

Les oeuvres morales et
philosophiques de Plutarque
, traduites de grec en
françois, par Messire Jacques
Amyot,....

Plutarque (0046?-0120?). Les oeuvres morales et philosophiques de Plutarque , traduites de grec en françois, par Messire Jacques Amyot,.... 1618.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus est libre et gratuite dans le respect de la législation en vigueur et notamment du maintien de la mention de source.
- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.
- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.

5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.

6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.

7/ Pour obtenir un document de Gallica en haute définition, contacter reutilisationcommerciale@bnf.fr.



LES OEUVRES MORALES ET PHILOSOPHIQUES DE PLUTARQUE,

*Translatées de Grec en François, par Messire JACQUES AMYOT, vicaire Euesque d'Auxerre,
Conseiller du Roy, & grand Aumosnier de France, & reuenës, corrigées, & augmentées
en ceste presente Edition en plusieurs passages, suivant son exemplaire.*

*Tous les Traictés desdites Oeuures contenus en deux Tomes, se voyent
incontinent apres l'Epistre: & à la fin vne Table tres-ample.*



A PARIS,

Chez CLAUDE MOREL, rue S. Jacques, à la Fontaine.

M. DC. XVIII.

AVEC PRIVILEGE DE SA MAIESTE.



AV ROY TRES-CHRESTIEN

CHARLES IX. DE CE NOM.



I vous prenez plaisir à porter Sceptres, et à seoir en Thrones royaux, dit Salomon, aimez la sapience à fin que vous regniez eternellement: aimez la lumiere de sapience, vous qui commandeZ aux peuples. C'est une belle instruction, Sire, et un sage aduertissement pour ceux à qui Dieu a mis en main les resnes du gouvernement de ce monde, leur estant adressé par un Roy, auquel Dieu donna iadis tant de sagesse, que iamaïs auparavant n'en auoit esté de semblable, ny iamaïs plus, dit l'Escripture, n'en sera de pareil. Car certainement sapience est prouision necessaire à ceux qui veulent regner, sans laquelle les Rois, quelques grands, quelques riches et puissans qu'ils soient, ne sont pas munis de ce qu'il leur faut, pour exercer dignement et maintenir seurement leur estat, et avec laquelle ils ont moyen d'estre honorez, et heureux en ce monde temporellement, et glorieux en l'autre eternellement, eux et ceux qui ont à viure sous leur obeissance, suiuant ce que dit la mesme sapience, Le sage Roy est l'establissement, l'appuy et assésuré fondement de son peuple. A quoy se raporte aussi naïuement, ainsi que toute verité s'accorde à toute verité, le dire de Platon. Que les Royaumes seront heureux quād les Philosophes regnerōt, ou que les Rois philosopherōt, c'est à dire, quand ils feront profession d'aimer la sapience: propos veritablement memorable, digne d'estre souuent recordé et profondement engraué és cœurs des Monarques et Roys, d'autant qu'en ce poinct-là principalemēt, à le bien prendre, gist et consiste la grandeur auguste de la Majesté Royale, et que c'est en quoy les Roys approchent plus pres, et ressemblent mieux à la diuinité, de pouuoir beatifier et rendre heureux, non une ville seulement, ou un païs particulier, ains tout un monde, par maniere de dire, selon l'estendue de leur Empire, n'ayant, la hauteſse de leur estat rien de meilleur que de vouloir, ny de plus grand que de pouuoir bien faire à une multitude innumerable de toutes sortes d'hōmes. Ory ayant en nostre ame deux principales puissances necessairemēt concurrentes à toute louable et vertueuse action, l'entendement et la volonté, l'un pour com-

Epistre au Roy.

prendre ce qu'il faut faire, et l'autre pour l'exécuter, sagesse est la perfection de toutes les deux, qui enlumine, sublime et affine le discours de la raison par la connoissance des choses, pour sçavoir discerner le vray du faux, le bien du mal, et le droit du tort, à fin de pouvoir bien iuger: et qui rectifie, regle et conduit la volonté pour luy faire aymer, elire et pourchasser l'un, hair, fuir et éviter l'autre. Ces deux perfections certainement sont graces singulieres de Dieu, et dons speciaux du saint Esprit, mais plus nécessaire celle de la volonté, qui n'est autre chose que la crainte de Dieu, et conscience craintive, et tremblante de peur de l'offenser, tant et si souvent recommandee par toute la sainte Escriture, qu'en plusieurs passages elle est honoree du tiltre et nom venerable de Sagesse, disant le bon Iob, Sagesse est la crainte du Seigneur Dieu: et l'intelligence, se garder de mal faire. Mais si elle est requise à toutes sortes de gens qui desirent traverser la tourmente de ceste vie sans mortel naufrage, beaucoup plus l'est-elle aux Princes souverains qu'à nuls autres, d'autant que les inferieurs et subiects, si d'adventure ils choppent quelquefois, trouvent assez qui les relèvent: mais les Roys qui ne recognoissent aucun superieur en ce monde, qui se disent estre par dessus les loix, et avoir plein pouvoir, puissance absolue, et autorité souveraine, s'ils ont envie de fourvoyer, qui les redressera? s'ils s'oublient, qui les corrigera? s'ils se laissent aller à leurs appetits, qui les en retiendra? Estant si difficile de tenir mesure et garder moyen en licence qui n'est point limitee, ainsi que tesmoigne ce proverbe ancien,

Celuy auquel ce qu'il veut loit,

Veult tousiours plus que ce qu'il doit.

Certainement il n'y aura rien que celuy qui est terrible, ce dit le Prophete Royal qui oste l'esprit et la vie aux Princes, qui transfere les Couronnes et Royaumes d'une gent à autre, pour les iniustices, abus, et diverses tröperies, ainsi que dit le Sage, lequel menace effroyablement les mauvais Princes au livre de Sagesse, en ces propres termes: La puissance et autorité que vous avez, vous a esté donnee de Dieu, lequel examinera voz ceuvres, et sondera voz cœurs: et pour ce que estans ministres de son regne vous n'avez pas bien iugé, vous n'avez pas gardé la loy de Iustice, ny n'avez pas cheminé selon sa volonté, il vous apparoitra horriblement, et bien tost, par ce qu'il se fera iugement tres-dur de ceux qui cōmandent: au petit se fera misericorde, mais les puissants seront tourmentez, puissamment. C'est la voix de Sagesse et de verité, Sire, qui deust continuellement sonner aux oreilles de tous Princes et Seigneurs, à fin qu'ils se donnassent bien garde de tomber en ce iugement, dont les peut guarentir et preserver ceste heureuse sagesse de la crainte de Dieu. Mais quel moyen y a-il de l'avoir? C'est luy seul qui la donne liberalement, et ne la plaint à personne qui la luy demande avec fermeté de viue foy. Et toutefois encor y a-il des moyens qui nous aident et nous

Epistre au Roy.

disposent à l'obtenir, cōme entre autres la lecture des saintes Lettres, qui semble estre l'estude propre d'un Roy Tres-Chrestien, suivant ceste sentence escrete en la Loy de Moysse : *Après que le Roy sera assis en son throne Royal, il transcrira le liure de ceste loy, dont il prendra l'original des mains des Presbtres Leuitiques, l'aura tousiours aupres de soy, et y lira tous les iours de sa vie, à fin qu'il en apprenne à craindre Dieu son Seigneur, à garder ses commandements, et les ceremonies contenues en sa Loy. Plus fructueuse ne plus salutaire estude ne pourroit-il faire, pourueu qu'il en prenne l'intelligence non du propre sens d'aucun particulier, mais de la tradition et consentement uniuersel de l'Eglise. C'est de tels liures proprement que le Prince Chrestien doit apprendre ceste genereuse et bien-heureuse crainte inspiree de l'esprit de Dieu, qui luy reigle et dirige sa volōté, la gardant de se desborder et vaguer en licence effrenee, luy enseignant de n'estimer pas que sa volōté absolue soit raison et iustice, ainsi que le flateur Anaxarchus donnoit iadis impudemment à entendre au Roy Alexandre le grand, pour luy faire passer le regret qu'il auoit de l'homicide par luy cōmis en la personne de Clytus, disant que Dicé et Themis, c'est à dire, droit et iustice, estoient les assesseurs et collateraux de Iupiter, pour signifier et dōner à entendre aux hōmes que tout ce qui est dit ou fait par le Prince, est iuste, legitime et droiturier : ains au contraire luy donne à cognoistre, qu'il doit estre sujet à la loy eternelle, royne des mortels et immortels, comme dit Pindarus, qui est la droite raison, verité et Iustice, propre volōté de Dieu seul, obeissant à laquelle il fera ne plus ne moins que la ligne et la reigle, laquelle estant premierement droite de soy mesme, dresse puis apres toutes autres choses qui sont gauches et tortues, en s'appliquant à elles : par ce que tout ainsi comme du chef sourdent et se deriuent les nerfs, instrumens du sentiment et du mouuement, et par iceux influe l'esprit animal en toutes les parties du corps humain, sans lequel il ne pourroit exercer aucune fonction naturelle de sentir ny de mouuoir : aussi void on ordinairement que par imitation et influence du desir de complaire, les sujets prennent les mœurs et conditions de leur Loy, suivant ce que dit un Poëte,*

Communement la suiette prouince,

Forme ses mœurs au moule de son Prince.

de maniere que s'il fait profession de craindre Dieu, d'estre sage et vertueux, il achemine par son exēple les principaux de ses sujets premierement, et puis les autres de main en main, à deuenir semblablement deuots enuers Dieu, iustes enuers les hommes, et consequemment bien-heureux : comme au contraire aussi depuis qu'il est ignorant et vicieux, il espend la contagion du vice et de l'ignorance par toutes les prouinces de son obeissance, ne plus ne moins qu'il est force que toutes les copies trāscrites d'un original defectueux ou depraué retiēnent les fautes du premier exemplaire. C'est pourquoy le grand Cyrus, celuy qui premier establit l'Em-

Epistre au Roy.

pire des Perses, (souloit dire, qu'il n'appartenoit à nul de commander s'il n'estoit meilleur que ceux ausquels il commandoit.) Cela mesmes vouloit aussi monstrier Osiris, qui fut iadis un sage Roy d'Egypte, portant pour sa devise le sceptre, dessus lequel il y auoit un œil, pour signifier la sapience qui doit estre en un Roy : n'appartenant pas à un qui fouruoie, de redresser : qui ne void goutte, de guider : qui ne sçait rien, d'enseigner : et qui ne veut obeyr à la raison, de commander. Ainsi que font les mal-aduisez, et pirement conseillez, Princes, qui refusent de recevoir les remonstrances de la raison, comme un maistre qui leur commande, de peur qu'elle ne leur retrenche ce qu'ils estiment le principal bien de leur grandeur, en les assuiettissant à leur deuoir, et les gardant de faire tout ce qu'il leur plaist : suivant ce que disoit le tyran de Sicile Dionysius, que le plus doux contentement qu'il receuoit de sa domination tyrannique estoit, que tout ce qu'il vouloit incontinent se faisoit. Car ce n'est pas vraye grandeur que de pouuoir tout ce que lon veut, mais bien de vouloir tout ce qu'on doit. Telle donc est la partie de Sapience où les Roys doiuent plus estudier, d'autant que seruir à Dieu est regner, et qu'ayans appris à craindre Dieu, ils sçauent ne craindre rien au demeurant, ains fouler aux pieds et mespriser tous les dangers et terreurs de ce monde : et au reste pour l'autre partie acquerir leur sert aussi grandement la cognoissance de l'antiquité, la lecture des histoires, et principalement les liures et discours de la philosophie morale, traitant des qualitez, loüables ou vituperables es mœurs des hommes, du gouuernement des estats, de l'origine des Royaumes, comment ils prennent leurs commencemens, qui les faict croistre et les maintient en leur entier, pour quelles causes ils diminuent, et qui leur aporte finale decadence et totale ruine. Ce sont les liures que Demetrius Phalerien, grand personnage et fort estimé en matiere d'estat et de gouuernement, conseilloit de lire sur tous autres au Roy d'Egypte Ptolomeus : (Pour ce, disoit-il, que tu y verras et apprendras beaucoup de fautes que tu commets en ton gouuernement, lesquelles tes familiers ne te veulent ou ne t'osent à l'auenture pas dire :) se trouuant tousiours assez de gens alentour des Princes, qui leur preschēt plustost la grandeur de leur pouuoir, que l'obligatiō de leur deuoir : là où ces maistres muets-là ne cherchent point à cōplaire, ains sans flatter representent naïfvement, comme dedans un miroier, quel est le bon Prince, quel est l'office d'un vray Roy : comme entre les autres est le liure de Xenophon qu'il a escrit de la vie de Cyrus, là où il a avec un gentil pinceau depeint de naïfues couleurs sous le nom de Cyrus, quel seroit un Roy s'il s'en trouuoit au monde de parfaict. Tels liures, d'autant qu'ils sont ornez de beau langage, enrichis d'exemples tirez de toute l'antiquité, et tissus de l'ingenieuse inuention d'hōmes sçauans qui ont visé à plaire ensemble et à profiter, entrent quelquefois avec plus de plaisir es oreilles delicatēs des Princes, que ne fait pas la sainte Escriture, qui pour sa simplicité, sans aucun ornement de langage, semble commander plustost imperieusement, que de suader gracieusement.

Et

Epistre au Roy.

Et pourtant seroit-il utile aux Princes de diuertir quelquefois leur entendement à la lecture de tels escrits, qui tendēt et cōduisent à mesme fin que les liures saints, c'est à sçauoir de rendre les hommes vertueux, mais par diuers moyens : ceux-là par la crainte de Dieu qui applique le loyer au merite, et la peine au demerite : et ceux-ci par la glorieuse renommee immortelle qu'ils promettent aux Princes vertueux, dont ils doivent estre plus desireux, que de la conseruation de leur propre vie : et l'infamie perdurable aussi dont ils menassent les vicieux, de tant plus mesmement que lon remarque iusques aux moindres choses, bonnes ou mauuaises, qui sont es mœurs des Princes, par ce que la hauteſſe de leur estat expose et met leur vie à la veuë de tout le monde. Si n'est pas l'estude d'un Roy de s'enfermer seul en vne estude, avec force liures, comme feroit vn homme priué, mais bien de tenir tousiours aupres de lui gens de sçauoir et de vertu, prendre plaisir à en deuiser et conferer souuent avec eux, mettre en auant tels propos à sa table, et en ses priuez passetemps, en ouyr volontiers lire et discourir : l'accoustumance lui en rend l'exercice peu à peu si agreable et si plaisant, qu'il trouue puis apres tous autres propos fades, bas et indignes de son exaucement, et si fait qu'en peu d'annees il deuiet sans peine bien instruit et sçauant es choses dont il a plus à faire en son gouuernement, suiuant la sentence de ce commun prouerbe des Grecs,

Les Roys sçauans deuiennent, quand ils ont

Tousiours pres d'eux des hommes qui le sont.

SuccedeZ doncques, Sire, à cette veritablemēt royale condition du feu Roy François premier, vostre grand pere, Prince de tres-auguste memoire, cōme vous auez fait à sa couronne, et à plusieurs autres belles et grandes qualitez, tant du corps que de l'esprit, d'aimer et aprocher de vous les personnes qui feront profession de lettres à bonnes enseignes, et qui auront vertu coniointe avec eminent sçauoir : aimez à discourir avec eux, et y employez tant de bonnes heures qui se perdent quelquefois inutilement. Car nous l'auons veu par le moyen de telle conference et communication deuenir l'un des plus sçauans hommes en toute liberale science et honneste litterature qui fust de son regne en la France, et sans contredit le plus eloquent. Ce que nous pouuons raisonnablement avec le temps esperer et nous promettre de vous sur les arres de la conoissance de plusieurs belles choses que vous auez ia acquises, et mesmement sur le liure que vous mettez presentement par escrit en beaux et bons termes touchant l'art de la venerie. Or ayant eu ce grand heur que d'estre mis aupres de vous dès vostre premiere enfance, que vous n'auiez gueres que quatre ans, pour vous acheminer à la conoissance de Dieu et des lettres, ie me mis à penser quels autheurs anciens seroient plus idoines et plus propres à vostre estat, pour vous proposer à lire quand vous serieZ venu en aage d'y pouuoir prendre quelque gouſt. Et pour ce qu'il me sembla qu'apres les saintes Lettres la plus belle et la plus digne lecture que lon sçauroit presenter à vn ieune Prince,

Epistre au Roy.

*est*oient les *Vies* de Plutarque, ie me mis à reuoir ce que i'en auois commencé à traduire en nostre langue par le commandement du feu grand Roy François, mon premier bien-facteur, que Dieu absolue, et paracheuay l'œuvre entier estant en vostre seruice il y a enuiron douze ou treize ans. Et en ayant esté la traduction assez bien receüe par tout où la langue François est entendüe, tant en ce Royaume que dehors, mesmement endroit vous qui depuis que l'aage et l'usage vous eurent apporté la suffisance de lire, et quelque iugement naturel, ne vouliez lire en autre liure : cela me donna des lors enuie de mettre aussi en vostre langue ses autres Oeuvres morales et philosophiques qui ont peu iusques à nos iours eschapper à l'enuie du temps, estant encore stimulé à ce faire par un Zele d'affection particuliere, pource que comme lon tient qu'il fut iadis precepteur de Traian, le meilleur des Empereurs qui furent oncques à Rome, aussi Dieu m'auoit fait la grace de l'auoir esté du premier Roy de la Chrestienté, que nature a doué d'autant de bonté que nul de ses predecesseurs : combien que ce fust entreprise trop hardie, à dire la verité, et presque temeraire, non seulement pour le peu de suffisance que ie reconois en moy, mais aussi pour l'obscurité du sujet en beaucoup de ses traittez philosophiques, ausquels il n'est pas possible, ou pour le moins bien difficile, de pouuoir donner grace et lumiere en nostre langue, et principalement pour la defectuosité, corruption et deprauation miserable qui se trouue presque par tout le texte original Grec. Toutesfoiſ le desir de faire chose à quoy vous prissiez plaisir, et qui fust profitable à vos sujets en public, m'a tenu en haleine et tellement excité, qu'à la fin i'en suis venu à bout tellement quellement, iusques à ce que par quelque bonne fortune un meilleur et plus entier exemplaire puisse tomber en mes mains, ou de quelque autre apres moy. Je laisseray iuger à la commune voix de ceux qui voudront prendre la peine de conſerer et examiner ma traduction sur le texte Grec, avec quel succez ie m'en seray acquitté : mais bien puis-ie dire en verité, que ç'a esté avec un labeur incroyable, pour suppleer, remplir ou corriger par coniecture fondee sur le long usage d'auoir tant et si longuement manié cest autheur par collation de plusieurs passages respondans l'un à l'autre, et de diuers vieux exemplaires escripts à la main, infinis lieux qui y sont desesperément estropiez et mutilez : ce que nul ne peut estimer, quel tourment d'esprit et quelle croix d'entendement c'est, qui ne l'a essayé : à fin de pouuoir faire sortir l'œuvre es mains des hommes, au moins en tel estat, que lon y peust prendre quelque plaisir et profit : ce que ie pense auoir fait, ayant estudié de le rendre le plus clair qu'il m'a esté possible, en si profonde obscurité bien souuent, et si scabreuse et raboteuse asperité presque par tout ordinairement. Mais si la varieté est delectable, la beauté aimable, la bonté loüable, l'utilité desirable, la rarité esmerueillable, et la grauité venerable, ie ne sçay point d'autheur profane, qui, à tout prendre ensemble, soit à preferer, non pas à conſerer, aux Oeuvres de Plutarque, mesme-


Epistre au Roy.

mesmement qui les pourroit auoir toutes, et en leur entier. Au demeurant, si i'ay par cette traduction mienne aucunement enrichi ou poli vostre langue, honoré vostre regne, et bien merité de vos sujets, et de tous ceux qui entendent le langage françois, loüange en soit à Dieu qui m'en a fait la grace: mais l'honneur et le gré du monde vous en sont deus, Sire, d'autāt que c'est pour vous que ie l'ay entrepris, et à vous seul ie le vouë et dedie, avec l'humble seruice de tout le reste de ma vie, le faisant sortir en public, sous la protection de vostre tres-noble nom, pour en quelque chose me monstrier reüonoissant de tant de biens, de faueurs et d'honneurs que vous m'avez faits de vostre grace, et me faictes iournellement: et aussi pour tesmoigner à la posterité, et à ceux qui n'ont pas cet heur de vous conoistre familièrement, que nostre Seigneur a mis en vous vne singuliere bonté de nature, encline d'elle mesme à aimer, honorer et estimer toutes choses vertueuses, mesmement les lettres, et ceux qui avec vertu ont trauaillé de les acquerir. Qui me fait estimer que si bien le commencement de vostre regne a esté fort turbulent et calamiteux, le progrès en sera plus heureux, si Dieu plaist, et la fin glorieuse: pourueu que vous vous affectionniez tousiours de plus en plus à aimer et pourchasser cette sainte Sapience discipline des Rois, en la demandant par chascun iour d'ardēte affection à celuy qui seul la peut donner, disant avec Salomon, Donne moy la Sapience qui assiste à ton throne: et avec le Prophete royal, Perce ma chair de ta crainte, à fin que ie redoute tes ingemens: demeurant à tousiours en l'union et obeissance de la sainte Eglise Catholique, dont vous estes le premier fils, et vous efforceant de retenir tousiours par tous vertueux et religieux deportemens le tiltre hereditaire de Roy Treschrestien que vos glorieux ancestres vous ont acquis. A tant ie finiray la presente par la deuote affectueuse oraison que fait le peuple fidele pour son bon Roy David, Nostre Seigneur vous vueille exaucer au iour de tribulation, le nom du Dieu de Iacob vous soit en protection, vous enuoye secours de son saint mont, et de Sion vous defende: se souuienne de tous vos sacrifices, et ait pour agreables vos offrandes: vous vueille donner ce que vostre cœur desire, et face ressortir tous vos conseils à bonne fin.

Vostre tres-humble, tres-obeissant & tres-obligé seruiteur & sujet
IACQUES AMYOT E. d'Auxerre, vostre grand Aumosnier




LES TRAICTEZ CONTENVS AV PREMIER TOME.

I.	 OMMENT il faut nourrir les enfans.	feuille 1.
II.	Comment il faut lire les Poëtes.	8
III.	Comment il faut ouyr.	24
IIII.	De la Vertu morale.	31
V.	Du vice & de la vertu.	38
VI.	Que la vertu se peut enseigner.	39
VII.	Comment on pourra discerner le flatteur d'auec l'amy.	39
VIII.	Comment il fault refrener la cholere;	55
IX.	De la Curiosité.	63
X.	Du contentement ou repos de l'esprit.	67
XI.	De la mauuaise honte.	76
XII.	De l'amitie fraternelle.	81
XIII.	Du trop parler.	89
XIV.	De l'auarice & conuoitise d'auoir.	97
XV.	De l'amour & charité naturelle des peres enuers leurs enfans.	100
XVI.	De la pluralité d'amis.	103
XVII.	De la Fortune.	105
XVIII.	De l'enuie & de la haine.	107
XIX.	Comment on pourra receuoir vtilité de ses ennemis.	109
XX.	Comment on pourra apperceuoir si lon amende en l'exercice de la vertu	113
XXI.	De la superstition.	119
XXII.	Du Bannissement.	124
XXIII.	Qu'il ne faut point emprunter à vsure.	130
XXIV.	Qu'il faut qu'un Philosophe conuerse avec les Princes.	133
XXV.	Qu'il est requis qu'un Prince soit sçauant.	135
XXVI.	Que le vice est suffisant pour rendre l'homme malheureux.	137
XXVII.	Comment on se peut louer soy mesme sans reprehension.	138
XXVIII.	Quelles passions sont les pires, celles de l'ame ou celles du corps.	144
XXIX.	Les Preceptes de Mariage.	145
XXX.	Le Banquet des sept Sages.	150
XXXI.	Instruction pour ceux qui manient affaires d'estat.	161
XXXII.	Si l'homme d'aage se doit mesler d'affaires publiques.	178
XXXIII.	Les dictz notables des anciens Roys, Princes & grands Capitaines.	188
XXXIV.	Les dictz notables des Lacedemoniens.	209
XXXV.	Les vertueux faictz des femmes.	229
XXXVI.	Consolation enuoyee à Apollonius sur la mort de son fils.	242
XXXVII.	Consolation enuoyee à sa femme, sur la mort de sa fille.	255
XXXVIII.	Pourquoy la Iustice diuine differe quelque-fois la punition des male- fices.	258
XXXIX.	Que les bestes brutes vsent de la raison.	269
XL.	Si il est loisible de manger chair, Traicté premier. Traicté second.	274 276
XLI.	Que lon ne sçauoit viure ioyeusement selon Epicurus.	277

XLII.	Si ce mot commun est bien dit, Cache ta vie.	291
XLIII.	Les Regles & preceptes de Santé.	292
XLIV.	De la Fortune des Romains.	301
XLV.	De la Fortune ou vertu d'Alexandre. Traicté premier. Traicté second.	307 311
XLVI.	D'Isis & d'Osiris.	318
XLVII.	Des Oracles qui ont cessé.	335
XLVIII.	Que signifie ce mot Ei.	352

Les Traictez du second Tome.

XLIX.	 Es Propos de Table.	359
L.	Les Opinions des Philosophes.	439
LI.	Les Demandes des choses Romaines.	460
LII.	Les Demandes des choses Grecques.	478
LIII.	Collation abregee d'aucunes histoires.	485
LIV.	Les Vies des dix Orateurs.	492
LV.	De trois sortes de gouvernement.	503
LVI.	Sommaire de la Comparailon d'Aristophanes & de Menander.	504
LVII.	Estranges Accidents aduenus pour l'amour.	505
LVIII.	Quels Animaux sont les plus aduisez.	507
LIX.	Si les Atheniens ont esté plus excellents en armes qu'en lettres.	523
LX.	Lequel est plus vtile, le feu, ou l'eau.	527
LXI.	Du premier froid.	528
LXII.	Les Causes naturelles.	534
LXIII.	Les Questions Platoniques.	539
LXIV.	De la creation de l'Ame.	546
LXV.	De la fatale Destinee.	556
LXVI.	Que les Stoïques disent des choses plus estranges que les Poëtes.	559
LXVII.	Les Contrediets des Philosophes Stoïques.	560
LXVIII.	Des communes Conceptions contre les Stoïques.	573
LXIX.	Contre l'Epicurien Colotes.	588
LXX.	De l'Amour.	599
LXXI.	De la face qui apparoist au rond de la Lune.	613
LXXII.	Pourquoy la prophetisse Pythie ne rend plus les oracles en vers.	627
LXXIII.	De l'esprit familier de Socrates.	635
LXXIV.	De la malignité d'Herodote.	648
LXXV.	De la Musique.	660

Traictez adioustez.

LXXVI.	Des Fleuves & montagnes & des choses rares qui s'y trouuent.	668
LXXVII.	Recueil de diuerfes preuues & argumens qui enseignent que les disciplines sont recordations.	675
LXXVIII.	De l'Amour & de ses effects.	ibidem.



LES OEUVRES MORALES
DE PLUTARQUE,
Traduites de Grec en François.

COMMENT IL FAUT NOUR-
RIR LES ENFANS.

A **D**OVR bien traiter de la nourriture des enfans de bonne maison, & de libre condition; comment, & par quelle discipline on les pourroit rendre honnestes & bien conditionnez; à l'adventure vaudra-il mieux commencer vn peu plus hault; à la generation d'iceux. En premier lieu doncques, ie conseilerois à ceux qui desirent estre peres d'enfans, qui puissent vn iour viure parmy les hommes en honneur de ne se meller pas avec femmes les premieres venuës, i'entens comme avec courtisanes publiques, ou concubines priuées: pour ce que c'est vn reproche qui accompagne l'homme tout le long de sa vie, sans que iamais il le puisse effacer, quand on luy peut mettre deuant le nez, qu'il n'est pas issu de bon pere & de bonne mere, & est la marque qui plustost se presente à la langue & à la main de ceux qui le veulent accuser ou iniurier: au moyen dequoy a bien dit sagement le poëte Euripide,

Quand vne fois mal assis a esté

Le fondement de la natiuité,

C Force est que ceux qui de tels parents sortent,
D'autrui peché la penitence portent.

Parquoy c'est vn beau thresor pour pouuoir aller par tout la teste leuée, & parler franchement, que d'estre né de gens de bien: & en doiuent bien faire grand compte ceux qui souhaitent auoir lignée entièrement legitime, où il n'y ait que redire. Car c'est chose qui ordinairement raualle & abaisse le cœur aux hommes, quand ils sentent quelque defectuosité, ou quelque tare en ceux dont ils ont pris naissance: & dit fort bien le poëte,

D Qui sent son pere ou sa mere coupable
D'aucune chose à l'homme reprochable,
Cela de cœur bas & petit le rend,
Combien qu'il l'eust de sa nature grand.

Comme au contraire, ceux qui se sentent nez de pere & de mere qui sont gens de bien, & à qui lon ne peut rien reprocher, en ont le cœur plus eleué, & en conçoient plus de generosité. Auquel propos on dit que Diophantus le fils de Themistocles disoit souuentefois & à plusieurs, que ce qui luy plaisoit, plaisoit aussi au peuple

En la Tragedie d'Hercules fureux

Eurip. en la Tragedie d'Hippolyte.

Comment il faut nourrir les enfans.

„ d'Athens: Car ce que ie veux (disoit il) ma mere le veut: & ce que ma mere veut, aussi E
 „ fait Themistocles: & ce qui plaist à Themistocles, plaist aussi aux Atheniens. Et
 en cela fait aussi grandement à louer la magnanimité des Lacedæmoniens, lesquels
 condamnerent leur Roy Archidamus en vne somme d'argent, pour l'amende de ce
 „ qu'il auoit eu le cœur d'espouser vne femme de petite stature, en y adioustant la
 „ cause pour laquelle ils le condamnoient: Pour autant (disoient ils) qu'il a pensé de
 „ nous engendrer non des Roys, mais des Royetelets. A ce premier aduertissement est
 conioint vn autre, que ceux qui parauant nous ont écrit de semblable matiere
 n'ont pas oublié: c'est, Que ceux qui se veulent approcher de femmes pour engen-
 drer, le doiuent faire où du tout à ieun, auant que d'auoir beu vin, ou pour le moins
 apres en auoir pris bien sobrement. Pour ce que ceux qui ont esté engendrez de
 peres saouls & yures, deuiennent ordinairement yurongnes: suyuant ce que Dioge-
 „ nes respondit vn iour à vn ieune homme desbauché & desordonné: Ieune fils mon
 „ amy, ton pere t'a engendré estant yure. Cela suffise quant à la generation des en- F
 fans. Au reste, quant à la nourriture, ce que nous auons accoustumé de dire ge-
 neralement en tous arts & toutes sciences, cela se peut encore dire & asseurer de la
 „ vertu: c'est, Que pour faire vn homme parfaitement vertueux, il faut que trois
 „ choses y soient concurrentes, la nature, la raison, & l'usage. I'appelle raison la do-
 ctrine des preceptes: & usage, l'exercitation. Le commencement nous vient de la na-
 ture, le progres & accroissement, des preceptes de la raison: & l'accomplissement,
 de l'usage & exercitation: & puis la cime de perfection, de tous les trois ensemble.
 S'il y a defectuosité en aucune de ces trois parties, il est force que la vertu soit aussi
 en cela defectueuse & diminuée: car la nature sans doctrine & nourriture est vne
 chose auetue, la doctrine sans nature est defectueuse, & l'usage sans les deux pre-
 mieres est chose imparfaite. Ne plus ne moins qu'au labourage, il faut premiere-
 ment que la terre soit bonne: secondement, que le laboureur soit homme entendu:
 „ & tiercement, que la semence soit choisie & eleue: aussi la nature represente la terre, G
 le maistre qui enseigne ressemble au laboureur, & les enseignements & exemples re-
 uiennent à la semence. Toutes lesquelles parties i'oserois bien pour certain asseu-
 rer auoir esté coniointes ensemble es ames de ces grands personages qui sont tant
 celebres & renommez par tout le monde, comme Pythagoras, Socrates, Platon,
 & autres semblables, qui ont acquis gloire immortelle. Or est bien-heureux celuy-
 là, & singulierement aimé des Dieux, à qui le tout est ottroyé ensemble: mais pour-
 tant il y a quelqu'un qui pense, que ceux qui ne sont pas totalement bien nez, estans
 secourus par bonne nourriture & exercitation à la vertu, ne puissent aucunement
 reparer & recouurer le defect de leur nature: sçache qu'il se trompe & se mesconte
 de beaucoup, ou pour mieux dire, de tout en tout: car paresse aneantit & corrompt
 „ la bonté de nature, & diligence de bonne nourriture en corrige la mauuaistie. Ceux
 „ qui sont nonchalans ne peuuent pas trouuer les choses mesmes qui sont faciles: & H
 „ au contraire, par soing & vigilance lon vient à bout de trouuer les plus difficiles.
 Et peut-on comprendre combien le labeur & la diligence ont d'efficace & d'execu-
 tion, en considerant plusieurs effects qui se font en nature: car nous voyons que
 les gouttes d'eau qui tombent dessus vne roche dure, la creusent: le fer & le cuyure
 se vont vstant & consumant par le seul attouchement des mains de l'homme: & les
 rouës des chariots & charrettes que lon a courbées à grand' peine, ne sçauroient
 plus retourner à leur premiere droiture, quelque chose que lon y sçeuft faire, com-
 me aussi seroit-il impossible de redresser les bastons tortus que les ioueurs portēt en
 leurs mains dessus les eschaffaux: tellement que ce qui est contre nature changé par
 force & labeur, deuiant plus fort que ce qui estoit selon nature. Mais ne voit-on
 qu'en cela seulement, combien peut le soing & la diligence? Certainement il y a
 vn nom-

Similitude
 prise du la-
 bourage.

A vn nombre infiny d'autres choses, esquelles on le peut clairement appercevoir. Vne bonne terre, à faute d'estre bien cultiuee, deuient en friche: & de tant plus qu'elle est grasse & forte de soy-mesme, de tant plus se gaste elle par negligence d'estre bien labouree: au contraire vous en verrez vne autre dure, aspre, & pierreuse plus qu'il ne seroit de besoin, qui neantmoins, pour estre bien cultiuee, porte incontinent de beau & bon fruit. Qui sont les arbres qui ne naissent tortus, ou qui ne deuiennent steriles & sauages, si lon n'y prend bien garde? à l'opposite aussi, pourueu que lon y ait l'œil, & que lon y employe telle sollicitude comme il appartient, ils deuiennent beaux & fertiles. Qui est le corps si robuste & si fort, qui par oyssiueté & delicatesse n'aïlle perdant sa force, & ne tombe en mauuaise habitude? & qui est la complexion si debile & si foible qui par continuation d'exercice & de travail ne se fortifie à la fin grandement? Y a il cheuaux au monde, fils sont bien domtez & dressez de ieunesse, qui ne deuiennent en fin obeissans à l'homme pour monter dessus? au contraire, si lon les laisse sans domter en leurs premiers ans, ne deuiennent ils pas farouches & reuesches pour toute leur vie, sans que iamais on en puisse tirer seruice? & de cela ne se faut-il pas esmerueiller, veu qu'avec soing & diligence lon appruiuise, & rend on domestiques les plus sauages & les plus cruelles bestes du monde. Pourtant respondit bien le Thessalien, à qui lon demandoit „ qui estoient les plus fots & les plus lourdaux entre les Thessaliens: ceux, dit-il, qui „ ne vont plus à la guerre. Quel besoin doncques est-il de discourir plus longuement sur ce propos? car il est certain, que les meurs & conditions sont qualitez qui s'impriment par long traict de temps: & qui dira que les vertus morales s'acquirent aussi par accoustumance, à mon aduis il ne se fouruoyera point. Parquoy ie feray fin au discours de cest article, en y adioustant encore vn exemple seulement: Lycurgus, celuy qui establit les loix des Lacedæmoniens, prit vn iour deux ieunes chiens nez de mesme pere & de mesme mere, & les nourrit si diuersement, qu'il en

C rendit l'un gourmand & goulou, ne sçachant faire autre chose que mal: & l'autre bon à la chasse, & à la queste: puis vn iour que les Lacedæmoniens estoient tous assemblez sur la place, en conseil de ville, il leur parla en ceste maniere: C'est chose „ de tresgrande importance, Seigneurs Lacedæmoniens, pour engendrer la vertu au „ cœur des hommes, que la nourriture, l'accoustumance, & la discipline, ainsi com- „ me ie vous feray voir & toucher au doigt tout à ceste heure. En disant cela il amena deuant toute l'assistance les deux chiens, leur mettant au deuant vn plat de soupe, & vn lieure vif: l'un des chiens s'en courut incontinent apres le lieure, & l'autre se ietta aussi tost sur le plat de soupe. Les Lacedæmoniens n'entendoient point encore où il vouloit venir, ne que cela vouloit dire, iusques à ce qu'il leur dit: Ces deux chiens sont nez de mesme pere & de mesme mere, mais ayans esté nourris diuersement, l'un est deuenu gourmand & l'autre chasseur. Cela doncques suffise

D quand à ce poinct de l'accoustumance, & de la diuersité de nourriture. Il ensuit apres de parler touchant la maniere de les alimenter & nourrir apres qu'ils sont nez. Ie dis doncques, qu'il est besoing que les meres nourrissent de lait leurs enfans, & qu'elles mesmes leur donnent la mammelle: car elles les nourriront avec plus d'affection, plus de soing & de diligence, comme celles qui les aimeront plus du dedans, & comme lon dit en commun prouerbe, des les tendres ongles: là où les nourrices & gouuernantes n'ont qu'une amour supposee & non naturelle, comme celles qui aiment pour vn loyer mercenaire. La nature mesme nous monstre, que les meres sont tenues d'allaiter & nourrir elles mesmes ce qu'elles ont enfanté: car à ceste fin a elle donné à toute sorte de beste qui fait des petits, la nourriture du lait: & la sage Prouidence diuine a donné deux tetins à la femme, à fin que si d'aduenture elle vient à faire deux enfans iumeaux, elle ait deux fontaines de lait

Exemple notable de Lycurgus.

Comment il faut nourrir les enfans.

pour pouuoir fournir à les nourrir tous deux. Il y a d'auantage, qu'elles mesmes en E
auront plus de charité & plus d'amour enuers leurs propres enfans, & non sans grâde
raison certes: car le auoir esté nourris ensemble est comme vn lien estrainct, ou
vn tour qui roidit la bienueillance: tellement que nous voyons iusques aux bestes
brutes, qu'elles ont regret quand on les separe de celles avec qui elles ont esté nour-
ries. Ainsi doncques faut-il que les meres propres, si est possible, essayent de
nourrir leurs enfans elles mesmes: ou si ne leur est possible, pour aucune imbecil-
lité ou indisposition de leurs personnes, comme il peut bien aduenir, ou pour ce
qu'elles ayent enuie d'en porter d'autres: à tout le moins faut-il auoir l'œil à choisir
les nourrices & gouuernantes, non pas prendre les premieres qui se presenteront,
ains les meilleures que faire se pourra: qui soient premierement Grecques, quant
aux meurs. car ne plus ne moins qu'il faut dès la naissance dresser & former les mem-
bres des petits enfans, à fin qu'ils croissent tous droits, & non tortus ne contre-
faicts: aussi faut-il dès le premier commencement accoustre & former leurs meurs, F
pour ce que ce premier aage est tendre, & apte à receuoir toute sorte d'impression
que lon luy veut bailler, & s'imprime facilement ce que lon veut en leurs ames pen-
dant qu'elles sont tendres: là où toute chose dure malaiseement se peut amollir:
car tout ainsi que les seaux & cachets s'impriment aiseement en de la cire molle,
aussi se moulent facilement es esprits des petits enfans toutes choses que lon leur
veut faire apprendre. A raison dequoy, il me semble que Platon admoneste pru-
demment les nourrices, de ne conter pas indifferemment toutes sortes de fables
aux petits enfans, de peur que leurs ames dès ce commencement ne s'abreuuent de
folle & de mauuaise opinion: & aussi conseille sagement le poëte Phocylides, quand
il dit,

Sur la fin du
2. de la Rep.

Au Poëme
touchant les
meurs.

Dés que l'homme est en sa premiere enfance,
Monstrer luy faut du bien la cognoissance.

Et si ne faut pas oublier, que les autres ieunes enfans, que lon met avec eux pour les G
seruir ou pour estre nourris quant & eux, soient aussi deuant toutes choses bien con-
ditionnez, & puis Grecs de nation, & qui ayent la langue bien deliée pour bien
prononcer: de peur que si ils frequentent avec des enfans barbares de langues, ou
vieux de meurs, ils ne retiennent quelque tache de leurs vices: car les vieux pro-
uerbes ne parlent pas sans raison quand ils disent, Si tu conuerses avec vn boitteux,
tu apprendras à clocher. Mais quand ils seront arriuez à l'aage de deuoir estre mis
sous la charge de pedagogues & de gouuerneurs, c'est lors que peres & meres doi-
uent plus auoir l'œil à bien regarder, quels seront ceux à la conduite desquels ils
les commettront, de peur qu'à faute d'y auoir bien prins garde, ils ne mettent leurs
enfans en mains de quelques esclaves barbares, ou escleruelez & volages. Car c'est
chose trop hors de tout propos ce que plusieurs font maintenant en cest endroit,
car si ils ont quelques bons esclaves, ils en font les vns laboureurs de leurs terres, les H
autres patrons de leurs nauires, les autres facteurs, les autres receueurs, les autres
banquiers pour manier & traffiquer leurs deniers: & si ils en trouuent quelqu'un qui
soit yuongne, gourmand & inutile à tout bon seruice, ce sera celuy auquel ils com-
mettront leurs enfans: là où il faut qu'un gouuerneur soit de nature tel, comme
estoit Phoenix le gouuerneur d'Achilles. Encore y a il vn autre poinct plus grand,
& plus important que tous ceux que nous auons alleguez, c'est qu'il leur faut cher-
cher & choisir des maistres & des precepteurs qui soient de bonne vie, où il n'y ait
que reprendre, quant à leurs meurs, & les plus sçauants & plus experimentez que
lon pourra recouurer: car la source & la racine de toute bonté & toute preudhom-
mie est, auoir esté de ieunesse bien instruit. Et ne plus ne moins que les bons iar-
diniers, fichent des pax, aupres des ieunes plantes, pour les tenir droites: aussi les
sages

A sages maistres plantent de bons aduertissemens & de bons preceptes à l'entour des cunes gents, à fin que leurs meurs se dressent à la vertu. Et au contraire, il y a maintenant des peres qui meriteroient qu'on leur crachast, par maniere de dire, au visage, lesquels par ignorance, ou à faute d'experience, commettent leurs enfans à maistres dignes d'estre reprouvez, & qui à faulx enseignes font profession de ce qu'ils ne sont pas: & encore la faute & la mecqquerie plus grande qu'il y a en cela, n'est pas quand ils le font à faute de cognoissance: mais le comble d'erreur gist en cela, que quelquefois ils cognoissent l'insuffisance, voire la meschanceté de tels maistres, mieux qui ne font ceux qui les en aduertissent, & neantmoins se fient en eux de la nourriture de leurs enfans: faisans tout ainsi comme si quelqu'un estant malade, pour gratifier à un sien amy, laissoit le medecin sçauant qui le pourroit guarir, pour en prendre un qui par son ignorance le feroit mourir: ou si à l'appetit d'un sien amy il reiettoit un pilote qu'il sçauoit tresexpert, pour en choisir un

B tres-insuffisant. O Iupiter & tous les Dieux, est-il bien possible qu'un homme aiant le nom de pere aime mieux gratifier aux prieres de ses amis, que bien faire instituer ses enfans? N'auoit doncques pas l'ancien Crates occasion de dire souuent, que si luy eust esté possible, il eust volontiers monté au plus haut de la ville, pour crier à pleine teste: O hommes, où vous precipitez vous, qui prenez toute la peine que vous pouuez pour amasser des biens, & ce pendant ne faites compte de voz enfans, à qui vous les deuez laisser? A quoy i'adiousterois volontiers, que ces peres la font tout ainsi, que si quelqu'un auoit grand soing de son soulier, & ne se soucioit point de son pied. Encore y en a il qui sont si auaricieux, & si peu aimants le bien de leurs enfans, que pour payer moins de salaire ils leur choisissent des maistres qui ne sont d'aucune valeur, cherchans ignorance à bon marché: auquel propos Aristippus se mocqua un iour plaisamment & de bonne grace d'un semblable pere, qui n'auoit ne sens ny entendement: car comme ce pere luy demanda, combien il vouloit auoir pour luy instruire & enseigner son fils, il luy respondit, Cent escus.

Cent escus, dit le pere, ô Hercules, c'est beaucoup: comment i'en pourrois acheter un bon esclau de ces cent escus. Il est vray, respondit Aristippus, & en ce faisant tu auras deux esclaves, ton fils le premier, & puis celui que tu auras acheté. Et quel propos y a il, que les nourrisles accoustument les enfans à prendre la viande qu'on leur baille, avec la main droite: & fils la prennent de la main gauche qu'elles les en reprennent: & ne donner point d'ordre qu'ils ayent de bonnes & sages instructions? Mais aussi qu'en aduient il puis apres à ces bons peres la, quand ils ont mal nourry, & pis enseigné leurs enfans? Le le vous diray. Quand ils sont paruenus à l'aage d'homme, ils ne veulent point ouïr parler de viure reglement ny en gens de bien, ains se ruent en sales, vilaines & seruiles voluptez: & lors tels peres se repentent trop tard à leur grand regret, d'auoir ainsi passé en nonchaloir la nourriture &

D instruction de leurs enfans: mais c'est pour neant, quand il ne sert plus de rien, & que les fautes que iournellement commettent leurs enfans, les font languir de regret. Car les vns s'accompagnent de flatteurs & de plaisans poursuuians de repcues franches, hommes maudits & meschans, qui ne seruent que de perdre, corrompre & gaster la ieunesse: les autres achettent à gros deniers des garçons folles, fieres, sumptueuses & superflues en despence, qui leur coustent puis apres infiniment à entretenir: les autres consument tout en despence de bouche: les autres à iouer aux dez, & à faire masques & mommeries: aucuns y en a qui se iettent en d'autres vices plus hardis, faisant l'amour à des femmes mariees, & allans la nuit pour comettre adulteres, achetans un seul plaisir bien souuent avec leur mort: là où fils eussent esté nourris par quelque philosophe, ils ne se fussent pas laissez aller à semblables choses, ains eussent à tout le moins entendu l'advertissement de Diogenes, lequel disoit en paroles peu

Comment il faut nourrir les enfans.

» honnestes, mais veritables toutefois: Entre en vn bordeau, à fin que tu cognoisses, E
 » que le plaisir qui ne coûte gueres ne differe rien de celuy que lon achette bien chere-
 » ment. Je concluray doncques en somme, & me semble que ma conclusion à bon
 droit deura estre plustost estimée vn oracle, que non pas vn aduertissement: Quele
 commencement, le milieu, & la fin, en ceste matiere, gist en la bonne nourriture &
 bonne institution: & qu'il n'est rien qui tant serue à la vertu & à rendre l'homme
 bien heureux, comme faict cela. Car tous autres biens aupres de celuy la sont petits,
 & non dignes d'estre si soigneusement recherchez ny requis. La Noblesse est belle
 chose, mais c'est vn bien de noz ancestres. Richesse est chose precieuse, mais qui gist
 en la puissance de Fortune, qui l'oste bien souuent à ceux qui la possedoient, & la
 donne à ceux qui point ne l'esperoient. C'est vn but où tirent les coupe-bourses,
 les larrons domestiques, & les calomniateurs: & f'y a des plus meschans hommes
 du monde qui bien souuent y ont part. Gloire est bien chose venerable, mais in-
 certaine & muable: Beauté est bien desirable, mais de peu de durée: Santé, chose F
 precieuse, mais qui se change facilement. Force de corps est bien souhaitable, mais
 aisée à perdre, ou par maladie, ou par vieillesse: de maniere que fil y a quelqu'un qui
 se glorifie en la force de son corps, il se deçoit grandement: car qu'est-ce de la for-
 ce corporelle de l'homme aupres de celle des autres animaux, i'entens comme des
 Elephans, des Taureaux, & des Lions? Et au contraire, le sçauoir est la seule qualité
 diuine & immortelle en nous. Car il y a en toute la nature del'homme deux par-
 ties principales, l'entendement, & la parole: dont l'entendement est comme le mai-
 stre qui commande, & la parole comme le seruiteur qui obeit: mais cest entende-
 ment n'est point exposé à la fortune: il ne se peut oster à qui l'a, par calomnie: il ne
 se peut corrompre par maladie, ny gaster par vieillesse, pour ce qu'il n'y a que l'en-
 tendement seul qui raieunisse en vieillissant: & la longueur du temps, qui diminue
 toutes choses, adiousté tousiours sçauoir à l'entendement. La guerre, qui comme G
 vn torrent entraine & dissipe toutes choses, ne sçauoit emporter le sçauoir. Et me
 semble que Stilpon le Megarien fait vne responce digne de memoire, quand Deme-
 trius aiant pris & saccagé la ville de Megare luy demanda, s'il auoit rien perdu du
 sien: Non, dit-il: car la guerre ne sçauoit piller la vertu. A laquelle responce s'accor-
 » de & se rapporte aussi celle de Socrates, lequel estant interrogé par Gorgias, ce me
 » semble, quelle opinion il auoit du grand Roy, fil l'estimoit pas bien-heureux: Je
 » ne sçay, respondit-il, comment il est proueu de sçauoir & de vertu. comme esti-
 mant que la vraye felicité consiste en ces deux choses, non pas és biens caduques de
 la fortune. Mais comme ie conseille & admoneste les peres, qu'ils n'ayent rien plus
 cher, que de bien faire nourrir & instituer en bonnes meurs & bonnes lettres leurs
 enfans: aussi di-je, qu'il faut bien qu'ils ayent l'œil à ce que ce soit vne vraye, pure &
 sincere litterature: & au demourant, les esloigner le plus qu'ils pourront de ceste va-
 nité, de vouloir apparoir deuant vne commune: pour ce que plaire à vn populace H
 est ordinairement desplaire aux sages: dequoy Euripide mesmes porte tesmoignage
 de verité en ces vers,

En la Tra-
 gœdie d'Hip-
 polyte.

Langue ie n'ay diserte & affilee
 Pour harenguer deuant vne assemblée:
 Mais en petit nombre de mes egaux,
 C'est là où plus à deuiser ie vaux:
 Car qui sçait mieux au gré du peuple dire,
 Est bien souuent entre sages le pire.

Quant à moy, ie voy que ceux qui s'estudient de parler à l'appetit d'une commune
 ramassée, sont ou deuient ordinairement hommes dissolus, & abandonnez à
 toutes sensuelles voluptez: ce qui n'est pas certainement sans apparence de raison:
 car si

- A car si pour plaire aux autres ils mettent à nonchaloir l'honnesteté, par plus forte raison oublieront ils tout honneur & tout deuoir, pour se donner plaisir & deduit à eux mesmes, & suiuront plus tost les attraits de leur concupiscence, que l'honnesteté de la temperance. Mais au reste, qu'enseignerons nous de bon encore aux ieunes enfans, & à quoy leur conseillerons nous de s'addonner? C'est belle chose, que ne faire ne dire rien temerairement: Et, comme dit le Prouerbe ancien, Ce qui est beau est difficile aussi. Les oraisons faites à l'improuueu sont pleines de grande nonchalance, & y a beaucoup de legereté: car ceux qui parlent ainsi à l'estourdie ne sçauent là où il fault commencer, ny là où ils doiuent acheuer: & ceux qui s'accoustument à parler ainsi de toutes choses promptement à la volée, outre les autres fautes qu'ils commettent, ils ne sçauent garder mesure ny moien en leur propos, & tombent en vne merueilleuse superfluité de langage: là où quand on a bien pensé à ce que lon doit dire, on ne sort iamais hors des bornes de ce qu'il appartient de deduire. Pericles, ainsi comme nous auons entendu, bien souuent qu'il estoit expressement appellé par son nom, pour dire son aduis de la matiere qui se presentoit, ne se vouloit pas leuer, disant pour son excuse, Je n'y ay pas pensé. Demosthenes semblablement grand imitateur de ses façons de faire au gouuernement, plusieurs fois que le peuple d'Athenes l'appelloit nommément pour ouïr son conseil sur quelque affaire, leur respondit tout de mesme, Je ne suis pas préparé. Mais on pourroit dire à l'adventure, que cela seroit vn conte fait à plaisir, que lon auroit receu de main en main, sans aucun resmoignage certain: luy mesme en l'oraison qu'il feit alencontre de Midias, nous met deuant les yeux l'vtilité de la premeditation: car il y dit en vn passage, Je confesse, Seigneurs Atheniens, & ne veux point dissimuler que ie n'aye pris peine & trauaillé à composer ceste harengue, le plus qu'il m'a esté possible: car ie serois bien lasche, si aiant souffert & souffrant tel outrage, ie ne pensois bien soigneusement à ce que i'en deurois dire pour en auoir la raison. Non que ie veuille de tout poinct condamner la promptitude de parler à l'improuueu, mais bien l'accoustumance de l'exerciter à tout propos, & en matiere qui ne le merite pas: car il le fault faire quelquefois, prouueu que ce soit comme lon vse d'vne medecine: bien diray- ie cela, qui ie ne voudrois point que les enfans, auant l'aage d'homme fait, s'accoustumassent à rien dire sans y auoir premierement bien pensé: mais apres que lon a bien fondé la suffisance de parler, alors est-il bien raisonnable, quand l'occasion se presente, de lascher la bride à la parole. Car tout ainsi comme ceux qui ont esté longuement enferrez par les pieds, quand on vient à les deslier, pour l'accoustumance d'auoir eu si longuement les fers aux pieds, ne peuuent marcher, ains choppent à tous coups: aussi ceux qui par long temps ont tenu leur langue scree, si quelquefois il foffre matiere de la deslier à l'improuueu, retiennent vne mesme forme & vn mesme style de parler: mais de souffrir les enfans harenguer promptement à l'improuueu, cela les accoustume à dire vne infinité de choses impertinentes & vaines. Lon dit que quelquefois vn mauuais peintre monstra à Apelles vne image qu'il venoit de peindre, en luy disant: Je la viens de peindre tout maintenant. Encore que tu ne me l'eusses point dit, respondit Apelles, i'eusse bien cogneu qu'elle a voyrement esté bien tost peinte: & m'esbahy cōment tu n'en as peint beaucoup de telles. Tout ainsi doncques (pour retourner à mon propos) comme ie conseille d'euer la façon de dire theatrale & pompeuse, tenant de la haultesse tragique: aussi admoneste- ie de fuir la trop basse & trop vile façon de langage, pour ce que celle qui est si fort enflée surpasse le commun vsage de parler: & celle qui est si mince & si seiche, est par trop craintifue. Et comme il fault que le corps soit non seulement sain, mais d'auantage en bon point: aussi faut il que le langage soit non seulement sans vice ne maladie, mais aussi fort & robuste: pource que lon louë seulement ce qui est seur, mais on admire

Comment il faut nourrir les enfans.

ce qui est hardy & aduenteux. Et ce que ie dis du parler, autant en pense-je de la E disposition du courage: car ie ne voudrois que l'enfant fust presumptueux, ny aussi estonné, ne par trop craintif: pource que l'un se tourne à la fin en impudence, & l'autre en couardise seruile: mais la maistrise en cela, comme en toutes choses, est de bien sçauoir tenir le milieu. Et ce pendant que ie suis encore sur le propos de l'institution des enfans aux lettres, auant que passer outre, ie veux dire absolument ce qui m'en semble: c'est, que de ne sçauoir parler que d'une seule chose, à mon aduis, est vn grand signe d'ignorance, outre ce qu'à l'exercer on s'en ennuye facilement: & si pense qu'il est impossible de tousiours y perseverer: ne plus ne moins que de chanter tousiours vne mesme chanson, on s'en saoule & s'en fasche bien tost: mais la diuersité resiouit & delecte en cela, comme en toutes autres choses, que lon voit, ou que lon oit. Et pourtant faut il que l'enfant de bonne maison voye & apprenne de tous les arts liberaux & sciences humaines, en passant par dessus, pour en auoir quelque goust seulement: car d'acquiescer la perfection de toutes, il seroit impossible: F au demourant qu'il employe son principal estude en la philosophie: & ceste mienne opinion se peut mettre bien clairement deuant les yeux par vne similitude fort propre: car c'est tout autant comme qui diroit, il est bien honneste d'aller visitant plusieurs villes, mais expedient de s'arrester & habiter en la meilleure. Or tout ainsi, disoit plaisamment le philosophe Bion, que les amoureux de Penelopé, qui pourfuyuoient de l'auoir en mariage, ne pouuans iouir de la maistresse, se meslerent avec les chambrières: aussi ceux qui ne peuuent aduenir à la Philosophie, se consumment de trauail apres les autres sciences, qui ne sont d'aucune valeur à comparaison d'elle. Et pourtant faut-il faire en sorte que la Philosophie soit comme le sort principal de toute autre estude, & de tout autre sçauoir. Il y a deux arts que les hommes ont inuentez pour l'entretienement de la santé du corps, c'est à sçauoir, la medecine, & les exercices de la personne: dont l'une procure la santé, & l'autre la force, & la gaillarde disposition: mais la Philosophie est la seule medecine des infirmités G & maladies de l'ame: car par elle & avec elle nous cognoissons ce qui est honneste ou deshonneste, ce qui est iuste ou iniuste, & generalement ce qui est à fuir ou à eslire: comme il se faut deporter enuers les Dieux, enuers ses pere & mere, enuers les vieilles gens, enuers les loix, enuers les estrangers, enuers ses superieurs, enuers ses enfans, enuers ses femmes, & enuers ses seruiteurs: pour ce qu'il faut adorer les Dieux, honorer ses parents, reuerer les vieilles gens, obeïr aux loix, ceder aux superieurs, aimer ses amis, estre moderé avec les femmes, aimer ses enfans, n'outrager point ses seruiteurs: & ce qui est le principal, ne se monstrier point ny trop esiouy en prosperité, ny trop triste en aduersité, ny dissolu en voluptez, ny furieux & transporté en cholere. Ce que i'estime estre les principaux fruiets que lon peut recueillir de la Philosophie: car se porter genereusement en vne prosperité, c'est acte d'homme: fy H maintenir sans enuie, signe de nature douce & traittable: surmonter les voluptez par raison, de sagesse: & tenir en bride la cholere, n'est pas œuvre que toute personne sçache faire: mais la perfection, à mon iugement, est en ceux qui peuuent ioindre cest estude de la Philosophie avec le gouuernement de la chose publique: & par ce moien estre iouissans des deux plus grands biens qui puissent estre au monde, de profiter au public, en s'entremettant des affaires: & à soy mesme, se mettant en route tranquillité & repos d'esprit par le moien de l'estude de Philosophie. Car il y a communément entre les hommes trois sortes de vie, l'une actiue, l'autre contemplatiue, & la tierce voluptueuse: desquelles ceste derniere estant dissoluë, serue & esclau des voluptez, est brutale, trop vile, & trop basse: la contemplatiue destituee de l'actiue, est inutile: & l'actiue ne communiquant point avec la contemplatiue, commet beaucoup de fautes, & n'a point d'ornement: au moien dequoy, il faut

Comment il faut nourrir les enfans. 5

- A faut essayer tant que lon peut de s'entremettre du gouuernement de la chose publique, & quant & quant vacquer à l'estude de Philosophie, autant que le temps & les affaires le pourront permettre. Ainsi gouuerna iadis Pericles, ainsi Archytas le Tarentin: ainsi Dion le Syracusain, ainsi Epaninondas le Thebain, dont l'un & l'autre fut familier & disciple de Platon. Quant à l'institution doncques des enfans es lettres, il n'est, à mon aduis, ia besoing de s'estendre à en dire d'auantage: seulement y adiousteray-ie, que c'est chose vtile, ou plus tost necessaire, faire diligence de recueillir les œuvres & les liures des Sages anciens, pourueu que ce soit à la façon des laboureurs: car comme les bons laboureurs font prouision des instruments du labourage, non pour seulement les auoir en leur possession, mais pour en vser: aussi faut il estimer que les vrais outils de la science sont les liures, quand on les met en vusage, qui est le moyen **par lequel** on la peut conseruer: mais aussi ne doit on pas oublier la diligence de bien **exerciter** les corps des enfans, ains en les enuoyant aux escholes des maistres qui font profession de telles dexteritez, les faut quant & quant adresser aux exercices de la personne: tant pour les rendre adroits que pour les faire forts, robustes, & dispos: pour ce que c'est vn bon fondement de belle vieillesse, que la bonne disposition & robuste complexion des corps en ieunesse. Et comme en temps calme, quand on est sur la mer, on doit faire prouision des choses necessaires à l'encontre de la tourmente: aussi faut il en ieunesse se garnir de temperance, sobriété & continence, & en faire reserue & munition de bonne heure, pour en mieux soustenir la vieillesse: vray est qu'il faut tellement dispenser le trauail du corps, que les enfans ne s'en dessechent point, & ne s'en treuuent puis apres las & recreuz quand on les voudroit faire vacquer à l'estude des lettres: car, comme dit Platon, le sommeil & la lassitude sont contraires à apprendre les sciences. Mais cela est peu de chose, ie veux venir à ce qui est de plus grande importance que tout ce que i'ay dit au parauant: car ie dis qu'il faut que lon exerce les ieunes enfans aux exercices militaires, comme à lancer le dart, à tirer de l'arc, & à chasser: pour ce que tous les biens de ceux qui sont vaincus en guerre sont exposez en proye aux vaincueurs, & ne sont propres aux armes & à la guerre les corps nourris delicatement à l'ombre:

Mais le Soudart de seiche corpulence
Ayant acquis d'armes experience,
C'est luy qui rompt des ennemis les rens,
Et en tous lieux force ses concurrens.

Mais quelqu'un me pourra dire à l'aduenture, Tu nous auois promis de nous donner exemples & preceptes, comment il faut nourrir les enfans de libre condition, & puis on voit que tu delaisse l'institution des pauvres & populaires, & ne donnes enseignements que pour les nobles, & pour les riches seulement. A cela il m'est bien aisé de respondre: car quant à moy ie desirerois, que ceste mienne instruction peust

- D seruir & estre vtile à tous: mais s'il y en a aucuns, à qui par faute de moyens mes preceptes ne puissent estre profitables, qu'ils en accusent la fortune, non pas celuy qui leur donne ces aduertissemens: au reste il faut, que les pauvres s'esuertuent, & tâchent de faire nourrir leurs enfans en la meilleure discipline qui soit: & si d'aduenture ils n'y peuuent attaindre, au moins en la meilleure qu'ils pourront. J'ay bien voulu en passant adioster ce mot à mon discours, pour au demourant poursuiure les autres preceptes qui appartiennent à la droite instruction des ieunes gens. Je dis doncques notamment, que lon doit attraire & amener les enfans à faire leur deuoir par bonnes paroles & douces remonstrances, non pas par coups de verges ny par les battre: pour ce qu'il semble que ceste voye la conuient plus tost à des esclaves, que non pas à des personnes libres, pour ce qu'ils s'endurcissent aux coups, & deuiennent comme hebetez, & ont le trauail de l'estude puis apres en horreur, partie

Au 7. de la
Repub.

Comment il faut nourrir les enfans.

pour la douleur des coups, & partie pour la honte: les louanges & les blasmes sont E plus vtils aux enfans nez en liberté, que toutes verges ne tous coups de fouët: l'un pour les tirer à bien faire, & l'autre pour les retirer de mal: & faut alternatiuement vser tantost de l'un, tantost de l'autre: & maintenant leur vser de reprehension, maintenant de louange. Car fils sont quelque-fois trop guays, il faut en les tenant leur faire vn peu de honte, & puis tout soudain les remettre en les louant: comme font les bonnes nourrices, qui donnent le tetin à leurs petits enfans apres les auoir fait vn peu crier: toutesfois il y faut tenir mesure, & se garder bien de les trop haut-louer, autrement ils presument d'eux-mesmes, & ne veulent plus trauailler depuis que lon les a louez vn peu trop. Au demourant i'ay cogneu des peres, qui pour auoir trop aimé leurs enfans, les ont en fin hays. Qu'est-ce à dire cela? Je l'esclairciray par cest exemple. Je veux dire, que pour le grand desir qu'ils auoient que leurs enfans fussent les premiers en toutes choses, ils les contraignoient de trauailler excessiuement: de maniere que plians sous le faix, ils en tomboient en maladies, ou se faschant d'estre ainsi surchargez, ne receuoient pas volontiers ce qu'on leur donnoit à apprendre. Ne plus ne moins que les herbes & les plantes se nourrissent mieux quand on les arrouse moderement, mais quand on leur donne trop d'eau, on les noye & suffoque: aussi faut il donner aux enfans moyen de reprendre haleine en leurs continuels trauaux: faisant compte, que toute la vie de l'homme est diuisee en labour & en repos: à raison dequoy nature nous a donné non seulement le veiller, mais aussi le dormir: & non seulement la guerre, mais aussi la paix: non seulement la tourmente, mais aussi le beau temps: & ont esté instituez non seulement les iours ouurables, mais aussi les iours de feste. En somme, le repos est comme la saulse du trauail: ce qui se voit non seulement es choses qui ont sentiment & ame, mais encore en celles qui n'en ont point: car nous relaschons les cordes des arcs, des lyres, & des violes, à fin que nous les puissions retendre puis apres: & brief, le corps s'entretient par repletion & par euacuation, aussi fait l'esprit par repos & trauail. Il y a d'autres peres qui G semblablement sont dignes de grande reprehension, lesquels depuis que vne fois ils ont commis leurs enfans à des maistres & precepteurs, ne daignent pas assister à les voir & ouir eux mesmes apprendre quelquefois: en quoy ils faillent bien lourdement, car au contraire ils deussent eux mesmes esprouuer souuent, & de peu en peu de iours, comment ils profitent, & non pas s'en reposer & rapporter du tout à la discretion de quelques maistres mercenaires: car par ceste sollicitude les maistres mesmes auront tant plus grand soing de faire bien apprendre leurs escholiers, quand ils verront que souuent il leur en faudra rendre compte: à quoy se peut appliquer le bon mot que dit anciennement vn sage escuyer, Il n'y a rien qui engraisse tant le cheual, que l'œil de son maistre. Mais sur toutes choses, il faut exercer & accoustumer la memoire des enfans, pour ce que c'est, par maniere de dire, le tresor de science: c'est pourquoy les anciens poëtes ont fainct, que Mnemosyné, c'est à dire Memoire, estoit la H mere des Muses: nous voulans donner à entendre, qu'il n'y a rien qui tant serue à engendrer & conseruer les lettres, & le sçauoir, que fait la memoire: pourtant la faut il diligemment & soigneusement exercer en toutes sortes, soit que les enfans l'ayent ferme de nature, ou qu'ils l'ayent foible: car aux vns on corrigera par diligence le defect, aux autres on augmentera le bien d'icelle: tellement que ceux la en deuiendront meilleurs que les autres, & ceux cy meilleurs que eux mesmes: car le poëte Hesiodé a sagement dit,

Au poëme
intitulé les
œuvres,

Si tu vas peu avecques peu mettant,
Et plusieurs fois ce peu la repetant:
En peu de iours tu verras cela croistre,
Qui par auant bien petit souloit estre.

D'auantage

- A D'avantage les peres doiuent ſçauoir, que ceſte partie memoratiue de l'ame ne ſert pas ſeulement aux hommes à apprendre les lettres, mais auſſi qu'elle vaut beaucoup aux affaires du monde : pour ce que la ſouuenance des choſes paſſées fournit d'exemples pour prendre conſeil à l'aduenir. Au ſurplus il faut bien prendre garde à deſtourner les enfans de paroles ſales & deſhonneſtes : Car la parole, comme diſoit Democritus, eſt l'ombre du faiët : & les faut duiſſe & accouſtumer à eſtre gracieux, affables à parler à tout le monde, & ſaluër volontiers vn chaſcun : car il n'eſt rien ſi digne d'eſtre hay, que celui qui ne veut pas que lon l'aborde, & qui dedaigne de parler aux gens. Auſſi ſe rendront les enfans plus amiables à ceux qui conuerſeront autour d'eux, quand ils ne tiendront pas ſi roide, qu'ils ne veuillent du tout rien conceder és diſputes & queſtions qui ſe pourront eſmouuoir entre eux : car c'eſt belle choſe de ſçauoir non ſeulement vaincre, mais auſſi ſe laiſſer vaincre quelquefois, meſmement és choſes où le vaincre eſt dommageable : car alors la victoire eſt veritablement Cadmiene, comme lon dit en commun prouerbe, c'eſt à dire, elle tourne à perte & dōmage au vainqueur : de quoy i'ay le ſage poëte Euripide pour teſmoing en vn paſſage où il dit,

Quand l'vn des deux qui diſputent enſemble
Entre en courroux, plus aduiſé me ſemble
Celuy qui mieux ayme coy ſ'arreſter,
Que de parole ireuſe conteſter.

En la tragedie de Proieſilaus citée par Stobæe en ſes fragmens.

- Au reſte ce dequoy plus on doit inſtruire les ieunes gens, & qui leur eſt de non moindre, voire i'oſe bien dire, de plus grande conſequence, que tout ce que nous auons dit iuſques icy : c'eſt, qu'ils ne ſoient delicats ne ſuperflus en choſe quelconque, qu'ils tiennent leur langue, qu'ils maiſtriſent leur cholere, & qu'ils ayent leurs mains nettes. Mais voyons particulierement combien emporte vn chaſcun de ces quatre preceptes, car ils ſeront plus faciles à entendre en les mettant deuant les yeux
- C par exemples : comme, pour commencer au dernier, Il y a eu de grands perſonnages qui pour ſ'eſtre laiſſez aller à prendre argent iniuſtement, ont reſpandu tout l'honneur qu'ils auoient amasſé au demourant de leur vie : comme Gylippus Lacedæmonien, qui pour auoir deſcouſu par deſſous les ſacs pleins d'argent qu'on luy auoit baillez à porter, fut honteuſement banny de Sparte. Et quant à ne ſe courroucer du tout point, c'eſt bien vne vertu ſinguliere : mais il n'y a que ceux qui ſont parfaitement ſages qui le puiſſent du tout faire : comme eſtoit Socrates, lequel ayant eſté fort outragé par vn ieune homme insolent & temeraire, iuſques à luy donner des coups de pied, & voyant que ceux qui ſe trouuoient lors autour de luy ſ'en courrouçoient amerement, & en perdoient patience, & vouloient courir apres : Comment, leur dit il, ſi vn aſne m'auoit donné vn coup de pied, voudriez vous que ie luy en redonnasſe vn autre ? touteſois il n'en demoura pas impuny : car tout le monde luy reprocha tant ceſte insolence, & l'appella l'on ſi ſouuent & tant, le regibbeur & donneur de coups de pied, que finalement il ſ'en pendit & eſtrangla luy meſme de regret. Et quand Ariſtophanes feit iouer la Comædie qui ſ'appelle les Nuës, en laquelle il reſpand ſur Socrates toutes les ſortes & manieres d'iniures qu'il eſt poſſible, comme quelqu'un des aſſiſtans, à l'heure qu'on le farçoit & gaudiſſoit ainſi, luy demandaſt : Ne te courrouces tu point Socrates, de te voir ainſi publiquement blaſonner ? Non certainement, reſpondit il, car il m'eſt aduiſ, que ie ſuis en ce Theatre, ne plus ne moins qu'en vn grand feſtin, où lon ſe gaudit ioyeuſement de moy. Archytas le Tarentin & Platon en feirent tout de meſme : car l'vn eſtant de retour d'une guerre, où il auoit eſté Capitaine general, trouua ſes terres toutes en friche : & feit appeller ſon receueur, auquel il dit, Si ie n'eſtois en cholere, ie te batterois bien. Et Platon auſſi feſtant vn iour courroucé à l'encontre d'un ſien eſclaué meſchant &

Comment il faut nourrir les enfans.

„ gourmand, appella le fils de sa sœur Speusippus, & luy dit, Pren moy ce meschant E
„ icy, & me le va fouëtter : car quant à moy ie suis courroucé. Mais quelqu'un me
dirà, que ce sont choses bien malaisées à faire & à imiter. Ie le sçay bien : toutefois il
se faut estudier, à l'exemple de ces grands personages-la, d'aller tousiours retren-
chant quelque chose de la trop impatiente & furieuse cholere : car nous ne sommes
pas pour nous egaler ny accompagner à eux aux autres sciences & vertus non plus, &
neantmoins comme estans leurs sacristains & leurs porte-torches, en maniere de par-
ler, ordonnez pour monstrier aux hommes les reliques de leur sapience, ne plus ne
moins que si c'estoient des Dieux, nous essayons de les imiter & suyure leurs pas, en
tirant de leurs faicts toute l'instruction qu'il nous est possible. Quant à refrener la lan-
gue, pour ce que c'est le seul precepte des quatre que i'ay proposéz qui nous reste à
discourir, s'il y a aucun qui estime que ce soit chose petite & legere, il se fouruoie de
grâde torse du droict chemin : car c'est vne grâde sagesse, que se sçauoir taire en temps
& lieu, & qui fait plus à estimer que parole quelconque : & me semble que pour ceste F
cause les anciens ont institué les saintes cerimonies des mysteres, à fin qu'estas accou-
stumez au silence par le moyen d'icelles, nous transportions la crainte apprise au ser-
uice des Dieux à la fidelité de taire les secrets des homes. Car on ne se repët iamais de
festre teu, mais bien se repent on souuent d'auoir parlé : & ce que lon a teu pour vn
têps, on le peut bien dire puis apres : mais ce que lon a vne fois dit, il est impossible de
iamais plus le reprendre. I'ay souuenance d'auoir ouy racôter innumerables exemples
d'hommes qui par l'intemperance de leur langue se sont precipitez en infinies cala-
mitez : entre lesquels i'en choisiray vn ou deux, pour esclarcir la matiere seulement.
Ptolomeus Roy d'Egypte, surnommé Philadelphus, espousa sa propre sœur Arsi-
noé, & lors y eut vn nommé Sotades qui luy dit, Tu fiches l'aiguillon en vn pertuis
qui n'est pas licite. Pour ceste parole il fut mis en prison, là où il pourrit de misere
par vn long temps, & paya la peine deuë à son importun caquet : & pour auoir pen-
sé faire rire les autres, il plora luy mesme bien longuement. Autant en feit, & souff- G
frit aussi presque tout de mesme, vn autre nommé Theocritus, excepté que ce fut
beaucoup plus aigrement. Car comme Alexandre eust escript & commandé aux
Grecs, qu'ils preparassent des robes de pourpre, pource qu'il vouloit à son retour
faire vn solemnel sacrifice aux Dieux, pour leur rendre graces de ce qu'ils luy auoient
ottroyé la victoire sur les Barbares : Pour ce commandement les villes de la Grece
furent contrainctes de contribuer quelque somme de deniers par teste : & lors ce
Theocritus, I'ay, dit-il, tousiours esté en doubte de ce qu'Homere appelloit la
mort purpuree, mais à ceste heure ie l'entens bien : ceste parole luy acquit la haine
& la maliceillance d'Alexandre le grand. Vne autre fois pour auoir par vn traitt
de mocquerie reproché au Roy Antigonus, qu'il estoit borgne, il le met en vn
courroux mortel, qui luy cousta la vie : car ayant Eutropion maistre cueux du
Roy esté eleué en quelque degré, & en quelque charge à la guerre, le Roy luy H
ordonna qu'il allast deuers Theocritus pour luy rendre compte, & le receuoir aussi
reciproquement de luy. Eutropion le luy feit entendre, & alla & vint par plusieurs
fois vers luy pour cest effect, tant qu'à la fin Theocritus luy dit : Ie voy bien que tu
me veux mettre tout crud sur table, pour me faire manger à ce Cyclops : repro-
chant à l'un qu'il estoit borgne, & à l'autre qu'il estoit cuisinier. Et lors Eutropion
luy repliqua sur le champ, Ce sera doncques sans teste : car ie te feray payer la
peine que merite ceste tienne langue effrence, & ce tien langage forcené : comme il
feit : car il alla incontinent rapporter le tout au Roy, qui enuoya aussi tost tren-
cher la teste à Theocritus. Outre les susdits preceptes, il faut encore de ieunesse ac-
coustumer les enfans à vne chose qui est tressainte, c'est, qu'ils dient tousiours ve-
rité : pource que le mentir est vn vice seruil, digne d'estre de tous hay, & non
pardonnable

Au 5. liure
de l'Iliade.

- A pardonnable aux esclaves mesmes qui ont vn peu d'honnesteté. Or quant à tout ce que i'ay discoursu & conseillé par cy deuant touchant l'honnesteté, modestie, & temperance des ieunes enfans, ie l'ay dit franchement & resoluëment, sans en rien craindre ne douter: mais quant au poinct que ie veux toucher maintenant, ie n'en suis pas bien certain ne bien resolu, ains en suis cōme la balance qui est entre deux fers, & ne pāche point plus d'vn costé que d'autre: tellement que ie fais grand doute, si ie le doy mettre en auant, ou bien le destourner: mais pour le moins faut-il prendre la hardiesse de declarer que c'est. La question est, Si lon doit permettre à ceux qui aiment les enfans, de conuerfer & hanter avec eux, ou bien les en reculer & chasser arriere, de sorte qu'ils n'en approchent, ny ne parlent aucunement à eux. Car quand ie considere certains peres seueres & austeres de nature, qui pour la crainte qu'ils ont que leurs enfans ne soient violez, ne veulent aucunement souffrir, que ceux qui les aiment parlent en sorte quelconque à eux: ie crains fort d'en establir & introduire la coustume:
- B mais aussi quād de l'autre costé ie viens à me proposer Socrates, Platon, Xenophon, Æschines, Cebes, & toute la suite de ces grāds personnages, qui iadis ont approuué la façon d'aimer les enfans, & qui par ce chemin ont poussé de ieunes gens à apprēdre les sciences, & à s'entremettre du gouuernement de la chose publique, & se former au moule de la vertu: ie deuiens alors tout autre, & incline à vouloir imiter & ensuiure ces grands hommes-là, lesquels ont Euripide pour tesmoing en vn passage où il dit,

Amour n'est pas tousiours celui du corps;
Vn autre y a qui n'appete rien fors
L'ame qui soit vestue d'innocence,
De chasteté, iustice, & continence.

- Aussi ne faut-il pas laisser derriere vn passage de Platon, là où il dit moitié en riant, moitié à bon escient, qu'il faut que ceux qui ont fait quelques grandes prouesses en vn iour de bataille, au retour ayent priuilege de baïser tel qu'il leur plaira entre les beaux. Je diray donc, qu'il faut chasser ceux qui ne desirent que la beauté du corps, & admettre ceux qui ne cherchent que la beauté des ames: ainsi faut-il fuir & defendre les sortes d'amour, qui se pratiquent à Thebes & en Elide, & ce que lon appelle le rauissement en Candie: mais bien le faut-il receuoir tel comme il se pratique à Athenes, & en Lacedamone: toutefois quant à cela, chacun suyue en ce propos l'opinion qu'il en aura, & ce que bon luy semblera. Au reste aiant desormais assez discoursu touchant l'honnesteté & bonne nourriture des enfans, ie passeray maintenant à l'aage de l'adolescence, apres que i'auray seulement dit ce mot: Que i'ay souuent repris & blasmé ceux qui ont introduit vne tresmauuaïse coustume de bailler bien des maistres & gouuerneurs aux petits enfans, & puis lascher tout à vn coup la bride à l'impetuosité de l'adolescence: là où, au contraire, il falloit auoir plus diligemment l'œil, & faire plus soigneuse garde d'eux, qu'il ne falloit pas des ieunes enfans: car qui ne sçait que les fautes de l'enfance sont petites, legeres, & faciles à r'habiller, comme de n'auoir pas bien obey à leurs maistres, ou auoir failly à faire ce qu'on leur auoit ordonné: mais au contraire, les pechez des ieunes gens en leur adolescence, bien souuent sont enormes & infames, comme vne yron-gnerie, vne gourmandise, larcins de l'argent de leurs peres, ieux de dez, masques & mommeries, amours de filles, adulteres de femmes mariees. Pourtant estoit-il conuenable de contenir & refrener leurs impetueuses cupiditez par grand soing & grande vigilance: car ceste fleur d'aage-là ordinairement s'espargne bien peu, & est fort chatouilleuse & endemenee à prendre tous ses plaisirs, tellement qu'elle a grand be-
soin d'vne grande & forte bride: & ceux qui ne tirent à toute force à l'encontre pour la retenir, ne se donnent de garde, qu'ils laissent à leur esprit la bride lasche à toute licence de mal faire. C'est pourquoy il faut que les bons & sages peres, prin-

Comment il faut nourrir les enfans.

Preceptes
enigmatiques
de Pythagoras.

Contre les
flatteurs.

* Les autres
lisent, & luy
produira la
femme.

cipalement en cest aage là, facent le guet, & tiennent en bride leurs ieunes iouuen-
 ceaux, en les preschant, en les menaſſant, en les priant, en leur remonſtrant, en leur
 conſeillant, en leur promettant, en leur mettant deuant les yeux des exemples d'au-
 tres, qui pour auoir ainſi eſté debordez & abandonnez à toutes voluptez ſe ſont abyſ-
 mez en grandes miſeres & griefues calamitez: & au contraire, d'autres qui pour auoir
 refrené leurs concupiſcences ont acquis honneur & glorieuſe renommee: car ce ſont
 „ comme les deux elements & fondemens de la vertu, l'Eſpoir de pris, & la Crainte de
 „ peine: pource que l'eſperance les rend plus prompts à entreprendre toutes choſes bel-
 les & louables, & la crainte les rend tardifs à en oſer commettre de vilaines & re-
 prochables. Brief il les faut bien ſoigneuſement diuertir de hanter toutes mau-
 uaiſes compaignies: autrement ils rapporteront touſiours quelque tache de la con-
 tagion de leur meſchanceté. C'eſt ce que Pythagoras commandoit expreſſément
 en ces preceptes enigmatiques ſous paroles couuertes, leſquels ie veux en paſſant
 expoſer, pour ce qu'ils ne ſont pas de petite efficace pour acquerir vertu: comme quād
 „ il diſoit, Ne gouſte point de ceux qui ont la queuë noire: c'eſt autant à dire com-
 me, ne frequente point avec hommes diffamez & denigrez pour leur meſchante vie.
 „ Ne paſſe point la balance: c'eſt à dire, qu'il faut faire grand compte de la Juſtice, &
 „ ſe donner bien garde de la tranſgreſſer. Ne te ſied point ſur le boiſſeau: c'eſt à dire,
 „ qu'il faut fuir oiſiueté pour ſe prouuoir des choſes neceſſaires à la vie de l'homme.
 „ Ne touche pas à tous en la main: c'eſt à dire, ne contracte pas legerement avec tou-
 „ te perſonne. Ne porter pas vn anneau eſtroit: c'eſt à dire, qu'il faut viure vne vie
 „ libre, & ne ſe mettre pas ſoy-meſme aux ceps. N'attizer pas le feu avec l'eſpee: c'eſt
 „ à dire n'irriter pas vn homme courroucé: car il n'eſt pas bon de le faire, ains faut
 „ ceder à ceux qui ſont en cholere. Ne manger pas ſon cœur: c'eſt à dire, n'offenſer pas
 „ ſon ame & ſon eſprit, en le conſumant de cures & d'ennuis. S'abſtenir de febues:
 „ c'eſt à dire, ne ſ'entremettre point du gouuernement de la choſe publique, pour ce
 qu'anciennement on donnoit les voix avec des febues, & ainſi procedoit-on aux
 „ elections des Magiſtrats. Ne ietter pas la viande en vn pot à piſſer: c'eſt, qu'il ne
 „ faut pas mettre vn bon propos en vne meſchante ame: car la parole eſt comme la
 „ nourriture de l'ame, laquelle deuient pollue par la meſchanceté des hommes. Ne ſ'en
 „ retourner pas des confins: c'eſt à dire quand on ſe ſent pres de la mort, & que lon eſt
 arriué aux extremes confins de ceſte vie, le porter patiemment, & ne ſ'en deſcoura-
 ger point. Mais à tant ie retourneray à mon propos. Il faut comme i'ay dit au para-
 uant, eſlongner les enfans de la compaignie & frequentation des meſchans, ſpecialle-
 ment des flatteurs. Car ie repeteray en ceſt endroit ce que i'ay dit ſouuent ailleurs, &
 à pluſieurs peres: c'eſt qu'il n'eſt point de plus peſtilent genre d'hommes, & qui gaſte
 d'auantage ne plus promptement la ieuneſſe, que ſont les flatteurs, leſquels perdent &
 les peres & les enfans, rendans la vicilleſſe des vns, & la ieuneſſe des autres miſerable,
 leurs preſentans en leurs mauuais conſeils vn appaſt qui eſt ineuitable, c'eſt la volupté,
 dont ils les emorchent. Les peres riches preſchent leurs enfans de viure ſobrement,
 ceux-cy les incitent à yurongner: ceux-là les conuient à eſtre chaſtes, ceux-cy à eſtre
 diſſolus: ceux-là à eſpargner, ceux-cy à deſpendre: ceux-là, à trauailler, ceux cy à
 iouer & ne rien faire: diſans, qu'eſt-ce que de noſtre vie? ce n'eſt qu'un point de tēps:
 il faut viure pendant que lon a le moyen, & non pas languir. Qu'eſt il beſoin ſe
 ſoucier des menaces d'un pere qui n'eſt qu'un vieil reſueur, qui radotte, & a la mort
 entre les dents? vn de ces matins nous le porterons en terre. Vn autre viendra qui
 luy amenera quelque garce priſe en plein bordeau, & luy donnera à entendre *
 qu'elle ſera ſa femme: pour à quoy fournir, le ieune homme deſrobera ſon pere, &
 rauira en vn coup ce que le bon homme aura eſpargné de longue main, pour l'en-
 tretenement de ſa vicilleſſe. Brief, c'eſt vne malheureuſe generation. Ils ſont ſem-
 blant

E

F

G

H

A blant d'estre amis, & iamais ne disent vne parole franche: ils caressent les riches, & mesprisent les pauvres. Il semble qu'ils ayent appris l'art de chanter sur la lyre, pour seduire les ieunes gens: ils esclattent quand ceux qui les nourrissent font semblant de rire: hommes faulx & supposez, & la bastardise de la vie humaine, qui viuent au gré des riches, estans nez libres de condition, & se rendans serfs de volonté: qui pensent qu'on leur fait outrage, fils ne viuent en toute superfluité, & si on ne les nourrit plantureusement sans rien faire: tellement que tels peres qui voudront faire bien nourrir leurs enfans, doiuent necessairement chasser d'aupres d'eux ces mauuaises bestes là: & aussi en faut-il esloigner leurs compaignons d'eschole, fil y en a aucuns vicieux, car ceux-là seroient suffisans pour corrompre & gaster les meilleures natures du monde. Or sont bien les regles que i'ay iusques icy baillees, toutes bonnes, honnestes & vtils: mais celle que ie veux à ceste heure declarer est equitable & humaine: c'est, que ie ne voudrois point que les peres fussent trop aspres & trop durs

B à leurs enfans, ains desirerois qu'ils laissassent aucunefois passer quelque faute à vn ieune homme, se souuenans qu'ils ont autrefois esté ieunes eux-mesmes. Et tout ainsi que les medecins meslans & destrempans leurs drogues qui sont ameres avec quelque ius doux, ont trouué le moyen de faire passer l'vtilité parmy le plaisir: aussi faut-il que les peres meslent l'aigreur de leurs reprehensions avec la facilité de clemence: & que tantost ils laschent vn petit la bride aux appetits de leurs enfans, & tantost aussi ils leur serrent le bouton, & leur tiennent la bride roide, en supportant doucement & patiemment leurs fautes: ou bien fils ne peuuent faire qu'ils ne s'en courroucent, à tout le moins que leur courroux s'appaise incontinent. Car il vaut mieux qu'un pere soit prompt à se courroucer à ses enfans, pourueu qu'il s'appaise aussi facilement, que tardif à se courroucer, & difficile aussi à pardonner: car quand vn pere est si seure qu'il ne veut rien oublier, ne iamais se reconcilier, c'est vn grand signe qu'il haït ses enfans: pourtant fait-il bon quelquefois, ne faire pas semblant de voir aucunes de leurs fautes, & se seruir en cest endroit de l'ouye vn peu dure, & de la veüe trouble qu'apporte la vieillesse ordinairement: de sorte qu'ils ne fassent pas semblant de voir ce qu'ils voient, ne d'ouïr ce qu'ils oyent. Nous supportons bien quelques imperfections de nos amis, trouuerôs nous estrange de supporter celles de nos enfans? bien souuent que noz seruiteurs yurongnent, nous ne voulons pas trop asprement rechercher leur yurongnerie. Tu as esté quelquesfois estroit enuers ton fils, sois luy aussi quelquefois large à luy donner. Tu t'es aucunefois courroucé à luy, vne autrefois pardonne luy. Il t'a tropé par l'entremise de quelqu'un de tes domestiques mesmes, dissimule le, & maistrise ton ire. Il aura esté en l'une de tes mestairies, où il aura pris & vëdu, peut estre, vne paire de bœufs: il viendra le matin te donner le bon iour sentant encor le vin, qu'il aura trop beu avec ses compaignons le iour de deuant, fais semblant de l'ignorer: ou bien il sentira le parfum, ne luy en dis mot. ce sont les

D moyens de domter doucement vne ieunesse petillante. Vray est que ceux qui sont de leur nature subiects aux voluptez charnelles, & ne veulent pas prester l'oreille quand on les reprent, il les faut marier, pource que c'est le plus certain arrest, & le meilleur lien que lon scauroit bailler à la ieunesse: & quand on est venu à ce point là, il leur faut chercher femmes qui ne soient ne trop plus nobles, ne trop plus riches qu'eux: car c'est vn precepte ancien fort sage, Pren la selon toy: pource que ceux qui les prennent beaucoup plus grandes qu'eux, ne se donnent garde qu'ils se trouuent non marrys de leurs femmes, mais esclaves de leurs biens. I'adiousteray encore quelques petits aduertissemens, & puis mettray fin à mes preceptes. Car deuant toutes choses il faut que les peres se gardent bien de commettre aucune faute, ny d'omettre aucune chose qui appartienne à leur deuoir, à fin qu'ils seruent de vif exemple à leurs enfans, & qu'eux regardans à leur vie, cōme dedans vn clair miroir, s'abstiennent à leur exēple de

Comment il faut nourrir les enfans.

faire & de dire chose qui soit honteuse : car ceux qui reprennent leurs enfans des E
fautes qu'ils commettent eux-mêmes, ne s'aduisent pas, que sous le nom de leurs
enfans ils se condamnent eux-mêmes : & généralement tous ceux qui vivent mal
ne se laissent pas la hardiesse d'oser seulement reprendre leurs esclaves, tant s'en faut
qu'ils puissent franchement tanfer leurs enfans. Mais qui pis est, en vivant mal ils
leur seruent de maîtres & de conseillers de mal faire : car là où les vieillards sont
deshontez, il est bien force, que les ieunes gens soient de tout poinct effrontez : pour-
tant faut-il tascher de faire tout ce que le deuoir requiert, pour rendre les enfans sa-
ges, à l'imitation de celle noble Dame Eurydicé, laquelle estant de nation Escla-
uonne, & par maniere de dire triplement barbare, neantmoins pour auoir moien
de pouuoir instruire elle mesme ses enfans, prit la peine d'apprédre les lettres, estant
desia bien auant en son aage. L'Epigramme qu'elle en feit, & qu'elle dedia aux Mu-
ses, tesmoigne assez comment elle estoit bonne mere, & combien elle aimoit che-
rement ses enfans : F

Eurydicé Hierapolitaine
A de ces vers aux Muses fait estraine,
Qui en son cœur luy feirent concevoir
L'honneste amour d'apprendre & de sçauoir :
Si que iamere, & ses fils hors d'enfance,
Pour acquerir des lettres cognoissance,
Où sont compris des Sages les discours,
Elle donna trauail à ses vieux iours.

Or de pouuoir obseruer toutes les regles & preceptes ensemble, que nous auons cy
dessus declarez, à l'aduenture est-ce chose qui se peult plustost souhaiter que con-
seiller : mais d'en imiter & ensuiure la plus grande partie, encor qu'il y faille de l'heur
& de la prosperité, si est-ce chose dont l'homme par nature peult bien estre capable,
& dequoy il peut bien venir à bout. G

Comment il faut que les ieunes gens lisent

LES POETES, ET FACENT LEVR
PROFIT DES POESIES.

*Ce Traicté n'est proprement utile qu'à ceux qui lisent les anciens Poetes Grecs ou Latins, pour
se garder d'en prendre impression d'opinions dangereuses pour la religion ou pour les meurs.*



Et que le Poëte Philoxenus disoit, qu'entre les chairs celles H
estoyent plus fauoureuses qui estoient les moins chairs : &
entre les poissons, ceux qui estoient les moins poissons : il
est vray ou non, Seigneur Marcus Sedatus, laissons le deci-
der & iuger à ceux qui ont, comme disoit Caton, le palais
plus aigu & plus sensitif que le cœur. Mais que les bien fort
ieunes personnes prennent plus de plaisir, qu'ils obeïssent
plus volontiers, & qu'ils se laissent plus facilement mener aux
discours de la Philosophie, qui tiennent moins du Philoso-
phe, & qui semblent plus tost estre dits en iouant qu'à bon esciant, c'est chose toute
euidente & notoire : car nous voyons, qu'en lisant non seulement les fables d'Æsope
& les fictions des Poetes, mais aussi le liure de Heraclides intitulé Abaris, & le Lycon
d'Ariston,

- A d'Ariston, là où sont les opinions que les Philosophes tiennent touchant l'ame, meſſees parmy des contes faiçts à plaisir, ils sont par maniere de dire ravis d'aïſe & de ioye. Pourtant faut il bien auoir l'œil à ce qu'ils soient non ſeulement honneſtes & voluptez du boire & du manger, mais encore plus les accouſtumer à vſer ſobrement du plaisir & de la delectation en ce qu'ils liront ou eſcouteront, comme d'une faulſe appetiſſante, pour en tirer & faire mieux ſauouer ce qu'il y aura de ſalutaire & de profit: car les portes cloſes d'une ville ne la garderont pas d'eſtre priſe, ſi elle reçoit les ennemis par une ſeule qui ſoit demouree ouuerte: ny la continence & voluptez des autres ſentimēts ne preſeruera pas un ieune homme d'eſtre deſpraué, ſi par meſgarde il ſe laiſſe aller aux plaisirs de l'ouye: ains d'autant qu'elle approche plus pres du propre ſiege de l'entendement & de la raiſon, qui eſt le cerueau: d'autant bleſſée & gaſte elle plus celuy qui la reçoit, ſi lon n'en fait bien ſoigneuſe garde. Parquoy n'eſtant à l'aduenture pas poſſible ny profitable avec, interdire de tout point la lecture des Poetes à ceux qui ſont ia de l'aage de ton fils Cleander, & du mien Soclarus, gardons les ie te prie, bien diligemment, comme ceux qui ont plus grand beſoyn de guide & de conduite en leurs lectures, qu'ils n'ont pas en leurs alleures. C'eſt la raiſon pour laquelle il m'a ſemblé, que ie te deuoyſ enuoyer par eſcript ce que n'agueres ie diſcoursu touchant les eſcripts des Poētes, à fin que tu liſes, & que ſi tu treuues que les raiſons y deduites ne ſoient de moindre efficace & vertu que les pierres que lon appelle Amethyſtes, que quelques vns prennent, & ſe les attachent autour du col pour ſe garder d'enyrurer en leurs banquets, où ils boient d'autant, tu en faces part & les communiques à ton Cleander, & en preoccupes ſon naturel, qui pour n'eſtre peſant ny endormy en choſe quelconque, ains par tout eſueillé, vehement & viſ, en ſera de tant plus facile à mener par tels aduertiffements,

Au chef du poulpe il y a quelque bien,
Et quelque choſe auſſi qui ne vaut rien.

- C C'eſt pour ce que la chair en eſt plaiſante au gouſt, à qui la mange, mais elle fait ſonger de mauuais ſonges, & imprime en la fantaſie des viſions eſtranges & turbulentes, ainſi comme lon dit: auſſi y a il en la poēſie beaucoup de plaisir, & bien de quoy repaiſtre & entretenir l'entendement d'un ieune homme de bon eſprit, mais il n'y a pas moins auſſi de quoy le troubler & le faire vaciller, ſi ſon ouye n'eſt guidée & regie par ſage conduite. Car on peult bien dire, non ſeulement de la terre d'Ægypte, mais auſſi de la Poēſie,

Drogues y a peſſe-meſſe à ſoiſon,
De medecine, & auſſi de poiſon,
Qu'elle produit à ceux-la qui ſ'en ſeruent.

Odyſs. liu. 4.

Et, Leans caché eſt amour gracieux,
Deſir, attraiçt, plaisir delicieux,

Iliad. liu. 14.

- D Et doux parler, qui bien ſouuent abuſe
Des plus ſçauans & des plus fins la ruſe.

Car la maniere dont elle trompe ne touche point à ceux qui ſont trop groſſiers & trop lourds, ainſi comme reſpondit un iour Simonides, quand on luy demanda pourquoy il ne trompoit les Theſſaliens auſſi bien comme les autres Grecs: pour ce dit-il, qu'ils ſont trop ſots & trop ignorans pour eſtre trompez par moy. Et Gorgias le Leontin ſouloit dire, que la Tragedie eſtoit une ſorte de tromperie, de laquelle celuy qui auoit trompé eſtoit plus iuſte, que celuy qui n'auoit point trompé: & celuy qui en auoit eſté trompé eſtoit plus ſage, que celuy qui ne l'auoit point eſté. Comment ferons nous doncques? contraindrons nous les ieunes gens de monter ſur le brigantin d'Epicurus, pour paſſer par deuant & fuir la poēſie, en leur plaſtrant & bouchant les oreilles avec de la cire non fondue, ne plus ne moins que fait iadis

Comment il faut lire les Poetes.

Vlysses à ceux d'Ithace? ou si plus tost enuironnans & attachans leur iugement avec les discours de la vraye raison, pour les engarder qu'ils ne branlent, & qu'ils n'enclinent par le moyen des allechemens du plaisir, à ce qui leur pourroit nuire, nous les redresserons & preseruerons? Car Lycurgus le fils du fort Dryas

n'eut pas l'entendement sain ne bon quand il feit par tout son royaume couper & arracher les vignes, pour autant qu'il voyoit que plusieurs se troubloient de vin & s'enuyuroient: là où il deuoit plus tost en approcher les Nymphes, qui sont les eaux des fontaines, & retenir en office vn dieu fol & enragé, cōme dit Platon, par vn autre sage & sobre: car la meslange de l'eau avec le vin luy oste la puissance de nuyre, & non pas ensemble la force de profiter: aussi ne deuons nous pas arracher ny destruire la poësie, qui est vne partie des lettres & des Muses: Mais là où les fables & fictions estranges & theatriques d'icelle, pour la grande & singuliere delectation qu'elles donnent en les lisant, se voudroient presumptueusement eleuer, dilater & estendre iusques à imprimer quelque mauuaise opinion, alors mettans la main au deuant, nous les reprimerons & arresterons: & là où la grace fera coniointe avec quelque sçauoir, & la douceur attrayante du langage ne fera point sans quelque fruit, & quelque vtilité, là nous y introduirons la raison de philosophie, & descouurirons le profit qui y fera. Car ainsi comme la Mandragore croissant aupres de la vigne, & transmettant par infusion sa force naturelle au vin qui en sort, cause puis apres, à ceux qui en boient, vne plus douce, & plus gracieuse enuie de dormir: aussi la Poësie prenant les raisons & arguments de la philosophie, en les meslant parmy des fables, en rend la science plus aisee & plus agreable à apprendre aux ieunes gens. Au moien dequoy, ceux qui desirent à bon escient philosopher, ne doiuent pas reietter les ceures de poësie, mais plus tost chercher à philosopher dedans les escripts des Poëtes, en s'accoustumant à trier & separer le profit d'avec le plaisir, & l'aimer: autrement, sil n'y a de l'vtilité, le trouuer mauuais, & le rebuter: car aimer le profit qui en vient, est certes le commencement de bien apprendre, & cōme dit Sophocles,

Qui bien commence en toute chose, il semble

Qu'apres la fin au principe ressemble.

Premier precepte.

En premier lieu doncques, le ieune homme que nous voudrōs introduire à la lecture des Poëtes, nous l'aduertirons qu'il ne doit rien auoir si bien imprimé en son entendement, ne si à la main que ce commun dire,

Communément Poëtes sont menteurs.

Et mentent aucunesfois volontairement, & aucunesfois malgré eux: volontairement, pour ce que desirans plaire aux oreilles, ce que la plus part des lisans demandent, ils estiment la verité plus austere pour le faire, que non pas le mensonge: car la verité racontant la chose comme de fait elle a esté, encor que l'issue en soit mal-plaisante, ne laisse pas pourtant de la dire: mais vn conte qui est inuenté à plaisir, se glisse facilement, & se destourne habilement de ce qui ennuye à ce qui chatouille d'aise & de plaisir. car il n'y a rime, ny carme, ny langage figuré, ny hauteesse de style, ny translation bien prise, ny douce liaison de paroles bien coulantes, qui ait tant de grace, ny tant de force d'attirer, & de retenir, comme a la disposition d'un conte fait à plaisir, bien entrelassé & bien deduit. Mais ne plus ne moins qu'en la peinture, la couleur a plus d'efficace pour esmouuoir, que n'a le simple trait, à cause de ie ne sçay qu'elle ressemblance d'homme qui deçoit nostre iugement: aussi es poësies, le mensonge meslé avec quelque verisimilitude, excite plus, & plaist d'auantage, que ne sçauoit faire toute l'estude que lon sçauoit employer à composer de beaux carmes, ny à bien polir son langage, sans meslange de fables & de fictions poëtiques: d'où vient que l'ancien Socrates, qui toute sa vie auoit fait grāde profession de combattre pour la defense de la verité, festant vn iour voulu mettre à la poësie, à cause de quelques illusions

A illusions qu'il auoit eues en songeant, ne se trouua point, à l'essay, propre ny ayant bonne grace à inuenter des menteries: au moien dequoy il meit en vers quelques vnes des fables d'Æsope, cōme n'y ayant point de poësie, la où il n'y a point de menterie. Car il a bien des sacrifices où lon ne danse point, & où lon ne ioue point des flustes, mais nous ne sçauons point de poësie, où il n'y ait point de fiction & de menterie: pource que les vers d'Empedocles, les carmes de Parmenides, le liure de la morsure des bestes venimeuses, & des remedes de Nicander, & les sentēces de Theognis, ce sont oraisons qui ont emprunté de la poësie la hauteſſe du ſtyle, & la meſure des ſyllabes, ne plus ne moins qu'une monture, pour euer la baſſeſſe de la proſe. Quand donques il y a es compositions poëtiques quelque choſe eſtrange & facheuſe, dire touchant les Dieux ou demy-dieux, ou touchant la vertu de quelque excellent perſonnage & de grand renom, celuy qui reçoit cela comme vne verité, ſ'en va gaſté & corrompu en ſon opinion: mais celuy qui ſe ſouuient touſiours, & ſe ramene
B deuant les yeux les charmes & illusions, dont la poëſie ſe fert ordinairement à controuer & inuenter des fables, & qui luy peut dire à tout propos,

O tromperieſſe eſtant plus maculee

Que n'eſt la peau de l'Once taulee,

pourquoy eſt-ce qu'en iouant tu fronces tes ſourcils, & pourquoy en me trompant fais tu ſemblant de m'enſeigner? celuy-la n'en ſouffrira iamais rien de mal, ny ne receura en ſon entendement aucune mauuiſe impreſſion, ains ſe reprendra ſoy-mesme, quand il aura peur de Neptune, craignant qu'il n'ouure & ne fende la terre iuſques à deſcouurir les enfers, & reprendra auſſi Apollo ſe courrouceant pour le premier homme du camp des Grecs,

Luy qui ſi haut ſes louanges chantoit,

Luy qui propos ſemblables en contoit,

Qui au feſtin luy meſme eſtoit aſſis,

C C'eſt celuy ſeul qui l'a, non autre, occis.

Auſſi reprimera il les larmes d'Achilles treſpaſſé, & d'Agamemnon aux enfers, qui pour le deſir de reuiure, & le regret de ceſte vie, tendent leurs foibles & debiles mains: & ſi d'aduenture il ſe trouue aucunesfois troublé de paſſions, & ſurpris d'enchantement & enſorcellement, il ne ſaindra point de dire en ſoy-mesme,

Retourne t'en viſtement ſans ſejour

Là ſus où eſt la lumiere du iour:

Et rien bien fermement en memoire

Tout ce qui eſt dedans ceſte vmbre noire,

Pour le conter cy apres à ta femme.

Homere a dit plaiſamment ce mot là, au lieu de ſon Odyſſee où il deſcrit les enfers, comme eſtant vn conte propre à faire deuant les femmes, à cauſe de la fiction. Ce

D ſont donques ſemblables choſes que les Poëtes faignent volontairement: mais il y en a d'autres en plus grand nombre, qu'ils ne faignent & ne controuuent pas, ains pour ce qu'ils les penſent & les croyent eux meſmes ainſi, ils nous attachēt la faulſeté, comme ayant Homere dit de Iupiter,

Deux ſorts de mort il meit en la balance,

L'un d'Achilles, l'autre de la vaillance

Du preux Hector, leſquels il ſoubs-peſa

Par le milieu: mais d'Hector plus peza

Le ſort fatal, tirant ſa deſtinee

Vers la maiſon aux ombres aſſignee:

Ainſi Phoebus adonc l'abandonna.

Æſchylus a adiouſté à ceſte fiction toute vne Tragedie entiere, laquelle il a intitulé

Æriſtus qui tua Agamemnon.
Au 19. liu. de l'Illade.

Au liu. II. de l'Odyſſee.

Illad. liu. 22.

Comment il faut lire les Poetes.

lee, Le pois ou la balance des ames: faisant assister à l'un des bassins de la balance de Jupiter, d'un costé Thetis, & de l'autre costé l'Aurore, lesquelles prient pour leur fils, qui combattent: & neantmoins il n'est homme qui ne voye clairement, que c'est chose fainte; & fable controuuee par Homere, pour donner plaisir, & apporter esbahissement au lecteur. Mais ce passage,

Iliad. liu. 4.

C'est Jupiter qui meut toute la guerre,
Dont les humains sont trauaillez sur terre. Et cestuy-cy,
Dieu foudre fait de la guerre à choison,
Quand ruiner il veut vne maison.

Tous tels propos sont par eux affermez selon la creance & l'opinion qu'ils ont: en quoy ils sement parmy nous, & nous communiquent l'erreur & l'ignorance, en laquelle ils sont touchant la nature des Dieux. Semblablement les estranges merueilles des enfers, & les descriptions qu'ils en font, esquelles par paroles effroyables ils nous paignent & impriment des apprehensions & imaginations de fleuves brulans, de lieux horribles, de tourments espouuantables: il n'y a personne qui n'entende bien qu'il y a bien de la fable & de la fiction en cela: ne plus ne moins qu'es viandes que lon ordonne aux malades, il y a quant & quant beaucoup de la force des drogues medecinales. Car ny Homere, ny Pindare, ny Sophocles, n'ont point escript ces choses des enfers, pensans qu'elles fussent ainsi:

Là où les riuieres dormantes
De la nuit aux eaux croupissantes,
Rendent vn brouillas infiny
De tenebres en l'air bruny.

Odyss. liu. 24.

Et, Vers le rocher tout blanc sur le riuage
De l'Ocean dresserent leur voyage.
Et, C'est le reflux de l'abyssme profond,
Par où lon va des enfers au noir fond.

Et quand à ceux qui redoutent la mort, ou qui la regrettent & lamentent comme chose pitoyable, ou la priuation de sepulture, come chose miserable, en telles paroles,

Odyss. liu. 10.

Ne m'abandonne ainsi sans sepulture,
En t'en allant, sans plorer ma mort dure.

Et, L'ame prenant hors du corps sa volée,
En soupirant aux enfers est allée,
Pour le regret de laisser en douleur,
Auant son temps de ieunesse la fleur.

Iliad. liu. 22.

Et, Ne me tuez auant que ie fois meure,
Me contraignant d'aller faire demeure
Entre les morts, sous la terre pesante:
La lumiere est à voir trop plus plaisante.

Toutes telles paroles (di-ie) sont de personnes passionnees, & ia preuenues d'erreur d'opinion: pourtant nous esmeuent & troublent elles d'auantage, quand elles nous trouuent pleins de la passion & de la foiblesse de cuer, dont elles procedent. Au moyen dequoy, il se faut de bonne heure prouuoier & preparer alencontre, ayans tousiours ceste sentence qui nous sonne aux oreilles: La poësie ne se soucie pas gueres de dire verité: & si y a plus, que la verité de telles choses est tres-difficile à trouuer & à comprendre, voire à ceux mesmes qui ne trauaillent à autre besongne, qu'à chercher l'intelligéce & la cognoissance de ce qui est, ainsi come eux mesmes le cōfessent: auquel propos il seruira d'auoir tousiours en main ces vers d'Empedocles,

Il n'y a œil d'homme qui le sceust voir,
Ny de l'ouir auraille n'a pouuoir,

Et n'est

A Et n'est esprit humain qui peult estendre
Son pensement iusques à le comprendre.

Et ceux cy de Xenophanes,

Il ne sera, & n'a oncques esté
Homme qui sceust avec certainté
Que c'est des Dieux, ny de tout l'univers,
Dequoy ie vais discourant en mes vers.

Semblablement aussi les paroles de Socrates en Platon, s'excusant avec serment qu'il ne sçait, & n'entend rien de ces choses là: car par ce moien les ieunes hommes adiouteront moins de foy au dire des poëtes touchât cela, en l'inquisition dequoy ils verront que les Philosophes mesmes se perdent & s'esblouissent. Encore arresterons nous d'avantage la creance du ieune homme, que nous voudrons mettre à la lecture des Poëtes, quand premier que d'y entrer nous luy figurerons & descrirons, que c'est de

B la Poësie: en luy faisant entendre, que c'est vn art d'imiter, & vne science respondante à la peinture: & luy alleguant non seulement ce commun dire qui est en la
» bouche de tout le monde: Que la Poësie est peinture parlante, & la peinture vne
» poësie muette: mais aussi luy enseignât, que quâd nous voions vn lezard bien paint, ou vn singe, ou la face d'un Therfites, nous y prenôs plaisir, & le louôs à merucilles, non comme chose belle de foy, ains bien contrefaite apres le naturel: car ce qui est laid de foy, ne peut estre beau: mais l'art de bien faire ressembler soit chose belle, ou chose laide, est tousiours estimee: & au contraire, qui voulât portraire vn laid corps feroit vne belle image, ne feroit chose ny bien seante, ny semblable. Il se trouue des peintres qui prennent plaisir à paindre des choses estranges & monstrueuses, cōme Timomachus, qui paignit en vn tableau, comme Medee tua ses propres enfans: & Theon, comme Orestes tua sa mere: Parrasius, la fureur & rage simulee d'Vlysses: & Chærephanes qui contrefeit des lascifs & impudiques embrassements d'hommes & de femmes. Esquels argumêts, & semblables, par accoustumance de souuent luy recorder, il faut faire que le ieune homme entēde, que lon ne louë pas le faict en foy du quel on voit la representation, mais l'artifice de celuy qui l'a peu si ingenieusement, & si parfaitement représenter au vif. Pareillement aussi pource que la poësie représente quelquefois, par imitation, de meschants actes, des passions mauuaises, & des meurs vicieuses & reprochables, il faut que le ieune homme sçache, que ce que lon admire en cela, & que lon trouue singulier, il ne le doit pas receuoir cōme veritable, ny l'approuuer comme bon, ains le louer seulement, cōme bien conuenable & bien approprié à la personne, & à la matiere subiette: car tout ainsi comme il nous fasche & nous desplaît quand nous oyons ou le grongnement d'un pourceau, ou le cry que fait vne rouë mal ointe, ou le sifflemēt des vents, ou le mugissement de la mer: mais si quelque bouffon & plaissant le sçait bien contrefaire, comme Parmeno iadis
D contrefaisoit le cochon, & vn Theodorus les grâdes rouës à puiser de l'eau des puits, nous y prenons plaisir. Semblablement aussi fuyons nous vne personne malade ou pourrie d'vlcères, comme chose hydeuse à voir, & neantmoins quand nous venons à voir le Philoctetes d'Aristophon, & la Iocasta de Silanion, où l'un est descrit, cōme tombant par pieces, & l'autre comme rendant l'esprit, nous en receuons delectation grande: aussi le ieune homme lisant ce que Therfites vn plaissant, ou Sisyphus vn amoureux desbaucheur de filles, ou Batrachus vn maquereau, va disant ou faisant, soit instruit & aduertiy de louer l'art & la suffisance de celuy qui les a bien sçeu naïfument représenter, mais au demourant de blasmer & detester les actions & conditions qu'il représente: car il y a grande difference entre représenter bien, & représenter chose bone: pource que le représenter bien, c'est à dire, naïfuemēt & promptemēt ainsi qu'il appartient: or les choses deshonestes sont propres & conuenables aux personnes

Comment il faut lire les Poetes.

deshonneſtes. Et comme les ſouliers du boiteux Demonides, qui auoit les pieds bots, E
leſquels ayāt perdus, il prioit aux Dieux qu'ils fuſſent bōs à celui qui les luy auoit deſ-
robez: ils eſtoient bien mauuais de ſoy, mais bōs & propres pour luy: Auſſi ce propos,

Eurip. en la
Tragedie des
Phœniciens

Si violer la iuſtice & le droict
Il eſt licite à l'homme en quelque endroict,
C'eſt pour regner qu'il le ſe doit permettre,
Au demourant rien de mal ne commettre.
Cherche d'auoir d'homme droict le renom,
Mais les effectz & iuſtes œures non:
Ains va faiſant tout ce, dont tu verras
Que receuoir du profit tu pourras.
Si ne la prens, ie pers tout vn talent,
Auquel ſon doire on dit æquiualent:
Et puis eſt-il poſſible que ie viue,
Ayant failly à telle lucratiue?
Pourray-ie bien dormir, apres auoir
Refuſé tant d'argent à receuoir?
Mon ame eſtant hors de ce monde oſtee,
N'en fera elle aux enfers tourmentee,
Comme ayant trop mauditement meſpris
Contre ce ſainct talent d'argent non pris?

Et ceux-cy,

Et ceux-cy,

F

ce ſont tous meſchans propos, & faulx, mais qui conuiennent bien à vn Eteocles,
à vn Ixion, & à vn vieillard uſurier. Si doncques nous aduertifſons les ieunes gents,
que les Poëtes n'eſcriuent pas telles choſes, comme ſils les louoyent & les approu-
uoient, mais que ſçachans bien que ce ſont mauuais & meſchans langages, il les at-
tribuent auſſi à de mauuiſes & meſchantes perſonnes: en ce faiſant ils ne receuront
aucunes pernicieuſes impreſſions des poetes, ains au contraire la ſuſpicion qu'ils G
prendront de la perſonne qui parlera, leur fera incontinent trouuer mauuiſe la pa-
role & la ſentence, comme eſtant faite ou dite par vne meſchante & vicieuſe per-
ſonne. A quoy ſeruira d'exemple ce que fait Paris en Homere, qui ſ'enfuyant de la
bataille ſ'en va coucher dedās le liēt avec la belle Helene: car n'ayant le poete nulle
part ailleurs introduit homme qui aille de plein iour coucher avec ſa femme, il mon-
ſtre aſſez clairement, qu'il iuge & reputetelle incontinence reprochable & honteuſe.
En quoy il faut auſſi bien prendre garde, ſi le poete meſme en donne point quelque
demonſtration, qu'il tienne luy-meſme tels langages pour mauuais: ainſi comme a
fait Menander au prologue de la Comedie qu'il appelle Thais:

Iliad liu. 3.

Muſe dy moy qui eſt ceſte effrontee,
Belle non moins que fine & aſſetee,
A ces amants faiſant dix mille torts:
Leur demandant, & les chaffant dehors,
Ne leur portant à nul affection,
Et leur uſant à tous de fiction?

H

Deſquels aduertifſements Homere entre autres uſe treſſagement: car il reprend &
blaſme ordinaiement les mauuais propos, auant que de les faire dire: & au contraire,
il louë & recommande les bons, en ceſte maniere,

Odyſs. liu. 8.

Iliad. liu. 25

Lors il luy teint vn propos doux & ſage. Et ailleurs,
En ſ'approchant, d'un parler luy uſa
Si gracieux, que ſon ire appaiſa.

Et en reprenant le mauuais auant le coup, il ſemble qu'il proteſte par maniere de dire,
& qu'il denonce que lon ſ'en donne de garde, & que lon ne ſ'y arreſte point, non
plus

A plus qu'à chose de mauuais & dangereux exemple : comme quand il veut descrire les grosses paroles que dit Agamemnon au presbtre d'Apollo abusant irreueremment de sa dignité, il met deuant,

Iliad. liu. 5.

Cela au fils d'Atreus point ne pleut,
Ains de despit que son gros cuer en eut,
Il renuoya le presbtre malement.

Ce malemër signifie, qu'il le renuoya traicté outrageusement, temerairement & superbement, outre toute honnesteté du deuoir. Aussi fait il prononcer à Achilles des paroles outrageuses & temeraires,

Yurongne, aux yeux ehontez comme vn chien,
Au cœur de cerf qui de valeur n'a rien.

Iliad. liu. 3.

y adioustant & subioignant vn mesme iugement qu'aux autres,
Achilles dit, de rechef furieux,

B Au fils d'Atreus propos iniurieux,
N'estant encor point son ire assouuie.

Car il est vray semblable que rien ne peut estre beau ny honneste, qui soit dit aspremer & en cholere. Ce qu'il obserue non seulement aux paroles, mais aussi aux faicts,

Ainsi parla, puis au corps despouillé
Du preux Hector feit vn acte souillé,
De peu d'honneur, l'estendant sur sa face
Tout de son long, aupres du liët & place
Où Patroclus viuant souloit coucher.

Iliad. liu. 23.

Il vse aussi fort à propos d'autres reprehensions, apres les choses passees, donnant luy-mesme sa sentence touchant ce qui s'est dit ou fait peu deuant: comme, pour exemple, apres la narration de l'adultere de Mars, il fait que les Dieux disent,

Ce n'est vertu que faire œuvre illicite,

Odyss. liu. 8

C Car le boiteux attrape en fin le vifte.

Et en vn autre passage, apres l'audace presumptueuse de Hector, & sa braue vanterie, il dit :

Le haut parler d'Hector en se vantant,
Alla Iuno contre luy irritant.

Iliad. liu. 3.

Et touchant le coup de fiesche que delascha Pandarus,

Ainsi Pallas avec son saint langage,
Persuada son esprit trop volage.

Iliad. liu. 4.

Telles sentences doncques, & telles opinions des Poëtes, qui sont couchees en paroles expresses, sont aisees à discerner & cognoistre à qui y veut vn peu prendre garde: mais encores donnent ils d'autres instructions par les faicts: ainsi comme lon dit, que Euripides respondit vn iour à quelques vns qui blasmoient Ixion, en l'appellant malheureux & maudit des Dieux: Aussi ne l'ay-ie iamais laissé, ce leur dit-il, sortir hors de l'eschaffaud, que ie ne l'aye attaché & cloué bras & iambes à vne rouë. Il est bien vray, qu'en Homere il n'y a point de telle maniere de doctrine en termes expres, mais qui voudra considerer vn peu de pres les fables & fictions qui sont les plus blasmees en luy, il y trouuera au dedans vne tres-vtile instruction & speculation couuerte, combien que quelques vns les tordans à force, & les tirants, comme lon dit, par les cheueux, en expositions allegoriques (ainsi que nous les appellons maintenant, là où les anciens les nommoient Souspeçons) vont disant, que la fiction de l'adultere de Mars avec Venus signifie, que quand la planette de Mars vient à estre conioincte avec celle de Venus en quelques natiuitez, elle rend la personne encline à adulteres: mais quand le Soleil vient à se leuer là dessus, leurs adulteres sont subiects à estre descouuers & pris sur le faict. Quand à l'embellissement de

Comment il faut lire les Poetes.

Iuno, & à la fiction du tissu quelle emprunta de venus, ils veulent que cela signifie E
vne purgation & purification de l'air qui se fait quād on approche du feu: comme si
le poëte luy mesme ne donnoit pas les solutions & expositions de telles doutes: car
en la fable de l'adultere de Venus son intention n'est autre, que de donner à entendre,
que la Musique lasciuue, les chansons dissoluës, & les propos que lon tient sur des
mauuais arguments, rendent les mœurs des personnes desordonnees, leurs vies lu-
briques & effeminees, les hommes subiects à leur plaisir, aux delices, aux voluptez,
& aux amours de folles femmes,

Odyss. liu. 8.

Souuent changer de lits delicieux,
De baings aussi & d'habits precieux.

Pourtant fait-il qu'Vlysses commande au Musicien qui chantoit sur la lyre:

I à mesme.

Change propos, & dis en ta chanson
Du grand cheual de Troye la façon.

Nous donnant la-dessus vn bon enseignement, qu'il faut que les Chantres, Musi- F
ciens, & Poëtes prennent les arguments de leurs compositions des hommes sages &
vertueux: & en la fiction de Iuno il a tresbien voulu monstrier, que l'amour & la gra-
ce que les femmes gagnent sur les hōmes par charmes, sorcelleries & enchantemens,
auec fraudes & tromperies, non seulement est chose de peu de duree, mal asseuree,
& dont l'homme se lasse, & se fasche bien tost, mais aussi qui se tourne le plus souuent
en courroux & aspre inimitié, aussi tost que la volupté en est passée: car il fait que
Iupiter en ce lieu-là menasse ainsi Iuno, & luy vse de telles paroles,

Iliad. liu. 15.

Tu cognoistras alors, que profité
Rien ne t'aura du lit la volupté,
Que me tirant à part hors l'assemblee
Des Dieux par dol tu as eue à l'emblee.

Car le recit & la representation des œuvres vicieuses, pourueu qu'à la fin elle rende à G
ceux qui les ont faites la honte, le deshonneur & le dommage qu'ils meritent, elle
ne nuit point, ains plus tost profite aux escoutans: pour ce que les Philosophes vsent
d'exemples pris des histoires, pour admonester & instruire les lisans par choses qui
realement sont, ou qui ont esté: mais les Poetes inuentent & controuuent les choses
par lesquelles ils nous veulent enseigner. Qui plus est, tout ainsi comme Melanthius,
fust ou en ieu, ou à bon esciant, disoit que l'estat d'Athenes demouroit sur ses pieds,
& se maintenoit par la diuision qui estoit entre les Orateurs, à cause qu'ils ne pan-
choient pas tous d'un costé, & ainsi par le discord qui regnoit entre ceux qui ma-
nioient les affaires, il se faisoit tousiours quelque contrepois alencontre de ce qui
estoit dommageable à la chose publique: aussi les contrarietez qui se trouuent entre
les dicts des Poetes, ostans reciproquement la foy les vns aux autres, empeschent
que ce qu'il y a de dangereux & de nuisible ne soit de si grand pois. Quand donques
en approchant telles sentences l'une de l'autre, il nous apparoitra qu'il y aura con- H

Souuent, mon fils, les habitans des Cieux

Font tresbucher les hommes soucieux.

Au contraire,

Il n'y a rien pour sa faute excuser,

Si à la main, que les Dieux accuser.

Et ceux-cy,

Prend ton plaisir à des biens amasser,

Non à sçauoir ou vertu prochasser.

Au contraire,

C'est chose trop grossiere, que d'auoir

Planté de biens, & rien plus ne sçauoir.

Et ailleurs,

A. Qu'est il besoing pour les Dieux que tu meures?

B. Il est meilleur. faire seruire aux Dieux

Ne m'a

A Ne m'a iamais semblé laborieux.

Toutes telles diuersitez & contrarietez de sentences ont leurs solutions prestes à la main, si (comme nous auons dit peu deuant) nous adressons le iugement des ieunes gens à adherer à la meilleure. Mais quand il se trouuera quelque propos dit meschamment, & que la responce n'y fera pas toute prompte pour le confondre sur le champ il le faudra lors refuter & condamner par autres sentences contraires que les mesmes Poëtes auront escrites ailleurs, sans autrement s'en offenser ny courroucer à eux, ains estimer que ce sont propos dictz par icelluy, ou seulement pour représenter le naturel de quelque personnage. Alencontre doncques des fictions qui sont en Homere, quand il fait que les Dieux se iettent les vns les autres du haut en bas, ou qu'ils sont blecez en bataille par les hommes, ou qu'ils tansent les vns aux autres, & qu'ils ont debats ensemble, tu pourras sur le champ opposer, si tu veux, ce qu'il dit,

Tu pouuois bien, si tu eusses voulu,

B Tenir propos qui eussent mieux valu.

Iliad. liu. 7.

Et certainement tu parles & entends bien mieux les matieres ailleurs en ces passages,

Les Dieux viuans sans trauail à leur aise.

Et en cest autre,

Odyssée, liu.

Les Dieux seuls ont ioye perpetuelle.

Et ailleurs,

4. & 6.

Les Dieux pour eux ont retenu liesse,

Iliad. liu. 24.

Et resigné aux hommes la tristesse.

Car ce sont là les vrayes & certaines opinions que lon doit auoir des Dieux, & toutes ces autres fictions-là ont esté controuues seulement pour donner plaisir aux lisans.

Au cas pareil là où Euripides en vn lieu dit,

Les Dieux puissans, trop plus que nous ne sommes,

Vont abusant nous autres pauvres hommes

Par plusieurs tours de ruze tromperesse.

Il y faudra adiouter ce qu'il dit trop mieux, & plus veritablemēt en vn autre passage,

Si quelque mal les Dieux aux hommes font,

C Certainement vray Dieux plus il ne font.

Et comme ainsi soit, que Pindare die fort aigrement & vindicatiuement en vn lieu,

Il faut tout tenter & faire,

Pour son ennemy defaire:

Il luy faut opposer, voire mais tu dis toy mesme en vn autre passage,

Toufiours vn iniuste plaisir

Se fine en aigre desplaisir.

Ode 4. des Isthmies.

Et Sophocles dit en vn lieu,

Le gain toufiours est chose delectable,

Quoy que n'en soit le moien veritable:

Mais nous auons entendu de luy en vn autre passage,

D Iamais ne fut de bon fruit rapporteur,

Vn parler vain & langage menteur.

Et à l'encontre de ces propos, qui se lisent touchant l'auoir & la richesse:

Richesse prend ce qui est accessible,

Et ce qui est du tout inaccessible.

Possible n'est que de ses amours puisse

Iouir le pauvre, encor qu'il en iouisse.

Au contraire,

Langue diferte est cause qu'un visage

Laid & hideux nous semble beau & sage.

On luy peut mettre à l'encontre plusieurs autres bonnes sentences de Sophocles mesme:

Comment il faut lire les Poetes.

L'homme qui n'est de biens mondains fourny,
Ne laisse pas d'estre d'honneur garny. Et ceste cy,
Pour mendier, l'homme pis ne vaut mie,
Prouueu qu'il ait sagesse & preud'homme. Et d'autres,
Dequoy fert tant de vertus acquerir,
Veu que cela qui fait l'homme florir
En tout bon heur, la richesse opulente,
Vient de malice, & ruse fraudulente?

Menander aussi veritablement en quelque endroict a vn peu trop hault loué & exalté la concupiscence de volupté, mesmement pour ceux qui de nature sont chauds, aspres, & d'eux mesmes subiects à l'amour:

Tout ce qui est en ce monde viuant,
Et la chaleur du Soleil receuant,
Commune à tous, il est, il a esté,
Et sera serf tousiours à volupté.

Mais toutefois ailleurs il nous en destourne, & nous retire fort à l'honnesteté, refrenant l'insolence de l'impudicité, quand il dit,

La volupté de deshonneste vie,
Tousiours en fin de reproche est suiuite.

Ces derniers propos sont à demy contraires aux premiers, mais bien sont il meilleurs & plus vtils: ainsi cest approuchement de propos contraires, en les considerant ainsi l'un deuant l'autre, fera l'un des deux effects, car ou il attirera les ieunes gens à ce qui sera le meilleur, ou pour le moins il osterà & diminuera de la foy aux pires. Mais si d'aduéture les Poetes ne baillent eux mesmes les responses & solutions à quelques propos estranges qu'ils diront, il ne sera pas mauuais de leur opposer les sentences contraires d'autres hommes illustres, pour les mettre à l'esprouue de la balance à l'encontre des meilleurs: comme, pour exemple, le Poëte Alexis eueut à l'aduenture quelques vns par ces vers,

Si l'homme est sage, il doit de tous costez
Aller faisant amas de voluptez,
Dont il y a trois especes notables
A conseruer la vie profitables:
La premiere est, manger: & la deuxiesme,
Boire: Venus vient apres, la troisieme:
Outre cela, toute fruition
D'aïse, se doit nommer acceffion.

Mais il leur faut à l'opposite ramener en memoire ce que le sage Socrates souloit dire, que les hommes vicieux viuent pour manger & pour boire, mais que les gents de bien boiuent & mangent pour viure. Et semblablement à l'encontre du Poëte qui dit,

Contre vn meschant meschanceré est bonne:

commandant par maniere de dire, que lon se rende semblable aux meschans: on peut opposer ceste notable response de Diogenes, lequel interrogué, Comment on se pourroit le mieux venger de son ennemy, respondit, En se rendant soy mesme homme de bien & d'honneur. Et faut aussi vser de la prudence de Diogenes à l'encontre de Sophocles, lequel a emply vn milion d'hommes de desespoir par ces vers qu'il a escrits touchant la religion & confrairie des mysteres de Ceres,

O tresheureux les enfans des Confreres,
Qui aians veu les secrets des mysteres
Vont aux enfers. Il n'y a que ceux là
Qui puissent estre en vie pardela:

Les autres

A Les autres tous deuallans y endurent
Des grefs tourments, qui fans fin tousiours durent.

Diogenes ayant ouy ce propos, demanda tout haut, Qu'est ce que tu dis? le larron Patacion estant decedé, aura il plus heureuse condition de son estre apres ceste vie, que n'aura Epaminondas, seulement pour ce qu'il aura esté de la religion & de la confrairie des mysteres? Car à Timotheus en plein Theatre, où il chantoit vn sien poëme qu'il auoit composé à la louange de Diane, & l'appelloit par les surnoms que les Poëtes ont accoustumé de luy bailler, Furieuse, Insensee, enragee, forsenée: Cinefias respondit sur le champ tout hautement, Que puisses tu auoir vne fille qui soit telle. Aussi fut-ce bien gentiment respondu à Bion à l'encontre de ces vers de Theognis,

L'homme ne peut faire ne dire rien,
Quand paureté l'estraint en son lien,

B. Et a sa langue au palais attachee:

Comment doncques babilles tu tant, veu que tu es pauvre, & nous romps la teste de ton caquet? Aussi ne faut-il pas omettre les occasions des paroles & sentences adjacentes ou meslees parmy les propos que nous cognoissons meriter d'estre corrigez: mais tout ainsi que les medecins disent que la mousche cantharide est bien vn mortel poison, & toutefois que les ailes & les pieds ont force d'aider au contraire, & de dissoudre sa mortelle puissance: aussi les dictz des Poëtes vn seul nom, ou vn seul verbe, mis aupres de ce que lon a peur qui nuise, rendra bien souuent plus debile & plus foible sa force de tirer le lecteur à mal: au moien dequoy il s'y faut attacher, & plus amplement declarer la signification desdicts mots: comme pour exemple, aucuns font en ces vers icy,

C'est l'ordinaire aux humains malheureux,

Tondre leur chef, & larmoyer sur eux.

Chetifs humains sont à misere nez,

Et à tous maux par les Dieux destinez.

Et en ceux-cy,

Car le Poëte ne dit pas absoluëment aux humains que les Dieux ayent predestiné de viure en douleur & malheur, mais il le dit aux fols & eceruelez, lesquels estans ordinairement cauteleux & miserables pour leurs meschancetez, il a accoustumé d'appeller Deilous & Oïzyrous. Il y a encore vn autre moien de diuertir & destourner les intelligences des propos poëtiques en bonne part, lesquels on pourroit autrement prendre en mauuaise, par l'interpretation de la signification, en laquelle ils ont accoustumé de prendre les mots: à quoy il vaut mieux exercer les ieunes escholiers, que non pas à l'intelligence de certaines paroles obscures que nous appellons glottas, pour ce que cela est plein de grand sçauoir, & de delectation, comme de sçauoir pourquoy ce mot Rignedane aux Poëtes signifie malle mort, c'est pour autant que

δειλός & οἰζυρός.

D les Macedoniens appellent la mort Danos: & les Æoliens appellent la victoire que lon gaigne par patience & par continuation de perseuerance, Cammonie: les Dryopiens appellent les Dieux, Popi. Cela est vtile, & du tout necessaire, si nous voulons receuoir vtilité, non pas dommage, de la lecture des Poëtes, sçauoir comment & en quelle signification ils vsent des noms des Dieux, & aussi des appellations, c'est à dire, dictions qui signifient biens & maux, & que c'est qu'ils entendent quand ils nomment Psyschen, c'est à dire, l'ame: & Mceran, c'est à dire la destinee, & si ce sont termes qui ne se prennent qu'en vne signification, ou en plusieurs, en leurs escripts, comme beaucoup d'autres. Car ce mot Oicos signifie aucunesfois la maison où lon demeure, comme quand il dit,

πρὸ δανή.

καμμόνιον ποπῶν.

ψυχὴν. μοῖραν. οἶκος.

En la maison au comble haut leué:

Aucunesfois il signifie le bien, & le reuenue, comme là où il dit,

Οἶκος. 8.

Comment il faut lire les Poetes.

- Odyss. 4. Journellement ma maison on me mange. E
 Et ce mot Bios, c'est à dire vie, aucunesfois se prent pour viure, comme en ce vers,
 βίος.
 Iliad. 13. Luy voulant mal Neptune, par enuie,
 Diminua la pointe de sa vie.
 Et aucunesfois il signifie les facultez & les biens,
 Et ce pendant d'autres mangent ma vie.
 Odyss. 13. αλύν. Ce terme aussi Alyin, il le prent aucunesfois pour estre fasché & ennuyé, comme
 quand il dit,
 Iliad. 5. Ainsi parla, mais elle mal contente
 Se departit, en son cueur fort dolente.
 Quelquesfois il signifie se resjouir & se glorifier:
 Te glorifies tu
 Odyss. 18. Pour vn belistre Irus auoir battu?
 ῥαζ. Et Thoazin aucunesfois signifie, se mouuoir impetueusement, comme quand Euripides dit, F
 De l'Ocean se mouuant la baléne.
 & signifie aussi se seoir & se reposer, comme quand Sophocles dit,
 Mes beaux amis, quelle est l'occasion
 De ceste vostre estrange session?
 Que veulent dire alentour de vos testes
 Rameaux de ceux qui viennent aux requestes?
 C'est aussi fait dextrement, que d'accommoder la signification & l'usage des paroles
 aux choses qui se presentent, ainsi comme les Grammairiens enseignét, que les mots
 prennent diuerse signification selon la diuersité de la matiere subiecte: comme,
 La nef petite entre les autres prise,
 Mais en la grand' charge ta marchandise.
 Car ce mot Ænin en ces vers signifie Epænin, c'est à dire, louer: mais louer en ce G
 αἰνεῖν, lieu là vaut autant à dire comme, refuser ou reietter: ne plus ne moins qu'en vne
 ἐπαμνεῖν. cōmune façon de parler nous auons accoustumé de dire, Cela va bien, ou, bon prou-
 luy face, quād nous ne voulons point de quelque chose, ou que nous ne l'acceptons
 point: aussi disent aucuns, que Proserpine pour ceste cause a esté appelée Epænen,
 pour ce que c'est vne Deesse qui est à reietter. Laquelle difference & diuersité de
 signification des vocables il conuient obseruer premierement és plus grandes cho-
 ses, & qui sont de plus grande consequence, comme és noms des Dieux: & pour ce
 commencerons nous à enseigner aux ieunes gents, que les Poètes vsent des noms
 des Dieux, entendans aucunesfois leur essence mesme, & aucunesfois les forces &
 puissances que ces Dieux la donnent, ou ausquelles ils president, appellans ces deux
 choses par vn seul mesme mot: comme, pour exemple, quand Archilochus faisant
 sa priere dit, H
 Sire Vulcain escoute ma demande,
 En m'ottroyant ce que ie te demande
 A deux genous: & me donne les biens
 Que quand tu veux tu peux donner aux tiens.
 il est tout euident qu'il inuoque là le Dieu propre: Mais là où parlant du mary de
 sa seur, qui auoir esté noyé en la mer, il dit qu'il eust porté plus patiemment sa
 calamité,
 Si Vulcain eust son chef & corps aimé
 Dedans ses beaux vestemens consumé:
 il entend du feu, & non pas de l'essence du Dieu. Pareillement Euripides disant
 en son iurement,

Par

A Par Iupiter les astres regissant,
Et Mars de sang espandu rougissant,
il est bien certain qu'il parle des Dieux: mais quand Sophocles dit,
Mars est aueugle, ô Dames, & sans yeux,
Rompant tout comme vn sanglier furieux,
il faut entendre là de la guerre: ne plus ne moins qu'il le faut prendre pour le fer en
ce lieu d'Homere,

Dont Mars trenchant au long du clair Scamandre

Iliad. 7.

A maintenant le noir sang fait esandre.

Comme ainsi soit doncques, qu'il y a plusieurs termes & vocables doubles, aians plusieurs diuerfes significations: il faut entendre & retenir, que par ces mots Dios & Zenos, qui signifient Iupiter, les Poetes entendent aucunesfois le Dieu en son essence, & quelquefois la fortune, & quelquefois la fatale destinee: car quand ils disent,

B O Iupiter regnant sur le mont Idé:

Iliad. 3.

Et ailleurs,

O Iupiter qui est plus que toy sage?
ils parlent en ces lieux là, & autres semblables, du Dieu: mais quand en discourant des causes des choses qui se font, il vient à les nommer, en disant,

D'hommes vaillants elle ietta grand nombre,

Iliad. 5.

Auant leur temps, en la tenebreuse vmbre

Des creux enfers. le vouloir tel estoit

De Iupiter qui cela promettoit.

en ce lieu là il entend par Iupiter la fatale destinee. Car il n'est pas vray semblable que le poete pensast, que Dieu autrement machinast du mal aux hommes, mais bien veut-il en passant donner à entendre, que la necessité des choses humaines est telle, qu'il est fatalement predestiné à toutes villes, toutes armées, & tous Capitaines, fils
C font bien sages, que leurs affaires aussi necessairement prospereront, & qu'ils viendront en fin au dessus de leurs ennemis: mais si au contraire, se laissans aller à leurs passions, & tombans en erreurs, ils viennent à auoir des differents, & à entrer en querelles les vns contre les autres, cōme feirent ceux-cy, il est force qu'il en soude tout trouble, tout desordre, & que finalement l'issue n'en vaille rien:

Conseils qui sont à mal faire obstinez,

A porter fructs tels sont predestinez.

Et toutefois quand Hesiodé fait que Prometheus conseille à Epimetheus son frere,

Au 2. liure
des œuues

Ne reçoÿ dons que Iupiter t'enuoye

Du ciel en terre, ainçois les luy renuoye:

il vse là du nom de Iupiter, voulant signifier la puissance de fortune: car il appelle tous les biens de fortune dons de Iupiter, comme richesse, mariages, estats, & tous

D autres biens exterieurs, dont la possession est inutile à ceux qui n'en sçauent pas bien vser: & pourtant estimoit il que Epimetheus estant homme de nulle valeur, & sans entendement, deuoit craindre & euitertoutes telles prosperitez de la fortune, comme voyant bien qu'il estoit pour en receuoir honte, perte & dommage, plus tost qu'autrement. Et semblablement quand il dit,

N'ayes le cuer de iamais à personne

Au 2. liure

La pauureté reprocher que Dieu donne.

il appelle là manifestement, don de Dieu, vne chose fortuite, n'estimant pas que ce soit reproche, que lon doïue mettre deuant le nez à vn homme, qu'il soit par cas de fortune pauvre: mais bien que la pauureté qui procede de paresse, de lascheté, d'oisiveté, ou bien de folle des pense, & de superfluité, soit reprochable & honteuse. Car n'ayans pas encore lors ce mot de Fortune en vsage, & neantmoins cognoissans

Comment il faut lire les Poetes.

desia bien que la puissance de celle cause variante, inconstamment & incertainement ne se pouuoit pas euitier par discours d'entendement humain, ils exposoient cela, & le declaroient comme ils pouuoient par les noms des Dieux, ne plus ne moins que nous en commun langage appellons quelquefois des affaires des meurs, & natures de personnes, des propos, & des hommes mesmes celestes & diuins. Voila vn expedient & moien pour foudre & corriger plusieurs sentences, qui semblent de prime face impertinemment & importunement dites de Iupiter, comme sont celles cy,

Iliad. 24.

Iupiter a sur le fucil de sa porte
Deux tonneaux pleins de l'une & l'autre sorte
De sorts, dont l'un est remply des heureux,
L'autre contient ceux qui sont malheureux.

Et ceste-cy,

Iliad. 7.

Le haut tonnant ne voulut pas conduire
A bonne fin leurs serments, mais pour nuire
Autant aux vns qu'aux autres, leur transmeit
Signes du ciel, dont en erreur les meit.

F

Odyss. 8.

Et, De là fourdit aux Troyens & aux Grecs
Le mal qui tant leur causa de regrets:
Pour ce qu'ainsi à Iupiter plaisoit,
Qui tellement fourruoyer les faisoit.

Car tout cela se doit entendre de la Destinee fatale, ou de la Fortune, les causes desquelles sont incomprehensibles à nostre entendement, & ne sont du tout point en nostre puissance. Mais là où il y a chose conforme à la raison & à la semblance de verité, là estimons nous que proprement il entende Dieu quand il nomme Iupiter, comme en ces passages icy,

Iliad. 10.

Par les squadrons des autres il alloit,
Mais rencontrer Ajax il ne vouloit,
Car Iupiter a en haine celui,
Lequel s'attache à vn plus fort que luy.
Et ailleurs,

G

Iupiter est des grands cas soucieux,
Mais les petits il laisse aux Demy-Dieux.

ἀρετή.

Aussi faut-il auoir bien soigneusement l'œil aux autres dictions, qui se tournent & transferent à signifier plusieurs choses diuerses, & qui se prennent diuersement par les Poëtes, comme est entre autres ce mot Areté, c'est à dire, vertu: car pour ce que non seulement elle rend les hommes sages, prudents, iustes & bons, tant en faicts qu'en dictz, mais aussi ordinairement leur acquiert honneur, gloire & autorité, à ceste cause ils appellent souuent Areté glorieuse renommee & puissance, ne plus ne moins qu'ils appellent Elæa, c'est à dire l'oliue, & Phegos la fouïne, du mesme nom que les arbres qui les portent: & pourtant quand le ieune homme trouuera en lisant les Poëtes ces passages,

*Hesiod. 4s
œuvres.*

Les Dieux ont mis la sueur au deuant
De la vertu.

Iliad. 10.

Et, Lors les Gregeois rompirent par vertu
Des ennemis le squadron combatu.
Et, S'il faut mourir, honorable est la mort

Quand par vertu du monde ainsi lon sort.

qu'il pense incontinent que cela est dit de la meilleure, plus excellente, & plus diuine habitude qui puisse estre en nous, laquelle nous entendons que ce soit droiture de raison & de iugement, la cyme de nature raisonnable, & vne disposition de l'ame consentant

H

A consentant & s'accordant avec soy-mesme. Mais quand au contraire il viendra à lire ces autres lieux icy,

C'est Iupiter qui fait la vertu croistre,
Comme il luy plaist, és hommes, & décroistre.
Gloire & vertu vont apres la richesse.

Et cestuy cy;

Iliad. 20

qu'il ne demeure pas pour cela esblouy d'esbahissement de l'heur des riches, & s'en emerveillant comme fils auoient incontinent avec leur richesse la vertu achetee à pris d'argent, ny ne se persuade pas qu'il soit en la puissance de Fortune, augmenter, ou raccourcir & diminuer sa prudence, ains estime que le Poete aura là vsé du nom de vertu pour signifier honneur, autorité, prosperité, ou quelque autre chose semblable: ne plus ne moins que ce mot κακότης, c'est à dire, malice, se prent aucunesfois par eux en sa propre signification, pour la mauuaistié ou meschanceté de l'ame, comme quand Hesiodé escrit,

B De la malice on en treuve à foison.

Au 1. des
ceures.

aucunesfois il se prent pour quelque autre mal ou malheur, côme quand Homere dit,
Les hommes tous vieillissent en malice.

Car celuy s'abuseroit grandement qui se persuaderoit, que les Poetes prissent beatitude & l'entendissent precisément, comme font les Philosophes pour vne habitude parfaite, & vne possession entiere de tous biens, ou bien pour vne perfection de vie coulante heureusement selon nature, pour ce que bien souuent ils en abusent en appellant l'homme opulent en biens, heureux, & en nommant puissance, honneur, & autorité, beatitude & felicité. Homere a bien vsé proprement de ces termes en ces vers,

Odyss. 19.

Pour posseder vne grande cheuance

Je n'ay point plus au cœur d'esjouissance.

Odyss. 4.

aussi fait Menander, quand il dit,

De tout auoir i'ay chez moy grande somme;

Et pour cela chacun riche me nomme,

Mais bien-heureux pas vn seul ne m'appelle.

Et Euripides fait vn grand trouble, & vne grande confusion, quand il dit ainsi,
Ia ne me soit donnee vie heureuse,

Pour estre aussi ensemble douloureuse.

Et en autre lieu,

Pourquoy vas-tu honorant tyrannie,

Qui est heureuse iniustice, & benie?

En la
tragédie de
Medee.

Si ce n'est que lon prenne les termes par translation, en autre signification qu'en leur propre. Mais à tant c'est assez parlé de ce propos. Au reste il ne faut pas recorder vne fois seulement, mais plusieurs, aux ieunes gens, & leur remettre souuent deuant les yeux, que la Poésie ayant pour son propre subiect l'imitation, vsé d'ornement & d'enrichissement, en escriuant les choses qui se presentent à elle, & les meurs & naturels des personnes, mais toutefois elle n'abandonne point la semblance de verité, pource que l'imitation delecte le lisant, d'autant qu'elle tient du vray semblable: & pourtant l'imitation qui ne veut pas de tout poinct se departir de la verité, exprime les signes de vice & de vertu, qui sont meslez parmy les actions: comme fait celle d'Homere, laquelle ne s'arrestant aucunement aux estranges opinions des Stoïques, qui disent qu'il ne peult auoir rien qui soit de mal conioinct avec la vertu, ny aussi de bien avec le vice, ains que du tout, en tout & par tout l'ignorant fault & peche tousiours, & au contraire aussi, que le sage fait tousiours & en toutes choses bien. Car ce sont les opinions des Stoïques, que lon dispute par les escholes: mais aux affaires de ce monde, & en la vie des hommes, ainsi que dit Euripides,

Possible n'est que le mal de tout poinct

D'avec le bien, non meslé, soit desioint;

Comment il faut lire les Poetes.

ains y a tousiours meſlange de l'un avec l'autre. Mais ſans verité la poëſie uſe fort de E
 varieté & de diuerſité: car les diuerſes mutations ſont celles qui donnent aux fables
 la force de paſſionner les liſans, & qui ſont les eſtranges euenements, & contre l'opi-
 nion de ceux qui les liſent, en quoy conſiſte le plus grand eſbahiffement, & dont
 procede le plus de plaifir: au contraire, ce qui eſt ſimple & vniforme n'apporte point
 de paſſion, & n'y a point de fiction: d'où vient que les Poetes ne ſont iamais que
 meſmes hōmes gaignent tousiours, ne qu'ils ſoient tousiours heureux, ne que tous-
 iours ils facent bien: qui plus eſt, quand ils faignent que les Dieux meſmes ſ'entre-
 mettent des affaires des hommes, ils ne les ſont pas ſans paſſion, ny exempts d'erreur
 & de faute, de peur que ce qui paſſionne, & qui tient ſuſpendus en admiration les
 cœurs des hommes en la Poëſie, ne demeure oïſif & amorty, ſil n'y auoit aucun dan-
 ger, ny aucun aduerſaire. Cela eſtant ainſi, menons le ieune homme à lire les cœuvres
 des Poetes: non eſtant preueni de telles opinions touchant ces grands & magnifi-
 ques noms là des anciens, comme ſils auoient eſté ſages, iuſtes & vertueux Roys en F
 toute perfection, & par maniere de dire, la regle de toute vertu & de toute droiture:
 car autrement, il en rapportera grand dommage, ſil y va avec ceſte opinion de trou-
 uer tout bon ce qu'ils diront, & de l'admirer, & non pas d'en hair aucuns, & approu-
 uer celui qui blaſme ceux qui ſont ou qui diſent de telles choſes:

Iliad. 16. O Iupiter, Apollo, & Minerue,
 Que nul des Grecs ſa vie ne preferue,
 Ny des Troiens: mais que nous eſchappions
 La mort, à fin que tous ſeuls nous ſappions
 Les hautes tours & murailles de Troie.

Odyſſ. 18. Et, J'ay entendu la voix treſpitoyable
 De Caſſandra, la fille miſerable
 Au Roy Priam, que ma femme traïſtreſſe
 Clytemneſtra, en cruelle deſtreſſe
 A fait mourir, pour vne ialouſie
 D'elle & de moy, dont elle eſtoit faiſie.

Iliad. 9. Et, De me meſſer avec la concubine
 A mon vieil pere, à fin que la maſtine
 En euſt apres en haine le vieillard,
 Ce que ie creus, & fus laſche paillard.

Iliad. 3. Et, Iupiter pere, il n'y a Dieu aux cieus
 Qui ſoit autant que toy pernicieux.

Le ieune homme ne ſ'accouſtume point à iamais louër aucun propos ſemblable, ny
 n'aïlle point cherchant aucunes couuertures pour l'excuser, ny ne ſ'eſtudie point à H
 inuenter des deſguiſemens coulerez pour maſquer des choſes infames & vilaines,
 à fin de monſtrer la ſubtilité & viuacité de ſon eſprit: mais plus toſt, qu'il eſtime que
 la Poëſie eſt vne imitation d'hommes, de meurs, & de vies non entierement parfait-
 tes, ou du tout irreprehenſibles, ains meſſees de paſſions, de faulſes opinions, & d'i-
 gnorance, mais qui bien ſouuent par la dexterité & bonté de leur nature reuien-
 nent à ce qui eſt le meilleur. Quand le ieune homme ſe ſera ainſi préparé, & aura ainſi
 informé & inſtruiſt ſon entendement, de maniere que les choſes bien faites &
 bien dites luy emouueront le cœur, & l'affectionneront: & au contraire, les mau-
 uaiſes luy deſplairont, & le faſcheront: ceſte inſtruction de ſon iugemēt fera, que ſans
 aucun danger il pourra lire & ouïr toutes ſortes de liures poetiques. Mais celui qui
 admire tout, qui ſ'appriuoïſe à tout, & qui a deſia le iugement aſſeruy par la magni-
 ficence de ces grands noms heroïques, ne plus ne moins que ceux des diſciples de
 Platon,

A Platon, qui contrefaisoient les hautes espaules de leur maistre, & le beguoyement d'Aristote, ne se donnera garde qu'il se laissera trop aisément aller à des choses mauvaises. De l'autre costé aussi ne faut-il pas faire comme les superstitieux, qui quand ils sont en vn temple, craignent effroyement tout, & adorent tout: ains faut hardiment prononcer autant ce qui est dit importunément & meschamment, que ce qui l'est bien & sagement. Comme, pour exemple, Achilles voyant les gens de guerre tous les iours tomber malades, se faschant de voir la guerre aller ainsi en longueur, luy principalement qui auoit si grand renom & si grande reputation en la guerre, assemble le conseil: mais d'auantage estant homme sçauant en la medecine, & voyant apres le neuvième iour, qui est critique, c'est à dire, auquel se fait la iudication de la conualescence, ou de la mort, que ce n'estoit point vne maladie ordinaire, ny contractée des causes accoustumées & communes, il se dresse en pieds pour parler, non pas au commun peuple, ains pour donner conseil au Roy, en disant,

B Fils d'Atreus, il fera necessaire

De retourner, ce croy-ie, sans rien faire.

Iliad. 2.

Il dit cela sagement & modestement, & luy seoit bien de le dire: mais là où le deuin dit, qu'il redoute le courroux du plus puissant de tous les Grecs, Achilles luy respōd alors, non plus sagement ny modestement, en iurant, que nul, tant comme il seroit viuant ne luy mettroit la main sur le collet: & y adioustant d'auantage, non pas si tu disois Agamemnon mesme: montrant en cela vn mespris & vn contemnement de celuy qui auoit l'autorité souueraine: & passant encore outre en fureur de cholere, il met la main à l'espee, en volonté de le tuer: ce qui n'eust esté ny sagement, pour son honneur, ny vtilement fait à luy: & puis s'en repentant soudain,

Dans le fourreau son espee il remeit,

Minerue au cœur ce bon conseil luy meit.

En quoy il fait bien & honnestemēt, que n'ayant peu de tout point retrencher sa cholere, au moins la modera-il, & la reteint sous l'obeissance de la raison, auant que de commettre aucun excès, auquel il n'y eut point eu de remede. Pareillement aussi Agamemnon, en ce qu'il fait & qu'il dit en l'assemblee du conseil, est digne de mocquerie: mais en ce qu'il ordonne touchant Chryseïs, est plus venerable, & maintient plus sa maiesté Royale. Car Achilles, ce pendāt que lon luy enléue la belle Chryseïde,

Loing de ses gens se retirant à part,

S'en va plorer chaudement à l'esquart.

Mais Agamemnon conduisant luy mesme la sienne iusques dedans la nauire, la liurant & la renuoyant à son pere, celle que n'agueres il auoit dit, qu'il l'aimoit plus cherement qu'il ne faisoit sa propre femme espousée, il ne fit rien indigne de luy, ne qui sentist son homme passionné d'amour. Et au contraire, Phœnix estant maudit par son pere, à cause de sa concubine, dit ces propos,

D Je fus en train d'aller tuer mon pere,
Mais quelque Dieu refrena ma cholere,
Me remontrant comme ma renommee
En demourroit à iamais diffamee
Entre les Grecs, par lesquels interdit
Nommé serois parricide maudit.

Iliad. 9.

Aristarchus aiant en horreur telle abomination, osta ces vers en Homere. Mais ils ne sont pas mal à propos en celieu là, pource que Phœnix en cest endroit là enseigne à Achilles, comme la cholere est vne violente passion, & comme il n'est chose que les hommes n'osent commettre quand ils sont enflammez de courroux, quand ils ne veulent pas vser de raison, ny croire ceux qui les addoucissent. Car il introduit Meleager qui se courrouce à ses citoyens, & puis apres se rappaise, reprenant en cela

Comment il faut lire les Poetes.

& blasfant sagement les passions, mais louant aussi ceux qui ne sy laissent point aller, ains y resistent, & les maistrisent, & s'en repentent, comme estant chose honneste & vtile. Il est vray qu'en ces passages là, la difference est toute euidente & manifeste, mais là où il y a quelque obscurité & incertitude de la sentence & intelligence des propos, il faut arrester le ieune homme en cest endroit là, & luy enseigner à faire vne telle distinction: Si Nausicaa voiant Vlysses homme estrange, s'eschauffa de la mesme passion qu'auoit fait Calypso enuers luy, comme celle qui ne demandoit que son plaisir, estant desia en aage de marier, & dit follement ces parolles à ses chambrières,

Odyss. 6. Pleust or à Dieu qu'un tel mary me vint,
Et qu'avec moy volontiers il se tint.

son audace & son incontinence est à reprendre: mais si par les propos d'Vlysses aiant apperceu qu'il estoit homme de bon sens & de bon entendement, elle souhaite plus tost estre mariee avec luy, qu'avec vn de son pais qui ne sceust que baller, ou voguer sur la mer, en ce cas elle seroit digne de louer. Au cas pareil quand Penelope deuise gracieusement & courtoisement avec les pourfuyans qui la demandoient en mariage, & que eux à l'encontre luy donnent des habillemens, ioyaux d'or, & autres ornemens à parer les Dames, Vlysses s'en resiouissant,

Odyss. 18. Il leur tiroit des dons de dessous l'aile,
Et en prenoit son plaisir avec elle:

fil s'esjouissoit de ce que sa femme receuoit des dons, & qu'il prenoit plaisir au gaing qu'il y auoit, il surpassoit en maquerellage le Polyager qui est tant mocqué & picqué par les Poëtes comiques,

Polyager a bon heur qui luy rit,
C'est pourautant que chez luy il nourrit
Du ciel la chéure, & par son influence
Il reçoit biens mondains en affluence.

Mais fil le faisoit pource qu'il esperoit par ce moien les auoir mieux sous sa main, & moins se doutans de ce qu'il leur gardoit, en ce cas son esjouissance & son assurance estoient fondees en raison. Semblablement aussi au denombrement qu'il fait des biens que les Phæaciens auoient exposez avec luy sur le riuage, & puis auoient fait voile, si veritablement en telle solitude & en telle incertitude de l'estat où il se trouue, il a peur de son argent & de ses biens,

Odyss. 13. Qu'ils ne s'en soient ainsi allez d'emblee,
Pour luy auoir aucune chose emblee:

il est, à l'adventure, plus digne de commiseration que de detestation, pour auarice. Mais si, comme aucuns pensent, n'estant pas assuré qu'il fust en l'Isle d'Ithace il estime que la conseruation de ses biens & de son argent soit vne certaine preuue & demonstration de la legalité & saincteté des Phæaciens, pource que autrement ils ne l'eussent pas ainsi transporté en terre estrange sans y auoir profit, & ne l'eussent pas laissé là en s'en allant sans toucher à rien du sien, il n'vse pas en cela de mauuais indice, & est sa prouidence en ce fait digne de louange. Il y en a bien quelques vns qui blasment mesme ceste expositio de luy sur le riuage, fil est vray qu'elle fust faite par les Phæaciens luy dormant: & dit-on que les Tyrrheniens en gardent ne sçay quelle histoire, par laquelle il appert que Vlysses de sa nature aimoit fort à dormir, & que pour ceste cause, bien souuent on ne pouoit pas parler à luy: mais si le sommeil n'estoit pas veritable, & que aiant honte de renvoyer les Phæaciens qui l'auoient amené, sans les festoyer chez luy, & leur faire des presens, & ne pouuant faire qu'il ne fust descouuert & cogneu par ses ennemis, ils demouroient avec luy, il vsa de ce pretexte pour couvrir & celer sa perplexité de ne sçauoir comment il deuoit faire, en faisant

A en faisant semblant de dormir, en ce cas ils l'approuuent. En donnant doncques de tels aduertissemens aux enfans, nous ne les laisserons point tomber en corruption de meurs, ains plus tost leur imprimerons vn zele & vn desir des choses meilleures, en leur louant ainsi les bonnes, & blasmant les mauuaises. Ce que principalement il conuient faire és Tragedies, là où bien souuent il y a des propos affetez, & paroles fines & malicieuses sur des actes vilains & deshonestes. Car ce que dit Sophocles en vn passage n'est pas vniuersellement vray,

On ne scauroit parler honnestement

De ce qui est fait deshonestement.

Car luy mesme bien souuent en de mauuaises natures, & en faicts reprochables, a accoustumé de les pallier avec certains propos rians & raisons apparentes: & son compaignon Euripides, tout de mesme, ne voyons nous pas qu'il fait, que Phedra accuse Theseus de son forfait d'elle mesme, disant que c'est à cause de ses meschancetez

B qu'elle est deuenue amoureuse d'Hippolytus: & si donne vne semblable audace à Helene en la Tragedie des Troades contre la Royne Hecuba, disant que c'estoit celle qui auoit plustost meritè d'estre punie, pour ce qu'elle auoit enfanté Alexandre Paris son adultere? Le ieune homme doncques ne doit point prendre coustume de trouuer telles inuentions galantes ny de bon esprit, & de rire à telles subtilitez & telles arguces de deuis, ains de hair autant ou plus les paroles d'intemperance & de dissolution, que les faicts mesmes. Parquoy en tous propos il sera tousiours bon d'en rechercher la cause, ne plus ne moins que faisoit Caton quand il estoit encor ieune enfant: car il faisoit tout ce que son pedagogue luy commandoit, mais il luy demandoit tousiours la cause & la raison de chascun commandement: mais aux Poetes il ne faut pas croire tout, comme lon feroit ou à des Pedagogues, ou à des Legislateurs, si la matiere fuiette n'est fondee en raison, & elle sera fondee en raison lors qu'elle sera bonne & honneste: mais si elle est meschante, alors elle deura sembler folle &

C vaine. Or y ail des gents qui demandent & recherchent asprement & curieusement que c'est qu'a voulu dire Hesiodé en ces vers,

Ne mets le pot au dessus de la tasse.

Le cheualier de son char demonté,

Qui sur celuy d'autre sera monté,

Combatte avec la forte iauceline.

Et Homere en ceux cy, *Iliad. 4. & 5.*

Et des autres choses qui sont bien de plus grande consequence, ils en recoiuent la creance legerement, sans rien enquerir ny examiner: comme sont ces propos icy,

Qui sent son pere ou sa mere coupable

De quelque tare, ou faute reprochable,

Cela de cœur bas & petit le rend,

Combien qu'il l'eust de sa nature grand.

Et cestuy-cy,

D Celuy qui a la fortune aduersaire,

Doit abaisser son courage haulsaire.

Euripide en
la tragedie
d'Hippolyte

Et autres telles sentences, lesquelles touchent aux meurs, & troublent la vie des hommes, leur imprimans de mauuais iugemens, & des opinions lasches, qui n'ont rien del'homme magnanime, si ce n'est que nous nous accoustumions à leur contredire à chascun point, en ceste maniere: Pourquoi est-il besoing, que celuy qui a fortune contraire abaisse son courage, & non plus tost qu'il s'eleue contre elle, & se maintienne haut, & non subiect à estre rabaisé ny rauallé par les accidents de la fortune? Et à quelle cause, pour estre né d'un pere fol ou vicieux, faut-il que i'aye le cœur abatu, si ie suis homme de bien & sage? Est-il plus raisonnable, que l'ignorance & faute de mon pere me tienne bas & n'osant leuer la teste, que ma propre valeur & vertu me hausse le courage? Car celuy qui resiste faisant de telles oppositions à l'encontre,

Comment il faut lire les Poetes.

& ne donne pas le flanc, par maniere de dire, à tout propos, comme à tout vent, ains E
estime que ceste sentence de Heraclitus soit sagement ditte,

Vn homme simple festonne de tout ce qu'il oit dire.

ccluy la, dis-ie, reboutera & reiettera plusieurs propos des Poëtes, qui ne feront
ny profitables ny veritables. Ces obseruations donc feront, que le ieune homme
pourra ouïr & lire sans danger les Poëtes. Mais pourautant que ne plus ne moins
qu'en la vigne le fruiet bien souuent est caché deffous les pampres & les branches, de
forte que lon ne le voit point, à cause qu'il est tout couuert: aussi en la diction poëti-
que & parmy les fables & fictions des Poëtes, il y a beaucoup d'aduertissemets vtiles
& profitables, que le ieune homme ne peult appercevoir de luy mesme, & neant-
moins il ne faut pas qu'il s'en escarte, ains qu'il s'attache fermement aux matieres qui
peuuent seruir à le dresser à la vertu, & qui peuuent luy former ses meurs. Il ne sera
pas mauuais de discourir vn peu sur ce propos en peu de paroles, touchant somma-
irement les choses en passant, laissant les longues narrations, confirmations, & la F
multitude d'exemples à ceux qui escriuent plus à l'ostentation. Premièrement donc-
ques, le ieune homme cognoissant les bônes meurs, & bonnes natures des hommes,
& les mauuaises aussi, qu'il prenne bien garde aux paroles & aux faictz que le Poëte
leur attribue au plus pres de ce qui leur est conuenable, comme Achilles dit a Aga-
memnon, encore qu'il le die en cholere,

Iliad. 1. Iamais à toy pareille recompense
Je n'ay, non pas quand des Grecs la puissance
Vn iour aura la grande Troie prise.

Mais Therfites tensant le mesme Agamemnon dit,

Iliad. 2. Du cuyure à force il y a en ta tente,
Mainte captiue en beauté excellente,
Dequoy les Grecs vn present te feront
Premier de tous, quand pris Troie ils auront.

Et derechef Achilles, G

Iliad. 1. Si Iupiter tant noz vœux fauorise,
Que par nous soit Troie la grande prise. Et Therfites,

Iliad. 2. Que prisonnier i'ameneray lié,
Moy, ou des Grecs quelqu'un autre allié.

Semblablement en la reueuë de l'armee que fait Agamemnon, passant au long de
toutes les bandes, il tanse Diomedes, lequel ne luy respond rien,

Iliad. 4. Du Roy portant à la voix reuerence.

Mais Sthelenus, dont il ne faisoit point de compte, luy replique,

Fils d'Atreus ne dis parole vaine,
Veu que tu sçais la verité certaine:
Nous nous vantons de valoir beaucoup mieux,
Que n'ont iamais fait tous noz peres vieux.

La difference qu'il y a entre ces personnages bien remarquee instruira & enseignera H
le ieune homme, que c'est chose honneste, que d'estre humble & modeste: & au con-
traire, l'aduertira de fuïr l'orgueil & l'outrecuidance, & le parler hautainement de
foy, comme chose mauuaise. Aussi sera-il expedient & utile d'observer en ce passage
ce que fait Agamemnon, car il passe outre Sthelenus, sans s'arrester à parler à luy, mais
il ne met pas ainsi à nonchaloir Vlysses qui festoit senti picqué,

Ainsi parla, & luy rendit response,
Quand il cogneut que cholere luy fronce
La face: & l'autre apres luy repliqua.

Car de respondre à tout le monde, c'est à faire à vn poursuiuant qui fait la court, &
non pas à vn Prince qui retient sa dignité: mais aussi de mespriser tout le monde,
c'est

A c'est fait en homme superbe & fol. Aussi fait tresbien Diomedes, lequel estant repris & tanfé par le Roy, se tait, en la bataille : mais apres la bataille, il parle hardiment à luy,

Iliad. l. 9.

Tu m'as des Grecs le premier assailly,
Me reprochant d'auoir le cœur failly.

Ce sera aussi bien fait d'entendre & obseruer la difference qu'il y a entre vn homme prudent, & vn deuin, qui ne veut qu'apparoistre & se monstrier : Car Calchas ne choisit point le temps opportun, & ne se soucia point de charger publiquement deuant tout le monde le Roy Agamemnon, disant que c'estoit luy, & non autre, qui leur amenoit la pestilence. Mais Nestor, au contraire, voulant mettre en auant le propos de reconciliation avec Achilles, de peur qu'il ne semblast qu'il voulust deuant tout le peuple accuser le Roy d'auoir failly, & de sestre trop laissé transporter à sa cholere, il l'admoneste,

Iliad. l. 12.

B Donne à disner aux Seigneurs de grand aage,
Venir t'en peut tout honneur sans dommage :
L'aduis adonc de plusieurs tu prendras,
Et au meilleur sagement te tiendras.

Iliad. l. 13.

Puis, apres le souper, il enuoye ses Ambassadeurs. L'une de ces deux diuerses façons de faire est, dextrement r'habiller vne faute : l'autre est, iniurieusement accuser & faire honte à vn homme. D'auantage il faut aussi noter la diuersité qu'il y a entre les nations, qui est de telle sorte. Les Troyens courent sus à leurs ennemis avec grands cris & fierté grande, & les Grecs avec vn silence, craignans leurs capitaines : car craindre ses capitaines & ses superieurs lors que lon vient aux mains avec l'ennemy, est signe de vaillance, & ensemble de bonne discipline militaire. D'où vient que Platon conseille d'accoustumer les hommes à craindre plus tost les reprehensions & les choses laides & vilaines, que non pas les trauaux ny les dangers : & Caton disoit qu'il aymoit mieux ceux qui rougissoient, que ceux qui pallissoient. Et quant aux promesses, il y a aussi des marques propres pour recognoistre les sages d'avec les folles : car Dolon promet,

*Iliad. l. 13.
& 4.*

Tout à trauers du camp ie passeray,
Tant qu'à la nef d'Agamemnon seray.

Iliad. l. 10.

Au contraire, Diomedes ne promet rien de foy, mais il dit qu'il aura moins de peur quand il sera enuoyé avec vne autre. C'est doncques chose honneste & digne d'hommes Grecs, que la preuoyance : mais c'est chose mauuaise & barbaresque, que la fiere temerité : pourtant faut-il imiter l'une, & reietter l'autre arriere. Il y aura bien aussi quelque profitable speculation, en obseruant ce qui aduint aux Troyens & à Hector lors qu'il s'appresta pour combattre d'homme à homme contre Ajax. Æschylus estant vn iour à regarder l'esbatement des

D ieux Isthmiques, l'un des combattans à l'escrime des poings ayant receu vn grand coup de poing sur le visage, l'assemblée s'en escria tout haut : & luy se prit à dire, Voyez ce que fait l'accoustumance & l'exercitation : ceux qui regardent crient, & celui qui a receu le coup ne dit mot. Aussi le Poëte disant, que les Grecs se resiouirent grandement quand ils veirent venir Ajax sur les rangs bien armé à blanc, mais

Tous les Troyens trembloient de froide peur,
Hector en eut vn battement de cœur :

Iliad. l. 7.

qui est-ce qui avec plaisir ne remarque ceste difference ? Celui qui va pour combattre n'a que le cœur qui luy faulte, comme s'il alloit pour luiéter seulement, ou pour gagner le pris d'une course : mais tout le corps tremble & tressaut à ses gens qui le regardent, pour la peur qu'ils ont du danger de leur Roy, & pour la bonne affection

Comment il faut lire les Poëtes.

qu'ils luy portent. Il faut aussi remarquer icy la difference, qu'il y a entre le plus vaillant & le plus lasche de tous les Grecs : car quant à Therfites, E

Iliad. l. 2. Il haïssoit le preux Achilles fort,
Et vouloit mal à Vlysses de mort.

Mais Ajax aiant toujours cherement aimé Achilles, porte encore tesmoignage de sa vaillance en parlant à Hector,

Iliad. l. 7. De ce combat d'homme à homme, la preuue
Te monstrera quels champions on treuve
En l'ost Grec, outre Achilles parangon
De la prouësse, aiant cœur de lion.

Cela est vne particuliere louange d'Achilles: mais ce qui suit apres est dit à la louange de tous vniuersellement, non sans vtilité,

Nous sommes tels, que pour teste te faire

On nous verra plusieurs en auant traire. F

Car il ne se fait ny seul ny plus vaillant que les autres pour le combattre, ains dit qu'il y en a plusieurs autres suffisans pour luy faire teste. Cela doncques suffira quant à la diuersité des personnes, si nous n'y voulons d'aduenture adiouter encore cela d'auantage, qu'il y eust en ceste guerre plusieurs Troyens qui furent pris prisonniers vifs, & des Grecs pas vn: & que plusieurs d'iceux se sont abbaïssez iusques à se ietter aux pieds de leurs ennemis, comme Adrastus, les enfans d'Antimachus, Lycaon, Hector luy mesme, qui pria Achilles pour sa sepulture, mais des autres nul: comme estant chose barbare de s'humilier en bataille deuant son ennemy, & le supplier: & au contraire, valeur Grecque, de vaincre en combattant, ou bien mourir vertueusement.

Belle similitude,

Or tout ainsi comme és pasturages l'abeille cherche pour sa nourriture la fleur, la chéure la fueille verte, le pourceau la racine, & les autres bestes la semence & le fruit: aussi en la lecture des poëmes l'un en cueille la fleur de l'histoire, l'autre s'attache à la beauté de la diction, & à l'elegance & douceur du langage, ainsi comme Aristophanes parle d'Euripide, G

Car la rondeur de son parler me plaist.

Les autres se prennent à ce qui peut seruir à former les meurs, auxquels ce present traitté s'adresse. Ramenons leur doncques en memoire, que celuy qui aime les fables remarque bien ce qu'il y a de subtilement & ingenieusement inuenté: & semblablement, que celuy qui est studieux d'eloquence y note diligemment ce qu'il y a d'escript purement & artificiellement: & par ainsi qu'il n'est pas raisonnable, que celuy qui aime l'honneur & la vertu, & qui ne prent pas les Poëtes en main par maniere de ieu & d'esbattement pour passer son temps, mais pour en tirer vtile instruction, escoute negligement & sans fruit les sentences que lon y treuve, à la recommandation de la prouësse, de la temperance, & de la iustice: comme sont celles cy, H

Iliad. l. 11. Diomedes d'où vient ceste foiblesse,
Que nous mettons en oubly la prouësse?
Approche toy de moy pour faire teste:
En cest endroit reproche deshonneste
Ce nous seroit, si en nostre presence
Hector prenoit nos vaisseaux sans defense.

Car de voir le plus sage, & le plus prudent Capitaine des Grecs au danger de mourir, & d'estre perdu avec toute l'armee, redouter & craindre non la mort, mais la honte & le reproche, cela sans point de doute deura rendre le ieune homme grandement affectionné à la vertu. Et ceste-cy,

Odyss. l. 13. Minerue auoit plaisir tout euident
D'un homme iuste & ensemble prudent.

Le Poëte

- A Le Poëte fait vne telle conclusion, que la deesse Pallas ne prent plaisir à vn homme ny pour estre beau de corps, ny pour estre riche, ny pour estre fort & robuste, mais seulement pour estre sage & iuste: & en vn autre passage quand elle dit, qu'elle ne le delaisse ny ne l'abandonne point, pour ce qu'il estoit

Odyss. l. 13.

Sage, rassis, prudent & aduisé,

le Poëte nous donne clairement à entendre, que cela signifie, qu'il n'y a en nous que la vertu seule qui soit diuine, & aimée des Dieux, fil est ainsi que naturellement chaque chose se resioit de son semblable. Et pour ce qu'il semble que ce soit vne grande perfection à vn homme, comme à la verité elle l'est, pouuoir maistriser sa cholere, c'est encore vne plus grande vertu de preuenir & prouueoir à ce que lon ne tombe point en cholere, & que lon ne s'en laisse point surprendre. Il faut aussi aduertir les lisans de cela bien soigneusement, & non point en passant, comme Achilles qui de

- B sa nature n'estoit point endurant ne patient, commande à Priam qu'il se taise, & qu'il ne l'irrite point en ceste maniere,

Garde vieillard d'irriter ma cholere,
Car de moy mesme assez ie delibere
De te liurer ton fils: & puis apres,
I'en ay du ciel commandement expres.
Mais garde toy que ie ne te dechasse
Hors de ma tente, & que ie ne trespasse
Ce que mandé m'a Iupiter bruyant,
Quoy que venu tu sois en suppliant.

Iliad. liu. 24.

Et puis apres auoir lauë & ensepuely le corps d'Hector, luy mesme le met dedans le chariot, deuant que le pere le veist ainsi deschiré qu'il estoit,

- C De peur qu'estant le pere vieil attainct
D'aspre douleur, son courroux il ne teint,
Voiant le corps de son fils dechiré,
Et que cela n'eust encore empiré
Le cœur selon d'Achilles tellement
Que sans auoir egard au mandement
De Iupiter, de sa tranchante espee
Soudain la teste il ne luy eust couppee.

Car se cognoistre subiect à soy courroucer, & de nature aspre & courageux, mais en euitier les occasions & s'en garder, en preuenant de loing avec la raison, de sorte que non pas mesme mal-gré soy il ne tombast en celle passion, cela est acte de merueilleuse prouidence. Ainsi faut-il, que celuy qui se sent aimer le vin, face à l'encontre de

- D l'yurongnerie, & semblablement à l'encontre de l'amour celuy qui se sent de nature amoureuse: comme Agesilaus ne voulut pas se laisser baiser par vn beau ieune fils qui s'approcha de luy pour cest effect: & Cyrus n'osa pas seulement voir Panthea: là où, au contraire, les fols & mal-appris vont eux-mesmes amassant la matiere pour enflammer leurs passions, & se precipitent volontairement eux mesmes dedans les vices dont ils se sentent tarez, & auxquels ils sont le plus enclins. Au contraire Vlysses non seulement arreste & retient sa cholere, mais qui plus est, sentant par les paroles de Telemachus qu'il estoit vir peu aspre, & qu'il haïssoit les meschants, il l'addoucit, & le prepare de longue main, luy commandant de ne remuer rien, ains auoir patience,

Odyss. liu. 7.

Si de mespris ils me font demonstrence
En ma maison, passe tout en souffrance
Patiemment, quelque tort qu'on me face

Odyss. l. 16.

Comment il faut lire les Poetes.

Deuant tes yeux, voire si en la place
Ils me trainoient par les pieds attaché,
Ou fils auoient sur moy leur arc lasché,
Endure tout, le voyant sans mot dire.

E

Car tout ainsi, que lon ne bride pas les cheuaux cependant qu'ils courent, mais deuant qu'ils aient commencé leur course, aussi mène lon au combat ceux qui sont courageux & malaisez à tenir, apres les auoir preparez & dontez premierement avec la raison. Il ne faut pas non plus passer negligemment par dessus les dictions, non que ie vueille que lon se iouë, comme fait Cleanthes, car il se mocque bien souuent, en faisant semblant d'interpreter ces vers,

Iupiter pere au mont Ida regnant,

*Iliad. liu. 3.
& 16.*

Et, Ζεύς ἀνα δαδωνάων.

car il veut que lon lise ces deux mots d'un tenant, comme si ce n'en estoit qu'un seul qui signifiait les exhalations qui se leuent de la terre. Chrysippus aussi en beaucoup d'endroits est froid & maigre, non pource qu'il se iouë, mais pource qu'il veut subtilizer impertinemment, en forçant la signification des mots: comme quand il veut que *Εὐπλοκα Κρηίδης* signifie aigu en dispute, & transcendât en force d'éloquence. Il fera donc meilleur laisser ces petites arguces là aux Grammairiens, & considerer de pres d'autres obseruations, où il y a plus de verisimilitude, & plus d'utilité,

F

*Iliad. liu. 6.
& 17.*

Mon vouloir mesme y estoit tout contraire,

Car j'ay appris à bien viure & bien faire.

Et ceste cy,

Car il sçauoit estre à chacun affable.

Car en declarant que la prouesse estoit chose que lon peut apprendre, & montrant qu'il estime, que l'estre affable aux hommes, & parler gracieusement à tout le monde, se fait par science, & avec discours de raison, il exhorte les hommes en ce faisant à n'estre point nonchallans d'eux mesmes, ains à trauailler pour apprendre les choses honnestes, & hanter ceux qui les enseignent, comme estant la couardise, la sottise & l'incivilité faute de sçauoir, & vraye ignorance. A cela s'accorde & conuient fort proprement ce qu'il dit de Iupiter & de Neptune,

G

Iliad. liu. 18.

Ils sont tous deux de mesme sang yllus,

Et d'un pais tous deux, mais le dessus

Iupiter a, pour estre né deuant,

Et qu'il est plus que son frere sçauant.

car en ce disant il monstre, que le sçauoir & la prudence sont qualitez plus diuines & plus royales: en quoy il met la plus grande excellence de Iupiter, comme estimant que toutes les autres bonnes parties suyuent celle-là: aussi faut-il accoustumer le ieune homme à escouter d'une oreille non endormie ces autres sentences icy,

Odyss. liu. 3.

Iamais pour rien ne dira menterie,

Car il a trop la sagesse chérie.

H

Et, Antilochus qui as tousiours esté

Iliad. liu. 23.

Par cy deuant si sage réputé,

Qu'as tu commis, puis que si peu tu vaux?

Tu m'as fait honte, & gasté mes cheuaux.

Et, Glaucus comment as tu vne parole

Iliad. liu. 17.

Ditte (estant tel) si superbe & si folle?

Certainement j'eusse dit, qu'en bon sens

Tu emportoies le pris entre cinq cens.

comme voulant inferer, que les sages ne mentent iamais en leurs propos, & ne se montrent iamais lasches quand ce vient à un bon affaire, ny ne reprehnent autrui sans raison. Et quand il dit aussi que Pandarus par sa folie se laissa induire à rompre les trefues,

A les trefues, il monstre assez qu'il estime que l'homme sage ne commet iamais iniustice. Autant leur en peut on semblablement enseigner touchant la continence, en farrestant à considerer ces passages icy,

Antea femme à Prætus amoureuse
De luy, estoit ardemment desiruse
D'estre par luy en secret embrassée:
Mais point ne peut induire ta pensée
Bellerophon, car sage tu estois,
Et rien que bon en ton cœur ne mettois.

Iliad. liu. 8.

Et, Au parauant Clytæmnestra pudique
Faisoit tousiours refus d'acte impudique,
Car sagement alors se conduisoit,

Odyss. l. 3.

B Et de bon sens en sa vie elle vsoit.

En ces passages nous voyons que le Poëte attribue la cause de continence & de pudicité à la sagesse. Et es enhortemens que font les Capitaines à leurs souldards au fort de la bataille,

Où est la honte, ô lasches Lyciens,
Où fuyez vous si vistes comme chiens?

Iliad. liu. 10.

Et, Mettez chacun la honte & la iustice
Deuant voz yeux vengeresse de vice:
Car autrement certes vn grand reproche
Et vitupere encontre vous s'approche.

Iliad. liu. 14.

il semble qu'il fait les temperans & continens preux & vaillans, pource qu'ils ont honte des choses laides, & pourautant qu'ils peuuent surmonter les voluptez & soutenir les dangers: ce qui eueut aussi Timotheus à dire sagement en preschant les

C Grecs de bien faire, en son poëme qui est intitulé les Perses,

Honte par vous soit crainte & reuerce,
Force de cœur par elle est aceree.

Æschylus aussi met en ligne de sagesse, le non appeter d'estre veu, ny passionné de conuoitise de gloire, & se soubleuer par les louanges d'une commune, escriuant de Amphiaræus en ceste sorte:

Il ne veut point sembler iuste, mais l'estre,
Aimant vertu en pensée profonde,
Dont nous voyons ordinairement naistre
Sages conseils, où tout honneur abonde.

En la Tragédie de Thebes.

car se contenter de soy-mesme, & de sa façon de viure quand elle est tresbonne, c'est fait en homme sage, & de bon entendement. Comme ainsi soit doncques qu'ils re-

D duisent toutes choses bonnes & honestes à la sagesse, cela demontre que toute espee de vertu s'acquiert par discipline & apprentissage. Or l'abeille trouue naturellement es plus aigres fleurs, & parmy les plus aïpres espines, le plus parfaict miel, & le plus utile: aussi les enfans, fils sont bien nourris en la lecture des Poëtes, en tireront tousiours quelque bonne & profitable doctrine, mesmes des passages où il y a de plus mauuaises & plus importunes suspicions: comme en premier lieu, pour exemple, il semble que le Roy Agamemnon se rende fort suspect de concussion & d'auarice, d'auoir exempté d'aller à la guerre ce riche homme qui luy donna la iument Ætha,

De peur d'aller à Troie la vendeuse,
Mais demourer loing de guerre douteuse,
Chez soy en paix & toute volupté,
Car il auoit de tous biens à planté.

Iliad. liu. 23.

mais toutefois il feit bien & sagement, comme dit Aristote, aiant preferé vne bonne

Comment il faut lire les Poetes.

ivement à vn tel homme: car il ne vaut pas vn chien, non pas certainement vn asne, **E**
l'homme qui est ainsi lasche de cœur, & ainsi effeminé par delices & par abondance
de richesses. Au cas pareil, il semble que Thetis fait tres-deshonneſtemēt d'inciter son
fils Achilles aux voluptez, & luy ramenteuoir les plaisirs de ses amours: mais encore
là peut on en passant cōsiderer la continence d'Achilles, que cōbien qu'il fust amou-
reux de Briseïde, estant retournée deuers luy, & sachant que la fin de sa vie estoit pro-
chaine, neantmoins il ne se haste point, ny ne conuoite point de iouir ce pendant
tant qu'il pourra de ses plaisirs, ny ne porte point de deuil de la mort de son amy en
oyſiueté, comme fait le commun des hommes: en omettant les choses que requeroit
son deuoir, ains s'abstient de volupté pour le regret & la douleur qu'il en sentoit, &
neantmoins ce pendant ne laisse pas de mettre la main à l'œuure, & d'aller à la guerre.
Semblablement Archilochus n'est pas estimé de ce, qu'estant triste & desplaisant
pour la mort du mary de sa sœur, lequel auoit esté noyé en la mer, il veut combattre
& vaincre sa douleur par boire & faire bonne chere: mais neantmoins il allegue vne **F**
cause là où il y a quelque apparence de raison, car il dit,

Pour lamenter, son mal ne gueriray,

Ny pour iouër ie ne l'empireray.

Car si celuy-la à bon droit disoit, qu'il n'empireroit rien pour iouër, faire banquets,
& se donner du plaisir: comment gasteriōs nous quelque chose en noz affaires, pour
philosopher, ou pour vacquer au gouuernement de la chose publique, ou pour aller
au palais, ou pour hanter l'Academie, ou pour nous meller du labourage? Au moien
dequoy, les corrections soudaines d'aucunes sentences poëtiques qui se font en chan-
geant quelques mots, ne sont pas mauuaises, desquelles ont vsé Cleanthes & Anti-
sthenes. Car l'un comme les Atheniens vn iour se fussent fort scandalisez & murinez
en plein Theatre à raison de ce vers,

Qu'y a il laid sinon ce qui le semble?

les appaisa sur le champ en leur iettant à l'encontre cest autre vers, **C**

Le laid est laid, quoy qu'il le semble, ou non.

Et Cleanthes reforma ce vers parlant de la richesse,

A ses amis donner, & puis despendre,

Pour la santé au corps malade rendre.

En le rescriuant ainsi,

A des putains donner, & puis despendre,

Pour vn malade encor empiré rendre.

& Zenon aussi corrigeant ces vers de Sophocles,

Chez vn tyran qui entre, il y deuient

Serf, quoy que libre il soit quand il y vient:

les rescriuit ainsi,

Qui entre chez vn tyran ne deuient

Son serf, fil est libre quand il y vient.

par l'homme libre il entend celuy qui n'est point timide, ains magnanime, & qui n'a **H**
point le cœur aisé à raualler. Qui empeschera donc, que nous ne puissions aussi reti-
rer les ieunes gens du pis au mieux, en vsant de semblables emendations?

Ce qui est plus à l'homme souhaitable,

Est quand le traiçt de son soing delectable

Chet à l'endroit où plus il le demande.

Mais plus tost,

Ce qui est plus à l'homme souhaitable,

Est quand le traiçt de son soing profitable

Chet à l'endroit, duquel plus il amende.

Car appeter ce qui ne se doit pas vouloir, & l'obtenir & auoir, est chose miserable, &
non pas souhaitable.

Et,

Pas engendré ne t'a le pere tien

Pour

A

Pour en ce monde auoir, sans mal, tout bien :

Il faut sentir aucunesfois liesse,

Et quelquefois aussi de la tristesse.

Mais bien, dirons nous, faut-il sentir liesse, & auoir contentement, quand on peut auoir moyennement ce qui est necessaire, pour ce que

Pas engendré ne t'a le pere tien

Pour en ce monde auoir, sans mal, tout bien.

Et cest autre,

Lás, c'est vn mal enuoyé des hauts Dieux,

Quand l'homme sçait & voit deuant ses yeux

Le bien, & fait neantmoins le contraire.

Mais bien est-ce vne faute brutale, defraisonnable, & miserable avec, que sçauoir & cognoistre ce qui est le meilleur, & neantmoins se laisser aller au pire par lascheté de cœur, par paresse, ou par incontinence.

B

Les meurs, non pas le parler, persuadent.

Mais bien sont-ce les meurs & la parole ensemble qui persuadent, ou les meurs par le moien du parler, comme le cheual se manie avec la bride, & le pilote regit sa nauire avec le timón: car la vertu n'a point de si gracieux ne si familier instrumét, que la parole.

L'Affectiõ tienne à aimer est-elle

Encline au male, ou plus à la femelle?

Responõ,

Où beauté est, ambidextre ie suis.

Il valoit mieux dire, Où continence est, l'homme est ambidextre veritablement, & n'encline ny en vne part ny en l'autre: & au contraire, celui qui par la volupté & beauté est tiré tantost cy tantost là, est gaucher, inconstant & incontinent,

Cognoistre Dieu l'homme prudent espeure.

Mais plustost,

Cognoistre Dieu l'homme prudent assure.

Et au contraire il n'espeure sinon les fols, les ingrats, & qui n'ont point de iugement, pour autant qu'ils ont suspecte & qu'ils craignent la cause & le principe de tout bien, comme fil nuisoit & fil faisoit mal. Voila la maniere comment lon peut vser de correction. Il y a vne autre sorte d'amplification, quand on estend la sentence plus que les paroles ne portent: comme nous a bien enseigné Chrysippus qu'il faut transporter & appliquer vne sentence qui sera vtile, à autres especes semblables, comme,

Iamais vn bœuf mesme ne se perdroit,

Quand le voisin homme de bien voudroit.

Autant en faut il entendre d'un chien, d'un asne, & de tous autres animaux, qui se peuuent perdre, & perir.

Semblablement là où Euripide dit,

Qui est le serf qui n'a crainte de mort?

il faut penser qu'il en a autant voulu dire & du trauail & de la maladie. Car tout ainsi

D

comme les medecins trouuans vne drogue conuenable & propre à quelque certaine maladie, & par là cognoissans sa force & vertu naturelle, la transferent puis apres, & en vsent à toute autre maladie qui a quelque chose de conforme & semblable à celle là: aussi vne sentence qui peut estre commune, & dont l'vtilité se peut appliquer à plusieurs diuerses matieres, il ne la faut pas laisser attacher & approprier à vn tout seul subiect, ains la remuer & accommoder à toutes les choses qui seront semblables, en accoustumant les ieunes gens à pouuoir soudainement cognoistre celle communication, & à transferer promptement ce qu'il y a de propre, les exercitans & dui-sans par plusieurs exemples à estre prompts à le remarquer, à fin que quand ils viendront à lire en Menander ce verset,

Heureux qui a biens & entendement,

ils estiment, que cela est autant dit de l'honneur, de l'autorité, & de l'eloquence.

d iij

Hesiodo au
i. liu. des
œuvres.

Comment il faut lire les Poetes.

Et la reprehension que fait Vlysses à Achilles lors qu'il estoit oisif entre des filles en E
l'Isle de Scyros,

Toy qui es fils du plus vaillant guerrier
Qui ceignit onc espee ne baudrier
En toute Grece, à filer la filasse
Esteindras tu la gloire de ta race?

Cela mesme se peut dire à vn homme dissolu en voluptez, à vn auaricieux, & à vn
nonchalant & paresseux, & à vn ignorant: Tu yurongnes estant fils du plus hom-
me de bien de la Grece: ou, tu iouës aux Dez, ou aux Cailles: ou, tu exerces vn me-
stier vil, tu prestes à vsure, n'ayant point le cœur assis en bon lieu, ny digne de la no-
blesse dont tu es yssu.

Ne va disant, Pluto dieu de cheuance,
Ie ne scaurois adorer la puissance
D'un dieu que peut le plus meschant du monde
Facilement acquerir.

F

Autant doncques en peut on dire de la gloire, de la beauté corporelle, d'un manteau
de capitaine general, & d'une mitre de prestre que nous voyons des plus meschans
hommes du monde aucunesfois obtenir.

Les enfans sont fort laids de couardise:
aussi sont ils certes d'intemperance, de superstition, d'enuie, & de tous les autres vices
& maladies de l'ame. Et aiant Homere tresbien dit,

Iliad 3. & 17.

Lasche Paris de visage tresbeau: Et semblablement,
Hector aiant le visage tresbeau:

il donne secrettement à entendre, que c'est chose qui tourne à blasme, & à deshon-
neur à celui qui n'a rien de meilleur que la beauté de la face: il faut appliquer ceste
reprehension à choses pareilles pour retrencher vn peu les ailes à ceux qui s'eleuent &
se glorifient pour choses de nulle valeur, enseignant aux ieunes hommes, que ce sont
reproches que telles louanges, comme quand on dit, excellent en richesse, excellent à
tenir bonne table, ou en seruiteurs, ou en montures, & encores y pouuons nous bien
adiouster, pour parler continuellement: car il fault chercher l'excellence & la prefe-
rence par dessus les autres es choses honnestes, & à estre le premier & le plus grand es
choses grandes: car la reputation prouenant des choses basses & petites n'est point
honorable, ny ne sent point son homme de bon cœur. Cest exemple dernier que
nous auons allegué, me fait souuenir de considerer de plus pres les blasmes & les lou-
anges qui sont principalement es poëmes d'Homere: car ils nous donnent vne bien
expresse instruction de n'estimer pas beaucoup les choses corporelles, ny celles qui
dependent de la fortune: car premierement es tiltres qu'ils se donnent en s'entre-
saluant, ou en s'entre appellant, ils ne se nomment point ny beaux, ny riches, ny ro-
bustes, ains vsent de telles louanges,

H

Esprit diuin, sage & ingenieux
Vlysses, fils de Laërtes le vieux.

Et, Fils de Priam Hector, qui en sagesse
De Iupiter egales la hauteſſe.

Et, Achilles fils de Peleus, lumiere
De tous les Grecs, & la gloire premiere.

Et, O Patroclus que tant le mien cœur aime!

Et à l'opposite, quand ils veulent aussi iniurier quelqu'un, ils ne s'attachent point aux
marques exterieures du corps, ny aux choses casuelles de la fortune, ains touchent
les fautes & vices de l'ame, qu'ils blasment:

Homme chonté, comme vn chien sans vergongne,

Qui as

A Qui as le cœur d'un cerf, couard, yurongne.

Et, Iniurieux Ajax, qui es le pire
Des detracteurs, & ne vaux qu'à mesdire.

Et, Presumptueux Idomeneus cesse
D'estre arrogant, & hault parler sans cesse.

Et, Ajax hautain & superbe en paroles,
Qui en dis tant de vaines & de folles.

Bref, Vlysses voulant iniurier Therfites, ne l'appelle point boiteux, ny bossu, ny chauue, ny teste pointue, ains luy reproche, qu'il est babillard, indiscret : & au contraire, la mere de Vulcain en le caressant luy dit,

Viença mon fils, vien mon pauvre boiteux.

Ainsi appert il, que Homere se mocque de ceux qui ont honte d'estre boiteux ou aueugles, & qu'il estimoit n'estre point reprehensible ce qui n'est point deshoneste,

B ny deshoneste ce qui ne vient point de nous, ny par nous, mais qui procede de la fortune. Parquoy ces deux grandes vtilitez demeurent à ceux qui sont exercez à ouir, & à lire les Poëtes: l'une c'est, qu'ils en deuiennent plus modestes, apprenans à ne reprocher odieusement ny follement à personne sa fortune: l'autre est, qu'ils en sont plus magnanimes, apprenans à ne fieschir point à la fortune, & à ne se troubler point pour quelque meschef qui leur aduienne, ains à porter doucement & patiemment les mocqueries, traicts de picqueure & risées que lon leur en pourroit bailler, aians tousiours en memoire prompte à la main ces vers de Philemon,

Rien n'est plus doux que se souffrir mocquer

Patiemment, & point ne s'en picquer.

toutefois il y a aucun de tels mocqueurs qui merite que lon le repicque, il se fault attacher à ses vices & à ses fautes, ne plus ne moins que Adraftus Tragique repliqua à Alcmeon, qui luy reprochoit,

C Alcme. Frere germain tu es d'une meschante,

Qui son mary tua de main sanglante.

Adraft. Mais toy tu as parricide inhumain,

Ta mere propre occise de ta main.

Car ainsi comme ceux qui fouëtent les habillements, ne touchent point aux corps: aussi ceux qui reprochent quelque infortune ou quelque tache ou default de la race à leur ennemy, adressent leur coup vainement & follement aux choses exterieures, & ce pendant ne touchent point à l'ame, & aux choses qui veritablement meritent d'estre reprises, corrigees, & blasmees. Au surplus ainsi comme cy dessus nous auons donné un enseignement, de mettre alencontre des mauuais propos & dangereuses paroles, qui se rencontrent aucunesfois és liures des Poëtes, les graues & bonnes sentences des grands & renommez personnages, tant en sçauoir, comme en gouuernement, pour diuertir & empescher que lon n'adiouste foy à tels dicts poëtiques: aussi

D les propos que nous trouuerons en eux bons, & honnestes, & viles, il les faudra encore confirmer & fortifier par tesmoignages, & par demonstrations tirees de la philosophie, en attribuant l'inuention premiere de tels propos aux philosophes. Car c'est chose iuste & profitable, que la foy soit ainsi fortifiee & authorisee, quand aux Poësies qui se recitent sur l'eschafaud en un theatre, ou qui se chantent sur la lyre, & que lon fait apprendre aux enfans en une eschole, les Deuises de Pythagoras s'accordent, & les Enseignemens de Platon, ou les Preceptes de Chilon, & que les Regles de Bias tendent à une mesme sentence, que ce que lon fait lire aux ieunes enfans: au moien dequoy, il ne faut pas leur dire en passant seulement, mais leur declarer par le menu bien diligemment, qu'en ces passages,

Tu n'as mon fils esté né sur la terre

Comment il faut lire les Poetes.

Pour manier armes & faire guerre :

E

Mais va plustost, tant que seras viuant,
Le faict d'amour & des nopces suiuant.

Et, Iupiter mesme a en haine celuy,
Lequel s'attache à vn plus fort que luy.

cela n'est point different de ce precepte, Cognois toy-mesme, ains tend à vne mesme sentence: ne plus ne moins que ces sentences icy,

Hesiodé au
1. liure des
œuvres,

Fols sont ceux la qui n'entendent au bout,
Combien plus est la moytié que le tout.

Et, Mauuais conseil ne nuyt tant à personne,

Qu'il fait tousiours à celuy qui le donne :

tendent à mesme intelligéce que sont les discours de Platon en ses liures de Gorgias, & de la chose publique, c'est à sçauoir, qu'il est plus dangereux faire iniustice que non pas la souffrir: & plus dōmageable mal faire, que mal recevoir. Semblablement aussi faudra il adiouster à ce dire d'Æschylus, F

Aies bon cœur, peine demesuree

Extremement, n'est de longue duree:

que c'est cela mesme qui tant est repeté és liures d'Epicurus, & tant loué par ses sectateurs, que les grands trauaux expedient & despeschent promptement l'homme, & que les longs ne sont pas grands. De laquelle sentence Æschylus a bien euidemmēt exprimé vne partie, & l'autre luy est si adiacente, qu'elle est aisée à entendre : car si le grand & vehement trauail ne dure pas, adonc celuy qui dure n'est pas grand, ne difficile à supporter.

Vois tu comment le haut tonnant precede

Tous autres Dieux, & qu'à nul il ne cede,

Pource qu'en luy n'y a de menterie,

Ny d'orgueil point, ny point de mocquerie

G

Et de sot ris, & que seul point n'essaye

Iamais que c'est que de volupté gaye?

ces vers de Thespis ne disent ils pas vne mesme chose que fait ce propos de Platon, La diuinité est située loing de douleur & de volupté?

De la vertu seule procede gloire

Vraye, & qui point ne sera transitoire :

Mais la richesse avec ceux mesmes hante,

Qui sont de meurs & de vie meschante.

Ces carmes de Bacchylides, & ces autres cy semblables d'Euripides,

On doit auoir sur tout en reuerence,

A mon aduis, la sage temperance,

Qui n'est iamais qu'avec les gens de bien.

Et ceux-cy,

H

Efforcez vous d'auoir vertu la belle,

Pour ce que si vous acquerez sans elle

Des biens mondains, vous semblerez heureux,

Mais ce pendant vous serez malheureux.

ne contiennent ils pas la preuue & la demonstration de ce que lisent les Philosophes touchant la richesse & les biens extérieurs, qu'ils sont inutiles, & ne portent aucun profit sans la vertu à ceux qui les possèdent? Car le conioindre ainsi & accommoder les passages des Poëtes aux preceptes & arrests des Philosophes, tire la Poësie hors des fables, & luy oste le masque, & donne efficace de persuader & profiter à bon escient aux sentences vtilement dites, & d'auantage ouure l'esprit d'un ieune garçon & l'encline aux discours & raisons de la Philosophie, en prenant desia quelque goust

- A goust, & en aiant ouy ia parler, non point y venant sans iugement, encore tout remply de folles opinions qu'il aura toute sa vie ouyes de sa mere, ou de sa nourrice, & quelquefois aussi de son pere, voire de son pædagogues : ausquels il aura ouy reputed tresheureux, & , par maniere de dire, adorer les riches hommes, & redouter effroyablement la mort avec horreur, ou le trauail : & au contraire, estimer la vertu chose non desirable, & n'en faire compte, non plus que de rien, sans auoir des biens de ce monde, & sans autorité. Car quand les ieunes gens viennent de prime face à entendre les decisions & raisons des Philosophes toutes contraires à ces opinions-là, ils en demeurent tous estonnez, troublez & effarouchez, ne les pouuans receuoir ny endurer : non plus que ceux qui ont longuement demouré en tenebres ne peuuent soudainement supporter ny endurer la lumiere des rayons du Soleil, s'ils ne sont premierement accoustumez petit à petit à quelque clarté bastarde, dont la lueur soit moins vifue, tant qu'ils la puissent regarder sans douleur : ainsi les faut-il peu à peu accoustumer du cōmancement à vne verité, qui soit vn peu meslee de fables. Car quand ils auront ouy premierement, ou leu és liures des Poëtes ces sentences,

Plorer conuient celuy qui sort du ventre,
Pour tant de maux auxquels naissant il entre,
Et conuoyer au sepulchre le mort,
Qui des trauaux de ceste vie sort,
En faisant tous signes d'aïse & de ioye,
En benissant de son depart la voye.
Et, Pain pour manger, & eau pour boire, en somme,
Sont seulement necessaires à l'homme.
Et, O tyrannnie aimée des barbares !
Et, Le bien suprême, & le comble de l'heur
Des humains est, sentir moins de douleur.

Euripide en
la tragédie
de Cresphôn
154.

- C ils se troubleront & se fâcheront moins quand ils entendront dire chez les Philosophes, Que nous ne nous deuons point soucier de la mort, Que nature a mis vne borne aux richesses, Que la beatitude & le souuerain bien de l'homme ne gist point en quantité grande d'argent, ny en maniement de grands affaires, ny en magistrats, & en credit & autorité : ains en ne sentir point de douleur, en auoir les passions addoucies, & en vne disposition de l'ame suiuant en toutes choses ce qui est selon nature. Pour ceste raison, & pour toutes celles que nous auons parauant alleguees & deduites, le ieune homme a besoing d'estre bien guidé en la lecture des Poëtes, à fin que la Poesie ne l'enuoye point mal edifié, mais plus tost préparé & rendu amy & familier à l'estude de philosophie.

D



Comment il faut ouir.

Ce sont preceptes que doiuent obseruer ceux qui vont ouir les leçons, harangues, & disputes publiques, pour sçauoir comment ils sy doiuent comporter.

Le t'enuoye

Comment il faut ouir.



Au liure,
en l'histoire
de Cyrus.

E t'enuoye, amy Nicander, vn petit traitté que i'ay recueilly ^E
& composé, Comment il faut ouir: à fin que tu sçaches es-
couter celuy qui te suadera & remonstrera par bonne raison,
maintenant que tu es hors de la subiection des maistres qui te
souloient cōman der, estant, par maniere de dire, forty hors
de page, & aiant pris la robbe virile: car ceste licence effrene
de n'estre subiect à personne, que les ieunes gens, à faute de
bien entendre, appellent & estiment faulxement liberté, les
soubmet à de plus rudes & de plus aspres maistres, que n'e-
stoient les precepteurs & les pædagogues qu'ils souloient
auoir en leur enfance, c'est à sçauoir, leurs cupiditez & appétits desordonnez, qui sont
lors comme desliez & deschainez. Et tout ainsi comme Herodote dit, que les femmes ^F
en despouillant leur chemise despouillent aussi la honte: aussi y a-il des ieunes gens
qui en laissant la robbe puerile, laissent quand & quand la crainte & la honte: & de-
uestant l'habit qui les tenoit en bonne & honneste contenance, ils se remplissent
incontinent de toute dissolution. Mais toy qui as souuent entendu que c'est vne
mesme chose, suiure Dieu & obeir à la raison, dois estimer que le sortir hors d'enfan-
ce, & entrer au rang des hommes, n'est point vne deliurance de subiection, ains seu-
lement vne mutation de commandât: pour ce que la vie, au lieu d'un maistre merce-
naire loué ou bien acheté à pris d'argët, qui nous souloit gouuerner en nostre enfance
prend alors vne guide diuine, qui est la raison, à laquelle ceux qui obeissent, doiuent
estre reputez seuls francs & libres: car ceux-là seuls aians appris à vouloir ce qu'il fault,
viuent comme ils veulent, là où es actions & affectiōs desordonnees, & non regies
par la raison, la franchise de la volonté y est petite, foible, & debile, meslee de beau-
coup de repentance. Mais ainsi comme entre les nouveaux bourgeois, qui sont en-
rollez de nouveau pour iouir des droicts & priuileges de bourgeoisie de quelque cité, ^G
ceux qui y sont estrangers, ou qui y viennent de loing habiter, blasment, reprennent,
& trouuent mauuais la plus part de ce qui sy fait: là où ceux qui y estoient habitans
auant qu'en estre faictz bourgeois, aians esté nourris, & estans tous accoustumez
aux loix & coustumes du pais, ne reçoient point mal en gré les charges qui leur sont
imposees, ains les prennent en patience: aussi faut il que le ieune homme long temps
durant soit à demy nourry en la philosophie, & accoustumé dès le commencement
à mesler tout ce qu'il apprend, & tout ce qu'il oit avec propos de la philosophie,
pour venir puis apres desia tout appriuoisé, & tout domté, à l'estude d'icelle à bon
escent, laquelle seule peut accoustre & reuestir les ieunes gens d'un veritablement
digne, viril & parfaict ornement & vestement de la raison. Aussi croy-ie que tu seras
bien aise d'entendre ce que Theophraste escrit touchant l'ouyë, que c'est celuy de tous ^H
les cinq sens de nature qui donne plus & de plus grandes passions à l'ame: car il n'y
a rien de tout ce qui se voit, ne qui se goust, ne qui se touche, qui cause de si grands
rauissemens hors de soy, si grands troubles, ne si grandes frayeurs, comme il en entre
en l'ame par le moyen d'aucuns bruits, sons, & voix qui viennent à ferir l'ouyë: mais
si elle est bien exposee & bien propre aux passions, encore l'est-elle plus à la raison:
car il y a plusieurs endroits & parties du corps, qui donnent aux vices entree pour se
couler au dedans de l'ame, mais la vertu n'a qu'une seule prise sur les ieunes gens,
qui est, les oreilles, prouueu qu'elles soient des le commencement contregardees
pures & nettes de toute flatterie, non amollies ny abreuiées d'aucuns mauuais pro-
pos: & pourtant à bonne cause vouloit Xenocrates que lon meist aux enfans des
oreillettes ou templieres de fer, pour leur couvrir & defendre les oreilles,
plus tost qu'aux combattans à l'escrime des poings, pour ce que ceux-cy ne
sont

- A sont en danger que d'auoir les aureilles rompues & déchirees à coups de poing seulement, & ceux la les meurs gastées & corrompues: non qu'il les voulust du tout priuer de l'ouyë, ou les rendre totalement sourds, mais bien admonester de ne receuoir les mauuais propos, & s'en dōner bien de garde, iusques à ce que d'autres bons y estans nourris de longue main par la Philosophie, eussent faisy la place des meurs la plus mobile, & la plus aisée à mener, y estans logez par la raison, comme gardes, pour la preseruer & defendre. Aussi l'ancien Bias enuoya la langue au Roy Amasis, qui luy auoit mandé qu'il luy enuoyast la pire & la meilleure partie de la chair d'une hostie, voulant dire que le parler estoit cause de tresgrands biens & de tresgrands maux: & ordinairement ceux qui baissent les bien petits enfans, les prennent par les aureilles, & leur disent qu'ils leur en facent autant: comme les admonestans couuertement en ieu, qu'il faut aimer ceux qui leur profitent par les aureilles: car il est tout certain que qui voudroit totalement priuer vn ieune homme d'ouïr, sans luy faire gouter aucunement la raison, non seulement il ne produiroit de soy-mesme ne fruit ne fleur quelconque de vertu, mais au contraire il se tourneroit au vice, mettant hors de son ame, ne plus ne moins que d'une terre non labouree & delaissee en friche, plusieurs reiettons & germes sauages: car l'inclination aux voluptez, & la fuitte du labeur, ne sont point en nous estranges, ne n'y ont point esté introduites par mauuaises persuasions, ains y sont naturelles & nees avec nous, qui sont les sources de vices & de maux infinis: & qui les laisseront aller à bride auallee, là où le naturel les inciteroit, sans rien en retrencher par sages remonstrances, & les destourner pour regler le defect de nature, il n'y auroit beste farouche ne sauage, qui ne fust plus douce que l'homme. Parquoy puis qu'ainsi est, que l'ouye porte aux ieunes gens si grande vtilité avec non moindre peril, i'estime que ce soit sagement fait de discourir & deuiser souuent, & avec soy-mesme & avec autrui, comment c'est qu'il faut ouïr, attendu mesmement que nous voyons, que la plus part des hommes en abuse, attendu qu'ils s'exercent à parler deuant que s'estre accoustumez à escouter, & qu'ils pensent qu'il y ait vne science de bien parler, & vne exercitation pour l'apprendre: & quant à l'escouter, que ceux qui en vsent sans art, comment que ce soit, en reçoient du profit. Combien que au ieu de la paume on apprend tout ensemble & à receuoir l'esteuf, & à le reuoyer: mais en l'usage du parler il n'est pas ainsi, car le bien receuoir precede le reietter, ne plus ne moins que le conceuoir & retenir la semence precede l'enfanter. Or dit on que les œufs des oiseaux que lon appelle vulgairement *ἐμπύμα*, c'est à dire esuentez ou conceus du vent, sont germes imparfaits, & commencemens de fruits qui n'ont peu auoir vie: aussi le parler des ieunes gens, qui ne sçauent escouter, & qui ne sont pas accoustumez à receuoir profit par l'ouyë, n'est veritablement que vent, & comme dit le Poëte,

D C'est vne vaine inutile parole
Qui solement deffous les nues vole.

car ceux qui veulent receuoir aucune chose que lon verse d'un vase en vn autre, inclinent & tournent la bouche de leurs vases deuers ce que lon y verse, à fin que l'infusion se face bien dedans, & qu'il ne s'en respanse rien au dehors: & eux ne sçauent pas se rendre attentifs, & par attention accommoder leur ouyë, à fin que rien ne leur eschappe de ce qui se dit vtilement, ains, ce qui est digne de plus grande mocquerie, s'ils se trouuent presents à ouir raconter l'ordre de quelque festin, ou d'une monstre, ou vn songe, ou vn debat & querelle que le recitant aura eu contre vn autre, ils escoutent en grand silence, & s'arrestent à ouir diligemment: mais si quelqu'un les tire à part pour leur enseigner chose vtile, ou pour les enhorter à quelque point de leur deuoir, ou pour les reprendre quand ils faillent, ou appaiser quand ils se courroucent, ils ne le peuuent endurer, & taschent à refuter par argumens, en contestant

Comment il faut ouir.

à l'encontre de ce que lon leur dit, fils peuuent: & fils ne peuuent, ils s'enfuyent pour E
aller ouir quelques autres fols propos, comme de meschaans vaisseaux pourris, rem-
plissans leurs oreilles de toute autre chose, plus tost que de ce qui leur est neccessaire.
Ceux doncques qui veulent bien dresser les cheuaux, leur enseignent à auoir bonne
bouche, & obeir bien au mors: aussi ceux qui veulent bien instruire les enfans,
les doiuent rendre soupplés & obeïssans à la raison, en leur enseignant à beaucoup
ouir, & à ne gueres parler. Car Spintharus louant Epaminondas disoit, qu'il n'auoit
111. jamais trouué homme qui sceust tant comme luy, ne qui parlaist moins: aussi dit
on, que nature pour ceste cause a donné à chascun de nous vne langue seule, &
deux oreilles: pource qu'il faut plus ouir, que parler. Or est-ce par tout vn grand
& seur ornement à vn ieune homme, que le silence: mais encore principalement,
quand en escoutant parler vn autre, il ne se trouble point, ny n'abbaye point à
chascun propos, ains encore que le propos ne luy plaïse gueres, il a patience neant-
moins, & attend iusques à ce que celuy qui parle ait acheué: & encore apres qu'il a F
acheué, il ne va pas soudainement luy ietter au deuant vne contradiction, ains, com-
me dit Æschines, il laisse passer entre-deux quelque petite interualle de temps, pour
veoir si celuy qui a dit voudra point encore adiouter quelque chose à son dire, ou
y changer, ou en oster: mais ceux qui tout soudain contredisent, n'estans escou-
tez ny n'escoutans, ains parlans tousiours à l'encontre de ceux qui parlent, font vne
faute mal-seante & de mauuaise grace: là où celuy qui est accoustumé d'ouir pa-
tiemment avec honneste contenance, en recueille mieux le propos qu'on luy tient
fil est vtile & bon, & fil est inutile ou faux, il a meilleur loisir de le discerner, & de
le iuger, & si se monstre amateur de verité, non de querelle, ny temeraire en conten-
tion & aigre: au moien dequoy ne parlent point mal ceux qui disent, qu'il faut plus
tost vider la folle opinion & presumption que les ieunes gens prennent d'eux mes-
mes, qu'il ne faut l'air dequoy sont enflés les outres & peaux de chèvres, quand on
y veult mettre dedans quelque chose de bon: car autrement estans pleins du vent G
1111. d'outrecuidance, ils ne reçoient rien de ce que lon y cuyde verser. Or l'enuie
coniointe avec vne malucillance & malignité n'est bonne à œuvre quelconque,
ains est nuyfante à toute chose honneste & louable: mais sur tout est elle mauuaise
assistante & conseillicre de celuy qui veult bien ouir, rendant les propos qui luy fe-
roient vtils, ennuyeux, mal plaïsans, & fascheux à ouir, pource que les enuieux
prennent plaisir à toute autre chose, plus tost qu'à ce qui est bien dit: & neantmoins
celuy qui est marry de veoir à vn autre richesse, autorité ou beauté, est seule-
ment enuieux, pource qu'il est marry de veoir vn autre auoir quelque bien: mais
celuy à qui il desplaist d'ouir bien dire, est marry de son bien propre: car tout ainsi
comme la clarté est le bien de ceux qui voient, aussi la parole est le bien de ceux qui
escoutent, fils la veulent receuoir. Et quant aux autres especes d'enuie, ce sont cer-
taines autres mauuaises & vicieuses passions & conditions de l'ame qui les engen- H
drent: mais l'enuie contre les bien-disans procede d'une ambition importune, & vne
conuoitise iniuste d'honneur, qui altere tellement celuy qui en est attainct, qu'elle
ne le laisse pas seulement prester l'oreille à ce qui se dit, ains luy trouble & luy di-
straiet la pensée à considerer en vn mesme temps sa suffisance, pour veoir si elle est
moindre que de celuy qui parle, & à regarder la contenance des autres qui escou-
tent, pour sçauoir s'ils y prennent plaisir, & s'ils ont en estime celuy qui discourt: car
si on le loue, il luy est aduis qu'on luy donne autant de coups de baston, & s'en cour-
rouce à l'encontre des assistans, fils le trouuent bien disant: & neantmoins quant aux
propos il les laisse là, & reiette arriere les precedents, pour ce qu'il luy fait mal de s'en
souuenir, & tremble, & ne sçait qu'il fait de peur qu'il a des iuccedents, craignant
qu'ils ne soient trouuez encore meilleurs que les premiers: au moien dequoy il fait
tout cet

- A** tout ce qu'il peut pour rompre le propos le plus tost qu'il est possible, mesmement quand il voit que le discourant parle le micux: puis quand l'audience est faillie, il ne s'attache à pas vn des discours qui auront esté faicts, ains va sondant & recueillant les voix & opinions, des assistans: & s'il en trouue qui le louent, il s'oste de là viftement, & s'en fuit arriere, comme s'il estoit fol: mais s'il y en a quelques vns qui les blasment, ou qui les tordent en mauuaise part, ce seront ceux-la auxquels il courra, & avec lesquels il se ioindra: & si d'aduenture il n'y a personne qui les destorde, alors il luy comparera d'autres plus ieunes, qui auront micux discouru (ce dira-il) & avec plus grande force d'eloquence, sur vn mesme subiect: & ne cessera d'interpreter tout en mauuaise part, iusques à tant qu'ayant corrompu & gasté toute la harenque qui aura esté faite, il se la rendra inutile, & sans aucun profit à luy mesme. Et pourtant faut-il, en tel cas, que l'ambition soit d'accord avec le desir d'ouir, à fin que lon escoute patiemment & doucement celuy qui harenquera, ne plus ne moins que si lon estoit conuié au banquet de quelque saint sacrifice, en louant son eloquence, là où il aura bien dit, & prenant en gré la bonne volonté de celuy qui aura mis en auant ce qu'il sçait, & qui aura voulu persuader les autres par les arguments & raisons dont il s'est luy mesme persuadé: ainsi quand il luy sera bien succédé, il y faudra pour conclusion adiouter, que ce n'a point esté par fortune ny par cas d'aduenture qu'il luy sera adueni de bien dire, ains par soing, par diligence, & par art: & pour le moins faudra-il contrefaire ceux qui louent, & qui estiment fort quelque chose, & là où il aura failly, il faudra là arrester son entendement à cōsiderer dont & pour quelles causes sera venue la faute: car ainsi comme Xenophon dit, que les bons mesnagers font leur profit de tout, & de leurs ennemis & de leurs amis: aussi ceux qui sont esueillez & attentifs à ouir diligemment, reçoient profit non seulement de ceux qui disent bien, mais aussi de ceux qui faillent à bien dire. Car vne maigre inuention, vne impropre locution, vn mauuais langage, vne laide contenance, vn esblouissement de sottise, quand on s'entend louer, & toutes autres telles impertinences, qui aduiennent souvent à ceux qui font les harenques en public, nous apparroissent beaucoup plus tost en autrui, quand nous escoutons, qu'ils ne font en nous mesmes quand nous harenquons. Et pource faut-il transferer l'examen & la correction de celuy qui aura harenqué en nous mesmes, en examinant si nous comettons point par mesgarde de telles fautes en orant: Car il n'est rien au monde si facile que de reprendre son voisin, mais ceste reprehension là est vaine & inutile, si on ne la rapporte à vne instruction de corriger ou eiter semblables erreurs en soy-mesme. Et ne faut pas en tel endroit oublier l'aduertissement du sage Platon, quand on a veu quelqu'un faillant, de descendre tousiours en soy-mesme, & dire à par soy, Ne suis-je point tel? Car tout ainsi que nous voyons noz yeux reluifans dedans les prunelles de ceux de noz prochains, aussi faut-il que en la maniere de dire des autres nous nous representations la nostre, à fin que nous ne soions pas legers ny temeraires à reprendre les autres, & aussi que quand nous viendrons nous mesmes à harenquer, nous soions plus soigneux de prendre garde à telles choses. A cest effect aussi seruira grandement la comparaison, quand nous serons retirez à part de retour du lieu où aura esté faite la harenque, que nous prendrons quelque poinct qui nous semblera n'auoir pas esté bien ou suffisamment deduit, & nous essayerons, & tirerons en auant nous mesmes pour le remplir, ou pour le corriger, ou bien pour autrement le dire, ou qui plus est encore, pour tascher à amener des raisons & arguments tous autres sur le mesme subiect, & les deduire tous autrement, ce que Platon mesme a autrefois fait sur les oraisons de Lysias. Car ce n'est pas chose difficile, ains tresfacile, que de contredire vne oraison prononcee, mais en prononcer & dire vne autre sur le mesme subiect, qui soit mieux faite, & meilleure, c'est cela qui est bien difficile à faire: comme

Comment il faut ouir.

dit vn Lacedæmonien quand il entendit que Philippus Roy de Macédoine auoit de- E
moly & rasé la ville d'Olynthe, Mais il n'en sçauoit, dit-il, faire vne telle. Quand
doncques nous verrons, que en discourant sur vn mesme subiect & argument, il n'y
aura pas grande difference entre ce que nous dirons, & ce que l'autre parauant aura
dit, alors nous retrencherons beaucoup de nostre mespris, & incontînét les æles tom-
beront à nostre presumption & amour de nous mesmes, quand nous viédrons, à nous
vi. esprouuer par telles comparaisons. Or est l'esmerueiller & admirer contraire au mes-
priser, signe d'une plus douce & plus equitable nature: mais il n'a pas besoing non plus
de peu de soing, & à l'aduenture de plus grand & plus referué que le mespriser: pour
ce que ceux qui sont ainsi mesprisans & presumptueux, reçoient moins de profit
d'ouir ceux qui harenguent, mais ceux qui sont simples & subiects à tout admirer, en
reçoient dommage, & ne démentent point ce que dit Heraclitus,

Vn homme simple s'estonne de tout ce qu'il oit dire.

Pourtant faut il simplement laisser eschapper de la bouche les louanges du disant: mais F
quant à adiouter foy à ce qu'il aura dit, il y faut aller bien retenu: & quant au langage
& à la prononciation de ceux qui s'exercent à bien dire, il en faut estre simple & gra-
cieux spectateur & auditeur, mais bien aspre & seure examinateur & contrerolleur
de ce qui aura esté dit, quant à l'vsage & à la verité, à fin que ceux qui auront ouy
ne haïssent point, & que ceux qui auront dit ne nuisent point: car bien souuent
nous ne nous donnons garde, que nous receuons des faulces & mauuaises doctri-
nes, pour la foy que nous adioustons, & la bonne affection que nous portons à ceux
qui les mettent en auant. A ce propos les Seigneurs du Conseil de Lacedæmone
trouuans l'opinion bonne d'un personnage qui auoit tresmal vescu, la feirent pro-
poser par un autre de bonne vie & de bonne reputation: faisans en cela sagement
& prudemment, d'accoustumer leur peuple à s'esmouuoir plus tost par les meurs,
que par la parole du proposant. Mais en Philosophie il faut mettre à part la re-
putation de celui qui met en auant un propos, & examiner le propos à part, pour- G
ce que, comme lon dit, qu'en la guerre il y a beaucoup de faulces alarmes, aussi y a
il en un auditoire: car la barbe blanche du disant, le geste, le graue sourcil, le parler
de foy mesme, & principalement les cris, les battemens de mains, les tressaillemens
des assistans à ouir vne harengue, estonnent quelquefois un auditeur qui n'est pas bien
rusé, comme un torrent qui l'emporte malgré luy: & si y a encore quelque trom-
perie au style, & au langage, quand il est doux & coulant, & qu'avec quelque grauité,
force & impetuosité artificielle, il vient à discourir des choses. Car ainsi comme ceux
qui chantent sous vne fluste, font beaucoup de fautes dont les escoutans ne s'apper-
çoient point: aussi un langage exquis & braue esblouit les oreilles de l'escoutant,
qu'il ne puisse sainement iuger de ce qu'il signifie: comme dit Melanthius interrogué
qui luy sembloit de la Tragedie de Dionysius: Je ne l'ay, dit-il, peu voir, tant elle
estoit offusquee de langage. Mais les deuis, leçons & harengues de ces Sophistes fai- H
sans monstre de leur eloquence, ont non seulement la couerture des paroles fardees
qui cachent la sentence, mais qui plus est, ils addoucissent leurs voix par ie ne sçay
quels amollissemens, ne sçay quels entonnemens & accents de chansons qu'ils don-
nent à leur prononciation, qui rauissent les escoutans hors d'eux mesmes, & les
tirent là où ils veulent, en leur donnant vne vaine volupté, & en receuant vne plus
vaine gloire, tellement qu'il leur aduient proprement ce que respondit vne fois
Dionysius, lequel aiant promis au theatre à quelque ioueur de Cithre qui auoit ex-
cellentement ioué deuant luy, qu'il luy donneroit de grands presens, depuis il ne luy
donna rien: Car autant que tu m'as, ce dit-il, donné de plaisir en chantant, au-
tant en as tu receu de moy en esperant. En semblable monnoye payent les
auditeurs qui escoutent de tels harengueurs: car ils sont admirez pour autant de
temps

- A** temps cōme ils demeurent en la chaire à harenguer: mais finie la harengue, aussi tost est escoulé le plaisir des vns, & plus tost encore la gloire des autres: de maniere que ceux-là ont despendu en vain autant de temps, comme ils ont demeuré à escouter, & ceux cy toute leur vie qu'ils ont employee pour apprendre à ainsi parler. A ceste cause faut-il oster ce qu'il y a de trop & de superflu au langage, & s'arrester à chercher le fruit même, & suyure en cela l'exemple non des bouquetières qui font les bouquets & les chapeaux de fleurs, mais les abeilles: car ces femmes-la choisissant à l'œil les belles & odorantes fleurs & herbes, en tissent & composent vn ouurage qui est bien souët à sentir, mais qui au demourant ne porte point de fruit, & ne dure qu'un seul iour: mais les abeilles bien souuant volans à trauers, & par dessus des prairies pleines de roses, de violettes, & de hyacinthes, se poseront sur du tres-fort & tres-acre thym, & s'arresteront dessus, preparans dequoy faire le roux miel, & y aiant cueilly quelque chose qui y puisse seruir, s'en reuolent à leur besongne: aussi faut il
B que le sage auditeur, & qui a l'entendement pur & net de passion, laisse là le langage affecté & fardé, & semblablement aussi les propos & gestes qui tiendront du triacleur ou du basteleur, qui se veut monstrier, en iugeant que ce sont mouches guespes qui sophistiquent & corrompent l'herbe: mais que avec vne profonde attention il descende au fond de la sentence, & de l'intention du disant, pour en retirer ce qu'il y aura d'utile & de profitable, se souuenant qu'il n'est pas là venu pour ouir iouer des farces ou chanter des musiciens en vn theatre, mais en vne eschole, & en vn auditoire pour apprendre à emender & corriger sa vie par la raison: & pour ceste cause faut il faire iugement & examen de la lecture & harengue par soy-même & par la disposition en laquelle on se treuve, en considerant si l'y aura aucune des passions de l'ame qui en soit deuenue plus douce, ou si elle nous aura rendu quelque ennuy plus leger, si le courage & l'assurance en est plus ferme, si lon se sent plus enflammé enuers l'honnesteté & la vertu. Car il n'est pas raisonnable que quand on se lève de la chaire d'un barbier, on se presente deuant vn miroir, & que lon tastre sa teste & son menton, pour voir si l'aura bien rongné les cheueux, & si l'aura bien accoustré la barbe: & qu'au sortir d'une leçon & d'une eschole lon ne se retire pas incontinent à part pour considerer son ame, si aiant laissé quelque chose de ce qui luy pesoit, & dont elle auoit trop auparauant, elle en sera point deuenue
 * plus legere, plus aisee, & plus douce: car, comme dit Ariston, ny vne estuue, ny
 * vn sermon ne sert de rien, si l'on ne nettoye. Soit doncques le ieune homme ioyeux,
 que le discours d'une leçon qu'il aura ouyë, luy ait profité: non que ie veuille que le plaisir soit la fin finale qu'il se proposera pour l'aller ouir, ne qu'il estime qu'il faille sortir de l'eschole d'un Philosophe, en chantant à demy voix avec vne chere guaye qui se lise en la face, ou qu'il cherche à estre parfumé de souëfues senteurs, là où
D il aura besoin d'estre graissé de cataplasmes, & frotté d'huyles & de fomentations plus medecinales que bien odorantes: mais bien qu'il ait à gré, si avec vne parole poignante & piquante on luy nettoye & purifie son ame pleine de brouillas espais, & d'obscurité grande, ne plus ne moins qu'avec la fumee on nettoye les ruches des abeilles. Car si bien celui qui presche & qui harengue ne doit pas du tout estre negligent de son style, qu'il n'y ait quelque plaisir & quelque grace: c'est neantmoins ce dequoy le ieune homme qui escoute se doit soucier le moins, au moins du commencement: ie ne dis pas que puis apres il ne s'y puisse bien arrester, ne plus ne moins que ceux qui boient, apres qu'ils ont estanché leur soif, alors ils tournent les coupes tout à l'entour, pour considerer & regarder l'ouurage qui est dessus: aussi quand le ieune homme auditeur se fera remply de doctrine, & qu'il aura repris haleine, on luy peut bien permettre de s'amuser à considerer le langage, si l'aura rien d'elegant & de gentil. Mais celui qui tout au commencement s'attache non aux choses, ny

VII.

VIII.

Comment il faut ouir.

à la substance, ains va requerant que le langage soit pur, Attique & rond, me semble E
faire tout ainsi, comme si estant empoisonné il ne vouloit point boire de preseruatif &
d'antidote, si lon ne luy bailloit le bruuage dedans vn vase fait & formé de la terre de
Colie en Attique, ny vestir vne robbe au cœur d'hyuer, sinon que la laine fust des mou-
tons de l'Attique, & aimoit mieux demourer sans se bouger ny rien faire, en vne cappe
simple & mince, comme est le style de l'oraison de Lyfias. Ces erreurs-là sont cause
qu'il se trouue grande indigence de sens & de bon iugement, & à l'opposite grande
abondance de babil & de caquet és ieunes gens par les escholes: pourautāt qu'ils n'ob-
seruent, ny la vie, ny les actions, ny les deportemens d'un Philosophe en l'admini-
stration & gouuernement de la chose publique, ains donnent toute la louange aux
beaux termes, paroles elegantes, & au bien dire, sans sçauoir, ny vouloir enquerir
pour le sçauoir, si ce qu'il dit est vtile ou inutile, necessaire, ou bien superflu. Apres
1 x, ces preceptes que nous auons baillez, comment on doit ouir vn Philosophe discou-
rant, suit tout d'un tenant la regle & aduertissement des questions que lon doit pro- F
poser: car il faut que celuy que lon conuie à soupper, se contente de ce que lon sert
sur la table deuant luy, sans demander autre chose ny contreroller ou reprendre ce
qui luy est présenté: mais celuy qui est venu à vn festin de deuis & de discours, par
manière de parler, si c'est sur certain subiect & argument prefix de longue main, il faut
qu'il ne face autre chose qu'escouter patiemment sans mot dire: car ceux qui di-
sttraient le disant à autres subiects & autres arguments, & qui luy entretiennent des
interrogations, ou luy font des oppositions à l'encontre de ce qu'il dit, sont fas-
cheux, importuns, qui ne peuuent iamais accorder en vn auditoire, & outre ce qu'ils
n'en reçoient aucun profit, ils troublent le disant, & tout le discours de son oraison
quant & quant. Mais si le disant prie de luy mesme qu'on l'interroge, & qu'on luy
propose telle question que lon voudra, il faut alors luy demander tousiours quelque
chose qui soit necessaire ou profitable: car Vlysses est mocqué en Homere par les
poursuiuans de sa femme, pour ce que

Odyss. 17.

Il ne queroit que des bribes coupees,

Non des vaisseaux d'honneur, ou des espees.

par ce qu'ils reputoient vn signe de magnanimité, demander, tout ainsi que donner,
quelque chose de grand pris: mais plus seroit digne d'estre mocqué celuy qui propo-
seroit au discourant des questions friuoles & sans fruit quelconque, comme font au-
cunefois des ieunes gens qui ont enuie de babiller, ou bien de monstrier qu'ils sont
sçauans en dialectique ou és mathematiques, & ont accoustumé de proposer au dis-
courant, comment il faut diuiser les choses indiuisibles, ou que c'est que le mouuemēt
selon la coste, & selon le diametre: ausquels se peut dire la responce que feit le mede-
cin Philotimus à vn, qui estant phthistique & pourry dedans le corps, luy demandoit
quelque medecine pour guarir vn petit vlcere qu'il auoit au bout de l'ongle: car le
Medecin cognoissant bien à sa couleur & son haleine, qu'il estoit gasté au dedans, H
luy respondit: Mon amy tu n'es pas en danger pour l'vlcere de ton ongle, il n'est pas
temps d'en parler maintenant. Aussi n'est-il pas heure maintenant de disputer de telles
questions que tu me proposes, ieune fils mon amy, mais plus tost, cōme tu te pourras
deliurer de la folle opinion & presumption de toy mesme, qui te tient, ou de l'amour
& de la sottie dont tu es empestre, pour te rendre en vn estat de vie saine, & sans vanité
quelconque. Qui plus est, encore faut il bien auoir l'œil à regarder, en quoy le discou-
rant a plus de suffisance ou naturelle ou acquise, pour luy faire les interrogations de ce
en quoy il est le plus excellent, non pas forcer celuy qui aura mieux estudié en la phi-
losophie morale, de respondre à des questiōs de Physique ou des Mathematiques: ou
celuy qui sera mieux entēdu en la naturelle & Physique, le tirer à iuger des propositiōs
conioinctes, ou à soudre les sophismes ou syllogismes fallacieux, que lon appelle les
menteurs.

- A menteurs. Car tout ainsi comme qui voudroit fendre du bois avec vne clef, ou ouurir vne porte avec vne coignee, il ne feroit poinct d'iniure à la clef, ny à la coignee, mais il se priueroit soy mesme de l'vsage propre, & de ce que peut faire l'un & l'autre: aussi ceux qui demandent au discourant ce à quoy il n'est pas propre de nature, ou en quoy il ne s'est pas exercité, & qui ne veulent pas cueillir ne prédre ce qu'il a & qu'il peut fournir, ils ne font pas seulement ceste perte là, mais d'auantage acquierent la reputation de mauuaistié & de malignité. Il se faut aussi garder de demander beaucoup de questions & souuent, car cela est encore signe d'homme qui se veut monstrier: mais prester l'oreille attentifement avec douceur, quand quelque autre propose, est fait en homme studieux, & qui se sçait bien accommoder à la compagnie, si d'auenture il n'y a quelque cas propre & particulier qui l'empesche, ou si il ny a quelque passion, aiant besoing d'estre arrestee, ou quelque imperfection requerant remède qui nous presse: car cōme dit Heraclitus, peut estre vaudroit il mieux ne cacher point son ignorance, ains la mettre en euidence, pour la faire guarir. Mais si quelque cholere ou quelque assaut de superstition, ou quelque violente querelle à l'encontre de noz domestiques & parents, ou quelque furieuse concupiscence d'amour,

x.

Touchant du cœur les cordes plus cachees,

Qui ne deuroient pour rien estre touchees,

commande en nostre entendement, il ne faut pas fuir en rompant le propos à en estre repris, ains faut chercher à en ouir discourir aux escholes mesmes: & apres les leçons faillies prendre à part le Philosophe, & luy en conferer, & l'en interroguer: non pas comme font plusieurs, qui sont bien aises d'ouir vn Philosophe parler des autres, & l'en estiment: & si d'aduenture le Philosophe laissant les autres, s'adresse à part à eux, pour leur remonstrier franchement ce qu'ils ont de besoing, & qu'il les en face souuenir, ils s'en courroucent, & l'en estiment enuieux & fascheux: car ils pensent proprement qu'il faille ouir les Philosophes en leurs escholes par maniere de passetemps, comme

- C les ioueurs de Tragedies en vn theatre, & cudent que hors de là il n'y a point de difference entre les Philosophes & eux: & ont bien raison de le cuidoer ainsi quant aux Sophistes: car depuis qu'ils sont hors de leurs chaires où ils harenguent, & qu'ils laissent leurs liures, & leurs petites introductions, és autres actions & vrayes parties de la vie humaine, on les trouue petits, & de moindre esprit que les plus bas & plus vulgaires hommes du monde: mais ils n'entendent pas aussi que de ceux qui sont vrayement dignes de ce nom de Philosophes, soit qu'ils se iouent, ou qu'ils fassent à bon escient vn clin d'œil, vn signe de la teste, vn froncement de visage, & principalement les paroles qui disent à part à chascun, portent tousiours quelque utilité & quelque fruit à ceux qui ont la patience de les laisser dire & de leur prester l'oreille. Au demourât quant aux louanges que lon donne au bien disant, il est besoing d'y vser de moien & de prudence retenue, pource que ny le peu, ny le trop, en telle chose n'est louable ny honneste: car l'auditeur qui se maintient si dur & si roide qu'il ne samollit ny ne s'esmeut pour chose qu'il oye, est facheux & insupportable, estant remply d'une presumptueuse opinion de soy mesme qu'il cache leans, & secrettement en soy mesme se vante qu'il diroit bien quelque chose de meilleur, que ce qu'il oit, ne remuant les sourcils à propos, ny ne reiettant aucune voix qui porte tesmoignage qu'il oye volontiers, ains par vn silence, vne grauité fainte, & vne contenance affectee, va prochassant la reputation d'homme constant & de grauité grande, pensant que les louanges soient comme de l'argent, qu'autant comme lon en donne à vn autre, autant on en oste à soy mesme. Car il y en a plusieurs qui prennent mal & à contre-poil vn dire de Pythagoras, qui disoit, que de l'estude de la philosophie il luy estoit demouré ce fruit, qu'il n'auoit rien en admiration: & ceux cy pensent que pour non louer ny honorer les autres, il les faille mespriser, & veulent qu'on les estime venerables

x i.

Comment il faut ouir.

par dedaigner tous les autres. Mais la raison philosophique oste bien l'esbahissement & l'estonnement qui procede de doute, ou d'ignorance, pource qu'elle sçait & cognoist la cause d'une chacune chose, mais pour cela elle ne perd pas la facilité, la grandeur & l'humanité: car à ceux qui veritablement & certainement sont bons, c'est vn tres-bel honneur que d'honorer ceux qui le meritent, & orner autrui est vn ornement tresdigne qui vient d'une superabondance de gloire & d'honneur qui est en celuy qui le donne: mais ceux qui sont chiches és louanges d'autrui, semblent estre pauvres & affamez des leurs propres: comme aussi au contraire, celuy qui sans iugement chascun mot & à chascun syllabe presque se leue & s'escrie, est par trop leger & volage, & bien souuent desplaist à ceux mesmes qui font les harengues, mais bien fait il tousiours les autres assistans, en les faisant soudre & leuer contre leur volonté, comme les tirans quasi par force à ce faire, & à crier comme luy de honte qu'ils ont: & puis n'ayant recueilly aucun profit de l'oraison ouyë, pour auoir esté trop estourdy & trop turbulent apres ses louanges, il s'en retourne de l'auditoire avec l'une de ces trois reputations qu'il en apporte, qu'il est mocqueur, ou qu'il est flatteur, ou qu'il est ignorant. Or faut il quand on est en siege de iustice pour iuger vn proces, ouir les parties sans haine ny faueur, ains de sens rassis, pour rendre le droit à qu'il appartient: mais és auditoires des gens de lettres, il n'y a ny loy ny ferment qui nous empesche que nous n'escoutions avec faueur & beneuolence celuy qui fait la harengue: ains au contraire, les anciens ont mis & colloqué les Graces aupres de Mercure, voulans par cela donner à entendre, que le parler requiert grace, beneuolence, & amitié: car il n'est pas possible que le disant soit si fort reiettable, ne si defaillant en toutes choses, qu'il n'y ait ny sens aucun digne de louange inuenté par luy mesme, ou renouelé des anciens, ny le subiect de sa harengue, ny son but & intention, ny au moins le langage & le style, ou la disposition des parties de l'oraison: car, comme dit l'ancien proverbe,

Parmy chardons & espincux halliers

Naissent les fleurs des tendres violiers.

Car si aucuns, pour monstrier leur esprit, ont prins à louer le vomissement, autres la fièvre, & quelques vns la marmite, & n'ont point eu faute de grace, comme est il possible qu'une oraison composee par vn personnage, qui quoy que ce soit semble, ou pour le moins est appelé Philosophe, ne donne aux auditeurs gracieux & equitables quelque respit & quelque temps à propos pour la louer? Tous les beaux en fleur d'age, ce dit Platon, comment que ce soit, donnent tousiours des attaintes d'amour à celuy qui est d'amoureuse nature: car s'ils sont blancs, il les appelle enfans des Dieux: ceux qui sont bruns, magnanimes: celuy qui a le nez aquilin, royal: celuy qui est camus, gentil & plaissant & agreable: celuy qui est passe, en couurant vn peu ceste mauuaise couleur, il le saluera, tainct de miel: car l'amour a cela, qu'il s'attache & s'elie à tout ce qu'il trouue, comme fait le lierre. Mais celuy qui prendra plaisir à ouir, s'il est homme de lettres, sera bien plus inuentif à trouuer tousiours de quoy louer vn chascun de ceux qui monteront en chaire pour declamer. Car Platon, qui en l'oraison de Lyfias ne louoit point l'inuention, & reprenoit grandement la disposition, encore toutefois en louoit il le style & l'elocution, pource que toutes les paroles y sont claires & rondement tournées. Aussi pourroit on avec raison reprendre le subiect de quoy a escrit Archilochus, la composition des vers de Parmenides, la bassesse de Phocylides, le trop de langage d'Euripides, l'inegalité de Sophocles: comme semblablement aussi des orateurs, l'un n'a point de nerfs à experimenter vn naturel, l'autre est mol és affections, l'autre a faute de graces, & neantmoins est loué pour quelque particuliere force qu'il a d'emouuoir & de delecter: au moien de quoy les auditeurs ne se scauroiënt excuser, qu'ils n'aient tousiours assez matiere de gratifier, s'ils veulent

xii.

Sur la fin du
5. liure de la
Repub.

- A** lent, à ceux qui font des leçons ou des harangues publiques : car il y en a, à qui il suffit encore que lon ne porte point tesmoignage de viue voix à leur louange, que lon leur mōstre vn bon œil, vn visage ouuert, vne chere ioyeuse, & vne disposition & cōtenance fauorable, & non point fascheuse ne chagrine. Au demourant ces choses cy sont toutes vulgaires & communes enuers ceux mesmes qui ne disent du tout rien qui vaille: vne assiette modeste en son siege, sans apparence de dedain, avec vn port de la personne droict, sans pancher ne ça ne là, vn œil fiché sur celuy qui parle, vn geste d'homme qui escoute attentifiquement, & vne composition de visage toute nette sans demonstration quelconque, non de mespris ou d'estre difficile à contenter seulement, mais aussi de toutes autres cures & de tous autres pensemens : d'autant qu'en toutes choses la beauté se compose comme par vne consonance, & conuenance mesuree de plusieurs bienseances concurrentes ensemble en vn mesme temps: mais la laideur s'engendre incontinent par la moindre du monde qui y defaille, ou qui y soit de plus qu'il
- B** ne fault mal à propos, comme notamment en cest acte d'ouir, non seulement vn froncis de sourcil, ou vne triste chere de visage, vn regard de trauers, vne torse de corps, vn croisement de cuisses l'vne sur l'autre mal honneste, mais seulement vn clin d'œil ou de teste, vn parler bas en l'oreille d'vn autre, vn ris, vn baillement, cōme quand on a enuie de dormir, vne morne tristesse, & toute autre chose semblable, est reprehensible, & requiert que lon y prenne bien soigneusement garde. Et puis ceux cy cuident que tout l'affaire soit en celuy qui dit, & rien en celuy qui escoute: ains veulent que celuy qui a à haranguer vienne bien préparé, & aiant bien & diligemment pensé à ce qu'il doit dire, & eux sans auoir rien propensé, & sans se soucier de leur deuoir, se vont seoir là, tout ne plus ne moins que fils estoient venus pour soupper à leur aise, pendant que les autres trauailleroient: & toutefois encore celuy qui va soupper avec vn autre a quelques choses à faire & obseruer, si l'y veut porter honnestement: par plus forte raison doncques, beaucoup plus en a l'auditeur: car il est à moitié de la parole avec
- C** celuy qui dit, & luy doit ayder, non pas examiner rigoureusement les fautes du disant, & peser en feure balance chascun de ses mots, & chascun de ses propos, & luy ce pendant sans crainte d'estre de rien recherché, faire mille insolences, mille impertinences & incongruitez en escoutant. Mais tout ainsi comme en iouant à la paume, il faut que celuy qui reçoit la balle se remue dextrement, au pris qu'il voit remuer celuy qui luy renuoye: aussi au parler y a il quelque conuenance de mouuement entre l'escoutant & le disant, si l'vn & l'autre veut obseruer ce qu'il doit. Mais aussi ne faut il pas inconsiderément vser de toutes sortes d'acclamations à la louange du disant: car mesme Epicurus est fascheux quand il dit, que ses amis par leurs missiues luy rompoient la teste à force de clameurs de louanges qu'ils luy donnoient: mais ceux aussi qui maintenant introduisent es auditoires des mots estranges, en voulant louer ceux qui haranguent, disans avec vne clameur, Voyla diuinement parlé:
- D** C'est quelque Dieu qui parle par sa bouche: Il n'est possible d'en approcher: comme si ce n'estoit pas assez de dire simplement, voyla bien dit, ou sagement parlé, ou, il a dit la pure verité: qui sont les marques de louanges dont vsoient anciennement Platon, Socrates, & Hyperides: ceux là font vne bien laide faute, & si font tort au disant, par ce qu'ils font estimer qu'il appéte telles excessiues & superbes louanges. Aussi sont fort fascheux ceux qui avec serment, comme si c'estoit en iugement, portent tesmoignage à l'honneur des disans: & ne le font gueres moins ceux qui faillent à accommoder leurs louanges aux qualitez des personnages: comme quand à vn Philosophe enseignant & discourant, ils escrient, Subtilement: ou à vn vieillard, Gentilment, ou Ioliement: en transferant & appliquant à des Philosophes les voix & paroles que lon a accoustumé d'attribuer aux ieunes gens qui se iouent, ou qui s'exercent & se monstrent en leurs declamations scholastiques, & donnans à vne oraison sobre &

Comment il faut ouïr.

C'est à dire
pesante &
grave.

xv.

pudique vne louange de courtisane, qui est autant comme si à vn champion victo- E.
rieux, ils mettoient sur la teste vne couronne de lis ou de roses, non pas de laurier ou
d'oliuier sauuage. Euripides le Poëte Tragique instruisoit vn iour les ioueurs d'une
danse, & leur enseignoit à chanter vne chanson faite en Musique harmonique: quel-
qu'un qui l'escoutoit, s'en prit à rire: auquel il dit, Si tu n'estois homme sans iugement
& ignorant, tu ne rirois pas, veu que ie chante en harmonie Mixolydiene*: mais aussi
vn homme Philosophe & exercité au maniemment des affaires, pourroit à mon aduis
retrencher l'insolence d'un auditeur trop licentieux, en luy disant, Tu me sembles
homme eceruillé, & mal appris: car autrement, ce pendant que i'enseigne, ou que
ie presche, & que ie discours touchant l'administration de la chose publique, ou de
la nature des Dieux, ou de l'office d'un Magistrat, tu ne danserois ny ne chanterois pas.
Car, à vray dire, regardez quel desordre c'est, quand vn Philosophe discours en son
eschole, que les assistans crient & bruient si hault & si fort au dedans, que ceux qui
passent, ou qui escoutent au dehors, ne scauent si c'est à la louange d'un ioueur de F
flustes, ou d'un ioueur de cithre, ou d'un baladin, que ce bruit se fait. D'auantage
il ne fault pas escouter negligemment les reprehensions & corrections des Philosophes
sans pointure aucune de deplaisir: car ceux qui supportent si facilement & negligem-
ment l'estre repris & blasmez par les Philosophes, qu'ils en rient quand ils les repren-
nent, & louent ceux qui leur disent leurs fautes, ne plus ne moins que les flatteurs &
bouffons poursuuians de repeuë franche louent ceux qui les nourrissent, encore qu'ad
ils leur disent des iniures: ceux là, dis-je, sont de tout point chontez & effrontez, don-
nans vne mauuaise & deshonneste preuue & demonstration de la force de leur cœur,
que l'impudence. Car de supporter vn trait de risée sans iniure, dit en ieu plaisamment,
& ne s'en point courroucer ny fascher, cela n'est point ne faute de cœur ne faute d'en-
tendement, ains est chose gentile & conforme à la coustume des Lacedæmoniens.
Mais d'ouïr vne viue touche, & vne reprehension qui pour reformer les meurs vse de
parole poignante, ne plus ne moins que d'une drogue & medecine mordante, sans en G
estre resserré, ny plein de sueur & d'esblouissement pour la honte qui fait mōter la cha-
leur au visage, ains en demourer inflexible, se soubfiant, & se moquant, c'est le faict
d'un ieune homme de treslasche nature, & qui n'a honte de rien, tant il est de lōgue main
accoustumé & confirmé à mal faire: de sorte que son ame en a desia fait vn cal endurcy,
qui ne peut non plus qu'une chair dure, receuoir marque de macheure. Mais ceux là
estans tels, il y en a d'autres de nature toute contraire: car si vne fois seulement on les
a repris, ils s'enfuyent sans iamais tourner visage, & quittent là toute la Philosophie,
cōbien qu'ils aient vn beau cōmancemēt de salut, que nature leur a baillé, qui est, auoir
honte d'estre repris, lequel ils perdent par leur trop lasche & trop molle delicatessē, ne
pouuans endurer que lon leur remonstre leurs fautes, & ne receuans pas genereusement
les correctiōs, ains destournās leurs oreilles à ouïr plus tost de douces & molles paroles
de flatteurs ou de Sophistes, qui leur chantent des plaisanteries bien agreables à leurs H
oreilles, mais au demourant sans fruiēt ny profit quelconque. Tout ainsi doncques
cōme celuy qui apres l'incision faite fuit le Chirurgien, & ne peult endurer qu'on luy
lie sa bleceure, a receu ce qui estoit douloureux en la medecine, & non pas ce qui estoit
profitable: aussi celuy qui ne donne pas à la parole du Philosophe, qui luy a vlcéré &
blecé sa bestise, le loisir d'appaiser la douleur & faire reprendre la playe, il s'en va avec
morsure & douloureuse pointure de la Philosophie, sans vtilité quelconque: Car non
seulement la playe de Telephus, comme dit Euripides,

Se guarissoit avecques la limeure

Du fer de lance aiant fait la bleceure:

mais aussi la morsure de la Philosophie, qui poingt les cœurs des ieunes hommes,
se guarit par la parole mesme qui l'a faite. Et pourtant faut-il, que celuy qui se sent
repris

- A** repris & blasmé, en souffre bien & resente quelque regret, mais non pas qu'il en demeure confus, ne qu'il s'en descourage, ains faut que quand la Philosophie a commencé à le manier & toucher au vif, comme vn sacrifice de purgation, apres en auoir patiemment supporté les premieres purifications & premiers rabrouëments, il en espere au bout de cela veoir quelque belle & douce consolation, au lieu du present trouble & espouuamment. Car encore que la reprehension du philosophe à l'adventure se face à tort, il est neantmoins hōneste de le laisser dire & auoir patience: & puis quand il aura acheué de parler, alors s'adresser à luy pour se iustifier, & le prier de reseruer ceste franchise & vehemence de parler à l'encontre de quelque autre faute qui aura au vray esté commise. D'auantage tout ainsi qu'en l'estude des lettres, en la musique, quand on apprend à iouer de la lyre, ou à luieter, les commencements sont fort laborieux, bien embrouilleez, & pleins de difficulté: mais puis apres, en continuant petit à petit, il s'engendre à la iournee vne familiarité & cognoissance grāde,
- B** ainsi qu'il se fait enuers les hommes, laquelle rend toutes choses faciles, aisces à la main, & agreables, tant à faire, cōme à dire: ainsi est il de la philosophie, laquelle du commencement semble auoir ne sçay quoy de maigre & d'estrange, tant es choses, comme es termes & paroles: mais pour cela il ne faut pas, à faute de cœur, s'estonner à l'entree ny laschement se decourager, ains faut essayer tout, en perseuerant, & desirant tousiours de tirer outre, & passer en auant, en attendant que le temps amēne celle familiere cognoissance & accoustumance, qui rend à la fin doux tout ce qui de soy mesme est beau & hōneste: car elle viendra en peu de temps, apportant quand & elle vne clarté & lumiere grande à ce que lon apprend, & engendrera vn ardent amour de la vertu, sans lequel l'hōme est bien lasche & miserable, qui se peult adonner & mettre à suyure autre vie, en se departant, à faute de cœur de l'estude de la philosophie: bien peut il estre à l'adventure, que les ieunes gens non encore experimentez trouuent au commencement des difficultez qu'ils ne peuuent comprendre es choses: mais si est-ce pour tant que la plus part de l'obscurité & de l'ignorance leur vient d'eux mesmes, & par façons de faire toutes diuerfes cōmettent vne mesme faute. Car les vns, pour vne reuerence respectueuse qu'ils portent au disant, ou pource qu'ils le veulent espargner, ne l'osent interroguer & se faire entierement declarer son discours, & font signe de l'approuuer par signe de la teste, comme s'ils l'entendoient bien: les autres à l'opposite, par vne importune ambition & vaine emulation de monstrier la promptitude de leur esprit contre d'autres, deuant qu'ils l'ayent compris, disent qu'ils l'entendent, & ainsi iamais ne le conçoient. Dont il aduiant à ces premiers honteux, & qui de vergongne n'osent demander ce qu'ils n'entendent pas, que quand ils s'en retournent de l'auditoire ils se faschent eux mesmes & demeurent en doute & perplexité, & que finablement ils font vne autre fois contraincts, avec plus grande vergongne de fascher ceux qui ont ia discouru, en recourāt apres, & leur redemandant ce qu'ils ont dit: & à ces ambitieux, temeraires & presumptueux, qu'ils sont contraincts de pallier, desguiser & couvrir l'ignorance qui demeure tousiours avec eux. Parquoy reietans arriere de nous toute telle lascheté & vanité, mettons peine, cōment que ce soit, d'apprendre, & comprendre en nostre entendemēt les profitables discours que nous oyrons faire aux philosophes: & pour ce faire supportons doucement les ruses des autres qui seront ou penseront estre plus vifs & plus aigus d'entendement que nous: comme Cleanthes & Xenocrates estans vn peu plus grossiers d'esprit que leurs compagnons d'eschole, ne fuyoient pas à apprendre pour cela, ny ne s'en descourageoiēt pas, ains se rioient & se mocquoient les premiers d'eux mesmes, disants qu'ils ressembloient aux vases qui ont le goulet estroict, & aux tables de cuyure, pource qu'ils comprenoient difficilement ce qu'on leur enseignoit, mais aussi qu'ils le retenoient seurement & fermement: car il ne faut

XVI.

XVII.

Comment il faut ouir.

Au poëme
touchant les
mœurs.

pas seulement, ce que dit Phocylides,

Souuent se doit laisser circonuenir

Celuy qui veut bon en fin deuenir,

ains faut aussi se laisser mocquer, endurer des hontes, des picqueures, des traiçts de gaudissierie, pour repoulsier de tout son effort & combattre l'ignorance. Toutesfois si ne faut il pas aussi passer en nonchaloir la faute que font au contraire ceux, qui pour estre d'apprehension tardieue, en sont importuns, fascheux & chargeans car ils ne veulent pas quelque fois, quand ils sont à part en leur priué, se trauailler pour entendre ce qu'ils ont ouy, ains donnent le trauail au docteur qui lit, en luy demandât & l'enquerant souuent d'une mesme chose, ressemblans au petits oyselets qui ne peuvent encore voler, & qui baillent tousiours attendans la becquee d'autrui, & voulans que lon leur bailleia tout masché & tout prest. Il y en a d'autres qui cherchans hors de propos la reputation d'estre vifs d'entendement & attentifs à ouir, rompent la teste aux docteurs lisans, à force de caqueter & de les interrompre, en leur demandant tousiours quelque chose qui n'est point necessaire, & cherchans des demonstrations là où il n'en est point de besoing: & par ainsi,

Le chemin court de foy en deuiant long,

comme dit Sophocles, non seulement pour eux, mais aussi pour les autres assistans. Car en arrestant ainsi à tous coups le Philosophe enseignant, avec leurs vaines & superflues questions, & le faisant demourer & seiourner, ne plus ne moins que quand on va par les champs ensemble, ils empeschent la continuation de l'enseignement & de la doctrine, qui en est ainsi souuent rompue & arrestee. Ceux là doncques, ainsi comme dit Hieronymus, sont ne plus ne moins que les couards & chetifs chiens, qui mordent bien les peaux des bestes sauuages, quand ils sont à la maison, & leur arrachent bien les poils, mais ils ne touchent point à elles aux champs. Au reste ie conseilleroie à ces autres là qui sont d'entendement tardif, que retenans les principaux points du discours, ils cōposassent eux mesmes à part le reste, & qu'ils exerçaissent leur memoire à trouuer le demourant: & que prenans en leur esprit les paroles d'autrui, ne plus ne moins qu'une semence & un principe, ils le nourrissent & l'accroissent: pource que l'esprit n'est pas comme un vaisseau qui ait besoing d'estre rempli seulement, ains plus tost a besoing d'estre echauffé par quelque matiere qui luy engendre une emotion inuentifue, & une affection de trouuer la verité. C'est tout ainsi comme si quelqu'un aiant affaire de feu en alloit chercher chez ses voisins, & là y en trouuant un beau & grand, il s'y arrestoit pour tousiours à se chauffer, sans plus se soucier d'en porter chez soy: aussi si quelqu'un allant deuers un autre pour l'ouir discourir & apprendre de luy, n'estime point qu'il faille allumer son feu ny son esprit propre, ains prenât plaisir à ouir seulement, s'arreste à iouir de ce contentement, il tire des paroles de l'autre l'opinion seulement, ne plus ne moins que lon fait une rougeur & une lueur de visage quand on s'approche du feu: mais quand à la moisissure & au reland du dedans de son ame il ne l'eschauffe ny ne l'esclarcit point par la Philosophie. Si doncques il est besoing d'autre precepte quelconque pour acheuer l'office d'un bon auditeur, c'est qu'il faut qu'en se souuenant de celui que ie viens de dire, il exerce son entendement à inuenter de soy mesme, aussi bien comme à comprendre ce qu'il entend des autres, à fin qu'il se forme au dedans de soy une habitude, non point sophistique, c'est à dire apparente, pour sçauoir reciter ce qu'il aura entendu d'ailleurs, mais interieure & de vray Philosophe, faisant son compte que le commencement de bien viure, c'est estre blasmé & repris.

E

F

G

H

A



O S T R E intention est d'escrire & traiter de la Vertu que lon appelle & que lon estime Morale, en quoy principalement elle differe de la contemplatiue, pour ce que elle a pour sa matiere les passions de l'ame, & pour sa forme la raison: quelle substance elle a, & comment elle subsiste. A sçauoir si la partie de l'ame qui la recoit, est nantie & ornee de raison qui luy soit propre à elle, ou si elle en emprunte l'usage & la participation d'ailleurs: & la receuant d'ailleurs, si c'est comme les choses qui sont meslees avec d'autres meilleures: ou bien si c'est pource que ce

- qui est sous le gouvernement & sous la domination d'autrui, semble participer de la puissance de ce qui luy commande & qui le gouverne: car qu'il soit bien possible que la vertu subsiste & demeure en estre sans aucune matiere ny meslange, i'estime qu'il soit assez manifeste. Mais premierement ie croy qu'il vaudra mieux reciter sommairement en passant les opinions des autres Philosophes, non par maniere de narration historique seulement, ains plus tost à fin que les opinions des autres exposees, la nostre en soit plus claire à entendre, & plus certaine à tenir. Menedemus doncques natif de la ville d'Eretrie, estoit toute pluralité & toute difference de vertus, pource qu'il tenoit qu'il n'y en auoit qu'une toute seule, laquelle s'appelloit de diuers noms, disant que c'estoit vne mesme chose qui s'appelloit temperance, force, iustice, comme c'est tout vn que homme, & mortel, ou animal raisonnable. Ariston natif de Chio tenoit aussi, qu'en substance il n'y auoit qu'une seule vertu, laquelle il appelloit Santé, mais selon diuers respects il y en auoit plusieurs differentes l'une de l'autre, comme qui appelleroit nostre veüe quand elle s'applique à regarder du blanc, Leucothee: & à regarder du noir, Melanthee: & ainsi des autres choses semblables. Car la vertu (disoit-il) qui concerne ce qu'il faut faire ou laisser, s'appelle Prudence, & celle qui regle la concupiscence, & qui limite ce qui est moderé & opportun es voluptez, se nomme Temperance: & celle qui concerne les affaires, & contraux que les hommes ont les vns avec les autres, est Iustice: ne plus ne moins qu'un cousteau est tousiours le mesme, mais il coupe tantost vne chose & tantost vne autre: & le feu agit bien en diuerses & differentes matieres, mais c'est tousiours par vne mesme nature. Et semble que Zenon mesme le Citieien panche vn petit en ceste opinion là, quand il definit que la prudence qui distribue à chacun ce qui luy appartient, est la Iustice: celle qui choisit ce qu'il faut eslire ou fuir, Temperance: ce qu'il faut supporter & souffrir, Force: & ceux qui le defendent en telle opinion, disent que par la prudence il entendoit la science. Mais Chrysippus estimant que chacune qualité a la vertu propre, sans y penser introduisit en la Philosophie vn exaim, comme disoit Platon, & toute vne ruche, par maniere de dire, de vertus: car comme de fort se deriue force, de iuste iustice, de clement clemence: aussi fait de gracieux grace, de bon bonté, de grand grandeur, de beau beauté, & toutes autres telles galanteries, gentilleses, courtoisies, & ioyeusetez, qu'il mettoit au nombre des vertus, remplissant la Philosophie de nouveaux termes, sans qu'il en fust besoing. Mais tous ces Philosophes là ont cela de commun entre eux, qu'ils tiennent que la vertu est vne disposition & vne puissance de la principale partie de l'ame, qui est la raison, & supposent cela comme chose toute confessee, toute certaine & irrefragable: & n'estiment point qu'il y ait en l'ame de partie sensuelle & irraisonnable, qui soit de nature differente de la raison, ains pensent que ce soit tousiours vne mesme partie & substance de l'ame, celle qu'ils appellent principale, ou la raison & l'entendement qui se tourne & se change en tout, tant

De la Vertu Morale.

és passions, comme és habitudes & dispositions, selon la mutation desquelles il de- **E**
vient ou vice ou vertu, & qui n'a en soy rien qui soit irraisonnable, mais que lon
l'appelle irraisonnable quand le mouvement de l'appetit est si puissant qu'il de-
meure le maistre, & poulse l'homme à quelque chose deshonneste, contre le iuge-
ment de la raison : car ils veulent que la passion mesme soit raison, mais mauuaise,
prenant sa force & vehemence d'un faux & peruers iugement. Tous ceux là me
semblent auoir ignoré, que chascun de nous est veritablement double & composé,
au moins n'ont-ils cogneu, que ceste premiere composition de l'ame & du corps,
qui est manifeste à tous, mais l'autre composition & mixtion de l'ame, ils ne l'ont
point entendue : toutefois qu'il y ait encore quelque duplicité & meslange en l'ame
mesme, & quelque diuersité de nature & difference entre la partie raisonnable &
l'irraisonnable, comme si c'estoit presque vn autre second corps par necessité na-
turelle meslé & attaché à la raison : il est bien vray-semblable, que Pythagoras ne
l'a pas ignoré, à ce que lon peut coniecturer par la diligence grande qu'il a employée **F**
en la Musique, l'appliquant à l'Ame pour l'addoucir, donter & appriuoiser, comme
s'apperceuant bien, que toutes les parties d'icelle n'estoient pas obeissantes ne sub-
iectes à doctrine, ny aux sciences, de maniere que par la seule raison on les peult
retirer de vice, & qu'elles auoient besoing de quelque autre maniere d'appriuoie-
ment & de persuasion, autrement qu'il seroit impossible à la Philosophie de ve-
nir à bout de sa rebellion. Mais bien est-il tout euident & tout certain, que Pla-
ton a tresbien entendu, que l'ame ou la partie animee de ce monde, n'est point
simple, ains est meslee de la puissance du Mesme & de l'Autre, par ce que d'une part elle
se regit & tourne tousiours par vn mesme ordre, qui est le plus puissant mouue-
ment, & de l'autre part elle est diuisee en cercles, spheres, & mouuements à demy
contraires au premier, vagabons & errans, en quoy est le principe des diuersitez
des generations qui se font en la terre. Aussi l'ame de l'homme estant part & por-
tion de celle de l'univers, & composee sur les nombres & proportions d'icelle, n'est **G**
point simple ny d'une seule nature, ains a vne partie qui est spirituelle & intelligen-
te, où est le discours de la raison, à laquelle appartient, selon nature, de comman-
der & dominer en l'homme : l'autre est brutale, sensuelle, errante & desordonnee
d'elle mesme, si elle n'est regie & conduite d'ailleurs. Et ceste cy derechef se sous-
diuise en deux autres parties, dont l'une s'appelle corporelle ou vegetatiue, l'autre
irascible ou concupiscible, adherente tantost à la partie corporelle, & tantost à la
spirituelle, & au discours de la raison, à qui elle donne force & vigueur. Or cognoist
on la difference de l'une & de l'autre en ce principalement, que la partie intelligente
resiste bien souuent à la concupiscible & irascible : & faut bien dire qu'elles soient
diuerfes & differentes de la raison, attendu que bien souuent elles desobeissent &
repugnent à ce qui est tresbon. Aristote a supposé ces principes là bien longue-
ment plus que nul autre, comme il appert par ses escripts, mais depuis il attribua la **H**
partie irascible à la concupiscible, les confondant toutes deux en vne, comme estant
lire vne convoitise & appetit de vengeance : mais tousiours a il tenu, que la par-
tie sensuelle & brutale estoit totalement distincte & diuisee de l'intellectuelle & rai-
sonnable, non qu'elle soit du tout priuee de raison, comme l'est la vegetatiue & nu-
tritiue, qui est celle des plantes, par ce que celle là estant du tout sourde, ne peult
ouir la raison, & est vn germe qui procede de la chair, & tient tousiours au corps :
mais la sensuelle ou concupiscible, encore qu'elle soit destituee de raison propre
à elle, si est-ce neantmoins, qu'elle est apte & idoine à ouir & obeir à la partie in-
telligente & discourante, à se retourner vers elle, & à se renger à ses preceptes,
proueu qu'elle ne soit point gaste'e à faict, & corrompue par vne volupté ignoran-
te, & vne habitude de vie dissoluë. Et si l'y en a qui s'esmerueillent & qui trouuent
estrange,

A estrange, comment vne partie peut estre irraisonnable, & neantmoins obeissante à la raison : ceux-là ne me semblent pas bien comprendre la force & la puissance de la raison, combien elle est grande, & iusques où elle passe & penetre à commander, conduire, & guider, non par dures ny violentes contrainctes, mais par molles & douces inductions & persuasions, qui ont plus d'efficace que toutes les forces du monde. Qu'il soit ainsi, les esprits, les nerfs & les os sont parties irraisonnables du corps, mais aussi tost qu'il y a en l'esprit vn mouuement de volonté, comme aiant la raison tant soit peu secoué la bride, tous s'estendent, tous s'esueillent & se redent prests à obeir: si l'homme veut courir, les pieds sont dispos: si veut prendre ou ietter quelque chose, les mains sont incontinent prestes à mettre en œuvre. Le poëte Homere mesme nous donne bien clairement à cognoistre la conuenance & intelligence qu'il y a entre la raison, & les parties priuees du discours de raison, par ces vers,

Au 19. liure
de l'Odysee.

B Ainsi baignoit de larmes son visage
Penelopé, en plorant le veufuage
De son espoux tout ioignant d'elle assis:
Mais Vlysses en son esprit rassis
Se sentoît bien attainct de pitié tendre,
Voiant ainsi tant de larmes espandre
Celle que plus il aimoit cherement:
Et toutefois il tenoit sagement
Ses pleurs cachez, & deffoubs les paupieres
Fermes estoient de ses yeux les lumieres,
Sans plus filler, que si leur durté
De roide fer ou de corne eust esté.

tant il auoit rendu obeissans au iugement de la raison & les esprits, & le sang, & les larmes. Cela mesme monstre aussi clairement les parties naturelles, qui se retirent & par maniere de dire, s'enfuient, sans se bouger ny emouuoir, quand nous approchons des belles personnes que la raison ou la loy nous defendent de toucher. Ce qui aduient encore plus euidemment à ceux, qui estans deuenus amoureux de quelques filles ou femmes, sans les cognoistre, recognoissent puis apres que ce sont ou leurs sœurs, ou leurs propres filles: car alors tout soudain la concupiscence cede & fait ioug, quand la raison sy est interposée, & le corps contient toutes ses parties honestement, en deuoir d'obeir au iugement de la raison. Et aduient aussi bien souuent, que lon mange quelques viandes de bon appétit sans sçauoir que c'est, mais aussi tost que lon s'apperçoit, ou que par autre on est aduertý, que c'est quelque viande impure, mauuaise & defendue, non seulement on s'en repent, & en est on fasché en son entendement, mais aussi les facultez corporelles s'accordans avec l'opinion, on en prend des vomissements & des maux de cœur, qui renuersent l'estomach sans dessus dessous. Et si ce n'estoit que i'aurois peur qu'il ne semblast que i'allasse industrieusement ramasser de toutes parts des inductions plaisantes, pour aggreer aux ieunes gens, ie m'eslargirois à deduire les psalterions, les lyres, les espinettes, les flustes, & autres tels instruments de musique, que lon a inuentez pour accorder & consoner avec les passions humaines, encore que ce soient choses sans ames, elles ne laissent pas toutefois de s'esjouir ou se plaindre & lamenter avec eux, ains chantent, s'esguayent, voire font l'amour quand & eux, representans les affections, les volontez, & les meurs de ceux qui en iouent. Auquel propos on dit, que Zenon mesme allant vn iour au theatre pour ouir le musicien Amœbeus, qui chantoit sur la lyre, dit à ses disciples: Allons-y pour ouir & apprendre quelle armonie & resonance rendent les entrailles des bestes, les nerfs, les osséments, & les bois, quand on les sçait disposer par nombres, par proportions, & par ordre.

De la Vertu Morale.

Mais laissant ces exemples-là, ie leur demanderois volontiers, si quand les cheuaux, E
les chiens, & les oyseaux, que nous nourrissons en noz maisons, par accoustumance,
nourriture & enseignement, apprennent à rendre des voix intelligibles, & à faire des
mouuements, des gestes, & des tours qui nous sont & plaisants & vtiles : & sembla-
blement quand ils lisent dedans Homere, que Achilles excitoit à combattre & les
hommes & les cheuaux, ils s'esbahissent encore, & doutent si la partie qui se cour-
rouce, qui appéte, qui se deult, qui s'esioit en nous, peut bien obeir à la raison, &
peut estre affectionnée & disposée par elle, attendu mesmement qu'elle n'est point
logée dehors, ny diuisée & distincte d'auec nous, & qu'il n'y a rien au dehors qui la
forme, ne qui la moule, ou qui la taille par force à coups de marteau ny de ciseau, ains
que elle est tousiours attachée à elle, tousiours conuersant auec elle, nourrie & duitte
par longue accoustumance. Voila pourquoy les anciens l'ont bien proprement
appellee Ethos, qui est à dire, les Meurs, pour nous donner grossièrement à entendre,
que les meurs ne sont autre chose, qu'une qualité imprimée de longue main en celle F
partie de l'ame qui est irraisonnable, & est ainsi nommée par ce qu'elle prend celle
qualité de la demeure longue & longue accoustumance, étant formée par la raison,
laquelle n'en veut pas du tout oster ny defraciner la passion, par ce qu'il n'est ny
possible, ny utile, ains seulement luy trasse & limite quelques bornes, & luy establit
quelque ordre, faisant en sorte que les vertus morales ne sont pas impassibilitez, mais
plustost reglements & moderations des passions & affections de nostre ame : ce
qu'elle fait par le moien de la prudence, laquelle reduit la puissance de la partie
sensuelle & passible à une habitude honneste & louable. Par ce que lon tient que
ces trois choses sont en nostre ame, la puissance naturelle, la passion, & l'habitude.
La puissance naturelle est le commencement, & par maniere de dire, la matiere de la
passion, comme la puissance de se courroucer, la puissance de se vergongner, la puis-
sance de s'asseurer. La passion apres est le mouuement actuel d'icelle puissance, come
le courroux, la vergongne, l'assurance. Et l'habitude est une fermeté establie en G
la partie irraisonnable par longue accoustumance, & une qualité confirmée, laquel-
le deuient vice quand la passion est mal gouvernée, & vertu quand elle est bien
conduite & menée par la raison. Mais pourautant que lon ne trouue pas que toute
vertu soit une mediocrité, ny ne l'appelle on pas toute morale, à fin de mieux en
monstrer & declarer la difference, il faut commencer un peu de plus haut. Toutes les
choses sont ou absoluëment & simplement en leur estre, ou relatiuement eu esgard à
nous. Absoluëment sont en leur estre, comme la terre, le ciel, les estoilles, & la mer :
relatiuement au regard de nous, comme bon, mauuais : profitable, nuisible : plaisant,
desplaisant. La raison contemple l'un & l'autre, mais le premier genre des choses qui
sont absoluëment appartient à science, & à contemplation, comme son obiet : le
second, des choses qui sont relatiuement eu esgard à nous, appartient à consultation
& action : & la vertu de celui-là est sapience, la vertu de cestuy-cy, prudence : & y a H
difference entre prudence & sapience, d'autant que prudence consiste en une relation,
& application de la partie contemplatiue de l'ame, à l'action & au regime de la sen-
suelle & passible selon raison : tellement que prudence a besoing de la fortune, là où
sapience n'en a que faire, pour attaindre & paruenir à sa propre fin, ny aussi de con-
sultation, par ce qu'elle concerne les choses qui sont tousiours vnes & tousiours de
mesme sorte. Et comme le Geometrien ne consulte pas touchant le triangle, à
sçauoir si la trois angles egaux à deux droicts, ains le sçait certainement : & la con-
sultation se fait des choses qui sont & aduiennent tantost d'une sorte, & tantost d'une
autre, non pas de celles qui sont fermes & stables tousiours en un estre immua-
ble : aussi l'entendement & ame speculatiue exerceant ses fonctions sur les choses
premieres & permanentes qui ont tousiours une mesme nature, & qui ne reçoient
point

- A point de changement, est exempte de toute consultation. Mais la prudence descendant aux choses pleines de variation, de troubles & de confusion, il est force qu'elle se mesle souvent des choses fortuites & casuelles, & qu'elle use de consultation en choses si douteuses & si incertaines, & apres auoir consulté, qu'elle vienne lors à mettre la main à l'œuvre & à l'action, assistee de la partie raisonnable, laquelle elle tire quand & foy aux actions, car elles ont besoing d'un instinct & esbranlement que fait l'habitude morale en chascque passion: mais cest instinct-là a besoing de raison qui le limite, à fin qu'il soit moderé, à fin qu'il ne passe point outre, ny ne demeure point deçà le milieu, parce que la partie brutale & passible a des mouuements qui sont les vns trop vehemens & trop soudains, les autres trop tardifs & plus lasches qu'il n'appartient. C'est pourquoy nos actions ne peuuent estre bonnes qu'en vne sorte, & mauuaises en plusieurs, comme lon ne peut assener au but que par vne sorte seulement, mais bien le peut on faillir en plusieurs, en donnant
- B ou plus haut ou plus bas qu'il ne faut. L'office doncques de la raison actiue selon nature est, d'oster & retrencher tous excès & toutes defectuositez aux passions, par ce que quelquefois l'instinct & esbranlement, soit par infirmité, ou par delicatesse, ou par crainte, ou par paresse, se lasche & demeure court au deuoir, & là se treuve la raison actiue, qui le refueille & l'excite. Et quelquefois aussi au contraire, se laisse aller à la debordee, estant dissolu & desordonné, & la raison luy oste ce qu'il a de trop vehement, reglant ainsi & moderant ce mouuement actif, elle imprime en la partie irraisonnable les vertus morales, qui sont mediocritez entre le peu & le trop: car il ne faut pas estimer que toute vertu consiste en mediocrité, d'autant que la sapience & prudence, qui n'ont besoing aucun de la partie brutale & irraisonnable, gisent seulement au pur & sincere entendement & discours du pensément, non subiectes aux passions, n'estans autre chose que sensuelle, en laquelle raison se forme & engendre la tres-diuline & tres-heureuse science, mais la vertu morale tenant de la
- C terre à cause du corps, a besoing des passions, comme d'outils & de ministres, pour agir & faire ses operations, n'estant pas corruption ou abolition de la partie irraisonnable de l'ame, ains plus tost le reglement & l'embellissement d'icelle, & est bien extremite quant à la qualité & à la perfection, mais non pas quant à la quantité, selon laquelle elle est mediocrité, ostant d'un costé ce qui est excessif, & de l'autre ce qui est defectueux. Mais pource qu'il y a milieu & mediocrité de plusieurs sortes, il nous faut definir quel milieu & quelle mediocrité est la vertu morale. Premièrement doncques, il y a un milieu qui est composé des deux extremitez, comme le gris ou le tanné, composé du blanc & du noir. Et ce qui contient ou qui est cōtenu est moien & milieu entre ce qui contient & ce qui est contenu seulement, comme le nombre de huit entre le douze & le quatre. Ce qui ne participe & ne tient de nulle des extremitez s'appelle aussi moien & milieu, comme ce qui est indifferant entre le bien & le mal: mais vertu ne peut estre milieu ne moien selon pas vne de ces interpretations-là, par ce qu'elle ne peut estre composition ny mélange de deux vices, ny ne peut contenir ce qui est moins, ny estre contenu de ce qui est plus que le deuoir, & si n'est point du tout exempté des passibles emotions subiectes au trop & au peu, & au plus & au moins. Mais plus tost elle est & s'appelle milieu & moien, selon la mediocrité qui est aux sons & aux accords des voix: car il y a en la Musique vne note & vne voix qui s'appelle moienne, pource qu'elle est au milieu de la basse & de la haute que lon appelle Hypaté & Neté, se retirant de la hautesse de l'une qui est trop aiguë, & de la bassesse de l'autre qui est trop grosse: aussi la vertu morale est un certain mouuement & puissance en la partie irraisonnable de l'ame qui tempere le relaschement ou roidissement, & le plus & moins qui y peuuent estre, reduisant chascune passion à temperature moderee pour la garder de faillir.

De la Vertu Morale.

En premier lieu doncques ils disent, que la force ou prouesse & vaillance est le moien **E**
& le milieu entre couardise & temerité, desquelles deux extremités l'une est excès
& l'autre défaut de la passion d'ire. La Liberalité est vn moien entre chicheté & pro-
digalité: Clemence entre indolence & cruauté: Iustice moien entre le distribuer plus
& moins de ce qu'il faut és contraires & affaires des hommes les vns avec les autres:
Temperance milieu entre l'impassibilité insensible, & la dissolution desbordée és vo-
luptez: en quoy principalement & plus clairement se donne à cognoistre la diffé-
rence qu'il y a de la partie brutale à la partie raisonnable de l'ame: & voit-on euident-
ment, qu'autre chose est la passion, & autre chose la raison: par ce qu'autrement il n'y
auroit point de différence entre la temperance & la continence, & entre l'intempe-
rance & l'incontinence és voluptez & cupiditez, si c'estoit vne mesme partie de l'ame
qui iugeast, & qui conuoitast: mais maintenant la temperance est quand la raison
gouverne & manie la partie sensuelle & passionnée, ne plus ne moins qu'un animal
bien domté & bien faict à la bride, le trouuant obeissant en toutes cupiditez, & receuant **F**
volontairement le mors. Et la continence est quand la raison demeure bien la plus
forte, & emmène la concupiscence, mais c'est avec douleur & regret, par ce qu'elle
n'obeit pas volontiers, ains va de trauers à coups de baston, forcée par le mors de bri-
de, faisant toute la résistance qu'elle peut à la raison, & luy donne beaucoup de trauail
& de trouble: comme Platon, pour le mieux donner à entendre par similitude, fait
qu'il y a deux bestes de voiture qui tirent le chariot de l'ame, dont la pire combat,
estriue & regibbe contre la meilleure, & donne beaucoup d'affaire & de peine au co-
cher qui les conduit, étant contrainct de tirer à l'encontre, & tenir roide, de peur que
les resnes purpurees, comme dit Simonides, ne luy eschappent des mains. Voila
pourquoy ils ne tiennent point que continence soit vertu entiere & parfaite, ains
quelque chose moindre, par ce que ce n'est point vne mediocrité de consonante ar-
monie & accord du pire avec le meilleur, ne qui resèque ce qu'il y a de trop en la
passion, ny l'appétit n'obeit point volontairement de gré à gré à la raison de l'ame, **G**
ains luy fait de la peine, & en reçoit aussi, & finalement est rengé sous le ioug par
force, comme en vne sedition ciuile, là où les deux parties discordantes se voulans
mal, & se faisant la guerre l'une à l'autre, habitent dedans vne mesme closture de ville,
comme dit Sophocles,

Au com-
mancement
de la Tragœ-
die d'Oedi-
pus le Tyra.

La cité est pleine d'encensements,
Pleine de chants, & de gémissements.

telle est l'ame du continent, pour le combat & le discord qu'il y a entre la raison &
l'appétit. C'est pourquoy ils tiennent aussi, que l'incontinence n'est pas du tout vice,
ains quelque chose de moins, mais que l'intemperance est le vice tout entier, pour ce
qu'elle a l'affection mauuaise & la raison gaste & corrompue, étant par l'une poulsee à
appéter ce qui est deshoneste, & par l'autre induitte à mal iuger & consentir à la cupi-
dité deshoneste: de maniere qu'elle perd tout sentiment des fautes & pechez qu'elle **H**
cōmet, là où l'incontinence retient bien le iugement sain & droit par la raison, mais
par la vehemence de la passion plus puissante que la raison, elle est emportée contre
son propre iugement: aussi est elle différente de l'intemperance, d'autant qu'en l'une la
raison est vaincue par la passion, & en l'autre elle ne combat pas seulement. L'inconti-
nent en cōbattant quelque peu, se laisse à la fin aller à sa concupiscence: l'intemperant
en consentant, approuuant & louant, suit son appétit. L'intemperant est bien aise &
se resiouit d'auoir peché, l'incontinent en a douleur & regret: l'intemperant vaguaye-
ment & affectueusement apres sa vilanie: l'incontinent enuis & mal volontiers aban-
donne l'honesteté: & si l'y a différence entre leurs faicts & actions, il n'y en a pas moins
entre leurs paroles: car les propos de l'intemperant son tels,

Grace il n'y a ny plaisir en ce monde,

Sinon

- A Sinon avec Dame Venus la blonde :
 Puissent mes yeux par mort esvanouir
 A lors que plus ie n'en pourray iouir.
 Vn autre dit, Boire, manger, & paillarder, c'est le principal : tout le reste ie l'estime
 accessoire, quant à moy. Celuy-la est de tout son cœur enclin aux voluptez, & miné
 par dessous : aussi ne l'est pas moins celuy qui dit,
 Laisse moy perdre, il me plaist de perir.
 Car il a le iugement avec l'appétit gasté & corrompu, depuis qu'il parle ainsi. Mais
 les propos & paroles de l'incontinent sont autres & différentes,
 J'ay le sens bon, mais nature me force. Et cest autre,
 Helas helas, c'est diuine vengeance,
 Que l'homme aiant du bien la cognoissance,
 N'en vse pas, ains fait tout le contraire. Et cest autre,
 B Là le courroux ne peut non plus durer
 Ferme, que l'ancre en tourmente asseurer
 La naue estant fichee dans du sable,
 Qui ne tient coup, & ne demeure stable.
 Il ne dit pas mal, ny de mauuaise grace, l'ancre fichee dedans le sable, pour signifier la
 foible tenue de la raison, qui ne demeure pas fichee & ferme, ains par la lascheté, &
 molle delicateffe de l'ame, laisse aller son iugement : & n'est pas loing aussi de celle
 comparaison ce que dit vn autre,
 Comme vne naue attachee au riuage,
 Venu le vent, rompt tout chable & cordage.
 Car il appelle chable & cordage le iugement de la raison qui resiste à l'acte deshonne-
 neste, lequel vient à se rompre par l'imperuosité de la passion, comme d'un vent vio-
 lent : car, à dire la verité, l'intemperance est poulsee par cupiditez à pleines voiles dedans
 C les voluptez, & luy mesme s'y dresse & s'y accommode : mais l'incontinent y va, par
 maniere de dire, à la boulingue de trauers, desirant s'en retirer, & repousser la passion
 qui l'attire, mais à la fin il se laisse couler & tomber en l'acte deshonesté : ainsi que
 Timon le donne à entendre par ces vers dont il picquoit Anaxarchus,
 D'Anaxarchus hardie & permanente
 La force estoit comme vn chien impudente,
 Où qui ce fust qu'il se voulust ietter :
 Mais malheureux, comme j'oy raconter,
 Il se iugeoit, pource que sa nature
 A volupté encline outre mesure
 (Dont la plus part de ces Sages ont peur)
 Le retiroit arriere de son cœur.
 D Car ny le sage n'est continent, mais temperant, ny le fol incontinent, mais intem-
 perant : par ce que le temperant se plaist & delecte des choses belles & honnestes, &
 l'intemperant ne se fasche & desplaist pas des deshonestes : parquoy l'incontinence
 conuient proprement & ressemble à vne ame sophistique, qui a bien l'usage de la rai-
 son, mais si imbecille, qu'elle ne peut pas perseuerer & demourer ferme en ce qu'elle a
 vne fois iugé estre le deuoir. Voyla doncques les differences qu'il y a entre l'intem-
 perance & l'incontinence, & aussi entre la temperance & la continence : car le remors,
 le regret, & le contre-cœur n'ont point encore abandonné la cōtinence, là où en l'ame
 temperante tout est applany : il n'y a rien emeu qui batte, tout y est sain : de sorte que
 qui verroit l'obeissance grande, & la tranquillité merueilleuse, dont la partie irraison-
 nable est vnée & incorporee avec la raisonnable, il pourroit dire,
 Alors le vent auoit du tout cédé,

De la Vertu Morale.

Et luy estoit le calme succédé
Sans nulle haleine, aiant des mers profondes
Dieu appaisé totalement les ondes.

E

Aiant la raison assopy les excessifs, furieux & forcenez mouuements des cupiditez & passions, & celles dont la nature a necessairement besoing, les aiant rendues tellement souples & obeissantes, amies & secondantes toutes les intentions & toutes les volontez de la raison, que ny elles ne courent deuant, ny ne demourent derriere, ny ne font desordre quelconque par aucune desobeissance,

Comme vn poulain fuit la iument qu'il tette.

Ce qui confirme le dire de Xenocrates touchant ceux qui prennent à bon escient l'estude de la Philosophie, que seuls ils font volontairement ce que les autres font mal-gré eux pour la crainte des loix, s'abstenans de satisfaire à leurs appétits desordonnez pour la doute des peines, comme les chiens pour la peur des coups de baston, & le chat pour le bruit, ne regardans seulement qu'au danger de la peine. Or qu'il y ait F en l'ame sentiment d'une telle fermeté & résistance à l'encontre des cupiditez, comme il y auoit quelque chose qui les combatist, & qui leur feist teste, il est bien euident: toutefois il y en a qui maintiennent, que la passion n'est point chose differente ny diuerse de la raison, & que cela qui se sent n'est point vn combat de deux diuerses choses, ains changement d'une seule, qui est la raison, mais que nous ne nous apperceuons pas de ce chagement, à cause de sa soudaineté, ne considerans pas ce pendant que c'est vn mesme subiect de l'ame, laquelle de sa nature sçait conuoiter, & se repentir, se courroucer & auoir peur, qui tend à faire chose deshonneste attirée par la volupté, & à l'opposite aussi s'en retient par crainte de la peine: car il est certain, que cupidité, crainte, & autres semblables passions, sont opinions peruerfes, & mauuais iugemens qui s'impriment non en diuerses parties de l'ame, ains en celle qui est la principale, c'est à sçauoir le discours de la raison, de laquelle les passions sont inclinations, consentemens, appetitions, mouuements, & operations: brief qui se chan- G gent legerement en peu d'heure, & dont l'impetuosité & vehemence violente est fort dangereuse, à cause de l'imbecillité & inconstance de la raison, ne plus ne moins que les courses des petits enfans. Mais le discours de ces oppositions-là premierement est contraire à l'euidence notoire, & au sens commun, car il n'y a personne qui en soy mesme ne sente vne mutation de concupiscence en iugement, & à l'opposite aussi, de iugement en concupiscence: & voyons que l'amant ne cesse point d'aimer, encore qu'en son entendement il discoure & iuge, qu'il se faille departir de l'amour, & luy résister, ny derechef aussi ne sort il point du discours & du iugement, quand il se lasche & se laisse aller à sa cupidité, ains lors que par la raison il combat à l'encontre de sa passion, il est encore actuellement en la passion: & semblablement à l'heure mesme qu'il se laisse vaincre de la passion, il voit & cognoist par le discours de la raison, le peché qu'il commet: de maniere que ny par la passion il ne perd point la raison, ny par H la raison il n'est point deliuré de la passion, ains branlant tantost en vn costé & tantost en l'autre, il demeure neutre, mestoyen & commun entre les deux. Mais ceux qui estiment, que la principale partie de l'ame soit maintenant la cupidité, maintenant le discours qui s'oppose à la cupidité, ressemblent proprement à ceux qui voudroient dire, que le veneur & la beste sauuage ne fussent pas deux, ains vn tout seul corps qui se changeast tantost en vne beste, & tantost en vn veneur: car & ceux là en chose toute euidente ne verroient goutte, & ceux cy parlent contre leur propre sentiment, attendu qu'ils sentent realement & de faict en eux mesmes, non vne mutation d'un en deux, mis vn estrif & combat de deux l'un contre l'autre. Pourquoy doncques (disent-ils) ce qui delibere & qui consulte en nous, n'est-il aussi bien double, ains est simple & seul? C'est bien allegué, respondrons nous, mais l'euenement

A nement & l'effect en est tout different: car ce n'est pas la prudence de l'homme qui combat contre soy-mesme, ains se seruant d'une mesme puissance; & faculté de ratiociner, elle touche diuers arguments: ou plus tost, dirons nous, c'est vn mesme discours employé en diuers subiects & matieres differentes: & pourtant n'y a il point de douleur, ny de regret aux discours qui sont sans passion, ny ne sont point les consultants forcez de tenir vne des parties contraires, contre leur propre volonté, si ce n'est que d'aduenture il n'y ayt secrettement quelque passion attachee à l'une des parties, comme qui adiousteroit sous main quelque chose à l'un des bassins de la balance: ce qui aduient bien souuent, & lors ce n'est pas le discours de la ratiocination qui se contrarie à soy-mesme, ains est quelque passion secrette qui repugne à la ratiocination, comme quelque ambition, quelque emulation, quelque faueur, quelque ialousie, ou quelque crainte contreuenant au discours de la raison: & il semble que ce soient deux discours qui de paroles se combattent l'un contre l'autre, ainsi qu'il ap-

B pert clairement par la sentence de ces vers d'Homere,

Honte ils auoient du combat reietter

Le refusant, & peur de l'accepter.

Souffrir la mort est chose douloureuse,

Mais renommee on acquiert glorieuse:

Craindre la mort est vne lascheté,

Mais il y a à viure volupté.

Et de ces autres,

Iliad. liu. 7.

Voyla pourquoy au iugement des proces, les passions qui s'y coulent, sont ce qui les fait longuement durer: & au conseil des Princes & des Roys, ceux qui y parlent en faueur de quelque partie, ne le font pas, ny ne defendent pas l'une des sentences pour la raison, ains se laissent trauerfer à quelque passion contre le discours de l'utilité. C'est pourquoy és citez qui sont gouuenees par vn Senat, les Magistrats qui seient en iugement ne permettét pas aux Orateurs & Aduocats d'esmouuoir les affectiōs: car

C le discours de la raison n'estât empesché d'aucune passion, tend directement à ce qui est bon & iuste: mais si l'y met quelque passion à la trauerse, alors le plaisir ou des- plaisir y engēdre combat & dissention à l'encontre de ce que lon iuge estre bon. Qu'il soit ainsi, pourquoy est-ce, qu'aux disputes de la Philosophie on ne voit point que les vns soiēt amenez avec douleur & regret par les autres en leurs opinions? Ains Aristote mesme, Democritus & Chrysippus ont depuis reprouué quelques aduis qu'ils auoient approuuez, sans regret ne fascherie quelconque, mais plus tost avec plaisir: pour ce qu'en la partie speculatiue de l'ame, il n'y a aucune contrariété de passions, à cause que la partie irraisonnable de l'ame se repose & demeure quoye sans curieusement s'ingerer de s'en entremesler. Ainsi les discours de la ratiocination, aussi tost que la verité luy apparoit, encline volontiers en celle part, & abandonne le mensonge, d'autant qu'en luy est non ailleurs, la faculté de croire ou descroire, là où les conseils & de-

D liberations d'affaires, les iugements & arbitrages, pour la plus part estans pleins de passions, rendent le chemin mal aisé, & donnent bien de la peine à la raison, qui est arrestee & empeschée par la partie irraisonnable de l'ame, qui luy resiste, en luy mettant au deuant quelque plaisir, ou quelque crainte ou quelque douleur ou cupidité, dequoy le sentiment est le iuge, touchant à l'une & à l'autre partie: car si bien l'une surmōte, elle ne deffait pas pour cela l'autre, ains la tire à soy malgré elle par force, cōme celuy qui se tanse & se reprēt soy-mesme, pour estre amoureux, vse du discours de la raison contre sa passion, estans tous les deux ensemble actuellemēt dedans son ame, ne plus ne moins que si avec la main il reprimoit & repoulloit l'autre partie enflammee d'une fiēure de passion, sentant les deux parties realement se battans l'une contre l'autre dedans soy mesme: là où és disputes & inquisitions non passionnees, telles que sont celles de l'ame speculatiue & contemplatiue, si les deux parties se trouuent

De la Vertu Morale.

egales, il ne se fait point de iugement, ains y a vne irresolution, qui est comme vne E
pause & vn arrest de l'entendement, ne pouuant passer outre, ains demourant suspēdu
entre deux contraires opinions : & fil aduient qu'il encline en l'vne des opinions, la
plus forte dissout l'autre, sans qu'elle en deuienne marrie, ny qu'elle en conteste ob-
stineement contre l'opinion. Brief là où il y a vn discours & vne ratiocination qui
semble contrarier à l'autre, ce n'est pas que lon sente deux diuers subiects, mais vn seul
en diuerses apprehensions & imaginations. Mais quand la partie brutale combat à
l'encontre de la raisonnable, estant telle qu'elle ne peut ny vaincre ny estre vaincue,
sans regret & douleur, incontinent ceste bataille diuise l'ame en deux, & rend ceste di-
uersité toute euidente & manifeste. Si ne cognoit on pas seulement à ce combat, qu'il
y a difference entre la source de la passion, & celle de la raison, mais aussi à ce qui s'en
ensuit, par ce que lon peut aimer vn gentil enfant & bien né à la vertu, & en aimer
aussi vn mauuais & dissolu. Et se peut faire que lon vse de courroux iniustement à l'en-
contre de ses propres enfans, ou de ses peres & meres, & que lon en vse aussi iustement F
pour ses enfans, & pour ses peres & meres à l'encōtre des ennemis & des tyrās : & cōme
là se sent manifestement le combat & la difference de la passion d'auec le discours de
la raison, aussi la sent on icy de l'obeissance & de la fuite de la passion qui se laisse con-
duire & mener à la raison. Comme, pour exemple, il aduient souuent qu'un homme
de bien espouse vne femme selon les loix, en intention de l'honorer & de viure avec
elle iustement & honestement : mais puis apres, la longue conuersation par laps de
temps y aiant imprimé la passion d'amour, il apperçoit en son entendement, qu'il la
cherit & l'aime plus tendrement qu'il n'auoit proposé du cōmanccment. Et les ieunes
gens qui rencontrent des maistres & precepteurs gentils, les suyuent & les caressent du
commancement pour l'vtilité qu'ils en reçoient, mais par traict de temps puis apres,
ils les aiment cordialement : & au lieu qu'ils leur estoient familiers & assidus disci-
ples seulement, ils en deuiennent amoureux. Autant en aduient il enuers les Ma-
gistrats, enuers les voisins, & enuers les alliez : car du commancement nous hantons G
auecques eux ciuilement & par obligation de quelque honnesteté : mais puis apres
nous ne nous donnons garde, que nous les aimons cherement, venant la raison à
persuader & y attirer la partie de l'ame qui est le subiect des passions. Et celuy qui
a dit le premier ce propos,

Il y a deux hontes, l'vne louable,

L'autre fardeau qui les maisons accable :

Hesiodé au
1. des œuvres

ne monstre il pas manifestement, qu'il auoit en foy mesme souuent experimēté que
ceste passion luy auoit par dilayer contre raison, & differer de iour à autre, ruiné
ses affaires & fait perdre de belles occasions? Ausquelles preuues ces Stoïques icy se
rendans pour l'euidence manifeste qu'il y a, appellent honte vergongne, & volupté
ioye, & peur circonspection : en quoy on ne les sçauoit pas iustement reprendre de
ces deguisemēs-là de noms honestes, prouueu qu'ils appellassent les mesmes passions, H
quand elles se rengent à la raison de ces honestes-là : & quand elles y repugnent & la
forcent, de ces fascheux icy. Mais quand estans conuaincus par larmes qu'ils espan-
dent, par tremblemens de leurs membres, par changement de couleur, ils appellent
au lieu de douleur & de peur, ie ne sçay quelles morsures & contractions, & qu'ils
disent au lieu de cupidité promptitude, pour cuider diminuer l'imperfection de leurs
passions, il semble qu'ils inuentent & mettent en auant des iustificacions plus ap-
parentes que vrayes, & sophistiques, non pas philosophiques, cuidans pour neant
s'exempter & esloigner des choses par les changemens & deguisemens des noms, &
toutefois eux mesmes appellent encore ces ioyes-là, ces promptitudes de volonté,
ces circonspections retenues, Eupathies, c'est à dire, bonnes affectiōs ou droittes pas-
sions, & non pas impassibilitiez : vñs en cest endroit des noms ainsi comme il appar-
tient

A tient. Car il se fait alors vne droiture de passions, quand le discours de la raison vient non à abolir & ôter du tout les passions, mais à les regler & bien ordonner en ceux qui sont sages : mais les vicieux & incontinens, que leur aduient il quand ils ont iugé qu'il leur faut aimer pere & mere, & au lieu d'une amie ou d'un amy ? Ils ne peuuent venir à bout de le faire : & au contraire, ils ont iugé qu'il leur faille aimer vne courtisane ou vn flatteur bouffon, ils les aiment incontinent. Or si c'estoit vne mesme chose que la passion & le iugement, il faudroit que aussi tost comme lon auroit iugé, qu'il seroit besoing d'aimer ou de haïr, que l'aimer ou le haïr s'en ensuiuiſt incontinent : mais au contraire, tout au rebours aduient, par ce que la passion s'accorde bien avec quelques iugemens, & à d'autres elle repugne : parquoy eux mesmes forcez par la verité des choses, disent bien que toute passion n'est pas iugement, ains seulement celle qui eueit l'appetition forte & vehemente, confessans par là, que ce sont choses diuerſes en nous, celle qui iuge, & celle qui souffre, c'est à dire, qui reçoit les passions, comme ce qui remue, & ce qui est remué. Chrysippus mesmes en plusieurs passages definissant que c'est patience & continence, il dit, que ce sont habitudes aptes & idoines à ſuivre l'election de la raison : par où il monstre euidentement, qu'il est contraint de confesser & aduouër, que c'est autre chose en nous, ce qui ſuit en obtemperant, ou qui repugne en n'obtemperant pas, que ce qui est ſuiuy, ou non ſuiuy. Et quant à ce qu'ils tiennent que tous pechez sont egaux, & toutes fautes egales, il n'est pas maintenant temps ne lieu à propos pour le refuter : mais bien diray-je en passant, que en la plus part des choses ils se trouueront repugner & resister à la raison, contre l'apparence & euidence toute manifeste : car toute passion selon eux est faute, & tous ceux qui se deulent, ou qui craignent, ou qui appetent, faillent. Or y a il certainement de grandes differences entre les passions selon plus & moins : car qui diroit que la peur de Dolon fust egale à celle d'Aïax, qui regardoit tousiours derriere luy, & se retiroit au petit pas d'entre les ennemis,

C L'un des genoux auanceant de peu l'autre, comme dit Homere : & entre la douleur de Platon pour la mort de Socrates, & celle d'Alexandre pour la mort de Clytus, qui s'en voulut tuer luy mesme ? Car les douleurs & regrets croissent infiniment quand c'est contre toute apparence de raison, & l'accident est bien plus grief & plus angoisseux quand il aduient tout au rebours de l'esperance : comme, pour exemple, si vn pere qui s'attendoit de voir son fils aduancé en honneur & credit, entend dire qu'il est en prison, là où on luy donne la gehenne fort estroit, ainsi que Parmenion entendit de son fils Philotas. Et qui diroit que le courroux de Nicocreon à l'encontre de Anaxarchus ait esté pareil à celui de Magas à l'encontre de Philemon, tous deux aians esté iniuriez & outragez de paroles par eux ? car Nicocreon feit piler & briser Anaxarchus avec des pilons de fer dedans vn mortier : & Magas commanda au bourreau d'appliquer le trenchant de l'espee nue sur le col de Philemon, sans luy faire autre mal, & puis le laisser aller. C'est pourquoy Platon appelle l'ire & le courroux, les nerfs de l'ame, pour donner à entendre qu'ils se peuuent lascher & roidir. Pour repouſer ces obiections là, & autres semblables, ils disent que ces tensions & roidissemens là des passions ne se font pas par iugement, attendu qu'il y a faute en toutes, mais que ce sont certaines pointures d'aiguillons, & certaines contractions & dilatations qui reçoient plus ou moins par raison : & toutefois encore y a il difference, quant aux iugemens, par ce que les vns iugent que la pauureté n'est pas mal, & les autres tiennent que c'est vn bien grand mal, & les autres encores plus, iusques à se ietter du hault des rochers dedans la mer, pour en eschapper. Les vns tiennent que la mort est mal, en ce qu'elle nous priue de la fruition du bien : les autres disent, qu'il y a sous la terre des maux eternels, & des punitions horribles. Et la Santé aucuns l'aiment cōme chose vtile, & qui est selon nature :

Iliad. l. 10

De la Vertu Morale.

aux autres il semble que c'est le souverain des biens, tellement que sans elle les richesses ne servent de rien, ny les enfans, ny les estats, non pas

La Royauté, qui l'homme egale à Dieu.

voire iusques à dire, que les vertus mesmes ne servent de rien, & sont inutiles, si elles ne sont accompagnées de la santé: de sorte qu'il appert, que aux iugemens mesmes on erre plus & moins: mais il n'est pas maintenant à propos de refuter cela, seulement faut il de là prendre ce qu'ils confessent eux mesmes, qu'il y a vne partie du iugement qui est irraisonnable, en laquelle ils tiennent que se forme la passion plus grande & plus vehemente, contestans de voix & de parole, & cependant confessans de fait la chose à ceux qui maintiennent, que la partie qui reçoit les passions de l'ame est differente de celle qui iuge & qui discerne. Et Chrysippus en son liure qu'il a intitulé Anomologie, apres qu'il a dit, que la cholere est aveugle, & qu'elle nous empesche de voir bien souvent ce qui est tout evident, & qu'elle offusque & se met au deuant de ce que lon sçait parfaitement, vn peu apres il dit: Car les passions qui suruiennent chassent du tout hors le discours de la raison, & comme si lon estoit d'autre aduis, ils poulent l'homme à faire de contraires actions. Puis il allegue le tesmoignage de Menander,

O moy chetif hélas, en ce temps là

Que ie choisy non cecy, mais cela?

En quel endroit de toute ma personne

Estoit logé ce qui en moy raisonne?

Au 1. liure
des Loyx.

Et passant encore plus outre: Comme ainsi soit, dit-il, que l'animal raisonnable soit né pour en toutes choses user de la raison, & se gouverner par icelle, nous la reiettons neantmoins en arriere par vne autre plus violente force: confessant bien clairement en ces termes, ce qui aduient du debat de la passion à l'encontre de la raison: car ce seroit vne mocquerie, comme dit Platon, de dire qu'un fust meilleur & puis apres pire que soy mesme, ou qu'il fust maistre & maistrisé tout ensemble de soy-mesme, si ce n'estoit pour ce que naturellement vn chascun de nous est double, & qu'il a en soy vne partie meilleure & vne autre pire: ainsi celui qui rend la pire partie subiette & obeissante à la meilleure, est continent, & meilleur que soy-mesme: mais celui qui souffre que la partie brutale & irraisonnable de son ame commande, & aille deuant celle qui est plus noble & meilleure, celui là est incontinent, & pire que soy-mesme, faisant contre nature, d'autant que selon nature il est raisonnable que la raison qui est diuine, marche deuant & commande à la partie sensuelle & brutale, qui prend sa naissance du corps mesme, & auquel elle ressemble, de sa propriété participant ou pour mieux dire estant pleine des passions du corps mesme, auquel elle est adiointe: ainsi que tesmoignent & declarent tous ses mouuemens qui ne tendent qu'à toutes choses materielles & corporelles, & qui prennent leurs roidissements ou relaschemens des mutations du corps. Voila pourquoy les ieunes hommes sont prompts, hardis, & en leurs appetits bouillans, iusques à en estre presque furieux, pour la quantité & chaleur de leur sang: & des vieux, au contraire, la source de concupiscence, qui est au foye, festaint, & deuiet foible & imbecille, & à l'opposite la raison vient en force & vigueur, d'autant que la partie sensuelle & passionnée vient à s'amortir avec le corps: & c'est cela mesme qui dispose la nature des bestes sauvages à diuerses passions: car ce n'est point pour droittes ou peruerses, bonnes ou mauuaises opinions qu'elles aient, que les vnes sont incitées à faire effort, & se mettre en defense contre quelque peril qui se presente, & les autres sont si esprises de peur & de frayeur, que lon ne les sçauroit iamais asseurer, ains les forces qui sont au sang, aux esprits & en tout le corps, font les diuersitez & differences des passions qui sourdent & germent de la chair, come de leur source & racine. Mais en l'homme que le corps se meue & souffre quand & les ellans des passions, on l'apperceoit euidentement par la couleur passe en frayeur,

par

- A** par la rougeur de visage, par le tremblement des iambes, le battement du cœur en cholere : & au contraire aussi, par les espanouïssemens & eslargissemens du visage, quand l'homme est en esperance de quelques voluptez : là où quand l'esprit & l'entendement se meut seul sans passion, alors le corps se repose & demeure quoy, n'ayant communication ny participation quelcōque avec la partie qui entend & qui discourt : où fil se met à penser quelque proposition de Mathematique ou d'autre sciēce speculatiue, il n'y appelle pas seulement pour adioinct la partie irraisonnable, tellement que par là mesme il appert clairement, que ce sont deux parties differentes en facultez & en puissance. En somme, de toutes les choses qui sont au monde, comme eux mesmes le disent, & comme il est aussi tout euident, les vnes sont regies & gouuernees par habitude, les autres par nature : les vnes par l'ame sensuelle & irraisonnable, les autres par celle qui a la raison & l'entendement, dequoy l'homme est en tout participant & né avec toutes ces differences : car il est contenu par habitude, & nourry par nature, & vse de raison & d'entendement : ainsi a il sa part de ce qui est irraisonnable : & est nec avec luy, non venue ny introduitte d'ailleurs, la source & cause primitiue des passions, laquelle par consequent luy est necessaire : & pource ne la faut pas oster ny deraciner du tout, ains seulement la cultiuer, la regir & gouuerner. Pourtant ne faut il pas, que la raison face comme iadis feit Lycurgus le Roy de Thrace, qui feit couper les vignes pourautant que le vin enyuroit : ny ne faut pas qu'elle retrenche tout ce qu'il y peut auoir de profitable en la passion, avec ce qu'il y a de dommageable : ains faut qu'elle face comme le bon Dieu, qui nous a enseigné l'vsage des bonnes plantes & arbres fructiers, c'est de resequer ce qu'il y a de sauuage, & oster ce qu'il y a de trop, & au demourant cultiuer ce qu'il y a d'vtile : car ceux qui craignent de s'enyurer, ne respandent pas le vin en terre : ny ceux qui craignent la violence de la passion, ne l'ostent pas du tout, ains la téperent, comme lon donte bien la fierté des bœufs & des cheuaux, pour les garder de regibber & de sauter : aussi le discours de la raison se sert des passions quād
- C** elles sont bien dontees & bien duittes à la main, sans eneruer ny du tout couper à la racine la partie de l'ame qui est nec pour seconder & seruir.

Le cheual est pour seruir à la guerre :

Pour la charrue à labourer la terre

Il faut le bœuf : le Daulphin cour volant

Iouxte la nef en pleine mer cinglant :

Au fier sanglier, qui de tuer menace,

Faut vn leurier hardy qui le terrasse.

- ce dit Pindare : mais l'entretienement des passions est encore bien plus vtile que toutes ces bestes là, quand elles seconcent la raison, & seruent à roidir les vertus, comme l'ire moderee sert à la vaillance, la haine des meschans sert à la iustice, l'indignation à l'encontre de ceux qui indignement sont heureux : car leur cœur esleué de folle arrogance & insolence à cause de leur prosperité a besoing d'estre reprimé, & n'y a personne qui voulust, encore qu'il se peust faire, separer l'indulgence de la vraye amitié ou l'humanité de la misericorde, ny le participer aux ioyes & aux douleurs de la vraye bien vueillance & dilection. Et fil est ainsi, comme il est, que ceux qui voudroient chasser amour du tout à cause du fol amour, erreroient grandement, aussi peu feroient bien ceux, qui pour l'auarice, qui est conuoitise d'auoir, voudroient estaindre, & blasmeroient toute cupidité : & feroient ne plus ne moins, que ceux qui voudroient empescher que lon ne courust, pource que lon choppe quelquefois en courant : & que lon ne tirast iamais de l'arc, pource que lon faut aucunesfois à donner au blanc : & comme si quelqu'un ne vouloit iamais ouir chanter, pourautant que le discorder luy desplairoit : car ainsi comme la musique ne fait pas l'harmonie de l'accord, en ostant le bas & le haut de la voix, ny la medecine ne ramene pas la santé es corps en ostant le

De la Vertu Morale.

chaud & le froid, mais en les temperant & meslant ensemble par bonne proportion, E
ainsi est il quant à ce qui est louable és meurs, quand par la raison il y a vne mediocrité & moderation empreinte és facultez & mouuemens des passions, par ce que l'excessiue ioye, l'excessiue douleur & tristesse, ressemblent à la fieure & inflammation du corps, non pas la ioye ny la tristesse simplement. Voyla pourquoy Homere dit sagement,

Iliad. l. 12.

L'homme de bien n'a iamais trop de peur,

Ny pour effroy ne change de couleur.

Car il n'oste pas la peur simplement, mais l'excessiue peur, à fin que lon ne pense pas que la vaillance soit vne folie desesperee, ny que l'assurance soit temerité. Ainsi faut-il aux voluptez retrencher la trop vehemente cupidité, & és vengeance, la trop grande haine des meschans: & qui le fera ainsi, se trouuera non point indolent, mais temperant, & iuste, non point cruel: là où si lon oste de tout point entierement les passions, encore qu'il fust possible de le faire, on trouuera que la raison en plusieurs F choses demourera trop lasche & trop molle, sans action, ne plus ne moins qu'un vaisseau branlant en mer, quand le vent luy defect. Ce que bien entendans les Legiflateurs és establissemens de leurs loix & polices, y meslent des emulations & ialousies des citoiens, les vns sur les autres, & contre les ennemis ils aiguifent la force du courage: & la vertu militaire, avec des tabourins & trompettes, les autres avec des flustes & semblables instrumens de musique. Car non seulement en la poësie, comme dit Platon, celui qui sera espris & rauy de l'inspiration des Muses, fera trouuer tout autre ouurier, quelque laborieux, exquis & diligent qu'il soit, digne d'estre mocqué: mais aussi és combats l'ardeur affectionnee & diuinement inspiree est inuincible, & n'y a homme qui la peust soustenir: c'est vne fureur martiale que Homere dit que les Dieux inspirent aux hommes belliqueux,

Parlé qu'il eut, de grand force il enfla

Le cœur du Roy, que dedans il souffla.

Et cest autre,

G

Il faut qu'il soit assisté d'un des Dieux,

Qu'il est si fort au combat furieux.

adioustant au discours de la raison comme vn aiguillon & vne voicture de la passion qui la pousse, & qui la porte. Et nous voyons que ces Stoïques icy, qui reiettent tant les passions, incitent bien souuent les ieunes gens avec louanges, & bien souuent les tansent de bien seueres paroles & aigres reprehensions, à l'un desquels est adioinct le plaisir, & à l'autre le desplaisir, parce que la reprehension apporte repentance & vergongne, dont l'une est comprise sous le genre de douleur, & l'autre sous le genre de crainte: aussi vsent ils de ceux-là principalement aux corrections & reprehensions.

- " C'est pourquoy Diogenes, vn iour que lon louoit hautement Platon, Et que trouuez
" vous, dit-il, de si grand & si digne en ce personnage, veu qu'en si long temps qu'il y a
" qu'il enseigne la Philosophie, il n'a encore fasché personne? car les sciences Mathe- H
matiques ne sont pas si proprement les anses de la Philosophie, comme souloit dire Xenocrates, comme le sont les passions des ieunes gens, c'est à sçauoir la honte, la cupidité, la repentance, la volupté, la douleur, l'ambition, ausquelles passions la raison & la loy venans à toucher avec vne touche discrete & salutaire, remet promptement & efficacement le ieune homme en la droite voye: tellement que le Pædagogue Laconien respondit tresbien, quand il dit, qu'il feroit que l'enfant qu'on luy bailloit à gouverner se resiouiroit des choses honestes, & se fascheroit des deshonestes: qui est la plus belle & la plus magnifique fin, qui sçauoit estre de la nourriture & education d'un enfant de bonne & noble maison.

DV

A



L S E M B L E que ce soient les habillemens qui eschauffent l'homme, & toutefois ce ne sont-ils pas qui l'eschauffent, ne qui luy donnent la chaleur, par ce que chascun d'iceux vestemens à par soy est froid: de maniere que quād on est en fièvre & en chaud mal, on aime à changer souuent de draps & de couuerture, pour se refreschir: mais l'habillement enueloppant le corps, & le tenant ioinct & serré, arreste & contient la chaleur au dedans, que l'homme rend de soy-mesme, & empesché qu'elle ne se respande parmy l'air. Cela mesme estant

es choses humaines trompe beaucoup de gens, lesquels pensent fils sont logez en belles & grandes maisons, fils possèdent grand nombre d'esclaves, & qu'ils amassent grosse somme d'or & d'argent, qu'ils en viurent ioyeusement:

B là où le viure doucement & ioyeusement ne procede point du dehors de l'homme, ains au cōtraire l'homme despart & donne à toutes choses qui sont autour de luy ioye & plaisir, quand son naturel & ses mœurs au dedans sont bien composez, par ce que c'est la fontaine & source viue, dont tout ce contentement procede.

La maison est à voir plus honorable,

Ou il y a tousiours feu perdurable.

aussi les richesses sont plus agreables, la gloire a plus de lustre & de splendeur, & l'authorite apporte plus de contentement si la ioye interieure de l'ame y est coniointe, attendu que l'homme supporte & la pauureté, & le bannissement de son pais, & la vieillesse plus patiemment & plus aiseement, si de luy-mesme il a les mœurs doulces, & le naturel debonnaire. Car tout ainsi comme les senteurs des espiceries & des parfums rendent les haillons mesmes tous deschirez, bien odorās: & au cōtraire l'ulcere du duc Anchise rendoit vne bouë de tres-mauuaise odeur, ainsi que dit le poëte Sophocle:

C Son dos estant vlcéré du tonnerre,
Bouë d'odeur mauuaise degouttoit
Sur son habit qui de fin crespé estoit.

Aussi avec la vertu toute façon de viure est doulce & aisee: au contraire, le vice rend les choses qui sembloient autrement grandes, honorables & magnifiques, fascheuses & desplaisantes, quand il est meslé parmy, comme tesmoignent ces vers,

Tel au dehors en public semble heureux,
Qui porte ouuerte au dedans malheureux
Se trouue: en tout sa femme est la maistresse,
Elle commande, elle ransé sans cesse:
Il a plusieurs causes de se doulloir,
Je n'en ay point qui force mon vouloir.

D Et toutefois, encore est il plus aisé de se desfaire d'une mauuaise femme, pourueu que lon soit homme, & non pas esclave. Mais il n'y a point de diuorce avec son propre vice, ny moien d'en estre exempt, deliuré de toutes fascheries, pour demourer en repos à par soy, en luy escriuant vn petit libelle de repudiation: ains adhère tousiours aux entrailles de celui qui s'en est vne fois emparé, luy demourant attaché iour & nuit,

Sans torche ardente en cendres le reduit,
Et à vieillesse auant temps le conduit.

C'est vn fascheux compagnon par les champs, par ce qu'il est presumptueux, & ne fait que mentir: mauuais à la table, parce qu'il est friand & gourmand: ennuyeux au liēt, pource que de soucy, d'ennuy, & de ialousie, il rompt le sommeil, & engarde de dormir: car le sommeil est le repos du corps à ceux qui dorment: &, à l'opposite,

g ij

Homere en
ses epigram-
mes.

En la Tra-
gédie de La-
coon, citée
par Denys
d'Halicar-
nasse, liure 1.
des Antiq. de
Rome.

Du vice & de la vertu.

ce n'est que frayeur & trouble de l'ame pour les songes espouventables qu'ont ceux **E**
qui sont espris de superstition :

Si ie m'endors quand mes ennuyes me tiennent ,

Je suis perdu des songes qui me viennent ,

Au 9. de la
Repub.

ce dit quelqu'un : autant en font les autres vices , comme l'enuie , la peur , la cholere ,
l'amour & l'incontinence. Car tant que le iour dure , le vice regardant au dehors , &
se composant au gré des autres , a quelque honte , & couure ses passions , ne se lais-
sant pas du tout aller à ses appetits desordonnez , ains y resistant & contestant quel-
quefois : mais en dormant , estant eschappé de la crainte des loix , & de l'opinion du
monde , & se trouuant arriere de toute crainte & de toute honte , alors il remue toute
cupidité , il resueille sa malignité , il desploye son intemperance , il s'efforce d'habiter
charnellement avec sa propre mere , comme dit Platon , il mange des viandes abomi-
nables : & n'y a chose vilaine dont il s'abstienne : employant & executant sa mau-
uaise volonté en tout ce qui luy est possible , par illusions & imaginations de songes , **F**
qui se terminent , non en aucune volupté , ny iouissance de sa mal-heureuse cupidité ,
ains seulement à esmouuoir , exciter , & irriter d'auantage ses passions & maladies se-
crettes. En quoy doncques gist & consiste le plaisir du vice , si est ainsi qu'il ne soit
iamais sans ennuy , sans peur , & sans soucy , si n'est iamais content , si est tousiours
en trouble , & iamais en repos ? Car il faut que la bonne complexion & saine disposi-
tion du corps donne lieu & naissance aux voluptez de la chair : & au regard de l'ame il
n'y peut auoir ioye certaine ny contentement , si tranquillité d'esprit , constance & as-
seurance n'en ont posé le fondement , & n'y ont apporté vn calme , sans aucune appa-
rence de tempeste ny de tourmente , ains si y a quelque esperance qui luy rie , ou quel-
que delectation qui le chatouille , incontinent soing & sollicitude perce , qui comme
vne nuee vient à brouiller & troubler toute la serenité du beau temps. A masse force
or , assemble de l'argent , edifie de belles galeries , emply toute vne maison d'esclaves ,
& toute vne ville de tes debteurs : si tu n'applanis les passions de ton ame , si tu n'ap- **G**
paisses ta cupidité insatiable , & que tu ne te deliures toy-mesme de toute crainte &
toute sollicitude , c'est tout autant comme si tu versois du vin à vn qui auroit la fièvre ,
ou si tu donnois du miel à vn qui auroit vn flon , ou la maladie qui s'appelle cholere ,
& si tu apprestois force viande & bien à manger à qui auroit vn grand flux de ventre ,
& vne dysenterie telle , qu'il ne pourroit rien digerer , ny retenir viande aucune , & à
qui la viande mesme apporteroit corruption encore plus grande. Ne vois tu pas que
les malades ont à contre-cœur , & reiettent les plus delicates & plus exquises viandes
qu'on leur scauroit presenter , & qu'on s'efforce de leur faire prendre ? puis quand la
bonne temperature du corps leur est retournee , les esprits nets , le sang doux & la cha-
leur moderee & familiere , ils sont bien aises , & ont à plaisir de manger du pain tout
sec avec vn peu de fourmage , ou vn peu de cresson. La raison apporte vne telle dispo-
sition à l'ame : & seras alors content de ta fortune , quand tu auras bien appris que c'est **H**
que la vraye honnesteté , & que c'est que la bonté : tu auras paureté en delices , & seras
veritablemēt Roy , n'aimant pas moins la vie priuee & retiree loing de charges & d'af-
faires , que celle de ceux qui ont les grandes armées & les grands estats à gouverner : &
quand tu auras profité en la Philosophie , tu viuras par tout sans desplaisir , & scauras
viure ioyeusement en tout estat. La richesse te resiouira , d'autant que tu auras plus
de moien de faire du bien à plusieurs : la paureté , d'autant que tu auras moins de
soucy : la gloire , d'autant que tu te verras honoré : la basse condition , d'autant
que tu en seras moins enuié.

Q V E

A.



O V S mettons la vertu en dispute, & doutons si la prudence, la iustice & la preud'homme se peuvent enseigner: & ce pendant nous admirons les œuvres des orateurs, des marini-
niers, des architectes, des laboureurs, & autres infinis sem-
blables: & de gens de bien il n'y aura que le nom tout sim-
ple, & que la parole toute nue seulement, comme si c'estoient
Hippocentaures, Géants ou Cyclopes? & ce-pendant d'action
vertueuse où il n'y ait rien à redire, qui soit entière & parfaite,
il ne s'en pourra point trouver, ny de mœurs tellement
composées à tout devoir, qu'il n'y ait mélange aucune de

passion, ains si par fortune la nature d'elle-mesme en produit quelques vnes qui soient
belles & bonnes, elles sont incontinent offusquées & obscurcies par autres mixtions

B estrangères, ne plus ne moins qu'un fruit franc, qui seroit altéré par adionction de
matière & nourriture sauvage? Les hommes apprennent à chanter, à baller, à lire &
à écrire, à labourer la terre, à picquer chevaux: ils apprennent à se chauffer, à se vestir,
à donner à boire, à cuisiner: & n'y a rien de tout cela qu'ils sçachent bien faire, s'ils ne
l'ont appris: Et ce, pourquoy toutes ces choses & autres s'apprennent, qui est la preu-
d'homme & la bône vie, sera chose casuelle & fortuite, qui ne se pourra ny enseigner
ny apprendre? O bonnes gens, pourquoy est-ce qu'en niant que la bonté se puisse en-
seigner, nous nions quand & quant qu'elle puisse estre! car s'il est vray que son appren-
tissage soit sa generation, en niant qu'elle se puisse apprendre, nous affermons aussi
qu'elle ne peut doncques estre. Et toutefois, comme dit Platon, pour estre le manche
d'une lyre disproportionné & demesuré d'avec le corps, iamaïs il n'y eut frere qui en
feist la guerre à son frere, ny amy qui en prist querelle à son amy, ny ville qui en en-
trast en inimitié avec autre ville sa voisine, iusques à faire & à souffrir les maux &

C miseres extremes que telles guerres ont accoustumé d'apporter: & ne sçauoit on
dire que pour occasion d'un accent, s'il faut prononcer Telchinas l'accent sur la pre-
miere syllabe, ou sur la seconde, il se soit emeu iamaïs sedition en aucune cité, ny
debat en une maison entre le mary & la femme à raison de la trame & de l'estaim: &
neantmoins iamaïs homme ne se mettra à vouloir tixer un drap, ou ourdir une toile,
ny à manier un liure, ou une lyre, qu'il ne l'ait au parauant appris: non qu'il fust au-
trement pour en recevoir quelque dommage notable, quand il le feroit, ains seulement
pour ce qu'il se feroit mocquer de luy, par ce qu'il vaut mieux, comme disoit Heracli-
tus, cacher son ignorance: & ce pendant il presume de pouoir bien gouverner &
administrer une maison, un mariage, un magistrat, une chose publique, sans l'auoir
appris? Diogenes voyant un ieune garçon qui mangeoit goulument, donna un
soufflet à son pédagogue: & eut raison de ce faire, attribuant la faute plustost à celui
qui ne luy auoit pas enseigné, qu'à celui qui ne l'auoit pas appris. Ainsi on ne pourra
mettre la main au plat honnestement, ny prendre la coupe de bonne grace, qui ne
l'aura appris de ieunesse, ny se garder

D'estre goulu, ou friand, ou gourmand,

Ny d'esclatter de rire vehement,

Ny mettre un pied en croix par dessus l'autre:

comme dit Aristophanes. Et ce pendant il sera bien possible qu'une personne sça-
che comment il se faut gouverner en mariage, au maniement des affaires de la chose
publique, viure parmy les hommes, exercer un magistrat, sans auoir premierement
appris comment il s'y faut comporter, les uns enuers les autres? Quelqu'un dit un
iour en disputant à Aristippus, Es tu doncques par tout? Je perdrois, respondit-il,
le nautage que ie paye au marinier, si i'estois par tout. Ne pourroit on pas aussi

In la Co-
medie des
Noces.

Que la vertu se peut enseigner & apprendre.

dire, on pert doncques le salaire que lon donne aux maistres & pedagogues, si les enfans par apprentissage ne deuiennent point meilleurs? Mais au contraire il se voit que comme les nourrices forment & dressent les membres de leurs enfans avec les mains, aussi les gouuerneurs & pedagogues les prenans au partir des nourrices, les adressent par accoustumance au chemin de la vertu. Auquel propos vn Laconien respondit sagement à celuy qui luy demandoit, quel profit il faisoit à l'enfant qu'il gouuernoit: „ Je fais, dit'il, que les choses bonnes & honestes luy plaisent. Ils leur enseignent à ne se pancher pas en auant quand ils cheminent, ne toucher à la faulx que d'un doigt, de deux au pain & à la viande, se frotter ainsi, trousser ainsi sa robbe. Que diroit on doncques à celuy qui voudroit dire, qu'il y auroit art de medecine pour guarir vne dartre, & vn panaris, ou mal au bout du doigt, & qu'il n'y en auroit point à guarir vne pleuresie, vne fiéure chaude, ou vne frenesie? ne seroit-ce pas tout autant comme qui diroit, que raisonnablement il y auroit escholes, maistres, & preceptes de petites & pueriles choses, mais que des grandes & parfaites il n'y auroit qu'une routine, ou vne rencontre fortuite, & cas d'aduenture seulement? Car ainsi que celuy meriteroit d'estre F
mocqué qui diroit, que nul ne doit mettre la main à la rame pour voguer, qu'il ne l'ait appris, mais bien au timon pour gouuerner: aussi en seroit digne celuy qui maintiendrait, qu'il y eust apprentissage es autres sciences inferieures, & en la vertu qu'il n'y en eust point: & si feroit le contraire des Scythes, lesquels ainsi cōme escrit Hero-
dote, creuent les yeux à leurs esclaves, à fin qu'ils leur tournent & remuent leur laiçt: & celuy-là dōnant l'œil de l'art & de la raison aux arts inferieurs l'osteroit à la vertu. Là où, au contraire, Iphicrates respondit à Callias fils de Chabrias qui luy demandoit „ par vne façon de mespris, Qu'es-tu toy? Archer, Picquier, homme d'armes, ou che-
„ ualleger? Je ne suis pas vn de tous ceux-là, mais bien celuy qui leur commande à tous. Digne doncques de mocquerie & impertinent seroit celuy, qui diroit qu'il y auroit de l'art à tirer de l'arc, à escrimer, à ruer de la fonde, & à picquer cheuaux, mais G
qu'à cōduire vne armee il n'y en auroit point, & que c'est chose qui se rencontre par cas d'aduenture: & encore plus impertinent seroit, qui voudroit dire, que la prudence ne se peut enseigner, sans laquelle tous les autres arts seroient de nulle vtilité, & ne seruiroient de rien. Et qu'il soit ainsi, que ce soit la guide qui mène, conduit, & rend vtils & honorables toutes les autres sciences & vertus, on le peut cognoistre à ce qu'il n'y auroit aucune grace en vn festin, encore qu'il y eust de bons & friands cuysiniers, de bons escuyers trenchans, & de bien adroits eschançons, si n'y auoit vn bon ordre & belle disposition parmy eux.

Voyez le
commance-
ment du 4.
liure d'He-
rodote.

Comment on pourra discerner le

FLATTEVR D'AVEC L'AMY.

Au cinquie-
me liure des
Loix.



L A T O N escrit, que chascun pardonne à celuy qui dit H
qu'il s'aime bien soy-mesme, Amy Antiochus Philopap-
pus, mais neantmoins que de cela il s'engendre dedans nous
vn vice, outre plusieurs autres, qui est tres-grand: c'est, que
nul ne peut estre iuste & non fauorable iuge de soy-mesme:
car l'amant est ordinairement auégle à l'endroit de ce
qu'il aime, si ce n'est qu'il ait appris & accoustumé de lon-
gue main à aimer & estimer plus tost les choses honestes,
que ses propres, & celles qui sont nees avec luy: cela donne
au flatteur la large campagne qu'il y a entre flaterie & amitié, où il a vn fort assis bien
à propos pour nous endommager, qui s'appelle l'Amour de soy-mesme, moyennant
laquelle

- A laquelle chascun estant le premier & le plus grand flatteur de soy-mesme, n'est pas difficile à recevoir & admettre pres de soy vn flatteur estrange, lequel il pense & veut luy estre tesmoing & confirmateur de l'opinion qu'il a de soy-mesme: car celuy, auquel on reproche à bon droit, qu'il aime les flatteurs, s'aime aussi bien fort soy-mesme, & pour l'affection qu'il se porte, veut & se persuade, que toutes choses soient en luy, desquelles la volonté n'est point illicite ny mauuaise, mais la persuasion en est dangereuse, & a besoing d'estre bien retenue. Or si c'est chose diuine que la verité, & la source de tous biens aux Dieux & aux hommes, ainsi que dit Platon, il faut estimer, que le flatteur doncques est ennemy des Dieux, & principalement d'Apollo, pour ce qu'il est tousiours contraire à cestuy sien precepte, *Cognoy toy-mesme*: faisant que chascun de nous s'abuse en son propre faict, tellement qu'il ignore les biens & les maux qui sont en soy, luy donnant à entendre, que les maux sont à demy, & imparfaits, & les biens si accomplis, que lon n'y sçauoit rien adiouster pour les emender.
- B Si doncques le flatteur, comme la plus part des autres vices, s'attachoit seulement ou principalement aux petites & basses personnes, à l'adventure ne seroit il pas si mal-faisant, ne si difficile à s'en garder, comme il est: mais pour-autant que ne plus ne moins que les artisans s'engendrent & se mettent principalement és bois tendres & doux: aussi les gentilles, ambitieuses, & amiables natures, sont celles qui plus tost recoiuent & nourrissent le flatteur, qui s'attache à elles: & encore, tout ainsi comme Simonides fouloit dire, que l'entretenir escuirie ne fuit point la lampe, ains les champs à bled: c'est à dire, que ce n'est point à faire à pauures gens à entretenir grands cheuaux, ains à ceux qui ont beaucoup de reuenu: aussi voyons nous ordinairement, que la flaterie ne fuit point les pauures ou petites personnes, & qui n'ont aucune puissance, ains qu'elle est ordinairement la peste & la ruine des grandes maisons & des grands estats, & que bien souuent elle renuerse sans dessus dessous les Royaumes mesmes, & les principautez & grandes seigneuries. Parquoy ce n'est pas peu de chose, ne qui requiere peu de soing & de sollicitude, que de bien rechercher & considerer la nature d'icelle, à fin qu'estant bien descouuerte & entierement cogneuë, elle n'endommage ny ne deserie point l'amitié. Les flatteurs ressemblent aux poux, car les poux s'en vont incontinent d'auec les morts, & abandonnent leurs corps aussi tost que le sang, duquel ils se fouloient nourrir, en est estainct: aussi ne verrez vous iamais, que les flatteurs s'approchent seulement de personne dont les affaires commencent à se mal porter, & dont le credit s'aille passant ou refroidissant: ains s'attachent tousiours à gens d'autorité & de puissance grande, & les font encores plus grands qu'ils ne sont: mais soudain qu'il leur aduient quelque changement de fortune, ils s'escoulent & se tirent arriere. Voila pourquoy il ne faut pas attendre ceste preuue là, qui est inutile, ou plus tost dommageable & dangereuse: car c'est vne dure chose d'experimenter en temps qui a besoing d'amis, ceux qui ne sont pas amis, mesmement quand lon n'en a pas vn vray & loyal pour opposer à vn faux & desloyal: à raison dequoy il faut auoir esprouué l'amy, ne plus ne moins que la monnoye, auant que le besoing soit venu de l'employer, non pas de l'essayer au besoing & à la necessité, pource qu'il ne faut pas l'esprouuer à son dommage, ains au contraire trouuer moien de sçauoir que c'est, de peur d'en recevoir dommage: autrement il nous en prendra tout ainsi, comme à ceux qui pour cognoistre la force des poisons mortels, en font eux-mesmes l'essay les premiers: car ils en ont la cognoissance, mais c'est aux despens de leur vie, & avec leur mort. Et comme ie ne louë pas ceux là, aussi ne fais-ie ceux qui estiment, que l'estre amy soit seulement estre honeste & profitable, & pour ceste cause pensent que ceux dont la compagnie & frequentation est plaisante & ioyeuse, soient aussi tost atteints & conuaincus d'estre flatteurs: car l'amy ne doit point estre fascheux ne desplaisant, & tel qu'il n'ait rien que l'affection toute simple: ny n'est pas l'amitié venerable

Au 5. liure
des Loix &
au 2. de la
Repub.

Flaterie tres-
pernicieuse.

Comment on pourra discerner

pour estre aspre ou austere, ains au contraire son honesteté mesme & sa grauité est E
douce & desirable, & comme dit le poëte,

Grace & Amour aupres d'elle demeurent.

En la Tra- Et si n'est pas seulement vray ce que dit Euripide,
gardie l'on. L'homme affligé grandement se soulage,

Quand il peut voir son amy au visage.

pource que l'amitié n'adiouste pas moins de grace & de plaisir aux prosperitez, qu'elle oste de douleur & de fâcherie aux aduersitez. Et tout ainsi comme Euenus disoit, que la meilleure saulce du monde estoit le feu: aussi Dieu ayant meslé l'amitié parmy la vie humaine, a rendu toutes choses ioyeuses, douces & plaisantes, là où elle est presente & iouissante de partie du plaisir. car autrement, en quelle sorte se couleroit en grace le flateur par le moien de volupté, s'il voioit que l'amitié de sa nature ne receust & n'admit iamais aucun plaisir? cela ne se scauroit dire ne maintenir. Mais ainsi comme les escus faulx, & qui ne sont pas de bon aloi, representent seulement F le lustre & la splendeur de l'or: aussi le flateur contrefaisant seulement la douceur & l'aggreable façon de l'amy, se monstre tousiours guay, ioyeux, & plaisant, sans iamais resister ny contredire. Pourtant ne fault pas souspeçonner vniuersellement, que tous ceux qui louent autrui soient incontinent flatteurs: car le louer quelquefois, en temps & lieu, ne conuient pas moins à l'amitié, que le reprendre & le blasmer: & à l'opposite, il n'y a rien si contraire à l'amitié, ne si mal accointable, que l'estre fâcheux, chagrin, tousiours reprenant, & tousiours se plaignant: là où quand on cognoist vne bencuolence preste à louer volontiers & largement les choses bien faites, on en porte plus patiemment & plus doucement vne libre reprehension & correction es choses mal-faittes, d'autant que lon le prent en bonne part, & croit on que, qui louë volontiers, il blasme à regret. C'est doncques chose bien fort mal-aïsee, dira G quelqu'un, que de discerner vn flateur d'avec vn amy, puis qu'il n'y a difference entre eux, ny quant à donner plaisir, ny quant à donner louange: car au demourant, quand aux menus seruices & entremises de faire plaisir, on voit bien souuent que la flaterie passe deuant l'amitié. Nous respondrons, que c'est chose tresdifficile voirement de les discerner, si nous prenons le vray flateur qui sçache bien avec artifice & dexterité grande mener le mestier, & que nous n'estimions pas, comme fait le rude & commun populaire, que ces plaisans de table & pourfuyans de repeuës franches, qui n'ont iamais audience qu'apres qu'on a lauë les mains à table, ce disoit vn ancien, soient flatteurs, qui n'ont rien d'honeste, & dont la villanie se manifeste à vn seul plat de viande & vn verre de vin, avec toute truanderie & meschanceté: car il n'y auroit pas grande affaire à descouurir vn tel truant escornifleur qu'estoit Melanthius, le plaisant d'Alexandre tyran de Pheres, lequel respondit vn iour à ceux qui luy demandoient comment son maistre Alexandre auoit esté tué: d'un coup d'espee, dit il, H qui luy donnant au costé, a percé iusques à mon ventre: ny ceux qui ne bougent iamais d'alentour des tables plantureuses & friandes, qui ne cherchent que le broust, comme lon dit: de sorte qu'il n'y a feu, ny fer, ny cuyure, qui les peust arrester ny engarder de se trouuer là où lon disne: ny de telles femmes qu'estoient iadis en Cypre celles que lon surnommoit les Colacides, c'est à dire les flateresses, qui depuis, apres qu'elles furent passées en la terre ferme de la Syrie, furent appellees Climacides, come qui diroit eschelieres, pour autant qu'elles se courboient à quatre pieds, & faisoient escheles de leur dos aux femmes des princes & des Roys, quand elles vouloient monter dedans leurs coches. De quel flateur doncques est-il difficile, & neantmoins necessaire, de se garder? De celui qui ne semble pas flater, & ne confesse pas estre flateur, que lon ne trouue iamais à l'entour d'une cuisine, que lon ne surprant iamais mesurant l'ombre, pour scauoir combien il y a encore iusques au soupper, que lon

A lon ne voit iamais yure couché par terre tout de son long, ains qui est le plus du temps sobre, qui est curieux d'entendre & rechercher toutes choses, qui veut se mesler d'affaires, qui pense qu'on luy doie communiquer des secrets: & brief qui est vn Tragique, c'est à dire, serieux & graue, non pas Satyrique, ny Comique, c'est à dire ioyeux » contrefaiseur d'amitié. Car tout ainsi que Platon escrit, que c'est vne extreme in-
 » iustice, faire semblant d'estre iuste quand on ne l'est pas: aussi faut-il estimer, que la flaterie la pire qui soit, est celle qui est couuerte, & qui ne se confesse pas estre telle, qui ne se iouë pas, ains fait à bon esciant: tellement qu'elle fait bien souuent mes-
 » croire la vraye amitié mesme, d'autant qu'elle a ne sçay quoy de commun auec elle, si lon n'y prend garde de bien pres. Il est vray que Gobrias s'estant ietté dedans vne petite chābre obscure apres l'un des tyrans de Perse, qui s'appelloient Mages, comme qui diroit les Sages, & se trouuant aux prises bien à l'estroit auec luy, cria à Darius (qui y suruint l'espee nue au poing, & qui doutoit de frapper le Mage, de peur qu'il
 B n'assénast quand & quand Gobrias) qu'il donnast hardiment, quand il deuroit donner à trauers tous les deux: mais nous, qui ne pouuons en sorte ne maniere du monde
 » trouuer bon ce mot ancien, Perisse l'amy quand & l'ennemy: & qui cherchons à separer le flatteur d'auec l'amy, auec lequel il est entrelassé par plusieurs grandes similitudes: nous, dis-ie, deuons grandement craindre, que nous ne chassions, auec ce qui est mauuais, ce qui est bon & vtile, ou qu'en pardonnant à ce qui nous est agreable & familier, nous ne tombions en ce qui est nuisible & dommageable. Car tout ainsi qu'entre les grains & semences sauuages, celles qui sont de mesme forme en grandeur & grosseur, que le froment, se trouuans meslees parmy, sont bien mal-aisees à trier, & separer d'ensemble auec le crible, d'autant qu'elles ne passent pas à trauers les trous du crible, si les trous sont trop petits, non plus que les grains du froment, ou bien y passent ensemble, si les trous sont larges: aussi est l'amitié tresdifficile à cribler & discerner d'auec la flaterie, d'autant qu'elle se melle en tous accidents, en tous mouuements, en
 C tous affaires, & en toute conuersation auec elle: car pource que le flatteur voit qu'il n'y a rien si doux, ne qui donne plus de plaisir & de contentement à l'homme, que fait l'amitié, il fininue en grace à force de donner plaisir, & est tout apres à chercher
 » moien de plaire & de resiouir. Et d'autant que grace & vtilité accompagnent tousiours l'amitié, suyuant l'ancien prouerbe qui dit, Que l'amy est plus necessaire que ne
 » sont les elemens de l'eau & du feu: pour ceste cause le flatteur s'entremet à tout propos de faire seruice, & traueille à se mōstrer tousiours homme d'affaires, diligēt & prompt: & d'autant que ce qui lie & qui estrainct principalement l'amitié à son commencement, c'est la similitude de mœurs, d'estudes, d'exercices & d'inclinations: & brief, s'esjouir & receuoir plaisir ou desplaisir de mesmes choses, c'est ce qui assemble & conioint les hommes en amitié les vns auec les autres, par vne similitude & correspondance de naturelles affections: le flatteur se compose comme vne matiere propre à
 D receuoir toutes sortes d'impressions, s'estudiant à se conformer & s'accommoder à tout ce qu'il entreprend de ressembler par imitation, estant souple & dextre à se transformer en toutes similitudes: tellement que lon pourroit dire de luy,

Ce n'est le fils d'Achilles, mais luy mesme.

Et ce qui est la plus grande ruze, & plus fine malice qui soit en luy, c'est que voyant comme à la verité, & selon le dire de tout le monde, la franchise de parler librement est la propre voix & parole de l'amitié: & que là où il n'y a celle liberté de parler franchement, il n'y a point d'amitié ny de generosité, il n'est pas celle là qu'il ne contreface: ains comme les bons cuysiniers vsent quelquefois de ius aigres, & de saulses aspres, pour diuersifier, & engarder qu'on ne se saoule, & que lon ne s'ennuye des doulces: aussi les flatteurs vsent d'une certaine franchise de parler, qui n'est ny veritable ny profitable, ains qui par maniere de dire guigne de l'œil en se mocquāt, & sans

Au 2. liure
de la Repub.

Comment on pourra discerner

nulle doute ne touche pas au vif, & ne fait que chatouiller par dessus. C'est pour- E
quoy le flatteur veritablement est tres-difficile à descouvrir & surprendre, ne plus ne
moins que les animaux qui de nature ont ceste propriete de muer de couleur, & de
ressembler en tainture à tous lieux & tous corps où ils touchent : mais puis qu'ainsi
est, qu'il deçoit les personnes, & se cache dessous tât de similitudes qu'il a avec l'amy,
c'est nostre office en touchant les differences qu'il y a, de descouvrir & despouiller ce
masque qui se vest & se pare des couleurs & habits d'autrui, ainsi que dit Platon, à
faute d'en avoir de propres à luy. Or commençons doncques à entrer de ce pas en
matiere. Nous avons desia dit, que le commencement de l'amitié en la plus part des
hommes est vne conformité de nature & d'inclination, qui aime tous mesmes exer-
cices, & se delecte de mesmes & semblables occupations: suyuant lequel propos on
dit en commun proverbe,

Au vieillard plaist d'un vieillard le langage,
Et de l'enfant à l'enfant de bas aage:
La femme avec l'autre femme conuient,
Et le malade au malade survient:
Le malheureux tout de mesme lamente
Avec celuy que fortune tourmente.

F

Parquoy le flatteur entendant tresbien, que c'est chose nee avec nous que prendre
plaisir à estre avec noz semblables, à communiquer avec eux, & à les aimer, il essaye
premierement à s'approcher de chascun qu'il veut enueller, à se loger pres de luy
& à l'accoster, ne plus ne moins que lon fait és pasturages vne beste sauvage que lon
veut apprivoiser : se coulant petit à petit pres de luy, & s'incorporant avec luy par
mesmes affections, mesmes occupations à choses semblables, & mesme façon de vi-
ure, iusques à ce que l'autre luy ait donné prise sur luy, & qu'il se soit rendu familier
& priué, iusques à se laisser manier & toucher, blasmant les choses, les personnes & les G
mœurs, qu'il verra que l'autre aura en haine, & louant ceux qu'il sentira luy plaire, non
simplement, mais excessiuement avec admiration & esbahissement, le confirmant
par ce moien en son amour ou en sa haine, comme n'ayant point reçu ces impres-
sions là par passion, mais par iugemēt. Comment donc, & par quelles differences le
peut on aduerer, & cōvaincre qu'il n'est pas semblable, ne qu'il ne le deuient pas, mais
qu'il le contrefait? Premierement il faut considerer si luy a egalité vniforme en ses in-
tentions & actions, si luy continue de prendre plaisir à mesmes choses, & si luy les loue de
mesme en tout temps, si luy dresse & compose sa vie à vn mesme moule, ainsi comme il
conuient à l'homme libre amateur de semblables mœurs & semblables conditions à la
sienne: car tel est le vray amy: là où le flatteur au contraire, comme celuy qui n'a pas
vn seul domicile en ses mœurs, & qui ne vit pas d'une vie qu'il ait eleue à son gré, mais
qui se forme & compose au moule d'autrui, n'est iamais simple, vniforme, ne sembla-
ble à soy-mesme, ains variable & changeant tousiours d'une forme en vne autre, cōme H
l'eau que lon transvase, qui tousiours coule, & s'accommode à la façon & figure des
vases & lieux qui la recoiuent: de maniere qu'il est en cela du tout contraire au singe, car
le singe en cuydant contrefaire l'homme, en se remuant & dansant quand & luy, se
prend: mais le flatteur à l'opposite attire & surprend les autres à la pipee, en les contre-
faisant, non pas tout d'une sorte, mais l'un en dansant, l'autre en chātant, vn autre en lui-
ctant & se pouldrant pour luieter comme luy, & vn autre en se promenant avec luy.
Car si luy s'attache à vn qui aime la chasse & la vencie, il fera tousiours apres luy, cryant
presque à haute voix les paroles que dit Phēdra en la Tragēdie du poëte Euripide, qui
se nomme Hippolyte,

Mon deduit est à pleine voix
Appeller chiens parmy les boys,

En sui-

A En fuiuant les cerfs à la trace,
Ainsi des Dieux i'aye la grace.

& si ne luy chault pas de beste qui soit és forests, car c'est le veneur mesme qu'il veult prendre & enfermer dedans ses toiles. Et si d'aduenture il se met à chasser vn ieune homme studieux, aimant les lettres, & desireux d'apprendre, au rebours il sera du tout apres les liures, il laissera croistre sa barbe longue iusques aux pieds, par maniere de dire, se vestira d'une robe d'estude à la Grecque, sans faire compte de sa personne, il aura tousiours en la bouche les nombres, les angles droicts & les triangles de Platon: mais si luy vient par les mains quelque faitneant, homme riche, aimant à boire d'autant, & à faire grand' chere,

Adonc le sage Vlysses viftement

Met bas le sien deschiré vestement:

Odyss. l. 22.

- il iette arriere la robe longue d'estude, il vous fait raser sa barbe comme vne moisson
B sterile, il ne parle plus que de flascons & bouteilles, de refrechissoirs pour boire froid, & dire mots plaisants pour rire, en se promenant, donner des attaintes & traicts de mocquerie à l'encontre de ceux qui se trauaillent apres l'estude de la philosophie. Ainsi que lon dit qu'en la ville de Syracuse quand Platon y arriua, & que Dionysius tout à coup fut espris d'un furieux amour de la Philosophie, le chasteau du tyran fut plein de poulciere, pour la multitude d'estudians qui traçoient les figures de la Geometrie: Mais depuis que Platon se fut courroucé à luy, & que Dionysius eut abandonné la Philosophie, se remettant de rechef à faire grand' chere, à l'amour, à follastrer, & se laisser aller à toute dissolution, il sembla qu'ils eussent esté enforcellez & transformez par vne Circé, tant ils furent incontinent espris d'une haine des lettres, oubliance de toute honesteté, & faisine de toute sottie. Auquel propos se rapporte le tesmoignage des façons de faire des grands flatteurs, & de ceux qui ont gouuerné les peuples, entre lesquels le plus grand qui fut onc a esté Alcibiades, lequel estant à
C Athenes iouoit, disoit le mot, entretenoit grands cheuaux, & viuoit en toute galanterie & toute ioyeuseté: quand il estoit en Lacedemone, il faisoit sa barbe au rasoir, il portoit vne meschante cappe de gros bureau, se lauait en eau froide: puis quand il estoit en Thrace, il faisoit la guerre & beuuoit: depuis qu'il fut arriué deuers Tissaphernes en Asie, ce n'estoit que delices, superfluité & volupté, que toute sa vie: gaignant ainsi & prenant vn chascun, en se trāsformant & s'accommodant aux meurs de tous ceux qu'il hantoit. Mais ainsi ne faisoit pas Epaminondas ny Agesilaus, car combien qu'ils ayent hâté en plusieurs villes, avec plusieurs hommes, & plusieurs sortes de vie, ils ne changerent iamais pourtant, ains reteindrent tousiours, & par tout, ce qui estoit digne d'eux en habillements, en façon de viure, en parole, & tous leurs deportements. Et Platon, tout de mesme, estoit tel à Syracuse comme en l'Academie, & tel aupres de Dionysius comme aupres de Dion. Mais qui voudra prendre garde de pres, il apperceura facilement les mutations & changemens du flatteur, comme du poulpe: & verra qu'il se transforme en plusieurs façons, blasfant tantost vne vie qu'il auoit louée nagueres, & approuuant vn affaire, vne façon de viure, & vne parole qu'il reiettoit au parauant: car il ne le cognoistra iamais constant en vne chose, ne qui ait rien de peculier à soy, ne qui aime ou qui haïsse, qui s'attriste ou qui s'esiouisse d'une sienne propre affection, par ce qu'il reçoit tousiours, comme vn miroir, les images des passions, des vies, des mouuemens & affections d'autrui: tellement que si vous venez à blasmer quelqu'un de voz amis deuant luy, il dira incontinent, Vous avez demouré longuement à le cognoistre, car quant à moy, il y a ia long temps qu'il ne me plaisoit point. Et si, au contraire, vous venez de rechef, à changer d'opinion, & à le louer: Certainement, dira il aussi tost, i'en suis bien aise, & vous en remercie pour l'amour de luy. Si vous dites que vous voulez changer de façon de

Comment on pourra discerner

viure, comme vous retirer du manient des affaires de la chose publique, pour vi- E
ure en paix & en repos: Il y aia long temps, dira-il, qu'il le falloir faire, & se tirer hors
de ces troubles & enuies: & si, au contraire, il vous prent enuie de laisser le repos &
vous entremettre d'affaires, & de parler en public, il respondra incontinent: Vous
entreprenez chose digne de vous, car à ne rien faire, encore qu'il y ait quelque aise, si
est-ce viure trop bassement & sans honneur. Parquoy il luy faut incontinent mettre
deuant le nez,

Odyss. l. 16.

Tu es soudain tout autre deuenue,

Que tu n'estois par cy deuant tenu.

ie n'ay que faire d'amy qui se change ainsi quand & moy, & qui s'encline en mesme
part que moy, cela est le propre d'une ombre: j'ay plus tost besoyn d'un amy, qui avec
moy iuge la verité, & qui la die franchement. Voyla l'une des manieres qu'il y a
pour esprouuer & discerner le vray d'avec le faux amy. Mais il faut obseruer une autre
difference qu'il y a entre leurs similitudes, car le vray amy n'imité point toutes les con- F
ditions, ny ne loué point toutes les actions de celui qu'il aime, ains seulement tasche
à imiter les meilleures: & comme dit Sophocles,

Il veut aymé, non haïr, avec luy:

c'est à dire, qu'il veut bien faire & honnestement viure, non pas errer ne pecher quand
& luy: si ce n'est d'aduenture que pour la grande frequentation & conuersation or-
dinaire qu'il a avec luy, il ne se remplit, malgré qu'il en ait, sans y penser, de quel-
que qualité & condition vicieuse, par la longue accoustumance, ne plus ne moins
que par contagion se prent la chassie & le mal des yeux: ainsi comme lon escrit, que
les familiers de Platon contrefaisoient ses hautes espaulles, & ceux d'Aristote son be-
guayement, ceux du Roy Alexandre son ply du col, & l'aspreté de sa voix: car ainsi
prennent la plus part des hommes l'impression de leurs meurs & de leurs conditions.
Mais le flatteur fait tout à la mesme sorte que le Chaméléon, lequel se rend sembla- G
ble, & prent toute couleur, fors que la blanche: aussi le flatteur es choses bonnes &
importantes ne se pouuant rendre semblable, ne laisse rien de mauuais & de laid à
imiter: comme les mauuais peintres ne pouuans par leur insuffisance en l'art contre-
faire les beaux visages, en representent quelque semblance en des rides, des lentilles,
& des cicatrices: aussi luy se rend imitateur d'une intemperance, & d'une superstition,
d'une soudaineté de cholere, d'une aigreur enuers ses seruiteurs & de defiance en-
uers ses domestiques & ses parents, pour ce qu'il est de sa nature tousiours enclin à ce
qui est le pire, & semble estre bien loing de vouloir blasmer le vice, puis qu'il le prent
à imiter. Car ceux qui cherchent amendement de vie & de meurs sont suspects, &
qui monstrent de se fascher & courroucer des fautes de leurs amis: ce qui meit en
male grace de Dionysius Dion, Samien de Philippus, & Cleomenes de Ptolomeus, &
fut à la fin cause de leur totale ruine: mais le flatteur veut estre estimé ensemble autant
loyal & fidele, comme plaissant & agreable, de maniere que pour la vehemence de H
son amitié, il ne s'offense pas mesme des choses mauuaises, ains est en tout & par tout
de mesme inclination & de mesme affection: en sorte que des choses fortuites & ca-
suelles, qui aduiennent sans nostre volonté & conseil, il en veut auoir sa part, telle-
ment que sil vient à flatter un qui soit maladié, il fait semblant d'estre subiect à mes-
mes maladies: & dira que la veüe luy baisse fort, & qu'il a l'ouye dure, sil frequente
avec gens qui soient à demy auégles, ou à demy sourds: comme les flatteurs de Dio-
nysius qui ne voioit presque goutte, s'entrehurtoient les uns les autres, & faisoient
tomber les plats de dessus la table, pour dire qu'ils auoient mauuaise veüe. Les autres
penetrans encore d'auantage au dedans, meslent leurs conformitez iusques aux plus
secretes passions. Car ils peuuent sentir que ceux qui les flattent soient mal fortunez
en femmes, ou qu'ils soient en quelque defiance de leurs propres enfans, ou de leurs
domestiques

A domestiques, eux mesmes ne s'espargneront pas, & commanceront à se plaindre de leurs femmes, de leurs propres enfans, de leurs parents, ou de leurs domestiques, & si en allegueront quelques occasions qui vaudroient mieux teuës que dites, car ceste semblance les rend plus affectionnez l'un à l'autre par compassion: ainsi les flattez cuydans auoir receu d'eux comme vn gage de loyauté, leur laissent aussi aller de leur bouche quelque chose de secret, & l'ayant ainsi laissé eschapper, ils sont puis apres contraincts de se seruir d'eux, & craignent de là en auant leur donner à cognoistre qu'ils se deffient aucunement de leur foy, iusques là, que i'en ay cogneu vn qui repudia sa femme, pour ce que celuy qu'il flatoit auoit fait diuorse auec la siene, & fut trouué qu'il alloit secrettement & enuoyoit deuers elle: ce qui fut apperceu par la femme mesme de son amy: tant peu cognoissoit la nature du vray flatteur celuy qui estimoit que ces vers iambiques conuinssent plus à la description du cancre que du flatteur,

B Tout son corps n'est autre chose que ventre,
Son œil perçant par tout penetre & entre,
Vn animal qui marche de ses dents.

Car ceste figuration est celle d'un escornifleur poursuuyant de repeuë franche, & de ces amis de fricassée & de nappe mise, comme dit Eupolis: mais quant à cela remettons le à son lieu propre pour en parler plus amplement. Et pour ceste heure, ne laissons pas derriere vne grand ruze du flatteur en ses imitations, c'est que fil contre-fait quelque bonne qualité qui soit en celuy qu'il flate, il luy en cede tousiours le dessus: car entre ceux qui sont vrais amis, il n'y a iamais emulation de ialousie, ny iamais enuie, ains soit qu'ils se treuuent egaux en bien faisant ou inferieurs, ils le portent doucement & modereement. Mais le flatteur ayant tousiours en memoire & singuliere recommandation le seconder, cede tousiours en son imitation l'egalité, confessant estre vaincu & demourer tousiours derriere, excepté es choses mauuaises: car es mau-

C uaises il ne cede iamais la victoire à son amy, ains fil est difficile, il dira de soy-mesme qu'il est melancholique: si l'autre est superstitieux, luy sera tout transporté & esperdu de la crainte des Dieux: si l'autre est amoureux, luy sera furieux d'amour: si l'autre dit ie ris à pleine bouche: luy, ie cuide mourir de rire. Mais aux choses louables & honestes au contraire de luy il dira: Je cours bien assez viste, mais vous, vous volez: Je suis, dira-il, assez bien à cheual, mais ce n'est rien aupris de ce Centaure icy: Je ne suis pas trop mauuais poëte, & fais assez bien vn carme, mais tonner n'est pas à faire à moy, c'est à ce Iupiter icy: en quoy il fait deux choses ensemble, l'une qu'il declare l'entreprise de l'autre honeste en ce qu'il l'imite, & sa suffisance nonpareille en ce qu'il confesse en estre vaincu. Voyla doncques quant aux ressemblances, les marques de difference qu'il y a entre le flatteur & l'amy. Et pourautant que la delectation, ainsi que nous auons dit parauant, est aussi commune entre eux, pource

D que l'homme de bien ne prent pas moins de plaisir à ses amis, que l'homme de neant à ses flatteurs, considerons vn peu la difference qu'il y a en cela: le moien de les distinguer, sera de remarquer la fin à laquelle l'un & l'autre dirige la delectation qu'il donne, ce qui se pourra plus clairement entendre par cest exemple. Vne huyle de parfum a bonne odeur, aussi a quelque drogue de medecine: mais il y a difference en ce, que l'huyle de parfum se fait seulement pour donner le plaisir de la senteur, & rien plus: mais en la drogue medicinale, outre le plaisir de la douce odeur, il y a vne force qui purge le corps, ou qui le rechauffe, ou qui fait naistre la chair. D'auantage, les paintres broient des couleurs plaisantes & recreatiues, & aussi y a il des drogues medicinales qui ont des couleurs & taintures qui sont belles & agreables à l'œil: quelle difference doncques y a il? Il est tout euident qu'il ne faut que regarder, pour les scauoir discerner, à quelle fin l'usage d'icelle est destiné. Au cas pareil aussi

Comment on pourra discerner

les graces des amis , parmy l'honnesteté & l'vtilité qu'elles ont , apportent ie ne sçay E
quoy qui delecte , ne plus ne moins qu'une fleur qui paroist par dessus : & quelque-
fois ils vsent d'un ieu , d'un boire & manger ensemble , d'une risée , d'une facétie l'un
avec l'autre , comme de faulces pour assaisonner des affaires de pois & de grande con-
séquence : auquel propos est dit ,

Ioyeusement ensemble ils s'entretiennent

De maints propos plaisans , qu'entre eux ils tiennent.

Et , Rien n'a iamais disioint nostre amitié ,

Ny nos plaisirs partis par la moytié.

Mais la seule besongne du flatteur , & le but où il vise , est de tousiours inuenter , ap-
prester & confire quelque ieu , quelque faict , & quelque parole à plaisir & pour don-
ner plaisir : brief , pour comprendre le tout en peu de paroles , le flatteur estime qu'il faille
tout faire pour estre plaisant : & le vray amy faisant tousiours & par tout ce que le de-
voir requiert , bien souuent plaist , & quelquefois aussi desplaist : non que son inten- F
tion soit de desplaire , comme aussi ne le fuit-il pas , s'il voit que meilleur soit de le faire .
Ne plus ne moins que le Medecin , s'il voit qu'il soit expedient , iettera du safran ou de
la lauende dedans ses compositions de medecine , voire que bien souuent il baignera
delicatement , & nourrira friandement son patient : & quelquesfois aussi laissant ces
douces odeurs là , il y ruera du Castorium , ou

Du Polium , de qui la senteur forte ,

Puante au nez est d'une estrange forte .

ou bien il broyera de l'Hellebore , qu'il le contraindra de boire , ne se proposant pour
sa fin ne là le plaire , ny icy le desplaire , ains conduisant son malade par diuerses voyes
à un mesme but , c'est à sçauoir ce qui est expedient pour sa santé : aussi le vray amy
aucunesfois par complaire & haut louer son amy , en le resiouissant le cōduit à faire ce
qu'il doit , comme celui qui dit en Homere ,

Amy Teucer de Telamon extraict ,

Fleur des Grejois , tire ainsi de ton traict .

Et ailleurs ,

Comment mettrois-ie Vlysses en oubly ,

Qui de vertu diuine est ennobly ?

A l'opposite aussi , là où il est besoing de correction , il le vous tanse avec une parole
mordante , & une liberte autorisee d'une affection soigneuse de son bien ,

Menelaus né de diuin lignage ,

Ie t'aduertis que tu n'es pas bien sage :

De ta folie aussi mal te prendra .

Quelquefois il conioinct le faict avec la parole , comme Menedemus faisant fer-
mer la porte au fils d'Asclepiades son amy , qui estoit desbauché , & menoit une
vie dissoluë , & ne le daignant pas saluer , le retira de son mauuais gouuernement : &
Arcefilaus defendit l'entree de son eschole à Battus , pource qu'en une Comédie H
qu'il auoit composee , il auoit mis un vers qui poignoit Cleanthes : mais depuis , en
aiant fait satisfaction à Cleanthes , & s'en estant repenty , il luy pardonna , & le receut
en sa grace comme deuant . Car il faut contrister son amy en intention de luy pro-
fiter , non pas de rompre l'amitié , ains vser de reprehension picquante , comme
d'une medecine preseruatiue , qui sauue la vie à son patient : ainsi fait le bon amy cōme
le sçauant musicien , qui pour accorder son instrument , tend aucunes de ses cordes ,
& en lasche les autres : aussi concede il aucunes choses , & en refuse d'autres , chan-
geant selon que l'honnesteté ou l'vtilité le requierent : & est par ce moien aucunesfois
aggreable , & par tout vtile : mais le flatteur aiant accoustumé de tousiours sonner
une seule note , qui est de complaire , & de faire & dire toutes choses au gré de ce-
luy qu'il flatte , ne sçait que c'est ny de resister de faict ny de fascher de parole , ains va
tousiours

Iliad. 8. &
10.

Iliad. liu. 7.

- A** tousiours apres ce que lon veult, s'accordant tousiours, & disant tousiours ad idem. Or ainsi comme Xenophon escrit, qu'Agésilas estoit bien aisé de se sentir louer de ceux qui l'eussent bien voulu blâmer: aussi faut-il estimer que celuy-là resjouit & complaist en amy, qui peult aussi quelquefois contrister & contredire, & auoir pour suspecte la conuersation de ceux qui ne font iamais que donner plaisir, en accordant tout sans aucune pointure de reprehension, & de contradiction, & auoir tousiours à main le dire d'un ancien Laconien, lequel oyant que lon louoit haultement le Roy Charilaus, Et comment seroit-il bon, dit-il, quand il n'est pas aspre aux meschans? On dit que le taillon qui tourmente les taureaux, se fiche aupres de leurs oreilles, & aussi fait la tique aux chiens: tout ainsi le flatteur attachant les hommes ambitieux par les oreilles, à force de leur chanter leurs louanges, est bien malaisé à secouer & chasser depuis qu'il y est vne fois fiché: & pourtant faut-il auoir le iugement bien esueillé en cest endroict, à obseruer diligemment si ces louanges seront attribuees à la chose, ou à la personne: elles seront attribuees à la chose, **B** si l'on loue les absents plus tost que les presents, si luy mesme veult & desire en luy ce qu'il loue en autrui, & si ne nous loue pas seuls, mais tous autres pour semblables qualitez, & si ne varie point en disant & faisant tantost d'un tantost d'autre, mais tousiours d'une sorte. Et ce qui est le principal à considerer, c'est si nous mesmes en nostre secret ne nous repentons point ou n'auons point de honte de ce dont il nous loue, & si nous ne voudrions point plus tost auoir fait & dit le contraire: car le iugement de nostre conscience nous portant tesmoignage au contraire, empêchera que telles louanges ne nous affectionneront, ny ne nous atteindront point au vif, & consequemment le flatteur ne nous en pourra surprendre. Mais ie ne sçay comment il aduient que la plus part des hommes ne reçoient point les consolations que lon leur baille en leurs aduersitez, ains plus tost se laissent mener à ceux qui plorent & lamentent avecques eux: & quand ils ont offensé & failly, si quelqu'un les **C** en reprent, & les en blasme si visuellement qu'il leur en imprime au cœur un remors & une repentance, ils estiment celuy-là leur accusateur & leur ennemy: & au contraire ils embrassent & reputent leur bien-veillant & amy celuy, qui louera & magnifiera ce qu'ils auront fait. Or ceux qui louent & qui prisent avec un applaudissement de mains ce que lon aura fait ou dit, soit à bon escient ou soit en iouant, ceux-là encore ne sont dommageables que pour le present, & pour cela que lon a à l'heure en main: mais ceux qui avec leurs louanges penetrent iusques aux mœurs, & par leurs flateries atteignent iusques à corrompre les conditions, ceux là sont comme les mauuais esclaves & serfs, qui ne desrobent pas seulement du bled de leur maistre, ce qui est en monceau au grenier, mais aussi ce qui est préparé pour la semence: car les conditions de l'homme sont la source de toutes ses actions, & les mœurs sont le principe & la fontaine, dont découle toute nostre vie, laquelle ils detordent, **D** en donnant au vice les noms des vertus. Thucydides escrit qu'és seditions & guerres ciuiles, lon transféroit la signification accoustumee des mots, aux actes que lon faisoit, pour les iustifier: car une temerité desesperée estoit reputée vaillance aimant ses amis: une dilation prouidente, honeste couardise: une temperance, couverture de lascheté: une sagesse pensant à tout, une totale paresse: Aussi faut-il bien prendre garde és flatteurs là où lon verra qu'ils appelleront prodigalité, liberalité: timidité, feureté: teste eceruelee, promptitude: chicheté mechanique, temperance & frugalité: un qui sera subiet à folles amourettes, gracieux & homme de bonne compagnie: un cholere ou superbe, vaillant & magnanime: & au contraire, un de cœur bas & lasche, doux & humain: ainsi comme Platon escrit en quelque passage, que l'amoureux est flatteur de ce qu'il aime: car si est camus, il l'appellera agreable: si a le nez aquilin, face Royale: si est noiraut, viril: si est blanc, enfant des Dieux: & quant à

Au liure
de la vie d'Agésilas.

Au 5. liure
de la Rep.

Comment on pourra discerner

ce nom *μελιχρός*, bafané & couleur de miel, il dit que c'est vne faine d'amoureux, qui E
diminue pour apprendre à supporter plus aiséement vne couleur palle & morte de
son amy: combien que celuy qui se donne à entendre qu'il soit beau quand il est laid,
ou grand quand il est petit, ne demeure pas longuement en son erreur: & si n'en reçoit
perte sinon bien fort legere, & non pas irremediable. Mais les louanges qui accou-
stument l'homme à cuider que vice soit vertu, tellement qu'il ne se desplaist pas en
son mal, mais plus tost qu'il s'y plaist, & qui ostent toute honte de pecher & de faillir,
ce furent celles qui amenerent la ruine des Siciliens, en donnant occasion aux flatteurs
d'appeller la cruauté de Dionysius & de Phalaris, haine des meschants & bonne ius-
tice: ce furent celles qui perdirent l'Ægypte, en appelant la lascheté effeminee du
Roy Ptolomæus, sa furieuse superstition, ses lamentables chansons, ses sonnements
de tabourins, & ses danses bacchanales, deuotion, religion, & le seruice des Dieux:
ce furent celles aussi qui cuiderent gaster & corrompre du tout les meurs & façons
Romaines, qui par auant renoient tant du grand, en surnommant les delices, les dis- F
solutions, les ieux & festes d'Antonius, ioyeusetez, gentilleses, & humanitez, en des-
guisant & diminuant ainsi la faute d'Antonius, qui abusoit excessiuement de sa for-
tune, & grandeur de sa puissance. Que fut-ce autre chose qui attacha à Ptolomæus
la museliere à iouer des flustes? Qui feit monter Neron sur l'eschafaud avec vne mas-
que sur le visage, & des brodequins aux iambes, qui estoit l'accoustrement des ioueurs
de farce, ne furent-ce pas les louanges des flatteurs? Et la plus part des Roys ne sont
ils pas attirez en toute vergongne & tout deshonneur par les flateries de ceux qui
les appellent Apollons, pour peu qu'ils sçachent mionner, & Bacchus quand ils
s'enyurent, & Hercules quand ils luitent, & qu'ils prennent plaisir à telles gallante-
ries de surnoms? Et pourtant se faut-il principalement donner de garde du fla-
teur en ses louanges: ce que luy-mesme n'ignore pas, mais estant caut & subtil à se
garder de se rendre suspect, si d'aduenture il rencontre quelque mignon glorieux, G
bien paré, ou bien quelque lourdaut qui ait vn peu le cuir gros, & comme lon dit
vulgairement, qui soit vn peu de grosse paste, il se mocque & gaudit d'eux à gorge
desployee, comme fait Struthias en la comédie, foulant aux pieds & ballant sur le
ventre de la sottise de Bias, en maniere de dire, par les louanges qu'il luy donne, sans
que l'autre le sente, Tu as plus beu que ne fait oncques le Roy Alexandre le grand: &
ce-pendant il se pafme & fond à force de rire, en se tournant deuers le Cyprien. Mais
fil a affaire à quelques habiles & galants hommes, qui aient l'œil sur luy principale-
ment en cest endroiect, & qui soient au guet pour bien garder ceste place & ce lieu-là,
il ne leur adresse pas des louanges de droit fil, ains vient de loing, tournant tout à
l'entour, & puis fait ses approches petit à petit, sans faire bruit, tant qu'il vient à les
manier, comme lon fait vne beste quelon veut appriuoiser, & à les taster: car tan-
tost il viendra rapporter à son amy des louanges qu'il aura ouy dire à quelques vns
de luy, faisant comme les Rhetoriciens, qui quelques-fois en leurs harengues par- H
lent en tierce personne: J'ay pris grand plaisir, dira-il, nagueres estant en la place,
à ouïr certains estrangers, ou bien de bons vieillards, qui racontotent tous les biens
du monde de vous, & vous louoient à merueilles. Tantost il controuuera quel-
ques legeres fautes à l'encontre de luy, disant qu'il les aura entendues d'autres qui les
disoient de luy, & qu'il s'en est venu en diligence incontinent vers luy, pour luy de-
mander là où il auroit dit cela, ou fait vne telle chose: l'autre luy niera, comme il est
vray-semblable, & de là adonc il prendra son commencement pour entrer en ses
louanges, Aussi m'esbahissois-je bien, comment vous eussiez mesdit de quelqu'un
de voz familiers, veu que vous ne mesdites pas de voz ennemis mesmes: & comment
vous eussiez attenté à vsurper de l'autrui, veu que vous donnez si largement & si libe-
ralement le vostre. Les autres font comme les peintres, qui pour releuer & faire plus
apparoi-

- A apparoistre les choses luisantes & claires, les renforcent avec les obscures & ombreuses qu'ils mettent aupres: car en blasmant, detractant, mocquant, & iniuriant les choses contraires, tacitement ils louent & approuuent les vices & imperfections qui sont en ceux qui flatent, & en les louant, ils les nourrissent: car il vous blasmeront la temperance, & abstinence, en l'appellant rusticité, s'ils se trouuent parmy des hommes luxurieux, auaricieux, gens de mauuais affaire qui acquierent des biens par tous moiens deshonestes & meschans. La iustice & bonne conscience, qui se contente du sien, sans rien vouloir auoir de l'autrui, ils l'appelleront lascheté & faute de cœur de n'oser entreprendre. Et quand ils seront avec des paresseux, gens oisifs, qui fuyent les affaires, ils n'auront point de honte de blasmer l'entremise du gouuernement de la chose publique, & de dire que c'est faire les affaires d'autrui à grand travail sans profit. Vn desir d'estre en Magistrat ils l'appelleront vaine gloire, qui ne sert à rien. Pour flater vn Orateur, ils blasmeront en sa presence le Philosophe. Parmy des femmes lasciuues & impudiques, ils seront les bien venus en appelant les honestes, qui n'aiment que leurs maris, sottés, mal-appriés, & sans grace quelconque. Et y a encore vne plus grande meschanceté, c'est que ces flatteurs ne s'espargnent pas eux mesmes: car ainsi comme les lucteurs baissent aucunes fois leurs corps pour renuerser par terre leurs compagnons, aussi quelquefois par se blasmer eux mesmes ils se coulent secrettement à louer autrui. Je suis, diront ils, plus couard qu'un esclau sur la mer: ie ne puis durer au travail: i'enrage de cholere quand i'entens que lon a mesdit de moy: mais à cestuy-cy, celuy est tout vn, il ne trouue rien de mauuais, c'est vn homme tout autre que les autres, il ne se courrouce de rien, il porte tout patiemment. Et si d'aduenture il se treuve quelqu'un qui ait grande opinion de sa suffisance & de son entendement, qui veuille faire de l'austere & du roide & entier, disant à tout propos,

Diomedes ne me va trop prisant,

- C Ny au contraire aussi trop mesprisant:

- le flatteur bon ouurier de son mestier ne l'assaudra pas par ceste voye, ains vsera d'un autre artifice à l'endroit de celuy là. C'est qu'il viendra deuers luy pour auoir conseil en ses propres affaires, comme de celuy qu'il estime plus sage & mieux aduisé que luy, & dira qu'il a bien d'autres avec lesquels il aura plus grande familiarité, mais neantmoins qu'il est contrainct de l'importuner: car à qui aurons nous recours nous autres qui auons besoing de conseil, & à qui nous fierons nous? & puis apres auoir ouy ce que l'autre luy aura dit, quoy que ce soit, il s'en ira disant qu'il aura eu vn oracle, & non pas vn conseil. Et si d'aduenture il voit que l'autre s'attribue quelque suffisance en la cognoissance des lettres; il luy apportera quelques siennes compositions, le priant de les lire, & de les corriger. Le Roy Mithridates aimoit l'art de Medecine, au moien dequoy, il y eut quelques vns de ses familiers qui luy baillerent de leurs membres à inciser, & brusler avec des cauterés, qui estoit le flater de faict, non pas de parole: car il semboit qu'ils luy portassent tesmoignage de sa suffisance, puis qu'ils se fioient de leur vie à luy.

Les cas diuins sont de beaucoup de formes:

mais cest espee de louanges dissimulees, aiant besoing de plus grande circonspection pour s'en garder, merite d'estre diligemment aueree & esprouuee: & pourtant faudra il que celuy qui sera tenté par telle sorte de flaterie, tout expressement luy mette en auant des aduis, où il n'y aura point d'apparence quand le flatteur luy demandera conseil, & des aduertissements tout de mesme, & aussi des corrections sans propos, quand il luy apportera ses compositions à reuoir & corriger: car quand il verra que le flatteur ne luy contredira en rien, ains luy consentira en tout & par tout, & receura tout, & qui plus est encor, qu'à chascun point il s'escrira, hó voyla bien dict! il n'est

Iliad. l. 10.

Eurip. en la
Tragedie
d'Alceste.

Comment on pourra discerner

possible de mieux: il est tout manifeste qu'il fait comme dit le commun proverbe, E

Le mot du guet il nous va demandant,

Mais autre chose il cherche ce pendant.

C'est qu'en nous louant, il nous veut enfler de vaine outrecuidance. D'avantage ainsi comme aucuns ont definy la peinture, estre vne poësie muette, aussi y a il des louanges que donne vne flaterie muette: car ne plus ne moins que les chasseurs decoient mieux les bestes qu'ils chassent, quand il ne semble pas qu'ils chassent, mais bien qu'ils passent leur chemin, ou qu'ils gardent leurs troupeaux, ou qu'ils labourent la terre: aussi est-ce lors que les flatteurs touchent mieux au vif en louant, quand il ne semble pas qu'ils louent, ains qu'ils facent autre chose: car celuy qui cede vne chaire, ou vn lieu à table, à vn suruenant, ou qui aiant accoustumé de harenguer deuant le peuple, ou deuant le Senat, fil sent que l'un des riches veuille parler, entrerompt son parler pour se taire, & quitter la place & le rang de parler: celuy-là, dis-je, en se taisant, declare plus que fil crioit à haute voix, qu'il repete l'autre plus suffisant & plus prudent que luy. De là est que lon voit ceste maniere de gens, qui font profession de flaterie, se saisir ordinairement des premiers sieges, tant és sermons, harengues publiques que lon va ouir, comme és theatres, non qu'ils s'en reputent dignes, mais à fin qu'en les cedant aux plus riches, ils les flatent d'autant: & és assemblees & compagnies ils seront les premiers à entamer les propos, mais c'est pour puis apres les quitter aux plus puissans, voire pour passer facilement à vne opinion toute contraire à la leur premiere, si le contredisant sera homme puissant, ou riche, ou personne d'autorité: c'est pourquoy il se faut de tant plus esuertuer pour les conuaincre, & auerir qu'ils ne font point ces cessions & ces reculemens là pour reuerence qu'ils portent ou à la suffisance plus grande, ou à la vertu, ou à l'aage, mais seulement aux biens, aux richesses, & au credit. Megabyzus vn des plus grands seigneurs de la court du Roy de Perse vint vn iour visiter Apelles iusques en sa bouttique, & s'estant assis aupres de luy à le regarder besongner, commença à vouloir discourir de la li- G
gne & des vmbres. Apelles ne se peut tenir de luy dire: Voys-tu ces ieunes gar-
çons qui broient l'ochre, pendant que tu ne disois mot te regardoient fort atten-
tifement, & s'esbahissoient de voir tes beaux habits de pourpre, & tes chaisnes &
ioyaux d'or: mais depuis que tu as commencé à parler, ils se sont pris à rire, en se moc-
quant de toy, d'autant que tu te mets à discourir des choses que tu n'as pas apprises. Et Solon estant interrogué par le Roy de Lydie Cræsus, quels hommes il auoit veus qu'il reputast les plus heureux de ce monde, luy nomma Tellus, vn simple citoien d'Athenes, & vn Cleobis, & Biton, qu'il dit auoir cogneus pour les mieux fortunez: mais les flatteurs ne disent pas seulement, que les Roys, les riches hommes, & les personnes de grande autorité soient bien fortunez & heureux, mais aussi les declarent les premiers hommes du monde en prudence, en science, & en vertu. Et puis il y en a qui ne peuuent pas seulement endurer les Stoïques, qui appellent le sage tel H
qu'ils le depeignent, riche, beau, noble & roy tout ensemble: là où les flatteurs vous rendent le riche qu'ils flatent, orateur, poëte, voire & fil veut encore, peintre & bon ioueur de flustes, léger du pied, & roide de corps, se laissant tomber dessus luy en luiëtant, & demourans derriere en courant: ainsi comme Crisson Himerien demoura derriere en courant à l'encontre d'Alexandre, dequoy Alexandre fut fort courroucé quand il le sceut. Carneades souloit dire, que les enfans des Roys & des riches n'apprenoient rien adroit, qu'à picquer & manier les cheuaux, & rien autre chose, pource que le maistre les flatte aux escholes en les louant, à l'exercice de la luiëte celuy qui luiëte avec eux se laisse volontairement tomber dessous eux: mais le cheual ne cognoissant pas qui est fils d'un homme priué, ou d'un prince, qui est pauvre ou riche, iette par terre ceux qui ne se scauent pas bien tenir. Parquoy le dire de Bion est sot & lourd,

- A & lourd, car il disoit ainſi: Si à force de louer ie pouuois rendre vne terre bonne, graſſe & fertile, ie ne ferois point de faute de la louer, plus toſt que de me trauailler le cœur & le corps à la labourer & cultiuer: Celuy doncques ne peche point auſſi qui louë vn homme, ſi en le louant il le rend vtile & fertile à celuy qui le louë. Car on luy peut renuerſer ſa raiſon, en luy alleguant, que la terre ne deuient pas pire pour eſtre louee, là où ceux qui louent faulſement, & outre le merite & le deuoir, vn homme, l'empliſſent de vent, & ſont cauſe de ſa ruine. Mais à tant auons nous aſſez diſcouru ſur ceſt article des louanges: il ſuit apres de traicter de la franchise de librement parler. Or eſtoit il bien raiſonnable, que comme Patroclus ſe veſtant des armes d'Achilles, & menant ſes cheuaux à la guerre, n'oſa toucher à ſa iaueline, ains la laiſſa ſeule, auſſi que le flatteur ſe maſquant & deſguiſant des marques & enſeignes d'un amy, laiſſaſt la ſeule franchise de parler librement, ſans y toucher ne la contrefaire, comme eſtant le baſton propre, peſant, grand & fort, qu'il appartient de porter à l'amitié
- B ſeule, & non à autre: mais pour autant qu'ils ſe donnent bien garde d'eſtre deſcouuerts en riant, ny en beuuant, ny en gaudiſſant ou iouant, ains eleuent ia leur piperie iuſques à vne monſtre de ſourcil leuere, & flatent auec vn viſage renfrongné, meſlants parmy leur flaterie ne ſçay quoy de reprehension & de correction, ne laiſſons point paſſer cela ſans le toucher & examiner. Quant à moy, i'eſtime que comme en la comédie de Menander, Hercules contrefait vient en auant auec vne maſſue ſur l'eſpaule qui n'eſt ny peſante, ny maſſiue, ne forte, ains vne vaine, ſainte, legere, où il n'y a rien dedans: auſſi que la liberté de parler dont vſera le flatteur, ſe trouuera molle & legere, & qui n'aura point de coup à ceux qui l'eſprouueront, ains qu'elle fera ne plus ne moins que les aureillers des femmes, qui au lieu qu'ils ſemblent repouſſer & reſiſter aux teſtes que lon couche deſſus, plient plus toſt deſſous & leur cedent: auſſi ceſte faulſe liberté de parler, pleine de vent, ſe leue & ſenſle bien d'une enſeigne vaine & tromperieſſe, à fin que ſe reſſerrant & ſabaïſſant elle reçoïue & attire auec ſoy celuy
- C qui ſe laiſſe aller deſſus: car la vraye & amie liberté de parler ſ'attache à ceux qui ſaillent & qui pechent, apportant vne douleur bien-faiſante & ſalutaire, ne plus ne moins que le miel qui mord les parties vlcerées, mais il les nettoye, eſtant au demourant profitable & douce, de laquelle nous parlerons à part en ſon lieu. Mais le flatteur monſtre premierement d'eſtre aſpre, violent, & inexorable enuers les autres: car à ſes ſeruiteurs il eſt faſcheux à ſeruir, aigre à reprendre les fautes de ſes domeſtiques & parents: il n'eſtime ny ne priſe perſonne hors luy, ains meſpriſe tout le monde, ne pardonne à homme qui viue, accuſe vn chaſcun, ſ'eſtudiant à acquerir la reputation d'homme haïſſant le vice, en prouoquant les autres à courroux, comme celuy qui pour rien ne laiſſeroit volontairement à leur dire leur verité, & qui ne feroit ny ne dirois iamais rien pour complaire à autrui: Et puis il fera ſemblant de ne voir ny ne cognoiſtre pas vn des vrais & gros pechez, mais ſil y a d'aduenture quelque legere & ex-
- D terieure faute, il fera merueille de crier hault à bon eſciant, & de la reprendre auec vne voix forte & vne vehemence de parole: comme, pour exemple, ſil apperçoit quelque choſe qui traîne parmy la maiſon, ſi lon eſt mal logé, ſi lon a la barbe mal faite, ou vn veſtement qui ſeie mal, ou vn chien & vn cheual qui ne ſoient pas traittez comme il appartient. Mais au demourant vne oubliance de ſes pere & mere, faulte de ſoing de ſes propres enfans, ne faire cas ne compte de ſa femme, meſpris de ſes parents, ruine & perte de biens, toutes ces choſes là ne luy touchent en rien, ains eſt muet & couard en tout cela: ne plus ne moins qu'un maïſtre du ieu de la luiète, qui laiſſe enyurer & paillarder ſon eſcholier & champion de luiète, & puis le tanſe ſil treuve faulte à la burette à l'huile, & à l'eſtrille: ou comme vn Grammaïrien qui reprend ſon eſcholier ſil faut à auoir ſon eſcritoire & ſa plume, & puis ne fait pas ſemblant de l'ouïr quand il commet vne incongruité en parlant, ou qu'il vſe de quelque mot barbare: car le fla-

Comment on pourra discerner

teur est tel, que d'un mauvais orateur & digne d'estre mocqué, il ne dira rien quant à E
sa harangue, mais bien le reprendra il de sa voix, & l'accusera grièvement de ce qu'il
gastera le gosier & la voix par boire trop froid : & si on luy baille à lire un Epigramme
qui ne vaille rien, il s'attachera à blasmer le papier qui sera trop gros, ou bien l'escriuain
qui aura esté trop negligent ou ignorant. En ceste sorte les flateurs qui estoient à
l'entour du Roy Ptolomeus, lequel sembloit aimer les lettres, & estre desireux de
sçavoir, estoient ordinairement leurs disputes iusques à la minuit, à débattre de la
propriété d'un mot, ou d'un verset, ou touchant une histoire : & ce pendant il n'y en
auoit pas un de tant qu'ils estoient, qui luy remonstroit rien touchant la cruauté dont
il vsoit, ny de l'insolence en laquelle il se debordoit, ny quand il iouoit du tabourin,
ou qu'il faisoit d'autres indignitez sous couleur de religion. C'est tout ne plus ne
moins, que si à un qui auroit quelque grosse apostume, ou quelque vlcere fistuleux,
on venoit avec la lancette à luy raire les cheveux, ou à luy rongner les ongles: car ainsi
les flateurs appliquent leur liberté de parler aux parties qui ne sont point dolentes, F
& qui ne sont point de mal. Il y en a d'autres qui sont encore plus cauts & plus rusez
que tous ceux-là, car ils vsent de ceste liberté de parler, & de reprendre & blasmer,
pour complaire: comme Agis natif de la ville d'Argos, voyant qu'Alexandre don-
noit de grands dons à ne sçay quel plaissant, s'escria d'enuie & de douleur qu'il en
auoit, O le grand abus! Alexandre l'ayant ouy se tourna deuers luy en courroux, & luy
demanda, que c'estoit qu'il vouloit dire: Je confesse, dit-il, qu'il me fait mal, & que
j'ay grand despit de voir, que tous vous autres qui estes nez de la semence de Iupiter,
prenez plaisir d'auoir autour de vous des flateurs & des plaissants pour vous faire
rire: car Hercules auoit ainsi en sa compagnie les Cercopes, & Bacchus les Silenes: &
autour de vous aussi, tout de mesmes, ces bouffons icy sont en credit. Et un iour
comme l'Empereur Tiberius Cesar fust entré au Senat, il y eut un des Senateurs fla-
teur, qui se dressa en pieds, & dit tout haut, Qu'il falloit, puis qu'ils estoient libres,
qu'ils parlassent aussi librement, & qu'ils ne s'en faignissent point, ny ne teussent ce G
qu'ils sçauoient estre vtile. Il feit dresser les oreilles à tout le monde par ces paroles,
& se feit un grand silence: Tiberius mesme prestoit l'oreille fort attentiuement pour
ouir ce qu'il voudroit dire: & lors il se prit à dire, Escoute Cesar en quoy nous nous
plaignons tous de toy, & n'y a personne qui te l'ose dire ouuertement: C'est que tu
ne fais compte de toy, ains abandonnes ta personne, & affliges ton corps de soucis &
de trauaux que tu prens pour nous, sans te donner repos ne iour ne nuit. Et comme
il continuast une longue trainee de tels propos, on dit que l'orateur Cassius Seuerus
dit, La liberté de parler dont vse cest homme le fera mourir. Telles flateries sont le-
geres, & ne nuysent pas beaucoup: mais celles cy sont dangereuses, & corrompent
les mœurs des mal-aduisez, quand les flateurs accusent & blasment ceux qu'ils fla-
tent des vices & crimes contraires à ceux dont ils sont entachez: comme Himerius
un flateur Athenien tanst & iniurioit un vieil vsurier le plus chiche & le plus aua- H
ricieux de toute la ville, l'appellant prodigue, negligent de son profit, & qu'il en
mourroit de male faim luy & ses enfans: ou, au contraire un prodigue despensier qui
consumera tout, ils luy reprocheront qu'il sera un taquin, mechanique, ainsi comme
Titus Petronius faisoit à Neron: ou si ce sont Princes & seigneurs qui traittent dure-
ment & cruellement leurs subiects, ils leur diront, qu'il faudra oster ceste trop gran-
de douceur, & ceste importune grace, & misericorde inutile. Tout pareil à ceux-là
est celuy qui fait semblant de redouter & se donner de garde d'un lourdault & gros
fot, comme si c'estoit quelque habile homme, caut & rusé: & celuy qui tanse &
reprend un enuieux & mesdisant, qui prend ordinairement plaisir à detracter & mes-
dire de tout le monde, si d'aduenture il luy eschappe quelquefois de louer aucun
excellent personnage: C'est un vice que vous auez de louer ainsi toute sorte de gens,
voire

A voire iusques à ceux qui ne valent à chose qui soit : car quel homme est cestuy-cy que vous louez si fort? qu'a il iamais ne fait ne dit qui meritaist d'estre si hautement prisé? Mais c'est principalement aux amours que les flatteurs ruent leurs grands coups, & qu'ils enflamment plus ceux qu'ils flatent : car s'ils voient qu'ils aient quelque différent à l'encontre de leurs freres, ou qu'ils ne fassent compte de leurs parents, ou qu'ils soient en quelque soupçon & deffiance de leurs femmes, ils ne les en reprennent ny ne les en corrigent point, ains au contraire augmentent leur mescontentement : C'est bien employé, car vous ne vous sentez pas vous mesmes : vous estes cause de tout cecy, en montrant trop de les rechercher & caresser, & vous humiliant trop enuers eux. Et si d'auenture il sourd quelque demangeaison d'amour, ou quelque courroux de ialousie enuers quelque concubine ou quelque amie marice, alors la flaterie se tirera en auant avec vne liberté & franchise de parler tout ouuerte, apportant du feu en la flamme : accusant & faisant le procès à l'amoureux, comme ayant faict & dict beaucoup de choses mal seantes à l'amour, mal gracieuses, & pour faire haïr plus tost qu'aimer vne personne :

O homme ingrat de tant de doux baisers !

En ceste sorte les familiers d'Antonius qui brusloit de l'amour de Cleopatre l'Ægiptienne, luy faisoient à croire, que c'estoit elle qui estoit amoureuse de luy, & le tantant l'appelloient homme sans affection & superbe : Ceste Dame, disoient ils, laissant vn si grand & si opulent Royaume, & tant de belles & plaisantes maisons, se consume le cœur & le corps à tracasser ça & là apres ton camp, aiant pour tout honneur le tiltre de concubine d'Antonius :

Tu as vn cœur bien dur & inflexible,

Odyss. l. 10.

de la laisser ainsi se consumer d'ennuy : & luy estant bien aise d'estre ainsi conuaincu de luy faire tort, & prenant plaisir à se voir ainsi accuser, plus qu'il n'eust fait à s'ouïr louer, ne se donna garde que ce qui sembloit l'admonester de son deuoir, le desbauchoit encore plus qu'il ne l'estoit. Car ceste liberté simulée de parler franchement ressemble aux morsures des femmes impudiques, qui chatouillent & prouoquent le plaisir par ce qui semble deuoir faire douleur. Et tout ainsi comme le vin pur, qui autrement est vn certain remede contre la poison de la cigüe, si vous le mellez avec le ius de la cigüe, rend la force de la poison irremediable, d'autant que par le moien de sa chaleur il la porte promptement au cœur : aussi les meschants entendants tresbien que la franchise de parler est vn grand secours contre la flaterie, flatent par elle mesme.

Et pourtant semble il que Bias ne respondit pas du tout bien à celui qui luy demandoit, qui estoit la plus mauuaise beste de toutes : des sauages, dit-il, c'est le Tyrann, & des priuees le flatteur : car il pouuoit dire plus veritablement, qu'entre les flatteurs les priuez sont ces pourfuyuants de repeuës franches, & ces amis de table & d'estuues : mais celui qui estend sa curiosité, sa calomnie, & sa malignité, cōme le poulpe fait ses branches, iusques es chambres secretes & cabinets des femmes, celui-là, dis-je, est sauage, farouche, & dangereux à approcher. Or l'vn des moiens pour s'en donner de garde est, d'entendre & se souuenir tousiours, que nostre ame a deux parties, l'vne qui est plus veritable, aimant l'honnesteté & la raison : l'autre irraisonnable de sa nature, aimant passion & mensonge. Le vray amy assiste tousiours & donne confort & conseil à la meilleure partie, comme le bon Medecin qui vise tousiours à augmenter & entretenir la santé : mais le flatteur se sied tousiours aupres de celle qui est priuee de raison & pleine de passion, la gratte & la chatouille continuellement, en la maniant de sorte qu'il la destourne du discours de la raison, luy inuentant & preparant tousiours quelques vicieuses & deshonestes voluptez. Tout ainsi comme entre les viandes que l'homme mange, il y en a qui ne seruent ny à augmenter le sang ny les esprits, ny à adiouster force ne vigueur aucune aux nerfs ny aux mouelles, ains seule-

Comment on pourra discerner

ment excitent les parties naturelles, laschent le ventre, & engendrent vne chair mol- E
lace & demy pourrie: aussi qui y prendra de pres garde on ne faudra iamais à veoir
que tout le parler du flateur n'adiouste rien de bon à l'homme prudent & sage, qui
se gouuerne par raison, ains facilite à vn fol quelque volupté d'amour, ou luy en-
flamme vne cholere follement conceuë, ou irrite vne enuie, ou l'emplit d'vne odieu-
se & vaine presumption de soy-mesme, ou de douleur, en lamentant avec luy, ou luy
rend la malignité qu'il aura en luy, ou vne deffiance, ou vne timidité seruile, tousiours
de plus en plus aiguë à mal penser, plus tremblante de peur, & plus souspeçonneuse
par quelques faulx accusations, ou faux indices & coniectures qu'il luy mettra en
auant: car il est tousiours rangé au long de quelque vice & maladie de l'ame, laquel-
le il nourrit & engraisse, & comparoist incontinent qu'il y a quelque partie mal saine
de l'ame, ne plus ne moins que fait la bosse és parties enflammées & pourrissantes du
corps. Estes vous en courroux contre quelqu'un? Punissez, dira-il. Conuoitez vous?
Iouissez. Auez vous peur? fuyons nous en. Souspeçonnez vous? croyez le fermement. F
Et si d'aduenture il est mal-aisé à descouurir & surprendre en ces passions-là, parce
qu'elles sont si violentes & si fortes, que bien souuent elles chassent de nostre enten-
dement tout vsage de raison, il nous donnera aiseement prise en d'autres qui seront
moins vehementes, là où nous le trouuerons tout semblable. Car si l'homme se
trouue en quelque doute d'auoir trop beu ou trop mangé, & pour ceste occasion
qu'il face difficulté d'entrer en vn bain, ou bien de banquetter, le vray amy le retiendra,
l'admonestant de se garder, & d'auoir soing de sa santé: mais le flateur le tirera luy-
mesme dedans le baing, & commandera qu'on apporte sur table quelque nouuelle
viande, non pas offenser son corps par le trop adicuner. Et si luy voit son homme mal
affectonné à entreprendre quelque voyage par terre ou par mer, ou à faire chose
que ce soit, il dira que le temps ne presse point, & qu'il n'y est pas propre, & que lon
le pourra bien remettre à vn autre temps, ou bien y enuoyer quelque autre. S'il G
voit qu'il ait promis à quelque sien familier de luy prester ou donner de l'argent, &
puis qu'il s'en repente, mais neantmoins qu'il ait honte de faillir de promesse en cest
endroit, le flateur s'adioustant au pire plat de la balance, la fera pancher du costé de la
bourse, & chassera la vergongne de refuser, luy conseillant d'espargner son argent, at-
tendu la grande despenſe qu'il fait, & le nombre de gens ausquels il a à fournir: de
forte que si nous ne nous mescognoissons nous mesmes, & que nous ne voulions
ignorer que nous soions ou conuoiteux, ou dehontez, ou pusillanimes, iamais le fla-
teur ne nous pourra deceuoir: car ce sera tousiours celuy qui defendra ces passions là,
& qui parlera franchement en faueur d'elles, quand on les vouldra outrepasser. Mais
à tant est-ce assez parlé de ceste matiere. Venons maintenant aux seruices, & aux en-
treprises de faire plaisir, car en tels offices le flateur confond & obscurcit fort la diffe-
rence qu'il y a entre luy & le vray amy, se monstrant tousiours en apparence prompt
& diligent en toutes occurrences, sans chercher occasion de restituer ou refuser: car le H
naturel du vray amy, ne plus ne moins que la parole de la verité, comme dit Euripides,
est simple, naif, & sans fard ne faintise quelconque: mais celuy du flateur, estant cer-
tainement mal-sain en soy-mesme, a besoing de plusieurs exquisés & ruses medeci-
nes pour s'entretenir. Ainsi doncques comme quand on s'entrerencontre par la
ville, le vray amy quelquefois sans mot dire ny saluer, & aussi sans qu'on luy en die,
ny qu'on le resalüé autrement que des yeux, passe outre, declarant seulement avec
vn doux regard & vn sous-riſ la bienueillance & l'affection qu'il a imprimée de-
dans son cœur: & au contraire le flateur court au deuant, & va apres, & estend les
bras pour embrasser de tout loing, & si d'aduenture on l'a salüé deuant, pour l'auoir
apperceu le premier, il en fait ses excuses, avec tesmoins & avec grands serments. Bien
souuent aussi aux affaires & negoces, les amis omettent plusieurs choses petites & le-
geres

A geres , sans se monſtrer trop exactement ſeruable, ny trop curieux, & ſans ſingerer à toute ſorte de ſeruiſſe: mais le flateur eſt en cela aſſidu, continuel, ſans iamais ſe laſſer, ne iamais donner lieu ne place à autre de faire aucun ſeruiſſe, ains voulant eſtre commandé, & eſtant marry ſi on ne luy commande, voire ſ'en deſeſperant, & appellant les Dieux à teſmoings, comme ſi on luy faiſoit grand tort. Ces ſignes là monſtrent à ceux qui ont bon entendement, vne amitié qui n'eſt point vraye ne pudique, mais plus toſt qui ſent ſon amour de putain, abraſſant plus chaudement & plus volontiers que lon ne demande: toutefois pour les examiner plus par le menu, il faut premierement conſiderer és offres & promeſſes la difference qu'il y a entre l'amy & le flateur: car ceux qui ont eſcrit par auant nous, diſent bien, que ceſte ſorte de promeſſe eſt promeſſe d'amy,

Si ie le puis, & ſi faire ſe peut:
mais que ceſte cy eſt l'offre d'un flateur,

B Demande moy tout ce que tu voudras.
Car les Poëtes comiques introduiſent de tels prometteurs en leurs Comédies,
Nicomachus mettez moy à l'encontre
De ce ſoudard, qui ſi braue ſe monſtre,
Et vous verrez ſi à coups de baſton
Ie ne le rend ſouple comme vn poupon,
Et ne luy fais toute la face molle,
Comme vne eſponge, avec ſa chaude chole.

D'auantage les amis ne ſingrent pas de donner confort & aide en aucun affaire, ſi premierement ils n'ont eſté appelez au conſeil de l'entrepriſe, & qu'ils ne l'ayent approuuee ou comme honeſte, ou comme vtile: mais le flateur encore que deuant que faire l'entrepriſe on luy demande ſon aduiſ, & qu'on ſe remette en luy de l'approuuer ou reſprouuer, non ſeulement il deſire ceder & gratifier, mais il craint que lon ne le ſouſpeçonne de vouloir reculer ou de fuir à mettre la main à l'œuvre, & pour ceſte cauſe ſ'accommode à ce qu'il voit où l'autre encline, & qui plus eſt l'aiguillonne & l'incite encore à le faire: car il ſe trouue bien peu, ou point du tout, de riches hommes ou de Roys qui dient ces paroles,

Pleuſt or à Dieu qu'un mendiant ſa vie,
Et pis encor qu'un pauvre qui mendie,
M'eſtant amy vint deuers moy ſans peur,
Me declarer ce qu'il a ſur le cœur.

Mais au contraire ils ſont comme les compoſeurs de Tragédies, qui veulent auoir vne danſe de leurs amis pour chanter avec eux, & vn Theatre d'hommes qui leur applaudiſſent: d'où vient que Mécropé en vne Tragédie donne ces ſages aduertissements,

Prens pour amy ceux qui point ne flechiſſent.

D En leurs propos, mais ceux qui obeiſſent
A ton vouloir pour te gratifier,
Fais leur fermer ton huys, ſans t'y fier.

Et les Seigneurs ſont tout au rebours, car ceux qui ne chalent & ne flechiſſent à leurs deuis, ains y reſiſtent, en leur remonſtrant ce qui eſt plus vtile, ils les haïſſent, & ne les daignent pas regarder: & au contraire les meſchans hommes de laſche cœur & trompeurs, qui ſçauent bien leur complaire, non ſeulement ils leur ouurent leurs huys, & les reçoient en leurs maiſons, mais les admettent iuſques à la communication de leurs plus interieures affectionſ & leurs plus ſecrettes penſées: entre leſquels celui qui ſera vn peu plus ſimple dira, qu'il ne luy appartient pas, & qu'il ne ſ'eſtime pas digne d'eſtre appellé en deliberation de ſi grands affaires, & qu'il ſe ſentira bien heureux de faire comme ſimple miniſtre & ſeruiteur, ce qui luy ſera enioint & commandé:

mais celuy qui fera plus fin, & plus malicieux, s'arrestera bien à la consultation, oyant E les doutes que lon fera, froncera bien les sourcis, fera signe des yeux & de la teste, mais il ne dira rien, sinon que si l'autre declare ce qui luy en semble, il s'escriera incontinent, ô Hercules, vous me l'avez osté de la bouche, car si vous ne m'eussiez preuenu, ie m'en allois dire le mesme. Et ainsi comme les Mathématiciens tiennent, que les superficies & les lignes ne se courbent ny ne s'estendent, & ne se meuuent point d'elles mesmes, d'autant qu'elles sont intellectuelles & incorporelles, mais qu'elles se plient, qu'elles s'estendent, & qu'elles se remuent quand & les corps, dont elles sont les extremittez: aussi vous trouuerez tousiours, que le flatteur ne dira iamais, ny n'assurera ny ne sentira, ny ne se courroucera de luy.


roucera tousiours avec vn autre: de se difference qu'il y a entre l'amy & le flat & bons offices pour l'amy: car le seruice vn œuf, le meilleur au fond du dedans, bien souuent comme le sage Medecin & le bon amy porte quelque bonne parole, & fait les affaires sans qu'il en sache en autres offices, qu'en cestuy cy qu'il natif de l'Isle de Chio: vn iour qu'il estoit pauvre, il y retourna vn peu gent, qui sont environ trois francs & dlict: il n'y a rien icy, luy dit il, sinon les

L'eau, & le feu, la terre, & l'air & si tu n'es pas bien couché à ton aise: & secretelement il luy mit ce peu d'argent sans son liect le trouua, dont elle fut bien en se sous-riant luy respondit, C'est v philosophie les enfans naissent semblables. cesilaus, assistoit en iugement avec plusieurs accusé de quelque grand crime: qu'il eust à exhiber son anneau, lequel dequoy Lacydes s'estant aperçeu, mais que toute la preuue du fait, dont il estoit la sentence donnee Cephisocrates absout les iuges, de la bonne iustice qu'ils luy auoient veu le fait, qui luy dit, Remercie allé, sans que Lacydes en eust dit mot à beaucoup de biens & de graces aux horribles nature, qu'ils prennent plaisir contraire, l'office que fait le flatteur n'a rien de liberal: ains vne sueur au visage, & tous signes qui donnent apparence & op grand' peine & grand soing: ne plus ne leurs renforcees, avec plus rompus, & au bien viuement apparente: de sorte qu'il il a fait les allées & venues, les foucis qu'il en a encourues enuers les autres, & gers & grand accidents qu'il recite, telle ritoit pas tant de travaux & de peines: cache, deuient odieux, desaggreable, &

A fait le flatteur, le reproche, & la honte, qui fait rougir, y sont conioincts, non seulement apres qu'il les a faicts, mais aussi à l'instant mesme qu'il les fait: là où le vray amy si d'adventure il eschet, qu'il luy faille par force reciter le fait, il l'exposera nuement, mais de foy-mesme il ne dira iamais vn mot: ainsi que firent iadis les Lacedemoniens apres qu'ils eurent enuoyé du bled à ceux de la ville de Smyrne, qui en leur extrême necessité leur en auoient demandé: car comme les Smyrneiens magnifiaient & louaient fort hautement ceste liberalité enuers eux, ils leur respondirent, Ce n'est pas si grande chose qu'il la faille tant louer: car nous auons assemblé cela en faisant commandement, que tous hommes & bestes s'absteinsent pour vn iour de disner.

, non seulement est liberale, mais aussi plus agitant qu'ils estiment qu'elle n'a pas porté grand. Or n'est-ce pas à la façon odieuse de faire titude de les offrir & promettre facilement, que gnoistre sa nature, mais beaucoup plus en ce, le flatteur en chose honteuse: & à diuerse fin, l'vn. Car l'amy ne requerra iamais, ainsi que diuisir en choses iustes, & luy ce-pendant luy en

conioinct ire point. choses mal-seantes & mal-honestes, & si d'ad-onse que fait Phocion à Antipater sera bien rois m'auoir pour amy & pour flatteur ensemble. Car il faut bien estre du costé de son liberer, non pas à coniuurer: à porter tesmoicun par faulseté: voire iusques à luy aider à pas à rien comettre meschamment: car il chose honteuse & reprochable de son amy, & de pecher avec luy. Tout ainsi doncques lessaicts en bataille par Antipater, & traittans mander tant qu'il voudroit de charges domussi le vray amy est tel, que si d'adventure il requiere de se mettre en despense, en danger mier appellé, & en veult alaigrement porter ue: mais s'il y a tant soit peu de honte & de on le laisse en paix, & qu'on luy pardonne. ar és dangereuses & laborieuses entremises r le sonder vous le touchez, il vous sonnera excuse qu'il forgera: mais au contraire en serionteux, Je suis à vous, dira-il, faittes de moy vos pieds. rien ne luy est indigne, ny ignomire à garder la maison des larrons comme le heual, ny à labourer la terre comme le bœuf, s nazardes, toutes les iniures, & tous les ieux trument de mocquerie, & de faire rire les ny à plaider en iugement pour son amy, ny tre, comme celuy qui ne sçait ne trauailler, uires qui se font sous laixelle, c'est à dire, etes voluptez, il ne cherchera point d'excusques folles amourettes, pour tirer quelque



Comment on pourra discerner

mais celuy qui fera plus fin, & plus malicieux, s'arrestera bien à la consultation, oyant E les doutes que lon fera, froncera bien ses sourcis, fera signe des yeux & de la teste, mais il ne dira rien, sinon que si l'autre declare ce qui luy en semble, il s'escriera incontinent, ô Hercules, vous me l'avez osté de la bouche, car si vous ne m'eussiez preueni, ie m'en allois dire le mesme. Et ainsi comme les Mathematiciens tiennent, que les superficies & les lignes ne se courbent ny ne s'estendent, & ne se meuuent point d'elles mesmes, d'autant qu'elles sont intellectuelles & incorporelles, mais qu'elles se plient, qu'elles s'estendent, & qu'elles se remuent quand & les corps, dont elles sont les extremittez: aussi vous trouuerez tousiours, que le flateur ne dira iamais, ny n'assurera ny ne sentira, ny ne se courroucera de luy-mesme, ains dira, assurera, sentira, & se courroucera tousiours avec vn autre: de sorte qu'en cela sera tres-facile à apperceuoir la difference qu'il y a entre l'amy & le flateur, & encore plus en la maniere de faire seruice & bons offices pour l'amy: car le seruice ou office qui procedera de l'amy, aura, comme vn œuf, le meilleur au fond du dedans, & rien de monstre ny de parade en front: ains F bien souuent comme le sage Medecin guarit son patient sans qu'il en sache rien, aussi le bon amy porte quelque bonne parole qui luy profite, on luy appointe quelque querelle, & fait ses affaires sans qu'il en sache rien. Tel a esté le philosophe Arcefilaus tant en autres offices, qu'en cestuy cy qu'il feist à l'endroiect d'un sien amy nommé Apelles, natif de l'Isle de Chio: vn iour qu'il estoit malade l'estant allé veoir, & aiant cogneu qu'il estoit pauvre, il y retourna vn peu apres, portant en sa main vingt drachmes d'argent, qui sont enuiron trois francs & demy, & se seant aupres de luy qui estoit en son liect: il n'y a rien icy, luy dit il, sinon les elements d'Empedocles,

L'eau, & le feu, la terre, & l'air mobile,
& si tu n'es pas bien couché à ton aise: & quant & quant en luy remuant son oreiller, secrettement il luy meit ce peu d'argent dessous. La vieille qui le seruoit, en refaisant son liect le trouua, dont elle fut bien esbahie, & le dit sur l'heure à Apelles: lequel en se sous-riant luy respondit, C'est vn larcin d'Arcefilaus. Et pource qu'en la Phi- G losophie les enfans naissent semblables à leurs parents, Lacydes vn des disciples d'Arcefilaus, assistoit en iugement avec plusieurs autres à vn sien amy nommé Cephisocrates accusé de quelque grand crime: en plaidant laquelle cause l'accusateur requit qu'il eust à exhiber son anneau, lequel il auoit tout bellement laissé tomber à terre, dequoy Lacydes s'estant apperceu, meit aussi tost le pied dessus, & le cacha pource que toute la preuue du faict, dont il estoit question, dependoit de cest anneau: apres la sentence donnee Cephisocrates absous à pur & à plein, alla remercier & caresser les iuges, de la bonne iustice qu'ils luy auoient faitte: entre lesquels il y en eut vn qui auoit veu le faict, qui luy dit, Remerciez en Lacydes: & luy conta comme le cas estoit allé, sans que Lacydes en eust dit mot à personne. Ainsi estimé-ie, que les Dieux font beaucoup de biens & de graces aux hommes, sans que les hommes le cognoissent, aians telle nature, qu'ils prennent plaisir & s'esjouissent de gratifier & bien faire. Au H contraire, l'office que fait le flateur n'a rien de iuste, rien de veritable, rien de simple, ne de liberal: ains vne sueur au visage, vn courir çà & là, vne face chagrine & pensue, tous signes qui donnent apparence & opinion d'œuure laborieuse, & faitte avec vne grand' peine & grand soing: ne plus ne moins qu'une peinture affectee, qui avec couleurs renforcees, avec plis rompus, & avec rides: & angles, chercheroit de se monstrier bien viuement apparente: de sorte qu'il ennuye & fasche à force de conter comment il a fait les allees & venues, les soucis qu'il en a euz en luy mesmes, les malveuillances qu'il en a encourues enuers les autres, & puis dix mille autres empeschements, dangers & grand accidents qu'il recite, tellement que lon pourroit dire, Cecy ne meritoit pas tant de trauaux & de peines: car tout plaisir & tout bien-fait que lon reproche, deuient odieux, desaggreable, & du tout insupportable. Et en tous ceux que fait

- A fait le flatteur, le reproche, & la honte, qui fait rougir, y sont conioincts, non seulement apres qu'il les a faictz, mais aussi à l'instant mesme qu'il les fait : là où le vray amy si d'adventure il eschet, qu'il luy faille par force reciter le faict, il s'exposera nue-ment, mais de foy-mesme il ne dira iamais vn mot : ainsi que firent iadis les Lacedemoniens apres qu'ils eurent enuoyé du bled à ceux de la ville de Smyrne, qui en leur extrême necessité leur en auoient demandé : car comme les Smyrneiens magnifiasent & louassent fort hautement ceste liberalité enuers eux, ils leur respondirent, Ce n'est pas si grande chose qu'il la faille tant louer : car nous auons assemblé cela en faisant commandement, que tous hommes & bestes sabsteinissent pour vn iour de disner. Ceste grace & beneficence ainsi faire, non seulement est liberale, mais aussi plus agreable à ceux qui la reçoient, d'autant qu'ils estiment qu'elle n'a pas porté grand dommage à ceux qui la leur ont faite. Or n'est-ce pas à la façon odieuse de faire seruice fascheusement, ny à la promptitude de les offrir & promettre facilement, que
- B le flatteur donne principalement à cognoistre sa nature, mais beaucoup plus en ce, que l'amy fait office en chose honeste, le flatteur en chose honteuse : & à diuerse fin, l'un pour profiter, & l'autre pour complaire. Car l'amy ne requerra iamais, ainsi que disoit Gorgias, que son amy luy face plaisir en choses iustes, & luy ce-pendant luy en fera en choses iniustes :

Car à tout bien il doit estre conioinct

Auecques luy, mais à mal faire point.

- Et pourtant le diuertira il plus tost des choses mal-seantes & mal-honestes, & si d'adventure l'autre ne le veult croire, la responce que feit Phocion à Antipater sera bien
- à propos en cest endroit, Tu ne scaurois m'auoir pour amy & pour flatteur ensemble : c'est à dire, pour amy & pour non amy. Car il faut bien estre du costé de son amy à faire, non pas à meffaire, & à deliberer, non pas à coniuurer : à porter tesmoignage de verité, non pas à opprimer aucun par faulseté : voire iusques à luy aider à
- C porter vne aduersité patiemment, non pas à rien commettre meschamment : car il ne faut pas seulement scauoir aucune chose honteuse & reprochable de son amy, tant s'en faut qu'il soit loysible de la faire, & de pecher avec luy. Tout ainsi doncques comme les Lacedemoniens aians esté deffaits en bataille par Antipater, & traittans de paix avec luy, le prioient de leur commander tant qu'il voudroit de charges dommageables, mais de honteuses nulle : aussi le vray amy est tel, que si d'adventure il suruiuent à son amy quelque affaire qui requiere de se mettre en despenſe, en danger ou en peine pour luy, il veult estre le premier appelé, & en veult alaigrement porter sa part, sans alleguer excuse quelconque : mais si luy a tant soit peu de honte & de deshonneur, il s'excusera, & priera qu'on le laisse en paix, & qu'on luy pardonne. Mais le flatteur fait tout au contraire, car és dangereuses & laborieuses entremises de faire plaisir il se tire arriere, & si pour le sonder vous le touchez, il vous sonnera
- D ie ne ſçay quel son cas & bas de quelque excuse qu'il forgera : mais au contraire en seruices & offices deshonestes, vils, bas & honteux, Je suis à vous, dira-il, faites de moy ce que vous voudrez : mettez moy sous vos pieds. rien ne luy est indigne, ny ignominieux. Voyez le singe, il n'est pas propre à garder la maison des larrons comme le chien, ny à porter sur son dos comme le cheual, ny à labourer la terre comme le bœuf, & pourtant faut-il qu'il supporte toutes les nazardes, toutes les iniures, & tous les ieux mal-faisans du monde, seruant d'un instrument de mocquerie, & de faire rire les gens : ainsi est-il du flatteur, qui n'est bon ny à plaider en iugement pour son amy, ny à mettre la main à la bourse, ny à combattre, comme celuy qui ne ſçait ne trauailler, ne faire rien qui soit de bon : mais aux affaires qui se font sous l'aixelle, c'est à dire, à cachette, aux ministrees de sales & secretes voluptez, il ne cherchera point d'excuse, il sera fidele courtier & ministre de quelques folles amourettes, pour tirer quelque

Comment on pourra discerner

garfe de la main d'un maquereau, exquis à merucille, pour mettre au net le **E** compte de la despenfe d'un feftin, diligent, non paresfeux à faire apprefter un banquet, bien aduenant à entretenir des concubines: fi on luy commande de parler des groffes dents à un facheux beau pere, ou de chaffer la femme efpoufee & legitime, il eft fans honte & fans mercy, tellement qu'il n'eft pas malaisé à defcouvrir en cest endroit: car commandez luy ce que vous voudrez de vilain & de deshoneste, il eft tout prest de ne s'efpargner point pour complaire à celuy qui luy commande. Encore y a il un autre grand moien de le cognoiftre, par la disposition qu'il aura enuers les autres amis, là où lon trouuera qu'il fera bien different du vray amy, lequel n'a rien plus agreable que d'aimer avec beaucoup d'autres, & aufsi d'estre aimé de plusieurs, & va tousiours procurant cela à son amy, qu'il soit aimé & honoré de plusieurs autres: car estimant que tous biens font communs entre amis, il pense qu'il n'y doit auoir rien plus commun que les amis: mais le fupposé, faux, & contrefaict, comme celuy qui cognoift tresbien en foy-mefme, qu'il tient grand tort à l'amitié, **F** en la contrefaisant ainfi qu'une faulfe monnoye, & est bien de fa nature enuieux, & exerce son enuie à l'encontre de fes semblables, s'efforceant de les surpasser en gaudifferie, & en babil, mais il redoute & tremble deuant celuy qu'il fçait estre plus homme de bien que luy, ne comparoiffant pas certes aupres de luy plus qu'un homme de pied aupres d'un chariot de Lydie, comme lon dit en commun prouerbe, ou comme dit Simonides,

Plus que du plomb noir aupres de fin or.

Se sentant donc leger, non naturel, ains falsifié, quand on le vient à conferer de pres avec une vraye, folide, & graue amitié, qui endure le marteau, il ne la peut endurer, pource qu'il fçait bien qu'il sera defcouuert pour tel qu'il est: au moien dequoy, il fait ne plus ne moins qu'un mauuais peintre, qui auoit fort mal peint des cocqs, car il commandoit à son vallet de chasser bien loing de sa peinture les cocqs naturels: aufsi cestui-cy chasse les vrais amis, & ne les seuffre pas approcher: ou s'il ne le peut **G** faire en public & ouuertement, il fera semblant de les caresser, honorer & admirer, comme gens de plus grande valeur que luy, mais fous main, & en derriere, il vous iettera & semera des calomnies: & si ses clandestins & secrets rapports poignans en derriere n'engendrent pas soudainement un vlcere, il retient en sa memoire ce que disoit anciennement Medius. Ce Medius estoit comme le maistre & le chef du trouppreau de tous les flateurs qui estoient en la court d'Alexandre, bandé à l'encontre de tous les plus gens de bien de la court: celuy-là donnoit un enseignement que lon ne faignist point de picquer hardiment, & de mordre avec force calomnies: car encore, disoit-il, que celuy qui aura esté mordu guarisse de la playe, la cicatrice pour le moins en demeure. Par telles cicatrices de faulces accusations, ou, pour les mieux appeller, par telles gangraines & tels chancres Alexandre estant rongé, fait mourir Callisthenes, Parmenion & Philotas, & s'abandonna à renuerfer & don- **H** ner le croc en iambe, à leur volonté, à un Agnon, un Bogoas, un Agefias, & un Demetrius, estant vestu, paré, diapré & adoré par eux, comme une statue barbaresque: tant a le complaire grande force & efficace, mais ie dis tresgrande, mesmement enuers ceux qui en ce monde sont estimez les tresgrands: car d'autant qu'ils se persuadent, & qu'ils desirent les meilleures choses du monde estre en eux, cela donne foy & hardiesse tout ensemble au flateur, au contraire des places qui sont situees en haults lieux, lesquelles en sont inaccessibles & impossibles à approcher à ceux qui les cuydent surprendre d'emblee, là où un cœur eleué pour la haultesse de sa fortune, ou pour l'excellence de sa nature, en une ame où il n'y a point de sain iugement de raison, est facile à prendre, voire à fouler aux pieds, aux plus basses & plus viles personnes. C'est pourquoy dès l'entree de ce discours nous auons admonesté

- A** nesté, & encores admonestons en cest endroit les lisans, de chasser arriere d'eux l'amour & l'opinion de soy-mesme: car ceste presumption là nous flatant premiere-ment nous mesmes au dedans, nous rend plus tendres & plus faciles aux flatteurs de dehors, comme y estans ia tous disposez: là où si obeïssans au dieu Apollo, & reco-ignoissans combien en toutes choses fait à estimer son oracle, qui nous commande de nous cognoistre nous mesmes, nous allions rechercher nostre nature, nostre in-stitution, & nostre nourriture, quand nous y trouuerions infinies defectuositez de ce qui y deust estre, & tant de choses malement, ou temerairement meslees, qui ne deussent pas estre en noz actions, en noz propos, & en noz passions, nous ne nous abandonnerions pas ainsi facilement aux flatteurs à nous fouler aux pieds, & faire ainsi, par maniere de dire, litriere de nous à leur plaisir. Le Roy Alexandre souloit dire, que deux choses principalement le destournoient d'adiouster foy à ceux qui le saluoient & l'appelloient Dieu: l'une estoit le dormir, & l'autre le iouir d'une femme,
- B** comme se sentant plus imparfait, & plus defectueux en ces deux poincts là, qu'en nuls autres: mais si nous considerions, chascun en son priué, plusieurs choses laides, fascheuses, imparfaites & mauuaises que nous auons, nous trouuerions que nous au-rions besoing, non d'un amy qui nous louast, & qui dist bien de nous, mais plus tost qui parlast à nous librement, qui nous reprist & blasmast des fautes que nous com-mettons en nostre particulier. Car il y en a bien peu entre plusieurs, qui osent li-brement & franchement parler à leurs amis, & entre ces peu là encore y en a il moins qui le sachent bien faire: car ils pensent que dire iniure & blasmer soit librement parler, & neantmoins ceste liberté de parler, comme toute autre medecine qui n'est pas donnee à propos, en temps & en lieu, a cela qu'elle offense, fasche, & trouble sans aucun profit, & qu'elle produit aucunement le mesme effect avec douleur que le flater fait avec plaisir: car les hommes reçoient dommage, non seulement pour estre louez, mais aussi pour estre blasmez importunément, & hors de temps & de saison: &
- C** est cela qui les rend plus faciles à prendre, & leur fait plus monstrier le costé aux flatteurs, se laissant facilement aller & couler, ne plus ne moins que l'eau qui court tousiours d'un hault en un fond & contre bas. Parquoy il fault que ceste liberté de reprendre soit temperee d'une affection amiable & accompagnée d'un iugement de raison, comme d'une lumiere retrenchant ce qu'il y pourroit auoir de trop ve-herent & de trop crud: de peur que se voyans ainsi repris de toutes choses, & blas-mez à tout propos, ils ne s'en faschent & ne se despitent, de sorte qu'ils se iettent à l'ombre & à l'abry de quelque flatteur, & se tournent deuers ce qui ne les faschera point. Car il faut fuir, Amy Philopappus, tout vice par le moien de la vertu, & non pas par le vice contraire, comme aucuns font, qui pour fuir la honte sotte tom-bent en impudence, & pour euitier inciuilité tombent en plaisanterie, & cuidans esloigner leurs mœurs bien loing de lascheté & de couardise, ils s'approchent d'au-dace & de brauerie: & y en a qui pour se iustifier de n'estre point superstitieux de-uiennent atheïstes, & pour ne sembler & estre tenus pour lourdaults, se rendent fins & malicieux: faisant des mœurs comme d'un bois courbé d'un costé, à faute de le sca-uoir bien redresser, ils le courbent de l'autre. Or est-ce une bien laide façon de mon-strer que lon ne soit point flatteur, que de se rendre fascheux sans profit, & une con-uersation bien rustique & ignorante de se faire aimer, que de se rendre mal-plaisant & ennuieux, à fin de ne sembler point seruir ne valeter en amitié, ne plus ne moins que le serf affranchy en une Comédie, qui pense que la licence d'accuser autrui, soit iouissance de la liberté de parler de pair à pair. Puis que donc c'est chose laide que de tomber en flaterie, en cherchant de complaire, & aussi que de corrompre par immo-derée liberté de parler toute la grace de l'amitié, & le profit de remedier aux mauix en cuidant euitier flaterie, & que lon ne doit faire ne l'un ne l'autre, ains que comme

Comment on pourra discerner

en toute autre chose, il faut que la liberté de parler prenne sa perfection & bonté de la E
mediocrité en n'en usant ne trop ne peu, il semble que le fil mesme & la deduction de
ce propos requiert, que le subiect du reste de ce traité soit discourir de ce poinct là.
Voians doncques, que ceste liberté de franchement parler & reprendre a plusieurs vices
qui luy nuisent, essayons de les luy oster l'un apres l'autre : & premierement deliurons
la de l'amour de soy-mesme, nous donnant fort bien de garde qu'il ne semble que ce
soit pour nostre interest, comme pour aucun tort que nous aions reçu, ou pour quel-
que despit que lon nous ait fait, que nous tançons & reprochions : car ils n'estiment
point que ce soit pour bien veillance que nous leur portions, mais pour vn maltalent
que nous aions dedans le cœur, quand ils voient que nous auons interest à ce que nous
disons, ny ne reputent pas que ce soit vn admonestement, ains vne plainte : car la liberté
de reprendre, soigneuse du bien de son amy, est venerable, là où la plainte sent son
homme qui s'aime soy-mesme, & qui est de cœur bas. De là est que lon reuer, honore
& admire ceux qui parlent librement, & au contraire on accuse reciproquement & mes- F
prise lon ceux qui se plaignent : ainsi comme nous voions en Homere que le Roy
Agamemnon ne peut supporter Achilles, qui auoit assez moderément usé de ceste
franchise de parler endroit luy, là où il donne gaigné, & supporte doucement Vlysses
qui le poingt fort aigrement, & luy dit,

At 1. liu.
de l'Iliade.

Que pleust à Dieu (malheureux) que d'une autre
Tu fusses chef, non de l'armee nostre.

se rendant à la parole aigre d'un homme sage, de bon conseil, & soigneux du bien
public : car Vlysses n'auoit aucune occasion particuliere de courroux contre luy, &
parloit franchement pour l'interest public de toute la Grece, là où Achilles se cour-
rouceoit & tourmentoit principalement pour son interest priué. Et luy-mesme, en-
core qu'il ne fust pas gueres

Iliad. l. 11.

Doux en son ire, & de léger courroux,
ains tel qu'il eust bien accusé celui qui n'eust point esté coupable, endura neantmoins G
patiemment & sans mot dire, que Patroclus luy dist plusieurs paroles de telle sorte,

Iliad. l. 16.

Cœur sans mercy, Thetis n'est point ta mere,
Ny Peleus ne fut onques ton pere :
Celle qui t'a enfanté c'est la Mer,
Et les Rochers qui la font escumer,
Puis que tu es à pitié inflexible.

Car ainsi comme Hyperides l'orateur disoit aux Atheniens, qui se plaignoient de luy
qu'il estoit trop aspre & trop rude, qu'ils considerassent non seulement s'il estoit
aspre, mais s'il estoit sans rien prendre : aussi la reprehension d'un amy estant pure
& nette de toute passion particuliere, se fait reuerer & rougir de honte, de sorte que
lon n'oseroit leuer les yeux à l'encontre : tellement que s'il appert que celui qui tanse
librement reiette loing les fautes que son amy aura commises à l'encontre de luy, H
& n'en face mention quelconque, mais qu'il argüe & reprenne d'autres erreurs &
fautes qu'il aura commises contre d'autres, sans se feindre ny l'espargner, la vehe-
mence de ceste franchise de parler est inuincible, d'autant que la douceur & bien-
veillance du reprenant fortifie l'aigreur & l'austerité de la reprehension. Et pourtant,
a il esté bien dit anciennement, que quand on est en courroux ou en different avec ses
amis, c'est lors que plus on doit estudier à faire quelque chose, qui leur soit ou pro-
fitable ou honorable : & ne sent pas moins que cela son affection amiable, quand on
se voit soy-mesme contemné & mesprisé, parler franchement pour d'autres qui se-
ront mesprisés aussi, & les ramenteuoir. Comme fait Platon enuers Dionysius du
temps qu'il le mesprisoit, & qu'il auoit quelque mescontentement de luy. Il luy fait
demander audience pour pouuoir à part parler à luy : Dionysius luy donna assignation,
pensant

A pensant qu'il luy deust faire quelque plainte pour luy-mesme, & luy en reduire les occasions: mais Platon luy parla en ceste maniere: Si tu estois bien aduerty, seigneur Dionysius, qu'il y eust quelqu'un de tes mal-veillans, qui fust de propos deliberé venu en la Sicile pour te faire desplaisir, & qu'il ne differast à executer sa mauuaise volonté, que pource qu'il n'en auroit point de moien, le laisserois tu partir de la Sicile? & souffrirais-tu qu'il s'en allast sans peine quelconque? Ie m'en engarderois bien, Platon, respondit Dionysius: car il ne faut pas seulement chastier les faicts de ses ennemis, mais aussi haïr & punir leur mauuaise intention. Si doncques, à l'opposite (ce dit Platon) quelque autre estant expressément venu pour amitié qu'il te porte, & pour l'enueie qu'il a de te faire quelque plaisir, & que tu ne luy en donnes point le temps ny l'opportunité, est-il raisonnable de ne luy en sçauoir point de gré, & n'en faire compte, ains le mespriser? Dionysius adonc luy demanda qui estoit cèluy là: c'est, luy respondit-il, Æschines, homme aussi bien conditionné & aussi honeste, qu'il y en eust point B en toute l'eschole & compagnie de Socrates, & qui pourroit aussi bien par son eloquence reformer les mœurs de ceux avec lesquels il hanteroit: & aiant fait vn si long voiage par mer pour cuider conferer & communiquer avec toy, est là demouré sans que personne en face compte. Ces paroles toucherent si vifvement Dionysius, qu'il remercia sur l'heure & ambrassa Platon, louant grandement sa debonnaireté & magnanimité: & depuis traita honorablement & magnifiquement Æschines. Secondement il faut repurger & nettoier la franchise de parler de toute parole iniurieuse, de toute risée, de toute mocquerie, & de toute plaifanterie, car ce sont de mauuaises faulx pour l'en cuider assaisonner: pource que tout ainsi comme quand le Chirurgien incise la chair d'un homme, il faut qu'il y vse d'une grande dexterité, netteté, & propreté en son faict, mais non pas que la main luy danse, ne qu'il affecte aucun geste superflu pour monstrier l'habilité de sa main: aussi la franchise de parler librement à son amy, reçoit bien quelque rencontre bien à propos, prouueu que la grace n'en gaste point la grauité, mais pour peu qu'il y ait de brauerie, d'insolence, d'aigreur picquante, ou d'iniure, elle perd toute son autorité. Et pourtant vn Musicien iadis fort gentilmente & de bonne grace ferma la bouche au Roy Philippus, qui disputoit & contestoit à l'encontre de luy de la maniere de toucher des chordes d'un instrument de musique, en luy disant, Dieu te gard, Sire, d'un si grand mal, que d'entendre cela mieux que moy. Et au contraire Epicharmus ne parla pas sagement, car comme le Roy Hieron, aiant peu de temps auparauant fait mourir aucuns de ses familiers, l'eust enuoyé conuier quelques iours apres à souper avec luy: Mais n'agueres, dit-il, quand tu sacrifieras tes amys, tu ne m'y appellas pas. Aussi mal fait Antiphon chez le tyran Dionysius, car s'estant esmeu propos entre eux, quel estoit le meilleur cuyure, il respōdit promptement, celui duquel les Atheniens fondirent des statues à Armodius & Aristogiton. Car ny l'aigreur & aspreté de telles paroles picquantes, ne profite, ny la ioyeuseté & plaifanterie ne delecte, ains est vne espee d'incontinence de langue meslee avec vne malignité, vne volonté de faire iniure, portant declaration d'inimitié, de laquelle ceux qui vsent ne seruent à rien, & se perdent eux-mesmes, dansant, comme lon dit en commun prouerbe, la dance d'alentour du puis. Car Dionysius en fit mourir Antiphon, & Timagenes en fut priué de la familiarité d'Auguste Cæsar, non qu'il eust iamais parlé trop franchement, mais pour ce qu'en toutes tables, en tous promenemens, où l'Empereur l'appelloit, sans propos il alleguoit tous-iours ces vers,

Il ne venoit seulement que pour dire

Ce qui sembloit les Grejois faire rire.

tournant la cause de la faueur qu'on luy faisoit en arguce d'un traict de mocquerie: car mesmes les Poëtes Comiques anciennement en leurs Comedies mettoient bien quelques remonstrances serieuses appartenantes au gouuernement de la chose

Ceux qui auoient conspiré contre le tyran Pisistratus & ses enfans.

Comment on pourra discerner

publique, mais pour autant qu'il y auoit de la risée & de la gaudisserie parmy, comme vne faulx de mauuais goust parmy de bonnes viandes, tout cela rendoit inutile & vaine leur franchise de parler, & n'en demouroit sinon la reputation de malignité & de dangereuse & mauuaise langue à ceux qui les disoient, & nul profit à ceux qui les escoutoient. Ce sera doncques ailleurs qu'il faudra vser de risée & de ieu enuers ses amis: mais la franchise de parler en faisant remonstrance, soit toute serieuse, & montrant toute bonne intention, & toute douce nature: mais si c'est touchant affaires de grand pois, la parole soit telle, & en affection, & en geste, & en vehemence de la voix, qu'elle se face croire, & qu'elle emeue celuy à qui elle sera adreesee. Au demourant le poinct de l'occasion en toutes choses estant oublié & omis, apporte grande nuisance, mais sur tout oste-il toute l'vtilité & l'efficace de la remonstrance, Or est il tout manifeste, qu'il se faut bien garder d'en vser à table où lon est ensemble pour faire bonne chere, car il amene en temps serein des nuées celuy qui entre les ioyeux & plaisans deuis de table met en auant des propos qui font froncer les sourcils, & rider le visage, comme se voulant opposer au Dieu qui est à bon droit appelé Lyæus, pour autant qu'il deslie les fascheux liens des soucis & ennuis, comme dit Pindare: & puis ceste importunité porte quand & soy vn grand peril, pour ce que noz ames eschauffees de vin sont fort faciles à fallumer de cholere, & aduient souuent que quand apres boire on se cuide mesler de faire remonstrance, on engendre des inimitiez tres-grandes. Bref ce n'est point fait en homme genereux & de courage assure, ains craintif & paoureux, de n'oser hors de table franchement parler, & apres boire s'entremettre de librement remonstrer, comme les chiens couards, qui ne grongnent iamais sinon tandis que lon est à table: pourtant n'est-il ia besoing d'allonger ce propos d'auantage. Mais pour autant que plusieurs ne veulent ny n'osent redresser leurs amis quand ils faillent, pendant qu'ils sont en prosperité, & estiment que la remonstrance ne doit approcher ny ne peut atteindre à la felicité, & puis quand ils ont bronché, ou qu'ils sont tombez, alors ils leur courent sus, & les foulent aux pieds, par maniere de dire, les tenant sous leur main prosternez en terre, en laissant aller tout à vn coup leur liberté de tanfer, comme vn eau retenue par force contre nature, & sont bien aises de iouir de ceste occasion de changement de fortune pour l'arrogance de leurs amis, qui par auant les mesprisoient, & pour leur imbecillité aussi: Il ne sera pas impertinent d'en discourir vn petit, & respondre à Euripides qui dit,

En la Tragédie de Mécuba.

Quand lon est bien, qu'a lon besoin d'amis?

Car c'est principalement à ceux qui ont fortune à leur commandement, que les amis parlans librement sont necessaires, pour leur rabatre vn peu la hautaineté de cœur que la prosperité leur apporte, pour ce qu'il y en a bien peu qui en felicité retiennent le bon sens, & la plus part ont besoing de sagesse empruntée, & de raison venant d'ailleurs pour les abbaissier & affermir quand ils sont enflés ou esbranlez par les faueurs de la fortune: car quand la fortune vient à oster la grandeur & l'autorité, alors les affaires mesmes apportent quand & eux vn chastiment accompagné de repentance: & pourtant n'est-il lors point besoing d'amy qui remonstre librement, ny de paroles graues & poignantes, ains en telles mutations certainement,

L'homme affligé grandement se soulage,

Quand il peut voir son amy au visage,

Sur la fin du 1. liure de l'expédition de Cyrus.

qui le console, & qui le reconforte, comme Xenophon escrit qu'és batailles, au plus fort des dangers, quand on voyoit la face riante & guaye de Clearchus, cela donnoit plus grand courage à ceux qui combattoient: là où celuy qui fait à vn homme affligé de la fortune vne remonstrance aspre & mordante, c'est ne plus ne moins que qui appliqueroit à vn œil trauaillé & enflammé de fluxion vne drogue propre à esclaircir la veuë, car il ne le guariroit point, ny ne luy diminueroit aucunement sa douleur,

- A leur, mais il adiousteroit courroux à son mal, & luy régregeroit son tourment. Quand l'homme est sain ordinairement il n'est pas si hargneux, ny tant impatient qu'il ne veuille aucunement prester l'oreille à vn sien amy, qui le reprendra de ce qu'il fera trop subiect aux femmes, ou au vin, ou qui le blasmera de paresse, & de ce qu'il ne fera pas assez d'exercice, ou qu'il ira trop souuent aux estuues, ou qu'il mangera trop, & à heures indeuës: là où lors que lon est malade, c'est chose insupportable, & qui engrege le mal, que d'ouïr, Ceste maladie vous est venue de trop boire, ou de paresse, ou de trop manger, ou de trop hanter les femmes. O la grande importunité! he deà mon amy, ie fais mon testament, & les medecins me preparēt vne medecine de Castorium, ou de Scammonee, qui sont celles que lon donne à l'extremité, quand il n'y a plus d'autre esperance, & tu me viens icy amener des raisons de Philosophie, & me faire des remonstrances! Ainsi est-il des affaires de ceux à qui la fortune court sus, car ils ne reçoient point d'aspres remonstrances, ny de graues sentences, ains ont besoing d'aide
- B & de secours: comme les nourrices, quand leurs petits enfans sont tombez, ne courēt pas les battre & iniurier, ains vont premierement les releuer, & les lauer, nettoyer & raccoustrer, & puis apres elles les tansent, & les chastient. Auquel propos on recite que Demetrius le Phalerien estant banny de son pais, & s'estant retiré en la ville de Thebes, ne veit pas volontiers de prime face le Philosophe Crates, qui l'alla visiter, d'autant qu'il fattendoit qu'il luy deust dire quelques paroles aspres, fascheuses, & picquantes, en vsant de la liberté de parler que vsurpoient alors les Philosophes Cyniques: mais quand il l'eut ouy parler modestement, & discourir doucement de l'exil, qu'il n'apportoient rien de miserable, ne pourquoy on se deust griefuement tourmenter, & que plus tost au contraire, il l'auoit deliuré de la charge & du maniment d'affaires fort muables & fort dangereux, & quant & quant l'admonester de remettre tout son confort en soy mesme, & en sa bonne conscience, il en fut tout resiouy, & reprenant courage, il dit en se tournant deuers ses amis, Maudits soient les affaires & les fascheuses occupations qui m'ont engardé de cognoistre & pratiquer vn tel homme.
- C

Le doux parler d'un amy consolant

A l'homme plaist qui a le cœur dolent:

Mais remontrer à vne teste folle,

C'est perdre temps, sa peine, & sa parolle.

telle est la façon des amis genereux: mais les autres de cœur bas flatent leurs amis pendant qu'ils ont la fortune propice, & comme dit Demosthenes, que toutes les vieilles rompures & denouures s'esmeuent en nostre corps soudain qu'il luy aduient quelque nouveau mal, aussi eux s'attachent aux changemens de la fortune, comme fils en estoient bien aises, & qu'ils en eussent plaisir: car, encore que l'affligé eust aucunement besoing qu'on luy ramenast en memoire sa faulte, pour laquelle il seroit tombé en cest inconuenient par auoir fuiuy mauuais conseil, il suffiroit de luy dire,

- D Ce n'a iamais esté de mon aduis,

Je vous ay fait, contre, plusieurs deuïs.

En quelles occurrences doncques est-ce, que le vray amy doit estre vehement? & en quel temps doit-il renforcer la voix de sa remonstrance? C'est quand l'occasion se presente, de retenir vne volupté qui se desborde, de reprimer vne cholere qui sort hors des gonds, & de refrener vne insolence qui se laisse trop aller, ou d'empescher vne auarice, ou d'arrester quelque fol mouuement. Ainsi parla librement Solon à Cræsus, le voyant enflé & enorgueilluy pour l'opinion d'une felicité incertaine qu'il auoit, l'aduertissant, qu'il falloit attendre quelle en seroit la fin: Ainsi Socrates rongna les aëles à Alcibiades, & luy fit venir les larmes vrayes aux yeux, en le reprenant, & luy mettant sans dessus dessous l'entendement: telles estoient les remonstrances de Cyrus à Cyaxares, & celles de Platon à Dion, lors qu'il estoit en la plus grande

En la 2.
Olynth.

Homere au
9. de l'Illiade.

Comment on pourra discerner

fleur de ses prosperitez, & que les yeux de tous les humains estoient tournez sur luy, E pour la grandeur & l'heureux succès de ses affaires, en l'admonestât de se donner garde de l'arrogance, comme de celle qui demouroit avec solitude, c'est à dire qui en fin estoit abandonnée de tout le monde : aussi luy escrivit Speusippus, qu'il ne presumast point de foy, pourtant si iusques aux femmes & aux enfans on ne parloit que de luy : mais qu'il regardast de si bien orner la Sicile de religion & de pieté enuers les Dieux, de iustice & de bonnes loix enuers les hommes, que l'eschole de l'Academie en demourast à iamais honoree. A l'opposite, Euctus & Eulaus deux familiers amis du Roy Perseus, luy aians tousiours compleu en toutes choses, tandis que la bonne fortune luy auoit duré, & aians tousiours applaudy & consenty à toutes ses volonte, comme ses autres courtisans, apres qu'il eut perdu la bataille pres la ville de Pidne contre les Romains, ils se ietterent sur luy à grosses paroles, à le reprendre ameremēt, en luy reprochant les fautes qu'il auoit faictes, & les hommes qu'il auoit mal traitez, ou mesprizez, iusques à ce qu'ils l'irriterent si fort, que transporté de douleur & de courroux, il les tua tous deux sur le champ à coups de poignard. Voyla le poinct de l'occasion, à le definir vniuersellemēt: mais au demourant, il ne faut pas reietter celles qu'eux mesmes nous presentent, si nous auons soing de leur bien, ains s'en seruir & les embrasser promptemēt: car bien souuent vne interrogation, ou vne narration, ou vn blasme de semblables choses en autres personnes, ou vne louange, nous ouurent la porte pour entrer en libre remonstrance, comme lon dit que Demaratus le Corinthien feir vn iour, venant de Corinthe en Macedoine, du temps que Philippus estoit en querelle à l'encontre de sa femme & de son fils: Car l'ayant le Roy saluē & embrassē, il luy demanda incontinent si les Grecs estoient bien d'accord les vns avec les autres. Demaratus, qui estoit son amy, & bien priuē de luy, luy respondit, Vrayement il te sied bien, Sire, de t'enquerir de la concorde des Atheniens & des Peloponnesiens, & ce pendant laisser ta maison ainsi pleine de diuision & de dissension domestique. Aussi feir bien Diogenes, lequel estant allē au camp de Philippus lors qu'il venoit pour faire la guerre aux Grecs, fut surpris & menē deuant luy. Le Roy ne le cognoissant pas, luy demanda, si luy estoit pas vne espie: ouy certainement, luy respondit-il, ie suis espie voirement, qui suis venu pour espionner ton imprudence, & ta folie, veu que sans estre contraint de personne, tu viens icy mettre sur le tablier au hazard d'une heure, ton Royaume & ta propre vie avec. Mais cela fut à l'aduenture vn peu trop vehement. Il y a vne autre temps propre pour faire remonstrance, qui est, quand ceux que nous voulons reprendre, aians esté reprochez par d'autres des fautes qu'ils commettent, en sont tous raualez, retirez, & rabbaissē: de laquelle occasion l'homme de bon entendement se seruiroit bien à propos en reboutant en public, & repoussant ces iniurieux là, & puis apres prenant à part son amy, & luy ramenteuant que quand nous ne deuriens prendre garde à viure correctement pour autre cause, encore le deussions nous faire, au moins à fin que noz ennemis & malueillans n'eussent point d'occasion de se leuer insolentement encontre nous. Car dequoy pourront ils ouuir la bouche pour mesdire de toy, que te pourront ils reprocher, si tu veux ietter arriere & laisser ce que maintenant ils t'obiectent? par ce moien la pointure de ce qui offense est reiettee sus celuy qui a dit iniure, & l'utilité de la remonstrance attribuee à celuy qui donne l'aduertissement. Il y en a d'autres qui le font encore plus galantemēt, & en parlant d'autres admonestent leurs familiers: car ils accusent des estrangers en leur presence des fautes qu'ils scauent bien qu'eux commettent. Comme nostre maistre Ammonius, l'apperceuant à sa leçon d'apres disner, que quelques vns de ses disciples & familiers auoient disné plus amplement qu'il n'estoit conuenable à des estudiants, commanda à vn sien seruiteur affranchy qu'il luy fouētast son propre fils, Il ne scauroit, dit-il, disner sans vinaigre: En disant cela, il ietta l'œil sur nous, de sorte que ceux qui en

- A qui en estoient coupables, sentirent bien que cela s'adressoit à eux. D'auantage il faut bien prédre garde de n'vser pas de ceste libre façon de remōstrer deuant plusieurs personnes, attendu ce qui en aduint à Platon : car comme vn iour Socrates se fust attaché vn peu vehementemēt à quelqu'vn de ses familiers, deuant tous ceux de la maison, en pleine table, Platon ne se peut tenir de luy dire, Ne vaudroit il pas mieux que
 „ cela eust esté dict à part en priué ? Socrates luy respondit tout sur l'heure : Mais toy-
 „ mesme, n'eusses tu pas mieux fait de me dire cela en priué ? Et Pythagoras, à ce que lon dit, f'estant attaché de paroles fort asprement à vn de sa cognoissance en la presence de beaucoup de gens, le ieune homme en eut si grand regret & si grand honte, qu'il se pendit. Depuis lequel iour iamais il n'aduint à Pythagoras de tanfer homme en presence d'vn autre: car il faut que d'vn peché, comme d'vne maladie honteuse, la decouuerture & la correction soit secrette, non pas publique, & n'en faire pas vne mōstre & vn spectacle commun à la veuē de tout vn peuple, en y appellant des tesmoings
 B & des spectateurs: car cela n'est pas fait en amy, mais en Sophiste, qui ne quiert que l'apparence, & veut chercher sa gloire és fautes d'autrui, pour en faire ses monstres deuant les assistans: comme les Chirurgiens qui font les operations de leur art en plein theatre, pour auoir plus de pratique: mais outre ce qu'il y auroit infamie pour celuy qui seroit ainsi repris, laquelle ne doit estre en nulle cure ne guerison, encore faut-il auoir esgard au naturel du vice, lequel de soy-mesme est opiniastre & contentieux à se defendre: car ce n'est pas simplement l'amour, comme dit Euripides,

Plus on reprent l'amour, & plus il presse.

- Car quelque vice que ce soit, & quelque imperfection, si vous en arguez publiquemēt & deuant tout le monde vn homme, sans l'espargner ne luy rien celer, vous le rendrez à la fin eshonté. Tout ainsi doncques comme Platon commande, que les vieillards, qui veulent imprimer la honte aux ieunes enfans, aient eux mesmes les premiers honte deuant les enfans: aussi la remonstrance d'vn amy qui est elle mesme honteuse, fait grande honte à son amy: & quand douteusement, avec crainte, & peu
 C à peu elle vient à approcher & toucher le faillant, elle sappe & mine petit à petit son vice, en remplissant de honte & de reuerence celuy, qu'elle mesme doute d'aborder de honte: & pourtant sera il tousiours tresbon, en telles reprehensions, d'observer ce precepte,

Bas en l'oreille, à fin qu'autres ne l'oyent.

- Encore est il beaucoup moins conuenable de descouurir la faute d'vn mary deuant sa femme, ou d'vn pere deuant ses enfans, ou d'vn amoureux deuant ses amours, ou d'vn maistre deuant ses disciples: car ils sortēt hors d'eux mesmes, & perdent patience, tant ils sont courroucez & marris de se voir reprendre deuant ceux, dont ils desirent estre bien estimez. Et m'est aduis, que ce ne fut pas tant le vin qui irrita mortellement Alexandre contre Clitus, comme ce qu'il luy sembla qu'en presence de beaucoup de
 D gens il le regentoit. Et Aristomenes precepteur de Ptolomeus, pource que en presence d'vn ambassadeur il l'esueilla, qu'il sommeilloit, & le feit estre attentif à ce qui
 „ se disoit, il donna prise sur luy à ses mal-veuillans & flatteurs de court, qui faisoient
 „ semblant d'estre marris pour le Roy, & disoient, Si apres tant de trauaux que vous
 „ supportez, & tant de veilles que vous endurez, le sommeil vous surprend quelquefois,
 „ nous vous en deuons bien aduertir à part en priué, non pas mettre la main sur vostre
 „ personne en presence de tant de gens. Le Roy émeu de ces paroles, luy enuoya vne coupe pleine de breuuage empoisonné, avec commandement de la boire toute. Aristophane mesme dit, que Cleon luy tournoit cela à crime,

Qu'il mesdisoit de la ville d'Athenes,

Deuant plusieurs de regions loingtaines.

& par là taschoit à irriter les Atheniens à l'encontre de luy. Et pourtant se faut il dili-

Odyss.liii.1.

En la Comedie des Cheualiers.

Comment on pourra discerner

gemment donner garde de cela, entre autres observations, que lon ne face ces remon- E
strances par maniere d'ostentation ne de vaine gloire, ains seulement en intention que
elles soient vtilles & profitables: mais outre cela, ce que Thucydides fait dire aux Co-
rinthiens d'eux mesmes, qu'à eux appartenoit de reprendre les autres, n'estant pas mal
dit, doit estre en ceux qui se meslent de reprendre & corriger les autres. Car comme
Lyfander respondit à vn Megarien qui s'auançoit de parler hautement & librement
pour la liberté de la Grece, en vne assemblee de conseil des allies & confederez, Ces
propos là, mon amy, auroient besoing d'une puissante cité: aussi pourroit on dire à
tout homme qui se mesle de parler librement pour reprendre autrui, qu'il a besoing de
mœurs bien reformees. Cela est tresveritable de tous ceux qui s'entremettent de vou-
loir chastier & corriger les autres, ainsi que Platon disoit, qu'il corrigeoit Speusippus
par l'exemple de sa vie. Et tout de mesme Xenocrates iettant son oeil sur Polemon
qui estoit entré en son eschole en habit dissolu, de sa veuë seule le changea & le refor-
ma tout: là où vn homme leger ou mal conditionné, qui se voudroit ingerer de re- F
prendre les autres, oyroit incontinent qu'on luy mettroit deuant le nez,

Tout vlcéré il veut guarir les autres.

Ce neantmoins, pour autant que les affaires mesmes nous meinent bien souuent à re-
prendre les autres, qui ne valent pas mieux que nous, ny nous aussi gueres mieux
qu'eux, le plus honeste & le plus dextre moien de le faire, en ce cas, est, quand celuy
qui remonstre & reprunt s'enveloppe luy-mesme, & se comprend aucunement en ce
dont il accuse les autres: comme en Homere,

*Iliad. liu. 3.
& 11.*

Diomedes, d'où nous vient ce defastre,

Que nous auons oublié à combattre?

Et en vn autre passage,

Nous ne valons tous pas vn seul Hector.

Et Socrates arguoit ainsi tout bellement les ieunes gens, comme n'estant pas luy-
mesme deliuré d'ignorance, ains aiant besoing d'estre avec eux instruit de la vertu, &
de rechercher la cognoissance de la verité: car on aime, & adioustel on foy à ceux G
que lon estime estre subiects à mesmes fautes, & vouloir corriger ses amis comme
foy-mesme, là où celuy qui espanouit ses eies en rongnant celles d'autrui, comme,
estant homme net & sincere, sans aucune passion, si ce n'est qu'il soit beaucoup plus
aagé que nous, & qu'il n'ait acquis vne autorité de vertu & de gloire toute notoire &
confessée de tous, ne gaigne ny ne profite autre chose, sinon qu'il se fait reputer im-
portun & fascheux: pourtant n'est ce pas sans cause que le bon homme Phœnix, en
prieant Achilles, luy allegue ses infortunes, comme il auoit vn iour esté pres de tuer son
pere par vne soudaine cholere, mais que incontinent il s'en estoit repenty,

Iliad. liu. 9.

Pour n'encourir ce villain impropere

Entre les Grecs, d'auoir tué mon pere:

ains le fait à fin qu'il ne semble qu'il le reprenne bien à son aise, n'ayant iamais esprouué
quelle force a la passion de cholere, & comme s'il n'eust iamais esté subiect à faillir: H
car ces façons là de reprendre nous entrent plus affectueusement dedans le cœur, &
nous y rendons nous plus volontiers, quand il nous semble qu'on les nous fait par
compassion, & non pas par mespris. Mais pour ce que ny l'œil enflammé ne reçoit vne
claire lumiere, ny l'ame passionnée vn parler franc, ny vne reprehension toute crue,
vn des plus vtils secours & remedes que lon y sçauroit trouuer, seroit d'y meller
parmy quelque peu de louanges: comme en ces passages d'Homere,

Iliad. liu. 13.

Vous n'avez plus à cœur l'honneur des armes,

Quoy que soyez les plus vaillans gendarmes

De tout le camp: aussi iamais tanfer

Je ne voudrois, pour le combat laisser,

Vn que ie sçeusse auoir courage lasche:

Mais

- A Mais contre vous à bon droict ie m'en fasche. Et ailleurs,
Où est ton arc, Pandarus, & où font
Tes traicts elez qui l'honneur donné t'ont,
Qu'en ce pais nul n'est qui comparer
Se peüst à toy, pour iustement tirer?

Aussi certainement retiennent & reuocquent merueilleusement ceux qui se laissent aller, ces obliques manieres de reprendre:

- Où est le sage Oedipus à ceste heure?
Où font ses beaux enigmes leur demeure? Et cest autre,
Cest Hercules qui tant a enduré,
Vn tel propos a il bien proferé?

- B Car cela n'adoucit pas seulement l'aspreté de la reprehension & de la iussion, ains engendre vne emulation enuers soy-mesme, luy faisant auoir honte des choses laides & deshonestes, par la recordation des belles & honestes qu'il a autrefois faites, en prenant de soy-mesme exemple de mieux faire: car quand nous luy en comparons d'autres de ses citoiens ou de ses compagnons egaux en aage, ou mesme de ses parents, alors le vice, qui de soy-mesme est opiniastre, reuesche & contentieux, s'en ennuye & s'en courrouce, & respond souuent tout bas entre ses dents, Que ne vous en allez vous doncques à ceux là qui valent mieux que moy, & que vous ne me laissez en paix, sans me plus fascher? Pourtant se faut il bien garder, quand on reprend, ou que lon remonstre librement à quelqu'un, que lon ne louë d'autres en sa presence, si d'adventure ce ne sont ses peres, comme fait Agamemnon,

Tydeus a engendré de son germe

Vn fils qui n'a comme luy le cœur ferme.

& Vlysses, en la Tragédie intitulee les Scyriens, parlant à Achilles,

Toy qui es fils du plus vaillant guerrier

- C Qui ceignit onc espee ne baudrier
En toute Grece, à filler la fillace
Esteindras tu la gloire de ta race?

Ce seroit bien au demourant chose fort mal-seante quand on se sentiroit admonesté d'un amy, ou remonstré franchement, vouloir vser d'admonestement & de remonstration au contraire enuers luy: car cela enflamme soudain les courages, & engendre bien souuent grande contention: & en effect ce debat là ne sentiroit pas la reciprocation de remonstration contre remonstration, mais plus tost son cœur selon, qui ne pourroit supporter qu'on luy feist aucune remonstration: & pourtant est il beaucoup meilleur supporter patiemment vn amy qui nous remonstre, car s'il aduient puis apres qu'il faille luy-mesme, & qu'il ait besoing de remonstration, cela donne, par maniere de dire, liberté à la liberté de remonstrer: car en luy ramenant en memoire, sans aucune

- D pique ny aigreur du passé, que luy-mesme souloit ne mettre pas en nonchaloir ses amis, quand ils s'oublioient, ains prenoit bien la peine de les redresser, & les instruire & enseigner, il se rendra plus facilement, & receura la correction, comme estant vne pareille de bien-veillance & de grace, non pas de plainte ny de courroux. D'auantage Thucydides escrit, que celuy est sage & bien aduisé qui reçoit enuie, & se fait enuier pour de tres-grandes occasions: aussi fault il dire, que le sage amy reçoit la male grace que lon acquiert à corriger les autres pour causes de grand pois & de bien grande importance: car si pour toutes choses, & contre tous il se fasche, & qu'il ne se porte pas enuers ses familiers comme amy doucement, ains comme pedagogue & regent imperieusement, il se trouuera puis apres mouffe, & de nul effect, quand il cuedera remonstrer & corriger es choses de bien grande consequence, pour auoir vſé de la remonstration, ne plus ne moins que le Medecin qui employroit vne drogue de

Comment on pourra discerner

medecine forte & amere, mais necessaire, & qui cousteroit beaucoup, en plusieurs E
menues maladies & non necessaires : parquoy il se gardera de faire ordinaire de cor-
riger & de monstrier d'estre de trop pres reprenant : & si d'adventure il a quelque sien
amy hargneux, querellant facilement, & calumniant toutes choses, ce luy sera vne
anse pour le reprendre luy-mesme, quand il viendra à faillir en plus lourdes fautes.
Le Medecin Philotimus dit vn iour à quelqu'un qui estoit suppuré, & plein d'apo-
stumes dedans le corps, & luy monstroient vn panaris qu'il auoit à la racine de l'ongle
d'un de ses doigts, Mon amy, ton mal n'est pas au bout de ton ongle. Aussi le temps
apportera à vn sage amy occasion de dire à l'autre, qui reprendra à tous coups des
choses petites & legeres, comme, qu'il fera vn peu subiect à iouer, ou à faire bonne
chere, ou quelques telles brouilleries : Mon amy, trouuons moyen seulement qu'il
mette dehors sa garse, & qu'il ne ioue plus aux dez, car au demourant c'est vn homme
qui a de belles & grandes parties : car celuy qui sent qu'on luy pardonne de legeres
fautes, endure patiemment que son amy prenne la liberte de le reprendre hardiment F
des lourdes & grosses : mais celuy qui est pressant par tout, aspre & fascheux, qui s'en-
quierit curieusement, & recherche tout, il n'est pas supportable à ses propres enfans
mesmes, ny à ses freres, ains est intolerable iusques à ses seruiteurs. Mais pource que,
comme dit Euripides,

En la Tra-
gedie des
Phoenissien-
nes,

Les maux ne sont pas tous en la vieillesse :
aussi ne sont pas tous les vices en noz amis, & les fault obseruer diligemment, non
seulement quand ils sont mal, mais aussi quand ils sont bien, & alors les louer affe-
ctueusement en premier lieu, & puis faire comme ceux qui trempent le fer, apres
qu'ils l'ont amolli & attendry par le feu, ils le baignent en quelque humeur froide,
dont il prent la dureté & la trempe : aussi quand nous verrons que noz amis seront
eschauffez & destrempez des louanges que nous leur aurons donnees, il leur faut
adonc bailler, comme la trempe, vne libre reprimende & remonstrance de leurs faul-
tes. Alors sera il temps de leur dire, Ces actes cy sont ils dignes d'estre comparez à G
ceux-là ? voiez vous la vertu quels fructs elle produit ? Voila que c'est que nous, qui
sommes voz amis, demandons de vous. Ces offices cy sont propres à vous : vous estes
né pour cela : mais ces autres là,

Ietter les faut en vn mont solitaire,

Ou en la mer qui ne cesse de braire.

Car tout ainsi comme le prudent Medecin aimera tousiours mieux guarir la maladie
d'un sien patient par vn dormir, ou par vne maniere de diete & de nourriture, que par
vn Castorium ou vne Scammonce : aussi vn amy honeste, vn bon pere, vn maistre gra-
cieux sera tousiours plus aise de louer, que de blasmer, pour reformer des mœurs : car il
n'y a rien qui face que celuy qui remonstre offense moins, & qu'il profite plus, que, sans
se courroucer, doucement avec affection & bien-veillance s'adresser à ceux qui
faillent. Pourtant ne fault pas asprement les conuaincre quand ils nient le faict, ny H
les empescher quand ils y veulent respondre pour se iustifier, ains plus tost leur sub-
ministrer aucunement quelques honestes couuertes & excuses : & quand on voit
qu'ils se reculent de la cause qui pourroit estre la pire de leur forfait, leur ceder aussi
plus gracieusement, comme fait Hector à son frere Paris,

Iliad. liu. 6.

O Malheureux, ce ne t'est point d'honneur

Que tu as mis ce courroux en ton cœur.

Comme si sa retraicte du combat d'homme à homme, contre Menelaus, n'eust pas
esté fuitte ny lascheté de cœur, mais seulement vn despit : autant en dit le bon vieillard
Nestor à Agamemnon,

Iliad. liu. 9.

Tu as cédé à ton cœur magnanime :

Car il est plus doux & plus gracieux à mon aduis de dire, tu n'y pensois pas : ou, tu ne
le

A le ſçauois pas : que de dire , c'eſt meſchamment fait à toy: ou , cela eſt villain & deſhonneſte: &, ne conteſte point à l'encontre de ton frere, eſt plus doux, que, ne porte enuie à ton frere: & plus ciuil de dire, fuy ceſte femme qui te gaſte, que, ceſſe de corrompre ceſte femme. Voyla le moyen dont doit vſer la franchise de parler d'un amy pour curer la maladie ja aduenuë, mais pour le preuenir, tout au contraire: car quand nous le voudrons deſtourner de commettre vne faute, dont il ſera tout preſt, ou nous oppoſer à quelque impetuofité de volonté deſordonnee qu'il aura , ou le pouſſer & eſchauffer, là où nous le ſentirons trop froid & trop mol, il faudra transferer le faiçt aux plus enormes & plus vilaines cauſes que nous pourrons, comme fait Vlyſſes pour aiguillonner Achilles en vne Tragédie de Sophocles: car il dit, Ce n'eſt pas pour le ſoupper Achilles, que tu te courrouces,

Mais tu as peur, comme deſia voyant
Les murs de Troye.

B Et comme derechef Achilles ſe courrouceaſt encore de plus en plus pour ces paroles là, & diſt que par deſpit il ne ſ'embarqueroit point, & ne feroit point le voyage, Vlyſſes luy reſpond,

Je ſçay que c'eſt que tu fuis, ce n'eſt mie,
Que tu ayes peur d'encourir infamie,
Mais c'eſt qu'Hector n'eſt guere loing d'icy:
Du courroucé fait-il bon faire ainſi.

Par ce moyen celuy qui eſt vaillant & hardy, en luy mettât au deuant la crainte d'eſtre tenu pour laſche & couard: celuy qui eſt honneſte, & chaſte, d'eſtre reputé paillard & diſſolu: celuy qui eſt liberal & magnifique, d'eſtre eſtimé auaricieux & meſanique: on les incite à bien faire, & les diuertit-on de mal faire: auſſi faut-il eſtre moderez quâd ce ſont choſes faites, où il n'y a point de remede, tellemēt que la remonſtrance monſtre que le reprenant ait plus de deſplaiſir & de cōpaſſion de la faute de ſon amy, que non pas d'aigreur à le reprendre: mais où il eſt queſtion de les garder qu'ils ne faillent, & de combattre contre leurs violentes paſſions, il faut là eſtre vehemens, aſſidus, & inexorables, ſans leur rien pardonner: car c'eſt là proprement le poinçt de l'occafion, où ſe doit monſtrer l'amitié non feinte, & la franchise de remonſtrer veritable: car de blaſmer les choſes faites & paſſees, nous voyons que les ennemis meſmes en vſent les vns contre les autres. Auquel propos Diogenes ſouloit dire, que pour garder vn homme d'eſtre meſchant, il faut qu'il ait ou de bons amis, ou de vehemens & aſpres ennemis: car les vns l'enſeignent à bien faire, les autres le ſyndiquent ſils le voyent mal faire. Or vaut il beaucoup mieux ſ'abſtenir de mal faire en croiant au bon conſeil de ſes amis, que ſe repentir d'auoir mal fait pour ſ'en voir accusé & blaſmé par ſes ennemis. Parquoy ne fuſt-ce que pour cela il faut vſer de grâde prudence & de grande circonſpection à faire remonſtrances & parler librement à ſes amis, d'autant que c'eſt la plus grande & la plus forte medecine, dont puiſſe vſer l'amitié, & qui a plus beſoyn d'eſtre donnee en temps & en lieu, & plus ſagement temperee d'une meſure & mediocrité. Et pour autant, comme nous auons ja dit pluſieurs fois, que toute remonſtrance & reprehension eſt douloureuse à celuy qui la reçoit, il faut imiter en cela les bons medecins & chirurgiens: car quand ils ont incisé quelque membre, ils ne laiſſent pas la partie dolente en ſa douleur & en ſon tourment, ains vſent de quelques fomentations ou infuſions lenitiues: auſſi celuy qui aura fait la remonſtrance dextrement, apres auoir donné le coup de la pointure ou morſure, ne ſ'en fuira pas incontinent, ains en changeant d'autres entretenements & d'autres propos gracieux, addoucira & reſiouira celuy qu'il aura contriſté: ne plus ne moins que les tailleurs d'images & ſculpteurs, quand ils ont rompu ou frappé trop auant quelque partie d'une ſtatue, ils la poliſſent & la luſtrent puis apres: mais celuy qui a eſté attainçt

Comment il faut refrener la cholere.

au vif, & defchiré d'une remonſtrance, ſi on le laiſſe ainſi tout bruſque, enflé & emeu **E** de cholere, il eſt puis apres difficile à remettre & à reconforter. Pourtant faut-il, que ceux qui veulent reprendre & admoneſter leur amis, obſeruent diligemment ce poinct là ſur tous autres, de ne les abandonner pas incontinent apres les auoir tanſez, ny ne terminer pas tout court leurs propos & leurs deuis par l'aigreur de la pointure & picqueure qu'ils leur auront donnée.

De la Manſuetude, Comment il faut refrener la

CHOLERE, EN FORME DE DEVIS,

Les perſonnages deuifans, Sylla & Fundanus.



SYLLA. Il me ſemble, Seigneur Fundanus, que les peintres font ſagement, de contempler à pluſieurs fois, par inter- **F** ualles de temps, leurs ouurages, auant que les tenir pour acheuez : pource qu'en eſloignant ainſi leurs yeux d'iceux, & puis les ramenant ſouuent pour en iuger, ils les rendent comme nouueaux iuges, & plus aptes à toucher iuſques aux moindres & plus particulieres faultes, leſquelles la continuation, & accouſtuman- ce de voir ordinairement vne choſe, nous couure & cache. Mais pourautant qu'il n'eſt pas poſſible qu'un homme ſ'eſloigne de ſoy-meſme, & puis ſ'en rapproche par interuallles, ne qu'il interrompe la continuation de ſon ſentiment, ainſi eſt ce qui fait que chaſcun eſt pire iuge de ſoy-meſme que des autres: le ſecond remede qu'il y auroit en cela, ſeroit de reuoir ſes amis par interuallles, & auſſi ſe bailler ſemblablement à viſiter à eux, non ſeulement pour regarder ſi lon eſt toſt enuieilly, ou ſi le corps ſe porte pis ou mieux que parauāt, mais auſſi pour cōſiderer les mœurs & les façons de faire, à ſçauoir **G** ſi le temps y auroit point adiouſté quelque choſe de bon, ou oſté quelque choſe de mauuais. Quāt à moy dōc. y aiant ia deux ans que ie ſuis arriué en ceſte ville de Rome, & ceſtuy eſtant le cinquieme mois que ie demeure avec toy, ie ne trouue pas eſtrāge, veu la gentilleſſe & dexterité de ta nature, que aux bonnes parties qui ia eſtoiet en toy, il y ait vne acceſſion & accroiſſement ſi grand : mais voiant comme celle vehemence & ardente impetuoſité de cholere qui eſtoit en toy, eſt maintenāt addoucie & rendue obeiſſante à la raiſon, il me vient en penſée de dire ce qui eſt en Homere,

Iliad. l. 22.

O Dieux, combien ton ire eſt amollie!

Mais ceſt amolliſſement & addouciſſement là ne procede pas ny d'une pareſſe, ny d'une reſolution de la vigueur du corps, ainſi comme vne terre bien labouree prent du labourage vne egalité & profonde iauge qui profite à la fertilité : auſſi a ta nature vne prudence egale & profonde, vtile à manier affaires, au lieu de l'impetuoſité & **H** ſoudaineté qu'elle auoit au parauant: dont il appert que ce n'eſt point par un declinement de la vigueur corporelle qui ſe paſſe, à cauſe de l'aage, ny fortuitement, que ta cholere ſe ſoit paſſee & ſenee, ainſi par aucunes bonnes remonſtrances & raiſons qu'elle ait eſté guarie: combien que, pour te dire la verité, ie ne le pouuois pas du commencement croire à Eros noſtre familier amy, qui m'en faiſoit le rapport, aiant doute & ſouſpeçon, qu'il ne preſtaſt ce teſmoignage à l'amitié qu'il te porte, de m'aſſeurer que les bonnes parties, & qui doiuent eſtre en toutes gens de bien & d'honneur, fuſſent en toy, qui n'y eſtoient pas: encore que tu ſaches aſſez, qu'il n'eſt pas hōme qui en faueur de perſonne, pour luy complaire, ſoit pour dire autrement qu'il en penſe. Or maintenant le tiens- ie pour totalement abſouls du crime de faux teſmoignage: & pource que le cheminer t'en donne le loyſir, ie te ſupplie de nous raconter

A conter la maniere de la medecine dont tu as vſé à rendre ta cholere ainſi ſoupple, ainſi douce, ſubiecte & obeiffante entierement à la raifon. F V N D A N V S. Mais ne regardes-tu pas toy meſme, cher amy Sylla, que à l'occaſion de l'amitié & bien veuil- lance que tu me portes, tu ne cuydes veoir en moy vne choſe pour l'autre: car quant à Eros, qui luy meſme n'a pas touſiours ſon courage & ſa cholere arreſtée au chable de l'ancre que dit Homere, ains quelquefois ſ'eſcarmouche aſſez aſprement, pour la haine qu'il a contre les meſchans, il eſt vrayſemblable qu'il me trouue plus doux, ainſi comme és muances de la game, en la muſique, telle note qui eſt la plus baſſe, en vne octaue, eſt la plus haute au regard d'une autre. S Y L L A. Ce n'eſt ny l'un ny l'autre: mais fay ce que ie te requier pour l'amour de moy. F V N D A N V S. Puis que ainſi eſt Sylla, l'un des meilleurs aduertiffements du ſage Muſonius, dont il me ſou- uiene, eſt, qu'il ſouloit dire, Qu'il faut que ceux qui ſe veulent ſauuer, ne facent autre
choſe toute leur vie, que ſe curer & nettoyer. Non pas qu'il faille ietter hors la raifon
B avec la maladie, apres qu'elle a acheué la cure & guarifon, comme l'hellebore, ains faut que demourant en l'ame elle contregarde, & conſerue le iugement: pour ce que la raifon ne reſſemble pas aux drogues medecinales, mais plus toſt aux viandes ſalu- bres, engendrant és ames de ceux à qui elle eſt familiere vne bonne complexion, & habitude avec la ſanté: là où les aduertiffements & remonſtrances que lon fait aux paſſions, lors qu'elles ſont en la force de leur enſleure & inflammation, produiſent bien quelque effect, mais lentement & à grand peine, reſſemblans proprement aux odeurs, leſquelles ſont bien reuenir ſur l'heure ceux qui ſont tombez du hault mal, mais elles ne guariffent pas pour cela la maladie: encore toutes les autres paſſions de l'ame, ſur le poinct meſme qu'elles ſont en leur plus grande fureur, cedent aucune- ment, & plient à la raifon venant de dehors au ſecours: mais la cholere ne fait pas ſeu- lement, comme dit Melanthius,

Maulx infinis, en mettant la raifon,

C Pour vn temps, hors de ſa propre maiſon:
mais elle la deſloge du tout, & la ferme dehors: & comme ſont ceux qui ſe bruſſent eux meſmes dedans leur maiſon, elle remplit tout le dedans de trouble, de ſumee, & de bruit, de maniere qu'elle n'oit, ny ne voit rien de ce qui luy peut profiter. Et pourtant vne nauire eſtant en fortune & tourmente en haulte mer abandonnee, re- ceuroit pluſtoſt vn pilote de dehors, que ne receuroit l'homme qui eſt agité de cour- roux & de cholere, la raifon & remonſtrance d'un autre, ſi de longue main il n'a fait prouiſion chez luy du ſecours de la raifon: ains comme ceux qui ſ'attendent d'auoir le ſiege dedans vne ville, amaſſent & ſerrent tout ce qui leur y peut ſeruir, ne ſ'atten- dans point au ſecours de dehors: auſſi faut il apporter les remedes que lon a de long temps au parauant amaſſez de la philosophie à l'encontre de la cholere: eſtans bien certains, que quand l'occaſion du beſoing & de la neceſſité ſ'y presentera, mal-
D aileement en pourront-ils faire entrer de dehors: car l'ame n'oit pas ſeulement ce qu'on luy dit au dehors pour le trouble qu'elle a au dedans, ſi elle n'a chez ſoy ſa propre raifon, comme vn comite qui promptement reçoie & entende les com- mandemens & remonſtrances, qu'on luy fait, ou bien ſi elle l'oit, elle meſpriſe ce que lon luy dit tout doucement & quoyement, & ſi on luy fait inſtance & qu'on la preſſe vn peu plus aſprement, elle ſaigrit & ſ'indigne: car la cholere de ſa nature eſtant ſuperbe, audacieuſe, & malaiſee à manier par autrui, comme vne grande & puisſante tyrannie, doit auoir en ſoy meſme quelque choſe domeſtique & nec avec elle qui la ruine. Or la continuation de courroux & accouſtumanee de ſe courrou- cer ſouuent, engendre en l'ame vne mauuaiſe habitude que lon appelle cholere, la- quelle finalement deuient vn feu d'ire ſoudaine, vne amertume vindicatiue, & vne aigreur intraitable à qui tout deſplaist, quand le courage deuient vlceré, ſ'offenſant de

Comment il faut refrener la cholere.

En ses Pro-
blemes, sect.
9. Pr. 17.

peu de chose, chagrin, hargneux, comme vne lame de fer tenue & foible, qui se perce E
à la moindre graueure du monde : mais le iugement qui s'oppose sur le champ prom-
ptement au courroux, & le supprime, ne remédie pas seulement au present, ains for-
tifie & rend l'ame plus roide & plus ferme à l'aduenir : car il m'est adueni à moy,
apres auoir fait deux ou trois fois teste à la cholere, ce qui aduint iadis aux Thebains,
lesquels ayans vne fois faiët teste aux Lacedæmoniens qui parauant sembloient inuin-
cibles, iamais depuis ne furent vaincus d'eux en bataille : car depuis ie pris courage de
penſer, que lon en pouuoit venir à bout par discours de raison, & si voyois que elle
sestanchoit non seulement en respandant de l'eau froide sur celuy qui est courroucé,
ainsi comme l'escrit Aristote, mais aussi qu'elle s'esteint en luy approchant vne peur,
voire en luy presentant vne soudaine ioye, comme dit Homere, elle se dissout & se
destrempe : tellement que ie feis en moy-mesme ceste resolution, que c'estoit vne
passion qui n'estoit pas du tout irremediable à ceux qui y veulent prouuoir, pour au-
tant mesmement qu'elle n'a pas tousiours des commencemens qui soyent grands ne F
puissans : attendu que bien souuent vn brocquard, vn traiët de mocquerie, vne risée,
vn clin d'œil, ou hochement de teste, & autres telles & semblables choses, mettent
plusieurs en cholere : comme Helene fâcha & courroucea sa niepce seulement en
luy disant,

Fille Electra de moy pieça non veüë : iusques à luy respondre,
Il est bien tard d'estre maintenant sage,
Ayant esté par auant si volage,
Que de quitter l'hostel de ton mary.

Semblablement aussi Callisthenes irrita Alexandre pour luy auoir dit, quand on ap-
porta la grande coupe à boire d'autant à tour de rolle, Je ne veux pas, pour boire
à la santé d'Alexandre, auoir besoing d'un Æsculapius : c'est à dire, d'un medecin.
Ainsi donc comme il est facile d'arrester vne flamme qui s'est prise à du poil de con-
nin, ou à des fueilles seiches, ou à de la paille, mais si vne fois elle s'attache à cho- G
ses solides & où il y ait du fond, elle embraze incontinent & consomme, comme
dit Æschylus,

Le hault labour des maistres Charpentiers :

Aussi celuy qui veut prendre garde à la cholere du commencement, en voyant qu'el-
le commence à fumer & à fallumer pour quelque parole ou quelque gaudisserie de
neant, il n'a pas beaucoup à faire, ains bien souuent pour se taire seulement, ou
pour n'en tenir compte, il l'appaise totalement : car qui ne donne nourriture & entre-
tenement de bois au feu, il l'esteint : aussi qui ne donne sur le commencement nour-
riture à son ire, & qui ne souffle soy-mesme, il l'euite ou la dissipe. Et pourtant ne
me plaist point le philosophe Hieronymus, combien qu'au demourant il donne
beaucoup de beaux enseignemens & bonnes instructions, en ce qu'il dit, que lon ne
sent point la cholere quand elle s'engendre, mais quand elle est engendree, tant elle H
est soudaine : car il n'y a nulle autre passion qui face vne si manifeste naissance, ne si
euidente croissiance, quand elle s'amasse & se remuë, comme fait la cholere : ainsi
comme Homere mesme en homme bien experimenté le donne à entendre, quand
il fait qu'Achilles est bien atteint de douleur soudaine, aussi tost qu'il entend la pa-
role du Roy Agamemnon, en disant :

Ainsi dit-il, & vne noire nuë

D'aigre douleur le couurit suruenüë :

mais qu'Agamemnon se courrouce lentement apres estre enflambé de plusieurs pa-
roles ouyes & dictes, lesquelles si quelqu'un se fust entremis de destourner, la que-
relle ne fust pas venuë à si grand accroissement comme elle fait.

Voilà pourquoy Socrates toutes les fois qu'il se sentoit vn peu plus asprement esmeu
qu'il

A qu'il ne falloir à l'encontre de quelqu'un de ses amis, se rengeant auant la tourmente à l'abry de quelque escueil de mer, il rabbaïssoit sa voix, & monstroït vne face riante, & vn regard plus doux, se maintenant ainsi droit sur ses pieds, sans tomber ny estre renuersé, penchant en l'opposite, & s'opposant au contraire de sa passion. Car le premier moyen d'abbatre la cholere, mon bel amy, comme vne domination tyrannique, c'est de ne luy obeir, ny ne la croire point, quand elle nous commande de crier hault, & regarder de mauuais œil en trauers, & se frapper soy-mesme, ains se tenir quoy, & ne renforcer pas sa passion, comme vne maladie, à force de braire, & de crier hault, & de se demener, & tourmenter : car ce que font ordinairement les ieunes gens amoureux, comme d'aller en masque, danser, chanter à la porte de leur maistresse, & la couronner de bouquets & de festons de fleurs, cela au moins apporte quelque gracieux & honeste allégement à leur passion,

Arriué là ie ne demandé mie

B Qui, ne de qui estoit fille m'amie,
Ains la baïsé : si cela est peché,
Ie librement confesse auoir peché.

Et la permission que lon donne à ceux qui sont en deuil de lamenter & de plorer leur perte, avec les larmes qu'ils espendent iettent hors aussi vne bonne partie de leur douleur : mais la passion de cholere n'est pas ainsi, car elle s'enflamme & s'allume d'auantage par les actes que font ceux qui en sont espris. Et pourtant est-il bien meilleur de se tenir quoy, ou s'en fuir & se cacher, ou retirer en quelque port de seureté, quand on sent comme vn accès du hault mal qui nous veut prendre, de peur que nous n'en tombions, ou plus tost que nous n'en surtombions : car nous en tombons le plus souvent, & le plus asprement sur nos amis, d'autant que nous n'aimons pas toutes sortes de choses, ny ne portons pas enuie à toutes sortes de gens, ny ne les craignons pas : mais il n'y a rien à quoy nostre cholere ne s'attache, il n'y a rien à quoy elle ne se prenne : car nous nous courrouçons & à nos amis, & à nos ennemis, & à nos enfans, & à nos peres & merces, voire & aux Dieux mesmes, & aux bestes, & aux vtenfiles, qui n'ont ny ame ne vie, comme Thamyris,

Rompant son cornet relié

A cercles d'or fin delié,

Et de sa lyre l'harmonie

De chordes tenduë & garnie.

Et Pandarus qui se maudit luy-mesme, si il ne rompt son arc & ses fleches de ses propres mains, & ne les met dedans le feu : & Xerxes qui donna des poinçonnades & des coups de fouët à la mer, & escriuit des lettres missiues à la montagne Athos, qui disoient, Athos merueilleux, qui de ta cyme touches au ciel, garde toy bien d'auoir des rochers grands, & qui soient malaisés à quasser, pour empescher mes ouurages :

D autrement ie te denonce, que ie te couperay toy-mesme, & te ietteray dedans la mer.

Il y a plusieurs choses formidables & redoutables en la cholere, mais aussi y en a il plusieurs ridicules & mocquables. C'est pourquoy elle est & plus hayë, & plus mesprisée que nulle autre passion qui soit en l'ame, & pourtant seroit-il expedient & utile de considerer l'un & l'autre diligemment. Quant à moy doncques, si j'ay bien ou mal faict, ie ne scay, mais j'ay commencé par là à me guarir de la cholere : comme faisoient anciennement les Lacedemoniens, qui pour enseigner à leurs enfans à ne s'enfurer point, leur monstroient leurs esclaves, les Ilots, yures : aussi considerois-je les effects de l'ire és autres. Premièrement, ainsi comme Hippocrates escrit, que celle maladie est la plus mauuaise & la plus dangereuse, qui defigure le visage de l'homme, & le rend dissemblable à soy-mesme : aussi voyant que ceux qui sont espris de cholere sortent plus d'eux mesmes, & changent de face, de couleur, de contenance, d'allure,

En Homere liu. 5.
de l'Iliade.

Comment il faut refrener la cholere.

& de voix, i'en imprimé comme vne forme en mon ame, & pensé en moymesme, **E**
que ie serois bien desplaisant si iamais ie me monstrois ainsi espouventable, & ainsi
transporté à mes amis, à ma femme, & à mes petites filles, estant non seulement hy-
deux à voir, & tout autre que de coustume, mais aussi aiant la voix aspre & rude: cōme
ie m'estois rencontré à en voir aucuns de mes familiers si esprits & troublez de cho-
lere, qu'ils ne pouuoient pas retenir ny leurs façons ordinaires, ny la forme de leur vi-
sage, ny leur grace à parler, ny leur douceur en cōpagnie. On lit que Caius Gracchus
l'orateur, qui estoit de nature homme aspre, vehement & violent en sa façon de dire,
auoit vne petite fleute accommodée, avec laquelle les musiciens ont accoustumé de
conduire tout doucement la voix de hault en bas, & de bas en hault, par toutes les
notes, pour enseigner à entonner, & ainsi comme il harenguoit, il y auoit l'vn de ses
seruiteurs, qui estant debout derriere luy, comme il sortoit vn petit de ton en parlant,
luy entonnoit vn ton plus doux & plus gracieux, en le retirant de son hault crier &
braire, & luy ostant l'aspreté & l'accent cholerique de sa voix : **F**

Rendant tel son melodieux,
Que le flageolet gracieux,
D'vn roseau accoustré de cire,
Fait aux bouuiers souefuement bruire,
Tant qu'il les endort par les champs.

& ainsi ramenoit-il la vehemence cholerique de l'orateur. Quand à moy, si i'auois vn
vallet adroit, & homme de bon entendement, ie ne trouuerois point mauuais que
quand il me verroit courroucé, il me presentast soudain vn miroir, comme nous en
voions qui le se font apporter quand ils sortent du baing, sans aucune vtilité : là où
ce seroit chose fort profitable à plusieurs, de se voir ainsi troublez & hors de son na-
turel, pour leur faire à iamais hair ceste passion de courroux & de cholere. On raconte
par maniere de ieu & de passe-temps, que vn Satyre admonesta vn iour Minerue, que
ce n'estoit point bien son cas que de iouer des fleutes, mais que sur le champ elle ne **G**
fit point autrement compte de son admonestement :

Point ne t'est bien ceste forme seante,
Iette moy là route fleute bouffante,
Et prens en main les armes, sans enfler
Si laidement tes iouës à souffler.

mais depuis quand elle eut contemplé son visage dedans vne riuere, elle s'offensa tant
de ses grosses iouës, qu'elle en ietta ses fleutes : & toutefois encore a cest art de iouer
des fleutes ce reconfort de la laideur & deformité de visage, que le son en est doux &
plaisant. Et puis Marsias qui inuenta la hanche, pour emboucher le aubois, & les
fermoirs de la museliere que lon attache à l'entour de la bouche, reteint la violence du
vent enclos à force, & cacha & accoustra vn petit la deformité du visage :

D'or reluisant la bouche il orna, pleine
D'impetueuse & vehemente haleine,
Aussi feit il les iouës de laniere
Double de cuir nouée par derriere :

mais la cholere enfant & estendant le visage villainement, iette encore vne plus vil-
laine & plus mal plaisante voix,

Touchant du cœur les chordes plus cachees,
Qui ne deuroient pour rien estre touchees.

car on dit que la mer, quand elle est agitée de vents, & qu'elle iette hors de l'algue &
de la mousse, qu'elle se purge: mais les paroles dissoluës, ameres & folles, que l'ire fait
sortir hors de l'ame renuersee sans dessus dessous, souillent premierement ceux qui
les disent, & les remplissent d'infamie, pource que elles donnet à cognoistre, qu'ils les
auoient

- A** auoient de tout temps en leurs cœurs, & en estoient pleins, mais que la cholere les a descouverts: & pourtant payent ils, pour la plus legere chose qui soit, c'est à sçauoir la parole, la plus griëue & plus pesante amende, c'est qu'ils en sont tenus & reputez malings & mesdifans. Ce que voyant & obseruant quelquefois, ie veins à faire ce discours tout doucement en moy mesme, que c'est bonne chose en fiebure, mais encore meilleure en cholere, d'auoir la langue doulce, molle & vnice: car celle des febricitans, si elle n'est telle qu'elle doit estre par nature, c'est signe, mais non pas cause, de mauuaise disposition au dedans: mais celle de ceux qui sont courroucez estant orde, ou aspre, & desbridée à proferer paroles indignes, met dehors iniure, outrage & contumelie, mere d'inimitié irreconciliable, & qui montre vne malignité latente & cachee. Car le vin ne produit rien de si desordonné, ne de si mauuais, comme la cholere, encore cela s'attribue à risée & à ieu, mais cecy est destrempé avec fiel d'inimitié & de rancune. Et en beuuant à la table, celuy qui se tait est ennuyeux à la compagnie & fascheux: mais en la cholere il n'y a rien si venerable, si graue, ne si digne, que de se tenir quoy, comme Sappho admoneste,

L'ire en la poitrine cachee
Engarder sa langue attachee,
Qu'elle ne parle follement.

- Si peut on non seulement recueillir cela, en prenant garde à ceux qui sont espris d'ire, mais aussi cognoistre & cōprendre au demourant, quelle est toute la nature de la cholere, comment elle n'est ny genereuse, ny magnanime, ny aiant en soy rien de grand ny de viril: combien que au vulgaire il semble, que pour estre tempestatiue, elle soit actiue, que ses menaces soient hardiesse, & son opiniastrété soit force: & y en a qui pensent que sa cruauté soit disposition à faire grandes choses, que sa dureté implacable soit fermeté, & son estre hargneuse soit haine des vices: en quoy ils s'abusent grandement: car tous ses actes, ses mouuements, & ses contenance arguent & montrent grande foiblesse & bassesse, non seulement par ce que nous voyons que les petits enfans, quand ils sont courroucez deschirent tout & saigrissent à l'encontre des femmes, & veulent que lon batte & chastie les chiens, les cheuaux, & les mulets: comme Ctesiphon l'escrimeur vouloit faire à coups de pied, & regimber à l'encontre de sa mule: mais aussi es meurtres & homicides que font faire les tyrans, en l'amertume & atrocité desquels on apperçoit leur pusillanimité & foiblesse, & en ce qu'ils sont souffrir aux autres ce qu'ils souffrent eux mesmes: ne plus ne moins que les morsures des serpens venimeux, plus elles sont douloureuses & enflammées, plus elles font grande enflure aux patients: car ainsi comme la tumeur & enflure est indice de grande blesseure en la chair, aussi es ames qui plus sont molles, plus elles se laissent aller & succomber à la douleur, plus elles mettent hors grande cholere procedente de plus grande infirmité. Voila pourquoy les femmes ordinairement sont plus aigres & plus choleres que les hommes, & les malades que les sains, & les vieillards que ceux qui sont en fleur d'aage, & les biens fortunez que les infortunez: car l'auaricieux est fort cholere à l'encontre de son receueur, le gourmand à l'encontre de son cuisinier, le ialoux à l'encontre de sa femme, le glorieux & ambitieux contre celuy qui mesdit de luy: & les plus aspres de tous en leurs choleres, ceux qui affectēt les premiers hōneurs en vne cité, & qui se font chefs de part, qui est vn tourment honorable, cōme dit Pindarus. Voila comment de la part dolente de l'ame, & souffrante à cause de son imbecillité, sourt la cholere, laquelle ne ressemble point à des nerfs de l'ame, comme disoit quelqu'un des anciens, ains plustost, ou à des extensions, ou des conuulsions d'icelle, se dressant & soubs-leuant avec plus de vehemence quand elle a enuie de se venger. Or les exemples des choses mauuaises ne sont pas plaisans à voir, ains sont necessaires seulement: mais quant à moy estimant que les exemples de ceux qui se

Comment il faut refrener la cholere.

font doucement & benignement portez és occasions de courroux, font & E
tresplaisans à ouïr, & tresbeaux à voir, ie commence à mespriser ceux qui disent,

Tu as fait tort à vn homme, & vn homme

Te faut souffrir. Et semblablement aussi,

Iette le moy, iette le moy par terre,

Et que du pied la gorge on me luy ferre.

& autres telles paroles, qui seruent à aiguïser la cholere, par lesquelles aucuns taschèt à transporter la cholere des cabinets des dames aux logis des hōmes. Car la prouesse, l'accordant au demourant en toutes autres choses avec la iustice, me semble quereller & debattre avec elle de la douceur & mansuetude seulement, cōme à elle plus iustement appartenant: car il est bien quelquefois aduenü, que les pires ont surmonté les meilleurs: mais en son ame propre dresser vn trophée contre la cholere, à laquelle, comme dit Heraclitus, il est bien difficile de pouoir resister, à cause que ce qu'elle veut, elle l'achete de sa vie: cela est acte d'une grande & victorieuse puissance, qui sort du iugement de la raison, comme de nerfs & de muscles à l'encontre des passions. C'est pourquoy ie m'estudie à lire & à recueillir les dictz & faictz, non seulement des gens de lettres & des Philosophes, qui n'ont point de fiel, ce disent les sages, mais des Princes, Capitaines & Roys: comme ce que dit vn iour Antigonus à quelques vns qui mesdisoient de luy tout aupres de sa tente, ne pensans pas qu'il les entendist, en souleuant la toille de sa tente avec son baston, Deà n'irez vous point, dit-il, plus loing mesdire de moy? Et comme vn nommé Arcadion natif d'Achaïe feist profession de mesdire par tout de Philippus, & d'admonester vn chascun de fuir,

Iusques à tant que trouué lieu on eust,

Où Philippus personne ne cogneust.

& depuis ne scay comment se fust rencontré en la Macedoine, les courtisans du Roy Philippus vouloient qu'il le feist chastier, & ne le laissast point eschapper, puis qu'il le tenoit entre ses mains: mais au contraire Philippus parla à luy humainement, & luy enuoya iusques à son logis des presens: & quelque temps apres commanda que lon senquist quels propos il tenoit de luy entre les Grecs: chascun luy rapporta qu'il faisoit merueilles de le louer par tout: & Philippus leur respondit adonc, Ie suis doncques meilleur medecin de la mesdisance, que vous n'estes. Et vne autrefois en l'assemblée des ieux Olympiques, comme les Grecs eussent mesdit de luy, ses familiers disoient qu'ils meritoient d'estre bien asprement chastiez, de mesdire ainsi de celuy qui leur faisoit tant de bien: Et que feroient ils donc, leur respondit-il, si nous leur faisions du mal? Aussi furent bien honestes & gentils les tours que firent iadis Pisistratus à Thrasylulus, & Porfena à Mucius, & Magas à Philemon qui l'auoit publiquement en plein theatre farcé & moqué,

Magas, le Roy t'a fait escrire,

Mais tu ne sçais ses lettres lire:

& depuis l'ayant entre ses mains, parce qu'une tourmente de mer le ietta en la ville de Parætonium, dont il estoit gouuerneur, il ne luy fit autre mal, sinon qu'il commanda à l'un de ses souldards, de luy toucher avec son espee nue dessus le col, & puis le laisser aller sain & sauf: & depuis il luy enuoya des osselets & des boules à iouer, comme à vn enfant qui n'auoit point de iugement. Ptolomeus se moquant d'un grammairien ignorant, luy demanda par ieu, qui estoit le pere de Peleus: le grammairien luy respondit, Ie voudrois que tu me disses premier qui estoit le pere de Lagus. Ce trait de moquerie touchoit au Roy Ptolomeus, l'arguant d'estre yssu de petite lignee: de sorte que les familiers du Roy disoient, que cela estoit indigne, & ne deuoit point estre supporté. Et il leur respondit, S'il est indigne d'un Roy, d'estre moqué, aussi peu est-il digne de se moquer d'autrui.*

* Il y a
brefche de
quelques li-
gnes en cest
endroit.

Alexandre

- A Alexandre le grand fut par trop aspre & cruel enuers Callisthenes & enuers Clitus: mais le roy Porus aiant esté pris en bataille son prisonnier, comme Alexãdre luy demanda en quelle sorte il le traicteroit: En Roy, luy respondit-il. Et comme il luy demanda de rechef, fil vouloit rien dire d'auantage: non, dit-il, car tout est compris sous ce mot là, En Roy. Voyla pourquoy les Grècs, à mon aduis, appellent le Roy des Dieux Milichius, c'est à dire, doux comme miel: & les Atheniens le nomment Marmactas, c'est à dire, secourable: car punir & tourmenter est office de diable & de furie, non pas acte celeste ne diuin. Ainsi donc comme quelqu'un respondit touchant Philippus qui auoit destruit la ville d'Olynthe, Mais il n'en sçauoit pas edifier
- » vne telle: aussi peult on bien dire à la cholere, Tu peux bien renuerser, demolir & destruire: mais releuer, sauuer, pardonner, & supporter, c'est à faire à la clemence, à la douceur, & nature moderee: c'est l'office d'un Camillus, d'un Metellus, d'un Aristides, & d'un Socrates: mais de pinser, mordre & ferrer, c'est à faire à vne formis, ou à vne
- B fouris. Qui plus est, si ie regarde à la vengeance, ie trouue que le plus souuent, quand on y procede par cholere, on n'en vient iamais à bout, & qu'elle se consume ordinairement en morsure de léures, grincement de dents, en vaines courses ça & là, en iniures, & menaces qui ne seruēt de rien: ne plus ne moins que les petits enfans qui pour leur foiblesse en courant se laissent tomber auant que pouuoir paruenir où ils pretendent. Et pourtant respondit, ce me semble, bien à propos un Rhodien à l'huissier d'un
- » Preteur Romain qui crioit apres luy, & le harceloit, Je ne me soucie pas de chose que
- » tu dies, mais de ce que pense celuy-là qui se taist. Et Sophocles aiant armé Neoptolemus & Eurypylos, les loua magnifiquement en disant d'eux,

D'iniurieux langage point n'vserent,

Ains au milieu des armes se ruerent.

- car il y a quelques nations barbares qui empoisonnent leurs armes, mais la vaillance n'a point besoing de cholere, par ce qu'elle est trempee de raison & de iugement, là
- C où l'ire & la fureur sont fragiles, pourries, & aisées à briser: c'est pourquoy les Lacedemoniens ostent avec le son des fleutes la cholere à leurs gens, quand ils vont combattre, & deuant le combat ils sacrifient aux Muses, à celle fin que la raison leur demeure: & apres qu'ils ont tourné leurs ennemis en fuite, ils ne les poursuivent plus, ains retiēnent leur cholere aisée à ramener & à manier, comme les especes qui sont de moyenne longueur: là où le courroux en a fait mourir infinis auant qu'ils peussent venir à bout d'executer leur vengeance, comme entre autres Cyrus & Pelopidas le Thebain. Agathocles mesme enduroit patiemment de fouir iniurier par ceux qui
- » estoient assiegez: & comme quelqu'un luy dist, Potier, où prendras tu l'argent pour
- » payer tes gens? En se riant il respondit, En ceste ville, quand ie l'auray prise. Quelques autres se mocquoient d'Antigonius de dessus les murailles, pour ce qu'il estoit laid: il
- » leur respondit tout doucement: Comment? ie suis doncques bien trompé, car ie pensois estre beau fils. Mais quant il eut pris la ville, il vendit à l'encan ceux qui festoient
- D mocquez de luy, en leur protestant, que si de là en auant ils se mocquoient plus de luy, il s'en prendroit à leurs maistres: aussi voy-ie que les veneurs & les orateurs commettent de grandes fautes par cholere, comme Aristote recite, que les amis de l'orateur Satyrus, en vne cause qu'il auoit à plaider en son nom, luy bouscherent les oreilles avec de la cire, de peur que oyant ses aduersaires, qui luy disoient des iniures en leurs plaidoyers, il ne gasta tout par sa cholere. Et à nous mesmes, ne nous aduient il pas souuent, que nous faillons à punir un esclau qui nous aura fait quelque faute, par ce qu'il s'enfuit de peur, pour les menaces, ou pour les propos qu'il nous en aura ouy tenir? Parquoy nous deurions dire à nostre cholere, & nous nous en trouuerions
- » fort bien, ce que les nourrices ont accoustumé de dire aux petits enfans, Ne pleurez
- » pas, & vous l'aurez: aussi, ne te precipite pas, ne crie pas, ne te haste pas, & ce que tu

En ses Pro-
blemes, sect.
3. Pr. 26.

Comment il faut refrener la cholere.

veux se fera plus tost & mieux, qu'en la sorte que tu y vas : car le pere voyant son enfant qui tasche à couper ou fendre quelque chose avec vn petit cousteau, le prent, & le coupe, ou le fend luy mesme: aussi la raison ostant à la cholere la vengeance, punit celuy qui le merite plus seurement, sans se mettre en danger, & plus vtilement, & non pas soy mesme, comme fait la cholere bien souuent. Et comme ainsi soit, que toutes passions ont besoing d'accoustumance pour donter & surmonter par exercitation ce qu'il y a de desobeissant & de rebelle à la raison, il n'y en a point où il se faille tant exercer enuers ses familiers & domestiques, comme la cholere : d'autant que nous n'auons point ordinairement d'ambition, ny d'enuie, ny de crainte enuers eux, mais des courroux nous en auons plus que tous les iours, qui engendrēt des hargnes & riottes, & nous font broncher & chopper quelquefois bien lourdement, à cause de la licence que nous nous donnons, ne se trouuant là personne qui nous arreste & qui nous soustienne, comme en vn endroit fort glissant, pour nous engarder de tomber, nous nous y laissons facilement aller. Car il est bien mal-aisé là où lon n'est point tenu de rendre compte à personne en telle passion, de se garder de faillir, si premierement on n'a donné ordre à bien munir & réparer ceste grande licence de douceur, benignité & clemence, & que lon ne soit bien accoustumé à supporter beaucoup de paroles & de sa femme, & de ses familiers & amis, qui nous reprēnt que nous sommes trop doux & trop mols: ce qui estoit principalement causé que ie m'aigrissois le plus souuent à l'encontre de mes seruiteurs, pensant qu'ils deuissent pires à faulte d'estre bien chastiez: mais ie me suis à la fin apperceu bien tard, Premierement qu'il valoit mieux par patience & indulgence rendre mes vallets pires, que de me destordre & gaster par aspreté & cholere moy mesme, en voulant redresser les autres. Secondement ie voiois plusieurs, qui par ce que lon ne les chastioit point, bien souuent deuenoient honteux d'estre meschans, & prenoient le pardon qu'on leur donnoit pour vn commencement de mutation de mal en bien, plus tost qu'ils n'eussent fait la correction, & certainement obeissoient plus volontiers & plus affectueusement aux vns avec vn clin d'œil sans mot dire, qu'ils ne faisoient à d'autres avec soufflets & coups de baston: tellement que ie me suis finalement persuadé, que la raison estoit plus apte & plus digne de commander & de gouverner, que non pas la cholere: car ie n'estime pas qu'il soit totalement vray ce que dit le poëte,

Où est la peur, là mesmes est la honte.

mais au reuers, ie pense qu'en ceux qui sont honteux s'imprime la crainte qui les retient de mal faire: là où l'accoustumance ordinaire d'estre battu sans mercy, n'imprime pas vne repentance du mal faire, mais vne preuoyance de se garder d'y estre surpris. Tiercement ie considerois en moy mesme, & me ramenois en memoire, que celuy qui nous enseigne à tirer de l'arc, ne nous defend pas de tirer, mais de faillir à tirer: aussi celuy qui nous enseigne à chastier en temps & lieu modérément, opportunément, vtilement, & ainsi qu'il appartient, ne nous empesche pas de chastier: ie m'efforce d'en soustraire & oster entierement toute cholere, principalement par n'oster pas à ceux qui sont chastiez le moyen de se iustifier, & par les ouïr: car le temps apporte ce pendant à la passion vn delay & vne remise, qui la dissout: & ce pendant le iugement de la raison trouue & le moyen & la mesure de faire la punition conuenablement: & puis on ne laisse point de lieu à celuy qui est chastié de resister au chastiment, fil est puny & chastié, non pas en courroux & par cholere, mais conuaincu de l'auoir bien meritē, & qui seroit encore plus laid, on ne trouuera point que le vallet chastié parle plus iustement que le maistre qui le chastie. Tout ainsi doncques, comme Phocion, apres la mort d'Alexandre le grand, voulant engarder les Atheniens de se soubleuer trop tost auant le temps, & d'adiouster trop promptement foy aux nouvelles de sa mort: Seigneurs Atheniens, dit-il, fil est mort aujourd'huy, aussi le fera il demain

A demain, & d'icy à trois iours: aussi, si cestui-cy a failly aujourdhuy, autant au il
 failly demain, & d'icy à trois iours: & si n'y aua point d'inconuenient, quand il en
 sera puny vn peu plus tard qu'il n'eust deu estre, mais bien y en auroit il, si pour festre
 trop hasté il apparoiſſoit à tousiours, qu'il eust esté chastié à tort, cōme il est aduenu
 souuentefois: car qui est celuy de nous si aspre, qu'il batte ou fouëtte son vallet, pour
 auoir il y a cinq ou six iours brulé le rost, ou renuersé la table, ou trop tard respendu
 & obey? & toutefois ce sont les causes ordinaires pour lesquelles sur le champ, quand
 elles sont recentes, nous nous troublons, & nous courrouceons amerement, sans
 vouloir presque pardonner: car ainsi comme les corps à trauers vn brouillas appa-
 roissent plus grands, aussi sont les fautes à trauers la cholere. Et pourtant faut-il sur
 l'heure conuiuer en telles fautes, & ne faire pas semblant de les apperceuoir, & puis
 quand on est du tout hors de passion, sans aucun reste de perturbation, considerer le
 faict en soy meurement, & de sens rassis: & si lors il nous semble mauuais, en faire la
 B correction, & ne la laisser point aller ny eschapper, comme on feroit la viande quand
 on n'a plus d'appetit. Car il n'y a rien qui tant soit cause de faire chastier en cholere,
 comme de ne chastier pas quand la cholere est passée, & estre tout descouſu, & faire
 comme les paresseux mariniers, qui durant le beau & bon temps demeurent en repos
 dans le port, & puis quand la tourmente se leue ils font voile, & se mettēt en danger:
 aussi nous reprenans & blasmans la raison de n'estre pas assez roide, ains trop lasche
 & trop molle en matiere de punition, nous nous hastons de l'executer alors que la
 cholere est presente, qui est comme vn vent impetueux: car naturellement celuy qui
 a faim vse de viande, mais de punition ne doit vsr sinon celuy qui n'en a ne faim ne
 soif: ny ne faut se seruir de la cholere comme d'une faulſe à la viande, pour nous
 mettre en appétit de chastier, ains lors que lon est le plus esquarté, & que lon y est
 contrainct necessairement, y employant le iugement de la raison. Et ne fault pas faire,
 comme Aristote escrit, que de son temps au pais de la Thoscane, on fouëttoit les es-
 C clauies au son des flustes & aubois: aussi prendre plaisir, & se saouller comme d'un
 agreable passetemps, de chastier les hommes, & puis apres que la punition est faite,
 ſen repentir: car l'un est à faire à vne beste sauuage, & l'autre à vne femme: ains fault
 que sans douleur & sans plaisir, au temps de raison & de iugement la iustice face la
 punition, sans qu'il demeure derriere aucun reste de cholere. Voire-mais on me
 pourra dire, que cela n'est pas proprement donner remede ny guarison à la cholere,
 ains plus tost vne precaution & fuite des fautes que lon peult commettre en la cho-
 lere: à cela ie respond, que l'enſeure de la ratte n'est pas aussi cause efficiente de la
 fiebure, ains vn accident accessoire: mais toutefois quand elle est amollie, elle allege
 grandement la fiebure, ainsi que dit Hieronymus: mais en considerant comme ſen-
 gendre proprement la cholere, ie voy que les vns par vne cause, les autres par vne
 autre y tombent: mais en tous il y a vne opinion conioincte d'estre mesprisé & con-
 D temné: pourtant faut il donner quelque aide à ceux qui veulent appaiser vn courroux,
 en esloignant le plus que lon pourra le faict de toute suspicion de mespris & de con-
 temnement, ou de brauerie & d'audace, & la reiettant ou sur la necessité, ou inaducr-
 tance, ou accident, ou disgrace & infortune, comme fait Sophocles,

Pas ne demeure aux affligez, seigneur,
 L'entendement qu'ils auoient en bon heur,
 Ains quelque grand qu'il fust, il diminue.

& Agamemnon quoy qu'il referast le rauissement de Briseïde à vn fatal malheur,
 Si est il prest du sien en satisfaire,
 Et grands presens pour payement en faire.

car le prier est signe d'homme qui ne mesprise point, & celuy qui a offensé, ſil ſhu-
 milie, dissoult toute l'opinion que lon pouuoit auoir de contemnement: mais il ne

En la tra-
 gœdie d'An-
 tigon.

Iliad. liu. 18.

Comment il faut refrener la cholere.

fault pas que celuy qui se sent en cholere attende cela, ains qu'il se serue de la responce E
que fit Diogenes : Ceux là se mocquēt de toy, Diogenes : Et ie ne me sens point moc-
qué moy, respondit-il : aussi ne se doit il point persuader qu'on le mesprise, ains plus
tost qu'il auroit matiere de mespriser l'autre, & estimer que la faulte qu'il a commise
est procedee ou d'infirmité, ou d'erreur, ou de hastiueté, ou de paresse, ou de tacqui-
nerie, ou de vieillesse, ou de ieunesse: & quand aux seruiteurs ou aux amis, il les en fault
descharger de tout poinct, car ils ne nous mesprisent pas pour ce qu'ils aient opinion
que nous leur puissions rien faire, ou que nous ne soions pas gens d'execution, ains les
vns pour ce qu'ils nous estiment bons & debonnaires, les autres pour ce qu'ils nous
aiment: & maintenant nous ne nous aigrissons pas seulement contre nostre femme,
contre nos seruiteurs, & nos amis, comme estans mesprizez par eux, mais aussi nous
attachons nous en courroux & aux hosteliers, & aux mariniers, & aux muletiers qui
sont yures, pensans estre mesprizez par eux: &, qui plus est, nous nous courrouceons
encore contre les chiens qui nous abbayent, & contre les asnes qui nous regimbent: F
comme celuy qui aiant haulsé la main pour battre l'asnier, comme il se fust escrié qu'il
estoit Athenien: Et tu ne l'es pas toy, dit-il à l'asne: en le frappant, & luy dōnant force
coups de baston. Mais ce qui plus engendre de frequētes & continuelles hargnes de
cholere en nostre ame, qui s'y amassent petit à petit, c'est l'amour de nous mesmes, &
vne malaisance de mœurs, avec vne mignardise, & vne delicatessē, tout cela ensemble
nous en produit vn exaim comme d'abeilles, & vne guespiere: & pourtant n'y a il
point de meilleure prouision pour se comporter doucement & benignement enuers
sa femme, enuers ses seruiteurs, & enuers ses familiers & amis, que la facilité de mœurs
& la simplicité ronde, quand on se sçait contenter de ce que lon a present à la main,
& que lon ne requiert point plusieurs choses, ne trop exquisēs:

Mais celuy là qui iamais n'est content
Que son rosty ou bouilly le soit tant,
Ny plus, ny moins, ny de moyenne sorte
Appareillé, si que louange en sorte
Hors de sa bouche, & qu'il en die bien.

G

Celuy qui ne beuroit iamais fil n'auoit de la neige pour rafreschir son vin, qui ne mā-
geroit iamais pain qui eust esté acheté sur la place, ny ne mangeroit iamais viande en
pauvre vaisselle, comme de bois, ou de terre, qui ne coucheroit iamais en liēt, sinon
qu'il fust mol, & enfondrant comme les vndes de la mer quand elle est agitee iusques
au fond, qui haste ses vallets seruans à la table à coups de fouēt & de baston, & les fait
courir avec sueur, cryant apres eux à pleine teste, comme fils portoient des cataplas-
mes à mettre sur vne apostume fort enflammee, qui l'assubiettit luy mesme à vne fa-
çon de viure fort seruile, hargneuse & querelleuse: celuy-là, dis-ie, ne se donne de
garde que ne plus ne moins que par vne toux continuelle, ou par frequētes concus-
sions, il se contracte en son ame vne disposition vlcereuse & catarreuse, qui à la fin luy H
cause vne habitude de cholere. Et pourtant faut-il par frugalité accoustumer son
corps à se contenter facilement de peu: pour ce que ceux qui appetent peu, ne peu-
uent auoir faute de beaucoup: & n'y aura point de mal, commençant à la viande, se
contenter sans dire mot de ce qu'il y aura, sans se courroucer & tourmenter à la table,
& en ce faisant donner vn tresfascheux mets & à soy mesme, & à toute la compagnie,
qui est la cholere:

Car presenter on ne nous sçauroit pas
Vn plus fascheux & plus mauuais repas,
que de voir battre vallets, tanfer & iniurier sa femme, pour ce que la viande sera bru-
lee, ou qu'il y aura de la fumee en la sale, faute de sel sur table, ou que le pain sera trop
dur. Arcefilaus donnoit vn iour à souper à quelques siens hostes estrangers, & à
quelques

- A quelques vns de ses amis, mais quand la viande fut apportee, il ne se trouua point de pain sur table, par ce que les seruiteurs n'auoient pas eu le soing d'en acheter: pour laquelle faute, qui est celuy de nous qui n'eust rompu les murailles à force de crier?
- " mais luy ne s'en fit que rire: Voyez, dit-il, si faut pas estre sage pour bien dresser vn banquet. Et Socrates au sortir de l'exercice de la luitte, aiant mené Euthydemus soupper chez luy, Xanthippé sa femme se print à le tanter & luy dire iniure, tant que finalement elle renuerfa table & tout. Euthydemus se leua tout fasché pour s'en aller.
- " Et Socrates luy dit, Et comment, ne te souuiens-tu pas que deuant-hyer, ainsi que nous dîinions chez toy, vne poule faulta sur la table, qui nous en feit tout autant, & nous ne nous en courrouceâmes pas pourtant? car il fault recueillir ses amis avec vne facilité, avec careffe, & avec vn visage riant, non pas froncer les sourcils, pour donner vne frayeur & horreur à ses seruiteurs. Et se faut semblablement accoustumer à se seruir de tous vases & vaisselles indifferemmēt, & non pas s'astreindre à vser de cestuy-cy ou cestuy-là sans autre: comme font aucuns, encore qu'il y ait grande compagnie, qui ont en particuliere recommandation vn certain gobelet ou vne coupe: ainsi que lon escrit du viel Marius, qui beuuoit en vn faict en guise d'vn gros cornet, & ne beuroient iamais en d'autre: autant en font ils des burettes à huyle, & des estrilles, dont on se sert aux estuues: car ils mettent leur affection en quelqu'vne entre toutes, & puis si elle vient à estre rompue ou esgaree & perdue, ils en sont extremement marrys, & en battent leurs vallets. Parquoy ceux qui se sentent enclins à la cholere, se doiuent abstenir de faire prouision de telles choses rares & exquises, comme de vases ou d'anneaux, & de pierres precieuses, pource que tels ioyaux exquis & precieux, quand ils viennent à estre perdus, mettent bien les hommes plus hors de sens, par cholere, que si c'estoit chose de peu de pris, & que lon peust facilement recouurer: & pour ce dit-on, que l'Empereur Neron aiant vne fois fait faire vn pauillon à huit pans, beau, sumptueux, & riche à merueilles, Senecque luy dit, Tu as montré en ce pauillon que tu es pauure, pour ce que si vne fois tu le perds, iamais plus tu n'en pourras recouurer de pareil. comme il aduint, par ce que la nauire, en laquelle estoit ce pauillon, se perdit par naufrage: & Neron se souuenant de ce que luy en auoit dit Senecque, porta la perte plus patiemment. Or l'aisance & facilité que lon prent enuers les choses, enseigne à estre facile & aisé enuers les seruiteurs: & si lon en deuient aisé enuers les seruiteurs, il est certain qu'encores plus le deuient on enuers les amis & enuers les subiects. Et nous voions que les serfs nouvellement achetez s'enquierent de celuy qui les a acquis, non pas si il est superstitieux, ne si il est enuieux, mais si il est cholere: & si ny les marys ne peuuent endurer la pudicité de leurs femmes, si elle est conuaincue avec mauuaise teste & cholere, ny les femmes les amours de leurs marys, ny les gens la conuersation des vns avec les autres, tellement que ny le mariage, ny l'amour ne sont point supportables avec la cholere: mais sans cholere l'yuresse mesme n'est point à tolerer: car la ferule du dieu Bacchus, qui est comme vne canne, dont on donne sur la main aux enfans qui ont failly, est suffisante punition de l'yurongue, pour ce que la cholere ne s'y ioigne point, qui rende Bacchus, au lieu de Lygus, & de Chonius: c'est à dire, chasseur d'ennuys, & balleur, Omettes & Menoles, qui signifie cruel & furieux: encore quant à la fureur & manie, l'hellebore qui croist en l'isle d'Anticyre la guarit, quand elle est seule: mais si vne fois elle est meslée avec la cholere, elle produit des Tragœdies, & cas si estranges, qu'ils semblent fables: & pourtant ne luy faut il iamais donner lieu, non pas en iouant mesme, pource qu'elle tourne vne careffe en inimitié: ny en deuissant & conferant ensemble, pource que d'une conference de lettres elle en fait vne opiniastre emulation & contention: ny en iugeant, pource qu'elle adioust insolence à l'autorité: ny en montrant aux enfans, pource qu'elle les met en desespoir, & leur fait haïr l'estude des lettres: ny en prosperité, pource qu'elle

Comment il faut refrener la cholere.

augmente l'enuie qui accompagne la bonne fortune : ny en aduersité, pource qu'elle le oste la misericorde, quand ceux qui sont tombez en mauuaise fortune se courroucent, & combattent à l'encontre de ceux qui ont compassion de leur malheur, comme fait Priam en Homere,

Iliad. 24.

Allez vous en arriere de ma veuë
Meschans truans, gens de nulle valuë,
Puis que venez pour mon deuil consoler.

Au contraire, la facilité de mœurs donne secours aux vns, honore les autres, addoucit l'aigreur, & par sa douceur vient au dessus de toute rudesse & toute asperité de mœurs: comme fait Euclides à l'endroit de son frere, avec lequel estant entré en quelque contestation, comme son frere luy eust dit, Je puisse mourir malement, si ie ne me venge de toy: Il luy respondit, Mais ie puisse mourir moy, si ie ne te persuade gracieusement. il le gaigna tout sur le champ, & luy changea la mauuaise volonté qu'il auoit. Et Polemon, comme quelquefois vn autre qui aimoit fort les pierres precieuses, & estoit fort conuoiteux d'auoir de beaux anneaux, le tanfast & l'iniuriaست outrageusement, il ne luy respondit rien, mais il fait seulement semblant de regarder affectueusement l'un de ses anneaux, & de le bien considerer: l'autre en estant tout resiouy, luy dit incontinent, Ne le regarde pas ainsi Polemon, mais à son iour, & il te semblera beaucoup plus beau. Et Aristippus s'estant mis en cholere à l'encontre d'Æschines, comme quelqu'un qui les oyoit contester luy eust dit, Comment Aristippus, & où est vostre amitié? Elle dort, respondit-il, mais ie la resuscilleray: & s'approchant d'Æschines, Te semble il que ie sois si malheureux, & si incurable, que ie ne doiue obtenir de toy vn seul admonestement? Et adonc Æschines luy respondit, Ce n'est point de merueille, si estant en toute autre chose de plus excellente nature que moy, tu as encore en ce point veu & cogneu deuant moy ce qui estoit conuenable de faire: car comme dit le poëte,

Non seulement la femme estant debile,
Mais vn enfant de sa main imbecille
Grattant tout doux le sanglier herissé,
Le tournera à son vouloir plissé,
Mieux qu'un luidteur, avec toute sa force,
Ne luy scauroit donner la moindre entorse.

G

Mais nous appriuoisons les bestes sauuages, & addoucissons des petits louueteaux, voire & portons quelquefois entre nos bras de petits lionceaux, & par vne fureur de cholere nous chassons arriere de nous & noz enfans, & noz amis, & familiers, & laschons à l'encontre de noz seruiteurs domestiques & de noz citoiens la cholere, comme vne beste sauuage, furieuse, en la desguisant à faulces enseignes d'un beau nom de haine des vices: mais c'est, à mon aduis, comme des autres passions & perturbations de l'ame, comme de la timidité que nous surnommons prudence, de la prodigalité que nous appellons liberalité, de la superstition que nous disons religion, & ce pendant ne nous en pouuons sauuer de pas vne. Et neantmoins tout ainsi comme Zenon disoit, que la semence de l'homme estoit vne mixtion & composition extraicte de toutes les puissances de l'ame: aussi pourroit-on, à mon aduis, dire que la cholere est vne meflange composee de toutes les passions de l'ame: car elle est tiree & extraicte & de la douleur & de la volupté, & de l'insolence & audace: elle tient de l'enuie, à ce qu'elle est bien aise de voir mal à autrui: elle a du meurtre & de la violence, car elle combat non pour se defendre & ne point souffrir, ains pour faire souffrir & ruiner autrui: & de la conuoitise elle en a ce qui est le plus mal plaissant & le plus deshonneste, attendu que c'est vne enuie & appetit de faire mal à autrui. Et pourtant si d'aduenture nous approchons de la maison d'un homme voluptueux

- A** voluptueux & luxurieux, nous entendrons des l'aube du iour vne menestriere qui sonnera l'aubade, & verrons à la porte la lie du vin, comme disoit quelqu'un, c'est à dire, les vomissemens de ceux qui y auront rendu leur gorge, des pieces de festons deschirez, & des pages & lacquais qui yurongneront. Mais les marques & signes qui descouurent les hommes aspres & choleres, vous les verrez imprimez sur les visages des seruiteurs, des frisures & esgratigneures, & aux fers qu'ils auront aux pieds: Car au logis d'une personne subiecte à l'ire & à la cholere, il n'y a qu'une seule musique, ce sont les lamentations & gémissemens ou de despensiers que lon fouettera leans, ou de seruantes que lon y gehennera: de maniere que vous aurez compassion des douleurs qu'il faut que seuffre la cholere es choses qu'elle conuoitte, & là où elle prent plaisir. Mais encore en ceux qui veritablement sont surpris de cholere, comme il aduient souuent potir la haine qu'ils portent aux vices & aux meschans, si faut il en oster ce qui est de trop & d'excessif, ensemble avec le trop de fiance & de creance
- B** que nous prenons en ceux qui conuersent avec nous: car c'est l'une des causes, qui plus engendre & augmente la cholere, quand celuy que nous auons tenu pour homme de bien se descouure meschant, & que nous auons estimé nostre amy, tombe en quelque different & querelle avec nous: car quant à moy, vous cognoissez mon naturel, combien peu d'occasion il me faut à me faire aimer les hommes, & me fier en eux: & pourtant ne plus ne moins que ceux qui marchent sur solage faulx & qui n'est pas ferme, tant plus ie m'appuye par aimer sur quelqu'un, tant plus bronche-ie lourdement, & tant plus suis-ie marry, quand ie me trouue deceu. Et quant à l'inclination à l'aimer, il seroit bien deormais mal aisé que i'en peusse retirer ce qui est de trop prompt & de trop volontaire: mais pour me garder de trop me fier, ie pourrois à l'aduenture me seruir comme d'une bride, de la prudence & circonspection retenue de Platon: car en recommandant le mathematicien Helicon, il dit, qu'il le louë comme homme, c'est à dire, comme un animal qui de sa nature se mue & se change facilement: & de ceux qui auoient esté bien nourris & bien instituez à Athenes, il dit encore qu'il craint, qu'estans hommes & semence d'autres hommes, ils ne donnent à cognoistre la grande infirmité & imbecillité de la vie humaine: & Sophocles quand il dit,
- C**

Plus des humains les faicts tu chercheras,

Plus mal que bien caché y trouueras.

il semble qu'il nous abaisse, & nous rongne les ailes merueilleusement: toutefois ceste difficulté à faire iugement des personnes, & malaisance à nous en contenter, nous rendra plus faciles en nos courroux: car toute chose soudaine & improuueue nous transporte promptement hors de nous-mesmes. Et faut aussi, comme Panætius nous admoneste en quelque lieu, pratiquer la constance d'Anaxagoras: & comme luy,

- D** quand on luy vint rapporter que son fils estoit mort, respondit, Je scauois bien „ que ie l'auois engendré mortel: aussi à chascune faute qui nous aiguïsera la cholere, nous pourrons respondre, Je scauois bien que ie n'auois pas achetté un esclau qui fust sage comme un philosophe: Je scauois bien que i'auois acquis un amy, qui pouuoit bien faillir: Je scauois bien que la femme que i'auois espousee estoit femme. Mais si quelqu'un d'auantage y vouloit encore adiouter ce refrein de Platon,
- E** Ne suis-ie point moy-mesme en quelque chose tel? & destournoit ainsi la discussion de son iugement du dehors au dedans, & entreiettoit un peu parmy le reprendre autrui, la crainte d'estre repris luy mesme, il ne seroit à l'aduenture pas si aspre à condamner les autres pour leurs vices, quand il verroit que luy mesme auroit tant de besoing de pardon. Mais à l'opposite chascun de nous estant en cholere, & punissant autrui, prononce des sentences d'un Aristides, ou d'un Caton, Ne derobbe plus, Ne ments plus, Pourquoi es tu si paresseux? &, qui est plus laid que tout, nous

Epistre 13.

Comment il faut refrener la cholere.

reprenons en cholere ceux qui se courroucent & cholerent , & les fautes qui ont esté E
commises par cholere, nous les punissons nous mesmes en cholere: non pas en la sorte
que font les Medecins ,

Qui d'une drogue & medecine amere
Vont destrempant le fiel de la cholere.

car nous l'augmentons , & labrouillons encore d'avantage. Quand doncques quel-
ques-fois ie me mets à par moy en ces discours, ie tasche quant & quant à retrencher
quelque chose de la curiosité: car de vouloir exquisement rechercher & descouvrir
toutes choses, pourquoy vn vallet aura failly à faire ce qu'on luy aura commandé, ce
qu'aura fait vn amy, à quoy s'amusera vn fils, ce qu'aura dit en l'aureille vne femme,
tout cela n'engendre que de continuelles riottes iournellement, lesquelles en fin se ter-
minent en vne aspreté & malaisance de mœurs: car comme dit quelque part Euripide,

Dieu met la main à toute chose grande,
Mais tout le reste à fortune il commande.

F

quant à moy, ie ne cuide pas qu'il faille rien commettre à la fortune, ny moins encore
passer en nonchaloir, à vn homme de bon sens, mais de quelques choses se fier & s'en
rapporter à sa femme, de quelques autres à ses seruiteurs, d'autres à ses amis, comme
aians sous eux des commis, des receueurs, & administrateurs, en se retenant à luy, &
à la disposition de son iugement, les principales & de plus grande importance: car
tout ainsi comme les petites lettres offensent & poignent plus les yeux, d'autât qu'elles
les tendent plus, aussi les petits affaires emeuvent plus la cholere, qui de là en prent vne
mauvaise accoustumance pour les plus grands. Puis, apres tout, i'ay estimé que ce pre-
cepte d'Empedocles estoit grand & diuin ,

Maintiens-toy sobre, & net de tout peché.

aussi louois-je grandement ces obseruations, comme estans honestes & bien seantes
à homme faisant profession de sapience, vouër en ses prieres de s'abstenir vn an du-
rant de femmes, & de vin, honorant ainsi Dieu de ceste continence: ou bien de s'abste- G
nir vn temps certain & limité de toute vaine parole, prenant garde à soy de ne dire ia-
mais ny en ieu, ny à bon esciant, parole qui ne soit veritable: & appliquois mon ame
à telles obseruations, comme n'estans pas moins saintes: & premierement ie m'accou-
stumoies à passer quelque peu de iours sans me courroucer pour quelque occasion
que ce fust, comme de m'enyurer, ou de boire du vin, ne plus ne moins que si ie sa-
crifiois à Dieu vn sacrifice sans effusion de vin, ains seulement de miel: & puis m'es-
sayant pour vn mois ou pour deux, ie gaignois ainsi petit à petit en auant du temps,
m'exerceant de tout mon pouuoir à la patience, ou me contregardant avec tous bons
& honestes propos gracieux, doux & paisibles, pur & net de toutes mauvaises pa-
roles, de melchantes actions, & d'une passion, qui pour vn bien peu de plaisir, & ice-
luy encore peu honeste, apporte de grands troubles, & finalement vne repentance
tres-villaine. Dont avec la grace de Dieu qui m'y aidait, à mon aduis, l'experience H
m'a donné euidentement à cognoistre, que ceste mansuetude, clemence, benignité &
debonnairété, n'est à nul des familiers qui viuent & conuersent ordinairement en-
semble, si douce, si agreable, ne si plaisante, qu'elle est à ceux mesmes qui l'ont im-
primee en leur ame.

Ce reste
semble auoir
esté adiou-
sté par quel-
que Chre-
stien, & n'est
point du sty-
le de l'au-
teur.

De la

A



E meilleur seroit, à l'adventure, de ne se tenir du tout point en maison qui fust mal aëree, mal percee, obscure, froide, & mal saine : mais encore si pour l'auoir de long temps accoustumee aucun y.vouloit demourer, il y pourroit en remuant les veuës, en changeât la montee, en ouurant quelques huys, & en fermant quelques autres, la rendre plus claire, mieux à propos exposee au vent, & plus salubre : car on a amendé des villes mesmes toutes entieres, par semblables remuemens :

comme lon diët que Cheronee, deuers le Soleil leuant, laquelle au parauant regardoit vers le Ponant, & receuoit le couchant du costé du mont de Parnasse : & le Philoso-

B phe naturel Empedocles ayant faict estoupper vne bouche & ouuerture de montaigne, de laquelle il sortoit vn vent de Midy pesant & pestilent à toute la campagne d'au dessoubs, osta l'occasion de la pestilence qui estoit parauant ordinaire en toute la contree. Pour autant donc qu'il y a des passions de l'ame pestilentes & domma-geables, comme celles qui luy apportent trauail, tourmente, & obscurité, le meilleur seroit les chasser de tout poinct, & les ietter entierement par terre, pour se donner à foy-mesme vne veuë libre, vne lumiere claire, & vn vent salubre, ou pour le moins les rechanger & rhabiller en les changeant ou destournant autrement : comme pour exemple, sans en chercher plus loing, la curiosité est vn desir de sçauoir les tares & imperfections d'autrui, qui est vn vice ordinairement conioinct avec enuie & malignité : car pourquoy est-ce, homme par trop enuieux, que tu vois si clair es affaires d'autrui, & si peu es tiens propres? destourne vn peu du dehors, & retourne au dedans ta curiosité, si tant est que tu prennes plaisir à sçauoir & entendre des maux, tu trouueras bien chez toy-mesmes à quoy passer ton temps :

C

Autant que d'eau autour d'une Isle il passe,

Et qu'en vn bois de fueilles il s'amasse :

autant trouueras-tu de pechez en ta vie, de passions en ton ame, & d'omissions en ton deuoir. Car, comme Xenophon diët, que chez les bons mesnagers il y a lieu propre pour les vtenfiles destinez à l'usage des sacrifices, autre lieu pour la vaisselle de table, & qu'ailleurs sont situez les instruments du labourage, & ailleurs à part ceux qui sont necessaires à la guerre : aussi trouueras-tu en toy des maux qui procedent les vns d'en-
En son Oe-
conomique.
 uie, les autres de ialousie, les autres de lascheté, & les autres de chicheté : amuse toy à les reuifiter, à les considerer : estouppe & bousche toutes les aduenues, & toutes les portes & fenestres qui regardent chez tes voisins, & en ouure d'autres qui respondent à ta chambre, au cabinet de ta femme, au logis de tes seruiteurs : là tu trouueras à quoy t'amuser avec profit & sans malignité, là tu trouueras des occupations profitables & salutaires, si tu aymes tant à enquerir & rechercher ce qui est caché, pourueu que chascun veuille dire à par foy,

Où ay-ie esté? qu'ay-ie faict ou meffaiict?

Qu'ay-ie oublie que ie deusse auoir faict?

Mais maintenant, ainsi comme les fables disent, que la fee Lamia ne faict que chanter quand elle est en sa maison estant aueugle, d'autant qu'elle a ferré ses yeux en quelque vaisseau à part : mais quand elle sort dehors, elle se les remet, & voit alors : aussi chascun de nous au dehors, & pour contempler les autres, adiousté à la male intention la curiosité, comme vn œil, & en noz propres defaults, & en noz maux, nous auons la barlue par ignorance à tout propos, à faute d'y employer les yeux & la clarté de la lumiere. Voyla pourquoy le curieux est plus vtile à ses ennemis qu'il n'est pas à luy mesme, d'autant qu'il descouure, met en euidence, & leur monstre, ce dont il

De la curiosité.

se faut garder, & ce qu'ils doiuent corriger, & ce pendant il ne voit pas la plus part de E
ce qui est chez luy, tant il est esblouy à regarder ce qui est au dehors : mais Vlysses
homme sage ne voulut pas mesme parler à sa propre mere deuant qu'il eust enquis &
entendu du prophete, ce pourquoy il estoit descendu aux enfers, & apres qu'il l'eut
entendu, alors il se tourna à parler & à sa mere & aux autres femmes, demandant qui
estoit Tyro, qui estoit la belle Chloris, & pour quelle occasion Epicaste estoit morte,

Odyss. II.

S'estant pendue avec vn lacs mortel

Aux soliueaux du hault de son hostel.

Mais au contraire, nous mettans à non-chaloir, & ne nous soucians point de sçauoir
ce qui nous touche, allons rechercher la genealogie des autres, que le grand pere de
nostre voisin estoit venu de la Syrie, que sa nourrice estoit Thracienne, que vn tel
doit trois talents, & n'en a point encore payé les arrerages, & nous enquerons de tel-
les choses, d'où reuenoit la femme d'un tel, & qu'estoit ce qu'un tel & un tel disoient
à part en un coing. Au contraire, Socrates alloit ça & là enquerant de quelles raisons F
vsoit Pythagoras pour persuader les hommes, & Aristippus en la solennité & assem-
blee des ieux Olympiques se rencontrant en la compagnie d'Ischomachus, luy de-
manda de quelles persuasions vsoit Socrates pour rendre les ieunes hommes si fort
affectionnez à luy : & comme l'autre luy en eust communiqué quelque petit de se-
mence & de monstre, il en fut si passionné que son corps en deuint incontinent tout
fondu, passe & deffaict, iusques à ce que s'en estant allé à Athenes avec ceste ardente
soif, il en puisa à la source mesme, & cogneut le personnage, ouit ses discours, & sçeut
que c'est de la Philosophie, de laquelle la fin est cognoistre ses maux, & le moien de
s'en deliurer : mais il y en a qui pour rien ne veulent voir leur vie, comme leur estant
un tres mal-plaisant spectacle, ny replier & retourner leur raison comme vne lumiere
sur eux mesmes, ains leur ame estant pleine de toutes sortes de maux, & redoutant
& craignant ce qu'elle sent au dedans d'elle mesme, faulte dehors, & va errant ça & là
à rechercher les faicts d'autrui, nourrissant & engraisant ainsi sa malignité : car ainsi G
que la poule, bien souuent qu'on luy aura mis à manger deuant elle, s'en ira neant-
moins gratter en un coing, là où elle aura peut estre apperceu en un fumier quelque
grain d'orge : semblablement aussi les curieux, passans par dessus les propos ex-
posez à chascun, & les histoires dont chascun parle, & que lon ne defend point d'en-
querir, ny n'est on point marry quand on les demande, vont recueillant & amassant
les maux secrets & cachez de toute la maison. Et toutefois la responce de l'Ægy-
ptien fut gentille & bien à propos à celuy qui luy demandoit, que c'estoit qu'il por-
toit enueloppé : c'est à fin que tu ne le sçaches pas, qu'il est enueloppé. Aussi toy cu-
rieux pourquoy vas-tu ainsi recherchant ce qui est caché ? car si ce n'estoit quelque
chose de mal on ne le cacheroit pas : & si y a plus, que lon n'a pas accoustumé d'en-
trer de plein vol en la maison d'autrui sans frapper à la porte, & maintenant on vse
de portier pour mesme occasion : mais anciennement on auoit des marteaux atta- H
chez aux portes dont on tabouroit, pour aduertir ceux de dedans, à fin qu'un estran-
ger ne surprist point la maistresse au milieu de la maison, ou la fille à marier, ou un ser-
uiteur que lon fouetteroit, ou des chambrieres qui cryeroient, mais c'est là où plus
volontiers le curieux se glisse : de maniere qu'il ne verroit pas volontiers encore qu'on
l'en priaist, vne maison honeste & bien composee, mais ce pourquoy on vse de clef,
de verrou, & de porte, c'est ce qu'il appetite descouvrir, & le mettre en veüe de tout le
monde. Et toutefois, comme disoit Ariston, les vents que nous haïssons le plus,
ce sont ceux qui nous rebrassent noz habillemens : mais le curieux ne rebrasse pas seu-
ment les robbes & les sayes de ses voisins, mais il ouure iusques aux parois, il ouure
tout arriere les portes, & penetre mesme à trauers le corps de la tendre pucelle, comme
un vent enquerant de ses ieux, ses danfes & ses veilles, & les calumniant : & comme
le poëte

A le poëte comique se moquant de Cleon dit, que
Ses deux mains sont au pais d'Ætolie,
Et son esprit est en la Clopidie,

voulant dire qu'il ne faisoit que demander, que prendre & dérober: aussi l'entendement du curieux est tout ensemble és palais des riches, & maisonnettes des pauvres, és cours des Roys, és chambres des nouveaux mariez: il furette toutes choses, & s'enquiert des affaires des passans, des seigneurs & capitaines, & quelquefois non sans danger, ains comme si quelqu'un par curiosité d'apprendre la qualité de l'Aconite, en goustoit, se trouueroit mort auant qu'il en sceust rien cognoistre: aussi ceux qui recherchent les maux des grands, se perdent eux mesmes auant que d'en pouuoir rien sçauoir: car ceux qui ne se contentent pas de la lumiere abondante des rayons du Soleil, qui s'espendent si clairement sur toutes choses, ains veulent à plein fond regarder le cercle mesme de son corps, en osant se promettre qu'ils penetreront sa clarté, & en-

Belle similitude.

B treront des yeux à force au beau milieu, ils s'aveuglent. Et pourtant Philippides le ioueur de Comédies respondit vn iour bien sagement au roy Lyfimachus qui luy disoit, Que veux tu que ie te cōmunique de mes biens, Philippides? Ce qu'il vous plaira,
Sire, dit-il, prouueu que ce ne soit point de voz secrets. Car ce qu'il y a de plus beau & de plus plaissant en l'estat des Roys se monstre au dehors, exposé à la veüe d'un chacun: comme sont leurs festins, leurs richesses, leurs festes, leurs liberalitez & magnificences, mais s'il y a quelque chose de caché & secret, ne vous en approchez pas. La ioye d'un Roy en prosperité ne se cache point, ny son rire quand il est en ses bonnes, ny quand il se prepare à faire quelque grace & quelque liberalité: mais s'il y a quelque chose de secret, c'est cela qui est formidable, triste, non approchable, & où il n'y a pas matiere de rire: car ce sera ou vn amas de rancune couuerte, ou vn proiect de quelque vengeance, ou vne ialousie de femme, ou vne deffiance de quelques vns de ses mignons, ou vne suspicion de son fils. Fuy ceste espeße & noire nuee, tu verras bien quel tonnerre & quel esclair elle iettera, quand ce qui est maintenant caché viendra à se creuer. Quel moien doncques y a il de la fuir? c'est de destourner & tirer ailleurs la curiosité, mesmemēt à rechercher les choses qui sont & plus belles & plus honestes: recherche ce qui est au ciel, ce qui est en la terre, en l'air, en la mer. Tu demandes à voir ou de grandes ou de petites choses: si tu en aimes à voir de grandes, recherche le Soleil, enquiers toy là où il descend, de là où il monte: cherche la cause des mutations qui se font en la Lune, comme tu ferois les changements d'un homme: comment est-ce qu'elle a perdu vne si grande lumiere, d'où est-ce qu'elle l'a depuis recouuree, & comment est-ce que,

Premierement de non point apparente
Elle se monstre vn petit esclairante,
Embellissant sa belle face ronde,
D Et l'emplissant de lumiere feconde:
Puis de rechef se va diminuant,
Et s'en retourne en son premier neant.

& cela sont des secrets de nature: mais elle n'est pas marrie quand on les recherche. Te deffies tu de pouuoir trouuer les grandes choses? recherche les petites: Comment est-ce qu'entre les arbres les vns sont tousiours verds, floriss, reuestus de leurs beaux habillements, & monstrent leurs richesses en tout temps: les autres sont aucunesfois semblables à ceux-là, mais puis apres, aiants, comme vn mauuais mefnager, tout à vn coup mis hors, & despendu tout leur bien, ils demeurent tout nuds & pauvres: & pourquoy est-ce que les vns produisent leurs fruiets ronds, les autres longs, & les autres angulaires: car il n'y a mal ny danger quelconque à toutes ces enquestes là. Mais s'il est force que la curiosité s'applique tousiours à rechercher choses mauuaises, cōme

De la curiosité.

vn serpent venimeux se nourrit & se tient tousiours en lieux pestilents, menons-la à la lecture des histoires, & luy presentons abondance & affluence de tous maux : car là elle trouuera des ruines d'hommes, pertes de biens, corruptions de femmes, des seruiteurs qui se sont esleuez contre leurs maistres, calomnies d'amis, empoisonnements, enuies, ialousies, destructions de maisons, euersions de royaumes & de seigneuries : faoulet'en, remply t'en, prens y tant que tu voudras de plaisir, tu ne fascheras ny ne ennuyras personne de ceux avec qui tu conuerferas : mais il semble que la curiosité ne se delecte pas de maux qui soient desia rances, & vieux, ains tous frais & tous recens, & qu'elle prenne plus de plaisir à voir tousiours de nouuelles tragœdies : car quant aux comédies & spectacles de ioyeuseté, elle ne s'y arreste pas volontiers. Et pourtant si quelqu'un raconte l'appareil d'une nopce, ou d'un sacrifice, ou d'une monstre, le curieux l'escoutera froidement, & negligemment, & dira qu'il l'aura desia entendu d'ailleurs, commandera à celui qui fait le conte, qu'il passe cela, ou qu'il l'abbrege : mais si quelqu'un assis bec à bec raconte comme une fille aura esté despucelée, ou une femme violée, ou un procez qui se va commancer, ou une querelle dressée entre deux freres, alors il ne sommeille ne il ne vague pas,

Ains pour ouir le conte il s'appareille,
En approchant soigneusement l'aureille.

Et ceste sentence,

Helas que l'homme est prompt à escouter
Plus tost le mal, que le bien raconter !

cela proprement est dit à la verité touchant la curiosité : car ainsi comme les cornets & ventoses attirent du cuir ce qu'il y a de pire, aussi les oreilles des curieux attirēt tous les plus mauuais propos qui soient : ou pour mieux dire, comme les villes & citez ont des portes maudites & malencontreuses, par lesquelles elles font sortir ceux que lon mène executer à la mort, & par où elles iettent hors les ordures, & les hosties d'execration & de malediction, & iamais n'y entre, ny n'en sort chose qui soit nette, sainte, ny sacrée : aussi les oreilles du curieux sont de pareille nature, car il n'y passe rien qui soit gentil, ny bon, ny honeste, ains tousiours y trauerse & hantent paroles sanglantes, apportans quand & elles des contes execrables, pollus, & contaminez,

Larmes & pleurs sont en toute saison

Le Rossignol qu'on oyt en ma maison.

Cela est la seule muse, la seule Sirene des curieux : il n'y a rien qu'ils oyent plus volontiers : car curiosité est une conuoitise d'ouir les choses que lon tient closes & cachees : or n'y a il personne qui cache un bien qu'il possède, veu que bien souuent on simule d'en auoir que lon n'a pas : ainsi le curieux conuoitant de sçauoir & entendre des maux, est entaché de ceste malheurté, que les Grecs appellent Epichærecakia, qui signifie ioye du mal d'autrui, passion qui est sœur germaine de l'enuie, d'autant qu'enuie est douleur du bien d'autrui, & l'autre peruersité, est ioye du mal : toutes lesquelles deux passions procedent d'une peruerse racine & d'une autre passion sauage & cruelle, qui est la malignité. Or est-il si facheux & si moleste à un chascun de descouurir les maux secrets qu'il a, que plusieurs ont mieux aimé se laisser mourir, que de declarer aux medecins les maladies cachees qu'ils enduroient : car supposez que Erophilus ou Erasistratus, ou bien Esculapius mesme du temps qu'il estoit encore homme, vint en vostre maison vous demander, à un homme s'il auroit une fistule au fondement, ou si c'estoit une femme, si elle auroit point un chancre en la matrice, aiant en sa main les outils de chirurgie, & les drogues qui sont propres à la guarison de tels maux : qui est celui qui ne chassast bien au loing un tel medecin, qui sans attendre que lon eust affaire de luy, & que lon l'eust mandé, viendroit de gayeté de cœur, & de son propre mouuement, pour entendre les maux d'autrui : encore que la curiosité & le soing de bien particulièrement enquerir, soit salutaire en cest

art

A art là? là où les curieux recherchent en autrui ces mêmes maux là; & d'autres encore pires: il est vray que ce n'est pas pour les guarir, mais seulement pour les descouvrir: au moien de quoy ils sont à bon droit haïs de tout le monde. Car nous haïssons les gabelleurs, & sommes marris contre eux, non quand ils font payer la gabelle pour les hardes que lon fait entrer à descouvert en la ville, mais quand ils viennent rechercher & fureter les besongnes & hardes d'autrui, encore que l'autorité publique leur dōne loy de ce faire, & qu'ils reçoivent dommage quand ils ne le font pas: mais au contraire, les curieux laissent perdre & abandonnent leurs affaires propres, pour vacquer à enquerir ceux d'autrui. Ils ne vont pas souvent aux champs, d'autant qu'ils ne peuvent supporter le requoy ny le silence de la solitude: mais si d'adventure apres vn long espace de temps, il leur aduient d'y aller, ils ietteront plus tost l'œil sur les vignes de leurs voisins que sur les leurs, & s'enquerront combien de bœufs seront morts à leur voisin, ou combien de muys de vin luy seront aigris, & soudain apres qu'ils se seront empris de telles curieuses demandes, ils s'en refuiront à la ville. Car le vray & bon laboureur ne se souciera mesmes des nouvelles qui sans s'en enquerir luy viendront de la ville: car il dit,

Puis en marrant il me racontera

Soubs quelles loix paix faitte se fera:

Car le meschant fait mestier de s'enquerre,

Allant par tout, & de paix & de guerre.

Mais les curieux fuyans le labourage & l'agriculture, comme chose vaine & froide, qui ne produit point de grand cas, se iettent au beau milieu d'un Senat, d'une tribune où les harengues se font au peuple sur la place, au plus frequent lieu du port où abordent les nauires: Et bien y a il rien de nouveau? Comment, n'as tu pas esté ce matin sur la place? Penses tu que la ville se soit changée en trois heures? Si quelqu'un d'adventure luy fait ouuerture de tels propos, s'il est à cheual, mettant pied à terre, il l'embrassera, il le baisera, & dressera les oreilles: mais si celui qu'il rencontrera en son chemin luy dit, qu'il n'y a rien de nouveau, il luy respondra lors, Que dis tu? n'as tu pas passé par la place? n'as tu point esté au palais? & n'as tu point parlé à ceux qui sont venus d'Italie? Voila pourquoy j'estime, que les magistrats de la ville de Locres font bien: car si quelqu'un de leurs bourgeois reuenant des champs en la ville, demande, Et bien y a il rien de nouveau? ils le condamnent à l'amende: par ce que comme les cuisiniers pour bien ruer en cuisine ne demandent autre chose, que qu'il y ait force gibier, & les pescheurs force poisson: aussi les curieux ne souhaitent que qu'il y ait grande abondance de maux, & grand nombre d'affaires, grandes nouueautez, grands changements, à celle fin qu'ils aient tousiours de quoy chasser, & que tuer. Aussi fait sagement le legislateur des Thuriens, quand il defendit de farcer ne mocquer aucun es jeux publics & comedies, sinon les adulteres & les curieux: car il semble que l'adultere soit vne espece de curiosité, de rechercher la volupté d'autrui, & vne inquisition & recherche de ce que lon garde caché, & que lon ne veut pas estre veu de tout le monde. Et la curiosité semble estre vn deliement, violement & descouurement des choses secretes: or est il que communément ceux qui enquierent & sçauent beaucoup, parlent aussi beaucoup: c'est pourquoy Pythagoras ordonna aux ieunes gens cinq annees de silence, qu'il appella Echemythie, c'est à dire, tenir sa langue. Mais il est du tout necessaire, que mesdisance soit conioincte à curiosité: car ce qu'ils oyent volontiers, ils le redisent aussi volontiers: & ce qu'ils recueillent soigneusement des autres, ils le departent encore plus volontiers à d'autres. D'où vient qu'outre les autres maux que ce vice là contient, encore a il celui-là, qu'il est contraire à sa propre conuoitise: car il conuoite sçauoir beaucoup, & chascun le fuit & se donne garde de luy. Car on n'a pas à plaisir de faire rien qu'il voye, ne dire rien qu'il oye: ains fil

De la curiosité.

est question de consulter quelque affaire, on en remet la deliberation, & en differe lon E
la conclusion, iusques à ce que celuy-là tel sen soit allé: & si lon tient quelque propos
de secret, ou que lon face aucune chose de consequence, & il y suruient vn curieux,
on l'oste incontinent, & la cache lon, ne plus ne moins que de la viande qui est en
prise, quand on voit passer vn chat: de maniere que le plus souuent ce que lon dit, &
que lon fait deuant les autres, on le tait & le cele deuant celuy-là seul. Voyla pour-
quoy consequemment il est priué de toute foy, que nul ne se fie plus en luy, tellement
que nous fions plus tost des lettres missiues, ou nostre cachet, à des seruiteurs ou à
des estrangers, que non pas à des parents, familiers & amis, qui aient ce vice d'estre
curieux. Bien autrement fait le sage Bellerophon, lequel ne voulut pas ouurir les
lettres qu'il portoit, encore qu'il sceust bien qu'elles estoient escrites contre luy, &
s'abstint de toucher à la missiue du Roy, tout ainsi qu'il n'auoit pas voulu toucher à
sa femme, par la mesme vertu de continence: car la curiosité est vne incontinence,
comme l'adultere: mais outre l'intemperance il y a vne folie, & vne resuerie extreme: F
car c'est bien estre insensé & hors du sens extremement, que laissant tant de femmes
communes & publiques, vouloir penetrer à grands frais & grande despense iusques
à vne qui sera tenue sous la clef, & qui bien souuent sera laide. Tout autant en font
les curieux: car mettans en arriere plusieurs belles & plaisantes choses à voir & à ouir,
& plusieurs honestes passetemps & exercices, ils se mettront à crocheter les lettres
missiues d'autrui, ils approcheront l'oreille contre les parois des maisons d'autrui,
pour escouter ce qui se dit & se fait au dedans, ils iront oreiller ce que des vallets ou
des chambrières cacquetteront en vn coing, quelquefois avec danger, mais tousiours
avec honte & deshonneur: pourtant seroit-il tresutile aux curieux, pour les diuertir de
ce vice là, se resouuenir des choses qu'ils auroient au parauant sceuës & entenduës:
car si, comme Simonides souloit dire, que quand par interualles de temps il venoit
à ouurir ses coffres, il trouuoit tousiours celuy des salaires plein, & celuy des graces
uide: aussi si quelqu'un apres vne espace de temps venoit à ouurir l'armoire ou l'ar- G
riere boutique de la curiosité, & regardoit au fond, la trouuant toute pleine de choses
inutiles, malplaisantes & vaines, à l'aduenture luy sembleroit cest amas-là bien fas-
cheux, & que celuy qui l'auroit fait, auroit eu bien peu d'affaires. Car voyez, si quel-
qu'un feuilletant les escripts des anciens, en alloit elisant & triant ce qu'il y auroit de
pire, & en composoit vn liure, comme les vers d'Homere defectueux, comman-
ceans par vne syllabe briefue, ou des incongruitez que lon rencontre es Tragædies,
ou des obiections villaines & deshonestes que fait Archilochus à l'encontre du sexe
feminin, en se diffamant luy mesme: celuy-là ne seroit il pas digne de ceste tragique
malediction,

Maudit sois tu, qui vas faisant recueil,

Des maux de ceux qui gisent au cercueil?

mais sans ceste malediction, c'est à luy vn amas qui ne luy apporte ny honneur, ny H
profit, d'aller ainsi par tout recueillir les fautes d'autrui: comme on dit que Philippus
fit vn amas des plus meschans & plus incorrigibles hommes qui fussent de son temps,
lesquels il logea ensemble dans vne ville qu'il fit bastir, & l'appella Poneropolis,
c'est à dire la ville des meschans: aussi les curieux en recueillant & amassant de tous
costez les fautes & imperfections, non des vers, ny des poëmes, mais des vies des
hommes, font de leur memoire vn archiue & registre fort mal-plaisant, & de fort
mauuaise grace, qu'ils portent tousiours quand & eux. Et tout ainsi comme à Rome il
y a des personnes qui ne se souciët point d'acheter de belles peintures ny de belles sta-
tues, non pas mesmes de beaux garçons, ny de belles filles de celles que lon expose en
vente, ains s'addonnent à acheter affectueusement des monstres en nature, comme
qui n'ont point de iambes, ou qui ont les bras tourne au cōtraire, qui ont trois yeux,
ou la

A ou la teste d'une austruche, prenans plaisir à les regarder, & à rechercher s'il y a point de corps mêlé de diverses especes,
Monstre auorté de l'un & l'autre sexes :

mais qui nous meneroit ordinairement veoir de tels spectacles, on s'en fâcheroit incontinent, & feroient mal au cœur à les voir : Aussi ceux qui curieusement vont rechercher les imperfections des autres, les infamies des races, les fautes & erreurs advenues es maisons d'autrui, ils doivent rappeler en leur memoire comme les premieres telles observations ne leur ont apporté ny plaisir aucun ny profit. Or l'un des plus grands moiens pour diuertir ceste vicieuse passion, c'est l'accoustumance, si commandans de loing nous nous exerçons & accoustumons à ceste continence : car l'accroissement se fait par l'accoustumance, gagnant le mal tousiours petit à petit en auant : mais comment il s'y faut accoustumer, nous le sçaurons & entendrons en parlant de l'exercitation. Premieremēt doncques nous commencerons aux plus petites & plus
B legeres choses : car quelle difficulté y a il en passant chemin de ne s'amuser point à lire les inscriptions des sepultures ? ou quelle peine est-ce qu'en se promenant passer des yeux outre les escriteaux qui s'escriuent contre les murailles, en supposant vne maxime, qu'il n'y a rien qui soit ny profitable ny plaisant ? car ce sera quelqu'un qui fera mention d'un autre en bonne part, ou, celui-là est le meilleur amy que j'aye, & plusieurs autres escripts pleins de telle badinerie, lesquels semblent n'apporter point de mal pour les lire, mais ils en apportent secrettement beaucoup, d'autant qu'ils engendrent vne coustume de rechercher ce que lon ne doit pas enquerir. Et comme les veneurs n'endurent pas que leurs chiens se déuoyent, ne qu'ils poursuivent toutes odeurs, ains les retiennent & retirent en arriere avec leurs traicts, pour garder le nez & le sentiment pur & net à ce qui est propre à leur office, à fin qu'ils soient plus ardens à suivre la trace,

Suiuans avec le sentiment du nez

C Les animaux qui seront destournez.

aussi faut-il oster au curieux ses saillies & ses courses à vouloir tout escouter & tout regarder, & en le tenant de court, le tirer & destourner à voir & ouïr seulement ce qui est vtile. Car ainsi comme les aigles & les lions en marchant referrent leurs ongles au dedans, de peur qu'ils n'en vsent & emoussent les pointes : aussi estimans que la curiosité a quelque partie du desir de beaucoup sçauoir & apprendre, gardons nous que nous ne l'employons & la rebouchons en choses mauuaises & viles. Seconde-ment accoustumons nous en passant par deuant la porte d'autrui, de ne regarder point dedans, & ne toucher point de l'œil à chose qui y soit, comme estant l'œil l'une des mains de la curiosité, ains aions tousiours deuant les yeux le dire de Xenocrates, qui disoit, qu'il n'y auoit point de difference entre mettre les yeux ou les pieds en la maison d'autrui : car ce n'est chose ny iuste, ny honneste, ny plaisante à voir,

Le dedans est laid à voir, estranger.

car qu'est-ce pour le plus ordinaire, sinon telles choses, des vtenfiles de mesnage, qui seront l'un deçà l'autre delà, des chambrières assises, & rien d'importance ny de plaisir ? mais ceste torse de regard qui tord l'ame quant & quant, & ce destournement en est laid, & la coustume n'en vault rien qui soit. Diogenes voiant vn iour Dioxippos qui faisoit son entree sur vn chariot triomphal en la ville, pour auoir gagné le prix es ieux Olympiques, & obseruant qu'il ne pouuoit retirer ses yeux de contempler vne belle ieune Dame qui regardoit l'entree, ains la suiuoit tousiours de l'œil, & se retournoit vers elle : Voyez, dit il, nostre champion victorieux & triomphant, qu'une ieune garce emmeine par le collet. Aussi verriez vous que les curieux ordinairement sont subiects à tordre le col, & se retourner à tout ce qu'ils voient & qu'ils oyent, apres qu'ils ont fait par accoustumance vne habitude de ietter les yeux par

De la curiosité.

tout: car il ne fault pas, à mon aduis, que le sentimēt exterieur vague & rage à son plaisir, comme vne chambriere dissoluë & mal apprise, ains faut que quand il est enuoyé par la raison deuers les choses, après auoir communiqué & traicté avec elles, qu'il s'en retourne incontinent deuers sa maistresse, pour en faire son rapport, & puis derechef se rasseoir au dedans de l'ame, estant tousiours attentif à ce que la raison luy commandera: mais maintenant il se fait ce que dit Sophocles,

En la Tragédie d'Electra.

Comme vn poulain qui a la bouche forte,
Le mors, la bride, à force, & l'homme emporte.

Les sentimens qui n'ont pas esté bien instruits ne bien exercitez, courants deuant le commandement de la raison, tirent quand & eux bien souuent & precipitent l'entendement là où il ne faudroit point: pourtant est-ce chose faulse qui se dit communement, que Democritus le philosophe festaignit la veuë en fichant & appuyant ses yeux sur vn mirouer ardant, & receuant la reuerberation de la lumiere d'iceluy, à fin qu'ils ne luy apportassent aucun destourbier en euoquant souuent la pensee au dehors, ains la laissant au dedans en la maison, pour vacquer au discours des choses intellectuelles, estans comme fenestres, respondantes sur le chemin, bouchées. Bien est-il vray, que ceux qui besongnent beaucoup de l'entendement, se seruent bien peu du sentiment. C'est pourquoy ils bastissoient anciennement les temples des Muses, lieux destinez à l'estude, qu'ils appelloient Musées, le plus loing qu'ils pouuoient des villes: & appelloient la nuit, Euphroné, comme qui diroit la sage: estimans que la solitude, le repos, & le n'estre point destourbé, seruent beaucoup à la contemplation & inuention des choses que lon cherche de l'entendement. D'auantage il n'est pas non plus malaisé, ne difficile, quand il y a d'aduenture quelques hommes qui tantent & finiurent les vns les autres sur la place, de ne s'en approcher point, ny quand il se fait vn concours de plusieurs personnes, pour quelque occasion, ne s'en bouger point, ains demourer en sa place: & si tu ne t'y peux tenir, te leuer & t'en aller ailleurs: car tu ne gaigneras rien à te mesler parmy les curieux, & recevras grand profit en diuertissant à force la curiosité, & la reprimant & contraignant par accoustumance d'obeir à la raison. Et pour tendre & roidir encoré plus l'exercitation, il sera bon quand il se iouëra quelque ieu dedans le theatre, qui retiendra fort les spectateurs, passer oultre, & repoulses tes amis qui te voudront mener voir vn excellent balladin, ou vn excellent ioueur de comedies, ny se retourner quand on oyra quelque clameur ou quelque bruit, procedant de la carriere où lon faiet au ieu de pris courir les cheuaux: car ainsi comme Socrates conseilloit de s'abstenir des viandes qui prouoquent les hommes à manger quand ils n'ont point de faim, & les bruuages qui conuiuent à boire, encore que lon n'ait point de soif: aussi faut il que nous fuyons, & nous gardions de voir ny d'ouïr chose, quelle qu'elle soit, qui nous arreste ou retienne quand il n'en est point de besoin. Le bon Cyrus ne vouloit pas voir la belle Panthea, & comme Araspes l'un de ses mignons luy dist, que sa beauté estoit bien chose digne de voir: voyla pourquoy, dit il, il vaut doncques mieux du tout s'abstenir de l'aller voir: car si maintenant à ta persuasion ie l'allois voir, à l'aduenture que cy apres elle mesme m'induiroit d'y aller, encore que ie n'en eusse pas le loisir, & me soir apres d'elle pour contempler sa beauté, en laissant ce pendant aller plusieurs affaires de grande importance. Semblablement Alexandre ne voulut point aller voir la femme de Darius, bien que lon luy dist que c'estoit vne fort belle ieune dame, ains allant visiter sa mere, qui estoit desia vieille, s'absteint de voir l'autre qui estoit belle & ieune: mais nous, iettans les yeux iusques dedans les litteres des femmes, & nous pendans à leurs fenestres, ne cuidons pas commettre aucune faute, en laissant ainsi la curiosité glisser & couler à tout ce qu'elle veut. Aussi est il expedient pour s'exercer à la iustice, laisser à prendre quelquefois ce que lon pourroit bien iustement faire,

à fin

- A à fin de s'accoustumer à s'abstenir tant plus de prendre rien iniustement. Semblablement aussi pour s'accoustumer à la temperance, s'abstenir quelquefois d'habiter avec sa propre femme, à fin que iamaïs on ne soit esmeu de la conuoitise de celle d'autrui. Te seruant donc de ceste façon de faire encore contre la curiosité, parforce toy de ne faire pas semblant de voir ny d'ouïr quelque chose qui t'appartienne : & si quelqu'un te veult faire quelque rapport de ta maison, de passer oultre, & reietter arriere quelques propos qui sembleroient auoir esté dictz de toy à ton desauantage. Car à faute de cela, la curiosité enuolopa Oedipus en de tresgrands maux, par ce que voulant sçauoir qui il estoit, comme n'estant pas de Corinthe, en allant à l'oracle pour luy demander, il rencontra Laius par le chemin, qu'il tua, & espousa sa propre mere, par le moyen de laquelle il obtint le royaume de Thebes : & lors qu'il sembloit estre tres-heureux, encore se voulut-il chercher soy-mesme, combien que sa femme l'en destournaist le plus qu'elle pouuoit : & plus elle le prioit de ne le faire pas, plus il en pressa un vieillard qui sçauoit toute la verité du faict, en le contraignant par toutes voyes, tant que le discours de l'affaire l'ayant desia mis sur le bord de la suspicion, comme le vieillard se fust escrié,

Helas ie suis sur le poinct dangereux

De declarer vn cas bien malheureux :

toutefois estant desia surpris de sa passion de curiosité, & le cœur luy en battant, il respond,

Et moy aussi sur le poinct de l'entendre,

Mais toutefois il le me faut apprendre.

tant est aigre, doux, & malaisé à contenir le chattouillement de la curiosité, comme vn vlcere, qui plus on le gratte & plus s'enfangeante luy-mesme : mais celuy qui est entierement net & deliure de telle maladie, & qui est de nature paisible, quand il aura ignoré quelque mauuaise nouuelle, il dira,

O fainct oubly de passée tristesse,

- C Tant tu es plein de tresgrande sagesse!

Et pourtant se faut-il petit à petit accoustumer à cecy, quand on nous apportera des lettres de ne les ouurir pas viftement & à grande haste, comme font la plus part, que si les mains demeurent vn peu trop à leur gré à deslier la ficselle, ils la maschent à belles dents : & si l'arriue vn messager de quelque part, ne courir pas incontinent à luy, ny ne se leuer à l'estourdie de sa place, soudain que quelqu'un viendra dire, l'ay quelque chose de nouveau à vous conter : mais bien eusses-tu quelque chose de bon & vtile à me dire. Vn iour que ie declamois à Rome, Rusticus, celuy que Domitian depuis fait mourir, pour l'enuie qu'il portoit à sa gloire, y estoit, qui m'escoutoit : au milieu de la leçon il entra vn soudard qui luy bailla vne lettre missiue de l'Empereur : il se fit là vn silence, & moy-mesme feis vne pause à mon dire, iusques à ce qu'il l'eust leuë : mais luy ne voulut pas, ny n'ouurit pas sa lettre deuant que i'eusse acheué mon discours, & que l'assemblee de l'auditoire fust departie : dont toute la compagnie prisa & estima beaucoup la grauité du personnage. Mais quand on nourrit la curiosité de ce qui est bien loisible, on la rend à la fin si forte & si violente, que puis apres on ne la peult pas facilement retenir, quand elle court aux choses defendues, pour la longue accoustumance. Ains telle sorte de gens ouurent les lettres, ils s'ingerent aux conseils secrets de leurs amis : ils veulent voir à descouuert les choses fainctes, qu'il n'est pas licite de voir : ils se vont enquerant des faicts & dictz secrets des Princes : & toutefois il n'y a rien qui rende tant odieux les tyrans que les mousches, c'est à dire, les espions, qui vont par tout espiant ce qui se fait, & qui se dit, encore qu'ils soient contraincts de tenir de telles gens aupres d'eux. Or le premier qui eut riure soy de telles mousches que lon appelle Otacoustes, comme qui diroit,

Sophocles
en la tragedie
d'Oedipus le tyran.

De la curiosité.

les oreilles du prince, fut le ieune Darius, qui ne se fioit pas de soy-mesme, & auoit E tout le monde suspect: mais ceux que lon appelloit *ωρολογιας*, comme qui diroit, courtiers ou rapporteurs, ce furent les tyrans de Sicile Denys, qui les meslerent parmy les bourgeois & le peuple de Syracuse: aussi quand vint la mutation de l'estat, ce furent les premiers que les Syracusains massacrerent. Car mesme la nation des Sycophantes, c'est à dire des calomniateurs, est de la confrairie des curieux, toutefois encore ces calomniateurs là recherchent s'il y a aucun qui ait commis ou voulu commettre quelque malefice: mais les curieux descouurant les mesadventures fortuites de leurs voisins, les exposent en veüe de tout le monde. Aussi dit on que ce mot d'Aliterius qui signifie meschant, a esté premierement ainsi denommé de la curiosité: car estant la famine bien grande à Athenes, ceux qui auoient du bled en leurs maisons, ne le portoient pas au marché, ains le mouloient secrettement la nuit en leurs maisons: & ceste maniere de curieux alloient çà & là, oreillant la où ils entendoient le bruit des moulins, & de là en furent ainsi appelez. Pareillement aussi dit on, que le nom des F Sycophantes est venu de semblable occasion: car aiant esté prohibé & defendu par edict, d'emporter hors du pais des figues, ceux qui alloient espian & descourant ceux qui en emportoient, en furent de là appelez Sycophantes. Et pourtant ne sera-il point inutile, que les curieux pensent à cela, à fin qu'ils aient honte en eux-mesmes, d'estre trouuez semblables en mœurs, & façons de faire, à ceux qui sont les plus hays, & les plus mal-voulus du monde.

Du contentement ou repos de l'esprit.

PLVTARQUE A PACCIVS S.



'A Y receu ta lettre bien tard, par laquelle tu me pries de G t'escire quelque chose de la tranquillité de l'esprit, & quant & quant de quelques passages du Timée de Platon, lesquels semblent auoir besoing de plus diligente exposition. Or est-il aduenü qu'en mesme temps, nostre commun amy Eros a eu occasion de nauiguer en diligence à Rome pour quelques lettres qu'il receut du tres-vertueux personnage Fundanus, par lesquelles il le pressoit fort de partir incontinent pour se rendre deuers luy: ainsi n'ayant pas du temps assez pour vacquer à loisir à ce que tu desirois, & ne pouuât souffrir que cest homme partant d'auec moy s'en allast les mains vuides vers toy, j'ay recueilly sommairement des memoires que j'ay de longue main compilez pour mon particulier, quelques sentences touchant la tranquillité de l'esprit: estimant que tu ne H n'as point demandé ce discours-là pour auoir le plaisir de lire vn traicté escript en beau langage, mais seulement pour t'en seruir à ton besoing: sçachant tresbien que pour estre en la bonne grace des Princes, & auoir la reputation de bien dire, & estre eloquent à plaider causes au palais, autant que pas vn autre qui soit à Rome, tu ne fais pas neantmoins comme le Tragique Merops, que la tourbe populaire transporta de vaine gloire iusques hors des bornes de passions naturelles, en luy donnant à entendre qu'il estoit bien heureux: ains retiens en memoire ce que tu as bien souuent entendu de nous, que ny le soulier Patricien ne guarit pas de la goutte des pieds, ny l'anneau precieux, les panaris: ny le diademe, de la douleur de teste: car dequoy seruent les grands biens à deliurer l'ame de toute fascherie, & à rendre la vie de l'homme tranquille, ny les grands honneurs, ny le credit en court, s'il n'y a au dedans qui en sçache vser

- A** vser honnestement, & si cela n'est tousiours accompagné du contentement, qui ne souhaite iamais ce qu'il n'a point? Et qu'est-ce autre chose cela, sinon la raison accoustumee & exercitee à refrener incontinent la partie irraisonnable de l'ame, qui sort aisement & souuent hors des gonds, & ne la laisse pas vaguer à son plaisir & se transporter à ses appetits? Ainsi donc comme Xenophon admoneste, que lon se souuienne des Dieux, & que lon les honore, principalement lors que lon est en prosperité, à fin que quand on sera en aduersité, on les puisse reclamer avec plus d'assurance, comme estans de longue main propices & amis: aussi faut-il que les hommes sages & de bon entendement, facent de longue main prouision des raisons qui peuuent seruir à l'encontre des passions, à fin qu'estans ainsi de longue main preparees, elles en profitent d'auantage au besoing. Car ainsi comme les chiens qui sont aspres de nature, s'aigrissent & abboient à toutes voix qu'ils entendent, & ne s'appaient qu'au son de celle qui leur est familiere, & qu'ils ont accoustumé d'ouïr: aussi n'est-il pas aisé de ramener à la raison les passions de l'ame effarouchées, sinon que lon ait des raisons propres & familières à la main, qui les reprennent aussi tost comme elles commencent à s'esmouuoir. Or quant à ceux qui disent, que pour viure tranquillement il ne se faut pas mesler ny entremettre de beaucoup de choses, ny en priué ny en public: En premier lieu ie dis, qu'ils nous veulent vendre trop cherement ceste tranquillité, nous la voulans faire acheter à pris d'oyfueté, qui est autant que fils admonestoient vn chacun comme estant malade, ainsi que fait Electra son frere Orestes,

Demeure quoy, miserable en ton liect.

- Mais ce seroit vne mauuaise medecine au corps, que pour le deliurer de douleur luy faire perdre le sentiment: & ne seroit de rien meilleur medecin de l'ame celuy qui pour luy oster tout ennuy & toute fascherie, la voudroit rendre paresseuse, molle, oubliante tout deuoir enuers ses amis, ses parents & son pais. Et puis cela n'est pas veritable, que ceux-là aient l'ame tranquille, qui ne s'entremettent pas de beaucoup de choses: car sil estoit vray, il faudroit doncques dire, que les femmes seroient plus reposees & plus tranquilles en leur esprit, que les hommes, attendu qu'elles ne bougent, pour la plus part, de la maison: mais maintenant il est bien vray, comme dit le poëte Hesiodé, que

Le vent trenchant de la bise qui gele

Ne perce point le corps de la pucelle.

mais les ennuis, les soucis, les courroux & mescontentemens, soit ou par ialousie, ou superstition, ou ambition, ou par tant de vaines opinions qu'à peine les pourroit on nombrer, se coulent bien aisement iusques dedans les cabinets des Dames. Et Laërtes qui vescu l'espace de vingt ans à part aux champs,

Seulet avec vne vieille il estoit,

- D** Qui son manger & son boire apprestoït: il s'esloingnoit bien de son pais, de sa maison, & de son royaume, mais il auoit tousiours douleur & tristesse en son cœur, qui tousiours est accôpaignée de langueur oyseuse, & de morne silence. Mais il y a d'auantage, que le non s'employer aux affaires, est ce qui bien souuent met l'homme en mesaise & trauail d'esprit, comme cestuy que décrit Homere,

Mais Achilles, de Peleus la race,

Leger du pied, plein de diuine grace,

Tenoit son cœur, sans d'aupres se bouger

De ses vaisseaux, ny iamais se renger

Avec les Grecs en bataille ou assise

D'aucun conseil, ny d'aucune entreprise,

Euripide
en la tragédie d'Orestes.

Au poëme
intitulé les
œuvres.

Odyss. 24.

Iliad. 1. 2.

Du contentement ou repos de l'esprit.

Iliad. 18.

Ains de despit à part se confumoit,
Et si rien plus que la guerre il n'aimoit.
dequoy luy mesme estant passionné & indigné en son cœur, dit puis apres,
Pres de mes nefz ie me voy fait-neant,
Pois de la terre inutile seant :

tellement que Epicurus mesme n'est pas d'aduis, qu'il faille demourer à requoy, ains suiure l'inclination de son naturel : les ambitieux & conuoiteux d'honneur, en se meslant d'affaires, & s'entremettant du gouuernement de la chose publique, disant qu'ils seroient autrement plus troublez, & plus trauaillez de ne rien faire, par ce qu'ils ne pourroient obtenir ce qu'ils desireroient : mais en cela il est homme de mauuais iugement, de semondre au gouuernement des affaires, non ceux qui sont les plus idoines à les manier, ains ceux qui moins peuuent reposer : car il ne faut pas mesurer ou determiner la tranquillité ou le trouble de l'esprit à la multitude, ou au petit nombre des affaires, ains à l'honnesteté ou deshonnesteté : car comme nous auons desia dit, il n'est pas moins ennuyeux, ne moins turbulént à l'esprit, omettre les choses honnestes, que commettre les deshonestes. Et quant à ceux qui estiment qu'il y ait determineement quelque speciale sorte de vie, qui soit sans aucune fascherie, comme quelques vns tiennent celle des laboureurs, d'autres celle des ieunes gens à marier, autres celles des Roys, Menander leur respond assez en ces vers,

O Phania, ie pensois que les hommes
Riches, qui ont argent à grosses sommes,
Sans à vsure en iamais emprunter,
Ne sceussent point que c'est de lamenter
Toutes les nuits : & en tournant à dextre
Sur vn costé, puis sur l'autre à fenestre,
Dire souuent hélas ! mais que leur œil
Iouist tousiours d'un gracieux sommeil.
mais depuis s'en estant approché, quand il apperceut que les riches souffroient autant de mesaise que les pauvres,

Ainsi donc est tristesse sœur germaine
Tousiours conioincte avecques vie humaine :
Les delicats qui vivent mollement,
Les gens d'honneur, se portans noblement,
En ont leur part : &, sans que point en yssent,
Les indigents avec elle vieillissent .

Mais c'est tout ainsi comme ceux qui sont timides, & qui ont mal au cœur quand ils vont sur la mer : car ils estiment qu'ils se trouueront mieux, & seront moins malades, s'ils passent d'une barque en un brigantin, & d'un brigantin en une galere, mais ils ne gagnent rien pour cela, d'autant qu'ils portent par tout quand & eux la cholere & la peur, qui leur causent ce mal de cœur : aussi les changemens de sortes de vie, n'ostent pas les ennuis & fascheries qui troublent le repos de l'esprit, lesquels ennuis procedent de faute d'experience des affaires, faute de bon discours, faute de se sçauoir bien accommoder aux choses presentes : c'est ce qui trauaille autant les riches que les pauvres : c'est ce qui fasche autant ceux qui sont mariez, que ceux qui sont à marier : c'est pourquoy ils fuyent le palais & les plaids, & puis ils ne peuuent endurer ny supporter le repos : c'est pourquoy ils poursuiuent d'estre auancez, & auoir grand lieu és courts des Princes, & puis quand ils y sont paruenus, soudain ils s'en ennuyent :

Difficile est contenter un malade,
ce dit le poëte Ion : car la femme le fasche, il accuse le medecin, il se courrouce à son lit

A liēt: vn sien amy luy ennuyra, pour ce qu'il le fera venu visiter, vn autre pour ce qu'il n'y fera pas venu, ou pour ce qu'il s'en ira: mais puis apres quand la maladie vient à se dissoudre, & que vne autre temperature & disposition du corps retourne, la santé reuiert qui rend toutes choses agreables & plaisantes: car celuy qui auparauant & hier reiettoit avec horreur des œufs, de l'amidon, & du pain le plus blanc du monde aujourdhuy mange du pain bis de mesnage, avec des oliues & du cresson, encore bien-aise & de bon appétit: aussi le iugement de la raison venant à se former en l'entendement de l'homme, luy apporte pareille facilité & mesme changemēt en toute sorte de vie. On dit qu'Alexandre aiant ouy le philosophe Anaxarche disputer & soute-
 nir, qu'il y auoit des mondes innumerables, se prit à pleurer: & comme ses familiers
 „ luy demandassent, qu'il auoit à larmoyer: N'ay-ie pas dit-il, bien cause de plorer,
 „ fil y a nombre infiny de mondes, veu que ie n'ay pas encore peu me faire seigneur
 „ d'vn seul? Là où Crates n'ayant pour tout bien qu'vne meschante cappe & vne besace,
B ne fait iamais autre chose que iouer & rire toute sa vie, comme fil eust tousiours esté de feste. Au contraire, Agamemnon se plaignoit de ce qu'il auoit à commander à tant de monde,

Tu vois le fils d'Atree Agamemnon,

Que Iupiter fait dessus l'eschignou

Du col, porter le faix pour tout le monde.

là où Diogenes, quand on le vendoit pour esclaue, estant couché tout de son long, se mocquoit du sergent qui le crioit à vendre, & ne se vouloit pas leuer, quand il luy
 „ commandoit, ains se iouoit, & se mocquoit de luy, en luy disant: Et si tu vendois vn
 „ poisson, le voudrois tu faire leuer? Et Socrates deuisoit familièrement de propos de
 philosophie en la prison: là où Phaëthon estant mēté iusques au ciel ploroit encore de
 despit, que lon ne luy vouloit pas dōner à regir & gouuerner les cheuaux & le chariot
 du Soleil son pere. Tout ainsi donc, comme le soulier se tord selon la torse & forme du
C pied, & non pas au contraire: aussi sont-ce les dispositions des personnes qui rendent
 les vies semblables à elles, car ce n'est pas l'accoustumance, comme quelqu'vn a vou-
 lu dire, qui rend la bonne vie plaisante à ceux qui l'ont choisie: mais l'estre sage &
 moderé, est ce qui rend la vie & bonne & plaisante tout ensemble. Et pourtant, puis
 que la source de toute tranquillité d'esprit est en nous, curons la & nettoions dili-
 gemment, à fin que les choses mesmes exterieures, & qui nous aduiendront de de-
 hors, nous semblent amies & familières, quand nous en sçaurons bien vser:

Point ne se faut courroucer aux affaires,

Il ne leur chaut de toutes noz choleres:

Mais se sçauoir à tout euenement

Accommoder, est faire sagement.

Car Platon accomparoît nostre vie au ieu du tablier, là où il faut que le dé die bien, &
D que le ioueur vse bien de ce qui sera escheut au dé. Or de ces deux poincts là, l'euenement & le sort du dé n'est pas en nostre puissance, mais le receuoir doucement & modereement ce qui plaist à la fortune nous enuoyer, & disposer chasque chose en lieu où elle puisse ou beaucoup profiter, si elle est bonne, ou peu nuire, si elle est mauuaise, cela est de nostre pouuoir & deuoir, si nous sommes sages. Car les fols eceruellez, qui n'entendent pas comment il se faut comporter en ceste vie humaine, sortent arrogamment hors des gonds en prosperité, & se resserrent vilainemēt en aduersité: ainsi sont-ils troublez par toutes les deux extremittez, ou pour mieux dire par eux-mesmes en l'vne & en l'autre extremité, & principalement en ce que lon appelle biens: ne plus ne moins que ceux qui sont maladifs en leurs personnes, ne peuvent supporter ny le chaud ny le froid. Theodorus, celuy qui pour ses mauuaises opinions fut surnommé Atheos, c'est à dire, sans Dieu, disoit qu'il bailloit ses propos

Du contentement ou repos de l'esprit.

avec la main droite à ses auditeurs, mais qu'ils les prenoient avec la main gauche: aussi E
les ignorans qui ne sçauent pas comment il faut viure, receuans à gauche bien souuent
la fortune qui leur vient à droite, y commettent de villaines fautes: mais les sages au
contraire font comme les abeilles, qui tirent du thym le plus penetrant & le plus sec
miel: aussi des plus mauuais & plus fascheux accidents, en tirent quelque chose de
propre & vtile pour eux. C'est doncques le premier poinct, auquel il se faut diure &
exerciter: comme celuy qui visant à donner d'une pierre à un chien, faillit le chien, &
„ assena sa maratre, Encore, dit-il, ne va il pas mal ainsi: aussi pouuons nous transferer
la fortune, en voulant & nous accommodant à ce qu'elle nous amene. Diogenes fut
chassé de son pais en exil, encore n'alla il pas mal ainsi pour luy: car ce bannissement
fut le commencement de son estude en philosophie. Zenon le Citieien auoit encore vne
nauiue marchande, & aiant nouuelles, qu'elle estoit perie, charge & tout coulee à bas
„ en pleine mer: Tu fais (dit-il) bien, fortune, de me renger à la robe longue, simple,
„ & à l'estude de philosophie. Qui nous empesche de les ensuiure en cela? Tu as esté de- F
bouté de quelque office public & magistrat que tu exerçois: Bien de par Dieu, tu viuras
aux champs, faisant profiter ton bien. Tu pourchassois d'entrer en la maison & au ser-
uice de quelque prince, tu en as esté esconduit: tu en viuras chez toy avec moins de
peine & avec moins de danger. Au contraire, tu es entré en maniemment d'affaires, où
il y a grand labeur & grand soucy: l'eau chaude du baing ne reconforte pas tant les
membres lassez, comme dit Pindare,

Aux Neme-
es ode. 4.

L'eau chaude ne reconforte
Les membres las, de la forte
Que la gloire, de se voir
Honneur & credit auoir,
Rend le labeur agreable,
Et la peine supportable.

T'est-il aduenu quelque defaueur ou quelque rebut par calomnie, ou par enuie? c'est G
un bon vent en poupe pour te remener droit à l'estude des lettres, & de la philoso-
phie, comme fait Platon, quand il fait naufrage de la bone grace de Dionysius le tyran.
Pourtant n'est-ce pas un moien de petite importance, pour mettre son esprit en repos,
que de considerer les grands, fils se font point emeus & troublez de pareil accident:
comme, Ce qui te mescontente, est-ce que tu ne peux auoir enfans de ta femme? re-
garde combien il y a d'Empereurs Romains, dont nul n'a laissé l'Empire à son fils. Es
tu fasché de te voir pauvre? Et à qui des Thebains aimerois-tu mieux ressembler qu'à
Epaminondas, & des Romains qu'à Fabricius? T'a lon violé ta femme? N'as-tu donc
pas leu ceste inscription qui est en la ville de Delphes, au temple d'Apollo, sur l'offran-
de qu'il y donna?

De terre & mer Agis Roy couronné,
M'a pour offrande à ce temple donné.

H

& n'as tu pas entendu comme Alcibiades luy corrompit sa femme Timæa, & comme
tout bas entre ses femmes elle mesme appelloit le fils qu'elle en eut, Alcibiades? mais
pourtant, cela n'engendra point qu'Agis ne deuint le plus grand & plus glorieux
homme de toute la Grèce en son temps. Ny semblablement la fille de Stilpon, pour
estre impudique, n'empescha point qu'il ne vescu aussi ioyeusement, comme autre
philosophe qui fust de son temps, ains, comme un Metrocles philosophe Cyni-
„ que luy eust reproché: Cela, respondit-il, est-ce ma faute, ou la faute d'elle? Metro-
„ des respondit, La faute en est à elle, & l'infortune en est à toy. Comment dis-tu cela,
„ repliqua Stilpon, les fautes ne sont-ce pas cheuttes? ouy vrayement, respondit l'au-
„ tre. Et les cheuttes, poursuiuit Stilpon, ne sont-ce malencontres? Metrocles le con-
„ fessa. Et les malencontres ne sont-ce pas infortunes pour ceux à qui elles aduiennent?

Par ceste

A Par ceste douce & philosophique progression de poinct en poinct, il luy monstra & prouua , que tout son reproche & sa maledicence n'estoit autre chose que l'abboy d'un chien. Et au contraire, la plus part des hommes ne se fasche & ne s'irrite pas seulement pour les vices de leurs amis, ou de leurs domestiques & parents , mais aussi de leurs ennemis mesmes : car les conuices, les courroux, les enuies, les malignitez , les ialousies, accompanees de rancunes, sont taches de ceux qui les ont , mais toutefois elles faschent & irritent ceux qui ne sont pas sages, ne plus ne moins que les soudaines choleres des voisins, la fascheuse conseruation de noz familiers, & les malices des seruiteurs en ce qu'on leur comect à faire, desquelles il me semble que tu t'emeus, & te troubles autant que de nulle autre chose , faisant en cela comme les medecins que descript Sophocles,

Lauans l'amere humeur de la cholere

Auec le ius de quelque drogue amere,

B en t'aigrissant & te courrouceant à l'encontre de leurs passions & imperfections sans grand propos, à mon aduis : car les negoces dont lon a commis à ta foy le gouuernement , ne s'administrent pas coustumierement par entremise de personnes , de mœurs simples & droictes, comme par instruments aptes & idoines, ains le plus souvent scabreuses & tortues. Or de les redresser, ne pense pas que ce soit office ny entreprise autrement facile à faire : mais si en te seruant d'eux, comme estans nez tels, ne plus ne moins que les chirurgiens se seruent des tiredents, & des agraphes à ioindre les léures des playes , tu te monstres gracieux , & traittable autant que l'affaire le pourra comporter, certainement tu ne receuras pas tant de mescontentement & de desplaisir de la mauuaistié & pippérie d'autrui, comme de contentement & de plaisir de ta propre disposition : & en estimant que tels ministres font ce qui leur est propre & naturel, ne plus ne moins que les chiens quand ils abboient, tu te garderas d'amaasser plusieurs ennuis & fascheries, lesquelles ont accoustumé de couler, comme en vne fosse & en vn lieu bas, à telle pusillanimité, & imbecillité, qui se remplit des maux d'autrui. Car veu qu'il y a des Philosophes qui reprennent la pitié & compassion que lon a des hommes miserables & calamiteux, comme estant bien bon de donner secours à leur misere & calamité , mais non pas de condouloir & compatir, ny mesme fleschir avec eux : & qui plus est encore, veu que les mesmes Philosophes ne veulent pas, si nous apparceuons que nous pechions, & que nous soyons mal conditionnez en quelque vice, que pour cela nous nous en contristions ny nous en faschions, ains que nous le corrigions & emendions, sans autrement nous en fascher ne douloir : considéré combien il y a peu de raison de nous contrister & ennuyer, pour ce que tous ceux qui ont affaire à nous, ou qui nous hantent, ne sont pas si honnestes ne si gens de bien comme ils deuroient. Mais donnons nous garde, amy Paccius, que ce ne soit pas tant la haine de meschanceté

D en general, que l'amour de nous mesmes en particulier, qui nous face ainsi detester & redouter la malice de ceux qui ont affaire à nous : car l'estre quelquefois trop vehementement affectionné enuers les affaires , & les appeter, & poursuiure plus chaudement qu'il ne faut, ou bien au contraire, estre degousté, & les desestimer, engendrent en nous des soupçons & des impatiences & malaifances enuers les personnes, qui nous donnent des apprehensions, qu'il nous semble que lon nous a priuez de cecy, ou que lon nous a fait tomber en cela : mais celuy qui s'est accoustumé de se comporter doucement & moderément enuers les affaires, en est bien plus gracieux & plus aisé à negocier avec les personnes. Et pour ce reprenons de rechef le propos des affaires & des choses : car ainsi comme quand on a la fièvre, toutes choses que lon prend semblent au goust desaggreables & ameres : mais quand nous voyons que les autres qui en prennent de mesmes, ne les trouuent point mauuaises, alors nous

Du contentement ou repos de l'esprit.

ne blasmons plus ny le breuueage, ny la viande, ains la maladie seulement : aussi cef- E
serons nous d'accuser & porter impatiemment les affaires, quand nous en verrons
d'autres qui les receurent gayement & ioyeusement. Parquoy quand il nous aduen-
dra quelque sinistre accident contre nostre volonté, il sera bon pour maintenir no-
stre esprit en tranquillité, de ne laisser pas en arriere nos bonnes & heureuses aduen-
tures, ains en les meslant les vnes avec les autres, effacer ou obscurcir les mauuaises
par la conference des bonnes. Mais à l'opposite, nous refaisons & reconfortons bien
noz yeux offenez du regard des couleurs trop viues & trop brillantes, en les iettant
sur des fleurs & sur de la verdure, & nous rendons nostre pensee à choses doulou-
reuses, & la contraignons de s'arrester & demourer en la cogitation des fortunes
aduerses & tristes, en l'arrachant à force, par maniere de dire, de la souuenance des
bonnes & prosperes, combien que lon pourroit bien pertinemment transferer à ceste
matiere le propos qui autrefois a esté dit à l'encontre du curieux ? Pourquoy est-ce,
homme tres-enuieux, que tu as les yeux si aigus à voir le mal d'autrui, & si ternis à F
voir le tien propre ? Pourquoy est-ce aussi, beau Sire, que tu regardes si ficeement,
& rends tousiours manifeste & recent ton mal, & iamais n'appliques ta pensee aux
biens qui te sont presens ? ains comme les ventoses & cornets attirent ce qu'il y a de
pire en la chair, aussi amasses tu à l'encontre de toy-mesme ce qu'il y a de plus mau-
uais en toy : ressemblant proprement au marchand de Chio, lequel vendant aux au-
tres grande quantité de bien bon vin, alloit par tout cherchant & goustant pour en
trouuer d'aigre pour son disner : aussi y eut il vn seruiteur, qui estant interrogé qu'il
„ auoit laissé son maistre faisant, Aiant, dit-il, beaucoup de bien, il cherche du mal : aussi
la plus part des hommes passant par dessus les choses bonnes & desirables qu'ils ont,
s'attachent aux mauuaises & fascheuses. Mais ainsi ne faisoit pas Aristippus, ains
estoit tousiours dispos à se soubleuer & allegier en toute occurrence qui se presentoit,
en se rengeant à la balance qui montoit à mont : car aiant vn iour perdu vne belle
terre, il s'adressa à l'un de ses familiers qui faisoit le plus de mine de s'en condouloir & G
„ contrister avec luy. Vien-ça, dit-il, n'as tu pas vne petite metairie seule : & moy, n'ay-
„ ie pas encore trois autres belles terres ? L'autre luy aduoüa, que si. Pourquoy donc
„ ques n'est il raisonnable de se condouloir avec toy, plus tost qu'avec moy ? car c'est
vne fureur de se douloir de ce qui est perdu, & ne se resiouir pas de ce qui est sauué :
ains faire comme les petits enfans, ausquels si lon oste vn seul de beaucoup de leurs
petits iouëts, par despit ils quassent tous les autres, & puis pleurent & crient à plei-
ne teste : au cas pareil, si la fortune nous trouble en quelque chose, nous rendons
toutes les faueurs qu'elle nous fait d'ailleurs inutiles & vaines à force de nous plain-
dre & de nous tourmenter. Mais qu'est-ce que nous auons, me dira quelqu'un ? &
qu'est-ce que nous n'auons pas plus tost, fault-il dire ? l'un a honneur, l'autre belle
maison, l'autre femme honeste, l'autre vn vray amy. Antipater le philosophe, natif H
de la ville de Tarse, estant proche de sa fin, & rememorant les biens & heurs qu'il auoit
eus en sa vie, n'oublia pas à y comprendre & compter l'heureuse nauigation qu'il auoit
euë à venir de la Cilicie à Athenes : mais encore ne faut il pas omettre les choses qui
nous sont communes avec plusieurs, ains les tenir en quelque compte, & nous es-
iouir de ce que nous viuons, que nous sommes sains & dispos, que nous voyons le
Soleil, qu'il n'y a point de guerre, qu'il n'y a point de sedition, ains que la terre se laisse
labourer, la mer nauiguer à qui veut, sans danger : qu'il est loisible de parler, & de se
taire, se mesler d'affaires, ou de se reposer : & si en aurons encore le repos de l'esprit
plus assure, ces choses là nous estans presentes, si nous nous les figurons en nostre
pensee absentes, en nous ramenant en memoire souuent, combien la santé est re-
grettee & souhaittee de ceux qui sont malades, & la paix de ceux qui sont affligez
de guerres, combien il est desirable d'acquiescer à l'autorité si grande, & de tels amis à vn
homme

- A homme estranger & incongnu en vne telle ville : & au contraire, quel regret c'est de les perdre apres qu'on les a acquis : par ce qu'une chose ne peut pas estre grande ny precieuse alors que nous la perdons, & de nulle valeur alors que nous la possedons & en iouïssons, car le non estre ne luy peut adiouter ne pris ne valeur : ny ne faut pas que nous possedions ces choses comme grandes, en tremblant tousiours de peur de les perdre & d'en estre priuez, & ce pendant quand nous les auons les mettre en oubly & les mespriser comme choses de peu d'importance, ains en vser ce pendant qu'on les a, & prendre plaisir à en iouir, à celle fin que s'il aduient qu'on les perde, qu'on en supporte la perte plus doucement. Mais le plus grand nombre des hommes est bien d'aduis, comme disoit Arcesilaïs, qu'il faut suiure de l'œil & de la pensee les poëmes, les tableaux, les peintures & statues d'autrui, pour les bien contempler par le menu de poinct en poinct, & de bout en bout : mais quant à leur vie & à leurs meurs, où il y a beaucoup de choses bien laides à voir, ils les laissent là, en regardant tousiours dehors les honneurs, les auancemens & fortunes des autres, comme font les adulteres les femmes d'autrui, en mesprisant ce pendant les leurs propres. Et toutefois c'est vn poinct de grande importance, pour bien mettre son esprit à repos, de se considerer principalement soy-mesme, son estat, & sa condition, ou pour le moins contempler ceux qui sont au dessoubs de soy, non pas comme font plusieurs qui se comparent tousiours à ceux qui sont au dessus d'eux : comme, pour exemple, les serfs qui ont les fers aux pieds iugent bien-heureux ceux qui sont déliez, & les serfs déliez, les libres : ceux qui sont libres, les citoyens : les simples citoyens, les riches : les riches bourgeois, les grands Princes & Seigneurs : les Princes, les Roys : & les Roys finalement les Dieux, desirants par maniere de dire pouuoir tonner & esclairer : & par ce moyen estans ainsi tousiours indigents de ce qui est au dessus d'eux, ils ne iouissent iamais du plaisir de ce qui est en eux :

- C Des grands thresors de Gyges ie n'ay cure,
Et ne fut onc mon cœur de la picqueure
De conuoitise attainct, ny enuieux
De fegaler aux œuvres des hauts Dieux :
De Royauté grande poinct ie n'affecte,
Ma veuë est trop pour cela imparfaicte.

- c'estoit vn Thasiën qui disoit cela : mais vn autre qui sera ou de Chio, ou de Galatie, ou de Bythinie, ne se contentera pas d'auoir sa part d'honneur, de credit & d'autorité en son pays, parmy ses citoyens, ains plorera s'il ne porte l'habit de Senateur & Patri-ce : & s'il a loy de le porter, s'il n'est Preteur Romain : & s'il est Preteur, s'il n'est Consul : & s'il est Consul, s'il n'a esté le premier proclamé : mais tout cela qu'est-ce, si non amasser des occasions affectees d'ingratitude enuers la fortune, en se punissant & se chastiant soy-mesme ? Mais celuy qui est sage, & qui a bon sens & bon entendement, s'il
- D y a quelqu'un entre tant de milliers d'hommes que le Soleil regarde,

Et qui des fruiets de la terre viuons,
qui soit ou plus honoré ou plus riche que luy, pour cela il ne se retire pas incontinent à part plorant & se laissant aller, ains tire outre son chemin, en benissant & remerciant sa fortune, de ce qu'il vit plus honorablement & plus à son aise qu'un million de millions d'autres. Car il est bien vray qu'en l'assemblee des ieux Olympiques on ne choisit pas ceux à qui lon a à combattre pour gagner le pris : mais en la vie humaine les affaires sont tellement composez, qu'ils nous donnent moyen de nous vanter d'estre au dessus de plusieurs, & d'estre plus tost enuiez que de porter enuie à d'autres, si d'adventure lon n'est si presumptueux, que de se parangonner à vn Briareus, ou à vn Hercules. Quand doncques tu auras beaucoup estimé, comme grand seigneur, vn que tu verras estre porté en vne litiere à bras, baïsse vn petit tes yeux, &

Du contentement ou repos de l'esprit.

regarde ceux qui le portent sur leurs espaules : & apres que tu auras reputé bienheu- E
reux ce grand Roy Xerxes , pour auoir passé le destroit de l'Hellespont sur vn pont
de nauires , considere aussi ceux à qui lon faisoit à coups de baston couper & cauer
le mont Athos , & ceux à qui lon couppa les oreilles & le nez , par ce que la tour-
mente auoit rompu ledict pont de vaisseaux : & quant-&-quant imagine en toy mes-
me quel est leur pensément , & combien ils reputent ta vie & ta condition heureuse au
pris de la leur. Socrates ayant ouy dire à quelqu'un de ses familiers, Ceste ville est mer-
ueilleusement chere, le vin de Chio couste dix escus, la pourpre trente escus, la chopi-
ne de miel cinq drachmes : il le prit & le mena aux bouttiques où lon vendoit la fari-
ne, demy picotin pour vn obole, à bon marché : & puis là où lon vendoit les oliues,
vn picotin pour deux doubles, bon marché : puis en la fripperie où lon vendoit les ha-
bits, vn saye pour dix drachmes, bon marché : on vit donc à bon marché en ceste ville.
Aussi nous, quand nous entendrons quelqu'un qui dira, que nostre estat est petit, &
nostre fortune basse , d'autant que nous ne serons poinct Consuls , nous ne serons F
poinct Gouverneurs de prouinces, nous luy pourrons respondre : mais au contraire,
nostre estat est honorable, & nostre vie bien-heureuse, d'autant que nous ne deman-
dons poinct l'aumosne, nous ne sommes poinct portefaix, nous ne gagnons poinct
nostre pain à flater. Toutefois pource que nous sommes venus à telle folie, pour la
plus part, que nous accoustumons à viure plus tost aux autres qu'à nous mesmes , &
que nostre nature est corrompue d'une si impuissante ialousie , & si grande enuie,
qu'elle ne se resiouit pas tant de ses biens propres , comme elle se contriste de ceux
d'autrui : ne regarde pas seulement ce qu'il y a de reluisant & de renommé en ceux
que tu admires, & que tu estimes tant heureux, mais en te baissant, & entre-ouurant
vn petit, par maniere de dire, le rideau, & le voile d'apparence & d'opinion, qui les
couure, entre au dedans, & tu y verras de grands travaux, & de grands ennuis & fas-
cheries. Au moyen dequoy Pittacus, ce personnage tant fame & renommé pour sa
vaillance, sa sagesse, & sa iustice, festoyoit vn iour quelques siens amis estrangers : sa G
femme qui suruint sur le milieu du banquet, en estant courroucée renuersa la table,
avec tout ce qui estoit dessus : les estrangers en furent tous honteux, mais luy n'en feit
.. autre chose que dire, Il n'y a celuy de nous qui n'ait en soy quelque defect, mais quant
.. à moy, ie n'ay que ce seul poinct, de la mauuaise teste de ma femme, qui me garde
.. d'estre autrement en tout & par tout tref-heureux.

Tel au dehors en public semble heureux,
Qui, porte ouuerte, au dedans malheureux
Se treuve : en tout sa femme est la maistresse,
Elle commande, elle tanse sans cesse :
Il a plusieurs causes de se douloir,
Ie n'en ay poinct qui force mon vouloir.

Il y a plusieurs telles hargnes secretes en ceux qui sont riches, en ceux qui tiennent H
les grands lieux, voire aux Roys mesmes, que le vulgaire ne cognoist pas, pourautant
que la pompe & le bombant les cache :

Iliad. li. 3.

Fils d'Atreus heureux sans tarc aucune,
Comblé de biens, enfant de la Fortune.

Tout cela n'est que commemoration de beatitude exterieure, à cause des armes, des
cheuaux, & des gens de guerre qu'il auoit autour de luy : mais la voix de ses passions
procedant du dedans dément ceste vaine opinion-là,

Iliad. li. 3.

Iupiter a ma douloureuse vie
A vn destin miserable asseruie.

Et cest autre,

*Euripide en
la Tragédie
d'Iphigenie.*

O que tu es, vieillard, bien fortuné,
A mon aduis, toy, & quiconque né

En petit

A En petit lieu, sans danger & sans gloire
As acheué la vie transitoire.

On peut donc par telles meditations espuiser vn peu de la plaintiue querimonie à l'encontre de la fortune, qui tousiours raualle & desestime de sa propre condition, en hault-louant & exaltant celle des autres. Mais ce qui nuyt autant que chose qui soit à ceste tranquillité d'esprit, c'est quand on a les esclans de la volonté demesurez, & disproportionnez à la puissance, comme quand on prend des voiles plus grandes que ne requiert la nauire, & que lon se promet en ses desirs & en ses esperances plus que lon ne doit, & puis quand on voit à l'espreuue que lon n'y peult paruenir, on s'en prend à la fortune, & en accuse lon sa destinee, & non pas sa propre folle: car ny celuy qui voudroit tirer vne fleche avec vne charrue, ny courir vn lieure avec vn bœuf, ne se pourroit dire malheureux: ne celuy qui voudroit prendre les cerfs avec vne seinne ou avec vn verueu, ne pourroit accuser la mauuaise fortune de luy estre contraire, mais bien

B faut-il qu'il condamne sa propre temerité & folle de vouloir attenter choses impossibles: duquel erreur la principale cause est le fol & aueuglé amour de soy-mesme, qui rend les hommes amateurs des premiers lieux, opiniastrés en toutes choses, & voulans tout pour eux insatiablement, sans iamais estre contents: car non seulement ils veulent estre riches ensemble & sçauans, dispos, robustes & plaisans, les mignons des Roys, les gouuerneurs des villes, mais encore ils n'ont les meilleurs chiens, les plus vistes cheuaux, les cailles, & les coqs les plus courageux au combat, ils ne peuvent auoir patience. Dionysius l'aisné ne se contentoit pas d'estre le plus grand & le plus puissant tyran qui fust de son temps, mais pour autant qu'il n'estoit pas meilleur poëte que Philoxenus, & qu'il ne sçauoit pas si bien discourir comme Platon, il s'en indigna & s'en irrita si aigrement, qu'il en ietta l'un dedans les carrieres où lon mettoit les criminels & serfs de peine, & en enuoya vendre l'autre comme esclau en l'Isle d'Ægine. Alexandre le grand n'estoit pas ainsi, car estant aduertie que Brison le coureur, auquel il couroit en carriere à qui gaigneroit le pris de vitesse, s'estaint fainct en sa course, il s'en courrouça bien asprement à luy: & pource fait sagement Homere, car aiant dit d'Achilles,

Tel que des Grecs, sans autrui blasonner,
Nul ne se peult à luy parangonner,
il adiousté incontinent apres,
Au faict de Mars: car quant à l'eloquence,
Il y en a de plus grande excellence.

Iliad. l. 18.

Megabyfus vn grand seigneur de Perse alla vn iour en la boutique d'Apelles, là où il paignoit: & comme il s'entremist de parler de l'art de la peinture, Apelles luy ferma la bouche dextrement, en luy disant: Tandis que tu as gardé silence, tu semblois estre quelque chose de grand, à cause de tes chaines & carquans d'or, & de ta robbe de pourpre: mais maintenant il n'est pas ces petits garçons là qui broient l'ochre qui ne se moquent de toy, voyant que tu ne sçais ce que tu dis. Et neantmoins aucuns d'iceux estiment que les Philosophes Stoïques se iouent & se moquent quand ils leur entendent dire, que le Sage, selon leur opinion, est non seulement prudent, iuste, & vaillant, mais aussi qu'ils l'appellent orateur, capitaine, poëte, riche, & Roy mesme: & eux ce pendant veulent bien auoir toutes ces qualitez-là, & ils ne les ont, ils en sont desplaisans. Et toutefois entre les Dieux l'un a sa puissance en vne chose, l'autre en vne autre: & pour ce est l'un surnommé Enyalios, c'est à dire, belliqueux: l'autre Mantôus, c'est à dire, prophetique: l'autre Kerdôus, c'est à dire, gaignant à traffiquer: & Iuppiter renuoye Venus aux liets & chambres nuptiales, non pas à la guerre, comme ne luy appartenant pas de se mesler des armes: ioint qu'il y a de ces qualitez-là que nous affectons & où nous pretendons, qui ne peuvent

Du contentement ou repos de l'esprit.

estre ensemble, parce qu'elles sont contraires les vnes aux autres : comme l'exercice E
d'éloquence, & les arts mathématiques ont befoin de repos & de loisir, & au con-
traire le credit au gouuernement, & la faueur des Princes, ne s'acquierent pas sans
s'empescher d'affaires, & sans assiduité grande à faire la court : comme le manger beau-
coup de chair & boire force vin rendent le corps fort & robuste, & l'ame imbecille :
& le soing continuel d'amasser argent, & de le conseruer, augmente les richesses :
& au contraire, le mespris & contemnement des biens terriens est vn grand entretien
pour l'estude de la philosophie. Et pourtant toutes choses ne conuiennent pas à
tous, ains faut en obeissant à la sentence d'Apollo Pythique, apprendre à cognoistre
foy-mesme, & puis vser de foy, & s'addonner à ce à quoy lon est né, & non pas for-
cer la nature, en la tirant par les cheueux, en maniere de dire, tantost à vne imitation
de vie, & tantost à vne autre.

Le cheual est pour seruir à la guerre,
Pour la charuë à labourer la terre
Il faut le bœuf : le daulphin court volant
Iouste la nef en pleine mer cinglant :
Le fier sanglier, qui de tuer menasse,
Hardy leurier trouue qui le terrasse.

F

Mais celuy qui se courrouce & se fasche, qu'il n'est tout ensemble Lyon de montai-
gne se fiant à sa force, & vn petit chien de Malte nourry au giron d'une riche veufue,
c'est vn fol insensé : & de rien plus sage n'est celuy qui veut ressembler à Empedocles,
ou à Platon, ou à Democritus, escriuant de la nature du monde, & de la verité des
choses, & quant & quant entretenir & coucher avec vne riche vieille comme Eupho-
rion : ou bien, boire & iouer avec Alexandre le grand, comme faisoit vn Medius : &
qui se despise & desplaist de ce qu'il n'est estimé pour ses richesses, comme Ismenias :
& pour la vertu, comme Epaminondas : mais les coureurs ne se tourmentent pas de
ce qu'ils n'ont les couronnes des lucteurs, ains se contentent & s'esjouissent des G
leurs. Sparte t'est escheute, mets peine de l'orner, comme dict le commun prouer-
be : & suiuant le dire de Solon,

Ce neantmoins changer nostre bonté
Nous ne voudrions à leur meschanceté :
Car la vertu est ferme & perdurable,
Et la richesse incertaine & muable.

Straton le philosophe naturel entendant que son concurrent Menedemus auoit
beaucoup de fois plus d'auditeurs & de disciples que luy : Quelle merueille est-ce,
dict-il, si y a plus de gens qui veulent estre lauez que huilez ? c'est à dire, qui ayment
mieux viure mollement à leur plaisir, comme leur maistre Menedemus, que dure-
ment & austèrement, comme ie les enseigne ? Et Aristote escriuant à Antipater, Il ne
faut pas, dict-il, qu'Alexandre seul se magnifie de ce qu'il commande à grand nom- H
bre d'hommes : mais aussi, & non pas moins, ceux qui ont la creance & opinion telle
qu'il faut des Dieux : ceux qui exaltent ainsi leur estat, ne seront iamais enuieux de
celuy des autres. Et maintenant nous ne requerons pas que la vignë porte des figes,
ny que l'oliuier porte des raisins, mais nous si nous n'auons tous les auantages ensem-
ble & des riches, & des doctes, & des guerriers, & des philosophes, & des flatteurs &
plaisans, & des hommes libres & francs, & des despensiers & des espargnans, nous
nous calomnions, & sommes ingrats enuers nous mesmes, & mesprisons nostre vie
comme indigente & necessiteuse. Mais outre cela, nous voyons que la nature mesme
nous admoneste : car ainsi comme elle a preparé aux bestes brutes diuers moyens de
se paistre & nourrir, & n'a pas faict que toutes deuorassent la chair, où toutes ves-
cussent de grains, & de semences, ne toutes fouillassent les racines : aussi a elle donné

aux

A aux hommes plusieurs sortes de nourriture: les vns vivent de leur bestail, les autres du labourage, les autres de la volerie, les autres de la pescherie. Et pourtant faut-il que chascun choisisse la maniere qui est plus sortable à sa nature, & qu'il l'exerce & la suyue, & ne conuaincre pas le poëte Hesiodé d'auoir defectueusement parlé, & non pas assez dict,

Et le potier au potier porte enuie,

Et le maçon au maçon.

Au poëme intitulé, les oeures.

Car non seulement nous sommes enuieux de ceux qui sont de mesmes estats & mesmes mœurs que nous: mais il y a ialouzie entre les riches & les sçauans, entre les riches & les nobles, entre les aduocats & les rhetoriciens, voire iusques là, que des personnes libres & de noble maison auront enuie sur vn ioueur de Comédies qu'ils verront auoir plaisamment reüssy en vn Theatre, & sur des baladins ou des vallers qu'ils entendront estre bien venus & en grand credit és courts des Princes & des Roys, les

B reputans heureux iusques à vne pasmoyson d'esbahissement, & iusques à s'en des-
plaire à eux-mesmes & s'en troubler grandement. Mais qu'il soit ainsi, que chascun de nous ait en soy-mesmes les thresors de contentement, & de mescontentement, & que les tonneaux des biens & des maux ne soient pas sur le fueil de l'huis de Iupiter, comme dit Homere, mais bien en l'ame de chascun de nous, les diuerfes pas-
sions le donnent assez à cognoistre: car les fols & mal-aduisez negligent & laissent aller sans en iouir les biens qu'ils ont presents, tant ils ont tousiours l'esprit tendu du soucy de l'aduenir: & les sages rememorent si vifement ceux qu'ils ont desia passez, qu'ils se les ramencent, & s'esioiuent comme s'ils estoient encore presents, car le present ne se laissant toucher à nous que par vn bien petit moment de temps, & fuyant aussi tost nostre sentiment, semble aux fols n'estre point nostre, & ne nous appartenir point: Ains comme ce cordier là que lon peint en la description des en-
fers, laisse consumer à vn asne paissant aupres de luy, autant de corde de genest, comme il en peult plier & tordre: aussi l'oubliance de plusieurs, ingrate & sans au-
cun sentiment, venant à recueillir & deuorer quant-&-quant, & faire esuanouir toute action honneste, tout office de vertu, tout agreable passe-temps, tout deduit, & toute amiable conuersation, ne permet pas que la vie soit vne & mesme, le passé demourant enchainé avec le present, ains diuisant la iournee d'hyer d'avec celle d'au-
iourd'huy, & celle d'auourd'huy d'avec celle de demain, met tout ce qui a esté avec ce qui ne fut oncques, en en faisant perir toute souuenance. Ceux qui aux escholes & disputés des Philosophes ostent toutes augmentations, disans que la substance coule
continuellement, font de paroles vn chascun de nous à toute heure autre & autre que soy-mesme: mais ceux-cy, à faute qu'ils ne peuuent retenir en leur memoire le
passé, ny le comprendre & arrester, ains le laissent tousiours escouler, se rendent eux
mesmes par effect & au vray vuides & vains à chasque iour present, & dependans
D tousiours du lendemain, comme si ce qu'ils feirent ou qu'ils eurent l'annee passée, ou n'a gueres, ou mesme hyer, ne leur appartenoit en rien, & du tout ne leur fust oncques adueni. Cela donc est l'vne des choses qui trouble l'equanimité & tranqui-
lité d'esprit, & cecy encore plus, c'est que comme les mousches ne se peuuent tenir contre les endroicts des miroirs qui sont bien lissez, ains glissent, & au contraire elles
s'attachent bien à ceux qui sont rabotteux & scabreux, & où il y a des graueures: aussi
les hommes glissans dessus les auentures qu'ils ont euës guayes, ioyeuses & prospe-
res, s'attachent à la rememoration des aduerses & mal-plaisantes: ou plus tost, ainsi
que lon dit qu'au territoire de la ville d'Olynthe y a vn endroit qui est mortel aux es-
charbots, à raison dequoy il est aussi appelé Cantharolethron, pour ce que quand
les escharbots y entrent vne fois, iamaïs ils n'en peuuent sortir, ains tournent & virent
tant la dedans, qu'ils y meurent: aussi se laissans vne fois couler en la rememoration

Iliad. l. 24.

Du contentement ou repos de l'esprit.

de leurs malheurs passez, iamais plus ils n'en veulent sortir, ny respirer: & au contraire, E
il faut faire comme quand on peint vn tableau, là où on cache deffous les couleurs
brusques & mornes, & met-on au dessus les guayes & claires: car d'effacer du tout les
mesaduentures, & s'en deliurer entieremēt, il n'est pas possible, pource que l'harmonie
du monde est composee de choses contraires, ne plus ne moins que d'une lyre & d'un
arc: & n'y a rien du tout es choses humaines qui soit tout pur & net, ains comme en
la Musique il y a des voix haultes & basses, & des sons aigus, & d'autres graues: &
en la grammaire des lettres que lon appelle voyelles, & d'autres muettes, & n'est pas
grammairien ny musicien qui hait & fuit les vnes & aime les autres, mais celuy qui se
sçait seruir de toutes, & les mesler ensemble selon son art: aussi les affaires & occurren-
ces humaines, aians des contrequarres les vnes avec les autres, d'autant que, comme
dit Euripides,

Iamais le bien n'est separé du mal,
ains y a ne sçay quel meffange pour faire que tout aille bien, il ne faut pas se descou- F
rager, ny se laisser aller par les vnes, quand elles aduiennent, ains faut faire comme les
harmoniques & musiciens, en rebouchant tousiours la poincte des aduerses par la re-
cordation des prosperes, & ambrassant tousiours les bonnes avec les mauuaises for-
tunes, faire vne composition de vie bien accordante & propre à vn chascun: car il
n'est pas ainsi comme disoit Menander,

Chascun de nous au iour de sa naissance
A d'un bon ange aussi tost l'assistance,
Pour le guider tout le long de sa vie.

Mais plus tost, comme dit Empedocles, incontinent que nous venons sur terre, deux
Demons & deux destins nous prennent & nous instituent:

La Chthonié est la fee terrienne,
Heliopé tournant la veuë sienne
Vers le Soleil: la Deris qui ses mains
Aime tousiours teindre au sang des humains:
Harmonié à la face riante,
Callisto belle, & Æschra mal plaisante,
Thoosa viste, & Dinée qui tout
Ce qu'entreprendre elle oze mène à bout:
Nemertes blanche & nette comme yuoire,
Et Asaphie aussi l'obscure & noire.

tellement que nostre natiuité receuant les semences de toutes ces passions là meslees
& confuses ensemble, & pour ceste raison nostre vie en estant fort inegale, l'homme
de bon iugement & sage doit souhaitter & demander aux Dieux les meilleures,
mais se disposer aussi à entendre des autres, & à se seruir de toutes, en ostant de chaf-
cune ce qui y pourroit estre de trop. Car non seulement celuy qui se souciera le moins H
du demain, arriuera le plus ioyeusement à demain, ainsi que souloit dire Epicurus:
mais aussi la richesse, la gloire, l'autorité & le credit resiouissent plus ceux qui moins
redoutent leurs contraires: car le trop ardent desir que lon a de chascune d'icelles,
imprimant aussi vne trop vehemente peur de les perdre, rend le plaisir de la iouissance
foible & mal assure, ne plus ne moins qu'une flamme qui est agitée du vent: mais ce-
luy à qui la raison donne tant de force, que de pouuoir dire, sans craindre ny trem-
bler, à la fortune,

Tu me peux bien oster quelque plaisir,
Mais peu laisser aussi de desplaisir:
c'est celuy qui plus ioyeusement iouist des biens quand ils sont presents, pour son as-
seurance, & pour ne redouter point la perte d'iceux, comme si c'estoit chose insup-
portable

A portable. Et en cela peut on non seulement admirer, mais aussi imiter la disposition
 „ d'Anaxagoras en vertu, quand il entendit que son fils estoit trespasé, il dit, Je sçauois
 „ bien que ie l'auois engendré mortel : & dire à chascque occurrence de malheurs for-
 tuits, Je sçauois bien que i'auois des richesses transitoires, & non permanentes : Je sçauois
 bien que ceux qui m'auoiét conseré telle dignité, me la pouuoiet oster : Je sçauois
 bien que i'auois vne femme de bien, mais femme toutefois : & vn amy qui estoit hōme,
 c'est à dire, animal de nature muable, comme disoit Platon. Car telles preparations,
 & dispositions, si d'aduenture il nous arriue quelque cas contre nostre volonté, &
 non pas contre nostre attente, nous ostent tous tels regrets, Je n'eusse iamais pensé,
 i'attendois bien autre chose, ie n'eusse iamais cuidé que telle chose eust peu aduenir :
 (qui sont comme battemens de cœur, & hastemens de pouls) & arrestent soudain
 toute furieuse emotion & trouble d'impacience. C'est pourquoy Carneades aux
 grands affaires auoit accoustumé de ramenteuoir aux hommes, que ce qui aduient
B contre l'Esperance ou attente, glisse facilement en desplaisir & douleur. Le Royaume
 de Macedoine n'estoit qu'une petite partie de l'Empire Romain, mais le Roy Perseus
 l'ayant perdue, luy-mesme regrettoit sa fortune, & de tout le monde estoit iugé tres-
 malheureux, & tres-infortuné : au contraire, celui qui l'auoit vaincu, Paulus Em-
 lius, ayant remis entre les mains d'un autre son armee, qui commandoit à la terre & à
 la mer, estoit couronné de chappeaux de fleurs, & sacrifioit aux Dieux, estant à bon
 droit estimé de tout le monde bien-heureux : d'autant que l'un sçauoit bien qu'il auoit
 reçu vne puissance, laquelle il luy faudroit rendre au bout de son terme : l'autre en
 auoit perdue vne, qu'il ne s'attendoit pas iamais de perdre. Le poëte mesme Homere
 nous donne bien à entendre, quel est ce qui arriue contre toute attente & esperance,
 quand il fait qu'Ulysses pleure pour la mort de son chien, & neantmoins estant assis
 aupres de sa femme qui ploroit, il ne pleure point, d'autant qu'il estoit là venu, ayant
 de longue main anticipé & domté par le iugement de la raison son affection : & au
C contraire il estoit tombé à l'improuueu soudainement, contre son attente, en l'autre
 accident. Mais en somme, des choses qui nous aduiennent contre nostre volonté,
 les vnes nous griefuent, & nous offensent par nature : les autres, & la plus part, par
 opinion & mauuaise accoustumance nous apprenons à nous en facher. Et pource
 ne seroit-il pas mauuais d'auoir tousiours à main ce mot de Menander,

Il ne t'est rien de grief mal adueni,

Si tu ne fains t'estre mesadueni.

car comment, dit-il, te peut-il appartenir, s'il ne touche ny à ton corps ny à ton
 ame? comme pour exemple, l'estat roturier de ton pere, l'adultere de ta femme,
 la perte de quelque honneur, ou de quelque preeminence, tous lesquels incon-
 ueniens peuvent arriuer à l'homme, que ny son corps ny son ame, pour leur
D presence, ne s'en porteront ia pis, ains seront en tresbon estat : & à l'encontre
 de ceux qui naturellement nous griefuent, comme sont les maladies, les tra-
 uaux, la mort & perte d'amis, ou d'enfans, il faut opposer vn autre mot du poëte
 Euripide,

Helas, mais quoy, hélas, cest' infortune

Est chose à l'homme ordinaire & commune.

car il n'y a raison ny remonstrance qui retienne tant la sensualité, quand elle glisse &
 se laisse emporter à ses affections, que celle qui luy ramenteoit & reduit en memoire
 la commune & naturelle necessité, par le moien de laquelle l'homme, à cause de son
 corps, estant meslé & composé, expose ceste seule anse à la fortune, par où elle le peut
 prendre, au demourant seur & asseuré en ce qui est le principal & le plus grand en
 luy. Demetrius ayant pris la ville de Megare demanda au philosophe Stilpon, si on
 „ luy auoit point pillé quelque chose : Stilpon luy respondit, Je n'ay veu personne

O. l'ys. liu.
17. & 19.

Du contentement ou repos de l'esprit.

- » qui emportast rien qui fust à moy : aussi quand bien la fortune nous auroit pillé & E
- » osté tout le reste, encor auons nous quelque chose en nous,

Qu'on ne sçauroit n'emporter ne piller.

- Et pourtant ne faut-il pas du tout raualler ny deprimer si fort la nature humaine, comme si elle n'auoit rien de ferme ny de permanent, ou qui fust par dessus la fortune: ains au contraire sçachât que c'est la pire & plus petite partie de nous, fresse & vermoulue, par laquelle nous sommes subiects à la fortune, & que de la meilleure partie nous en sommes seigneurs & maistres, en laquelle sont situes & fondees les meilleures qualitez qui soient en nous, les bonnes opinions, les arts & sciences, les bons discours tendans à la vertu, lesquelles sont de substance incorruptible, & qui ne nous peult estre defrobee : faut que nous maintenions asseurez & inuincibles à l'aduenir, disans à l'encontre de la fortune ce que Socrates dit à l'encontre de ses accusateurs Anytus & Melitus, adressant sa parole aux iuges: Anytus & Melitus me peuuent bien faire mourir, mais de me porter dommage ils ne sçauoient. Aussi la fortune me peult bien faire F tomber en maladie, m'oster mes biens, me mettre en male grace d'un peuple ou d'un prince : mais elle ne peult rendre meschant, ne couard, ny lasche & vil de cœur, ny enuieux celui, qui est homme de bien, vaillant & magnanime, ne luy oster la disposition rassise de prudence, de la presence de laquelle la vie de l'homme a tousiours plus grand besoing que la nauire n'a de la presence du pilote sur la mer: car le pilote ne sçauroit pas quand il luy plaist addoucir la tourmente, ny appaiser la violence du vent, ny gagner le port toutes les fois qu'il luy en seroit bien besoing, ny constamment sans trembler attédre tout ce qui sçauroit aduenir, ains court fortune, tant qu'il ne desespere point pouuoir vser de son artifice,

Calant la voile tout à bas,

Tant que paroist vn peu le mas

Par dessus la mer tenebreuse:

- & lors il se sied tremblant & branlant de frayeur : mais la disposition de l'homme prudent, oultre ce qu'elle apporte serenité & tranquillité aux corps en dissipant, pour la plus part, les preparatifs des maladies par continence, sobre diète, exercices & travaux moderez, si encore du dehors il aduient par fortune quelque commencement d'indisposition, comme fil fault à vn vaisseau passer par dessus vn rocher caché sous l'eau, il le traueuse avec vn leger & habile trinquet, comme dit Asclepiades. Mais si d'adventure il arriuoit quelque si grand inconuenient contre toute esperance, que puissance humaine n'en peult venir à bout, le port est prochain, & se peut on sauuer à nage hors du corps, comme hors d'un esquif qui fait eau: car c'est la crainte de mourir, non pas le desir de viure, qui tient le fol attaché & lié au corps, lequel il tient estroittement embrassé, comme fait Vlysses en Homere vn figuier sauuage de peur de tomber dans le gouffre de Charybdis qui estoit au dessous,

Æschylus en la tragédie de Phuocetes.

Là où le vent ne le laisse amarer,

Et ne le seuffre aussi pas demarer,

se desplaisant infiniment en l'un, & redoubtant effroyement l'autre. Mais celui qui a tant soit peu de cognoissance de la nature de l'ame, & qui discourt & considere en soy-mesme, que la mort aduenant, il se fait vne mutation d'icelle en mieux, ou pour le moins non en pis, certainemēt ce luy est vn grand entretien de repos & tranquillité en son ame de ne redouter point la mort: car qui peut, alors que la vertu & la partie propre à l'homme est la plus forte, viure ioyeusement, & qui peut aussi lors que la cōtraire ennemie de la nature surmonte, s'en departir hardiment & sans crainte, en disant,

Euripides en la tragédie des Bacchantes.

Quand ie voudray Dieu me deliurera:

que pourrions-nous imaginer qui peult aduenir de fascheux, de moleste, ny de turbulent à homme de telle resolution? Car celui qui peult dire, Je t'ay preuenu, Fortune, & t'ay

A & r'ay bouché toutes tes aduenues, i'ay estouppé toutes tes entrees : celuy-là ne faf-
seure pas sur des barrieres, ny sur des portes fermées à clefs, ny des murailles, ains sur
des sentences philosophiques, & discours de raison, dont tous ceux qui le veulent
sont capables, & ne les faut pas décroire, ny s'en defier, ains plus tost les admirer, &
estimer avec vn rauissement d'esprit affectonné, en faisant preuue & experience de
foy-mesme premierement és choses moindres, pour puis apres paruenir aux plus
grandes, en ne fuyant & ne reiettant pas le soing & la diligence de bien cultiuer & ex-
erciter son ame. Quoy faisant à l'aduenture ny trouuera lon pas tant de difficulté,
comme lon pense : car la mignardise de nostre ame s'arrestant tousiours à ce qui luy
est plus aisé, & s'en refuyant incontinent de la cogitation des choses molestes & fas-
cheuses, aux agreables & plaisantes, fait qu'elle demeure tendre & non exercitee à
l'encontre de la delicateffe & de la douleur. Mais celle qui s'apprent par accoustu-
mance, & s'exercite à soustenir l'apprehension d'une maladie, d'une aduersité, d'un
B bannissement, & qui se parforce de combattre par raiton contre chascun de tels acci-
dents, trouuera par experience qu'il y a beaucoup de faulseté, de vanité, & d'imbecil-
lité és choses que par erreur d'opinion on estime penibles, douloureuses & effroya-
bles, ainsi que la raison le demonstre à qui veut s'arrester à discourir particulièrement
de chascune : & toutefois il y a encore plusieurs qui redoubtent effroyement ce dire
de Menander,

Homme viuant affermer ne sçauroit,

Tel cas iamais venir ne me pourroit :

ne sçachans pas combien sert à s'exempter de tout ennuy & toute fascherie, s'exer-
citer à pouuoir regarder à yeux ouuerts à l'encontre de la fortune, & ne rendre point
les apprehensions & imaginations en foy-mesme molles & effeminees, comme estant
nourry à l'ombre, sous des esperances qui cedent & plient tousiours à leurs contrai-
res, & ne se roidissent iamais à l'encontre de pas vn : mais nous pouuons aussi dire à
C l'encontre de Menander, Il est vray qu'homme viuant ne sçauroit dire, Cela iamais
ne m'aduiendra : mais aussi pouuons-nous dire, Tant que ie viue, iamais ie ne feray
cela : ie ne mentiray iamais : iamais ie ne tromperay : iamais ie ne faulseray ma foy : ie
ne surprindray iamais personne : car cela estant en nostre puissance, n'est pas peu de
moien, ains grand acheminement au repos de l'esprit : comme au contraire le remors
de la conscience, ie sçay que i'ay commis telle meschanceté, laisse, comme vn vlcere
en la chair, vne repentance en l'ame, qui tousiours s'egratigne & s'ensanglante elle
mesme : car la raison oste & efface les autres tristesses, angoilles & douleurs, mais elle
engendre celle de la repentance, laquelle se mord avec honte, & se punit elle mesme.
Car ainsi comme ceux qui tremblent de froid, ou brulent de chaud en fiéure, en sont
plus affligez & plus tourmentez que ceux qui seuffrent les mesmes passions par causes
exterieures de froideur d'hyuer, ou de chaleur d'esté : aussi les mesaduentures fortui-
D tes & casuelles apportent des douleurs plus legeres, comme venans du dehors. Mais
quand on dit,

Autre que moy nullement ne me cause

Ces maux : i'en suis moy mesme seul la cause :

ce que lon a accoustumé de regretter & lamenter du fond du cœur, quand on se sent
coupable de quelque crime, cela rend la douleur d'autant plus griefue, qu'elle est
conioincte à honte & infamie. Et pourtant n'y a il maison plantureuse ny quan-
tité grande d'or & d'argent, ny dignité, & noblesse du sang, ny grandeur d'estat &
office, ny grace ou vehemence de parler, qui apporte tant de serenité & de tranquil-
lité calme à la vie de l'homme, que d'auoir l'ame pure & nette de tous meschants faicts,
volontez & conseils, & les mœurs qui sont la source, dont coulent toutes noz hon-
nestes & louables actions impollues, & non troublees ny infectees d'aucun vice :

Du contentement ou repos de l'esprit.

c'est ce qui leur donne vne efficace gaye : & comme diuinement inspiree , avec vne E
grandeur & fermeté de courage , & avec vne souuenance plus ioyeuse & plus con-
stante , que l'Esperance que décrit Pindare , nourrice de la vieillesse. Car ne plus ne
moins que les bouëttes où lon met l'encens, ainsi que disoit Carneades, encore apres
qu'elles sont vuides retiennent la bonne odeur longuement : aussi les bonnes & hon-
nestes actions sortans de l'ame de l'homme sage, y laissent tousiours vne agreable &
tousiours fresche recordation, par laquelle la ioye & liesse arrousee florit en vigueur &
mesprise ceux qui lamentent & diffament ceste vie, comme si c'estoit vne gehenne &
lieu de tourments, ou vn confinement où les ames fussent releguees & bannies. Et
ne puis que ie ne louë grandement le propos de Diogenes, lequel voyant quelquefois
en Lacedemone vn estranger, qui se paroît & ornoit curieusement pour vn iour de
.. feste : Comment, dit-il, l'homme de bien n'estime-il pas que tous iours soient festes
.. pour luy ? ouy certainement, & feste fort celebre & solennelle, si nous sommes sages.
Car ce monde est vn temple tres-sainct, & tres-deuot, dedans lequel l'homme est in- F
troduit à sa natiuité, pour y contempler des statues non ouurees & taillees de mains
d'hommes, & qui n'ont aucun mouuement, mais celles que la diuine pensee a faittes
Au Timee. sensibiles, pour nous représenter les intelligibles, comme dit Platon, aians en elles les
principes empraints de vie & de mouuement, c'est à sçauoir, le Soleil, la Lune, les
estoilles, & les riuieres, iettans tousiours eau fresche dehors, & la terre qui enuoye &
fournit sans cesse aliments aux animaux & aux plantes. Ainsi faut-il estimer, que la vie
de l'homme soit comme vne profession & entree en vne tresparfaite religion: pour-
tant estoit-il conuenable qu'elle fust remplie de grande tranquillité d'esprit & de con-
tinuelle ioye, non pas comme fait le vulgaire de maintenant, qui attend la feste de Sa-
turne, ou celle de Bacchus, ou celle de Minerve, pour se resiouir, & pour rire vn ris
acheté à pris d'argent, qu'ils payent à des baladins & à des badins & ioueurs de farces
pour les faire rire à force. Et puis en ces festes là nous demourons assis honneste- G
ment, sans nous tourmenter : car il n'y a personne qui face des regrets quand on le
reçoit en la confrairie, ne qui se lamente en regardant les ieux Pythiques, ny qui ieusne
és festes de Saturne : & au contraire les festes que Dieu mesme a instituees, & que luy-
mesme conduit & ordōne, ils les contaminent & deshonorent, les passans le plus sou-
uent en pleurs, regrets, & gémissements, ou pour le moins en soucis & ennuis fort
laborieux. Ils prennent plaisir à ouïr les instruments de musique, qui sonnent plai-
samment, & les oyseaux qui chantent doucement, & voyent volontiers les ani-
maux qui se iouēt, & qui saultent de gayeté de cœur, & au contraire ils s'offensent de
ceux qui hurlent, ou qui buglent & fremissent, ou qui ont vne hydeuse & triste mine
à les voir : & ce pendant voyans tout le cours de leur propre vie, triste, morne, tra-
uailé & opprimé des plus tristes passions, plus laborieux affaires, & de cures & soucis
qui ne prennent iamais fin, non seulement ils ne se veulent pas donner à eux-mesmes
quelque relasche & quelque moien de respirer, mais qui pis est, ils ne veulent pas re- H
cevoir les paroles & remonstrances de leurs amis & parents qui les admonestent de ce
faire, lesquelles s'ils vouloient ouïr & s'en seruir, ils pourroient sans reprehension se
comporter enuers le present, & se souuenir avec ioye & plaisir du passé, & s'appro-
cher hardiment & sans deffiance, avec vne gaye & ioyeuse esperance de l'aduenir.

De la

A



N T R E les plantes que la terre produit il y en a aucunes qui non seulement de leur nature sont sauuages, & ne portent aucun fruit, mais qui pis est, en croissant nuisent aux bonnes & fructueuses plantes & semences : & toutefois les iardiniers & laboureurs iugent que ce sont signes de terre qui n'est pas mauuaife, mais bonne & grasse: aussi y a il des passions de l'ame qui ne sont pas bonnes quant à elles, mais ce sont comme fleurs & boutons d'une bonne nature, & qui se laisse bien cultiuer par raison : entre lesquelles ie

compte celle que les Grecs appellent Dysopie, c'est à dire, mauuaife honte, & qui porte dommage, laquelle n'est pas mauuais signe, quant à elle, mais elle est occasion de mal. Car ceux qui sont par trop honteux, & là où il ne le faut pas estre, sont bien

B souuent autant de fautes, comme ceulx qui sont effrontez & impudens, excepté qu'ils sont marris & desplaisans quand ils faillent, & les autres en sont bien aises: car l'impudent ne se desplait point d'auoir fait chose deshoneste, & le honteux se trouble facilement des choses mesmes qui semblent estre deshonestes & ne le sont pas. Car à fin de n'equiuoquer point, nous entendons, par honteux, celuy qui rougist de hôte, par trop & à tout propos, & semble qu'il en ait pris son nom en la langue Grecque, Dysopetus, pour ce que le visage luy change, & se laisse aller quand & le courage: car ainsi commelon definit Catefia, c'est à dire, silence morne, & tristesse qui fait regarder contre terre: aussi ont ils appellé celle honte qui cede & se laisse aller à toutes prieres, iusques à n'oser pas regarder en face ceux qui luy demandent, Dysopie.

Voila pourquoy l'orateur Demosthenes disoit, que l'effronté n'a pas des prunelles, mais des putains, aux yeux, se iouant en l'equiuoque de ce nom Cora, qui signifie vne pucelle, & la prunelle de l'œil: & au contraire le honteux monstre à son visage, qu'il a

C le courage trop tendre & trop effeminé, & la faute qu'il fait en se laissant vaincre & emporter aux impudens, en se flatant soy mesme, il la nomme vergongne. Or Caton disoit, qu'il aimoit mieulx les ieunes homes qui rougissoient, que ceux qui pallissoient, aiant raison d'accoustumer & enseigner les ieunes gens à redouter plus tost d'estre blasmez que d'estre conuaincus, & la suspicion plus tost que le peril: mais toutefois encore faut-il oster ce qu'il y a de trop en la timidité & crainte de reproche, pour ce qu'il y en a souuentefois qui redoutans autant d'estre accusez comme d'estre chastiez, à faute de cœur laissent à faire le deuoir, ne pouuans soustenir que lon die mal d'eux: ainsi ne fault il pas negliger ny ceux là qui sont ainsi foibles & si tendres de cœur, ny aussi louer ceux qui l'ont si dur & si roide, qu'ils ne fleschissent à rié, comme celuy que décrit ce poëte,

D

D'Anaxarchus hardie & vehemente

La force estoit comme vn chien impudente,

Où que ce fust qu'il se voulust ietter:

mais il faut composer vne meffange temperee des deux extremittez, en ostant de celle trop grande roideur l'impudence, & de ceste trop molle douceur l'impuissance, mais de ces deux extremittez la cure n'en est pas bien aisee, ny le trop ne s'en peut pas retrancher sans danger: Car ainsi comme le laboureur quand il veut esfarter, & arracher quelque plante sauuage qui ne porte point de fruit, mettant à bon esciant la marre tout du premier coup dedans la terre, il en coupe les racines, ou en approchant le feu il la brusle: mais quand il met la main à la vigne pour la tailler, ou à vn pommier, ou vn figuier, il y va bien retenu, craignant de couper, avec ce qui est superflu, quelque chose de ce qui est bon & sain: aussi le philosophe voulant oster de l'ame d'un ieune homme l'enuie, qui est vne

De la mauuaife honte.

plante fauage, dont on ne ſçauroit faire rien qui vaille, ou vne ardeur d'acquérir E
hors de faifon, ou vne luxure defordonnee, il ne craindra point de l'enſanglanter, le
percer iufques au fond, & luy faire vne profonde playe: mais quand il viendra à ap-
procher le trenchant de la parole de la tendre & delicate partie de l'ame, comme eſt
celle où giſt ceſte demefuree & exceſſiue honte qui n'oze regarder les hommes en la
face, il craindra que par meſgarde il ne retrenche quant-&-quant celle qui eſt bonne
& louable: car les nourrices meſmes bien ſouuent en cuidant nettoyer & frotter la
craſſe des petits enfans, elles leur eſcorchent le cuir, & les offenſent à bon eſciant.
Voyla pourquoy il ne faut pas en voulant effacer à faiſt aux ieunes gens ceſte honte
exceſſiue, les rendre ou nonchalants de choſe qu'on leur die, ou trop roides & infle-
xibles, ains faut faire comme ceux qui demoliffent les maifons prochaines des tem-
ples, de peur de toucher à choſe qui ſoit ſacree, ils laiffent de bout les parties des edi-
fices qui y touchent, & qui en ſont les plus pres, & les eſtayent, qu'elles ne tombent
d'elles meſmes: auſſi faut-il craindre qu'en voulant oſter le trop de honte, nous n'em- F
portions la honte toute entiere, & ce qui en approche, comme la modeſtie & la de-
bonaireté, ſoubs leſquelles deux qualitez la honte exceſſiue ſe gliffant & ſ'attachant, à
celuy qui y eſt ſubieſt, le flate, comme ſi cela luy procedoit d'humanité, de courtoi-
ſie, & de bon ſens commun, non pas d'une opiniaſtre & inflexible dureté. Voyla
pourquoy les philoſophes Stoïques ont diſtingué de noms meſmes la honte exceſ-
ſiue, la honte ſimple, & la vergongne: de peur qu'ils ne laiſſaſſent pas l'equiuoque &
douteuſe ambiguïté du nom, moiſen à ceſte paſſion de porter dommage aucun: & à
fin que nous peuſſions ſans calomnie vſer des noms propres, ou bien les diſtinguer,
comme fait Homere en diſant,

*δυσωπία
αἰσχύν
αἰδώς.*
Ces termes
là propres ne
ſe peuuent
trouuer en la
langue Frā-
çoïſe cōme
en la Grec-
que.
Iliad. l. 24.

La honte à l'homme eſt bien fort dommageable,

Ou au contraire auſſi bien proufitable.

& n'eſt pas ſans cauſe qu'il a mis deuant, le porter dommage: car la honte eſt vtile G
par le moiſen de la raiſon, qui reſtreint ce qu'il y a de trop, & laiſſe ce qui eſt au milieu
entre peu & trop. Premièrement doncques il fault que celui qui ſe ſent forcé de trop
de honte, croye & ſe perſuade, qu'il eſt detenu d'une paſſion nuyſible & domma-
geable. Or n'y a il rien de nuyſible & dommageable qui ſoit honneſte, & ne ſe faut
pas reſiourir pour ſe ſentir chatouiller les oreilles des louanges, en foyant appeller
gentil, courtois, & ioly, au lieu de iuſte, graue & magnanime, ny faire comme le Pe-
gaſus d'Euripides,

Qui ſe baiſſoit plus que lon ne vouloit

deuant Bellerophon, c'eſt à dire ne ſe laiſſer pas aller à tous demandans, ne ſ'abbaïſſer
à leur appétit pour crainte d'entendre, c'eſt vn homme dur, c'eſt vn homme inexora-
ble. On dit que le Roy d'Ægypte Bocchoris eſtant de ſa nature aſpre & rude, la
Deeſſe Iſis luy enuoyoit vn aſpic, lequel ſ'entortillant à l'entour de ſa teſte luy fai- H
ſoit ombre, à fin qu'il iugeaſt iuſtement: mais ceſte honte exceſſiue eſtant touſiours
deſſus ceux qui n'ont pas le cœur eſſez ferme & viril, & n'ozant pas librement respi-
rer ny regarder franchement entre deux yeux, diuertit les iuges de faire iuſtice, cloſt
la bouche à ceux qui doiuent conſeiller, & les contrainēt de faire & dire beaucoup de
choſes qu'ils ne voudroient pas, & celui qui ſera le plus deraifonnable & le plus im-
portun, maïſtriſera touſiours & tyranniſera celui qui eſt ainſi honteux, forçant ſon
trop de honte par ſon impudence, d'où vient que ceſte honte exceſſiue, ne plus ne
moins qu'un lieu bas qui reçoit toutes fluxions, ne pouuant repouſſer ny deſtourner
aucune requeſte, ne iamais dire non, ſe laiſſe fouler aux pieds, en maniere de dire,
par les plus villains actes & plus deſhonneſtes paſſions qui ſoient, car c'eſt vn mau-
uais gardien de l'aage puerile: comme diſoit Brutus, qu'il ne luy ſembloit pas,
que celui qui ne ſçauroit rien reſuſer, euſt honneſtement paſſé la fleur de ſa ieun-
neſſe:

A nesse: auffi est - ce vne mauuaife gouuernante du liēt nuptial , & des chambres des femmes, comme le reproche, en Sophocles, à son adultere, celle qui se repent du faict,

Tu m'as seduite, abusée, & perdue:

de maniere que ceste honte, oultre ce que d'elle mesme elle est vicieuse, venant encore à corrompre & solliciter l'impudicité, trahit & rend toutes forteresses foibles, ouuertes, faciles à ceux qui les veulent tenter & assaillir, lesquels par dons prennent les plus villaines & plus vicieuses natures, mais par inductions, & par le moien de ceste excessiue honte, ils viennent à bout bien souuent de celles qui sont gentilles & honnestes. Je laisse doncques à parler des dommages que ceste honte fait en matiere d'argent. Ils prestent, de honte de refuser, à ceux de la foy desquels ils se défient: Ils approuuent & louent ceste sentence doree du temple d'Apollo, Qui respond paye: mais quand ce vient à l'esprouuer aux affaires, ils ne s'en peuuent seruir. Il ne seroit pas facile de nom-

B brer, combien d'hommes ceste passion a fait mourir: car Creon mesme en la tragœdie d'Euripide nommee Medee, apres auoir dit,

Femme il vaut mieux que ie te mescontente,

Te refusant à ceste heure presente,

Que pour auoir esté mol, cy apres,

En ton endroit, ietter mille regrets.

il a dit vne belle sentence pour les autres, mais luy mesme s'estant laissé aller à ceste excessiue honte, & aiant donné vn iour de delay à sa requeste, il fut cause de la ruine totale de sa maison. Il y en a eu d'autres, qui se doubtons bien qu'on les vouloit tuer ou empoisonner, ont encore eu honte de refuser d'aller où on les conuioit: ainsi mourut Dion, sçachant bien que Callippus l'espioit, & aiant honte de se défier & garder de luy, pourautant qu'il estoit son hoste & son amy: ainsi fut aussi massacré

C Antipater fils de Cassander, aiant conuié Demetrius de soupper en son logis, & le lendemain estant aussi conuié par luy, il eut honte de se monstrier défiant, en refusant d'y aller, attendu que l'autre s'estoit fié en luy, & ainsi fut assommé apres le soupper. Et Hercules qu'Alexandre auoit eu de Barsine, Polyperchon auoit fait marché à Cassander de le tuer pour la somme de soixante mille escus, & puis l'auoit conuié à venir soupper en son logis: le ieune Prince eut peur, & se défia de telle semonce, alleguant pour son excuse, qu'il se trouuoit tout mal: tellement que Polyperchon y alla luy mesme, & luy dit: Sur toutes choses, mon fils, estudiez vous à imiter la facilité & priuauté de vostre pere enuers & avec ses amis, si d'aduenture vous ne me tenez pour suspect, comme si i'espiois de vous faire mourir. Le ieune homme eut honte de le refuser, & le suiuit: & apres qu'ils eurent souppé, il le fit estrangler. Ce n'est doncques pas vn aduertissement digne de mocquerie, ny plein de sottise, comme aucuns pensent, ains prudent & sage, quand Hesiode dit,

D Chez toy conuie à soupper ton amy,

Mais laisse à part chez luy ton ennemy.

n'aye point honte d'esconduire celuy que tu sçais qui te hait, & ne le reiette point à demy quand il monstrea se fier en toy: car il te reconuiera si vne fois tu le conuies, & te donnera à soupper quand tu luy en donneras, si vne fois tu abandonnes la défiance, garde de ton salut, comme amollissant ta bonne trempe par honte de n'oser refuser. Parquoy puis qu'il est ainsi, que ceste passion est cause de plusieurs inconueniens, il faut tascher à la forcer par exercitacion, en commenceant, comme lon fait à tous autres exercices, premierement par les choses qui ne sont pas trop difficiles, ny trop mal-aisées à regarder droit à l'encontre. Comme, pour exemple, si y a quel-

qu'un en vn bancquet qui boiue à toy, quand tu auras desja suffisamment beu, n'aye point de honte de le refuser, & ne te force point toy-mesme, ains pose la coupe: ou

Au poëme
intitulé, Les
œuvres.

De la mauuaife honte.

bien si vn autre te semond à iouër à trois dez, n'aye honte de n'y vouloir entendre, E
& ne crains point d'en estre mocqué, mais fay comme Xenophanes fait à Lafus
Hermionien qui l'appelloit couard, d'autant qu'il ne vouloit pas iouër aux dez avec
• luy : Ouy, dit-il, ie suis couard voirement & timide és choses villaines & deshonne-
• ftes. D'autre part, feras tu tombé entre les mains d'un babillard, qui t'arrestera, t'am-
brassera, & ne te laissera point eschapper, n'aye point de honte, mais romps luy tout
court la broche, & t'en va ton chemin pour faire tes affaires : car tel refus & telles
fuittes & desfaittes, en choses dont on ne se sçauroit plaindre que bien legerement de
nous, nous exercent à n'auoir point de honte là où il n'en fault point, & nous accou-
stument à choses de plus grande importance. Auquel endroit il n'est pas mal à pro-
pos de nous souuenir de Demosthenes : car comme les Atheniens fussent en branle
de secourir Harpalus, & meissent ia l'armet en teste contre Alexandre le grand, sou-
dainement comparut Philoxenus, lieutenant du Roy sur la marine : de quoy le peuple
d'Athenes fut si estonné, qu'il n'y en eut pas vn qui dist plus vn seul mot, tant ils auoient F
• de peur : & lors Demosthenes, Que feront ils, dit-il, quand ils verront le Soleil, veu
• qu'ils ne peuuent pas franchement regarder la lueur d'une petite lampe ? car que fe-
ras tu en negoces de grande importance, si vn Roy parle à toy, ou si vn peuple te re-
quiert de quelque chose qui ne soit pas raisonnable, veu que tu ne peux repouls-
er, vne coupe de vin qu'un tien familier beuant à toy te presente ? ny t'eschapper de
la prise d'un babillard, ains te laisses proumener à ce iaseur, sans auoir la fermeté
de luy ozer dire, Nous nous reuerrons vne autrefois, car maintenant ie n'ay pas
loisir. Oultre plus l'exercitation & accoustumance pour vaincre ceste honte, ne sera
point mauuaife ny inutile à l'encontre des loüanges en choses petites & legeres : com-
me en vn festin d'un amy il y aura quelque sonneur de lut ou de lyre, qui en sonne-
ra ou chantera mal, ou vn iouëur de comedies, que lon aura loué à grand pris d'argent,
qui gastera tout Menander, tant il aura mauuaife grace à iouër, & neantmoins le vul- G
gaire luy applaudira & le prifera grandement : il n'y aura, à mon aduis, point de dif-
ficulté ny de peine à l'escouter, sans mot dire, & sans le louer seruilement & en fla-
teur, contre ta propre opinion. Car si tu n'es maistre de toy en cela, que feras-tu
quand vn tien amy te lira quelque ryme, & quelque mauuaife poésie qu'il aura
composee, ou qu'il te monstrera quelque harengue qu'il aura escrite ? tu te louëras
doncques haultement & follement, & feras bruit des mains, en luy applaudissant
comme les iaquets : & si ainsi est, comment doncques le reprendras tu quand il viendra
à commettre quelque faulte és affaires : comment l'admonesteras tu, s'il vient à sou-
blier en l'administration de quelque Magistrat, ou bien en ses deportements en ma-
riage, ou au gouuernement de la chose publicque ? car quant à moy, ie ne me con-
tente point encore de la responce que feit Pericles à vn sien amy, qui le requit de por-
ter vn tesmoignage faulx pour luy, à laquelle faulseté il y auoit encore vn pariure-
• ment adioint : Ie suis, dit-il, amy de mes amis iusques aux autels. comme s'il eust H
voulu dire, iusques à n'offenser point les Dieux : car il estoit approché trop pres.
Mais celuy qui de loing s'est accoustumé à ne louer contre son aduis celuy qui
harengue, ny à applaudir à celuy qui chante, ny rire à celuy qui dit vne maigre ren-
contre, ne laissera iamais son familier passer, iusques à luy faire ceste requeste-là : ne
n'y aura iamais homme qui die à celuy qui aura appris à n'auoir point de honte de
refuser en telles petites choses, Pariure toy pour moy, porte faux tesmoignage pour
moy, prononce vne inique sentence pour l'amour de moy. Semblablement auf-
si se faut-il preparer contre les emprunteurs d'argent, en s'accoustumant premiere-
ment és choses qui ne soient pas grandes ny difficiles à refuser. Il y eut quelqu'un ia-
dis, qui estimant qu'il n'y eust rien si honneste que de demander & receuoir, deman-
da vn iour en souppant au Roy de Macedoine Archelaus, vne coupe d'or là où il
beuuoit

- A beuuoit . Le Roy commanda à son page de la porter & donner à Euripides qui estoit à la table : & tournant son visage deuers celuy qui la luy auoit demandee, luy dit ,
- Quant à toy tu es digne de demander & d'estre refusé, par ce que tu demandes: mais
 - Euripides est digne qu'on luy donne, encore qu'il ne demande pas. Disant en cela tresbien, que le iugement de la raison doit estre le directeur & le maistre du donner & de la liberté gratuite, non pas la honte de refuser : & au contraire, nous, bien souuent laissons en arriere des personnes honnestes, nos parents ou amis, & qui ont be-
soin de nostre secours, donnons à d'autres qui nous demandent continuellement & impudemment, non pour volonté que nous aions de leur donner, mais pource que nous ne leur pouuons refuser : comme fait Antigonus le vieil apres auoir lon-
guement enduré l'importunité de Bias, Donnez (dit-il) à Bias vn talent, & par force: combien qu'il eust aussi bonne grace, & rencontraist aussi dextrement à se deffaire de tels importuns, que fait oncques Roy ny Prince : car comme vn belistre philo-
- B sophe Cynique luy demanda vne drachme, qui pouuoit valoir trois soulds & qua-
tre : Ce n'est, dit-il, pas vn don de Roy : & comme l'autre luy repliquast, Dōne moy
doncques vn talent, qui sont six cens escus : il luy respondit, Ce n'est pas present de
Cynique . Diogenes alloit quelquefois se pourmenant par la rue d'Athenes appelée
Ceramique, en laquelle il y auoit plusieurs statues des anciens personnages de va-
leur, aux quelles il alloit demandant l'aumosne : & comme quelques vns s'en esmer-
ueillassent, il leur respondit, J'apprens (dit-il) à estre esconduit. Il nous fault aussi
premierement estudier en choses legeres, & nous exercer à refuser en choses peti-
tes, à ceux qui nous demanderont ce dont ils ne sont pas pour vser ainsi qu'il ap-
partient, à fin que nous puissions suffire à faire refus de choses de plus grande impor-
tance : car, comme dit Demosthenes, celuy qui a despensé ce qu'il auoit, autre-
ment quil ne falloir, n'employra iamais à ce qu'il faut, ce qu'il n'a pas, si on luy don-
ne . Or toutes & quantesfois que nous auons disette des choses honnestes, & abon-
- C dante des superflues, cela tesmoigne qu'il y a bien de la faute en nous. Si n'est pas seu-
lement ceste honte excessiue mauuaise & inique despensiere d'argent, mais aussi des
choses serieuses & de grande consequence, esquelles elle ne reçoit pas le conseil vtile
que luy donne la raison : car souuent estans malades, nous n'appellons pas le plus ex-
pert medecin, pour respect & faueur que nous portons à vn nostre familier : &
elisons pour maistres & precepteurs de nos enfans, non ceux qui sont les meilleurs,
mais ceux qui nous en requierent, & bien souuent quand nous auons des procez, nous
ne les faisons pas plaider par le plus suffisant Aduocat, & le plus sçauant du barreau,
ains par le fils de quelque nostre parent ou amy, qui apprendra à tonner aux despens
de nostre cause . Brief, nous voyons plusieurs de ceux qui font profession de
philosophie, Epicuriens, ou Stoïciens, ou autres, qui ne se seront pas mis à suiure ceste
secte là par leur iugement ou election, ains se seront adioincts à quelques vns, de leurs
- D parents ou amis de ceste secte qui les en auront importunez & requis . Or sus donc-
ques exercitons nous de longue main à l'encontre de si lourdes fautes en choses vul-
gaires & legeres, en nous accoustumant à ne nous seruir point ny d'un barbier ny
d'un paintre, à l'appetit de nostre sorte honte, ny à loger en vne mauuaise hostellerie,
y en ayant aupres de meilleures, pource que l'hostellier nous aura souuent saluez : ains
pour accoustumance, encore qu'il y ait peu de difference de l'un à l'autre, choisissons
toufiours le meilleur : comme les philosophes Pythagoriens obseruoient toufiours
diligemment de ne mettre iamais la cuisse gauche dessus la droite, ny de prerdre le
nombre pair au lieu du non pair, & ainsi des autres choses egales & indifferentes : aus-
si se fault-il accoustumer quand on fait ou vn sacrifice, ou vnes nopces, ou quel-
que autre grand banquet, de n'appeller pas celuy qui nous saluë & nous fait sou-
uent la reuerence, ou qui accourt de tout loing à nous, plustost que celuy que nous

De la mauuaife honte.

sçaurons qui est homme de bien, & qui nous aime : car celuy qui est ainsi de longue E
main exercité & accoustumé, sera mal-aisé à surprendre, ou plustost ne sera iamais af-
faillly és choses de plus grande importance: mais quand à l'exercitation, ces aduertisse-
mens là suffisent. Au demourant des vtiles instructions que nous en pouuons recueil-
lir, la premiere, à mon aduis, est, que toutes les passions & maladies de l'ame sont ordi-
nairement accompagnées des inconueniens, qu'il semble que nous taschions plus à
fuir par icelles: comme l'ambition & conuoitise d'honneur communément est suiuiue
de deshonneur, dissolution & volupté ordinairement accompagnée de douleur, deli-
cateffe suiuiue de trauail, opiniastreté contentieuse suiuiue de perte & de condemnatiō:
semblablement aussi autant en aduient-il à la honte excessiue, laquelle fuyant la fumee
de blasme, se iette dedans le feu mesme d'infamie. Car ayant honte de refuser & con-
tredire à ceux qui iniquement & importunément les poursuuyent, ils sont apres con-
traints d'auoir honte de ceux qui iustemēt les accusent: & pour auoir craint vne plain-
te legere, bien souuent ils soustiennent vne vergongne certaine: & aians eu honte de F
contredire à vn amy, qui leur demandoit de l'argent, bien tost apres ils sont cōtraincts
de rougir à bon esciant pour estre conuaincus de n'en auoir point. Et aians promis
de secourir quelques vns qui ont des proces, puis apres aians honte de faire cōtre leurs
parties, ils sont contraincts de se cacher & s'enfuir. Et y en a plusieurs que ceste honte
aiant forcez de faire quelque promesse desauantageuse du mariage ou de leur fille, ou
de leur sœur, sont contraincts puis apres de faillir de promesse, pour auoir changé d'ad-
uis. Celuy qui dit anciennement que tous les habitans de l'Asie seruoient à vn seul hō-
me pour ne sçauoir pronōcer vne seule syllabe qui est, Non, ne parloit pas à bon esciāt,
ains se ioüoit: mais ces honteux icy pourroient sans parler en fronçant seulement les
sourcils, ou baissant la teste, eschapper plusieurs couruees qu'ils font outre leur gré &
par importunité. Car comme dit Euripide,

Le silence est response pour les sages,
duquel il est besoing de plus vser à l'endroit de tels importuns poursuuyans: car quant G
à ceux qui sont raisonnables & honnestes, on se peult avec raison excuser: & pour-
tant fault-il auoir à main plusieurs responses & dicts notables des grāds & illustres per-
sonnages du temps passé, & s'en souuenir, pour les pratiquer alencontre de ces impor-
tuns là: comme est-ce que dit jadis Phocion à Antipater, Je ne te sçauois estre flateur
& amy tout ensemble: & aux Atheniens qui luy applaudissoient, & le prioient de con-
tribuer avec eux quelque argēt pour faire vne feste & vn sacrifice: l'aurois, dit-il, honte
de desbourser avec vous, & ne rembourser pas ce que ie doy à cestuy-cy: en monstrāt
l'vsurier Callicles. car comme dit Thucydides, Il n'est pas laid de confesser sa pauureté,
mais il est bien laid de ne la fuir pas de faiēt. Mais celuy qui par sa bestise ou fadē deli-
cateffe est si honteux, qu'il n'ose dire à celuy qui luy demande de l'argent,

Amy ie n'ay ny or ny argent faiēt

Dessous la clef en coffre ny buffet. H

& neantmoins se laisse sortir de la bouche vne promesse comme vne arre, & vn gage:

Il est lié de fers sans fer forgez,

Qu'estroictement honte luy a chargez.

Mais Perseus, prestant de l'argent à vn sien familier, alla iusques en la place en passer le
contract à la banque, se souuenant du precepte que nous donne le poëte Hesiodē,

En riant mesme avec ton propre frere,

D'y adiouster vn tesmoing ne differe.

Dequoy l'autre s'esbahissant, Comment doncq, dit-il, Perseus, ainsi iuridiquement?
Ouy, respondit Perseus, à fin que ie le retire de toy amiablement, & que ie ne te le re-
demande pas iuridiquement. Car plusieurs au commencement ne cherchans pas de
honte leur assurance, puis apres sont contraincts d'y proceder par la voye des loix
avec

A avec inimitié. D'auantage Platon baillant des lettres de recommandation au tyran Dionysius en faueur de Helicon Cyzicenien, adiousta au bout de la lettre, Je t'escrie ce que dessus d'un homme, c'est à dire, d'un animal de nature muable. Mais Xenocrates au contraire, encore qu'il fust bien de nature austere, toutefois il fut gaigné & plié de honte, & recommanda par lettres à Polyperchon un homme qui ne valoit rien, ainsi comme il le donna bien à cognoistre par effect: toutefois ce seigneur Macedonien luy fit bon recueil, & luy demanda s'il auoit de rien affaire, l'autre luy demanda un talent de six cens escus: ce que Polyperchon luy bailla, mais il escriuit à Xenocrates que de là en auant il examinast plus diligemment ceux qu'il recommanderoit. Et quant à Xenocrates encore fait-il ceste erreur là, par ce qu'il ne cognoissoit pas le personnage: mais nous bien fort souuent cognoissans que ce sont meschans qui nous requierent, neantmoins iettons des missiues au vent, & qui plus est, de l'argent, nous faisons ce dommage à nous mesmes, non pas de gayeté de cœur, ny avec plaisir, comme ceux qui donnent à des putains, ou à des plaisans & flateurs, ains en estans bien marris & ennuyez de leur impudence, qui nous force & renuerse sans dessus dessous tout le discours de nostre raison: tellement, que s'il y a gens au monde contre lesquels nous puissions dire ces mots,

Bien ie cognois le mal que ie vais faire,
c'est à l'encontre de ceux qui nous causent ceste honte d'aller porter faux tesmoignage, d'aller prononcer vne iniuste sentence, d'aller faire election d'un personnage inutile, ou de prester argent à homme que nous sommes certains qu'il ne le rendra pas. Et partant entre toutes les passions ceste honte excessiue est celle qui plus que nulle autre est accompagnée, en ce qu'elle fait, de repentance non suiuite apres, mais conioincte & presente: car il nous grieve de donner, nous rougissons de tesmoigner, nous encourons infamie de cooperer: & ne fournissans pas ce que nous auons promis, nous sommes conuaincus de ne le pouuoir bailler: car pour ne pouuoir contredire, nous promettons mesmes des choses qui nous sont impossibles, à ceux qui continuellement nous en pressent, comme de les recommander à ceux qui gouernent en cour, d'aller parler pour eux aux Princes, pour ne vouloir pas & n'auoir pas le cœur assez ferme de dire, Le Roy ne me cognoit pas, adressez vous à d'autres plus tost. Comme Lyfander ayant encouru la male grace du Roy Agesilaus, combien que lon estimast qu'il deust estre le premier en credit à l'entour de luy pour la reputation de ses haults faicts, n'eut point de honte d'esconduire ceux qui s'adressoient à luy, en leur disant, qu'ils allassent à d'autres, & qu'ils essayassent ceux qui auoient meilleur credit à l'entour du Roy que luy. Car ce n'est pas honte que de ne pouuoir pas toutes choses, mais bien de les entreprendre, ne pouuans pas, & n'estans pas idoines à les faire: & se promettre plus que lon n'a de puissance, outre ce qu'il est laid, encore fait-il fort mal au cœur. Mais aussi fault-il volontairement faire plaisir à ceux qui nous requierent choses raisonnables, & à nous conuenables: non par contrainte de honte, mais en cedant à l'equité, comme aussi à l'encontre des demandes dommageables ou deraisonnables, il fault tousiours auoir le dire de Zenon prompt à la main, lequel rencontrant un ieune homme de ses familiers, qui se promenoit à l'escart le long des murailles de la ville, & en ayant entendu la cause, que c'estoit pource qu'il fuyoit un sien amy, qui le requeroit de porter faux tesmoignage pour luy, Que dis-tu sot que tu es, luy respondit-il: celuy là ne craint point, & n'a point de honte de te requierir de choses iniques & deraisonnables, & tu n'as pas le cœur de le refuser & rebouter pour choses iustes & raisonnables? Car celuy qui dit,

Meschanceté est vne arme seante,
Contre celuy qui fait œuvre meschante,
nous enseigne mal à nous venger de la meschanceté, en nous la faisant imiter: mais

De la mauuaife honte.

de repouſſer ceux qui nous moleſtent impudemment & effrontément, en ne nous E
laiffant point vaincre à la honte, & ne conceder point choſes deſraifonnables & des-
honneſtes à tels effrontez, pour eſtre honteux de leur refuſer, ce ſont hommes ſages
& bien aduiſez qui le font ainſi. Or quant à ces dehontez importuns icy, il eſt bien
aiſé de reſiſter à ceux qui ſont petits, ſans aucune autorité ne moyen: & y en a qui
les eſcōduiſent avec vne riſee, & quelque trait de mocquerie, comme fait iadis Theo-
critus deux qui luy demandoient ſon eſtrille à emprunter dedans vne eſtuue, dont
l'vn eſtoit eſtranger, & l'autre de ſa cognoiſſance, mais larron: il les renuoya tous deux
ioyeuſement, en leur diſant, Quant à toy, ie ne te cognois point: & quant à toy, ie
te cognois bien. Et Lyſimache la preſbtreſſe de Minerue, ſurnommee Poliade, c'eſt
à dire gardienne de la ville d'Athenes, à des muletiers qui auoient amené des victi-
mes, & luy demandoient à boire: ô mes amis, dit-elle, j'aurois peur que lon n'en feiſt
couſtume. Et Antigonus à vn ieune homme qui eſtoit fils d'un gentil centenier, mais
luy eſtoit laſche & couard, & neantmoins demandoit à eſtre auancé en la place de F
ſon feu pere: Ieune fils, dit-il, ie recompense la prouèſſe, & non pas la nobleſſe de mes
ſoudards. Mais encore que le pourſuiuant ſoit homme d'autorité & puiſſant, qui
ſont ordinairement plus mal-aiſez à eſconduire & à renuoyer, meſmement ſ'il eſt
queſtion de donner ſa ſentence en quelque iugement, ou ſa voix en quelque election,
à l'aduenture ne ſemblera-il pas facile ny neceſſaire de faire ce que iadis fait Caton,
eſtant encore ieune homme, à Catulus, lequel pour lors eſtoit au plus grand & plus
hōnorable Magiſtrat qui fuſt à Rome, car il eſtoit Cenſeur, & ſ'en alla deuers Caton,
lequel preſidoit ceſte annee-là en la chambre du Threſor, à fin d'interceder pour vn
financier qui auoit eſté condamné en quelque amēde par Caton: il le preſſa & impor-
tuna tant de ſes prieres, que Caton à la fin fut contrainct de luy dire: Ce ſeroit choſe
bien villaine, Catulus, à toy qui es Cenſeur, que ne voulant pas ſortir d'icy, ie t'en feiſ-
ſe ietter dehors par les eſpaules à mes ſergens. Catulus aiant honte de ceſte parole,
ſ'en ſortit en cholere. Mais conſiderez ſi la reſponſe d'Ageſilaus & celle de Themis- G
tocles fut point plus gracieuſe & plus douce: car Ageſilaus, cōme ſon pere luy vou-
luſt faire iuger quelque proces contre le droit & contre les loix, Tu m'as, dit-il, mon
pere, monſtré dès ma ieuneſſe à obeir aux loix, voila pourquoy ie te veux encore
obeir maintenant, en ne iugeant rien qui ſoit contre les loix. Et Themistocles reſpon-
dit à Simonides qui le requeroit de quelque choſe iniuſte, Ny toy Simonides, ne ſe-
rois pas bon poëte, ſi tu chantois contre meſure, ny moy bon officier, ſi ie iugeois
contre les loix. Et neantmoins ce n'eſt point à faute de bonne proportion du manche
au corps de la lyre, comme diſoit Platon, que les villes contre villes, & les amis contre
les amis, entrans en different, ſouffrent & font ſouffrir les vns aux autres de tres-gran-
des miſeres & calamitez, ains eſt plus toſt pource qu'ils faillent en ce qui appartient
aux loix, & à la iuſtice: & toutefois il y en a qui obſeruans exactement & exquisement
au chant, à l'orthographe, aux meſures des ſyllabes, ce qui eſt de l'art, veulēt que pour H
eux les autres ſoient nonchalans & oublians du deuoir en l'adminiſtration d'un ma-
giſtrat, en leurs iugements, & en leurs actions. Et pourtant fault-il vſer de ce ſtyle
alencontre d'eux: Eſt-ce vn aduocat qui te vient importuner toy eſtant iuge, ou vn
orateur toy eſtant du Senat? accorde luy ce qu'il te demande, ſoubs condition, que
luy tout à l'entree de ſon oraiſon fera vne belle incongruité, ou qu'il vſera d'un mot
barbare en ſa narration: il ne le voudra iamais, pource que cela luy ſembleroit vne
trop grande villanie: car nous en voyons qui n'auroient pas le cœur de commet-
tre vne voyelle avec vne voyelle en parlant. Ou bien, eſt-ce quelqu'un des nobles
ou des gens d'honneur & d'autorité qui te preſſe? dy luy qu'il aille donc ſautant &
danſant pour l'amour de toy à trauers la place, en faiſant la mouë, & tordant la
gueule: & ſ'il te dit qu'il n'en fera rien, ce ſera lors à toy à parler, & à luy demander,
lequel

- A lequel est plus villain, ou faire vne incongruité en parlant, & tordre la bouche, ou bien violer la loy, & faulser sa foy, & adiuger plus de bien au meschant qu'au bon, contre tout droict & raison. D'auantage comme Nicostratus l'Argien respondit au Roy Archidamus qui le sollicitoit à luy liurer par trahison la ville de Cromnum, pour vne bonne somme d'argent, & pour le mariage de telle Dame qu'il vouldroit choisir en toute Lacedemone, qu'il n'estoit point descendu de la race de Hercules, pource que luy alloit par tout le monde tuant les meschants apres les auoir vaincus: & luy s'estudioit de rendre ceux qui estoient gens de bien, meschants. Ainsi nous faudra-il parler à celuy qui vouldra estre tenu pour homme de bien & d'honneur, & ce pendant nous viendra presser & forcer de faire choses indignes & de sa noblesse & de sa vertu. Mais si ce sont basses & communes gens, il faudra voir & considerer si tu le pourrois induire, si est auaricieux, à te prester vn talent sans cedula ny obligation: ou si est ambicieux, si tu luy pourrois persuader de te ceder quelque
- B preface: ou si est conuoiteux des honneurs publiques, te quitter sa brigue, mesmement lors qu'il y aura apparence qu'il soit pour emporter l'office qu'il pretend: car il seroit à la verité estrange, qu'eux en leurs vices & passions fussent si roides, si fermes, & si immuables, & que nous qui voulons estre tenus pour gens de bien, amateurs du deuoir & de la iustice, ne peussions estre maistres de nous mesmes, ains laississions porter par terre nostre vertu, & l'abandonnissions. Car si ceux qui nous font honte à force de nous presser, le font ou pour leur reputation, ou pour leur autorité, il n'y a point de propos de vouloir augmenter l'honneur, le credit, & autorité d'autrui, en se deshonorant, & se diffamant soy-mesme: comme ceux qui aux ieux de pris publics faulsent leur foy à distribuer les pris, ou qui aux elections des magistrats par faueur donnent à qui ne le merite pas les honneurs de seoir aux palais, & les couronnes de victoire, en se priuant eux-mesmes de bonne reputation & de saine conscience. Et si nous voions que c'est pour le gain, que cest importun nous
- C fait si pressante instance, comment ne nous vient-il incontinent en pensee, que c'est chose esloignee de toute raison de mettre en compromis sa reputation & sa vertu, à fin que la bourse d'un ie ne sçay qui en soit plus pesante? Mais certes telles considerations se representent bien à l'entendement de plusieurs, lesquels n'ignorent pas qu'ils font mal: comme ceux que lon contrainct de boire de grandes coupes de vin toutes pleines, ils accomplissent à toute peine, en soupirant, & tournant les yeux en la teste, & changeant tout de visage, ce qui leur est commandé: mais ceste mollesse de cœur ressemble à vne foible temperature de corps, qui ne peult resister ny au froid ny au chaud: car soit qu'ils soient louez par ceux qui les poursuyuent, ils sont incontinent destrempez & dissouls par telles louanges: soit qu'ils craignent d'estre accusez, repris & soupçonnez s'ils refusent, ils en meurent de peur: mais au contraire il se faut affermir à l'encontre de l'un & de l'autre, sans se laisser plier ny
- D esbranler, ny à ceux qui font peur, ny à ceux qui flatent. Or Thucydides estimant qu'il soit impossible d'auoir grande puissance, & n'estre point enuié, dit que celuy qui est bien aduisé choisit d'estre subiect à l'enuie pour faire de grandes choses: quand est à moy, j'estime qu'il n'est pas difficile d'eschapper l'enuie: mais d'euitter toutes plaintes, & se garder d'estre moleste à pas vn de ceux qui hantent aupres de nous, il me semble du tout impossible: & pourtant me semble aussi, que nous prendrons bon conseil quand nous choisirons plus-tost d'estre en la male grace & inimitié des importuns, que de ceux qui iustement nous accuseroient, si contre tout droit & iustice nous faisons pour ces iniques poursuyuans. Il y a plus, qu'il se faut bien donner garde des louanges de tels importuns poursuyuans, comme estans fardees & desguisees, de peur qu'il ne nous prenne comme aux pourceaux, qui quand on les gratte, & qu'on les frotte & chatouille, se laissent faire tout ce qu'on veut,

De la mauuaise honte.

iusques à se veaultrer par terre: car il n'y a point de difference entre ceux qui baillent E
leurs iambes à se faire trainer, & ceux qui prestent leurs oreilles à foudrir flater, sinon
que ceux-cy se laissent renuerfer & ietter par terre plus villainement, les vns en remer-
tant les peines & punitions deuës à des meschans, à fin qu'ils soient appelez humains,
doux, pitoyables, & misericordieux: les autres au contraire, persuadez par ceux qui les
louent de se soubmettre à des inimitiez & accusations non necessaires & dangereuses,
en leur disant, qu'ils sont seuls hommes entiers, seuls qui ne se laissent point gagner par
flaterie, voire qui se peuuent dire seuls auoir bouche & langue libre. C'est pourquoy
Bion accomparoît telles manieres de gens à des vases à deux anses, qui se transportent
aisément par les oreilles là où on veult: comme lon raconte que le Sophiste Alexi-
nus disoit vn iour tout plein de mal, en se promenât avec d'autres, de Stilpon philoso-
» phe Megarien: & comme quelqu'un de la compagnie luy dist, Et comment, il disoit
» l'autre iour tous les biens du monde de toy: Certainement aussi, respondit-il, est-ce
» vn tres-homme de bien & de fort gentil cœur. Mais au contraire Menedemus estant F
» aduerry, que ce mesme Alexinus disoit souuent bien de luy: Au contraire, dit-il, ie dis
» tousiours mal d'Alexinus: tellement qu'il faut necessairement qu'il soit meschant hō-
» me, ou pource qu'il en loüe vn meschant, ou pource qu'il est blasmé d'un bon. tant il
estoit malaisé à fleschir, ou à prendre par telles voyes, & tant il prattiquoit bien cest
enseignement d'Antisthenes surnommé Hercules, qui commanda à ses enfans, de ne
sçauoir iamais gré ny grace à personne qui les loüast: ce qui n'estoit autre chose, que
de ne se laisser point gagner à la hôte, pour contreflater ceux qui les loueroient: car il
» suffit, ce que respondit Pindare à vn qui luy disoit, Ie te vois loüant par tout & enuers
» tous: & ie t'en rends la grace, dit-il, pourtant que ie te fais dire verité. Ce doncques
qui est souuerainement vtile alencontre de toutes autres passions, se doit aussi princi-
palement employer alencontre de ceste excessiue honte, quand ils verront que contre
leur volonté, forcez de tel vice, ils auront cōmis quelque faute, & seront trespuchez, G
de s'en souuenir, & l'imprimer bien fermement en leur memoire, & conseruer en leur
pensée bien longuement les marques de la morsure, & les notes de leur repentance, en
les repetant souuent. Car ainsi comme les viateurs passans chemin, quād ils ont chop-
pé & bronché contre vne pierre, & les pilotes aians brisé leur vaisseau contre vn ro-
cher, s'en souuiennent, ils redoutent effroyement, non ces pierres ny ces roches-
là seulement, mais aussi toutes celles qui leur ressembtent, tout le temps de leur vie:
aussi ceux qui serrent en leur pensée atteinte & picquee de repentance, les pertes &
deshonneurs qu'ils ont receus à cause de ceste honte vicieuse, en iront apres plus rete-
nus en cas semblables, & ne se laisseront pas vne autrefois facilement aller.

De l'amitié

H

A



E V X de la ville de Sparte appellent les anciennes deuises & figures dediees & consacrees à l'honneur de Castor & Pol-
 lux, Docana, qui vaut autant à dire comme, les poutres des
 Roys : ce sont deux pieces de bois distantes également l'une
 de l'autre, conioinctes par autres deux equidistantes aussi en
 trauers : & semble que ce soit vne deuise bien propre & con-
 uenable à l'amitié fraternelle de ces deux Dieux, pour mon-
 strer l'vnion indiuifible qui estoit entr'eux : aussi vous offre-
 ie, Seigneurs Nigrinus & Quintus, ce petit traicté touchant
 l'amitié fraternelle, commun & conuenable à vous deux, comme à ceux qui en estes
 dignes : car faisans desia de vous mesmes ce à quoy il vous admoneste, il ne semblera
 pas tant vous admonester de le faire, comme vous porter tesmoignage de l'auoir
 desia fait : & la ioye que vous sentirez de voir approuué ce que vous fairez, donnera
 encore à vostre iugement vne assurance plus ferme pour le faire continuer, comme
 estans vos actions approuuees & loüees par des vertueux & honnestes spectateurs. Or
 Aristarchus pere de Theodectes se mocquant du grand nombre des Sophistes con-
 trefaisans les Sages qui estoient de son temps, disoit qu'anciennement à peine y auoit
 il eu sept Sages par le monde, mais de nostre temps, disoit-il, à peine pourroit-on
 trouuer autant d'hommes ignorans. Mais ie pourrois avec verité dire, que ie voy de
 nostre temps l'amitié aussi rare entre les freres, comme la haine l'estoit au temps passé :
 de laquelle encore le peu d'exemples qui s'en est anciennement trouué, du consente-
 ment des viuans a esté renuoyé aux Tragédies & aux Theatres, comme chose estrange
 & fabuleuse : mais tous ceux qui sont auourd'huy, quand ils rencontrent deux bons
 freres, ils s'en esmerueillent autant comme ils feroient de voir ces Molionides là, qui
 sembloient auoir les corps collez ensemble : & trouuēt aussi mal-aisé à croire & mon-
 strueux, que des freres vsent en commun des biens, des amis, & des esclaves que
 leurs peres leur ont laissez, comme ils feroient que vne seule ame regist les pieds, les
 mains, & les yeux de deux corps : combien que la nature n'ait pas logé loing l'exem-
 ple du deportement dont doiuent vser les freres les vns enuers les autres, ains dedans
 le corps mesme, là où elle a formé la plus part des membres necessaires doubles, fre-
 res & germains, comme deux mains, deux pieds, deux yeux, deux oreilles, deux na-
 zaux, nous montrant qu'elle les a ainsi distinguez & diuisez pour leur salut mu-
 tuel, & pour s'entrecider reciproquement, non pas pour quereller ny combattre
 les vns contre les autres : & qu'ayant diuisé la main en plusieurs doigts de longueurs
 inegaux, elle l'a rendue le plus apte, & le plus propre, & le plus artificiel outil qui
 soit : tellement que l'ancien Anaxagoras mettoit la cause de toute la sapience & sa-
 gesse de l'homme en la main : mais toutefois le contraire de cela est veritable, car
 l'homme n'est pas le plus sage des animaux, pour autant qu'il a des mains : mais pour
 ce que de sa nature il est raisonnable & ingenieux, il a aussi de la nature obtenu des
 outils qui sont tels. Or est-il manifeste à chascun, que la nature a formé d'une mesme
 semence & d'un mesme principe deux, & trois, & plusieurs freres, non à fin qu'ils
 querellassent ou combattissent les vns aux autres, mais à fin qu'estans separez les vns
 des autres, ils s'entrecidaissent mieux & plus commodément. Car ces hommes là à
 trois corps & à cent bras que nous peignent les Poëtes, si iamais il en a esté de tels,
 estans collez & conioincts de toutes leurs parties, ne pouuoient rien faire hors d'eux
 mesmes, ny à part les vns des autres : ce que les freres au contraire peuuent bien faire,
 demourer en la maison, & aller dehors, se mesler des affaires publiques, & labour-
 rer la terre tout ensemble, les vns par les autres, prouueu qu'ils conseruent bien
 le principe d'amitié & de bien-veüillance que la nature leur a baillé : sinon, ils ressem-

De l'amitié fraternelle.

bleront proprement aux pieds qui se donnent le croc en iambe l'un à l'autre pour se E
faire tomber, & aux doigts de la main qui s'entrelaissent pour se tordre & se debouërter
contre nature les vns les autres. Mais plus tost ainsi comme en vn mesme corps le froid
& le chaud, le sec & l'humide regis par vne mesme nature, quand ils s'accordent &
conuiennêt bien ensemble, engendrent vne tresbône & tres-doulce harmonie & tem-
perature, qui est la santé, sans laquelle ny tous les biens du monde,

*Ariphron,
en son Ode
de la santé.*

Ny la grandeur de maiesté royale,

Quant aux humains à la diuine egale,

ne sçauroient donner ny plaisir ny profit à l'homme: mais si entre ces premieres qua-
litez là il se met vn debat & vne cupidité de s'accroistre par dessus les autres, elle cor-
rompt tres-villainement & confond sans dessus dessous le corps de l'animal: aussi par
l'union & concorde des freres, toute la race & toute la maison s'en porte mieux, & en
florit, & les amis mesmes & familiers, comme vne belle danse qui va tout d'un branle:
car ils ne font, ny ne disent, ny ne pensent chose quelconque qui soit contraire les vns F
aux autres:

Mais en discord & partialité

Le plus meschant a lieu d'autorité.

ou vn rapporteur de vallet à mauuaise langue, ou vn flatteur qui se glissera de dehors
au dedans, ou vn voisin maling & enuieux: Car comme les maladies engendrent es
corps qui ne reçoient point ce qui leur est propre, des appétits de nourritures estran-
ges, & qui leur sont nuisibles: aussi la calomnie ou suspicion à l'encontre de ses pa-
rents, attire de dehors des propos mauuais & meschants, qui coulent tousiours là où
ils sentent qu'il y a quelque défaut. Or le deuin d'Arcadie, ainsi comme escrit Hero-
dote, fut contraint de se faire vn pied de bois, apres qu'il se veit priué du sien naturel:
mais vn frere qui fait la guerre à son frere, & qui est contrainct d'acquiescer vn amy
estranger, ou de la place, en s'y promenant, ou du parc des exercices, en regardant ceux
qui s'y exercent, me semble ne faire autre chose, que volontairement se couper vn G
membre de sa propre chair tenant à luy, pour y en appliquer & attacher vn estran-
ger: car la necessité mesme qui nous induit à rechercher & à receuoir amitié & con-
uersation, nous enseigne d'honorer, entretenir & conseruer ce qui est de nostre pa-
renté, comme ne pouuans viure, ny n'estans point nez pour demeurer sans amis,
sans frequentation, solitaires, à part comme bestes sauuages: & pourtant dit bien &
sagement Menander,

Par bancqueter & bonne chere faire

Les vns avec les autres ordinaire,

Cherchons-nous pas, mon pere, à qui fier

Nous nous puissions? & n'est pas celuy fier,

Pensant auoir trouué des biens sans nombre,

Qui d'un amy a peu recouurer l'ombre?

H

car ce sont ombres veritablement la plus part de noz amitez, images & semblances
de celle premiere que la nature imprime aux enfans enuers leurs peres & meres, &
aux freres enuers leurs freres: & celuy qui ne la reuerse & l'honore, comment pourra
il faire à croire & persuader aux estrangers qu'il leur porte bien-veillance? Et quel
homme est celuy là qui appelle en ses caresses & par ses misliues vn sien compaignon
son frere, & ne veut pas seulement aller par chemin quand & son propre frere? Car
comme ce seroit vne folie d'orner la statue de son frere, & ce pendant battre & mu-
riller son propre corps naturel: aussi reuerer & honorer le nom de frere en d'autres,
& le frere propre le fuir & haïr, ne seroit pas fait en homme d'entendement sain,
ne qui iamais eust compris en son cœur, que la nature soit la plus sainte & la plus sa-
cree chose du monde. A ce propos il me souuient qu'un iour à Rome ie pris la charge
de iuger

- A** de iuger entre deux freres comme arbitre, desquels freres l'un sembloit faire profession de philosophie, mais il estoit, comme il apparut, non seulement frere à faulx enseignes, mais aussi philosophe à faulx tiltre, ne meritant pas ce nom : car comme ie luy remonstrasse & requisse qu'il se portast enuers son frere comme philosophe enuers vn sien frere, & vn frere ignorant des lettres: quant à ignorant, dit-il, ie l'aduouë bien pour veritable, mais quant à frere, ie ne tiens pas pour chose grande ny venerable d'estre sorty de mesmes parties naturelles. Il appert voirement, dis-je, que tu ne fais pas grand compte d'estre yssu de mesmes parties naturelles, mais tous les autres, fils ne le sentent & pensent ainsi, pour le moins si disent & chantent-ils, que la nature & la loy qui conseruela nature, ont donné le premier lieu de reuerence & d'honneur, apres les Dieux, au pere & à la mere : & ne scauroient les hommes faire seruice qui soit plus agreable aux Dieux, que de payer gracieusement & affectueusement aux pere & mere qui les ont engendrez, & à ceux qui les ont nourris & esleuez,
- B** les vsures des graces vieilles & nouuelles qu'ils leur ont prestees : comme au contraire, „ il n'y a point de plus certain signe d'un Atheiste, que de mettre à nonchaloir, ou com-
 „ mettre quelque faulte à l'encontre de son pere & de sa mere. Et pourtant est-il
 „ defendu de faire mal aux autres, mais de ne se monstrier pas à son pere & à sa mere
 „ faisant & disant toutes choses, ie ne diray pas dont ils ne soient pour prendre des-
 „ plaisir, mais dont ils ne soient pour receuoir du plaisir, on l'estime vne impieté & vn
 „ sacrilege. Et quelle action, quelle grace, ny quelle disposition des enfans enuers leurs
 peres & meres leur pourroit estre plus agreable, ny leur donner plus de contentement, que de voir vne bien-veillance, & vne amitié asseuree & certaine entre les freres? Ce que lon peut facilement cognoistre par les signes contraires : car veu que les fils courroucent leurs peres & leurs meres, quand ils outragent ou traittent mal vn esclau qu'ils aiment & qu'ils tiennent cher: & veu que les bonnes vieilles gens de cordiale & gentille affection, sont marris que lon ne fait cas ou d'un chien, ou d'un
- C** cheual, qui sera né en leur maison : & se faschent quand ils voient que leurs enfans se moquent, ou mesprisent les ieux, les recits, les spectacles, les luidteurs & autres cōbattans qu'eux ont autrefois beaucoup estimez : est-il vray-semblable qu'ils puissent porter patiemment de voir que leurs enfans s'entre-haïssent, qu'ils querellent tousiours l'un à l'autre, qu'ils mesdisent l'un de l'autre, qu'en toutes entreprinſes & actions ils soient tousiours appoinctez contraires, & taschent à s'entre-supplanter l'un l'autre? Je croy qu'il n'y a homme qui le voulust dire. Doncques au contraire, aussi les freres qui s'entrayment & s'entrecherissent l'un l'autre, qui reioignent en vn lien de mesmes volontez, estudes, & affections, ce que la nature auoit déioinct & separé de corps, & qui ont tous deuis, exercices, ieux, & esbats cōmuns entr'eux, certainement ils donnent à leurs pere & mere vn doux & heureux contentement en leur vieillesse de ceste grande amitié fraternelle. Car iamais pere n'aima tant les lettres, ny l'honneur,
- D** ny l'argent, comme il aime ses enfans : & pourtant ne voyent-ils pas avec tant de plaisir leurs enfans ny bien disans, ny opulents, ny colloquez en grands offices & dignitez, comme ils font s'entraymans. C'est pourquoy on lit que Apollonide, natifue de la ville de Cyzique, & mere du Roy Eumenes, & de trois autres freres, Attalus, Phileterus, & Athenus, se reputoit bien-heureuse & rendoit graces aux Dieux, non pour ses richesses, ny pour sa principauté, mais pour ce qu'elle voyoit ses trois enfans puisnez seruir de garde-corps à leur frere aîné, & luy viuant librement & en toute asseurance au milieu d'eux, ayans les espees au costez, & les iauelaines en leurs mains: comme au rebours aussi le Roy Xerxes aiant apperceu que son fils Ochus dressoit embusche à ses freres pour les faire mourir, en mourut de desplaisir. Car les guerres sont bien griesues entre les freres, ce disoit Euripide, mais plus qu'à nuls autres sont elles griesues aux peres & aux meres : pource que celuy qui hait son frere, & ne le

En la Tra-
 gédie de
 Apogenie
 en Aulide,

De l'amitié fraternelle.

peut voir de bon œil, ne sçauroit qu'il n'en soit courroucé contre celui qui l'a engen- **E**
dré, & celle qui l'a enfanté. Or Pisistratus se remaria en secondes nopces, que ses en-
fans du premier liēt estoient desia tous hommes faiets, & disoit que les voyant ainsi
beaux & bons, il desiroit estre pere de plusieurs autres encore, qui leur ressemblassent:
aussi les bons & loyaux enfans, non seulement pour l'amour de leurs peres & meres
s'entre-aimeront plus les vns les autres, mais aussi en aimeront d'auantage leurs peres
& meres, les vns pour les autres, disans & pêsans tousiours en eulx-mesmes, qu'ils sont
pour beaucoup de causes bien obligez à eux, mais principalement pour le regard de
leurs freres, comme estant le plus precieux, & le plus doux & gracieux heritage qu'ils
aient herité d'eux. C'est pourquoy Homere a bien fait, quand il introduit Telemachus
comptant entre ses calamites ce, qu'il n'auoit point de frere,

Odyss. liu.
24.

Car Jupiter la race de mon pere
A terminé en moy seul, sans nul frere.

Au Poëme
intitulé, Les
œuvres.

& au contraire Hesiode ne souhaite & ne conseille pas bien, qu'un fils unique soit he- **F**
ritier vniuersel des biens de son pere, luy mesmement qui estoit disciple des Muses,
lesquelles ont ainsi esté appellees, pource qu'elles sont tousiours ensemble, à cause de
l'amour & bienueüillance fraternelle qu'elles se portent l'une à l'autre. L'amitié fra-
ternelle doncques est telle enuers les peres & meres, que d'aimer son frere est demon-
stration certaine d'aimer aussi son pere & sa mere, & un exemple & enseignement à ses
enfans de s'entre-aimer les vns les autres, autant que nulle autre chose: comme aussi au
contraire, ils prennent le mauuais exemple de haïr leurs freres de l'original de leur pe-
re: car celui qui est enuicilly en procez, en querelles & dissensions avec ses freres, & puis
va prescher ses enfans de viure amiablement ensemble, il fait ce qui se dit en un com-
mun prouerbe,

Tout vlcéré il veut guarir les autres,
& oste par ses faiets toute efficace à sa parole. Si doncques le Thebain Eteocles aiant **G**
dit à son frere ce qui est en Euripide,

En la Trage-
die des Phœ-
niciennes.

Je monteroie en l'estoillé sciour
Du clair Soleil, où commence le iour,
Et descendrois deffoubs la terre basse,
Si ie pouuois acquerir par audace
La royauté souueraine des Dieux:
venoit puis apres à admonester ses enfans
De conseruer entre eux egalité,
Laquelle ioinct cité avec cité,
Amis avec leurs amis secourables,
Confederez en ligues perdurables:
Et n'y a rien qui en fermeté seure,
Qu'egalité en ce monde demeure:

qui seroit celui qui ne se mocqueroit de luy? Et quel seroit trouué & réputé Atreus, si **H**
apres auoir donné à soupper les propres enfans à son frere, il venoit ainsi arraisonner
& instruire ses enfans?

Quand le malheur sur quelqu'un prent son cours,
Communément il n'a d'amis secours,
Sinon de ceux qui sont de son lignage.

Et pourtant fault-il de tout poinct bannir & chasser la haine de ses freres, comme celle
qui est mauuaise nourrice de la vieillesse des peres & meres, & pire encore de la ieu-
nesse des enfans: & si donne mauuais bruit, & grand blasme enuers les concitoiens,
lesquels estiment & iugent à bonne cause, qu'ayans esté nourris & eleuez dès leur
naissance ensemble, ils ne seroient pas deuenus ennemis & malueuillans, fils ne sça-
uoient

A uoient de grandes meschancetez & grandes peruersitez les vns des autres; car il fault bien qu'il y ait de grandes & griefues causes pour dissouldre vne si grande amitié & bienueillance, tellement que puis apres ils se reconcilient malaisément. Car ainsi comme les corps qui ont vne fois esté ioincts ensemble, si la colle ou ligature vient à se lascher, ils se peuuent bien de rechef reioindre & recoller ensemble: mais depuis qu'un corps naturel vient à se rompre ou deschirer, il est mal aisé de trouuer colleure ny soudeure qui le puisse iamais revnir: aussi les amitez mutuelles que la necessité a conioinctes entre les hommes, si d'auenture elles viennent quelquefois à se separer, facilement elles se reprennent: mais les freres, si vne fois ils sont esloignez & decheus de ce qui est selon la nature, difficilement reuiennent-ils plus iamais ensemble: & s'ils y reuiennent, la reconciliation attire vne cicatrice orde & sale, tousiours accompagnée de defiance & de soupçon. Or toute inimitié d'homme à homme s'imprimant aux cœurs, avec les passions qui plus trauaillent & tourmentent, comme opiniastrété, cholere, enuie, souuenance des maux passez, est chose fort douloureuse & turbulente: mais celle qui est de frere à frere, avec lequel il est force d'auoir communion de tous sacrifices, & de toutes choses saintes & religieuses, mesme sepulture, & quelquefois mesme maison, possessions, & heritages confinans les vns aux autres, a tousiours deuant ses yeux ce qui la tourmente, luy ramenant en memoire sa folie & sa forcenerie, pour laquelle la face qui mieux luy ressemble, & qui luy deueroit estre la plus doulce, luy est la plus hideuse à voir, & la voix la plus amiable & la plus familiere depuis son enfance, luy deuient plus effroyable à ouïr: & voians plusieurs autres freres qui n'ont qu'une maison, qu'une table, mesmes heritages, & seruiteurs non departis, eulx au contraire ont partagé leurs amis, leurs hostes, leurs familiers, brief toutes choses qui sont communes entre les autres freres, leur sont à eux ennemies & contraires: encore qu'à toute personne il soit facile à discourir en son entendement, que les amis, & les compagnons de table sont subiects à estre rauagez, les familiers & les alliez se peuuent acquerir nouueaux, quand les premiers, ne plus ne moins que des outils ou des instruments, sont vsez, mais d'acquerir vn nouueau frere il n'est pas possible, non plus qu'une main couppee, ou vn œil arraché. Et dit la Persienne sagement, quand on luy demanda pourquoy elle

» aimoit mieux sauuer la vie à son frere qu'à son fils: Pource, dit-elle, que ie puis bien

» auoir d'autres enfans, mais d'autres freres, maintenant que mes pere & mere sont

» morts, ie ne puis. Que faut-il donc faire, me pourra demander quelqu'un, à vn qui aura vn mauuais frere? Premierement, il faut retenir en memoire, que la mauuaistié se trouue en toutes sortes d'amitié qui sont entre les hommes, & que selon ce que dit Sophocles,

Plus des humains les faiëts tu chercheras,

Plus mal que bien tousiours y trouueras.

D Il n'y a ny amitié de parentelle, ny de societé, ny de compagnie, qui se puisse trouuer sincere, saine & nette de tout vice. Mais le Lacedemonien qui espousoit vne petite

» femme disoit, qu'entre les maux il faut tousiours choisir les moindres: aussi pourroit-on, à mon aduis, sagement conseiller aux freres, de supporter plus tost les imperfections domestiques, & les maux de leur propre sang, que d'experimenter ceux des estrangers: car en l'un n'y peut auoir reprehension aucune, d'autant que lon y est contrainct: & l'autre est reprehensible, d'autant qu'il est volontaire. Car ny le compagno de table, ou de ieu, ny de l'age, ny l'hoste

N'est point lié de fers sans fer forgez,

Qu'estroittement honte luy a chargez:

mais si est bien celuy qui est de mesme sang, qui a esté nourry avec nous, qui est né d'un mesme pere & d'une mesme mere, auquel il semble que la vertu mesme permet

De l'amitié fraternelle.

& concede par conuiuence quelque chose, quand il dit à son frere pechant & faillant E
en quelque endroit,

Homere O-
dyll. 1. 13.

L'occasion pourquoy sans offenser

Je ne te puis miserable laisser,

homme non seulement miserable, mais aussi mauuais & mal sage, c'est de peur qu'en
n'y pensant pas, ie ne semble punir aigrement & amerement en toy quelque vice de
pere ou de mere instillé en toy par leur semence, en te haïssant. Car, comme di-
soit Theophraste, il ne faut pas aimer les estrangers pour les esprouuer, mais au con-
traire il les faut esprouuer pour les aimer: mais là où la nature ne donne pas au iuge-
ment la precedence pour faire aimer, ny n'attend pas ce que lon dit communé-
ment, qu'il faut auoir mangé vne mine de sel avec celuy que lon veut aimer: ains
dés nostre natiuité a fait naistre quand & nous le principe & l'occasion d'amitié, là
ne faut-il pas que nous allions trop asprement ny trop exactement recherchant les
fautes & imperfections. Mais maintenant tout au contraire, que diriez-vous qu'il F
y en a qui supporteront & excuseront facilement, iusques à y prendre plaisir, les faul-
tes des estrangers, & qui ne leur appartiennent de rien, avec lesquels ils auront pris
quelque cognoissance ou en vn banquet, ou au ieu, ou aux exercices de la personne,
& seront seueres, voire inexorables alencontre de leurs propres freres? tellement qu'il
y en a qui prennent plaisir à nourrir des chiens mauuais, des cheuaux: & plusieurs, des
onces, des chats, des singes, des lions, & les aiment: & ce pendant ils ne peuuent pas
endurer les courroux, les erreurs, ou les ambitions de leurs propres freres. Et d'autres,
qui donneront à des paillardes & putains des maisons & des terres toutes entieres,
combattront à bon esçiant contre leurs freres pour vne mesure ou pour vn coing
de maison: & puis imposans à la malueillance qu'il portent à leurs freres le nom
de haine des meschans, ils s'en iront detestans & vituperans le vice en leurs freres,
& aux autres ils ne s'en soucieront pas, ains hanteront & frequenteront communé-
ment avec eux. Cela doncques soit comme le preambule de tout nostre discours. G
Au reste pour entrer aux enseignements, ie ne veux pas commencer, comme les
autres font, au partage des biens paternels, mais à l'emulation mauuaïse & ialou-
sie reprehensible qui se leue entre les freres, viuans encore les peres & meres. Age-
filaus iadis auoit vne coustume, qu'il enuoyoit à chascun Senateur de Lacedemone,
incontinent qu'il estoit créé, vn bœuf, en tesmoignage de sa vertu: les Ephores, qui
estoient comme Syndiques d'un chacun, l'en condamnerent à l'amende enuers le
public, avec adionction de la cause, que c'estoit pource que par telles caresses &
menees il alloit prattiquant & gagnant à luy seul ceux qui deuoient estre communs
à tous: Aussi pourroit-on conseiller à vn fils d'honorer tellement pere & mere, qu'il
n'estudie pas à se les gagner, & acquerir leur bonne grace pour luy seul, en destour-
nant leur bienueillance des autres enuers luy, par laquelle prattique plusieurs sup-
plantent leurs freres, couvrans d'une couleur honneste en apparence, mais non iuste
en verité, leur auarice & cupidité: car ils priuent leurs freres finement & cauteleuse- H
ment du plus beau & du plus grand bien de leur heritage, qui est l'amour & bien-
ueillance de peres & meres, espians oportunément l'occasion que leurs freres font
ailleurs empeschez, ou qu'ils ne se doutent point de leurs menées, & se rendans fort
modestes, reglez, soupplés & obeïssans à leurs peres, mesmes es choses où ils voient
que leurs freres s'oublient & faillent, ou semblent faillir: là où il faut faire tout l'op-
posite, quand on sent qu'il y a quelque courroux & mescontentement du pere,
en se mettant & se coulant deffoubs la charge, comme pour soulager son frere, en
luy aidant, & par caresses & secourables seruices remettre le mieulx qu'on peut son
frere en grace: & quand il a inexcusablement failly, il en faut reietter la coulpe ou
sur le temps contraire, ou sur quelque autre occupation, ou bien sur sa nature mesme,
comme

A comme estant plus vtile & plus idoine à autre chose : & conuient bien à cela le dire d'Agamemnon,

Ce n'a esté ny par lourde paresse,
Ny par defect de sens & de sagesse,
Ains pour auoir sur moy l'œil estendu,
Et le motif de mon cœur attendu.

Iliad. liu. 7.

Aussi peut dire vn bon frere, à l'excuse de son frere, Il m'a voulu laissé faire ce deuoir là. Les peres mesmes sont bien aises d'ouïr faire translations de noms, & adioustent foy à leurs enfans, quand ils appellent la negligence & paresse de leurs freres, vne simple bonté : la sottize, vne bonne & droitte conscience : vne opiniastrété querelleuse, courage qui ne veut point estre mesprisé : de maniere que celuy qui y procede de telle forte, en intention d'appaiser son pere, il y gaigne cela, qu'oultre ce qu'il diminue la cholere de son pere alencontre de son frere, il augméte la bienueillance de son pere enuers luy. Puis apres, quand on a ainsi respondu & satisfait au pere, il se faut alors adresser à part au frere, & luy toucher & remonstrer vifement en grande liberté son peché & sa faute : car il ne fault ny estre indulgent ou conuiuent enuers son frere, ny aussi luy estre trop dur, & le fouller aux pieds quād il a failly : car l'un est autant comme s'esjouir de sa faute, & l'autre faillir avec luy : mais vser d'une reprehension & correction, qui tesmoigne le soing de son bié, & le desplaisir de sa faute : car celuy qui aura esté le plus affectionné aduocat & intercesseur pour luy enuers ses pere & mere, sera le plus vehement accusateur en priué enuers luy-mesme. Que

B fil aduient que le frere n'ayant rien offensé, soit neantmoins accusé enuers le pere, il est certainement tres-honneste en toute autre chose de plier & supporter toute cholere & toute rudesse de pere & de mere, mais neantmoins les iustifications & defenses d'un frere enuers eux, qui contre tout droit & raison & contre verité seroit accusé, ou à qui lon feroit tort, sont irreprehensibles & fondees en toute honnesteté : & ne fault

C point craindre en tel cas d'ouïr le reproche qui se lit en Sophocles,

Mauuais le fils qui si fort degenerate,
Que de plaider contre son propre pere,

en parlant librement pour la defense de son frere, que lon voit iniquement condamné ou opprimé : car telle procedure rend la perte de la cause plus agreable à ceux qui sont conuaincus, que ne leur eust esté la victoire & gaing de cause. Au demourant, depuis que le pere est decedé, il se fault encore plus affectionner à aimer ses freres, que non pas au parauant : Premièrement à mener dueil, & à communiquer la charité du sang, en regrettant la mort du commun pere, & en reiettant arriere toutes suspicions de vallets, & tous calomnieux rapports des familiers qui voudroient fermer quelque alteration entre eux : & plus tost croyant tout ce que l'on raconte de l'amour reciproque de Castor & Pollux, mesmement ce que lon dit, que Pollux tua

D d'un coup de poing vn qui luy venoit rapporter en l'oreille quelque chose alencontre de son frere : puis quand ce vient au partage des biens patrimoniaux, ne s'entrede-noncer pas la guerre l'un à l'autre, comme font plusieurs y venans tous preparez à ceste intention,

Escoute moy la fille de la guerre, Diffension :

ains se donner bien garde de celle iournee, comme celle qui est aux vns commencement de guerre mortelle & irreconciliable, & aux autres d'amitié & de concorde perdurable : & là faire leurs partages entre eux seuls, si est possible : si non, en la presence d'un amy commun à tous deux, homme de bien, qui assiste, comme dit Platon, aux loix de iustice, en prenant & donnant ce qui sera plus agreable & plus cōuenable l'un à l'autre : & ainsi estimer que lon partage seulement la procuration & l'administration des heritages, & laisser l'usage & la iouissance de tout, sans departir en com-

De l'amitié fraternelle.

mun, là où il y en a qui s'entre-arrachent les vns aux autres les nourrices qui les ont E nourris de mammelle, ou les enfans qui ont esté esleuez & nourris qu'ad & eux, à toute force de les pourfuiure, & s'en vont au partir de là aians gagné le pris d'un esclave, & perdu ce qui estoit le plus precieux en la succession de leur pere, l'amitié & la confiance de leur frere: & en ay cogneu, qui sans y auoir aucun gain, par vne opiniastrété seulement, au partage de leurs biens paternels se sont portez ne plus ne moins, & de rien plus gracieusement, que si c'eust esté butin & pillage de guerre: entre lesquels nommément ont esté Charicles & Antiochus de la ville d'Opunte, qui coupperent par le milieu vn vase d'argent & vn habillement, & en emporterent chascun sa part, diuisans ainsi, comme par vne malediction tragique,

Leur heritage au trenchant de l'espee.

Les autres vont contant apres leurs partages, comme par subtils moiens, par finesse & cautelle, ils ont circonuenu leurs freres, & ont beaucoup gagné, s'en glorifians, là où plus tost ils se deuoient esiouir, plaire à eux mesmes, & se magnifier, de ce que F par gracieuseté, courtoisie & volontaire cession, ils seroient venus au dessus de leurs freres. Et pourtant merite bien Athenodorus que lon face mention de luy en cest endroit, comme il n'y a celuy en nostre pais qui ne s'en souuienne bien: Il auoit vn frere plus ancien que luy, qui se nommoit Xenon, lequel maniant comme curateur le bien entier d'eux deux, en dissipa vne bonne partie, & à la fin aiant pris vne femme à force, & en estant condamné, il perdit tout son bien, lequel fut appliqué par confiscation au fisque de l'Empereur. Athenodorus pour lors estoit encore ieune adolescent sans aucun poil de barbe, & comme sa part des biens paternels luy eust esté rendue par la iustice, il n'abandonna point son frere, ains mettant tout en commun, en fait partage avec luy: & encore combien qu'en ce partage il cogneust que son frere le defraudoit malicieusement de beaucoup, iamaïs il ne s'en courroucea à luy, ny ne s'en repentir, ains supporta gayement & doucement l'ingrate meschanceté de son frere, laquelle fut diuulguee par toute la Grèce. Or Solon ayant prononcé ceste G sentence touchant le gouuernement de la chose publique, que l'egalité n'engendre point de sedition, semble auoir trop fascheusement introduit la proportion Arithmetique, qui est populaire, au lieu de la belle Geometrique: mais en vne famille & maison qui conseileroit aux freres, comme Platon admonestoit ses citoiens, sur tout, fil estoit possible, d'oster de la Republique ces mots de, mien & tien, ou à tout le moins se contenter de l'egalité, & tascher à la conseruer, certainement il asseroit vn grand & beau fondement de paix, amitié & concorde entre les freres. Et qu'il se serue à ce propos d'exemples honorables & illustres, comme est la responce de Pittacus au Roy de Lydie, qui luy demandoit s'il auoit des biens: Deux fois, dit-il, plus que „ ie ne voudrois, estant mon frere mort, duquel i'ay herité. Mais pour ce que le plus „ n'est pas ennemy du moins seulement en augmentation & diminution de richesses, ains comme dit Platon, vniuersellement en inegalité y a tousiours mouuement, H & en egalité repos & sejour: aussi toute inegalité est bien dangereuse de mettre dissension & querelle entre les freres, & est toutefois impossible qu'ils soient en toutes choses egaux ny pareils, d'autant que ou la nature dès la naissance, ou depuis la fortune leur departent inegalement leurs graces & faueurs d'où procedent les enuies, & ialousies entre-eux, maladies & pestes mortelles, non seulement aux familles & maisons, mais aussi aux villes & citez: il s'en fault donner de garde, & promptement y remedier, quand elles commencent à sy engendrer. On pourroit conseiller à celuy qui auroit aduantage sur ses freres qu'il leur communiquast tout ce qu'il auroit par dessus eux, en les honorant par son credit & reputation, & les auanceant par le moien de ses amitez: & si d'auenture il est plus eloquent qu'eux, leur offrant sa peine & suffisance, comme estant à eux autant comme à luy mesme, & puis n'en montrant

Au 4. liure
de la Repu-
blique.

A montrant aucune enflure d'arrogance ny de mespris enuers eux, ains plus tost en s'abbaissant & soubmettant, rendre sa preference & son aduantage non subiect à l'enuie, & egaler autant comme il luy est possible l'inegalité de la fortune par moderec opinion de soy-mesme: comme Lucullus ne voulut iamais entreprendre office ny Magistrat deuant son frere, encore qu'il fust plus aagé que luy: ains laissant passer son temps, attendit celuy de son frere. Et Pollux ne voulut pas estre Dieu mesme seul, ains plus tost demy-dieu avec son frere, & participer de la cōdition mortelle pour luy faire part de son immortalité: là où il est en toy, pourra lon dire à celuy que lon prendra à admonester, sans aucunement diminuer rien des biens que tu as presentement, accompagner & egaler à toy ton frere, le faisant, par maniere de dire, iouir de ta grandeur, de ta gloire, de ta vertu, & de ton bon-heur: comme fait iadis Platon, qui meit les noms de ses freres, les introduisant parlans en ses plus nobles traittez, pour les rendre renommez, à sçauoir Glaucon & Adimantus, és liures B qu'il a escrit de la Republique, & Antiphon le plus ieune, en son dialogue de Parmenides. D'auantage, ainsi comme il y a ordinairement de grandes inegalitez entre les natures ou les auantures des freres, aussi est-il presque impossible que l'un soit en tout & par tout superieur à ses freres: Car il est bien vray que les Elemens que lon dit estre creez d'une mesme matiere, ont des qualitez & forces toutes contraires: mais on ne voit iamais que de deux freres nez d'un mesme pere & d'une mesme mere, l'un fust comme le sage que seignent les Stoiques, beau, gracieux, liberal, honorable, riche, eloquent, studieux, sçauant & humain tout ensemble, & l'autre laid, maufade, sale, chiche, necessiteux, mal emparlé, ignorant & inhumain aussi tout ensemble: ains y a bien souuent en ceux qui sont les plus rebutez & moins estimez quelque scintille de grace, de valeur & d'aptitude & inclination à quelque chose de bon: car, comme dit le commun prouerbe,

Parmy chardons & espineux halliers

C Naissent les fleurs des tendres violiers.

Celuy doncques qui sentira auoir l'auantage en autres choses, fil n'amoindrit ny ne cache point les telles-quelles parties de vertu qui seront en son frere, ny ne le deboute point comme en un ieu de pris de tous les premiers honneurs, ains luy cede reciproquement en quelques vns, & le declare plus excellent & plus habile que luy en plusieurs choses, retirant tousiours toute occasion & matiere d'enuie, comme le bois du feu, il l'estendra à la fin, ou plus tost il empeschera du tout qu'elle ne s'engendre & conree. Mais encore celuy qui s'aydera tousiours de son frere, és choses mesmement esquelles il sçaura estre plus excellent que luy, & vsera de son conseil, comme fil est rhetoricien, à plaider des causes: fil est entendu en matiere d'estat, à sçauoir comment il se doit porter en son Magistrat: fil est homme qui ait beaucoup d'amis, en affaires: brief qu'en nulle chose de consequence, & qui peut apporter reputation, ne laisse son frere derriere, ains le fait son parsonnier & cōpagnon en toutes choses grandes & honorables, qui se sert de luy quand il est present, l'attendant quand il est absent, & generalement qui luy donne à entendre qu'il ne seroit pas homme de moindre execution que luy, mais qu'il fait moins de compte d'acquérir reputation, & de s'auancer en credit, que luy, en ne foyant rien à soy-mesme, il adioust beaucoup à son frere. Ce sont les preceptes & aduertissemens que lon pourroit donner à celuy qui seroit plus excellent que son frere: & quant à celuy qui seroit inferieur, il fault qu'il pense en luy-mesme, que son frere n'est pas vn, ny seul, ou plus riche, ou plus sçauant, ou plus renommé que luy, ains qu'il est luy-mesme vaincu d'un nombre infiny d'autres,

Tant qu'il y a d'hommes mangeans le fruit
Que la grandeur de la terre produit.

De l'amitié fraternelle.

Mais fil est tel qu'il aille par tout portant enuie à tout le monde, ou bien fil est si mal né, qu'entre tant d'hommes qui sont heureux, il n'y en ait pas vn qui le fasche, que celuy qu'il deust le plus aimer, & qui luy tient de plus pres d'obligation du sang, il peut bien dire qu'il est malheureux en toute extremité, & qu'il ne laisse moien à homme qui viue de le passer en malheurté. Si comme donc Metellus disoit que les Romains deuoient bien rendre graces aux Dieux de ce que Scipion estant si grand personnage estoit né dedans Rome, & non pas en vne autre cité, aussi que chascun souhaitte & face priere aux Dieux, que luy principalement surmonte tous autres en prosperité, ou si non, au moins que ce soit vn sien frere qui ait ceste tant desirée puissance & autorité: mais il y en a qui sont si mal nez à toute honnesteté, qu'ils s'esioiissent & se glorifient bien d'auoir des amis colloquez en grands honneurs, & d'auoir des princes ou des grands seigneurs & riches pour hostes, mais ils estiment que la splendeur de leurs freres soit leur obscurité: & se plaisent bien d'ouir racôter les prosperitez de leurs peres, les victoires & conduittes d'armees de leurs ayeux, ausquelles ils n'eurent oncques part, ny n'en receurent oncques honneur ny profit: mais de grandes successions qui seront escheutes à leurs freres, ou d'estats magnifiques, ou de mariages honorables, ils en sont marris, & leur semble que cela les raualle. Et toutefois il falloit en premier lieu ne porter enuie à personne, ou si non, à tout le moins tourner son enuie au dehors, & deriuer ceste malignité, d'estre marry du bien d'autrui, à l'encontre des estrangers: comme ceux qui embrouillent leurs ennemis en seditions intestines, & les chassent hors de chez eux.

Iliad. l. 6.

D'autres Troyens & de leurs alliez
Grand nombre y a parmy vostre bataille,
Pour esprouuer de mon glaiue la taille:
Des Grecs aussi en nostre ost Argien,
Sur qui pourras faire espreuue du tien.

comme dit Diomedes à Glaucus. c'est là où tu peux exercer ton enuie & ta ialousie. Mais il faut que vn frere ne soit pas comme le bassin d'une balance qui fait le contraire de son compagnon, quand l'un se hausse, l'autre se baisse: ains fault qu'il face comme les petits nombres, qui par multiplication d'eux mesmes produisent les grands, & en se multipliant ainsi l'augmenter, & faugmenter aussi des biens: car entre les doigts de la main, celuy qui ne tient pas la plume en escriuant, & qui ne touche pas les chordes de l'instrument en iouant, pource qu'il n'est pas propre ne dispos à ce faire, n'en vaut pas pire pour cela, ains se meuuent tous ensemble, & s'entre-aident les vns les autres en quelque sorte, comme aians expressément pour ceste cause esté faits incgaux à l'entour du plus grand & du plus fort, pour estre plus aptes à prendre, & à retenir. Ainsi Craterus estant frere propre d'Antigonus roy regnant, & Perilaus de Cassander, se meirent à conduire des armees sous leurs freres, ou bien se reindrent en leurs maisons: mais ie ne sçay quels Antiochus Seleucus, & ailleurs Grypus & Cyzicenus, n'aians pas appris à se contenter du second lieu, ains appetans les marques de dignité royale, la pourpre, & le diadème, se remplirent eux-mesmes, & les vns les autres de maux infinis, & en comblèrent quant & quant toute l'Asie. Mais pour autant que les enuies & ialousies s'impriment le plus souuent és natures & mœurs de personnes ambitieuses, le plus expedient seroit aux freres, pour obuier à tel inconuenient, de n'aspirer pas à acquerir honneur, ny autorité & credit par mesmes moiens, ains l'un par vn moien & l'autre par vn autre: car les combats des bestes sauuages s'emeuent ordinairement entre celles qui se nourrissent de mesme pasture, & entre les combattans des ieux de pris ceux là seuls se nomment aduersaires les vns des autres qui trauaillent à mesme sorte de ieu: là où les escrimeurs des poings aux escrimeurs à outrance sont amis, & les lucteurs aux coureurs de carriere, & s'entre

A & s'entre-aident & s'entre-favorisent les vns aux autres. Et pourtant des deux fils de Tyndarus, l'un Polynices gaignoit tousiours le pris à l'escrime des poings, & Castor l'emportoit à la course. Voyla pourquoy Homere a bien fait, que Teucer estoit excellent à tirer de l'arc, là où son frere estoit des meilleurs combattans à coups de main, Iliad. liu. 8.

Et le couuroit de son luyfant escu.

Comme entre ceux qui se meslent des affaires publiques, ceux qui manient les armes, ne portent pas communément enuie à ceux qui harenguent deuant le peuple, ny entre ceux qui parlent en public, les Aduocats aux lecteurs de philosophie, ny entre ceux qui pensent les malades, les medecins aux chirurgiens, ains s'entredonnent la main, & s'entreportent resmoignage les vns aux autres: mais vouloir & chercher d'acquérir honneur & reputation d'un mesme art, & par vne mesme valeur & suffisance, c'est autant entre ceux qui ne sont pas parfaicts, comme estans amoureux d'une mesme maistresse, vouloir estre mieux venu, & auoir plus d'auantage l'un que l'autre. Ceux doncques qui cheminent par diuerses voyes eurent les occasions d'enuie, & s'entre-aident les vns les autres, comme Demosthenes & Chares, & semblablement Æschines & Eubulus, Hyperides & Leosthenes, dont les vns proposoient les decrets, & harenguoient deuant le peuple, les autres conduisoient les armées, & faisoient les affaires. Et pourtant fault-il que les freres qui ne seront pas pour s'entrecommuniquer sans enuie, leur gloire & leur credit, ayent leurs cupiditez & leurs ambitions bien tourneés à contrepoil, & bien esloignées les vnes des autres, s'ils veulent receuoir plaisir, & non pas desplaisir de la prosperité & de l'heureux succez les vns des autres: mais par dessus tout cela il se faut bien donner garde des parents & alliez, & quelquefois des femmes mesmes, qui à la conuoitise d'honneur adioustent de mauuais & malicieux propos: Vostre frere fait merueille, il emporte tout, on ne parle que de luy, tout le monde luy fait la court, là où personne ne vient vers vous, & n'avez honneur ne demy. Le frere qui sera sage, respondra à ces mauuais langages là, l'ay vn frere qui a la vogue de credit, & du credit & autorité qu'il a, la plus grande part en est mienne, & à mon commandement. Car Socrates disoit, qu'il aimoit mieux auoir Darius pour amy que ses Dariques: mais vn frere qui a bon iugement, ne se pensera pas auoir moins de bien, d'auoir son frere constitué en grand estat, ou riche, ou auancé en credit & reputation, par le merite de son eloquence, que si luy-mesme auoit l'estat, la richesse, le sçauoir & l'eloquence. Voyla comment il fault essayer à radoubler le mieux qu'il est possible telles inegalitez: mais il y a d'autres differences qui naissent incontinent avec eux, au moins ceux qui ne sont pas bien appris quant aux aages: car à bon droit les plus vieux voulans tousiours commander aux plus ieunes, leur presider, & auoir plus & d'honneur & d'autorité, & de puissance en tout & par tout, sont fascheux & ennuyeux: & de l'autre costé aussi les plus ieunes secouans la bride, & s'enorgueillissans accoustument à ne faire compte, & à mespriser leurs freres plus aagez: de là aduient que les ieunes, comme enuiez & rabbaïssez tousiours par leurs aisnez, fuyent & haïssent leurs corrections & admonitions, & les aisnez desirans garder & retenir tousiours leur precedence par dessus eux, redoubtent l'accroissement de leurs puisnez, comme estant la ruine d'eux-mesmes. Tout ainsi doncques comme lon dit, qu'en vn bien-faict il fault que celuy qui le reçoit l'estime plus grand qu'il n'est, & celuy qui le donne plus petit: aussi qui pourroit persuader à l'aisné de ne reputer pas que le temps dont il precede son frere soit beaucoup, & au puisné que ce soit peu de chose, il les deliureroit tous deux, l'un de desdaing & de mespris, & l'autre d'irreuerence & de negligence. Et pource qu'il est conuenable à l'aisné d'auoir soing, enseigner, reprendre & admonester, & au puisné honorer, suiure & imiter, ie voudrois que la sollicitude de l'aisné teint plus tost du compagnon que du pere, & de la sua-

De l'amitié fraternelle.

sion plus tost que du commandement, & qu'il fust plus prompt à s'esjouir pour le E
devoir fait, & à le louer, que non pas à le reprendre & blasmer, pour l'auoir oublié,
& face l'un, non seulement plus volontairement, mais aussi plus humainement que
l'autre : & aussi qu'au zele du puîné il y eust plus de l'imitation, que de la jalousie
& contention, pource que l'imitation presuppose la bonne estime & admiration,
& la jalousie & contention n'est iamais sans enuie, qui fait que les hommes aiment
ceux qui taschent à les ressembler, & au contraire ils rebutent & deprimant ceux qui
estriuent & s'efforcent de s'esgaler à eux. Et parmy l'honneur qu'il est bien seant que
le puîné rende à son aîné, l'obeïssance est celle qui merite plus de louange, & qui
engendre vne plus forte & plus cordiale bien-veillance, accompagnée d'une reue-
rence & d'un contentement, qui est cause que l'aîné reciproquement luy cede &
luy defere. Dont il aduint que Caton ayant dès son enfance honoré & reueré
son frere Cépion par obeïssance, obseruance & silence deuant luy, à la fin le gaigna F
tant, quand ils furent hommes faits, & le remplit de si grand respect & reuerence en-
uers luy, qu'il ne faisoit ny ne disoit rien qu'il ne luy dist. Auquel propos on racon-
te que Cépion vn iour ayant signé & scellé de son cachet quelques tablettes de tesmoi-
gnage, Caton son frere suruenant apres, ne les voulut point signer ny sceller : quoy
entendant Cépion, redemanda incontinent les tablettes, & arracha son cachet auant
que demander pour quelle occasion son frere ne luy auoit pas creu, ains auoit eu le
tesmoignage pour suspect. Aussi semble-il que les freres d'Epicurus luy porterent
grand respect & reuerence, pour l'amour & bien-veillance qu'il auoit monstre en-
uers eux : ce qui apparut tant en toutes autres choses, qu'en ce qu'ils espouserent fort
chaudement toutes ses inuentions & opinions en la philosophie : car encore qu'ils se
soient trompez d'opinion, d'auoir tousiours dit & tenu dès leur enfance, que ia-
mais homme n'auoit esté si sçauant en philosophie que leur frere Epicurus : si est-ce
chose merueilleuse comment ou luy les ait peu ainsi affectionner, ou eux se soient ain-
si disposez & affectionnez enuers luy. Entre les plus modernes philosophes mesmes, G
Apollonius le Peripatetique a conuaincu de mençerie celuy qui a dit le premier, que
l'honneur & la gloire ne receuoient point de compagnon, ayant rendu son frere puî-
né Sotion plus honoré & plus renommé que luy-mesme. Et quant à moy, com-
bien que la fortune m'ait fait beaucoup de faueurs, qui meritent bien que ie luy en
rende grandes graces, il n'y en a pas vne dont ie me sente tant obligé à elle, com-
me l'amour & la bien-veillance que m'a porté & me porte en toutes choses mon fre-
re Timon, ce que nul ne peult nier, qui ait tant soit peu hanté ou fréquenté avec
nous, & moins que tous autres, vous qui nous avez esté familiers. Il y a d'autres har-
gnes, dont il se fault donner garde, entre les freres qui sont de pareil aage, ou bien
peu esloignez l'un de l'autre, lesquelles passions sont petites, mais continuelles &
en grand nombre, au moyen dequoy elles apportent vne mauuaise accoustumance
de se fascher, aigrir & courroucer de toutes choses, laquelle en fin se termine en hai- H
nes & inimitiez irreconciliables : car ayans commencé à quereller les vns contre
les autres dès les ieux d'enfance pour la nourriture, ou pour les combats de quel-
ques petites bestes, comme de cailles ou de cocqs, & puis pour la luitte des petits
garçons, ou pour la chasse de leurs chiens, ou la comparaisson de leurs cheuaux, ils
ne peuuent plus retenir ny refrener, quand ils sont deuenus grands, leur opinia-
streté & leur ambition en choses de grande consequence. Comme les plus grands
& plus puissans hommes d'entre les Grecs de nostre temps, festans premierement
bandez les vns contre les autres pour les faueurs qu'ils portoient à des baladins
& ioueurs de cithres, & puis faisans à l'enuy à qui auroit de plus beaux viuiers, de
plus belles baignouères, & de plus belles allées & galeries, de plus belles salles, &
lieux de plaïssance au territoire de Edepsus, en les comparant les vnes aux autres
opiniastre-

- A opiniaftrement, en couppant les canaulx, & diuertiffant les conduicts des fontaines, ils fe font tellement aigris les vns contre les autres, qu'ils s'en font perdus: car le tyran les leur a tous oftez, & ont esté bannis de leurs païs, pauvres, vagabonds par le monde, & à peine que ie ne dis, tous autres qu'ils n'estoient au parauant, excepté qu'ils font demourez les mefmes qu'ils estoient à s'entrehaïr. Voila pourquoy il fault bien dès le commencement refifter à la ialoufie & opiniaftreté qui se gliffe entre les freres és premieres & petites chofes, en s'accouftumant à ceder l'un à l'autre reciproquement, & à se laiffer vaincre, & à s'esjouir plus toft de leur complaire, que non pas de les vaincre: car ce n'a point esté d'autres victoires que les anciens ont entendu, quand ils ont appellé la victoire Cadmiene, que celle d'entre les freres au deuant de Thebes, qui fut vne tres-villaine & tres-mefchante victoire. Mais quoy, les affaires mefmes n'apportent-ils pas plusieurs occasions de diffenfions & de debats entre les freres, à ceux encore qui font les plus doux & les plus gracieux? ouy certes, mais c'est auffi là
- B où il fault laiffer les affaires se combattre tous feuls, fans y adioufter aucune paffion d'opiniaftreté, ny de cholere, comme vn hameçon qui les accroche & attache à debatre, ains fault que comme en vne ballance ils regardent par enemble de quel costé panchera le droict & l'equité, & que le plus toft qu'il leur fera possible, ils remettent le iugement & l'arbitrage de leur different à quelques bons personnages, pour les vuider & purger tout au net deuant qu'ils percent fi auant, comme vne tache ou vne taincture, que lon ne la puiſſe plus effacer ny lauer: & puis imiter les philosophes Pythagoriciens, lesquels n'estans alliez ny parents, ains ſeulement participans de meſme eſchole & meſme diſcipline, ſi d'aduenture ils ſeſtoient quelques fois transportez de cholere, iuſques à dire iniure l'un à l'autre, deuant que le ſoleil fuſt couché touchās en la main l'un de l'autre & ſ'entr'ambraffans, faiſoient l'appoinctement: car comme quand il aduient vne fieure ſur vne boſſe en l'aine, il n'y a pour cela danger quelconque, mais ſi la boſſe nettoyée & paſſée, la fieure perſeuerere, c'eſt vne maladie qui a ſon
- C principe & ſa cauſe d'ailleurs plus profonde: auffi le different qui eſt entre deux freres, quand il ceſſe avec l'affaire, procedoit de l'affaire: mais ſi le different demeure apres l'affaire vuide, l'affaire n'eſtoit que pretexte, & y auoit au dedans vne ſuſpecte & mauuaife racine cachee. Auquel propos il fait bon entendre la façon de proceder à la deciſion du different de deux freres de nation barbare, non pour vne part ou portion de quelque petite terre, ou pour vn nombre d'eſclaves, ou de moutons: mais pour l'Empire des Perſes: car apres la mort de Darius aucuns des Perſes vouloient que Ariamenes ſuccedaſt à la couronne, comme eſtant le fils ainſné du feu Roy: les autres vouloient que ce fuſt Xerxes, tant pource qu'il eſtoit fils de Atossa fille du grand Cyrus, que pour ce qu'il eſtoit né de Darius, eſtant ja Roy couronné. Ariamenes doncques deſcendit du païs de la Medie, non point en armes, comme pour faire la guerre, ains tout ſimplement avec ſon train, comme pour pourſuyure ſon droict en iuſtice. Xerxes parauant ſa venue faiſoit toutes chofes qui appartenoient à vn Roy, mais quand ſon frere fut arriué, volontairement il ſoſta le diademe ou frontal, & poſa le chapeau royal, que les Roys ont accouſtumé de porter à la pointe droicte, & luy alla au deuant, l'ambrassa, & luy enuoya des preſens, avec commandement à ceux qui
- „ les luy portoient de luy dire, Xerxes ton frere t'honore maintenant de ces preſens icy:
 „ mais ſi par la ſentence & le iugement des Princes & Seigneurs de Perſe il eſt déclaré
 „ Roy, il veult que tu ſois la ſeconde perſonne de Perſe apres luy. Ariamenes fait reſ-
 „ ponſe: Je reçoÿ de bon cœur les preſens de mon frere, & penſe que le royaume des
 „ Perſes m'appartienne, mais quant à mes freres, ie leur garderay l'honneur qui leur eſt
 „ deu apres moy, & à Xerxes le premier de tous. Quand fut eſcheu le iour du iugement,
 les Perſes de commun conſentement déclarerēt iuge de ceſte grande cauſe Artabanus, qui eſtoit frere du defunct Darius. Xerxes ne vouloit point eſtre iugé par luy ſeul,

De l'amitié fraternelle.

par ce qu'il se fioit plus à la multitude des Seigneurs, mais sa mere Atossa l'en reprit: E
" Pourquoy, dit-elle, mon fils, refuses-tu Artabanus ton oncle, le plus homme de bien
" qui soit en Perse, pour ton iuge? & pourquoy as-tu tant de crainte de l'issue de ce
" iugement-là, où le second lieu mesme est encore honorable, d'estre appelé & iugé
" le frere du Roy de Perse? Xerxes doncques se laissa persuader à sa mere: & le proces
estant iugé, Artabanus prononça que le royaume appartenoit à Xerxes: parquoy
Ariamenes incontinent se levant de son siege alla faire hommage à son frere, & le
prenant par la main droite le mena seoir dedans le siege Royal, & de là en avant fut
toujours le plus grand auprès de luy, & se monstra si bien affectionné en son en-
droit, que en la bataille navale de Salamine il mourut en combattant vaillamment
pour son service. Cest exemple donc soit comme vn patron original de vraye be-
nignité & magnanimité, où il n'y a rien à reprendre. Et quant à Antiochus on pour-
roit bien iustement reprendre en luy vne trop grande conuoitise de regner, mais
aussi fait-il bien à esmerveiller, que l'amitié fraternelle ne fut pas du tout esteinte F
en son ambition. Il faisoit la guerre pour le royaume à son frere Seleucus qui estoit
son aîné, & auoit sa mere qui luy fauorisoit: mais au plus fort de leur guerre Seleucus
ayant donné vne bataille aux Galates, la perdit, & ne se trouuant nulle part, on fut
long temps que l'on le teint pour mort: & son armee toute taillee en pieces par les
Barbares: ce que ayant entendu Antiochus posa la robe de pourpre, & se vestit de
noir, & fermant son palais royal, mena deuil de son frere, comme s'il eust esté perdu:
mais apres étant aduerty comme il estoit sain & sauf, & qu'il remettoit sus vne autre
armee, sortant de son logis en public, il alla sacrifier aux Dieux en action de graces, &
commanda aux villes qui estoient sous luy de faire semblablement sacrifices, & por-
ter chapeaux de fleurs en signe de resiouissance publique. Et les Atheniens ayans
sans propos inuenté & controuué la fable, touchant la querelle d'entre Neptune &
Minerue, y ont entremeslé vne correction qui n'est pas trop hors de propos: car ils
suppriment toujours le deuxiesme iour du mois de Iuin, auquel ils disent qu'aduint G
ce debat & ceste noise entre Neptune & Minerue. Qui nous empeschera doncques
aussi, s'il aduient que nous aions eu debat ou different à l'encontre de noz alliez &
parents, que nous ne condamnions ce iour-là de perpetuelle oubliance, & ne le re-
putions entre les iournees maudittes & malencontreuses, non pas oublier tant d'au-
tres bonnes & ioyeuses, esquelles nous auons vescu, & auons esté nourris ensen-
ble, à l'occasion d'une seule? car ce n'est point en vain, ne pour neant, que nature
nous a donné la mansuetude, & la modestie, fille de patience, où il faut que nous
en vsions, principalement enuers noz alliez & noz parents. Si ne se montre pas
l'amour & affection cordiale enuers eux seulement, en leur pardonnant quand ils ont
failly, mais aussi en leur demandant pardon quand on les a offensez: pourtant ne les
fault-il pas negliger quand ils sont courroucez, ny se roidir alencontre d'eux quand
ils se viennent iustifier ou excuser, ains plus tost les preuenir & aller au deuant H
de leurs courroux, en s'excusant si on les a offensez, & leur pardonnant deuant
qu'ils s'excusent: pourtant est Euclides le disciple de Socrates fort renommé es
escholes des Philosophes, pource que ayant ouy vne parole indigne & bestiale de son
frere, qui luy auoit dit, Je mourrois de male mort si ie ne me vengeois de toy: mais
" moy, dit-il, si ie n'appaisois ta cholere, & ne te persuadois que tu m'aimasses com-
" me tu faisois au parauant. Mais l'effect & non pas la parole du Roy Eumenes ne
se peult aucunement surpasser ny en patience, ny en douceur & bonté: car Perseus
le Roy de Macedoine, étant son ennemy, auoir attiré des meurtriers pour le tuer,
lesquels estoient en embusche à l'espier auprès de la ville de Delphes, ayans enten-
du qu'il venoit de la marine vers la ville, pour se conseiller à l'oracle d'Apollo: & l'as-
saillans par derriere, luy ietterent de grosses pierres, qui l'assenerent sur la teste & sur
le col:

- A le col: dont il fut tellement estourdy, qu'il en tomba par terre tout palmé, de maniere que lon pensa qu'il fust mort, & en courut le bruit par tout, tant que quelques vns de ses seruiteurs & amis mesmes coururent iusques en la ville de Pergame en porter la nouvelle, comme de chose à laquelle ils auoient esté presens: parquoy Attalus le plus aagé de ses freres homme de bien, & qui festoit tousiours plus fidelement & plus loyaument que nul autre porté enuers son frere, fut non seulement déclaré Roy, & couronné du diadème royal, mais qui plus est, il espousa la Royne Stratonice femme de son frere, & coucha avec elle: mais depuis quand les nouvelles arriuerent qu'Eumenes estoit viuant, & qu'il sen venoit, posant le diadème, & reprenant la iaueline, comme il auoit accoustumé de porter à la garde de son frere, il luy alla au deuant avec les autres gardes, & le Roy le reçeut humainement, salua & ambrassa la Royne avec grand honneur & grandes caresses: & aiant vescu longuement depuis sans plainte ny suspicion quelconque, finablement venant à mourir il consigna & B laissa son royaume & sa femme à son frere Attalus. Mais que feit Attalus apres sa mort! il ne voulut iamais faire nourrir aucun de ses enfans que Stratonice sa femme luy porta, & si en eut plusieurs, ains nourrit & esleua le fils de son frere defunct, iusques à ce qu'il fust en aage d'homme, & lors luy-mesme luy mit sur la teste le diadème royal, & l'appella Roy. Mais Cambyfes au contraire, pour vn songe qu'il auoit songé, craignant que son frere ne vint à estre roy de l'Asie, sans autre raison ne preuue aucune le feit mourir: à l'occasion dequoy la succession de l'empire sortit de la race de Cyrus apres sa mort, & vint à regner celle de Darius, prince qui sceut communiquer le gouuernement de ses affaires & son autorité, non seulement à ses freres, mais aussi à ses amis. Il faut bien aussi se souuenir d'un autre poinct, & l'observer soigneusement quand on est tombé en quelque different avec les freres, c'est de hanter lors, & parler, & frequenter plus souuent que iamais avec leurs amis, & à l'opposite fuir leurs malveillans & ennemis, sans les vouloir ouir ny recevoir: suyuant en C cela pour le moins la façon de faire des Candiots, lesquels entrans souuent en combustion les vns contre les autres, & se faisans la guerre, quand il leur suruenoit des ennemis de dehors ils se r'allioient incontinent ensemble, & se bandoient tous contre eux: & cela s'appelloit Syncrétisme. Mais il y en a qui, comme l'eau coule tousiours contrebas, aussi s'abbaisent à ceux qui se baissent & qui se diuisent, ruinans par leurs soufflemens toute parenté & toute amitié, haïssans l'un & l'autre, & s'attachans plus à celuy qui se lasche par imbecillité. Car les amis simples, & ne pensans point en mal, comme sont les ieunes, aiment ce que leurs amis aiment, mais les plus peruers & plus malins ennemis font semblant d'estre marris & courroucez aussi contre le frere qui a courroux & debat à l'encontre de son frere. Comme donc la poule en Æsope respond au regnard, qui faisoit semblant d'auoir ouy dire qu'elle estoit malade, & luy demandoit par amitié, comment elle se portoit: Je me porteray bien, dit elle, mais que D tu sois arriere d'icy: aussi fault il respondre à vn tel homme maling, qui viendra mettre en auant & ouurir le propos du debat avec le frere, pour sonder & sapper par dessous, à fin d'entendre quelque secret: Je n'ay rien à demesler avec mon frere, ny luy avec moy, pourueu que ie ne preste point l'aureille aux rapporteurs, ny luy aussi. Mais maintenant ie ne sçay comment quand nous sommes chassieux, ou que nous auons mal aux yeux, nous diuertissons nostre veuë des corps qui font reuerberation, & des couleurs trop viues, & quand nous auons quelque cholere, ou plainte ou suspicion contre nos freres, nous prenons plaisir à ouir ceux qui nous y embrouillent encore d'auantage, & leur adherons lors qu'il estoit plus besoing de fuir leurs ennemis & malveillans, & se cacher d'eux: & au contraire s'approcher, hanter & conuerfer avec leurs alliez, leurs domestiques & amis, & mesmes entrer dedans leurs maisons, pour s'aller librement plaindre iusques à leurs femmes: & neantmoins on

De l'amitié fraternelle.

dit communément, que les freres cheminans ensemble ne doiuent pas seulement mettre vne pierre entre eux, & est on marry quand vn chien vient courir à trauers d'eulx, & craint on beaucoup d'autres choses semblables, desquelles nulle ne sçauroit separer ne diuiser la concorde des freres : & ce pendant ils ne voyent pas, qu'ils admettent au milieu d'eux, & reçoient à trauers, des hommes de nature canine, qui ne font qu'abboyer, pour irriter les vns contre les autres. A ceste cause venant à propos pour la suite du discours, Theophrastus disoit fort bien, que si toutes choses doiuent estre communes entre amis, suyuant l'ancien prouerbe, encore plus le doiuent estre les amis: car les familiaritez, conuersations & frequentations separees à part, destournent & diuertissent les vns d'auec les autres : car à choisir d'autres familiers & amis suit incontinent par consequence, prendre plaisir à d'autres compagnies, en estimer d'autres, & se laisser mener & gouverner à d'autres, par ce que les amitez forment les naturels des personnes, & n'y a point de plus certain signe de differentes humeurs & naturels des personnes, que le chois & election de differents amis: tellement que ny le boire & manger, ny le iouer, ny passer les iours tous entiers ensemble, n'ont pas tant d'efficace à contenir la concorde & bienveillance des freres, comme le haïr & l'aimer de mesmes personnes, & prendre plaisir à mesmes compagnies, & au contraire aussi, d'en abhorrir & fuir de mesmes : car quand les freres ont des amis communs, ils n'endurent iamais qu'il naisse entre-eux des picques ny des querelles, ains si d'adventure il suruient ou quelque soudaine cholere, ou quelque plainte, elle est incontinent appaisée par le moien des amis communs, qui les prennent sur eux, & les font esuanouir en neant, s'ils sont bien affectionnez enuers l'un & l'autre des freres, & que leur bienveillance panche autant d'un costé comme d'autre. Car ainsi comme l'estain soude & reioinct le cuiure qui est cassé, en touchant aux deux extremittez des pieces rompues, pour ce qu'il s'accorde autant auec l'une comme auec l'autre: aussi faut il que l'amy soit commun, & s'accorde aussi bien auec l'un des freres comme auec l'autre, pour bien resoudre & confirmer la mutuelle bienveillance: mais ceux qui sont inegaux & ne se peuuent mesler autant auec l'un comme auec l'autre bout, font vne separation & disionction, & non pas vne conionction, comme certains tons en la musique. Et pourtant pourroit on à bon droit douter, & demander si Hesiodé a bien ou mal dit,

Au poëme
intitulé Les
œuvres.

Ne fais egal le compagnon au frere.

car le compagnon qui sera sage & commun amy, plus il sera incorporé auec tous les deux, plus ferme neud & lien sera il de l'amitié fraternelle: mais Hesiodé a entendu & craint cela des ordinaires & vulgaires hommes, qui sont coustumierement subiects à estre ialoux, & à s'aimer soy-mesme, ce qui est bien raisonnable d'euitter, encore que lon porte egale bienveillance à l'amy qu'àu frere: ce neantmoins en cas de concurrence, de reseruer tousiours le premier lieu au frere, soit à le preferer en election de magistrat ou maniement d'affaires d'estat, soit à le conuier à quelque festin ou assemblée solennelle, ou à le recommander aux princes & seigneurs, & autres telles choses semblables, que le commun des hommes reputé grandes & honorables, il faut en tout cela rendre la dignité & l'honneur à l'obligation du sang & à la nature: car l'auantage en telles choses n'apporterait pas tant de reputation & de gloire à l'amy, que le rebut apporterait de dereputation & de deshonneur au frere. Et quant à ceste sentence là nous en auons ailleurs traité plus amplement: mais vn autre mot sententieux de Menander, qui est tres-sagement dit,

Qui aime bien, ne veut qu'on le mesprise,

nous remet en memoire & nous enseigne d'auoir soing de noz freres, & ne nous fier pas tant à l'obligation de la nature, que nous les mesprisons: car le cheual est vne beste de nature aimant l'homme, & le chien son maistre, mais toutefois si vous faillez à les

- A à les penser, & en auoir le soing tel que vous deuez, ils perdent celle cordiale affection, & s'estrangent de vous : & le corps est de naissance tresconioint à l'ame, mais si elle le neglige & le mesprise, il ne veut plus luy aider, & gaste ou empesche ses actions. Or le soing & la sollicitude honnestes que lon doit auoir des freres, & encore plus des beaux peres & des gendres d'iceux, est de se monstrier tousiours bien veuillans, & bien affectionnez en leur endroit, prompts à faire pour eux en toutes occasions, saluër & caresser leurs seruiteurs fauorits, remercier les medecins qui les auront pensez en leurs maladies, leurs amis fideles qui les auront volontairement & vtilement accompagnés en quelque voyage, & en quelque expedition de guerre : & quand à la femme espousee du frere, la tenir & reuerer comme vne relique tressaincte, pour l'amour de son mary, la louer, se plaindre avec elle de son mary, fil n'en fait compte tel qu'il doit, l'appaiser quand elle est courroucée, & si d'adventure elle commet quelque legere faute, la reconcilier avec son mary, & le prier de luy pardonner, & aussi fil y
- B a quelque chose particuliere en quoy il soit en different avec son frere, s'en plaindre à elle, & tascher de l'appointer avec luy. Estre à bon esciant marry de ce que son frere ne se marie point, ou fil est marié, de ce qu'il n'a point d'enfans, en l'en sollicitant, & le tantant, tant que lon le conduise par toutes voyes à se marier, & se lier par legitimes alliances : & quand il a eu des enfans, monstrier encore plus manifestement sa bienveillance, tant enuers luy qu'enuers sa femme, en l'honorant plus que iamais, & aimant ses enfans comme les siens propres, mais se monstrier encore plus indulgent & plus doux enuers ceux de son frere, à fin que fil aduient qu'ils facent quelque faute, cōme font les ieunes gés, qu'ils ne s'en fuyent point, & ne se retirent point, pour crainte du pere ou de la mere, en quelque mauuaise & desbauchee compagnie, ains qu'ils ayent vn recours & vne retraite, où ils soyent admonestez amiablement, & où ils treuuent intercesseur pour faire leur appointement. Voyla comment Platon ramena son nepueu Speusippus, qui estoit fort desbauché, & fort dissolu, sans luy
- C dire ne faire mal quelconque, ains se monstrier doux & gracieux à le recueillir, là où il fuyoit ses pere & mere qui crioient tousiours apres luy, & le tansoient incessamment : quoy faisant il engendra en son cœur vne grande reuerence enuers luy, & grand zele de l'imiter, & de s'employer à l'estude de la philosophie : combien que plusieurs de ses amis le blasmassent de ce qu'il ne reprenoit & ne corrigeoit autrement ce ieune homme : mais luy leur respondit, qu'il le reprenoit assez, en luy donnant à cognoistre par sa vie & par ses deportements la difference qu'il y a entre le vice & la vertu, & entre les choses honnestes & deshonestes. Le pere d'Aleuas Roy de Thessalie le rebutoit & le rudoyoit, pource qu'il estoit hault à la main & superbe, & au contraire son oncle frere de son pere le soustenoit & l'auançoit : & comme vn iour les Thessaliens enuoyassent les buletins à l'oracle d'Apollo en Delphes, pour sçauoir qui seroit Roy, l'oncle au desceu du pere meit vn buletin pour Aleuas : la prophetisse Pythie
- D prononça, que c'estoit Aleuas qui deuoit estre Roy : au contraire le pere insistoit, qu'il n'auoit point mis de buletin pour luy : & sembloit à tout le monde qu'il y deuoit donc auoir eu erreur à escrire ces buletins & ces noms : & pourtant renuoya lon de rechef à l'oracle, là où la Pythie respondit,

J'entends & dis le roux fils d'Archedice.

& en ceste maniere Aleuas estant déclaré Roy de Thessalie par l'oracle d'Apollo, moyennant ceste faueur que luy feit le frere de son pere, fut quant à luy beaucoup plus excellent prince que tous les autres qui auoient esté en la maison deuant luy, & si eleua son pays & sa nation en grande gloire & grande reputation. Ainsi faut-il en s'esrouissant & se glorifiant de l'auancement, des honneurs, charges & offices honorables des enfans de son frere, les pousser & encourager à la vertu, & quand ils font bien, les louer bien hautement : car à l'adventure seroit il odieux de grandement

De l'amitié fraternelle.

ſeignifie divin Oncle. louer le ſien propre, mais celui de ſon frere, il eſt digne & honorable, non point pro- cedant de l'amour de ſoy-meſme, ains de l'honneſteté, & tenant à vray dire de la diu- nité. Si me ſemble que le nom meſme nous conuie à aimer cherement noz nepueux: & ſi fault que nous nous propoſions à imiter les grands perſonnages qui ont eſté ſan- ctifiez & deifiez par le paſſé, car Hercules ayant engendré ſoixante & huit enfans, ay- ma auſſi cherement Iolaus celui de ſon frere, que pas vn des ſiens propres: c'eſt pour- quoy encore maintenant on le met deſſus vn meſme autel que ſon oncle Hercules, & le prie lon quand & luy, l'appellant le coſteillier d'Hercules: & ſon frere Iphicles ayant eſté tué en vne bataille, qui fut donnée pres de Lacedemone, il en fut ſi deſplaiſant, qu'il ſe partit de tout le Peloponeſe. Et Leucothea, ſa ſœur eſtant treſpaſſée, nourrit & eleua ſon enfant, & le deſia quand & elle: d'où vient que les Dames Romaines encores aujourdhuy en la feſte de Leucothea, qu'ils appellent Matuta, portent entre leurs bras & cheriſſent, non leurs propres enfans, ains ceux de leurs ſœurs.

F

Du trop parler.



C'EST vne cure bien faſcheuſe & bien mal-aiſée à la philoſo- phie, qu'entreprendre de guarir le vice de ceux qui parlent trop, pour ce que la medecine dont elle vſe eſt la parole re- ceuë des eſcoutans, & ces grans parleurs n'eſcoutent iamais perſonne, car ils parlent touſiours: & eſt le premier vice de ceux qui ne ſe peuuent taire, qu'ils ne veulent eſcouter per- ſonne, tellement que c'eſt vne ſurdité volontaire de gens qui ſemblent ſe plaindre de la nature, de ce qu'elle ne leur a don- né qu'une langue, veu qu'elle leur a donné deux oreilles. Si donc Euripides eſt loué d'auoir bien dit à vn maladiſé auditeur auquel il parloit,

On ne ſçauroit ſage conſeil donner
A homme fol, ne bien l'arraifonner,
Non plus qu'emplir ſe pourroit vn vaiſſeau
Qui par tout coule, & ne retient point eau.

plus iuſtement pourroit-on dire à vn babillard ou d'un babillard, on ne ſçauroit em- plir celui qui ne reçoit point les ſages & bons aduertiffemens qu'on luy verſe, ou pour mieux dire, que lon reſpand alentour des oreilles de celui qui parle touſiours à ceux qui point ne l'eſcoutent, & n'eſcoute iamais ceux qui parlent à luy: car ſ'il eſ- coute tant ſoit peu, ce n'eſt que comme vn reſlus de babil, qui prêt haleine pour reba- biller puis apres encore d'auantage. Il y auoit en la ville d'Olympe vn portique, que lon appelloit Heptaphonos, pource qu'une meſme voix y retentiſſoit par diuerſes re- flexions pluſieurs fois: mais ſi la moindre parole touche tant ſoit peu à vn babillard, incontinent il reſonnera par tout,

Touchant du cœur les chordes plus cachees,
Qui ne deuroient pour rien eſtre touchees:

tellement que lon diroit, que les pertuis & conduits de l'ouye en eux ne reſpondent point au dedans du cerueau, mais à la langue: au moien dequoy les paroles demeurent en l'entendement des autres: mais des babillards ils ſ'eſcoulent incontinent, & puis ils ſ'en vont comme vaiſſeaux percez, vuides de ſens & pleins de bruit. Toutefois à fin que nous ne laiſſions à eſprouuer aucun moyen de leur profiter, nous pourrons com- mencer par dire à chaſcun de ces grans parleurs,

Amy

A Amy tais toy, car taciturnité

Porte avec foy mainte commodité,

& entre les autres deux premières & principales, c'est à ſçavoir, eſcouter, & eſtre eſcouté, deſquelles ces importuns parleurs ne peuvent iamais obtenir ne l'une ne l'autre, ains ſont frustrez de leur deſir en toutes les deux. Les autres paſſions & maladies de l'ame, comme l'avarice, l'ambition, l'amour, ont à tout le moins aucunes fois iouiſſance de ce qu'elles deſirent, mais c'eſt ce qui plus tourmente ces grands babillards, qu'ils cherchent par tout qui les veuille ouïr, & n'en peuvent trouver: car ſoit ou que lon deuiſe aſſis, ou que lon ſe promene en compagnie, chaſcun ſ'enfuit grand' erre ſi toſt que lon voit approcher quelqu'un de ces grands cauſeurs: vous diriez proprement que lon a ſonné la retraite, ſi viſte chaſcun ſe retire. Et ainſi comme quand en vne aſſemblée il ſe fait ſoudainement vn grand ſilence, & que perſonne ne parle, on dit que Mercure y eſt entré: auſſi quand vn babillard entre en vn banquet ou vne

B compagnie de gens qui ſ'entrecognoiſſent, chaſcun ſe tait, craignant de luy donner occasion de parler: ou ſi de luy meſme il commence le premier à entre-ouurir les leures, chaſcun ſe leue & ſ'en va, deuant que l'orage ſoit venu, comme ſont les gens de marine, qui ſe retirent à l'abry, ſe doutans de tourmente, pour auoir ouy vn peu bruire la biſe ſur le hault de quelque eſcueil de mer. Dont il aduient qu'ils ne peuuent auoir à boire & à manger avec eux perſonne qui y vienne volontairement: ny loger avec eux quand on va par les champs, ou que lon voyage par mer, ſils n'y ſont contraincts: car ceſt importun eſt touſiours apres, tantost les tirant par la robbe, tantost par la barbe, tantost les frappant du coude, de maniere que les pieds ſont là bié beſoing, comme diſoit Archilochus, ou plus toſt le ſage Ariſtote, lequel reſpondit à vn tel importun cauſeur, qui le faſchoit & luy rompoit la teſte, en luy faiſant des

plus eſtranges contes du monde, & luy repetoit ſouuent, Mais n'eſt-ce pas vne merueilleuſe choſe, Ariſtote? non pas cela, dit-il, mais c'eſt bien choſe merueilleuſe,

C qu'un homme ayant des pieds puiſſe endurer ton babil. Et à vn autre ſemblable qui luy diſoit, apres vn long procès qu'il luy auoit fait: Je t'ay bien rompu la teſte, Philoſophe, de mon parler: non as, reſpondit-il, point autrement: car ie n'y ay point penſé. Pource que ſi lon eſt quelquefois contrainct de les laiſſer babiller, l'ame cependant ſe retire en ſoy, & fait à par elle quelque diſcours, ne leur laiſſant que les oreilles ſeulement, ſur leſquelles ils eſpandent leur babil par dehors: ainſi ne peuuent-ils trouver qui les veuille ouïr, & encore moins qui les veuille croire. Car comme lon tient que la ſemence de ceulx qui ſe meſlent trop ſouuent avec les femmes, n'a pas la force d'engendrer: auſſi le parler de ces grâds babillards eſt ſterile, & ne porte point de fruit. Et toutefois il n'y a partie en tout noſtre corps que la nature ait ſi ſeulement remparée, que la langue, au deuant de laquelle elle a aſſis le rempar des dents, à fin que ſi d'aduenture elle ne veult obeïr à la raiſon, qui luy tient au dedans la bride roide, &

D qu'elle ne ſe retire en arriere, nous en puiſſions refrener ſon intéperance avec ſanglante morſure: car comme dit Euripide,

En fin toute langue eſfrenee

Se trouuera mal-fortunee.

Et me ſemble que ceulx qui diſent, que maiſon ſans porte, & bourſe ſans fermeture, ne ſeruent de rien à leurs maiſtres, & ce pendant ne mettent ne porte ne ferrure à leur bouche, ains la laiſſent touſiours couler au dehors, comme fait celle de la mer de Pont: ceulx-là, diſ-ie, me ſemblent eſtimer, que la parole ſoit la plus vile choſe du monde. C'eſt pourquoy on ne les croit iamais, & toutefois c'eſt le but auquel toute parole tend, pource que ſa fin proprement eſt faire foy aux eſcoutans: & ces grands parleurs ne ſont iamais creus, encore qu'ils diſent verité: comme le froment enfermé dedans quelque vaiſſeau, croiſt bien quand à la meſure, mais qu'à la bonté

En la tragedie des Bacchantes.

Voyez Plin li. 4. chap. 131

Du trop parler.

de l'usage, il empire: ainsi est-il de la parole du babillard, car il l'augmente bien en E mentant, mais il luy oste toute force de persuasion. D'avantage c'est chose dont toute personne honneste, & qui a honte des choses infames & villaines, se doit bien soigneusement contregarder, que de s'enyurer: car, comme disent aucuns, cholere est bien du mesme rang que la manie & fureur, mais yuresse loge & demeure tousiours avec elle, ou pour mieulx dire, c'est la fureur mesme; moindre quant à la duree du temps, mais plus griefue quant à la cause, d'autant qu'elle est volontaire, & que nous l'encourons de nous mesmes, sans que rien nous y contraigne. Or n'y a il rien en l'yuresse que tant lon blasme & reprenne, que l'intemperance du trop parler: car comme dit le poëte,

Odyss. 14.

Le vin peult tant que le sage il destraine,
Il fait chanter l'homme tant soit-il graue,
Rire, gaudir, & chanter, & baller,
Et ce, que taire il deuroit, deceler.

F

Ce dernier est bien le pire & le plus dangereux, au pris de chanter & de baller: & peut estre que le poëte taiblement a voulu soudre la question que demandent les philosophes, quelle difference il y a entre auoir beu, & estre yure: car de l'un on est plus guay que de coustume, & de l'autre on parle trop: d'où vient que lon dit en commun proverbe, Ce qui est en la pensee du sobre, est en la bouche de l'yure. Et pourtant respondit sagement le philosophe Bias à un babillard qui se mocquoit de luy, pource qu'estant en un festin il ne parloit point, & disoit que ce n'estoit qu'un lour-dault: Comment seroit-il possible, dit-il, qu'un fol se teust à la table? Il y eut quelque-fois à Athenes un des citoiës qui festoya les Ambassadeurs du Roy de Perse, & pource qu'il sentoient bien que ces seigneurs y prendroient plaisir, il conuia au festin les philosophes qui pour lors estoient en la ville: & comme tous les autres commençassent à deuïser avec eux, & chacun à tenir sa partie, Zenon qui y estoit se teut tout quoy sans dire un seul mot: parquoy ces seigneurs Persiens se prirent à le caresser & à boi- G re à luy, disans: Et de vous seigneur Zenon, que dirons nous au Roy nostre maistre? Non autre chose, respondit-il, sinon, que vous avez veu un vieillard à Athenes qui se scait bien taire à la table. tant le silence est vne profonde sapience, & chose sobre, & pleine de haults secrets, comme au contraire l'yuresse est chose pleine de tumulte, vuide de sens & de raison. Les Philosophes mesmes definissans l'yuresse disent que c'est un trop parler à table: de sorte qu'ils ne reprennent pas le bien boire, prouueu que lon y garde modestie & silence: mais le trop & follement parler fait, que le boire est yuresse: ainsi l'yure parle follement à table, & le babillard par tout, au marché, au theatre, en se promenant, en seant à table de iour & de nuict. S'il va visiter un malade, il luy fait plus de mal que sa maladie mesme: s'il est dedans vne nauire, il fasche plus les passagers que ne fait la marce: s'il veult louer quelqu'un, il luy est plus ennuyeux que s'il le mesprisoit: & aime lon mieux auoir quelquefois en sa compagnie H des hommes mauuais, moyennant qu'ils soient discrets en parler, que d'autres qui parlent trop, combien qu'ils soient au reste gens de bien. Le bon vieillard Nestor en vne tragedie de Sophocles parlant à Ajax, lequel estoit un peu auantageux en paroles, pour le moderer luy dit gracieusement,

Je ne te veux blasmer, Ajax, combien

Que parles mal, pource que tu fais bien.

Nous ne disons pas ainsi du babillard, car l'importunité de son parler oste toute la grace de son bien faire. Lyfias iadis, à la requeste de quelqu'un qui auoit un proces, luy composa vne harengue, & la luy bailla: la partie l'ayant plusieurs fois leuë & releuë, s'en vint en fin vers Lyfias tout decouragé, & luy dit: la premiere fois que ie l'ay leuë, elle m'a semblé excellente: mais la seconde & la tierce, elle m'a semblé mai- gre

A gre, & n'y ay point trouué de nerfs. Lors Lyfias luy replica, Comment, ne fçais-tu pas bien qu'il ne te la faudra prononcer qu'une fois deuant les iuges? & toutefois on voit manifestement la douceur grãde & force d'eloquence qui est escripts de Lyfias, car i'ose bien dire & maintenir, que les Muses aux blonds cheueux luy ont esté fauorables. Entre les choses singulieres que lon dit du Prince des poëtes, celle-la est tres-veritable, que Homere est seul au monde qui n'a iamais saoulé ny degousté les hommes, se montrant aux lecteurs tousiours tout autre, & florissant tousiours en nouvelle grace: aussi a il bien monstré combien il craignoit & fuyoit ce degoust, & ceste fascherie qui suit de pres toute longue trainnee de paroles, en ce que luy mesme a escrit,

Odyss. 12.

Ce que lon a clairement desia dit
Est odieux quand puis on le redit.

Voila pourquoy il mène les auditeurs d'un conte en autre, & par la nouveauté empesche que les oreilles ne se lassent & ne se saoulent iamais d'ouïr: & ceux-cy au contraire rompent la teste de mesmes redittes, comme ceux qui souillent les tablettes de ratures. Et pourtant mett'õs leur cecy premieremēt deuant les yeux, tout ainsi que ceux qui par force de boire du vin oultre mesure & sans eau, sont cause que ce qui nous a esté doné pour nous resiouir & pour faire bõne chere, aux vns se tourne en fascherie, aux autres en violēce: aussi ceux qui hors de saison & à tous propos vsent du parler, qui est la plus delectable & la plus amiable cõference que les hõmes sçauroient auoir ensemble, le rendent fascheux & importun, desplaisans à ceux à qui ils cuidēt plaire, moquez de ceux dont ils cuident estre estimez, & mal-voulus de ceux desquels ils pensent estre aimez. Ainsi dõc cõme à bon droict celuy seroit estimé peu courtois, qui avec le tissu de Venus, auquel sont toutes les sortes de gracieux attraicts, rebuterait & chasseroit tous ceux qui s'approcheroient de luy: aussi celuy qui par son parler se fait fuir & haïr, se peult biē tenir pour hõme de mauuaise grace, & mal instruit & appris. Or quāt aux autres passios & maladies de l'ame, les vnes sont dāgereuses, les autres odieuses, les autres subiectes à mocquerie: mais tous ces maux aduiennēt ensemble aux babillards, ils sont moquez, car chacun en fait des contes: ils sont haïs, car ils apportent tousiours quelques mauuaises nouvelles: ils sont en danger, pource qu'ils ne peuuent taire leur secret. Voila pourquoy Anacharsis, ayant un iour esté festoyé chez Solon, fut estimé sage, par ce qu'on le veit en dormant tenir sa main droite sur sa bouche, & sa gauche sur les parties naturelles, ayāt bõne opinion de penser, que la langue a besoing de plus forte bride que nō par la nature: car il ne seroit pas facile de nombrer autāt de personnes qui se soient ruinez par intemperance de luxure, comme il y a eu de puissantes citez, & de grãds estats destruits & renuersez par auoir euenté quelque secret. Sylla estant au siege deuant Athenes, & n'ayant pas loisir d'y tenir le camp longuement,

Pource qu'un autre affaire le pressoit,
& que d'un costé Mithridates auoit enuahy, occupé & rauy toute l'Asie, & d'autre costé la ligue de Marius se remettoit sus, & recouuroit grande puissance dedans Rome, il y eut quelques vieillards en la bouttique d'un barbier, qui en cacquettant ensemble dirent, qu'un certain quartier de la ville, que lon nommoit Heptachalcon, n'estoit pas bien gardé, & qu'il y auoit danger que la ville ne fust prise par cest endroit-là. Ce que entendans certains espions qui estoient dedans la ville, l'allerent rapporter à Sylla, lequel incontinent sur la minuit approcha son armee de ce costé-là, par où il entra dedans, & peu s'en fallut qu'il ne la rasast toute, mais au moins l'emplit-il de meurtre, & fut la rue que lon appelloit Ceramique toute arrosée de sang, estant Sylla plus indigné contre ceux de la ville pour certaines paroles iniurieuses, que pour autre offense qu'ils luy eussent faite: car pour se mocquer de Sylla & de sa femme Metella, ils venoient sur la muraille, & disoient,

* Sylla tu as d'une meure la mine,

* SYLLA
s'appellent les
personnes de
couleur brune,
comme escrit
Sextus Pom-
petius, & tel
estoit Sylla: &
parmy il ietoit
hors de
son cuir de la
fleur cõme sa-
rine: aussi mou-
rui-je de la
maladie pedis-
culaire.

Du trop parler.

Par le dessus semée de farine:

E

& vn tas d'autres telles mocqueries: & par ainsi pour la plus legere chose du mōde, cōme dit Platon, c'est à sçauoir pour des paroles, ils payerēt vne tres-griefue & tres-cruelle amēde. Le trop parler d'un seul hōme engarda que Rome ne fust deliuree de la tyrānie de Neron: car il n'y auoit qu'une nuit entre deux, & estoit tout appresté pour le tuer le lēdemain: or celuy qui auoit entrepris l'executiō, allāt au Theatre veit à la porte vn pauvre prisonnier de ceux qui estoient condānez à estre iettez deuāt les bestes sauages, que lon alloit mener à Neron, & l'oiant lamēter sa miserable fortune, il s'approcha de luy, & luy dit tout bas en l'aureille, Prie Dieu, pauvre hōme, que tu puisses eschapper ce iour seulemēt, & demain tu me remercieras. Le prisonnier rauit incōtinent ceste parole couuerte: & pensant, à mon aduis, ce que lon dit communément,

Fol est celuy qui laisse le certain,

Pour suyure apres ce qui est incertain,

prefera la maniere de sauuer sa vie seure à la iuste, & pour ce alla descouuir à Neron F
ce que l'autre luy auoit couuertement dit: ainsi le malheureux fut incōtinent saisy au corps: & aussi tost la gehenne, le feu, les escorgees furent prestes pour faire confesser par force à ce malheureux, ce que ja de luy mēme il auoit sans cōtrainte descouuert. Mais Zenon le philosophe, de peur que contre sa volōté son corps forcé de l'horreur des tourments ne decelast quelque chose de son secret, cracha sa langue, qu'il tronçonna luy mēme avec ses propres dents, au visage du tyran. La constance aussi & patience de Leena l'amie d'Armodius & Aristogiton a esté remuneree d'une tres-belle recompense: elle participoit d'esperance, autant que pouuoit vne femme, à la conspiration que ces deux amoureux auoient coniuree alencontre des tyrans d'Athenes: car elle auoit beu en la belle couppe de l'amour, & par iceluy s'estoit voīee à taire ces secrets. Apres donc que ses deux amants, ayans failly à leur entreprise, eurent esté mis à mort, elle fut gehennée & mise à la torture, pour luy faire declarer les autres complices de la coniuration, qui n'estoient point encores descouverts, mais elle fut si G
constante, qu'elle n'en decela iamais vn, & monstra que ces deux ieunes hommes n'auoient rien fait indigne d'eux de s'estre enamourez d'elle: & depuis en memoire de ce faict, les Atheniens feirent faire vne Lionne de bronze, laquelle n'auoit point de langue, & la feirent asseoir & poser à l'entree du chasteau: voulans donner à entendre le cœur inuincible d'elle, par la generosité de la beste, & la perseuerance en taciturnité secrette, par ce qu'ils ne luy auoient point fait de langue. Iamais parole ditte ne seruit tant comme plusieurs teuēs ont profité, d'autant que lon peut bien tousiours dire ce que lon a teu, mais non pas taire ce que lon a dit, pour ce qu'il est desia fort y
& respandu par tout. C'est pourquoy nous apprenons des hommes à parler, & des Dieux à nous taire: car es sacrifices & saintes cerimonies du seruice des Dieux, il est commandé de se taire & de garder silence: & aussi le poëte Homere fait Vlysses, duquel l'eloquence estoit si douce, taciturne & peu parlant: aussi fait-il sa femme, son H
fils, & sa nourrice, laquelle il introduit ainsi parlant,

Odyss. 19.

Il fortiroit aussi tost d'une foughe,

Ou d'un fer dur, qu'il feroit de ma bouche.

Et luy mēme seant aupres de sa femme, auant qu'il se fust donné à cognoistre,

Bien auoit-il au cœur grande pitié,

De veoir plorer sa loyalle moitié:

Mais ses deux yeux iamais ne remua,

Non plus qu'un roc, ne sa face mua.

tant fut sa bouche pleine en toute sorte de patience: & la raison eut tellement toutes les parties de son corps obeissantes à son commandement, qu'elle commandoit aux yeux de ne plorer point, à la langue de ne parler point, au cœur de ne trembler point,

A point, & de ne soupirer point.

A la raison son cœur obeïssoit,

Sans demonstrier l'ennuy qui l'oppressoit.

Odyss. 13.

tellement que la raison maistrisoit iusques aux occultes mouuements interieurs, qui ne sont point capables de ratiocination, tenant & le sang & les esprits mesmes sous sa main, & en son obeïssance. Ses gens aussi, pour la plus part, estoient semblables: car c'est bien vn signe d'extreme constance & fidelité enuers leur seigneur, de se laisser deschirer au geant Cyclops, & froisser contre la terre, plus tost que de dire vn tout seul mot contre Vlysses, & declarer l'apprest de celle grosse piece de bois qu'il auoit bruslee par le bout pour luy creuer l'œil, & plus tost endurer d'estre deuorez tous vifs, que de descouvrir aucune chose du secret d'Vlysses. Parquoy Pittacus fait bien quand le Roy d'Ægypte luy enuoya vn mouton, luy mandant qu'il luy en meist à part la pire & la meilleure chair, il luy enuoya la langue comme l'instrument des plus grands biēs

B & des plus grands maux qui se facent par le monde: & Ino en Euripide parlant librement de soy-mesme dit,

Je sçay parler quand il fault, & me taire.

Car certainement ceux qui sont noblement & royalement nourris, apprennent premierement à se taire, & puis apres à parler. Et pource Antigonus le grand, vn iour que son fils luy demandoit quand le camp deslogeroit, As tu peur, luy dit-il, que toy seul n'entendes pas la trompette? il ne se fioit pas d'vne parole secrette à celui, auquel deuoit venir la succession de son empire, luy enseignant à estre par cela plus reserué & plus retenu en telles choses. Et le vieil Metellus à vn autre qui luy demandoit quelque secret semblable, Si ie sçauois, dit-il, que ma chemise sçeuist mon secret, ie la despouillerois pour la mettre au feu. Eumenes fut aduertý que Craterus venoit contre luy, il le teint secret, sans le descouvrir à pas vn de ses amis, feignant, & leur donnant à entendre que c'estoit Neoptolemus, pource que ses gens de guerre mesprisoient cestuy-cy, & auoient la reputation de l'autre en estime grande, & la vertu en amour, de maniere que personne n'en sçeut rien que luy seul: ainsi luy donnerent-ils la bataille, qu'ils gaignerent, & le tuerent sur le champ, sans le cognoistre, sinon apres qu'il fut mort. Voyla comment la ruze de taciturnité gagna ceste bataille, en celant vn si grand, & si formidable ennemy: tellement que ses plus priuez amis admirerent plus sa prudence de l'auoir teu, qu'ils ne se plainquirent de sa defiance de ne leur auoir dit. Et encore que lon se plaigne, si vault-il mieulx, que toy faulx, lon se mescontente que tu te sois défié, que toy perdu, tu te condamnes toy-mesme de t'estre trop fié. Et d'auantage, comment oseras-tu franchement blasmer & reprendre celui qui n'aura pas tenu secret ce que tu luy auras reuelé? car sil ne falloit pas qu'il fust sçeu, pourquoy l'as-tu dit à vn autre? & si mettant ton secret hors de toy-mesme, tu le veux garder en vn autre, tu as donc plus de fiance en vn autre,

D qu'en toy-mesme: & sil est semblable à toy, tu es perdu à bon droit: sil est meilleur, tu es eschappé contre toute raison, ayant trouué vne personne qui te soit plus fealle que toy-mesme. Mais c'est mon amy, diras-tu: aussi sera vn autre le sien, à qui il se fiera aussi: & celui-là encore à vn autre: ainsi prent la parole accroissement & multiplication par vne suite enfilee d'incontinence de langue: car ainsi comme l'vnité ne sort point hors de ses borne, ains demeure tousiours en soy-mesme vne, à raison dequoy on l'appelle Monas, qui est à dire seule, mais le nombre binaire est indefiny, & le commencement de diuorce: d'autant qu'il sort incontinent de soy-mesme en doublant l'vnité, & se tourne en pluralité: aussi vne parole quand elle demeure enclose en celui qui premier la sçait, elle est veritablement secrette, mais depuis qu'elle sort dehors, & vient iusques à vn autre, elle commence à auoir nom de bruit commun: car, comme dit le Poëte, les paroles ont ailes. Et ainsi comme il n'est

Du trop parler.

pas aisé de reprendre ne retenir vn oyseau, quand on l'a vne fois laissé eschapper des mains : aussi ne sçauoit-on retenir ne r'auoir vne parole, depuis qu'elle est ietee hors de la bouche, car elle s'en vole battant ses legeres ailes, & s'espand des vns aux autres: bien peult-on retenir & alentir le cours d'une nauire, que l'impetuosité des vents emporte, avec ancres & rouleaux de cordages : mais depuis que la parole est yssue de la bouche, comme de son port, il n'y a plus ne rade où elle se peult retirer, ny ancre qui la sçeuist arrester, ains s'en volant avec vn merueilleux bruit & grand son, en fin elle va rompre contre quelque rocher, & abismer en quelque gouffre de danger celuy qui l'a laissée aller.

On brusleroit toute la grand' forest
Qui à l'entour du hault mont d'Ida est
D'un peu de feu, & en bien peu d'espace
Ainsi sera semé en toute place
Ce qu'auras dit à vn seul en secret,
Si tu n'es bien en ton parler discret.

F

Le Senat Romain fut vne fois par plusieurs iours en conseil bien estroict sur quelque matiere secrette, & estant la chose d'autant plus enquisse & soupçonnée, que moins elle estoit apparente & cogneuë, vne Dame Romaine sage au demourant, mais femme pourtant, importuna son mary, & le pria tres-instamment de luy dire quelle estoit ceste matiere secrette, avec grands serments & grandes execrations, qu'elle ne le reueleroit iamais à personne, & quant-&-quant larmes à commandement, disant qu'elle estoit bien malheureuse de ce que son mary n'auoit autrement fiance en elle. Le Romain voulant esprouuer sa folie : Tu me contrains, dit-il, m'amie, & suis forcé de te descouurir vne chose horrible & espouuentable : c'est que les prestres nous ont rapporté, que lon a veu voler en l'air vne allouëtte avec vn armet doré, & vne picque : & pource nous sommes en peine de sçauoir si ce prodige est bon ou mauuais pour la chose publique, & en conferons avec les deuins qui sçauent que signifie le vol des oyseaux : mais garde toy bien de le dire. Apres qu'il luy eut dit cela, il s'en alla au palais : & sa femme incontinent tirant à part la premiere de ses chambrières qu'elle rencontre, commence à battre son estomach, & arracher ses cheueux, criant, Helas mon pauvre mary, ma pauvre patrie, helas que ferons nous! enseignant & conuiant sa chambrière à luy demander, Qu'y a-il? apres que doncques la seruante luy eut demandé, & elle luy eut le tout conté, y adioustant le commun refrain de tous les babillards, Mais donnez vous bien garde de le dire, tenez le bien secret : à grand' peine fut la seruante departie d'avec sa maistresse, qu'elle s'en alla decliquer tout ce qu'elle luy auoit dit, à vne sienne compagne qu'elle trouua la moins embesongnée, & elle d'autre costé à vn sien amy, qui l'estoit venu voir, de sorte que ce bruit fut semé & sceu par tout le palais, auant que celuy qui l'auoit controuué y fust arriué. Ainsi quelqu'un de ses familiers le rencontrant, Comment, dit-il, ne faites vous que d'arriuer maintenant de vostre maison? Non, respondit-il. Vous n'avez doncques rien ouy de nouveau. Comment, dit-il, est-il suruenu quelque chose de nouuelle? L'on a veu, respondit l'autre, vne allouëtte volant avec vn armet doré, & vne picque: & doiuent les Consuls tenir conseil sur cela. Lors le Romain en se soubriant, vrayement, dit-il à par soy, ma femme, tu n'as pas beaucoup attédu, quand la parole que ie t'ay naguères ditte a esté deuant moy au palais : & de là s'en alla parler aux Consuls pour les oster de trouble. Et pour chastier sa femme, incontinent qu'il fut de retour en sa maison: Ma femme, dit-il, tu m'as destruit: car il s'est trouué que le secret du conseil a esté descouuert & publié de ma maison : & pourtant ta langue effrenée est cause qu'il me fault abandonner mon país, & m'en aller en exil. Et comme elle le voulust nier, & dist pour sa defense, N'y a-il pas trois cents Senateurs qui l'ont ouy

A ouy comme toy? Quels trois cents, dit-il, c'estoit vne bourde que i'auois controu-
 „ uue pour t'esprouer. Ce Senateur fut homme sage, & bien aduisé, qui pour essayer
 „ sa femme, comme vn vaisseau mal relié, ne versa pas du vin, ny de l'huile dedans,
 „ ains seulement de l'eau. Mais Fuluius, l'un des familiers de César Auguste, estant
 „ ja sur l'aage, apres auoir ouy les regrets & cōplaintes de l'Empereur, lamentant la
 „ solitude de sa maison, & qu'apres le trespas des deux fils de sa fille, & la relega-
 „ tion de Posthumius qui luy restoit seul, & pour quelque imputation auoit esté
 „ confiné, il estoit contrainct de laisser le fils de sa femme son successeur à l'Empire:
 „ combien qu'il eust compassion, & qu'il fust entre-deux de reuoquer le fils de sa
 „ sa fille de son confinement. Fuluius ayant entendu ces propos, les alla rapporter
 „ à sa femme, & elle à Liuia femme d'Auguste, laquelle s'en attacha bien asprement
 „ à César, fil estoit ainsi qu'il eust de long temps proposé de rappeler son arriere fils,
 „ pourquoy il ne le faisoit, ains la mettoit en inimitié & en guerre avec celuy qui luy
 B deuroit succeder à l'Empire. Le lendemain matin, comme Fuluius luy fust venu
 „ donner le bon iour, ainsi qu'il auoit de coustume, & qu'il luy eust dit, Dieu te gard
 „ César: il ne luy feit que respondre, * Dieu te face sage Fuluius. Fuluius entendant
 „ incontinent que cela vouloit dire, se retira tout aussi tost en sa maison, & là faisant
 „ appeller sa femme: César, dit-il, a bien sçeu que ie n'ay pas teu son secret, & pour
 „ ceste cause i'ay resolu de me faire mourir moy-mesme. Tu feras iustice, dit-elle,
 „ veu qu'ayant si longuement vescu avec moy, & par cy deuant ayant assez experi-
 „ menté l'incontinence de ma langue, tu ne t'en es pas donné garde: mais laisse que ie
 „ me tue la premiere: & prenant vne espee, elle mesme s'en tua deuant son mary. Par-
 „ quoy le joüeur de Comœdies Philippides feit sagement, quand il respondit au Roy
 „ Lyfimachus, qui le caressoit, & luy disoit, Que veux-tu que ie te communique de
 „ mes biens? Ce que tu voudras, Sire, pourueu que ce ne soit point de tes secrets. Il y a
 „ plus, que la curiosité, vice non moindre, est ordinairement iointe au parler beau-
 C coup: car ils desirent entendre & ouïr beaucoup de nouuelles, à fin qu'ils en puis-
 „ sent conter beaucoup, mesmement des plus secretes. Voyla pourquoy ils vont
 „ par tout furettant & fleurant, fils pourront point esuenter quelque chose bien ca-
 „ chée, adioustant comme vne vieille surcharge de matieres odieuses à leur babil. Ce
 „ qui fait qu'ils sont puis apres semblables aux petits enfans, qui ne veulent lascher, &
 „ si ne peuuent tenir la glace qu'ils ont en la main: ou, pour mieux dire, ils mettent
 „ en leur sein, & embrassent des secrets qui sont comme des serpents, lesquels ils ne peu-
 „ uent longuement retenir, ains sont deuorez & rongez par iceux. On dit que les pois-
 „ sons qui s'appellent aiguilles de mer, & les viperes, créuent & se deschirent quand
 „ elles enfantent leurs petits: aussi les secretes paroles, en sortant de la bouche de ceux
 „ qui ne les peuuent contenir, perdent & ruinent ceulx qui les ont reuelees. Le Roy Se-
 „ leucus, surnommé Callinicos, qui est autant à dire comme victorieux, en vne batail-
 D le qu'il eut contre les Galates, perdit tous ses gens, & toute son armee: parquoy lais-
 „ sant son diadème ou bandeau Royal, & sa cotte d'armes, il se meit à fuir sur vn che-
 „ ual, avec trois ou quatre autres, par chemins escartez & destournez, tant & si longue-
 „ ment que les cheuaux ny les hommes n'en pouuoient plus: à la fin il arriua en la pe-
 „ tite maisonnette d'un païsan, où il trouua de cas d'aduenture le maistre, & luy de-
 „ manda du pain & de l'eau: ce que le païsan luy bailla, & non seulement cela, mais de
 „ tout ce qu'il peult finer aux champs abondamment, en luy faisant la meilleure che-
 „ re dont il se pouuoit aduiser: à la fin il cogneut que c'estoit le Roy, & fut si ioyeux de
 „ ce que la fortune l'auoit adressé en sa maison, se trouuant en telle necessité, qu'il ne
 „ sçeut contenir sa ioye, ny seconder le Roy, lequel ne demandoit que d'estre incogneu,
 „ & de se dissimuler, & contrefaire: si le conduisoit iusques à l'adresse du chemin, là
 „ où en prenant congé il luy dit, A dieu Sire Seleucus. Le Roy luy tendant la main, &

Cornelius
Tacitus en
son premier
liure l'appel-
le Fabius
Maximus, &
Ouide de
Ponto.

* *ὁ γὰρ*
Sois sain:
les autres
veulent que
ce soit au-
tant cōme
A Dieu
te dis, le
salut que
lon donne à
celuy qui
s'en va.

Du trop parler.

le tirant à luy, comme fil l'eust voulu baïser, feit signe secrettement à l'un de ses gens, E
qu'il luy couppast la teste de son espee:

Iliad. li. 10.

Lors en parlant la teste luy trencha,

Et son clair sang sur la poudre espancha.

là où fil eust peu contenir sa langue pour vn peu de temps, que le Roy puis apres eut
meilleure fortune, & redeuint grand & puissant, il luy eust à mon aduis sceu meil-
leur gré, & fait plus de biens pour sa taciturnité, que pour sa courtoisie, & toute sa
bonne chere: & toutefois cestuy-cy encore auoit quelque couleur pour defendre son
incontinence de langue, à sçauoir son esperance, & la bonne chere qu'il auoit faite au
Roy. Mais la plus part de ses babillards se perdent eux-mesmes, sans auoir aucune cou-
uerture ny couleur de raison: comme il aduint, qu'en la boutique d'un barbier aucuns
deuisoient de la tyrannie de Dionysius, qu'elle estoit bien asseuree, & aussi mal-aisee
à ruïner que le diamant à rompre: le m'esmerueille, dit le barbier en soubriant, com-
ment vous dittes cela de Dionysius, sur la gorge duquel ie passe le rasoir si souuent. F
Ces paroles estans rapportees à Dionysius, il feit mettre le barbier en croix. Si n'est pas
sans occasion que les barbiers sont ordinairement grands babillards: car coustumiere-
ment les plus grands truans & faictneans d'une ville, & les plus grands causeurs s'assem-
blent & se viennent asseoir en la boutique d'un barbier, & de ceste accoustumance de
les ouïr caquetter ils apprennent à trop parler. Parquoy le Roy Archelaus respondit
plaisamment à un sien barbier, qui estoit grand babillard, apres qu'il luy eut accoustré
son linge à l'entour de luy, & luy eut demandé, Comment vous plaist-il que ie face
vostre barbe, Sire? Sans dire mot, luy respondit le Roy. Un autre fut le premier qui
vint dire les nouuelles de celle grande desconfiture, que les Atheniens receurent en la
Sicile: il auoit son ouurouër de barberie sur le port que lon appelle Piree, en la ville
d'Athenes, là où il entendit ces mauuaises nouuelles par un esclau qui s'en estoit fuy
de là: & prenant aussi tost sa course, en abandonnant boutique & tout, s'en vint tout
battant à la ville, ayant grande peur que quelqu'un ne luy ostast cest honneur, d'auoir G
le premier apporté la nouuelle de ceste malheureuse defaïcte à la ville, & qu'il n'y arri-
uast trop tard. Soudain qu'il fut sceu par la ville, le peuple en fut bien estonné, comme
lon peult penser, & non pas sans cause: si fut aussi tost tenuë une assemblee de ville, en
laquelle le peuple commanda que lon sceust qui auoit apporté ceste nouuelle. Le
barbier fut amené: on l'interroqua, & il ne sceut pas seulement dire le nom de celuy de
qui il l'auoit entenduë: mais bien asseuroit-il, l'auoir ouy dire à un certain qu'il ne co-
gnoissoit point, & duquel il ne sçauoit pas le nom. Le peuple commença à se muti-
ner, & à crier, Qu'il ait la gehenne, Qu'on luy baille les grillons à ce meschant: Il a
menty, il a controuuë cecy: Qui est l'autre qui l'ait ouy comme luy? Qui est celuy
qui le croit? Qu'on apporte une rouë. Le barbier est estendu dessus. Et sur ces entre-
faites voicy arriuer ceux qui apportent certaines nouuelles de la desconfiture, en
estants eux-mesmes eschappez de viffesse: ainsi chascun se departit de l'assemblee, & se H
retira chez soy pour plorer sa priuee perte, laissant ce pauvre malheureux attaché à
cette rouë, là où il fut iusques au soir bien tard, que le bourreau le vint deslier: &
lors encore luy demanda-il, fils auoyent aussi ouy dire, comment leur Capitaine ge-
neral Nicias auoit esté tué: tant ce vice de trop parler, par accoustumance deuient in-
expugnable & incorrigible. Et neantmoins tout ainsi que ceux qui prennent mede-
cine d'amere saueur, ou bien de mauuaise senteur haïssent puis apres les gobelets où ils
les ont beuës: aussi ceux qui apportent mauuaises nouuelles sont coustumierement
mal voulus de ceux à qui ils les apportent: & pourtant Sophocles subtilement distin-
gue l'un de l'autre:

LE MESSAGER,

Est-ce en ton cœur, ou bien en ton ouye,

Qu'offensé

A Qu'offensé t'a ceste parole ouye?
 CREON,
 Pourquoi vas tu enquerant là où c'est
 Que ton parler me touche & me desplaist?

LE MESSAGER,
 Pource qu'ainsi que du faict la pensée,
 Aussi du dire est l'oreille offensée.

Voila pourquoy ceulx qui nous denoncent noz maux, nous sont aussi odieux, comme ceulx qui les nous font: & neantmoins on ne sçauoit arrester ne retenir vne langue depuis qu'elle est vne fois debordée. Aduint vn iour à Lacedemone, que le temple de Iuno qu'ils appelloient Chalceæcos fut pillé, & ne trouua lon rien dedans qu'une bouteille vuide: tout le peuple y accourut, & fut-on en grand esbahissement & grand pensément que vouloit dire ceste bouteille. Si y eut quelqu'un des
 B assistans qui se prit à dire, Si vous voulez ie vous declareray ce qui me vient en l'entendement touchant ceste bouteille: i'ay fantasie que les sacrileges ayants proiecté d'exécuter vne si perilleuse entreprise, auoient premierement beu du ius de ciguë, & puis auoient apporté du vin, à fin que s'ils n'estoient pris sur le faict, ils se peussent sauuer de mourir en beuuant du vin, lequel auroit puissance d'esteindre ou de resoudre la froideur du poison de la ciguë: ou bien, s'ils estoient surpris, qu'ils peussent aisément mourir, & sans grande passion, auant que d'estre gehennez & tourmentez. Il n'eut pas plustost dit cela, que l'assistance pensa, que l'inuention d'une si subtile ruse, & de si profonde cogitation, ne venoit point de coniecture, ains qu'il falloit qu'il le
 „ sçeuist bien d'ailleurs: & ainsi l'environnans, l'un deçà, l'autre delà, ils commencerent à l'interroguer, Qui es tu? D'où es tu? Qui te cognoist? Comment sçais tu ce que tu dis? brief ils le manierent si bien, qu'ils luy feirent confesser & adouër, qu'il estoit
 C l'un de ceux qui auoient commis le sacrilege. Et ceulx qui auoient occis Ibycus, ne furent-ils pas aussi pris de mesme? Ils estoient au theatre, là où ils regardoient le pasetemps des ieux: & voyans vne volée de grues, ils dirēt les vns aux autres, Voicy ceux
 „ qui vengeront la mort d'Ibycus. Or y auoit-il long temps que lon ne l'auoit point veu, & qu'on le cherchoit par tout: au moyen dequoy ceulx qui estoient assis au plus pres d'eulx, ayants bien noté ceste parole, l'allerent aussi tost rapporter aux officiers de la iustice: ainsi furent-ils saisis aux corps, & à la fin punis, non par les grues, mais par leur importun babil, comme par vne furie, ou vn esprit maling qui les forcea de deceler le meurtre qu'ils auoient commis. Car ainsi comme en nostre corps les parties offensées & dolentes attirent tousiours à soy, & toutes humeurs corrompues des parties voisines y fluent: aussi la langue d'un babillard ayant tousiours fiebure & inflammation, tire tousiours à soy & assemble quelque chose de secret & de caché: à raison de quoy il la fault bien remparer, & luy mettre tousiours au deuant le boulevard de la raison, qui comme vne leuee empesche le flux & la glissante inconstance d'icelle, à fin que nous ne soyons plus indiscrettes bestes que les oyes, lesquelles pour passer de la Cilicie par dessus le mont de Taurus, qui est plein d'aigles, prennent en leur bec vne grosse pierre, comme mettans vne serrure ou vn frein à leur cry, pour pouoir passer la nuict sans cryer, & sans estre apperceuës des aigles. Or si lon demandoit quelle personne est la plus pernicieuse & la plus meschante du monde, ie croy qu'il n'y a homme qui ne dist, passant toutes les autres, que c'est vn traistre: & neantmoins Euthycrates, comme dit Demosthenes, couurit sa maison du bois qu'il eut de Macedoine: Philocrates vescu opulemment d'une grosse somme d'or & d'argent qu'il eut du Roy Philippus, & en achetta des concubines, & des poissons delicieux: à Euphorbus & Philager, qui trahirent Eretrie, le roy donna plusieurs belles terres: mais le babillard est vn traistre gratuit & volontaire qui ne demande point de loyer,

Du trop parler.

& qui n'attend pas qu'on le sollicite, ains se va presenter de luy-mesme, & ne tra- E
hit pas aux ennemis des cheuaux, ou des murailles, ains reuele les secrets, soit en pro-
ces, ou en seditions ciuiles, ou en menees de gouuernement, sans que personne
luy en sçache gré, car encore pense-il estre bien tenu à ceulx qui le veulent ouïr:
parquoy ce qu'on dit à vn prodigue, qui follement despend & dissipe le sien, tu n'es
pas liberal, c'est vn vice duquel tu es entaché, tu prens plaisir à donner: ceste mesme
reprehension conuient tresbien à vn babillard, tu n'es point mon amy pour me
venir descouurir cela, tu es entaché de ce vice, tu aimes à caquetter, & à babiller.
Si ne fault pas estimer, que nous entendions dire cela pour accuser & blasmer seule-
ment le vice de trop parler: mais aussi pour le guarir, & y remedier: car nous surmon-
tons les vices & passions de l'ame par iugement, & par exercitation: mais le iuge-
ment, c'est à dire, la cognoissance, precede, pource que nul ne s'exerce à fuir, &
par maniere de dire, arracher les vices de son ame, s'il ne les a en haine. Or comman-
ceons nous à haïr les vices, quand par raison nous entendons la honte & le domma- F
ge qui en vient, comme nous cognoissons maintenant que ces grands parleurs vou-
lans estre aimez se font haïr, cuidans plaïsanter desplaïsent, pensans estre bien estimez
font mocquez: qu'ils despendent, & ne gagnent rien: qu'ils nuysent à leurs amis,
aydent à leurs ennemis, & se ruinent eulx mesmes. Parquoy, la premiere recepte
& ordonnance de medecine pour corriger ce vice, soit la consideration & declaratiō
des malheurs, inconuenients & infamies qui en aduiennent. La seconde soit la cogi-
tation du contraire, c'est à sçauoir, escouter, retenir, & auoir tousiours à main les
loüanges & recommandations du silence, la majesté, la mystique grauité, la saincte-
té de la taciturnité, en nous representant tousiours en nostre entendement, com-
bien plus on a en admiration, combien plus on aime, combien plus on repute sages
ceulx qui parlent rondement & peu, & qui en peu de paroles embrassent beaucoup
de substance, que lon ne fait pas ces grands causeurs, qui babillent à langue desbridee.
Ce sont ceulx que Platon estime tant, & qu'il compare à ceulx qui sçauent bien tirer G
& lancer le dard, desquels le parler est rond, pressé & trouffé, sans que rien traine:
car ainsi comme les Biscains font du fer l'acier, en l'affinant par l'enfouïr dedans la
terre, & y faisant consommer & repurger ce qu'il y a de plus grosse & plus terrestre
substance: ainsi la parole des Laconiés n'a point d'escorce, ains toute superfluité ostee,
elle est aceree & remplie de certaine efficace & viuacité: car Lycurgus adressoit &
exerceoit ses citoïens dès leur enfance à ceste force & vehemence de parler amassé
& renforcé, par leur faire obseruer silence, & celle grace de respondre avec vne gra-
uité sentencieuse, & vne arguce bien tournee en leurs rencontres, laquelle ne prouiet
d'ailleurs que de beaucoup de taciturnité. Et pourtant sera-il expedient de mettre
tousiours deuant les yeux de ces grands parleurs tels mots aigus & courts, lesquels
ont ensemble & grace & grauité: comme cestuy-cy que les Lacedemoniens mande-
rent vn iour à Philippus de Macedoine, Dionysius est à Corinthe. Et vne autrefois H
„ comme il leur eust escript, Si i'entre dedans la Laconie, ie vous ruineray de fond en
„ comble: ils luy rescriurent, Si. Et comme vn autre Roy Demetrius se courrouceast
„ & criaist tout hault, Comment, les Lacedemoniens n'ont-ils enuoyé qu'un seul Am-
„ bassadeur deuers moy? l'Ambassadeur sans s'estonner luy respondit, Vn vers vn. Aussi
„ estoient ceux qui parloient peu iadis en grande estime empres les anciens: voyla pour-
quoy les Amphictyons, qui estoient les deputez pour conseil general de toute la
Grèce, ne feirent point escrire sur les portes du temple d'Apollo Pythien, l'Odyf-
see ou l'Iliade d'Homere, ou bien les Cantiques de Pindare: mais bien y ont-ils fait
„ escrire ces briefues sentences, Cognoy toy-mesme: Rien trop: Qui respond paye:
tant ils ont prisé vn parler simple & rond, contenant sous peu de paroles vne sen-
tence bonne & bien tournee. Mais Apollo luy-mesme, n'est-il pas grand amateur de
brief.

- A** briefueté, & succint en ses oracles ? c'est pourquoy on l'appelle Loxias, qui est à dire oblique, pourautant qu'il aime mieulx parler peu, que clairement. Et ceux qui sans parler donnent à entendre leurs conceptions par signes & deuises, ne sont ils pas estimez & louez en diuerfes sortes? comme iadis fut Heraclitus, lequel estant prié par ses citoiens de leur faire quelque harangue & remonstrance, touchant l'vnion & concorde ciuile, monta en la chaire aux harangues, & prit en sa main vn verre d'eau fresche, puis iettant dessus vn peu de farine, & la remuant avec vn brin de pouliot, la beut, & s'en alla: leur voulant donner à entendre, que se contenter de peu, & de ce que lon trouue le premier, sans conuoiter choses superflues, est ce qui conserue & entretient les citez en paix & en concorde. Scilurus vn Roy des Tartares laissa quatre vingts enfans, & peu auant que mourir commanda qu'on luy apportast vn faisceau de dards, qu'il bailla à tous ses enfans, les vns apres les autres, leur commandant, qu'ils s'efforçassent de rompre le faisceau tout entier, & apres qu'ils eurent bien essayé, & n'en peurent venir à bout, luy mesme les tira du faisceau les vns apres les autres, & les rompit tous, sans peine quelconque: leur voulant par là donner à cognoistre, que leur vnion & concorde seroit inuincible, mais la discorde les rendroit foibles, & seroit cause qu'ils ne dureroient gueres. Qui doncques liroit & rememoreroit souuent telles choses, à l'aduenture ne prendroit il pas grand plaisir à tant caquetter. Et quant à moy, vn seruiteur Romain me fait grand' honte, quand ie considere en moy-mesme combien il y a de sagesse à bien aduiser ce que lon dit, & soy constamment maintenir en ce que lon a proposé. Publius Piso l'orateur, voulant prouuoir à ce que ses gens ne luy rompissent point la teste de leur babil, commanda à ses seruiteurs, qu'ils luy respondissent seulement à ce qu'il leur demanderoit, & non autre chose: Et quelque iour voulant festoyer l'Empereur Clodius, commanda que lon l'allast conuier, & feit apprestier vn magnifique festin, comme il est à penser: Quand l'heure du soupper fut venue, & les autres conuiez tous arriuez, il ne restoit plus que l'Empereur: Si renuoya Piso par plusieurs fois celuy de ses seruiteurs qui auoit accoustumé de le conuier, pour sçauoir sil vouloit pas venir: mais quand il fut si tard, qu'il n'y eut plus d'apparence qu'il deust venir, Comment dit Pison à ce seruiteur, ne l'as tu pas esté semondre? Ouy, respondit-il. Et pourquoy donc n'est il venu? pource qu'il m'a dit qu'il ne viendrait pas. Et pourquoy donc ne me l'as tu dit incontinent? pource, respond le seruiteur, que tu ne me l'as pas demandé. Celuy là estoit seruiteur Romain: mais vn Athenien contera à son maistre, en labourant la terre, les articles du traicté de la paix: tant l'accoustumance a d'efficace & de pouuoir, de laquelle il nous faut maintenant parler, pource qu'il n'y a mors ny bride dont on peust arrester la langue d'un babillard, & la fault donter, & luy oster ce vice par accoustumance. Premièrement doncques, quand en vne compagnie lon demandera quelque chose, accoustume toy à te taire iusques à ce que tu voyes que personne des autres ne se mette en auant pour en respondre: car
- D** comme dit Sophocles,

Bien conseiller & bien courir n'ont pas

Vn mesme but ny vn mesme compas:

aussi n'ont pas la voix & la responce, car là celuy gaigne le pris de la course qui peut passer deuant: mais icy, si vn autre a suffisamment respondu, il suffira bien en louant & approuuant son dire, acquerir la reputation d'homme courtois & gracieux: & sil n'a bien ou suffisamment respondu, alors ne sera il point odieux ny importun de luy remonstrer doucement ce qu'il pourroit auoir ignoré, & supplier ce qui pourroit estre defectueux en sa responce. Mais sur tout nous deuons nous bien donner garde, quand la demande sera adressée à vn autre, de ne le preuenir, & anticiper sa responce: car à l'aduenture n'est il point honneste, ny en cela, ny en autre chose, offrir & pro-

Du trop parler.

mettre de foy-mesme, sans en estre requis, ce que lon demãde à vn autre, en le repoul- E
lant mesmement, pource qu'il semble que nous faisons outrage à l'un, comme ne pou-
uant fournir ce qu'on luy demande : & à l'autre, comme non sçachant s'adresser à
qui luy pourroit bailler ce qu'il cherche. Il y a plus, que celle precipitee celerité &
temerité de respondre semble estre pleine d'arrogance & de presumption, pource
qu'il semble que celuy qui preuient ainsi la response de l'interrogué, veuille dire,
Qu'as-tu que faire de luy? Et qu'en sçait-il luy? & , là où ie seray, il n'en fault deman-
der à personne qu'à moy. Combien que souuentefois nous faisons des demandes
à quelques vns, non que nous ayons grande enuie d'ouyr leurs responses, mais seule-
ment pource que nous les voulons entretenir, & prouoquer à deuiler & discourir,
comme fait Socrates à Theætetus, & à Charmides. Le preuenir donc la response d'un
autre, destourner les oreilles, diuertir les yeux & la pensée, pour le tirer à foy, c'est
autant comme si nous courions au deuant pour baiser vistement les premiers celuy
qu'un autre voudroit baiser, attendu que encore que celuy à qui on propose la que- F
stion n'y sçeuſt ou ne vouluſt respondre, si seroit-il bien ſeant, apres auoir fait vn peu
de pause, ſe presenter avec toute modestie & reuerence, en accommodant ſon dire
au plus pres de ce que lon pense que veult celuy qui fait la demande, à faire la respon-
ſe, comme au nom d'un autre : car ſi ceux à qui la question est adreſſee faillent à
bien respondre, avec grande raiſon on leur pardonne, & les excuſe lon : mais celuy
qui de foy-mesme ſingere de respondre, & oſte la parole à vn autre, il est à bon droit
odieux, encore qu'il die bien : & ſil fault à bien dire, il fait que chaſcun ſe rit & ſe
mocque de luy. Le ſecond poinct auquel il ſe fault diligemment diuerſifier & exercer,
c'est aux responses particulieres, à quoy celuy qui ſe ſent entaché du vice de trop par-
ler doit bien prendre garde, à fin que ceux qui le voudroient prouocquer à parler
pour auoir à gaudir & à rire, cognoiſſent qu'il respond pertinemment & à bon eſciet,
car il y en a qui ſans beſoing, ſeulement pour auoir leur paſſe-temps, forgent quel-
ques demandes à plaſir, leſquelles ils propoſent à ceſte maniere de gens pour eſmou- G
uoir leur babil: pourtant y fault-il bien auoir l'œil, & n'eſtre pas tant eſtourdy, ne ſou-
dain à courir aux paroles, donnant à cognoiſtre que lon ſoit bien aiſe d'auoir occaſiõ
de parler, mais conſiderer meurement la nature de celuy qui propoſe la demande. En-
core ſe faudroit-il accouſtumer à ſe tenir quoy, & faire quelque interualle de ſilen-
ce entre la demande & la response, pendant lequel ſilence, celuy qui a propoſé la que-
ſtion, y peult adiouter quelque choſe, ſi bon luy ſemble, & celuy qui est interrogué
peult penſer à ce qu'il a à respondre, & non pas à l'eſtourdie ſe ruer incontinent en
langage, & preſſer tellement l'interroguant, qu'on ne luy donne pas preſque loſir
de paracheuer ſa demande, en ſorte que bien ſouuent lon responde toute autre choſe
que ce que lon aura demãdé. Combien que la religieuſe du temple d'Apollo ſouuen-
tefois respond ſes oracles ſur l'heure, auant qu'elle en ſoit requiſe : car ainſi que dit le
Poëte, ce Dieu là

Oyt le muet qui a la bouche cloſe,

Et ſçait qu'on penſe auant qu'on le propoſe:

mais celuy qui veult ſagement respondre, doit attendre qu'il ait conceu la pensée, &
entierement cogneu l'intention de celuy qui l'interroge, de peur qu'il n'aduienne ce
que dit le commun prouerbe,

Ie leur demandois des faux,

Ils me nioyent des hoyaux.

encore que ſans ceſt inconuenient-là, touſiours fault-il reſrener & reſtraindre celle
importune haſtiueté & appetit deſordonné de parler, à fin que nous ne façons pen-
ſer que ce ſoit comme vne apoſtume ou vne fluxion d'humeurs, de longue main
amaſſées ſur noſtre langue, & que la demande que lon nous propoſe nous face grand
plaſir

- A** plaisir de nous en descharger. Socrates auoit accoustumé de restraindre & reprimer ainsi sa soif, apres qu'il auoit exercé son corps, & qu'il festoit eschauffé à la luitte, ou à la course, & autres tels exercices, il ne se permettoit point de boire, qu'il n'eust respandu le premier seau d'eau, qu'il auoit tiré du puis, à fin qu'il accoustumast son sensuel appétit à attendre le temps opportun de la raison. Il faut doncques noter qu'il y a trois sortes de responses que lon fait aux interrogatoires, l'une necessaire, l'autre ciuile, la tierce superflue: comme pour exemple, si quelqu'un demandoit, Socrates est il leans, celui qui respondroit enuis & mal volontiers, diroit, Il n'y est pas. Et s'il vouloit encore d'auantage laconiser, & accourcir son dire, il osteroit ce, pas, & respondroit simplement, non: comme les Lacedemoniens feirent quelquefois à Philippus qui leur auoit escrit, fils le vouloient receuoir en leur ville: Ils luy rescriurent en grosse lettre sur vn papier, Non. Mais celui qui voudroit respondre vn petit plus courtoisement, diroit: Il n'y est pas, car il est allé iusques à la place du change: & qui voudroit faire encore meilleure mesure, y pourroit adiouster, là où il attend quelques estrangers: mais vn superflu babillard, mesmement s'il a leu Antimachus le Colophonien, dira: Il n'est pas leans, car il est allé iusques à la place du change, attendant quelques estrangers du pais d'Ionie, desquels Alcibiades luy a escrit, qui maintenant est en la ville de Milet, & demeure avec Tissaphernes, l'un des lieutenans du grand Roy de Perse, lequel au parauant estoit amy des Lacedemoniens, mais maintenant pour l'amour d'Alcibiades s'est tourné du party des Atheniens: car Alcibiades desirant retourner en son pais, a tant fait qu'il a retourné Tissaphernes de nostre costé. Brief, il vous deduera tout le huitième liure des histoires de Thucydide, & vous noyera de langage, tant que vous ne vous donnerez garde, qu'il y aura eu sedition en la ville de Milet, & qu'Alcibiades sera encore vne autrefois banny. C'est doncques en quoy principalement il faut ficher le pied, & arrester babil: tellement que le centre & la circonference de la response soit, ce que veult &
- C** a besoin de sçauoir celui qui fait la demande. Carneades n'ayant pas encore grand nom, disputoit vn iour au lieu deputé aux exercices, & pource qu'il cryoit à pleine teste, le maistre ou concierge du lieu luy enuoya dire qu'il modcrast vn peu sa voix, car il l'auoit haultaine & forte. Carneades luy repliqua, Donne moy donc le ton & la mesure que ie doy tenir: & l'autre ne rencontra pas mal, luy respondant, Le ton & la mesure est l'ouye de celui qui dispute avec toy. Autant en peult on dire en ce cas, car la mesure que doit garder celui qui respond, c'est le vouloir de celui qui interrogue. D'auantage, ainsi comme Socrates commandoit, que lon euitast les viandes qui prouocquent à manger ceux qui n'ont point de faim, & à boire ceux qui n'ont point de soif: aussi faut il que vn babillard craigne, & fuye les propos qui plus luy plaisent, & desquels il aura accoustumé de parler excessiuement, & aller au deuant quand il les sentira couler: comme pour exemple, gens de guerre sont ordinairement
- D** grands conteurs de batailles & de faicts d'armes: & pource le poëte fait souuent conter à Hector ses vaillances & prouesses. Et ordinairement ceux qui auront gaigné quelque gros & difficile procès, qui auront, contre l'opinion & esperance d'un chacun, obtenu quelque grace d'un Prince ou d'un Roy, ont ce vice comme vne maladie ordinaire, à laquelle ils sont subiects, de souuentefois rememorer par quel moien ils seront entrez, comme ils auront esté introduits, comment ils auront plaidé, parlé & conuaincu leurs aduerses parties ou leurs accusateurs, & comment ils auront esté louez, car la ioye est encore plus grande babillarde, que celle vieille Agrypnie, que les poëtes introduisent en leurs Comédies, se resueillant tousiours elle mesme, & se montrant toute fresche à recommencer ses contes: voila pourquoy ils retombent en ces discours à tout propos: car non seulement cela est vray que lon dit en commun prouerbe,

Du trop parler.

Chascun a la main, fil peult,

Toufiours au lieu qui luy deult.

E

mais auffi la ioye attire à foy la voix, & meine là toufiours sa lāgue, pour plus appuyer & fortifier sa memoire. Ainsi voyons nous que les amoureux passent la plus part de leur temps à rememorer quelques paroles qui leur renouuellēt & refreschissent la memoire de leurs amours: de maniere que fils ne peuuent trouuer personne à qui ils en puissent conter, ils en deuiferont plus tost avec des choses qui n'ont ne sens ny ame, comme celuy qui dit,

O tres-doulx liēt, ô lampe tres-heureuse,

Bacchis te tient pour deesse amoureuse.

Platon au
Gorgias, cite
cette sentence
d'Euripide.

Combien que, à dire vray, le babillard est comme lon dit, la ligne blanche ou le traitt blanc en paroles, c'est à dire, que sans discretion indifferemment il parle de toutes choses: si est-ce pourtant, qu'il est plus affectionné aux vnes qu'aux autres, & de celles là il se doit retirer & abstenir, pour ce que à raison du plaisir qu'il y prent, & du contentement qu'il en reçoit, il se pourroit laisser emmener bien au loing. Mesme inclination ont-ils à deuifer des choses où ils se sentent les plus experimentez, & plus excellents que les autres: car estant chascun conuoiteux d'honneur, & s'aimant foy-mesme, il employe la meilleure part du iour en cela, où il y a quelque auancement, taschant à se rendre toufiours de plus en plus excellent, comme en histoires celuy qui aura beaucoup leu, vn grammairien à parler des regles de la grammaire, vn qui aura beaucoup veu & hanté en beaucoup de païs, à faire toufiours de nouveaux contes: voyla pourquoy il s'en fault donner garde, car le babil y estant accoustumé, y court, comme fait chasque beste de proye à son gibbier. En quoy l'on peult cognoistre l'excellente nature qu'auoit le Roy Cyrus, lequel ne prouocquoit iamais ses egaux d'aage à exercice, auquel il se sentist le plus fort, mais toufiours à ceux où il estoit moins exercité qu'eux, à fin qu'il ne leur causast desplaisir, en emportant le pris deuant eux, & que luy eust le profit d'apprendre ce qu'il sçauoit moins bien faire qu'eux. Mais vn babillard au contraire, si quelque propos vient en auant, duquel il puisse apprendre quelque chose qu'il ne sçauoit pas auparauant, il le repoulse & le reiette, ne pouuant souffrir qu'on luy donne loyer pour se taire vn petit, ains tournant tout alentour, ne cessera iusques à ce qu'il ait faict tomber le deuis sur quelques vieux contes qu'il aura repassez mille fois. Comme l'un de noz citoiens, auquel il estoit adueni de lire deux ou trois liures d'Ephorus, rompoit les oreilles à tout le monde, & n'y auoit compagnie ny festin qu'il ne feist departir à force de conter la bataille de Leuctres, & ce qui en ensuiuit, de sorte qu'il en fut surnommé Epaminondas: toutefois c'est le moindre vice du babil, & fault tascher de mettre toufiours ces grands causeurs en tels propos, car par ce moyen leur langage sera moins fascheux & importun, quand il desbordera en termes de litteratures. Oultre cela il sera bon aussi accoustumer telle sorte de gens à escrire quelque chose à part: comme Antipater le Stoïque, ne pouuant, ainsi qu'il est plus vray semblable, ou ne voulant contester en dispute teste à teste alencontre de Carneades, qui avec vn impetueux torrent d'eloquence refutoit la secte des Stoïques, respondoit par escript audiēt Carneades, & emplissoit les liures de contredicts, tellement qu'il en fut surnommé Calamoboas, qui est autant à dire comme, grand criant par escript: car ainsi celle façon de combattre à l'ombre, & de deuifer à part en secret, retirant ces grands causeurs tous les iours peu à peu de la frequence & multitude du peuple, les pourra à la fin rendre plus compaignables & plus tolerables à hanter: comme les chiens, apres qu'ils ont consumé leur cholere sur les bastons ou sur les pierres qu'on leur a iettez, en sont moins aigres & moins aspres aux hommes. Mais sur tout il leur seroit expedient & profitable, de hāter toufiours aupres de plus grands personnages en autorité & en aage, que eux: car la honte

A honte & crainte qu'ils auroient de leur dignité & grauité, les conduiroit par accoustumance à se taire : & parmy ces exercices que nous auons cy deuant declarez, il faudra tousiours meller & entre-laisser ceste aduertance, quand nous voudrons dire quelque chose, & que quelques paroles nous couleront en la bouche, Quel propos est-ce cy qui me vient sur la langue, & qui me presse de sortir? pourquoy a ma langue enuie de le mettre dehors? Quel bien peut-il aduenir de le dire? quel mal aduiendroit-il de le taire? pour ce que la parol n'est pas comme vne pesante charge de laquelle nous deuions tascher de nous descharger : car elle demeure encore aussi bien apres qu'elle est ditte. Mais les hommes parlent, ou pour soy, quand ils ont besoing de quelque chose, ou pour profiter à d'autres, ou pour se donner du plaisir les vns aux autres, & se recreer de ioyeux deuils, comme de sel, pour addoucir le trauail des affaires, ou bien pour rendre plus sauoureux le repos auquel ils seront. Si donc le propos n'est ny profitable à celuy qui le dit, ny necessaire à celuy qui l'escoute, & fil n'y a ny grace ny plaisir, quel besoing est-il qu'il soit dit? car on peut aussi bien parler cōme faire en vain & sans besoing. Mais sur tout & apres tout, il faut tousiours auoir à main & souuent rememorer ce sage mot de Simonides, On se repent souuent d'auoir parlé, de festre
 „ teu, jamais : & penser que l'exercitation est chose de si grande efficace & de telle force, qu'elle vient à chef de tout : attendu mesmement que les hommes mettent grande peine & grande sollicitude, & endurent de la douleur pour chasser la toux, & le hoccquet : & la taciturnité n'a pas seulement ceste belle & bonne propriété que dit Hippocrates, qu'elle n'engendre point la soif, mais aussi n'apporte-elle point de desplaisir ny de douleur, & n'est-on point tenu d'en rendre compte.

De l'auarice & conuoitise d'auoir.

C



IPPOMACHV S maistre des exercices du corps, oyant quelques vns qui luy louoient vn homme grand & de haulte stature, qui auoit les mains longues, comme estant bien propre pour l'escrime des poings: ouy bien, dit-il, si la couronne, le pris du vainqueur, estoit penduë en hault lieu, où il la falust prendre avec la main. Cela mesme peult on dire à ceux qui estiment tant, & reputent si grand heur, que d'auoir force belles terres, force grandes maisons, & grosses sommes de deniers comptans: ouy bien, si il falloit acheter la felicité qui fust à vendre: & toutesfois vous en verrez plusieurs qui aiment mieux estre riches & malheureux, que bien-heureux en donnant de leur argent : mais le repos de l'esprit vuide de tout ennuy, la magnanimité, la constance, l'assurance, la suffisance ne s'achette point à pris d'argent. Pour estre riche on n'apprent pas à ne se passionner point des richesses, ny pour posseder beaucoup de choses superflües, on n'acquiert pas le contentement de ne les point desirer. De quel autre mal doncques est-ce que nous deliure la richesse, si elle ne nous deliure point de l'auarice? Par boire on remedie à la cupidité de boire, par manger on guarit l'appetit de manger : & celuy qui dit,

A Hipponax donnez vn vestement,

Car de froidure il gele durement,

qui luy en ietteroit sur luy plusieurs, il s'en fescheroit & les reietteroit : là où il n'y a quantité d'or ny d'argent qui puisse esteindre l'ardeur du desir d'auoir, ny l'auarice ne cesse ny ne diminuë point pour posseder beaucoup de biens. Et peut on dire

De l'auarice & conuoitise d'auoir.

à la richesse ce que lon diroit à vn mauuais medecin,

E

Ta medecine à celuy qui la prend

Sa maladie augmentee luy rend:

car depuis qu'elle prent vn homme, au lieu qu'il n'auoit besoing que de pain, de maison, & de couuerture moyenne, & de peu de viande, la premiere venuë, elle le remplit d'une impatiente cupidité d'or, d'argent, d'yuoire, d'esmeraudes, de cheuaux & de chiens, transportant le desir naturel des choses necessaires en vn appetit desordonné de choses perilleuses, rares, & mal-aisees à recouurer: car iamais homme n'est pauvre des choses qui suffisent à la nature, ny iamais il n'emprunte argent à vsure pour acheter de la farine, ou du fourmage, ou du pain, ou des oliues: mais l'un s'endebte pour bastir vne maison magnifique, l'autre pour acheter vn champ d'oliuiers qui ioinct à sa terre, ou bien des terres à froment, ou des vignes, ou des mules de Galatie, ou

Homere au
15. de l'Iliade.

De beaux rouffins ensemble au collier duits

Pour entrainer coches menans grands bruits,

F

s'est precipité en vne fondriere de contracts, d'vsures, & d'hypotheques: & puis comme ceux qui boient apres qu'ils n'ont plus de soif, ou qui mangent apres qu'ils n'ont plus de faim, ils reuomissent tout ce qu'ils ont beu ayans soif, & tout ce qu'ils ont mangé aiâs faim: aussi ceux qui appétent les choses inutiles & superflues, ne retiennent pas celles mesmes qui sont necessaires. Voyla quels sont ceux-là. Mais ceux qui ne despendent rien & ont beaucoup, & si desirent encore d'auantage, sont bien encore plus à esmerveiller, qui voudra rememorer ce que souloit dire Aristippus, que celuy qui mange beaucoup, qui boit beaucoup, & iamais n'est soul, s'en va aux medecins, & leur demande quelle maladie c'est, & quelle indisposition, & le moyen qu'il doit tenir pour s'en deliurer: mais si vn qui a cinq beaux liëts en demande dix, & qui a dix tables, en achete encore autres dix, & qui a beaucoup de terres & possessions, & beaucoup d'argent, & n'en est de rien plus plein, ains s'estend encore à en prochasser d'autres, & veille apres, & de tout ne se remplit iamais, celuy-là ne pense-il pas auoir besoing de medecin qui le guarisse, & qui luy montre de quelle cause cela luy aduient? Et toutefois on pourroit penser, que de ceux qui ont soif, celuy qui n'a point beu sera deliuré de sa soif apres qu'il aura beu: mais celuy qui boit tousiours, & iamais ne cesse d'auoir soif, nous n'estimons pas qu'il ait besoing de se remplir, ains plustost de se vuidier & purger, & luy ordonnons qu'il vomisse, comme n'estant pas trauaillé d'aucun default, mais plustost de quelque chaleur ou acrimonie contre nature, qui est en luy. Aussi entre ceux qui acquierent, le necessiteux & indigent cessera de se trauailler pour acquerir, si tost qu'il aura acheté vne maison, ou qu'il aura trouué vn thresor, ou que quelque amy l'aura secouru d'aucune somme de deniers dont il se fera acquitté enuers l'vsurier: mais celuy qui en a plus qu'il ne luy en fault, & en appéte encore d'auantage, ce ne sera point l'or ny l'argent qui le guarira, ny les cheuaux, ny les moutons, ny les boeufs, il a besoing de se vuidier & de se purger: car ce n'est point pauureté que sa maladie, ains auarice & cupidité insatiable, pour vn faulx iugement & vne peruerse opiniõ qu'il a prise: laquelle si elle ne luy est arrachée de l'ame, comme ce que lon aualle de trauers, il ne cessera iamais de souhaitter choses superflues, c'est à dire de conuoitter ce dont il n'a que faire. Quand le medecin entrant en la chambre d'un patient, qu'il trouue couché de son long dedans vn liëst gemissant, & ne voulant ny boire ny manger, il luy touche & taste le poulx, il l'interroque, & trouue qu'il n'a point de fiebure, C'est maladie de l'ame, dit-il: & s'en va. Aussi quand nous verrons vn homme qui seche sur le pied d'ardeur d'acquerir, qui pleure quand il luy fault despendre vn denier, qui n'espargne, ny ne pardonne à peine ny à indignité quelconque, prouueu qu'il en vienne du profit, encore qu'il ait force maisons, force terres, force troupeaux de bestes, grand nombre d'esclaves & d'habillemens, que dirons nous quelle maladie a cest hõme-là, sinon vne pauureté

G

H

De l'auarice & conuoitise d'auoir.

A pauvreté de l'ame ? Car quant à la pauvreté de biens, vn amy, comme dit Menander, en peult guarir, en luy faisant du bien : mais celle de l'ame tout tant qu'il y a d'hommes au monde, ou qui y ont iamais esté, ne la rempliroient pas : & pourtant a bien dit Solon d'eux,

Les hommes n'ont fin quelconque ne terme
A leur desir d'enrichir, qui soit ferme.

Car à ceux qui sont sages, & ont sain iugement, nature leur a definy certaines bornes de richesses, qui sont traſſées sur vn certain centre, & sur la circonference de leur necessité : mais cela est propre & peculier à l'auarice, car c'est vne cupidité qui repugne à son assouissement, là où toutes autres cupiditez y aydent : car iamais gourmand ne s'absteint d'un bon morceau pour gourmandise, ny yurongne de bon vin pour yurongnerie, comme les auaricieux s'abstiennent de toucher à l'argent, pour leur auarice & conuoitise d'argent : & toutefois comment ne seroit-ce vne passion furieuse & miserable,

B si quelqu'un s'abstenoit de se couvrir d'un vestement pour ce qu'il trembleroit de froid, & de toucher à du pain pour ce qu'il mourroit de faim, & aussi de mettre la main à ses biens, pour ce qu'il les aimeroit ? Ce sont proprement les maux que décrit Thrasionides en vne Comédie,

Elle est chez moy, & est en ma puissance
Quand il me plaist en prendre iouissance,
Et si le veux autant comme ſçauroit
Celuy qui plus follement aimeroit,
Et toutefois ie n'en fais iamais rien :

Ains en fermant & ſcellant tout tres-bien,
Ie compte à ceux qui mènent mon vsure,
A mes ſacteurs, ie trauaille & procure

C D'en amasser d'autre, à mes creanciers,
Touſiours ie plaide à mes ſerfs & cenſiers.

O Apollon, cogneus tu amour doncques

Plus que le mien malheureux & fol oncques ?

Sophocles enquis par quelqu'un de ſes familiers, ſil pouuoit bien encore auoir compagnie de femme : Dieu m'en gard', dit-il, mon amy, i'en ſuis deſormais libre, eſtant eſchappé de la ſeruitude de tels furieux & forſenez maîtres, par le benefice de la vieillesse. Aussi est-ce chose honneſte en voluptez, d'en quitter les deſirs qu'ad on en a perdu la puissance, encore qu'Alceus die, que iamais ny homme ny femme ne ſ'en peuvent guarantir. Mais cela n'est pas en l'auarice, car comme vne rude & mauuaife maistresse, elle contrainct d'acquérir, & defend de iouir : elle en excite l'appetit, & en oſte le plaifir. Stratonicus anciennement ſe mocquoit de la ſuperfluité des Rhodiés, diſant qu'ils baſtiſſoient comme ſils euſſent eſté immortels, & ruoyent en cuyſine comme ſils euſſent eu bien peu de temps à viure : mais les auaricieux acquierent comme magnifiques, & deſpendent comme mechaniques : ils endurent les trauaux d'acquérir, & n'ont pas le plaifir d'en iouir. L'orateur Demades vint vn iour voir Phocion, & le trouua à table où il diſnoit : & voyant comme il ſe traittoit petitement & auſterement, il luy dit : Ie m'eſbahis, Phocion, comme te pouuant paſſer d'un ſi maigre diſner, tu prens la peine de t'entremettre des affaires publiques. Car quant à Demades, il ſ'en meſſoit pour auoir dequoy fournir à ſon ventre : & penſant que la ville d'Athenes ne luy eſtoit pas ſuffiſant reuenu pour entretenir ſon intemperance & diſſolution, encore tiroit-il viures de la Macedoine : Et pourtant Antipater vn iour le voyant ja tout vieux & caſſé, dit plaifamment, qu'il ne luy eſtoit demouré que le ventre & la langue, comme d'un mouton qui a eſté mangé en vn ſacrifice. Mais de toy miſerable qui eſt-ce qui ne ſ'eſmerueilleroit ? commét, veu que tu peux ainſi viure

De l'avarice & conuoitise d'auoir.

mechaniquement & inhumainement, sans donner rien à personne, sans te monstrier E
honneste ny liberal à tes amis, ny magnifique enuers le public, tu t'affliges ainsi du-
rement, tu veilles les nuits toutes entieres, tu trauailles comme vn mercenaire pour
de l'argent, tu caresses vn chascun pour estre institué heritier, tu te soubmets à tout le
monde pour gagner, & si as vne si orde tacquinerie de chicheté en toy, qu'elle
te pourroit dispenser de rien faire. Lon dit qu'un Byzantin ayant surpris vn adulte-
re sur le faict avec sa femme qui estoit fort laide, s'escria, O miserable, quelle necessi-
té te contraignoit? car le douaire a forcé Sapradoras: mais toy mal-heureux tu brouil-
les la chaudiere, & attizes le feu dessous. Il est necessaire que les Roys amassent, F
les gouuerneurs des Roys, ceulx qui veulent tenir les premiers lieux, & auoir les grâds
estats es grosses citez, à tous ceux-là il est force de faire amas de deniers, d'autant
que pour paruenir à leur ambition, ou pour la pompe, ou leur vaine gloire, ils font
des festins, ils donnent à leurs satellites, ils enuoyent des presents, ils entretiennent
des armées, ils achettent des esclaves pour escrimer à outrance: mais toy tu te don-
nes tant d'affaires, tu te tourmentes, tu te tourneboulles comme vne toupie, pour
viure la vie d'une ouytre ou d'une coquille, tant tu es tacquin & mechanique: tu
supportes tous trauaulx, & ne prens plaisir quelconque, non plus que l'asne des
estuues, qui porte tousiours le bois & le serment pour chauffer les estuues, & de-
meure tousiours cendieux & enfumé, sans iamais estre baigné, laué, chauffé, ny net-
toyé. Et quant à ces reproches-là, c'est à l'encontre de celle miserable avarice tacqui-
ne d'asne ou de formis: car il y en a vne autre sorte bestiale & farouche, qui ca-
lornie, qui suppose de faux testaments, qui trompe, qui se fourre par tout, & se mes-
le de tout, qui compte sur ses doigts combien il y a de ses amis **encore** viuans, & puis
ne reçoit fruition quelconque de tous les biens qu'elle amasse de tous costez par tant
d'artifices. Tout ainsi doncques comme nous auons en haine & abomination les
viperes, les mousches cantharides, & les tarantules, plus que les ours ny les lions, d'au-
tant qu'elles tuent & font mourir les hommes, sans qu'elles s'en seruent apres qu'el- G
les les ont tuez: aussi sont plus dignes d'estre haïs ceux qui sont meschans par avarice
& tacquinerie, que ceux qui le sont par intemperance & dissolution, car ils ostent
aux autres ce dont ils ne voudroient ny ne sçauoient vser eux-mesmes: d'où vient
que ceux-là font trefues de violence quand ils se voyent en abondance de toutes cho-
ses, pour fournir à leurs desordonnez appetits, comme respondit Demosthenes à
ceux qui estimoient que Demades vouldust désormais cesser d'estre meschant: C'est,
dit-il, pource qu'il est saoul maintenant, comme les lions ne chassent plus la proye
quand ils sont pleins: mais ceux qui s'entremettent du gouuernement de la chose
publique, non pour aucune intention qui soit ny **utile** ny **plaisante**, ceulx-là n'ont
iamais trefue d'amasser & d'acquérir, ny surseance de mal faire: car ils sont tous-
iours vuydes, & ne seroient pas contents quand ils auroient tout. Mais, pourra
dire quelqu'un, ils amassent & gardent pour leurs enfans ou pour leurs heritiers. H
Comment est-il vraysemblable cela, veu qu'ils ne leur voudroient pas rien don-
ner, tant qu'ils sont en vie? Ils sont doncques comme les rats & souris qui sont
es minieres où lon fouille l'or, car ils mangent la mine d'or, & n'en peult-on rien
tirer, sinon apres qu'ils sont morts, & que l'on en fait anatomie. Mais pourquoy
est-ce qu'ils veulent ainsi garder beaucoup d'argent & de grandes facultez à leurs en-
fans, ou à leurs successeurs & heritiers? à fin, ie croy, que ces enfans & ces heritiers-là
les gardent aussi encore à d'autres, & ainsi de main en main, comme les canaux &
tuyaux de terre cuiète, qui ne retiennent rien de l'eau coulante pour eux, ains la
transmettent & enuoyent toute, chascun à son prochain voisin, iusques à ce qu'il
vient de dehors vn calōniateur, ou vn tyran, qui destruisant ce depositaire gardien,
& le quassant, deriue & destourne le cours de ceste richesse ailleurs: ou bien iusques à
ce qu'il

A ce qu'il en vient vn, le plus meschant de toute la race, comme lon dit communément, tout ce que les autres auront amassé & gardé. Car non seulement,

Toufiours en tout, des esclaués mal nez

Les enfans sont pis conditionnez,

cōme disoit Euripides : mais aussi ceulx des chiches auaricieux, sont dissolus & desordonnez : ainsi que dit vn iour Diogenes en se mocquant, Qu'il valoit mieux estre le mouton que le fils d'un Megarien : car en ce qu'il semble qu'ils les instruisent, ils les gastent & corrompent, en leur entant leur chicheté & auarice mechanique, comme fils bastissoient en eux vne forte place pour seurement garder leur hoirie & succession. Car quels aduertissemens & enseignemens sont-ce qu'ils leur dōnent? Gaignez, espar-gnez, & pensez que lon fera autant de cas de vous, comme vous aurez de bien vail-lant: mais cela n'est pas instruire vn enfant, ains l'estressir & le coudre comme vne bouge ou vne bourse, à fin qu'il puisse bien contenir ce que lon iette dedans : excepté

B qu'il y a difference, parce que la bourse deuient salle, & orde, & mal-sentant, quand on a mis de l'argent dedans : mais les enfans des auaricieux, auant qu'ils ayent receu de leurs peres & meres la richesse, sont ja tous remplis de conuoitise d'icelle, laquelle ils ont apprise d'eux, aussi leur rendent-ils digne salaire de leur escholage, en ce qu'ils ne les aiment pas tant, pource qu'ils sont certains d'amender beaucoup d'eux, qu'ils les haïssent, pource qu'ils ne le tiennent pas encore : car ayans esté ainsi nourris, qu'ils n'ont appris à rien estimer sinon les biens & la richesse, & ne se constituer autre fruit à leur vie, sinon le beaucoup amasser, & beaucoup posseder, ils reputent que la vie de leurs peres & meres empesche la leur, & qu'autant de temps qu'il s'adiouste à la vieillesse d'eux, autant s'en oste-il à leur ieunesse. C'est pourquoy pendant que leurs peres viuent, encore desrobent-ils secrettement vn peu de la volupté, & iouissent aucu-nement du plaisir de donner, leur semblant que c'est de l'autrui qu'ils donnent à leurs

C amis, & qu'ils despendent à leurs plaisirs, quand ils peuuent tirer quelque chose de deffoubs l'aile à leurs peres, d'autant qu'allans ouïr les leçons, ils apprennent quelque chose : Mais quand apres le trespas de leurs peres ils viennent à auoir les clefs & les cachets, ils prennent toute vne autre façon de viure, vn visage refrongné, qui ne rit ia-mais, austere, mal-gracieux & mal-accoïtable. Il n'est plus question de fhuyler, de iouer à la paume, de luieter, d'aller ouïr les philosophes au parc de l'Academie, ou en celuy de Lyceum, mais d'interroguer des seruiteurs, de regarder des papiers, de disputer avec des receueurs & des creanciers, estres si aspre à la besongne & au soing des affaires, que lon en perd le disner, & n'entre lon aux bains pour s'estuuer auât sou-per qu'il ne soit nuit toute noire : les exercices de la personne ausquels il auoit esté nourry, se baigner en la riuere de Dirce, tout cela est mis en arriere : voire que si quel-qu'un luy dit, Voulez-vous pas aller ouïr la harangue d'un tel philosophe? Commēt y irois-je, respondra-il : ie n'ay pas le loisir, depuis que mon pere est mort. O mise-

D rable, que t'a-il laissé qui vaille ce qu'il t'a osté, c'est à sçauoir le repos & la liberté? Mais ce n'est pas tant luy, comme c'est sa richesse respanduë alentour de toy, qui te domine, & te tient le pied sur la gorge, comme celle femme que disoit Hesiodé,

Qui l'homme ardant sans torche ne tison,

Auant le temps le rend vieil & grison,

apportant comme des rides & des cheueux blancs à ton ame auant qu'il en soit temps, les soucis, les trauaux & ennuis de l'avarice, qui suffoquent & amortissent toute la gentillesse, la gayeté, l'honnesteté & courtoisie qui y deuit estre. Mais quoy, dira quelqu'un, n'en voyez-vous pas aucuns qui vsent largement & liberalement de leurs biens? mais nous luy respondrons, n'oyez-vous pas Aristote qui dit, que les vns n'en vsent point, & les autres en abusent, là où il ne fault ny l'un ny l'autre : car la richesse ne fait à ceux-là ny profit ny honneur, & à ceux-cy elle apporte honte & dommage.

Au poëme
intitulé Les
ceures.

De l'avarice & convoitise d'auoir.

Mais considerons vn petit quel est l'usage de ces richesses que lon estime tant, n'est-ce E pas pour auoir les choses qui sont necessaires à la nature? ceulx doncques qui sont bien riches n'ont rien d'auantage que ceux qui ont dequoy mediocrement: & est la richesse, comme disoit Theophraste, telle que lon ne la deust pas desrober à la verité, ny en faire si grand cas, si est ainsi que Callias le plus riche homme d'Athenes, & Ismenias le plus opulent de Thebes, vsoient des mesmes choses que faisoient Socrates & Epaminondas. Car ainsi comme Agathon renuoya les fleutes au festin des Dames, estimant qu'à celuy des hommes suffisoient les propos & deuils des assistans: ainsi pourriez vous reietter & les liëts de pourpre, & les tables sumptueuses, & toutes autres choses superflues, voiant que les riches vsent des mesmes choses que font les pauvres,

Hesiod. au
liure intitulé
Les oeuvres.

Le labourage on ne delaisseroit,

Et la charrue aussi ne cesseroit:

mais bien les orfeures, les graueurs, les parfumeurs & les cuisiniers seroient chassiez, quand on feroit vn sobre & honneste bannissement de toutes choses inutiles: & si est ainsi que les choses requises à la nature soient communes & aux riches & à ceux F qui ne sont pas riches, & que la richesse se magnifie & se vante des choses seulement superflues: & qu'à bon droit on a loué Scopas le Theffalien, de ce qu'estant requis de donner quelques vtenfiles de sa maison, comme luy estans superflues & inutiles, il respondit, Et c'est en quoy on nous repute bien-heureux & bien-fortunez, qu'en ces choses-là superflues, non pas és autres qui sont necessaires. si est ainsi, dis-ie, voyez que ce ne soit la pompe, l'apparence & les ieux de bastellerie que lon louë, en faisant tant de cas des richesses, & non pas la necessité de la vie. La procession & solennité des Bacchanales qui se fait en nostre pais, se faisoit anciennement fort simplement & ioyeusement: on y portoit vne cruchee de vin, vn cep de vigne, & puis quelqu'un y trainoit vn bouc, vn autre y portoit vne corbeille pleine de figes seiches, puis apres tout on y portoit vn Phalus, qui est la semblance de la nature d'un homme: mais maintenant tout cela y est obscurcy & negligé, tant on y porte de vaif- G felle d'or & d'argent, d'habits sumptueux, tant de chariots trainez par beaux rouffins, tant de masques: & ainsi ce qui y est vtile & necessaire en la richesse, est offusqué & comblé par ce qui y est superflu & inutile. Mais nous autres pour la plus part ressemblons à Telemachus, lequel par faute d'experience, ou bien plus tost à faute de iugement, aiant veu la maison de Nestor, où il y auoit des liëts, des tables, des habillements de la tapisserie, de bon vin, ne iugea point bien-heureux le maistre de ceste maison qui auoit si bonne prouision de choses vtils & necessaires: mais chez Menelaus aiant veu force yuoire, force or, & argent, il en fut tout rauy en ecstase d'admiration, & dit,

Odyss. l. 3.
& 4.

Tel au dedans est le Palais doré

De Iupiter au haut ciel azuré,

Tant icy a d'infinie opulence,

Rauy ie suis de la seule euidence.

H

Mais Socrates ou bien Diogenes eussent dit, Tant icy a de choses malheureuses, inutiles, folles & vaines, ie me ris d'en auoir l'euidence. Que dis tu pauvre sot, là où tu deuois oster à ta femme la pourpre, & tous ses ioyaux & affiquets, à fin qu'elle ne fust plus convoiteuse des delices & superfluites estrangeres, tu vais au contraire embellir & orner ta maison, comme vn theatre ou vn eschaffaut à iouer des ieux, pour ceux qui y entrent. Voila en quoy gist la beatitude & felicité de la richesse qui a besoing de spectateurs & de tesmoins, à qui il en faut faire monstre: autrement ce n'est rien. Mais il n'est pas ainsi de la temperance, de la philosophie, de la creance & cognoissance des Dieux, telle qu'il appartient, encore qu'elle soit incogneue à tous autres, elle a tousiours sa lumiere, & sa splendeur propre dont elle esclaire l'ame, tousiours

A toujours accompagnée d'une ioye qui iamais ne l'abandonne de iouir de son bien, soit que quelqu'un le sçache, ou qu'il soit incognu aux Dieux & à tous les hommes. Voyla que c'est de la vertu, de la verité & beauté des sciéces, comme de la Geometrie, & de l'Astrologie, à quoy il ne fault pas comparer les bagues, carquans & colliers, de la richesse, qui ne sont que spectacles, & parements de femmelettes. S'il n'y a personne qui la contemple & qui la regarde, la richesse à la verité est aveugle, & ne rend clarté aucune. Car si l'homme riche mange à part avec sa femme & quelques uns de ses familiers, il ne se travaillera d'auoir des mets exquis, table friande, ny vaisselle doree, ains se seruira de la premiere trouuee: sa femme ne sera point parée de ioyaux d'or, ny de robe de pourpre, ains en son simple accoustrement aupres de luy. Mais quand il fait vn festin, c'est à dire, quand le theatre, la pompe, le spectacle s'assemble, c'est à dire, que les ieux de la richesse se iouent, alors on tire des nauires les beaux flascons, on met en auant les riches tables, on accoustre les lampes d'argent, on fait

B escurer les coupes, on change les eschançons, on reuest tout le monde, on remue toutes choses, l'or, l'argent, les pierres precieuses: brief on declare simplement que l'on est riche: mais encore qu'il souppast seul, il auroit besoing de temperance & de contentement.

De l'amour & charité naturelle des peres &

MERES ENVERS LEURS ENFANS.

C E qui fait que les Grecs premierement se remirent de leurs differents à des iuges estrangers, & introduisirent en leurs pais des appellations foraines, fut la defiance qu'ils eurent de la iustice les uns des autres, comme estant la iustice chose necessaire à la vie humaine, mais qui ne croissoit point chez eux: N'est-il point ainsi de quelques questions de philosophie, lesquelles iceux philosophes, pour la diuersité d'opinions qui est entre eux, euocquent à la nature des bestes brutes, comme à une ville estrangere, & en remettent la decision & le iugement à leurs passions & affections naturelles, comme n'estans point sujettes à faueur, ny à corruption ne concussion? Ou bien, est-ce point vn commun reproche à la malice des hommes, qu'il faille que nous estans en different des plus grandes & plus necessaires choses de la vie humaine, allions chercher au naturel des cheuaux, des chiens & des oyseaux, comment nous nous deuons marier, comment nous deuons engendrer, & comment nous deuons nourrir & esleuer nos enfans? & comme si la

D nature n'en auoit imprimé aucun indice en nous mesmes, alleguer les mœurs & les affections des bestes brutes, & les produire en tesmoignage, pour monstrier le desbordement & dereglement de la vie des hommes, qui des le commencement & à la premiere entree se sont embrouilleez & confondus: Car la nature retient & garde mieux en icelles bestes brutes ce qui luy est propre, simple & entier, sans le corrompre ny alterer d'aucune meslange estrangere: là où au contraire, il semble que les hommes en ont fait comme les parfumeurs font de l'huile, par accoustumance & par le discours de leurs raisons, ils y ont meslé tant d'opinions & tant d'aduis adioustez de dehors, qu'elle en est deuenue variable & particuliere à chascun, & n'a point retenu ce qui luy estoit propre & peculier. Et ne deuons pas trouuer estrange si les bestes brutes suiuent mieux & de plus pres la nature, que ne font pas les raisonnables, car les plantes mesmes la suiuent encore mieux que les bestes, quoy que nature ne leur ait donné ny

De l'amour & charité naturelle.

imagination, ny affection ou inclination aucune : aussi n'ont elles desir ny conuoir- E
rife quelconque, qui branle ny sorte hors de leur naturel, ains demeurent, & sont ar-
restees, comme si elles estoient attachees aux ceps en quelque prison, cheminans touf-
iours par vn mesme chemin, à sçauoir celui auquel nature les conduit. Et quant aux
bestes brutes, elles n'ont pas ny beaucoup de discours de raison qui addoucit les
mœurs, ny beaucoup de subtilité d'entendement, ny fort grand desir de liberté, mais
bien ont elles des instincts, inclinations & appetitions non regies par raison, suiuant
lesquelles elles s'en vont quelquefois au haut & au loing, & courent, ça & là, mais non
pas toutefois fort loing : ne plus ne moins que la nauire qui est à l'ancre, à la rade,
branle bien, mais elle ne court pas fortune : aussi elles ne s'esloignent pas gueres de la
nature, & pourtant monstrent elles la droite voye, comme cheminans sous le mors
& la bride : là où la raison maistresse, & qui fait à son plaisir, en l'homme trouuant tan-
tost vne diuersion, tâtost vne autre, & tousiours quelque nouuelleté, n'y laisse aucune
apparente ne manifeste trasse de la nature. Voyez premierement les mariages des F
bestes, comment elles suiuent en cela la nature. En premier lieu, elles ne se soucient
point des loix, qui punissent ceux qui ne se marient point, ou qui se marient trop tard,
comme font les citoyens de Lycurgus & de Solon, ny ne craignent point les infamies
de ceux qui n'ont point d'enfans, ny ne poursuient aussi point les honneurs & prero-
gatiues de ceux qui en ont trois : comme plusieurs Romains se marient, prennent
femmes & engendrent des enfans, non à fin qu'ils aient des heritiers, mais à fin qu'eux
mesmes puissent estre instituez heritiers : & puis le male se melle avec sa femelle, non
point en tout temps, d'autant que la fin de ceste conionction & mixtion n'est point
la volupté, ains la generation des enfans : à l'occasion dequoy sur la prime vere, lors
que les gracieux vents aptes à engendrer souspirent, & que la temperance de l'air est
fort à propos pour les femelles grosses, la femelle s'approche du male toute priuee,
& poulsee de son propre instinct, se rendant agreable à sa partie, tant pour la douce
senteur de sa chair, que pour le propre & peculier ornement de son corps, estant tout G
plein de rosee & de verdure, toute nette & pure : puis quand elle s'apperçoit d'estre
enceinte, elle se retire honnestement, & s'en va penser & prouoir à ce qui est neces-
saire, tant pour son accouchement, que pour la nourriture & traitement du petit
qu'elle fera : Et certes il n'est pas possible de bien exprimer dignement, & deduire suffi-
samment les choses qu'elles font, sinon que tout se fait avec vne grande amour & di-
lection enuers leurs petits, en preuoyance, en patience, & en tolerance de tous labeurs.
Mais nous appellons l'abeille sage, & la celebrons comme celle qui produit le roux
miel, en flatant ainsi la douceur d'iceluy miel, qui nous agree, & nous chatouille
sur la langue, & ce pendant nous laissons derriere la sapience & l'artifice des autres
animaux, tant en l'enfantement de leurs petits, qu'en la nourriture d'iceux : comme
tout premierement l'oiseau de mer, que lon nomme Alcyone, laquelle se sentant
pleine compose son nid, amassant les arrestes du poisson que lon appelle l'aiguille de H
mer, & les entre-lassant l'une parmy l'autre, & tissant en long les vnes avec les autres
en forme ronde & longue, comme est vn verueu de pescheur, & l'ayant bien dili-
gemment lié & fortifié par la liaison & fermeté de ces arrestes, elle le va exposer au
battement du flot de la mer, à fin qu'estant battu tout bellement, & pressé, la tissure
de la superficie en soit plus dure & plus solide, comme il se fait : car il deuient si ferme,
que lon ne le sçauoit fendre avec fer ny avec pierre : & qui est encore plus esmeruil-
lable, l'ouuerture & embouscheure dudit nid est si proportionnéement composee à
la mesure du corps de l'Alcyone, que nul autre ny plus grand ny plus petit oiseau ny
peut entrer, non pas la mer mesme, comme lon dit, ny la moindre chose du monde.
Mais ceste charité se monstre encore d'auantage es chiens de mer, lesquels font leurs
petits tous vifs au dedans de leur ventre, & leur donnent moien d'en sortir, & d'aller
courir

A courir pour trouver à se paistre, & puis derechef les reçoivent, les enuoloppent & mettent coucher dedans leurs matrices. Et l'ourse qui est l'une des plus sauvages & plus farouches bestes du monde, enfante ses petits sans forme ne figure de membres quelconques, mais elle forme avec sa langue, ne plus ne moins qu'avec un ciseau ou autre outil, les taye, tellement qu'elle n'enfante pas seulement ses petits hors de son ventre, mais elle les taille, & leur donne la forme. Et le lion que décrit Homere,

Lequel menant ses petits chercher proye
Par la forest, rencontre emmy sa voye
Quelques veneurs, & alors furieux
Il couvre tout des paupieres ses yeux :

Iliad. liu. 17.

ne vous est il pas aduis, qu'il semble qu'il veuille faire composition avec les veneurs, pour sauuer la vie à ses petits? L'amour & charité enuers les petits rend hardis les animaux qui de leur nature sont couards, & diligents ceux qui sont paresseux, &

B espargnans ceulx qui d'eux mesmes sont goulus. Et comme l'oiseau que décrit Homere,

Qui en son nid porte à sa geniture
Ce peu qu'il peut recouurer de pasture,
Et est content soy mesme mal traiter,
Pour ses petits grassement sustenter.

Iliad. li. 7.

Car de sa disette il nourrit ses petits, & retient avec son bec, en le serrant, la becquee qu'il porte, laquelle touche presque à son gisier, de peur que contre sa volonté il ne l'auale :

Comme la chienne autour de sa portee
Tendrette court aigrement irritée,
En abboyant si fort à l'estrange,
Qu'elle voudroit ce semble le manger.

Odyss. l. 13.

C prenant la crainte qu'elle a que lon ne face mal à ses petits, comme un redoublement de courage. Et les perdrix, quand on les poursuit avec leurs petits perdriaux, elles les laissent voler deuant, & s'en fuir, & affinent tellement les chasseurs, qu'ils s'arrestent à elles, se trainans aupres d'eux, iusques à ce qu'estans tout sur le point d'estre prises, elles s'en courent un petit, & puis s'arrestent de rechef, & s'exposent en si belle prise, que le chasseur se persuade & prend esperance qu'il ne leur faudra pas à ce coup, tant que se mettans ainsi en danger pour sauuer leurs petits, elles attirent les chasseurs bien loing arriere d'eux. Et les poules que nous auons tous les iours deuant les yeux, avec quelle diligence & sollicitude traittent elles leurs poulcins, estendans leurs ailes pour en laisser entrer les uns dessous, & receuans les autres qui leur montent de tous costez sur les espauls, avec un son de voix qui tesmoigne leur ioye & leur amour enuers leurs petits? & si se presente un chien ou un serpent à elles seules, elles en ont grande peur & s'enfuient : mais si elles ont les petits, elles se mettent en defense, & combattent plus asprement que leur puissance ne porte. Et pensons nous que la nature ait imprimé ces affections & passions en ces animaux-là, pour soing qu'elle eust de la posterité des gelines, ou des chiens, ou des ours, & non pour faire honte aux hommes, & nous picquer quand nous venons à discourir en nous mesmes, que ces choses-là sont exemples pour ceulx qui les suivent, & reproches pour ceulx qui n'ont aucun ressentiment d'affection, par lesquels ils accusent la nature humaine, comme si elle seule ne s'affectionnoit point gratuitement, & ne scauroit aimer sinon ce dont elle tire quelque profit? On estime beaucoup es theatres celuy qui dit le premier,

Qui est celuy qui soit tant debonnaire,
Qu'il puisse aimer un autre sans salaire?

cela fait selon Epicurus, que le pere aime le fils, la mere son enfant, les enfans leurs



De l'amour & charité naturelle.

progeniteurs qui les ont engendrez : mais si les animaux pouuoient parler & enten- E
dre la parole , & que lon assemblast en vn commun theatre les bœufs , les che-
uaux , les chiens , & les oyseaux , on confesseroit tout haultement au contraire , que
ny les chienes n'aiment leurs petits chiens pour aucun salaire , ny les iuments leurs
poulains , ny les poules leurs petits poulins , ains les aiment gratuitement , & natu-
rellement , & recognoistralon en toutes leurs passions & affections , que cela est bien
& veritablement dit . Or seroit-il certainement trop infame de dire , que les gene-
rations & conceptions , enfantements , & nourritures des petits , és bestes , soient
actes de nature , & offices gratuits , & au contraire és hommes prests , salaires
& arres donnees pour en tirer apres du profit . Mais ce propos n'est ny verita-
ble ny digne d'estre escouté , car la nature , ainsi comme és plantes sauuages , tel-
les que sont les vignes agrestes , les caprifiques , les oliuastres , engendre ne sçay
quels commencements cruds & imparfaicts de bons & francs fruiçts : aussi a elle
donné aux bestes brutes vne charité enuers leurs petits qui est imparfaite , & ne F
pouuant s'estendre iusques à la iustice , ny passer plus oultre que l'vtilité & le be-
soing : mais au contraire l'homme estant animal raisonnable , né à ciuile société ,
pour obseruer les loix & la iustice , que la nature a mis en ce monde pour seruir &
honorer les Dieux , fonder & regir les citez , & pour y exercer tous offices de beni-
gnité & bonté , elle luy en a baillé de belles , genereuses & fructueuses semences , qui
sont l'amour , la charité & dilection enuers les enfans , suyans les premieres erres des
principes qu'elle en auoit imprimees en la structure & fabrication des corps humains :
car la nature en tout & par tout est exquise , aimant ses enfans , à qui rien ne default
de necessaire , & à qui on ne sçauroit aussi rien oster comme superflu , & qui n'a rien ,
comme fouloit dire Erasistratus , de vain ny de friuole . Car premierement quant à la
generation de l'homme , on ne sçauroit assez dignement exprimer sa prudence : & à
l'aduenture aussi ne seroit-il pas fort honneste de toucher trop diligemment les par- G
ties secretttes , en les appellant par les propres noms , ains vault mieux en les laissant à
part cachees , imaginer en son entendement la dexterité , bien-seance , & propre dispo-
sition de ces naturelles parties-là , tant pour engendrer que pour conceuoir : la seule
confection , departement & distribution du laiçt , est suffisante pour clairement mon-
strer la prouidence & sa diligence , car ce qui demeure de sang superflu apres l'vsage au-
quel il est destiné , flottant par le corps de la femme au reste du temps , se respand çà &
là , & l'appesantit fort pour la foiblesse & petitesse des esprits : mais à certaines reuolu-
tions de iours , chascun mois , nature a accoustumé & appris de luy ouurir certains es-
gouts & conduits par où il se vuide & escoule : en quoy faisant il purge & allège le re-
ste du corps , & rend la matrice , comme vne bonne terre , apte & disposée à receuoir
la charrue & la semence en son temps : mais apres qu'elle a retenu la semence qui y a
pris racine , alors elle se resserre , pource que le nombril , ainsi que dit Democritus , est
comme vne ancre & vn cable au fruiçt conceu , qui l'arreste ferme , & le garde de va- H
guer par la matrice de la mere , alors nature bousche & estouppe les canaux & ruisseaux
des purgations menstruales , & prenant le sang qui y couloit , s'en sert pour nourrir &
arroser l'enfant , qui commence desia à se mouler , & à prendre forme & consistance ,
iusques à ce qu'estant demouré certain nombre de iours necessaires à la croissance
qu'il prend au dedans , il a besoing de sortir de ce lieu-là , pour estre nourry autrement
& en vne autre place . Alors doncques , diuertissant le sang plus dextrement que ne
sçauroit faire nul jardinier ny fontenier son eau , & l'employant à autre vsage , elle a
comme des cisternes ou fontaines toutes prestes à receuoir la liqueur du sang qui y
decoule , non pas sans y rien cooperer , ny sans l'alterer , car en le receuant elles ont
quant-&-quant la force de le cuire & digerer , adoucir & transmuier par vne douce
& gracieuse chaleur de l'esprit naturel , & tendreur delicate & feminine , pour ce que
le tetin

A le tetin au dedans a vne telle temperature & disposition. Si ne se fait pas vne soudaine influxion du laiët, ne n'y a pas des tuyaux qui le versent & respandent tout à coup: mais le tetin s'abboutissant en vne chair pleine de petits canaulx, & qui le coule & passe tout doucement par plusieurs petits pertuits, il exhibe vn petit bout fort aisé à la bouche du petit poupin, qu'il prent fort grand plaisir à toucher & enuclopper de ses léures. Mais pour neant, & sans aucun fruit, auroit la nature vsé de si grande prouoyance, si grand ordre, & telle diligence à preparer ces outils, pour engendrer, nourrir & esleuer l'homme, si quât-&-quant elle n'eust imprimé és cœurs des meres vne charité, amour & dilection soigneuse enuers les fruits qu'elles ont mis sur terre: car,

Des animaux respirans & marchans
Dessus la terre, és villes & aux champs,
Nul n'y en a si malheureux que l'homme.

Iliad. liu. 17.

Qui dira cela du petit enfant qui ne fait que naistre & sortir du ventre de la mere, il ne
B faudra point à dire verité: car il n'y a rien si imparfaict, si indigent de toutes choses, si nud, si difforme, ne si ord & sale à voir, que l'homme, qui le verroit au sortir du ventre de la mere, à sa naissance, attendu qu'il est seul presque à qui la nature n'a pas seulement cōcedé vne pure & nette entree en la lumiere de ceste vie. Car il y entre tout souillé de sang, plein de toute ordure, ressemblant plus tost à vne creature recentemente masfacree & escorchee, que nouuellement nec. Il n'y a personne qui le peust toucher, recueillir, caresser, ny embrasser, sinon celle qui par nature l'aime. Et pourtant nature a fait descendre à bas, sous le ventre, les tettes de tous autres animaux, mais à la femme elle les a attachées à la poitrine, en assiette propre pour pouuoir baiser, embrasser & caresser son enfant, en l'allaitant: voulant par là nous donner à entendre, que l'enfant, nourrir & esleuer, n'ont pas pour leur but aucune vtilité, mais la charité & la dilection. Et qu'il soit ainsi, proposez vous en vostre entendement les femmes du temps passé, qui premieres conceurent, enfanterent, & veirent vn enfant venât de naistre sur
C la terre: il n'y auoit point encore de loy qui leur commandast de nourrir leurs petits, ny aucune esperance de plaisir reciproque, ou prest de nourriture, que les petits leur deussent rendre & rembourser vn iour à l'aduenir: plus tost dirois-ie, qu'elles deuroiēt auoir esté rudes à leurs enfans, pour la souuenance fresche de tant de maux, tant de perils, & de trauaux qu'elles auroient endurez à cause d'eux.

Quand les tenez aspres & douloureux
Viennent saisir en trauail dangereux
La femme grosse, alors sa deliurance
Se fait avec angoisseuse souffrance.

Iliad. li. 17.

Les femmes disent que ce n'a pas esté Homere qui a escrit ces vers là, mais quelque
D Homeride, c'est à dire, quelque femme qui auoit autrefois essayé le trauail d'enfanter, & qui sentoît encore en ses flancs la melle de celle aspre, amere & perceante douleur. Et neantmoins l'amour & la charité naturelle, la plie & la meine tellement, qu'estant encore toute eschauffee de sa douleur, & toute tremblante de l'angoisse de son trauail, elle n'abandonne pas son enfant, ny ne le refuit pas, ains, se retourne vers luy, luy rit, le recueille & l'embrasse, sans qu'elle en recoiue aucun plaisir ny aucune vtilité: ains le recueillant en peine & en labeur, l'enveloppe de langes & de petits drappeaux, pour le tenir chaudement, n'estant pas plus tost sortie du labeur du iour, qu'elle entre en celuy de la nuit: & de tous ces trauaux-là quel loyer, ne quel profit en receuoient-elles ces femmes-là du temps jadis, non plus que celles du present, attendu que les esperances en sont si longues & si incertaines? Celuy qui a labouré la vigne en l'equinoxe du Printemps, la vendange en celuy de l'Automne: qui a semé le blé quand les Pleiades se couchent, il le moissonne quand elles se leuent: les vaches, les iuments, les gelines portent des fruits, dont on peut incontinent

De l'amour & charité naturelle.

en peu de temps tirer du profit : là où de l'homme la nourriture en est laborieuse , la E
croissance tardive & lente, & la vertu longue à venir , de maniere que plusieurs peres
meurent avant que de la voir en leurs enfans. Neocles ne voit jamais la victoire de Sa-
lamine, que gagna son fils Themistocles : ne Miltiades ne voit oncques celle que son
fils Cimon gagna sur la riviere de Eurymedon : Xanthippus n'ouit jamais son fils Pe-
ricles orer devant le peuple , ny jamais Ariston ne voit son fils Platon tenant eschole
de Philosophie : les peres d'Euripides & de Sophocles n'eurent oncques la cognois-
sance des victoires qu'ils emporterent , en faisant reciter leurs Tragédies : ils ne les
ouïrent jamais que gazouiller, & appeler les lettres en leurs premiers ans, ou bien fils
ont vescu d'avantage, ils ont veu en tristesse leurs amours, leurs despenfes à faire mas-
ques & festins, & autres semblables fautes : tellement que lon rememore & remarque
avec louange ce mot seul qu'en dit Euenus en vn sien epigramme,

Voyez combien de douleurs & miseres

Donnent tousiours les enfans à leurs peres.

F

Et neantmoins pour tout cela ils ne laissent jamais à nourrir & esleuer des enfans : &
plus encore ceux qui en ont moins de besoing : car ce seroit vne mocquerie de penser
que les riches sacrifient aux Dieux, & facent de grandes resjouïssances , quand il leur
naist vn enfant, pour ce qu'ils auront qui les nourrira en leur vieillesse , & les ensevelira
apres leur mort : si d'adventure ils n'esleuent des enfans , pour ce qu'ils ne treuvent pas
qui veuillent estre leurs heritiers.

Il n'y a pas de menus grains au sable ,

Ou au poulcier nombre tant incomptable,

Ny des oyseaux chantans diuers ramage

Tant de dubet n'a pas tout le plumage,

comme il y a de ces poursuiuans de successions. Danaus auoit cinquante filles,
mais fil n'en eust point eu, il eut eu des heritiers d'avantage, & bien d'autre sorte. Car
les enfans ne sçauent nul gré à leurs peres , ny ne les seruent ou honorent pas pour G
cela, d'autant qu'ils attendent leur succession, comme chose qui leur est deuë : & au
contraire, vous oyez dire à ces poursuivans qui taschent à s'insinuer en grace des ri-
ches qui n'ont point d'enfans, pour se faire instituer heritiers, des propos & paroles
semblables à celles-cy des poëtes comiques,

O peuple cher estuuez-vous premier,

Et du labeur de iuger coustumier

Reposez vous vne seule iournee,

Desiunez vous à ceste matinee.

Tenez, humez, & auallez cela ,

Emboursez moy ce triobole là.

Ce sont les
paroles fla-
teresses que
Cleon dit au
peuple Athe-
nien ou la
comique des
Cheualiers
d'Antiocha-
nes.

Et ce que Euripide dit, que

Les biens mondains font aux hommes auoir

H

Nombre d'amis , grand credit & pouuoir :

Cela n'est pas simplement & vniuersellement veritable, sinon endroit ceux qui n'ont
point d'enfans. A ceux là les riches mesmes donnent à souper, les Seigneurs les
caressent, les orateurs & aduocats plaident pour eux seuls gratis. C'est vne puissante
chose que vn homme riche, quand on ne sçait point qu'il ait aucun heritier : & y
a eu souuent plusieurs, qui au parauant auoient infinis amis , & estoient honorez
de plusieurs, qui tout aussi tost qu'un fils leur est né, ont perdu tous leurs amis, tout
leur credit & leur suite tout ensemble. Ce n'est doncques point à cause des enfans
que les hommes sont en autorité , & n'est point aussi pour cela que les peres les
aiment , ains toute ceste force là qui les fait aimer depend de la nature, non moins es
hommes que aux animaux : mais quelquefois ceste amour-là naturelle & plusieurs
autres

A autres bonnes qualitez sont aux hommes offusquées par la mauuaistié du vice, qui vient à pulluler auprès, ne plus ne moins que des espines & brossailles bien souuent naissent parmy la bonne semence: autrement il faudroit dire, que les hommes ne faimeroient pas, d'autant que plusieurs se tuent & se precipitent eux mesmes. Oedipus

De doigts sanglants ses paupieres leua,

Et ses deux yeux luy mesme se creua,

Et aussi tost ses iouës furent teinctes

Du sang coulant des prunelles esteinctes.

Hegesias discourant du mespris de la mort, feit que plusieurs des auditeurs qui l'auoiēt ouy s'absteindrent tant de manger, qu'ils se feirent mourir de faim.

Les cas qui des Dieux nous suruiennent

En diuerses sortes aduiennent,

lesquels tous sont comme les autres maladies & passions de l'ame qui transportent
B l'homme hors de son naturel, ainsi comme ils tesmoignent à l'encôtre d'eux-mesmes: car si vne truye aiant fait vn petit cochon vient à le manger, ou si vne chienne aiant fait vn petit chien vient par fortune à le deschirer, il s'en desesperent & s'en tourmentent grandement, ils en font sacrifices aux Dieux pour diuertir les sinistres presages: & reputent cela vn prodige & vn monstre, comme estant chose commune à toutes sortes de creatures, & à quoy nature mesme les conuie, que d'aimer leur geniture. Ce neantmoins, ainsi comme dedans les mines, l'or, encore qu'il soit mellé & enueloppé de force terre, reluit & se fait voir de loing: aussi nature es plus depravees mœurs & passions fait voir la charité enuers les petits: car ce qui fait que les pauures ne nourrissent & n'esleuent pas quelquefois leurs enfans, c'est qu'ils craignent, qu'estans nourris & esleuez moins honnestement qu'il n'appartient, ils ne deuiennent lourdaux & mal appris, destituez de toutes parties requises à personnes d'honneur: & cuidans que pauvreté soit le dernier & plus grand mal de l'homme, ils ne peuuent auoir le cœur de la

C laisser à leurs enfans, estimans que ce soit vn tres-grand & fascheux mal.

Sophocles
en la tragédie
d'Oedipus le Tyrā.

De la pluralité d'amis.

Qu'il n'est pas possible, ny expedient, d'auoir plusieurs amis.



D

SOCRATES demanda vn iour à Menon le Thessalien, qui s'estimoit fort suffisant homme es lettres, &, comme dit Empedocles, Auoir attainct au comble de sagesse, Que c'estoit que vertu. L'autre luy respondit audacieusement & promptement, Qu'il y auoit vertu d'enfant & de vicillard, & d'homme & de femme, & de magistrat & de priué, & de maistre & de vallet. Voyla qui va bien, repliqua Socrates, nous ne te demandions qu'une vertu, & tu nous en remues tout vn exaim, comme d'abeilles. ne coniecturant pas mal, que cest homme ne cognoissoit pas vne vertu, qui en nommoit plusieurs. Mais ne pourroit-on point vser de semblable mocquerie en nostre endroiect, pource que n'aiant pas encore acquis vne seule amitié certaine, nous auons peur que sans y penser nous ne tombions en pluralité d'amis: car il semble que c'est presque tout ainsi que si vn manchot ou vn auetgle auoit peur de deuenir vn Briareus qui auoit cent mains, ou vn Argus qui auoit des yeux par tout le corps. Et toutefois nous louons infiniment le ieune homme qui dit en vne comédie de Menander, qu'il estime vn merueilleusement grand bien & grand heur à vn homme,

Platon au
dialogue de
Menon.

De la pluralité d'amis.

Pensant auoir trouué des biens sans nombre,
Quand d'un amy a peu recouurer l'ombre.

E

Mais vne des causes, entre plusieurs autres, qui nous empesche d'acquiescer vne amitié certaine, c'est que nous conuoytons en auoir plusieurs: ne plus ne moins que les putains & folles femmes qui se prestent souuent à plusieurs hommes, n'en peuuent arrester ny retenir pas vn, pource que les premiers se sentans mesprizez s'en retirent: ou plus tost, ainsi comme le nourrisson de la belle Hypsipyle estant assis dedans vn pré,

Alloit cueillant de main tendrette

Mainte fleurette sur fleurette,

Ne pouuant son cœur enfantin

Rassasier de tel butin:

aussi chascun de nous, pour le desir de nouveauté, & l'inconstance de se saouler incontinent d'une chose, se laisse emporter au nouveau venu & plus freschement congneu, qui nous tourne comme il luy plaist, nous faisant entreprendre plusieurs commencemens ensemble d'amitié & de familiarité, lesquels ne viennent iamais à perfection, d'autant que pour l'amour d'un nouveau que nous poursuuyons, nous laissons aller celuy que nous tenons. Premièrement doncques commençans à la publique renommée de la vie des hommes, ne plus ne moins qu'à la Déesse Vesta, que lon dit en commun prouerbe, qui nous a esté laissée de main en main touchant les constans & parfaicts amis, prenons la longue & ancienne suite des temps pour témoignage, & ensemble pour conseiller de ceste matiere: car de toute ancienneté de memoire vous trouuez ces couples d'amis renommées, Theseus & Pirithous, Achilles & Patroclus, Orestes & Pylades, Pythias & Damon, Epaminondas & Pelopidas. Car l'amitié est bien, par maniere de dire, beste de compagnie, mais non pas de troupe, ne qui veuille estre en foule, comme les estourneaux ou les gays: car estimer l'amy vn autre soy-mesme, & l'appeller *ἑταῖρον* ou *ἑταρον*, cōme qui diroit *ἑτερον*, c'est à dire autre, ce n'est autre chose que mesurer l'amitié au nombre de deux: car on ne peut acquerir ne plusieurs esclaves ny plusieurs amis de peu de monnoye: & quelle est la monnoye d'amitié? c'est beneuolence & plaisir conioinct avec vertu: chose si rare, qu'il n'y en a point de plus en toute la nature, de maniere qu'il n'est possible ny d'aimer ny d'estre aimé en perfection de plusieurs: ains comme les riuieres diuisees en plusieurs canaux & plusieurs ruisseaux, en demeurent basses & foibles: aussi nostre ame, qui est fort nee à aimer, son affection estant departie en plusieurs, s'en affoiblit, & reuiert presques à neant. C'est pourquoy les animaux qui ne font qu'un petit, en ont l'amour plus vehemente: & Homere voulant signifier vn enfant bien aimé, l'appelle *μόδιον* & *τηλόγετον*, c'est à dire unique, & engendré par des pere & mere qui n'ont que celuy-là, sans esperer d'en auoir iamais plus d'autre. Quant est à moy, ie ne voudrois point que l'amy fust seul, mais bien qu'entre tous autres il fust uniquement & tendrement aimé, comme l'enfant que le pere a engendré sur la fin de ses iours, & qu'il eust mangé avec nous le minot de sel que lon dit communement: non pas faire comme plusieurs, qui appellent amis pour auoir beu seulement vne fois ensemble, ou auoir ioué à la paulme, ou aux dez, ou auoir logé en vn mesme logis, amassans ainsi des amitez des hostelleries, ou des ieux de luitte, ou des promenemens par les places des villes. Et quand ils voyent les marins és maisons des riches & puillans hommes, grande tourbe & foule de gens qui leur vont donner le bon iour, leur baiser les mains, & les accompagner au sortir de leurs logis, ils les reputent alors bien-heureux, comme aians beaucoup d'amis: combien qu'ils voyent encore plus grand nombre de mouches en leurs cuyfines: mais ny elles n'y demeurēt point, si la viande y defaut: ny eux, fils n'y sentent plus de profit: pour ce que la vraye & parfaite amitié requiert trois choses, la vertu comme honneste, la conuersation comme

A comme plaisante, & l'utilité comme nécessaire : car il faut recevoir l'amy après l'avoir bien éprouvé, s'esjouir de sa compagnie, & se servir de luy à son besoing, toutes lesquelles choses sont contraires à pluralité d'amis, mesmement celle qui est la principale, c'est le iugement de l'espreuve. Qu'il ne soit ainsi, voyez si est possible de concerter en peu de temps des baladins, & les accoustumer à baller tous d'un branle ensemble, ou des forçats à voguer tous d'une cadence, ou des serviteurs à qui nous nous voulons fier du gouvernement de nos biens, ou de l'institution de nos enfans: tant s'en faut que lon puisse esprouver plusieurs amis qui soient pour se mettre en pourpoint quand & nous, pour combattre toute fortune, & dont chascun soit prest & appareillé,

Te faire part de la bonne fortune,

Et de bon cœur porter ton infortune.

B Car ny les nauires ne se varent point en la mer à tant de tempestes & de tourmentes, ny on ne fiche point tant de paux à l'entour des heritages que lon veult enfermer de pallissade, ny ne clost-on point les ports de iettees & de moles contre tant ny contre tels dangers, comme l'amitié nous promet de refuge & de secours, quand elle est bien éprouvée, & seurement experimentée. Les autres amis qui ne sont pas à l'espreuve de la fortune, ne font que couler, & ceux qui les perdent (ne plus ne moins qu'une faulx monnoye auerée à la touche) gagnent beaucoup,

Ceux qui de tels amis perdent, en rient,

Et qui en ont, de les perdre aux Dieux prient.

Ce qui n'est pas facile, ains fort fascheux à faire, de fuir & deposer vne amitié qui ennuye: ne plus ne moins qu'une viande qui fait mal à l'estomac, & qui fasche, on ne la peut retenir qu'elle ne face desplaisir, & qu'elle n'engendre quelque corruption, ny aussi la rendre telle comme elle y est entrée, ains toute souillée, meslée parmy d'autres humeurs, & toute alterée: aussi un mauvais amy, ou il demeure nous faschant & estant luy mesme fasché, ou il sort par force avec inimitié & malveuillance, ne plus ne moins que la cholere sort de l'estomac quand on vomit. Pourtant ne faut-il pas legerement recevoir, ny s'attacher d'affection facilement aux premiers qui se presentent, ny aimer incontinent ceux qui nous poursuivent d'amitié, ains plus tost faut que nous mesmes poursuivions ceux qui sont dignes d'estre aimez: car il ne faut pas du tout elire ce qui se prend facilement, pour ce que nous passons par dessus la ronce & le gratteron qui s'attache à nous, & la reiettons, là où nous allons chercher l'olive & la vigne: aussi n'est-il pas tousiours expedient d'admettre en nostre familiarité celui qui aisément nous embrasse, ains au contraire nous faut affectueusement embrasser ceux que nous esprouvons utiles, & qui meritent que lon en face compte, ainsi comme respondit iadis le peintre Zeuxis à quelques uns qui l'accusoient de ce qu'il estoit long à faire ses peintures: Je confesse, dit-il, que ie demeure voirement long temps à peindre, mais aussi est-ce pour long temps: aussi celuy garde vne amitié & familiarité longuement, qui a demouré long temps à l'esprouver. Or si n'est pas possible à l'homme d'esprouver beaucoup d'amis, sera-il facile de conuerser ensemble avec plusieurs, ou si sera du tout impossible? Et neantmoins toute la iouissance & la fruition de l'amitié gist en la conuersation, & le plus doux fruct consiste en s'entre frequenter, & hanter ensemble:

Iamais ne faut resolution prendre,

Sans l'avoir fait à ses amis entendre,

comme dit Homere: & en un autre passage, Menelaus parlant d'Ulysses dit,

Rien n'a iamais peu dissoudre en querelle

Nostre amitié & ioye mutuelle,

Deuant la nue obscure de la mort.

Odysses l. 4.

De la pluralité d'amis.

Mais la pluralité d'amis dont nous parlons fait tout le contraire : car l'amitié nous **E**
ferre, nous unit, & nous entraîne par fréquentes & continuelles conuersations, caresses & offices d'amitié,

Ne plus ne moins que la presure rendre

Fait le lait frais se cailler & se prendre,

comme dit Empedocles : car elle desire faire vne telle vnion & incorporation : là où la pluralité d'amis nous separe, nous distrait & diuertit en nous rappelant, & nous transferant de l'un à l'autre, ne permettant pas que la commixtion & le collement de la bienveillance se face par la familiere conuersation espandue & figee, en maniere de dire, à l'entour : & cela quant-&-quant nous apporte vne inégalité & difficulté grande aux offices & seruices, qui sont conuenables entre amis : car ce qui est aisé à l'amitié, deuiet malaisé par ceste pluralité,

En mesme humeur tout homme **ne consent,**

Autrement l'un, autrement l'autre **sent.**

F

d'autant que nos natures ne panchent pas toutes à mesmes inclinations, ny ne sommes pas tousiours enuironnez de semblables aduentures, outre ce que les occasions des temps, ne plus ne moins que les vents, seront propres à quelques actions, & contraires aux autres. Et quand **bien encore** tous les amis desireroient ensemble mesmes seruices de nous, si **seroit-il trop difficile** de pouuoir satisfaire & suffire à tous ceux qui voudroient ou consulter de quelque affaire, ou traicter quelque negoce publique, ou briguer quelque magistrat, ou receuoir & festoyer quelque hoste estrange en leur maison : mais si en vn mesme temps ils viennent à tomber en affaires tous differents, & en toutes diuerses affectiōs, & nous requierent tous ensemble, celui qui veut nautiger, de voyager quād & luy : celui qui est accusé, de luy assister en iugement : celui qui accuse, de le seconder : celui qui achette ou qui vend, de luy aider à mesnager : celui qui se marie, à sacrifier : celui qui fait des funerailles, à mener deuil :

Sophocles
au commandement de la
Tragedie
d'Oedipus le
Tyran.

La cité est pleine d'encensements,

De chants de ioye, & de gémissements.

G

Certes qui a tant d'amis, assister à tous il est du tout impossible : & ne gratifier à nul, il n'y auroit point d'apparence : & en gratifiant à vn en offenser plusieurs, il seroit aussi trop fascheux. Car,

Qui aime bien, ne veut qu'on le mesprise :

& toutefois encore supporte-lon plus patiemment les negligences & oubliances des amis, & reçoit-on avec moins de courroux de telles responses & excuses d'eux, le t'ay oublié : ou, Il ne m'en est pas souuenu. Mais celui qui dit, Je ne vous ay pas assisté en vostre cause, d'autāt que j'assistois à vn autre mien amy, qui auoit aussi vn autre proces : ou, Je ne vous ay pas esté visiter en vostre siebure, pour ce que j'estois empesché au festin **que faisoit vn tel à ses amis** : alleguant pour excuser sa negligēce enuers son amy, sa diligēce enuers d'autres, il ne satisfait pas à la plainte, ains il augmente la ialousie. Mais la plus part des hommes ne regarde seulement qu'à ce, que la pluralité des amitez **H**
leur peut apporter cōmodité du dehors : & ne se soucie pas de ce qu'elle leur doit imprinter au dedans, ne se souuenant pas qu'il faut, que celui qui se sert de plusieurs à son besoing, secoure aussi reciproquement ces plusieurs-là, quand ils auront affaire de luy. Tout ainsi doncques comme si Briareus avec ses cent mains eust emply cinquāte ventres, il n'eust eu rien d'auantage que nous qui avec deux mains en fournissons vn : aussi en la commodité de se seruir de plusieurs amis y a-il l'incommodité, qu'il se faut aussi employer pour plusieurs, se passionner, se trauailler & se tourmenter avec eux. Car il ne faut pas adiouster foy au poëte Euripide en ce qu'il dit,

En la tragedie d'Hippolyte.

L'affection d'amitié engendree

Entre mortels doit estre moderee,

Non

- A Non de leur cœur la mouëlle percer,
Ains estre aisee à prendre & à laisser,
pous la roidir & lascher, ne plus ne moins que la scote d'une voile de nauiure, selon
que le besoin le requerroit. Mais au contraire, Euripide, il faudroit transporter vo-
stre dire aux inimitiez, & admonnester que les querelles entre les hommes fussent
moderees, & qu'elles ne penetrasent pas iusques à la mouëlle de l'ame: ains que les
haines fussent aisees à appaiser, & aussi les courroux, les plaintes & doléances, & les
suspensions & deffiances: & plus tost donner ce sage admonnement de Pythagoras,
» Ne touche pas à plusieurs en la main. c'est à dire, ne fais pas plusieurs amis, & n'affe-
cte pas celle amitié populaire commune à tous, & exposee à vn chascun: laquelle en-
tre en vn cœur avec beaucoup de passions, dont celles-cy, l'estre en esmoy pour son
amy, se condouloir avec luy, se mettre en peine & exposer en danger pour luy, ne
sont pas difficiles à supporter à hommes libres & de gentil cœur: mais le dire du sage
B Chilon est veritable, lequel respondant à vn qui se vantoit de n'auoir aucun ennemy
» Il semble doncques, respondit il, que tu n'ayes aussi point d'amy. Car les inimitiez
suyuent incontinent de pres les amitez, & sont entrelasces avec elles. Ce n'est point
tour d'amy de ne se ressentir pas d'une iniure faite à son amy, ou d'une honte à luy
procuree, & de n'espouser point ses querelles: car les ennemis ont incontinent pour
suspect l'amy de leurs ennemis, & le haïssent: &, au contraire, les amis bien souuent
portent enuie à leurs amis, & ont quelque ialousie de leur prosperité, & les distraient
ça & là. Et comme l'oracle qui fut respondu à Timesias, touchant la nouvelle co-
lonie qu'il vouloit aller peupler, l'appelle,
C'est vn exaim d'abeilles que tu meines,
Qui deuiendront tost guespes inhumaines:
aussi ceux qui cherchent vn exaim, ou toute vne ruche, par maniere de dire, d'amis,
ne se donnent de garde, qu'ils tombent en vne guespiere d'ennemis: mais il y a ceste
C difference, que la souuenance vindicative du mal de l'ennemy péze beaucoup plus,
que ne fait la memoire du bien de l'amy. Et qu'il ne soit vray, voyez comment
Alexandre accoustra les familiers & amis de Philotas & de Parmenion, & Diony-
sius ceux de Dion, Neron ceux de Plautus, & Tibere ceux de Seianus, qu'ils feirent
tous mourir apres les auoir bien tourmentez à la gehenne. Tout ainsi comme les ri-
ches ioyaux de sa fille & son precieux voile ne seruirent de rien à Creon, mais le feu
qui sy prit & alluma soudainement, le brusta luy mesme quand il accourut, & la prit
entre ses bras, tellement qu'il en mourut quand & elle: aussi il y en a qui n'ayans receu
aucun bien de la prosperité de leurs amis, sont enuoloppez en la ruine de leur aduer-
sité, & perissent quand & eux: ce qui aduient principalement aux gens de lettres, &
personnes d'honneur & de valeur, comme Theseus qui fut avec son amy Pirithous
emprisonné & puny,
D Se trouua pris, & les deux pieds chargez
D'autres liens que de cuyure forgez.
Et Thucydide escrit, qu'en la grande pestilence qui fut à Athenes, les plus gens de
bien, & qui plus faisoient profession de la vertu, furent ceux qui plus moururent avec
leurs amis malades de peste, d'autant qu'ils ne s'espargnoient point, & alloient visi-
ter & traiter ceux qui leur appartenoient. Et pourtant ne faut-il pas ainsi mettre la
vertu en abandon, en la liant & attachant à toutes heures à d'autres, ains la reseruer
pour vne communication reciproque à ceux qui en sont dignes, c'est à dire à ceux
qui peuuent autant aimer & autant contribuer à la communauté: car cela est l'une
des plus grandes contrarietez & oppositions qu'il y ait contre la pluralité d'amis,
que l'amitié est comme vne generation qui se fait par conformité & similitude. Car
veu que les creatures mesmes qui n'ont point d'usage de de raison, qui les veut faire

Liure 2.
& 3. de la
guerre Pelo-
ponésiaque.

De la pluralité d'amis.

mesler avec celles qui ne sont pas de leur espece, il faut que ce soit à force, & par contrainte, d'autant qu'elles se couchent sur leurs genoux, & s'enfuient arriere l'une de l'autre : là où au contraire, elles ont plaisir de se mesler avec leurs semblables, receuans volontiers, & avec toute douceur & facilité, celle communion : Comment est-il possible qu'il s'engendre vne bonne amitié entre gens qui sont de mœurs toutes différentes, conditions toutes diuërses, & façons de viure tendantes à toutes autres fins ? Car les accords de la musique, soit en voix ou en instruments, ont bien leurs consonances par contrariété de sons, se formant ne sçay quoy de similitude & conuenance du haut & du bas : mais en ceste consonance & harmonie de l'amitié il n'y doit auoir du tout rien de dissemblable, ny d'inegal, ny de couuert & obscur, ains doit estre composée de toutes choses pareilles, de mesme volonté, mesme opinion, mesme conseil, & toute mesme affection, comme si ce n'estoit qu'une seule ame distribuee & departie en plusieurs corps. Et qui est l'homme ou si laborieux, ou si facile à transmuier en toutes façons, & à prendre tous visages, qui peult se former à tous patrons, & s'accommoder à tant de natures ? Et non pas se moquer du poëte Theognis qui nous commande,

Aies le sens du poulpe, lequel teint
Sa molle peau, puis d'un, puis d'autre teint,
Prenant couleur telle comme la roche
Et la pierre est de laquelle il s'approche :

& toutefois encore les changements du poulpe ne profondent point au dedans, ains se font seulement en la superficie du cuyr, qui en se reserrant, ou relaschant, reçoit les defluxions des couleurs des corps dont il approche : là où les amitez requierent, que les mœurs soient entierement conformes, les passions, les propos, les estudes, & vacations, & les inclinations. Or seroit-ce à faire à quelque Proteus, qui ne seroit pas trop heureux, ny trop homme de bien avec, ains qui par enchantement se transformeroit souuent, & en mesme instant, d'une figure en vne autre, pource qu'il faudroit qu'avec ceux de ses amis qui seroient doctes & studieux il s'occupast à estudier & à lire, avec les lucteurs qu'il se poudrast pour se preparer à la lucte, qu'il chassast avec les chasseurs, qu'il s'enyurast avec les beueurs, & qu'il briguast les offices avec les ambitieux, sans auoir aucune mansion de naturel propre à luy. Et tout ainsi comme les Philosophes naturels tiennēt, que la substance sans figure ne couleur quelconque, qu'ils appellent la matiere premiere, est subiecte à toutes formes, & se tourne en toutes façons, de maniere que tantost elle brusle, tantost elle deuient liquide, maintenant elle se tient rare, & puis elle s'espeffit : aussi faudra-il qu'à ceste pluralité d'amis il y ait vne ame subiecte qui soit de plusieurs conditions, de plusieurs affections, souple & facile à changer d'une sorte en vne autre. Et au contraire, l'amitié demande vne nature ferme & constante, qui demeure tousiours en vn mesme lieu & en vne mesme façon de faire. Voyla pourquoy c'est chose rare & difficile à rencontrer, H qu'un certain amy.

De la

A

*C'est un brief Discours contre ce commun dire, Il n'y a qu'heur
& malheur en ce monde.*



B

O v s faicts humains dependent de Fortune,
Non de conseil, ny de prudence aucune, ce dit vn
vieux quolibet. Comment n'y a il doncques point de iu-
stice, non plus és affaires des hommes, ny d'équité, ny de
temperance, ny de modestie? Et a-ce esté de fortune & par
fortune qu'Aristides a mieux aimé demourer en sa pauvreté,
combien qu'il fust en sa puissance se faire seigneur de beau-
coup de biens: & que Scipion aiant pris de force Carthage,
ne toucha, ny ne vit oncques rien de tout le pillage? Et fut-ce
de fortune & par fortune que Philocrates aiant pris grosse somme d'or du roy Phi-
lippus achetta des putains & de précieux poissons: & que Lathenes & Euthyocrates
trahirét la cité d'Olynthe: mesurans le souuerain bien de l'homme à la volupté de leur
ventre, & autres voluptez encores plus infames? Et fut-ce fortuitement qu'Alexandre
fils de Philippus s'absteint luy-mesme de toucher aux femmes captiues prises en la
guerre, & chastia ceux qui les voulurent forcer? Et au contraire aussi, fut-ce par for-
tune, qu'Alexandre fils de Priam, à sa male destinee & malencontre coucha avec
la femme de son hoste, qui l'auoit receu chez luy, & l'ayant rauie emplit des miseres
& calamitez de la guerre l'Europe & l'Asie? Si toutes ces choses-là ont esté faictes par
fortune, qui empeschera que lon ne die, que les chats, les boucs, & les singes sont
aussi par fortune friands, luxurieux, & malfaisans? Mais au contraire aussi, fil est cer-
tain qu'il y ait au monde de la iustice, de la temperance, & de la vaillance, comment
seroit il raisonnable de dire, qu'il n'y eust point de prudence? Et fil y a de la prudence,
comment pourroit on soustenir qu'il n'y eust point de conseil? car la temperance,
comme aucuns disent, est vne sorte de prudence, & la iustice a besoing d'estre assistee
de prudence: ou, pour mieux dire, nous appellons la sagesse & prudence, qui rend
les hommes bons és voluptez, continence & temperance: & és dangers & trauaux,
patience & vaillance: & és contraux & maniement des affaires, legalité & iustice.
Parquoy si nous voulons que les effectz de conseil & de sagesse soient attribuez à la
fortune, il faudra donc que ceux de la iustice, & ceux de la temperance, & ceux de la
vaillance luy appartiennent aussi: voire que le desrobber, le couper bourses, & le
paillarder procedera de la fortune: & brief, quittons tout le discours de nostre raison,
& nous laissons du tout aller à la fortune, qui nous poulse, & nous chasse comme
de la poulsiere, ou de la balle ça & là, à son plaisir. S'il n'y a doncques point de pru-
dence, aussi n'y a il point de conseil aux affaires, ny de deliberation, ny d'inquisition
de ce qui est vtile: & refuioit doncques bien Sophocles quand il disoit,

On trouue tout par soing & diligence,

Et tout perit en fin par negligence.

Et en vn autre passage, où il diuise les affaires des hommes, il dit,

Ce qui se peut enseigner, ie l'appren,

Ce qui trouuer, à le chercher me pren:

Et ce qu'il faut que de-la-sus descende,

En ma priere aux Dieux ie le demande.

Car qu'est-ce qui se peut apprendre, & qu'est-ce qui se peut trouuer par les hommes,
fil est ainsi que tout se face en ce monde par la fortune? quel Senat de ville, & quel
conseil de Prince n'est ruiné & destruiét, fil est ainsi que toutes choses soient en la

*En la tragoe-
die d'Oedi-
pe le Tyran.*

De la Fortune.

subiection & puissance de fortune? laquelle nous iniurions, en l'appellant aueugle, E nous soubmettans comme aueugles nous mesmes à elle : & bien le sommes nous certainement, si nous arrachans les yeux de la prudence, nous prenons vne guide aueugle pour nous guider & conduire par la main au cours de ceste vie. C'est tout autant comme si quelqu'un disoit, c'est fortune que tout le faict des voyans, non pas de la veüe ny des yeux esclairans, comme dit Platon : ou, c'est fortune que tout le faict des oyans, non pas vne naturelle puissance de receuoir par l'oreille & le cerueau le coup de l'air frappé. Mais ce seroit à l'adventure bien fait, pourra dire quelqu'un, craindre de soubmettre le sentiment à la fortune : voire-mais la nature nous a donné la veüe, l'ouye, le goust, l'odoremment, & autres parties du corps, avec toutes leurs facultez & puissances, pour ministres de la sagesse & prudence : c'est l'entendement qui voit & qui oyt, tout le reste est sourd & aueugle. Et tout ainsi que fil n'y auoit point de soleil, nous serions en vne nuit perperuelle, non obstans tous les autres astres & estoilles, comme dit Heraclitus : aussi non obstans tous les naturels senti- F ments, si l'homme n'auoit l'entendement & le discours de la raison, il ne differe- roit en rien des bestes brutes en sa vie: mais maintenant ce n'est point par fortune, ny par cas d'adventure que nous les dominons & en sommes les maistres : car Pro- metheus, c'est à dire le discours de la raison, en est cause, qui nous a donné en re- compense,

Pour nous porter des asnes & cheuaux,
Des puissants bœufs pour aiser nos trauaux,
ainsi que dit le poëte Æschylus. Car au demourant la fortune, ou la nature, a esté à leur naissance plus fauorable à plusieurs bestes brutes, qu'elle n'a esté à l'homme, pour ce que les vnes sont armées de cornes, & de dents, & d'aiguillons,

Le Herisson est armé sur l'eschine
Horriblement de mainte aiguë espine.
ce dit Empedocles : les autres sont vestues & chaussées d'escailles, de poil, d'ongles, G & de cornes dures : l'homme seul, comme dit Platon, est abandonné de la nature, tout nud, sans armes, sans chaussure, & sans vesture :

Mais par vn don tout cela s'addoucit,
c'est par le don de la raison, du soing, & de la prouoyance.

Force de corps est en l'homme debile,
Mais son esprit a le sens si habile,
Qu'il donte tous les plus fins animaux
Qui soient en mer, en terre, monts & vaux.

C'est vn animal bien viste, & bien leger à la course, que le cheual, mais c'est pour l'homme qu'il court: le chien est courageux & aspre au combat, mais c'est pour garder l'homme: le poisson a beaucoup de chair, & le pourceau aussi, mais c'est pour seruir de nourriture & de viande à l'homme. Qu'est-il plus grand, ny plus espouventable à voir qu'un Elephant? mais à la fin encore sert il de iouët à l'homme, & de spectacle H de ieux & de feste : on luy fait apprendre à danser & à baller, & à faire la reuerence. Si n'est pas en vain, sans vtilité, que nous alleguons ces exemples là, ains à fin que par iceux nous cognoissions iusques où la prudence esleue l'homme, au dessus de qui elle le met, & avec quoy il surmonte & surpasse tout,

Car pour luiéter ou escrimer des poings,
Ne pour courir du pied encore moins,
Sommes nous gens où n'y ait que redire?

ains en toutes ces forces-là nous sommes plus malheureux emet nez q̃ les bestes, mais par experience, memoire, ruse & artifice, cōme disoit Anaxagoras, nous nous en seruons d'au- cun nous chastrōs les goffres des abeilles, nous tirōs les pis des femelles, brief nous les pillons

A pillons & saccageons quand nous les prenons: tellement qu'en tout cela il n'y a rien qu'on puisse attribuer à la fortune, ains procede le tout de bon sens & de prouoyance. D'auantage les ouurages des charpentiers sont faiçts humains, si sont ceulx des tailleurs de pierre, des maçons & des statuaires, en tous lesquels nous ne voions rien qui soit fait casuellement ny fortuitement, au moins qui soit bien fait: & si d'adventure quelquefois à vn bon ouurier, tailleur de pierre ou maçon, il se rencontre quelque fortune, c'est en chose petite & legere, mais les plus grands de leurs ouurages, & le plus grand nombre, sont acheuez respectiuelement par leurs arts. Ce que donne à entendre vn certain poëte par ces vers,

Marchez auant vous tourbe manouuriere
Qui adorez Minerue la guerriere,
Mere des arts, fille de Iupiter,
Auecques vos paniers à pain porter.

B Car les mestiers & les arts ont pour leur patronne Minerue, qui s'appelle autrement **Ergané**, comme qui diroit, ouuriere & artifane, non pas la fortune. Bien recite lon de **quelque** certain peintre, qui peignant vn cheual auoit bien rencontré au demourant, **tant au** portraict comme à la couleur, excepté que ce bouillon d'escume qui se concree à l'entour du mors quand il le ronge, & qui tombe de la bouche en soufflant, ne luy plaisoit point ainsi comme il l'auoit peint, de sorte qu'il l'effacea par plusieurs fois, & à la fin de despit ietta son esponge sur le tableau tout ainsi qu'elle estoit pleine de toutes sortes de teintures: ceste esponge venant à donner à l'endroit de la bouche du cheual, y imprima & representa merueilleusement bien ce qu'il falloit. Je ne sçache point que lon raconte autre chose artificielle aduenue par cas de fortune. Les ouuriers vsent par tout de regles, de lignes, de mesures, & de nombres, à fin qu'en tous leurs ouurages il ne se trouue rien qui soit fait temerairement & à l'adventure: & lon dit que les arts sont comme de petites prudences, ou plus tost des rui-

C seaux & lambeaux d'icelle, departies par les necessitez de la vie humaine: ainsi comme les fables nous donnent couuertement à entendre, que depuis que Prometheus eust diuisé le feu, vne estincelle en vola deçà, vne autre delà: aussi les parties & fragments de la prudence departie & decoupee en plusieurs, sont deuenues arts. C'est doncques chose merueilleuse, comment les arts n'ont rien de commun avec la fortune, pour attaindre & paruenir à leur propre fin: & que celle qui est la plus grande & la plus parfaite de toutes, celle qui est le comble & la cyme de toute la louange & reputation de bonté que lon sçauroit donner à vn homme, ne soit du tout rien. Et toutefois à tendre ou lascher les chordes d'un instrument, il y a vne sagesse qui s'appelle musique: & à accoustrer les viandes y en a vne autre, que nous nommons l'art de cuyliner: & à lauer les draps & vestemens, vne autre qui se nomme le mestier de foulon: & puis nous enseignons aux enfans à se vestir & à se chauffer, & à prendre la

D viande qu'on leur baille avec la main droite, & avec la main gauche tenir leur pain, comme n'estans pas iusques à ces petites choses-là dependantes de la fortune, ains aians besoing d'aduertance & de sollicitude. Et puis les choses qui sont les grandes, principales & plus necessaires pour rendre l'homme bien-heureux, n'vsent pas de la prudence, & ne participeront pas de prouoyance & du iugement de la raison? Et toutefois on ne voit point qu'il y ait personne si deprouueü de iugement, que aiant destrempé de la terre avec de l'eau, la laisse là, attendant que fortuitement & casuellement il s'en face des briques: ny que aiant achetté de la laine & du cuir, il se seie dessus priant la fortune de luy en faire des vestemens & des souliers: ny que aiant amassé grosse somme d'or & d'argent, & grand nombre d'esclaues, ny pour auoir plusieurs portes fermées sur soy, ny pour monstrier des liçts sumptueusement & richement parez, ou des tables precieuses, fil n'a quant-&-quant la prudence pour en bien

De la Fortune.

vser, qu'il estime que cela soit sa souveraine felicité, ne que cela luy apporte vne vie E
heureuse sans douleur, & qui iamais ne se puisse changer. Il y eut quelquefois vn, qui
contestant avec le Capitaine Iphicrates, pour le cuyder conuaincre de n'estre rien, luy
demanda qui il estoit, Car tu n'es ne picquier, ny archer, ny rondelier: Non, respondit
Iphicrates, mais ie suis celuy qui commande à tout cela, & qui les mets tous en be-
songne. Aussi Prudence n'est point or, ny argent, ny gloire, ny richesse, ny santé, ny
force, ny beauté: Qu'est-ce donc? c'est ce qui sçait bien vser & se seruir de tout cela,
& par qui chascune de ces choses est plaisante, hōorable & profitable: & au contrai-
re, sans elle, desplaisante, nuisible & dommageable: destruisant & deshōnorant celuy
qui les possede. Certainement c'est dequoy sagement nous admoneste le poëte He-
siode, quand il fait que Prometheus conseille à son frere Epimetheus,

Au liure in-
titulé les
ceures.

Ne recevoir present que luy enuoye

Le Dieu du ciel, ainçois qu'il le renuoye,

entendant les biens exterieurs, & de la fortune: comme s'il eust voulu dire, Ne iouë F
point de la fleute, si tu n'entends rien en la musique: ne lis point, si tu ne sçais les let-
tres: ne monte point à cheval, si tu ne sçais bien t'y tenir: aussi tout de mēme, ne
prochasse point d'office & de magistrat, si tu es vn fol: ne cherche point d'estre riche,
si tu es auaricieux: ne te marie point, si tu aimes autre femme. Car auoir des biens que
lon ne merite point, donne occasion aux mal-aduisez, ce dit Demosthene, de faire
beaucoup de folies: & l'estre-heureux aussi plus que de raison, est occasion de deuenir
mal-heureux à ceulx qui ne sont pas sages.

De l'enuie & de la haine.



L semble qu'il n'y ait point de difference entre haine & en-
uie, ains que ce soit tout vn: car le vice, à parler en general, G
a plusieurs crochets, par le moyen desquels se remuant ça &
là, il donne aux passions qui dependent de luy plusieurs pri-
ses & attaches, pour s'entrelasser les vnes avec les autres, &
comme des maladies compatissent aux inflammations les
vnes des autres: car autant est fasché de la prosperité d'au-
truy le mal-veillant, comme l'enuieux. Voyla pourquoy
nous estimons que beneuolence soit contraire à l'vne & à
l'autre, d'autant que c'est vn vouloir bien à son prochain: & que ce soit tout vn le haïr
que le porter enuie, d'autant qu'ils ont vne fin & intention contraire à l'aimer. Mais
pour autant que les similitudes ne sont pas tant vn, comme les differēces sont autre &
different, recherchons & examinons ces differences là, en commençant à la source
mēme & origine d'icelles passions. La haine doncques s'engendre en nos cœurs de H
l'imagination & apprehension que nous auons, que celuy que nous haïssons soit mes-
chant, ou generalmente enuers tous, ou particulièrement enuers nous: car commu-
nément ceulx qui pensent auoir receu tort de quelqu'un sont disposez à le haïr, &
autrement on haït & void-on mal-volontiers ceulx que lon sçait estre meschans &
coustumiers d'outrager autrui, & porte lon enuie seulement à ceulx que lon co-
gnoist estre heureux: & pourtant semble il que l'enuie soit indeterminée, ne plus
ne moins que le mal des yeux qui s'offense de toute clarté & lueur: mais la haine est
determinée, estant tousiours fondée & appuyée sur certains subiects au regard d'elle.
Secondement le haïr s'estend iusques aux bestes brutes, comme il y en a qui naturel-
lement haïssent les chats & les mousches cantharides, les serpens, & les crapaux:
& Germanicus ne pouuoit souffrir ny le chant ny la veuë d'un coq: & les Sages
des

- A des Perses, qu'ils appelloient Magi, tuoient les rats & les souris, tant pource qu'ils les haïssoient eux, comme aussi pource qu'ils disoient que leur Dieu les auoit en horreur: car tous les Arabes & les Æthiopiens generally les abominent: là où l'enuie conuiert seulement à l'homme contre l'homme, & n'y a point d'apparence de dire qu'il s'imprime enuie entre les animaux sauvages des vns contre les autres, d'autant qu'ils n'ont point d'imagination, ny d'apprehension, si vn autre est heureux ou mal-heureux, ny ne sont point touchez de sentiment d'honneur ou deshonneur, qui est ce qui plus & principalement aigrit l'enuie, là où ils se haïssent les vns les autres, se portent inimitiez, & s'entrefont la guerre les vns aux autres, comme des loyaux, & auxquels ils n'ont point de fiance, comme les dragons & les aigles se guerroyent, les chats-huants & les corneilles, les mauvis & les chardonnerets: tellement que lon dit qu'encore quand on les a ruez, leur sang ne se peut mesler ensemble, & qui plus est, si vous en meslez, encore s'escoulera il à part, en se separant l'un d'avec l'autre. Et est vray semblable que la haine qui est entre le lion & le coq procede de la peur, comme aussi entre l'Elephant & le pourceau: car volontiers ce que les animaux craignent, ils le haïssent: de maniere qu'encore en cela se peut assigner difference entre la haine & l'enuie, d'autant que la nature des animaux en reçoit bien l'une, & non pas l'autre. Et puis on ne peut estre enuieux du bien d'autrui iustement, car pour estre heureux lon ne fait point de tort à personne, & neantmoins c'est pour cela que lon est enuie: là où au contraire plusieurs sont haïs iustement, comme ceulx que nous appellons *ὄνους* dignes de la haine publique, & ceux qui ne les fuyent, ne les detestent, & ne les abominent: de quoy on peut prendre pour signe, qu'il y en a qui confessent bien en haïr plusieurs, mais ils disent qu'ils ne portent enuie à personne: car la haine des meschans est vne qualité d'homme de bien. Auquel propos on recite que Charillus, nepueu de Lycurgus, & Roy de Lacedemone, estoit homme fort doux & debonnaire: de quoy quelques vns le louans, son compagnon en la royauté leur respondit, Et comment feroit il bon, quand il n'est pas rude aux meschans? Et Homere descriuant la laideur & deformité du corps de Therfites, la depeint & figure par plusieurs parties de sa personne, & par plusieurs circonlocutions, mais la malice de ses mœurs, & peruersité de sa nature, fort briuelement, & en vne seule sorte,

Iliad. lib. 2.

Haï estoit de Pelides bien fort,

Et Vlysses luy vouloit mal de mort.

- côme estant vne extreme meschanceté d'estre ainsi haï des plus gens de bien. Et puis on nie fort & ferme que lon soit enuieux, & quand on est conuaincu manifestement, alors on pretend mille couuertures & excuses: disant que lon est courroucé à celuy à qui on porte enuie, ou que lon le craint, ou bien que lon le hait: mettant au deuant de ceste passion d'enuie tout autre nom, pour la cuider cacher & couvrir, comme estant celle passion la seule maladie de l'ame que lon doit dissimuler. Il est doncques force que ces deux passions soient nourries, entretenues & augmentees, comme des plantes, de mesmes moyens: attendu mesmement que elles succedent l'une à l'autre: toutefois nous haïssons plus ceulx que nous voyons plus s'aduancer en meschanceté, & portons enuie à ceulx qui passent plus auant en vertu: & pourtant Themistocles estant encore ieune homme, disoit, qu'il n'auoit encore rien fait de notable, par ce que personne ne luy portoit enuie. Car ainsi comme les mouches cantharides s'attachent principalement au plus beau bled, & aux roses plus espouuies, aussi l'enuie se prent ordinairement aux plus gens de bien, & aux personages qui ont plus de gloire ou plus de vertu: au contraire les meschancetez extremes augmentent la haine contre les meschans. Qu'il soit vray, les Atheniens eurent en telle haine & abomination les malheureux qui par calomnie feirent mourir Socrates, qu'ils ne leur daignoient pas allumer du feu, ny leur respondre quand ils leur de-

De l'enuie & de la haine.

mandoient quelque chose, ny se lauer aux estuues quand & eux, ains commandoient E
aux seruiteurs qui versioient l'eau, de ietter toute celle où ils s'estoient lauez, comme
estant pollue & contaminee, de peur d'auoir rien commun avec eux, iusques à tant
que ne pouuans plus supporter celle grande haine publique qu'on leur portoit, ils se
pendirent & estranglerent eux-mesmes: là où bien souuent l'excellence de vertu, & de
gloire & honneur esteint l'enuie: car il n'est pas vray-semblable qu'aucun portast en-
uie à Cyrus ny à Alexandre, depuis qu'ils se furent faiçts seigneurs & maistres du mon-
de: ains comme le Soleil, quand il est droit à plomb dessus le sommet de quelque
chose que ce soit, il ne laisse point d'ombre, ou s'il en laisse, elle est fort courte & pe-
tite, pour ce qu'il espend sa lumiere par tout: aussi quand les prosperitez d'un homme
sont paruenues à vne tresgrande hauteur, & qu'elles sont au dessus de l'enuie,
alors elle se retire & se restraint, se voyant toute esclairee & enluminee: là où
au contraire, la grandeur de la fortune ou puissance des mal-voulus, ne relasche &
diminue point la malveuillance que leurs haineux & malveillans leur portent: qu'il F
soit ainsi, Alexandre n'eut pas vn enuieux, mais plusieurs ennemis & malveillans,
par lesquels à la fin il fut tué proditoirement. Semblablement aussi les aduersitez sont
bien cesser les enuies, mais les inimitiez non: car les hommes haïssent tousiours leurs
ennemis, encore qu'ils soient rauallez par calamitez, là où il n'y a personne qui porte
enuie à vn malheureux, ains est veritable vn mot que dit l'un des Sophistes de nostre
temps, Que les hommes enuieux sont bien aises d'auoir pitié. Tellement que c'est
vne des plus grandes differences qu'il y ait entre ces deux passions, que la haine ne se
depart iamais de ceux, sur lesquels elle est vne fois ancree, ny en bonne, ny en mau-
uaïse fortune, là où l'enuie s'esuanouit fort en l'extremite de l'un & de l'autre. D'auan-
tage encore pourrons nous mieue descouurir ceste difference par les contraires: car on
cesse les haines, inimitiez, & malveillances, quand on est persuade que lon n'a receu
aucun tort, ou que lon prend opinion que ceux que lon haïssoit comme meschans,
sont deuenus gens de bien, ou pour le troisieme, quand on a receu d'eux quelque G
plaisir: car la grace d'un plaisir suiuant, faite à propos, comme dit Thucydides, en-
core qu'elle soit moindre, si elle est faite en temps opportun, dissout bien souuent
vne plus griefue iniure precedente. Et de ces trois causes-là, la premiere n'efface point
l'enuie, car encore qu'ils soient dès le commencement persuadez de n'auoir point re-
ceu de tort, ils ne laissent pas de porter enuie: & les deux autres l'irritent & l'aigrissent
encore d'auantage, car ils portent encore plus d'enuie à ceux qu'ils estiment gens de
bien: car encores qu'ils recoiuent du bien & plaisir des autres bienheureux, ils en sont
marris, & ne laissent pas de leur porter enuie; & pour leur felicité, & pour leur bonne
volonté, d'autant que l'un procede de vertu, & l'autre de bonne fortune, & l'une &
l'autre est bonne chose. Parquoy il faut conclure, que l'enuie est vne passion diuerse
de la haine, puis qu'il est ainsi que l'une s'irrite & s'aigrit de ce dont l'autre s'addoucit.
D'auantage considerons vn peu la fin, le but & l'intention de l'une & de l'autre, car H
l'intention du malveillant & haineux est de malfaire à celuy qu'il hait: & definit on
ainsi ceste passion, que c'est vne disposition & volonté qui espie l'occasion de faire
mal à autrui: mais cela au moins n'est point en l'enuie, car il y en a plusieurs qui por-
tent enuie à aucuns de leurs parens & de leurs compagnons, lesquels neantmoins ils ne
voudroient pas voir perir ny tomber en griefue calamité, mais seulement ils sont
marris de les voir en prosperité, & empeschent s'ils peuuent, leur gloire & leur splen-
deur: toutefois ils ne voudroient pas procurer, ny souhaitter des maux irremediabls,
ny des miseres extremes, ains se contentent seulement de resequer & abbaïsser leur
hauteur, comme d'une maison ce qui offusque & empesche la veüe.

Au premier
liure de son
histoire.

Comment

A **Comment on pourra receuoir vtilité**
DE SES ENNEMIS.



E voy que tu as esleu, Seigneur Cornelius Pulcher, la plus douce voye qui soit en l'entremise du gouuernement des affaires publiques : en laquelle estant grandement vtile au public, tu te monstres tres-gracieux & tres-courtois en priué à ceux qui vont parler à toy. Mais pour autant que lon peut bien trouuer vn país où il n'y ait point de beste venimeuse, ainsi comme lon escrit de Candie : mais de gouuernement & de maniement d'affaires qui ne porte point d'enuie, ny de ialousie & d'emulation, qui sont passions fort promptes à engendrer inimitiez, iusques icy il n'en a point esté : pource que, quand il n'y auroit autre chose, les amitez mesmes nous embrouillent & enuoloppent en des inimitiez : ce que le sage Chilon aiant tresbien entendu, demanda à vn qui se vantoit de n'auoir point d'ennemis, fil n'auoit point aussi d'amis. Il me semble qu'un homme d'estat & de gouuernement, entre autres choses qu'il doit bien auoir estudees, doit aussi sçauoir que c'est que des ennemis, & diligemment escouter ce que dit Xenophon, Que l'homme prudent & sage sçait tirer profit & vtilité de ses ennemis. Et pourtant aiant recueilly en vn petit traitté ce qu'il me vint n'a gueres en pensee de dire en discourant sur ceste matiere, ie te l'ay enuoyé aux mesmes termes : aiant eu l'œil, le plus qu'il m'a esté possible, à ne repeter rien de ce que i'auois parauant escrit és preceptes des affaires d'Estat & du gouuernement de la chose publique, pource qu'il me semble que ie t'en voy souuent le liure en la main. Les premiers anciens se cōtentoient de n'estre point blesez ny offensez des bestes farouches & sauages, & estoit cela la fin de tous les combats qu'ils auoient contre elles : mais ceux qui sont venus depuis, aians appris à en vser, non seulement se gardent bien d'en receuoir du dommage, mais qui plus est, en sçauent tirer du profit, se nourrissans de leurs chairs, se vestans de leur laine & de leur poil, se medecinans de leur fiel & de leur presure, & s'armans de leurs cuys : tellement que deormais il est à craindre que venans les bestes à defaillir à l'homme, sa vie n'en deuienne sauage, pauvre & necessiteuse. Puis que doncques il est ainsi, que les autres hommes se contentent, & leur suffit de n'estre point offensez par leurs ennemis, & que Xenophon a escrit, que les sages reçoient profit de leurs aduersaires, il n'est pas raisonnable que nous le descroyons : mais il nous fault chercher l'art, & la science de pouoir atteindre à ce bien là, au moins à ceux, à qui il est impossible de viure sans ennemis. Le laboureur ne peut pas domestiquer toute sorte d'arbres, ny le veneur appriuoiser toutes especes de bestes : & pourtant ont-ils cherché d'autres moyens & d'autres vsages de se valoir les vns des plantes steriles, & les autres des animaux sauages. L'eau de la mer est salee & mauuaise à boire, mais elle nourrit les poissons, & est voicture propre à porter ce que lon veut, & à aller par tout. Le Satyre voulut baiser & embrasser le feu la premiere fois qu'il le veit : mais Prometheus luy crya, Boucquin, tu pleureras la barbe de ton menton, car il brusle quand on y touche : mais il baille lumiere & chaleur, & est vn instrument seruant à tout artifice, prouueu que lon en sçache bien vser. Aussi considerons si l'ennemy, qui est au reste mal-faisant, & bien difficile à accointer & manier, auroit point quelque endroiect par lequel on le peust aucunement toucher, si lon s'en pourroit point seruir à aucune chose, & en tirer quelque profit : car il y a bien d'autres choses & beaucoup, qui sont fort odieuses, fascheuses & ennuyeuses à ceux à qui elles arriuent : mais neantmoins vous voyez que les maladies du corps ont seruy à quel-

Au liure
de la Menage-
rie.

Comment on pourra receuoir

ques vns d'occasion de viure en loisir, hors d'affaires & en repos: & les trauaux qui E
se font par fortune presentez à d'autres, les ont si bien exercitez, qu'ils en sont deuenus plus robustes & plus forts. Qui plus est, l'estrebanny hors de son pais, & auoir perdu tous ses biens, ont donné le moyen à quelques autres de s'addonner à l'estude & à la philosophie, comme feirent iadis Diogenes & Crates: & Zenon mesme aiant
» entendu que sa nauire s'estoit brisée & perie en mer, ne fait que dire, Tu fais bien,
» Fortune, de me reduire à la robbe d'estude. Car ainsi comme les plus sains animaux, & qui ont les estomacs plus robustes, digerent les serpens & les scorpions qu'ils aual-
lent: voire qu'il y en a quelques vns qui se nourrissent de pierres & d'escailles & co-
quilles, lesquelles ils cuysent & conuertissent en aliment, pour la force & vehemen-
te chaleur de leurs esprits: là où ces delicats, flouëts & maladifs ont enuie de vomir, quand ils prennent seulement du pain & du vin: aussi les fols gastent & corrompent les amitez, là où les sages scauent vser opportunément, & tirer des commoditez mesmes des inimitiez. En premier lieu doncques, il me semble que ce qui est en l'ini- F
mitié le plus dommageable, pourra deuenir le plus profitable, qui y voudra bien prendre garde. Et qu'est-ce que cela? c'est que ton ennemy veille continuellement à espier toutes tes actions, & fait le guet à l'entour de ta vie, cherchant par tout quelque moyen de te surprendre à descouuert, pour auoir prise sur toy, ne voiant pas seulement à trauers les chesnes, comme faisoit Lynceus, ou à trauers les pierres & les tuy-
les, mais aussi à trauers vn amy, à trauers vn seruiteur domestique, & à trauers tous ceux avec qui tu auras familiere conuersation, pour descouurir, autant qu'il luy sera possible, ce que tu feras, sondant & fouillant tout ce que tu delibereras, & que tu proposeras de faire. Car il aduiert souuent que noz amis tombent malades, voire qu'ils meurent, que nous n'en scauons rien, pendant que nous differons de iour à iour à les aller visiter, ou que nous n'en tenons compte: mais de nos ennemis, nous en recerchons curieusement iusques aux songes. Les maladies, les debtes, les mau-
uais mesnages avec leurs propres femmes sont plus tost incogneus à ceux à qui ils G
touchent, que non pas à l'ennemy: mais principalement s'attache-il aux fautes, & est-ce que plus il recerche à la trace. Et tout ainsi que les vaultours volent à la fen-
teur des corps pourris & corrompus, & n'ont aucun sentiment de ceux qui sont sains & entiers: aussi les parties de nostre vie qui sont mal saines, mauuaises & gastees, sont celles qui plus esmeuent nostre ennemy: c'est là que sautent incontinent ceux qui nous haïssent, c'est ce qu'ils harassent & qu'ils deschirent. Et c'est cela qui plus nous profite, en nous contraignant de viure reglément, & prendre bien garde à nous, sans dire ne faire rien negligemment, à l'estourdie, ny imprudemment, ains conser-
uer tousiours nostre vie comme en estroite diette irreprehensible: car ceste reseruee caution reprimant les violentes passions de nostre ame, & contenant la raison au logis, engendre vne accoustumance, vne intention & volonté de viure honnestement & correctement. Car ainsi comme les citez qui par guerres ordinaires avec leurs H
proches voisins, & continuelles expéditions d'armes, ont appris à estre sages, aiment les iustes ordonnances, & le bon gouuernement: aussi ceux qui par quelques inimi-
tiez ont esté contraints de viure sobrement, & se garder de mesprendre par negligéce, & par paresse, & faire toutes choses vtilement & à bonne fin, ceux-là ne se donnent de garde, que la longue accoustumance, petit à petit, sans qu'ils s'en apperçoient, leur apporte vne habitude de ne pouoir plus pecher, & embellit leurs mœurs d'in-
nocence, pour peu que la raison y mette la main: car ceux qui ont tousiours deuant les yeux ceste sentence,

Iliad. liu. 1.

Le Roy Priam & ses enfans à Troye

Certainement en meneroient grand ioye:

cela les diuertit & destourne bien des choses dont les ennemis ont accoustumé de se
resiouir

A resjouir & de se mocquer. Et puis nous voions bien souuent les chantres & musiciens
és theatres, & toute autre telle maniere de gens qui seruent à faire des ieux, tous lan-
guissans, nonchallans, & non point deliberez, ny faisans tout leur effort de monstrier
ce qu'ils sçauent quand ils iouent à par eux: mais quand il y a emulation & conten-
tion à l'enuy contre d'autres, à qui fera le mieux, alors non seulement ils se preparent
eux-mesmes plus attentifvement, mais aussi leurs instruments, choisissans les chordes
plus diligemment, les accordans, & entonnans leurs fleutes. Celuy donc qui sçait qu'il
a son ennemy pour emuleur de sa vie, concurrent d'honneur & de gloire, prent de
plus pres garde à soy, considere circonspectement toutes choses, & ordonne mieux
ses mœurs & sa vie. Car cela est vne des proprieté du vice, auoir plus tost honte des
ennemis que des amis, quand on peche. Et pourtant Scipion Nasica, comme quel-
ques vns dissent & estimassent que les affaires des Romains estoient desormais en
toute seureté, estans les Carthaginois qui leur souloient faire teste du tout ruinez, &
B les Acheiens subiuguez: mais au cōtraire, dit-il, c'est à ceste heure que nous sommes
„ en plus grand danger, aians tant faict que nous auons osté tous ceux que nous deuions
„ reuerer, & tous ceux que nous pouuions craindre. Adioustez y d'auantage vne res-
„ ponsé de Diogenes fort sage, & digne d'un homme d'estat, à quelqu'un qui luy de-
„ manda, Commét me pourray-je bien venger de mon ennemy? En te rendant, dit-il,
„ toy-mesme vertueux & homme de bien. Si lon voit les cheuaux de son ennemy pri-
sez & louez, ou ses chiens bien estimez, on en est marry: si lon voit ses terres bien la-
bourees, son iardin bien en ordre & bien verdoiant, on en souspire: Que pen-
ses-tu donc qu'il fera, quand il verra que tu te monstreras toy-mesme homme iuste, sage,
bon: en paroles bien aduisé, en faicts net & entier, & honneste en ton viure?

Cueillant le fruit du sillon de prudence
Profond empraint dedans sa conscience,
Duquel on voit germer incessamment

C Sages conseils, pleins de tout ornement.

Le poëte Pindare dit, que ceux qui sont vaincus ont la lāgue liee de silence, mais non
pas simplemēt, ne tous, ains ceux qui se sentent vaincus par leurs ennemis en diligēce,
en bonté, en magnanimité, en humanité, en biēfaicts: c'est cela qui empesche la lāgue
qui ferme la bouche, qui serre le gosier, & fait taire les hōmes, cōme dit Demosthenes:

Garde toy donc de ressembler aux folles,
Il est en toy: & non pas de parolles
Tant seulement: ains de cœur & de faict.

Si tu veux faire grand desplaisir à celuy qui te hait, ne l'appelle pas bougre, ny pail-
lard, ny ruffian, ny bouffon, ny chiche ou auaricieux, mais donne ordre que tu fois
toy-mesme homme de bien, chaste, veritable, porte toy courtoisement & iustement
enuers ceux qui auront affaire à toy: & si d'aduenture il t'eschappe de luy dire quelque

D iniure, donne toy bien garde d'approcher puis apres aucunement des vices que tu luy
reproches en l'iniuriant: entre au dedans de ta conscience, considere s'il y a rien de
pourry, de gasté & de taré en ton ame, de peur que lon ne puisse rendre le change à
ton vice, en luy respondant le reproche pris d'une Tragédie,

Tout vlcéré il veult guarir les autres.

Au contraire, si ton ennemy t'iniurie, en t'appellant ignorant, augmente ton labeur,
& prens plus de peine à estudier: si l'appelle couard, excite la vigueur de ton coura-
ge, & te monstre plus homme: si l'appelle luxurieux ou paillard, efface de ton ame si luy
y a aucune trace cachee de volupté: car il n'est rien si laid qu'une iniure qui se retourne
contre celuy qui la dit, ne qui desplaist & grieve plus. Comme il semble que la reuer-
beration d'une lumiere offense plus les yeux malades, aussi font les blasmes qui sont
retorquez & renuoyez par la verité contre le blasonneur: car ainsi comme lon dit,

Æschylus
en la Tra-
gédie inti-
tulée les sept
contre The-
bes.

Euripide
en la Tra-
gédie d'O-
restes.

Comment on pourra receuoir

que le vent Cécias, la galerne, tire à soy les nuës, aussi la mauuaise vie tire à soy les E iniures. Et pourtant Platon, toutes les fois qu'il f'estoit trouué present à voir faire à d'autres hommes quelque chose de mal-honneste, en se retirant à part, il souloit dire .. en soy-mesme, Ne ressemble-ie point en quelque chose à cela? aussi celuy qui a iniurié & blasmé la vie d'un autre, si tout aussi tost il s'en va regarder & examiner la sienne propre, & la reformer & raccoustrer, en se redressant & retournant en mieux, il receura quelque vtilité de son iniurier, qui autrement semble estre, & est veritablement, vain & inutile. On ne se scauroit garder de rire si l'y a vn homme chauue ou bossu qui reproche à d'autres ces imperfections-là du corps: aussi est-ce à la verité chose digne de mocquerie, blasmer ou iniurier vn autre de ce dont on peult estre moqué & iniurié soy-mesme. Comme respondit Leon le Byzantin à vn bossu qui se mocquoit de luy à .. cause qu'il auoit mal aux yeux, Tu me reproches, dit-il, vne imperfection de nature, & .. tu portes la vengeance diuine sur ton dos. Parquoy tu ne reprendras iamais vn adultere estant toy-mesme vn putier, ny vn prodigue estant chiche: comme Alcmeon repro- F cha à Adrastus,

Frere germain tu es d'une meschante,
Qui son mary tua de main sanglante:
que luy respōd Adrastus: il ne luy reproche point le crime d'autrui, ains le sien propre,
Et toy tu as, parricide inhumain,
Ta propre mere occise de ta main.

.. Et Domitius reprocha vn iour publiquement à Crassus, N'est il pas vray, que t'estant .. morte vne lamproye que tu nourrissois par delices en vn viuier, tu en pleuras? Et .. Crassus luy repliqua sur le champ, N'est-il pas vray, que aiant porté trois femmes .. tiennes en terre, iamais tu n'en pleuras? Il ne fault pas, comme le vulgaire pense, que pour iniurier autrui on soit bien né, ny que lon ait la voix forte, ou que lon soit éhonté, ains tel que lon ne puisse estre iniurié ny taxé d'aucun vice: car il semble qu'Apollo .. n'adresse à personne tant cestuy sien commandement, Cogneoy toy-mesme, qu'à ce- G luy qui veult blasmer ou iniurier autrui, de peur qu'il ne leur aduienne qu'en disant à autrui ce qu'ils veulent, ils oyent qu'autrui leur die ce qu'ils ne veulent pas: pource qu'il aduient ordinairement, ce dit Sophocles, que

Qui laisse aller sa langue iniurieuse
A reprocher qualité vicieuse
De son bon gré vainement à autrui,
Le mesme il oyt puis apres malgré luy.

Voyla ce qu'il y a d'utile & de profitable à iniurier autrui: mais il n'y en a pas moins à estre iniurié, repris & blasmé de ses ennemis: & pourtant ne fut-ce pas mal dit à .. Diogenes, que pour sauuer vn homme il fault qu'il ait ou de bons amis, ou d'aspres ennemis: pour ce que ceux-là par bonnes remonstrances, & ceux cy par outrageuses iniures, le retireront de mal faire. Et pour ce que maintenant l'amitié a la voix fort H gresse & foible à remonstrer franchement à son amy, & qu'au contraire la flaterie d'icelle est grande babillarde à louer, & muette à reprendre, il nous reste d'ouïr la verité de nos faictz par la bouche de nos ennemis: ne plus ne moins que Telephus, à faute de medecin amy, fut contrainct de soubmettre son vlcere au fer de la lance de son ennemy: aussi ceux qui n'ont point de bien veuillans qui les osent reprendre librement de leurs fautes, il est force qu'ils endurent patiemment la parole de leur mal-veuillant ennemy, qui les chastie & reprenne de leur vice, ne prenant pas tant garde à l'intention de celuy qui le dit, qu'au faict duquel il mesdit. Car ainsi comme celuy qui auoit entrepris de tuer Prometheus le Thessalien, luy donna de l'espce si grand coup sur son apostume, qu'il la luy couppa en deux, & luy sauua par ce moien la vie, l'apostume estant creuee: aussi bien souuent vne iniure ditte par courroux, ou par mal-veuillance,

A veuillance, est cause de guarir vn mal incogneu, ou duquel on ne faisoit compte. Mais la plus part de ceux qui se sentent iniuriez, ne regardent pas si le vice qu'on leur obiice est en eux, mais sil y en a point quelque autre en celuy qui le leur obiice: & comme les luitteurs ne secouënt pas la poulciere dont ils sont saupoudrez, si ne font-ils pas eux les iniures dont ils sont diffamez, ains s'entrepoudrent l'un l'autre, & puis en se saboulant s'entresouillent & s'entresalissent l'un l'autre: là où il faudroit que celuy qui se sent iniurié de son ennemy, taschast d'oster plus tost le vice dont il seroit diffamé, que non pas la tache de sa robbe qu'on luy auroit monstree. Et encore que lon eust dit iniure qui ne fust pas veritable, si faudroit-il neantmoins rechercher l'occasion dont pourroit estre procedé vn tel opprobre, se donner de garde & craindre, qu'en n'y pensant pas, on eust commis aucun peché semblable, ou approchant de celuy que lon auroit obiicé. Comme Lacydes le Roy des Argiens, pource qu'il portoit sa per-
B ruque curieusement accoustree d'une certaine sorte, & que son alleure estoit trop molle & delicate, fut soupçonné d'estre impudique: si fut bien Pompeius, pour ce que quelquefois il grattoit sa teste d'un doigt seulement, combien qu'il fust fort esloigné d'estre lascif ny effeminé. Et Crassus fut accusé de conuerser charnellement avec l'une des religieuses vestales, pource qu'il auoit enuie de recouurer d'elle vn beau lieu de plaifance qu'elle auoit, & pour ceste cause parloit souuent à elle à part, & luy faisoit la court: & vne autre Vestale, nommee Posthumia, pour ce qu'elle rioit trop facilement, & parloit vn peu trop librement avec les hommes, fut tellement mescreüe de forfaire à son honneur, que son proces criminel luy en fut fait, par lequel elle fut
„ absoute: Mais le souuerain Pontife Spurius Minucius, en luy prononceant sa sen-
„ tence d'absolution, l'admonesta de n'vser plus deormais de paroles moins honnestes
„ que sa vie. Themistocles semblablement, encore qu'il en fust innocent, vint en
suspçon d'auoir esté traistre à la Grece, d'autant qu'il auoit amitié avec Pausanias, qu'il luy escriuoit souuent, & enuoyoit souuent deuers luy. Quand doncques on
C aura dit quelque chose qui ne fera pas veritable, il ne le faudra pas mespriser ny con-
temner, pour ce que lon sçaura bien qu'il fera faux, ains faudra examiner & enquerir, que c'est que nous aurons dit ou fait, ou nous, ou quelqu'un de ceux que nous aimõs, ou avec qui nous hantons, qui ait peu bailler aucune verisimilitude à la calomnie controuuee: car si les inconueniens de fortune aduersaire enseignent aux autres ce qui leur est vtile, comme Merope dit en vne tragedie,

Fortune aiant pour son salaire pris
Ce qui m'estoit de plus cher & grand pris,
M'a enseigné d'estre cy apres sage:

qui nous empeschera d'vser d'un maistre qui ne couste rien, c'est vn ennemy, pour
apprendre ce qui nous peut grandement profiter, & que nous ne sçauons pas? car vn
ennemy sent beaucoup de choses plus promptement que ne fait vn amy, pourautant
D que l'amant, ainsi que dit Platon, est auetugle à l'endroit de ce qu'il aime, là où en ce-
luy qui nous hait, outre la curiosité qu'il a de rechercher nos imperfections, il a encore
l'enuie de les dire & publier. Il y eut vn des ennemis de Hieron, qui en querellant luy
reprocha qu'il auoit l'halene puante: parquoy si tost qu'il fust arriué en son logis, il en
„ tança sa femme, luy disant: Et comment, pourquoy ne m'en auez vous aduertie? Elle
„ qui estoit simple & chaste, luy respondit, Je pensois que tous hommes sentissent ainsi.
„ Voyla comment nous sçauons plus tost les choses qui sont grossieres, corporelles, &
notoires à tout le monde, par nos ennemis, que par nos familiers & amis. Outre
cela il n'est pas possible de contenir sa langue, qui n'est pas petite partie de la vertu, &
la rendre tousiours obeïssante & subiette à la raison, sans auoir de tout poinct donté
& asseruy par exercitation, par labeur & longue accoustumance, les plus mauuais
passions de l'ame, comme la cholere: car vne parole qui eschappe contre la volonté,

Comment on pourra receuoir,

quel on voudroit bien retenir, comme dit Homere,

E

*Odyss. l. 1.
& ailleurs.*

Vn mot volé hors du pourpris des dents,
& les propos qui sortent de la bouche d'eux mesmes fortuitement, aduiennent le plus souuent, & principalement aux esprits qui ne sont pas bien mattez & bien exercitez, qui glissent & s'escoulent par vne impuissance de cholere, vn entendement non rassis, & vne trop licentieuse façon de viure: & puis pour vne parole, qui est la plus legere chose du monde, ainsi que dit le diuin Platon, & les Dieux & les hommes leur font payer vne tresgriefue & trespesante peine: là où le silence non seulement n'altere point, comme dit Hippocrates, mais aussi n'est point subiect à rendre compte, ny à payer amende: mais qui plus est en tolerance d'iniures, y a ne sçay quoy de la grauité de Socrates, ou plus tost de la magnanimité d'Hercules, si est vray ce que dit le poëte,

Il ne faisoit de paroles hargneuses

Non plus de cas que de mousches fascheuses.

il n'y a doncques rien plus graue ne plus beau, que d'ouir vn ennemy iniurieux, disant F
iniure, sans aucunement s'en passionner:

Ainsi qu'au long d'un haut bruyant rocher

Sans s'esmouuoir nauigue le nocher.

Mais encore est-ce plus grand exercice de patience, s'accoustumer à ouir sans mot dire son ennemy mesdire & iniurier: car y estant accoustumé vous supporterez facilement le courroux de vostre femme qui tantera, & endurerez sans vous troubler les paroles d'un amy, ou bien d'un frere, vn peu trop aspres & trop aigres: & si aduient que pere ou mere vous tanent ou vous battent, vous le souffrirez aisément, sans vous en alterer ny courroucer. Car Socrates s'accoustumoit à supporter en sa maison sa femme Xanthippé, qui estoit cholere, & auoit mauuaise teste, à fin que plus aisément & patiemment il conuersast avec les autres: mais il vaut beaucoup mieux exercer & accoustumer sa cholere à demourer quoye, & à ne se point esmouuoir, ny perdre patience en s'oyant outrager par les brocards, iniures, reproches, outrages, courroux & G
malignitez des ennemis & estrangers, que non pas de ses domestiques. Voyla comment on peut monstrier mansuetude & patience es inimitiez, mais simplicité, magnanimité & bonté, se peuuent mieux faire veoir es amities: Car il n'est pas tant honneste
» faire bien à ses amis, comme deshonneste de ne les secourir pas quand ils en ont be-
» soing. Laisser à prendre vengeance de son ennemy, quand l'occasion s'en presente, c'est humanité, mais auoir compassion de luy, quand il est tombé en aduersité, le secourir quand il nous en requiert, monstrier vne bonne volonté enuers ses enfans, & affection de secourir sa maison estant en affliction, celui qui n'aime ceste benignité, & ne loue ceste bonté,

A le cœur de noire teinture,

Battu d'acier à trempe dure,

Ou bien forgé de diamant.

H

César commanda que les statues erigees à l'honneur de Pompeius, aians esté abbatues, fussent redressées: dequoy Ciceron le louant, luy dit, En releuant les images de Pompeius, César, tu as affermy les tiènes. Et pourtāt ne fault-il point estre chiche de louange & d'honneur à l'endroit de son ennemy, quand il a fait chose qui iustement le merite, car cela rapporte plus grande louange à celui qui la donne: & si aduient aussi au contraire qu'on le blasme, l'accusation en a bien plus de foy, comme procedant non de la haine de la personne, mais de la reprobation de son fait. Mais ce qui est encore plus utile & plus beau que tout cela, c'est que celui qui se fera accoustumé à louer ses ennemis bienfaisants, & à n'estre point marry ny desplaisant quand quelque prosperité leur aduiendra, plus il le fera, & plus il s'esloignera de ce vilain vice de porter enuie à la bonne fortune de ses amis, ny à ses familiers acquerans honneur. Et y il exercita-

- A exercitation au monde qui peult apporter vne plus profitable habitude à nos ames, ou vne disposition meilleure, que celle qui luy oste ceste peruerse emulation de ialousie, & ceste inclination à l'enuie? Car tout ainsi comme en vne cité il y a plusieurs choses necessaires, mais mauuaises pourtant, lesquelles depuis qu'elles ont vne fois pris pied & force de loy par coustume, il est bien mal-aisé de les oster, encore qu'elles facent du dommage: aussi l'inimitié introduisant en nostre cœur quand & elle la haine, l'enuie, la ialousie, l'aise du mal d'autrui, & la souuenance des offenses passées, elles les y laisse encore apres qu'elle en est sortie: & outre ces vices-là, la finesse encore, la tromperie, l'embusche, l'aguet & surprise, qui ne semblent pas estre mauuaises, ny iniustes contre l'ennemy, depuis qu'elles y sont vne fois imprimees, y demeurent fichees, sans que iamais lon s'en puisse desfaire, de sorte que lon vient à en vser contre les amis mesmes, si lon ne s'en donne de garde contre les ennemis. Si doncques Pythagoras faisoit sagement de s'accoustumer iusques aux bestes
- B brutes à s'abstenir de cruauté & d'iniustice, en priant les oyseurs & preneurs d'oyseaux de les laisser aller apres qu'ils les auoient pris, & achetant les traicts de rets des pescheurs, & puis leur commandant de les reietter en la mer, & interdisant de tuer aucune beste priuee: Il est certainement beaucoup plus venerable & plus digne es querelles, debats & contentions que lon a contre les hommes, qu'un genereux ennemy, iuste, & non point traistre, reprime les meschantes, malicieuses, lasches & cauteleuses passions de l'ame, & les mette sous les pieds, à fin que puis apres es affaires qu'il aura à demesler & traicter avec ses amis, elles ne bougent & s'abstiennent de faire aucun tour de finesse & de tromperies. Scaurus estoit ennemy & accusateur de Domitius, & y eut vn des seruiteurs dudit Domitius, qui auant le iugement du procès s'en alla deuers luy, disant qu'il luy vouloit descouurir quelque chose qu'il ne scauoit pas, laquelle luy seruiroit en son plaidoyer contre son maistre: Scaurus ne le voulut point ouir parler, ains le fait prendre, & le renuoya lié & garroté à son maistre. Caton le ieune accusoit Muræna d'auoir corrompu & acheté les voix du peuple, pour paruenir au consulat, & alloit recueillant çà & là les preuues, & selon la coustume des Romains, il y auoit de la part de l'accusé des gardes qui le suiuoient par tout, regardans & obseruans ce qu'il faisoit pour l'instruction de son procès: ces obseruateurs luy demandoient bien souuent s'il recherchoit rien ce iour-là, & s'il negocieroit rien appartenant son accusation: s'il disoit que non, ils luy adioustoient telle foy, qu'ils s'en alloient. Or est bien cela vn indice tresgrand de l'opinion que lon auoit de sa iustice: mais encore plus grand & plus beau tesmoignage est il de ce, que si nous nous accoustumons à vser de la iustice enuers les ennemis mesmes, iamais ne nous porterons iniustement, finement, ny cauteleusement enuers nos amis. Mais pour ce qu'il fault que toutes allouettes, comme dit Simonides, aient la houppe sur la teste, & que la vie de tous hommes porte ie ne scay
- D quoy de ialousie, d'enuie, d'emulation, & de contention entre amis de vaine ceruelle, ce dit Pindare: ce ne seroit pas peu de fruit, ny legere vtilité, si lon apprenoit à faire les vuidanges de telles passions sur ses ennemis, pour en diuertir les esgouts, par maniere de dire, & les cloaques le plus loing que lon pourroit des familiers & amis. Dequoy il semble que s'aduisa anciennement vn sage homme d'estat, nommé Demus en l'Isle de Chio, lequel en vne sedition ciuile estant de la partie qui estoit demouree superieure, conseilla à ceux de son party de ne chasser pas de la ville tous leurs aduersaires, ains y en laisser quelques vns: de peur, dit-il, que nous ne commandions à exercer nos querelles contre les nostres mesmes, quand nous n'aurons plus d'ennemis à qui quereller: aussi quand nous despendrons & employerons ces viciueuses passions-là contre nos ennemis, elles facheront moins nos amis. Car il ne fault pas que le potier porte enuie au potier, comme dit Hesiodé, ny le chantre au

Comment on pourra receuoir

chantre, ny que le voisin ait ialousie de son voisin, le cousin du cousin, ny le frere du E
frere, s'efforçant de deuenir riche & de bien faire ses besongnes : mais fil n'y a moyen
autre de se desfaire totalement de contentions, enuies, ialousies & emulations, accou-
stume toy au moins à estre marry de l'heureux succès de tes ennemis, aiguise & acere
la pointe de ton emulation contre ceux là : car ainsi comme les bons iardiniers ont
opinion qu'ils rendent les roses & les violettes meilleures en semant aupres des aulx &
des oignons, pour ce que tout ce qu'il y peut auoir de forte & de puante odeur au suc
dont elles sont nourries, se purge en ceux-là : aussi l'ennemy receuant & tirant à soy
toute l'enuie & la malignité, nous rendra plus traictables & plus gracieux enuers nos
amis en leurs prosperitez : pourtant sera ce contre eux qu'il faudra estriuer & combat-
tre de l'honneur, des offices & magistrats, & des iustes moyens de faire ses besongnes
& acquerir des biens, non seulement estans marris de les en voir auoir d'auantage que
nous, mais aussi obseruans en quoy & par quels moyens ils en ont plus, pour s'esuer-
tuer par sollicitude, par trauail, par espargne, & par entendre bien à soy, de les sur- F
passer, comme Themistocles disoit, que la victoire de Miltiades, qu'il auoit gaignee
en la plaine de Marathon; ne le laissoit point reposer. Car celuy qui pense que son
ennemy le surmonte en dignitez & charges publiques, en plaidoyers de grandes cau-
ses, & en maniemment d'affaires, ou en credit & autorité enuers les Princes & Sei-
gneurs, & au lieu de s'esuertuer à entreprendre quelque chose, & à estriuer encontre
luy, se va tapir & se ranger d'enuie à perdre courage entierement, il monstre qu'il est
saisi d'une enuie oyseuse & paresseuse seulement : mais celuy qui ne sera pas au eugle
alendroict de celuy qu'il haïra, ains considerera & regardera de iuste œil toute sa vie,
ses mœurs, ses propos, & ses faicts, il verra que la plus part des choses ausquelles il
porte enuie ont esté acquises de ceux qui les ont par diligence, prudence, & toutes
vertueuses actions, & tendant tout son esprit à cela, il exercera & aiguïsera son am-
bition & son desir d'honneur, & au contraire reiettera arriere de son cœur toute fe-
tardise & langueur. Et si d'auenture nos ennemis auront acquis en court, ou enuers le G
peuple, au maniemment des affaires quelque autorité & credit indigne, par flaterie
ou par tromperie, ou par plaiderie, ou par concussion d'argent pris falement, cela ne
nous faschera point, ains au contraire nous resiouïra, quand nous viendrons à oppo-
ser alencontre nostre liberté, la pureté & netteté de nostre vie, & nostre innocence, à
laquelle on ne scauroit rien reprocher : car tout tant d'or qu'il y a dessus & dessous
la terre, ce dict Platon, n'est pas comparable à la vertu : & fault tousiours auoir à
main la sentence de Solon,

Plusieurs meschans deuïennent riches gens,
Et plusieurs bons demeurent indigens,
Mais toutefois changer nostre bonté
Nous ne voudrions à leur meschanceté :
Car la vertu est tousiours perdurable,
Et la richesse incertaine & muable.

H

Aussi peu certes voudrions nous eschanger les acclamations d'une multitude popu-
laire, en vn theatre, faoulee à nos despens, ny les honneurs & faueurs de seoir les
premiers à table chez les fauorits, ou les amis, ou les lieutenants, & gouuerneurs des
.. Roys, car rien n'est desirable ny honneste qui procede de cause deshonneste : mais ce-
.. luy qui ayme, comme dict Platon, est tousiours au eugle à l'endroit de ce qu'il ayme,
& remerquons plus tost les fautes & impertinences que font nos ennemis : mais il ne
fault pas ny que le plaisir de les voir faillir demeure oyseux, ny le desplaisir de les voir
bien faire, inutile : ains faire compte & recueillir des deux, qu'en nous gardant de l'un,
nous deuïendrons meilleurs : & en imitant l'autre, pour le moins nous ne serons pas
pires qu'eulx.

Comment

A Comment lon pourra apperceuoir si lon amende &
PROFITE EN L'EXERCICE DE LA VERTU.



L n'est possible que lon se cognoisse, ny que lon se sente profiter en vertu, Seigneur Sossius Senecion, si ce profit & amendement n'amene à la iournee quelque diminution de vice & de folie, & si le vice nous aggrauant tout à l'entour de pesanteur egale nous retient tousiours à bas,

Comme le plomb tire à fond le filé :

ne plus ne moins qu'en l'art de la musique, ou de la grammaire, on ne scautoit iamais combien on auanceroit si lon ne voyoit qu'en estudiant on vuydast & espuisast tousiours

- B quelque partie de l'ignorance de ce que traictent ces arts là, & que l'on sceust tousiours aussi peu que deuant: ny la cure que le medecin employe à penser vn malade ne luy bailleroit aucun sentiment de difference, si elle n'apportoit quelque meilleur portement, & quelque allegement par la diminution de la maladie s'en allant peu à peu, iusques à ce que la disposition contraire fust entierement restituee, & le corps retourné de tout poinct en sa santé & sa force premiere. Mais tout ainsi comme en ces choses là on n'y amende point, si ceux qui y amendent n'en apperçoient l'amendement & le changement par la diminution de ce qui leur pesoit, se sentans aller au contraire, ne plus ne moins qu'en vne balance, à mesure que l'un des plats monte, l'autre descend: aussi en ceux qui font profession de la philosophie, il ne faut point conceder, qu'il y ait amendement, ny sentiment aucun d'amendement, si l'ame ne se despouille peu à peu, & ne se purge tousiours de sa folie, & qu'il faille que elle soit tousiours saisie d'un souuerain mal, iusques à ce qu'elle ayt attrainct le souuerain & parfait bien: car par ce
- C moyen il s'enfuyuroit, si en vn instant & en vn moment d'heure le sage passoit d'une extreme meschanceté en vne supreme disposition de vertu, qu'il auroit tout à coup en vn moment fuy le vice entierement, duquel il n'auroit peu en long temps oster de soy la moindre partie. Combien que vous sçauiez que ceux qui tiennent telles opinions extrauagantes, se donnent à eux mesmes beaucoup d'affaires, & se trouuent en de grandes perplexitez quand on leur allegue le passé, si nul d'eux n'a point cognu quand il est deuenu sage, & si l'ignore ou doute que cest accroissement se soit faict par espace de long temps, en ostant de l'un, & adioustant à l'autre, comme vn arriuer tout bellement à la vertu, sans que lon s'en apperçoie: & si se faisoit vne si grande & si soudaine mutation, que celuy qui estoit au matin tres-vicieux se trouuast au soir tres-vertueux, & si estoit iamais adueni à aucun tel changement, que s'estant endormy fol, il se fust esueillé sage, & qu'il eust ainsi parlé aux folies & tromperies qu'il
- D auoit hyer, & qu'il auroit aujourd'huy chassée de son ame,

Allez vous-en arriere de moy songes,

Vous n'estiez rien que deceuans mensonges.

Seroit-il possible que quelqu'un n'eust senty vne si grande & soudaine mutation qui se seroit faicte dedans luy mesme, & vne sapience qui tout à coup luy auroit ainsi illuminé & esclairé l'ame? quant à moy, il me semble qu'un homme qui auroit esté transformé par les Dieux, à sa requeste, de femme en homme, comme lon dit de Caneus, ignoreroit plus tost ceste metamorphose & transmutation, que non pas estant rendu temperant, prudent & vaillant, de dissolu, fol, & couard qu'il estoit au parauant, & estant transporté d'une vie bestiale en vne celeste & diuine, il en ignorast le poinct de l'instant auquel se seroit faict vn tel changement. Mais il a bien esté dict anciennement, qu'il failloit accommoder la pierre à la regle, & non pas la regle à la pierre:

Comment on pourra appercevoir,

& ceux-cy ne voulans pas accommoder leurs opinions aux choses, ains à toute force E
contraindre les choses, contre toute nature, de se conformer & accorder à leurs opi-
nions, & suppositions, ont remply la philosophie de grandes perplexitez, mesme-
ment de ceste-cy qui est tres-grande, comprenant tous hommes ensemble sous le
vice, excepté vn seul, celui qui est parfait: laquelle sauage supposition a fait, que
ce mot de amendement leur semble vn ænigme, & vne fiction bien peu distante d'ex-
treme refuerie, & que ceux qui par le moyen de cest amendement, sont deliurez de
toutes passions ensemble & de tous vices, ils les tiennent pour aussi malheureux, que
ceux qui ne sont exemptez d'aucun des plus enormes vices du monde: & toutefois
ils se refutent & se condamnent eux mesmes, car es disputes de leurs escholes ils
mettent l'iniustice d'Aristides pareille à celle de Phalaris, & la timidité de Brasidas à
celle de Dolon, & l'ingratitude de Melitus en rien qui soit differente de celle de Pla-
ton: & toutefois en leur vie, & en manient d'affaires, ils fuyent & declinent ceux
là comme gens de mauuais affaire: & se seruent de ceux-cy, & se fient à eux de leurs F
plus importans negoces, comme à personnes d'honneur & de valeur. Mais nous
qui voyons qu'en tout genre de mal, principalement au desordre & debauchement
de l'ame, il y a tousiours plus & moins, & que c'est en quoy different les amende-
ments, selon que la raison petit à petit enlumine, purge & nettoye l'ame, en dimi-
nuant la meschanceté, comme l'ombre & l'obscurité, estimons qu'il n'est point
hors de raison d'asseurer que lon en sent la mutation, bien qu'elle sorte comme
d'un fond obscur, mais elle conte & estime combien elle va droit en auant, ne plus
ne moins que ceux qui courent avec voiles par l'infinie estenduë de la mer, en ob-
seruant ensemble la longueur du temps, & la force du vent qui les pousse, viennent
à mesurer le chemin qu'ils ont fait, combien il est vray semblable, qu'en tant de
temps, & estans portez par vne telle puissance de vent, ils en ayent passé: aussi en la
philosophie on peut prendre coniecture de l'amendement & auancement, que lon
aura gagné par l'assiduité & la continuation de tousiours marcher, sans souuent far- G
rester au milieu du chemin, & puis recommencer ou falter, ains tousiours aller
vniement, & egaleement tirer en auant, & passer outre avec la guide de la raison: car
ce precepte là,

Hesode au
poëme des
œuvres.

Si tu vas peu avecques peu mettant,
Et plusieurs fois ce peu-là repetant,
n'a pas seulement lieu, & n'est pas seulement bien dit, pour augmenter les sommes de
deniers, mais aussi pour toutes autres choses, & mesmes pour accroissement de la
vertu, par ce que la raison en prent vne accoustumance, qui est de grande force &
efficace: là où les intermissions inegales, & mousses, ou tiedes affections de ceux qui
se mettent à la philosophie, ne font pas seulement des pauses & des arrests de l'amen-
dement, comme quand on se repose par le chemin: mais qui pis est, des relasche-
ments & reculemens en arriere, pour ce que le vice, qui est tousiours au guet leur H
vient courir sus, aussi tost comme il sent qu'ils se laschent vn peu en oyfueté, & les
fait rebourser chemin. Car les mathematiciens appellent les planetes stationnaires,
& disent qu'elles s'arrestent quand elles cessent d'aller en auant: mais à profiter en
philosophie, c'est à dire, en correction de mœurs & de vie, il n'y peut auoir inter-
ualle d'amendement, ny pause & cessation aucune, pour ce que la nature estant en
vn perpetuel mouuement, veult tousiours qu'on la pousse en la meilleure part, ou au-
trement elle se laisse emporter, comme vne balance, en la pire. Si doncques suiuant
l'oracle qui fut respondu par Apollo à ceux de Cirrha, que fils vouloient viure en
paix les vns avec les autres, il falloit qu'ils feissent la guerre sans cesse iours & nuicts
au dehors: aussi si tu sens en toy-mesme que tu ayes combatu iour & nuict continuel-
lement contre le vice, ou non gueres souuent abandonné ta garnison, ny reçu or-
dinairement

- A** dinairement de luy des heraults & messagers, qui sont les voluptez, les negligences, & les amusemens à traicter de paix, il est vraysemblable que tu peux lors asseurément & hardiment passer oultre. Mais encore qu'il y eust des interruptions de viure philosophiquement, prouueu que les derniers fussent tousiours plus rares, & les reprises plus longues que les premieres, ce seroit vn signe qui ne seroit pas mauuais, d'autant qu'il tesmoigneroit que par labeur & exercitation la paresse s'en iroit peu à peu chassée: comme le contraire aussi seroit mauuais signe, qu'il y eust plusieurs intermissions, & pres l'une de l'autre, pource que cela monstreroit que la chaleur de l'affection premiere s'en iroit peu à peu aneantissant & refroidissant. Car tout ainsi comme la premiere bouttee que fait le germe du roseau, aiant forcé de poulsier grande, produit vne longue tige droicte, egale & vnie du commencement, pour ce qu'elle ne trouue rien qui l'arreste, ne qui la repoulse: & puis apres, comme si elle se lassoit au hault par vne defaillance de courte haleine, elle est souuent retenue par plusieurs
- B** nœuds, non gueres distans l'un de l'autre, comme si l'esprit qui poulse contremont trouuoit quelque empeschement qui le rabbarist, & qui le feist trembler: aussi tous ceux presque qui d'entree font de grands ellans en l'estude de philosophie, & puis vn peu apres trouuent souuent des empeschements & des diuertissemens, ceux-là, sans sentir aucune difference de mutation en mieux, à la fin se lassent, quittent tout, & demeurent tout court, là où aux autres des ailes leur naissent, & pour le fruiet qu'ils sentent donnent à trauers toutes excuses, & fendent tous empeschements, comme vne presse de gens qui leur voudroient empeschier le passage par force, & bonne affection de venir à chef de leur entreprise. Tout ainsi doncques comme l'esioir de voir vne belle creature presente n'est pas signe d'amour commenceant, pour ce que cela est commun à toutes gens, mais bien sentir vn regret, & estre marry quand on en est separé: aussi y en a il plusieurs qui prennent plaisir à la philosophie, & qui semblent s'attacher fort gaillardement à l'estude, mais fil aduient qu'ils soient vn peu
- C** retirez de là par autres negoces & affaires, ceste premiere affection qu'ils auoient prise seuanouit, & ne s'en soucient gueres: mais celuy qui est attainit au vif de la pointure d'amour de la philosophie, semblera moderé & non trop eschauffé en le frequentant à l'estude, & conferant avec luy de la philosophie: mais quand il en sera distraict & retiré arriere, on le verra brulant, impatient, & se faschant de tous autres affaires, & de toutes autres occupations, iusques à oublier ses propres amis, tant il aura vn passionné desir de la philosophie. Car il ne fault pas se delecter des lettres & de la philosophie, comme lon fait des senteurs & des parfums, en les trouuant beaux & bons tant comme ils sont presents, & puis quand on les a ostez, ne les regretter plus, & ne s'en soucier point: ains fault qu'elles impriment en nos ames vne passion semblable à la soif, & à la faim, quand on nous en distraict, si nous y voulons profiter à bon escient, & y appercevoir amendement, quelque occasion que ce soit qui nous en
- D** distraie, ou mariage, ou richesse, ou amitié, ou quelque voyage de guerre qui survienne: car d'autant que plus grand sera le fruiet que lon en aura appris, d'autant sera plus grief le regret de ce que lon en aura laissé. A ce premier signe d'amendement ioinct vn autre tresancien, qui est tout vn ou bien pres de la, c'est celuy que décrit Hesiodé quand on ne trouue plus la voye trop aspre ny roide, ains facile, plaine & vnie, comme estant applanie par l'exercitation, & que la lumiere y commace à reluire clairement au lieu des perplexitez, fouruoyemens en tenebres, & des repentances esquelles encourent bien souuent ceux qui se mettent à la philosophie du commencement ne plus ne moins que ceux qui laissent vn païs qu'ils cognoissent bien, & ne voyét pas encore celuy auquel ils tendent par mer. Car aians abandonné les choses communes, & qui leur estoient familiares, deuant qu'auoir cogneu les meilleures, & en auoir iouy, en cest interualle du milieu ils sont fort trauaillez, tellement qu'aucuns retour-

Comment on pourra appercevoir

nent arriere : comme lon dit que Sextius Gentil-homme Romain, ayant abandon- E
né les honneurs, offices, & Magistrats de la ville de Rome, pour l'amour de la philo-
sophie, & puis se trouuant en l'estude d'icelle tourmenté, & ne pouuant mordre en
ses discours & raisons du commencement, fut prest de se ietter d'une fuste dedans la
mer. Semblable chose recite lon de Diogenes le Sinopien, quand il commença de
se donner à la philosophie, c'estoit vn iour de feste solennelle que les Atheniens fai-
soient des festins publics, des jeux és Theatres, des assemblees les vns avec les au-
tres, des danſes & des masques toute la nuit : & luy en vn coing de la place, festant
enueloppé comme pour y dormir, tomba en des imaginations qui luy mettoyent le
cerueau sans dessus-dessous, & luy affoiblissoient fort le cœur, en discourant que,
sans aucune necessité qui le contraignist, il festoit allé volontairement ietter en vne
vie laborieuse, estrange & sauage, festant segregé de tout le monde, & priué de
tous biens. Sur ces entrefaictes il apperceut vne petite souris qui venoit ronger les
miettes qui luy estoient tombées de son gros pain, & qu'alors il reprit cœur, & dit en F
" soy-mesme, comme se reprenant, & blasmant sa foiblesse de courage: Que dis-tu
" Diogenes? voyla vne creature qui vit encore & fait grand chere de ton relief, &
" toy, lasche que tu es, as regret à ta vie, & te lamentes de ce que tu n'es pas saoul &
" yure comme ceulx-là, couché en lits mols, delicats, & richement parez. Quand
donc telles tentations de diuertissements ne reuiennent pas souuent, & que la raison
fesseleu incontinent à l'encontre, qui les rembarre, & au retour comme de la chasse
de ses ennemis dissout aisément tout le nuage de desespoir & de languissant en-
nuy, qui festoit concreé en l'entendement, alors se peut-on asseurer qu'il y a cer-
tain profit & amendement. Mais pour-autant que les occasions qui esbranlent les
hommes qui s'addonnent à la philosophie, & quelquefois les font retourner en arrie-
re, non seulement naissent & prennent force en eux-mesmes, à cause de leur infirmi-
té : mais aussi les poursuites & instances que leur en font leurs amis à bon escient, les
attaches que leur en donnent leurs aduersaires par maniere de risée & de mocquerie, G
attendrissent, amollissent & ployent leurs cœurs, voire iusques à en auoir dechassé
de tout poinct quelques vns hors de la philosophie, ce ne sera pas vn mauuais signe
d'auancement si l'on supporte cela doucement, sans s'esmouuoir, ny se chatoüiller,
de leur ouïr raconter par nom & par surnom aucuns de leurs compagnons qui sont
paruenus en grand credit, & à grands biens aux Cours de quelques Princes, ou qui
ont eu de gros mariages des femmes qu'ils auront espousees, & qu'ils sont allez avec
vne grande & honorable compagnie de gens en la place & au palais, pour quelque
office, ou bien pour plaider quelque noble cause de grande consequence : car celui
qui ne s'esmeut ny ne festonne ou lasche point pour ouïr toutes ces emorches-là,
donne certainement à cognoistre qu'il est pris & arresté comme il fault de la philoso-
phie: car il n'est pas possible de se garder de conuoiter ce que les autres adorent, sinon à
ceux qui n'admirēt rien que la vertu. Car de brauer & faire teste à des hommes, il eschet H
à aucuns par cholere, & à d'autres par folie : mais de mespriser & reietter ce que les au-
tres estiment iusques à admiration, il n'est homme qui le sceust faire sans vne grande,
vraye, & constante magnanimité : d'où vient que se comparans aux autres en cela, ils
s'en glorifient, comme fait Solon quand il dit,

Plusieurs meschants deuiennent riches gens,
Et plusieurs bons demeurent indigens,
Mais toutefois changer nostre bonté
Nous ne voudrions à leur meschanceté:
Car la vertu est ferme & perdurable,
Et la richesse incertaine & muable.

& Diogenes comparoit son passage de la ville d'Athenes en celle de Corinthe, & de
celle

- A celle de Corinthe à celle de Thebes, aux mutations de seiour que faisoit le grand Roy de Perse, lequel passoit la saison du printemps à Suse, celle de l'hyuer en Babylone, & l'esté en la Medie. Et Agesilaus oyant nommer le Roy de Perse, le grand Roy:
- » Pourquoi, dit-il, est-il plus grand que moy, si ce n'est qu'il soit plus iuste? & Aristote
- » escriuant à Antipater touchant Alexandre le grand, luy demande: Qu'il ne luy appartenoit pas à luy seul de s'estimer grand, pour ce qu'il dominoit beaucoup de pais:
- » mais aussi à quiconque auoit droicte & saine opinion des Dieux. Et Zenon voiant
- » que Theophrastus estoit en grande estime, pour ce qu'il auoit beaucoup d'auditeurs,
- » dit: Son auditoire est plus grand que le mien, mais le mien est mieux d'accord que le sien. Quand doncques tu auras ainsi estably & fondé en ton cœur l'affection qu'il faut porter à la vertu, au pris des choses exterieures, & versé hors de ton ame toutes enuies, toutes ialousies, & tout ce qui chatouille, ou qui rebute plusieurs de ceux qui commencent à philosopher, cela te fera vn grand indice & argument de profiter &
- B auancer en la philosophie: aussi n'en sera-ce pas vn petit, que la mutation des propos autres que lon ne souloit tenir: car tous ceux qui commencent à estudier en philosophie, à parler vniuersellement, cherchent plus ceux qui ont de la gloire & de l'apparée, les vns se iuchant en hault, comme les coqs & les poules, à la splendeur & hauteur des choses naturelles, pour ce qu'ils sont legers & ambitieux de leur inclination naturelle: les autres prenans plaisir ainsi comme les ieunes leurons, ce dit Platon, à tirer & deschirer tousiours quelque chose, s'en vont droict aux disputes, aux questions & arguts de la Dialectique, & la plus part en prennent prouision pour passer oultre, iusques à la Sophistique. Il y en a qui vôt ça & là faisans amas des beaux dictz, notables sentences & belles histoires des anciens: comme Anacharsis disoit qu'il ne voyoit point que les Grecs vsassent de leurs deniers monnoyez à autre vsage qu'à ietter & compter: aussi ne font ceux-là autre chose que compter & mesurer leurs bōs propos & belles histoires, sans en tirer autre commodité ne profit. Et comme Antiphanes, l'un des familiers de Platon en se iouant disoit, qu'il y auoit vne ville là où les paroles se geloient en l'air incontinent qu'elles estoient prononcees, tant il y faisoit froid, & puis quand elles venoient à se fondre l'esté, les habitans entendoient ce qu'ils auoient deuisé & parlé l'hyuer precedant: aussi la plus part, disoit-il, de ceulx qui viennent ouir ieunes les discours de Platon, à peine les entendent-ils iusques bien tard, quand ils sont deuenus tous vieux: aussi leur en prent-il de mesme enuers toute la philosophie, iusques à ce que le iugement aiant pris vne fermeté de resolution saine & rassise, vient à donner dedans les discours qui peuuent imprimer en l'ame vne affection morale, vne passion d'amour, & à chercher ces propos-là, dont les traces tendent plus tost au dedans que non pas au dehors, cōme dit la fable d'Æsope. Car ainsi cōme Sophocles disoit en se iouant, qu'il vouloit changer la hauteſſe de l'inuention d'Æschylus, puis sa fascheuse & laborieuse disposition, & en tiers lieu l'espece de son elocution & de sa diction, qui est tres-
- D bonne, & pleine de douces affections: aussi les estudiâs en Philosophie, quand ils sentiront qu'ils ne s'arresterōt plus aux choses artificiellement & ingenieusement escrites par ostetation, ains passeront aux morales, & qui touchent au vif les affections, c'est lors qu'ils commenceront à profiter veritablement & à bon esciant. Considere donc non seulement en lisant les œuvres des poëtes, ou en les oyant lire, premierement si tu ne t'attacheras point plus tost aux paroles qu'à la sentence, & ne te ietteras point plus tost à ce qui est subtil & aigu, qu'à ce qui est vtile, profitable & charnu: mais aussi en versant dedans les escripts des poëtes, & en prenant en main quelque histoire, obserue bien si tu laisses point eschapper aucune sentence bien dite, pour reformer les mœurs ou alleguer quelque passion: car comme Simonides dit, que l'abeille hante les fleurs pour en tirer le roux miel, là où les autres en aiment seulement la couleur & la senteur, & n'en veulent, ny n'en prennent autre chose: aussi là où les autres

Comment on pourra appercevoir,

versent en la lecture des poëtes pour plaisir seulement , & par maniere de ieu, celuy E qui trouue quelque chose digne d'estre notee , & en fait vn recueil, semble desia recognoistre de premier front le bien, par vne familiarité & amitié de longue main prise avec luy, comme son domestique. Car ceux qui lisent les œuures de Platon & de Xenophon, pour la beauté du style seulement, sans y chercher autre chose que la pureté du langage naïfement Attique, comme fils alloient recueillant ce peu de rosee & de bourre qui vient dessus les fleurs, que diriez vous de ceux-là, sinon qu'ils aiment des drogues medicinales la belle couleur, ou la douce senteur seulement, mais au demourant la propriété de purger le corps, ou d'appaiser vne douleur qu'elles ont, ils ne la cognoissent point, & ne s'en veulent point seruir? Au demourant ceux qui passent encore plus auant en ce profit, non seulement tirent vtilité des escripts & des paroles, mais aussi des spectacles & des choses qu'ils voient, & en tirent ce qui leur est propre & commode: comme lon escrit d'Æschylus, & de plusieurs autres semblables: car Æschylus estant vn iour present à voir és ieux Isthmiques vn combat de deux F champions combattans à l'escrime des poings, comme l'un deux eust receu vn grand coup bien assené, tout le theatre s'escria: luy, poulsant du coude vn nommé Ion natif de Chio, Voys-tu, dit-il, combien peult l'accoustumance & exercitation? le frappé ne dit mot, & les regardans crient. Et Brasidas aiant trouué vne souris parmy des fignes seiches, qui le mordit au doigt, il la laissa eschapper, & puis dit en luy-mesme, O Hercules, voyez-vous cōment il n'y a rien si petit ne si foible, que fil oze se defendre, ne trouue moyen de sauuer sa vie! Et Diogenes aiant veu vn qui buuoit dedās le creux de sa main, ietta le gobelet qu'il portoit en sa besace: tant l'accoustumance & l'exercitation, qui bien l'a continuee, & y a esté diligent, rend les personnes promptes à remarquer & à receuoir de tous costez choses qui seruent à la vertu: ce qui se fait encore plus quand ils meslent les paroles avecques les actions, non seulement en la sorte que dit Thucydides, apprenans & s'exercitans entre les perils, mais aussi contre les voluptez, contre les querelles & altercations és iugemens, és defenses des causes, és G magistrats, comme donnans preuue des opinions qu'ils tiennent, ou plus tost par leurs deportemens enseignans quelles opinions on doit tenir. Car ceux qui apprennent encore, & neantmoins s'entremettēt d'affaires, & qui ne font qu'espier fils pourront desrober quelque chose de la philosophie pour l'aller incontinent prescher, comme charlatans, ou au milieu d'une place, ou en vne assemblée de ieunes gens, ou à la table d'un Prince: il ne faut non plus estimer que ces manieres de gens-là facent actes de philosophes, que ceux qui vendent les drogues medicinales & les simples facent actes de medecins: ou pour mieux dire, ce contrefaiseur-là de philosophe ressemble proprement à l'oysseau que décrit Homere, qui porte incontinent en sa bouche, tout ce qu'il peult prendre, à ses disciples, comme à des petits qui sont encore dedans le nid sans plumes,

Iliad, liu. 7.

Et ce pendant il meurt de faim luy-mesmes: ne prenant rien de ce qu'il apporte pour s'en valoir & nourrir, ou ne digerant rien de ce qu'il prent. Et pourtant faut-il bien prendre garde si nous faisons vn discours que ce soit quant à nous, pour en vser en nous-mesmes: & quant aux autres, que ce ne soit point pour vne vaine gloire, ny pour ambition de nous monstrier, mais en intention d'apprendre ou d'enseigner quelque bonne chose: & sur tout faut aussi bien obseruer, si toute opiniastrerie, & toute contentieuse animosité en dispute, est en nous amortie, & si nous auons desormais desisté d'inuenter ambitieusement des raisons pour confondre noz aduersaires, ne plus ne moins que les champions de l'escrime des poings, à qui on lie de grosses courroyes alentour des bras, & des boules dedans les mains, prenans plus de plaisir à assener vn bon coup, & à ruer par terre nostre compagnon, que non pas à apprendre ny enseigner: car la douceur & de-
bonnairété

H

A bonnairété en cela, de ne vouloir iamais attacher vne cōference de dispute avec intention de vaincre en cōbattant, ny la rōpre en courroux, ny par maniere de dire, fouler aux pieds l'aduersaire quand on l'a vaincu, ou estre desplaisant quand on a esté vaincu, ce sont signes d'homme qui a suffisamment ja profité : ce que monstra bien vn iour Aristippus aiant esté pressé de si pres en quelque dispute, qu'il ne sceut que respondre sur le champ à vn sophiste audacieux, mais au demourant homme eceruélé & sans iugement : car le voyant fort ioyeux & foit enflé de vaine gloire, pour l'auoir ainsi
 „ rengé à ne sçauoir que dire, Je m'en vois, luy dit-il, vaincu pour ce coup, mais ie dor-
 „ miray plus iouïfucement que toy qui as vaincu. Nous pouuons encore nous esprouer & ionder nous mesmes quand nous haranguons publiquement, si ne pour voir en l'audience plus de gens que nous n'en auions attendu, nous ne restiuons point de peur, ny au contraire nous ne laschons point nostre courage pour y en auoir moins que nous n'auions esperé, ny là où il est besoing de haranguer deuât vn peuple ou deuant vn magistrat, nous perdons l'occasion de ce faire, pour n'auoir pas bien premedité & mis par escript ce que nous deurions dire, comme lon recite de Demosthenes & d'Alcibiades: car Alcibiades estant tres-ingenieux & prompt à inuenter les choses, estoit craintif à les dire, & se troubloit quand il venoit à les exposer, car bien souuent au milieu de son dire il cherchoit le mot propre à exprimer sa conception, ou quelque parolle qui luy estoit eschappée de la memoire, qui le faisoit demourer tout court en parlant. Et Homere ne feignit point de mettre hors le premier de ses vers defectueux en mesure, tant il auoit d'assurance de la perfection & bonté des autres, pour sa suffisance en l'art poétique : tant plus est-il vraysemblable que ceux qui n'ont rien deuant les yeux, où ils aspirent, que la vertu & le deuoir seulement, se seruent de l'occasion du temps, & de l'occurrence des affaires, sans se soucier que lon applaudisse à leur beau parler, ne qu'on les siffle, ou qu'on leur face bruit pour le trouuer mauuais : si ne faut pas prendre garde aux parolles seulement, mais aussi aux actions, fil y a plus de profit
C que de parade, & plus de verité que d'apparence & d'ostentation. Car si le vray amour de fille ou de femme ne demande point de tesmoings, ains iouïst de son contentemēt à par soy, encore que secrettement & sans le sçeu de personne il accomplisse son desir: combien plus est-il croyable que celuy qui est amoureux de l'honnesteté & du deuoir, hantant familièrement par ses actions avec la vertu, & en iouïssant, sente sans en mot dire vn grand & haut contentement en soy-mesme, ne demandant autres auditeurs ny autres spectateurs que sa conscience propre? comme celuy qui appelloit sa chambriere en sa maison, & crioit tout haut, Dionysia regarde comment ie ne suis plus glorieux ne superbe : aussi celuy qui a fait quelque chose hōneste & vertueuse, & puis la va conter & la porte monstrier par tout, il est tout euident que celuy-là regarde encore dehors, & est tiré de la conuoirise de vaine gloire, & n'a point encore veu à nud & au vray la vertu, ains seulement en dormant & en songe en a pensé entrevoir quelque
D vmbre & quelque image, puis qu'il expose ainsi en veuë ce qu'il a fait, comme vn tableau de peinture. Celuy doncques qui profitera, non seulement quand il aura donné quelque chose à vn sien amy, ou fait quelque bien à vn sien familier, n'en dira rien: mais aussi quand il aura donné sa voix ou sa balotte iuste entre plusieurs autres iniustes, ou quand il aura fermement resisté en face au propos deshonneste de quelque homme riche, ou de quelque seigneur & magistrat, ou qu'il aura refusé quelques presens, voire iusques à là, fil a eu soif la nuict, & qu'il se soit gardé de boire, ou qu'il ait rebouté le baiser de quelque belle fille ou femme qui l'en ait pressé, comme fait Agesilaus, il le retiendra en soy-mesme, & n'en dira iamais rien: car celuy-là qui se contente de se prouuer à soy-mesme, non par mespris des autres, mais pour l'aïse & le contentement qu'il en a en sa conscience, estant suffisant tesmoing & spectateur des choses bien louablement faïttes, monstre que la raison est logee chez luy, & y a pris pied & racine, &

Comment on pourra appercevoir

comme dit Democritus, qu'il s'accoustume à prendre plaisir de soy-mesme : ainsi E comme les laboureurs voyent plus volontiers les espics qui panchent & se courbent contre la terre, que ceux qui pour leur legereté sont tous droits, d'autant qu'ils les estiment vuides de grain, & qu'il n'y a presque rien dedans : aussi entre les ieunes gens qui se donnent à la philosophie, ceux qui sont les plus vuides & qui ont moins de pois, ceux-là ont du commencement l'assurance, la contenance, le port, le visage plein de mespris & de contemnement de toutes choses : & puis quand ils se commencent à remplir, & à amasser du fruit des discours de la raison, ils ostent alors ceste mine superbe, & ceste vanité d'apparence extérieure. Ne plus ne moins que les vaisseaux où l'on met quelque liqueur, à mesure que la liqueur y entre, l'air vain en sort : aussi à mesure que les hommes se remplissent de biens certains & veritables, la vanité leur cede, & toute hypocrisie s'en va, l'enfleure en devient plus molle : & cessans de s'attribuer beaucoup pour la grande barbe & la robe longue, ils transfèrent l'exercitation des choses extérieures au dedans de l'ame, vñs d'amertume & de morsure de reprehension, principalement encontre eux-mesmes, & au demourant deuisent & parlent avec les autres plus gracieusement : & quant au nom de philosophie, & à la reputation de philosophes, ils ne l'vsurpent plus comme ils faisoient au parauant, ains si d'adventure quelque gentil ieune homme est appelé par vn autre de ce nom-là, il respondra en soubriant tout doucement, & rougissant de honte,

Homere au
16. liure de
l'Odysee.

Je ne suis pas vn des celestes Dieux,
Pourquoy pareil me faites vous à eux? Car ainsi que dit Æschylus,
La ieune femme à qui l'œil estincelle,
Me fait iuger qu'elle n'est plus pucelle :

mais le ieune homme qui a commencé à gouter le profit en l'exercice de la philosophie, ces accidents que décrit Sappho le suyuent,

Quand ie te voy,
Soudainement ie m'apperçoy,
Que toute voix defect en moy,
Que ma langue n'a plus en soy
Rien de langage.
Vne rougeur de feu volage
Me court sous le cuyr au visage.

G

Vous prendriez plaisir à voir sa contenance rassise, son regard doux, & desireriez de l'ouir parler. Car ainsi comme ceux qui demandent à entrer en la confrairie des mysteres, s'assemblans du commencement en foule & en tumulte, s'entre-heurtent & s'entre-poulsent les vns les autres, mais quand on vient à faire le seruice diuin, & à monstrer les choses sacrées, ils sont alors attentifs, avec crainte & avec silence : aussi au commencement de l'estude de philosophie & à l'entree de la porte, vous y verrez beaucoup de bruit, de tumulte, d'insolence & de caquet, pour ce que la plus part se H iette dedans brusquement & violement, pour l'enuie qu'ils ont d'en acquerir reputation & honneur : mais celuy qui est vne fois entré dedans, & qui a veu celle grande lumiere, comme si le repoitroire des choses saintes luy estoit ouuert, alors prenant vne toute autre contenance, vn silence & vn esbahissement, il devient humble, souple, & modeste, suiuant la raison comme Dieu : & me semble que lon leur peut bien appliquer & accommoder à cela ce que Menedemus en iouant disoit, C'est que plusieurs venoient aux escholes à Athenes, qui du commencement estoient sages, * puis deuenoient amateurs de sagesse, car cela signifie ce mot de Philosophe : & puis de Philosophes deuenoient Sophistes, & à la fin par succession de temps se trouuoient Idiots, c'est à dire, gens du tout ignorans : car d'autant que plus ils approchent de la raison, d'autant diminuēt-ils plus de l'opinion de soy-mesme, & de la presumption. Or entre ceux qui ont be-

Comme qui
droit qu'ils
estoiēt pre-
mierement
Docteurs,
puis Bache-
liers, puis
Escholiens,
& finable-
ment du tout
ignorans.

A ont besoing du secours du medecin, les vns qui n'ont mal qu'aux dents, ou au doigt, eux-mesmes vont deuers ceux qui les pensent, & ceux qui ont fiebres les appellent en leur maison, & les prient de leur vouloir estre en aide : mais ceux qui sont tóbez en vne fureur de melácholie, ou en vne frenesie, & alienation d'entendement, ne les veulent pas quelquefois receuoir, encore qu'ils viennent d'eux mesmes, ains les fuyent & les chassent, estant si fort malades, qu'ils ne sentent pas leur mal : aussi entre ceux qui pechent & qui faillent, ceux-là sont incurables & incorrigibles, qui se courroucent amèrement, & haïssent mortellement ceux qui leur remonstrent & qui les reprennent : & ceux qui les endurent, & qui les reçoient sont en meilleur estat & plus beau chemin de recouurer guarison : mais ceux qui se baillent eux mesmes à ceux qui les reprennent, qui confessent leur erreur, & qui descouurent eux-mesmes leur paureté, n'estans pas bien aises qu'on n'en sçache rien, ny contents d'estre secrets, ains l'aduouent, & prient ceux qui les en reprennent, & admonestent de leur y donner remede, cela n'est pas vn

B des pires signes de profit & amendement, suyuant ce que souloit dire Diogenes, Que
 „ celui qui se veut sauuer & deuenir homme de bien, il a besoing d'auoir ou vn bon
 „ amy, ou vne aspre ennemy, à fin que ou par amour de remonstrance, ou par force
 „ de iustice, il se chastie de ses vices. Mais tant que lon fait gloire de monstrier au dehors vne souillure de robbe, ou vne tache de vestement, ou vn soulier rompu, & que par vne façon d'humilité presumptueuse on se mocque de soy-mesme, de ce que lon fera d'adventure, ou petit, ou courbé & bossu, pensant faire vne gallanterie, & ce pendant on couure & cache les ordures de sa vie, & villanies de ses mœurs, les enuies, les malignitez, l'auarice, les voluptez, comme des vlceres & apostumes, ne souffrant pas que personne y touche, non pas qu'on les voye seulement, pource qu'on craint d'en estre repris, certainement on a fait peu de profit ou plus tost à vray dire, rien du tout. Mais celui qui donne à trauers, & qui peut ou qui veut principalement se penser soy-mesme, & se faire douloir, & sentir regret quand il a failly, ou sinon, à tout le

C moins qui endure patiemment qu'un autre par ses reprehensions & remonstrances le nettoie & le purge, celui-là certainement semble haïr la meschanceté, & auoir enuie de s'en desfaire : ie ne veux pas dire qu'il ne faille auoir honte, & fuir d'estre estimé & tenu pour meschant, mais celui qui a en haine la substance de la meschanceté, plus que non pas l'infamie, celui-là ne feindra point de faire dire mal de soy, & d'en dire luy-mesme, prouueu qu'il voye qu'il soit pour en deuenir meilleur. A quoy lon peut appliquer vne gentille parole que dit vn iour Diogenes, à vn ieune homme, lequel s'estant apperceu que Diogenes l'auoit veu en vne tauerne, s'en estoit vistement fuy

„ plus au dedans de la tauerne : Tant plus, luy dit-il, que tu fuis au dedans, tant plus auant
 „ es-tu en la tauerne : aussi peut on dire des vicieux, que tant plus ils nient leur vice, tant plus se fourrent-ils auant au dedans du vice, comme les pauvres qui contrefont les riches, en sont de tant plus pauvres pour leur vanité : car personne ne leur donne. Mais

D celui qui profite veritablement, a pour exemple ce grád personnage Hippocrates, lequel publia luy-mesme, & escriuit ce qu'il auoit ignoré touchant les coustures de la teste de l'homme en l'anatomie : faisant ce compte que ce seroit chose hors de toute raison, que ce grand personnage-là ait bien voulu publiquement prescher sa faute, de peur que les autres ne tombassent en pareil erreur, & que celui qui se veut sauuer soy-mesme ne peust endurer qu'on le reprist, ne confesser son ignorance & sa mauuaitié. Au demourant les regles & preceptes que dōnent Bion & Pyrrhon en cest endroit, ne sont pas, à mon aduis, signes d'amendement, mais plus tost de quelque autre plus grande & plus parfaite habitude de l'ame. Car Bion disoit à ses familiers & disciples, qu'ils estimassent auoir profité alors quand ils auroient acquis tant de cōstance, qu'ils entendoient aussi patiemment ceux qui les outrageroient & iniurieroient, que ceux qui leur diroient,

Comment on pourra appercevoir,

Odyss. l. 6.
& 24.

Amy passant certes tu n'as point chere
D'estre homme fol, ny de mauuais affaire:
A dieu te dis, priant la Deité
De te donner toute prosperité.

E

Au 9. liu. de
la Repub.

Et Pyrrhon, ainsi comme on trouue par escript, estant dedans vne nauire, en vne dangereuse tourmente de mer, monstra à quelques vns de ses disciples qui estoient avec luy, vn petit cochon qui mangeoit fort goulüement de l'orge que lon auoit respandu parmy la nauire, leur disant qu'il falloit par la raison & l'exercice de la philosophie acquerir vne constance ainsi impassible, pour ne s'esmouuoir ny ne se troubler point d'aucuns accidents de la fortune. Or voyez donc encore plus, quelle estoit la regle de Zenon, car il vouloit que chascun print garde à ses songes, pour cognoistre si luy profitoit ou non, si lon prenoit point plaisir en songeant à quelque chose deshoneste, ou si luy estoit point aduis que lon endurast, ou que lon feist rien qui fust villain, ou qui fust iniuste: voulant que lon veist, comme en vn calme du tout tranquille sans aucune agitation, au fond clair & net, la partie imaginatiue & passionnée de l'ame totalement applanie & regie par la raison. Ce que Platon au parauant, à mon aduis, ayant entendu, nous a representé & figuré ce que fait la partie imaginatiue & sensitiue en vne ame de nature tyrannique la nuit en dormant, comme elle s'efforce quelquefois d'auoir compagnie charnelle avec sa propre mere, & comme il luy prend des appetits de manger des choses estranges, & comme lors elle se laisse aller à toutes ses sensualitez & concupiscences de chose que la loy, de honte ou par crainte, empesche & reprime de iour. Tout ainsi doncques comme les bestes de selle ou de voicture qui sont bien apprises, encore que celuy qui leur commande leur lasche la bride, ne se destournent point pour cela, ny ne sortent point de leur chemin, ains tirent tousiours auant comme elles ont accoustumé, ordonnément, sans se destracquer ny laisser leur train ordinaire: aussi ceux à qui la partie sensuelle de l'ame est rendue si obeissante, si priuee & si bien disciplinee par la raison, que non pas en songe mesme, ny en maladie, elle ne laisse ses appetits se desborder, iusques à commettre choses qui soient reprises & punies par les loix, elle retient & conserue en memoire sa bonne discipline & accoustumance, laquelle donne force & grande efficace à la diligence de prendre garde à soy. Car si elle a accoustumé par exercitation de resister aux passions & tentations, de tenir le corps & les parties d'iceluy sous bride en sa subiection, tellement qu'elle engarde les yeux de ietter des larmes par pitié, le cœur de tressaillir de peur, les parties naturelles de se mouuoir & donner fascherie aupres de belles personnes: comment ne seroit-il plus vray-semblable, que l'accoustumance & exercitation prenant à dompter ceste sensuelle partie de l'ame, ne la polisse, vniße, & reforme, reprimant & contenant ses imaginations & ses mouuements, iusques aux songes mesmes? Comme lon raconte du philosophe Stilpon, qu'il luy fut aduis vne nuit en songeant, que Neptune se courrouceoit à luy de ce qu'il ne luy auoit pas sacrifié vn bœuf, comme auoient accoustumé de faire les autres presbtres parauant luy: Et que luy ne s'estant point estonné de ceste vision, luy respondit, Que dis tu, Sire Neptune? te viens-tu icy plaindre, comme vn enfant qui pleure de ce qu'on ne luy a pas donné assez grand part, de ce que ie ne me suis pas endebté d'argent pris à vsure, pour emplir tout ceste ville de la senteur de rosty, ains t'ay fait vn sacrifice mediocre de ce que i'ay peu auoir de ma maison? & qu'il luy fut aduis que Neptune se prit à rire de ceste responce, & qu'en luy tendant la main il luy promet, que ceste année-là il enuoyroit grand foison de loches de mer aux Megariens, pour l'amour de luy. Ceux doncques à qui en dormant il ne monte point au cerueau d'illusions qui ne soient douces, claires, sans douleur, non point espouuentables, ny aspres ou malignes & tortueuses, lon dit que ce sont certaines reflexions de lumiere qui reiallis-

F
G
H

sent

- A sent de l'amendement en la philosophie: là où les furieux appetits, les frayeurs, les fuittes lasches, les aises excessiues d'enfans, les regrets & lamentations, à cause des visions & illusions pitoyables & estranges, sont comme les brisemens des flots de la mer, qui se rompent contre le riuage, & les vndes de l'ame, laquelle n'a pas encore chez soy la perfection raslise: ains se va à la iournee formant par bonnes loix & sages enseignements, desquels se trouuant le plus esloignee quand elle dort, alors elle se laisse de-rechef aller, & enuelopper aux passions. Or si cela appartient à ce profit & auancement duquel nous parlons, ou bien à vne autre habitude, aiant ia acquis plus grande force & plus ferme constance, non subiette à estre esbranlee és lettres, ie te laisseray considerer en toy-mesme. Comme ainsi soit doncques, que la totale impassibilité, pour ainsi parler, c'est à dire, l'estat de l'ame si parfait qu'elle soit vuide de toutes passions, est chose grande & diuine, & qu'en vn relaschement & adoucissement des passions, consiste ce profit & amendement duquel nous traittons,
- B il fault en comparant chascune d'icelles passions à soy-mesme, & puis les vnes aux autres, iuger de la difference qu'il y a entre les deux. Nous conferons chascune passion à soy-mesme, en obseruant si nos cupiditez sont plus douces & moins violentes qu'elles n'estoient au parauant, autant de nos peurs, autant de nos choleres: si nous oston soudain avec la raison ce qui les souloit allumer & enflammer: si nous conferons les vnes avec les autres, en considerant si nous auons maintenant plus de honte que de crainte, si nous sentons en nous emulation & non enuie, si nous conuoitons plus l'honneur que les biens, & brief si nous pechons plus en l'extremite de l'harmonie Doriene, qui est graue & deuote, ou en la Lydiene, qui est gaillarde & ioyeuse, comme les chantres, tenans plus du lourd & du rude, en nostre maniere de viure, que du mignon & delicat: si nous sommes plus lents en nos actions ou plus estourdis: si nous admirons plus outre le deuoir, les propos des hommes, & eux-mesmes, ou si nous les mesprisons: pour ce que tout ainsi comme c'est vn bon signe, quand les maladies se diuertissent és parties du corps, qui ne sont pas les nobles, ny les principales: aussi semble il que quand le vice de ceux qui sont en estat de profit & d'amendement se change en passions plus douces, c'est commencement de s'effacer petit à petit. Or les Ephores des Lacedemoniens, qui estoient comme les contrerolleurs de tout l'estat de Lacedemone, demanderent au Musicien Phrynis, qui auoit adiousté deux chordes de nouueau à la lyre, s'il vouloit qu'ils coupassent de celles du haut, ou de celles du bas: mais quant à nous, nous auons besoing d'estre retrenchez & par haut & par bas, si nous voulons reduire nos actions au milieu en vne mediocrité: & ce profit & acheminement à la perfection est ce qui relasche les extremittez, & emousse les pointes des passions,
- C

- En quoy les fols sont par trop vehemens, ce dit le poëte Sophocles. Or auons nous desia dit au parauant, qu'il nous faut appliquer le iugement aux choses, & ne laisser pas les paroles demourer toutes nues en l'air: ains faire qu'elles deuiennent effects, & que cela est le propre du profit & amendement que nous cerchons: dequoy l'un des premiers indices sera l'affection de vouloir ensuyure & imiter ce que lon entendra louer, & estre prompts & deliberez à executer ce que lon aura en estime & que lon prisera, comme aussi au contraire, ne vouloir pas seulement ouir parler de ce que lon blasmera & mesprisera. Car il est bien vraysemblable, que tous les Atheniens louoient & prisoient la hardiesse & prouesse de Miltiades: mais Themistocles, qui disoit, que la victoire & le trophée de Miltiades ne le laissoit pas dormir, ains l'esueilleoit la nuit, il est tout euidant qu'il ne le louoit & prisoit pas seulement, ains qu'il le desiroit imiter, & en faire autant: ainsi faut il estimer, que l'amendement n'est pas encore grand, quand il imprime en nous vne affection de louer, priser & estimer seulement ce que les gens de bien font, sans au-
- D

Comment on pourra appercevoir,

cune esmotion & incitation à les vouloir par effect imiter. Car l'amour mesme charnel, si n'y a vn peu de jalousie meslé parmy, n'est point actif, ny la louange de vertu n'est ardente ny produisante effects, si elle ne poingt au vif, & n'aiguillonne le cœur d'un zele, au lieu d'enuie, de vouloir ressembler aux gens de bien, & de desirer remplir ce qu'il s'en fault que nous n'arriuions à leur perfection : car il ne fault pas que le cœur de celui qui philosophe à bon escient, soit renuersé sans-dessus-dessous par les paroles seulement, comme disoit Alcibiades, iusques à faire sortir les larmes des yeux : ains fault que celui qui profite veritablement, se cōparant soy-mesme aux œuvres & actions de l'homme de bien, parfaict en la vertu, sente tout ensemble en son cœur desplaisir de ce qu'il se verra court & defectueux, & plaisir de l'esperance, & du desir qu'il aura de se rendre bien tost esgal à luy, estant remply d'une bonne affection & volonté non oyfifue, selon la similitude de Simonides,

Comme vn poulain suit la iument qu'il tette, desirant, en maniere de dire, s'vnr du tout, & incorporer par imitation à celui qu'il estime homme de bien. Car cela est vne affectiō peculiēre & propre à celui qui profite veritablement, aimer & cherir les conditions & les mœurs de ceux dont il estime les œuvres, & avec vne bien-veillance rendant tousiours honneur de paroles à leur vertu, essayer de sy conformer, & se rendre semblable à eux : mais où il y a ne sçay quoy d'enuie, d'estrif & de contestation à l'encontre des plus excellens, sçachez que cela procede d'un cœur vlcéré de la jalousie de quelque autorité & puissance, & non pas d'amour ou d'honneur qu'il porte à la vertu. Quand doncques nous commencerons à aimer les gens de bien en telle sorte, que non seulement nous estimerons bien heureux l'homme temperant, comme dit Platon, & bien-heureux ceux qui sont ordinaires auditeurs des beaux discours, qui iournellement procedent de sa bouche : mais aussi que nous aimerons & admirerons sa contenance, son port, sa marche, son regard, son rire : & que nous voudrons volontiers, par maniere de dire, nous conioindre & coller à luy, alors pourrons nous certainement asseurer, que nous profiterons en la vertu. Et encore plus si nous ne les admirons pas seulement en leurs prosperitez, ains comme les amoureux treuvent bien seante vne langue grasse, ou vne palle couleur en ceux qu'ils aiment pour leur beauté : de sorte que Panthea par ses larmes & son triste silence, toute affligee qu'elle estoit, & esploree pour le dueil de la mort de son mary, faisoit Araspes de son amour : aussi nous ne refuirons point de peur ny le bannissement d'Aristides, ny la prison d'Anaxagoras, ny la paureté de Socrates, ny la condamnation de Phocion, ains reputerons avec tout cela leur vertu amiable & desirable, & courrons droit à elle pour l'embrasser par imitation, ayans tousiours en la bouche, à chascun de leurs accidens, ce beau mot d'Euripides,

Que tout sied bien à vn cœur genereux.

Car il ne fault pas craindre que rien de bon & d'honneste peult iamaïs plus diuertir ceste inspiration diuine de si vehemente affection, que non seulement elle ne se fache point des choses qui semblent aux hommes les plus miserables & plus calamiteuses, ains au contraire elle les admire & les desire imiter. Et puis ceux qui ont ja receu telle impression en leur cœur, prennent vne autre façon de faire, que quand ils vont commencer quelque entreprinse, ou qu'ils entrent en l'administration de quelque Office & Magistrat, ou quand il leur suruient quelque sinistre accident, ils se representent alors deuant leurs yeux ceux qui sont, ou qui autrefois ont esté gens de bien, & discourēt ainsi en eux-mesmes, Qu'est-ce qu'eust fait Platon en cest endroit ? Qu'est-ce qu'eust dit Epaminondas ? Quel se fust icy monstré Lycurgus ou Agesilaus ? en s'accoustrant, & se reformant à leurs mœurs, ne plus ne moins que deuant vn miroir, en rhabillant quelque parole qu'ils auront trop peu genereusement professée, ou en resistant à quelque passion. Ceux qui sçauent les noms de ces demy-dieux

- A dicux que lon appelle Dactyles Ideiens, en vsent comme de preseruatifs à l'encontre des soudaines frayeurs, en les nommant par leurs noms, les vns apres les autres : mais le souuenir & le penser aux grands & vertueux personages soudain se representant, & embrassant ceux qui sont en voye de perfection, en toutes passions & toutes perplexitez où ils se puissent trouuer, les maintient droiects, & les engarde de tomber : & pourtant te soit encore cela vn signe d'homme qui va profitant en la vertu. Et oultre cela ne se troubler pas trop fort, ny ne rougir pas de honte, n'essayer point à se cacher, ou à rhabiller sa contenance ou quelque autre chose dessus sa personne, quand il se presente soudainement à l'improuueu quelque grand & sage personnage, ains l'asseurer, & aller droiect à luy le visage ouuert, sent sa conscience bien assuree, comme Alexandre voyant vn messager qui accouroit à luy avec vne face riante, & luy tenoit la main de tout loing, luy dit : Quelle bonne nouuelle me scaurois-tu plus apporter, mon bel amy, si tu ne me venois dire, qu'Homere fust ressuscite? estimant qu'à ses faicts & gestes ne se pouuoit plus adiouster aucune grâdeur, sinon l'estre cōsacrez à l'immortalité par les escripts de quelque noble esprit. Mais vn ieune homme qui va tous les iours de mieux en mieux composant ses mœurs, n'aime rien plus que se monstretel qu'il est aux hommes de bien & d'honneur, & de leur faire voir entierement sa maison, sa table, sa femme, ses enfans, son estude, ses propos ou prononcez, ou mis par escript : de sorte qu'il a regret toutes les fois qu'il luy souuient ou de son pere ou de son maistre trespassé, de ce qu'ils ne l'ont veu en l'estat & la disposition qu'il est, & ne souhaiteroit, ny ne requerroit rien tant aux Dieux, que qu'ils peussent de rechef retourner en vie, pour estre spectateurs de sa vie & de ses actions: comme au contraire aussi, ceux qui ont esté paresseux de bien faire, & sont corrompus en leurs mœurs, ne peuuent voir sans frayeur & sans tremblement ceux qui leur appartiennent, non pas en songe seulement. Adioustez encore, si bon vous semble, à ce que nous auons dit, de ne reputer plus aucune faulte ny aucun peché petit, ains s'en donner de garde soigneusement, & les fuir tous. Car tout ainsi que ceux qui desesperent de pouuoir iamais deuenir riches, ne font aucun compte de petite despenſe, pource qu'ils pensent que de petite espargne adiouſtee à peu de chose ne se peut pas faire grand amas : & au contraire, l'esperance qui se voit approchée bien pres du but de la richesse, augmēte sa conuoitise d'auoir de tant plus qu'elle s'en sent plus prochaine : aussi au fait de la vertu, celuy qui ne se laisse pas beaucoup aller à tels langages, Et bien que sera-ce quand il s'en faudra cela? & , Pour ceste heure ie feray ainsi, vne autrefois ie feray mieux : ains est tousiours au guet, se mescontentant fort & se courrouceant, si iusques aux moindres faultes le vice se coulant par dessous y suggere aucune couleur d'excuse & aucun pardon, celuy là monstre manifestement qu'il a maison nette, & qu'il n'y veult plus endurer la moindre ordure du monde : mais n'estimer & n'auouër rien de grand en infamie, nous rend faciles & paresseux aux choses petites. Car ceux qui bastissent vne haye ou vne pallissade, ou bien vne closture de maçonnerie, mettent en œuvre toute sorte de bois qui leur vient en main, & toute pierre qu'ils rencontrent au deuant d'eux, voire iusques à vne coulomme quarree qui sera tombee de dessus vn sepulchre : ainsi font les meschans qui assemblent l'un sur l'autre, & amassant en vn monceau toute sorte de gain, & toutes especes d'actions les premieres venues : mais ceux qui profitent en la vertu, qui ont desia planté & assis le fondement doré de bonne vie, comme d'un saint temple ou d'un palais royal, ny recoiuent rien à bastir dessus temerairement, ains y adiouſtent & y appliquent toutes choses avec le plomb & la regle de la raison. C'est pourquoy nous estimons que Polycletus faiseur d'images souloit dire, que le plus fort à faire & le plus difficile de leur besongne estoit, quand la terre estoit venue iusques à l'ongle, c'est à dire, que la difficulté plus grande de la perfection gist à la fin.

De la Superstition.

E

Cet traité est dangereux à lire, & contient une doctrine faulſe : car il eſt certain, que la Superſtition eſt moins mauuaife, & approche plus pres du milieu de la vraye Religion, que ne fait l'Impieté & Atheiſme: ainſi que luy meſme le diſcourt en propres termes à l'encontre de l'impieté des Epicuriens, & la raiſon Chreſtienne le monſtre euidentement, qui appelle l'infidelité peché, par antonomasie, comme le peché des pechez.



L'IGNORANCE & faulte de bien ſçauoir que c'eſt que des Dieux, feſtant dès le commencement meſpartie en deux branches: l'vne ſe rencontrant avec des mœurs dures, comme vn païs rude, y engendra l'Impieté: l'autre avec des mœurs tendres, comme en vn païs mol, y imprima la Superſtition. Or eſt il que tout erreur de iugement, meſme-ment en telle matiere eſt choſe mauuaife, mais avec celuy **P** de la ſuperſtition, il y a vne paſſion conioincte, qui eſt bien pire, pour ce que toute paſſion eſt comme vne deception qui nouſ tient en fiebure: & tout ainſi comme les deſboitements de membres mis hors de leurs lieux, qui ſe font avec bleſſure ſanglante, ſont les plus dangereux, auſſi ſont les diſtorſions de l'ame conioinctes avec paſſion. Comme, pour exemple, ſi quelqu'un penſe, que de petits corps indiuiſibles que lon appelle Atomes, & le vuide, ſoient les principes de l'vniuers, c'eſt vne faulſe opinion qu'il a, mais elle ne luy engendre point d'vlcere, elle ne luy donne point de fiebure, ny ne luy cauſe point de douleur qui le tourmente: Et au contraire, ſi quelqu'un eſtime que la richeſſe ſoit le bien ſouuerain de l'homme, ceſte faulſeté d'opinion a vne rouille & vermi qui luy ronge l'ame, qui le transporte hors de foy, & ne le laiſſe point repoſer, elle le poingt de furieux aiguillons, elle le precipite, par maniere de dire, du hault des rochers, luy ferre la gorge, & luy oſte toute liberté de franchement parler: ou bien, ſi quelques **G** uns ont opinion, que le vice & la vertu ſoient ſubſtances corporelles, & materielles, c'eſt à l'aduenture vne trop groſſe & trop lourde ignorance, mais non pas digne d'eſtre lamêtee ny deploreë. Mais ſi ce ſont de tels iugements, & de telles opinions,

O miſerable & chetifue vertu,
Or rien que vent & langage n'eſt tu,
Et comme eſtant vne reale eſſence
Ie t'exerçois en toute reuerence,
Laiſſant le train d'iniuſtice tenir,
Qui à tous biens deſire paruenir,
Et reiertant intemperance arriere,
Celle qui eſt de tous plaiſirs la mere:

ce ſont celles dont on doit auoir pitié enſemble, & ſ'en courroucer, d'autant qu'elles **H** engendrent pluſieurs maladies, & pluſieurs paſſions, comme des vers & des tignes, dedans les ames où elles penetrent: auſſi pour venir à celles dont à preſent il eſt queſtion, l'impieté de l'atheïſte eſt vn faulx & mauuais iugement qui luy fait croire qu'il n'y a point de nature ſouuerainement heureuſe & incorruptible, & le conduit par ceſte meſcreance, à n'en ſentir point auſſi de paſſion: car ſa fin, de n'eſtimer point qu'il y ait de Dieu, c'eſt de ne le craindre point auſſi: mais la Superſtition, ainſi comme la propriété du nom Grec, qui ſignifie crainte des Dieux, le donne clairement à cognoiſtre, eſt vne opinion paſſionnee & vne imagination, laquelle imprime en l'entendement de l'homme vne frayeur qui abbat & atterre l'homme, eſtimant bien qu'il y ait des Dieux, mais qui ſoient malſaiſants, nuſibles & dommageables aux hommes: de maniere que l'atheïſte ne ſemeut aucunement enuers la Deïté, là où le

A où le superstitieux se mouuant & affectionnant enuers elle autrement qu'il ne fault, se destort & fouruoye: ainsi l'ignorance fait à l'un descroire la nature qui est cause de tout bien, & à l'autre croire qu'elle soit cause de mal: tellement que l'impieté, vient à estre vn faulx iugement de Dieu, & la superstition vne passion procedant d'un faulx iugement. Or est-il bien vray, que toutes les maladies & passions de l'ame sont laides & mauuaises, mais toutefois si y a il en quelques vnes ie ne sçay quoy d'esleué & de hault, procedant de legereté: & n'y en a pas vne, en maniere de parler, qui soit destituee d'un mouuement actif, ains est le commun blasme que lon donne à toutes passions, qu'avec leurs aiguillons actifs, elles pressent & violentent si fort la raison, qu'elles la forcent, excepté la peur seule, laquelle n'estant pas moins destituee de raison que d'assurance, a vn estourdissement & alienation de bon sens, oyseuse, morte, sans exploict ny effect quelconque. C'est pourquoy elle est par les Grecs appelée quelquefois Deima, qui signifie lien, & quelquefois Tarbos, c'est à dire, trou-^{de l'ame}
B ble, pource qu'elle tient l'ame liee sans pouuoir rien faire, & toute perturbée: mais ^{de l'esprit} entre toutes les sortes de peur, la plus confuse & la plus esperdue est celle de la superstition. Celuy qui ne nauigue point ne craint point la mer, ny celuy qui ne suit point les armes ne doute point la guerre, ny les voleurs & espieurs de chemins celuy qui ne bouge de sa maison, ny le calomniateur celuy qui n'a rien, ny l'enuie celuy qui n'a point d'estats, ny le tremblement de terre celuy qui habite en la Gaule, ny le tonnerre celuy qui demeure en Æthiopie: mais celuy qui craint les Dieux, craint toutes choses, la terre, la mer, l'air, le ciel, les tenebres, la lumiere, le bruit, le silence, les songes. Les serfs oublient la durezza de leurs maistres quand ils dorment: le sommeil allegé les ennuis de ceux qui sont en prison, les fers aux pieds: les inflammations des playes, les vlceres malings, qui mangent cruellement les membres tous vifs, les angoisseuses douleurs donnent quelque relasche aux patients ce pendant qu'ils sont endormis, ainsi que dit le poëte Tragique,

C O gracieux dormir, allegement
Doux aux trauaux des malades, comment
Tu m'es venu au besoin secourable,
A ma douleur relasche desirable!

La superstition ne permet pas aux superstitieux de pouuoir dire cela, car elle seule ne fait point de trefues avec le sommeil, ny ne permet point à l'ame de pouuoir au moins aucunes fois respirer, ny se rassurer, en reiettant arriere d'elles ces mauuaises & fascheuses opinions qu'elle a de Dieu: ains comme si le dormir des superstitieux estoit vn enfer, & le lieu des damnez, elle leur suscite des imaginations horribles, & des visions terribles & monstrueuses des diables & des furies qui tourmentent la miserable ame, & la chassent hors de son repos par ses propres songes, desquels elle se flagelle & flagelle elle mesme, comme si elle le faisoit par les estranges & cruels commandements de quelque autre: mais encore le pis est puis apres, que quand ils sont esueillez & leuez, ils ne mesprisent pas ce qu'ils ont songé, ny ne s'en moquent pas, & ne se iouissent pas de ce qu'il n'y a rien de veritable en toutes ces visions qui les ont tourmentez: ains estans sortis de l'ombre de ses faulces illusions, où il n'y a mal quelconque, ils se deçoient eulx-mesmes à bon escient, & se tourmentent, & despendent infiniment en des magiciens, diseurs de bonne aduventure, triacleurs & telle maniere d'abuseurs & affronteurs, qui leur vont disant, Si d'aduventure tu crains quelque vision nocturne, ou que tu aies esté trauaillé de Proserpine terrestre, appelle la vieille qui te paistrit le pain, & te plonge dedans la mer, & te tiens assis contre terre tout le long d'un iour.

O Grecs aians trouué des mauux barbares,
par ceste superstition se souiller de fange, se veautrer en la bourbe, chommer les sab-

De la superstition.

bats, se ietter en terre villainement la face contre bas, se tenir assis en public sur la terre, faire d'estranges & extrauagantes adorations! Anciennement quand vn ioueur de cithre commençoit à sonner, on luy commandoit qu'il chantast de bouche iuste, au moins ceux qui vouloient entretenir la musique legitime, à fin qu'il ne dist rien de deshonneste: mais il est bien plus raisonnable que nous prions les Dieux de bouche droicte & iuste, & non pas en visitant les entrailles des hosties immolees, prendre garde si la langue en est pure & droicte, & ce pendant destordre la nostre, & l'infecter de noms peregrins, estrangers, & la contaminer de mots barbaresques, en offensant les Dieux, & violant la dignité de la religion receüe & autorisee en nostre païs. Mais le poëte Comique a dit plaisamment en quelque passage, parlant de ceux qui dorent & argentent les chalits de leurs liëts, Pourquoi te rends tu cher le dormir, qui est le seul bien que les Dieux nous donnent gratuitement? aussi pourroit on dire à bon droit au superstitieux, que les Dieux nous ont donné le sommeil pour vne oubliäce & vn repos de nos maux, pourquoi en fais tu vne gehenne perpetuelle & douloureuse de ta malheureuse ame, qui ne peult refuir n'y auoir recours à vn autre sommeil? Heraclitus disoit, que les hommes pendant qu'ils veillent n'ont qu'un monde commun à tous, mais quand ils dorment, que chacun d'eux s'en va au sien propre: mais le superstitieux n'a point de monde commun, car ny quand il veille il n'vse point de sage discours qui l'assure, ny quand il dort il n'est iamais sans quelque chose qui le tourmente: car la raison sommeille, & la peur veille tousiours, & iamais ne s'en peult sauuer ny s'en desfaire. Le Tyran Polycrates estoit redouté en Samos, Periander à Corinthe, mais nul ne les craignoit plus depuis qu'ils venoient en vne ville franche, estât regie par gouuernemēt populaire: là où celui qui redoute la domination des Dieux, comme vne tyrannie seuerë & inexorable, où se retirera-il? où s'enfuira-il? Quelle terre trouuera-il où il n'y ait point de Dieu? quelle mer? En quelle partie du monde pourras-tu deualer, pauvre homme, ny te cacher pour t'assurer que tu sois hors de la puissance des Dieux? Il y a loy pour les pauvres esclaves qui sont si durement traittez de leur maistre, qu'ils n'esperent pas iamais en pouuoir obtenir liberté, qu'ils peuvent requerir d'estre vendus à vn autre, & changer de maistre qui leur soit plus doulx & plus gracieux: mais la superstition ne nous donne point moyen de changer de Dieux, & ne scauroit on trouuer espee de Dieux que le superstitieux ne craigne, attendu qu'il craint les Dieux tutelaires du païs, & les Dieux de la naissance: Il redoute les Dieux salutaires & faueurs, il tremble de frayeur quand il pense à ceux à qui nous demandons richesse, abondance de biens, concorde, paix, heureux succez de nos diëts & de nos faicts. Et puis ceux-cy estiment qu'estre serf soit vne calamité grande, en disant,

C'est grand malheur à homme & femme d'estre
Serfs, mesmement de miserable maistre.

& combien plus griefue & plus miserable seruitude estimez vous que seuffrent ceux qui ne s'en peuvent fuir, qui ne peuvent euader, ny se departir & retirer? le serf a les autels, ausquels il peut recourir, & y a beaucoup de temples, de la franchise desquels on n'ozeroit enleuer les voleurs mesmes: les ennemis qui s'enfuient apres vne desfaiëte, s'ils peuvent embrasser vne statue des Dieux, ou se ietter dedans vne eglise, ils sont assurez de leur vie: mais le superstitieux, ce que plus il fremit, que plus il craint & redoute, c'est ce en quoy mettēt leur esperance ceux qui ont peur de plus cruelles peines que lon face souffrir aux hommes. Ne vous donnez pas peine de tirer par force vn superstitieux hors des temples des Dieux, c'est là où plus aigrement il est affligé & tourmenté. Qu'est-il besoing de dire dauantage? la mort est fin de la vie à tous hommes, mais non pas de la superstition, car elle estend ses bornes & limites au dela de l'extremité de la vie, faisant sa peur plus longue que sa vie, & attachant à la mort vne imagina-

- A l'imagination de maux immortels : & lors qu'elle achève tous ses ennuys & trauaux, elle se persuade qu'elle en doive commencer d'autres qui iamaïs n'acheueront : les profondes portes de ie ne sçay quel Pluto dieu des enfers s'ouurent, des fleues de feu cruel, & les creuses baricaues de la riuere de Styx se descouurent, & se desploient des tenebres pleines de plusieurs apparitions d'ames & d'esprits, representans des figures horribles à voir & des voix piteuses à ouïr : des iuges, & des bourreaux, des abysses & des caernes creuses, pleines de toutes sortes de gehennes & de tourments. Ainsi la miserable superstition, pour craindre par trop, sans propos, ce qu'elle imagine estre mauuais, ne se donne garde qu'elle se soubs-met à tous les maux du monde : & pour ne sçauoir couter de se passionner de la crainte des Dieux, elle se forge l'attente de maux inuitables encore apres sa mort. L'impieté de l'atheïste n'a rien de tout cela : il est bien vray que son ignorance est bien malheureuse, & que c'est vne grande calamité à l'ame que de mal voir, ou du tout estre auetgle, en si grandes & si dignes choses, aiant le principal & le plus clair de ses yeux esteinct, qui est la cognoissance de Dieu : mais au moins ceste crainte passionnee, cest vlcere de conscience, ceste combustion d'esprit, & ceste seruile abiection, n'est point conioincte à son opinion. Platon escrit que la musique a esté donnee aux hommes par les Dieux, pour les rendre modestes, gracieux, & bien conditionnez, non pas pour delices, ny pour vne volupté, ny vn chatouillement d'oreilles, pource qu'il aduient aucunes fois, à faulte des Muses & Graces, grande confusion & desordre és accords & consonances de l'ame, qui se debauchent quelquefois outrageusement par intemperance, ou par nonchalance, & la musique suruenant là-dessus, les rameine & les remet derechef tout doucement en leur ordre & en leur lieu : car, comme dit le poëte Pindare,

Ceux qui ne sont point des esleus
Du grand Iupiter bien-voulus,
Trouuent la voix melodieuse
Des Muses mesmes odieuse.

Au 4. de la
Republiq.

En l'Ode
premiere
des Pythies.

- C Voire & s'en aigrissent & courroucent : comme lon dit que les Tigres, si on leur sonne des tabourins alentour d'elles, en entrent en fureur, & s'en tourmentent tant, que finalement elles s'en deschirent elles mesmes. Il y a doncques moins de mal en ceulx qui par surdité, ou autre dureté & debilitation de l'ouyë, n'ont aucune passion ne sentiment de la musique. C'estoit vn grand malheur à Tiresias de ne voir point ses enfans ny ses familiers, mais bien plus grief & plus grand fut-ce à Athamas & à Agaué de penser, en les voyant, voir des lions, ou des cerfs : & quand Hercules deuint enragé, il luy eust mieux valu ne voir, ny ne sentir point ses enfans, que de faire à ceux qu'il aimoit plus au monde, ce qu'il eust sçeu executer alencontre de ses plus mortels ennemis. Ne te semble-il pas maintenant, qu'il y ait vne semblable difference entre les atheïstes & les superstitieux ? les atheïstes ne voyent point les Dieux du tout, les superstitieux les voyent autrement qu'il ne fault : les atheïstes se persuadent qu'il n'y en a point du tout : les superstitieux estiment effroyable ce qui est bening, cruel comme vn tyran ce qui est doux comme vn pere, nous portant dommage ce qui a tout soing de nostre bien & profit, aspre & farouche en courroux ce qui est sans cholere : & puis ils adioustent foy à des fondeurs de bronze, à des tailleurs de pierre, & à des imagiers & mouleurs en cire, qui leur representent les Dieux avec semblance de corps humains, & les forment, les accoustrent, & les adorent tels : & ce pendant ils mesprisent les philosophes & les graues hommes de gouuernement, qui preuent & monstrent que la maiesté de Dieu est accompagnée de bonté, de magnanimité, de beneuolence & de soing de nostre bien : tellement qu'il en demeure aux vns vne priuation de tout sentiment, & vne mescreance des causes d'où procedent tous biens, & aux autres vne desfiance & vne crainte de ce qui ne fait

De la superstition.

que profiter & aider. Et en somme, l'impiété de l'athéiste est, ne sentir aucune passion E
envers la divinité, à faute d'entendre & de cognoître ce qui est souverainement
bon : & la superstition est un amas de diverses passions soupçonant que ce qui est
bon de nature soit mauvais : car les superstitieux craignent les Dieux, & neantmoins
recourent à eux : Ils les flatent, & leur disent injures : Ils les prient & les accusent.
C'est chose commune aux hommes de n'estre jamais heureux en toutes choses, car,
comme dit Pindare, parlant des Dieux,

Ceux-là ne sont ny à vieillesse,
Ny à maladifue foiblesse,
Ny à autres maux asseruis,
Toujours en liesse ravis,
Pour ne craindre point le passage
D'Acheron au bruyant riuage.

Mais les passions & affaires des hommes sont entremeslez de diuers accidents & ad- F
ventures, qui tournent tantost en vne sorte, & tantost en vne autre. Voyons donc-
ques quel est l'athéiste premierement és choses qui aduennent oultre son gré, & con-
siderons un peu son affection & disposition en telles occurrences. S'il est au demou-
rant homme modeste & temperé, il supportera sa fortune patiemment sans mot dire,
& cherchera aide & confort de là où il pourra : mais s'il est vehement de nature, & qu'il
porte impatiemment son malheur, il reiettera & fondera toutes ses plaintes & lamen-
tations sur la fortune & casuelle aduventure, & criera qu'il n'y a rien qui soit gouverné
par iustice ny par prouidence és choses humaines, ains que tout y va temerairement
& confusément en perdition. Mais la façon du superstitieux n'est pas telle, car l'acci-
dent à luy suruenu sera le moindre de ses maux, ains demourant assis sans prouueoir
à rien, se bastira sur sa douleur d'autres afflictions grandes & griefues, & dont il ne se
pourra desfaire, & se remplira luy-mesme de peurs, de frayeurs, de soupçons, & de
troubles & perturbations, s'attachant en toutes ses plaintes & lamentations à la pro- G
uidence diuine : car il n'accuse de ses malheurs ny l'homme, ny la fortune, ny l'occa-
sion, ny soy-mesme, ains attribue le tout à Dieu, & dit que c'est de là que luy descend
& luy court sus vne influence celeste de tout malheur, preschant qu'il n'est pas hom-
me malheureux, mais hai & mal-voulu des Dieux, & qu'il est meritoirement puny,
affligé, & tourmenté par la prouidence diuine. Si l'athéiste deuient malade, il discourt
en luy-mesme, & se ramene en memoire s'il a point trop mangé, ou trop beu, ou s'il
a point fait quelque autre desordre en son viure, s'il a point trauaillé excessiue-
ment ou s'il a point changé d'air qui luy fust familier en autre fort estrange & trop different
du sien naturel. Et si d'aduventure il luy est suruenu quelque defastre en matiere de
gouvernement de la chose publique, qu'il ait encouru quelque disgrâce & mauuaise
reputation envers le peuple, ou s'il a esté calomnié envers le prince, il en va rechercher
la cause en luy-mesme, & és choses qui sont alentour de luy, H

Où ay-ie esté, qu'ay-ie fait, ou mesfait ?

Qu'ay-ie oublié que ie deusse auoir fait ?

Des vers
dorez de Py-
thagoras.

Mais le superstitieux dira, que toute maladie de son corps, perte de biens, mort d'en-
fans, toute aduersité & toute malencontre en affaires de gouvernement, seront au-
tant de coups de l'ire des Dieux, & d'assaults de la iustice diuine, tellement qu'il n'o-
sera pas se secourir soy-mesme, ny destourner son malheur, ou bien remedier à son
inconuenient, non pas mesme s'y opposer, de peur qu'il ne semble se vouloir attacher
à combattre contre les Dieux, ou leur resister quand ils le veulent chastier : en sorte
que s'il est malade, il chassera hors de sa chambre le medecin qui le viendra visiter : s'il
est en deuil, il fera fermer sa porte au philosophe qui le viendra consoler & reconfor-
ter : Laisse moy mon amy, dira-il, payer la peine que j'ay meritee, meschant, malheu-
reux

- A reux & maudit homme, haï des Dieux & denty-dieux, que ie suis. On peut bien à vn homme qui ne croit point, & ne se persuade point qu'il y ait de Dieu, qui au demourant est oultré de douleur, & se tourmente desesperément, luy essuyer la larme de l'œil, luy faire tondre ses cheueux, luy oster sa robbe de deuil. Mais le superstitieux, comment luy parlerez vous? comment luy donnerez-vous secours? Il sera en sa douleur dehors de sa maison, affublé d'un sac, ou ceint sur les reins de quelques meschants haillons tous deschirez, souuent il se veautrera tout nud dedans la fange, il confessera & declarera ie ne sçay quels pechez & fautes qu'il aura commises, comme qu'il aura beu ou mangé cecy ou cela, ou qu'il aura esté quelque part où Dieu luy defendoit d'aller: & fil est le mieux qu'il sçauroit estre pour superstitieux, & que sa superstition soit douce, pour le moins sera-il en sa maison assis avec force sacrifices que lon fera autour de luy, force aspersions: & les vieilles qui luy viendront attacher, & pendre au col, ne plus ne moins qu'à vn pau fiché, comme disoit Bion, tous les breuets, B forcelleries & sottises, qu'elles auront en main. On lit que Teribafus quand les Perses le voulurent prendre prisonnier, mit la main à son cymeterre qui estoit fort & roide, & se defendit vaillamment: mais si tost qu'ils luy crierent & protesterent, que c'estoit par commission & commandement du Roy qu'ils le vouloient prendre, il ietta incontinent son espee, & bailla ses deux mains à lier. N'est-ce pas chose du tout semblable à ce que nous disons? Les autres combattent à l'encontre des aduersitez, & repoulsent les afflictions, faisant tout ce qui est en eux pour les euader, & pour destourner ce qu'ils ne voudroient pas veoir aduenir: Mais le superstitieux ne veut escouter personne, ains dit en luy-mesme à par soy: ô miserable, tout ce malheur te vient de la prouidence diuine, & par le commandement de Dieu. Il reiette toute esperance, il s'abandonne luy-mesme, il fuit & repousse ceux qui le veulent secourir. Il y a beaucoup de maux qui d'eux-mesmes sont mediocres, que les superstitieux rendent mortels. L'ancien Roy Midas estant troublé & fasché pour quelques songes qu'il auoit songez, à la fin se desespera, tellement qu'il se fit volontairement mourir en beuuant du sang de taureau: & Aristodemus Roy des Messeniens, en la guerre qu'il eut contre les Messeniens, estant adueni que les chiens hurlerent comme des loups, & que à l'entour de son autel domestique il estoit creu de l'herbe qui s'appelle chiendent, & que ses deuins luy dirent qu'ils redoutoient fort ces signes-là, il en conceut en son cœur vne si grãde tristesse, & en entra en si grand desespoir, qu'il se desfit luy-mesme. Et eust à l'aduenture mieux valu que Nicias se fust ainsi deliuré de sa superstition, comme feirent Midas & Aristodemus, que pour la crainte de l'ombre de l'eclipse de la Lune, attendre que l'ennemy le vint enuelopper & enceindre tout à l'entour, & au bout du ieu tomber vif entre les mains de ses ennemis, qui le feirent mourir honteusement avec quarante mille hommes Atheniens, qui furent ou mis à l'espee, ou pris prisonniers: car l'opposition de la terre se rencontrant diametralement entre la Lune D & le Soleil n'estoit pas à craindre ny à redouter en temps où il estoit besoing se seruir de ses pieds, mais bien estoient dangereuses les tenebres de la superstition, de troubler & confondre le iugement de celuy qui y estoit tombé, en temps mesmement qui auoit plus besoing de bon sens & de bon entendement.

Defia la mer commence à se froncer

De pers fillons, & à se courroucer:

Defia la nue à l'entour enuironne

Le haut des monts de venteuse couronne,

En se leuant tout' droite contre mont.

Cela est vn signe de tempeste: ce que voyant le bon pilote, prie bien aux Dieux de luy faire la grace d'en eschapper, & inuoque à son aide ceux que lon appelle Salutaires: mais ce pendant en faisant ses prieres, il prend en main le timon, il baisse l'antenne, &

De la superstition.

tasche en amenant la maistresse voile, à se ietter hors de la mer tenebreuse. Hesiode E commande, avant que le laboureur commence à labourer ou semer,

Au poëme
intitulé les
œuvres.

Faire ses vœux à Iupiter terrestre,
Et à Ceres la deesse champestre :

mais c'est en ayant la main sur le mâche de la charrue. Et Homere fait que Ajax, estant sur le poinct de combattre teste à teste contre Hector, admoneste les Grecs de faire priere aux Dieux pour luy : mais que cependant qu'ils prient, luy farne tresbien de toutes pieces. Et Agamemnon apres auoir recommandé aux souldards Grecs,

Iliad. liu.
2. & 7.

Chascun sa lance aiguise & tienne preste,
Et son escu ainsi qu'il faut appreste : alors il requiert à Iupiter,
O Iupiter donne moy ceste grace,
Que de Priam la cité ie terrace.

Car Dieu est esperance de vertu, non pas excuse de lascheté. Mais les Iuifs, estant la solennité de leurs grands sabbats, combien que les ennemis plantaissent les eschelles F & gaignassent leurs murailles, demurerent assis en robbe de deuil en leurs maisons, & ne s'en leuerent iamais de leurs sieges, ains demurerent liez & enuoloppez en leur superstition, comme dedans vne seinne. Voyla quelle est la superstition és occurren- ces des temps & affaires qui ne succedent pas à gré, ains au rebours de nostre volonté, c'est à dire en aduersité : mais elle n'est de rien meilleure que l'atheïsme és succès qui aduiennent à souhait & en prosperité. Il n'est rien si ioyeux entre les hommes, que les solennitez des festes, & les festins qui se font és sacrifices pres des temples, les confrairies où lon est purifié de ses pechez, & ceremonies du seruice des Dieux, où lon les prie & les adore. Or considerez quel est l'atheïste en ces endroits-là : il se rira d'un ris furieux, &, comme lon dit communément, Sardonien, de voir les choses que lon y fait : & quelquefois dira tout bas en l'oreille de ses plus familiers qui seront à l'en- tour de luy, Ceux-là sont bien hors du sens & enragez, qui estiment que telles choses soient agreables aux Dieux : au reste il n'aura mal du monde. Mais le superstitieux G voudroit bien, & ne peut, se resiouir, ny prendre plaisir, & est son ame comme la ville que décrit Sophocles,

Au com-
mencement
de la Tragœ-
die d'Oédi-
pus le tyran.

Pleine de chants, parfums, encensements,
Pleine de pleurs & de gémissements.

Il pallit, de peur, & a sur sa teste vn chapeau de fleurs: il sacrifie, & tremble de crain- te: il fait sa priere d'une voix tremblante: il met de l'encens dedans le feu, & la main luy branle : & brief, il rend le dire de Pythagoras inepte & vain, lequel souloit dire, * Que nous sommes lors plus gens de bien, quand nous allons deuers les Dieux : car c'est alors que les superstitieux sont plus miserables & plus malheureux, quand ils en- trent dedans les temples & sanctuaires des Dieux, comme si c'estoient des cauernes d'ours, ou des trous de dragons, ou des creux de monstres marins. C'est pourquoy ie m'esmerueille de ceux qui appellent la mescreance & le peché des Atheïstes, impieté, H & non pas la superstition. Et toutesfois Anaxagoras fut accusé d'impieté pour autant qu'il auoit dit, que le Soleil estoit vne pierre, & iamais homme n'appella les Cimmeriens impieux, pour ce qu'ils estiment qu'il n'y ait point totalement de So- leil. Que me dis-tu? celui qui estimera qu'il n'y ait point de Dieux sera tenu pour im- pieux & excommunié, & celui qui estime qu'il y en ait de tels comme le superstitieux les iuge, n'a-il pas des opinions beaucoup plus impieuses & plus meschantes? Quant à moy j'aimerois mieux que les hommes dissent de moy, que Plutarque ne fut iamais, ny n'est point aucunement, que fils disoient, Plutarque est vn homme inconstant, va- riable, cholere, & vindicatif pour la moindre occasion du monde, despit & chagrin. Si vous conuiez les autres à souper, & que vous le laissiez : si estant empesché, vous ne venez au deuant de luy à la porte : si vous faillez à le saluer, il vous mangera le corps

- A corps, en vous mordant à belles dents, il prendra vn vostre petit enfant, & le vous gchennera, il aura quelque mauuaise beste sauuage qu'il enuoyera dedans vos terres, & gastera tous vos fruiçts. Le musicien Timotheus chantoit vn iour en plein theatre à Athenes les louanges de Diane, en l'appellant, comme font les poëtes, furieuse, forcensee, transportee, enragee. Et Cinesias vn autre iouëur d'instruments se leuant d'entre les spectateurs, luy dit tout haut, Que pleust aux Dieux que tu eusses vne telle fille: & neantmoins les superstitieux estiment de semblables choses, voire encore pires, de Diane, A la miene volonté que tu entrasses, soit que tu vinsses de faire pendre quelqu'un, ou de tyranniser femmes grosses en trauail d'enfant, ou d'en faire auorter, encore toute souillée de sang, ou des carrefours, tirant apres toy tes purifications, accompagnée du maling esprit. Et si n'ont de rien meilleur sentiment, ny plus honneste iugement d'Apollo, de Iuno, ny de Venus, pour ce qu'ils les craignent & redoutent tous. Et neantmoins, quelle iniure plus outrageuse auoit ditte
- B Niobé de Latone, que cela que la superstition persuade aux fols d'elle? c'est à sçauoir, qu'elle estant irritée des paroles outrageuses que Niobé luy auoit dittes, luy fait tuer à coups de fiesches six fils & six filles, ia tous estans en age de marier, tant elle estoit insatiable des maux d'autrui, & irreconciliable. Car quand bien il seroit ainsi, que celle Deesse eust de la cholere, qu'elle haïst les meschans, & qu'elle fust marrie d'ouir mal dire de soy, & qu'elle ne se fust pas plus tost mocquée de la sottise & ignorance humaine, ains s'en fust courroucée, plus tost eust elle deu descocher ses fiesches sur ceux qui vont faulxement mettant en auant qu'elle soit si amerement vindicatifue, & qui vont disant & escriuant telles choses d'elle. Nous abominons & detestons la cruauté d'Hecuba, comme estant barbare & bestiale, quand elle dit au dernier liure de l'Iliade,

Je mangerois volontiers sa fressure

A belle dents, sans lascher la morsure:

- C & les superstitieux estiment que la deesse de Syrie, si quelqu'un mange des anchois ou des manoles, qu'elle luy mange le gras des iambes, elle luy emplit le corps d'ulceres, & luy fait pourrir le foye. Comment si c'est meschamment fait de mesdire des Dieux, ne sera-ce pas aussi meschamment fait d'en mal penser & mal estimer? veu mesmement que c'est l'opinion de l'iniuriant, qui fait reputer sa parole iniurieuse: car nous ne detestons l'iniure que pour autant qu'elle est signe d'une maligne volonté, & reputons nos ennemis ceux qui disent mal de nous, comme gens ausquels il ne nous faut pas fier, & qui ont enuie de nous mal faire. Voyez quel iugement les superstitieux ont des Dieux, quand ils les estiment estourdis, desloyaux, muables, vindicatifs, cruels, chagrins, & choleres: dont il s'ensuit necessairement qu'ils les haïssent, & qu'ils les craignent, & ne peut estre autrement, puis qu'ils se persuadent que les plus grands maux qu'ils aient oncques endurez par le passé, & qu'ils soient encore
- D pour endurer à l'aduenir, leur sont arriuez par eux: & si est ainsi qu'ils les haïssent & qu'ils les craignent, ils sont doncques leurs ennemis: & si ne faut pas trouuer estrange cela, veu qu'ils les prient, qu'ils les adorent, qu'ils leur sacrifient, & qu'ils ne bougent ordinairement des Eglises: car nous voyons que lon fait la reuerence aux tyrans, on les saluë, on leur fait la court, on erige en leur honneur des statues d'or ou d'argent, mais ce pendant on ne laisse pas à les haïr de mort secrettement, bien qu'on sacrifie en apparence pour eux. Hermolaus faisoit la court à Alexandre, Pausanias estoit l'un des garde-corps de Philippus, & Chereas de Caius, mais chascun de ceux là en allant apres eux disoit en soy-mesme,

Certainement si i'auois la puissance,

De toy tyran ie ferois la vengeance.

Ainsi l'atheïste pense qu'il n'y ait point de Dieux, & le superstitieux veult qu'il n'y en

Homere
li. 22. de
l'Iliade.

De la superstition.

ait point, mais il le croit pourtant mal gré luy, d'autant qu'il a peur de mourir : mais E
fil pouuoit, comme Tantalus, sortir de dessous ceste grosse pierre qui luy pend sur
la teste, aussi luy se descharger de ceste peur qui ne le presse pas moins, il aimeroit
bien cherement, & trouueroit bienheureuse la disposition & condition de l'atheïste,
comme vne franchise & liberté. Or maintenant l'atheïste ne tient rien du monde de
la superstition, & au contraire le superstitieux de volonté estant atheïste, est plus
coüard & plus foible que de pouuoir croire & se persuader des Dieux ce qu'il vou-
droit bien. Et puis l'atheïste ne donne iamais cause ny occasion de naistre à la super-
stition, là où la superstition donne commencement à l'atheïsme, & puis quand il est
né, encore luy donne elle excuse, non pas vraye ny honneste, mais au moins qui luy
sert de quelque couleur & couuerture: car les sages hommes anciens voyans qu'il n'y
auoit rien que lon sceust reprendre au ciel, ny negligence, ou desordre & confusion
quelconque au mouuement des astres, ny aux saisons de l'année, ny à leurs reuolu-
tions, ny au cours du Soleil à l'entour de la terre, qui est la cause du iour & de la nuit, F
ou à la nourriture des animaux, & generation des fruiëts annuels de la terre: pour ces
considerations & autres semblables ils ont à bon droit condamné de tout poinct
l'impiété des atheïstes. Mais les faicts & œuvres de la superstition, ses passions di-
gnes de mocquerie, ses paroles & ses mouuements, ses charmes & forcelleries, ses
courses çà & là, ses battements de tabourins, ses impures purifications, ses ordes &
salles sanctifications, ses barbares & illicites corrections, deschirements & lacerations
du corps, toutes ces choses-là donnent occasion à aucuns de dire, qu'il est meilleur
qu'il n'y ait du tout point de Dieux, que qu'il y en ait qui reçoient ou approuuent
tous ces abus-là ne qui y prennent plaisir, ne qui soient si outrageux, qui se courrou-
cent de si peu de chose, ne si malaisés à appaiser. N'eust-il pas esté meilleur pour ces
Gaulois ou Tartares-là du temps iadis, de n'auoir iamais eu aucun pensément ny ima-
gination, ny lecture ou cognoissance des Dieux, que de penser qu'il y en eust qui se
delectassent de sang humain respendu, ny de croire que le plus saint & le plus parfait G
sacrifice fust de couper la gorge à des hommes? N'eust-il pas mieux valu pour les
Carthaginois, qu'aiants eu Critias ou Diagoras pour législateurs des le commence-
ment, ils eussent estimé qu'il n'y eust eu ne Dieux ne diables au monde, que de sacri-
fier à Saturne ce qu'ils luy sacrifioient? non pas comme dit Empedocles, reprenant
ceux qui immolent des animaux aux Dieux,

Le pere mesme entre ses mains leuant
Son propre fils en autre corps viuant,
Changé de forme aux celestes l'immole,
Faisant ses vœux, tant il a teste fole:

mais scachans, cognoissans & voyans, eux mesmes immoloient leurs propres enfans,
& ceux qui n'en auoient point, en achetoient des pauures, comme si c'eussent esté H
des agneaux, ou des cheureaux, & falloit que la mere propre qui les auoit vendus as-
sistast au sacrifice, sans monstrier apparence quelconque de s'esmouuoir à pitié, & sans
plorer ne soupirer, autrement elle perdoit le pris & l'argent de son fils, & neantmoins
son enfant ne laissoit pas pour cela d'estre sacrifié: d'auantage à l'entour de la statue
à qui se faisoit ce sacrifice, tout estoit plein de ioueurs de fleutes, de aubois, & de ta-
bourins, à fin que lon n'ouist point le cry de l'enfant. Or si des diables ou des geants,
aians chassé les Dieux, auoient vsurpé l'empire & la seigneurie de ce monde, de
quels autres sacrifices se resiouiroient ils, ne quelles autres offrandes pourroient ils de-
mander aux hommes? Amestris la mere du Roy Xerxes enfouit en terre douze hom-
mes vians, dont elle faisoit offrande à Pluton, pour cuider allonger sa vie: com-
bien que Platon die, que ce Dieu Pluton estant humain, sage & riche, & retenant les
ames par doulces paroles, & gracieuses remonstrances, en a esté appelé par les
Grecs

A Grecs, Hades, qui vaut autant à dire comme plaissant. Et Xenophanes voyant que les Ægyptiens se battoient & frapportoient leurs poitrines en leurs festes, & se lamentoient és iours de leurs solennitez, les admonesta bien pertinemment : Mes amis, si ceux-cy dont vous solennisez les festes sont Dieux, ne les lamentez point : & si sont hommes, ne leur sacrifiez point. Mais il n'y a rien si plein de toutes sortes d'erreurs, il n'y a maladie si meslée de diuerses passions, & contraires opinions & repugnantes les vnes aux autres, comme est celle de la superstition : pourtant la faut-il fuir, mais que ce soit seurement & vtilement, non pas comme ceux qui fuyent la surprise des brigands ou des bestes cruelles & sauvages, ou le feu, qui sont si esperdus & si transportez de frayeur, qu'ils ne sçauent qu'ils font, ne là où ils vont, & en fuyant ainsi follemēt & indiscrettement, se vont ietter en des destours escartez, où ils rencontrent des abysses de baricaues, & des precipices de roches coupees. Aussi y en a il qui fuyans la superstition, se vont ruer & precipiter en la rude & pierreuse impieté de l'atheïsme, en sautant par dessus la vraye Religion, qui est assise au milieu entre les deux.

Du bannissement, ou de l'exil.

C N T R É les propos, ne plus ne moins qu'entre les amis, les meilleurs & les plus certains sont ceux qui nous assistent en nos aduersitez, non point inutilement, mais pour nous aider & secourir : car il y en a beaucoup qui se presentent, & qui parlent à nous quand il nous est aduenü quelque malencontre, mais c'est sans profit, ou plus tost avec dommage : ne plus ne moins que ceux qui ne sont pas assez exercez à plonger, en cuidant secourir ceux qui se noient, estans embrassez par eux, sont eux-mesmes tirez à fond. Or faut-il que les propos & raisons qui viennent des amis & de ceux qui veulent profiter, soient à la consolation de l'affligé, non pas à la iustification de ce qui afflige : car nous n'auons pas besoing de personnes qui pleurent ne qui lamentent avec nous en nos tribulations, comme fait ordinairement l'assemblée du Chorus és tragœdies : ains auons besoing d'hommes qui parlent à nous franchement, & qui nous remonstrent, que se contrister, affliger, & abbaïsser soy-mesme, non seulement est inutile en toute chose, & procede de vanité & de folie : mais là où les affaires mesmes, qui les sçait bien prendre & manier avec raison, & les descouurir tels qu'ils sont, nous donnent occasion de dire,

D Tu n'as dequoy aucunement te plaindre,
Si tu ne veus le simuler & feindre.

Ce seroit à nous trop grande simplesse si nous ne demandions au moins à nostre chair, que c'est qu'elle a, & à nostre ame, si pour le malheur aduenü elle en est deuenue pire, ains qu'il nous fallust auoir des estrangers, qui nous enseignassent nostre mal & douleur, en plorant & se lamentant avec nous. Et pourtant quand nous sommes à part seuls, nous deuons examiner nostre cœur sur tous & chascun des mauvais accidents, comme si c'estoient fardeaux : car le corps est aggraué seulement par la pesanteur du fardeau qu'on luy charge, mais l'ame bien souuēt d'elle mesme adioust la pesanteur aux affaires. La pierre de sa nature est dure, la glace de sa nature est froide, & n'apporte pas de dehors casuellement, l'une la dreté, ny l'autre la froideur glacee : mais les bannissements, les rebuts, & pertes d'honneurs, comme au contraire aussi les honneurs, les magistrats & les preeminences, qui ont puissance de nous

Du bannissement, ou de l'exil.

resjouir ou attrister, selon la mesure, non de leur propre nature, mais de nostre iugement, vn chacun se les rend ou pesans, ou legers, & faciles à porter : & au contraire, d'où vient que Polynices respond ainsi à la demande qui luy est faite par sa mere?

Euripide
en la tragedie
des Phœniciennes.

Quoy donc, est il vn grand mal arriué,
A qui se void de son pais priué? Polynices,
Ouy tresgrand, & en experience
Plus qu'exprimer ne scauroit eloquence.

Mais au contraire Alcman, ainsi comme dit celuy qui a fait cest Epigramme,
Sardis estoit iadis la demourance
De mes parents, là où ie pris naissance,
Et fus nourry, appelé Macelas,
A la façon du pais, ou Celsas :
Robbe & ioyaux de fin or ie portoye,
Et le plaissant tabourin ie battoye : F
Mais maintenant Alcman ie suis nommé,
L'vn des bourgeois de Sparte renommé,
Aiant appris les Muses de la Grece,
Qui m'ont rendu en gloire & alaigresse
Plus triomphant que ne fut onc Gyges,
Ny le tyran qui eut nom Dascyles.

Car l'opinion rend vne mesme chose à l'vn vtile, comme bonne monnoye qui a cours, & à l'autre invtile : mais supposons que l'exil & bannissement soit chose grieve à supporter, comme plusieurs le disent & le chantent : aussi y a il entre les choses que lon mange quelques vnes qui sont ameres ou aigres, & qui poignent le sentiment, mais en les meslant parmy quelques vnes des douces & gracieuses, nous leur oston ce qu'elles ont de desaggreable à la nature : aussi y a il des couleurs qui offensent la veüe, tellement qu'elle s'en esblouit & s'en trouble, tant elles sont esclattantes, G
aspres & brillantes. Si doncques pour remedier à la dureté malaisée de telles couleurs, nous auons inuenté d'y mesler de l'ombre, ou bien nous destournons nos yeux à regarder quelque couleur verdoyante & delectable : le mesme pourrons nous aussi semblablement faire des sinistres accidents de la fortune, en meslant parmy les bonnes & desirables qualitez qui sont en toy maintenant, abondance de biens, nombre d'amis, repos d'affaires, n'auoir besoing de chose quelconque necessaire à la vie humaine. Je ne pense pas qu'il y ait Sardonien qui n'aimast mieux, & ne fust plus content, d'auoir les biens que tu as, voire en exil, & hors de sa maison, en pais estranger, que comme les ouystres, qui sont collez & attachez à leurs coquilles, n'auoir autre bien que de iouir en paix, sans fascherie, de ce qu'il a en sa maison. Ne plus ne moins doncques, qu'en certaine Comédie il y a quelqu'un qui admoneste son amy estant tombé en aduersité, d'auoir bon courage, & de combattre la fortune : H
& l'autre luy demande, En quelle maniere? Il luy respond, En philosophe, c'est à dire, en homme sage, armé de patience. Aussi nous maintenans en ceste aduersité combattons-la de patience, ainsi qu'il appartient à homme sage : car comment est-ce que nous nous defendons de la pluye? comment est-ce que nous nous couurons de la bise? En cherchant le feu, en nous mettant dedans vne estuue, en faisant provision de robbe & de couuerture : nous ne demourons pas assis à nous mouiller à loisir quand il pleut, ny ne plorons pas sans nous mettre au couuert & à l'abry : aussi en ce qui s'offre presentement, as tu moyen, plus que nul autre, de refaire & reschauffer ceste partie de ta vie, qui semble vn peu refroidie, attendu que tu n'as besoing quelconque de tous autres secours, prouueu que tu en veuilles vser par raison. Car les ventoses que les medecins appliquent, tirans du corps humain ce qu'il y a de plus mauuais

A uais sang, allegent & conferuent au reste le demourant : mais les hommes chagrins de nature, hargneux & subiects à se plaindre continuellement, à force de ramasser tousiours en leur entendement ce qu'il y a de plus mauuais en leur fortune, & de le rememorer souuent, en s'attachant ordinairement à leurs ennuis, se rendent inutile cela mesme qui est vtile, & au temps qu'il peut le plus profiter : car les deux tonneaux qu'Homere dit estre au ciel pleins des destinées des hommes, l'un des bonnes, & l'autre des mauuaises, ce n'est pas Iupiter qui seant en son throne les distribue, & qui enuoye aux vns des aduentures doulces, & tousiours meslees de quelque bien, & aux autres, par maniere de dire, des ruisseaux continuels de pures miseres & maux : mais entre nous, ceux qui sont sages & qui ont bon entendement, espuisent de leurs bonnes aduentures ce qu'il y peut auoir de mauuais meslé parmy, & par ce moyen rendent la vie plus ioyeuse & plus aisée à aualler, en maniere de dire : là où au contraire vous diriez, que la plus part des hommes passent leurs fortunes par vne couloire, aux trous de laquelle s'attachent & s'arrestent les mauuaises, & les bonnes s'escoulent à trauers.

B Pourtant fault-il, encore que nous soyons tombez en quelque inconuenient, qui à la verité soit mauuais & fascheux, induire par dessus quelque resiouissance & quelque gayeté de ce que nous auons d'ailleurs, & qui nous demeure de bien, en rabotant & polissant, fil fault ainsi parler, ce qui est rude & aspre, par ce qui est doux & gracieux ; mais quant aux accidents qui de leur nature n'ont rien de mauuais, & où tout ce qui nous trouble est entierement feint & controuué par vne vaine opinion & folle imagination, il fault faire comme nous faisons aux petits enfans qui craignent les masques, nous les leur approchons de pres, & les manions deuant eux, tant que nous les accoustumions à n'en faire plus de compte : aussi en y touchant de pres, & y arrestant le discours de nostre entendement à le bien considerer, & descouurir ce qu'il y a de faulx apparence, de vanité & de feinte Tragœdie, comme est l'accident qui de present t'est arriué, d'estre banny de ton pays, selon l'erreur de la commune opinion. Car

C par nature il n'y a point de pays distingué, non plus que de maison, ny d'heritage, ny de boutique de ferrurier ou de chirurgien, comme disoit Ariston : ains est chascune de ces choses-là, ou plus tost s'appelle & s'estime propre à celuy qui y habite & qui s'en sert : car l'homme, ainsi que disoit Platon, n'est pas vne plante terrestre qui ait ses racines fichees en terre, ne qui soit immobile, ains est celeste, la teste en estant la racine, de laquelle le corps s'esleue droit contremont deuers le ciel. Voyla pourquoy Hercules disoit en vne Tragœdie,

Quoy qu'on me face Argien ou Thebain

Point ne me vante estre de lieu certain,

Toute cité de Grece est ma patrie.

Mais Socrates disoit encore mieulx, qu'il ne pensoit estre ny d'Athenes, ny de la Grece, mais du monde, comme qui diroit Rhodien ou Corinthien, d'autant qu'il ne

D se feroit enfermé dedans les limites des promontoires de Sunium ou de Ténarus, ou des montaignes Ceraunienes.

Vois-tu ce hault infiny firmament,

Qui en son sein liquide fermement

Tient la rondeur de la terre embrassée ?

Ce sont les bornes de nostre pays, & n'y a nul qui au dedans d'icelles se doiue estimer banny, ny forain ou estranger : là où il y a vn mesme feu, vne mesme eau, vn mesme air, mesmes magistrats, mesmes gouuerneurs, & mesmes presidents, le Soleil, la Lune, l'estoille du iour, mesmes loix pour tous, sous vn mesme ordre, & sous vne mesme conduite, le solstice d'hyuer, le solstice d'esté, l'équinoxe, les Pleiades, l'estoille d'Arcturus, la saison de semer, la saison de planter, vn mesme Roy & mesme prince de tout ce monde, qui est Dieu, ayant en sa main le commencement, le milieu, & la fin de

Du bannissement, ou de l'exil.

tout l'univers, marchant droitement, & se promenant par tout, selon nature, tous-
iours accompagné de droicte & de iustice, qui venge ceulx qui transgressent au-
cun point de la loy diuine, de laquelle nous autres vsons enuers tous autres hom-
mes, comme enuers nos citoyens. Mais que tu n'habites point en la ville de Sardis, ce-
la n'est rien : car aussi tous les Atheniens n'habitent pas au bourg de Colyttus, ny tous
les Corinthiens en la rue du Cranium, ny tous les Laconiens en la villette de Pittane.
Est-ce à dire que tous les Atheniens qui passerent de la ville de Melite en celle de
Dromide fussent tous estrangers, ou bien sans pais, attendu que là ils solennisent en-
core le mois de leur transmigration, & y font vn solennel sacrifice qu'ils appellent
Metagitnia, en memoire de leur transition à autre voisinage, qu'ils receurent fort ai-
sément, en ioye, & avec contentement? Je croy que tu ne le voudrois pas dire. Quel-
le partie doncques de la terre habitable, ou bien de l'universelle, est loing l'une de l'aut-
re, veu que les Mathematiciens preuent & demonstrent par raison, que le total d'i-
celle ne tient lieu que d'un point qui n'a nulle dimension au regard du firmament? F
Mais nous, comme des formis chassés hors de leur formilliere, ou des abeilles iettées
hors de leur ruche, nous desconfortons & nous trouuons tous estranges, par ce que
nous ne sçauons pas nous attribuer & estimer propres à nous toutes choses, comme
elles le sont, combien que nous nous mocquions ordinairement de la sottise de ceux
qui disent, que la Lune d'Athenes soit meilleure que celle de Corinthe: & ce pendant
nous sommes en mesme erreur de iugement, quand estans hors du lieu de nostre de-
murance nous mescognoissons la terre, la mer, l'air, & le ciel, comme estans autres,
& tous differents que ceux que nous auons accoustumez : Car la nature nous laisse
aller par le monde tous libres & desliés : mais nous mesmes nous lions, nous empri-
sonnons & emmurons, en nous estraignant & reduisant à peu de petite & estroicte
place. Et puis nous nous mocquons des Roys de Perse, de ce qu'ils ne boient ia-
mais autre eau que de celle de la riuere de Choaspes, & par ceste maniere de faire se ré-
dient toute la terre habitable, au demourant sterile d'eau pour eux : & quand nous G
sommes remuez de lieu à autre, regrettant ou la riuere de Cephissus, ou celle d'Eur-
rotas, ou la montagne de Taugetus, ou de Parnassus, nous nous rendons tout le de-
mourant de la terre, inhabitable, comme vn desert où il n'y ait point de ville pour
nous. Et au contraire, quelques Egyptiens par vne cholere ou trop grande du-
reté de leur Roy, s'estans transportez en Æthiopie, comme leurs parents & amis les
priaient & admonnestaient de s'en retourner vers leurs femmes & leurs enfans, en
descourant leurs parties naturelles, vn peu bien effrontément, ils respondirent,
qu'ils n'auroient point de faulte de femmes ny d'enfans, tant qu'ils auroient ces outils
là quand & eux : mais on peut bien plus honnestement & plus grauement dire, que
celuy auquel en lieu qu'il soit ne default commodité des choses qui luy sont neces-
saires pour sa vie, là ne pourroit-on dire que celuy là soit hors de son pays, sans ville,
ny sans feu, ne lieu, ne qu'il y soit estranger, prouueu qu'il ait l'œil & l'entendement H
à cela qui le gouerne, & luy serue cōme d'une ancre, à fin qu'il se puisse seruir de tout
port, & de tout havre où il abordera : car quand on a perdu ses biens, il n'est pas facile
soudainemēt d'en ramasser d'autres : mais toute ville est le pays de celuy qui s'en sçait
bien seruir, & qui a des racines qui puissent viure & se nourrir par tout, & prendre
pied en tout lieu, telles que les auoit Themistocles, ou Demetrius le Phalerien, lequel
apres auoir esté banny d'Athenes, se trouua le premier homme de la Cour du Roy
Ptolomēus en Alexandrie : là où non seulement il eut abondance de tous biens pour
luy, mais qui plus est, enuoya des presens aux Atheniens : & Themistocles estant
nourry & entretenu par la liberalité du Roy de Perse, en estat de Prince, dit, ainsi que
lon raconte, à sa femme & à ses enfans, Nous estions perdus, si nous n'eussions esté
perdus. Pourtant Diogenes surnommé le Chien, respondit pertinemment à vn qui
luy

A luy reprochoit que les Sinopiens l'auoient banny du pais de Pont : Et moy, dit-il, ie
 „ les ay confinez dedans le pais de Pont, à la charge qu'ils ne partent iamais des riuages
 „ & des falaises de la mer maïour, qui est Pont Euxine. Et Stratonicus estant en l'isle de
 „ Seriphe, qui est fort petite, demanda à son hoste, pour quel crime on punissoit de
 „ bannissement les malfaïcteurs en leur pais : & comme il luy eust respondu, que c'e-
 „ stoit pour crime de faulx : Et que ne fais-tu donc quelque faulseté, luy repliqua-il, à
 „ fin que tu sortes de ceste estroïcte prison ? là où, ce disoit vn poëte Comique, on
 „ cueille les figues auec des fondes, & là où lon a à foïson de toutes necessitez. Car si tu
 „ veux bien cōsiderer la verité sans vaine opinion, celuy qui a vne ville affectee, est estrā-
 „ ger & pelerin de toutes les autres : Car il n'est pas honneste ny raisonnable, qu'aban-
 „ donnant la sienne propre, il aille habiter celles des autres. Sparte r'est escheute en ton
 „ fort, honore la : quoy qu'elle soit ou de peu de renom, ou mal saine : & encore qu'elle
 „ soit trauaillee de seditions ciuiles, ou d'autres turbulents affaires : mais celuy à qui la
 B fortune a osté celle qui luy estoit propre, à celuy-là elle abandonne celle qui luy plaira.
 Ce beau precepte des Pythagoriens seroit bien sage & bien vtile à prattiquer en cest
 „ endroit, Choyfi la voye qui est la meilleure, l'accoustumance te la rendra agreable
 „ & plaisante : choyfi la meilleure & la plus plaisante ville, le temps te la rendra ton
 „ pais, qui ne te distraira point de tes affaires, ne te faschera point, ne te commandera
 „ point : contribue, va en ambassade à Rome, reçois le capitaine en ta maison, prens
 „ vne telle charge. Celuy qui ramenera bien tout cela en sa memoire, prouueu qu'il
 ait entendement, & qu'il ne soit point aueuglé de vanité, il eslira & souhaittera d'estre
 banny, voire quand bien ce seroit à la charge d'aller habiter en la petite Isle de Gyare,
 ou en celle de Cinare,

Aspre & sterile à tout bon fruiet porter,

Nullement propre à des arbres planter,

C sans y auoir regret & sans se plaindre, ne dire les paroles que disent les femmes en
 Simonides,

Le bruit tonnant de la mer tourmentee

A l'environ me ceint espouuantee :

ains plus tost discourant à par soy, ce que iadis Philippus le Roy de Macedoine dit,
 estant tombé de son long à la renuerse, au lieu où l'exerçoit la luitte, & se retournant
 „ comme il eut veu la forme & figure de son corps imprimée en la poulsiere, ô Hercu-
 „ les, dit-il, combien peu de terre il nous fault par nature, & neantmoins nous conuoï-
 „ tons tout le monde habitable. Je pense que tu as veu quelquefois l'Isle de Naxe, ou
 bien celle de Thurie qui n'est pas loing d'icy, c'estoit le domicile d'Orion ancienne-
 ment, & l'autre auoit iadis pour ses habitans Ephialtes & Otus. Et Alcmeon feit sa
 demeure sur la vase que le fleue d'Achelous auoit nouuellement amassée, apres
 qu'elle fut vn peu affermie & desseichee, fuyant, comme disent les poëtes, la pour-
 D suite des furies : mais quant à moy, ie me doute que pour fuir les magistrats & offi-
 ces d'une Republique, les seditions, brigues & calomnies furiales, que lon y endu-
 re, il eust choyfi vn bien plus petit lieu pour son habitation, moyennant qu'il y eust
 peu viure en seureté & en repos, loing de tous affaires. Et Tiberius César vescu les
 sept ans derniers de sa vie, iusques à sa mort, en la petite Islette de Caprees : tellement
 que le temple & throne Imperial de la terre habitable, restraint au cœur d'un seul
 homme, par maniere de dire, fut tant de temps en ce seul lieu là, sans en sortir
 nulle part ailleurs : mais quant à celuy-là, les soucis, cures & ennuys de l'empire luy
 estans respendus sur la teste, & accourans à luy de tous costez, ne luy laissoient pas
 nettement & sans tourmente, iouir de son repos insulaire : mais celuy qui peult, en-
 trant en vne petite Isle, se deliurer de grāds trauaux, celuy là est miserable s'il ne dit sou-
 uent à par soy en luy mesme, & ne chante maintefois ces vers de Pindare,

Cornelius
 Tacitus l. 4.
 mer vnze
 ans.

Du bannissement, ou de l'exil.

E

Petit nombre de beaux Cypres
Aime, & laisse les grands forests
Qui sont en Crete, alentour d'Ide:
J'ay peu de champ ras & tout vuide
D'arbres, si peu est spacieux,
Mais aussi de deuil soucieux
Est mon ame du tout exempte,
Et procès point ne la tourmente.

aussi ne seras tu point subiect à brigues & seditions civiles, ny à mandemens de gouverneurs, ny à charges & administrations en affaires publiques, dont on ne se sçau-
roit excuser. Et veu qu'il semble que Callimachus ait bien rencontré, disant qu'il ne
fault pas mesurer la sapience au cordeau Persien, à sçavoir-mon, si mesurans la feli-
cité aux chordes & aux lieuës Persiennes, nous nous devons plaindre & lamenter
comme malheureux, quand nous habiterons vne petite Islette, qui n'aura que deux
cents stades de tour, & non pas quatre iournees de nauigation comme la Sicile? car
de quoy sert le pais grand & large à la felicité, & à rendre vn homme heureux? n'en-
tens-tu pas Tantalus, qui en vne Tragédie dit ainsi, -de Berecynthe

F

Les plaines ont de long douze iournees,
Qui tous les ans par moy sont engrainees?

Et puis vn peu apres il dit,

Mon ame estant du hault ciel deuallee
En ceste basse & terrestre vallee,
Me parle ainsi, Garde toy d'adorer
Par trop ce monde, & de t'en amourer.

Et Nausithous abandonnant Hyperie aux larges campagnes, pource qu'elle estoit
trop voisine des Cyclopes, & s'en allant demourer en vne Isle arriere des autres hom-
mes, sans auoir conuersation quelconque avec eulx,

G

Loing des humains au milieu de la mer,
prepara vne tresdoulce vie à ses citoyens. Au temps iadis les enfans de Minos habite-
rent premierement les Isles Cyclades, & depuis ceux de Codrus & de Neleus les tein-
drent, esquelles les fols bannis maintenant estiment estre griefuement punis quand
on les y confine: & toutefois quelle Isle y a il destinee au confinement des bannis
qui ne soit plus large que la possession & le champ de Scillontie, dedans lequel Xeno-
phon apres le tant renommé voyage de Perse passa heureusement sa vieillesse: &
l'Academie, qui n'estoit qu'un petit verger, qui ne cousta d'achapt que trois mille
drachmes, estoit l'habitation de Platon, de Xenocrates & de Polemon, qui là te-
noient leurs escholes, & y demouroient tout le temps de leur vie, excepté vn seul
iour tous les ans, auquel Xenocrates descendoit iusques à la ville pour voir le passe-
temps des ieux, aux festes de Bacchus, quand on ioüoit de nouuelles tragédies, pour
honorer la feste, comme lon disoit: & Theocritus natif de Chio, reproche mesme
à Aristote, que pour viure en la court de Philippe & d'Alexandre, il aimoit mieux
demourer sur la bouche de la riuere de Borborus, que non pas en l'Academie: car
Borborus est vne petite riuere, qui passe au long de la ville de Pella en Macedoine.
Et le poëte Homere par expres nous recommande les Isles, en les celebrant & hono-
rant de diuines louanges,

300. Efcus.

Iliad. l. 14.

Il arriua à Lemnos la belle Isle,
Où du diuin Thoas estoit la ville. Et,
Ce que des Dieux l'heureux seiour Lesbos
Contient dedans tout son pourpris enclos. Et,
Après, qu'il eut la haulte Scyros prise,

Ville

A Ville de Mars aux armes bien apprise.
Et, Les habitans des Echinades sainctes
Dulichios, Isles toutes encceintes
De haulte mer d'Elide vis à vis.

aussi dit-on que des hommes illustres le plus deuot Aeolus habitoit en vne Isle, le plus sage Vlysses en vne autre, le plus vaillant Ajax, le plus courtois aux passans & estrangers Alcinous. Et Zeno le philosophe aiant nouuelles qu'une nauire, qui luy estoit de tous ses biens demouree seule, estoit perie en mer, avec toute la marchandise qui estoit dedans, Tu fais (dit-il) bien, Fortune, de me ranger & reduire à la robbe d'estude, & à la vie philosophique. Aussi pense-je qu'un homme qui ne seroit pas du tout estourdy de vaine gloire, ny transporté d'ambition populaire, ne pourroit iustement se plaindre de la fortune, quand il seroit rangé en vne Isle: ains l'en remerciroit de ce qu'elle luy auroit osté toute angoisse d'esprit, tout rompement de teste, toute subiection d'aller errant çà & là par le monde, de s'exposer aux perils de la mer, & aux crieries & rabrouemens d'une multitude de peuple, & l'auroit reduit à vne vie stable, tranquille, pleine de repos, n'estant distrait d'aucune superflue occupation, ains viuant proprement & veritablement à soy, luy ayant tracé à l'entour pour son centre & sa circonference l'usage de toutes choses necessaires à la vie de l'homme: car qui est l'Isle qui n'a vne maison, vn promenoir, vne estuue, des poissons, des lieures, qui veult prendre son passetemps à les pescher, & chasser? Qui plus est, tu peux souuent iouir à cœur saoul du repos & loysir dont les autres sont affamez: car ailleurs les calomniateurs, & les curieux recherchâs toutes noz actions, & nous espiâs, soit que nous iouons au dez, ou que nous nous tenions cachez chez nous, nous tirent par force de noz maisons de plaissance, & de noz iardins, pour aller respondre & comparoir en iustice, ou bien nous entraînent par force en Court: là où à celui qui est confiné en vne Isle, il n'y a personne qui luy aille rompre la teste, personne qui luy aille demander, personne qui luy emprunte: nul ne le prie de venir respondre pour luy, nul de luy aider à conduire sa brigue. Il n'y a seulement que les meilleurs de ses amis, & de ses plus affectionnez parents, qui pour l'amour qu'ils luy portent, & pour desir de le voir, montent sur mer pour l'aller visiter: tout le reste du temps & de la vie luy demeure franc & quitte, sans qu'on luy puisse violer ny troubler, à qui sçait & qui veult user de son repos. Mais celui qui louë ou repoute heureux ceux qui vont courant par le monde hors de leurs maisons, & qui passent la plus part de leur vie, ou par les hostelleries, ou dedans les nauires de passage, il ressemble proprement à celui qui iugeroit les planettes & estoilles errantes plus heureuses, que non pas les autres fixes: & toutefois chacune planette tourne tousiours en son ciel propre, côme en vne Isle, gardant tousiours l'ordre de sa reuolution: Car, comme disoit Heraclitus, le Soleil mesme ne outrepassera iamais ses bornes, autrement les Furies, qui seruent & secondent la iustice, le rencontreront. Mais toutes ces raisons-là, & autres semblables, mon bon amy, alleguons les & les chantons à ceux, qui estans releguez ou confinez en vne Isle, ne peuuent pratiquer ny hanter en autre lieu quelconque,

Ceux qui des flots de l'escumeuse mer
Contre leur gré se voient enfermer:

mais à toy, à qui vn seul lieu n'est pas donné & assigné pour habiter: ains vn seul est defendu, l'exclusion d'une seule ville est l'ouuerture de toutes les autres. Et si quelqu'un nous obiice, Voire mais nous ne tenons plus de magistrats, nous n'allons plus au Senat, nous ne presidons plus aux ieux publiques: Nous luy opposerons, aussi ne sommes nous plus en brigues, aussi ne despensons nous plus, aussi ne sommes nous plus subiects à aller faire la court aux portes des gouuerneurs, & ne nous chault

Du bannissement, ou de l'exil.

maintenant à qui par fort soit escheu le gouvernement de nostre prouince, fil est E cholere, fil est fascheux: ains comme Archilochus ne faisant compte des fertiles terres à bleds & à vignes, qui sont en l'isle de Thasos, l'a diffamee, pour ce qu'elle est aspre & bossue, disant,

Comme le dos d'un asne elle est pointue,
De sauuageaux couuerte & reuestue.

aussi nous, iettans nos yeux & les fichans sur cela seulement qui est le plus vil en vn exil, nous ne nous arrestons pas à considerer le repos, le loisir & la liberté qui nous en prouient. Et toutefois on beatifie & reputé bien-heureux les roys de Perse de ce qu'ils passent leur hyuer en Babylone, leur esté en la Medie, & la plus douce partie du printemps en Suse: & celuy qui est hors de son pais peut durant la solennité des mysteres demourer en la ville d'Eleusine, durant les Bacchanales se festoyer en Argos, quand on iouë les ieux Pythiques s'en aller en la ville de Delphes, quand on celebre les Ieux Isthmiens passer à Corinthe, fil est homme qui prenne plaisir à voir diuer- **F** sifré de spectacles: sinon se tenir quoy, se promener, lire, reposer & dormir, sans que personne vienne interrompre son sommeil: & ce que souloit dire Diogenes, Aristote disne quand il plaist à Philippus, & Diogenes quand il plaist à Diogenes, sans qu'il y ait affaire, ny magistrat, ny gouverneur & capitaine qui interrompe sa façon ordinaire de viure. C'est pourquoy vous trouuerez peu des plus sages & plus prudents hommes qui ayent esté ensepuelis en leurs pais, ains la plus part, sans que necessité quelconque les y forceast ny contraignist, ont volontairement leué l'ancre, & s'en sont allez surgir en autrui port, pour y passer leur vie: & sont les vns allez d'Athenes ailleurs, & les autres venus d'ailleurs à Athenes: car qui a oncques dit vne telle louange de son pais comme a faict Euripide?

Premierement vn peuple nous ne sommes
Venu d'ailleurs icy, estranges hommes,
Ains de tout temps au pais mesme nez: **G**
Tous autres gens ont esté promenez,
Comme osselets que ça & là loniette,
Chassez puis d'une & puis d'une autre affiette:
Et si nous-fault d'auantage exalter,
Nous auons l'air que nous pouuons vanter
D'estre si bien temperé, qu'en froidure
Ny en chaleur point d'exces il n'endure:
Et si la Grece ou l'Asie produit
Gibbier aucun delicat, ou bon fruit,
Au doux appast de cest air se vient rendre,
Tant qu'il nous est facile de le prendre.

& toutefois celuy qui auoit escrit toutes ces belles louanges là de son pais, s'en alla **H** en Macedoine, & vescu en la court du Roy Archelaus.

Æschylus fils d'Euphorion natif
D'Athenes est sous ce tombeau captif,
Inhumé pres Gele la fromenteuse.

car luy aussi se partit de son pais, & s'en alla habiter en Sicile, comme aussi feit Simonides deuant luy. Et ce tiltre des liures d'Herodote, C'est l'histoire d'Herodote Hali-carnassien, il y a plusieurs qui le corrigent & escriuent, d'Herodote Thurien, pour ce qu'il falla tenir en la ville de Thuries, & fut participant de celle colonie. Mais le diuin esprit & celeste Homere en la science des Muses,

Decorateur de la guerre Troyenne,
qui a fait que tant de citez se debattent à qui l'aura, & l'attribuent sa naissance, sinon
qu'il

- A** qu'il n'en louë pas vne seule : & puis nous voyons que par tout on fait tant & de si grands hōneurs à Iupiter Hospital. Et si quelqu'un me dit, que tout ces personnages là ont esté ambitieux, & qu'ils cherchoient gloire & honneur, retire toy deuers les sages, & aux escholes de sapience à Athenes, ramene en ta memoire ceux qui ont esté anciennement renommez en l'eschole du Lyceum, en l'Academie, au Portique dont a esté denommee la secte Stoique, au Palladium, en l'Odeum qui estoit l'eschole de la musique : si tu aimes & as en estime la Peripaterique par dessus toutes les autres, Aristote, qui en a esté le prince, estoit natif de la ville de Stagires en Macedoine, Theophraste natif d'Eressus, Straton de Lampsaque, Glycon de Troade, Ariston de Chio, Critolaus de Phasele : si tu admires plus la Stoique, Cleanthes estoit d'Assos, Zenon Citicien, Chrysippus de Soles, Diogenes de Babylone, Antipater de Tarse : & Archedemus, qui estoit natif d'Athenes, s'en alla demourer entre les Parthes, & laissa en Babylone vne succession de philosophie Stoique. Qui a-ce doncques esté qui les a tous
- B** chassés de leur pais : nul : ains ont esté eux-mesmes qui ont par tout cherché leur repos, duquel mal-aísement peuuent iouir en leur maison ceux qui ont quelque autorité ou quelque reputation : tellemēt qu'ils nous ont bien enseigné leurs autres sciences en leurs liures, mais ce poinct de viure en repos, ils le nous ont montré par effect & par leur exemple. Car encore à present les plus illustres & les meilleurs Philosophes viuent en pais estranges & hors de leurs maisons, non qu'ils y aient esté trāsportez par autrui, mais par ce que ils s'y sont trāsportez d'eulx-mesmes : ne qu'ils y aient esté releguez, mais qu'ils s'y sont confinez d'eulx-mesmes : en fuyant les empeschemens, destourbiers & occupations que nous apportent noz pais. Qu'il soit ainsi, la plus part des plus belles & des plus approuuees & louées compositions que les anciens aient faites, ce a esté moyennant l'exil où ils estoient, que les Muses leur ont inspiré le sçauoir de les faire. Thucydides Athenien escriuit la guerre des Peloponesiēs, & des Atheniēs en la Thrace, en vn lieu qui s'appelloit la Forest fossoyce. Xenophon escriuit son histoire au lieu de Scillonte qui est en la prouince d'Elide, Philistus en Epire : Timæus qui estoit natif de Taurominium en Sicile, à Athenes : Androtion Athenien, à Megares : Bacchylides le poëte, au Peloponese. Tous ceux-là, & plusieurs autres encore, pour estre sortis de leurs pais, ne se sont pas descouragez, ny ne se sont pas desesperez ains ont montré la viuacité de leurs bons esprits, aians pris de la fortune leur bannissement, comme vne occasion propre à ce faire, pour laquelle maintenant encore apres leur mort ils sont renommez par tout : là où au contraire il n'est demouré aucune memoire maintenant de ceux qui par leurs brigues & menées les ont chassés. Et pourtant merite d'estre mocqué celuy qui estime qu'il y ait quelque note d'infamie, conioincte & adherente au bannissement. Comment dis-tu cela ? Doncques Diogenes est infame, lequel Alexandre le grand voiant assis au Soleil s'approcha de luy, & luy demanda, si l'auoit besoing d'aucune chose : l'autre luy respondit, que non, sinon qu'il fust vn
- D** petit de deuant son Soleil : tellement qu'Alexandre esbahy de ceste grandeur & hautesse de courage, dit alors à ceux là qui estoient autour de luy, Si ie n'estois Alexandre, ie serois Diogenes. Doncques Camillus estoit infame pour auoir esté chassé de Rome, de laquelle maintenant il est appelé le second fondateur : & Themistocles pour estre banny, ne perdit pas la gloire qu'il auoit acquise entre les Græcs, mais au contraire y adiousta celle qu'il auoit acquise entre les Barbares : & n'y a homme qui soit de si bas cœur & si peu soucieux d'honneur, qu'il n'aimast mieux estre Themistocles tout banny, que non pas Leobates celuy qui l'accusa & qui le fit bannir : & Ciceron qui fut dechassé, que non pas Clodius qui le chassa : ou Timotheus qui fut contrainct d'abandonner son pais, que Aristophon son accusateur qui le luy fit abandonner. Mais pourautant que l'autorité d'Euripides en esmeut plusieurs, ausquels il semble qu'il a allegué de bien puissants arguments à la condamnation & diffama-

Du bannissement, ou de l'exil.

En la Tragédie des Phœniciennes.

tion du bannissement, voions que c'est qu'il en dit, en demandant & respondant. E

I O C A S T A ,

Quoy donc, est-il si grand mal arriué
A qui se sent de son païs priué?

P O L Y N I C E S ,

Ouy tres-grand, & en experience,
Plus qu'exprimer ne scauroit eloquence.

I O C A S T A ,

Comment cela? qu'est-ce qui griefue plus
Ceux-là qui sont de leur païs exclus?

P O L Y N I C E S ,

Ce qui plus griefue, est que le banny n'ose
Pas librement parler de toute chose.

I O C A S T A ,

Celuy est serf qui n'ose franchement
Se declarer de tout son pensément.

P O L Y N I C E S ,

On est contraint d'endurer sous faintise,
Des plus puissans l'ignorance & sottise.

Ceste sentence n'est ny bonne, ny veritable: car premierement ce n'est point vn serf qui n'ose franchement declarer tout ce qu'il pense, ains plus tost vn homme sage & prudent, qui tient sa langue en temps & affaires qui requierent taciturnité & silence: ainsi comme luy-mesme le dit ailleurs plus sagement & mieux,

Taire où il faut, & où il loit parler.

Et puis on n'est pas contraint de supporter l'ignorance des plus forts seulement quand on est hors de sa maison, mais bien souuent & encore plus, quand estant dedans on craint d'estre calomnié, ou forcé & violenté par ceux qui ont iniustement le credit & l'autorité és villes. Et qui plus est manifestement faux, il oste à ceux qui sont hors de leur païs la liberté de franchement parler: & m'esmerueille fil trouuoit que Theodorus fust sans franchise & liberté de parler, attendu que comme le Roy Lyfimachus luy dist, Ceux de ton païs t'ont chassé & banny pour ta mauuaise langue, Ouy, respondit-il, pour ce qu'ils ne me pouuoient plus porter, non plus que Semelé Bacchus: combien qu'il luy eust monstré dedans vne cage de fer Telephorus, auquel il auoit fait arracher les yeux, couper le nez & les oreilles, & tronçonner la langue, en luy disant, Voyla comment l'accoustre ceux qui me font desplaisir. Quoy? Diogenes n'auoit-il point de liberté, lequel estant allé au camp de Philippus, sur le point qu'il estoit prest à donner la bataille aux Grecs, fut pris & mené deuant le Roy comme espion, qui seroit venu pour espionner le camp: Ouy vrayement, dit-il, ie suis venu voirement pour visiter ton insatiable cupidité de dominer, & ta folie: veu que tu t'apprestes pour hazarder en vn moment d'heure, non seulement ta couronne, mais aussi ta personne. Et Hannibal estant banny de Carthage ne parla-il pas librement au Roy Antiochus, quand il luy conseilla, l'occasion s'estant presentee de donner la bataille aux Romains, & le Roy aiant fait sacrifice aux Dieux, luy respondit, que les entrailles des hosties ne luy permettoient pas de ce faire. Et comment, luy repliqua il, en le reprenant: Tu veux doncques faire ce qu'une chair morte te dit, & non pas ce que te conseille vn homme sage? Mais non pas les Geometres mesmes, & ceux qui vsent de demonstrations lineaires, ne perdent pas pour estre bannis la liberté de dire franchement ce qui est de leur art & science: car pourquoy cela, fils sont gens de bien & d'honneur? mais la couardise & lascheté de cœur est celle qui par tout empesche la parole, lie la langue, serre le gosier, & fait taire les

A les hommes. Mais voyons ce qui suit apres en Euripide.

IOCASTA,

Mais, comme on dit, esperance de mieux
Paist les chetifs qui sont hors de chez eux.

POLYNICES,

Ils ont beaux yeux, & la veuë loingtaine,
Pour voir de loing vne attente incertaine.

Cela encore est vn blasme & reprehension de folie, & non pas du bannissement, car ce ne sont pas ceux qui ont appris, & qui sçauent s'accommoder à ce qui se presente, mais ceux qui sont tousiours suspendus en l'attente de l'aduenir, & qui souhaitent tousiours ce qu'ils n'ont pas, qui sont emportez tousiours ça & là sur l'esperance, comme sur vn radeau, encore qu'ils ne soient iamais sortis des murailles de leur ville.

IOCASTA,

B Les alliez de ton pere, & amis,
A ton besoin ont-ils secours omis?

POLYNICES,

Garde toy bien de tomber en affaire:
Peu sont amis en fortune contraire.

IOCASTA,

Le noble sang dont tu es descendu
Ne t'a-il pas par tout honneur rendu?

POLYNICES,

Il fait mauuais en necessité estre
Mal me donnoit ma noblesse à repaistre.

Ces paroles de Polynices ne sont pas seulement fausses, mais ingrates, quãd il dit que la noblesse ne treuve pas qui l'honore, ne qui se mōstre amy en exil, veu q̃ luy estat bāny hors de son pais fut tāt honoré, qu'on luy dōna en mariage vne fille de Roy, & qu'il assēbla vne si grosse & puissante armee de ses alliez, amis & cōfederez, à l'aide desquels il retourna en armes dedans son pais, ainsi cōme luy-mesme le cōfesse vn peu apres,

Plusieurs Seigneurs des Mycenciens,
Plusieurs aussi princes Danaïens,
Sont avec moy pour vn plaisir me faire
Qui peu me plaist, mais il est necessaire:

Aussi peu receuables sont les paroles de la mere qui se lamente,
Point allumé la torche coniugale
Je n'ay deuant ta feste nuptiale,
Et d'Ismenus on ne porta de l'eau,
Lors que tu fus faict espousé nouveau.

D Mais au contraire, elle se deuoit resiouir & estre fort contente d'entendre, que son fils estoit si hautement marié en maison Royale: mais en se lamentant qu'elle n'auoit point allumé la torche nuptiale, & que la riuere d'Ismenus n'auoit point fourny l'eau à ses nopces, cōme s'il n'y eust point eu de feu ny d'eau en la ville d'Argos pour les nouveaux mariez, elle attribue à l'exil les maux de vanité & de folie. Mais on me dira que c'est vne note reprochable que d'estre banny: ouy bien empres les fols, qui font vn reproche d'estre pauvre ou d'estre chauue, ou d'estre petit, ou bien d'estre estranger ou passager: mais ceux qui ne se laissent point aller & transporter à ces vaines persuasions là, ont en estime & admiration les gens de bien, encore qu'ils soient pauvres, encores qu'ils soient estrangers, & encore qu'ils soient bannis. Ne voyons nous pas que tout le monde reuere & honore le temple de Theseus, aussi bien que celuy de Parthenon, qui est de Minerue, & celuy d'Eleusinium, qui est de

Du bannissement, ou de l'exil.

Ceres & de Proserpine? & toutefois Theseus fut banny d'Athenes, par le moien duquel la cité d'Athenes est auioird huy habitee, & perdit la ville qu'il n'auoit point eüe d'un autre, mais qu'il auoit luy-mesme fondee. Et que demeure-il d'honorable en Eleusine, si nous deshonorons & auons honte d'Eumolpus, qui se transportant de la Thrace icy, monstra iadis, & monstre encore auioird huy aux Grecs la religion des mysteres? Et Codrus, de qui estoit-il fils, qui deuint Roy d'Attique? n'estoit-il pas fils de Melanthus banny de Messine? Ne trouues-tu pas loüable la responce que fit Antisthenes à un qui luy disoit, Ta mere est Phrygiene: Aussi, respondit-il, l'est celle des Dieux. Si donc lon te reproche que tu es banny, que ne respons-tu, aussi l'estoit le pere d'Hercules le grand conquerant, & le grand pere de Bacchus, qui fut enuoyé pour chercher Europe, & ne retourna iamais depuis en son pais, estant natif de la Phœnicie, ains estant arriué à Thebes hors de son pais, engendra

Bacchus Euius qui errantes
Incite à fureur les Bacchantes,
Qui veut estre honoré de ieux,
Et de seruice furieux.

F

Et quant à ce que Æschylus a voulu entendre par ces paroles couuertes, ou plus tost qu'il a montré de loing, quand il dit,

Sainct Apollo le Dieu du ciel banny,
ie le passe sous silence à bouche close, comme dit Herodote. Et Empedocles au commencement de sa Philosophie,

Il y a loy de necessité stable,
Decret des Dieux ancien, immuable,
Depuis qu'un homme a maculé ses mains
Du sang à tort espendu des humains,
Que les Demons de tresfort longue vie,
Le vont chassans hors de la compagnie
Des bien-heureux, pour un temps infiny:
Par ceste loy ie suis ores banny
D'auec les Dieux, errant parmy le monde.

G

Ce n'est pas de luy seul, mais de nous tous apres luy, qu'il nous declare tous en ce monde passagers, estrangers & bannis. Car ce n'est point le sang, ce dit-il, ny l'esprit vital congelé qui nous a, ô hommes, donné la substance de l'ame, & le principe de vie, ce n'est que le corps qui en est composé terrestre & mortel: mais la generation de l'ame qui vient d'ailleurs icy bas, il la desguise du plus gracieux nom qu'il peut, l'appellant un bannissement & relegation hors de son pays: Car à la vraye verité elle vague & erre, chassée par les diuines loix & status, iusques à ce qu'elle vienne à estre attachee à un corps, ne plus ne moins que l'ouystre à quelque roc, en vne Isle fort battue des vents & des vndes de la mer tout à l'entour: pource qu'elle ne se recorde, ny ne se souuient point,

H

De quel honneur & quelle magnitude
D'heureux estat & de beatitude,

elle est trāsferée: qui n'est pas coume de Sardis à Athenes, ou de Corinthe en l'Isle de Lénos ou de Scyros, mais pour auoir chagé la demeure du ciel & de la Lune à la terre & à la vie terrestre: là où elle se courrouce, & trouue estrange si elle chage un petit lieu à un autre, comme vne chetifue plante qui se seiche quand on la trāsplante, combien qu'encore à vne plante vne sorte de terre luy est plus-fortable & plus conuenable qu'une autre, comme celle où elle se nourrit & germe mieux: mais au contraire, il n'y a lieu qui oste à l'homme sa felicité, non plus que la vertu de force & de prudēce. Car Anaxagoras en prison mesme composoit & escriuoit la quadrature du cercle: &

Socrates

- A Socrates en auallant le poison dont il mourut, philosophoit, c'est à dire, exerçoit l'estude de sapience, & exhortoit ses familiers à y estudier, lesquels admiroient sa cōstance: là où au contraire, Phaëthon & Icarus *, qui, cōme les poëtes disent, mōterent au ciel, par leur folie & imprudence tomberent en de trefgriefues calamitez.

Autres li-
sent Tanta-
lus.

Qu'il ne faut point emprunter à vsure.

- B** **L** A T O N en ses loix ne permet point que lon puisse aller prendre de l'eau chez son voisin, que premierement on n'ait fouillé & creusé dedans son fond iusques à l'argille, & que lon n'ait sondé & esprouué que le lieu n'engendre point d'eau: pource que l'argille, ou terre à potier, estant de sa nature grasse, solide & forte, retient l'humidité qu'elle reçoit, & ne la laisse pas escouler ny percer: & fault qu'il soit loisible de prendre de l'eau chez l'autrui, quand il n'y a ordre ny moien d'en pouuoir trouuer sur le sien: pource
- » qu'il faut que la loy prouuoie à la necessité, non pas qu'elle fauorise à la lascheté. Mais il faudroit qu'il y eust aussi vne ordonnance touchant l'argent, qu'il ne fust loisible d'en emprunter à vsure, ny d'aller fouiller aux bourses, comme aux puits ou fontaines d'autrui, que premierement on n'eust chez soy cherché & sondé tous les moiens d'en recouurer, & par maniere de dire, recueilly & amassé tous les esgouts & toutes les sources, pour essayer si lon en pourroit tirer ce qui nous seroit vtile & necessaire: mais au cōtraire plusieurs y en a, qui pour fournir à leurs folles despenfes, à leurs delices & superfluites, ne se seruent pas de ce qu'ils ont, ains en prennent de l'autrui à grands frais, sans qu'il leur soit necessaire: ce qui est bien aisé à iuger, par ce que les vsuriers ne prestent ordinairement point à ceux qui sont necessiteux, ains à ceux qui
- C** veulent acquerir & auoir quelque chose qui leur est superflue, & ne leur fait point de besoing: tellement que ce que lon croit & preste à qui emprunte, est vn tesmoignage qui preuue suffisamment qu'il a dequoy: là où il falloit au contraire, puis qu'il auoit bien dequoy, qu'il se gardast donc d'emprunter. Pourquoi vas tu faire la court à vn banquier, ou à vn marchand? emprunte de ta table propre: tu as des flascons, des plats, des bassins d'argent, employe les en ta necessité, & au reste la gentille ville d'Aulide, ou celle de Tenedos te remeublera ta table de belle vaisselle de terre, qui est plus nette que celle d'argent: elle ne sent point la forte & fascheuse senteur de l'vsure, cōme vne rouille, qui tous les iours de plus en plus fouille & fallit ta sumptueuse magnificence: elle ne te fera point tous les iours souuenir des Kalendes & des nouuelles lunes, qui de soy estant le plus sainct & plus sacré iour de tout le moys, est rendu le plus haï, & le plus maudit, à cause des vsures. Car quand à ceux qui aiment mieux
- D** mettre leurs biens en gage, & les hypotheker pour auoir de l'argent à vsure dessus, que de les vendre à forfait, Iupiter mesme possesioire ne les garentiroit pas: ils ont honte de recevoir le pris & valeur de leurs biens, & n'ont point de honte d'en payer l'vsure: & toutefois ce grand sage homme Pericles fait faire l'accoustrement de la statue de sa Pallas, qui estoit de fin or, pesant iusques aux pois de quarante talents, en sorte qu'il se pouuoit mettre & oster quand on vouloit: à fin, disoit-il, que quand il nous viendra vn affaire pour la guerre, nous nous en puissions seruir, pour puis apres le faire remettre de pris & valeur non moindre que deuant: ainsi deuons nous en noz affaires, comme en vne place assiegee, n'admettre ny recevoir iamais au dedans garnison d'un vsurier ennemy, ny endurer deuant nos yeux, que lon baille nos biens pour demourer en perpetuelle seruitude, ains plus tost retrencher de nostre table ce qui n'y est point necessaire ny vtile, & semblablement de noz lits,

Qu'il ne faut point emprunter à vsure.

de nos coches, de nostre despenſe ordinaire, pour nous maintenir nous meſmes E
francs & libres, en eſperance de remettre puis apres ce que nous aurons retranché, ſi
la fortune nous dit bien. Les Dames Romaines baillerent iadis leurs bagues &
ioyaux d'or, dont fut faite la coupe que lon enuoya pour offrande au temple d'A-
pol'o Pythien en la ville de Delphes: & celles de Carthage coupperent elles meſ-
mes leurs propres cheueux pour en faire des cordes à guinder les engins de batterie,
dont on deſendoit leur ville aſſiegee: & nous, comme ſi nous auions honte de nous
pouuoir paſſer d'autrui, nous allons aſſeruir nous meſmes par engagements & obli-
gations: là où il vaudroit beaucoup mieux qu'en nous reſtreignant, & reſſerrant à
ce qui nous ſeroit vtile, nous baſtiſſions vn temple de franchise pour nous, pour
noz femmes, & pour noz enfans, de nostre vaiſſelle que nous fondrions, ou que
nous vendrions. La deſſe Diane en la ville d'Ephèſe donne franchise & ſauuegar-
de aux debteurs, qui peuuent recourir en ſon temple, contre leurs creanciers: mais
celuy de l'eſpaigne & de despenſe meſuree, dedans lequel ne peuuent entrer les vſu- F
riers, pour en rair & emmener aucun debteur priſonnier, eſt touſiours arriere ou-
uert aux ſages, & leur donne long & large eſpace de repos ioyeux & hōorable. Car
ainſi comme la prophetiſſe qui rendoit les oracles au temple d'Apollo Pythien, au
temps des guerres Medoiſes, reſpondit aux Atheniens, que pour eux ſauuer Dieu
leur donnoit vn mur de bois, & eux abandonnans leurs heritages, leur ville, leurs mai-
ſons & tous leurs biens, eurent recours aux nauires pour ſauuer leur liberté: auſſi
nous donne Dieu vne table de bois, vaiſſelle de terre, & robbe de gros drap, ſi nous
voulons viure & demourer en liberté,

N'ayez eſmoy d'auoir chariots dorez

Par gros rouſſins portans cornes tirez :

car quoy qu'ils ſoient viſtes, les vſures les ataignent bien, qui vont encore plus viſte:
ains plus toſt avec vn aſne le premier venu, & avec vne meſchante iument de baſt,
fuy l'vſurier ennemy cruel & tyrannique, lequel ne te demande pas le feu & l'eau, G
comme iadis faiſoit le barbare roy de Perſe, ains qui pis eſt, touche à ta liberté, blece
ton honneur par affiches, mettant tes biens en crie: ſi tu ne le payes, il te moleſte: ſi
tu as de quoy le payer, il ne le reçoit pas ſ'il ne luy plaiſt: ſi tu vends, il veut auoir les
choſes à non pris, ſi tu ne vends, il t'y contraint: ſi tu le mets en iuſtice, il te parle
d'appointement, ſi tu luy iures de le payer, il te commande: ſi tu vas à ſa porte pour
parler à luy, il te la ferme: ſi tu demeures en ton logis, il vient battre à ta porte, & ne
bouge de chez toy. De quoy ſeruit aux Atheniens l'ordonnance de Solon, par laquelle
il ordonna, que pour debte ciuile on n'obligeroit plus le corps: car ils ſont ſerfs à tous
ruineurs de peuple, banquiers: mais encore non pas à eux ſeulement, car il n'y auroit pas trop
grand mal, mais à leurs eſclaves ſuperbes, inſolens, barbares, oultrageux, tels propre-
ment comme Platon eſcrit que ſont les diables & bourreaux enflammez aux enfers,
qui tourmentent les ames des meſchans. Car ainſi ces malheureux vſuriers font du H
palais, où ſe rend la iuſtice, vn enfer pour les pauvres debteurs, les plumans & deuor-
rans iuſques aux os à coups de bec & de griffes, qu'ils leur mettent dedans la chair
comme des vautours affamez: aux autres leur eſtans touſiours deſſus, ils empeſchent
de toucher à leurs propres biens, quand ils ont ferré leurs bleds & fait vendanges, ne
plus ne moins qu'à Tantalus. Et comme le Roy Darius enuoya contre la ville d'A-
thenes ſes lieutenans Datis & Artaphernes, avec des chaines & des cordes dont ils
deuoient lier les priſonniers qu'ils prendroient: auſſi ces vſuriers apportans en la
Grèce des leiëttes pleines de ſcèdules, de breuets, & de contraux obligatoires, ne plus
ne moins que des fers & des manottes à enſerrer les pauvres criminels, ſ'en vont par
les villes, où ils ſement en paſſant non de bonne & profitable ſemence, comme
faiſoit iadis Triptolemus, quand il alloit par tout enſeignant l'vſage de ſemer le bled,
mais

A mais des racines & graines de debtes qui produisent infinis trauaux, & intolerables vsures, dont on ne peut iamais trouuer le bout : lesquelles mangeâs, & estendans leurs branches partout, font à la fin plier les villes sous le faix, tant qu'elles les suffoquent. On dit que les lieures nourrissent vn petit leurault, en portent vn autre dedans le ventre prest à sortir, & enchargent encore d'vn autre : mais les vsures de ces barbares icy, meschans vsuriers, enfantent deuant que de conceuoir, car en baillant leur argent ils le redemandent tout incontinent, & en le posant ils le leuent, & rebailent à vsure ce qu'ils prennent, & reçoient pour auoir baillé à vsure. On dit des Messeniens,

En ceste ville y a porte sur porte,

Et puis encore vne autre arriere porte :

mais on pourroit encore mieux dire contre les vsuriers,

Ils vont mettant vsure sur vsure,

Puis autre vsure encore sans mesure.

B tellement qu'ils se moquent des philosophes naturels, qui tiennent que rien ne se peut faire de rien, & de ce qui n'est pas : car chez eux vsure se fait & s'engendre de ce qui n'est pas & qui ne subsiste point. Ils estiment que ce soit chose reprochable & honteuse, que prendre des gabelles & daces publiques à ferme, ce que les loix permettēt nonobstant : & eux au contraire, contre toutes loix du monde font payer la dace de ce qu'ils prestent à vsure, ou plus tost, s'il faut dire verité, en prestant à vsure ils fraudent de male-foy leur debteur : car le pauvre debteur, qui reçoit moins qu'il n'a escrit par son obligation, est trompé faulxement & de male-foy. Et toutefois les Perles estiment, que mentir soit le second peché, & le premier, deuoir, pour autant que le mentir aduient le plus souuent à ceux qui doiuent. Or n'y a il gens au monde qui mentent plus que font les vsuriers, ne qui vsent plus de male-foy en leurs papiers iournaux, là où ils escriuent qu'ils ont tant baillé à vn tel, à qui ils ont moins baillé : & si la cause mouuante de leur menterie est belle auarice, & non pas indigence ny pau-

C ureté, ains vne miserable cupidité de tousiours plus auoir, la fin de laquelle ne leur tourne ny à plaisir, ny à profit, quant à eux, mais bien à la perte & ruine de ceux à qui ils tiennent tort : car ils ne labourent point les terres qu'ils ostent à leurs debteurs, ny n'habitent es maisons dont ils les chassent, ny ne mangēt sur les tables qu'ils leur emportent, & ne vestent les habillemēs dont ils les despouillēt : ains si le premier est destruit, le second s'en va apres alleché par le premier, d'autant que c'est comme vn feu Grejois, qui mange en s'augmentant tousiours de la perte & ruine de ceux qui tombent dedans, les deuorant tous les vns apres les autres : & l'vsurier qui entretient ce feu, le soufflant & l'enflammant à la perte de tant de gens, n'en a rien de fruit d'auantage, sinon que par interualle de temps il prent son liure de raison, & y lit combien il a fait vendre de pauvres debteurs : combien il en a depossédé de leurs heritages & de leurs biens, d'où est venu, & où est allé en tournant, virant, & tousiours

D croissant, son argent. Et ne pensez pas que ie dic cela pour guerre ou inimitié aucune que j'aye iuree contre les vsuriers,

Car ny mes bœufs, ny mes cheuaux aussi,

Ils n'ont iamais emmenez, Dieu mercy :

mais seulement pour monstrier à ceux qui empruntent facilement argent à vsure, combien il y a de villanie & de honte en cela, & comment cela ne procede que d'vne extrême folie, paresse & lascheté de cœur. Car si tu as dequoy, n'emprunte pas, puis que tu n'en as point de besoing : & si tu n'as rien, n'emprunte pas, pource que tu n'auras pas moyen de payer. Mais considerons vn peu l'vn & l'autre à part. L'ancien Caton disoit à vn vieillard qui se gouernoit mal, Mon amy, veu que la vieillesse a de foy-mesme tant de maulx, comment y vas tu encore adioustant le reproche & la honte de meschanceté : aussi pouuons nous dire, Veü que la pauureté a de foy-mesme

*Au premier
liure de l'I-
liade d'Ho-
mere.*

Qu'il ne faut point emprunter à vsure.

tant & tant de miseres , n'y va pas encore accumulant les angoisses d'emprunter , E
& de deuoir: n'oste point à la pauureté le seul bien qu'elle a par dessus la richesse , c'est
qu'elle n'a soucy de rien : autrement tu tomberas en la mocquerie du commun pro-
uerbe qui dit,

Je ne puis pas vne chéure porter ,

Vous me baillez vn bœuf à supporter.

Tu ne peux pas porter la pauureté, & tu te vas encore surcharger d'un vsurier, qui est
vn fardeau insupportable à celuy mesme qui a bien de quoy. De quoy voulez vous
doncques que ie viue? Demandes tu cela aiant des mains, aiant des pieds, aiant la voix,
brief estant homme, de qui le propre est d'aimer & estre aimé, faire plaisir & en re-
cevoir? ne peux tu pas enseigner les lettres, conduire des ieunes enfans, garder vne
porte, voiauer sur mer, seruir en vne nauire? Il n'y a rien de tout cela qui soit plus hon-
teux, ny plus fascheux à faire, que d'ouir, Paye moy, rend moy mon argent. Rutilius
ce riche Romain s'approchant vn iour de Musonius le philosophe, luy dit en l'au- F
reille, Iupiter sauueur, que vous autres philosophes faites profession d'imiter & en-
suiure, n'emprunte point d'argent à vsure. Musonius en riant luy respondit prom-
ptement, Non, ny n'en preste point aussi. Car ce Rutilius qui prestoit à vsure, repro-
choit à l'autre qu'il empruntoit à vsure, qui estoit vne folle arrogance Stoique. Quel
besoing est il que tu allegues Iupiter sauueur, veu que lon peut recorder le mesme
par choses qui sont toutes familiares & toutes apparentes? Les arondelles, les fourmis
n'empruntent point à vsure, à qui nature n'a point donné de mains, point de discours,
point de raison, point d'art ny de mestier, là où elle a doué l'homme de tant & de si
grand entendement, que non seulement il se sçait nourrir soy-mesme, mais oultre
nourrir des cheuaux, des chiens, des perdrix, des lièvres, des geais: pourquoy donc-
ques te condamnes-tu toy mesme d'estre plus beste qu'un geay, plus muet que la per-
drix, plus lasche qu'un chien, que tu ne saches trouuer aucun homme qui te face du
bien, en luy faisant la cour, en le resiouissant, en le gardant, & en combattant pour luy? G
Ne vois tu pas que la mer & la terre produisent tant de choses pour l'vsage de l'hom-
me? l'ay veu le bon homme Micylus, disoit Crates, qui cardoit la laine, & sa femme
quand & luy qui la filoit,

En combattant la faim à toute outrance.

Le Roy Antigonus aiant esté vne espace de temps sans voir le philosophe Cleanthes,
& le rencontrant vn iour en la ville d'Athenes luy demanda, Tournes tu encores la
meule du moulin, Cleanthes? Ouy Sire, respondit Cleanthes, ie la mene encore, & le
fais pour gaigner ma vie, & ne me departir point de la philosophie. Combien estoit
grâd & genereux le courage de ce personnage-là, qui venât de la meule, avec la mesme
main qui venoit de tourner la meule, & paistrir la paste, escriuoit de la nature des
Dieux, de la Lune, des estoilles, & du Soleil? Et puis il nous semble que ces œuures là
soient seruiles. Et ce pendant, à fin que nous-soions libres (Dieu le sçait) nous em- H
pruntons de l'argent à vsure, & pour en auoir, nous flattôs des personnes seruiles, nous
leur payons tribut, & leur faisons des presens, nous leur faisons la court, & leur don-
nons à disner, non par pauureté, car personne ne preste à vn pauvre, mais par nostre
superfluité: pource que si nous estions contents des choses necessaires à la vie huma-
ne, il n'y auroit point d'vsuriers au monde, non plus que de Centaures ou de Gor-
gones: car les delices & la superfluité ont engendré les vsuriers, aussi bien que les
orfeures, les argentiers, les parfumeurs, & les teinturiers: nous ne deuons point le
pris du pain & du vin, mais bien de belles terres & maisons, de grand nombre d'es-
claues, de beaux mulets, de parement de sales & de riches tables, & de toutes folles
& excessiues despeses, que nous faisons bien souuent, pour donner passetemps au
peuple, pour vne vaine ambition, de laquelle nous ne reccuons bien souuent autre
fruit

A fruit, qu'ingratitude : & celuy qui y est vne fois enueloppé, demeure debteur pour tout le reste de sa vie, changeant de picqueur, tantost d'un, tantost d'autre : ne plus ne moins que le cheual, depuis qu'il a vne fois receu le mors en sa bouche, & la selle sur le dos, il n'y a plus ordre qu'il s'en puisse fuir és beaux pasturages & belles prairies, dont il est party, ains va errant ça & là, ainsi comme les Demons & malings esprits qu'Empedocles escrit auoir esté chassés du ciel par les Dieux,

Dedans la mer le ciel en bas les iette,
La mer sur terre arriere les reiette,
La terre apres au Soleil radieux,
Et le Soleil puis les renuoye aux cieux.

aussi tombent ils entre les mains d'un vsurier ou banquier, tantost Corinthien, tantost d'un autre de Patras, & tantost d'un d'Athenes, l'un apres l'autre, iusques à ce qu'estans deceus & trompez de tous, ils se trouuent finalement tous dissipez & de-

B coupez en vsures. Car ainsi comme celuy qui est embourbé, se doit ou du tout leuer pour sortir du borbier, ou du tout ne bouger d'un lieu, pource que celuy qui se deméne & se tourne & vire en la bourbe, ne fait autre chose que souiller de plus en plus son corps : aussi ceux qui ne font que changer de banque, & que faire transcrire leur nom du papier d'un vsurier en celuy d'un autre, se chargeans tousiours les espauls, & s'embrouillans de nouuelles vsures, deuiennent tousiours de plus en plus chargez : ressemblans proprement aux personnes malades de cholere, qui ne veulent pas prendre medecine pour se guarir à fait, ains continuent tousiours à ôster ce qui degoutte d'humeur cholerique, & puis à en amasser de l'autre d'auantage, & payent à toutes saisons de l'annee les vsures, avec griefues douleurs & angoisseux tranchez : & n'en ont pas plus tost payé l'une que l'autre coule & distille incontinent apres, ce qui leur apporte un mal de cœur & douleur de teste : là où il falloit qu'ils donnassent ordre à s'en nettoyer du tout, à fin d'en demourer francs & quittes. Je

C parle maintenant à ceux qui ont bien dequoy, & qui sont trop lasches & paresseux, & vont disant, Comment, demeureray-je doncques sans vallets, sans feu, ne sans lieu, & sans retraite? c'est tout ainsi, comme si un malade d'hydropisie & enflé comme un tonneau disoit au medecin : Comment, voulez vous donc que ie deuienne gresse, maigre & menu? pourquoy non, prouueu que tu sois sain? ainsi vailt il mieulx que tu demeures sans vallet, que tu deuiennes vallet toy-mesme, & que tu demeures sans heritages plus-tost, que tu deuiennes toy-mesme heritage d'autrui. Escoute un peu le deuis de deux vautours, comme disent les fables : l'un vomissoit si fort qu'il disoit, Je croy que ie vomiray iusques à rendre mes entrailles : & son compagnon luy respondoit, Quel mal y aura il? car aussi bien ne rendras tu pas les tiennes, mais celles d'un trepassé que nous deuorâmes l'autre iour : aussi un endebté ne vend pas sa terre, ne son heritage, ny sa maison, ains celle de l'vsurier qui luy a presté argent,

D à qui la loy adiuge le droit & la possession d'iceux. Voire mais, mon pere, dira-il, m'a laissé cest heritage. Je croy bien, aussi t'auoit il laissé la liberté & la bonne renommee, dequoy tu dois faire plus de compte, & en auoir plus de soing. Celuy qui t'a engendré a fait ton pied & ta main, & neantmoins fil aduient qu'ils soient esthiomenez, encore donneras-tu de l'argent au chirurgien qui te les couppera. Calypso auoit bien vestu Vlysses d'un robe sentant comme baume,

Qui retenoit vne odeur douce & telle
Qui sort du corps d'une Fee immortelle.

present qu'elle luy feit, à fin qu'il eust à tout iamais memoire de l'amitié qu'elle luy auoit portee : mais depuis que sa nauire fut brisee, & qu'il se trouua à fond, ne pouuant reuenir sur l'eau, à cause de sa robe trempée qui le tiroit à bas, il la despouilla tresbien, & laietta là, & se ceignant le corps tout nud d'un linge se sauua à nage,

Homere en
l'Odysee
liu. 5.

Qu'il ne faut point emprunter à vsure.

iufques en terre, là où quand il fut hors de danger, & qu'il fut apperceu, il n'eut E depuis faulte ny de veftements ny de nourriture. Et n'est ce pas proprement vne vraye tempefte, quand l'vsurier apres quelque temps vient affaillir les misérables debtors en leur difant, Paye?

Odyff. liu 5.

Difant ces mots, les nues il amaffe,
Et la grand mer de vagues il haraffe:
De l'Orient, & du Midy tonnant,
Le vent fe leue encontre le Ponant.

ces vents font les vsures, & les vsures des vsures, qui roulent les vnes fur les autres, & luy accablé d'elles, qui le retiennent de leur pesanteur, ne fe peult faauer à nage, ny efchapper, ains est à la fin tiré à fond avec fes amis, qui l'ont plegé & refpondu pour luy, tant qu'il y perit. Crates le philosophe Thebain feit bien autrement, car ne deuant rien, & n'estant prefé d'aucun creancier pour payer, feuleme't fe fâchant des cures & fouscis du mefnage, & de la foillicitude qu'il falloit auoir pour gouuer- F ner son bien, laiffa vn patrimoine qu'il auoit de la valeur de huit talents, quatre mille huit cents efcus, & chargeant la beface avec la robbe de bureau, s'en fuit en la franchise de pauureté & de philosophie. Anaxagoras laiffa fes terres en friche. Mais quel befoin est il d'alleguer ceux là? veu que Philoxenus vn chantre, estant du nombre de ceux qui auoient esté enuoyez pour peupler vne nouuelle ville & nouuelle terre en la Sicile, luy estant efcheuë vne bonne maison en fa part, & grand moien d'y viure bien à son aife, voiant que les delices, la volupté, l'oyfieté, fans aucun exercice de lettres regnoient en ce quartier là, Par les Dieux, dit il, ces biens icy ne me perdront point, mais bien moy eux: & laiffant à d'autres le partage qui luy estoit efcheu à son sort, remonta fur mer, & s'en retourna à Athenes. Là où ceux qui font endebtez endurent, & supportent que lon les taille, que lon les angarie, & que lon les gehenne comme des efclaues que lon fait fouiller aux mines, nourrissans ainsi que le Roy Phineus, des Harpyes qui ont des ailes: & les vsuriers leur enuolent & rauif- G sent des mains leur propre nourriture, encore n'ont ils pas patience d'attendre la faifon: car ils achettent leurs bleds auant qu'ils foient moissonnez, & font marché de l'huyle auant que l'oliue foit meure: & du vin femblablement, Je le retien, dira-il, pour tel pris, & quand & quand il le luy baille par efcript: & ce pendant le raisin est encore pendant à la vigne, attendant le moys de Septembre, que l'estoille d'Arcturus se leue, pour faire vendange.

QVIL

A **Qu'il faut qu'un Philosophe conuerse principa-
LEMENT AVEC LES PRINCES
ET GRANDS SEIGNEURS.**



B

MBRASSER vne espee en son sein est chose dangereuse: Il est vray: mais rechercher ou accepter & entretenir vne amitié qui peut estre vrile & fructueuse à plusieurs en particulier, & encore plus en commun, c'est le faict d'hommes sages, honnestes, & affectionnez au bien public, non pas, comme quelques vns estiment, ambitieux & conuoiteux d'honneur: mais au contraire, celuy-là doit estre réputé ambitieux, ou bien pusillanime, qui fuit & a peur que lon ne l'appelle cour-
tisan, poursuivant & caressant les Princes & grands seigneurs. Car que dira le seigneur qui sera guerissable, desireux d'appre-

dre, & ne demandera que d'accointer quelque philosophe? Quoy? faudra-il doncques que ie deuienne vn Simon le Sautier, ou vn Dionysius maistre d'Eschole, au lieu d'un Pericles ou d'un Caton, à fin que ce philosophe deuisse avec moy, & qu'il s'ap-
proche de moy, comme Socrates faisoit iadis avec ceux-là? au contraire, Ariston de Chio estant repris & blasmé par les Sophistes de son temps, de ce qu'il deuisoit à tous
ceux qui le vouloient ouïr: A la miene volonté, dit-il, que les bestes mesmes peussent
entendre les propos qui excitent les cœurs à aimer la vertu. Et nous fuïrons les moyens
& occasions de hanter & deuisse avec les grands personnages & puissans seigneurs,
comme si c'estoient hommes farouches & sauuages? La parole & doctrine de la phi-
losophie n'est point vn tailleur d'images pour faire des statuës mornes & muettes, sans
sentiment quelconque, à poser dessus vn soubassement, comme dit Pindare, ains
veut rendre les cœurs des hommes qu'elle touche, actifs & vifs: elle leur imprime des
essans de bonne volonté qui les incitent, des iugemens qui les tirent à toutes choses
profitables au public, des intentions desireuses de toute honnesteté, vn courage grand
& hault, avec assurance & bonté: toutes lesquelles parties font que les hommes en-
tendus au fait de gouuernement sont plus aises de deuisse, conuerse & hanter avec
les personnes de grande puissance & autorité: & non sans cause. Car le medecin ex-
cellent & gentil, prendra tousiours plus de plaisir à medeciner vn œil qui voit pour
plusieurs, & qui en garde plusieurs: aussi le philosophe sera plus affectionné à pren-
dre soing de cultiuer vn esprit & vne ame qui doit estre vigilante, qui doit estre sage,
prudente & iuste pour plusieurs. Et fil est entendu en la science de trouuer, assembler
& conduire les eaux, ainsi comme lon dit que Hercules l'estoit, & plusieurs autres an-
ciens, il ne prendra ja plaisir d'aller en quelque coing desert, loing de la frequence
des hommes, pres le rocher du corbeau, comme dit le poëte, creuser celle mare des
porchers Arethuse, ains s'estudiera de descouurir les sources vifues de quelque ruis-
seau ou riuere, pour abbruier vne grosse ville, ou vn camp, ou pour arroser les iardins
& vergers de quelque Roy. Suyuant quoy nous oyons qu'Homere appelle Minos
Oaristes de Iupiter, c'est à dire, ainsi que Platon mesme l'interprete, familier & disci-
ple: Car il n'entendoit pas que les disciples des Dieux fussent personnes priuees, ca-
saniers, viuans en oyfueté en leur maison sans rien faire, ains Princes & Roys, lesquels
estans sages, prudents, iustes, debonnaires & magnanimes, tous ceux qui auroient à
viure sous eux, & à estre commandez par eux, en seroient benicts & bienheureux. Il
y a vne herbe que lon appelle Eryngium, le chardon à cent testes, laquelle a ceste pro-
priété, que depuis qu'une chœure la prent en sa bouche, elle s'arreste tout court, & tout
le troupeau aussi semblablement, iusques à ce que le cheurier la luy vienne oster:

Aux Nées
mees, Od. 5.

C

D

Qu'il faut qu'un philosophe conuerse

les defluxions aussi qui procedent des hommes de grande puissance & grande au- E
thorité, comme sont les Roys, ont pareille viftesse & celerité, laquelle se dilate en vn
moment, & comme vn feu, faist & gaigne ce qui est voisin à l'enuiron. Et puis si la
parole & remonstrance d'un Philosophe s'adresse à vn homme priué, qui aime à vi-
ure en repos, & se borne luy-mesme comme d'un centre & d'une circonference geo-
metrique, d'auoir ce qui luy est necessaire pour l'entretienement de sa personne, elle
ne se distribue point à d'autres, ains aiant composé en luy seul vne grande tranquil-
lité, & grand calme de toutes perturbations, elle se fene, vieillit & se termine incon-
tinent : mais au contraire, si elle remonstre à vn magistrat, vn homme de gouuerne-
ment, vn homme d'affaires, & qu'elle le remplisse de vertu & de bonté, par le
moyen d'un seul elle fait du bien à infinis: cōme Anaxagoras qui se teint avec Pericles,
Platon avec Dion, Pythagoras avec les Princes & Seigneurs de l'Italie, & Caton luy-
mesme partant du camp nauiga en Asie pour voir Athenodorus: Scipion enuoya F
querir Panætius, quand le Senat le combeit & deputa pour aller visiter & syndiquer
quelle iustice ou iniustice regnoit par le monde, ainsi que dit Posidonius. Que deuoit
doncques alors dire Panætius? Si tu estois vn Castor ou vn Pollux, ou quelque autre
tel homme priué, voulant fuir la frequence des villes, & te retirer en quelque coing
d'eschole à part, pour illec à loisir & en plein repos coudre & descoudre, plier & des-
plier les syllogismes des Philosophes, i'eusse volontiers accepté l'offre que tu me fais,
& fusse allé demourer avec toy : mais pour ce que tu es le fils de Paulus Æmylius, qui
a esté par deux fois Consul, & arriere-fils de Scipion l'Africain, celuy qui desfeit
Hannibal de Carthage, ie ne deuifera point avec toy. Et de dire maintenant qu'il y
a double raison & parole, l'une interieure ou mentale, que lon dit estre don de Mer-
cure, surnomé Hegemon, c'est à dire guide: & l'autre proferee, qui est messagere & in-
strumentale pour donner à entendre ses conceptions, cela est tout rance & moisy de
vieillesse, & doit estre compris dessous cest ancien prouerbe, Je scauois cela deuant
que Theognis fust né. Mais toutefois encore ceste distinction-là ne fait rien contre G
ce que nous disons: car de l'une & de l'autre raison ou parole, tant de celle qui demeure
en la pensee, que de celle qui se prononce & se profere dehors, la fin est amitié de l'une
enuers soy-mesme, & de l'autre enuers autrui : car celle-là tendant au but de la vertu
par les enseignements de la philosophie, rend l'homme accordant tousiours avec
soy-mesme, ne se plaignant iamais, ny se repentant de rien, plein de paix, plein d'a-
mour & de contentement de soy-mesme,

Ses membres n'ont nulle sedition

Estrange entre-eux, nulle dissension,

nulle passion rebelle & desobeissante à la raison, nul combat de volonté contre vo-
lonté, nulle repugnance de discours à discours. Il n'y a point d'amertume turbulente,
messée avec ioye, comme sur les confins de desir, de repentance & regret, ains y sont
toutes choses yniement doulces, paisibles & amiables, & font que chascun iouif- H
sant de tant & tant de biens se contente & s'esjouist de soy-mesme. Et quant à l'autre
sorte de raison & de parole proferee, * Pindarus dit que la Muse n'estoit point an-
ciennement auaricieuse, aimant le gain, ny mercenaire: & croy qu'encore ne l'est elle
pas maintenant, mais par l'ignorance & nonchalance des hommes ne se soucians de
bien ny d'honneur, Mercure, qui parauant estoit gratuit & commun, est deuenu traf-
fiqueur, ne voulant rien faire sans estre payé : car il n'est pas vray semblable que Venus
se soit iadis mortellement courroucée à l'encontre des filles de Propætus, pour ce
que ce furent-elles qui les premieres machinerent de semer * des haines & inimi-
tiez entre les ieunes homes, & que Vrania, Clio & Calliopé se contentent ou pren-
nent plaisir à ceux qui corrompent la dignité des lettres pour de l'argent, ains m'est
aduiz que les ceuures & les dons des Muses doiuent estre encore plus amiables & plus
gracieux,

* Pind. aux
Isthmies
Od. 2.

* *Aucuns li-
sent μίσος,
c'est à dire
des abomi-
nations,
cōme char-
mes & en-
forcellemēs
sur les ie-
unes homes:
les autres,
μίσος, &
faudroit le
rédre, semer
des haines
& inimi-
tiez entre
les ieunes
hommes.*

- A gracieux, que non pas ceulx de Venus: car l'honneur que d'aucuns se proposent pour la fin & le but du sçavoir & des lettres, a esté tenu cher, pour ce que c'est vn principe & vn seminaire d'amitié: mais qui plus est, le commun des hommes mesure l'honneur à la bienveillance, estimans que nous ne louons seulement que ceux-là que nous aimons. Mais ceux-là font comme Ixion, qui poursuiuant d'amour la deesse Iuno tomba en vne nuee: aussi au lieu d'amitié ils embrassent honneur, image vaine, tromperesse, pompeuse, vagabonde & incertaine: mais l'homme de bon sens & de bon iugement, fil s'entremet d'affaires & du gouuernement de la chose publique, il ne conuoitera d'honneur sinon autant qu'il en aura de besoing pour entretenir son autorité & son credit, à fin que lon se fie en luy au maniemēt des affaires: car il n'est ny plaissant ny facile de profiter à ceux qui ne le veulent pas, & la disposition de le vouloir procede de se fier: ne plus ne moins que la lumiere est plus le bien de ceux qui voyent, que de ceux qui sont veuz: aussi est l'honneur plus vtile à
- B ceux qui sentent qui en est digne, qu'à ceux qui ne sont pas mesprizez. Mais celuy qui ne se mesle point d'affaires, qui vit avec soy-mesme, & constitue son bien à viure à part en loisir & en repos, saluē de loing la vaine gloire & populaire, dont iouissent les autres qui versent en la veuē des peuples, & en pleins theatres: tout ainsi qu'Hippolytus, qui estoit chaste, saluoit de loing la deesse Venus: mais celle qui procede des gens de bien & d'honneur, il ne la refuse ny ne la mesprise pas. Quand il est question d'amitié, il ne faut pas chercher à l'auoir & contracter seulement avec ceux qui ont les biens, la gloire, le credit & l'autorité de grands seigneurs: mais aussi ne faut-il pas fuir ces qualitez-là, quand elles sont conioinctes avec vne nature douce & des mœurs moderees. Le philosophe ne cherche pas les beaux & bien formez ieunes hommes, ains ceux qui sont dociles, bien conditionnez & conuoiteux de sçavoir: mais aussi fils ont & beauté de visage, & bonne grace, & fleur de ieunesse, cela ne luy fera pas peur de s'en approcher, ny les beaux traicts de visage ne le chasseront pas d'aupres de ceux qu'il sentira dignes que lon en prenne soing, & que lon y employe sa peine: aussi quand la puissance, la richesse, & l'autorité de Prince se trouuera en vn homme de bonne nature, gracieux & honneste, il ne laissera pas de l'aimer & de le caresser pour cela, ny ne craindra pas qu'on l'appelle courtisan ny caressant les grands.
- C

Ceux qui par trop fuyant Venus estriuent,

Failent autant que ceux qui trop la suiuent:

ainsi en est-il de l'amitié des Princes & des grāds seigneurs: parquoy le philosophe qui ne se meslera point d'affaires, ne les fuira point, mais le ciuil qui s'empeschera du maniemēt de la chose publique, les recherchera, non les faschāt pour se faire ouyr, ny leur chargeāt les oreilles de cōtes importuns de Sophiste qui se veut monstrier, mais s'accōmodant volōtiers à les hanter, passer le temps, & deuiser avec eux quād ils le veulent.

D

-- de Berecynthe

Les plaines ont de long douze iournees,

Qui tous les ans par moy sont engrenees.


Celuy qui dit cela, fil eust autāt aimé les hommes, comme il aimoit le labourage, eust plus volontiers cultiuē & ensemencē celle terre qui pouuoit nourrir si grande multitude d'hōmes, que la petite mestairie d'Antisthenes, qui à peine pouuoit suffire à saupoudrer Autolycus quand il alloit luicter. Et toutefois Epicurus, qui mettoit le souverain bien de l'homme en vn tref-profond repos, comme en vn port couuert de tous les vents & de toutes les vagues du monde, dit, que le faire bien à autrui est non seulement plus honneste que le receuoir bien d'autrui, mais encore plus plaissant: car il n'y a rien qui engendre tant de ioye que fait la Grace, c'est à dire, la beneficēce: & auoit bon iugement celuy qui imposa les noms aux trois Graces, Aglaïa, Euphrosynē, &

Qu'un philosophe doit conuerfer

Thalia, car certainement la ioye & le contentement est bien plus grand & plus net E
en celuy qui donne la grace, qu'en celuy qui la reçoit. Voyla pourquoy plusieurs
souuent rougissent de honte quand ils reçoient du bien, là où lon est tousiours bien
aise quand on en fait. Or font bien à tout vn peuple ceux, qui rendent gens de bien
ceux dont le peuple ne se peut passer: comme, au contraire, ceux qui gastent & cor-
rompent les Princes, les Roys, & les Seigneurs, comme font les flatteurs, les calom-
niateurs & faux accusateurs, sont en abomination de tous, & punis par tous, comme
ceux qui iettent vn poison mortel, non en vne coupe, ains en vne fontaine qui cou-
le en public, de laquelle ils voyét que tout le monde boit. Tout ainsi doncques cōme
Eupolis dit, en se mocquant des flatteurs poursuiuans de repeuë franche du riche
Callias, qu'il n'y auoit ny feu, ny fer, ny cuyure qui les peust engarder d'aller souper
chez luy: là où les mignons & fauoris d'un tyran Apollodorus, ou d'un Phalaris, ou
d'un Dionysius, apres le deces de leurs maistres furent gehennez, escorchez, &
brullez, & les meit-on au rang des hommes maudits & damnez, pour ce que ceux F
là ne faisoient tort qu'à vn seul, & ceux-cy en outrageoient plusieurs, en en depra-
uant vn tout seul, qui estoit le Seigneur: aussi ceux qui demeurent ou hantent avec
des hommes priuez, ils les rendent bien contents, innocents, doux & gracieux en
eux-mesmes, mais celuy qui à vn seigneur & magistrat oste vne mauuaise condi-
tion, ou luy dresse sa volonté & son intention là où il faut, celuy-là philosophe pour
le public, & corrige le moule & le patron auquel tous les subiects sont formez &
gouuernez. Les citez & republiques bien policees decernent & deferent honneur
& reuerence aux presbtres, pource qu'ils prient & demandent aux Dieux des biens,
non pour eux seuls, ny pour leurs parents & amis seulement, mais vniuersellement
pour tous les citoyens: & toutefois les presbtres ne rendent pas les Dieux bons, ny
donneurs de biens, mais estants tels d'eux mesmes, ils les prient & reclament: mais
les Philosophes qui vivent & conuerfent avec les Princes & Seigneurs, les rendent
plus iustes, plus moderez & plus affectionnez à bien faire: au moyen dequoy il est G
vray semblable, qu'ils en reçoient aussi plus d'aise & plus de contentement. Et m'est
aduis, quant à moy, qu'un ouurier qui fait les luts & les lyres, prendra plus de plaisir à
faire vne lyre, quand il sçaura que celuy qui la possedera en edifiera les murailles de
la ville de Thebes, comme iadis fait Amphion: ou en appaisera vne grande sedition,
comme fut celle des Lacedemoniens que Thaletas le Candiot pacifia, en chantant
sur la lyre, & les addoulcissant. Et semblablement aussi vn charpentier, faisant le gou-
uernail & timon d'une galere, sera plus resiouy, quand il entendra que ce timon ser-
uira à gouuerner la galere capitainesse, dedas laquelle Themistocles combattrà con-
tre les Perses pour la defense de la liberté de la Grece, ou bien celle de Pompeius,
avec laquelle il desfeit en bataille nauale l'armee des Pirates. Que cuydez vous
doncques que le philosophe pensera de sa parole & de sa doctrine, quand il viendra
discourir en luy-mesme, que celuy qui la receura, estant homme d'autorité, H
Prince ou grand Seigneur, fera vn bien public, par ce qu'il rendra le droict iuste-
ment à vn chascun, il fera de bonnes loix & ordonnances, il punira les meschants,
& auancera les gens de bien & d'honneur. Il m'est aduis certainement qu'un gen-
til charpentier & faiseur de nauires, fera plus volontiers vn timon, quand il sçaura
qu'il seruira à regir la grand naue d'Argo à tous recommandee: & semblablement
qu'un charron ne mettra pas si volontiers la main à faire vne charrue ou vn chariot,
qu'il fera les aixieux sur lesquels il sçaura que Solon deura engrauer ses loix. Or les
discours, & raisons des Philosophes, si vne fois elles sont bien & fermement im-
primees és ames des grands personnages, qui ont le gouuernement des estats en
main, & qu'elles y prennent pied, elles ont force & efficace de viues loix. Ce fut pour-
quoy Platon nauiga en Sicile, esperant que les sentences de sa philosophie vaudroiet
loix, &

- A loix, & produiroient de bons & profitables effects és affaires de Dionysius, mais il trouua que Dionysius estoit comme vne de ces tablettes ja toute pleines de ratures & de souillures, qui ne pouuoit plus laisser la teincture de la tyrannie, pour ce qu'elle auoit desia percé & penetré iusques au fond, & ne se pouuoit plus effacer : là où il faut que ceux qui sont pour faire leur profit de bons aduertissemens, soient encore en mouuement.

Qu'il est requis qu'un Prince soit sçauant.

- B  E S habitans de la ville de Cyrene prierent vne fois Platon de leur donner par escript de bonnes loix, & de leur dresser & ordonner le gouuernement de leur estat : ce qu'il refusa de faire, disant qu'il estoit bien malaisé de donner loix aux Cyreniens, qui estoient si riches & si opulents : car il n'est rien si hault à la main, si farouche, ne si malaisé à domter & manier, qu'un personnage qui s'est persuadé d'estre heureux. Voyla pourquoy il est bien difficile de conseiller les Princes & seigneurs, comment ils se doiuent gouuerner, car ils craignent de receuoir & admettre la raison, comme vn maistre qui leur cōmande, de peur qu'elle ne leur oste ou retrenche ce qu'ils estiment le bien de leur grandeur & puissance, en les assubiectissant à leur deuoir : c'est pour ce qu'ils n'entendent pas le discours de Theopompus le Roy de Sparte, qui fut le premier qui introduisit à Sparte les Ephores, & les messa au gouuernement avec les Roys : car comme sa femme luy reprochast, qu'il laisseroit à ses enfans l'autorité & puissance Royale moindre qu'il ne l'auoit eue de ses predecesseurs : mais plus grande, luy respondit-il, d'autant qu'elle sera plus asseuree : car relaschant vn peu ce qui estoit en la royauté trop roide & trop vehement, il euita par vn mesme moyen & l'enuie & le peril : & toutefois ce Theopompus-là deriuant de son autorité comme d'une grande riuere vn petit ruisseau, autant comme il donna de puissance aux Ephores, autant s'en osta il à soy mesmes : mais la raison & remonstrance de philosophie estant logee avec le Prince pour luy assister & le conseruer, luy ostant de sa licence comme de l'embonpoint ce qu'il y a de trop, luy laisse ce qui est sain. Mais la plus part des Princes & grands Seigneurs qui ne sont pas sages, ressemblēt aux ignorants tailleurs d'images, lesquels ont opinion que les statuës enormes & excessiues qu'ils taillēt, que lon appelle Colosses, semblerōt vastes & grandes, s'ils les font bien escarquillees de iambes, & bien estendues de bras, avec vne bouche qui baille bien grand : car semblablement aussi ceux-cy avec vne voix grosse, vn visage renfrongné, vn regard fier vne fascheuse conuersation, & vn viure à part, sans communiquer avec personne, cudent contrefaire la grauité, grandeur & dignité qui est requise en vn Seigneur : & ce pendant ils ne different en rien de ces Colosses-là, qui par le dehors ont la representation de quelque Dieu ou demy-dieu, mais par le dedans sont pleins de terre, de pierre & de plomb : il n'y a difference, sinon que la pesanteur de ces enormes statuës-là les maintient aucunement droittes, sur leur soubassement sans pancher ne ça ne là : & ces ignorants princes & seigneurs-cy, pour ce qu'ils ne sont pas bien au dedās dressez à plomb, souuētēfois sont esbranlez, & quelquefois du tout renuersez : car venans à bastir leur puissance & licence haute sur vne base qui n'est pas bien dressee à plomb, ne mise au niueau, ils panchent & versent en leur ruine avec elle. Là où il faut que comme la reigle estāt elle mesme droitte, & non gauche ny tortuē, dresse & rend droittes toutes autres choses, les faisant à soy semblables, en s'approchāt

Qu'il est requis qu'un Prince soit sçauant.

& appliquant à elles : semblablement aussi, que le Prince aiant estably & dressé pre- E
mierement en soy mesme sa principauté, c'est à dire apres auoir bien composé sa vie &
ses mœurs, alors il accommode & applique à soy ses subiects, pour les rendre aussi
droits. Car ce n'est pas affaire à celuy qui tombe, de redresser : ny à celuy qui ne sçait
rien, d'enseigner : ny à celuy qui est desordonné, d'ordonner : ny à celuy qui est de-
reglé, de ranger : ny à celuy qui ne sçait obeir, de commander : mais la plus part des
hommes se trompans en cela, estiment que le premier & principal bien qu'il y ait à
cōmander, soit de n'estre point commandé : comme faisoit le Roy de Perse, qui esti-
moit que tous ses subiects luy estoient esclaves, excepté sa femme seule, de laquelle
plus que d'autre il deuoit estre seigneur. Mais qui sera-ce doncques qui commandera
au Roy & au Prince? Ce sera la loy, qui est Royne de tous & mortels & immortels,
comme dit Pindare, non pas vne loy escrite dehors en quelques liures, ou dessus
quelque bois : mais la raison viue imprimée en son cœur, tousiours demourant avec
luy, tousiours le conseruant, & iamais ne l'abandonnant sans conduite : Car le Roy F
de Perse auoit vn de ses chambellans ordonné à cest office, pour luy venir dire tous
les matins entrant en sa chambre, Léue toy Sire, & prouuooy aux affaires, ausquels
„ Mesforomades, c'est à dire le grand Dieu, t'a ordonné pour prouuoir : mais à l'endroit
„ d'un sage prince & bien appris, c'est la raison qu'il a au dedans qui luy sonne tousiours
cela à l'oreille. Polemon disoit, que l'amour estoit vne entremise des Dieux à l'en-
droit des ieunes gens, dont ils auoient soing, & qu'ils vouloient sauuer : mais plus
veritablement pourroit-on dire, que les Princes sont ministres des Dieux, pour prou-
uoir aux affaires & au salut des hommes, à fin que des biens qu'ils leur donnent, ils
soient distributeurs des vns, & conseruateurs des autres.

Vois tu ce haut infiny firmament,

Qui dans son sein liquide fermement

De tous costez la terre ronde embrasse?

C'est luy qui influe les principes des semences conuenables, & puis la terre les pro- G
duit en estre, & sont les vnes accreues par les pluyes, les autres par les vents, les au-
tres eschauffées par les astres & par la Lune : mais c'est le Soleil qui regit & gouuerne
tout, & leur inspire le gracieux attraiēt d'amour, aussi de tous tant de grands biens,
dons & presens que les Dieux font aux hommes, il n'y a moyen d'en iouir ny vser
droittement sans loy, sans iustice, ny sans prince & magistrat. La iustice est la fin de
la loy, la loy œuvre du prince, & le prince image de Dieu, qui tout regit & gouuerne,
n'ayant besoing ny de Phidias qui le taille, ny de Polycletus, ny de Myron, ains luy-
mesme se formant au moule & patron de Dieu, par le moyen de la vertu, statue la
plus plaissante & la plus excellente que lon sçauroit iamais veoir. Et comme Dieu a
colloqué au ciel pour vn bel image de sa diuinité le Soleil & la Lune, telle represen-
tation & telle lumiere est en vne cité & en vn royaume, le Prince, tant qu'il a au
cœur la crainte de Dieu, & l'obseruation de la iustice empreinte, c'est à dire, qu'il a H
la raison diuine en son entendement, non pas le tonnerre en la main, ny la foudre,
ny le trident, comme il y a des fols princes, qui se font mouler & peindre, rendans
leur folie odieuse d'affecter ce à quoy ils ne peuuent atteindre : car Dieu hayt & punit
ceux qui veulent imiter le tonnerre, la foudre, les rays du Soleil, & choses sembla-
bles : & au contraire, ceux qui sont zelateurs de sa vertu, & qui taschent à se confor-
mer à sa clemence & bonté, il les aime & auance, & leur donne part de sa verité, de
sa iustice, clemence & legalité. Lesquelles qualitez sont telles, qu'il n'y a rien plus
diuin au monde, non le feu, ny la lumiere, ny le cours du Soleil, non le leuer & cou-
cher des estoilles, non pas mesme l'eternité, ny l'immortalité : car Dieu n'est pas be-
niēt ny heureux pour la longueur & duree de sa vie, mais pour ce qu'il est prince
de toute vertu, c'est cela qui est la diuinité, & la beauté ce qui est regy par elle.

Anaxarchus

- A Anaxarchus pour reconforter & consoler Alexandre, lequel se desespéroit pour le meurtre qu'il auoit commis en la personne de Clitus, luy dit, que Dicé & Themis, c'est à dire iustice, equité & droiture, sont les assesseurs de Iupiter: pour monstrier, disoit-il, que tout ce qui est fait par le Prince, est iuste, equitable & droitturier: péchant en cela griefuement, lourdement & pernicieusement, de vouloir remedier au regret que ce prince sentoit pour le peché qu'il auoit commis, en luy donnant assurance d'en faire encore d'autres semblables. Et s'il est en cela loisible d'amener sa coniecture, Iupiter n'a point iustice & equité pour ses assesseurs, mais luy mesme est la iustice & l'equité, & la plus ancienne & plus parfaite loy qui soit: ainsi parlent, escriuent & enseignent tous les anciens, que Iupiter mesme ne sçauoit bien commander sans iustice: laquelle est vierge, selon que dit Hesiode, non violée ny contaminée, ains tousiours logée avec honte, pudicité & simplicité. Voila pourquoy les anciens appellent les Roys reuerends & venerables. Car il est conuenable que ceux qui moins ont de
- B crainte, aient plus de honte & d'honneur. Or faut il que le Prince craigne plus tost de mal faire que de mal recevoir, comme estant l'un cause de l'autre: & est celle crainte benigne & genereuse, propre & peculièrè à un bon prince, craindre que ses subiects, sans qu'il le sache, ne soient offenzés & foulez,

Ne plus ne moins que les chiens genereux
Veillent aupres des brebis, non pour eux,
Sentant venir quelque beste fauuage,
Autour du parc, pour y faire carnage.

- Et n'est pas pour eux qu'ils craignent, mais pour ceux qu'ils gardent: comme Epaminondas, festans les Thebains laissez aller à boire dissoluement & faire grand' chere en vne feste, luy seul alloit reuisitant les armes & les murailles, disant qu'il ieunoit & veilloit, à fin que les autres peussent à seureté boire & dormir. Et Caton en la ville d'Vtique fait cryer à son de trompe, que à tous ceux qui festoient sauuez de la defaite, il donneroit moyen de s'en aller par la mer: & les aiant tous embarquez, apres auoir fait priere aux Dieux de leur donner bon voyage, luy retournant en son logis, se tua soy mesme, monstrent en cest exemple ce que le prince doit craindre, & ce qu'il doit mespriser. Au contraire, Clearchus le tyran de Pont s'enfermoit dedans un coffre pour dormir, comme un serpent dedans son creux: & Aristodemus le tyran d'Argos montoit en vne petite chambrette suspendue, dont l'huy estoit vne trappe, sur laquelle il mettoit son lièt, là où il se couchoit avec sa concubine: & la mere d'elle quand il estoit monté venoit oster l'eschelle d'à bas, & puis le matin la rapportoit. Comment pensez vous que ce tyran-là deuoit trembler de frayeur quand il estoit dedans un plein theatre, ou dedans le palais où l'on exerçoit la iustice, ou dedans le conseil, ou en un festin, veu qu'il faisoit de sa chambre vne prison? A la verité
- C aussi, les bons Princes craignent pour leurs subiects, & les Tyrans craignent leurs subiects: & pour ce d'autant que plus ils augmentent leur puissance, autant augmentent ils aussi leur crainte: car de tant qu'ils commandent à plus grand nombre d'hommes, de tant en craignent ils aussi plus grand nombre. Car il n'est pas vray semblable, ne bien seant avec, à la maiesté diuine, ce que aucuns philosophes ont voulu dire, que Dieu est inuisiblement meslé parmy la matiere premiere qui souffre toutes choses, & qui reçoit mille contraintes & mille cas fortuits, & des changements innombrables, ains reside là-haut, assis & colloqué en la nature, qui est tousiours vne & tousiours en mesme estat sur des saints fondements, comme dit Platon, fait & parfait ce qui est droit selon nature, se promenant par tout. Et comme le Soleil au ciel, qui est son tres-bel image, se laisse voir dedans un miroir à ceux qui ne le peuuent regarder: luy mesme aussi a il laissé és villes & parmy les hommes, vne autre image, c'est la lumiere de iustice & de droitte raison qui l'accompagne, laquelle les

Qu'il est requis qu'un Prince soit sçauant.

hommes sages & heureux descriuent & peignent des sentences de la philosophie, E en se conformant à ce qui est le plus beau en ce monde. Et n'y a rien qui imprime és ames & esprits des hommes vne telle disposition, que la raison tirée & apprise de la philosophie: à fin qu'il ne nous aduienne comme il feut à Alexandre le grand, lequel aiant veu & considéré Diogenes en la ville de Corinthe, comme il estoit genereux, estima beaucoup & admira la grandeur de courage & magnanimité de ce „ personnage, iusques à dire, Si ie n'estois Alexandre, ie serois Diogenes: quasi par maniere de dire se faschant de sa richesse, de sa splendeur, & de sa puissance, comme estant empeschés & destourbiers de sa vertu, & portant enuie à sa cappette, & à sa besace, d'autant que par icelles Diogenes estoit inuincible & imprenable, non pas comme luy qui ne l'estoit que par le moyen des armes, des cheuaux, & des picques: car il pouuoit en se gouuernât par vraye raison philosophique estre de disposition & affection Diogenes, & demourer d'estat & de fortune Alexandre, voire tant plus estre Diogenes, d'autant qu'il estoit Alexandre: comme aiant contre vne grosse tourmête, F agitée de forts vêts, & de vagues impetueuses, besoing de chable & d'ancre plus forte, & de gouuerneur & pilote plus grand: car és hommes petits, qui ont peu ou point de puissance, comme sont les priuez, la folie est innocente, & ne font point de mal quand ils sont fols, pour ce qu'ils ne peuuent: comme és mauuais songes il y a ie ne sçay quoy de douleur qui fasche l'ame quand elle ne peut pas venir à bout de mettre à execution ses cupiditez: mais où la puissance est cōioincte avec la mauuaistié, elle adioute aussi douleur à ses passions & affections. Et est bien veritable ce que souloit dire le tyran Dionysius, car il disoit que le plus grand plaisir & contentement qu'il sentist de sa domination tyrannique, estoit, que ce qu'il vouloit, soudainement estoit fait,

Comme il fut dit, il fut aussi tost fait.

Ainsi la mauuaistié & le vice prenant sa course legere par la carriere de la puissance, poulse & presse toute violente passion, faisant que vne cholere deuiet aussi tost G meurtre, vn amour adultere, vne auarice confiscation: la parole n'est pas plus tost acheuee, que celui qui est tombé en suspicion perit, & celui qui est calomnié est perdu. Mais comme les naturels tiennent, que l'esclair sort de la nue apres le tonnerre, encore qu'il apparaisse deuant, comme le sang sort de la playe: par ce que l'oreille reçoit le son, & la veüe va au deuant de l'esclair: aussi à l'endroit de tels seigneurs les punitions precedent les accusations, & les condamnations vont deuant les probations:

Car le courroux ne peut là plus durer,
Non plus que l'ancre en tourmente asseurer,
La naue estant fichee dans le sable,
Qui ne tient coup, & ne demeure stable.

Si le pois de la raison ne reprime & n'arreste la puissance, faisant le Prince & seigneur ainsi comme fait le Soleil, lequel alors qu'il est plus hault eleué en la partie Septen- H trionale, c'est lors que plus lentement il chemine & moins il se remue, rendant son cours plus assésuré par la tardité: car il n'est possible que les vices demeurēt couverts & cachez és hommes qui ont grande puissance: ains cōme ceux qui sont subiects au mal caduque, soudain que quelque froid les prend, ou qu'ils tournent vn peu, il leur vient incontinent vn esblouissement & vn chancellement, qui descouure & fait voir leur mal: aussi les ignorans & mal appris, soudain que la fortune les a vn petit esleuez en biens, en richesses, en estats & autoritez, incontinent elle fait voir leur cheute, & ruine: ou, pour mieux le donner à entendre, comme lon ne cognoist pas le vice & la faute des vaisseaux quand ils sont vuides, mais quand vous y versez quelque liqueur, alors vous voyez par où ils coulent & s'en vont: aussi les ames pourries & gastees ne peuuent contenir leur autorité & puissance, ains coulent dehors par leurs

A leurs cupiditez, leurs cholères, leurs vanitez, & leurs impertinences. Et qu'est-il besoing de s'estendre à discourir cela plus amplement, veu que lon calomnie és grands & illustres personnages iusques aux moindres fautes qu'ils ont eues? on reprochoit à Cimon qu'il aimoit le bon vin, à Scipion qu'il aimoit à dormir, & accusoit on Lucullus de ce qu'il tenoit table trop sumptueuse & trop friande.

Que le vice seul est suffisant pour rendre

L'HOMME MALHEUREUX.

Le commencement de ce Traitté est si defectueux & si corrompu, mesmes és liures escripts à la main, que lon ne sçait qu'elle coniecture y asseoir.

B



IANT vendu le sien corps pour vn douaire, ^{**}
comme dit Euripides, bien peu de bien, & encore mal assuré
& incertain : mais à celuy qui ne passe pas par dessus beaucoup
de cendre, ains à trauers vn feu royal, par maniere de dire, &
qui est brulé tout à l'entour, qui est continuellement à la
grosse & courte haleine, en peur & en crainte, plein de sueur,
& qui s'en court iusques delà la mer pour gaigner, elle luy
donne à la fin vne richesse de Tantalus, de laquelle il ne
iouïra iamais, pour les continuelles occupations, esquelles il
s'enveloppe. Or feit iadis sagement ce grand riche homme

Echepolus

Sicyonien qui nourrissoit des haras de cheuaux, quand il donna à Agamemnon Roy
des Acheïens vne belle iument coursier fort viste, pour estre dispensé

Homere, en
Iliad. liu. 23.

C De n'aller point à Troye la venteuse,
Ains demourer loing de guerre douteuse
Chez soy en paix & toute volupté,
Car il auoit de tous biens à planté :

à fin que demourant en sa maison il se veautrast à son aise en profonde richesse, &
se donnast du bon temps à loisir, sans aucune fascherie. Mais nos courtisans d'au-
iourd'huy, & ceulx qui se veulent faire estimer gens d'affaires, n'attendent pas
qu'on les appelle, ains se vont d'eulx mesmes ietter la teste baissée és courts des prin-
ces & és grosses maisons, là où il fault qu'ils veillent & facent le guet en grand trauail,
pour gaigner ou vn cheual, ou vne chaine, ou quelque tel present:

Et ce pendant, la face deschiree

Iliad. liu. 2.

En sa maison sa femme est demeuree,

D Et la maison acheuee à demy :

pendant que son mary est trainé çà & là errant, vagabond par le monde, tiré de
quelques esperances, qui à la fin bien souuent le trompent, & luy font honte: Et si
d'aduenture il obtient quelque chose de ce qu'il desire, apres auoir esté bien tourne-
boulé sans dessus-dessous, iusques à en auoir la teste toute estourdie de virer ainsi au
rouët de la fortune, il demande à s'en eschapper, & appelle bien-heureux ceulx qui de-
meurēt en vie priuee, sans s'exposer aux perils: & ceux-cy, au contraire, le reputēt luy
bien-heureux, d'autant qu'ils le voient preferé à eulx. Voyla comment le vice dispose
tous homes à toutes sortes de malheurs, estāt vn parfait ouurier de malheurté, de ma-
niere qu'il n'a besoing ne d'instrumēts ny de ministres. Les autres tyrans qui s'estudiēt à
rendre miserables ceulx qu'ils tourmentent, ils nourrissent des bourreaux & des ge-
henneurs, ils inuentent des fers chaulds à brulser, des grillons & des coings: mais le

Que le vice seul est suffisant pour

vice sans aucun appareil d'outils, aussi tost qu'il s'attache à l'ame, il la brise & l'accable & ruine, il remplit l'homme de douleur, de lamentations, de rancune, de regrets & repentance. Qu'il soit ainsi, on voit plusieurs, qui endurent qu'on leur coupe la chair & les membres, sans qu'ils dient mot, & endurent patiemment quand on les fouët, & quand leurs maistres, ou bien des tyrans leur donnent les grillons: vous ne leur entendrez pas icter vn seul cry, d'autant que l'ame avec la raison, comme avec la main, reprimant la voix, la garde de sortir: là où, au contraire, vous ne sçauriez iamais faire demourer quoy vn courroux, ny commander à vn deuil qu'il se taise: ny arrester vn qui est surpris de peur, ny vn qui se repent de regret, qu'il ne crie, qu'il ne se tire par les cheveux, & qu'il ne frappe sa cuisse, tellement que le vice est plus violent que n'est ny le feu ny le fer. Or les villes & citez, quand elles font à sçauoir par affiches, qu'elles veulent faire edifier quelques nauires, ou quelques statues de grandeur excessiue, que l'on appelle Colosses, elles escoutent les ouuriers disputans les vns contre les autres de la manufacture, & entendent leurs raisons, & voient leurs modèles, puis elles elisent celuy d'entre eux qui fera la besongne à moins de coust, mieux & plus promptement. Or posons le cas doncques que nous publions par affiches à faire & rendre vn homme & vne vie mal-heureuse, & qu'il se presente pour entreprendre le marché, d'vn costé la Fortune, & le Vice de l'autre: l'vne, à sçauoir la fortune, pleine d'outils de toute sorte, & d'vn appareil de grands frais, pour construire vne vie miserable & malheureuse: comme pourroient estre voleries de brigands, des guerres, des inhumanitez de tyrans, des tempestes de mer, des foudres de l'air, qu'elle traineroit apres elle, de la cigüe qu'elle broyeroit, des espees qu'elle apporteroit, des calomniateurs qu'elle soudoyeroit, des fièvres qu'elle allumeroit, des fers & manotes qu'elle feroit sonner, & des prisons qu'elle bastiroit à l'entour: encore que la plus part de tout cela procede plus tost du vice que de la fortune: mais pour tant supposons que tout cela procede de la fortune, & que la malice, & le vice estant au pres tout nud, & n'ayant besoing de chose quelconque hors de foy à l'encontre de l'homme, interrogue la fortune comment elle entend de rendre l'homme mal-heureux, & failly de cœur: Menasses-tu l'homme de le rendre pauvre, Fortune? Metrocles se mocquera de toy, qui l'hyuer dormoit parmy les moutons, & l'esté dedans les cloistres & portiques des temples: & par ainsi estriuoit de la felicité à l'encontre du grand Roy de Perse, lequel passoit son hyuer en Babylone, & son esté en la Medie, Ameneras-tu la seruitude, les fers & manotes, & l'estre vendu comme esclau? Diogenes le mesprisera, lequel estant exposé en vente par les brigands qui l'auoient pris, cryoit luy-mesme à l'encan, Qui veult acheter vn maistre? Broyes tu vne coupe de poison? n'en baillas tu pas autant à boire à Socrates? & luy tout doucement & facilement sans restiuer de peur, ne rien changer de contenance ny de couleur, l'aualla: & quand il fut mort les suruiuans le iugerent bien-heureux, comme celuy qui en l'autre monde s'en alloit viure d'vne vie diuine. Me presenteras-tu le feu? voire mais Decius le Capitaine des Romains t'a pieça preuenu, quand au milieu des deux armées il feit dresser vn grand feu, où il se brusta luy-mesme en holocauste à Saturne, comme il auoit voué pour le salut & la prosperité de l'Empire Romain. Et les honnestes femmes des Indiens, qui aiment mieux leurs marys, combattent & estriuent ensemble pour le feu, & celle qui gaigne la victoire est bruslee avec le corps de son defunct mary, laquelle toutes les autres iugent & estiment bien-heureuse. Et quant aux sages de pardela, il n'y en a pas vn qui soit reputé homme sainct, ne bien-heureux, si estant encore viuant, en son bon sens & sain entendement, il ne separe son ame de son corps avec le feu, & qu'il ne sorte tout pur & net de la chair, en aiant consumé tout ce qu'il y auoit de mortel. Ouy mais d'vne maison plantureuse & d'vne richesse grande, d'vne table friande & sumptueuse, tu me reduiras à la besace, à la petite cappette, & à deman-

- A** demander mon pain ordinaire : toutes ces choses-là furent les principes & causes de la felicité de Diogenes, & de liberté & de gloire à Crates. Mais tu me feras clouër en croix, ou bien empaler au bout d'un pieu. Et que peult il chaloir à Theodorus fil pourrira dessus ou dessous la terre? Ce sont les plus heureuses sepultures des Tartares, & des Hyrcaniens, l'estre mangé des chiens : & entre les Baëtrianiens, par les loix du païs, ceux-là sont estimez auoir plus heureuse fin, quand les oiseaux les mangent apres qu'ils sont morts. Qui sont d'ocques ceux que tels accidents rendent mal-heureux? Ce sont les lasches de cœur, delicats, sans iugement, mal nourris & mal instruits en affaires du monde, & qui tousiours ont retenu les opiniõs qui leur ont esté imprimees dès leur enfance. La fortune d'ocques seule n'est pas ouriere parfaite de malheur & infelicité, si elle n'a la malice & le vice qui luy aide. Car tout ainsi comme vn filer sie l'os qui a esté longuement trempé dedans du vinaigre & de la cendre, & comme les ouriers courbent & forment en telle façon qu'ils veulent l'yuoire, apres qu'ils l'ont mollifié & de-
- B** trempé avec de la biere, autrement ils n'en peuuent venir à bout : aussi la fortune blesse & caue ce qui est desia gasté & amolly de soy-mesme, quand la malice y suruient d'auantage. Et tout ainsi que le poison appellé Pharicum, * autrement Napel ou Aconit, ne nuit à personne des autres, & ne fait point mal à ceux qui le touchent, & qui le portent quant & eux : mais sil touche tant soit peu à vn qui soit nauré, il le fait incõtinẽt mourir par le moien de la playe & blessure qui reçoit son influxion : aussi celui duquel la fortune sera pour ruiner & gaster l'ame, deura auoir au dedãs de sa propre chair quelque vlcere, quelque apostume, & quelque mal pour rẽdre les accidents, qui luy suruiendront de dehors, miserables & lamentables. Le vice donc est-il point tel, qu'il ait besoing de la fortune pour produire malheurté? De quel costé cela? la fortune ne fait-elle pas souleuer la tempeste & tourmente en la mer? ne ceint-elle pas les pieds des montaignes, des aguets & embusches des larrons? ne iette-elle pas par grande impetuosité la gresse dedans les champs fertiles & fructueux? mais la malice ne suscite-elle pas vn Melitus, vn Anytus, vn Calixenus, calomniateurs? n'oste-elle pas les biens? n'empesche-elle pas les hommes d'estre chefs d'armees pour les rendre malheureux? Mais elle les fait lasches, elle leur amasse de grandes successions en terre, elle les accompagne par mer, elle est tousiours apres, les dessechât de cupiditez, les enflammant de cholere, les accablant de superstitions, les attirant par les cupiditez des yeux.

* voyez
Dioscoride,
Livre 6.
Chap. 19.
Nicæder en
ses Theria-
ques.

Il n'y a ny commencement, ny fin.

Comment on se peult louër soy-mesme, sans

ENCOVRIR ENVIE NY REPREHENSION.

E



L n'y a celuy qui ne die de bouche, que parler de soy-mesme en se donnant la loüange d'estre ou de valoir quelque chose, amy Herculanus, ne soit fort odieux, & mal seant à toute personne bien apprise: mais de faiçt il y en a bien peu qui se gardent de tomber en ceste impertinence & importunité là, non pas de ceulx mesmes qui la reprennent. Car Euripides disant,

Si la parole il falloit acheter,
Nul ne voudroit ses loüanges conter,
Mais à raison qu'on en peult de l'air prendre

Tant que lon veult, sans aucun pris en rendre,
Chascun disant de soy-mesme se plaist
Ce qui est vray, & ce qui pas ne l'est,
Pource que rien le parler ne luy couste:

F

il vse d'une tres-odieuse & importune vanterie, en cela mesmement qu'il va entrelasfer parmy des accidents & affaires tragiques, vn propos de soy-mesme qui n'appartient rien à la matiere subiecte. Semblablement Pindarus aiant dit en vn lieu,

Qui se vante importunément
Est fouruoyé d'entendement,

ne cesse iamais toutefois de magnifier sa suffisance en la poësie, qui est grande certainement, & bien digne de loüange, il n'y a personne qui le nie: mais ceux qui sont couronnez és ieux & combats sacrez, sont declarez victorieux par la voix d'autrui, pour oster la fascherie que porte avec soy le parler de soy-mesme: & à bon droict auons nous à contrecœur la vaine gloire de Timotheus, en ce qu'il escrit luy-mesme touchant la victoire qu'il obtint à l'encontre de Phrynis, Tant tu fus heureux Timotheus lors que le herault proclama à haulte voix, Timotheus le Milesien a vaincu le fils de Carbon le plieur de voix. Car cela n'a point de grace & est contre toute façon honneste de trompeter ainsi soy-mesme sa victoire, par ce qu'il est bien vray ce que disoit Xenophon, que la plus plaissante audition que l'homme scauroit entendre est, d'ouïr reciter ses louanges par vn autre: mais la plus fascheuse aussi aux autres est, d'ouïr que luy-mesme les recite. Car premierement nous estimons effrontez & impudens ceulx qui se louënt eux mesmes, attendu qu'ils deuroient estre honteux quand d'autres les louëroient en leur presence. Secondement, nous les reputons iniustes en ce qu'ils se dōnent à eulx mesmes ce qu'ils deuroient recevoir des mains des autres. Tiercement, si nous nous taisons quand nous entendons vn qui se louë soy-mesme, il semble ou que nous en soyons marris, ou que nous luy portions enuie: ou si nous craignons cela, nous sommes contraincts de confirmer nous mesmes ses louanges, & porter tesmoignage à la chose dont il est question, contre ce que nous en pensons, ce qui est plus conuenable à vne vile flaterie, qu'à vray honneur, d'auoir le cœur de louër aucun en sa presence. Mais encore que cela soit veritable, & que la chose aille ainsi, si peult il aduenir des occurences qu'un homme d'honneur s'entremettant des affaires de la chose publique, pourra se hazarder à parler de soy-mesme à son aduantage: non pour aucun honneur ou plaisir qu'il en pretende, mais pour ce que l'occasion ou l'action qui se presente, requiert qu'il parle de soy-mesme, comme il feroit de quelque autre chose veritable: mesmement quand les choses faites ou aduenues sont bonnes & honnestes, il ne faut point qu'il feigne de dire hardiment, qu'il en a fait autrefois de semblables: car ceste louange-là apporte vn beau & bon fruit, c'est que d'icelle, comme d'une graine & semence, plusieurs autres

G

H

Au second
liv. des Diçts
de Socrates.

- A autres & plus grandes louanges en procedent. Car l'homme de bien ne demande & n'aime pas l'honneur comme vn salaire, ou vn reconfort & recompense de ses vertueuses actions, mais pour ce que l'estre creu, & auoir reputation d'homme de bien, & qu'on se fie en luy, luy donne les moyens de faire plusieurs autres plus grandes & plus belles actions : car il est & plaisant & facile de faire bien à ceux qui vous aiment, & se fient en vous : & au contraire, il est impossible ou bien mal-aisé, se seruir de la vertu & l'employer enuers ceux qui vous calomnient, ou vous ont pour suspect, en forçant ceux qui fuyent les occasions de receuoir aucun bien ne plaisir de vous. Il nous fault doncques considerer, s'il y auroit point d'autres occasions pour lesquelles l'homme de bien & d'honneur se pourroit louer soy-mesme, à fin que ne le redoutant pas par trop, comme chose vaine & odieuse, nous ne faillions à nous seruir de quelque vtilité & commodité qu'il y pourroit auoir. Or est bien vaine la louange de ceux qui se louent eux-mesmes, à fin qu'ils soient louez des autres : &
- B la mesprise-lon plus que nulle autre, pour ce qu'il semble qu'elle procede d'une ambition & d'un appetit importun de vaine gloire seulement. Car ainsi comme ceux qui n'ont de quoy manger, sont contraincts de manger de leur propre corps contre la nature, & cela est l'extremité de famine : aussi ceux qui sont affamez d'honneur & de louanges, s'ils ne treuent des autres qui les louent, ils se louent eux-mesmes : ce qui de tant plus est laid, qu'il semble que par un amour de vaine gloire, ils y adioutent encore & y mettent du leur. Mais encore quand ils ne le font pas simplement, & ne cherchent pas à estre louez à par-eux, ains par une emulation & ialousie de la louange d'autrui, ils vont comparant leurs faicts & actions, comme pour offusquer & obscurcir celles des autres, alors oultre la vanité, il y a de l'enuie & de la malignité : car on dit en commun prouerbe, que celuy est curieux & importun, qui met le pied en la danse d'autrui : mais de s'aller ietter à trauers les louanges des autres par une ialousie & enuie, en rompant le propos pour parler de soy-mesme, c'est chose dont il se fault non seulement bien garder, mais aussi ne souffrir pas que d'autres nous louent à l'enuy, ains gracieusement ceder l'honneur à ceux qui seront dignes d'estre louez & honorez, & si d'aduenture ils en sont indignes & ne le meritent pas, encore ne fault-il point que nous les priuions des louanges qu'on leur donne en y interposant les nostres, ains plus tost ouuertement les conuaincre, & monstrier par vives raisons que c'est à tort que lon leur fait tant d'honneur. Et quant à cela, il n'y a point de doute qu'il ne faille ainsi faire. Mais on se peut louer soy-mesme sans reprehension : Premièrement si on le fait en respondant à une calomnie & imputation
- C qui auroit esté mise sus, cōme fait Pericles en Thucydide, là où il dit, Et neantmoins, Seigneurs Atheniens, vous vous courroucez à moy, qui me puis bien vanter d'estre tel, que ie ne cede à autre homme qui qu'il soit, ny quant à preuoir & cognoistre ce qui est vtile pour la chose publicque, ny quant à le bien dire & donner à entendre, ny quant à aimer le bien public, & ne se laisser point gagner à l'auarice. Car non seulement il euita le blasme de vanité, d'arrogance & de presumptueuse ambition, en parlant ainsi magnifiquement de soy-mesme en tel endroit : ains, qui plus est, il monstra parmy la grandeur & magnanimité de la vertu, laquelle pour ne s'abaisser point, rabaisse & tient sous sa main l'enuie : tellement que les hommes qui l'oyent ainsi parler, ne veulent plus s'amuser à peser & iuger si son dire est veritable, ains sont emportez & ravis d'aise & de ioye, d'ouyr telles magnanimes vanteries, quand elles sont veritables & certaines, cōme le tesmoignēt les effects que lon en voit aduenir. Car les Thebains, estans leurs capitaines, accusez de ce que, apres le temps de leur office expiré, ils ne s'en estoient pas incontinent retournez, selon les loix du pais, ains estoient entrez en armes dedans la Laconie, auoient repeuplé la ville de Messene, à peine absolurent Pelopidas, qui plioit à telles obiections, & les supplioit : & au cōtraire, Epa-

Au 2. liure
de son histoire.

Comment on se peult louer soy-mesme,

minondas qui vint à raconter magnifiquement les braues choses qu'il auoit faittes **E**
en ce voyage, & en ce temps-là, iusques à dire finablement qu'il estoit prest & content de mourir, prouueu qu'ils voulussent confesser, que malgré eux, & contre leur volonté, il auoit pillé & saccagé la Laconie, auoit repeuplé la ville de Messene, & remis en vne ligue toutes les villes del' Arcadie : ils n'eurent pas le cœur de prendre seulement les ballotes en main pour donner sentence contre luy, ains se departirent de l'assemblée, en louant grandement sa haultesse de courage, & s'esjouissant & riant d'auoir ainsi ouy parler ce personnage. Pourtant ne faut-il pas du tout reprendre Sthenelus de ce qu'il dit en Homere,

Iliad. liu. 4.

Nous nous vantons de valoir beaucoup mieux
Que iamais n'ont valu nos peres vieux :
Si nous nous souuenons de ce qui precede vn peu au parauant,
O fils du pieux Tydeus & vaillant,
Comment de peur est ainsi tressaillant
Ton foible cœur, que ton œil par tout quiere
A te tirer de la bataille arriere?

F

car ce n'estoit pas luy à qui ceste parole picquante s'adressoit, ains repliquoit pour son amy, qu'il sentoist iniurié : & pourtant la iuste cause luy donnoit liberté de parler ainsi brauement de soy-mesme. Les Romains se fascherent d'ouyr tant souuent repeter à Ciceron les louanges des choses qu'il auoit faittes à l'encontre de Catilina : & au contraire, quand Scipion leur dit en publique assemblée, qu'il ne leur estoit pas bien seant vouloir iuger de Scipion, veu que par son moyen ils estoient paruenus à ceste grandeur de iuger de tout le monde, ils meirent des chapeaux de fleurs sur leurs testes, & monterent avec luy au Capitole pour sacrifier & rendre graces à Iupiter : l'un & l'autre avec raison, car l'un repetoit ainsi souuent ses louanges sans aucun besoing qu'il en fust, pour se glorifier : & à l'autre le peril luy ostoit la haine, & l'enuie de s'en magnifier. Si ne conuient pas ceste vanterie & ceste gloire de se magnifier, seulement à ceux qui sont accusez & appelez en iustice de leur vie ou de leur honneur, ains à tous ceux qui sont en aduersité plus tost qu'en prosperité : pource qu'il semble que ceux cy embrassent, par maniere de dire, la gloire, & prennent plaisir à la iouyr, gratifiâs en cela à leur ambitieux desir : & ceux-là pour la qualité de leur temps sont bien esloignez de toute suspicion d'ambition, & se roidissent encontre la fortune, estayans le mieux qu'ils peuuent la generosité de leur courage, en euitant totalement la bassesse de sembler mendier compassion, ny d'estre rauallé de courage, & se lamenter en leur mesaduenture. Tout ainsi doncques comme nous estimons fols & glorieux ceux qui en se promenant se rehaussent & dressent le col, & au contraire nous louons ceux qui se redressent & releuent le plus qu'ils peuuent en escrimant des poings, ou en combattant : aussi vn homme qui estant renuersé par la fortune se releue sur ses pieds, & se redresse pour luy faire teste, & au lieu de se monstrier pitoyable, suppliant & lamentable, par vne parole auantageuse se môstre braue & hault en courage, en est trouué non superbe ne presumptueux, ains au contraire, grand & inuincible : comme le poëte Homere depeint Patroclus, modeste & gracieux en paroles, quand il a fait vaillamment & heureusement : & au contraire, à sa mort il le décrit parlant brauement & haultainement,

H

Iliad. liu. 16.

Si tels esté comme ie suis ils eussent,
Encontre moy presentez ils se fussent.
Et Phocion, qui au demourant auoit tousiours esté fort gracieux & modeste, apres qu'il se veit condamné, il donna à cognoistre sa magnanimité en plusieurs autres choses, & mesmement en ce qu'il dit à l'un de ceux qui estoient condamnez à mourir quand & luy, qui se tourmentoist & complaignoit, Que dis-tu pauvre homme?

ne te

A ne te tiens-tu pas bien-heureux de mourir avec Phocion? Autant doncques, voire plus encore, est-il permis à l'homme d'estat, à qui lon fait tort, de dire quelque chose auantageusement de soy, à ceux qui se monstrent ingrats enuers luy, comme Achilles ailleurs rendoit bien à Dieu la gloire du succés des affaires, & parloit modestement quand il disoit,

Si Iupiter la grace nous ottroye

Iliad. liu. ii.

Que ruïner puissions la grande Troye.

mais ailleurs, là où on luy fait tort & iniure, il desploye sa langue à parler haultainement en courroux,

Avec mes gens, & mes vaisseaux, j'ay pris

Douze citez.

& en vn autre lieu,

Iliad. liu. ii.

Ils ne pourront supporter la lueur

De mon armet, approchant pres du leur.

Iliad. 9. & 16.

B Car là où la brauerie est partie de la iustification, alors il est loisible & permis d'en vser. Suyuant laquelle doctrine, nous voyons que Themistocles, pendant qu'il feist les grands seruices à son pais, iamais ne dit ny ne feist rien de superbe, mais lors qu'il veit que les Atheniens estoient saouls de luy, & qu'ils n'en faisoient plus de compte, il ne faignit pas de leur dire, O pauvres gens, pourquoy vous laissez-vous de recevoir souuent des bienfaits de mesmes personnes? Et vne autre fois, En temps de pluye & d'orage vous recourez à moy, comme à l'abry d'un arbre, & puis quand le beau temps est reuenu, vous en arrachez chascun vne branche en passant. Ceux-là doncques se sentans d'ailleurs outragez rememoroient ainsi leurs bons seruices & beaux faits à ceux qui en estoient mescognoissans: mais celuy qui se sent repris & blasmé des meilleures choses qu'il ait faites, est bien à excuser, & ne luy peult on attacher aucun blasme, si luy-mesme se met à louer ce qu'il a fait: d'autant qu'il semble qu'il ne le die pas par reproche, mais pour respondre à ce dont on le calomnie.

C Qu'il soit ainsi, cela donna vne honneste liberté à Demosthene de parler à son auantage, & si empesche qu'on ne se lasse, & ne se saoule des loüanges que luy-mesme se donne par toute l'oraison qu'il escriuit de la Couronne: là où il se glorifie de ce qu'on luy imputoit, à sçauoir des ambassades qu'il auoit faites, & des decrets qu'il auoit mis en auant pour la guerre. Aussi n'est pas logé loing de là, & a bonne grace le renuersement de l'obiection, quand on monstre, que le contraire de ce dont on est chargé & imputé, est meschant & deshonneste, comme feist l'orateur Lycurgus à Athenes, respondant à ceux qui luy reprochoient, qu'il auoit donné argent à vn calomniateur pour se racheter de la vexation de sa calomnie: Et bien, dit-il, quel citoyen vous semble-il que ie sois, veu qu'en si long temps qu'il y a que ie m'entremets du gouuernement des affaires de la chose publique, ie suis conuaincu deuant vous d'auoir plus tost donné que pris de l'argent iniustement? Et Ciceron, comme Metellus luy reprochast, qu'il auoit plus affligé & perdu d'hommes par son tesmoignage, qu'il n'en auoit sauué par son eloquence: Et qui est celuy, dit-il, qui ne die, qu'il y a plus en moy de foy & de prud'homme, qu'il n'y a d'eloquence, & de force de bien dire? Et ces passages de Demosthene, Qui est celuy qui ne m'eust iustement condamné à mourir, si ie me fusse efforcé de contaminer seulement de parole les honneurs & tiltres glorieux que ceste cité a? Et que pensez-vous qu'eussent dit ces meschans hommes icy, si lors que ie discourois ces choses par le menu, les villes s'en fussent allees? Bref toute la harangue pour la Couronne could fort dextrement ses louanges, & les adioustes aux oppositions & solutions des obiections qu'on luy mettoit sus: toutefois il est bien à remarquer en ceste mesme oraison-là, comme artifice tres-vtile, qu'en meslant parmy les propos qu'il tient de soy les louanges aussi des escoutans, il rend tout son parler exempt d'enuie, & de la haine qui accompagne ordinairement ceux

Comment on se peult louer foy-mefme

qui monstrent de f'aimer trop foy-mefme : quels se monstrent alors les Atheniens E
enuers ceux d'Eubœe, quels enuers ceux de Thebes, combien de bien feirent-ils aux
habitans de la Cherroneſe, combien à ceux de Byzance, en diſant que luy n'en eſtoit
que le miniſtre : Car l'auditeur ſecrettement ainſi gagné par ſes propres louanges
en reçoit plus volontiers, & avec plaifir, le dire de l'Orateur, & eſt bien-aiſe d'ouïr
reciter & referer à vn autre ce que luy-mefme a bien fait, & à ceſte aiſe-là ſuit incon-
tinent conioinct l'auoir en admiration & amour ceux par le moyen deſquels il
a bien fait. Suyuant lequel propos, Epaminondas dit vn iour publiquement,
comme vn ſien enuieux Meneclidas en ſe mocquant luy reprochaſt, qu'il ſe magni-
» fioit plus que n'auoit oncques fait le Roy Agamemnon : Mercy à vous, Seigneurs
» Thebains, avec leſquels ſeuls j'ay en vn iour ſubuerty & ruiné la domination des
» Lacedemoniens. Et pourtant que la plus part des hommes repugnent ordinaire-
ment en leurs cœurs, & ſe faſchent fort contre celuy qui ſe loue foy-mefme, & ne
font pas de meſme contre celuy qui loue vn autre, ains en ſont bien ſouuent aiſes, F
& confirment telles louanges par leur teſmoignage : aucuns ont accouſtumé en
louant dextrement & opportunément ceux qui aiment, & qui ſont de meſmes cho-
ſes, & qui bref ſont de meſmes conditions & meſme humeur que eux, de ſinſinuer
en la bonne grace des auditeurs, & les attirer à culx, pource qu'ils recognoiſſent
incontinent au diſant, encore qu'il parle de quelque autre, vne ſemblance de ver-
tus, qui merite toute pareille louange. Car ainſi comme celuy qui reproche à vn
autre les vices, deſquels il eſt luy-mefme taré, ſe fait plus d'iniure à foy-mefme, qu'à
l'autre auquel il les reproche : auſſi les gens de bien, honnorans les gens de bien, re-
mettent ceux qui les cognoiſſent en memoire, tellement que tout auſſi toſt ils leur
vont criant : Et vous, n'eſtes-vous pas tout de meſme ? Voyla pourquoy Alexandre
honorant Hercules, & Andropus Alexandre, ont fait qu'eux meſmes ont eſté
honorés par leurs ſemblables : & à l'opposite, Dionyſius ſe mocquant de Gelon,
en diſant qu'il auoit eſté gelos, c'eſt à dire, la riſee & la mocquerie de la Sicile, ne ſap- G
perceuoit pas, que par enuie qu'il ſe ſuſcitoit, il ruinoit & demolifſoit la grandeur &
la dignité de ſa ſeigneurie. Il faut donc que l'homme d'eſtat, encore ailleurs entende
& pratique bien ces regles là : mais ſi quelquefois il eſt contrainct de ſe louer foy-
meſme, il rendra ceſte ſienne louange beaucoup plus ſupportable, quand il ne ſe l'at-
tribuera pas toute, ains comme ſi la gloire luy eſtoit charge peſante, il ſ'en deſchar-
gera d'une partie ſur la Fortune, & d'une autre ſur Dieu : & pourtant fait Homere
ſagement parler Achilles,

Iliad. liu. 22.

Puis que les Dieux m'ont donné ceſte grace

D'auoir occis l'ennemy ſur la place.

& ſagement fit auſſi Timoleon à Syracuſe, qui apres ſes beaux faiçts dedia vn autel
à l'heureuſe aduerture, & consacra ſa maiſon à la bonne fortune : & treſſagement
ſe fit auſſi Python Aënien, lequel eſtant venu à Athenes apres auoir tué le Roy Cotis, H
comme les Orateurs ſeiſſent à l'enuy les vns des autres, à qui plus haultement loue-
roit ſa prouèſſe deuant le peuple Athenien, & que luy ſe fuſt apperceu que quel-
» ques-vns luy en portoient enuie, & en eſtoient marris : il dit en paſſant, Seigneurs
» Atheniens, ce a eſté quelque Dieu qui l'a fait, & ie luy ay preſté mes mains. Auſſi
oſta Sylla l'enuie à ſes faiçts, en louant ſouuent ſa bonne fortune : & finalement en
ſe ſurnommant Fauſtus, c'eſt à dire, le bien fortuné : car les hommes aiment mieulx
ſembler eſtre vaincus par la fortune, que par la vertu, pource qu'ils reputent l'un eſtre
bien non appartenant au vainqueur, & l'autre default propre à eux, & qui procede
d'eux. C'eſt pourquoy lon dit que les loix de Zalcucus pleurent infiniment aux
Locriens, d'autant qu'il leur donnoit à entendre que la deeſſe Minerue ſappa-
roifſoit à chaſque coup à luy, & luy enſeignoit & dictoit les loix qu'il leur donnoit,
& qu'il

- A & qu'il n'y en auoit pas vne qui fust de son conseil ny de son inuention. Or est-il à l'aduenture necessaire d'inuenter ces remedes & ces adouciffemens-là, à l'encontre de ceux qui sont de nature fascheux ou enuieux : mais encore enuers ceux qui sont de bonne sorte & modeste, il ne sera pas impertinent d'vser de corrections des louanges, si d'aduenture quelqu'un en nostre presence nous louë d'estre ou sçauans, ou riches, ou de grand credit, en le priant de ne dire point cela de nous : mais bien si nous sommes bons, à nully mal-faisans, & profitables à plusieurs : car qui fait ainsi, n'accumule pas louanges sur louanges, ains la transfere d'une chose à vne autre : & ne semble pas qu'il prenne plaisir à fouyr louer, ains plus tost d'estre marry de ce qu'on ne le louë pas ainsi qu'il faut, ny pour ce qu'il faut : & cacher & obscurcir les qualitez moindres sous les plus grandes & meilleures, non tant pour vouloir estre loué, que pour enseigner comment il faut louer : car ceste maniere de dire, Ce n'est pas de pierres que j'ay fortifié ceste ville, ny de murailles de brique : mais si vous voulez considerer de quoy
- B & comment ie l'ay fortifiée, vous trouuerez que c'est d'armes, de cheuaux, & de confederer & alliez : cela tire sur ceste regle-là, & encore plus ce que dit Pericles sur la fin de ses iours. Car ainsi comme il acheuoit sa vie, & se portoit fort mal, ses parens, amis & familiers se priret à rememorer en sa presence les charges qu'il auoit eues, les expeditiōs qu'il auoit faittes, la puissāce grāde qu'il auoit eue, les victoires, les trophées, les villes & citez qu'il auoit conquises aux Atheniens, & luy se soubleuant vn petit en son seant, les reprit & blasma grandement de ce qu'ils alleguoient des louanges qui estoient communes à plusieurs, & aucunes qui estoient plus tost deuës à la fortune, que non pas à la vertu : & ce-pendant ils obmettoient ce qui estoit le plus grand & le plus beau, & qui estoit plus propre à luy : c'est que par luy nul citoyen n'auoit iamais porté le deuil, ne pris robe noire. Cest exemple donc le moyen & à vn Orateur s'il est bon, & qu'on le louë de la force de son eloquence, de transférer la louange à sa vie, & à ses meurs : & à vn Capitaine que lon estimera pour sa grāde experiēce & son heur au
- C faiēt des armes, de parler franchement de sa iustice & de sa clemence : ou au contraire, si d'aduenture il y en a qui luy donnēt des louanges excessiues, comme bien souuent il sen trouue qui disent, en flattant, des propos qui ne seruent qu'à exciter enuie,

Je ne suis point du nombre des haults Dieux,

Ody G. l. 16.

Pourquoy vas-tu me comparant à eux ?

mais si tu me cognois à la verité pour tel que ie suis, louë ce, que j'ay les mains nettes, que ie suis temperant, que ie suis acquitable, doux & gracieux : car l'enuie concède volontiers à qui refuse les plus grandes louanges, celles qui sont moindres & plus modestes, & ne priue pas de veritable louange ceux qui ne reçoieēt pas les faulces & vaines. Et pourtant ne se faschoient point les hommes d'honorer les Princes & les Roys, qui ne cerchoiēt pas à se faire appeller Dieux, ou enfans des Dieux, ains Philadelphes, c'est à dire aimās leurs freres & sœurs : ou Philometores, aimās leurs

D meres : ou Euergetes, bienfaiēteurs : ou Theophiles, c'est à dire aimans les Dieux, qui sont belles & honnestes appellations, propres aux homes, & aux bons princes : cōme au cas pareil, on ne peut endurer patiemment ceux qui en escriuant ou en lisant se donnent le tiltre de Sages, & est-on bien aise d'ouyr ceux qui se nomment amateurs de sagesse, ou qui disent qu'ils profitent en l'estude de sapience, ou telle chose semblable, qui est modeste & non subiecte à aucune enuie. Là où ces ambitieux Sophistes, qui reçoient & seuffrent qu'on leur die ces paroles, qu'ils ont harengué diuinement, celestement, & magnifiquement, perdent outre cela, le modestement, & humainement : & toutefois, ainsi comme ceux qui ne veulent pas fascher ny donner peine à ceux qui ont mal aux yeux, parmy des couleurs fort brillantes & fort vifues entremessent quelque peu d'ombrage : aussi aucuns recitans leurs louanges, non totalement reluisantes & claires sans aucune meſlange, ains y entremessans quelques

Comment on se peut louer soy-mesme

imperfections ou defectuositez & fautes, lesquelles deschargent par ce moyen de ce E
qui cause haine & enuie : comme Epeus aiant parlé fort auantageusement, & festant
vanté brauement de sa vaillance en l'escrime des poings,

A coups de poing son corps ie creueray,

Et tous ses os ie luy desbriseray.

il va dire apres,

Iliad. liu. 23.

Car de combat autre ie ne demande.

Mais à l'aduenture est celuy-là digne de mocquerie, qui pour excuser vne brauerie
d'escrimeur & champion de lui-même, aduouë & confesse qu'il est lasche & couard : & au
contraire est adroit, de bon iugement, & de bonne grace, celuy qui allegue contre
soy-mesme quelque oubliance, quelque ignorance, ou quelque desir d'ouyr & d'ap-
prendre, comme Vlysses quand il dit,

Mais le mien cœur desiroit escouter,

Et commandois de me desgarroter

En leur guignant des yeux & de la teste.

Et en vn autre lieu,

F

Odyss. l. 12.

Mais point de soy ie ne leur adioustay,

Odyss. l. 9.

Comme beaucoup meilleur il eust esté,

Pour le geant voir dedans son repaire,

Pensant qu'il deust quelque present me faire.

Et brief toutes sortes de fautes, prouueu qu'elles ne soient pas par trop deshonestes,
ny par trop lasches, estans adioustees à des louanges, leur ostent la haine & l'enuie. Et
y en a plusieurs qui en entre-iettant vne confession & adueu de pauvreté ou de faute
d'experience, ou de noblesse, parmy des louanges, les rendent moins enuiees & moins
odieuses : ne plus ne moins qu'Agathocles beuuant aux ieunes hommes qui estoient
de sa compagnie en vases d'or & d'argent ingenieusement ouurez, en faisoit appor-
ter sur sa table d'autres de terre, leur disant, Voyla que c'est de perseuerer à trauailler,
prendre peine & se hazarder à faire vaillamment : car par cy deuant nous faisons de
ces pots-là (monstrât ceux de terre) & maintenant nous en faisons de ceux-cy (mon- G
strant ceux d'or & d'argent). car il auoit esté nourry en la boutique d'un potier de
terre, tant il estoit pauvre & de bas lieu yssu : mais depuis il se fait Roy de toute la Si-
cile presque. Voyla doncques les remedes que lon peut appliquer de dehors, quand
on est contrainct de parler de soy-mesme : mais il y en a d'autres qui sont dedans ceux
mesmes qui se louent, comme Caton disoit qu'on luy portoit enuie de ce qu'il ne
faisoit compte de ses propres affaires, & qu'il veilloit toutes les nuits pour le salut de
la patrie : à quoy ressembloit aussi ces passages,

Quelle sagesse y a-il en moy, veu

Que ie pourrois de charge desprouueu,

Comme vn soldat simple de l'exercite,

De tout trauail & de tout soucy quitte,

Participer à la fortune, autant

Que le plus sage & plus s'entremettant

Et cest autre,

H

Ie crains d'auoir ietté la grace au vent

De mes trauaux endurez cy deuant,

Et toutefois ie ne repousse encores

Arriere ceux qui se presentent ores.

Car les hommes communément portent enuie à ceux qui ont la gloire & la vertu gratis,
ou sans qu'il leur couste guerres, ne plus ne moins que si c'estoit vne maison ou vn heri-
tage, mais non pas à ceux qui l'ont achetee bien cherement avec grâds labours & grâds
perils. Et pourtant qu'il ne faut pas seulement ne fascher point les escoutans, ny se faire
enuié en se louant, ains faut tascher à seruir & profiter en ce faisant, à fin qu'il ne
semble pas que nous facions cela, mais que nous tendons à autre effect par cela.

Considerez

A Considérez premierement quand quelqu'un s'est loué soy-mesme, si l'a point fait pour vne exhortation, pour exciter vne ialousie & vne emulation, comme fait Nestor, lequel en racontant ses prouesses & vaillances encouragea Patroclus, & les autres neuf cheualiers à entreprendre le combat d'homme à homme contre Hector: car l'exhortation, qui a la parole de l'œuvre quand-&-quand, & l'exemple avec la peinture d'emulation, est viue, & aiguillonne merueilleusement: & avec le courage & l'affection apportel'esperance de pouuoir venir à bout, comme de chose qui n'est pas impossible: & pource des trois danses qui estoient en Lacedemone celles des vieillards disoit,

*Iliad. liu. 7.
& 11.*

Nous auons esté iadis
Jeunes, vaillans & hardis.

celle des enfans,

Et nous vn iour le serons

B Et tous vous surpasserons.

& celle des ieunes hommes,

Nous le sommes à l'espreuue,

Qui voudra, vienne, & l'espreuue.

En quoy fait sagement & en homme bien entendu au faict de gouuernemēt, le Legislatteur qui les institua, de proposer aux ieunes gens des exemples familiers, & pres d'eux, par ceux mesmes qui les auoient executez: ce neantmoins encore n'est-il pas mauuais aucunesfois de se vanter, & hautainement & magnifiquement parler de soy-mesme, pour estonner & reprimer vn petit, ou bien pour raualler & tenir bas vn braue audacieux, comme fait le mesme Nestor en vn autre endroit,

J'ay en mes iours hanté des personages,
Qui valoient mieux en faicts & en langages
Que vous, desquels estimé mal-appris

Iliad. liu. 11.

C Je ne fus oncq, ny tenu en mespris.

Ainsi parla aussi Aristote à Alexandre, disant qu'il estoit loisible & bien seant d'auoir le cœur haut, non seulement à ceux qui tenoient beaucoup d'hommes subiects à leur puissance: mais aussi à ceux qui auoient telle créace qu'il falloit auoir des Dieux. Et sont ces façons-là de parler vtils quelquefois à l'encōtre des ennemis & des malvueillans.

Ceux que mon bras en bataille rencontre,
Sont arriuez à mal-heureuse encontre.

Iliad. liu. 8.

» Et Agésilas parlant du Roy de Perse que lon nommoit le grand Roy: En quoy, dit-il,
» est-il plus grand que moy, si n'est plus iuste? Et Epaminondas repliqua aux Lacedemoniens, qui accusoient avec beaucoup de paroles les Thebains: Au moins, dit-il,
» vous auons nous guarý du peu parler. Mais quant à ces façons-là de dire, elles s'adressent à des ennemis publiques, ou particuliers mal-vueillans: & quant aux amis

D & à ceux qui sont des nostres, on peut bien aussi en vsant à propos, en temps & lieu, de hautain langage, non seulement applattir & abbaïsser ceux qui sont trop superbes & trop braues: mais aussi au contraire esleuer & exciter ceux qui sont estonnez, effroyez & espouuantez. Car Cyrus au milieu des armes & des dangers de la guerre, parloit hautainement, & ailleurs non: & Antigonus, qui au demourant estoit sobre en paroles, & modeste, en la bataille nauale qu'il donna pres l'Isle de Co, comme l'un de ceux qui estoient autour de luy, vn peu auant la meslee, luy dist, Sire ne vois-tu pas que les vaisseaux des ennemis sont en beaucoup plus grand nombre que les tiens? Mais moy, dit-il, pour combien de vaisseaux me comptes-tu? Et semble qu'Homere ait bien entendu cela: car il fait qu'Ulysses voyant ses gens effroyez du bruit & de la tourmente qui sortoit du gouffre de Charybdis, leur ramene en memoire la subtilité de son engin, & sa vaillance, en leur disant,

A iij

Comment on se peult louer soy-mesme,

Odyss. l. 12.

Ce mal icy n'est point si dangereux
Qu'estoit celuy, quand le Cyclops hereux
Nous tournoyot de force merueilleuse
Tout à l'entour de sa cauerne creuse,
Et toutefois ie vous en ay mis hors
Par ma prouesse & mes conseils accors.

E

car ceste façon de louange n'est point d'un aduocat flatant, ny d'un sophiste se vantant, ne qui demande un applaudissement ny battement de mains, mais d'un personnage qui baille à ses amis pour gage de s'asseurer sur luy, sa vertu & sa suffisance: car c'est chose de grande importance pour le salut, en temps dangereux, que la reputation la & fiance que lon a d'un homme qui a l'autorité & la suffisance de bon Capitaine. Or auons nous desia par cy deuant deduit, que ce n'est point chose conuenable ne bien seante à homme d'estat & d'honneur, que de s'opposer à la gloire & à la louange d'autrui: toutefois là où vne faulx & peruerse louage porteroit nuyssance & dommage, en apportant emulation de mal-faire, & vne mauuaise volonté & intention en choses de grande conséquence, il ne seroit pas inutile de repousser arriere, ou plus tost de diuertir l'auditeur à choses meilleures, en luy faisant voir la difference. Car on se contenteroit bien à mon aduis de voir que les hommes s'absteinsent volontairement du vice, quand ils le verroient blasmé & vituperé: mais si au lieu de le vituperer on le voyoit louer, & si outre le plaisir & le profit qu'il apporte communément quand & soy, on y adioustoit encore le tenir en honneur & en reputation, il n'y auroit si forte ne si heureuse nature, de laquelle il ne vint au dessus. Et pourtant fault-il que l'homme de bien & de gouvernement face la guerre non aux louanges des hommes, mais aux louanges des choses, si ainsi est qu'elles soient mauuaises: car ce sont celles qui corrompent les mœurs, pour ce que avec telles louanges entre la volonté de imiter & ensuyure telles actions deshonestes, comme si elles estoient belles & honestes: mais on les aduere pour telles qu'elles sont, quand on les met au parangon vis à vis des honestes & veritables louanges. On dit que Theodorus le ioueur de Tragédies dit un iour à Satyrus ioueur de Comédies, que ce n'estoit pas grande merueille de faire rire les spectateurs, mais bien de les faire pleurer & crier: aussi pourroit un sage philosophe dire à ce mesme Theodorus, Mais au contraire ce n'est pas chose grande ne digne, de faire pleurer ny crier les spectateurs, mais bien de leur oster toute occasion de se douloir & de pleurer: car celuy qui se loue en ceste sorte, profite à l'auditeur, & luy change son iugement, ainsi comme feit Zenon parlant du grand nombre des auditeurs de Theophraste: Sa danse, dit il, est plus grande que la mienne, mais la mienne est mieux accordee. Et Phocion, comme Leosthenes eust encore la vogue, estant interrogué par les harengueurs, Quel bien il auoit iamais fait à la Republique: il leur respōdit, Non autre, dit-il, sinon que ce pendant que i'ay esté gouuerneur & capitaine, iamais vous autres messieurs n'avez fait aucune oraïson funebre, ains avez enterré tous vos citoyens qui sont morts, és sepultures de leurs ancestres. Et Crates escriuit & opposa fort gentilmente à ces vers de la sepulture de Sardanapalus,

Demouré m'est seulement ce que i'ay
Paillardé, beu, yurongné, & mangé.
Demouré m'est seulement ce que i'ay
En mon viuant appris, sceu, & iugé
Des beaux secrets des Muses que i'aimoye.

Car ceste maniere de louanges est belle, honeste & vtile, enseignāt à aimer & estimer les choses qui sont vtils & profitables, non pas celles qui sont vaines & superflues: parquoy cest aduertissement soit ioinct aux autres, sur le subiect de la question proposée

pōsee

A posée. Mais il reste maintenant à dire, ainsi que la suite du propos le requiert & nous en admoneste, comment chacun pourra éviter la fâcherie de se louer importunément soy-mesme : car le parler de soy sortant d'une si forte garnison, que l'amour de soy-mesme, aduient bien souvent à ceux mesmes qui sont les plus modestes & plus éloignés de vaine gloire. Et tout ainsi que l'un des preceptes de santé est, fuir & éviter totalement les lieux mal-salubres & maladiés, ou pour le moins prendre plus soigneusement garde à soy quand on y est : aussi y a-il certains temps, & certains propos fort glissants, esquels on se laisse facilement couler à parler de soy, à la moindre occasion du monde. Premièrement ceux qui de nature sont ambitieux, quand ils oyent louer autrui, communément s'avancent à parler d'eux mesmes, & leur prend un appetit de gloire, & un esclancement qu'ils ne peuvent retenir, leur chatouillant & grattât une demangeaison qu'ils ont de se louer, mesmement si celui que lon loue devant eux, se rencontre ou égal en mérite, ou inférieur à eux : car ainsi comme

B ceux qui ont faim sont encore plus irrités, & leur appetit d'avantage prouoqué, quand ils en voyent d'autres manger devant eux, aussi la louange d'autrui enflamme de jalousie ceux qui sont subiects à la convoitise d'honneur & de gloire. Secondement, le récit des choses que lon a heureusement & à souhait exécutées, pousse ordinairement ceux qui les racontent, en des vanteries & braveries pour la ioye qu'ils en ont : car depuis qu'ils sont une fois tombez en propos des victoires qu'ils ont eues à la guerre, ou des entreprises qu'ils ont heureusement conduites à chef en matière de gouvernement, ou des discours qui leur ont bien succédé, ils ne se peuvent contenir ny moderer : à laquelle manière de parler de soy-mesme on voit principalement estre subiects les gens de guerre & gens de marine, plus qu'autres : & aduient aussi cela coustumièrement à ceux qui reviennent de la court des grands Princes, ou des lieux où il s'est fait quelques grâds exploits & affaires. Car en faisant mention des Princes & grands Seigneurs, ils y entrelassent ordinairement quelques paroles qu'ils

C auront dites à leur avantage, & ne cuydent pas se louer eux-mesmes en disant cela, ains seulement reciter les louanges que d'autres auront dites d'eux : & y en a qui pensent que les escoutans ne s'en apperçoivent point, quand ils racontent les embrassements, recueils, & les caresses que les Roys, les Empereurs, & tels grands personnages leur ont faicts, comme s'ils ne recitoient par leurs propres louanges d'eux, mais les courtoisies & demonstrations de la bonté & humanité des autres : & pourtant faut-il bien attentivement prendre garde à soy, quand on loue quelqu'un que les louanges qu'on luy donne soient pures & nettes, sans aucune suspicion de s'aimer obliquement, & parler de soy-mesme, à fin qu'il ne semble point que nous louons, comme dit Homere,

Patroclus sous couleur & couverture,

Iliad. l. 10.

mais que nous entendons nous louer nous mesmes à traver luy. Qui plus est, les

D blasmes mesmes & les reprehensions sont quelques fois bien dangereuses à faire chopper & desuoyer ceux qui se deulent un petit de la vaine gloire : en laquelle maladie encourent souvent les vieilles gens, quand ils se mettent à reprendre les autres & à blâmer les mauvaises façons de faire, & les fautes d'autrui, en se magnifiant eux-mesmes, comme aians esté admirables en l'opposite de ce dont ils accusent les autres : toutefois à ceux-là le peut on concéder, mesmement s'ils ont avec l'age la reputation de longue main acquise de gens de bien & d'honneur : car ce n'est pas chose inutile, ains qui donne grande emulation & enuie d'acquérir pareils honneurs à ceux qui sont ainsi châtiés par eux : mais tous autres se doiuent bien garder, & craindre ce desournement-là : car étant de soy-mesme autrement fâcheux & presque intolérable le blâmer autrui, & où lon doit estre bien réservé & retenu, celui qui mesle sa louange propre avec le blâme d'autrui, & qui va chercher gloire en l'infamie d'autrui

Comment on se peut louer soy-mesme

est odieux infiniment, & totalement importun & insupportable, voulant estre hon- E
noré de ce qu'il deshonnore les autres. D'auantage comme ceux qui sont de nature
prompts & enclins à rire, doiuent fort euitier & fuir les chatouillemens & frottemens
legers par deffous les aixelles, & autres telles parties du corps tendres & lissees, les-
quelles se laissant aller, & se fondant à tels attouchemens, esmeuent & excitent
quand-&-quand la passion risible: aussi peult-on donner cest aduertissement à ceux
qui se laissent trop passionneement emporter à la conuoitise de gloire, de s'abstenir
de se louer eux-mesmes, quand autres les loueront. Car il faut que celuy qui se sent
louër, rougisse de honte, non pas effronteement l'escouter, & qu'il reprenne ceux
qui disent quelque grand' chose d'eux, non pas qu'il le reprenne d'en auoir trop peu
dit: ce que plusieurs font, qui suggerent eux-mesmes & entassent d'autres faicts ma-
gnanimes, & prouësses qu'ils auront faites, iusques à ce qu'ils gastent & la louange
qu'ils se donnent eux-mesmes, & celle que leur donnent les autres. Or y en a-il qui se
flatans eux-mesmes, se chatouillent & s'emplissent de vent, les autres malignement F
leur proposant quelque petite louange, comme vn appast pour les amorser, les atti-
rent à les faire parler d'eux-mesmes, les autres les interroguent & leur font des deman-
des, pour plus auant les faire entrer és filets, & auoir plus de matiere de rire: comme le
soldat glorieux en vne Comædie de Menander,

Seigneur comment eustes-vous ce coup-là?

L E S O L D A T.

D'un iauelot. Pour Dieu comment cela?

Sur vne eschelle en montant à mont contre

Vne muraille. Or le coup ie leur monstre

Quand est de moy à mon meilleur esciant:

Mais eux de moy se mocquoient en riant.

En toutes ces sortes-là doncques se faut-il bien donner garde le plus que lon peut, &
de sortir hors des bornes avec les louanges, & de se laisser aller aux interrogatoires: G
& pour s'en mieux retenir & donner de garde, le meilleur moyen est d'observer de
pres ceux qui se louent eux-mesmes, en se representant & ramenant en memoire,
comme c'est chose fascheuse & desplaisante à tout le monde: & comme il n'y a pro-
pos qui soit plus odieux, ne plus moleste à ouyr: car sans que nous puissions dire
quel autre mal nous fait celuy qui se louë soy-mesme, nous faisons tout ce que nous
pouuons pour nous en despestrer, & respirer arriere à nostre aise, comme estant vn
fardeau, qui de soy & de sa nature charge par trop: tellement qu'il est intolerable &
insupportable mesme à vn flateur, & vn poursuuiuant de repeuës franches, voire
aiant necessité: & disent qu'ils payent bien cherement leur escot, quand il leur fault
auoir la patience d'ouyr vn riche, ou prince, ou gouuerneur, ou Roy, qui qu'il soit,
qui se louë luy-mesme: comme le bouffon qui dit en Menander,

Il m'emmaigrit à la table, il m'assomme,

Quand il me faut endurer d'ouyr comme

A la soldate il rencontre aigument

Le franc archer malheureux garniment.


H

Car veu que cela ne se dit pas seulement contre les soldats, & contre les glorieux de
nouveau enrichis, qui ont accoustumé de faire de beaux contes bien dorez, mais
aussi contre les philosophes, les sophistes & rhetoriciens, & les capitaines enflés de
presumption, & parlans d'eux-mesmes hautainement: si nous nous voulons souue-
nir, que les propres louanges que l'homme se donne, sont tousiours accompagnees
du blasme & vitupere que les autres luy en donnent, & que la fin de ceste vaine gloi-
re est communément honte & infamie, & que fascher ceux qui les escoutent, com-
me dit Demosthene, leur en demeure, & non pas estre tenus ny reputez pour tels
qu'ils

A qu'ils se disent, nous nous garderons bien de parler de nous mesmes, si ce n'est qu'un grand profit en doive aduenir, ou à nous ou à ceux qui nous escoutent.

Quelles passions & maladies sont les pires, celles DE L'AME, OV CELLES DV CORPS.

C'est vn commencement de Declamation toute imparfaite.

B  O M E R E aiant consideré les diuers genres des animaux mortels, & les aiant comparez les vns aux autres, tant en la duree qu'en l'entretènement de leurs vies, a exlamé qu'il n'y en auoit pas vn si miserable que l'homme, de tous ceulx

Iliad, liu. 17.

Qui sur la terre ou marchent ou respirent, adiugeant vne malheureuse principaulté à l'homme, qu'il n'y en a point qui le passe en superiorité de tous maux. Mais nous supposans que l'homme ait desia emporté la victoire de misere, & soit déclaré le plus calamiteux de tous les autres animaux, le voulons comparer à soy-mesme, en collation de ses propres maux, les diuisans en ame & en corps, non point en vain, sans aucun fruit, ains fort pertinemment, à fin que nous sçachions, si c'est par nostre ame, ou par nostre corps, que nous viuons plus miserablemēt: car la maladie s'engendre en nostre corps par la nature, & le vice & la meschanceté en l'ame est premierement action, & puis apres deuient passion: si n'est pas petite consolation de sçauoir, que ce qui est le pire est curable, & le plus leger ce que lon ne peult fuir. Or le regnard d'Æsopé plaidant à l'encontre du leopard touchât la varieté de leur peau, apres que le leopard eut monstré la sienne, qui à l'œil estoit bien mouchetee & tauelee de belles marques,

» là où celle du regnard auoit vn roux sale & mal-plaisant à veoir: Voyre-mais, dit il,

» Sire iuge, si tu regardes le dedans, tu me trouueras mieulx taelé & mieulx mouchet-

» té que ce leopard icy. voulant entendre sa ruse & finesse de se tourner en diuerses sortes selon le besoing. Disons doncques aussi en nous mesmes: O homme, ton corps produit bien plusieurs maladies & plusieurs passions par nature de soy-mesme, & plusieurs en reçoit aussi qui luy aduiennent de dehors: mais si tu ouures le dedans de toy, tu y trouueras vn amas & vne conserue, comme dit Democritus, de plusieurs biens diuers, & differents maux, lesquels n'y font point coulez de dehors, ains y ont leurs sources originaires, faillantes de la mesme terre, lesquelles le vice, qui est abondant & riche de passions, pousse en auant: & d'autant que les maladies qui sont au corps & en la chair, se cognoissent par les inflammations, & par la couleur, quand

D le visage rougit ou pallit plus que de coustume, vne chaleur extraordinaire, vne lassitude sans cause apparente les descouure: mais celles de l'ame trompent bien souuent ceulx mesmes qui les ont, lesquels ne pensent pas que ce soient maladies: & d'autant sont elles pires, qu'elles ostent aux patients le sentiment de leur mal: car le discours de la raison, quand il est sain, sent les maladies du corps: mais es maladies de l'ame, luy mesme estant malade, n'y a point de iugement de ce qu'il souffre: car cela mesme qui doit iuger souffre, & faut estimer que la premiere & principale maladie de l'ame, c'est la folle, pour raison de laquelle le vice est irremediable & incurable en plusieurs, avec lesquels il habite, il vit, & meurt: car le commencement de la guarison d'une maladie, c'est le sentiment qui conduit le patient à chercher ce qui le peult secourir, mais celuy qui pour ne croire point qu'il soit malade, ne cognoist pas ce dont il a besoing, encore que ce qui le peult guarir se presente à luy, il le refuse: car mesme entre

Quelles passions & maladies sont les pires,

les maladies corporelles, celles-là sont les pires qui prennent avec priuation de sentiment, comme vn subet ou lethargie, vne phrenesie vne epilepsie ou hault mal, vne apoplexie, les fiéures ardentes, qui augmentent l'inflammation, iusques à mettre l'homme en resuerie, & luy faire perdre l'entendement, en luy troublant le sens, comme d'un instrument de musique,

Touchant du cœur les chordes plus cachees,

Qui ne deuroient pour rien estre touchees.

Voyla pourquoy les medecins veulent & souhaitent en premier lieu, que l'homme ne soit iamais malade, ou s'il l'est, au moins qu'il n'ignore pas qu'il soit malade, ains sente bien son mal: ce qui aduient presque ordinairement à toutes les maladies de l'ame: car ny ceulx qui sont fols & esuentez, ne ceulx qui sont dissolus & desordonnez, ne ceulx qui sont iniustes, ne pensent pas pecher ny faillir, ains y en a quelques vns mesmes qui pensent bien faire. Il n'y eut iamais homme qui estimast que la fiéure fust santé, ny l'estre phthisique fust estre bien dispos, ny que la goutte aux pieds fust estre bien eniambé, ny que pallir fust rougir: là où ils appellent la cholere vaillance, l'amour amitié, l'enuie emulation, couardise prudence. Et puis ceux-là appellent les medecins quand ils se sentent malades, car ils sentent bien de quoy ils ont besoing: mais ceux-cy fuyent les sages & sçauans, pource qu'ils cuident bien faire en ce qu'ils font mal. Par ceste mesme raison là nous disons que l'Ophthalmie, c'est à dire le mal des yeux, est moindre maladie que la Manie, qui est la rage & fureur, & la Podagre, qui est la goutte aux pieds, que la Phrenesie, qui est vne apostume dedans le cerueau: car celuy-là sent son mal, & criant enuoye querir le medecin: venu qu'il est, il luy montre son œil, il baille sa vene à ouurir, sa teste à entamer: là où nous oyons Agaués Tragœdies, si transportee hors de son bon sens par sa rage & Manie qui la tiét, qu'elle descognoist les personnes qui luy sont les plus cheres, en disant,

Euripide
en la Tragœ-
die des Bac-
chantes.

Ce ieune fan que nous venons

De massacrer, nous amenons

De la montagne en ceste place:

Heureuse en a esté la chasse.

G

Car celuy qui est malade de corps se rend incontinent, se couche dedans le liét, & endure patiemment que lon le medecine, & que lon le pense: & si d'adventure il s'est tourmenté & demené en son liét, de maniere qu'un peu d'emotion luy en soit venue, le premier des assistans qui l'aduertira, & luy dira doucement,

Demeure quoy dedans ton liét pauvre homme,

il l'arreste & le retient: mais à l'opposite ceulx qui sont surpris des passions de l'ame, c'est lors que plus ils trauaillét, c'est lors que moins ils reposent: car les essans & emotions sont les causes mouuantes & principes des actions, & les passions sont vehemens de telles motions. Voyla pourquoy elles ne laissent point reposer l'ame, ains lors que plus l'homme auroit besoing de patiëce, de silence, de retraite en soy mesme, c'est lors que plus elles le tirent au dehors en lumiere, c'est lors que plus se descouurent les choleres, les opiniaistretes, les amours, & les ennuys, le contraignans de faire plusieurs choses contre les loix, & d'en dire plusieurs mal conuenables au temps. Tout ainsi donc comme plus dangereuse est la tourmente qui empesche la nauire de surgir & prendre port, que celle qui ne permet pas sortir du port, & faire voile: aussi les tourmentes de l'ame sont les pires, qui ne permettent point à l'homme de se recueillir, ny de rasseoir le discours de sa raison, qui est troublé, & renuersé sans dessus dessous, sans pilote & sans chable, ny amare en tourmente, errans sans guide çà & là, & qui est emporté malgré luy en courtes temeraires & mortelles, tant qu'à la fin il sen va tomber en quelque effroyable naufrage, là où il brise sa vie: tellement que pour ces raisons & autres semblables, ie conclus qu'il est pire d'estre malade de l'ame, que

que

- A que non pas du corps: car les corps malades ne font que souffrir seulement, mais les ames souffrent mal & en font tout ensemble. Quel besoing doncques est-il d'alleguer pour exemple les autres passions, veu que l'occasion du temps qui se presente maintenant, nous en refreschit la memoire? Voyez-vous toute ceste foule de peuple, qui se pousse & se presse à l'entour de la tribune & par toute la place? ne font-ils pas tous venus en ce lieu pour sacrifier ensemble aux Dieux tutelaires, protecteurs de ce pais, & pour participer en commun à mesmes religions & mesmes sainctes ceremonies? ne sont-ils pas venus pour faire ensemble offrande à Iupiter Ascreien des primices de leurs fruiets & pour solenniser à l'honneur de Bacchus, durant les sainctes nuités sa feste eniuee en danſes & mommeries accoustumees? Et neantmoins comme par accès & retours anniuersaires, la force de la maladie venant à aigrir & à irriter l'Asie, ils viennent icy à s'entre-choquer en des plaids & procez ordinaires: & y a vn monde d'affaires, comme plusieurs torrens qui confluent ensemble tout à vn coup sur vne
- B mesme place, qui est enſlee & grouillante d'une multitude infinie de gens, se perdans eux-mesmes & les autres. De quelles fieures ou frissons procedent tels effectés? de quelles tensions ou remissions, augmentations ou diminutions, ou intemperature de chaleur, de quelles superfusions d'humeur viennent-ils? Si vous interrogez chacune cause, comme si c'estoient des hommes, d'où elles procedent, dont elles viennent, vous trouuerez que l'une est engendree par vne cholere superbe, l'autre par vne furieuse opiniaſtrete, l'autre par vne iniuste cupidité.

Les preceptes de Mariage.

C PLVTARQVE A POLLIANVS ET A EVRYDICE S.



- PRES la cerimonie de mariage vſitee en ce pais, que la presbtreſſe de Ceres vous a appliquee, en vous enfermant ensemble, il m'eſt aduis que le discours qui viendroit à ſeconder & fauoriſer ceste voſtre conionction, en vous inſtruiſant de bons enſeignements & ſages aduertissemets nuptiaux, ne vous ſeroit point inutile, & ſe trouueroit bien conforme à la couſtume & cerimonie que lon obſerue aux nopces en ce pais. Les Muſiciens entre leurs chanſons qu'ils chantent avec les haubois, en ont vne ſorte qu'ils appellent Hippothoros, qui vault autant à dire comme, Saille-iuments, aians opinion que cela eſt vn aiguillon qui incite les cheuaux à ſaillir les iuments. Mais
- D la philosophie aiant pluſieurs beaux & bons discours, en a vn qui fait autant à eſtimer que nul autre, par lequel inſtruiſant & enchantant ceux qui conuiennent en vn lien pour vſer tous les iours de leur vie enſemble, elle les rend plus ſouples, plus gracieux & plus traittables l'un à l'autre. Parquoy ie vous ay fait vn recueil de preceptes & aduertissemets que vous auez ſouuēt eſſayez, aians tous deux eſté nourris en l'eſtude de la philosophie, & les ay reduits à certains articles en peu de paroles, à fin qu'ils en ſoient plus aiſez à retenir, dont ie vous fais vn preſent à tous deux: en priant aux Muſes, qu'elles veuillent aſſiſter & accompagner en voſtre endroit la deeſſe Venus, pour ce que ce n'eſt pas moins leur office de mettre bon accord & bonne conſonance en vn mariage, par le moyen du discours de la raiſon & l'harmonie de la philosophie, que de bien accorder vne cithre ou vne lyre. C'eſt pourquoy les anciens ont voulu que l'image de Venus fuſt colloquee ſoignant celle de Mercure, comme voulans par là

Les preceptes de mariage.

donner à entendre, que le plaisir de mariage auoit befoin de l'entretien d'une bonne E & sage parole : encore mettoient-ils avec ces deux images-là, celles des Graces & de la deesse d'éloquence Suadele, à fin que les conioincts par mariage eussent gracieusement ce qu'ils voudroient l'un de l'autre, non pas en hargnant & noiant l'un contre l'autre.

Solon vouloit que la nouvelle mariee mangeast de la chair de coing premier que de se coucher auprès de son mary : signifiant, à mon aduis, par ceste cerimonie, qu'il faut premierement que la grace de la bouche, c'est à dire l'haleine, & la parole, soit douce, plaisante & agreable.

Au païs de la Bœoce la coustume est, que le iour des nopces, quand on met le voile nuptial à l'espousee, on luy met aussi sur la teste un chapeau du ramage d'asperge sauage, pour ce que celle plante d'une trespoignante espine produit un tres-doux fruit : aussi la mariee, prouueu que le mary ne s'ennuye, & ne se rebute point pour la difficulté & fascherie qu'il y a aux premieres approches de mariage, luy apportera F puis apres une tres-douce & tres-amiable compagnie : mais ceux qui ne peuvent supporter les premieres hargnes & riottes des filles, ressemblent proprement à ceux qui quitteroient la grappe de raisin à un autre, pour autant qu'ils l'auroient veüe qu'elle n'estoit que verius. Et plusieurs nouvelles mariees qui prennent à dédaing leurs marits, à cause des premieres rencontres, font tout ne plus ne moins que celuy, qui aiant ja reçu la picqueure de l'abeille, en iette par despit la goffre du miel qu'il tenoit en sa main. Parquoy il fault que ceux qui sont conioincts ensemble par mariage, aient soigneusement l'œil à eiter du commencement toutes occasions de discord & de dissension, considerans que les pieces de bois qui sont assemblees & collees freschement ensemble, se desioignent & desvissent facilement, & pour la moindre occasion du monde : mais au contraire, quand les iointures sont bien soudees & asseurees par long traict de temps, à peine les peut-on plus desioindre ne separer avec le feu ny avec le fer. G

Tout ainsi comme le feu se prend aisément à de la balle & au poil de lieure, mais aussi s'estaint-il encore plus tost, si lon n'y met soudainement quelque matiere propre à le nourrir & entretenir : aussi faut-il estimer que l'amour des nouveaux mariez qui n'est allumé que de la chaleur de ieunesse & de la beauté du corps seulement, n'est pas ferme ne durable, si n'est fondé en conformité de bonnes & honestes mœurs, & qu'il ne tiene de la prudence, engendrant une viue affection reciproque de l'un enuers l'autre.

La pescherie que lon fait de poisson avec des appasts empoisonnez est bien soudaine à prendre, & propre à arrester le poisson, mais elle le rend mauuais & dangereux à manger : aussi les femmes qui cōposent certains bruuages d'amour, ou quelques autres charmes & forcelleries pour donner à leurs marits, & qui les attrayent ainsi par allechemens de volupté, il est force qu'elles vivent puis apres avec eux insensés, estourdis, & transportez hors de leur bon sens. Ceux que l'enchanteresse Circé auoit en- H forcellez, estans deuenus pourceaux & asnes, ne luy pouuoient plus donner de plaisir ny de rien seruir, là où elle aimoit extrêmement Ulysses qui estoit sage, & se portoit en homme de bon entendement enuers elle. Mais celles qui aiment mieux estre maistresses de leurs marits insensés, que leur obeir estans sages, ressemblent proprement à ceux qui aimēt mieulx couduire & mener des aueugles par chemin, que suyure des voyās & qui sçauēt bien le chemin. Elles ne veulent pas croire que iamais la Roynie Pasiphaë ait aimé un taureau, aiant un Roy pour mary, & neantmoins elles en voyent aucunes qui se faschent de leurs marits, lesquels sont personnes honestes & graues, & sont plus aises d'estre avec d'autres qui sont tous composez de luxure, de dissolution & d'ordure, comme chiens ou boucs.

Il y a des hommes si foibles ou si mal-adroits, qu'ils ne peuvent pas monter dessus leurs

A leurs cheuaux estans debout, & pource leur enseignent-ils à se mettre à genoux & à se baisser: aussi se treuve-il des marits, qui aians espousé des femmes riches & de nobles maisons, n'estudient pas à se rendre eulx plus honnestes & meilleurs, ains à rabaisser leurs femmes, se persuadans qu'ils en viendront mieux à bout, quand ils les auront abaissées & rauallées: là où il faut entretenir, comme la iuste hauteur du cheual, aussi la dignité de la femme, & en l'une & l'autre sçauoir bien vser de la bride, qui est la raison, comme il appartient.

Nous voyons que la Lune plus elle est esloignée du Soleil, plus elle est claire, & plus elle se monstre, & qu'au contraire elle a moins de lumiere & se cache tant plus elle s'en approche: mais il faut que la femme sage face tout le contraire, qu'elle se face voir aupres de son mary, & qu'elle se tiene close, & garde la maison, quand son mary n'y est pas.

Herodote n'a pas bien dit, que la femme despouille la honte avec la chemise: car **B** au contraire celle qui est honneste, en despouillant sa chemise se vest de honte: & est le plus certain signe que lon sçauroit auoir, que les conioincts par mariage s'entraiment bien reciproquement, quand plus ils se portent de reuerence l'un à l'autre.

Ainsi comme si lon prend deux sons qui soient d'accord, lon entend tousiours plus celuy du bas: aussi en vne maison bien reglée & bien ordonnée tout se fait bien du consentement des deux parties, mais il apparoit tousiours que c'est de la conduite, du conseil, & de l'inuention du mary.

Le Soleil, ce disent les fables, surmonta le vent de bise: car tant plus qu'il s'efforçoit d'oster par force la robbe à l'homme, & que pour ce faire il souffloit plus violement, d'autant plus l'homme se ferroit, & restrainoit son habillement: mais quand le Soleil vint à estre chaud apres le vent, l'homme se sentant eschauffé, despouilla sa robbe, & puis apres brullant de chaud, il osta son saye & tout. La plus part des femmes en fait tout de mesme: car quand elles voyét que leurs marits leur veulent oster d'autorité & par force les delices & la superfluité, elles combattent à l'encontre, & en sont marries: & au contraire s'ils leur remōstrent avec la raison, elles les ostent d'elles mesmes tout paisiblement, & le supportent patiemment.

Caton priua vn Sénateur Romain de la dignité Senatoriale, d'autāt qu'en presence de sa fille il auoit baissé sa femme: cela fut bien vn peu trop violent: mais s'il est laid, comme il est, de s'entre-baiser, embrasser & accoller en presence d'autres, comment n'est-il encore plus laid & plus deshoneste, s'entre-iniurier & s'entre-tāser l'un l'autre? Il faut que les ieux & caresses du mary à sa femme se fassent à part en secret, & les aduertissements & remontrances en veüe & à descouuert?

Comme vn miroir, pour estre bien doré & enrichy de pierres precieuses, ne sert de rien s'il ne represente bien au vis la face de celuy qui se mire dedans: aussi ne plaist point vne femme pour auoir beaucoup de biens, si elle ne rend sa vie semblable, ses **D** mœurs & conditions conformes à celles de son mary. Si le miroir fait vn visage triste & morne à vn qui est ioyeux & gay, ou au contraire riant & enioüé à vne personne qui est melancholique ou marrie, il est faulx, & ne vaut rien: aussi est vne femme mauuaise & importune, qui fait de la renfrongnee quand son mary a enuie de se iouer à elle, & de la caresser: ou à l'opposite qui veut rire & iouer alors qu'elle void son mary en affaire, & bien empesché: car l'un est signe qu'elle est fascheuse, l'autre qu'elle mesprise les affections de son mary: là où il fault, ainsi que disent les Geometriens, que les lignes & les superficies ne se meuuent point par elles, mais au mouuement des corps: aussi que la femme n'ait nulle propre & peculiere passion ou affection à elle, ains qu'elle participe aux ieux, aux affaires, aux pensements, & aux ris de son mary.

Ceux qui ne prennent pas plaisir de voir leurs femmes boire & manger librement

Les preceptes de mariage.

en leur presence, leur enseignent à se saouler goulüement à part, quand elles sont E
seules : aussi ceux qui ne s'esjouissent pas gayement avec leurs femmes, & ne se iouent
& ne rient pas priuement avec elles, leur enseignent de chercher leurs plaisirs & vo-
luptez à part.

Les Roys de Perse quand ils souppent ou mangent à leur ordinaire, ont leurs fem-
mes espoufées assises aupres d'eux à la table: mais quand ils veulent iouër & boire d'au-
tant iusques à s'enyrer, ils renuoyent leurs femmes en leurs chambres, & font venir
leurs concubines, & leurs chanteresses & baladines : & font bien en cela, qu'ils ne veu-
lent point que leurs femmes legitimes voyent ne participent en rien de leurs yuron-
gneries, & de leurs dissolutions. S'il aduient doncques qu'un homme priué subiect à
son plaisir, & mal-conditionné commette quelque faute avec vne siéne amie ou avec
vne chambriere, il ne faut pas que sa femme pour cela se courrouce, ne qu'elle s'en
tourmente: mais plus tost qu'elle estime, que c'est pour la reuerence qu'il luy porte,
qu'il ne veult pas qu'elle soit participante de son yurongnerie, de son orde luxure & F
intemperance qu'il commet avec un autre.

Quand les Roys aiment la musique, ils font cause que de leur regne il se fait plu-
sieurs bons Musiciens: semblablement ceux qui aiment les lettres, font plusieurs
hommes lettrez, ceux qui aiment les exercices de la personne, rendent plusieurs de
leurs subiets bien adroits & dispos: Aussi un mary qui n'aime que le corps, fait que sa
femme n'a autre soing que de se farder: qui aime la volupté, fait qu'elle tient de la
courtisane, & deuiet lubricque & lasciuue: & quand il aime l'honneur & la vertu, il la
rend sage, vertueuse & honneste.

Vne ieune garçe Laconiene respondit à quelqu'un qui luy demandoit, si elle auoit
ja esté au mary: Non pas moy à luy, mais bien luy à moy. C'est, à mon aduis, la ma-
niere comme se doit comporter vne femme honneste enuers son mary, de ne reietter
ny ne desdaigner point les ieux & caresses d'amour, quand son mary les commence,
ny aussi ne les commencer point: pource que l'un tient de la courtisane effrontee, G
l'autre sent sa femme superbe, & qui n'a point de grace ny d'amour.

Il ne faut point que la femme face d'amis particuliers, mais bien qu'elle estime
communs ceux de son mary. Or les Dieux sont les premiers & les plus grands amis
que puisse auoir l'homme: pource faut-il qu'elle serue & adore ceux que son mary re-
pute Dieux seulement, sans en recognoistre d'autres: & au demourant qu'elle ferme
sa porte à toutes curieuses inuentions nouuelles de religions, & toutes estrangeres
superstitions: car à nul des Dieux ne peuuet estre agreables les seruices & sacrifices que
la femme fait à la dérobee, au desçeu de son mary.

Platon escrit que la cité est bienheureuse, & bien ordonnee, là où lon n'entend
point dire, Cela est mien, cela n'est pas mien: pour ce que les habitans y ont toutes
choses, mesmement celles qui sont de quelque importance, communes entre eux au-
tant comme il est possible: mais ces paroles-là doiuent bien encore plus estre bannies H
hors du mariage, sinon entant que comme les medecins tiennent que les coups qui
se donnent en la partie gauche se sentent en la droite, aussi la femme doit ressentir
par compassion les maux de son mary, & le mary encore plus ceux de sa femme, à
fin que comme les nœuds prennent leur force de ce que les bouts s'entrelassent l'un
dedans l'autre, aussi la société de mariage s'entretiene & se fortifie quand l'une & l'autre
des parties y apportera affection de bienveillance mutuelle: car la nature mes-
me nous melle par nos corps, à fin que prenant partie de l'un & partie de l'autre, &
mellant le tout ensemble, elle rende ce qui en prouient commun à tous deux: de
maniere que ny l'une ny l'autre des parties n'y puisse discerner ne distinguer ce qui
est propre à elle, ne ce qui est à autrui. Ceste communauté de biens mesme-
ment doit estre principalement entre ceux qui sont conioincts par mariage, qui
doiuent

A doiuent auoir mis en commun & incorporé tout leur auoir en vne substance: de forte qu'ils n'en reputent point vne partie estre propre à eux, & vne autre à autrui, ains le tout propre à eux, & rien à autrui. Comme en vne coupe où il y aura plus d'eau que de vin, nous l'appellons vin neantmoins: aussi le bien doit tousiours, & la maison estre nommée du nom du mary, encore que la femme en ait apporté la plus grande partie.

Helene estoit auaricieuse, & Paris luxurieux: au contraire, Vlysses estoit prudent, & Penelopé chaste: pourtant le mariage de ceux-cy fut heureux, & celui de ceux-là remplit les Grecs & les Barbares d'une Iliade, c'est à dire, d'une infinité de maux & de calamitez.

Vn gentilhomme Romain aiant espousé vne belle, riche, & honneste ieune Dame, la repudia: dequoy tous ses amis le reprirent, & tanferent bien asprement: & luy tenant le pied leur monstra son soulier, leur demadant, Que luy faut-il? n'est-il pas beau? n'est-il pas tout neuf? & toutefois il n'y a celui de vous qui sçache l'endroit où il me ferre & me bleçe. Voila pourquoy il ne faut point qu'une femme se confie ny en ses biens, ny en la noblesse de sa race, ny en sa beauté, mais en ce qui touche de plus pres au cœur de son mary, c'est à dire, en son entretien, en ses mœurs, & en sa conuersation, donnant ordre que toutes ces choses ne soient point dures, fâcheuses ny ennuyeuses par chascun iour à son mary, ains plaisantes, agreables & accordantes à ses conditions. Car tout ainsi que les medecins craignent d'auantage les fièvres qui s'engendrent de causes occultes, assemblees de longue main petit à petit, que celles qui viennent tout à coup de causes toutes apparentes & manifestes: aussi y a-il quelquefois de petites hargnes, & querelles quotidiannes & continuelles entre le mary & la femme, que ceux de dehors ne voyent ny ne cognoissent pas, qui les separent plus l'un de l'autre, & gastent plus le plaisir de leur cohabitation, que nulle autre cause.

Le Roy Philippe de Macedoine aimoit vne femme de Thessalie, que l'on mes- croyoit de l'auoir charmé & enforcélé: parquoy la Royne Olympias sa femme fait tât qu'elle l'eut entre ses mains: mais quand elle l'eut bien regardée, & bien considéré comme elle estoit belle, de bonne grace, & comme sa parole sentoit bien sa femme de bonne maison, & bien apprise: Arriere, dit-elle, toutes calomnies: car ie voy bien que les charmes dont vous vsez sont en vous-mesmes. C'est doncques vne force inexpugnable qu'une femme espousée & legitime, qui mettant en elle mesme toutes choses, son auoir, sa noblesse, ses charmes, voire tout le tissu mesme de Venus, s'estudie par douceur, bonne grace & vertu, d'acquérir l'amour de son mary.

Vne autrefois la mesme Royne Olympias entendant qu'un ieune gentilhomme espousoit vne Dame de la court, qui estoit bien belle, mais elle n'auoit pas trop bon bruit: Cestuy-cy, dit-elle, n'a point de ceruelle, car autrement il ne se fust pas marié au rapport ny à l'appetit de ses yeux. Or ne se faut-il pas marier au gré de ses yeux seulement, ny au rapport de ses doigts non plus, comme font aucuns qui comptent sur leurs doigts, combien leur femme leur apporte en mariage, & ne considerent pas premierement, si elle est conditionnée de forte qu'ils puissent viure avec elle.

Socrates auoit accoustumé de conseiller aux ieunes hommes qui se regardoient dedans des miroirs, fils estoient laids de visage, de corriger leur laideur par la vertu, en se rendant vertueux, & fils estoient beaux, de ne souiller point leur beauté par vice: aussi seroit-il bien honneste que la Dame mariée, quand elle tient son miroir en sa main, parlât ainsi en elle-mesme, si elle est laide: Que sera-ce doncques de moy, si ie deuiens encore meschante? Et si elle est belle, Que sera-ce au pris, si ie demeure honneste & sage: car si la laide est aimée pour sa bonne grace, & pour ses honnestes mœurs, ce luy est plus d'honneur, que si c'estoit pour beauté.

Le tyran de Sicile Dionysius enuoyoit des robbes & des bagues precieuses aux

Les preceptes de mariage.

filles de Lyfander, mais Lyfander ne les voulut oncques receuoir, disant, Ces paremëts E me feroient plus de honte, que d'honneur ny d'ornement à mes filles. Le poëte Sophocles deuant Lyfander auoit dit vne semblable sentence,

Cela chetif ne te fait point d'honneur,
Mais bien plus tost & honte & deshonneur,
Monstrant ton cœur lascif & impudique.

Car comme disoit le philosophe Crates, cela est ornement qui orne, & cela orne la Dame qui la rend plus honorable: ce que ne font pas les ioyaux d'or, les esmeraudes, ny les pierres precieuses, ny les accoustrements de pourpre, mais tout ce qui la fait estimer honneste, sage, humble & pudique.

Ceux qui sacrifient à Iuno coniugale ou nuptiale, n'offrent pas le fiel avec le demourant de la beste immolee, ains le tirent dehors, & le iettent aupres de l'autel: par laquelle cerimonie, celui qui l'a premierement instituee, a voulu donner à entendre, qu'en mariage il n'y doit point auoir de fiel, c'est à dire, amertume de cholere, ny de courroux quelconque: non que la Dame ne doie estre graue & vn peu austere, mais ceste austerité doit estre comme celle du vin, vtile & plaisante, non pas amere comme celle du chicotin, ou de quelque autre drogue de medecine.

Platon voyant le philosophe Xenocrates, qui estoit au demourant bien vertueux & homme de bien, mais vn peu de mœurs trop seueres, l'admonestoit de sacrifier aux Graces: aussi estime-ie qu'une Dame honneste a encore besoing de graces enuers son mary, à celle fin que, comme disoit Metrodorus, elle viue ioyeusement avec luy, & qu'elle ne se fasche, ny ne se repente point d'estre femme de bien: car il ne faut pas, ny que pour estre bonne mesnagere, elle mette en nonchaloir d'estre propre & nette, ny que pour bien aimer son mary, elle laisse de le caresser courtoisement, pour ce que la mauuaise teste d'une femme rend son honnesteté odieuse, comme la salleté fait aussi haïr son espargne & son bon mesnage: tellement que celle qui craint de rire deuant son mary, ou de faire quelque autre gayeté, de peur d'estre estimee affectee & effrontee, fait ne plus ne moins que si elle laissoit de s'oindre la teste de tout poinct, de peur que lon ne l'estimast parfumee: ou de se lauer le visage, de peur qu'on ne la soupçonast fardee. Nous voyons mesmes que les poëtes & les orateurs qui veulent euitter la fascherie qu'il y a à lire vn langage bas, vulgaire & de mauuaise grace, s'estudient ingenieusement à retenir & esmouuoir le lecteur & l'auditeur par la force de l'inuention, de la disposition, & naïfue representation des mœurs des personnes: aussi faut-il que l'honneste mere de famille, en bien faisant euite toute affecterie, toute mignardise, & brief toute façon de faire qui sente sa courtisane, ou sa femme qui se vueille monstrer: mais bien qu'en ses ieux, ses caresses & ses graces, dont elle viera en sa conuersation ordinaire avec son mary, elle l'accoustume à l'honnesteté avec plaisir. Toutefois si d'aduenture il s'en treuve quelqu'une si austere, & si seuer de sa nature, qu'il n'y ait ordre quelconque de la pouoir esgayer ny resiouir, en ce cas-là il faut que le mary soit equitable: & tout ainsi comme Phocion respondit à Antipater qui luy commandoit vne chose deshonneste & mal-seante à son estat, Tu ne me scaurois auoir pour amy, & pour flateur ensemble: aussi faudra-il qu'il die en soy-mesme de sa femme qui fera pudique & seuer, Il n'est pas raisonnable que i'vse d'elle comme d'une femme espousee, & comme d'une amie ensemble.

Les femmes d'Ægypte par la coustume du pais ne portoient point de souliers en leurs pieds, à fin que cela les accoustumast à demourer tout le iour en la maison: mais au contraire la plus part de nos femmes, si vous leur ostez les patins dorez, les carcans, les bracelets, les calleçons, les perles & les robbes de pourpre, elles ne partiront iamais du logis.

Theano vn iour en vestant sa robbe monstra d'aduenture vne partie du bras: & quelqu'un

A quelque vn des assistans qui l'apperceut, se prit à dire, O le beau bras que voyla! Il est vray, respondit-elle, mais il n'est pas commun: aussi ne faut-il pas que le bras seulement de la Dame pudique & honneste ne soit pas commun, mais ny sa parole mesme: ains faut qu'elle se garde, & qu'elle ait honte, autant presque de desployer sa parole, que de descouvrir son corps deuant des estrangers: pour autant que ses mœurs, ses actions & ses conditions se voyent & se descouurent en icelle, quand elle parle.

Phidias feit l'image de Venus aux Eliens, aiant le pied dessus la coque d'une tortue: qui signifioit, que la femme ne se doit point partir de la maison, ains y demourer en silence: car il faut qu'elle parle ou à son mary, ou par son mary, ne se faschant point pour cela, si elle sonne par la langue d'autrui, comme fait le iouëur du haut bois avec la languette de la hanche.

B Les hommes riches, les Princes & les Roys, en hōnorant les Philosophes & gens de lettres, se font honneur à eux mesmes: mais les Philosophes qui font la court & l'asservent aux riches, ne les rendent pas hōnorez pour cela, ains se rendent eux mesmes des-hōnorez. Il en prend tout de mesmes aux femmes: car quand elles obeissent & se soubmettent à leurs marits, elles en sont louees, mais quand elles en veulēt estre maistresses, cela leur est plus mal-seant, que non pas à ceux qu'elles maistrisent. Mais il faut que le mary domine la femme, non comme le seigneur fait son esclau & ce qu'il possede, mais comme l'ame fait le corps, par vne mutuelle dilection & reciproque affection, dont il est lié avec elle: comme l'ame peut bien auoir soing du corps, sans s'asservir aux voluptez, ny aux appetits desordonnez d'iceluy, aussi peut bien le mary dominer sa femme, en luy complaisant & la gratifiant.

C Les Philosophes tiennent, que des corps composez de plusieurs pieces, les vns sont composez de parties distinctes & separees les vnes des autres, cōme vne flotte de vaisseaux, ou vne armee nauale: les autres de parties conioinctes & qui touchent les vnes aux autres, comme vne maison ou vne nauire: les autres de parties vnies dès la naissance, croissantes & viuantes naturellement ensemble, comme sont tous les corps des animaux. Le mariage se rapporte presque & ressemble à tout cela: car le mariage de ceux qui s'entre-aiment, ressemble proprement aux corps dont les parties sont naturellement vnies ensemble: celuy de ceux qui se marient pour les grāds douaires, ou pour auoir des enfans, ressemble aux corps dont les parties s'entretouchēt: & celuy de ceux qui couchent seulement ensemble, se conforme aux corps duquel les parties sont separees & distinctes l'une de l'autre: desquels on pourroit veritablement dire, qu'ils habitēt, mais qu'ils ne vivent pas ensemble. Or fault-il, que cōme les Physiciens disent, que les corps liquides sont ceux qui se meslent du tout en tout l'un avec l'autre, aussi que de ceux qui sont mariez ensemble, & les corps & les biés, & les amis & les parēts, soiēt tous vns & cōmuns, meslez l'un parmy l'autre: c'est pourquoy les loix Romaines defendēt aux conioincts par mariage de s'entrefaire donatiōs mutuelles, non à fin qu'ils n'aient

D rien l'un de l'autre, mais à celle fin qu'ils estiment toutes choses communes entre-eux. Il y auoit vne coustume en la ville de Leptis, qui est maintenant appelee Tripoli, assise en la coste de la Barbarie, que la nouuelle mariee le lendemain de ses nopces enuoyoit deuers la mere de son mary, luy demander à emprunter vn pot à mettre au feu: sa belle-mere le luy refusoit, & respōdoit qu'elle n'en auoit point, à fin que dès le cōmancement la nouuelle espousee apprist que la belle-mere tient vn peu de la marastre, & que si apres il aduenoit qu'elle luy teint quelque autre plus aspre rudesse, elle ne le trouuast point estrāge, & qu'elle ne s'en courrouçast point: aussi fault-il que la femme de bōne heure remedie à l'occasion de ceste ordinaire rudesse, qui n'est autre chose que la ialousie de la mere pour l'amitié que son fils luy porte: & le remede vnique de ceste passion est, que la femme s'estudie tellement de gagner la bonne grace de son mary, que pour cela elle ne diminue point, ny ne tire point à elle l'affection que le fils doit

Les preceptes de mariage.

porter à sa mere.

Il semble que les meres entre leurs enfans aiment plus coustumierement les fils que les filles, comme ceux de qui elles esperent plus de secours: & les peres au contraire, aiment plus les filles, comme celles qui ont plus de besoing de leurs secours: & peut estre que par l'honneur qu'ils s'entre-portent, l'un veut sembler auoir plus d'affection & plus d'amour enuers ce qui est plus propre à l'autre: toutefois cela à l'adventure est different, mais bien est-il seant & honneste à la femme, de monstrier auoir plus d'inclination à honnorer & caresser les parents de son mary, que les siens propres, & si elle a quelque ennuy, le communiquer plus tost à ceux-là, & le celer aux siens: car ce qu'elle monstre auoir plus de fiance en eux, fait qu'ils se fient plus en elle, & ce qu'il semble qu'elle les aime plus, fait qu'elle est aussi plus aimée d'eux.

Les Capitaines de Cyrus commanderent à leurs soldats, si les ennemis leur venoient courir sus avec grand cris, qu'ils les receussent sans mot dire: & au contraire, si venoient les assaillir en silence, qu'eux leur courussent avec grand cris à l'encontre: aussi les femmes de bon entedement, quand elles voyent que leurs maris estans en cholere crient, elles se taisent: & au contraire, si les fils ne disent mot, en parlant à eux & les reconfortant, elles les appaisent & addoucissent. Et fait sagement le poëte Euripides, quand il reprend ceux qui vident de la Lyre & autres instrumens de musique, durant un festin: Car il falloit, dit-il, plus tost appeler la musique quand on est en cholere, ou bien en dueil, que non pas quand on est en feste & en ioye, pour se lascher encore plus en toute volupté: Aussi faut-il estimer que vous commettez vne faute, quand vous allez coucher ensemble pour vous donner plaisir l'un à l'autre, & quand vous estes en courroux, ou en quelque different l'un contre l'autre, vous faites deux lits & couchez à part l'un de l'autre, & n'appellez pas lors à vostre aide la Deesse Venus, qui scauroit mieux que nulle autre donner la medecine propre à telles maladies, ainsi comme le poëte mesme Homere le nous enseigne au passage, où il fait dire à Iuno,

Iliad, liu. 14.

Je finiray vos querelleux débats

Dedans un lit par amoureux esbats.

Or faut-il que la femme fuyt toutes occasions de quereller avec son mary, & le mary semblablement avec sa femme: mais principalement faut-il bien qu'ils s'en donnent de garde lors qu'ils sont couchez ensemble dedans le lit: car comme disoit la femme grosse prestee d'accoucher, & ia sentant les douleurs de son trauail, à ceux qui la vouloient coucher dessus son lit: Comment est-ce que le lit pourroit guarir ce mal, veu que ça esté sur le lit qu'il m'est aduenu? Aussi les querelles, iniures, courroux, & choleres qui s'engendrent dedans le lit, il est mal-aisé de trouuer autre temps ny autre lieu qui les peult iamais appaiser ny guarir.

Il semble que Hermione dit vray en vne Tragedie d'Euripide quand elle parle ainsi,

Entrons chez moy femmes de mauuais nom

Ont ruiné mon los & bon renom.

mais cela n'est pas simplement quand de mauuaises femmes entrent en vne maison, ains quand elles y hantent lors que quelque noise contre le mary, ou quelque ialousie, leur ouurent non seulement les portes de la maison, mais aussi les oreilles, c'est alors que la femme sage doit fermer les oreilles, & se donner bien garde de leur babil, de peur que ce ne soit adiouter feu sur feu, & qu'elle doit bien auoir deuant ses yeux le dire du Roy Philippus de Macedoine: car on lit qu'il respondit un iour à quelques vns de ses familiers qui l'irritoient à l'encontre des Grecs, d'autant qu'ils detractoi-
ent & mesdisoient de luy, apres en auoir receu beaucoup de bien: Or aduisez donc qu'ils feroient, dit-il, si ie leur faisois du mal. Quand doncques telles femmes viendront à luy dire: Comment, vostre mary vous fait iniure, à vous qui l'aimez tant, & qui luy gardez si bien loyauté de mariage: elle leur respondra, Que me fera-il doncques si ie com-

A ie commence à le haïr, & à luy faire tort?

Vn maistre aiant apperceu son esclau fugitif, qui s'en estoit fuy long temps y auoit, se meit à courir apres pour le reprendre: l'esclau fuyant, se ietta dedans vn moulin: & le maistre dit en luy-mesme, En quel lieu eusse-je mieux aimé le trouuer? Aussi la femme qui par ialousie est sur le poinct de faire diuorce avec son mary, qu'elle die à par-foy en elle mesme: En quel estat aimeroit mieux me voir celle qui me rend ialouse, que faisant ce que ie fais, me voyant despitée, en mauuais mesnage avec mon mary, abandonnant ma maison, & le liét mesme nuptial?

B Les Atheniens font en l'annee trois labourages sacrez, le premier est en l'Isle de Scyros, en memoire de la premiere inuention de labourer la terre & de semer, dont ils ont esté inuenteurs: le second est celuy qui se fait au lieu appellé Raria: le troisiéme celuy qui se fait tout ioignant la ville, & l'appelle lon Buzygion, en remembrance de l'inuention d'atteller les bœufs sous le ioug au timon de la charrue: mais le labourage nuptial est plus sacré, & se doit plus sainctement obseruer que tous ceux-là, en intention d'auoir lignee. C'est pourquoy Sophocles a bien & sagement appellé Venus fructueuse ou portât beau fruit: pourtant faut-il que l'homme & la femme conioincts par mariage en vsent fort religieusement, & sainctement, en s'abstenant entierement de toute autre illicite & defendue conioction, & de labourer ou semer en lieu dont ils ne voudroient pas recueillir aucun fruit, & dont, si d'aduerture il en vient, ils ont honte, & font ce qu'ils peuuent pour le cacher.

C L'orateur Gorgias en pleine assemblee des ieux Olympiques fait vne harangue aux Grecs qui y estoient assemblez de toutes parts, pour les enhorter de viure tous en bonne paix, vnion & concorde les vns avec les autres: mais il y eut vn Melanthius qui luy dit tout haut: Cestuy-cy fingere de nous conseiller & prescher la concorde en public, qui ne peut pas persuader en son priué à sa femme & à sa chambriere qu'elles viuent en paix ensemble, & si ne sont qu'eux trois en la maison: car ce Gorgias portoit quelque affection à sa chambriere, & sa femme en estoit ialouse: Aussi fault-il que la famille & maison soit bien ordonnee de celuy qui se veut meller de donner ordre aux affaires publiques, & à ceux de ses amis: car communément il aduient que les fautes que lon commet contre les femmes, sont plus diuulguees parmy le peuple, que celles des femmes.

D On escrit que les chats se troublent de l'odeur des parfums & des senteurs, iusques à en entrer en fureur: si l'aduenoit aussi que la femme s'offensast iusques à auoir le cerueau troublé des parfums de son mary, il seroit bien d'estrange nature si l'en abste-noit, ains, pour vn bien peu de plaisir, la laissoit tomber en vn si grand inconuenient. Or puis qu'il est ainsi que tels accidents leur aduennent, non pas quand leurs maris se parfument, mais quand ils s'addonnent à aimer des putains, c'est vne grande iniustice à eux, que pour vn bien peu de volupté, contrister, offenser, & troubler si fort leurs femmes, & ne faire pas au moins cōme ceux qui ont à s'approcher des abeilles, lesquels s'abstiennent de toucher mesmes à leurs propres femmes, pour ce que lon dit que les abeilles haïssent ceux qui viennent tous frais d'habiter avec les femmes, & leur font plus la guerre qu'aux autres, aians le cœur si lasche, que de se venir coucher aupres de leurs femmes estans souillees & pollues de la compagnie d'autres quelconques.

Ceux qui s'approchent des Elephans ne vestent iamais de robes blanches, ny ceux qui approchent des taureaux ne prennent iamais robes rouges, pour autant que ces animaux-là s'effarouchent & s'effroient de telles couleurs: & dit-on que les Tigres quand elles entendent sonner des tabourins à l'entour d'elles, en enragent, & se déchirent elles mesmes par fureur. Puis qu'il y a donc des hommes qui ne trouuent pas bon, & se courroucent quand leurs femmes portent des robes d'escarlante & de pourpre, & d'autres qui sont marris d'ouyr sonner des cymbales ou des tabourins,

Les preceptes de mariage.

quel mal y aura-il quand les femmes s'en abstiendront , pour ne fascher ny ne proon- **E**
quer point à ire leurs marits, & qu'elles viuront avec eux sans bruit, en repos & en
patience ?

Vne ieune femme dit vn iour au Roy Philippus qui la tiroit par force maugré
elle: Laissez moy Sire, toutes femmes sont vne quand la chandelle est ostee. Cela est
bon à dire aux hommes adulteres & dissolus en luxure: mais il faut pourtant que
l'honneste Dame mariee, principalement quand la clarté est ostee, ne soit pas toute
vne que les autres cōmunes femmes: ains faut que lors que son corps ne se void point,
ellé face plus paroistre sa pudicité, son honnesteté, son amour enuers son mary, &
qu'elle soit propre à luy seul.

Platon admoneste les vieilles gens de se monstrier plus vergongneux deuant les ieu-
nes que deuant nuls autres, à celle fin qu'ils leur enseignent par leur exemple à estre aussi
reuerends & respectueux en leur endroit: pource que là où les vieux sont effrontez, il
n'est pas possible d'imprimer aucune honte ny aucune reuerēce aux ieunes. Or fault- **F**
il que le mary se fouenant de ce precepte, reuere sa femme plus que toutes les autres
personnes du monde: car la chambre nuptiale luy sera vne eschole d'honneur & de
chasteté, ou bien d'intemperance & de lubricité: car celuy qui prend les plaisirs qu'il
defend à sa femme, fait ne plus ne moins que fil luy commandoit de combattre con-
tre des ennemis, auxquels il se fust desia luy mesme rendu.

Au reste quant à aimer d'estre paree & bien en poinct, toy Eurydice qui as leu ce
que Timoxenus en a escrit à Aristilla, tasche à l'imprimer en ta memoire: mais toy
Pollianus, n'estime pas que iamais ta femme s'abstienne de curiosité, delices & super-
fluité, si elle apperçoit que tu ne la mesprises pas és autres choses, ains que tu prennes
plaisir à voir & auoir de la vaisselle bien doree, ou des cabinets bien diaprez, des mu-
lets sumptueusement enharnachez, & des cheuaux richement equippez: car il est
bien mal-aisé de chasser les delices & la superfluité d'entre les femmes, quand on la void
regner entre les hommes. **G**

Au demourant, estant ia de l'aage pour estudier aux sciences, qui se preuent par
raison & par demonstration, orne desormais tes mœurs en hantant & frequentant
avec les personnes qui te peuuent seruir à cela: & quant à ta femme, amasse luy de
tous costez, comme font les abeilles, tout ce que tu penseras luy pouuoir profiter, le
luy apportant toy-mesme, & en toy-mesme, fay luy en part, & en deuise avec elle,
en luy rendant amis & familiers les meilleurs liures & les meilleurs propos que tu
pourras trouuer,

Homere en
l'Iliade l. 6.

Car tu luy es au lieu de pere & mere,

Et desormais tu luy es comme frere.

& ne seroit pas moins hōnorable d'ouyr vne femme qui diroit à son mary, mon mary
tu es mon precepteur, mon regēt, & mon maistre en philosophie, & en la cognoissan-
ce de tres-belles & tres-diuiues sciences. Car ces sciences-là & ces arts liberaux pre- **H**
mierement retirent & destournent les femmes d'autres exercices indignes: car vne
Dame qui estudiera en la Geometrie, aura honte de faire profession de baller: & celle
qui sera ia enchantee des beaux discours de Platon & de Xenophon, n'approuuera
iamais les charmes ny enchantements des sorciers: & fil y a quelque enchanteresse
qui luy promette d'arracher la Lune du ciel, elle se mocquera de l'ignorance & bestise
des femmes qui se laissent persuader cela, aiant appris quelque chose de l'Astrologie,
& entendu comme Aganice fille de Hegetor grand Seigneur en la Theffalie, sçachant
la raison des Eclipses qui se font lors que la Lune est au plein, & le temps auquel elle
entre dedās l'ombre de la terre, abusoit les femmes du païs, en leur faisant à croire que
c'estoit elle qui estoit la Lune du ciel.

Il n'y eut iamais femme qui feist enfant toute seule, sans auoir la compagnie de
l'homme,

A l'homme, mais bien y en a-il qui font des amas sans forme de creature raisonnable, ressemblans à vne piece de chair, qui prennent consistance de corruption : il fault bien auoir l'œil à ce que le mesme n'aduieue en l'ame & en l'entendement des femmes. Car si elles ne reçoient d'ailleurs les semences de bons propos, & que leurs maris ne leur fassent part de quelque saine doctrine, elles seules à par-elles engendrent & enfantent plusieurs conseils estrangers, & plusieurs passions extrauagantes. Mais toy Eurydice estude tousiours aux dicts notables & sentences morales des sages hommes & gens de bien, & ayes tousiours en la bouche les bonnes paroles que tu as par cy deuant estant fille ouyes & apprises de nous, à celle fin que tu en resiouisses ton mary, & que tu en sois louee & prisee par les autres femmes, quand elles te verront si honnorablement & si singulierement parée, sans qu'il te couste rien en bagues & ioyaux. Car tu ne scaurois auoir les perles de ceste riche & opulente femme-là, ny les robbes de foye de ceste estrangere-cy, pour t'en parer & accoustrer, que tu ne les
B achettes bien cherement : mais les ornements de Theano, ou de Cleobuline, ou de Gorgo femme du Roy Leonidas, ou de Timoclia sœur de Theagenies, ou de l'ancienne Claudia Romaine, ou de Cornelia de Scipion, & de toutes ces autres Dames qui iadis ont esté pour leurs vertus tant celebres & renommées, tu les peux auoir gratuitement sans qu'il te couste rien, & t'en parer & orner, de maniere que tu en viuras heureusement ensemble & glorieusement. Car si Sappho pour sa suffisance de mettre bien par escrit en vers, a bien eue le cœur d'escrire à vne Dame riche & opulente de son temps,

Toute au tombeau morte gerras,
Pour ce que cueilly tu n'auras
Iamais des roses, dont fleurie
Est la montagne Pierie :

C pourquoy ne te fera-il plus loisible de te glorifier & te contenter de toy-mesme, attendu que tu ne participeras pas seulement aux fleurs ny aux chansons, mais aussi aux fruiets que les Muses produisent & donnent à ceux qui aiment les lettres, & la philosophie?

Le Banquet des sept Sages.

Diocles raconte à Nicarchus tout ce qui y fut fait & dit.

DERTAINEMENT le long cours du temps, amy Nicarchus, deura apporter grande obscurité & incertitude aux affaires, puis que maintenant en choses si nouuelles & si recentes on a inuenté & controuué des propos faux, qui toutefois sont creus & receus pour veritables : car ny il n'y auoit pas seulement sept conuiez à table en ce festin, comme vous auez ouy dire, ains y en auoit deux fois plus, entre lesquels moy-mesme en estois l'un, estant familier de Periander à cause de mon art, & hôte de Thales, car il logeoit chez moy par le commandement de Periander : ny celui qui vous les a contez qui qu'il soit, n'auoit pas bien retenu les propos qui y furent tenus, qui me fait penser que ce ne doit point auoir esté aucun de ceulx qui furent au banquet. Mais puis que nous sommes à present de grand loisir, & que la vieillesse n'est pas bien assuré garant pour remettre & differer le compte à un autre temps, puis que vous en auez si grande enuie, ie vous

Le banquet des sept Sages.

reciteray le tout par ordre dès le commencement. Le festin premierement ne fut pas **E** préparé dedans la ville, mais au port de Lecheon, en vne grande falle à faire festes, qui là est ioignant le temple de Venus, à laquelle le sacrifice se faisoit: car depuis le malheureux amour de sa mere, laquelle se feit elle mesme volontairement mourir, il n'auoit iamais sacrifié à Venus, iusques alors qu'il fut premierement incité par quelques songes de Melissa à honorer & venerer ceste deesse. Orauoit-on amené à chascun des conuiez vn coche fort bien en poinct pour les conduire iusques au lieu, pource que c'estoit en la saison d'esté, & estoit tout le grand chemin, depuis la ville iusques sur le bord de la mer, plein de poulciere & de bruit des chariots & du monde qui alloit & venoit. Thales donques voyant à la porte de mon logis le coche que lon luy auoit amené, s'en prit à rire, & le renuoya. Ainsi nous nous meismes en chemin tout bellement à trauers les champs luy & moy, & pour le troisieme Niloxenus natif de Naucratic, homme d'honneur, & qui auoit autrefois cognu familieremēt Thales & Solon en Ægypte: & lors estoit pour la seconde fois renuoyé deuers Bias, mais pourquoy **F** c'estoit, luy-mesmes ne le sçauoit pas, sinon qu'il se doutoit, que c'estoit vne seconde question qu'il luy apportoit close & sceellée dedans vn paquet, pource qu'il luy estoit commandé, si Bias ne pouuoit venir à bout de soudre ladicte demande, qu'il la monstra lors aux plus sages des Grecs. Si dit adonc Niloxenus, Ce banquet icy, Seigneurs, m'est vn grand heur, là où ie vous trouueray tous ensemble: car ie porte quand & moy à ce festin le paquet, comme tu voys, & le nous monstra sur l'heure. Et lors Thales en se soubriant: Si c'est quelque question difficile à soudre, il te fault de rechef aller en la ville de Priene, car Bias luy mesme te la soudra, comme il a fait la premiere. Et quelle fut la premiere, dis-ie? Il luy enuoya, me respondit il, vn mouton, luy mandant qu'il luy en renuoyast la pire & la meilleure partie de la chair, la mettant à part: & luy en tirant à part bien & sagement la langue, la luy enuoya, dont il est à bon droit bien prisé & bien estimé. Ce n'est pas pour cela seulement, ce dit Niloxenus, mais aussi pource qu'il ne refuit pas l'amitié des Princes & des Roys, comme **G** tu fais: car Amasis admire plusieurs choses en toy, & entre autres la maniere comme tu pris la mesure de la haulteur de la Pyramide, il en fait fort grand compte, que sans autre manufacture quelconque, & sans aucun instrument, dressant seulement à plomb vn baston au bout de l'ombre de la Pyramide, & se faisant deux triangles avec la ligne que fait le rayon du Soleil touchant aux deux extremités de la pyramide & du baston, tu monstras qu'il y auoit telle proportion de la haulteur de la Pyramide à celle du baston, comme il y auoit de la longueur de l'ombre de l'un à l'ombre de l'autre: mais, comme i'ay dit, tu es accusé enuers luy, le porter mauuaise volonté aux Roys: & si y d'auantage, qu'on luy a apporté plusieurs sentences & responses de toy contumelieuses aux tyrans: comme, qu'estant vn iour enquis par Molpagoras seigneur d'Ionie, quelle chose tu auois iamais veüe qui te semblast la plus estrange, tu respondis, vn tyran vieil. Et de rechef, en vn banquet s'estant meu propos touchant **H** les bestes fieres, quelle estoit la pire, tu respondis, qu'entre les sauages c'estoit le tyran, entre les priuees, le flatteur. Car les Roys, encore qu'ils facent semblant d'estre bien differents des tyrans, ne prennent pas plaisir à ouyr tels propos. Ceste response-là, dit Thales, ne fut oncques miennē, ains fut Pittacus qui la feit vn iour en se riant à Myrsilus. Mais quant à moy, ie ne me sbahirois pas tant de voir vn vieil tyran, comme vn vieil pilote: toutefois quant à ceste transposition du tyran au pilote, ie dirois volontiers comme ce ieune homme là, lequel iettant vne pierre à vn chien, & ayant failly le chien, en assena sa marastre: Encore ainsi ne va il pas mal, ce dit il: pourtant ay-ie tousiours estimé Solon tressage, lequel refusa d'estre tyran de son pais. Et ce Pittacus icy, si n'eust approché de la monarchie, iamais n'eust dit, * Qu'il est difficile d'estre homme de bien. Et Priander me semble, par maniere de dire, comme

* Pittacus en sa vieillesse estant contrainct de prendre la charge d'une armee, prononcea ceste sentence.

- A** comme f'estant trouué saisy d'une maladie hereditaire de ceste tyrannie, s'en reuenir le mieux qu'il peut, en vsant de la conuersation salubre des gens de bien, au moins iusques aujourdhuy, & attirant aupres de soy compagnie de sages hommes, sans approuuer ny admettre les accourcissements des sommets, & appetissements des grands, que luy suade & met en auant Thrasylbulus mon concitoyen: car vn tyran qui aime mieux commander à des esclaves qu'à des hommes entiers, me semble proprement faire comme le laboureur, qui aimeroit mieulx recueillir des sauterelles, & des oyseaux, que non pas de bon grain de froment & d'orge: car ces dominations & principautez tyranniques icy, ont vn seul bien au lieu de plusieurs maux, qui est l'honneur & la gloire: d'autant que s'ils commandent à de bons hommes, c'est signe qu'ils sont eulx encore meilleurs, & s'ils commandent à de grands hommes, cela monstre qu'ils sont encore plus grands: & s'ils ne visioient qu'à leur seureté au lieu de l'honnesteté, ils ne deuoient seulement chercher qu'à commander à plusieurs moutons, plusieurs bœufs, & plusieurs
- B** cheuaux, non pas à plusieurs hommes. Mais ce bon seigneur icy estrange nous a ie ne sçay comment iettez en propos qui ne sont point conuenables à ce qui se presente, laissant en arriere de dire & demander ce qui sied beaucoup mieux à ceulx qui s'en vont à vn festin. Car n'estimez-vous pas que comme celuy qui fait le festin, a des apprests à faire, aussi en a celuy qui y est conuié? Les Sybarites, ce me semble, enuoyent conuier les Dames vn an deuant, à fin qu'elles ayent tout loisir de se parer de vestemens & de bagues & ioyaux, pour venir au festin: quant à moy ie pense que le vray preparatif de celuy qui doit aller à vn festin, ainsi qu'il appartient, a besoing de plus long tēps, d'autant qu'il est plus difficile de trouuer l'ornement conuenable aux mœurs & à l'ame, que non pas le superflu & inutile au corps: car l'homme sage ne va pas au festin porter son corps comme vn vaisseau pour le remplir, ains y va en intention d'y passer le temps à deuiser à certes & en ieu, & de parler & d'ouyr selon que le temps en apportera les occasions à la compagnie, s'ils veulent ioyeusement & plaisamment
- C** conuerfer ensemble: car il est en luy de reietter vne viande qui luy semblera mauuaise: & s'il ne treuve le vin bon, auoir recours aux nymphes: là où vn voisin fascheux, ennuyeux, & mal-plaisant à la table, fait perdre la grace & le plaisir de toute viande, de tout vin, voire & toute la douceur de la Musique: & si ne peult-on pas, quand on veult, reuoir ceste fascherie-là, ains y en a, à qui elle demeure toute leur vie: de maniere qu'ils ne peuuent iamais s'entreuoir de bon œil, comme si c'estoit vne vieille crudité d'iniure & de cholere, rapportee d'un festin, laquelle ils n'auroient iamais peu digerer. C'est pourquoy il me semble que Chilon fait treffagement, lequel estant hier conuié à ce festin, ne voulut iamais promettre d'y venir, que premierement il ne sçeuſt qui estoient les conuiez l'un apres l'autre: car il disoit que lon est contrainct, vucille lon ou non, de supporter vn compagnon fascheux en vn nauire, quand on est sur la mer, & en vn pauillon, quand on est à la guerre: pource qu'il est force de
- D** nauiguer & de camper avec eulx: mais de se meſler indifferemment sans discretion avec toutes sortes de gens en vn banquet, c'est à faire à l'homme qui n'a point de iugement. Quant à la façon de faire d'Egypte, où ils ont accoustumé d'apporter ordinairement au milieu d'un festin l'anatomie seiche d'un corps d'homme mort, & le monstrer à tous les conuiez, en les admonestant de se souuenir, qu'en peu de temps ils seront tels, encore que ce soit vn fort mal-plaisant masque, & importun entremets, toutefois si a-il quelque commodité: car s'il ne conuie la compagnie à faire grand' chere & à se donner du plaisir, au moins incite-il les conuiez à s'entreporter amour & dilection les vns aux autres, les admonestant de se souuenir que la vie estant courte de soy-mesme, ils ne cherchent pas à la faire trouuer longue par affaires fascheux & ennuyeux. En tenant tels propos par le chemin, nous fismes tant que nous arriuasmes au logis: & quant à Thales, il ne se voulut point estauer ny baigner: car ie me suis desia huylé, ce

Le banquet des sept Sages.

dit-il : mais il alla ce-pendant par tout voir les belles allées, les loges à luidter, & le E
bocage qui estoit au long de la mer fort bien planté & bien accoustré, non qu'il feschahist de voir rien de tout cela, mais de peur qu'il ne semblast mespriser en aucune chose Perian-
der, ou desdaigner sa magnificence: les autres, à mesure que chascun s'estoit lau-
& huylé, les seruiteurs le conduisoient en la salle par le portique, dedans lequel estoit
assis Anacharsis, aiant deuant soy vne ieune fille, qui de ses mains luy mespartissoit les
cheueux, laquelle accourant fort frâchement au deuant de Thales, qui la baïsa, & luy
dit en riant, Fay que cest estranger, qui est le plus doux homme du monde, deuienne
beau, à fin qu'il ne nous semble plus hydeux ny sauuage à voir. Je demanday lors qui
estoit ceste ieune fille : Comment, dit-il, ne cognoissez-vous pas la sage Eumetis, qui
est tant renommee? Le pere luy a donné ce nom là, mais le peuple l'appelle du nom de
son pere Cleobuline. Ne l'appellez-vous pas sage, dit adonc Philoxenus, à cause de la
viuacité de son esprit à proposer, & sa subtilité à soudre des questions obscures, que
lon appelle enigmes? car il y en a quelques-vns inuentez par elle, qui ont pectré iuf- F
ques en Ægypte. Non pas moy, respondit Thales, car elle n'en vse que comme de
martres, pour iouer & passer le temps seulement, & s'en esgaye avec ceux qu'elle ren-
contre: mais elle a vn courage grand à merueilles, vn entendement digne de gouuer-
ner vn estat, & vne douceur de mœurs fort agreable, de maniere qu'elle rend son pere
plus doux & plus humain seigneur enuers ses citoyens. Soit ainsi, dit Philoxenus, &
y a bien de l'apparence, à voir la simplicité de son accoustrement, & sa naïfueté: mais
d'ou vient ceste priuauté, qu'elle accoustre si amiablement les cheueux à Anacharsis?
Pource, dit-il, que c'est vn homme de bien, & qui sçait beaucoup, qui luy a raconté
bien au long & bien volontiers la façon de viure des Tartares, & la maniere de char-
mer les maladies, dont ils vsent à l'endroit des malades : & croy que maintenant elle
l'accoustre & le caresse ainsi, en deuissant & apprenant quelque chose de luy. Comme
nous estions desia tout aupres de la salle, nous rencontraimes Alexidemus Milesien,
le bastard de Thrasylulus le tyran, tout troublé & courroucé, disant ie ne sçay G
quoy en luy-mesme, sans que nous peussions clairement entendre ce qu'il disoit:
mais quand il apperceut Thales, il se reuint vn peu, & s'arrestant tout court : Perian-
der m'a fait, dit-il, vn grand tort, qui ne m'a pas voulu laisser partir quand ie me vou-
lois embarquer, ains m'a contrainct par ses prieres d'attendre ce beau souper, & puis
quand i'y suis venu, il m'a donné vn lieu d'assiette deshoneste à moy, en preferant
des Æoliens, des Insulaires, & qui non, à Thrasylulus? par où il appert qu'il n'a
cherché autre chose que le moyen de luy faire receuoir vne honte en moy qui suis
enuoyé de par luy, & de le mettre à bas par vn mespris & contemnement. Comment?
luy respondit Thales, tu crains donc que comme les Ægyptiens disent, que les astres,
en faisant leurs reuolutions ordinaires, sont vne fois haults, & puis vne autre fois
bas, & selon leur hauteur ou leur bassesse deuient pires ou meilleurs qu'ils n'estoient,
aussi que pour le lieu que lon t'a baillé tu n'en deuennes plus rauallé & plus rabaisié: H
tu serois par ce moyen de plus lasche cœur que ce Laconien, qui aiant esté par le
maistre des cerimonies colloqué tout au plus bas & dernier lieu de la danse, ne s'en
courrouça point autrement, ains dit seulement, Tu as bien sceu trouuer le moyen
comme tu rendrois ce lieu-cy honorable. Quand nous sommes assis à la table, il ne
faut pas regarder apres qui nous sommes assis, mais plus tost comment nous nous
accommoderons & rendrons agreables à ceux aupres de qui nous sommes, montrans
dés l'arriuee apparence d'auoir, ou plus tost aians à bon esciant dedans nous-mesmes
la source & l'anse, par maniere de dire, de contracter amitié avec eux, par ne nous fas-
cher point de lieu qu'on nous baille, ains plus tost louer nostre bone fortune, de nous
estre rencontrez avec si bonne compagnie : car celuy qui se courrouce pour le lieu &
assiette qu'on luy baille, se courrouce plus tost à celuy aupres de qui il est à table, qu'à
celuy

- A celui qui l'a conuié, & se rend odieux à l'un & à l'autre. Ce sont paroles que cela, dit adonc Alexidemus, mais en effect ie voy, que iusques à vous autres sages cherchez bien les moyens de vous faire honorer: & en disant cela il passa outre, & s'en alla. Et Thales se tournant deuers nous, qui nous esbahissions grandement de l'estrange façon de faire de cest homme: C'est vn fol esceruellé, ce nous dit-il, d'une bizarre nature, comme vous pourrez cognoistre par vn tour qu'il feit estant encore sur le commencement de son adolescence. On auoit apporté à son pere Thrasylbulus de l'huile de parfum fort excellente: il la versa toute dedans vne grande tasse, & du vin tout pur par dessus, puis beut & aualla l'un & l'autre tout ensemble, engendrant inimitié au lieu d'amitié à Thrasylbulus. Cela fait, il vint vn seruiteur à l'entour de la table, qui me dit, Periander vous prie que prenant Thales avec vous, & cest estranger aussi, vous veniez voir quelque chose que lon luy a apportee de nouveau, pour scauoir sil la doit prendre comme fortuitemēt aduenue, ou bien comme vn presage qui prognostique quelque chose: car il s'en trouue quant à luy tout troublé, aiant peur que ce ne soit vne pollution & vne macule à son sacrifice. En disant cela il nous mena en vne maison qui respondoit sur le iardin, là où nous trouuâmes vn ieune garçon, qui sembloit estre quelque pastre à le voir: il n'auoit point encore de barbe, & au demourant n'estoit point laid de visage: lequel desployant vn manteau de cuyr, nous monstra vn ieune tendron qu'il disoit estre né d'une iument, duquel le hault iusques au col & aux mains auoit forme d'homme, & tout le reste de cheual: criant au reste tout ne plus ne moins que font les petits enfans quand ils sortent du ventre de leurs meres. Niloxenus adonc l'ayant entreveu, tourna soudain sa face de l'autre costé, en s'escriant, O Dieu nous veuille preseruer! Mais Thales regarda le ieune garçon d'œil fiché bien long temps: puis en se riant, pource qu'il auoit tousiours accoustumé de se iouer à moy, touchant mon art, il me dit: Ne pensez-vous pas desia, Diocles, à faire quelque expiation de ce prodige, & en empescher les Dieux qui ont le soing de destourner les malheurs imminents, comme estant cecy vn grand prodige & vn mauuais accident? Pourquoi non, luy respons-je? car ie vous aduise Thales, que c'est vn presage de discord & de sedition, & ay grand peur qu'elle ne passe iusques aux mariages, & iusques à l'acte de generation, auant que le premier courroux de la Deesse soit appaisé, qui le nous monstre par ce second presage, comme vous voyez. Thales ne respondit rien à cela, ains s'en riant, s'osta de là. Et comme Periander nous fust venu au deuant à la porte de la salle, nous enquist touchant ce que nous venions de voir, Thales me laissant, & le prenant par la main luy dit: Quant à ce que Diocles te suade de faire, tu le feras tout à loisir: mais quant à moy, ie te conseille de ne te seruir plus d'orsnauant de si ieunes pastres à garder tes iuments, ou bien de leur donner des femmes. Si me sembla que Periander fut bien fort aise de ceste parole, car il s'en prit à rire, & embrassant Thales le baïsa. Et si croy, dit-il, en se tournant vers moy, Diocles, que ce prodige a desia son euenement, car vous voyez le grand mal qui nous est desia aduen, par ce que Alexidemus n'a pas voulu soupper avec nous. Quand nous fûmes enués dedans la salle, Thales commençant à parler plus hault: Et où est-ce, dit-il, que lon auoit logé cest homme de bien qui s'est courroucé du lieu qu'on luy auoit baillé? & l'y aiant esté la place monstree, tournant à l'entour, il sy en alla seoir, & nous y mena uad & luy, disant: Quant à moy, i'eusse achetté l'occasion de māger avec Ardalus: or estoit cest Ardalus Troezenien ioueur de fleutes, & presbtre des muses Ardaliennes dont l'ancien Ardalus Troezenien aussi auoit doné & dedié les images. Mais Æsopeluy depuis n'agueres auoit esté enuoyé par le Roy Cræsus, tāt deuers Periander, cōme deuers l'oracle d'Apollo en la ville de Delphes, estant assis sur vn banc bas aupres de Sion, qui estoit au dessus de luy, se prit à dire, Vn mulet de Lydie aiant veu la forme & figure de son corps dedans vne riuere, & s'esbahissant de la beauté & grandeur d'eluy, se meit à

Le banquet des sept Sages.

courir à toute bride, en secoüant la teste comme vn cheual eschappé : mais quand il e vint à penser en luy-mesme qu'il estoit fils d'un asne, il cessa soudainement de courir, & mit fin à son audace & à sa brauerie. Alors Chilon en son langage Laconien luy dit, Cela s'adresse à toy-mesme, qui estardif comme vn asne, & cours comme vn mulet. Apres cela entra Melissa, qui s'alla seoir aupres de Periander, & Eumetis s'assit aussi pour souper. Thales adressa sa parole à moy qui estois assis au dessus de Bias, & me dit, Amy Diocles, que ne dis-tu à Bias, que ton hôte Niloxenus de Naucratic est venu par deça enuoyé par son Roy deuers luy, pour luy apporter de rechef de nouvelles questions à soudre, à fin qu'ils les recoiue estant encore sobre, & en estat d'y pouuoir bien penser? Et Bias prenant la parole, Il y a ja long temps, dit-il, que pour me cuider estonner il m'admoneste de ce faire : mais quant à moy ie sçay tresbien, que Bacchus est au reste vn sage & puissant Dieu, & que pour sa sapience on le surnomme Lysien, qui vault autant à dire comme, desliant toutes difficultez : c'est pourquoy ie n'ay point de peur d'estre moins asseuré au combat pour estre remply de luy, F quand il me conuiendra disputer. De tels ioyeux propos s'entre-iouoient-ils l'un avec l'autre en soupant : & voyant l'appareil du souper vn peu moindre que l'ordinaire, il me vint en pensee, comme pour festoyer & donner à souper à des hommes sages & gens de bien, on n'en entre point en plus grande despense, ains que plus tost on la diminue, pour ce que lon en oste toute curiosité de viandes exquisés, des parfums, confitures & marchepàs apportez d'estrange pais, & des vins delicieux : dont Periander estant tous les iours seruy en son ordinaire pour la magnificence de son estat, de ses richesses, & de ses affaires, neantmoins il faisoit lors gloire enuers ces sages hommes-là, de se passer à peu sobrement : car non seulement il fait oster toute autre superfluité d'ornemens accoustumez, mais encore à sa propre femme il les fait laisser & cacher, & la leur mostra ornee de peu d'estat, & de modestie seulement. Apres que les tables furent ostées, & que Melisse eut enuoyé de rang à chascun des conuiez son chapeau de fleurs, nous rendismes graces aux Dieux, en leur espanchant vn peu de vin : G & la menestriere aiant vn peu chanté apres graces, se retira incontinent de la salle. Lors Ardalus appellant Anacharsis par son nom, luy demanda, si y auoit des menestrieres entre les Scythes : & luy sans songer luy respondit sur le champ, Non pas seulement des vigies. Et comme Ardalus luy repliquast, Voire-mais si y a-il des Dieux pourrât : Ouy ceres, respondit-il, il y en a voirement, & qui entendent la langue & parole des homme, non pas comme les Grecs qui s'estiment plus elegamment parler que les Scythes, & reantmoins ont opinion que les Dieux oyent plus volontiers le son des fleutes & haubis qui sont faits d'os & de bois, que non pas la voix & parole de l'homme. Et que crois-tu donc au pris, ce dit alors Æsope, si tu sçauois ce que font au iourd'huy les faiseurs de fleutes, qui reiettent les os des ieunes cerfs & biches, & choisissent ceux des asne, pource qu'ils disent que le son en est meilleur : & pourtant Cleobuline en a fait vn de ses enigmes, sur la fleute Phrygiene, H

Disne braiard iambe morte a l'ouye

Du chef ramé de grand cors resiouye.

de sorte qu'il c'est merueille comment l'asne, qui au demourant est vne fort grosse & lourde best, esloignee de toute douceur & harmonie de musique, peult bailler vn os ainsi delié & propre à faire vn harmonieux instrument de musique. Certainement, dit adonc Niloxenus, c'est ce que les habitans de Busiris nous reprochent à nous autres de Naucratic : car nous commençons aussi desia à vser des os d'asnes à faire fleutes, & à eux ne leur est pas loysible d'ouyr seulement le son d'une trompette, pour autant qu'elle tire vn peu au braire de l'asne : or sçauiez-vous que l'asne est fort dif-famé & haï enuers les Ægyptiens, à cause de Typhon. Apres cela chascun se taisant, Periander voyant que Niloxenus auoit bien bonne enuie de parler, mais qu'il n'osoit

A n'osoit entamer le propos, commença à dire, Seigneurs, ie trouue bonne la coustume des villes & des magistrats qui donnent audience, & despeschent premiere-ment les estrangers que leurs citoyens: & pourautant me sembleroit-il bon, que pour vn peu de temps vous retinsiez vos propos, qui nous sont tous familiers, & comme nez en nostre pays, & que vous donnissiez entree & audience, comme en vne assemblée de ville, à ceux que nostre bon amy Niloxenus a apportez d'Ægypte, mesme-ment de la part du Roy à Bias, & Bias en veult conferer avec vous. Alors Bias suiuant son dire: Et en quel lieu, dit-il, ny avec quelle compagnie me pouuois-ie plus delibe-rément hazarder qu'en ceste-cy, à faire de telles responses, fil en est besoing? attendu mesmement que le Roy mande expressément, que lon cōmence premieremēt à moy à me proposer sa question, & puis que lon l'aille puis apres de rang presentant à tous vous autres. Ainsi luy bailla lors Niloxenus la Lettre close du Roy, & le pria de l'ouuir, & de la lire hault & clair deuant toute la compagnie. Si estoit la substance

B des Lettres telle:

» Amasis le Roy d'Ægypte, à Bias le plus sage des Grecs, salut. Le Roy d'Æthiopie
» est entré en contestation de sapience à l'encontre de moy, & s'estant trouué vaincu en
» toutes ses autres propositions, finalement il m'a proposé vn mandement fort estrāge
» & merueilleusement difficile à accomplir, c'est qu'il m'a commandé, que ie boiue
» toute la mer. Et si ie puis venir à bout de soudre ceste question, ie gagneray plusieurs
» villes & villages, qui sont à luy: & si aussi ie ne la puis resoudre, il fault que ie luy cede
» les villes de la contree Elephantine. Et pourtant apres que tu y auras bien pensé, ren-
» uoye moy incontinent Niloxenus: & si tu as affaire pour toy ou pour tes citoyens, ie
» t'aduise que rien ne te defaudra de ma part.

Ces lettres leuës, Bias n'arresta pas long temps, ains apres auoir vn peu pensé en soy-mesme, & vn peu parlé en l'oreille à Cleobulus, qui estoit assis tout ioignant luy, se prit à dire: Comment amy Naucratiens, le Roy ton maistre Amasis, qui commande
C à si grande multitude d'hommes, & qui possède vn si beau & si bon pays, voudra-il bien boire toute la mer pour gagner ie ne sçay-quels meschans villages de peu de va-leur? Et Niloxenus en riant luy respondit, Ie te prie de considerer diligemment ce qu'il est possible pour y respondre, comme fil le vouloit. Or qu'il mande doncques à cest Æthiopien, qu'il arreste les riuieres qui se deschargent en la mer, iusques à ce qu'il ait acheué de boire toute l'eau de la mer qui est à present: car c'est de celle-là dont est fait le mandement, & non pas de celle qui sera par cy apres. Quand il eut dit ces paroles, Niloxenus en fut si aise, qu'il ne se peut contenir qu'il ne l'embrassast & baisast sur l'heure: & tous les autres louèrent & approuuerent aussi semblablement son dire. Mais Chilon en se riant, O Naucratiens mon amy, dit-il, ie te prie auant que la mer toute beuë perisse, retourne t'en par mer annoncer au Roy ton maistre
D qu'il ne se trauaille pas à chercher comment il pourra consumer vne si grande quan-tité d'eau salee, mais plus tost comment il pourra rendre son regne bien dessalé & doux à boire à ses subiects: car Bias est grand ouurier, & vn fort excellent maistre de ce mestier-là: lequel quand Amasis aura bien appris de luy, il n'aura plus besoing du bassin d'or* enuers les Ægyptiens pour les contenir en obeissance, ains le seruiront tous volontiers, & l'aimeront affectueusement, quand ils verront qu'il sera deuenu bon Prince, voire & fust-il encore de plus bas & de plus petit lieu venu qu'il n'est. Cer-tainement, dit adonc Periander, ce seroit chose digne que nous contribuissions tous à ce Roy de tels presens, *ἀνδραγαθή*, comme parle Homere, c'est à dire par teste: car par ce moyen l'accessoire luy sera plus vrile que le principal de son voyage, & à nous-mesmes il en reuiendra vn tresgrand profit. Alors dit Chilon, Il seroit raisonnable que Solon commençast le propos, non seulement pource qu'il est le plus ancien de nous tous, & qu'il est au premier lieu de la table, mais aussi pource qu'il tient le plus

Voyez He-
rodote du
regne d'A-
masis, liure
4.

Le banquier des sept Sages.

grand & le plus digne office, estant le premier qui a fait & estably les loix aux Athe- E
niens. Niloxenus adonc se tournant deuers moy, me dit tout bas en l'oreille, Certaine-
ment on croit, Diocles, beaucoup de choses à faulces enseignes, & y en a qui prennent
plaisir à controuuer eux-mesmes de faulces nouuelles, touchant les grands & sages
hommes, & à en receuoir de controuuees par d'autres, comme sont celles que lon
nous a apportees iusques en Ægypte de Chilon, qu'il auoit renoncé à l'amitié & hos-
pitalité de Solon, pourautant qu'iceluy Solon maintenoit que les loix estoient mu-
ables. Cela est vn propos digne de mocquerie (dis-ic) car il faudroit premieremēt chasser
Lycurgus & toutes ses loix, avec lesquelles il a renuersé tout l'ancien ordre de la repu-
blique de Lacedemone. Solon doncques aiant vn peu demouré, se print à dire: Il
me semble qu'un Roy ou Prince souuerain n'a moyen de se redre plus glorieux, qu'en
faisant de sa Monarchie vn Democratie, c'est à dire, en communiquant son autorité
souueraine à ses subiects: Le second fut Bias, qui dit, En se rendant luy-mesme le pre-
mier subiect aux loix de son pais: Apres luy Thales dit, Je repute vn Seigneur bien- F
heureux, qui peut arriuer à la vieillesse, & mourir de mort naturelle: Le quatrième,
Anacharsis, fil est seul sage: Le cinquième, Cleobulus, fil ne se fie à personne de ceux
qui sont autour de luy: Le sixième, Pittacus, fil peut tant faire que ses subiects crai-
gnent non luy, mais pour luy. Apres luy Chilon dit, qu'un Prince ne doit penser à
nulle chose transitoire ne mortelle, mais eternelle & immortelle. Apres que tous ces
sages eurent ainsi dit chascun leur mot, nous requerions Periander, qu'il voulust aussi
à son tour dire le sien. Et luy avec vn visage non gueres ioyeux, mais pensif & cha-
grin: Je vous diray ce qui me semble de toutes les sentences qui ont esté dittes par ces
Seigneurs, c'est qu'elles desgoustent presque toutes, l'homme de bon iugement, de
vouloir iamais commander aux autres. Et adonc Æsope, comme celuy qui aimoit à
reprendre: Il falloit donc, dit-il, que chascun de vous à par-foy feist & pensast cela,
non pas qu'aiants pris à conseiller vn Prince, & faisants profession de luy estre amis,
se constituer comme accusateurs des Roys & des Princes. Et Solon luy ambrassant la G
teste, luy dit en riant, Ne te semble-il pas Æsope, que celuy rende vn seigneur plus
modéré, & vn tyran plus gracieux, qui luy suade, qu'il est meilleur ne commander
point, que commander? Et qui sera celuy, respondit Æsope, qui te croira en cela,
ny au dieu Apollo mesme qui te rendit vn tel oracle,

De celle ville est heureuse la gent,

Là où ne soit que la voix d'un sergent.

Solon luy repliqua, Aussi n'oit-on maintenant à Athenes que la voix d'un huissier,
& d'un seul magistrat, qui est la Loy, estant la ville en estat populaire: Mais toy Æso-
pe, qui as le sens d'entendre les voix des corbeaux, voire des geais, tu n'entens pas
cependant la tienne propre, ny ta propre parole: car tu repoutes, suiuant l'oracle d'A-
pollo que tu as allegué, que la ville soit tresheureuse qui n'entend qu'une voix, &
cependant tu estimes, que ce soit la beauté & perfection d'un conuiue, que tous les H
conuiez y parlent, & de toutes choses. Ouy vrayement, dit Æsope, pource que tu
n'as pas encore escrit la loy (d'autant que c'est tout vn) que les serfs n'ayent point à
s'enyrer, comme tu en as fait à Athenes vne, que les esclaves n'ayent point à faire
l'amour, ny à soindre à sec. Solon se prit à rire de ceste replique: Et le medecin
Cleodemus, Il me semble, quant à moy, que c'est tout vn que de s'huyler à sec, &
de causer apres que lon a bien beu, car l'un & l'autre est fort plaisant. Et Chilon pre-
nant le propos, C'est pourquoy, dit-il, on s'en doit plus contregarder. Et Æsope de
rechef, Voire mais il semble que Thales a voulu dire, qu'il vieillira bien tost. Perian-
der adonc se prenant à rire, Vrayemēt, dit-il, nous auons tous payé la peine que nous
meritions, Æsope, de ce que nous nous sommes laissez transporter en autres propos,
deuant que d'auoir entendu tous ceux du Roy Amasis, ainsi que nous auons pro-
posé

A posé du commencement. Et pource, Seigneur Niloxenus, poursuy le demourant de sa lettre missiue, & te fers de ces personnages icy, ce pendant que tu les as tous ensemble. Voire-mais, respondit Niloxenus, il m'est aduis que le mandement de cest Æthiopien se pourroit proprement nommer le triste bulet^m,* ainsi que parle Ar-

chilochus : Mais le Roy Amasis ton hoïste est bien plus gracieux en semblables que-
 „ stions & plus gentil : car il luy demanda, Quelle chose au monde estoit la plus vieille,
 „ Quelle la plus belle, la plus grande, la plus sage, la plus commune : & par dessus encore,
 „ Quelle est la plus profitable, Quelle la plus dommageable, Quelle la plus puissante,
 „ & quelle la plus facile. Comment l'Æthiopien respondit doncques à chascune de
 ces demandes, & les solut-il toutes ? Voicy comment il respondit, ce dit Niloxenus,
 & vous iugerez, apres que vous aurez ouy ses responses, fil y satisfeist ou non : Car
 le Roy mon maistre y procede si sincerement, qu'il ne voudroit pour rien du monde,
 ny estre trouué calomniateur és responses d'autrui, ny aussi faillir à estre releué &

B repris, fil se trouuoit qu'il eust bronché & erré és siennes. Or ie vous reciteray de
 „ poinct en poinct, comment il y respondit : Quelle chose est la plus vieille du mon-
 „ de ? le Temps : Quelle la plus grande ? le Monde : Quelle la plus sage ? Verité : Quelle
 „ la plus belle ? la Lumiere : Quelle la plus commune ? la Mort : Quelle la plus profita-
 „ ble ? Dieu : Quelle la plus dommageable ? le Diable : Quelle la plus puissante ? For-
 „ tune : Quelle la plus facile ? ce qui plaist. Quand ces responses eurent esté leuës, Sei-
 gneur Nicarchus, il se fait vn peu de silence : & Thales adonc demanda à Niloxenus,
 si le Roy Amasis auoit approuué toutes ces solutions. Niloxenus fait response, qu'il
 en auoit approuué les vnes, & que de quelques autres aussi il ne s'en estoit peu con-
 tenter. Et toutefois, adiousta Thales, il n'y en a pas vne qui ne soit grandement re-
 prehensible, ains y a en toutes de grands erreurs & de grandes ignorances : comme
 dès le commencement : En quelle sorte peut-on soustenir que le Temps soit la plus
 ancienne chose du monde, attendu qu'une partie en est desia passée, l'autre presente, &

C l'autre encore à venir ? car le temps qui viendra apres nous, semble par raison deuoir
 estre estimé plus ieune que tous les hommes, & toutes les choses qui sont de present.
 Et puis d'estimer que Verité soit sagesse, il me semble que c'est tout autant comme
 qui diroit, que l'œil & la lumiere fussent tout vn : & puis fil estimoit que la lumiere
 soit chose belle, comme elle l'est aussi, comment oubloit-il le Soleil ? Au demourant
 quant à ce qu'il respond de Dieu & du Diable, il y a de l'arrogance & du danger beau-
 coup : & de la Fortune, il n'y a apparence quelconque : car si elle estoit si forte & si
 puissante comme il dit, comment se tourneroit & se changeroit-elle si facilement
 qu'elle fait ? Ny la mort n'est pas la plus commune chose qui soit au monde, car elle
 n'est pas commune aux viuans. Mais à fin qu'il ne semble que nous ne scachions que
 corriger les autres, conferons vn petit nos sentences particulieres avec les siennes.
 Quant à moy, ie me presente le premier à respondre de poinct en poinct, si Niloxenus

D me veult interroguer. Ie vous exposeray doncques maintenant icy par ordre les
 interrogatoires & responses, selon qu'elles furent lors proposees & respondues.
 „ Quelle chose est la plus vieille qui soit au monde ? c'est Dieu, respondit Thales : car il
 „ n'eut oncques commencement de naissance. Qui est la plus grande ? le Lieu : car le
 „ monde cōtient toutes autres choses, & le lieu contient le monde. Qui est la plus belle ?
 „ le Monde : car tout ce qui est disposé par bel ordre, est partie d'iceluy. Qui est la
 „ plus sage ? le Temps : car il a ja par cy deuant trouué tout ce qui s'est inuenté, & trou-
 „ uera encore cy apres tout ce qui finuentera. Qui est la plus commune ? Esperance :
 „ car elle demeure encore à ceux qui n'ont nulle autre chose. Qui est la plus profi-
 „ table ? Vertu : d'autant qu'elle rend toutes autres choses vtils en en vsant bien. Qui
 „ est la plus dommageable ? le Vice : car là où il est, il perd & gaste tout. Qui est la plus
 „ forte ? Necessité : car elle seule est inuincible. Qui est la plus facile ? ce qui est selon na-

*C'est vn
 cōmun pro-
 uerbe tiré de
 la façõ d'es-
 crire des La-
 cedemoniës
 quand ils
 vouloit es-
 crire quel-
 que secret à
 leurs Capi-
 taines ils
 leur escri-
 uoit sur vn
 petit rou-
 leau de para-
 chemin ca-
 stroit entor-
 tillé à l'en-
 tour d'un
 petit baston.*

Le banquet des sept Sages.

ture, car les hommes se lassent des voluptez mesmes quelquefois. Et comme toute E l'assistance eust grandement loué les réponses de Thales, Cleodemus se prit à dire: Voyla des questions qui sont cōuenables à proposer, & respondre aux Princes & aux Roys, Seigneur Niloxenus: mais ce Roy barbare d'Æthiopie, qui mande au Roy Amasis qu'il boiue la mer, auroit besoing d'une telle courte réponse, que fait Pittacus au Roy Alyates, qui commandoit par lettres quelque chose arrogamment aux Lesbiens: car il ne luy respondit autre chose, sinon qu'il l'admonesta de manger des oignons & des lupins. Si est-ce, dit Periander, que c'estoit la façon des anciens Grecs, Seigneur Cleodemus, de se proposer ainsi les vns aux autres de telles questions: car nous auons entendu que iadis la coustume estoit, que les plus sçauans & plus excellents poëtes qui fussent pour lors, s'assembloient à certain iour à l'entour de la sepulture d'Amphidamas en la ville de Chalcide. Cestuy Amphidamas estoit homme d'honneur & de valeur au gouuernement de la chose publique, & qui auoit donné beaucoup d'affaires aux Eretriens, es guerres qu'ils eurent contre ceux de Chalcide touchât F Lilantus, esquelles finalement il mourut. Et pour autant que les vers qu'apportoient les poëtes, rendoient le iugement difficile & fascheux à ceux qui estoient esleus pour iuges, & que la gloire de deux concurrents, Homere & Hesiodé, tenoit les iuges en grande perplexité, pour la honte qu'ils auoient de donner leurs sentences de deux si grands personages, ils se tournerent à demâder les vns aux autres de telles questions, ainsi comme raconte Lesches,

Muse dy moy ce qu'on confessera

Qui ne fut onc, ny iamais ne sera.

A quoy Hesiodé respondit sur le champ promptement,

Quand les cheuaux de rendon furieux,

Pour emporter les pris victorieux,

Courans entour la tombe & sepulture

De Iupiter, y rompront leur voicture.

G

& dit on que pour cela il fut tant estimé, qu'on luy en adiuagea le Tripié d'or. Et quelle difference y a-il, dit adonc Cleodemus, entre ces demandes-là, & les obscures questions de Eumetide? lesquelles ne luy sont pas à l'aduenture malseantes à inuenter, par maniere de ieu, & à proposer aux autres Dames, comme les autres s'amusent à tisser des cordons & à faire des coëffes de resiau: mais que les hommes d'entédement en fassent aucun compte, c'est vne droite mocquerie. A quoy il sembloit que Eumetide luy eust volontiers repliqué quelque chose, mais elle se reteint de honte, qui luy fait mōter la couleur au visage. Et Æsopé, comme pour la reuenger, se print adonc à luy respondre: Et n'est-ce pas encore plus grande mocquerie de ne les pouuoir pas soudre? comme est celle qu'elle nous a proposée vn peu auant souper,

J'ay veu coller du cuyure avec le feu,

Dessus le corps d'un homme en plus d'un lieu.

H

Nous sçauois tu declarer que c'est que cela? Nenny pas moy, respondit Cleodemus, ny ne me foucie pas de le sçauoir. Et toutefois, luy repliqua Æsopé, il n'y a personne qui le sçache mieux, ne qui le face plus que toy: & si tu le nies, i'en croy, dit-il, les cornets & ventoses. Adonc Cleodemus se prit à rire, car il il vsoit plus d'appliquer des ventoses que autre medecin qui fust de son temps, & estoit ce remede de medecine en vsage & en reputation autant que nul autre, pour l'amour de luy. Mais Mnesiphilus Athenien, familier & grand zelateur de Solon, se prit lors à dire: Seigneur Periander, ie desirerois quant à moy, que ce deuis & propos de ceste belle compagnie ne fust point departy aux riches ny aux nobles seulement, ains qu'il fust distribué également par teste, & communiqué à tous comme le vin, ainsi qu'il se fait es citez qui sont regies par gouuernement populaire. Ce que ie dis, d'autant que nous au-

tres

A tres qui viuons en estat populaire, n'auons aucune participation à tout ce que vous auez n'agueres dit, touchant la principauté & le gouuernement d'un Roy : & pour ce nous sembleroit-il raisonnable que recommençant derechef à discourir, vous alleguissiez chascun à son rang quelque notable sentence touchant le gouuernement populaire, où chascun a égale autorité, & que Solon fust derechef le premier qui commençast à dire la sienne. Tous furent alors d'aduis d'ainfi le faire.

» Et pourtant Solon commença à dire : Voire-mais, amy Mnesiphile, toy & tous les
 » habitans d'Athenes auez ja pieça entendu quel est mon iugement & aduis touchant
 » le gouuernement de la chose publique : toutefois si tu le veux encore maintenant en-
 » rendre, ie te dis qu'il me semble, Que la cité est tresbien gouuermee, & maintient tres-
 » bien l'estat & liberté populaire, en laquelle ceux qui ne sont point outragez, haïssent
 » autant & poursuiuent aussi asprement celuy qui a fait vne oppression & outrage,
 » que celuy qui est outragé. Apres luy Bias dit, que le gouuernement populaire luy
B sembloit estre tresbon, auquel tous les habitans redoutent la loy comme vn seuer
 » tyran. Apres lequel Thales opina disant, que celle chose publique luy sembloit la
 » mieux ordonnee, où il n'y auoit point d'hommes ny trop riches ny trop pauvres.
 » Suiuant celuy-là Anacharsis dit, que c'estoit à son aduis celle, en laquelle toutes autres
 » choses estans égales entre les habitans, la precedente se mesuroit à la vertu, & le rebut
 » au vice. Le cinquième, Cleobulus, afferma, que la cité populaire luy sembloit estre
 » la mieux policee, en laquelle les entremetteurs du gouuernement redoutoient plus le
 » deshonneur que la loy. Le sixième, Pittacus, celle où les meschans n'ont point autorité
 » de commander, & les bons si. Ioignant lequel Chilon prononça, que celle police luy
 » sembloit estre la meilleure, où le peuple prestoit plus l'oreille aux loix, que non pas
 » aux orateurs. Et apres tous Periander le dernier donnant son iugement, dit, qu'il luy
 » sembloit que tous estimoient le gouuernement populaire estre le meilleur, qui ap-
 » prochoit le plus pres de celuy d'un sage Senat. Ce propos estant acheué, ie les priay
C qu'ils voulussent aussi nous enseigner du mesnage, comment il fy fallloit gouuerner,
 pour ce qu'il y a peu d'hommes qui soient appelez à gouuerner les villes ny les roy-
 aumes, mais du gouuernement de son mesnage, & de sa maison, chascun en a sa part.
 Non n'a pas, ce dit Æsope en se riant, si vous y comprenez Anacharsis : car quant à
 luy, il n'a point de maison, & si fait gloire de n'en auoir point, ains de demourer en
 vn chariot, comme lon dit que fait le Soleil, qui va tournant tout à l'entour du ciel,
 tantost en vne contree, & tantost en vne autre. C'est pourquoy, respōdit Anacharsis,
 le Soleil seul, ou plus que nul autre de tous les Dieux, est franc & libre, commandant
 à tous, & n'estant commandé de personne, & pourquoy il regne & cōduit luy-mesme
 son chariot : mais il me semble que tu n'as iamais compris en ton entēdement la gran-
 deur & beauté d'iceluy, combien excellent & admirable est son chariot : car autre-
 ment tu ne l'eusses iamais en iouant, & par maniere de risée, cōparé aux nostres : au de-
D mourāt il semble que tu appelles maison ces toits couverts de tuile, de bois, & de terre
 cuitte, ne plus ne moins que si tu disois que la tortue fust sa coque, & non pas l'animal
 qui est dedans. C'est pourquoy ie ne m'esbahis pas, si tu te mocquas il y a quelque
 tēps de Solon, pour ce qu'ayant veu le palais de Crœsus fort richement & somptueu-
 sement orné, il ne iugea pas incontinent celuy qui en estoit possesseur, estre logé heu-
 reusement & magnifiquement, pour ce qu'il vouloit premierement estre spectateur,
 & voir à l'œil les biens qui estoient dedans luy, plus tost qu'alentour de luy. En quoy
 il me semble que tu as oublié ton regnard, lequel estant venu en cōtestation à l'encon-
 tre du leopard, à sçauoir lequel des deux estoit plus taulé de diueres mouchetures, il
 requit à leur iuge, qu'il ne cōsiderast pas tant les taulures & mouchetures exterieures
 de la peau, que celles de l'esprit au dedans, pour ce que de là il t'apparoistra que ie suis
 » plus taulé & mieux moucheté que luy : mais tu vas regardāt seulement aux ouurages

Le bancquet des sept Sages.

des tailleurs de pierres & des maçons, estimant que cela seul soit la maison, non pas ce **E**
qui est dedans chascune, & qui luy est propre & domestique, comme sont les enfans,
la femme, les amis, les seruiteurs, auxquels estans sages & bien conditionnez, le pere de
famille communiquant & faisant part de ce qu'il a, fust-ce dedans vn nid d'oiseau, ou
dedans vne formiliere, se peut dire habiter vne bonne & heureuse maison. Voyla ce
que ie respons à Æsope, quant à moy, & que ie contribue pour ma quote à Diocles:
au demourant, il est raisonnable qu'un chascun de vous en die son aduis. A laquelle
semonce Solon respondit, Que celle maison luy sembloit tresbonne, de laquelle les
biens n'estoient point acquis avec iniustice, ny gardez avec desfiance, ny despendus
avec regret. Bias apres: en laquelle, dit-il, le maistre est tel au dedans, par luy-mesme,
comme il est au dehors par la crainte de la loy. Et Thales: en laquelle, dit-il,
le maistre a moyen de viure en grand loisir. Et Cleobulus: là où il y a plus de per-
sonnes qui aiment le maistre, que qui le craignent. Pittacus dit, que la meilleure
maison est celle qui n'a faute de chose quelconque, ny superflue, ny necessaire. **F**
Chilon opina, que la maison doit, le plus qu'il est possible, ressembler à vne cité
gouvernee par le commandement d'un Roy: Puis y adiouta, que Lycurgus auoit
iadis respondu à vn qui luy conseilloit d'establir en la ville de Sparte vn gouverne-
ment populaire, Commence toy-mesme le premier à mettre en ta maison l'estat po-
pulaire, où chascun soit aussi grand maistre l'un que l'autre. Apres que ce propos fut
aussi acheué, Eumetide sortit avec Melisse. Et Periander prenant vne grande coupe
beut à Chilon, & Chilon de rang à Bias. Et adonc Ardalus se leuant & adressant sa
parole à Æsope, Ne nous veux-tu pas, dit-il, enuoyer aussi la coupe icy, veu que
ceux là se la renuoyent de main en main les vns aux autres, comme si ce fust le hanap
de Bathycles, sans en faire part aux autres? Et Æsope adoncques dit, Ny ceste
coupe mesme, à ce que ie voy, n'est point populaire, car il y a ja long temps qu'elle
demeure deuant Solon seul. Et Pittacus appellant Mnesiphilus par son nom: Pour-
quoy est-ce dit-il, que Solon ne boit, ains contredit à ses poëmes propres, esquels il **G**
a luy-mesme escrit,

Dame Venus est ores mon deduit,

Et de Bacchus le bruuage me duit,

Les dons aussi des Muses: car ce sont

Les poincts qui l'homme en plaisir viure font.

Anacharsis prenant la parole luy repliqua: C'est pour autant, Pittacus, qu'il te re-
doute, & celle tienne rigoureuse & seure loy, par laquelle tu as ordonné, si quel-
qu'un pour estre yure, vient à commettre vne faute, quelle qu'elle soit, qu'il fust pu-
ny au double, que s'il eust esté sobre. Et lors Pittacus: Mais neantmoins, dit-il,
tu t'es si superbement mocqué de mon ordonnance, que n'agueres chez mon
frere Libys, t'estant enyuré, tu en demandas le pris & la couronne. Pourquoi non,
respondit Anacharsis, veu que lon auoit proposé pris de la victoire à qui beuroit le **H**
plus, m'estant enyuré des premiers, n'eusse-je voirement demandé le pris de la
victoire? ou bien enseigne moy quelle autre fin il y a de bien boire, sinon que s'en-
yurer. Pittacus s'estant pris à rire, Æsope recita vne telle fable: Le loup aiant apperceu
des bergers qui mangeoient vn mouton dedans leur loge, s'approchant d'eux, Quel
bruit, dit-il, vous meneriez, si ie faisois ce que vous faites! Chilon adonc: Æsope,
dit-il, a eu sa reuanche bien à propos, de ce que n'agueres nous luy auons fermé la
bouche, voyant que maintenant d'autres ont rompu le propos, & osté la parole de la
bouche de Mnesiphilus, auquel on auroit demandé qu'il respondist pour Solon.
Adonc Mnesiphilus parla ainsi, Qu'il sçauoit bien que l'opinion de Solon estoit telle,
que l'œuvre de tout art & de toute faculté, tant humaine que diuine, estoit plus tost
son effect que ce parquoy elle le fait, & sa fin plus tost que les moyens tendans à icelle

fin

A fin: comme l'œuvre d'un tissier, à mon avis, est plus tost de faire un manteau, ou une robe, que non pas de disposer ses fils, & de dresser ses peçons: & d'un taillandier fonder le fer, & donner la trempe à une congnee, plus tost que chose aucune qui soit nécessaire pour cest effect, comme d'embraser les charbons ou preparer du chapplis de pierres. Et d'auantage un architecte nous reprendroit bien à bon droit, qui luy diroit, que son œuvre fust non bastir une maison, ou une nauiure, mais percer des pieces de bois, ou bien destremper du mortier. Et les Muses se plaindroient merueilleusement, & non sans cause, de nous, si nous estimions que leurs ouvrages fussent des citres ou des fleutes, & autres tels instrumens de Musique, non pas instruire les mœurs, & addoucir les passions de l'ame de ceux qui se delectent des chansons, harmonies & accord de la musique: Aussi doncques faut-il que nous confessions, que l'œuvre de Venus n'est pas l'assemblée ny la meslange des corps, ny de Bacchus l'yuressé ny le boire vin, mais bien la resiouissance, l'affection, l'amitié & la familiarité, qu'ils nous engédrent des uns envers les autres. C'est ce que Solon appelle œuvres diuines, & c'est ce qu'il dit qu'il aime, & qu'il desire, & qu'il poursuit estant devenu vieil: car certainement Venus est l'ouuriere de la concorde, & mutuelle bien-veillance qui est entre les hommes & les femmes, meslant & fondant ensemble, par le moyen de la volupté, les ames avec les corps: & Bacchus à plusieurs qui parauant n'auoient pas grande familiarité ensemble, ny pas la cognoissance seulement les uns des autres, amollissant & humectant, en maniere de dire, la dureté de leurs mœurs par le vin, ne plus ne moins que le fer s'amollist dedans le feu, leur donne un commencement de commixtion & incorporation des uns avec les autres. Il est bien vray que quand tels personnages, comme sont ceux que Periander icy conuiez, s'assemblent & conuiennent ensemble, il n'est ia besoing de coupe ny de verre pour les allier: car les Muses apportans au milieu de la compagnie, comme une coupe de sobriété, le deuis, où il y a non seulement beaucoup de plaisir, mais aussi d'erudition, de doctrine & de profit, excitent, arrosent & respandent, par le moyen de ce discours, la ioye & la caresse parmy les cœurs des assistans, en laissant bien souuent le pot au dessus de la tasse en repos sans en vser, au contraire de ce que defend Homere à ceux qui sçauent miculx boire que discourir ne deuiser,

Iliad. liu. 4.

Si lon bailloit à boire par mesure

Aux autres Grecs à longue chevelure,

Ta coupe estoit pleine & raise tousiours.

Car i'entens mesmes que les anciens appelloient ces prouocations à boire, Dætron, comme Homere les appelle, & que chascun beuuoit à certaine mesure: & puis ainsi que fait Ajax, en partoioit une portion à celui qui estoit plus prochain de luy à table. Apres que Mnesiphilus eut ainsi parlé, le poëte Chersias, qui nagueres auoit esté absous par Periander des crimes à luy imposez, & estoit retourné en bonne grace avec luy, à la requeste de Chilon: Je sçauois volontiers, dit-il, si Iupiter distribuoit à boire aux Dieux par mesure, pource qu'ils beuuoient les uns aux autres quand ils mangeoient avec luy, ne plus ne moins que faisoit Agamemnon aux Princes Grecs quand ils estoient à sa table. Et lors Cleodemus: S'il est vray, dit-il, amy Chersias, comme vous autres poëtes le dittes, que des colombes volans à grande peine & grande difficulté par dessus les rochers qui s'appellent Planctæ, apportent la viande de l'Ambrosie à Iupiter, n'estimez-vous pas que le breuage du Nectar luy soit aussi bien cher, bien rare & difficile à recouurer? de maniere, qu'il l'espargne & le donne à chascun par mesure. Ouy, & par esgale mesure, respondit Chersias. Mais puis que nous sommes de rechef retombez sur les propos du mesnage, qui sera celui de vous qui nous dira ce qui en reste à dire? car il nous reste, ce me semble, à definir la quantité de biens qui sera suffisante, & dont l'homme se deura contenter. Cleobulus adonc prenait

Le bancquet des sept Sages.

la parole : Quant aux sages, dit-il, la loy leur en a prescrite la mesure : mais quant aux E
fols, ie leur diray vn propos que i'ay autrefois ouy tenir par ma mere à vn mien frere.
Car elle disoit, que la Lune vn temps fut, pria sa mere de luy faire vn petit surcot, qui
luy ioignist bien au corps : Et comment est-il possible, respondit la mere, que ie t'en
tisse vn qui te ioigne bien, veu que ie te voy tantost toute pleine, puis apres en croi-
sant, & vne autre fois en decours? Aussi, amy Chersias, on ne scauroit definir mesure
aucune certaine de biens à vn fol, ny à vn vicieux: car il a besoing tantost d'une chose,
& tantost d'une autre, à cause de ses diuerses cupiditez & diuerses aduentures: comme
le chien d'Æsope, que l'hyuer se resserant & se pliant en rond, pource qu'il auoit grand
froid, proposa de se bastir vne maison : mais au contraire, l'esté s'estendant tout de son
long en dormant, il se trouua grand, & pensa que ce n'estoit point chose necessaire
de bastir maison, avec ce qu'il luy sembla que ce ne seroit pas petite entreprise d'en
bastir vne assez grande pour luy. Ne vois-tu pas aussi Chersias, que ces gens-là font
tantost les petits, & se restraintent à bien peu de chose, comme proposans de viure F
fort estroittement & Laconiquement, puis tout à coup fils n'ont tout ce qu'ils voyent,
& aux priuees personnes, & aux Princes & Rois, ils se plaignent, comme fils estoient
prests à mourir de faim. Cela dit, Chersias se teut : & Cleodemus adonc prenant la
parole, Voire-mais, nous voyons, dit-il, que vous mesmes, messieurs les Sages, auez
les biens inegalement departis entre vous. Cleobulus respondit, C'est pourautant,
homme de bien, que la loy comme vn bon tissier, nous donne à chascun ce qui nous
est bien seant, sortable & conuenant: Et toy de mesme, nourrissant, gouuernant &
medicinant avec la raison tes malades, ne plus ne moins qu'avec la prescription d'une
loy, ne leur bailles pas des ordonnances égales, mais bien conuenables à vn chascun.
Ardalus suiuant ce propos: Comment, dit-il, y a-il doncques quelque loy qui com-
mande à nostre familier Epimenides, hôte de Solon, de s'abstenir de toute autre vi-
ande, & de prendre seulement en sa bouche vn petit de la composition, qui a puissance
d'empescher la faim, qu'il se compose luy-mesme, & avec cela demourer tout vn G
iour sans boire, ny manger, ny disner, ny souper? Ceste parole aiant fait ouurir les au-
reilles à toute l'assistance, Thales en se iouant respondit, que c'estoit sagement fait
à Epimenides, de ne se vouloir pas traualier à moudre ny à pestrir ses viures, comme
fait Pittacus: Car i'ay moy-mesme ouy estant en l'Isle de Lesbos, vne esclauue estragere,
qui en tournant la meule chantoit, Mouls meule, mouls, car aussi bien meult Pittacus
le Roy de la grande Mitylene. Et Solon dit, qu'il s'esbahissoit d'Ardalus, fil n'auoit
pas leu dedans Hesiode la recepte du regime de viure, que gardoit ce personnage-là:
car c'est celuy qui a premieremet baillé les semences de telle nourriture à Epimenides,
& qui luy a enseigné de chercher

Ceste com-
position
s'appelle Ali-
mon.

Au lieu in-
titulé Les
œuvres & les
lois.

Le grand profit qu'il y a en la mauue,
Et le grand bien qui est en la guymauue.

Comment? estimez-vous, ce dit Perianther, que iamais Hesiode ait pensé à cela, & non H
pas qu'il ait tousiours hautement loué l'espargne & la sobriété, & qu'il ne nous ait pas
tousiours grandement incitez aux plus simples viandes, comme à celles qui estoient
les plus plaisantes? car la mauue est bonne à manger, & l'aphrodile douce au goust:
& quant à ces choses-là, que les medecins appellent Alima & Adipsa, c'est à dire,
ostans la faim & la soif, i'entens que ce sont medecines, & non pas viandes, & qu'il y
entre du miel & du fromage barbaresque, & grand nombre de semences qui sont fort
aisées à recouurer: & fil est vray que telles drogues aient besoing de si peu d'appareil,
comment ne faudroit-il ainsi que dit Hesiode,

Pendre au foyer timon, soc, & charrue?
Des puissans bœufs les trauaux periroient,
Les forts mulets labourer plus n'iroient.

Et

- A Et m'esmerueille de ton hoste Solon, si aiant n'agueres fait ceste grande cerimonie de purification aux Deliens, il ne veid pas comme lon apportoit dedans le temple, des enseignes & memoires de l'ancienne premiere nourriture des hommes: comme entre autres choses fort communes, & qui naissent d'elles mesmes sans main mettre, la mauue & l'aphrodile, desquelles herbes il est vraysemblable que Hesiodé nous presente & recommande la simplicité & vtilité. Ce n'est pas pour cela tant seulement, dit adonc Anacharsis, ains pource que l'une & l'autre de ces herbes là sont louees d'estre fort saines entre les autres hortulages. Et Cleodemus, Vous auez raison, dit-il, car Hesiodé estoit entendu en medecine, comme lon peult cognoistre par ce qu'il escrit, non impertinemment ny negligemment, du regime de viure, de la façon de tremper le vin, de la bonté de l'eau, de l'usage du baing, & des femmes, du temps qu'il se faut approcher d'elles, comment il faut accoustrer les petits enfans qui viennent de naistre: mais à bien iuger, Æsopé
- B se deuroit plus tost & à meilleure raison aduouër pour disciple d'Hesiodé, que non pas Epimenides: car le propos qu'il fait que le Rossignol tient à l'Eparquier, a donné à Æsopé le commencement de ceste belle & variable sagesse, qui fait parler tant de langues: mais j'entendrois volontiers de Solon, pour ce qu'il me semble qu'ayant vescu & conuersé familièrement par longues annees avec Epimenides à Athenes, il est vraysemblable que par plusieurs fois il luy a demandé, pour quel accident ou pour quel conseil il auoit esleu & suiuy ceste si estroitte façon de viure. Et quel besoing estoit-il, respondit Solon, de luy demander? car il est tout manifeste, que si le plus grand & le plus souuerain bien de l'homme est, n'auoir aucun besoing de nourriture, le second apres est, de n'en auoir besoing que de bien peu. Je ne confesseray pas cela quant à moy, ce dit Cleodemus, que le souuerain bien de l'homme soit de ne manger point, mesmement quand on est à table: car en ostant la table, sur laquelle se sert la viande, on ruine l'autel des Dieux d'amitié
- C & d'hospitalité: & comme Thales dit, que la terre estant ostee de ce monde, il est force qu'il s'en ensuiue necessairement vne confusion de toutes choses: aussi pouuons-nous dire, que oster la table, c'est autant que ruiner la maison totale, car vous ostez quand-&-quand le feu, garde domestique, la deité tutelaire de Vesta, l'amiable coustume de boire les vns aux autres en vne mesme couppe, de festoyer ses amis, de receuoir les estrangers, & traiter ses hostes, qui sont les plus doulces & plus humaines communications & conuersations que les hommes scauroient auoir les vns avec les autres: ou pour mieulx dire en somme, toute la douceur de la vie humaine. Et si y-a occupation ou passetemps quelconque qui comprenne le discours des actions de l'homme, le besoing de nourriture, & la sollicitude de l'appareiller, en produit & suscite la plus grande partie: Aussi est-ce encore vn autre grand inconuenient que la destruction & ruine de l'Agriculture, car estant ruinee, elle nous
- D rendra & laissera de rechef la terre sans forme, non repurgee ny essartee d'arbres & de brossailles, ne portans point de fruit, & pleine de rauage d'eaux courantes çà & là sans ordre, à faulte d'estre diligemment cultiuee: outre ce qu'elle perd tous les arts & toutes les manufactures qu'elles met toutes en train, & leur donne à toutes fondement & matiere: de maniere qu'elles reuiennent toutes à neant, si vne fois la table s'en va ostee. Aussi vont perissants les honneurs des Dieux: car les hommes ne porteront plus que bien peu d'honneur au Soleil, & encore moins à la Lune, ne leur sachant gré que de la lumiere seulement & de la chaleur: car qui sera celuy désormais qui face dresser vn autel à Iupiter pluuiex, ou Ceres fauorisant le labourage, ou à Neptune protecteur des arbres? qui leur fera plus de sacrifices? comment sera Bacchus donneur de ioye, si nous n'auons plus besoing de tout ce qu'il donne? & puis que sacrifierons-nous & qu'offrirons-nous plus aux Dieux? de quoy leur presenterons-nous les primices? Cela

Le banquet des sept Sages.

emporte quand & soy vne subuersion & confusion generale de toutes choses. Il est **E** bien vray que prochasser toute sorte de voluptez, & en toutes sortes, seroit vne folie, mais aussi les refuir toutes, & en toutes sortes, seroit vne sottie. L'ame iouïra bien d'autres voluptez, qui seront plus nobles & meilleures, mais le corps n'en scauroit trouuer vne à iouïr, qui soit plus honneste que celle du boire & du manger, dont il se nourrit: ce qu'il n'y a homme qui n'entende & qui ne confesse: au moyen dequoy, les hommes dressent leurs tables en public à la lumiere, pour boire & manger ioyeusement ensemble: là où pour iouïr du plaisir de Venus, ils mettent au deuant la nuit, & toutes les tenebres qu'ils peuuent, estimans que ce soit aussi bestialement & impudemment fait de iouïr en public de l'un, comme de non iouïr de l'autre. Ayant Cleodemus en cest endroit entrerompu son propos, ie le suyuy, en disant: Ne voulez-vous pas encore adiouster, que nous chassons le dormir quand & la nourriture? & s'il n'y a point de dormir, aussi n'y a-il point de songes, & par consequent s'en va aussi la plus ancienne sorte d'oracles & de diuination que nous ayons: & sera la vie nostre toute **F** d'une façon, & par maniere de dire, l'ame pour neant sera reuestue du corps, veu que le plus grand nombre des parties d'iceluy, & des principales, ont esté faictes & preparees par la nature, pour seruir d'instruments à la nourriture, comme la langue, les dents, l'estomach, le foye: car il n'y a rien en la structure du corps humain qui soit ocieux, ne qui soit ordonné à autre vsage: tellement que celuy qui n'a point besoing de nourriture, il n'a point besoing de corps aussi: qui est autant à dire comme il n'a point besoing de soy mesme: car chascun de nous est composé de corps & d'ame. Voila ce que nous contribuons quant à nous, pour la defense du ventre: au demourant si Solon ou quelque autre le veult accuser, nous sommes prests & disposez à l'oïr. Ouy certainement, respondit lors Solon, de peur que nous ne soyons de moindre entendement & iugement que les Égyptiens, lesquels fendans le corps de l'homme quand il est mort, le montrent au Soleil, & en iettent les boyaux & entrailles dedans la riuere: puis quand il est ainsi nettoyé, ils se mettent à l'embaumer au reste. Car à dire **G** la verité, ces parties-là interieures sont toute la pollution & iniquation de nostre chair, & est proprement le vray enfer de nostre corps: comme lon dit qu'il y a au lieu des damnez tout plein de ie ne sçay quelles villaines riuieres & vents meslez ensemble avec du feu & des morts, car nulle creature viuante ne se nourrit d'autre chose qui soit vifue: & en tuant les creatures qui ont ames, ou destruisant les plantes, herbes, & fruiçts, qui participent aussi de vie, entant qu'elles se nourrissent & qu'elles croissent, nous pechons & faisons mal, par ce que tout ce qui est transmué en vne autre, perd ce qu'il estoit au parauant, & se corrompt entierement de toute sorte de corruption pour deuenir nourriture d'un autre: car de s'abstenir seulement de manger chair, comme lon dit que faisoit l'ancien Orpheus, c'est plus tost vne subtilité & finesse, qu'une entiere fuite des pechez que lon commet en delices & superfluité: mais le moyen de les fuir entierement, & de s'en tenir de tout poinct pur & net, se terminant en parfaite iu- **H** stice, c'est auoir tout en soy, & ne desirer rien de dehors. Là où celuy que Dieu a fait naistre de telle condition, qu'il luy est impossible de conseruer son estre ny son salut, sans le dommage & la perte d'un autre, à celuy-là a-il baillé la nature pour occasion & principe d'iniustice. Ne seroit-ce doncques pas, mon bon amy, vne belle chose, que de retrancher avec leur iniustice le ventre, l'estomach, le foye, & toutes autres telles parties, lesquelles ne nous donnent sentiment ny appetit de chose quelconque qui soit honneste, & qui ressemblent les vnes aux vtériles de cuisine, comme sont cousteaux & marmites, les autres à ceux de moulin, ou à un four, ou à un puits, ou à vne met à pestrir? Car certainemēt il se peut avec verité dire, que l'ame de plusieurs est cachee & affublee de crainte d'auoir faite dedans le corps, comme dedans un moulin, tournant tousiours cōme à l'entour d'une meule apres la poursuite de quelque nourriture, ainsi que

- A que nous l'auons n'agueres veu par experience en nous-mesmes: car nous ne nous regardions, ny ne nous escoutions pas les vns les autres, ains chascun la teste courbee contre bas seruoit au besoing de sa nourriture: mais maintenant estans les tables ostees comme tu vois, aians chapeaux de fleurs dessus nos testes, nous prenons plaisir à deuiler d'honnestes propos ensemble, nous iouïssons de la compagnie, & passons nostre temps à loisir, apres que nous sommes arriuez à ce poinct de n'auoir plus d'appetit, ny de besoing de nourriture. Si doncques nous pouuions toute nostre vie demourer en cest estat, sans auoir crainte de disette, & sans sçauoir que c'est du desir de richesse, n'aurions-nous pas tousiours beau loisir de hanter ensemble, & de iouir de la conuersation les vns des autres? car il faut que vous sçachiez que la conuoitise de superfluité est tousiours conioincte, & suit de pres le besoing de la necessité. Mais Cleodemus est d'aduis qu'il est necessaire que lon mange, & qu'il y ait de la nourriture, à fin que les tables soient où lon boit les vns aux autres, & sacrifie lon encore à Ceres, & à sa
- B fille Proserpine. C'est tout autant comme si vn autre vouloit, que les guerres & les batailles fussent, à fin que nous aions des murailles & fortifications de ville, des arce-naux à bastir nauires, & des armeries, & que nous facions des sacrifices, pour rendre graces de cent hommes tuez, comme lon dit qu'il y en a vn statut en la ville des Messeniens: ou si quelque autre se courrouçoit à la fanté, disant que ce seroit grand' pitié, si pource qu'il n'y auroit plus de malades, aussi n'auroit on plus que faire de liect mol, ny de linceux de lin, & ne sacrifieroit on plus à Esculapius, ny aux Dieux qui diuertissent les malheurs: & puis la medecine avec tous ses outils & toutes ses drogues seroit ietee en arriere, sans honneur ny credit: car quelle difference y a il entre cecy & cela, veu que lon prent la nourriture comme vne medecine pour guarir la faim? & disent tous ceux qui se nourrissent, qu'ils se pensent & se traictent, appliquans ce remede, non comme plaisir agreable ou desirable, mais necessaire à la nature. Et pourroit on compter plus de douleurs que de voluptez qui viennent à l'homme de sa nourriture: ou, pour mieux dire, la volupté du manger a bien peu de lieu, & dure bien petit
- C de temps au corps de l'homme: mais l'occupation & la fascherie qu'il y a à l'apprester, il seroit malaisé à nombrer de combien de peines honteuses, & de combien de trauaux penibles elles nous remplit. C'est pourquoy ie pense qu'Homere regardant à toutes ces vexations-là, a pris son argument pour prouuer, que les Dieux ne mouroient point, par ce qu'ils ne mangeoient point.

Ne iamais pain ils ne mangent les Dieux,
Ny iamais vin ils ne boient és Cieulx,
Aussi sont-ils sans sang, qui est la cause
Que d'immortels le nom on leur impose.

Ilíad liu. 5.

- Comme voulant donner à entendre, que le boire & manger sont non seulement entretenement de la vie, mais aussi cause de la mort: car de là s'amassent les maladies
- D dedans nos corps, qui procedent non moins d'estre trop pleins, que d'estre trop vuides, & bien souuent y a plus d'affaire à consumer & digerer vne viande, que lon a mis dedans le corps, qu'il n'y auoit pas eu à la recouurer ny à l'amasser. Et tout ainsi comme si les Danaïdes estoient en doute de ce qu'elles feroient, & quelle vie elles meneroient, si elles estoient deliurees de la seruitude de tascher à remplir vn tonneau percé: aussi doutons nous, si nous estions venus à ce poinct de cesser de plus ietter & fourrer dedans ceste nostre chair insatiable, & qui ne se peult iamais remplir, toutes sortes de viandes, & de la terre & de la mer, que c'est que nous ferions, nous contentans de prochasser toute nostre vie les choses necessaires, à faute de cognoistre & sçauoir celles qui sont honnestes. Tout ainsi doncques cōme ceux qui ont esté lōgement serfs, quand ils viennent à estre deliurez de seruitude, font à eux-mesmes, & pour eux mesmes, les mesmes seruices qu'ils souloient faire à leurs maistres quand ils leur

Le banquet des sept Sages.

seruoient : aussi l'ame maintenant nourrit le corps avec grands labeurs & grandes fa- E
cheries, mais si vne fois elle se peut despestrer de ce ioug de seruage, quand elle se trou-
uera franche & libre, elle se nourrira elle mesme, & regardera à elle mesme & à la co-
gnoissance de la verité, sans auoir rien qui plus la destourne ny diuertisse. Voyla ce
qui fut lors dit, amy Nicarchus, touchant la nourriture. Mais ainsi comme Solon
parloit encore, Gorgias le frere de Periander entra, retournant de la ville de Ténarus,
où il auoit esté enuoyé à cause de ie ne sçay quels oracles, pour y porter quelques of-
frandes à Neptune, & luy faire sacrifice. Nous le saluâmes tous, & Periander son frere
s'approchant de luy le baisa, puis le feit seoir aupres de luy sur le bord du liêt, & il luy
raconta quelques nouvelles à luy seul. Periander l'escoutoit, monstrant à son visage
qu'il estoit bien diuersement passionné de ce qu'il entendoit, & sembloit à son visage
tantost qu'il en fust desplaisant, & tantost qu'il en fust courroucé, aucunefois qu'il
n'en peust rien croire, & autrefois qu'il en fust fort esmeruillé. Finablement en se
riant, il nous dit, Je voudrois bien tout presentement vous dire ce que mon frere me F
vient de rapporter, mais ie fais doubte de le vous racôter, pour autant que j'ay quel-
» quefois ouy dire à Thales, Qu'il falloit raconter les choses vraysemblables, mais les
» impossibles qu'il les falloit taire du tout. Bias prenant la parole : Mais aussi est, dit-il,
» ceste sage parole de Thales, Qu'il ne fault pas croire ses ennemis des choses mesmes
» qui sont croyables, ny descroire ses amis des choses mesmes qui sont incroyables : &
» quant à moy ie pense qu'il estime ses ennemis les meschants & les fols, & ses amis les
» bons & les sages. Je suis doncques d'aduis, Gorgias, que tu les recites deuant toute
ceste compagnie, ou plus tost que tu le mettes en ce nouveau genre de vers que lon
appelle maintenant Dithyrambes, pour le prononcer à haute voix, ainsi que tu me
l'as recité. Gorgias donc commença lors à parler en ceste maniere : Apres que nous
eufmes fait nostre sacrifice l'espace de trois iours durant, & le dernier y aiant eu vne G
assemblee de feste toute la nuit, avec danses & ieux au long de la marine, la Lune re-
luysoit au plein sur la mer, & ne tiroit vent du monde, ains y auoit vn calme & vne
bonace grâde, sinon que de loing on apperceuoit vn peu de frizeure de la mer qui se
fronçoit le long de l'escueil, & en approchant amenoit vn peu d'escume, avec vn grand
bruit pour la vehemence de la vogue, tellement que toute la multitude esmeruillée
que ce pouuoit estre, s'en courut à l'endroit du bord, où il sembloit que la flotte
deust arriuer : & auant que lon peust par coniecture deuiner que c'estoit, la vistesse fut
telle, que lon apperceut à l'œil que c'estoient Daulphins, les vns en foule enuironans
tout à l'entour, les autres guidans la troupe au plus facile endroit & plus doux ab-
bord du riuage : les autres venans apres à la queue, comme par honneur : au milieu de
toute ceste troupe apparoissoit au dessus de la mer ne sçay quelle masse d'un corps
flottant, que lon ne sçauoit discerner ny deuiner que c'estoit, iusques à ce que se scr-
rans tous ensemble, & arriuant avec vn elancement à bord, ils exposerent sur le riuage
vn homme viuant & mouuant, & cela fait s'en retournerent deuers le promontoire H
saultans & culbutans de ioye & de feste, comme il sembloit, plus qu'au parauant.
Ce qu'ayant veu la plus part de l'assemblee s'en effroya si fort qu'ils s'enfuirent à
perte d'haleine arriere de la mer, sinon quelque petit nombre qui fassa d'approcher
quand & moy : là où ils recogneurent que c'estoit Arion le ioueur de cithre, qui luy-
mesme disoit son nom, & estoit aisé à recognoistre, d'autant qu'il auoit le mesme ac-
coustrement qu'il souloit porter quand il iouoit en public de sa cithre : si le prit on
incontinent, & l'emporta lon dedans vne tente, là où lon cogneut qu'il n'auoit mal
du monde, sinon que pour la roideur & impetuosité dont on l'auoit apporté, il sem-
bloit estre tout las & rompu : & là ouïsmes de luy vn propos incroyable à tout le
monde, fors à nous qui en auons veu la fin : car il nous a racoté qu'ayant de long temps
resolu de s'en reuenir d'Italie, de tant plus mesmement que Periander luy auoit escrit
qu'il

- A** qu'il s'en reuint : à la premiere occasion qui se presenta d'une Carraque Corinthienne qui faisoit voile, il monta dessus incontinent, & ne fut pas plus tost eslargy en mer, avec vn petit vent, qu'il s'apperceut que les mariniers conspiroient entre eulx de le tuer, dequoy le pilote mesme de la nauire l'aduertit depuis secrettement, qu'ils auoiēt arresté de le faire la nuit. Se trouuant dōcques ainsi destitué de tout secours, & ne sachant qu'il deuoit faire, il luy vint vne inspiration diuine de parer son corps encore viuant des ornemens dont il auoit accoustumé de s'accoustrer quand il deuoit sonner de sa cithre en vn theatre, à fin qu'ils luy seruissent d'ornemēts funeraux à sa mort, & de chanter vne lamentation auant son trespas, pour ne se monstrier en cest endroit moins genereux que les cygnes. Parquoy s'estant reuestu de tous ses ornemens, & ayant aduertiy les mariniers qu'il luy estoit prins vne enuie de chanter vn cantique à Apollo Pythien pour le salut de luy, de la nauire, & de tous ceux qui estoient dedans, se dressant en pieds sur la poupe le long du bord de la nauire, & ayant premierement
- B** sonné quelque inuocation des Dieux marins, il chanta le cantique : & comme il fut presque au milieu, le Soleil se coucha dedans la mer, & incontinent se commença à descouurir le Peloponnese. Adonc les mariniers n'ayans pas la patience d'attendre la nuit toute noire, vindrent à luy pour le tuer : luy voyant les espees nuës, & le pilote qui se couuroit la face pour n'en rien voir, se lança & ietta le plus loing qu'il peut de la nauire : mais auant que tout son corps plongeast dedans la mer, les daulphins accoururent qui le soubsleuerent, plein de frayeur & de perturbation d'esprit : de maniere qu'il ne scauoit que c'estoit du commencement, mais peu à peu sentant qu'il estoit porté bien à son aise, & voyant vne grande flotte de ces daulphins qui l'environnoient amiablemēt, & succedoient les vns apres les autres à ceste charge de le porter, comme estant vn seruice auquel ils estoient necessairement obligez, & qui appartenoit à tous : & d'auantage voyant que la Carraque estant demouree bien loing derriere, luy donnoit argument de iuger qu'il alloit fort legerement : il n'eut, ce dit-il, pas tant ny de
- C** crainte de mourir, ny d'enuie de viure, comme d'ambition de pouuoir arriuer à port de salut, à fin que le monde cogneust qu'il estoit en la grace des Dieux, & que luy en prit vn certain creance & ferme fiance en eux, voyant le ciel tout plein d'estoilles, & la Lune se leuant pure & nette avec vne grande clarté, toute la mer à l'entour de luy platte & calme, sinon que leur cours y traſsoit comme vne route & vn sentier, il pensa en luy-mesme, que la iustice n'auoit pas vn œil tant seulement, ains qu'avec autant d'yeux, comme il y auoit d'estoilles au ciel, Dieu regardoit à l'environ tout ce qui se faisoit tant en la terre qu'en la mer : lesquelles cogitations, dit-il, luy renforçoient & soustenoient le corps, qui autrement se laissoit ja aller au trauail & à la lassitude : & finablement, quand ils vindrent à rencontrer le grand promontoire de Tenare hault & droit, se donnans bien dextrement garde d'y heurter, ains tournans tout doucement & nageans terre à terre au long de la coste à fleur d'eau, comme s'ils eussent voulu conduire vne barque entiere à sauueté, en port de salut, il s'apperceut bien euidentement que tout ce portement auoit esté fait par la conduite de la prouidence diuine. Apres qu'Arion nous eut fait tout ce discours, ce dit Gorgias, ie luy demanday là où il pensoit que la nauire deuoit arriuer : Ie pense, respondit-il, qu'en toute forte elle arriuera à Corinthe, mais qu'elle estoit encore beaucoup derriere : car s'estant ietté dedans la mer au Soleil couchant, à son aduis, il n'auoit pas fait depuis sur le dos des daulphins moins de chemin que de trente lieues, & que depuis il y auoit eu tousiours grand calme en la mer. Ce neantmoins Gorgias dit, que s'estant diligemment enquis du patron de la nauire, comment il auoit nom, & le pilote aussi, quelle enseigne portoit la nauire, il auoit enuoyé par tout des batteaux, & des soudards en tous les endroits où elle pouuoit aborder, & qu'il auoit ce-pendant amené quand & luy Arion caché, de peur que si les mariniers estoient premier aduertis qu'il eust esté sauué,

Le banquet des sept Sages.

ils ne s'enfuissent ça & là, de maniere qu'on ne les peust plus recouurer : & qu'à la ve- E
rité tout cest euenement estoit vn vray miracle de Dieu, pource qu'il n'estoit pas plus
tost arriué là, qu'il auoit entendu que la nauire estoit entre les mains des soudards, &
les mariniers & passagers qui estoient dedans, tous pris prisonniers. Periander adonc
luy commanda qu'il se leuast incontinent, & qu'il les allast faire mettre tous en bon-
ne & seure prison, où personne n'allast parler à eux, ny leur declarer qu'Arion fust
sauué. Æsope adonc se prit à dire, Et puis vous-vous mocquez de mes geays & de
mes corbeaux qui parlent, & vous voyez que les daulphins font de si grandes prouës-
ses. Nous en comptons vn autre (dis-ie) semblable, Æsope, & y a plus de mille ans, dès
le temps d'Ino & d'Athamas que ce compte-là est escrit & passé en chose iugee & cer-
taine. Solon adonc prenant la parole : Or quant à cela, dit-il, il approche des Dieux,
& surpasse nostre puissance, mais l'accident qui aduint à Hesiodé est humain, & non
point trop esloigné de nous, car ie croy que vous en auez ouy faire le recit. Non pas
moy, respondit-il. Si est-il bien digne d'estre entendu, poursuiuit Solon. C'est qu'un F
certain Milesien, avec lequel il logeoit, beuuoit, & mangeoit ordinairement en la ville
de Locres, entretenoit secrettement la fille de leur hôte, & aiant esté surpris sur
le fait avec elle, Hesiodé fut soupçonné d'auoir bien sçeu la forfaiture dès le
commencement, & d'auoir aydé à la couurir, sans que toutefois il en fust coupa-
ble en sorte du monde, ains luy en sçauoit-on mauuais gré, & l'en calomnioit-on
à grand tort, tant que les freres de la fille luy aiant dressé embusche aupres de Nemee
en Locride, le tuerent, & quand & luy son seruiteur, qui auoit nom Troilus : les
corps furent lancez dedans la mer, & celui de Troilus ietté dedans la riuere de
Daphnus, qui le porta dehors sa bouche, où il rencontra vn rocher battu des on-
des, lequel apparoissoit vn bien petit au dessus de la mer, & l'arresta, dont iusques
auiourd'huy le rocher en est appellé Troilus : mais celui de Hesiodé, au partir de
là, fut recueilly par vne flotte de daulphins, qui le porterent iusques au chef de Rhion, G
pres la ville de Molycric. Or estoit-ce au temps iustement que les Locriens fai-
soient leur solennel sacrifice, qu'ils appellent Rhia, lequel ils obseruent encore
iusques auiourd'huy fort magnifiquement, & y auoit vne bien grande assemblee
en cest endroit-là : quand ils apperceurent le corps qui abordoit, s'en esmeruil-
lans grandement, comme lon peut penser, ils accoururent sur le riuage, & le re-
cognoissans, pource qu'il estoit tout freschement tué, ils n'eurent rien en plus gran-
de recommandation que d'enuoyer incontinent par tout enquerir de ce meurdre,
pour le grand renom du poëte Hesiodé, & firent si prompte diligence qu'ils trou-
uerent ceux qui en estoient les meurdriers, lesquels ils ietterent tous viuans au fond
de la mer, & raserent leurs maisons, & fut le corps de Hesiodé enterré aupres du tem-
ple de Nemee, & n'y a gueres d'estrangers qui sçachent où est ceste sepulture, ains
leur est celé, à cause des Orchomeniens, comme lon dit, lesquels par ordonnance
de quelques oracles le cherchoient pour l'enleuer & l'inhumer en leur pays. Si donc- H
ques les Daulphins sont ainsi amoureusement affectionnez enuers les morts, il est
bien à croire qu'ils le sont encore d'auantage enuers les viuans, & qu'ils cherchent
à leur faire tout secours, mesmement quand ils y sont attirez par le son des fleutes &
d'autre harmonie : car il n'y a celui qui ne sçache maintenant cela, que ces animaux-là
prennent plaisir à ouyr chanter, & suyuent & nagent au long des vaisseaux où ils enten-
dent de la musique, & où lon vogue au son des fleutes, ou d'autre chant, quand le tēps
est doux, tant ils s'en delectent. Aussi prennent-ils plaisir à veoir nager les petits en-
fans, & iouēt à plonger avec eux : & pourtant y a-il vne ordonnance non escripte,
de franchise & immunité qu'ils ont par tout : car nul ne les prend, ny ne leur fait des-
plaisir, sinon que quelquefois quand on les trouue pris dedans les rets, où ils mangent
les poissons de la prise, on les fouët, comme lon feroit des enfans qui auroient failly.

Et me

A Et me souuient auoir ouy raconter bien à certes, aux habitans de Lesbos, qu'en le u pais il y eut iadis vne pucelle sauuee par vn Daulphin, du peril d'estre noyee en la mer: mais pource que Pittacus le doibt mieux sçauoir, il seroit bien raisonnable que luy mesme nous en feist le conté. Parquoy Pittacus commença à dire: C'est vn propos qui est assez notoire, & celebré de plusieurs: car aiant esté donné vn oracle aux fondateurs qui premiers peuplerent l'Isle de Lesbos, que quand en cinglant par la mer ils seroient arriuez à vn escueil, qui s'appelleroit Mesogœon, que lors ils iettassent dedans la mer vn taureau pour Neptune, & pour Amphitrite & les Nymphes Nereïdes, vne pucelle toute viue. Or y aiant sept conducteurs & Roys de la troupe qui deuoit là habiter, & pour le huitième Echelaus encore à marier, expressément nommé par l'oracle d'Apollo: les autres sept, qui auoient des filles à marier tirerent entre eux au fort, lequel tomba sur la fille de Smintheus. Si l'accoustrerent richement de belles robbes, & de ioyaux d'or: & quand ils furent au lieu designé, apres auoir fait leurs prieres & oraisons, ainsi qu'ils estoient prests à la ietter, il y eut vn ieune homme de ceux de la nauire, homme de gentil cœur, comme il apparut, nommé Enalus, lequel estant amoureux de la fille, prit soudainement vne resolution de la secourir à ce besoing, encore qu'il veist bien qu'il estoit impossible, & l'embrassant estroittement se laissa ietter quand & elle dedans la mer. Or sur l'heure mesme il courut vn bruit, qui n'auoit pas grand fondement, mais neantmoins qui fut creu de beaucoup de gens parmy l'armee, qu'ils auoient esté portez à bord & sauuez: mais depuis on dit, que ledict Enalus fut veu en l'Isle de Lesbos, lequel dit qu'ils auoient esté portez sur le dos des daulphins à sauueté iusques en terre ferme. Nous pourriôs bien reciter d'autres cōptes encore plus merueilleux, pour raur en admiration, & entretenir vn populaire: mais il seroit difficile de les prouuer: comme, qu'il se leua vne grande & haulte vague en l'air, ne plus ne moins qu'un rocher, à l'entour de l'Isle: tellement qu'il n'y eut homme qui en osast approcher, sinon luy seul qui alla vers la mer, & qu'une grande troupe de poulpes le suiuirent iusques au temple de Neptune, là où l'un de ces poulpes apporta vne pierre, que Enalus prit, & la dedia en memoire de ce miracle dedans le temple: d'où vient qu'encore l'appellons-nous iusques aujourdhuy Enalus: Mais en somme, dit-il, si lon entendoit bien la difference qu'il y a entre l'impossible & l'invité, ou hors du commun vſage, & entre ce qui est contre l'ordre du cours de nature, & contre la commune opinion des hommes, en ne croyant pas temerairement, ny aussi ne descroyant pas facilement, on obserueroit de bout en bout la regle de Rien trop, Seigneur Chilon, ainsi comme tu l'as commandee. Apres luy, Anacharsis parla disant, Qu'il ne se falloir pas esmerueiller, si les plus belles & plus grandes choses du monde se faisoient par la volonté & prouidence de Dieu: attendu que selon la bonne & sage opinion de Thales, en toutes les plus grandes & principales parties du monde, il y a vne ame: car l'organe & outil de l'ame c'est le corps, & l'ame est l'outil de Dieu: & comme le corps a de soy plusieurs mouuements, & la plus part mesmement les plus nobles, il les a de l'ame: aussi l'ame fait ne plus ne moins aucunes de ses operations, estant meüe d'elle mesme, és autres elle se se laisse manier, dresser, & tourner à Dieu, comme il luy plaist, estant le plus bel organe & le plus adroict outil qui sçauroit estre: car ce seroit chose estrange que le vent, l'eau, les nuees & les pluyes fussent instruments de Dieu, avec lesquels il nourrit & entretiēt plusieurs creatures, & en perd aussi & deffait plusieurs autres, & qu'il ne se seruist nullement des animaux à faire pas vne de ses œuures: ains est beaucoup plus vraysemblable, attendu qu'ils dependent totalement de la puissance de Dieu, qu'ils seruent à tous les mouuements, & secondent toutes les volonteiz de Dieu, plus tost que les arcs ne s'accommodent aux Scythes, les lyres aux Grecs, ne les haubois. Apres ces propos, le poëte Chersias fait mention de plusieurs autres qui auoient esté

Le banquet des sept Sages.

respitez de mort contre toute esperance, & entre autres de Cypselus pere de Periander, pour lequel tuer lors qu'il ne faisoit que naistre, aucuns meurdriers aians esté enuoyez, le rencontrèrent, & s'en destournerent par pitié, & depuis s'en estans repentis, retournerent pour le chercher, & ne le trouuerent plus, pource que sa mere l'auoit caché dedans vn coffre: en memoire dequoy Cypselus depuis fit bastir vne salle dedans le temple d'Apollo en Delphes, comme aiant ce Dieu miraculeusement empesché, que lors il ne criaist, de peur qu'il ne fust trouué. Et lors Pittacus adressant sa parole à Periander, se prit à dire, Chersias m'a fait grand plaisir de mentionner ceste salle: car i'ay eu plusieurs fois enuie de te demander que veulent dire tant de grenouilles qui y sont grauees à l'entour du pied du palmier, & qu'elles ont à faire ou avec le Dieu, ou avec celuy qui a fait bastir & dedié la salle. Periander luy
.. respondit en riant, qu'il le demandast à Chersias. Je n'en diray rien, respondit-il,
.. fils ne me disent premier que signifie, Rien trop, & Cognoy toy-mesme: & cest
.. autre mot qui a fait demourer plusieurs sans marier, & plusieurs deffians, & quelques
.. vns mesme muets, Qui respond paye, ou, Dommage suit response. Et quel besoing
est-il, dit Pittacus, que nous l'exposions, veu que tu louës des fables qu'Æsope a composées, qui declarent la substance de chascune de ces sentences? C'est quand Chersias se veut iouër avec moy qu'il dit cela, respondit Æsope: mais quand il parle à bon esciant, il dit, qu'Homere en a esté le premier autheur, alleguant que Hector se cognoissoit foy-mesme: car allant chercher & assaillir tous les autres capitaines Grecs,

Iliad.liu.11. Il refuyoit le fils de Telamon:

& dit aussi qu'Vlysses approuuoit & louoit ceste sentence, Rien trop, quand il admonestoit Diomedes, en disant,

Iliad.liu.10. Diomedes, par trop hault ne me prise,

Ny trop aussi ne me blasme & desprise.

Quant à la caution ou response, les autres tiennent qu'il la diffame & dissuade fort au lieu où il dit,

Odyss.liu.8. C'est bien vn cas souuent calamiteux

Que de pléger des hommes souffreteux.

Et ce poëte icy Chersias dit que la fee Até, c'est à dire peste, ou malheur, fut par Iupiter ietee du ciel en terre, pourautant qu'elle s'estoit trouuee presente à la caution & response qu'il auoit faite de la naissance d'Hercules, où il auoit esté trompé. Puis qu'ainsi est, dit adonc Solon, ie suis doncques d'aduis, que nous adiouctions foy au tressage Homere,

Iliad.liu.10. La nuit nous est ja venue surprendre,

Obeïssance il vaudra mieux luy rendre.

Ainsi apres que nous aurons rendu graces, en leur offrant du vin, aux Muses, à Neptune, & Amphitrite, mettons fin, si bon vous semble, à l'assemblée de ce festin. Voyla, amy Nicarchus, quelle fut lors la fin de ceste assemblee.

Instruction

A

AFFAIRES D'ESTAT.



'I l y a propos au monde, auquel on puisse proprement appliquer ces vers du poëte Homere,

Iliad. liu. 9.

Il n'y aura entre tous les Grecs ame
Qui ton parler contredie ny blasme,
Certainement: mais cela n'est pas tout,
Car tu n'es pas allé iusques au bout.

veritablement, Seigneur Menemachus, c'est à l'endroit des Philosophes qui exhortent assez, & disent qu'il se faut entre-mettre des affaires publiques, mais ils n'enseignent pas comment, ny n'en donnent pas les preceptes & aduertissements: & me semble qu'ils font tout ainsi que ceulx qui mouchent bien les lampes, mais ils ne versent point
B d'huile dedans. Voyant doncques que tu as avec bien bonne raison deliberé de te meller des affaires de ton païs, & que tu desires, ainsi qu'il appartient à la noblesse du lieu dont tu es yssu,

Là mesme.

Sçauoir bien dire & encore mieux faire,
& que tu n'as pas l'aage d'auoir peu contempler à descouuert la vie d'un homme sage, comme seroit un vray philosophe, en matiere de gouuernement, & considerer ses deportements en affaires d'estat, ny d'auoir esté spectateur de ses beaux exemples mis en œuure par effect, & non pas en discours seulement: à raison dequoy tu me requiers de te donner des preceptes & aduertissemens, pour sçauoir comment tu t'y dois gouuerner: il m'a semblé que ie ne pouuois honnestement esconduire ta requeste, & desire que ce que ie t'en ay recueilly, responde dignement & au zele de ton intention, & à la bonté de mon affection: l'ay accompagné les preceptes de plusieurs beaux exemples, ainsi que tu m'auois mandé. E n premier lieu doncques
C ie dis, qu'il faut que tout homme qui vient à s'entremettre du gouuernement de la chose publique, y apporte, pour un assésuré & certain fondement, la bonne intention, meue de raison & de iugement, non point de passion, ny de cupidité de vaine gloire, ny de ialousie d'un autre, & d'emulation, ny de faute d'autre occupation. Car ainsi comme il y en a qui demeurent le plus du temps sur la place, encore qu'ils n'y ayent que faire, pource qu'ils n'ont rien de bon en leur maison: aussi y en a-il qui se iettent aux affaires publiques, d'autant qu'ils n'ont que faire chez eux, prenans les affaires publiques pour autant d'amusement & de passe-temps. Il y en a d'autres qui sy estans iettez par cas d'aduenture, & s'en estans bien tost saoulez, ne s'en peuvent plus, au moins pas facilement, retirer: ressemblans proprement à ceulx qui montent dessus quelque vaisseau en mer, seulement pour se bransler, & puis sont emportez par le vent en haute mer: alors commençant la teste à leur tourner, & leur estomach à se renuerser sans-dessus-dessous, ils regardent vers la terre au dehors, mais toutefois ils sont contraincts de demourer dedans, & s'accommoder à ce qui se presente,

Les beaux amours leur sont passez
D'aller sur les bancs tapissez
De quelque fregatte legere,
Par vne bonace bien clere,
Plaisamment sillonner le dos
De la mer aux terribles flots:

ce sont ceux-là qui autant, ou plus que nuls autres, descrient le faiët, d'autant qu'ils se repentent & se courroucent de ce qu'ils sy sont mis, mesmement quand au lieu d'une gloire qu'ils s'estoient promise, ils se trouuent tombez en infamie, au lieu qu'ils

Instruction pour ceulx qui

entendoient d'estre formidables aux autres, par le moyen de leur credit & autorité, E
ils se treuvent embrouillez eux-mesmes en affaires pleins de troubles & de dangers.
Mais celuy qui y sera venu, & aura commencé par vray iugement de raison, comme
à vne treshonnesté vacation de soy-mesme, & tres-conuenable à son estat & à sa
qualité: celuy-là ne s'estonnera point de tous ces accidents-là, ny ne changera point
de resolution: car il ne faut pas venir au gouuernement de la chose publique, en in-
tention d'y trafiquer, ny d'y faire bien ses besongnes, ainsi comme iadis à Athenes vn
Stratocles & vn Democrides se conuioient l'un l'autre d'aller à leur moisson d'or, ap-
pellans ainsi par maniere de mocquerie, la chaire & tribune aux harangues, de sur l'a-
quelle ils preschoient le peuple, ny par faisissement d'une soudaine passion violente,
ainsi cōme fait iadis Caius Gracchus, lequel sur l'heure que l'inconuenient de la mort
de son frere estoit encore tout chaud, se retira en vne vie solitaire & priuee, bien
loing de tout maniement d'affaires, & depuis s'estant tout soudain allumé de cho-
lere pour des outrageuses & iniurieuses paroles, que quelqu'un luy dit, il s'en alla par F
despit icter au gouuernement des affaires, dont il fut tantost saoul, & son ambition
rassasiée: mais alors qu'il eust bien voulu s'en departir & se reposer, il ne peut trou-
uer moyen de quitter son autorité & sa puissance, tant elle estoit grande, & fut tué
auant que de le pouuoir faire: mais ceux qui se composent comme pour aller iouer
quelque ieu sur vn eschaffault, ou à vne contention de ialousie contre quelques au-
tres, ou à vne conuoitise de vaine gloire, il est force que ceux-là se repentent de s'y
estre mis, quand ils voient qu'il faut qu'ils seruent à ceux à qui ils se pensoient estre di-
gnes de commander, ou qu'ils desplaisent à ceux à qui ils deuroient complaire. Ne
plus ne moins que ceux qui tombent par inconuenient dedans vn puis, auant que l'a-
uoir preueu, il est force qu'ils se treuvent bien estonnez & faschez quand ils se voyent
au fond: mais ceux qui de propos deliberé, & apres y auoir bien pensé, y deual-
lent, ceux-là s'y portent modereement en repos d'esprit, sans se fascher ny courrou-
cer de rien, comme ceux qui dès leur entree se sont proposez le deuoir seulement, G
& non autre chose, pour leur but: ainsi apres que lon a bien fondé son intention en
soy-mesme, & que lon l'a tellement asseuree & affermie qu'il est mal aisé de la faire
plus varier ny branler, alors il se faut mettre à diligemment considerer & cognoistre
le naturel des citoyens, à qui lon a affaire: au moins ce qui estant composé & meslé
de tous en apparoit le plus, & a plus de force entre eulx. Car de vouloir entrepren-
dre de chāger du premier coup ou de reformer à sa mode la nature de tout vn peuple,
il n'est ny facile ny seur: par ce qu'il y faut vn long temps & vne grande autorité &
puissance. Mais il faut faire ainsi que fait le vin en nostre corps, lequel au commence-
ment est vaincu & maistrisé par l'humeur & le naturel de celuy qui le boit: mais puis
apres l'eschauffant petit à petit, & se meslant dedans ses veines, il vient à le transmu-
& tranformer en soy-mesme. Aussi faut-il que le sage gouuerneur, iusques à ce
qu'il ait acquis par fiance que lon aura en luy, & par bonne reputation, tant d'autho- H
rité enuers le peuple, qu'il le puisse mener à son plaisir, s'accommode à ses mœurs, tels
qu'il les rencontrera, & en face coniecture & iugement, en considerant à quoy il
prend plaisir, & de quoy il se delecte: comme, pour exemple, le peuple d'Athenes
est aisé à mettre en cholere, & prompt aussi à tourner à misericorde, voulant plus
tost souspeçonner & deuiner promptement, que d'auoir patience d'estre informé, &
enseigné à loisir longuement: & comme il est plus enclin à vouloir secourir les homes
bas & de petite condition, aussi aime-il plus & treuve meilleurs les propos ioyeux,
& dits par maniere de ieu & de risée, prend fort grand plaisir à ouir ceulx qui le
louent, & ne s'offense pas beaucoup de ceux qui se moquent de luy: il est formi-
dable iusques à ses magistrats mesmes, & toutefois humain iusques à pardonner,
voire aux ennemis. Le naturel du peuple de Carthage tout au contraire, aspre, seure,
&

- A & vindicatif, souple à ses superieurs, rude & imperieux à ses subiects, tres-couard en sa peur, tres-cruel en son courroux, ferme en ce qu'il a vne fois arresté, dur à esmouvoir à ieu, & à addoucir d'aucune gayeté: vous n'eussiez eu garde de voir qu'à la priere d'un Cleon, qui leur eust dit publiquement, qu'il auoit sacrifié aux Dieux, & qu'il deuoit festoyer quelques vns de ses amis estrangers qui l'estoient venus voir, ils se fussent leuez du conseil, & eussent remis l'assemblée à vn autre iour, en riant & battant des mains en signe de resiouissance: ny qu'estant eschappée vne caille à Alcibiades de dessous sa robbe, ainsi qu'il haranguoit, ils se fussent mis à courir apres pour la reprendre, & qu'ils la luy eussent rebaillee, plus tost l'eussent-ils tué luy-mesme sur la place, comme les mesprisant en cela, & se moquant d'eux, attendu qu'ils chasserent en exil le capitaine Hanno, pour ce qu'il faisoit porter à vn Lion, comme à vn sommier, partie de ses hardes à la guerre, disans que cela sentoit son homme qui brassoit quelque tyrannie. Et ne m'est pas aduis que celuy de Thebes se fust iamais
- B contenu d'ouurir des lettres de son ennemy, si elles fussent tombees en ses mains, comme firent les Atheniens, lesquels aians surpris des courriers du Roy Philippe, ne voulurent oncques souffrir qu'on ouurist vne missiue qui estoit suscrite, à la Royne Olympiade sa femme, né descouurir le secret des amours d'un mary absent escriuant à sa femme: ny celuy d'Athenes aussi, à l'opposite, n'eust pas à mon iugement supporté patiemment la hauteſſe de cœur, & le mespris d'Epaminondas, qui ne voulut oncques respondre à l'imputation qui fut proposée deuant le peuple de Thebes à l'encontre de luy, ains se leua du Theatre auquel estoit assemblé le peuple, & passant à trauers s'en alla au parc des exercices: & s'en eust aussi beaucoup fallu, que les Lacedemoniens eussent enduré l'insolence & la moquerie d'un Stratoles, lequel aiant persuadé aux Atheniens qu'ils sacrifiasſent aux Dieux, pour leur rendre graces de la victoire, comme fils eussent vaincu: & puis apres estant la nouvelle certaine venue de la desfaitte qu'ils auoient receüe, comme ils s'en courrou-
- C çassent à luy, il leur demanda: Hé bien, quel tort vous ay-ie fait, si ie vous ay tenu bien aises en feste l'espace de trois iours durant? Or les flatteurs és Courts des Princes, font comme les oyseleurs qui prennent les oyseaux à la pippee, en contrefaisant leurs voix, aussi pour s'insinuer en la bonne grace des Roys, ils se rendent semblables à eux, les attrapans par ceste tromperie: mais à vn bon gouuerneur d'estat populaire il n'est pas conuenable d'imiter ny contrefaire les mœurs ny le naturel de son peuple, mais de les cognoistre, & vser enuers vn chascun des particuliers des moyens par lesquels il sçait qu'il se peut prendre & gagner: car la faute d'auoir bien cogneu & sceu manier les hommes selon leurs humeurs, apporte & cause des rebuts & des reculemens, aussi bien és gouuerneurs populaires, comme il fait aux mignons des Roys. Mais apres que lon a acquis autorité & foy grande enuers le peuple, c'est alors que lon doit tascher à reformer son naturel s'il est vicieux, & le retirer petit à petit, & ramener tout doucement à ce qui est meilleur: car c'est chose bien laborieuse, & bien difficile de changer toute vne commune: mais pour y paruenir, il faut que tu commences à toy-mesme le premier, en reformant ce qu'il y a de déreglé en ta vie & en tes mœurs, sçachant que tu as à viure deormais comme en vn Theatre ouuert, où tu es veu de tous costez. Et si d'aduenture il est malaisé de retirer ton ame de toutes sortes de vices entierement, au moins en osteras & retrancheras-tu ceulx qui font les plus apparents, & qui plus se presentent au dehors: car tu oys comme Themistocles, quand il se voulut addonner au manient des affaires, se retira des compagnies où lon ne faisoit que boire, danser, iouer & faire grand' chere, & comme en veillant, ieusnant, & estudiant, il disoit à ses familiers, que la victoire & le trophée de Miltiades ne le laissoient pas reposer. Pericles au cas pareil changea ses façons de faire, en sa maniere de viure, & en sa personne, quant à marcher graument, &

Instruction pour ceulx qui

parler posément, à monstrier tousiours vn visage pensif, à contenir les mains au de - E
dans de sa robbe, sans iamais les monstrier dehors, à n'aller iamais par la ville ailleurs
qu'au conseil, & à la tribune aux harangues: car ce n'est pas chose aisée à manier qu'une
tourbe de populaire, ne qui se laisse prendre à toute personne d'une prise salutaire,
& gagne lon beaucoup si lon peut tant faire, que comme vne beste ombrageuse &
suspçonneuse, il ne s'effarouche & ne s'effroye point de chose qu'il oye, ne qu'il
voye, tant qu'on le puisse manier & gouverner. Pourtant ne fault-il pas mettre cela
en nonchaloir, ny auoir peu de soing de ses mœurs & de sa vie, en s'estudiant de faire
autant qu'il est possible, qu'elles soient sans blasme & sans reproche: pour ce que
ceulx qui prennent en main le gouvernement des affaires publiques, ne sont pas sub-
iects à rendre compte & raison de ce qu'ils disent, & de ce qu'ils font en public seule-
ment, ains recherche lon curieusement iusques à leurs liçts, leurs mariages, & à tout
ce qu'ils font en leur priué, soit en ieu, soit en bon esciant. Car que dirons nous d'Al-
cibiades, lequel estant homme d'execution, autant ou plus que nul autre Capitaine de F
son temps, & s'estant tousiours maintenu inuincible, quant à luy, en ce qu'il mania
du public, finit neantmoins ses iours malheureusement, pour la dissolution & le des-
bordement de sa vie domestique: de maniere qu'il frustra son païs du fruit de ses au-
tres bonnes qualitez, & par son intemperance, & sa sumptueuse superfluité de des-
pense. Ceulx d'Athenes reprenoient en Cimon, qu'il aimoit le vin: & les Romains
ne trouuans autre chose à redire en Scipion, le blasmoient de trop dormir: & les
malvueillans de Pompeius, aians remarqué qu'il grattoit quelquefois sa teste d'un
doigt, luy reprochoient, & tournoient à iniure cela. Car tout ainsi comme vne len-
tille, vn seing, vne verrue en la face de l'homme font plus d'ennuy, que ne feroient
vne balafre, ou vne cicatrice, ou vne mutilation en tout le reste du corps: aussi les fau-
tes petites & legeres de foy, apparoissent grandes es vies des Princes, & de ceulx qui
ont le gouvernement de la chose publique entre leurs mains, pour l'opinion imprimée
en l'entendement des hommes, touchant l'estat de ceux qui gouvernent, & qui sont G
en magistrat, estimans que c'est chose grande, & qui doit estre pure & nette de toutes
fautes, & de toutes imperfections. Pourtant à bon droit fut grandement loué
Liuius Drusus Sénateur Romain, de ce qu'il respondit à quelque ouurier qui luy pro-
mettoit de faire en sorte, si luy vouloit, que ses voisins qui descouuroient & voyoient
en plusieurs endroits de sa maison, n'auroient plus nullement de veüe sur luy, & ne
luy cousteroit que trois mille escus seulement: mais ie t'en donneray six mille,
dit-il, & fays en sorte que lon voye dedans ma maison de tous costez, à fin que tous
ceulx de la ville voyent & sçachent comment ie vis: car c'estoit vn personnage graue,
honneste & sage: mais à l'aduenture n'estoit-il ia besoing que lon luy rendist sa mai-
son veüe de tous costez, pource que le peuple penetre iusques à voir au fond des
mœurs, des conseils, des actions, & vies que lon pense estre plus cachees & couuertes
de ceulx qui gouvernent, non moins par ce à quoy ils s'adonnent en priué, qu'à ce H
qu'ils leur voyent faire & dire en public, en aimant les vns, & les estimant pour cela, &
en haïssant & mesprisant les autres. Et quoy, me dira quelqu'un, les citez ne se seruent
elles pas quelquefois de gouverneurs, qu'elles sçauent estre dissolus & desordonnez en
leur maniere de viure? Je croy bien: mais c'est comme nous voyons que les femmes qui
enchargent, & sont enceintes, appetent bien souuent à manger des pierres, & ceux à
qui le cœur fait mal sur la mer demandent des saleures, & autres telles mauuaises vian-
des: mais vn peu apres que le mal leur est passé, ils les reiettent & les ont en horreur:
aussi les peuples quelquefois par vne insolence & vn plaisir desordonné, ou à faute
de meilleurs gouverneurs, se seruent des premiers venus, combien qu'ils les mesprisent
& abominent: & puis apres ils sont bien aises quand ils oyent tenir d'eux de tels pro-
pos, que le poëte Comique Platon en vne sienne comédie fait dire au peuple mesme,
Prens

A Prends moy la main, prens la moy vistement,
Car i'essiray capitaine autrement
Ægyrius.

& puis en vn autre passage il demande le bassin, & vne plume pour mettre en sa gorge,
& se prouocquer à vomir,

Deuant moy i'ay la tribune eminente
Des harengueurs, Mantile se presente.
Il entretient vne puante teste,
Voire, ie dis, infame & deshoneste.

Et puis apres,

B Et le peuple Romain, comme Carbon luy promist quelque chose, en l'assurant par vn grand serment, avec vne execration & malediction s'il n'estoit ainsi, tout d'une voix iura haultement à l'encontre, qu'il n'en croyoit rien. Et en Lacedemone, comme vn meschant homme dissolu, nommé Demosthenes, eust proposé vn aduis & conseil, qui estoit fort à propos, & vtile pour la matiere dont il estoit question, le peuple le reietta : & les Ephores aians choisy vn des plus honorables Senateurs du conseil, luy commanderent de proposer le mesme aduis, ne plus ne moins que s'ils l'eussent osté d'un vaisseau sale & ord, & remué en vn autre pur & net, pour le rendre agreable à leur commune : tant a d'efficace pour gouverner vn estat, la foy & l'assurance de la preud'homme d'un personnage, & consequemment aussi, tant a de force le contraire. Ce n'est pas pourtant à dire, qu'il faille negliger la grace & science de bien dire, en faisant son total fondement de la vertu, mais estimer que l'eloquence n'est pas celle qui persuade seule, ains qu'elle y aide & coopere, en rhabillant le dire du poëte Menander,

Les bonnes mœurs de celuy qui harengue,
Croire le font, non pas sa belle langue.

C Car ce sont les bonnes mœurs & la parole ensemble : si d'adventure nous ne voulions dire, que c'est le timonnier qui gouverne la nauire, & non pas le timon, & que c'est le cheuaucheur qui tourne le cheual, & non pas la bride : aussi que la science de gouverner vne Chose publique vse des mœurs, & non pas d'eloquence, cōme d'un timon, ou d'une bride, pour manier & regir toute vne ville, qui est, ainsi que dit Platon, l'animal le plus aisé à tourner qui soit point, pourueu qu'il soit conduit & mené en maniere de dire par la poupe : car veu que les grands Roys enfans de Iupiter, ainsi comme Homere les appelle, enflaient encore leur magnificence avec des grandes robes de pourpre, avec des sceptres en leurs mains, avec des gardes & satellites, dont ils estoient enuironnez, avec des oracles des Dieux en leur faueur, assubiectissans à eulx par ceste venerable apparence extérieure, la commune, en leur imprimant opinion qu'ils estoient quelque chose plus que hommes : & neantmoins vouloient encore apprendre à disertement parler, & ne mettoient point en nonchaloir d'acquérir la
D grace de bien dire,

Et harenguer, pour estre plus parfaicts
A soustenir de la guerre le faix :

Hom Iliad.
liu. 9.

& ne se recommandoient pas seulement à Iupiter conseiller, ny à Mars sanglant, ou à Minerue guerriere, ains reclamoient aussi la Muse Calliopé,

Qui suit les Roys, & les rend venerables :

adoucissant par grace persuasive, & apaisant la violence & la fierté des peuples : veu, dis-je, que les grands Princes, se seruent de tant d'aides & de subsides, seroit-il bien possible qu'un homme priué, avec vne simple cappette & vne apparence populaire, entreprenant de manier toute vne cité à sa guise, en peust venir à bout, & domter tout vn peuple, s'il n'auoit l'eloquence qui luy aidast à ce faire, pour les persuader & amener à sa deuotion ? quant à moy, ie croy que non. Or les patrons des galeres

E

Instruction pour ceux qui

& des nauires, ont d'autres officiers deffous eulx, comme les Comites, qui font par E toute la nauire entendre leurs commandements : mais le bon gouuerneur d'estat doit auoir dedans soy-mesme l'entendement qui manie le timon, & puis la parole qui fait entendre sa volonte, à fin qu'il n'ait point affaire à tout propos de la voix d'un autre, & à fin qu'il ne soit contrainct de dire comme faisoit Iphicrates quand il se trouuoit rabroüé par l'eloquence d'Aristophon, Le ioueur de mes aduersaires est bien
" meilleur que le mien, mais mon jeu vault beaucoup mieux que le leur : & qu'il ne luy faille souuent vsurper ces vers d'Euripide,

Que pleust à Dieu que l'humaine semence

Fust sans parole & sans point d'eloquence.

Et ces autres,

O Dieux, que n'ont les affaires du monde,

Voix pour parler, à fin que la faconde

Des harangueurs ne seruist plus de rien.

Car ces propos-là se pourroient à l'aduenture conceder à vn Alcamenes, ou vn Ne- F siotes, ou vn Ictinus, & à telle maniere de gens viuans de leurs bras, & gaignans leur vie à la sueur de leur corps, qui n'ont point d'esperance de iamais attaindre à ceste perfection de bien dire : comme lon escrit de deux architectes & maçons que lon vouloit esprouuer à Athenes, pour sçauoir lequel des deux seroit mieulx à propos pour entreprendre vne grande fabrique & edifice publique : l'un, qui estoit affecté & sçauoit bien dire sa raison, recita vne harangue qu'il auoit premeditee touchant celle fabrique, si bien qu'il émeut toute l'assistance du peuple : & l'autre qui entendoit bien mieulx l'architecture, & ne sçauoit pas si bien haranguer, se presentant au peuple ne
" fait que dire, Seigneurs Atheniens, ce que cestui-cy a dit, ie le feray. Et quant à ceux là, ils ne recognoissent que Minerue artisanne & ouuriere, comme dit Sophocles,

Qui dessus l'enclume massiue

Forment à grands coups de marteaux

Vne masse sans ame viue

Obeïssante à leurs trauaux.

G

Mais celuy qui est ministre & prestre de la Minerue Poliade, c'est à dire gardienne des villes, & de Iustice conseillere,

Qui aux conseils des hommes presidente,

Ou à les rompre ou assembler regente :

celuy-là dis-ie, n'ayant qu'un seul instrument dont il se puisse seruir, qui est la parole, forme les vns à son moule & les accommode, les autres qu'il treuve repugnans au dessein de son ouurage, comme seroient des nœuds en du bois, ou des fueilles & pailles en du fer, en les polissant & applanissant, il embellit toute vne cité. Par ce moyen le gouuernement de Pericles, qui de nom & d'apparence estoit populaire, à la verité & en effect estoit principauté regie par vn seul homme premier de la ville, par le moyen & la force de son eloquence : car au mesme temps Cimon estoit bien homme H de bien, si estoit Ephialtes, & Thucydides aussi, qui estant vn iour enquis par le Roy de Lacedemone Archidamus, lequel estoit le plus adroit à la luiète de luy ou de Pericles : Cela, respondit-il, seroit bien mal-aisé à dire : car quand ie l'ay porté par terre
" en luiétant, luy en disant persuade aux assistans qui l'ont veu, qu'il n'est pas tombé, &
" le gaigne : ce qui n'apportoit pas seulement gloire & honneur à luy, mais aussi salut à toute sa ville, laquelle se laissant persuader à luy, maintint & garda tresbien la richesse & l'estat qu'elle auoit, & s'absteint de vouloir conquerir l'autrui : là où le pauvre Nicias, qui auoit bien la mesme intention, & non pas la mesme grace de persuader avec sa parole, qui estoit comme vn mors trop doux, tascha bien de re-frener & arrester la cupidité du peuple, mais il n'en peut venir à bout, ains fut emporté malgré luy, & entraîné à col tors par la violence du peuple, iusques en la Sicile.

On

Thucydide
au 2. liu. de
son histoire.

- A On dit communément par vn ancien prouerbe, Qu'il ne fault pas tenir le loup par les oreilles : mais c'est vn peuple & toute vne cité qu'il fault principalement prendre par les oreilles , non pas aller chercher d'autres prises lourdes & grossieres, pour attirer & gagner vne commune: ainsi que font ceux qui ne sont pas suffisamment exercez en cest art d'eloquence : les vns tirans le populaire par la panse, en luy faisant des banquetts : les autres par la bourse, en luy donnant de l'argent, ou luy faisant voir des jeux, des danses, ou des combats d'escrieurs à outrance: qui n'est pas tant mener que trainner par flatterie vn peuple: car le mener proprement est le persuader par force d'eloquence, là où ces autres allechements de populace ressemblent proprement aux appasts que lon fait pour prendre les bestes brutes. Puis qu'il est donc ainsi, que le principal instrument d'un sage gouuerneur est la parole, il fault tout premierement qu'elle ne soit point affectee, ny pompeuse & fardee, comme seroit celle d'un ieune charlatan & triacleur, qui voudroit monstrier son eloquence en pleine assemblée de foire, composant son oraison des plus beaux, plus doux, & plus elegans termes qu'il pourroit choisir: ny aussi tant elaboree & trauaillee, comme disoit Pytheas, qu'estoit celle de Demosthenes, luy reprochant qu'elle sentoit l'huile de la lampe: ny pleine de trop de curiosité sophistique, de raisons trop aiguës & subtiles, ou de clauses exactement mesurees à la regle & au compas, ne plus ne moins que les musiciens veulent qu'au touchement des cordes il se sente vne affection douce, non pas vn rude battement: aussi au langage du sage gouuerneur, soit qu'il conseille, ou qu'il ordonne quelque chose, qu'il apparaisse non vne ruse, ny vn artifice d'orateur, non vne affectation de louange d'auoir parlé doctement, subtilement, & ingenieusement: mais soit son parler plein d'une affection naïue, d'une vraye magnanimité, d'une franchise de remonstrance paternelle, qu'il sente son pere du public, plein de bon sens, de prouoyance soigneuse, aiant la grace attraiante cōiointe avec l'honneste dignité, en termes graues, raisons pertinentes & vraysemblables. Il est bien
- C vray que le langage d'un homme de gouuernement reçoit plus que ne fait celui d'un Aduocat plaidant en iugement, des sentences, des histoires, des fables, des translations, lesquelles esmeuent fort vne commune, quand celui qui les allegue en sçait vser moderément, & en temps & lieu, comme fait celui qui dit: Ne veuillez, Seigneurs, rendre la Grece borgne: parlant de la ville d'Athenes, que lon vouloit destruire: & comme parla Demades quand il dit, qu'il n'auoit à gouuerner que le naufrage de la Chose publique. Et Archilochus qui disoit, Que la pierre de Tatalus ne soit pas tousiours suspendue sur ceste Isle: & Pericles qui vouloit qu'on ostast vne petite Isle, qu'il disoit estre vne maille en l'œil du port de Piree: & Phocion parlant de la victoire qu'auoit gaignee le capitaine Leosthenes, Que la carriere de ceste guerre estoit belle, mais qu'il en craignoit le retour & le redoublement: c'est à dire, la longueur. En somme, le parler tenant vn peu du graue, & du hault & du grand, est
- D mieulx seant à vn gouuerneur de ville: dequoy lon peut prendre pour exemple & patron les oraisons que Demosthenes a escriptes contre le Roy Philippe, & entre les harangues & concions de Thucydides celle de l'Ephore Sthenelaïdas, & celle du Roy Archidamus en la ville de Platées, & celle de Pericles apres la grande pestilence d'Athenes. Mais quant aux longs preschements & grandes trainnees de harengues que Theopompus, Ephorus, & Anaximenes font dire aux capitaines, quand ils ont ja fait prendre les armes à leurs gens, & les ont rengez en bataille, on en peut dire ce que dit vn poëte,

Si follement on ne va langager

Quand on est prest de l'ennemy charger.

Il est bien vray que l'homme de gouuernement troussera bien aucunes fois quelque mot de rencontre, & quelque traitt de risée, mesmement si c'est pour chastier & par

Instruction pour ceux qui

mocquerie regenter quelqu'un modestement, & avec utilité, non pas le taxer ne pic-
quer outrageusement en son honneur avec gaudissérie : mais cela est principalement E
trouué bon & loué, quand il se fait en repliquant & rendant le change à quelqu'un :
car de commencer & le faire de propos délibéré & premedité, c'est à faire à un plai-
sant, qui cherche à faire rire la compagnie, outre ce que lon en encourt opinion de ma-
lignité, comme il y en auoit és brocards de Ciceron & de Caton le vieil, & d'un Eu-
xitheus qui estoit familier d'Aristote : car ceux-là ordinairement commencent les
premiers à se mocquer : Mais quand on ne fait que repliquer, la soudaineté de l'occa-
sion donne à celui qui fait la rencontre, pardon & bonne grace tout ensemble, com-
me fait Demosthenes à un qui estoit soupçonné d'estre larron, qui se mocquoit de
ce que Demosthenes veilloit toute la nuit pour estudier & escrire : Je sçay bien, dit-il,
que ie te fâche fort de ce que ie tiens la lampe allumée toute la nuit : & aussi quand il
respondit à Demades qui crioit à pleine teste, Demosthenes me veut corriger, c'est
bien ce que lon dit en commun proverbe, La Truye veut enseigner Minerue. Ceste F
Minerue-là, luy repliqua-il, fut l'autre iour surprise en adultere. Aussi n'eut pas mau-
uaise grace ce que respondit Xenetus à ses citoyens qui se mocquoient de luy, de ce que
estant leur Capitaine il s'en estoit enfuy : Avec vous mes beaux amis, respōdit-il. Mais
il se fault bien donner garde de passer vne certaine mediocrité en matiere de ces rencō-
tres & mots de risée, & d'offenser importunément les escoutans, ou de se raualler & se
monstrer lasche soy-mesme, en le disant : comme fait un Democrates, lequel un iour
montant en la tribune aux harangues, dit au peuple, qu'il ressembloit à leur ville, par
ce qu'il auoit peu de force, & beaucoup de vent : & vne autrefois du temps de la de-
faite & bataille perdue à Chæronee, se presentant deuant l'assemblée du peuple : Je
suis bien desplaisant, dit-il, que la Chose publique soit si calamiteuse, que vous pre-
niez la patience d'ouyr & receuoir mon conseil. Car l'un est acte d'homme bas & vil,
l'autre de fol & insensé : & à l'homme d'estat, ny l'un ny l'autre n'est bien conuenable. G
On a aussi en admiration la brefueté du langage de Phocion : tellement que Polyeu-
ctus faisant iugement de luy, disoit que Demosthenes estoit bien un tres-grand Ora-
teur, mais que Phocion sçauoit mieulx dire, pource que son langage en peu de paro-
les contenoit beaucoup de substance : & Demosthenes qui ne faisoit compte de tous
les autres Orateurs de son temps, quand Phocion se leuoit pour parler apres luy : Voy-
la, disoit-il, le couperet de mes paroles qui se lève. Mets donc peine le plus qu'il te se-
ra possible, quand tu auras à parler deuant le peuple, de bien propenser ce que tu auras
à dire, pendant que tu le pourras faire seurement, & non pas vser de paroles vaines &
vuides de sens, sçachant que Pericles mesme, ce grand gouuerneur prioit aux Dieux
auant que de monter en chaire, qu'il ne luy eschappast de la bouche aucune parole,
qui ne seruist à la matiere dont il deuoit traiter : toutesfois encores se fault-il exerci-
ter à sçauoir respondre & repliquer promptement, car les occasions passent en un mo-
ment, & apportent beaucoup de cas soudains en matiere de gouuernement : au moyen H
dequoy Demosthenes, pour n'y estre pas bien fait, estoit reputé inferieur à plusieurs
autres de son tēps, pource que quand l'occasion se presentoit, bien souuent il se tiroit
en arriere, & se cachoit, s'il n'auoit bien premedité ce qu'il auoit à dire. Et Theophra-
stus escrit qu'Alcibiades voulant non seulement dire ce qu'il falloit, mais aussi ainsi
qu'il le falloit, restiuoit bien souuent en parlant, & quelquefois demouroit tout court,
pendant qu'il cherchoit en luy-mesme, & composoit les termes propres esquels il de-
uoit dire : mais celui qui prent occasion de se leuer pour parler des occurrences mes-
mes, & des temps qui se presentent soudainement, il estonne merueilleusement & mène
comme il veut vne commune : comme Leon Byzatin vint un iour à Athenes, enuoyé
par ceux de Constantinople pour faire des remonstrances de pacification aux Athé-
niens, lesquels estoient tombez en grandes dissentiōs les uns contre les autres : or estoit
il fort

A il fort petit: de maniere que quand le peuple le vid sur la chaire aux harangues, chascun s'en prit à rire: dequoy luy s'apperceuant, Et que feriez-vous doncques, dit-il, si vous voiez ma femme, qui à peine me vient iusques au genouil? alors la risée fut encore bien plus grande de toute l'assemblée: Et neantmoins tous petits que nous sommes, dit-il, quand nous entrons en querelle l'un contre l'autre, la ville de Byzance n'est pas assez grande pour nous contenir tous deux. Et Pytheas l'orateur, lors qu'il contredisoit aux honneurs que lon decernoit à Alexandre, comme quelqu'un luy dist, Comment, ozes tu bien parler de si grandes choses, toy qui es si ieune? Et quoy, dit-il, Alexandre que vous faictes un Dieu par vos decrets, est encore plus ieune que moy. Mais encore outre ceste parole bien exercitée, il faut apporter vne forte voix, un bon & puissant estomach, & vne longue haleine à ce combat de gouvernement, qui n'est pas leger, ains où il fault que tout aille, de peur que si d'adventure sa voix se pert, ou se lasse, il ne vienne souuent à estre gagné & supplanté par quelque

B Larron criant, à voix de charlatan.

Et Caton le second, quand il sentoit que le Senat ou le peuple estoit preteu par faueurs, brigues & menees, tellemēt qu'il n'esperoit pas pouuoir persuader ce qu'il pretendoit, il se leuoit & parloit tout un iour, à fin d'empescher que pour le moins il ne se feist rien de tout ce iour-là, & faisoit ainsi couler le temps. Mais à tant, quant à la parole du gouuerneur, de quelle efficace elle est, & comment il la fault preparer, nous en auons desormais traité suffisamment, pour ceux qui y sçauront bien d'eux-mesmes adiouter ce qui necessairement y est ensuyuant. Au surplus il y a deux aduenues & deux chemins pour entrer en credit de gouvernement, l'un court & honorable pour bien tost acquerir gloire, mais il n'est pas sans danger: l'autre plus long & plus obscur, mais où il y a aussi plus de seureté: car les uns partans & faisans voile, comme d'une roche assise en pleine mer, en maniere de dire, commencent à quelque entreprise grande & illustre, là où il est besoing de hardiesse, & se iettent de prim-fault au beau milieu des

C affaires de gouvernement, estimans que le poëte Pindare dit verité en ces vers,

A tout œuure & acte naissant,

Ceux qui le vont encommençant

Doiuent donner un front illustre,

Qui de loing face voir son lustre.

Car certainement un peuple communément estant ja las & saoul des gouuerneurs qu'il a de long temps accoustumez, reçoit plus volontiers ceux qui commencent: ne plus ne moins que les spectateurs regardent plus affectueusement un nouveau combattant qui vient tout frais sur les rangs: & les faueurs, credits & puissances, qui ont tout soudain un illustre accroissement, estonnent & esblouissent l'enuie. Ne plus ne moins que le feu, disoit Ariston, ne fait point de fumee quand il s'enflamme soudainement: aussi la gloire n'engendre point d'enuie quand elle s'acquiert promptement: mais ceux qui croissent à loisir & petit à petit, sont ceux à qui lon s'attache, l'un d'un costé, l'autre de l'autre: & pour ceste cause plusieurs auant que florir en matiere de credit au gouvernement, sont demourez tous amortis & fenez à l'entour de la tribune aux harangues: mais là où il y a, comme dit l'Epigramme du coureur Ladas,

Quand on oyoit le son de la barriere,

Il estoit ja au bout de la carriere,

Aiant le chef de laurier couronné.

quelqu'un qui fait vne ambassade illustre, ou gagne un triomphe, ou conduit vne armee glorieusement, ny les enuieux, ny les mal-veuillans encontre ceux-là n'ont pas pareille puissance. Ainsi vint Aratus en grand credit dès son commencement, pour auoir deffait & ruiné le tyran Nicocles: ainsi feit Alcibiades quand il prattiqua l'alliance des Mantiniens avec les Atheniens contre les Lacedemoniens. Et Pompeius

Ode 6. des
Olympies.

Instruction pour ceulx qui

voulut entrer en triomphe dedans la ville de Rome, auant que d'estre receu au Senat: Et comme Sylla l'en voulust empescher, il ne feignit pas de luy dire, Il y a plus d'hommes qui adorent le Soleil leuant, que le Soleil couchant. ce que Sylla aiant ouy, ceda, sans rien repliquer à l'encontre. Et ce que le peuple Romain eleut Cornelius Scipion de prim-faut Consul contre la disposition des loix, lors qu'il ne demandoit que l'office d'Ædile, ne fut pas pour vn vulgaire commencement & entree telle-quelle aux affaires, ains pour l'admiration qu'il eut de sa grande vertu, en ce qu'estant encore en son adolescence, il auoit combattu teste à teste en champ clos en Espagne, & auoit vaincu son ennemy, & pour autres plusieurs grandes prouesses qu'il auoit faittes estant Colonel de mille hommes de pied à l'encontre des Carthaginois: pour lesquels beaux faiëts d'armes le vieil Caton retournant du camp exclama,

Remercer en
l'Orator.

Luy seul se peut mettre au nombre des sages,

Les autres tous sont comme vmbres volages.

Mais maintenant que les citez de la Grece sont reduites à tels termes, qu'elles n'ont plus d'armes à conduire, ny d'alliance à pratiquer, ny de tyrannies à ruiner, quelle noble & illustre entree voulez vous que face vn ieune homme en l'entremise du gouuernement? Il reste encore les causes publiques à plaider, les ambassades deuers l'Empereur à negocier, où il est ordinairement besoing d'un personnage ardent à l'action, qui ait cœur & entendement pour en venir à chef: & si y a plusieurs honnestes coustumes anciennes que lon a par negligence laissé abastardir, que lon pourroit remettre sus & renouueller, & plusieurs abus qui par mauuaise accoustumance se sont coulez dedans les villes, & y ont pris pied au grand deshonneur & grand dommage de la Chose publique, qui se peuuent redresser & rhabiller. Il est plusieurs fois aduenue, qu'un grand procès iugé droittement, foy & diligence cogneue en la cause d'un pauvre homme defendu librement & vertueusement contre l'oppression d'un puissant aduersaire, vne parole forte & roide ditte hardiment à quelque Seigneur mauuais pour le droict & la iustice, ont donné entrees honorables au manieement des affaires publiques: plusieurs mesmes se sont mis en auant par les inimitiez qu'ils ont prises à l'encontre de quelques personnages, dont l'autorité estoit odieuse, suspecte, & formidable au peuple. Car tout premierement la puissance & l'autorité de celuy qui est ruiné accroist à celuy qui l'a debouté avec meilleure reputation: non pas que ie veuille dire, qu'il soit bon de s'attacher par enuie à vn homme de bien & d'honneur, qui par sa vertu tient le premier lieu de credit en son pays, comme Simmias fait à Pericles, Alcmeon à Themistocles, Clodius à Pompeius, & Meneclides l'orateur à Epaminondas: car cela n'est ny bon, ny honorable, & encore moins profitable: pource que quand le peuple par vne soudaine cholere a offensé vn homme de bien, & que puis soudainement il s'en repent, comme il se faiët ordinairement, il n'estime point auoir de plus aisee ny plus iuste defense & excuse enuers luy, que de ruiner celuy qui a commencé le premier à les induire à ce faire: mais bien de se prendre à vn meschant homme, qui par vne audace temeraire & par ses ruzes & cautelles aura mis sous luy toute vne cité, comme estoient anciennement vn Cleon & vn Clitophon à Athenes, pour le ruiner & renuerser: cela est vn beau preambule, ne plus ne moins que d'une comédie, pour entrer au gouuernement d'une chose publique. Je n'ignore pas aussi que quelques vns pour auoir vn peu rongné les ailes à vn Senat trop impetueux, & s'attribuant trop de souueraineté, comme fait vn Ephialtes à Athenes, & vn Phormion en la ville des Eliens, en ont acquis honneur & credit en leur pays: mais cela est vn dangereux commencement pour ceux qui veulent venir au manieement des affaires: Et semble que Solon commença par vne meilleure entree, estant la ville d'Athenes diuisee en trois parts: la premiere, des habitans de la montaigne: la seconde, de ceux de la plaine: la tierce, de ceux de la marine: car ne se meslant avec

- A avec pas vne des trois, ains se maintenant commun à toutes, & disant & faisant toutes choses pour les reünir & reconcilier ensemble, il fut eleu d'un commun consentement de toutes reformateur, pour faire loix nouvelles de pacification entre elles, & par ce moien r'assura l'estat d'Athenes. Voyla donc comment on peut entrer au manient d'affaires par honorables & glorieux commencemens. Et quant à l'autre entree qui est plus seure & plus lente aussi, il y a eu plusieurs hommes notables, qui anciennement l'ont mieux aimée, Aristides, Phocion, Pammenes le Thebain, Lucullus à Rome, Caton, Agésilas à Lacedemone. Car tout ainsi que le lierre s'entortille à l'entour des arbres plus puissans que luy, & se lève à mont quand & eux: aussi chacun de ces personnages-là estant encore ieune & incogneu, se couplant avec un autre ancien qui desia estoit en credit, en se levant petit à petit sous l'ombre de l'autorité de l'autre, & croissant avec luy, a fondé & enraciné son entremise au manient des affaires. Ainsi Clisthenes poussa en avant Aristides, & Chabrias Phocion, & Sylla
- B Lucullus, Valerius Caton, Pammenes Epaminondas, & Lyfander Agésilas: mais ce dernier par vne ambition hors de propos, & vne importune ialousie, feit tort à sa reputation, en reiettant soudain arriere de soy celui qui le guidoit en ses actions, mais tous les autres sagement & honnestement ont tousiours reueré, recogneu & aidé de leur pouuoir à amplifier iusques à la fin les auteurs de leur auancement, ne plus ne moins que les corps opposez au Soleil, en rebattant & renuoyant la lumiere qui les enlumine, l'augmentent & l'esclarcissent encore d'avantage: de maniere que les mesdisants qui portoient enuie à la gloire de Scipion, disoient qu'il n'estoit que le ioueur des beaux faiëts d'armes qu'il executoit, mais que le premier auteur en estoit Lélius son familier: toutefois Lélius ne s'en eleua ny altera iamais pour tous ces langages-la, ains continua tousiours à seconder & promouvoir la gloire & la vertu de Scipion. Et Afranius amy de Pompeius, encore qu'il fust de bien petit lieu, estoit neantmoins prest à estre eleu Consul, mais sentant que Pompeius fauorisoit à d'autres, il se deporta de sa poursuite, disant qu'il ne luy seroit pas tant honorable d'estre promu au consulat, comme il luy seroit grief & moleste de l'auoir obtenu contre la volonté, & sans le port & faueur de Pompeius: ainsi en differât & attendant un an seulement, il obtint ce qu'il demandoit, & si se conserva la bonne grace de son amy. Par ce moyen il aduient à ceux qui sont ainsi menez comme par le poing au chemin de la gloire par d'autres, qu'en gratifiant à un, ils gratifient ensemble à plusieurs, & que si leur arriue mal, ils en sont moins hais. C'est pourquoy Philippus admonestoit fort son fils Alexandre, qu'il aduist bien à faire force seruiteurs & amis pendant qu'il en auoit le loisir, estant un autre que luy en regne, & qu'il parlât gracieusement à un chacun, & caressât tout le monde: mais il faut eslire pour son guide & conducteur, non simplement celui qui est le plus puissant, & qui a plus de credit, ains celui qui est tel par la vertu. Car ainsi comme tout arbre ne reçoit pas, ou ne peut pas porter la vigne
- D entortillée à l'entour de son tronc, & y en a quelques uns qui la suffoquent, & empêchent de croistre & de profiter: aussi es gouvernemens des villes ceux qui ne sont pas vraiment gens de bien, amateurs de la vertu seulement, ains sont ambitieux & conuoiteux de l'honneur & des grandeurs, ils ne laissent point aux ieunes gens de moyens & occasions de faire de belles choses, ains par enuie & ialousie les reculent & tiennent loing le plus qu'ils peuuent, en les faisant languir, cōme ceux qui leur ostent la gloire, laquelle ils estiment estre leur nourriture: ainsi que feit Marius en Afrique, & depuis en la Gaule, à l'endroit de Sylla, duquel il auoit tiré beaucoup de beaux & bons seruites, & puis soudainement il ne s'en voulut plus seruir: pource que à la verité il estoit marry de le voir venir en avant, & acquerir reputation, prenant pour sa couleur le cachet qu'il auoit fait grauer en un anneau, à fin d'auoir quelque occasion de le reculer: car Sylla aiant la charge des finances sous Marius, qui estoit Lieutenant general du

Instruction pour ceux qui

peuple Romain, fut enuoyé par deuers le Roy Bocchus, dont il amena Iugurtha prisonnier : & comme ieune homme qu'il estoit, ne faisant que commencer à gouter la douceur de la gloire, ne s'estoit pas cōduit trop modestemēt en cest affaire, parce qu'il portoit en son doigt vn anneau, sur lequel il auoit fait engrauer ceste histoire, comme Bocchus luy liuroit entre ses mains Iugurtha prisonnier : c'est dequoy Marius se plaignoit, & qu'il prenoit pour occasion coloree de le reculer: au moyen dequoy Sylla se retirant deuers Catulus & Metellus gens de bien aduersaires de Marius, en peu de temps chassa & ruina Marius par vne guerre ciuile, qui fut bien pres de renuerſer entierement tout l'Empire Romain. Sylla ne feit pas ainsi à l'endroit de Pompeius, car il l'auança tousiours dès sa premiere ieunesse, se leuant de sa chaire au deuant de luy, & se descourant la teste quand il arriuoit : & semblablement departant aux autres ieunes gentils-hommes Romains les moyens de faire exploits de capitaines, & mesmes y poussant aucuns qui n'y vouloient pas aller: de maniere qu'il emplit en ce faisant toutes ses armées de zele & d'émulation à qui feroit le mieux, & vint par ce moyen au dessus de tous, en voulant estre non seul, mais le premier & le plus grand entre plusieurs grands. Ce sont doncques tels hommes ausquels il se faut ioindre, & par maniere de dire, attacher & incorporer: non pas comme le petit roytelet des fables d'Æsopé, qui s'estant fait porter sur les espauls de l'aigle, quand il fut aupres du beau Soleil s'en vola soudainement, & y arriua deuant l'aigle, aussi leur desrobber leur honneur, & leur soubstraire leur gloire, ains au contraire la prenant & receuant d'eux avec leur consentement & bonne grace, en leur donnant à cognoistre qu'ils ne sçauoient pas bien commander s'ils n'auoient premierement appris d'eux à bien obeyr, ainsi comme dit Platon. Apres cela suit l'election que lon doit faire d'amis: en quoy il ne faut suivre ny la façon de Themistocles, ny celle de Cleon: car Cleon quand il voulut s'entre-mettre du maniement des affaires, assemblant tous ses amis ensemble, il leur declara qu'il renonçoit à l'amitié d'eux tous, par ce qu'il disoit que l'amitié estoit bien souvent cause d'amollir les hommes, & de les desuoyer de leur droite intention en affaires de gouuernement: mais il eust bien mieux fait de chasser hors de son ame toute auarice & toute opiniaſtreté, & de nettoyer son cœur de toute enuie & de toute malignité: car les gouuernemens des villes n'ont pas besoing d'hommes qui n'ayent ne familiers ny amis, ains seulement qui soient sages & gens de bien: mais luy aiant chassé ses amis, auoit à l'entour de luy des flatteurs qui le leschoient ordinairement, ainsi que luy reprochoient les poëtes Comiques, & se montrant aspre & rude aux gens de bien, il se laissoit puis apres aller à flatter & caresser vne commune, en faisant & disant toutes choses à leur gré, & prenant argent à toutes mains, en se liguant avec tous les plus meschans & plus perdus hommes de toute la ville, pour courir sus & faire la guerre aux gens de bien & d'honneur. Au contraire, Themistocles respondit à vn

» qui luy disoit, Tu feras le deuoir de bon Magistrat, si tu te monstres egal à tous:

» T'à-Dieu ne plaſe que ie ſcie iamais en ſiege preſidial, où mes amis n'ayent point plus

» d'auantage, que ceux qui ne ſeront point mes amis: ne faiſant pas bien, non plus que l'autre, de promettre ainſi l'autorité de ſon gouuernement à ceux avec leſquels il auoit amitié, & de ſoubmettre les affaires publiques à ſes priuées & particulieres affectionſ: nonobſtant qu'il euſt bien mieux reſpondu à Simonides, qui le requeroit de

» quelque choſe qui n'eſtoit pas iuſte, Ny le Muſicien, dit-il, ne ſeroit pas bon, qui chât-
» teroit contre meſure: ny le Magistrat iuſte, qui fauoriſeroit vne partie contre les loix. Car ce ſeroit veritablement, grande pitié & choſe bien indigne, qu'en vne nauire le maſtre & patron de la nauire donnaſt ordre à recouurer vn bon pilote & timonnier, & que ce timonnier choiſiſt de bons matelots, & compagnons mariniers,

Sçachans tresbien le timon gouuerner,
Dreſſer la voile, ou ſoudain amener,

Lors

A Lors que le vent impetueux se lève,
& qu'en vn atelier le maistre sceust bien eslire des ouuriers & maneuures sous luy,
qui ne luy gastent point son ouurage, ains luy aident, & luy seruent à le paracheuer,
& que l'homme de gouuernement, qui est, comme dit Pindare,

Le maistre ouurier de la iustice,

Le directeur de la police,

ne sceust pas dès le commencement choisir des amis de mesme zele & mesme affection que luy, qui le secondent en ses entreprises, & qui soient comme luy espris du desir de bien faire, ains se laissast plier iniustement, ores à faire vn tort à l'appetit de l'vn, ores à en faire vn autre au gré d'vn autre: car celuy-là ressembleroit proprement à vn charpentier ou maçon, qui par erreur ou ignorance vseroit d'esquierre, ou de plomb & de reigle, qui luy rendroient son ouurage tortu. Car certainement les amis sont les outils viuans & sentans des hommes de gouuernement, & ne faut pas
B glisser avec eux, quand ils sortent de la droite ligne, ains auoir l'œil soigneusement à ce, que sans son sceu mesme ils ne fouruoyent point: car ce fut cela qui deshónora & fit calomnier Solon enuers ses citoiens, par ce qu'ayant intention d'abolir les debtes, & introduire ce que lon appelloit à Athenes Sifachthia, comme qui diroit, allegement de charge, qui estoit vn nom addoucy, pour signifier vne abolition generalé de toutes sortes de debtes, il communiqua sa conception à quelques siens amis, qui luy firent vn lasche & meschant tour: car ils se hasterent d'emprunter çà & là le plus d'argent qu'ils peurent, & peu de temps apres l'Edict de l'abolition generale des debtes estant venu en lumiere, il se trouua qu'ils auoient achepté plusieurs belles maisons, & grande quantité de terres, de l'argent qu'ils auoient emprunté: & fut Solon mescreu & chargé d'auoir fait ce tort là, qui luy-mesme l'auoit receu. Et Agesilaus s'est monstre es affaires & poursuittes de ses amis plus foible & plus failly de cœur, qu'en nulle autre chose, comme le cheual Pegasus en Euripide,

C Qui se tapist à bas s'humiliant,

Plus qu'on ne veult son eschine pliant:

& portant ses familiers plus affectueusement que la raison ne vouloit quand ils estoient appelez en iustice pour aucunes forfaitures, il sembloit que luy-mesme s'estoit entendu avec eux à les faire: car il sauua Phœbidas, qui estoit accusé d'auoir surpris d'embiee le chasteau de Thebes, appelé la Cadmee, sans commandement du Senat, alleguant pour la defense d'iceluy, que telles entreprises se deuoient executer de son motif propre, sans en attendre autre mandement: d'autre costé, il fit tant par son port & faueur, que Sphodrias, qui estoit attainct d'vn meschant & malheureux acte, d'estre entré à main armee dedans le pais d'Attique, lors que les Atheniens estoient en paix & amitié avec les Lacedemoniens, s'eschappa, & fut absouls en iugement, & ce estant amolly par les prieres amoureuses d'vn sien fils. Lon trouue aussi
D vne sienne missiue qu'il escriuit à quelque Seigneur en ces termes;

„ Si Nicias n'a point forfait, deliure le pour la iustice: si a forfait, deliure le pour l'amour de moy: mais comment que ce soit, deliure le.

Au contraire, Phocion ne voulut pas assister seulement en iugement à son gendre Charillus, qui estoit accusé d'auoir pris de l'argent de Harpalus, ains s'en alla en luy disant, ie t'ay fait mon allié à toutes choses iustes & raisonnables. Et Timoleon le Corinthien apres auoir fait tout ce qui luy fut possible par prieres enuers son frere, pour le cuider diuertir de vouloir estre tyran, voyant qu'il n'en pouuoit venir à bout
„ il se tourna contre luy avec ceux qui le tuerent: Car il ne fault pas seulement estre
„ amy iusques aux autels, c'est à dire, iusques à ne se vouloir point parier pour eux,
„ ainsi que respondit vn iour Pericles: mais aussi iusques à ne vouloir rien faire pour eux contre les loix, contre le droit, & contre l'utilité publique: car quand on met cela

Instruction pour ceulx qui

à nonchaloir, il est cause d'amener vne grande perte, & ruine, comme fut ce que Phœ- E
bidas, & Sphodrias ne furent pas punis ainsi qu'ils auoient merité, car ils furent cause
que les Lacedemoniens tomberent en la guerre Leuctrique. Il est vray que le de-
voir de bon & vray administrateur du public, ne nous contrainct pas de vouloir se-
uerement punir iusques aux petites & legeres fautes de nos amis, ains nous permet
apres auoir mis en seureté le public, au surplus de donner secours à nos amis, leur
assister, suruenir, & secourir en leurs affaires: & y a des faueurs que lon peut faire
sans enuie, comme aider à vn amy à paruenir à quelque office, ou bien luy faire
tomber entre mains quelque honorable commission, ou quelque aisee legation,
comme d'aller saluer de la part de la ville quelque Prince, ou de porter parole d'amitié,
& de bonne intelligence, à quelque autre ville: ou bien s'il est question de quelque
affaire difficile & de grande importance, alors prenant la principale charge sur soy,
on peut bien choisir pour adioint vn sien amy, ainsi que fait Diomedes en Homere,

Iliad. l. 7.

Si vous voulez que moy-mesme i'elise
Vn compagnon qui soit mieux à ma guise,
Comme pourrois ie, Vlysses, t'oublier,
Esprit diuin, ny d'autre m'allier?
Vlysses aussi ne fault pas de luy rendre pareille louange,
Les beaux coursiers desquels tu me demandes,
Sage vieillard, arriuez en ces bandes
Nouvellement de la grand' Thrace sont,
Et leur seigneur au combat perdu ont:
Diomedes le vaillant chef de guerre,
En combattant l'a rué mort par terre,
Et avec luy douze de ses amis,
Tous grands guerriers, à mesme fin a mis.

En l'Epistre
à Dion de
Syracuse.

ceste modestie dont on vlc enuers ses amis n'honore pas moins ceux qui louent que G
ceux qui sont louez: là où au contraire, l'arrogance qui n'aime rien que soy-mesme,
comme dit Platon, demeure avec solitude, c'est à dire, elle est abandonnee de tout le
monde. D'auantage en ces hōnestes faueurs & plaisirs que lon peut faire ciuilement à
ses amis, il y faut associer ses autres amis, & admonester ceux qui reçoient telles gra-
ces, qu'ils les en louent & remercient, & leur en sçachent gré, comme en aians esté
cause en partie, & leur aians conseillé. Et si d'aduenture ils nous font quelque requeste
inciuite & defraisonnable, il les en faut tresbien esconduire, mais non pas aigrement,
ains tout doucement, en leur remonstrant pour les consoler, que telles requestes
ne sont pas dignes de leur bonne reputation, ny de leur vertu: comme fait Epa-
minondas mieux que tous les hommes du monde, quand il refusa à Pelopidas, de
mettre hors de prison vn tauernier: & peu d'heures apres, à la requeste d'une sienne
amic il le laissa aller, en luy disant, Seigneur Pelopidas ce sont de telles graces & fa- H
ueurs qu'il faut conceder à des concubines, & non pas à de grands capitaines: Mais
Caton au contraire respondit brusquement & fierement à Catulus, qui estoit l'un de
ses plus grands & plus familiers amis. Ce Catulus estant Censeur requeroit à Caton,
qui pour lors n'estoit que Questeur, qui est comme general des finances, que pour
l'amour de luy il voulust laisser eschapper vn clerc de finances, auquel il faisoit faire
„ le procès. C'est grand honte, dit-il, à toy qui es Censeur, c'est à dire, correcteur
„ & reformateur des mœurs, & qui nous deusses reformer nous autres qui sommes
„ plus ieunes, d'estre chassé hors d'icy par nos sergents: car il pouoit bien en luy re-
fusant de faict sa requeste, oster ceste aspreté & ceste aigreur de paroles, luy donnant
encore à entendre, que la rudesse dont il luy vsoit de faict, luy desplaisoit, mais qu'il
y estoit contrainct par le droit & la loy. Il y a d'auantage, que lon peut bien digne-
ment

- A ment quelquefois aider à ses amis, qui sont pauvres, à faire leurs besongnes, comme fait Themistocles apres la bataille de Marathon, voyant vn corps mort qui auoit des chaines & carquants à l'entour du col, il passa outre quant à luy, mais se retournant deuers vn sien familier qui le suiuiot, luy dit : Amasse cela toy, car tu n'es pas vn
- » Themistocles. Les affaires mesmes presentent bien souuent au sage gouuerneur des occasions telles, de pouuoir enrichir ses amis : car tous ne peuuent pas estre riches & opulents, comme toy, Menemachus. Donne donc à l'vn vne cause bonne & iuste à defendre, où il y ait bien à gagner : à l'autre, recommande luy l'affaire de quelque personnage riche, qui ait besoing d'homme qui luy sçache dresser & procurer son affaire : à vn autre, sois luy fauorable à auoir quelque marché de quelque œuvre publique, ou à luy faire estrousser quelque ferme à bon pris, où il y ait à profiter. Epaminondas fait bien plus : car il enuoya vn sien amy pauvre deuers vn autre riche bourgeois de Thebes, luy demander six cents escus en don, & luy dire que Epaminondas
- B luy commandoit de les luy bailler. Le bourgeois esbahy de ceste demande vint deuers Epaminondas, pour sçauoir à quelle occasion il luy mandoit de bailler ces six
- » cents escus : C'est pour autant, dit-il, que cestuy-cy estant homme de bien est pauvre :
- » & toy, qui as beaucoup desrobbé à la Chose publique, es riche. Et Agesilaus, ainsi comme escrit Xenophon, se glorifioit de ce qu'il enrichissoit ses amis, & luy ne faisoit compte aucun d'argent. Mais pour autant que, ce dit Simonides, ainsi comme toutes alouettes ont la creste sur la teste, aussi tout gouuernement de Chose publique apporte des inimitiez, enuies & ialousies, c'est vn poinct duquel l'homme d'estat & d'affaires doit estre bien informé, & bien instruit. Pour commencer doncques à en traiter, Il y a plusieurs qui louent grandement Themistocles & Aristides, lesquels comme ils sortoient du pais d'Attique pour aller ou en ambassade, ou en guerre ensemble, deposoient toutes leurs inimitiez & malvueillances sur les confins, & puis quand ils reuenoient, ils les reprenoient arriere. Et y en a aussi à qui la façon d'vn Cretin
- C Magnesien agree merueilleusement : Il auoit pour concurrent & aduersaire au gouuernement vn gentilhomme de sa mesme ville nommé Hermias, qui n'estoit pas fort riche, mais conuoiteux d'honneur, & de cœur magnanime, du temps de la guerre de Mithridates pour la conqueste de l'Asie. Ce Cretin voyant sa ville en danger, s'adressa à Hermias, & luy fait offre qu'il prist la charge de Capitaine general de leur ville, & luy cependant s'en iroit dehors, & se retireroit ailleurs, ou bien s'il aimoit mieux que luy prist la charge des affaires de la guerre, qu'il se retirast cependant hors du pais, de peur que demourans tous deux ensemble, & s'entrempeschans l'vn l'autre, comme ils auoient accoustumé, ils ne fussent cause de perdre & destruire leur ville. Ceste sermonce fut agreable à Hermias, lequel confessant que Cretin estoit plus expert au fait de la guerre que luy, sortit de la ville avec sa femme & ses enfans, & Cretin le conuoya en luy donnant de l'argent du sien, qui est plus vtile à ceux qui sont hors
- D de leurs maisons qu'à ceux qui sont assiegez dedans : & aiant tresbien gouuerné & defendu sa ville, qui fut bien pres d'estre de tout poinct destruite, la preserua contre l'esperance de tout le monde. Car si c'est vne parole genereuse & de cœur magnanime, de dire à haute voix,

Les miens enfans j'aime de bon courage,

Mais j'aime encor mon pais d'auantage :

comment & pourquoy ne sera-il plus aisé à chascun d'eux de dire, Je hay celuy-là, & desire luy faire desplaisir, mais j'aime plus mon pais ? Car ne se vouloir reconcilier à vn ennemy pour les causes qui nous doiuent mesme faire abandonner nostre amy, seroit à faire à vn cœur trop barbare & trop sauage : toutefois à mon aduis Phocion & Caton faisoient mieulx, qui ne prenoient inimitié quelconque à l'encontre de leurs citoyens, pour different aucun qu'ils eussent avec eux, à raison du gouuernement, ains

Instruction pour ceulx qui

se rendoient seulement implacables, & irreconciliables, où il estoit question d'abandonner ou d'offenser le public : au demourant en leurs priuez negoces se portoient humainement, sans aucune haine ny rancune enuers ceux contre qui ils auoient contesté en public. Car il ne faut estimer ny reputer aucun des citoyens ennemy, si d'adventure il n'estoit tel comme vn Ariston, vn Nabis, ou vn Catilina, qui n'estoient pas tant citoyens que bosses & pestes d'une cité : mais ceux qui feroient autrement vn peu discordans, il les faut ramener à vne bonne harmonie & accord, en les roidissant ou relaschant ainsi que feroit vn bon musicien, non pas en fattachant en courroux avec outrageuses iniures à ceux qui faillent, ains plus gracieusement, ainsi que fait Homere,

Iliad. liu. 7.

O doulx amy, certes i'eusse cuidé,
Que ton sens eust tous autres excédé.

Et en vn autre passage,

Si tu voulois y penser sagement,

Tu ferois bien vn meilleur iugement :

& quand ils disent ou qu'ils font quelque chose de bon, ne se montrant point marry de les voir honorer, & n'espargnant point les paroles honorables à leur louange & auantage : car en ce faisant on gagne cela, que le blasme qu'on leur donnera, quand ils faudront, en sera plus tost creu : & d'autant que nous exalterons leur vertu, d'autant deprimerons nous leur vice quand ils viendront à faillir, en faisant comparaison de l'un à l'autre, & montrant combien l'un est plus digne, & mieulx seant, que l'autre. Quant à moy, ie trouuerois fort honneste, que l'homme de gouuernement portast tesmoignage en choses iustes à ses aduersaires, voire qu'il les honorast en iugement, s'il aduenoit qu'ils fussent trauaillez en iustice par des calomniateurs, & mesme qu'il mescreust & se deffist des imputations qu'on leur mettroit sus, quand il verroit qu'elles feroient mal-accordantes avec l'intention qu'ils scauroient que ceux-là auroient : comme Neron ce cruel tyran, vn peu deuant qu'il feist mourir Thraseas, qu'il haïssoit & craignoit plus que nul autre, comme quelqu'un le chargeast deuant luy d'auoir donné vne sentence iniuste : Je voudrois estre asseuré, dit-il, que Thraseas m'aï-

Iliad liu. 5.

Certainement Tydeus a en toy

Semé vn fils peu ressemblant à soy.

Et Appius Claudius, estant concurrent de Scipion l'Africain en la brigade d'un magistrat, luy dit en le rencontrant par la rue, O Paule Æmille, combien tu soupirerois d'ennuy & de courroux, si tu estois aduerty sous la terre, qu'un Philonicus banquier accompagne ton fils par la ville, allant en l'assemblée des elections pour demander l'office de Censeur ! Ces manieres de reprehensions-là admonestent celuy qui fault, & honnorent celuy qui l'admoneste : & Nestor en la Tragedie de Sophocles, respond aussi ciuilement à Ajax qui l'iniurie,

Je ne me plains de toy Ajax, combien

Que parles mal, pource que tu fais bien.

Et Caton qui auoit contesté visuellement à l'encontre de Pompeius, lors qu'estant en ligue avec Iules César, il forçoit la ville de Rome, quand depuis ils furent en guerre ouuerte l'un contre l'autre, il fut d'aduis que lon donnast la charge des affaires à Pompeius, disant, que ceux mesmes qui font les grands maux, sont ceulx qui les peuuent

A peuuent mieulx rhabiller: car vn blasme meſlé avec vne louange, contenant non vne iniure, mais vne libre & franche remonſtrance, & imprimant non vn deſpit de courroux, mais vn remors de conſcience, & vne repentance, ſemble gracieux & amiable: là où les iniures ne ſont iamais bien-ſeantes en la bouche d'un hōme de bien & d'honneur. Voyez les reproches que fait Demosthenes à Æschines, & Æschines à luy, & ſemblablement les iniures atroces, que Hyperides a eſcriptes contre Demades, ſi Solon les euſt iamais proferees, ny Pericles, ny Lycurgus le Lacedemonien, ou Pittacus le Lesbien: encore n'vſe iamais Demosthenes de ceſte maniere de picquer iniurieusement, ſinon en cauſe criminelle: car ſes oraiſons Philippiques ſont pures & nettes de toutes iniures & toutes mocqueries: pource que telles choſes diffament plus ceux qui les diſent, que ceux à qui elles ſont dites, & qui plus eſt elles apportent conſuſion aux affaires, & troublent les aſſembles de ville & de conſeil: au moyen de quoy, Phocion cedant à vn qui luy diſoit iniures, le laiſſa dire, & ceſſa de parler, & apres que

B l'autre en fin à toute peine ſe fut teu, remontant de rechef en la chaire, il continua
 „ ſon propos entrerompuy, diſant: Je vous ay deſia parlé des gens de cheual & des gens
 „ de pied peſamment armez, oyez maintenant de ceux qui ſont armez à la legere. Mais
 „ pour autant que c'eſt choſe bien mal-aiſee à pluſieurs, de ſupporter & de ſe contenir,
 „ & que bien ſouuent on cloſt la bouche à ces iniurieux-là, & les fait-on taire tout
 „ court par vne petite replique, ie voudrois qu'elle fuſt courte, en peu de paroles, ne
 „ monſtrant point de courroux ny de cholere, ains vne douceur avec vne graue riſee,
 „ mordante toutefois vn petit, comme ſont principalemēt celles qui ſe retournēt contre
 „ celui qui a dit les premieres. Car tout ainſi que les traiçts qui reialliſſent cōtre ceulx
 „ qui les ont tirez, ſemblent eſtre rebattus & renuoyez par la force & fermeté ſolide de
 „ celui qui en a eſté frappé: auſſi ſemble-il qu'une parole picquante retorquee contre
 „ celui qui l'a ditte, ſoit renuoyee par la force & vigueur d'entendement de celui qui
 „ l'a receuē: comme fut la replique d'Epaminondas à Callistratus, qui reprochoit aux

C Thebains & aux Argiens le parricide d'Oedipus & celui d'Oreſtes, l'un qui tua ſon
 „ pere, & l'autre ſa mere, l'un natif de Thebes, & l'autre d'Argos: Nous les auons, dit-
 „ il, chasſez de nos villes, & vous les auez receus en la voſtre. Semblablement auſſi la
 „ reſponſe d'Antalcidas Lacedemonien, à vn Athenien qui luy diſoit par maniere de
 „ vanterie, Nous vous auons ſouuent chasſez de la riuiere de Cephife: Et nous, dit-il,
 „ ne vous auons iamais rechasſez de celle d'Eurotas. Et de Phocion, quand il repliqua
 „ plaifamment à Demades qui luy crioit tout hault, Les Atheniens te feront mourir:
 „ Ouy bien, dit il, ſils entrent en leur folie, mais toy ſils entrent iamais en leur bon
 „ ſens. Et Craſſus l'Orateur, quand Domitius luy demanda, Lors que la lamproye
 „ que tu nourriſſois en ton viuier mourut, ne ploras-tu pas? Il luy redemāda tout court,
 „ Et toy, pour les trois femmes que tu as miſes en terre, en as-tu iamais ploré? Mais
 „ ces regles-là ſont vtils non ſeulement en matiere d'affaires de gouuernement, mais

D auſſi à toute autre partie de la vie humaine. Au demourant il y en a qui ſe iettent &
 „ fourrent à toute ſorte d'affaires publiques, comme faiſoit Caton, voulant que le bon
 „ citoyen ne refuſe aucune charge ny adminiſtration publique, tant que ſon pouuoir
 „ ſe pourra eſtendre: & louēt grandement Epaminondas de ce que ſes malveuillans de
 „ la ville de Thebes par enuie l'aians fait eſlire ſuperintēdāt des gabelles, pour luy cuider
 „ faire iniure, il ne meſpriſa pas ceſt office, ains diſant que non ſeulement le magistrat
 „ mōſtre quel eſt l'hōme, mais auſſi l'homme mōſtre quel eſt le magistrat, il eſleua en
 „ grande dignité & reputation ceſt office, qui n'eſtoit rien au parauant, aiant ſeulement
 „ charge de faire nettoyer les ruēs, emporter hors la ville les fumiers, & deſtourner les
 „ eaux. Et ne fais point de doute, que moy-meſme Plutarque n'appreſte à rire à plu-
 „ ſieurs de ceux qui paſſent par noſtre ville, quand ils me voyent ſouuēt en public occu-
 „ pé & vacquant à pareilles choſes: à l'encontre de quoy me ſert ce que lon treuve eſcrit

Instruction pour ceux qui

d'Antisthenes : car comme quelques vns s'esmerueillassent de ce que luy-mesme portoit en sa main à trauers la place des saleures, comme des botargues, qu'il venoit d'acheter, C'est pour moy, leur dit-il, que ie les porte. Mais au contraire, ie respons à ceux qui me reprennent, quand ils me trouuent present à voir mesurer & compter la brique & la thuyle, ou les pierres, & le sable, & la chaux, que lon amène en la ville, Ce n'est pas pour moy que ie bastis, c'est pour la Chose publique. Car il y a plusieurs autres choses, que qui les exerceroit ou manieroit luy-mesme, il pourroit sembler bas de cœur, sale & mechanicque : mais si c'est pour le public, & pour le païs, ce n'est point acte de cœur bas ne petit, de se demettre iusques à prendre volontiers soing des moindres choses. Les autres estiment la maniere de faire, dont vsoit Pericles, plus digne & plus graue, comme Critolaus entre autres, lequel veult, que comme les deux galeres, que lon nômoit à Athenes la Salaminienne & la Paralos, ne se tiroient pas de l'arsenal en mer indifferemment pour toutes occasions, ains seulement pour causes grandes & necessaires, ainsi que l'homme de gouuernement s'employe soy-mesme aux principales & plus grandes besongnes, comme fait le Roy du monde :

Dieu met la main aux choses seulement
Qui sont de pois & de grand mouuement,
Mais ce qui est de peu de consequence,
A la Fortune en laisse la regence :

ainsi que dit le poëte Euripides : car nous ne scaurions louer la trop grande ambition & opiniastrété de Theagenes, lequel ne se contentant pas d'auoir vaincu le tour des ieux ordinaires, mais aussi en plusieurs autres combats extraordinaires. & non seulement à l'escrime generale, où lon fait de pieds & de mains le pis que lon peut, mais aussi à l'escrime simple des poings, à la course longue : finalement estant vn iour au banquet de l'anniuersaire d'un demy-dieu, comme lon estoit ja seruy, & la viande assise sur la table, il se leua pour aller encore combattre vne autre escrime generale, comme s'il n'eust appartenu à homme du monde de vaincre en tels combats, là où il estoit present, de maniere qu'il assembla iusques à douze cens couronnes qu'il auoit gaignees à tels combats, dont la plus part estoient de nul ou de bien peu de pris. A celui-là ressembloit proprement ceux qui se mettent en pourpoint, par maniere de dire, à toutes heurtes, quelque affaire qui se presente, saoulans le peuple d'eux, & se rendans odieux : de maniere qu'on leur porte enuie quand ils font bien, & se resioit on quand il leur arriue mal : Et ce que lon admiroit en culx à leur arriuee au gouuernement, à la fin se tourne en risée & en mocquerie, telle comme ceste cy ; Metiochus est capitaine, Metiochus dresse les chemins, Metiochus cuit le pain, Metiochus moult la farine, Metiochus fait tout, Metiochus aura mal an. Cestuy estoit vn des accoursiers & fauorits de Pericles, qui abusoit excessiuement de son autorité à se faire employer à toutes charges & toutes commissions publiques : car il fault que l'homme de gouuernement tienne tousiours le peuple en appetit de soy, & luy laisse tousiours vn desir de le reuoir quand il est absent, comme sagement faisoit Scipion l'Africain, se tenant la plus part du temps aux champs, diminuant par ce moyen l'enuie qui estoit à l'encontre de luy, & donnant ce pendant loisir de reprendre haleine à ceux qui se sentoient offusquez & opprimez de sa gloire. Timesias Clazomenien estoit au demourant fort homme de bien, mais il ne scauoit pas qu'il estoit fort enuie & fort hay en sa ville, à cause qu'il y vouloit faire tout luy seul, iusques à ce qu'il luy aduint vn tel accident. Il y auoit au milieu de la rue de ieunes garçons qui iouoient, ainsi comme il passoit, à faire sortir à coups de baston vn osselet dehors d'une fossette : les autres garçons maintenoient qu'il estoit encore dedans : & celui qui auoit frappé dit, Qu'eusse-ie aussi bien fait sortir la ceruelle de la teste de Timesias, comme cest osselet est fort de la fosse. Timesias ayant entédu ceste parole,

- A parole, & cognoissant par là l'enuie publique qui estoit imprimée au cœur du peuple, soudain qu'il fut en sa maison, raconta le fait à sa femme, & luy commandant qu'elle troussast incontinent ses hardes pour le suiure, s'en alla de ce pas hors de la ville de Clazomenes. Et semble que Themistocles, luy estant aduenü à peu pres
- » vn semblable cas, respondit aux Atheniens: Dea, beaux amis, pourquoy vous laissez
- » vous de receuoir souuent du bien de moy? Mais quant à ce propos, vne partie en est bien dicte, & l'autre non: pour ce qu'il fault que le sage entremetteur d'affaires, quant au soing, à l'affection, & prouoyance, ne se deporte d'aucune charge publique, ains qu'il les espouse toutes, & mette peine de les voir, entendre & cognoistre toutes particulièrement: non pas qu'il se tienne en reserue à part, comme l'ancre sa-
cree en quelque coing de la nauire, attendant l'extreme besoing & necessité de son païs pour s'employer: Mais comme les bons patrons de nauire font vne partie de la besongne eux-mesmes avec leurs propres mains, & l'autre partie avec d'autres
- B outils, & par d'autres hommes, eulx estans assis, de loing ils tirent, tournent ou las-
chent les cordages, & se seruent des autres mariniers, les vns pour prouiers, les au-
tres pour comites, & en appellent quelquefois vn en la poupe, auquel ils mettent le timon en la main: ne plus ne moins fault-il aussi, que le sage gouuerneur de la Chose publique cede aucunes fois aux autres l'honneur de commander, qu'il les conuie gracieusement & amiablement à venir quelquefois haranguer & prescher le peuple, non pas qu'il remuë toutes choses avec ses propres harangues ny ses propres decrets, comme avec ses propres mains: mais qu'ayant des gens de bien, fideles, qui le secon-
dent & s'entendent avec luy, il les employe par tout, les vns à vne charge, les autres à autre, selon qu'il les verra estre plus aptes & plus propres, ainsi comme Pericles vsoit de Menippus aux expeditions de guerre, & deprima la Court de Areopage par l'en-
treprise d'Ephialte, & par Charinus il mit en auant & fit passer le decret contre les Megariens: il enuoya Lampon pour peupler la ville de Thuries: car en ce faisant non
- C seulement il diminue l'enuie que lon a contre luy, d'autant qu'il semble que sa puis-
sance & son autorité est diuisee & departie en plusieurs, mais aussi il fait plus com-
modément & mieulx les affaires de la Chose publique: ne plus ne moins que la di-
uision de la main en cinq doigts n'affoiblit pas la force de toute la main, ains la rend
plus propre & plus commode à l'usage de tout artifice. Aussi celuy qui en matiere
de gouuernement communique partie du manient des affaires à ses amis, rend
par ceste communication les choses mieulx & plus aiseement faictes: mais celuy
qui par vne cupidité insatiable de monstrier son credit, s'attribue tout, & veut tout
faire ce qui se presente à faire en vne ville, se mettant bien souuent à vne charge à la-
quelle il n'est pas bien né, ny assez exercité, comme Cleon à conduire vne armee, &
Philopœmen à mener vne flotte de vaisseaux, Hannibal à haranguer, il n'a aucun
moyen d'excuser sa faute sil vient d'aduenture à faillir, & leur reproche-lon ce que
- D dit Euripides,

Tu te meslois aussi d'autre mestier

Que d'ouurer bois, n'estant que charpentier:

aussi ne sçachant pas bien haranguer, tu as entrepris vne ambassade: estant paresseux,
tu as voulu auoir charge de recepte: ne sçachant compter, tu as pris charge de the-
sorier: estant vieil & maladif, tu as voulu commander à vne armee. Pericles fit bien
mieulx, car il partagea l'autorité du gouuernement avec Cimon, se retenant la puis-
sance de commander dedans la ville, & laissant à Cimon le pouuoir d'armer les ga-
leres pour aller ce-pendant faire la guerre aux Barbares, pour ce que luy estoit plus
propre à commander dedans la ville, & l'autre plus à propos pour la guerre. Aussi louë
lon grandement Eubulus Anaphlystien de ce que le peuple se fiant à luy, & luy don-
nant autant de credit qu'à nul autre, toutefois il ne se mesla iamais d'aucune guerre de

Instruction pour ceux qui

la Grece, ny ne s'entremet jamais de conduire armee, ains s'estant dès son commen- E
cement proposé de vacquer aux finances, il augmenta grandement le reuenu de la
Chose publique, là où Iphicrates estoit mocqué de ce qu'il s'exercitoit en sa maison,
en presence de plusieurs, à faire des harengues: car encore qu'il eust esté excellent &
non pas vulgaire harengueur, si valoit-il mieux qu'il se contentast de la reputation
qu'il auoit acquise par les armes d'estre bon guerrier, & qu'il cedast l'eschole de bien
dire aux Orateurs, Rhetoriciens & Sophistes. Mais pour autant que toute com-
mune de peuple naturellement est maligne, mesmement à l'encontre de ceux qui
gouuernent, prenant plaisir à les blasmer & à les ouïr calomnier, & qu'ils soupçon-
nent ordinairement que plusieurs choses profitables que lon leur met en auant, si elles
ne sont debattues, & qu'il n'y ait de la contradiction, se facent par intelligence &
conspiration: & est ce qui descrie principalement les amitez & societez entre les per-
sonnes qui se meslent des affaires: il ne fault pas pour cela se laisser aucune inimitié,
ou resistance veritable, comme fait iadis vn gouverneur de Chio, appelé Onomade- F
mus. Apres qu'en vne sedition ciuile il fut venu au dessus de ses ennemis, il ne voulut
pas chasser de la ville tous ceux qui luy auoient esté aduersaires: de peur, dit-il, que
nous n'entrions desormais en discorde à l'encontre de nos amis, apres que nous n'au-
rons plus d'ennemis, car cela feroit vne folie. Mais quand le peuple aura quelque pro-
position, qui luy sera salutaire & de grande consequence, pour suspecte, il ne faudra
pas lors que tous comme d'un complot, dient vne mesme sentence, ains que deux ou
trois s'y opposans contredissent sans violence à leur amy, & puis que comme estans
conuaincus par raisons ils reuiennent à son opinion: car ils attirent par ce moyen le
peuple avec eulx, quand il semble qu'ils soient tirez par le regard de l'utilité publique:
vray est qu'es choses legeres il n'est pas mauuais de souffrir que nos amis mesmes dis-
cordent à bon esciant d'avec nous, & qu'ils suyuent chacun son iugement & son opi-
nion, à fin que quand il viendra en affaire principal & de grande importance, il ne
semble pas que ce soit par vn complot préparé entre eulx, qu'ils soient tous d'ac- G
cord. Or faut-il penser que l'homme sage par nature est tousiours en autorité de ma-
gistrat en sa ville, comme le Roy entre les abeilles, & sur ceste persuasion il fault qu'il
ait tousiours le timon des affaires en la main, mais toutefois qu'il ne poursuiue pas
tousiours chaudement ne souuent les estats & offices que le peuple eslit par ses voix:
car ceste conuoitise de vouloir tousiours estre en office, n'est point venerable ny
agreable au peuple: aussi ne les faut-il pas reietter quand le peuple legitiment les
donne, & nous y appelle, ains les faut accepter, encore que ce soyent à l'aduenture
offices de moindre dignité que ne requerroit la reputation que nous aurions desia
acquise, & s'y employer de bonne affection: car il est iuste que comme nous auons
esté honnorez par les estats de plus grande dignité, aussi que reciproquement nous
honorions ceux de moindre qualité: & quand nous serons esleus aux magistrats su-
premes, comme à l'estat de capitaine en la ville d'Athenes, à l'estat de Prytanes à Rho- H
des, de Bœotarche en nostre país de la Bœoce, il sera bien seant que par modestie
nous cedions & rabaissons vn peu de sa souueraine grandeur: & au contraire aussi,
que aux petits estats nous y adioustions vn petit de dignité & d'apparence d'avan-
tage, à fin que nous ne soyons ny enuiez en ceux-là, ny mesprisez en ceux-cy. Et aux
premiers iours que nous entrerons en quelque magistrat que ce soit, il ne nous faut
pas seulement ramener en memoire les discours que faisoit Pericles quand il prenoit
„ la robbe de magistrat pour sortir en public, Pense à toy Pericles, Tu commandes
„ à hommes libres, non pas à des esclaves: tu commandes à des citoyens qui sont pa-
„ reils à toy, tu commandes à des Atheniens: ains nous faut d'auantage dire en nous-
mesmes, Tu commandes estant commandé & subiect, tu commandes à vne ville qui
est sous vn proconsul Romain, ou sous vn procureur & lieutenant de l'empereur.
Ce ne

A Ce ne font plus, comme disoit celuy-là, icy les campagnes de la Lydie où lon puisse courir la lance, ce n'est plus icy l'ancienne cité de Sardis, ny la puissance qui fut au temps passé des Lydiens: il faut porter sa robbe plus estroite, & du palais de ville où logent les magistrats, faut tousiours auoir l'œil au siege imperial, & ne prendre pas trop de cœur pour se voir vne couronne sur la teste, regardans des souliers cornus, marques des Seigneurs Romains, qui sont encore au dessus: ains faut en cela imiter les ioueurs des Tragedies, lesquels adioustent bien du leur au roolle qu'ils iouent, le geste, l'accent, & la contenance qui luy est conuenable, mais toutesfois ils escoutent tousiours leurs protecolles, à fin que nous ne passions, ny n'excedions point les mesures ny les bornes de la licence qui nous est baillee par ceux qui ont la puissance de nous commander: car le sortir hors de ses termes, n'apporte pas quand & soy peril d'estre sifflé ny mocqué seulement, ains y en a desia eu plusieurs,

Dessus le col desquels est ja monté

B Le fil tranchant de la hache aceree,

Qui a du corps la teste separee:

comme il en est pris en nostre pays à Pardalas, pour estre vn peu fortý des bornes: & tel autre y a, qui estant confiné en quelque meschante isle deserte, est deuenu, comme dit Solon,

Sicinitain ou Phelegandrien,

Forpaísant au lieu d'Athenien.

Nous nous rions bien quelquefois des petits enfans, quand nous voyons qu'ils tascient à chauffer les souliers de leurs peres, ou qu'ils veulent mettre sur leurs testes leurs couronnes en se iouant: les magistrats des villes bien souuent, ramenans en memoire aux peuples follement les beaux faicts de leurs predecesseurs, la grandeur de leurs courages, & leurs deportements trop disproportionnez aux temps, & aux qualitez de maintenant, les font quelquefois faire des choses dignes de rire: mais il n'y a pas à rire puis apres pour tous, si ce n'est qu'ils soient si bas & si petits, que pour leur bassesse on ne face compte d'eux. Il ya bien d'autres histoires de l'ancienne Grece, que lon peut ramenteuoir & reciter aux hommes de ce temps icy, pour adoucir & moderer leurs mœurs: comme à Athenes, faisant souuenir au peuple, non des prouesses de leurs ancestres, mais pour exemple du decret d'abolition & d'oubliance generale qui fut iadis fait apres que la ville fut deliuree de la captiuité des trente tyrans, & de ce qu'ils condamnerent à l'amende le poëte Phrynichus, pour ce qu'il auoit fait iouer en vne Tragedie la prise de la ville de Milet, & aussi que par ordonnance publique ils porterent chapeaux de fleurs sur leurs testes, quand ils sceurent que Cassander faisoit rebastir la ville de Thebes: & comme quand ils entendirent la cruelle occision qui fut faite en Argos, en laquelle les Argiens feirent mourir quinze cents de leurs citoyens, ils feirent en pleine assemblee de ville apporter les sacrifices d'expiation, à fin qu'il pleust aux Dieux destourner vne si cruelle pensèe du cœur des Atheniens. Et du temps que lon recherchoit ceux qui auoient pris ou argent ou present de Harpalus, en visitant toutes les maisons de la ville, ils ne voulurent pas permettre que lon fouillast celle d'un nouveau marié, & passerent celle-là seule. Car en cela peuuent-ils bien encore auourd'huy ensuiure leurs maieurs, & se rendre semblables à eulx: mais la bataille de Marathon, & celle de la riuere d'Eurymedon, & celle de Platées, & autres tels exemples qui ne font qu'enfler & hausser le courage vainement à vne commune, il les faut laisser aux escholes des Sophistes & des maîtres de Rhétorique. Si ne faut pas seulement auoir l'œil à se maintenir si sagement soy & sa ville, que les Seigneurs souuerains n'aient aucune occasion de se plaindre, ains faut donner ordre d'auoir tousiours quelqu'un des seigneurs, qui ont le plus d'autorité à Rome, & en la court de l'Empereur, pour special amy, qui serue comme d'un rempart asséuré

Instruction pour ceux qui

pour defendre toutes nos actions au gouuernement de nostre païs: car tels seigneurs E
Romains se monstrent ordinairement fort affectionnez aux affaires que poursuivent
leurs dependans & leurs amis, & le fruit que lon peut tirer de l'amitié & bonne grace
de tels seigneurs, il n'est pas honneste de le conuertir à l'auancement & enrichissement
de soy & des siens particulièrement, mais l'employer, ainsi comme feirent iadis Po-
lybius & Panætius, qui par le moyen de la bienveillance que leur portoit Scipion,
feirent beaucoup de bien à leur païs: au nombre desquels il fault aussi mettre Arrius,
car quand César Auguste prit la ville d'Alexandrie, il entra dedans tenant Arrius
par la main, & deuisant avec luy seul de toute sa suite: puis il respondit aux Alexan-
drins, qui s'attendoient bien d'estre saccagez, & le supplioient de leur pardonner,
qu'il leur pardonnoit, & les receuoit en sa bonne grace, premierement pour la beau-
té & grandeur de leur ville, secondement pour le fondateur Alexandre le grand, &
tiercement pour l'amour de cestuy vostre citoyen, qui est mon amy. Pourroit-on
bien avec raison comparer ceste grace, avec les riches commissions de regir & admi- F
nistrer les prouinces, que poursuivent aucuns à la Court, avec seruitude & subiection
si obstinée, qu'il y en a qui vieillissent aux portes d'autrui à la poursuite de telles
charges, en delaisant cependant les affaires de leur païs: ne vaudroit-il pas mieux cor-
riger & changer le dire d'Euripides, en disant & chantant, S'il est honneste de veiller
& faire la court aux portes d'autrui, en se rendant subiect à la suite d'un seigneur, il
est doncques honneste de le faire pour l'amour & pour le bien de son pays: au de-
mourant chercher & embrasser amitez pareilles, à conditions iustes & egales. Mais aus-
si en rendant sa ville & son païs obeissant aux grands, il se faut bien garder que nous ne
l'assubiections encore d'auantage qu'il ne l'est, ne qu'estant attaché par la iambe nous
ne le lions encore par le col: comme font aucuns, qui rapportant toutes choses, autant
petites que grandes, à ces seigneurs, rendent leur seruitude honteuse, ou pour mieux
dire, ils ostent à leur pays toute forme de gouuernement, en le rendant ainsi timide,
& luy ostant tout pouuoir. Car ainsi comme ceux qui se sont accoustumez à ne dis- G
ner, ne souper, ny s'estuuer iamais sans le medecin, n'vsent pas de leur sanré, autant
que la nature leur permet: aussi ceux qui à tout decret, à toute resolution de con-
seil, à toute grace, voire à toute administration publique de leur ville, veulent ad-
iouster le consentement, iugement & gré des seigneurs, ils contraignent lesdits sei-
gneurs d'estre plus maistres qu'ils ne veulent eux-mesmes: de quoy sont ordinairement
cause l'auarice, & la ialousie & l'emulation des premiers & principaux citoyens des
villes, par ce que voulans quelquefois opprimer ceux qui sont moindres qu'eux, ils
les contraignent d'abandonner leurs villes, ou bien aians quelques differents avec
leurs egaulx concitoyens, & ne voulans pas auoir du pire en la ville, ils ont recours
aux seigneurs superieurs, par où ils sont cause de faire perdre au Senat, au peuple,
aux iuges & officiers de leur ville, tout ce peu d'autorité & de puissance qui leur
estoit demouré: là où il faut en entretenant ceux des bourgeois qui sont hommes H
priuez par egalité, & ceux qui sont puissans par leur ceder reciproquement, con-
tenir les affaires au dedans de la ville, & les y resouldre & terminer, guerissans tels
inconueniens, comme maladies secretes des choses publiques, avec vne medecine
ciuile, aimans mieux quant à soy estre vaincu entre ses citoyens, que vaincre de-
hors, en faisant tort à son pays, & estant cause de violer ses droicts & priuileges:
& quant aux autres les priant, & leur remonstrant particulièrement à vn chascun,
de combien de maux est cause l'obstination, que maintenant pour n'auoir voulu à
leur tour s'accommoder en leurs maisons à leurs concitoyens, qui seront bien sou-
uent d'une mesme lignee, à leurs voisins & compagnons en charges & offices, avec
honneur & bonne grace, ils vont deceler les secretes dissensions & debats de leur
ville, aux portes des aduocats, & es mains des praticiens de Rome, avec non moins
de honte,

A de hôte que de dommage & de perte. Les medecins ont bien accoustumé de tourner & tirer au dehors à la superficie du corps les maladies qu'ils ne peuvent pas du tout ôster du dedans: mais au contraire l'homme de gouvernement, s'il ne peult contregarder sa ville totalement paisible, qu'il n'y survienne tousiours quelques troubles, à tout le moins s'efforcera il de contenir au dedans d'icelle ce qui s'y remue, & qui y esmeut la sedition, & en le tenant caché, taschera de le guarir & y remedier, à celle fin que s'il est possible, il n'ait besoing de medecin, ny de medecines exterieures: car l'intention de l'homme d'estat & de gouvernement doit bien estre de proceder en ses affaires seulement, & de fuir les violents & furieux mouvemens de vaine gloire, comme nous auons desia dit, mais neantmoins son intention & sa resolution,

Qu'il ait au cœur vne ferme assurance,
Sans vaciller, & virile constance,
Comme les preux guerriers, qui hazarder

Iliad liu 17 :

B Leur vies vont pour leur pais garder :
& non seulement contre des hommes ennemis, mais aussi contre des affaires perilleux, & des temps dangereux, auxquels il faut resister & faire teste: car il ne faut pas qu'il soit cause de mouuoir les tourmentes, mais aussi ne faut il pas qu'il abandonne son pais au besoing, quand il les sent venir: ne qu'il pousse sa ville en apparent danger, mais aussi quand elle y est vne fois esbranlee, & qu'elle flotte en danger, c'est à luy à la secourir, en iettant la derniere ancre sacree de foy-mesme, qui est la hardiesse de franchement parler, quand il est question de si grande chose que du salut de son pays: comme furent les affaires qui arriuerent aux Pergameniens du temps de Neron, & nagueres aux Rhodiens du temps de Domitian, & au parauant aux Thessaliens du temps d'Auguste, pour auoir brulé tout vif Petreus. En telles occurrences vous ne verrez point que l'homme de gouvernement, s'il est digne d'un tel nom, face du restif, ne qu'il tire le pied arriere de peur, ou qu'il accuse les autres, & qu'il se tire luy-mesme hors de la meslee du danger, ains le verrez aller en ambassade, s'embarquer sur mer, parler le premier, disant non seulement,

Nous auons fait, Apollo, l'homicide,

Fay que la peste hors nostre pays vuide:

C mais encore qu'il ne soit point coupable du peché de la commune, si se mettra-il en danger pour eux: car c'est chose tres-honneste, & outre l'honnesteté du faict en foy, il est adueni plusieurs fois, que la vertu & grandeur de courage d'un tel homme a tant esté estimée, qu'elle a effacé le courroux qui estoit émeu contre toute vne commune, & a dissipé toute l'aigreur & la fureur d'une menace, ainsi qu'il aduint à un Roy de Perse à l'endroit de Bulis & de Sperchis gentils-hommes Spartiates: & comme fait aussi Pompeius enuers Sthenon son hôte: car aiant proposé de punir aigrement les Mamertins de ce qu'ils s'estoient rebellez contre luy, Sthenon luy dit, qu'il ne feroit pas bien ne iustement s'il faisoit mourir plusieurs innocents au lieu d'un seul qui estoit coupable, pour ce que c'estoit luy seul qui auoit fait rebeller toute la ville, y ayant induit ses amis par amour, & ses ennemis par force. Ces paroles toucherent tellement au cœur de Pompeius, qu'il pardonna à la ville, & se porta humainement enuers Sthenon. Et l'hôte de Sylla aiant vû de semblable vertu, mais non pas enuers un semblable seigneur & capitaine, mourut genereusement: car Sylla aiant pris la ville de Preneeste, condamna tous les habitans à mourir, excepté son hôte, auquel il pardonna pour l'ancienne alliance d'hospitalité qu'il auoit avec luy: mais son hôte luy respondit, qu'il ne vouloit point estre tenu de sa vie au meurtrier de son pays, & se ietta parmy la troupe de ses citoyens que lon massacroit, où il fut meurtry quand & eux. Or faut-il bien prier aux Dieux qu'il nous gardent de tomber en si calamiteux temps, & en esperer de meilleurs: mais au reste il faut estimer tout magistrat public,

Instruction pour ceulx qui

& celuy qui l'exerce, chose grande & sacree : à l'occasion dequoy il le faut sur tout hō- E
norer : & l'honneur qu'on doit au magistrat, est de l'accorder avec luy, & aimer ceux
qui sont constituez pour l'exercer : cest honneur-là est beaucoup plus digne que ne
sont pas les couronnes qu'ils portent sur leurs testes, ny leurs grands manteaux de
pourpre. Mais ceux qui prennent le commencement de leur amitié pour auoir esté
ensemble à la guerre, ou auoir passé les ans de leur adolescence ensemble : & au con-
traire prennent pour commencement de leur inimitié d'estre capitaines ensemble, &
auoir quelque charge de la Chose publique ensemble, ils ne sçauroient couter que ce
ne soit pour l'une de ces trois mauuaises causes, ou que estimans leurs compagnons
semblables à eux, ils commencent les premiers à les embrouiller de dissension : ou
les estimans plus grands, ils leur portent enuie : ou plus petits, & ils les mesprisent : là
où il faut courtirer les plus grands, honorer les egaulx, & auancer les petits, & les
aimer & embrasser tous, comme aians avec eux vne amitié engendree, non pour
auoir mangé à vne mesme table, ou diné à vn mesme festin, ains par vne obligation F
commune & publique, comme si c'estoit vne beneuolence paternelle, contractee pour
l'affection commune enuers la patrie. C'est pourquoy Scipion fut mal-estimé à
Rome, de ce qu'en dediant le temple d'Hercules, aiant conuie tous ses amis au banc-
quet, il n'y fait point semondre son compagnon au magistrat Mummius : car encore
qu'ils se sentissent d'ailleurs n'estre pas amis, si est-ce qu'en telles occurrences ils se de-
uoient honorer & caresser l'un l'autre, à raison de leur commun magistrat. Si donc-
ques Scipion, personnage au demourant grand & admirable, a encouru reputation
d'estre fier & presumptueux, pour auoir oublié & omis vne si petite demonstration
d'humanité, comment est-ce que celuy qui s'efforcera de diminuer la dignité de son
compagnon, ou qui taschera à luy faire receuoir vne honte, mesmement en chose
où il va de l'honneur, ou qui par vne arrogance voudra tout faire, & l'attribuer tout à
luy seul, comment le pourra l'on estimer homme modeste & raisonnable ? Il me sou-
uient qu'estant encore bien ieune, ie fus enuoyé, avec vn autre, en ambassade deuers G
le Proconsul, & ce mien compagnon estant ne sçay pourquoy demouré derriere,
i'y allay seul, & feis ce que nous auions commission de faire : à mon retour ainsi que
ie voulu rendre compte en public, & faire le rapport de ma charge, mon pere se le-
uant seul, me defendit de dire, Ie suis allé, mais nous sommes allez : ny i'ay parlé,
mais nous auons parlé : & faire mon recit en associant tousiours mon compagnon à
ce que i'auois fait : cela est non seulement gracieux & humain, mais qui plus est, il oste
de la gloire ce qui offense, l'enuie. C'est pourquoy les grands capitaines attribuent
& ascriuent leurs beaux faicts à la fortune, & à leur bon ange, comme feit Timo-
leon, celuy qui ruina les tyrannies establies en la Sicile, lequel fonda vn temple
à la bonne Fortune. Et Python estant hautement loué & prisé à Athenes, pour
auoir occis de sa main le Roy Cotys : C'est Dieu, dit-il, qui pour le faire fest voulu
seruir de ma main. Et Theopompus Roy des Lacedemoniens, à vn qui luy disoit, H
que Sparte demouroit sur ses pieds, pourautant que les Roys y sçauoient bien com-
mander : Mais plus tost, dit-il, pource que le peuple y sçait bien obeïr. Ces deux choses
là se font par le moyen l'une de l'autre : mais il y en a la plus part qui disent & estiment,
que la meilleure partie de la science ciuile de gouverner, est, sçauoir rendre les
hommes idoines à estre bien commandez : car en chascune ville il y a tousiours trop
plus grand nombre de ceux qui sont commandez, que de ceux qui commandent, &
chascun en chascune commande à son tour, pour vn peu de temps, au moins en vn
gouvernement populaire, & est puis apres commandé tout le reste de sa vie : de ma-
niere que c'est vn treshonnest & tres-vtile apprentissage, que d'apprendre à obeïr à
ceux qui ont autorité de commander, encore qu'ils soient de moindre estoife, & de
moindre credit que nous. Car il n'y auroit point de propos qu'un excellent & pre-
mier

- A** mien ioueur de Tragédies, comme seroit vn Theodorus, ou vn Polus, marche bien souuent apres quelque mercenaire qui n'aura que trois mots à dire, & qu'il parle en toute humilité & reuerence à ce mercenaire, pource qu'il a le bandeau royal du diademe à l'entour de la teste, & le sceptre en la main: & qu'en action veritable & non feinte, vn riche & puissant homme contemne & méprise celuy qui sera en magistrat, d'autant qu'il sera homme simple & de petit estat, outrageant & rauallant la dignité publique, pour cuider faire paroistre la sienne priuee, là où il deuroit plus tost adiouter de son credit, & de sa puissance à celle du magistrat. Comme en la ville de Sparte, les Roys se leuoient de leurs chaires au deuant des Ephores, & de tous les autres citoyens, celuy qui estoit mandé par eux n'y venoit pas le pas, ains courant à grand' haste, pour monstrier à leurs citoyens comme ils estoient bien obeïssans, se glorifians de ce qu'ils honnoroient leurs magistrats: non pas comme quelques fots glorieux, de mauuaise grace, & de peruers iugement, qui pour monstrier qu'ils ont
- B** grande autorité, feront quelque honte aux iuges & directeurs des combats, ou diront iniure aux entrepreneurs qui font iouer les Tragédies & Comédies es festes Bacchanales, ou se mocqueront des capitaines, ou de ceux qui president aux ieux & exercices de la ieunesse, n'entendans pas que l'honorer bien souuent est plus honorable, que non pas l'estre honoré: car à vn homme d'honneur qui a grand' fuitte & grande autorité en vne ville, ce luy est vn ornement plus grand d'accompagner & costoyer le magistrat, que si le magistrat le conuoyoit & l'accompagnoit: & pour mieux dire, cela cause vn desplaisir, & vne enuie aux cœurs de ceux qui le voyent, & cecy apporte vne vraye gloire, qui procede de beneuolence, quand on le voit quelquefois à l'huis d'un magistrat, quand il le saluë le premier, & quand il luy donne le lieu du milieu en se promenant, il adioste cest ornement à la dignité de la ville, & ne diminue rien de la sienne: aussi est-ce chose, qui attrait grandement la grace du peuple, que d'endurer patiemment vne iniure ou vne cholere de celuy qui commande, y
- C** repliquant ce que dit Diomedes en Homere,

Iliad. li. 4.

Il m'en viendra cy apres grande gloire:

- ou le dire de Demosthenes, que maintenant il n'est pas seulement Demosthenes, mais il est legistateur, il est president des ieux sacrez, il a vne couronne sur la teste: & pourtant il en faut remettre la vengeance à vn autre temps: car ou nous luy courrons sus, apres qu'il sera depose de son magistrat, ou nous gagnerons cela à differer, que nostre cholere en sera passée. Bien faut il tousiours faire à l'enuy des magistrats en diligence, soing & prouoyance du bien public, fils sont personnes de bonne sorte, en leur allant declarer & exposer ce qui se presentera bon à faire, en leur baillant à exécuter ce que nous aurons meurement deliberé, & leur donnant moyen de se faire honorer, en profitant par mesme conseil à la Chose publique: mais si ce sont personnes, qui ou par crainte & faute de cœur, ou par malignité, restiuent à entendre à ce
- D** que nous leur mettons en auant, alors il faut que nous mesmes allions le declarer publiquement au peuple, non pas negliger, dissimuler, ou passer sous conuenance aucune chose qui appartienne au bien public, sous couleur de dire, qu'il n'appartient à autre qu'au magistrat, d'estre curieux, ny de s'en remettre du manient des affaires: car la loy generale donne tousiours le premier lieu du gouuernement à celuy qui fait ce qui est iuste, & qui cognoist ce qui est profitable, comme lon peut comprendre par l'exemple de Xenophon: lequel escrit de soy-mesme, Il y auoit en l'armee vn appelé Xenophon, qui n'estoit ne capitaine, ny lieutenant, mais qui pour entendre ce qu'il falloit faire, & l'oser entreprendre, se meit à commander, si bien, qu'il fut cause de sauuer les Grecs. Et le plus glorieux faict d'armes que fait iamais Philopœmen, fut, que quand il eut nouuelle comme le Roy Agis auoit surpris la ville de Messene, & que le capitaine general des Achæiens ne la vouloit pas aller

Au 3. liure
de l'expedition
de Cyrus.

Instruction pour ceulx qui

secourir, ains restituoit de peur, luy avec vne troupe des plus gaillards & plus delibe- E
rez y alla, sans aucun mandement public, & osta la ville d'entre les mains d'Agis: non
pas qu'il faille pour choses legeres & vulgaires attenter rien de nouveau, ains seu-
lement pour choses necessaires, comme fait lors Philopœmen: ou belles & honnestes,
comme Epaminondas, lequel estendit & allongea le temps de son magistrat de
Bœotarche, quatre mois plus qu'il n'estoit permis par la loy du païs, durant lesquels
il entra en armes dedans le païs de la Laconie, & fait rebastir & repeupler Messene, à
fin que si d'adventure il en aduenoit puis apres quelque plainte ou accusation, nous
aions pour responce à l'accusation l'excuse de la necessité, ou pour reconfort du peril
auquel nous nous seronsexposez, la grandeur & beauté de la chose entreprise. On
recite & remarque vne sentence de Iason, celuy qui iadis fut tyran de la Thessalie, la-
quelle il disoit & repetoit souuent, toutes & quantes fois qu'il forçoit ou outrageoit
» quelques vns des particuliers habitans du pays, Qu'il est force de faire iniustice en
» petites choses, qui veut venir à chef de faire iustice és grandes: & qu'il est necessaire F
» de faire tort en destail, qui veut faire droict en gros: mais quant à ceste sentence-là,
il est aisé à voir de prime face, que c'est vne instruction propre pour vn qui se veut
» faire seigneur & vsurper la tyrannie. Ceste regle est bien plus ciuile, Qu'il fault laisser
» aller plusieurs choses legeres pour gratifier au peuple, à fin de pouuoir en choses
» grandes luy resister & le garder de faillir: car celuy qui veut estre en toutes choses re-
gardant de trop pres, & trop vehement, sans iamais rien ceder ny lascher, ains est
toufiours aspre & inexorable, il accoustume le peuple à estriuer opiniastrément,
& se courroucer contre luy,

Mais vn peu la scote lente

Contre l'onde violente

Sçauoir à propos lascher,

partie en se relaschant vn peu soy mesme, & se iouant gracieusement avec eux, comme
à faire sacrifices, à voir les ieux des combats, à assister aux Theatres, partie en ne G
faisant pas semblant de les voir ny ouïr, comme nous faisons aux fautes des petits
enfans en la maison, à fin que l'autorité de les reprendre & de parler franchement
à eux, comme la force d'une drogue non sus-annee ny passée, ains estant en sa vertu
& vigueur, ait plus d'efficace & plus de foy pour les toucher & assener au vif, quand
il sera question de choses de grande consequence. Alexandre aiant entendu que
sa sœur auoit eu accointance d'un beau ieune gentilhomme, il ne s'en courrouça
point autrement, ains dit qu'il luy falloir aussi bien à elle permettre de se sentir &
iouïr vn peu de la royauté: ne faisant pas en cela sagement, de luy conceder cela qui
faisoit honte à sa grandeur: car il ne faut pas estimer ieu ne plaisir ce qui est la ruine ou
le deshonneur d'un estat. Et pourtant le sage homme de gouvernement ne permettra
point, tant qu'il luy sera possible, que le peuple face vne iniure aux particuliers habi- H
tans, comme seroit en confisquant leur bien, en leur laissant departir entre eux les de-
niers communs, ains y resistera de tout son pouuoir en les preschant, menassant & in-
timidant, il combattra contre tous tels appetits desordonnez d'une commune: à l'op-
posite de ce que fait Cleon à Athenes, qui nourrissant & augmentant tels fols desirs
du peuple, fut cause de faire naistre en la ville plusieurs frelons & mousches guespes,
comme dit Platon, qui veulent viure sans rien faire que poindre & picquer tantost
cestuy-cy, & tantost celui-là. Mais si le peuple d'aducture prend vne feste solemnelle
du païs, ou bien l'honneur de quelque Dieu pour occasion de faire quelques ieux, ou
quelque donnee legere, ou quelque gracieuseté honneste, ou magnificence publique,
il est raisonnable, que leur permettant telles choses, on les laisse iouyr aucunement & de
leur liberté & de leur opulence: car au gouvernement de Pericles & de Demetrius
Phalereus, il y a plusieurs exemples de choses semblables. Cimon mesme embellit
la

- A la place d'Athenes de plusieurs belles allees de platains, qu'il y fait planter à la ligne: & Caton voyant au temps de la coniuration de Catilina, que le menu peuple de Rome estoit tout esmeu par les menees de Iules Cesar, & qu'il ne falloit gueres de chose pour faire changer tout l'Estat, il persuada au Senat d'ordonner, qu'il se feroit quelque petite donnee & distribution de deniers aux pauvres citoyens: & cela fait à propos appaisa tout le tumulte, & reprima la sedition & soulevation qui estoit toute preste à se faire. Tout ainsi que le sage & discret Medecin, apres qu'il a tiré à son patient beaucoup de sang corrompu, luy donne vn peu de bonne nourriture: aussi l'aduisé Gouverneur d'Estat populaire, apres auoir osté à la commune quelque grande chose, qui estoit pour leur apporter honte & dommage, au contraire, par quelque legere grace & douceur qu'il leur concède, il les reconforte & engarde de se facher & de se plaindre. Et n'est pas mauuais quelque fois pour les destourner d'une folie à quoy ils ont affectiō sans propos, de les ramener à autres choses qui sont vtilles: ainsi
- B que fait Demades, lors qu'il auoit la superintendance des finances, & de tout le reuenue de la chose publique, estant le peuple d'Athenes en volonte d'enuoyer des galeres au secours de ceux qui s'estoient rebellez contre Alexandre le grand, & luy commandant de fournir argent pour cest effect, il leur dit, Vous auez bien de l'argent tout prest, car i'en auois fait prouision pour vous distribuer à ceste feste des Bacchanales, si que chascun de vous eust peu auoir enuiron demy marc d'argent, qui eust esté enuiron cinq escus pour teste: si vous aymez mieux que ces deniers soient employez à cest vsage, ie m'en rapporte à vous, vsez ou abusez en, comme de chose vostre: par ceste ruse les ayans destournez de vouloir plus armer la flotte de vaisseaux qu'ils vouloient enuoyer, de peur de perdre la distribution qu'il leur promettoit, il les engarda d'offenser grieuement Alexandre. Il y a beaucoup de telles volonteiz dommageables & dangereuses, qu'il seroit impossible de rompre de droit fil, mais il y faut vser de destour & de torse: comme fait vn iour Phocion, quand les Atheniens vouloient à
- C toute force qu'il allast hors de temps & de saison dedans le pais de la Bœotie: car il fait incontinent crier à son de trompe, que tous citoyens, depuis l'aage de l'adolescence iusques à soixante ans, eussent à le suiure avec leurs armes: à raison duquel cry s'estant esleué vn grand bruit des vieillards, qui se mutinoient de ce qu'on les faisoit aller à la guerre en tel aage: Quel mal y a-il? leur dit-il, l'ay bien quatre vingts ans, & seray avec vous comme vostre Capitaine. Par tels moyens on pourra rompre beaucoup d'Ambassades importunes, en y commettant ceux que lon verra les plus mal-dispos à faire voyages, plusieurs entreprises de grands bastiments inutiles, en commandant de contribuer donques argent, & plusieurs procez inciuils, en leur disant, qu'ils aillent donques eux mesmes à la Court pour les solliciter. A quoy faire il y faut attirer & associer les premiers ceux qui mettent telles choses en auant, & qui incitent le peuple à les vouloir: car s'ils reculent, il semblera qu'ils rompent eux mesmes ce qu'ils auront
- D proposé, & s'ils l'acceptent, ils porteront partie de la fâcherie, & de la peine qu'il y aura. Mais là où il sera question de quelque affaire de grande consequence & de grande vtilité pour le public, où il faudra grandement trauailler, & chaudemēt s'y employer, alors regarde à choisir de tes amis ceux qui auront le plus d'authorité, & mesmement entre les autres, ceux qui seront de plus douce nature: car ceux-là te resisteront le moins, & te secoureront le plus, ayans le sens bon, & point de ialousie ny d'opiniastreté: toutefois en cela fault-il encore que chascun cognoisse bien sa nature, & qu'entendant ce à quoy il est moins apte, il eslise pour adioincts plus tost ceux qu'il sentira valoir en ce qui est requis pour ce qui se presente, que ceux qui luy seront plus semblables: comme Diomedes estant deputé pour aller recognoistre le camp des ennemis, choisit pour son compagnon le plus aduisé, & laissa les plus vaillans: par ce moyen les actions en seront mieux contrepesees, & ne s'engendrera pas si facilement

Instruction pour ceulx qui

la ialousie & l'emulation entre ceux qui desirent faire cognoistre leur valeur en vertus E
differentes. Si doncques tu as vne cause à plaider, ou vne ambassade à faire, choi-
sy pour ton adioinct quelque homme bien eloquent, si tu te sens mal-idoine à bien
parler, ainsi comme Pelopidas choisit Epaminondas: Si tu te sens mal-propre à caref-
fer vne commune, & auoir le cœur en trop bon lieu pour t'abaisser à faire la court,
comme estoit Callicratidas capitaine Lacedemonien, choisis en vn qui ait grace à en-
tretenir les gens, & qui soit bon courtisan: Si tu as le corps foible, & mal-dispos pour
porter beaucoup de peine, eslis en vn qui soit plus robuste, & qui aime à trauailler,
comme Nicias choisit Lamachus. C'est ainsi que Geryon estoit esmerueillable, que
aiait plusieurs iambes, plusieurs bras, & plusieurs yeux, le tout estoit regy & gouver-
né par vne seule ame: mais les sages hommes de gouvernement fils s'entre-enten-
dent, peuuent bien conferer ensemble, non seulement leurs corps & leurs biens, mais
aussi leurs fortunes, leurs credits, & leurs vertus en vn mesme affaire: de sorte qu'ils
viendront tousiours mieux à bout de quelque execution qu'ils entreprennent à faire, F
que ne fera vn autre qui qu'il soit. Non pas comme les Argonautes, qui, apres auoir
delaisié Hercules, furent contraincts d'auoir recours aux sorcelleries & enchante-
ments d'une femme pour se sauuer, & desrober la toison d'or. Or y a-il des tem-
ples, ausquels ceux qui entrent, laissent l'or dehors, fils, en ont sur eux: & quant au
fer, on n'en porte presque, en maniere de dire, dedans pas vn: & d'autant que la tri-
bune aux harangues, & le siege presidial est vn temple commun à Iupiter conseiller
& garde des villes, & à iustice & equité, auant que d'y mettre le pied, dés à present
despouille ton ame de toute auarice, de toute conuoitise d'auoir, comme si c'estoit
du fer, ou bien vne maladie pleine de rouille, & la reiette en la halle des marchands,
des reuendeurs, banquiers & vsuriers, & t'en esloigne le plus arriere que tu pourras,
estimant que celuy qui s'enrichit du maniement des affaires publiques, est vn sacri-
lege, qui desroberoit iusques sur le maistre autel, iusques dedans les sepultures des
morts, dedans les coffres de ses amis, s'enrichiroit de trahison & de faulx tesmoigna- G
ge: qu'il est conseiller infidele, iuge pariure, magistrat concussionnaire, brief conta-
miné de toutes les meschancetez que l'homme peut commettre: & pour ceste cause
n'est-il ia besoin de plus amplement en parler. Au demourant l'ambition enco-
re qu'elle soit de plus belle apparence que l'auarice, apporte neantmoins des pestes
non moins dangereuses ne moins pernicieuses qu'elle au gouvernement de la Chose
publique: car elle est ordinairement accompagnée d'audace & de temerité, d'au-
tant qu'elle ne s'engendre point és natures basses, ny foibles ou paresseuses, mais
principalement és fortes, actiues, & vigoureuses: & la vogue des peuples qui l'enleue
& la poulse bien souuent par louange qu'on leur donne, rend son impetuosité bien
mal-aisée à retenir, à manier & regir. Comme doncques Platon escrit qu'il faut
accoustumer les ieunes garçons des leur enfance à ouir dire, qu'il ne leur est pas loi-
sible, ny de porter de l'or à l'entour de leur corps pour ornement, ny mesme en auoir H
& posseder, pour ce qu'ils en ont vn autre propre interieur meslé avec leur ame:
voulant donner à entendre sous paroles couuertes, à mon aduis, la vertu deriuee
de leurs ancestres, par la descēte & continuation de leur race: ainsi pouuons nous re-
conforter & addoucir la cupidité de l'ambition, en remonstrant aux esprits ambitieux,
qu'ils ont en eux de l'or qui ne se peut ternir, gaster ne contaminer par l'enuie, ne
par Momus mesme le repreneur des Dieux, qui est l'honneur, lequel ira tousiours
croissant & augmentant, tant plus on discourra, considerera & rememorera les cho-
ses par eux faites & accomplies au gouvernement de la Chose publique: & pourtant
qu'ils n'aient pas besoin de ces autres honneurs, qui se moulent, qui se taillent,
ou qui se paignent, ne qui se fondent en bronze, attendu que bien souuent, ce que
plus on y prise, appartient à autre qu'à eux. Car la statue que feit Polycletus du
trompette

- A Trompette, & celle du Hallebardier sont loüees, pour le regard de celuy qui les a faittes, non pour le regard de ceux en faueur de qui elles furent faittes. Et Caton lors que la ville de Rome commençoit desia à se remplir toute d'images & de statues, ne voulut pas permettre qu'on en feist aucune pour luy, disant, qu'il aimoit mieux que lon demandast pourquoy on ne luy en auoit point fait, que pourquoy on luy en auoit fait: car ces choses-là apportent enuie, & si pensent les peuples estre redevables à ceux, à qui ils n'ont point baillé de telles fumées: & au contraire, ceux qui qui les ont receuës, leur sont ennuyeux & fascheux, comme aians recherché d'auoir les affaires de la ville en main, à fin d'en receuoir vn tel salaire. Ainsi donc comme celuy qui auroit nauigué sans peril tout le long du gouffre de Syrtis, & puis se feroit venu perdre & noyer à l'entree du port, n'auroit pas fait rien de grand, ny de fort recommandable: aussi celuy qui se feroit sauué du thresor, & auroit eschappé les fermes publiques, c'est à dire qui n'auroit point souillé ses mains du larrecin des
- B deniers communs, ny de mauuaise intelligence, avec les fermiers des impositions & gabelles publiques, & puis se feroit laissé prendre à la cupidité de vouloir presider au palais, & d'estre le premier au conseil de la ville: celuy-là auroit bien donné contre vne plus haute roche, mais il seroit allé à fond, & se seroit noyé aussi bien que les autres: ainsi seroit-ce de beaucoup le meilleur, n'appeter ny cōuoiter point ces honneurs-là, ains les fuir & refuser du tout: toutefois si d'auenture il est malaisé de rebouter de tout poinct vne grace & vne demonstration d'amitié que le peuple a quelquefois enuie de faire à ceux qui combattent en ce champ de gouuernement, non à vn ieu de pris d'argent, ny de riches presents, ains à vn ieu veritablement sainct & sacré, & digne d'estre couronné, il suffise de se contenter de quelque honorable inscription, ou de quelque tableau, ou quelque decret publique, quelque rameau de laurier ou d'oliue, comme Epimenides en eut vn de l'oliue sacree du chasteau d'Athenes, pour auoir nettoyé & purifié la ville: & Anaxagoras, refusant tous
- C autres honneurs qu'on luy vouloit decerner, demanda seulement, que le iour qu'il mourroit, les enfans eussent congé de iouer, & n'allassent point à l'eschole pour ce iour-là: & aux sept gentils hommes Persiens, qui tuerent les Mages tyrans, on leur donna priuilege de porter le chapeau pointu Persien, penchant sur le deuant de la teste, à eulx & à ceulx qui descendroient d'eulx: car c'estoit le signal qu'ils auoient pris entre eulx, quand ils allerent pour executer leur entreprise. Aussi eut de la ciuilité & modestie grande, l'honneur que lon fait à Pittacus: car comme ses citoiens luy eussent permis & commandé de prendre de la terre qu'il auoit conquise sur les ennemis, autant comme il en voudroit pour luy, il en prit seulement autant que contenoit le iet de son iaelot qu'il lança: & le Romain Cocles eut autant de terre comme il en peut labourer en vn iour, estant boiteux: car il ne fault pas qu'un honneur ciuil soit salaire d'un acte vertueux fait pour le public, ains marque pour
- D la souuenance seulement, à fin que la memoire en demeure plus longuement, comme ont fait ceux que nous auons recitez. Là où les trois cents statues de Demetrius le Phalerien n'engendrèrent iamais rouille, ny crasse & ordure, ains furent toutes de son viuant mesmes abbatues: & celles de Demades furent fondues, & en fait on des vrinaux, & bassins à selles percees, & plusieurs autres tels honneurs ont esté de mesme effacez, aians despléu & fasché au monde, non seulement pour la mauuastie de ceux qui les receuoient, mais aussi pour la grandeur de ce qu'on leur donnoit: & pourtant la plus honneste & plus seure garde de l'honneur pour le faire longuement durer, c'est la sobriété & simplicité, pource que les honneurs excessifs & desmesurez en grandeur, sont ne plus ne moins que les statues mal contrepesées & mal proportionnees, lesquelles se ruinent & tombent par terre d'elles mesmes: i'appelle maintenant honneurs ces choses exterieures, comme fait le vulgaire, entant

Instruction pour ceux qui

qu'il est loisible, comme dit Empedocles : toutefois j'affirme aussi bien que les autres, que le sage homme d'Estat & de gouvernement ne doit point mépriser le vray honneur, qui gist en la beneuolence & bonne affection de ceux qui ont souuenance des seruices & biens qu'ils ont receus : ny ne doit point contemner la gloire, fuyant le plaisir à ses prochains, ainsi que vouloit Democritus : car ny les escuyers ne doiuent pas reietter les caresses de leurs cheuaux, ny les veneurs les festes de leurs chiens, ains les doiuent plus tost chercher, pource que c'est chose vtile & plaisante de pouuoir imprimer à tels animaux, qui nous sont familiers, & vivent avec nous, vne telle affection en nostre endroit, comme le chien de Lyfimachus monstra enuers son maître, & que le poëte Homere recite des cheuaux d'Achilles enuers Patroclus. Et quant à moy, j'estime qu'il en prendroit mieulx aux abeilles, si elles vouloient caresser & laisser amiablement approcher d'elles ceux qui les nourrissent, & qui les traittent & ont soing d'elles, plus tost que de les picquer, & de saigrir si asprement contre eux : mais maintenant les hommes aussi les chastient avec de la fumee, & domtent les cheuaux farouches avec des mors de bride, & attachent à des billots de bois les chiens qui ont de coustume de s'enfuir : là où il n'y a rien qui rende l'homme libre volontairement obeissant, & se soubmettant à vn autre homme, que la fiance qu'il a en luy pour l'amour qu'il luy porte, & l'opinion qu'il a conceüe de sa bonté & de sa iustice. C'est pourquoy Demosthenes dit bien, que les citez libres n'ont point de meilleur moien pour se garder & preseruer des tyrans, que de se deffier d'eux : car celle partie de l'ame qui croit & qui se fie, est celle qui est la plus aisée à prendre. Tout ainsi donc comme le don de prophetie qu'auoit Cassandra, ne seruoit de rien à ses citoiens, d'autant qu'ils ne luy croyoient point,

Dieu n'a voulu que ma voix prophetique
Portast effect à la chose publique :
Car quand ils ont receu quelque meschef
Tant que le mal leur poise sur le chef,
Je suis par eux alors sage appelée,
Mais au surplus folle & éceruëlle :

ainsi la foy & bienveillance des citoiens d'Archytas & de Battus enuers eulx, apporterent de grands profits aux vns & aux autres qui se voulurent seruir d'eux, & suivre leur conseil, pour la bonne opinion qu'ils en eurent : aussi est-ce le premier & principal bien qui soit en la reputation des hommes de gouvernement, la foy & confiance que lon a en eux, laquelle leur ouure la porte à faire toutes bonnes actions : le second bien est l'amitié & bienveillance du peuple, qui est aux bons vn bouclier, & vn rempar grand à l'encontre des enuieux & des meschants,

Homere
Iliad. liu. 4.

Comme la mere empesche que la mousche
Son fils dormant de doux sommeil ne touche,
destournant l'enuie qui peult sourdre à l'encontre d'eux : & quant au credit égalant
celuy qui sera né de bas & petit lieu aux plus nobles, le pauvre aux riches, & le priué
au magistrat : brief quand vertu & verité sont conioinctes à ceste beneuolence populaire, c'est comme vn vent fort & gaillard en poupe, qui les poulse à toute entre-
mise de gouvernement. A l'opposite aussi peult-on voir quels effects produit la disposition contraire és cœurs du peuple, par tels exemples : car ceux d'Italie aians surpris la femme & les enfans du tyran Dionysius, apres les auoir forcez & violez honteusement, les firent mourir, & puis en aiant bruslé les corps, en ietterent les cendres dedans la mer. Au contraire, vn Menander aiant regné doucement sur les Bactriens, & estant à la fin mort en la guerre, les villes de son obeissance firent bien ensemble, & par commun accord, les funerailles & obseques : mais quand se vint à sçauoir où lon en logeroit les reliques, elles en vindrent en tresgrande contention les vnes contre
les autres

- A** les autres, qu'elles pacifierent à la fin à grande peine, sous condition que ses cendres feroient partagees également entre elles, & qu'en chascune y auroit vne sepulture de luy. A l'opposite, ceux d'Agrigente, apres qu'ils furent deliurez du tyran Phalaris, feirent vne ordonnance, que de là en auant il ne fust loisible à aucun de porter robe de couleur bleüe, pource que les satellites de ce tyran auoient porté des hocquillons bleus. Et les Persiens, pource que Cyrus auoit le nez aquilin, iusques aujour-d'huy aiment encore ceux qui l'ont tel, & les estiment les plus beaux. C'est l'amour le plus sainct, & le plus puissant de tous, que celuy que les villes & peuples portent à quelqu'un de leurs citoyens pour sa vertu : les autres honneurs, ainsi nommez à faul-fes enseignes & demonstrations de bienveillance, que les peuples donnent à ceux qui leur font bastir des Theatres, iouer des ieux, distribuer de l'argent, ou d'autres presens, ou de leur donner le passetemps de voir combattre des gladiateurs & escrimeurs à outrance, ressemblent proprement aux caresses & flatteries des putains, qui
- B** rient tousiours à celuy qui leur donne & qui leur fait plaisir, qui est vne reputation qui ne dure gueres, ains se passe en bien peu de temps. Celuy qui a dit, que le premier qui donna de l'argent au peuple, enseigna le vray moyen de ruiner l'estat populaire, entendit bien, qu'un peuple perd son autorité, quand il se rend subiect à corruption : mais aussi faut-il bien que ceux qui le corrompent entendent, qu'ils se ruinent & destruisent eux-mesmes, achetans leur reputation à si grands frais & si grands despens, & rendent la commune plus hautaine & plus arrogante, d'autant qu'elle presume qu'il est en sa puissance de donner ou oster vne chose grande. Ce n'est pas à dire, que ie veuille que l'homme d'Estat, es despenses ordinaires & liberalitez accoustumees, se monstre chiche & mechanique, quand ses affaires luy en donneront le moien, par ce qu'un peuple prend en plus grande haine le riche, qui ne luy communique pas de ses biens en telles occasions, que le pauvre qui desrobe du public, pour ce qu'ils estiment que l'un procede de mespris & de contemnement, & l'autre
- C** de necessité. Parquoy ie voudrois que telles largesses premierement se feissent gratuitement & pour neant, d'autant que faites en ceste sorte, elles font admirer & obligent d'auantage ceux qui les reçoient : & puis ie voudrois que ce fust tousiours pour occasion belle, bonne & honneste, comme pour l'honneur de quelque Dieu : ce qui attire tousiours de plus en plus le peuple à deuotion, pource que tout ensemble il s'imprime au cœur du peuple vne vehemente opinion & apprehension, que la diuinité & maiesté des Dieux doit estre grande & venerable chose, quand ils voient ceux qu'ils honorent, & qu'ils reputent grands personnages, si affectionnez à despendre liberalement pour les seruir & honorer. Tout ainsi donc comme Platon defend
- D** aux ieunes qui apprennent la musique, l'armonie Lydienne & la Phrygienne, d'autant que l'une excite en nostre ame toutes affections plaintiues & lamentables, & l'autre augmente l'inclination à la volupté & lubricité : ainsi quant aux largesses & despenses publiques, chasse hors de ta ville tant que tu pourras celles qui prouoquent les affections bestiales, barbares & sanglantes en nostre ame, ou les dissoluës & lubriques : ou si tu ne les peulx du tout chasser & oster, pour le moins fais deuoir d'en contester tant que tu pourras contre le peuple, qui te demandera de tels spectacles, & fais que le subiect de ta despenfe soit tousiours honneste & pudique, & la fin & intention bonne & necessaire, ou pour le moins que le plaisir & ioyuseté qui y sera, soit sans insolence ny dommage. Mais si d'adventure tes biens sont mediocres, & que le centre & la circonference d'iceux ne contiene ny n'embrace pas plus qu'il ne te fault necessairement, sçache que ce n'est ny lascheté, ny vileré & bassesse de cœur, de ceder ces ambitieuses despenses, & laisser faire ces liberalitez là à ceux qui ont bien de quoy, en confessant franchement sa pauvreté, non pas en s'endebtant & prenant argent à vsure, se faire regarder en pitié, & mocquer tout ensemble, en telles commissions : par ce

Au 3. liure
de la Rep.

Instruction pour ceux qui

que ceux qui le font ne peuvent si secrettement faire, que lon ne pense bien qu'ils en- E
treprennent plus qu'ils ne peuvent, & qu'ils sont contraincts de molester d'emprunts
leurs amis ; ou de flater & courtirer des vsuriers, tellement qu'ils n'acquierent ny
honneur ny credit, ains plustost honte & mespris par telles despenfes: pourtant seroit
il bon, que lon eust tousiours en telles choses Lamachus & Phocion deuant les yeux:
car Phocion vn iour comme les Atheniens en vn sacrifice luy criaient, qu'il leur don-
" nast quelque argent pour faire les frais: l'aurois honte, ce leur dit-il, de vous don-
" ner, & ce pendant ne payer pas cestuy-cy: en leur montrant Callicles l'vsurier, du-
quel il auoit emprunté. Et Lamachus es comptes de sa charge, quand il auoit esté
Capitaine de l'armée d'Athenes en quelque voyage, il y mettoit tousiours en ligne de
compte de la despenfe, pour vne paire de pantoufles, & pour vne robe à son vsage.
Et les Thessaliens ordonnerent à Hermon qui refusoit d'estre leur capitaine general,
par ce qu'il estoit pauvre, vn poinçon de vin par chascun mois, & vn minot de bled
de quatre en quatre iours: ainsi n'est-ce point honte de confesser sa pauvreté, & n'ont F
pas les pauvres moins de moien d'acquerir credit & autorité au gouuernement des
villes, que ceux qui despendent beaucoup à faire des festins & des ieux publiques,
pour acquerir la bonne grace de la commune, prouueu que par leur vertu ils ayent
acquis foy & liberté de franchement parler au peuple. Pourtant se fault-il bien sa-
gement m'istrifier & moderer en telles choses, & ne descendre pas à pied en campa-
gne rase, pour combattre contre des gens à cheual, ny entrer en carriere pour faire
ieux, ou sur vn eschaffault, ny en salle de festin, estant pauvre, pour faire à l'enuy des
riches, à qui se montrera plus magnifique: ains fault essayer de manier le peuple par
vertu, par gentillesse de cœur, & par bon entendement conioinct avec vne sage pa-
role: en quoy il n'y a pas seulement vne honnesteté venerable, mais aussi vne grace
attrayante & fauorable,

Plus que tout l'or de Crœsus desirable:

car pour estre bon il n'est pas necessaire d'estre fascheux ne presumptueux, G

Pour estre chaste & bien moriginé,

On n'est pourtant seuer & rechigné,

Ne par la ville on ne monstre vne trongne

Hydeuse à voir, tant elle se renfrongne:

au contraire l'homme de bien est premierement de facile acces, affable à tous, tenant
sa maison ouuerte, comme vn port de refuge pour tous ceux qui se veulent seruir de
luy. Et puis il ne monstre pas sa debonnaireté soigneuse aux negoces & affaires de
ceux qui l'emploient, mais aussi en ce qu'il se va resiouir avec ceux à qui il sera ar-
riué quelque bonne aduenture, & condouloir aussi avec ceux auxquels il sera escheu
quelque mesaduenture: ne se rendant point moleste ny fascheux à personne par
vn grand nombre de vallets qu'il menera quand & soy aux estuues, ny à retenir pla-
ces aux theatres quand on y iouera des ieux, ny remarquable par aucuns signes ex- H
terieurs de delices & de sumptueuse superfluité: ains estant egal & semblable au
commun des autres en habillement, en despenfe de table, en la nourriture de ses en-
fans, suite, estat & vestement de sa femme: & brief se voulant comporter en toutes
choses, comme vn simple homme & simple citoyen, n'ayant rien plus d'apparence que
l'un des autres, conseillant au reste chascun amiablement en son affaire, defendant
leurs causes, comme vn aduocat, gratuitement, sans prendre aucun salaire, reconci-
liant gracieusement le mary avec la femme, les amis les vns avec les autres, n'em-
ploiant pas vne petite partie du iour à la tribune aux harangues, ou au parquet de
l'audience pour le public, & puis tout le reste de sa vie tirant à soy tous affaires &
tous moiens de mesnager de tous costez pour son particulier profit, ainsi que lon dit
que le vent de Cécias attire à soy les nues: ains ayant tousiours l'esprit tendu au soing
du public,

- A du public, en faisant par effect apparoir, que la vie d'un sage homme de gouuernement est vne continuelle action & fonction publique, non pas vne oyssiueté, comme le vulgaire pense. Par ces façons & autres semblables il gaigne & attire à soy la commune, laquelle en fin vient à cognoistre que toutes les flateries, attraiçts & allechements des autres, ne sont que faulx appasts & amorfes bastardes, au pres & à comparaison de la prudence, bonté & diligence de luy. Les flateurs qui estoient à l'entour de Demetrius ne vouloient pas qu'il appellast les autres princes de son temps Roys, ains disoient qu'il falloit que lon nommast Seleucus, le capitaine des Elephans: Lyfimachus, garde des trefors: Ptolomeus, general de la marine: Agathocles, gouuerneur des Isles: mais le peuple encore que du commencement à l'aduenture ils eussent reietté le sage & prudent homme de gouuernement, toutefois à la fin apres qu'ils auront cogneu sa verité, sa preud'homme & bonté de son naturel, ils le reputeront seul populaire, seul gouuerneur, & seul magistrat: & quant aux autres, ils en appelleront
- B l'un le defrayeur, l'autre le festoyant, l'autre le president des ieux, & les tiendront pour tels seulement. Et puis tout ainsi que aux festins dont vn Alcibiades ou vn Callias faisoient la despenſe, il n'y auoit que Socrates qui parlast, & estoient les yeux de tous les conuiez tournez sur luy seul: ainsi és villes saines & bien ordonnees Ismenias fait des largesses, Lichas donne à soupper, Niceratus defraye les ieux, mais vn Epaminondas, vn Aristides, vn Lyfander, sont ceux qui tiennent les magistrats, qui gouuernent & qui commandent aux armées. Ce considéré il ne se fault point lascher de courage, ny festonner pour la reputation qu'acquierēt enuers vne commune ceux qui leur bastifſent des theatres, qui leur font des festins, & qui tiennent grandes maisons, pource que c'est vne gloire qui dure bien peu, & qui se dissout & s'esuanouit en fumee quand & la fin de ces combats de gladiateurs, & avec les ieux de leurs theatres, n'aians en soy rien de venerable ny de grand. Or ceux qui font mestier de nourrir & gouuerner des ruches d'abeilles disent, que les exaims qui resonnent le plus, & qui font plus grand
- C bruit, sont les meilleurs, les plus fructueux, & les plus sains: mais celuy, à qui Dieu a donné la charge & le soing de l'exaim raisonnable & ciuil des hommes, iugera celuy heureux qui sera le plus doux & le plus paisible, & approuuera bien les ordonnances & statuts de Solon en plusieurs autres choses, taschant à les ensuyure & obseruer à son pouuoir: mais il doutera & s'esbahira à quoy il pensoit quand il escriuoit, que ceux qui en vne sedition de ville ne se rengeroient à l'une ou à l'autre des parties, fussent notez d'infamie: car en vn corps naturel malade, le commencement de mutation à recouurement de santé ne luy vient pas des membres gastez, ny des parties malades, mais quand la temperature des fortes, saines & entieres, est si puissante, qu'elle chasse ce qui est en tout le reste du corps contre la nature: aussi en vn peuple tumultuant en sedition non dangereuse ny mortelle, ains qui soit pour se terminer & prendre fin, il fault qu'il y ait beaucoup de sain & entier, & qu'il y demeure, & se maintienne en-
- D semble: car il flue & decoule des sages ce qui guarit & penetre à trauers de ce qui est malade: mais les villes qui sont entierement troublees, & toutes sans dessus dessous, perissent de fond en comble, si ne leur suruiuent de dehors quelque contraincte & quelque chastiment qui les face sages par force. Non pas que ie veuille dire, qu'il faille, en sedition & dissension ciuile, demourer insensible & impassible, sans sentir aucune passion du mal public, en chantant son repos & sa tranquillité, & sa vie heureuse & paisible, ce pendant que les autres se battront, en s'eslouissant de la folle d'autrui: car c'est là principalement, où il fault chauffer le brodequin de Theramenes qui seruoit à l'un & à l'autre pied, & parler à toutes les deux parties sans se ioin-
- Dre ny aux vns ny aux autres: par ce moien tu ne sembleras pas estre aduersaire, en estant prest à offenser, ains commun à tous, en aidant aux vns & aux autres: & ne t'apportera point d'enuie ce que tu ne te sentiras point du malheur, si tu te monstres auoir

Instruction pour ceux qui

compassion également de tous, Mais le meilleur est de procurer & prouueoir que E
iamais ils ne viennent à ouuerte sedition, & doit on estimer, que cela est la cyme & le
point principal de toute la science ciuile de gouverner : car il est du tout euident que
c'est la cause des plus grands biens que les villes scauroient desirer de la paix, de la li-
berté, de la fertilité, de multitude de peuple, & d'vñion & concorde : & quant à la
paix pour le temps qui court auourd'huy, les peuples n'ont pas grand besoing de sages
gouverneurs pour la leur maintenir, pource que toutes guerres, & contre les Grecs
& contre les Barbares, s'en sont fuies arriere de nous : & quant à la liberté, les peuples
en ont autant qu'il plaist aux princes & superieurs leur en departir : & le plus, à l'ad-
venture, ne seroit pas le meilleur pour eulx : quant à la fertilité de la terre & abondan-
ce des fruiçts, & la bonne disposition & temperature des saisons de l'annee,

Hesiodé au
liure intitulé
Les oeuvres.

Que les enfans des ventres de leurs meres

Sortent à temps semblables à leurs peres,

l'homme de bien priant pour le salut d'iceux enfans nouvellement nez, le demande- F
ra en ses prieres aux Dieux pour tous ses citoiens. Il reste donc à l'homme de gou-
uernement de tous les ouurages proposez, celui qui est vn bien non moindre que
pas vn des autres, c'est de faire qu'il y ait tousiours amitié, vñion & concorde, entre
ses citoiens, & chasser hors de sa ville toutes dissensions, toutes querelles & toutes
malveuillances, comme entre communs amis: en reconfortant premierement la par-
tie qui semblera estre plus offensee, & montrant de s'en sentir offensé aussi bien com-
me eux, & qu'il luy en fait aussi grand mal comme à eux : & puis petit à petit tâcher
à les addoucir, & à leur donner à entendre, que ceux qui fleschissent & qui chalent
la voile vn petit, surmontent ordinairement ceux qui s'opiniaistrent à vouloir gai-
gner à toute force, & surmontent non seulement en douceur & bonté de nature,
mais aussi en grandeur de courage & en magnanimité : & qu'en pliant & cedant en
quelques petites choses, ils gagnent en de tresbelles & tresgrandes : & puis apres en
remonstrant en particulier à chascun, & en public à tous, & leur declarant la petitesse G
& foiblesse des affaires de la Grece, & qu'il est beaucoup plus expedient aux hom-
mes de bon & sain iugement, iouir du fruiçt & du bien qu'il y a en ceste imbecillité,
en vivant en paix & en concorde les vns avec les autres, attendu que la fortune ne
leur a laissé au milieu aucun grand & digne pris à gagner pour tous leurs efforts. Car
quelle gloire, quelle autorité, ne quelle puissance demourera à ceux qui gaigne-
ront & qui demoureront les maistres, que le Proconsul avec vn simple mandement
ne renuerse & ne transporte en vn autre toutes & quantesfois qu'il luy plaira, encore
que quand elle demoureroit, elle ne meritaist pas que lon en fist autrement grand
cas. Mais comme le plus souuent les grands embrasements de feu ne commencent
pas aux edifices sainçts & sacrez ny publiques, ains sera par le moien d'vne lampe que
lon aura laissé tomber sans y penser, en quelque pauvre & petite maison, ou bien
quelque paille que lon brullera, qui iettera soudain vne grande flamme, dont il ad- H
vient apres vne grande & publique perte de plusieurs bastiments : aussi n'est-ce pas
tousiours par les contentions & dissensions touchant les affaires publiques que les
seditions des villes sallument, ains bien souuent les querelles & riottes yssues de ne-
gociés particuliers, & procedees iusques au public, ont mis sans dessus dessous
toute vne ville. Au moien dequoy il appartient à l'homme politique autant que
nulle autre chose, d'y prouueoir & remedier, à fin que tels differents ou ne naissent
point du tout, ou qu'ils soient bien tost assopis, & qu'ils ne croissent point, ou pour
le moins qu'ils ne touchent point au public, ains demeurent entre ceux qui les au-
ront eueus : en considerant luy-mesme & le donnant à entendre aux autres, que les
priuez débats sont à la fin cause des publiques, & les petits des grands, quand on
les neglige, & que lon n'y vse pas des remedes conuenables dès le commencement.


Comme

- A Comme l'on tient, que le plus grand mouvement de sedition ciuile qui fut oncques en la ville de Delphes, aduint par le moien de Crates, duquel Orgilaus fils de Phalis estant pres à espouser la fille, il arriua par cas d'aduenture que la coupe, de laquelle on deuoit premierement faire les effusions de vin en l'honneur des Dieux, & boire puis apres l'un à l'autre par les ceremonies nuptiales, se rompit en deux pieces d'elle mesme: ce que ledit Orgilaus prenant à mauuais presage, abandonna l'espousee & s'en alla sans rien acheuer avec son pere: peu de iours apres, ainsi comme ils faisoient vn sacrifice aux Dieux, Crates leur feit supposer quelque vase d'or, de ceux qui estoient sacrez & dediez au temple, & ainsi fit precipiter du haut en bas de la roche de Delphes, Orgilaus & son frere, sans autre iugement ny forme de procez, comme sacrileges manifestes: & depuis encore fit mourir aucuns de leurs parents & amis, bien qu'ils suppliasse qu'on les laissast iouir de la franchise du temple de Minerue prouidente, dedans lequel ils s'en estoient fuis: & s'estans commis plusieurs tels meurtres, les Delphiens à la fin firent mourir ce Crates, & ceux qui avec luy auoient emeu la sedition, puis de l'argent procedé de la confiscation des excommuniez, ainsi qu'on les appelle, ils firent bastir les temples qui sont au bas de la ville. Et à Syracuse de deux ieunes hommes qui auoient grande familiarité ensemble, l'un s'en allant hors du pais laissa en garde à l'autre vne sienne concubine iusques à ce qu'il fust de retour: l'autre en l'absence de son amy la corrompit, & son compagnon à son retour l'ayant sçeu, fit tant qu'il desbaucha & adultera la femme de l'autre: & y eut lors vn des plus anciens Senateurs qui meit en auant au conseil, que lon les bannist de la ville tous deux, deuant qu'ils fussent cause de la mettre en combustion, & de la perdre en la remplissant de haines & d'inimitiez: ce qu'il ne peut pas persuader: tellement que le peuple entrant en sedition par grandes calamitez ruina vn tres bon gouuernement. Tu as aussi des exemples domestiques de Pardalus & de Tyrrenus, qui cuiderent destruire & ruiner la cité de Sardis, pour causes legeres & priuees, l'ayant ietee en guerres & rebellions par leurs factions & inimitiez particulieres. pourtant faut il que l'homme de gouuernement soit tousiours au guet, & qu'il ne mesprise pas non plus qu'en vn corps naturel les commencements des maladies, les petites hargnes, qui courent aisément de l'un à l'autre, ains qu'il les arreste, en y remediand de bonne heure: car en y ayant bien l'œil, ce qui estoit premierement grand deuient petit, & ce qui estoit petit se reduit à neant: or pour les bien induire & persuader à ce faire, il n'y a point de meilleur artifice ny de plus grand moien, que de se monstrier soy-mesme facile à pardonner, & aisé à reconcilier en semblables differents, demourant en ses premieres causes & raisons sans rancune, & n'adioustant à pas vne ny opiniastrété, ny cholere, ny autre passion qui puisse engendrer vne aspreté & vne aigreur es disputes necessaires & que lon ne sçauroit euitier. Car aux combats & escrimes des poings que lon fait par plaisir nud à nud, on a accoustumé de munir les mains de mouffles rondes, à fin que quand les combattans viennent à s'eschauffer, il n'en puisse arriuer aucun maling accident, estant les coups mols, & ne pouuans faire grande douleur: aussi es procéz & differents qui suruiennent entre les citoiens d'une mesme ville, le meilleur est de combattre, en deduisant ses moiens, raisons & arguments tout simplement & nuëment, sans aigrir ny enuenimer les affaires, comme les traicts, en y faisant des incisures, ou en les empoisonnant par iniures, par obstinations malignes, & par menasses, pour rendre le mal incurable, & l'augmenter, de sorte qu'il vienne à toucher iusques au public: car celuy qui se portera ainsi en ses propres affaires enuers ses parties, viendra facilement à bout aussi des autres: & depuis que lon a vne fois osté les occasions particulieres des malueillances priuees, les picques & discordes, que lon a à cause du public, sont faciles à pacifier, & n'apportent iamais inconueniens irremediabls ny malings.

Si l'homme d'aage se doit encore entremettre

ET MESLER DES AFFAIRES PVBLIQUES.

E



O V S sçauons bien, Seigneur Euphanes, que tu es assez coustumier de louer hautement le poëte Pindare, & que tu as souuent en la bouche ces paroles siennes, comme estans à ton aduis bien assises & dites de bonne grace,

Quand le combat est présenté,
Qui restiue en cherchant excuse,
Iette en profonde obscurité
Le bruit de sa vertu confuse.

Mais pour autant que lon allegue ordinairement plusieurs causes & pretextes pour couvrir la paresse & faute de cœur de s'entremettre des negoces & affaires de la chose publique, & entre autres pour la derniere, comme par maniere de dire, celle de la ligne sacrée, on nous amene en ieu **F** la vieillesse, & pense lon auoir bien trouué vn suffisant argument pour reboucher & attiedir le desir de se faire honneur par le moien d'iceluy, en nous disant, qu'il y a vn certain but, & fin limtee, non seulement à la reuolution du temps que lon est propre pour les combats & ieux de pris, mais aussi pour les affaires & negoces publiques: Il m'a semblé qu'il ne seroit point hors de propos, si ie t'enuoyois & communiquois les discours que ie fais quelquefois à par moy, sur l'entremise des vieilles gens au gouvernement de la chose publique, à fin que nul de nous deux n'abandonne le long pelerinage que nous auons longuement continué en cheminant tous deux ensemble iusques à present, ny ne reiette la vie ciuile au maniement des affaires, non plus qu'il voudroit faire vn vieil compagnon de son aage, ny vn ancien familier amy, pour en prendre vn autre non accoustumee, & pour à laquelle se familiariser & accoustumer il n'auroit pas du temps assez: ains que nous demouriös fermes & constans en la maniere de viure que nous auons dés le commencement choisie, tellement que **G** la fin de nostre viure soit aussi de bien viure, si nous ne voulons pour ce peu de temps qui nous reste à viure diffamer le beaucoup que nous auons desia vescu, comme aiant esté despendu vainement à nulle bonne & louable intention: car la domination tyrannique n'est pas vn beau monument pour y estre ensepuely, ainsi comme quelqu'un iadis mettoit en auant au tyran Dionysius: & quant à luy ceste principauté qu'il auoit acquise & iouye par voye si iniuste & si meschante, plus elle duroit sans d'ager de faillir, plus elle luy estoit grande & parfaite calamité: & comme Diogenes depuis voiant son fils deuenu pauvre hōme priué, de seigneur & prince qu'il estoit: ô (dit-il) Dionysius, que tu es indigne de l'estat auquel tu es reduit maintenāt! car tu ne meritois pas de viure icy en liberté, sans doute quelconque avec nous, ains deuois demourer par delà comme ton pere, emmuré & confiné dedans vne forteresse, pour toute ta vie, iusques à la vieillesse. Mais vn gouvernement populaire, iuste & legitime, auquel vn **H** homme de bien a accoustumé de se mōstrer tousiours, non moins en obeïssant qu'en commandant, utile & profitable au public, est à la verité vn beau sepulchre pour y estre en tel exercice honnorablement inhumé, en adioustant à sa mort la gloire de sa vie: car c'est le dernier qui descend sous la terre, cōme dit Simonides, sinon à ceux en qui l'hōneur & la bonté meurent premier, & en qui le zele du deuoir se lasse & s'estaint deuant que la conuoitise des choses necessaires à ceste vie, comme si les parties diuines de nostre ame, & qui dirigent les actions, estoient plus fresles, & s'amortissoient plus tost que les sensuelles & corporelles: ce qui n'est ny honneste à dire, ny bon à croire non plus que ceux qui disent, que nous ne nous lassons iamais de gagner, ains plus tost fault redresser en mieux & corriger le dire de Thucydides, en ne croiant pas ce qu'il dit, qu'il n'y ait que l'ambition seule qui ne vieillisse point en l'hōme, ains plus
tost

Si l'homme d'aagé se doit encore mesler d'affaires. 179

A tost qu'il y ait aussi la socialité de vouloir verser & viure en compagnie, & la ciuilité de vouloir entendre & se mesler des affaires : ce qui perseuere tousiours iusques à la fin aux fourmis & aux abeilles : car iamais homme ne voit qu'une abeille par vieillesse deuint frelon, comme il y a des gens qui veulent que ceux qui ont esté toute leur vie nourris aux affaires, quand la vigueur de leur aage est passée demeurent assis, & se retirent en leurs maisons à ne rien faire, laissant esteindre & consommer la vertu actiue par paresse, ne plus ne moins que la rouille gaste le fer. Car Caton disoit tres-fagement, que la vieillesse d'elle mesme auoit assez de laideurs, sans que volontairement nous y adioustissions encore la villanie & laideur du vice : or n'y a-il entre tous les vices vn qui plus diffame l'homme vieil, que fait la paresse, la delicatessé & voluptuosité, le faisant sortir d'un palais où s'exerce la iustice, ou d'une sale où se tient le conseil, pour s'aller cacher en un coing de maison, ne plus ne moins qu'une femme, ou en quelque terre aux champs, pour auoir l'œil à ce que font les moissonneurs &

B les glaneuses.

Mais où est or' Oedipus, & où sont

Ses tant prizez enigmes ?

ainsi comme il y a en Sophocles. Car de vouloir commencer en la vieillesse à s'entre-mettre des affaires, & non pas deuant, comme lon dit que Epimenides s'estant allé coucher ieune, se resueilla vieillard, cinquante ans apres : ainsi quittant & laissant un repos si long & si fort collé avec soy par longue accoustumance, s'aller ietter tout d'un coup en des trauaux & des occupations laborieuses, sans y estre duit, dressé ny exercité en façon quelconque, & sans auoir hanté personnes entendues en matiere d'Estar, ny pratiqué affaires du monde, celui qui le feroit, donneroit à l'aduenture occasion à qui l'en reprendroit, de luy mettre au deuant ce que la prophetisse Pythie respondit vn iour à quelqu'un qui enquerroit Apollon de semblable chose,

Tu es venu bien tard me demander

C Estat qui puisse au peuple commander :

Tu vas à heure indeuë & inciuile

Frapper à l'huis de la maison de ville :

comme feroit un malappris ou un estranger qui arriueroit à quelque festin à heure indeuë, la nuict toute noire : tu ne changes pas de lieu ny de place, mais de vie que tu n'as iamais essayée. Car quant à ceste sentence de Simonides,

La ville enseigne & rend habile l'homme,

elle est bien vraye en ceux qui ont encore du temps assez pour estre enseignez & pour apprendre une science qui ne s'apprend qu'avec beaucoup de trauaux, longues & laborieuses occupations, à toute peine, prouueu encore qu'elle rencontre à temps une nature patiente de labeur, & qui puisse aisément supporter un rebut de fortune. Ces raisons là pourroient sembler bien à propos alleguées contre ceux qui comman-

D ceroient en leur vieillesse à se vouloir mesler des affaires : & toutefois nous voyons au contraire, des hommes de grand iugement qui diuertissent les adolescents & les ieunes gens du gouuernement de la chose publique : à quoy se rapporte le tesmoignage mesme des loix, par ordonnance desquelles à Athenes le crieur publicq à haute voix appelle à la tribune, pour haranguer aux assemblees de ville deuant le peuple, non les ieunes gens de gaillarde ceruelle, comme un Alcibiades, ou un Pytheas, les premiers, ains ceux qui ont passé cinquante ans, les enhortant de venir dire & conseiller au peuple ce qu'ils verront estre bon à faire :

Icy y a faulte de quelques lignes en l'original Grec.

Et Caton aiant esté accusé apres l'aage de quatre vingts ans, en plaidant luy mesme sa cause, dit : Il est bien malaisé, Seigneurs, rendre compte de sa vie, & la iustifier deuant d'autres hommes, que deuant ceux avec lesquels on a vescu. Et n'y a person-

Si l'homme d'aage se doit encorè entremettre

ne qui ne confesse, que les actes que fit Auguste César, qui deffit Antonius vn peu E
auant que de mourir, ne soient trop plus royaux, & plus profitables à la chose publi-
que, que nuls autres qu'il ait oncques faits. Et luy mesme refrenant seuerement par
„ bonnes coustumes & ordonnances la dissolution des ieunes gens, comme ils s'en
mutinassent, il ne leur fit que dire, Escoutez ieunes hommes vn vieillard, que les
vieillards escoutoient bien quand il estoit ieune. Et le gouuernement de Pericles eut
sa plus grand' vogue & vigueur en sa vieillesse, lors qu'il persuada aux Atheniens de
hardiment entrer en la guerre Peloponesiaque: mais comme importunément ils vou-
lussent à toute force sortir de la ville, pour aller combattre soixante mille hommes de
pied armez, qui fourrageoient & saccageoient leur plat país, il sy opposa & l'em-
pescha, en arrachant, par maniere de dire, les armes au peuple, & seellant les serrures
des portes. Mais il vaut mieux coucher les propres termes que met Xenophon
„ quand il escrit du Roy Agefilaus: Quelle ieunesse, dit-il, est plus gaillarde que n'e-
„ stoit sa vieillesse? Qui fut iamais en sa plus grande fleur & vigueur plus formidable aux F
„ ennemis, que fut Agefilaus estant tout au bout de son aage? De la mort de qui de-
„ menerent oncques les ennemis plus grande ioye, qu'ils firent de celle d'Agefilaus, en-
„ core qu'il fust vieil quand il mourut? Qui estoit celuy qui asseuroit les alliez & con-
„ federez, sinon Agefilaus, combien qu'il fust des-ia sur le bord de sa fosse, & pres de
„ la fin de ses iours? Quel ieune homme regretterent onc les siens plus amerement que
„ luy mort, quelque vieil qu'il fust? Le long temps que ces grands personages auoient
vescu ne les empeschoit pas de faire de si belles & si honorables choses: & maintenant
nous autres faisons les delicats au gouuernement des villes, où il n'y a ny tyrannie à
combattre, ny guerre à conduire, ny siege à soustenir, ains seulement des debats &
contentions ciuiles entre des citoiens, & quelques emulations, lesquelles se vident
pour la plus part par la loy, auec paroles, & par la iustice: nous tirons le pied arriere de
peur, en nous montrant plus lasches & faillis de cœur, ie ne diray pas que ces anciens
Capitaines là & gouuerneurs du peuple, mais aussi que les poëtes, les sophistes, & les G
ioureux de Comédies & tragedies du temps passé: fil est vray, comme il est, que Si-
monides en sa vieillesse emporta le pris d'auoir le mieux ordonné sa danse, ainsi que
tesmoignent ces derniers vers d'un Epigramme qui en fut fait,

Quatre vingts ans auoit Simonides

Athenien, fils de Leoprepes,

Quand il gaigna l'honneur de la carolle.

Aussi dit on que Sophocles estant appelé en iustice par ses propres enfans, qui luy
mettoient sus qu'il radottoit, & estoit retourné en enfance pour son grand aage, à fin
que par autorité de iustice il luy fust baillé curateur, leut deuant les iuges l'entree du
Chorus de sa tragedie, que lon surnôme Oedipus en Colone, qui se commence ainsi:

Estranger tu as fait entree

En ceste fertile contree

Par le bourg Colone nommé,

Pour ses bons cheuaux renommé,

Là où le gracieux ramage

Du rossignol fait le boccage

Des vaux verdoyans resonner,

Plus qu'ailleurs on ne l'oyt sonner.

Et pour ce que le cantique en pleut merueilleusement à l'assistance, chascun se leua,
l'accompagna, & le reconuoya iusques en sa maison, auec grandes acclamations de
ioye, & battements de mains à son honneur, comme lon faisoit au sortir du Theatre,
quand il auoit fait iouer quelqu'une de ses Tragedies. Il est bien certain que ce petit
epigramme est de luy,

Quand

A Quand Sophocles ce cantique escriuoit
Pour honorer Herodote, il auoit
Desia vescu cinquante & cinq annees.

Philemon & Alexis tous deux poëtes Comiques, la mort les prit qu'ils faisoient encore iouër sur la scene leurs Comédies, & en gagnoient le pris. Et Pôlus le ioueur de Tragédies, Eratosthenes, & Philochorus escriuent, qu'il auoit soixante & dix ans qu'il ioua encore huit Tragédies, en l'espace de quatre iours, vn peu au parauant qu'il mourust. N'est-ce doncques pas vne grande honte, que les vieillards qui ont fait profession de haranguer au peuple de dessus vne tribune, de seoir en chaire de iudicature pour exercer la iustice, se monstrent moins genereux, & moins magnanimes que ceux qui ont fait toute leur vie mestier de iouër des ieux sur vn eschaffaut, & que quittant les ieux & combats qui sont veritablement sacrez, ils despouillent la personne ciuile d'homme d'honneur, se meslant du gouuernement de la chose publique,

B pour en prendre ie ne ſçay quelle autre? car de vouloir quitter la dignité Royale pour prendre le personnage d'un laboureur, c'eſt choſe trop baſſe & trop mechanique: & veu que Demoſthenes dit, que la galere ſacree de Paralos eſtoit indignement & ignominieufement traittee, quand on ſ'en ſeruoit à apporter à Midias du bois, des eſchalats, & des moutons: ſi vn personnage d'eſtat venoit à quitter l'honneur de ſuperintendant des feſtes publiques, de gouuerneur de la Bœoce, & de preſident en l'aſſemblee des Eſtats des Amphiſtyons, & puis apres qu'on le veiſt ſ'amuſer à faire meſurer de la farine, du marc de raiſin, ou bien à peſer des toiſons de laine, ne ſeroit-ce pas proprement cela qu'on dit en commun prouerbe, La vieilleſſe d'un cheual, ſans que perſonne l'y contraigne? Mais encore de ſe meſſer d'aucune manufacture mechanique, ny d'aucune traffique de marchandiſe, apres auoir eu office de gouuernement en la choſe publique, ce ſeroit autant comme deſpouiller vne Dame honneſte & de bonne maiſon de ſes beaux veſtemens, & luy bailler quelque haillons

Il se dit de
ceux qui aias
passé leurs
premiers ans
en honneur,
ez derniers
sont mespris-
sez.

C pour couvrir sa vergongne, la faisant tenir en vn cabaret : car toute la dignité, toute la grandeur & honnesteté de la vertu politique se pert quand on la raualle iusques à des mesnageries, espargnes, & traffiques si basses & priuees. Mais si (qui est le seul poinct qui reste) ils appellent viure doucement, & iouyr de ses biens, que se laisser aller aux delices & aux voluptez, & qu'ils conuient l'homme politique à se laisser aneantir peu à peu, en vieillissant en icelles, ie ne sçay auquel des deux tableaux & exemples, tous deux villains & deshonestes, ceste sienne vie seroit plus tost comparable, ou à des mariniers qui voudroient tout le reste de leur vie solenniser la feste de Venus, n'estant pas encore leur nauire dedans le port, ains l'ayant laissée cinglant en haute mer : ou bien à Hercules, que d'aucuns peintres en se iouant, mais mal & irreueremment pourtant, peignent, comme fil estoit au palais royal de la royne de Lydie, Omphale, vestu d'une cotte de damoiselle, se laissant souffleter & tresser aux filles & femmes de la Royne : ainsi nous despouillans l'homme d'estat de sa peau de lion, c'est à dire, de son courage magnanime, de vouloir tousiours profiter au public, & le mettans bien à son aise à table, le traiterons magnifiquement, & luy remplirons les aureilles du son des flustes & autres instruments de musique : n'ayants pas au moins honte de l'honneste reprimende que donna iadis Pompeius le grand à Lucullus, lequel apres ses guerres & conduirtes d'armees s'estoit adonné à baings, estuues, festins, à entretenir femmes, & faire l'amour sur iour, & plusieurs autres telles dissolutions & superfluitez, à bastir de somptueux edifices, reprochant cependant à Pompeius, qu'il estoit ambitieux & conuoiteux de dominer, oultre ce que son aage ne le comportoit : Car Pompeius luy respondit, Ie croy qu'il est plus hors d'aage à vn homme » vicil d'estre dissolu & superflu en delices, que non pas de vouloir commander. Et » comme estant vn iour tombé malade, le medecin luy eust ordonné de manger d'une

Si l'homme d'aage se doit encore entremettre

grue, n'en estant pas la saison, on n'en pouuoit recouurer pour argent, quelque vn dit E
qu'il y en auoit bon nombre chez Lucullus que l'on y nourrissoit toute l'annee : il n'y
» voulut pas enuoyer, ny en prendre, disant, Si Lucullus n'eust esté friad & delicat, Pom-
» peius doncques n'eust pas sceu viure. Car encore que la nature requiere & recherche
en toute sorte de s'esgayer & de se delecter & resiouyr, si est-ce que le corps des vieilles
personnes ne peut plus prendre fruition des voluptez, excepté biē peu des necessaires.
Et n'est pas Venus seule courroucée aux vieillards, ainsi que dit Euripide, mais encore
ont-ils les cupiditez du boire & du manger fort mousses, &, par maniere de dire, eden-
tees, de sorte qu'ils ne font que toucher vn petit par le dessus, sans penetrer ny enfon-
drer au dedans. Et pourtant faut-il qu'ils se preparent des plaisirs & voluptez, non bas-
ses ne lasches en l'ame, comme disoit Simonides à ceux qui luy reprochoient l'auarice,
qu'estant priué de toutes autres voluptez corporelles à cause de sa vieillesse, il y en
auoit encore vne qui l'entretenoit, c'estoit la volupté qu'il prenoit à gagner : mais la
vie politique de ceux qui se meslent d'affaires a de tresgrandes & treshonnestes volu- F
ptez, desquelles seules ou principales il est vraysemblable que les Dieux mesmes se
delectent : ce sont celles qui procedent de la beneficence de faire bien à beaucoup de
gens, & de la gloire des grandes & honnestes actions. Car si le peintre Nicias se plaisoit
si fort en ses ouurages, & y estoit si affectonné, que bien souuent il demandoit à ses
seruiteurs si l'estoit lauē, & si l'auoit disné : & Archimedes estoit si fort attaché à son
tableau, sur lequel il traçoit ses figures Geometriques, que ses seruiteurs l'en retiroient
& ostoient par force, & l'huiloient : & encore ce pendant qu'on l'huiloit il traçoit de
nouuelles figures sur son corps : & Canus le iouēur de flustes que tu as bien cogneu, di-
soit, que les hommes n'entendoient pas qu'il se donnoit à luy mesme plus de plaisir de
son ieu, qu'il ne faisoit à ceux qui l'escoutoient, & qu'ils voudroient plus tost auoir que
bailler salaire pour le venir ouyr : ne voulons nous pas imaginer en nous mesmes com-
bien les vertus apportent de grandes voluptez, de belles & loüables actions, qui cedent
au bien public, & tournent au profit de tout vn peuple : non qu'elles grattent ne qu'el- G
les flatent, comme font ces doux & gracieux mouuements de la chair, car celles
là apportent vne demangeaison impatiente, & vn chatouillement inconstant &
meslé d'une inflammation fiéreuse : mais celles qui procedent des beaux & loüa-
bles faiēts, comme sont ceux dont est ordinaire ouurier celuy qui se mesle du gou-
uernement de la chose publique droittement, ainsi qu'il appartient, eleuent l'ame
en vne grandeur & hauteſſe de courage, accompagnée de ioye, non avec les ailes d'or
d'Euripide, mais avec les ailes celestes que dit Platon. Et qu'il soit vray, ramene toy
en memoire ce que tu as souuentesfois entendu d'Epaminondas, qu'estant vn iour
enquis, quelle plus grande aise il auoit iamais sentie en toute sa vie : Il respondit,
que c'estoit d'auoir gaigné la bataille de Leuctres, son pere & sa mere estans encore
viuans. Et Sylla comme il arriua la premiere fois à Rome, apres auoir nettoyé l'Italie
des guerres ciuiles, il ne dormit point vn seul moment de toute la nuit, tant son H
ame estoit rauie d'aise & de ioye, comme d'un grand & violent vent, ainsi que luy
mesme l'escrit en ses Commentaires : car ie veux bien cōceder à Xenophon ce qu'il dit,
qu'il n'y a audition qui tant resiouisse l'ouye de l'homme, que d'ouyr reciter ses loüan-
ges : mais aussi fault-il que l'on me confesse, qu'il n'y a ny spectacle, ny rememoration,
ny pensément au monde qui tant apporte de plaisir & de contentement à l'ame, com-
me fait la contemplation des belles & loüables choses que lon a faiētes pendant que
lon a esté en administration d'offices & de charges, comme en lieux veuz & publi-
ques. Il est bien vray que le gré & la grace amiable que lon en acquiert, accom-
pagnant tousiours les actes vertueux & la loüange du peuple, faisant à l'enuy à qui
en dira plus de bien, guide qui l'achemine à vne iuste beneuolence, adioustée com-
me vn lustre & vne polissure resplendissante à la ioye de la vertu, & ne fault pas par
negligence

- A negligence laisser comme fener & secher en vieillesse la gloire de ses faicts, ne plus ne moins qu'une couronne que lon auroit acquise & gaignee aux ieux sacrez, ains fault en produisant tousiours quelque nouveau & recent merite, resueiller la grace des precedents, & la rendre de tant plus grande & plus asseuree. Car ainsi comme les charpentiers & ouuriers qui auoient charge d'entretenir entier le galion Deliaque, mettans tousiours des pieces de bois neufues, & les clouans au lieu de celles qui estoient gastees, l'ont conserue sain & entier depuis le temps qu'il fut premierement fabriqué: ainsi fault-il faire de la reputation, & n'est pas malaisé d'entretenir vne gloire, non plus que vne flamme, en y mettant tousiours dessous de petits soutènements, mais depuis qu'elles sont vne fois du tout esteintes & refroidies, alors ce n'est pas peu d'affaire, que de les rallumer & l'une & l'autre. Et comme Lampis ce riche marchand, enquis comment il auoit gaigné ses biens, respondit: Les grands, bien tost & facilement: & les petits, à grand' peine & en long temps: aussi n'est il pas bien aisé au commencement d'acquérir la reputation, le credit & l'autorité ciuile au maniement des affaires, mais l'augmenter depuis que le fondement en est posé, & la conseruer & entretenir grande avec peu de moien, il n'est pas malaisé. Ne plus ne moins que vn amy, depuis qu'il est vne fois acquis ne requiert pas plusieurs & grands plaisirs & offices d'amitié pour demourer amy, ains par petits signes la continuation conserue tousiours la beneuolence, aussi l'amitié d'un peuple, & la foy & creance qu'il a vne fois prise d'un personnage, encore qu'il ne puisse pas tousiours exercer ses largesses enuers luy, ne defendre sa cause, ny tenir un magistrat, s'entretient neantmoins quand le personnage se montre seulement auoir bonne volonté, & qu'il ne se lasse point de prendre peine & sollicitude pour le bien public: car les expeditions mesmes de guerre n'ont pas tousiours des batailles reengees, ny des combats & escarmouches ordinaires, ny des sieges de villes, ains ont quelquefois aussi parmy des sacrifices, des festins en compagnie, & beaucoup de loysir à vacquer à ieux & passe-temps. A plus forte raison doncques,
- C pourquoy doit on craindre s'entremettre du gouuernement de la chose publique, comme si c'estoit vne charge insupportable, pleine de trauaux innumerables sans aucune consolation, veu qu'il y a parmy des ieux, des theatres, des processions, des monstres, des donnees & largesses publiques, des danses, de la musique, des festes, & tousiours l'honneur de quelque Dieu, qui resoult & dissipe tout le soucy & toute l'austerité d'un palais, & d'un Senat & conseil, rendant beaucoup plus de plaisir & de contentement, que lon n'y reçoit de trauail, & de desplaisir: pour le moins, le mal qui est le plus à craindre, & le plus fascheux en telles administrations, c'est à sçauoir l'enuie, s'attache beaucoup moins à la vieillesse qu'à nul autre aage: Car, comme souloit dire Heraclitus, les chiens mesmes abbayent ceux qu'ils ne cōnoissent point, aussi l'enuie combat à l'encontre de celui qui commence à venir au gouuernement, à l'entree de la tribune & du siege presidial, & tasche de luy en empescher le passage: mais
- D depuis qu'elle a accoustumé la gloire d'un homme, & qu'elle a esté nourrie avec elle, elle la porte doucement, & ne s'en fasche ny ne s'en tourmente plus. C'est pourquoy quelques vns comparent l'enuie à la fumee, car elle sort grosse & espesse du commencement que le feu commence à prendre, mais apres qu'il est tout allumé & clair, elle s'en va. Et en toutes autres precedences les hommes coustumierement en debattent & querellent, comme de vertu, de noblesse, de diligence, aians opinion qu'ils s'en ostent autant à eux-mesmes comme ils en cedent aux autres: mais la precedence du temps qui proprement s'appelle Presbion, comme qui diroit l'honneur de vieillesse, il n'y a personne qui en soit ialoux, & qui ne le cede volontiers à son compagnon. Et n'y a forte d'honneur à qui conuienne mieulx ceste qualité, qui honnore plus celui qui le defere, que celui à qui il est deféré, que fait l'honneur qu'on donne aux vieilles gens. D'auantage tous n'esperent pas d'auoir quelquefois le credit

Si l'homme d'aage se doit encore entremettre

des richesses, ou la force de l'eloquence, ou de sapience : là où il n'y a pas vn de ceux E
qui se meslent des affaires publiques, qui desespere de paruenir vn iour à celle gloire
& reuerence, à laquelle la vieillesse conduit l'homme. Parquoy celuy qui apres auoir
combattu longuement à l'encontre de l'enuie, se retireroit à la fin de l'administration
publique, quand elle seroit appaisée, & presque toute amortie & esteinte, feroit ne
plus ne moins que vn pilote, qui en tourmente aiant vent & marée contraire, auroit
cinglé & nauigué en grand danger, & puis quand le beau temps & le doux vent se-
roit venu, chercheroit à se mettre à l'abry & à l'ancre, abandonnant avec les actions
publiques, les compagnies, alliances, & intelligences qu'il auoit avec ses amis : car
plus il y a esté de temps, & plus il y doit auoir fait d'amis & de compagnons, lesquels
il ne peult pas tous emmener quand & luy, comme fait vn maistre de carolle tous ses
baladins, ny n'est pas aussi raisonnable qu'il les abandonne : ains comme il n'est pas
aisé d'arracher vn arbre vieil & ancien, aussi n'est-il pas vne vie ciuile en administra-
tion publique, laquelle doit auoir fait plusieurs grandes racines, & s'estre entrelassee F
en plusieurs grands affaires, lesquels donnent plus de troubles & de haraslements à
ceux qui s'en retirent, qu'à ceux qui y demeurent : & là où il seroit bien encore de-
mouuré quelque reste d'enuie ou d'émulation des combats precedents en l'admini-
stration ciuile, il est bien meilleur de l'esteindre par puissance, que non pas donner le
dos, en t'en allant tout nud & tout desarmé : car les enuieux & malueuillans n'affaillent
pas tant par enuie ceux qui leur font teste, & qui tiennent bon, comme ils font par
mespris ceux qui se retirent : à quoy s'accorde ce que dit iadis le grand Epaminondas
aux Thebains : car comme les Arcadiens les conuiassent d'entrer dedans leurs villes,
durant l'hyuer, & se loger à couuert, il ne leur voulut pas permettre : car maintenant,
dit-il, qu'ils vous voyent exercer & luiéter tous armez, il vous ont en grande admi-
ration, comme vaillants hommes : mais s'ils vous voyoient au long du feu pilans des
febues, ils vous reputeroient semblables à eulx : aussi veux-je inferer, que c'est vne G
chose venerable que de voir vn vieillard parlant en public, despeschant affaires, ho-
noré d'un chascun : mais celuy qui ne bouge tout le iour d'un liét, ou bien d'un coing
de galerie à cacqueter, ou à cracher & moucher, celuy-là est facile à estre mesprisé.
Homere mesme le nous enseigne, à qui bien considere ce qu'il escrit : car le vieillard
Nestor estant à la guerre deuant Troye, estoit en honneur & reputation, & au con-
traire Peleus & Laërtes qui demourerent à la maison, furent reiettez & mesprisez.
Car l'habitude de prudence ne demeure pas semblable ny pareille en ceux qui se las-
chent, ains par nonchalance & oyisfucté se diminue, & se dissout petit à petit, ayant
toufiours besoing de quelque exercitation de soing qui luy resueille l'esprit, aguise
& esclarcisse son discours de raison à demesler affaires :

Comme le fer est clair & reluisant

Tant que la main de l'homme en va vsant :

Et la maison, où ne se tient personne,

Avec le temps du toict en terre donne.

H

Et n'est pas la foiblesse & imbecillité du corps vn si grand mal pour le gouuernement
de ceux qui hors d'aage montent en la tribune aux harengues, au siege presidial ou
au palais des capitaines, comme est le bien que la vieillesse leur apporte, à sçauoir la
circonspection retenue & la prudence, & le non s'estre ietté à l'estourdie au manie-
ment des affaires, abusé en partie de faulte d'experience, & en partie de vaine gloire
tout ensemble, & puis y tirer la commune, comme vne mer troublee & agitée des
vents, ains traitter & negocier doucement avec ceux qui ont affaire à eux. Voyla
pourquoy les villes, quand elles ont receu quelque mauuaise secousse, ou bien qu'el-
les la craignent, alors elles demandent estre regies & gouuernees par hommes vieux
& experimentez, tellement que bien souuent elles ont tiré par force de la maison
des

A des champs vn bon vieillard, qui ne pensoit ny ne demandoit rien moins, & l'ont contrainct de mettre la main au timon pour remettre les affaires en seureté, reiettant ce pendant arriere des beaux harengueurs qui scauoient crier bien hault, & prononcer de longues clauses tout d'vne halence sans respirer, voire & des capitaines qui eussent à la verité bien peu aller vaillamment affronter & combattre les ennemis. Comme vn iour à Athenes les Orateurs despouillans deuant Timotheus & Iphicrates qui estoient desia vieux, vn nommé Chares fils de Theochares estant en fleur d'aage, & fort & robuste de sa personne, disoient, qu'ils desireroient que celuy qui auoit à
 » estre Capitaine general des Atheniens, fust tel & d'aage & de corpulence: Non pas,
 » dit Timotheus, Dieu nous en gard: mais ouy bien son vallet qui auroit à porter son
 » matelas apres luy: & quant au Capitaine general, qu'il falloit que ce fust vn person-
 » nage, qui sceust regarder & deuant & derriere les affaires, & qui ne se laissast em-
 » porter, ny troubler les conseils & resolutions qu'il auroit prises pour le bien public
 B par aucune passion. Car Sophocles, estant ia deuenu vieil, disoit, qu'il estoit bien
 » aise d'estre eschappé de l'amour, comme de la subiection d'un maistre furieux &
 » enragé. Mais en l'administration de la Chose publique, il ne fault pas seulement fuir
 vne sorte de maistres, comme l'amour de femmes ou de filles, ains plusieurs autres
 qui sont encore plus forcenez, comme l'opiniastreté, la conuoitise de vaine gloire,
 la cupidité de vouloir estre tousiours & par tout le premier & le plus grand, vice qui
 engendre beaucoup d'enuies, de ialousies, & de conspirations, desquels maistres la
 vieillesse en esmousse & relasche les vns, & en refroidit & esteinct de toutes autres,
 ne diminuant pas tant de l'inclination & affection de bien faire, comme elle remou-
 che des passions trop impetueuses & trop ardentes, à fin de pouoir appliquer le dis-
 cours de la raison sobre, reposé & rassis, au pensement & sollicitude des affaires.
 Toutefois, soit à la verité, & au iugement encore des lecteurs, allegué ce propos
 de Sophocles,

C Demeure quoy miserable en ton liét:

pour dissuader & distraire celuy qui voudroit, avec la barbe grise & les cheveux che-
 nus, commencer encore à fescgaillardir, & pour picquer & reprendre vn vieillard,
 qui d'un long repos en sa maison, dont il ne seroit iamais bougé, ne plus ne moins
 que d'une longue maladie, se voudroit leuer pour s'en aller tout de primfault prendre
 vn office de capitaine, ou vne charge de gouuerneur de ville. Mais celuy qui vou-
 droit distraire vn qui auroit vsé toute sa vie, & seroit rompu aux administrations po-
 litiques & maniement d'affaires, ne luy voulant pas permettre de tirer oultre iusques
 au bout de la vie, & iusques à se saisir du flambeau de victoire, ains le rappelleroit
 d'une longue course, pour luy faire prendre vn autre chemin: celuy-là, dis-ie, seroit
 totalement desraisonnable, & ne ressembleroit son discours de rien au precedant: car
 ainsi comme celuy, qui pour diuertir vn vieillard ia couronné de chapeau de fleurs,

D & parfumé pour s'aller marier, luy diroit & alleguerait ce qui en vne tragedie est dit
 à Philoctetes,

Qui est la femme, & qui est la pucelle,

Qui pour mary te voulust aupres d'elle?

Vrayement tu es, malheureux, bien de l'aage,

Pour maintenant entrer en mariage:

il ne seroit pas hors de propos ny impertinent, car les vieillards mesmes par ieux di-
 sent beaucoup de telles railleries d'eux-mesmes,

Autant viellard, à la barbe fleurie,

Pour ses voisins que pour luy se marie.

Mais qui voudroit persuader à vn mary de laisser sa femme, avec laquelle il auroit
 vescu en mariage, & habité longuement sans plainte ny reproche, pour ce que luy

Si l'homme d'aage se doit encore entremettre

feroit deuenü vieil avec elle, & luy conseileroit de viure à part, ou bien de prendre E
quelque garce au lieu de sa legitime femme, il me semble que celuy là seroit vn sot en
toute perfection: aussi y auroit-il bien quelque raison d'admonester vn vieillard qui
sur le bord de sa fosse commenceroit à se vouloir approcher du peuple, ou vn Chli-
don qui auroit esté laboureur toute sa vie, ou vn Lápon, qui n'auroit fait autre chose
qu'exercer marchandise, ou quelqu'un des Philosophes du verger d'Epicurus, qui
veulent viure sans rien faire, & luy conseiller de demourer en son accoustumé exer-
cice, loing de tous affaires publiques: mais qui prendroit vn Phocion, ou vn Caton,
ou vn Pericles par la main, & luy diroit, Amy estranger, Athenien ou Romain, qui
que tu sois estant ia arriué à ta seche vieillesse, fais diuorce & quitte d'ores en auant
toute administration publique, toutes occupations, & tous soucis, tant du conseil que
de la guerre & de l'estat de Capitaine, & te retire habilement en ta maison des champs,
pour y viure le reste de tes iours, avec ta chambriere l'agriculture, ou ton vallet, mef-
nage, & avec des comptes que tu examineras de tes recepueurs, il luy suaderoit cho- F
ses iniques, & exigeroit d'un homme d'Estat choses indignes de luy. Comment, me
dira quelqu'un, n'oyons-nous pas en vne comedie vn vieil soldat qui dit,

Les cheveux blancs m'excusent de m'aller

Deformais faire à la guerre enroller.

Il est bien vray, respondray-ie, mon amy: car il est requis que les seruiteurs de Mars
soient en la fleur & la vigueur de leur aage, comme ceux qui font profession des labo-
rieux ouurages de Mars, esquels encore que la salade cache les cheveux chenus, tou-
tesfois au dedás les membres sont aggraez des ans passez, & la force default à la bon-
ne volonté: mais aux ministres de Iupiter conseiller, harengueur, & conseruateur des
villes, nous ne demandons point l'œuvre des pieds ny des mains, mais de conseil, de
prudence, & d'eloquence, & encore non pas de celle qui soit pour exciter vn bruit, ny
vn cry de ioye parmy le peuple, mais qui soit pleine de sens, meur de conseil, soigneu-
sement propensé & seurement digeré, en laquelle apparoiſſent la barbe blanche dont G
lon se moque, & les rides du front tesmoins de longue experience, qui luy adiou-
stent reputation seruant beaucoup à persuader & à tourner les cœurs des auditeurs à
sa volonté: Car la ieunesse est faite pour suiure & obeir, & la vieillesse pour guider &
commander: & est ce qui maintiét & conserue les villes & estats en leur entier, quand
les conseils des vieux, & les prouesses des ieunes y ont les premiers lieux. C'est pour-
quoy on louë grandement ces vers d'Homere,

Ilad. liu. 17.

En premier lieu ioignant la haulte naue

Du bon Nestor, il assembla le graue

Conseil des vieux capitaines vaillants.

Pour la mesme raison aussi l'oracle d'Apollo Pythique appelle le conseil qui fut ad-
joinct aux Roys en l'institution du gouuernement de Lacedemone, les Anciens:
& Lycurgus mesme tout ouuertement les appella, les vieillards: & iusques aujour- H
d'huy le conseil de Rome s'appelle le Senat, comme qui diroit, l'assemblée des vieil-
lards. Et comme la coustume & la loy donne aux Princes le diadème, c'est à dire, le
bandeau ou frontal, & la couronne sur la teste, pour la marque honorable de dignité
& autorité Royale: aussi fait la nature, les cheveux & la barbe blanche, pour marque
du droit de presider & de commander. Et pense quant à moy, que ce mot *γέρας*, qui si-
gnifie pris d'honneur, & *γεραίον*, qui vaut autant comme remunerer d'honneur, ont
esté ainsi vsitez, à cause de l'honneur, qui est proprement deu aux vieilles gens, non
pour-ce qu'ils se lauent d'eau chaude, ne pour-ce qu'ils couchent mollement: mais
pour-ce qu'és villes bien ordonnees ils tiennent le rang des Roys à cause de leur pru-
dence, de laquelle la nature ne nous laisse voir le propre & parfaict bien, comme d'un
arbre dont le fruiet n'est meur iusques en l'arriere saison, sinon à peine en la vieillesse.

Et pour-

A Et pourtant n'y eut il pas vn des martiaux & plus fiers capitaines Acheïens, qui reprist le grand Roy des Roys Agamemnon, d'auoir fait vne telle priere aux Dieux,
Que pleust aux Dieux que de toute la Grece
Dix conseillers i'eusse egaux en sagesse
Au vieil Nestor.

Iliad. liu. 3.

ains confessoient tous par leur silence, que non seulement en police & gouuernement, mais encore en la guerre, la vieillesse estoit de tresgrande efficace: car comme tesmoigne l'ancien prouerbe,

Vn bon conseil vault mieux que plusieurs mains:

& vne sentence fondee en raison, & prononcee avec grace persuasue, vient à bout de toutes les plus grandes & plus belles actions publiques: & fil y a quelque peine, il ne s'en fault pas rebuter pour cela. Car la royauté, qui est la plus grande & plus parfaite espee de gouuernement qui soit au monde, a de tresgrands soucis, tra-

B uaux & rompements de teste, & en grande quantité: tellement que lon escrit que „ Seleucus disoit souuent, Si les hommes sçauoient combien il est laborieux seule- „ ment de receuoir & escrire tant de lettres, comme il en fault receuoir & escrire aux „ Rois, ils ne daigneroient pas seulement amasser vn diademe, quand ils le trouue- „ roient en leur chemin. Et Philippus estant prest de se camper en vn beau lieu, comme „ il fut aduertty que là n'y auoit point de fourrage pour les bestes: ô Hercules, dit-il, quel- „ le doncques est nostre vie, puis qu'il nous la fault accommoder iusques à auoir soing „ des asnes! Il faudra doncques maintenant persuader à vn Roy, quand il sera deuenü „ vieil, qu'il quitte le diademe, & qu'il pose la robe de pourpre, & se vestant d'un „ simple habillement, & prenant vne baguette tortue en sa main, qu'il s'en aille de- „ mourer aux champs, de peur qu'il ne semble estre trop curieux hors d'age & de sai- „ son, de vouloir regner avec des cheveux blancs: & si cela feroit impertinent & indi- „ gne d'estre dit à vn Agesilaus; à vn Numa, & à vn Darius, Roys: pourquoy tirerons

C nous non plus vn Solon hors du conseil d'Areopage, ny vn Caton hors du Senat, „ à cause de sa vieillesse? Ne conseillons doncques point aussi à vn Pericles d'aban- „ donner le gouuernement populaire: car autrement encore n'y auroit il point de pro- „ pos, qu'ayant monté en ses ieunes ans dedans la chaire & tribune aux harengues, „ apres auoir de là versé en public sur le peuple toutes les furieuses ambitions & emo- „ tions impetueuses de la ieunesse, quand l'age meur, qui a accoustumé d'apporter „ le bon sens, & la prudence par experience, est arriuee, quitter & repudier, com- „ me vne femme legitime, le gouuernement, apres en auoir abusé longuement. Le „ regnard d'Æsope ne vouloit pas que le herisson luy chassast ses mousches, ne luy „ ostast ses tiques qui le mangeoient: Car si tu ostes, dit-il, ceux qui sont desia saouls, „ il en viendra d'autres qui seront affamez. Ainsi qui chasseroit tousiours de l'admini- „ stration publique les vieillards, il seroit force qu'elle se remplist de ieunes gens qui „ D auroient vne soif tresardente de gloire & d'autorité, & point de sens politique: car „ d'où l'auroient-ils, fils n'ont esté ny disciples ny spectateurs d'aucun vieillard ma- „ niant les affaires? Les Cartes qui monstrent l'artifice de nauiguer & de gouuerner les „ vaisseaux en mer, ne peuuent rendre vn marinier bon pilote, fil n'a souuent esté en „ la poupe luy-mesme, combattant à l'encontre des vagues, des vents, & de la tene- „ breuse tourmente,

Lors que le marinier tremblant

Desire voir estincellant

Le feu des iumeaux Tyndarides.

Et comment doncques pourra vn ieune homme bien gouuerner vne cité, donner bon conseil à vn peuple, & dire vne bonne sentence en vn Senat, pour auoir leu vn liure traitant du gouuernement politique, ou en auoir escrit vne declamation en

Si l'homme d'aage se doit encore entremettre

l'eschole de Lyceum, si par auoir souuent tenu luy mesme les resnes en la main, & manie le timon plusieurs fois au parauant, en oyant estriuer les Orateurs & les Capitaines les vns contre les autres, & inclinant selon les experiences & les accidents, tantost en vne part, & tantost en l'autre, en dangers & grands affaires, il n'en a de longue main acquis la suffisance? Il n'y auroit point de propos de le dire. Mais quand il n'y auroit autre esgard, à tout le moins faudroit-il que le vieillard se meslast des affaires pour instruire & enseigner les ieunes: car ainsi comme ceux qui enseignent aux enfans les lettres ou la musique, eulx-mesmes entonnent premierement les chants, & lisent les lettres, pour leur monstrier comment il faut faire: aussi l'homme d'aage politique adresse & enseigne le ieune, non seulement en parlant, protecollant, & aduertissant de dehors, mais aussi en maniant mesme & administrant les affaires, & le formant & moulant visuellement, non seulement de paroles & de preceptes, mais aussi d'exemples & d'œuvres: car celuy qui est nourry & exercié en ceste maniere, non point aux escholes des Sophistes bien difans, comme en des salles de luitte, où l'on oinct les corps d'une composition d'huyle & de cire ensemble, sans aucun danger, mais bien aux vrayes ieux publiques, Olympiques ou Pythiques, en la veüe de tout le monde: celuy-là, dis-je, suit la trace de son maistre,

Comme vn poulain suit la iument qu'il tette, ce dit Simonides. Ainsi fut Aristides sous Clisthenes, & Cimon sous Aristides, Phocion sous Chabrias, & Caton sous Fabius Maximus, Pompeius sous Sylla, & Polybius sous Philopœmen: car tous ces personnages estans ieunes se sont approchez des autres vieux, & ayans pris racine, par maniere de dire, au pres d'eulx, sont creus & montez quand & eulx en leurs actions & administrations, dont ils ont acquis experience & accoustumance à se mesler d'affaires avec honneur & reputation. Voyla pourquoy Æschines le Philosophe Academique, comme quelques Sophistes enuieux de son temps luy imposassent qu'il se vantoit d'auoir esté disciple & auditeur de Carneades, mais qu'il ne l'auoit iamais esté: le vous dis, respondit il, que ie l'ouïs alors que son parler abandonnant le bruit & le tumulte du peuple, à cause de sa vieillesse, se reserra à profiter en priuee communication: aussi au gouvernement d'un homme d'aage, non seulement la parole, mais encore les faictz estans esloignez de toute pompe affectee, & de toute vaine gloire: ne plus ne moins que lon dit que la cicoigne noire Ibis, quand elle est deuenue vieille a exhalé tout ce qu'elle auoit de forte & puante haleine, & commence à l'auoir douce & aromatique: aussi n'y a il plus rien de leger ny d'esuenté és conseils & opinions d'un homme vicil, ains y est tout graue, constant & reposé: & pourtant faut-il en toute maniere, quand ce ne seroit que pour le regard des ieunes gens, que les vieux se meslent des affaires de la Chose publique, à fin que, comme Platon dit parlant du vin que lon melle avec de l'eau, que c'est faire sage un Dieu furieux, en le chastiant par un autre sobre, la prudence retenue de la vieillesse meslee avec la ieunesse bouillante deuant un peuple, & transportee de conuoitise d'honneur & d'ambition, luy oste & retrenche ce qu'il y a de trop furieux, trop vehement & trop impetueux. Mais outre toutes ces raisons là, ceux qui pensent que verser au maniement des affaires publiques soit autant commenuiger pour son traffique, ou aller en quelque voyage de guerre, s'abusent grandement: car le nauiger, & le guerroyer se font à certaine fin, & cessent aussi tost que lon a atteint la fin où lon pretend, mais le verser aux affaires n'est point une commission ou office qui ait l'utilité pour son but & pour sa fin, ains est une vie d'animal doux, paisible & compagnable, né pour viure tant qu'il plaist à la nature ciuilement, honnestement, & au bien public de la société humaine. Et pour ceste cause faut-il que l'homme verse tousiours aux affaires, & non pas y ait versé, comme il faut qu'il soit veritable, & qu'il soit iuste, non pas qu'il l'ait esté, & qu'il

A & qu'il aime son pays, & ses citoyens, non pas qu'il les ait aimez : car la nature mesme nous guide à cela, & nous chante ceste leçon là, ie dis à ceux qui ne sont pas du tout corrompus de lascheté & de paresse :

Ton pere t'a en ce monde fait naistre
Pour grandement vtile aux hommes estre.
Ne nous lassons iamais de faire bien
Au genre humain.

Et cest autre,

B Au demourant quant à ceux qui alleguent pour excuse la foiblesse & l'impuissance, ceux là accusent la maladie & l'indisposition, non pas la vieillesse : car il y a beaucoup de ieunes hommes maladifs, & beaucoup de vieux gaillards : tellement qu'il ne faut pas donc diuertir les vieux de l'administration publique, mais les impuissants : ny aussi y appeller & conuier les ieunes, mais ceux qui en peuuent porter la peine : Car Arideus estoit bien ieune, & Antigonus vieil : mais cestuy cy ne laissa pas, tout
C vieil qu'il estoit, de conquerir toute l'Asie, & celuy là n'eut iamais que le nom de Roy seulement, comme s'il en eust ioué le rolle sur vn eschaffault, de mine, sans parler, estant tousiours vilipendé & mocqué par ceux qui estoient les plus forts. Comme doncques celuy qui voudroit suader à Prodicus le Sophiste ou à Phileras le poëte, qui estoient tous deux ieunes, mais gresles, & foibles, & maladifs, & la plus part du temps attachez au liêt pour leur maladie, qu'ils s'entremissent des affaires publiques, seroit vne beste sans iugement : aussi seroit celuy qui defendroit à tels vieillards comme estoient vn Phocion, vn Massinissa Africain, & vn Caton Romain, d'exercer office publique, ou de prendre charge de capitaine general : Car Phocion vn iour que les Atheniens importunément vouloient à toute force aller à la guerre, il commanda que ceux qui auroient iusques à soixante ans prissent les armes & le suiussent : de-
„ quoy eux se courrouçans, il leur respondit : Vous n'avez dequoy vous plaindre, car
„ moy qui ay quatre vingts ans passez seray avec vous, vostre capitaine. Et de Massi-
C nissa, Polybius escrit qu'il mourut en l'aage de quatre vingts & dix ans, & qu'il laissa mourant vn fils qui n'auoit que quatre ans, & que vn peu auant que mourir apres auoir defaict les Carthaginois en vne grosse bataille, le lendemain on le veit deuant sa tente mangeant du gros pain bis, & respondit à quelques vns qui s'esmeruilloient pourquoy il faisoit cela,

Comme le fer est clair & reluyfant
Tant que la main de l'homme en va vsant :
Et la maison où ne se tient personne,
Auec le temps du toict en terre donne,

ainsi que dit le poëte Sophocles : autant en est il de ce lustre, de celle splendeur & lumiere de l'ame, de laquelle nous discouons, nous entendons & rememorons. C'est pourquoy lon tient aussi, que les Roys és guerres & expeditions militaires de-
D uiennent bien meilleurs que quand ils demeurent oyseux en leurs maisons : tellement qu'on dit, que Attalus le frere d'Eumenes, enerué d'une longue paix & lasche paresse, se laissoit mener par le nez à l'un de ses fauorits Philopœmen, qui le menoit à l'engrais proprement, ne plus ne moins qu'une beste : de maniere que les Romains demandoient par mocquerie à chascun coup à ceux qui retournoient de l'Asie, si le Roy Attalus auoit bon credit enuers Philopœmen. Lon ne trouueroit pas facilement beaucoup de capitaines Romains plus suffisans en toute sorte de guerre, que fut Lucullus ce pendant que par l'action il maintenoit son bon sens en son entier : mais depuis qu'il se laissa vne fois aller à la vie oyseuse, & à demorer casanier en sa maison, sans se plus mesler d'affaires, il deuint tout hebeté & amorty, ne plus ne moins que les espouges par vn long calme : & puis il bailla sa vieillesse à paistre & à penser à vn sien affranchy nommé Callisthenes, par lequel on tient qu'il fut

Si l'homme d'aage se doit encore entremettre

Autres l'appellent Ateas.

enforcé d'un bruuage amatoire, & autres charmes, iusques à ce que son frere Marcus, chassant ce seruiteur, le voulut gouverner & conduire luy mesme le reste de sa vie, qui ne fut pas longue. Mais Darius le pere de Xerxes au contraire disoit, qu'aux temps perilleux & affaires dangereux il deuenoit de plus en plus sage. † Ateas vn Roy de Scythie disoit, luy sembler qu'il ne différoit de rien de son palefrenier quand il estoit oisif. Dionysius l'ancien enquis vn iour, si estoit iamais oisif, respondit: Dieu me garde que cela iamais m'aduienne: par ce que l'arc, comme dit le commun proverbe, pour estre trop tendu se gaste & se rompt: & l'ame, pour estre trop laschée. Car les musiciens mesmes si discontinuent trop longuement à ouïr des accords, & les geometres à prouuer des propositions, & les arithmeticiens à s'exercer aux comptes, ordinairement, avec les actions, ils viennent à diminuer aussi par l'aage les habitudes qu'ils auoient acquises en leurs arts, encore qu'elles ne soient pas actiues, ains speculatiues: mais l'habitude politique qui est vne prudence, vn sens rassis, vne iustice, & outre cela, vne experience qui sçait bien en toutes occurrences choisir & prendre le poinct de l'occasion, vne suffisance de pouuoir par bonnes paroles persuader ce qu'il faut: ceste habitude & science là, dis-je, ne se peut entretenir qu'en parlant souuent en public, en faisant affaires, en discourant, & en iugeant: & seroit bien estrange, si en quittant tous ces beaux exercices là, elle laissoit escouler de son ame tant de belles & de si grandes vertus: car il est vray semblable, qu'en ce faisant, l'humanité, la sociale courtoisie, & la gratitude, avec le temps, par desaccoustumance s'aneantissent & s'esuanouissent. Si doncques tu auois pour ton pere Tithonus, qui fust bien immortel, mais qui pour sa grande vieillesse eust besoing d'estre tousiours bien soigneusement pensé & traicté, voudrois tu bien fuir les moïens & te laisser de luy faire seruice, de l'entretenir, de le secourir, sous couleur de dire que tu luy aurois seruy bien longuement? Et nostre patrie, ou nostre matric, ainsi que les Candiots la nomment, qui est encore plus vieille, qui a sur nous de plus grands droicts & de plus estroictes obligations, que n'ont ny le pere ny la mere, bien qu'elle soit de longue duree, si n'est elle pas neantmoins sans vieillir, ny aiant en soy tout ce qu'il luy faut, ains a tousiours besoing d'un grand œil sur elle, de grand secours & de grande vigilance, elle tire à soy & retient l'homme d'honneur politique,

Homere
Iliad. 16.

En le tirant par la robbe derriere,

Et le gardant qu'il ne s'en aille arriere.

Tu sçais qu'il y a ia plusieurs Pythiades, c'est à dire, plusieurs termes de cinq annees, que s'exerce la presbtrise d'Apollo Pythien, toutefois ie croy que tu ne me voudrois pas dire: Plutarque, tu as assez sacrifié, tu as assez fait de processions, tu as assez mené de danfes: maintenant que tu es vieil & ancien, il est temps que tu quittes la couronne que tu as sur la teste, & que tu abandonnes l'oracle, à cause de ta vieillesse: aussi ne faut il pas que tu penses, qu'il te soit loisible maintenant, à cause de ton grand aage, abandonner le saint seruice de Iupiter, garde des villes & president aux assemblees de conseil de ville, toy qui es souverain presbtre & grand prophete des saintes ceremonies de la religion politique, en laquelle tu as de si longue main fait profession. Mais laissant à part, si tu me crois, tous ces arguments qui pourroient distraire & retirer l'homme vieil de l'administration publique, considerons & discourons vn petit sur cecy, que nous ne faisons entreprendre à la vieillesse aucun trauail qui luy soit trop grief ou indigne d'elle, attendu qu'au gouuernement vniuersel de la Chose publique, il y a beaucoup de parties bien seantes & conuenables à l'aage, auquel toy & moy de present sommes arriuez: car ainsi comme si le deuoir nous commandoit de continuer de chanter toute nostre vie, il ne faudroit pas qu'estans deuenus vieux nous suyissions les tons les plus aigus & les plus efforcez, attendu qu'il y a plusieurs diuerses tensions & differentes sortes de voix, que les musiciens appellent harmonies

- A harmonies : ains voudroit la raison que nous prinssions celui des tons qui seroit le plus facile à nostre aage, & plus sortable à noz mœurs : aussi puis que le parler & le manier affaires est aux hommes plus selon nature, toute leur vie, que non pas aux cygnes le chanter iusques à la fin, il ne nous faut pas abandonner l'action comme vne lyre qui seroit trop hautainement montee, mais il la faut vn peu relascher, en prenant les charges moins laborieuses, plus moderees, & mieux accordantes aux forces & mœurs des vieilles gens : car nous ne laissons pas les corps mesmes sans exercice & sans mouuement quelconque, pour ce que desormais nous ne pouuons plus manier ny la marre à labourer la terre, ny les plombees à sauter, ny lancer la barre, ou ietter la pierre au loing, ou escrimer avec l'espee & rondelle, comme nous auons fait autrefois, mais les vns s'exercitans à des branloires, ou à se promener en deuisant doucement, refueillent les esprits & soufflent pour allumer la chaleur naturelle : parquoy ne nous laissons pas refroidir ny glacer du tout par paresse, ny aussi par nous trop charger de tous offices, ny vouloir mettre la main à toute administration, ne contraignons pas la vieillesse conuaincue d'impuissance de venir iusques à ces paroles,

O droicte main combien tu aurois cher
Prendre la lance & en escarmoucher,
Mais la foiblesse empesche ceste enuie.

- car on ne trouue pas bon que celui mesme qui le peut faire, & qui est en la fleur de son aage, mette sur ses espaules tous les affaires de la Chose publique, sans en vouloir laisser aller rien qui soit aux autres, ainsi comme les Stoïques disent que fait Iupiter, se fourrant par tout & se meslant de tout par vne insatiable cupidité de gloire, ou par enuie qu'il porte à ceux qui en quelque sorte que ce soit veulent auoir leur part de l'honneur & de l'autorité en la Chose publique. Mais à vn homme vieil, encore que vous ostiez le decriement qu'il y a, ce seroit vne ambition fort penible & fort laborieuse de se vouloir trouuer à toute election & fortition d'office : & vne curiosité miserable d'espier l'heure de tout iugement & de toute assemblee de conseil : & vne conuoitise d'honneur insupportable, de raur toute occasion d'ambassade, & de porter la parolle en defension publique : car encore qu'on le peust faire avec la grace & bienveillance d'un chascun, si est il grief & outre la puissance de l'aage : mais il leur en aduient tout le contraire, car ils sont haïs des ieunes, pource qu'ils ne leur laissent eschapper aucune occasion ne moien de rien faire, ny de se pouller en auant : & enuers leurs egaux, ceste conuoitise de vouloir tenir le premier lieu par tout, & d'auoir l'autorité de toutes choses, n'est pas moins distance & haïe que l'auarice ou la dissolution en voluptez des autres vieillards. Parquoy ainsi comme lon dit, qu'Alexandre le grand ne voulant pas charger son cheual Bucephale, quand il fut vn peu vieil, montoit sur d'autres cheuaux deuant le combat, pour aller recueillir son armee en bataille, & apres qu'il l'auoit toute rangee en ordonnance de combattre, & qu'il auoit donné le mot, il remontoit sur luy, & tout aussi tost faisoit marcher droit contre les ennemis, & hazardoit la bataille : aussi l'homme politique, s'il a bon iugement, se regentera soy mesme quand il se sentira vieil, tenant les reines en la main, & s'abstiendra des charges qui ne seront point necessaires, & laissera manier aux ieunes gens la Chose publique en affaires de petite importance : mais en ceux de grand pois & de grande consequence, luy-mesme y mettra la main à bon esciant : au contraire de ce que font les champions des ieu de pris publiques, qui contregardent leurs corps sans toucher aucunement ny trauailler aux labeurs necessaires, pour les employer aux superflus & inutiles : mais nous au contraire, laissant passer les petites & legeres charges nous reseruerons aux serieuses & grandes : car à vn ieune homme, comme dit Homere, egalemeut tout luy aduient bien, tout le monde luy rit, tout le monde l'aime : s'il entreprend des petits affaires & beaucoup, on

Si l'homme d'aage se doit encore entremettre

dit qu'il est populaire & laborieux:fil en entreprend de grands & honorables, on l'appelle genereux & magnanime : & y a des occurrences, où la temerité mesme & l'opiniastreté ont grace & bienfiance en ceux qui sont frais & ieunes. Mais vn homme d'aage, qui en l'administration publique a bien le cœur de prendre des commissions basses & viles, comme seroit de bailler à ferme des peages, ou de faire curer vn port, ou d'accoustrer vne place publique, & outre d'aller en poste en des ambassades & voyages deuers des Seigneurs & des Princes, où il n'y a rien de necessaire ny de graue à traiter, ains seulement pour les aller saluër & leur faire la court: quant à moy, à te dire la verité, mon bon amy, ie treuve cela plus tost digne de compassion, que d'imitation: mais aux autres à l'aduenture semblera il fascheux, odieux & importun: car ce n'est pas l'aage auquel l'homme se doiue empescher d'offices, sinon de ceux où il y a dignité & grandeur, comme est celuy que tu exerces maintenant à Athenes, la presidence du Senat d'Arcopage: & certes aussi la dignité de conseiller en l'assemblee des estats generaux de toute la Grece, qui s'appellent Amphictyons, que ton pais t'a deferee pour toute ta vie, où il y a vn doux labour, & vn trauail fort aisé à supporter: encore ne faut il pas poursuiure tels honneurs, mais bien en les fuiant les exercer: ny comme les demandans, ains comme refusans les accepter, ny recevoir telles charges comme pour s'en honorer, ains plus tost comme se donnans soy-mesme pour honorer les charges. Car ce n'est pas honte, ainsi que disoit Tiberius Cesar, à homme qui a passé soixante ans, de tendre son poulx à taster au medecin, mais bien plus grande honte est-ce, de tendre sa main au peuple en le priant de donner sa voix & son suffrage à l'election d'offices: car cela est trop vil & trop bas. Comme au contraire il y a de la grandeur venerable, & de la dignité honorable, quand le peuple a esleu vn personnage, qu'il l'appelle & qu'il l'attent sur la place, de descendre alors & sortir de sa maison, en faisant honneur & caresse à l'assistance du peuple, embrasser & recevoir son present, digne veritablement d'une honorable vieillesse. Ainsi faut il semblablement que l'homme vieil vse de sa parole en assemblee de ville, ne sautant pas à tout propos sur la tribune aux harengues, ny ne contredisant pas ordinairement comme vn coc qui contrechante quand il en oit chanter d'autres, à tous ceux qui harengueront, ny ne debridant pas la reuerence que les ieunes gens ont enuers luy, en estriuant & s'attachant souuent de paroles à eux, & leur donnant luy mesme matiere de s'exerciter & accoustumer à luy desobeir, & à ne le vouloir plus ouïr, ains faut qu'il passe outre quelquefois, ne faisant pas semblant de rien voir, ny ouïr, leur permettant vn petit de brauer & de secouer le mors, sans s'y trouuer present, ny trop curieusement rechercher tout ce qui s'est ou fait ou dit, quand le danger n'y est pas grand, & qu'il n'est question ny du salut, ny de l'honneur & de la reputation du pais: car là il ne faut pas attendre qu'on l'appelle, ains y faut de soy-mesme aller courant outre la puissance de l'aage, en se faisant plus tost soustenir sous les bras, ou bien porter dedans vne chaire, ainsi comme on lit que fit anciennement le vieil Appius Claudius, lequel entédant que le Senat Romain, apres vne grosse bataille que le Roy Pyrrhus auoit gaignee sur eux, se laissoit aller à recevoir propos de paix, ne le peut supporter, combien qu'il eust perdu la veüe des deux yeux, ains se fit porter à trauers la place iusques dedans la salle du Senat, & entré qu'il y fut, se dressa sur ses pieds au milieu des Senateurs, en leur disant, que parauant il auoit eu regret d'estre priué des yeux, mais que lors il souhaitteroit mesme de ne rien ouïr, à fin qu'il n'entendist point les villains conseils qu'ils prenoient, & les lasches exploicts qu'ils faisoient: & apres, partie en les reprenant aigrement, partie en leur remonstrant & les excitant, il fit en sorte, qu'il leur persuada de remettre promptement la main aux armes pour combattre à l'encontre de Pyrrhus pour l'empire & seigneurie de l'Italie. Et selon, comme les flatteries de Pisistratus, dont il abusoit le peuple d'Athenes, fussent

A sent apertement descouvertes, ne pretendre à autre fin qu'à vsurper la tyrannie, & que personne n'osast entreprendre de luy faire teste, & de l'en empescher, luy seul tirât ses armes dehors, & les mettant en la ruë deuant la porte de sa maison, crioit à ses citoyens qu'ils luy voulussent aider: ce qu'entendant Pisistratus, enuoya deuers luy, demander sur quoy il fondoit son assurance de faire telles choses: Il respondit, sur la vieillesse. Les occurrences si necessaires & si belles, comme celles là, rallument & resuscitent les vieillards ia tous estaincts, prouueu qu'ils respirent encore: mais en autres moindres l'homme vieil fera sagement de s'excuser aucunesfois, & refuser les charges petites & basses, où il y a plus d'occupation pour ceux qui les font, que de necessité ny vtilité pour ceux qui les font faire. Et quelquefois attendant qu'on l'appelle, qu'on le desire, & qu'on l'enuoye querir iusques en sa maison; il en aura plus de foy & plus d'autorité enuers ses citoyens, quand il descendra à leur requeste. Et quand bien il sera present, il laissera dire la plus part aux ieunes gens, comme estant

B iuge d'une contention & emulation ciuile entre eux, prouueu qu'elle ne passe point vn certain moyen: car alors il les reprendra doucement, leur ostant, avec vne façon amiable, toutes opiniaftres contentions, toutes iniures & tous courroux. Et s'il est question de dire & recueillir les aduis & opinions, reconfortant celuy qui faudra, sans le vituperer ny blasmer, enseignant & louant hardiment celuy qui aura bien rencontré, & se laissant vaincre volontairement, en leur quittant le gaigner & surmonter souuentefois, à fin que le cœur leur croisse & qu'ils fassent, & suppleant à quelques vns, en les louant, ce qui sera defectueux en leur opinion: ainsi comme fait le bon vieillard Nestor en Homere,

Il n'y aura de tous les Grejois ame
Qui ton parler contredie ny blasme,
Certainement: mais cela n'est pas tout,
Car tu n'es pas allé iusques au bout:

Iliad, liu. 9.

C Aussi es tu ieune à voir ton visage,
Estre mon fils tu pourrois quant à l'age.

Mais encore sera ce plus ciuilement fait de ne les reprendre point ouuertement ny publiquement, avec vne aigre picqueure, qui abbat & raualle fort le cœur aux ieunes gens, mais plustost à part en priué, mesmement ceux que lon congnoistra bien nez pour le maniement des affaires, en les instruisant & les mettant amiablement sur les erres de quelques bons propos & quelques bonnes opinions & inuentions qu'ils pourroient mettre en auant, en les incitant tousiours à toutes entreprises honestes, en leur esleuant le courage, & leur rendant le peuple du commencement doux & maniable: comme ceux qui montrent aux ieunes gens à piquer les chevaux, leur en baillent vn qui soit facile aux monter: & si d'adventure quelqu'un estoit tombé à l'entree, ne le laissant pas desesperer ny perdre le courage, ains le releuant & reconfortant, comme iadis Aristides fit Cimon, & Mnesiphilus Themistocles, que le peuple du commencement ne pouuoit goulter, & qui auoient mauuais nom en la ville pour estre desbauchez & dissolus: & ces gens de bien là les releuerent & les encouragerent. Aussi dit on que Demosthenes à son entree fut rebuté par le peuple, dont il estoit desespéré, iusques à ce que l'un des anciens de la ville, qui auoit autrefois ouy Pericles haranguant au peuple, le prit, & luy dit qu'il ressembloit du tout en sa façon de faire & de dire à ce personnage là, & que pour ceste occasion il auoit grand tort de se desesperer & de perdre courage. Semblablement aussi Euripides tout de mesme reconforta Timotheus le musicien, qui à sa premiere arriuee fut sifflé par le peuple, comme violant & corrompant la Musique par la nouuelleté qu'il y introduisoit, luy disant qu'il ne se desourageast point pour cela, & qu'il ne passeroit pas gueres de temps, qu'il auroit tous les theatres à sa deuotion. Brief tout ainsi que le

Si l'homme d'aage se doit encore entremettre

dit qu'il est populaire & laborieux:fil en entreprennent de grands & honorables, on l'appelle genereux & magnanime : & y a des occurrences, où la temerité mesme & l'opiniastreté ont grace & bienfiance en ceux qui sont frais & ieunes. Mais vn homme d'aage, qui en l'administration publique a bien le cœur de prendre des commissions basses & viles, comme seroit de bailler à ferme des peages, ou de faire curer vn port, ou d'accoustrer vne place publique, & outre d'aller en poste en des ambassades & voiajes deuers des Seigneurs & des Princes, où il n'y a rien de necessaire ny de graue à traiter, ains seulement pour les aller saluer & leur faire la court: quant à moy, à te dire la verité, mon bon amy, ie treuve cela plus tost digne de compassion, que d'imitation: mais aux autres à l'adventure semblera il fascheux, odieux & importun: car ce n'est pas l'aage auquel l'homme se doiue empescher d'offices, sinon de ceux où il y a dignité & grandeur, comme est celuy que tu exerces maintenant à Athenes, la presidence du Senat d'Arcopage: & certes aussi la dignité de conseiller en l'assemblee des estats generaux de toute la Grece, qui s'appellent Amphictyons, que ton país t'a deferee pour toute ta vie, où il y a vn doux labour, & vn trauail fort aisé à supporter: encore ne faut il pas pourfuiure tels honneurs, mais bien en les fuiant les exercer: ny comme les demandans, ains comme refusans les accepter, ny recevoir telles charges comme pour s'en honorer, ains plus tost comme se donnans soy-mesme pour honorer les charges. Car ce n'est pas honte, ainsi que disoit Tiberius Cesar, à homme qui a passé soixante ans, de tendre son poulx à taster au medecin, mais bien plus grande honte est-ce, de tendre sa main au peuple en le priant de donner sa voix & son suffrage à l'election d'offices: car cela est trop vil & trop bas. Comme au contraire il y a de la grandeur venerable, & de la dignité honorable, quand le peuple a esleu vn personnage, qu'il l'appelle & qu'il l'attent sur la place, de descendre alors & sortir de sa maison, en faisant honneur & caresse à l'assistance du peuple, ambrasser & recevoir son present, digne veritablement d'une honorable vieillesse. Ainsi faut il semblablement que l'homme vieil vse de sa parole en assemblee de ville, ne sautant pas à tout propos sur la tribune aux harengues, ny ne contredisant pas ordinairement comme vn coc qui contrechante quand il en oit chanter d'autres, à tous ceux qui harengueront, ny ne debridant pas la reuerence que les ieunes gens ont enuers luy, en estriuant & s'attachant souuent de paroles à eux, & leur donnant luy mesme maniere de s'exerciter & accoustumer à luy desobeir, & à ne le vouloir plus ouir, ains faut qu'il passe outre quelquefois, ne faisant pas semblant de rien voir, ny ouir, leur permettant vn petit de brauer & de secouer le mors, sans s'y trouuer present, ny trop curieusement rechercher tout ce qui s'est ou fait ou dit, quand le danger n'y est pas grand, & qu'il n'est question ny du salut, ny de l'honneur & de la reputation du país: car là il ne faut pas attendre qu'on l'appelle, ains y faut de soy-mesme aller courant outre la puissance de l'aage, en se faisant plus tost soustenir sous les bras, ou bien porter dedans vne chaire, ainsi comme on lit que fit anciennement le vieil Appius Claudius, lequel entendant que le Senat Romain, apres vne grosse bataille que le Roy Pyrrhus auoit gaignee sur eux, se laissoit aller à recevoir propos de paix, ne le peut supporter, combien qu'il eust perdu la veüe des deux yeux, ains se fit porter à trauers la place iusques dedans la salle du Senat, & entré qu'il y fut, se dressa sur ses pieds au milieu des Senateurs, en leur disant, que parauant il auoit eu regret d'estre priué des yeux, mais que lors il souhaiteroit mesme de ne rien ouir, à fin qu'il n'entendist point les villains conseils qu'ils prenoient, & les lasches exploicts qu'ils faisoient: & apres, partie en les reprenant aigrement, partie en leur remonstrant & les excitant, il fit en sorte, qu'il leur persuada de remettre promptement la main aux armes pour combattre à l'encontre de Pyrrhus pour l'empire & seigneurie de l'Italie. Et Solon, comme les flatteries de Pisistratus, dont il abusoit le peuple d'Athenes, fussent

- A ple, mettre en auant force decrets & force Edicts, en quoy le commun estime que consiste toute l'entremise du gouuernement: comme ils pensent que philosopher soit seulement discourir & disputer de la philosophie dessus vne chaire en vne eschole, ou bien en escrire & composer des liures: & ce pendant ils ne cognoissent point l'administration ciuile ny la philosophie continuelle qui se voit es œuures & actions quotidianes: c'est comme disoit Dicæarchus, que lon estime communement, que faire des tours & retours, allees & venues dedans vne galerie, soit se promener, non pas aller aux champs, ny voir vn sien amy. Or fault-il croire que gouuerner la Chose publique & philosopher, c'est tout vn: de sorte que Socrates ne philosophoit pas seulement quand il auoit fait apprester des bancs, & qu'il se mettoit en sa chaire, ou qu'il obseruoit l'heure de la lecture & de la conference, ou du promenouer, qu'il auoit assignee à ses familiers: mais aussi quand il se iouoit aucunes fois, quand il beuuoit & mangeoit, quand il estoit au camp, ou quand il marchandait avec eulx, & finalement alors qu'il estoit en prison & qu'il beuuoit la poison de la ciguë, ayant le premier monstré & fait voir, que la vie de l'homme en tout temps, en toute partie, en toutes passions & tous affaires vniuersellement reçoit l'usage de la philosophie. Autant en fault-il semblablement penser de l'administration ciuile, que les fols & meschants n'administrerent point la Chose publique, ne quand ils sont capitaines generaux d'armees, ne quand ils sont chancelliers, ny quand ils haranguent au peuple, mais qu'ils flatent la commune pour s'insinuer en sa bonne grace, qu'ils declament par ostentation, qu'ils brassent quelque sedition, ou qu'ils font quelque charge à laquelle ils sont contraints par force. Mais au contraire, le bon & vray policien qui aime ses citoiens, qui aime sa patrie, qui a soing & amour du bien public, encore que iamais il ne veste le manteau & habit de capitaine & gouuerneur, si est-ce que tousiours il fait office de gouuerneur & d'administrateur public, en exhortant & incitant ceux qui le peuuent faire, en instruisant ceux qui ne le sçauent pas, en assistant à ceux qui luy demandent conseil, en destournant ceux qui ont mauuaise volonté, confirmant & encourageant ceux qui l'ont bonne, & en monstrant clairement par effect en toutes ses actions, que ce n'est point par forme d'acquit qu'il s'entremet des affaires publiques, ny là où il y a quelque interest pour luy ou pour les siens, ou qu'il y est nommeement appellé, qu'il va le premier au theatre, & qu'il se trouue le premier en la salle de conseil, ny que ce n'est point par maniere d'esbattement, comme s'il y alloit pour y voir iouer des ieux, ou pour ouïr quelque plaisante musique quand il est là, ains au contraire quand il n'y peut estre present de corps, qu'il y soit de l'esprit, & par soigneusement s'en enquerir, en approuuant aucunes des choses qui sy seront faites, & se malcontentant des autres: car ny Aristides à Athenes, ny Caton à Rome, ne furent par plusieurs fois en magistrat, & toutefois ils ne laisserent pas d'estre toute leur vie en action pour le bien & seruice de leur país. Et Epaminondas fit bien de grands D actes & plusieurs durant qu'il fut capitaine general de la Bœoce, mais on en recite vn de luy n'estant ny general, ny ayant charge quelconque, qu'il fit en la Thessalie, lequel n'est pas moindre que pas vn des autres: quand les capitaines de Thebes ayans ietté l'armee en des lieux aspres & mal-aisez se trouuerent chargez par les ennemis qui les pressoient fort, tellement qu'ils estoient en grand trouble & en grand effroy: luy, qui estoit deuant entre les gens de pied, fut rappelé, là où à son arriuee premierement il appaisa tout le trouble & l'effroy, en les asseurant de sa presence, puis il remeit en ordre & renga en bataille l'armee qui estoit toute confuse & esbranlee, & la tirant facilement hors de ce mauuais passage, la presenta en teste aux ennemis, qui en furent si esmerueillez qu'ils changerent d'aduis, & se retirerent. Et Agis le Roy de Lacedemone, comme il menoit desia son armee toute regee en bataille pour combattre les ennemis au país d'Arcadie, il y eut quelqu'un des anciens de

Si l'homme d'aage se doit encore mesler d'affaires.

Sparte qui luy cria, Sire Roy, tu penſes remedier à vn mal par vn autre : voulant entendre la trop facile retraitte & departement de la ville d'Argos, laquelle il cuidoit courir par la preſente importune promptitude de combattre, ainſi comme dit Thucydides : ce qu'ayant Agis entendu, le creut, & ſe retira lors, mais depuis il gaigna. Il faiſoit tous les iours mettre ſa chaire pres la porte du palais : & bien ſouuent les Ephores ſe leuans de leur parquet ſ'en alloient deuers luy pour auoir ſon aduis & prendre ſon conſeil ſur les plus importans affaires : car il eſtoit tenu pour homme de fort bon ſens, & le renomme lon pour vn grand ſage homme. Et pourtant vn iour que la force de ſon corps eſtoit deſia toute aneantie, tellement qu'il ne bougeoit preſque plus du liēt, les Ephores luy manderent qu'il ſ'en vint en la place. Il ſe leua du liēt, & ſe meit bien en deuoir d'y aller : mais ayant marché vn petit à grand peine & grande difficulté, il rencontra des petits garçons en ſon chemin, aux quels il demanda, „ ſils ſçauoient rien plus fort que la neceſſité d'obeir à ſon maĩſtre : ils luy reſpondi-
„ rent, le non pouuoir : ainſi faiſant compte que ſon impuiſſance deuoit eſtre la fin & borne de ſon obeĩſſance, il ſ'en retourna en ſa maiſon. Car il ne fault pas que la bonne volonté faille deuant la puiſſance : mais quand elle eſt faillie, auſſi ne la doit on pas forcer. Auſſi dit on que Scipion ſe ſeruoit touſiours à la guerre, & en la ville, du conſeil de Caius Lælius : de maniere qu'il y en auoit de ce temps là qui diſoient, des haults faiēts d'armes qu'il executoit, qu'e Lælius en eſtoit l'autheur, comme d'vne comedie, & Scipion le iouēur qui les iouoit. Et Ciceron luy-meſme confeſſe, que les plus grands & plus honorables conſeils qu'il exploita en ſon conſulat, moiennant leſquels il preſerua ſon païs, il les conſulta avec le philoſophe Publius Nigidius. Ainſi n'y a il rien qui empêche les vieilles gens de pouuoir ſeruir & profiter au public en pluſieurs ſortes de gouuernement, ſoit de bonne parole, de bon conſeil, de liberté & authorité de franchement parler, & de ſage ſoing, comme diſent les poētes : car ce ne ſont pas les pieds, ny les mains, ny toute la force du corps ſeulement qui ſont parties & biens de la Choeſe publique, ains ſont premierement & principalement l'a-
me & les beautez d'icelle, comme la iuſtice, la temperance, & la prudence, leſquelles venans tard à leur perfection, il n'y auroit point de propos ; qu'elle iouiſt d'vne maiſon, d'vne terre, & de tous autres biens & heritages de ſes citoiens, & que d'eulx meſmes elle n'en peuſt plus tirer aucun profit en commun pour le bien public du païs, à cauſe de leur long temps, lequel ne leur oſte pas tant des forces de pouuoir ſeruir, comme il leur adiouſte de ſuffiſance aux facultez requiſes pour commander & regir. Voyla pourquoy lon figure les Hermes, c'eſt à dire les ſtatues de Mercure, en vieil aage, n'ayans ne pieds ny mains, mais les parties naturelles tendues : donnans par là couuertement à entendre, que lon n'a pas beaucoup affaire du labour corporel des hommes vieux, proueu qu'ils ayent la parole actiue & ſeconde ainſi comme il appartient.

Les

A Les dictz notables des anciens Roys, Princes,
ET GRANDS CAPITAINES.



RTAXERXES le Roy de Perse, ô trespuissant Empereur Cesar Traian, estoit que c'estoit acte de magnanimité, & bonté Royale, non moins prendre en gré & recevoir avec bon visage de petits presens, que d'en donner de grands. Et pourtant comme quelquefois en passant chemin, vn pauvre manœuvre gagnant la vie à la sueur de son corps, n'ayant autre chose que luy presenter, luy eust offert de l'eau qu'il venoit de puiser en la rivière avec ses deux mains, il la reçut ioyeusement, & s'en prit à soubrire, mesurant la grace de l'offre, non à la valeur du present, mais à la bonne volonté

- B de celui qui le presentoit: & suivant ce propos, Lyncus ordonna en la cité de Sparte les Sacrifices de la moindre despense qu'il peut, à fin, ce disoit-il, que ses citoyens eussent moyen tousiours, & en tous lieux, d'honorer promptement & facilement les Dieux, de ce qu'ils auroient à la main. Et pourautant, Sire, que de mesme volonté & intention ie vous offre de petits presens, comme les premices, par maniere de dire, les plus communes de la philosophie, ie vous supplie de recevoir en gré avec ma bonne affection, l'utilité de ces beaux dictz notables que ie vous ay recueillis, pour ce qu'ils vous peuvent servir à congnoistre quelles ont esté la nature & les mœurs de ces grands personnages du temps passé, attendu qu'elles apparoiſſent mieux bien souuent, & se descouurent plus clairement en leurs dictz, que non pas en leurs faicts. Il est bien vray que nous auons en vne autre œuvre compilé les Vies des plus illustres personnages, tant en armes qu'en conseil, comme Capitaines, Legislateurs,
- C Roys & Empereurs, qui ayent oncques esté entre les Romains & entre les Grecs: mais en la plus part de leurs faicts & gestes la fortune y est ordinairement meslee: là où és paroles qu'ils ont dites, & aux propos qu'ils ont tenus, sur l'heure mesme de leurs faicts, de leurs passions & de leurs accidents, on apperçoit plus clairement & plus nettement, comme dedans des miroirs, quel estoit le cœur & la pensee de chacun d'eulx: au moyen dequoy Siramnes gentilhomme Persien respondit à quelques vns qui s'esmeruilloient, comme ses entreprises ne succedoient heureusement, veu que ses propos & discours estoient si sages: c'est, dit-il, pource que ie suis seul maistre de mes propos, mais des effects, c'est la Fortune & le Roy. Or en l'autre œuvre des vies les dictz notables de ces grands personnages sont accompagnez de la narration de leurs faicts bien au long escrits, tellement qu'ils requierent vn homme de grand loysir, & qui prenne plaisir à ouïr & à lire: mais en ce liure cy, n'y ayant que les eschantillons, par maniere de dire, ou les semences extraites à part de leurs vies, la lecture d'iceluy, à mon aduis, ne vous occupera point le temps que vous deuez à vos affaires, attendu qu'en peu de paroles vous y verrez le naturel dépaint au vif de plusieurs personnages dignes de memoire.
- D

Les Perſes aiment ceux qui ont le nez aquilin, c'est à dire courbé comme le bec d'un aigle, & les estiment les plus beaux, pour autant que Cyrus, celui de leurs Rois qu'ils ont le plus aimé, auoit le nez ainsi fait. Or disoit ce Roy là, que ceux qui ne vouloient faire du bien à eulx mesmes, estoient contraincts d'en faire aux autres: disoit aussi, qu'il n'appartenoit à nul de commander, qu'il ne fust meilleur que ceux à qui il commandoit. Et comme les Perſes voulussent changer de pais, & au lieu du leur, qui estoit aspre & bossu, en prendre vn autre qui estoit doux & plain, il ne le voulut pas permettre, disant, que les semences des plantes, & les mœurs des hom-

Les dictz notables des anciens

mes deuient à la fin semblables aux lieux & contrees où ils demeurent. Darius **E**
pere de Xerxes, se louant soy-mesme, souloit dire, que és batailles & perils de la
guerre il deuenoit plus sage: & ayant vne annee taxé les tailles & subides qu'il vou-
loit leuer sur ses subiects, il enuoya querir les principaux hommes de chaque pro-
uince, & leur demanda si les tributs qu'il leur auoit imposez estoient point griefs à
supporter: Ils luy respondirent, que moieusement: adonc il ordonna, que nul ne
payeroit que la moitié de sa cote seulement. Et comme vn iour il eust ouuert vne
pomme de grenade belle & grosse à merueilles, & que quelqu'un des assistans luy de-
mandast de quelle chose il voudroit auoir autant, comme il y auoit de grains dedans
cette pomme, Il respondit, de Zopyres: ce Zopyre estoit vn vaillant capitaine & fi-
dele amy, lequel s'estant luy-mesme deschiré le corps à coups de fouët, & coupé le
nez & les aures, abusa tellement par ceste ruse les Babyloniens, qu'ils se fierent
en luy du gouuernement de leur cité, laquelle depuis il liura entre les mains de Da-
rius, lequel par plusieurs fois depuis assura, qu'il aimeroit mieux auoir Zopyre entier **F**
de tous ses membres, que gagner cent telles citez comme estoit celle de Babylone.
La Royne Semiramis ayant fait construire sa sepulture, fit engrauer dessus ceste in-
scription: Le Roy qui aura affaire d'argent face demolir ceste sepulture, & il en trou-
uera autant comme il en voudra. Darius la fit ouurir, & n'y trouua point d'ar-
gent, mais bien rencontra il d'autres lettres qui disoient, Si tu n'eusses esté mauuais
homme & d'une auarice insatiable, tu n'eusses point remué les sepultures des tref-
passez. Arimenes, frere de Xerxes fils de Darius, querellant à l'encontre de son frere
le Royaume de Perse, descendit de la prouince Baëtrienne où il se tenoit: son frere luy
enuoya des presens au deuant, & commanda à ceulx qui les luy presentoient de sa part,
de luy dire, Ton frere Xerxes t'honore de ces presens pour ceste heure, mais il t'as-
süre que si vne fois il est déclaré Roy, tu seras le plus grand homme qui soit aupres
de luy: & de fait Xerxes ayant esté iugé Roy, Arimenes fut le premier qui luy fit
hommage, & luy mist le diadème Royal à l'entour de la teste, aussi le Roy son frere **G**
luy donna le second lieu d'honneur & d'autorité apres luy, en tout son Royaume. Et
estant indigné à l'encontre des Babyloniens pour autant qu'ils s'estoient rebellez con-
tre luy, apres les auoir reconquis, il leur defendit de porter plus armes, & leur com-
manda de danser, chanter, iouer des haubois, paillarder & tauerner, & porter de
longs sayes à plein fond. Et comme on luy eust apporté des figues seiches à vendre
du pais de l'Attique, il dit, qu'il n'en mangeroit point qu'il n'eust conquis la region
qui les portoit. Ayant surpris quelques espions de nation Grecque dedans son
camp, il ne leur fit aucun desplaisir, ains apres leur auoir fait monstrer à seureté
tout son camp, leur permit de s'en retourner. Artaxerxes fils de Xerxes, celuy qui
fut surnommé Longue-main, pource qu'il auoit vne main plus longue que l'autre,
souloit dire, que c'estoit chose plus royale d'adiouster que d'oster: & fut le pre-
mier qui permit à ceux qui chassoient avec luy, de frapper les premiers la beste **H**
quand ils pourroient & voudroient. Aussi fut-ce luy qui ordonna le premier, que les
Seigneurs qui auroient failly en leur estat (au lieu qu'on les souloit fouëtter eux
mesmes) fussent despouilleez, & leurs vestemens fouëttez pour eulx: & au lieu
qu'on leur souloit arracher les cheueux de la teste, qu'on leur ostast leur haut chap-
peau seulement. Il auoit vn chambellan nommé Satibarzanes, qui luy demandoit
quelque chose qui n'estoit ny iuste ny raisonnable, & estant aduertie qu'il faisoit
cette poursuite en faueur de quelque autre, qui luy en auoit promis trente mille es-
cus de Perse, qui s'appelloient Dariques, il commanda au tresorier de son espargne,
de luy apporter trente milles Dariques: & en les luy donnant, luy dit: Pren cest ar-
gent Satibarzanes, car pour te l'auoir donné, ie n'en seray pas plus pauure: là où si
i'eusse fait ce dont tu me requerois, i'en eusse esté plus iniuste. Cyrus le ieune,
pour

- A** pour esmouuoir les Lacedemoniens à faire alliance & entrer en ligue avec luy, disoit, qu'il auoit le cœur plus grand que son frere le Roy Artaxerxes, qu'il beuuoit plus de vin sans eau que luy, & le portoit mieux : & que son frere estant à la chasse, à peine se pouuoit tenir à cheual, & en temps de danger, non pas en son throne mesme : & pour les conuier à luy enuoyer de leurs hommes de guerre, il promettoit à ceux qui viendroient à pied, qu'il leur donneroit des cheuaulx : & à ceux qui auroient des cheuaulx, qu'il leur donneroit des chariots : & à ceux qui auroient des metairies, qu'il leur donneroit des villages : à ceux qui auroient des villages, qu'il leur donneroit des villes : & au reste, quant à l'or & l'argent, qu'il leur en bailleroit tant qu'il le faudroit peser, non pas compter. Artaxerxes le frere de ce ieune Cyrus, qui fut surnommé grande memoire, non seulement donna libre accez & audience à tous ceux qui eurent affaire à luy, mais qui plus est commanda encore à sa femme legitime, qu'elle ostant les tapisseries & courtines qui couuroient & bouschoient son chariot, à celle fin que ceulx qui vouldroient, peussent parler à elle mesme par les chemins : &
- B** cōme vn pauvre païsan luy eust fait present d'une belle & grosse pōme, en la receuant avec vn bon visage, il dit : Par le Soleil (qui estoit le serment des Perles) il me semble que cest homme feroit d'une petite ville vne grosse cité, qui la luy bailleroit à gouverner : & comme en vne defaite son bagage luy eust esté tout pillé, estant contrainct de manger, pour toute viande, vn peu de figues seiches avec du pain d'orge, O Dieux, dit-il, quelle volupté ie n'auois iamais essayee ! Parysatis la mere de Cyrus & d'Artaxerxes disoit, que celuy qui vouloit faire quelque remonstrence à vn Roy, deuoit vser de paroles de foye : c'est à dire, les plus doulces qu'il pourroit choisir. Orontes le gendre du Roy Artaxerxes, ayant esté par vn courroux du Roy condamné & priué de son estat, disoit, que les mignons des Rois & des Princes ressembloient proprement aux doigts de ceux qui comptent : car ainsi comme ils les font valoir tantost vn, & tantost dix mille : aussi ceux qui sont à l'entour des Princes peuuent vne fois tout, & vne autre-fois peu ou rien du tout. Memnon capitaine Grec, qui fit la guerre pour Darius contre Alexandre, comme l'un de ses souldards vint en sa presence dire tout plein de villaines & outrageuses paroles à l'encontre d'Alexandre, luy donna sur la teste d'une lance qu'il tenoit en sa main, en luy disant : Je te soudoye pour guerroyer, & non pas pour iniurier Alexandre. Les Rois d'Ægypte, suiuant vne ancienne ordonnance de leur païs, faisoient jurer les iuges, quand ils les installaient en leurs offices, que quand bien le Roy leur commanderoit de iuger iniustement, ils ne le feroient pas pourtant. Du temps de la guerre de Troye, il y auoit en la Thrace vn Roy nommé Poltys, deuers lequel tant les Grecs que les Troyens enuoyerent pour auoir de luy secours : il leur fit responce qu'il estoit d'aduis que Paris rendist Helene, & qu'au lieu d'elle, il luy bailleroit deux belles femmes. Teres le pere de Sitalces souloit dire, que quand il estoit de loysir, & qu'il ne faisoit point la guerre, il luy estoit aduis qu'il n'y auoit point de difference entre luy & son palefrenier. Cortys rendit vn lyon à celuy qui luy auoit fait present d'un leopard : & pourautant qu'il estoit prompt à se courroucer, & aspre à punir ses seruiteurs domestiques, quand ils auoient failly en leurs seruices, comme vn sien amy, chez lequel il estoit logé, luy eust fait present de plusieurs vases & vaisselles de terre fort tenues & aises à rompre, mais au demourant singulierement bien ouurez & labourez, il donna bien de riches dons à celuy qui les luy auoit presentez, mais il les rompit & cassa tous entierement, de peur que par vne soudaine cholere il ne chastiait trop aigrement ses seruiteurs qui viendroient à les rompre. Idathyrus Roy des Tartares, contre lequel Darius mena son armee, manda aux Seigneurs des Pæoniens qu'ils rompissent le pont que Darius auoit fait faire sur la riuere de Danube pour passer en ses païs, à fin qu'en ce faisant ils se deliurassent de toute seruitude : ce qu'ils ne

Les dictz notables des anciens

voulurent pas faire, pour ce qu'ils vouloient garder leur foy à Darius: au moien de- E
quoy il les appelloit esclaves de bien, qui n'auoient point de volonté de s'enfuir.

» Atcas escriuit à Philippus Roy de Macedoine, Tu commandes aux Macedoniens qui
» sçauent bien combattre contre des hommes: mais moy ie commande aux Tartares,
» qui peuuent combattre & la faim & la soif. Et comme luy-mesme frottaist & estrillaist
son cheual, il demanda aux ambassadeurs de Philippus, si leur maistre faisoit pas le
semblable. Aiant en vne rencontre pris prisonnier de guerre Ismenias excellent
ioueur de flustes, il luy commanda d'en iouer deuant luy: & comme tous les autres
assistans s'esmerueillassent de son excellence, il iura qu'il prenoit plus de plaisir à ouïr
vn cheual hennir. Scilurus laissant quatre vingts enfans malles, quand il fut prest à
mourir se fit apporter vn faisceau de iauelots, qu'il presenta de reng à chacun de ses
enfans, leur commandant de tâcher à le rompre: & comme chascun d'eulx se fust
efforcé de ce faire, en vain, sans en pouuoir venir à bout, luy prenant chascun iauelot
à part, les rompit tous facilement l'un apres l'autre: leur enseignant par ceste simili- F
tude qu'en se tenant bien ioincts ensemble, ils demoureroient forts & inuincibles:
mais s'ils se diuisoient, & qu'ils entraissent en querelles les vns contre les autres, qu'ils se
trouueroient foibles & faciles à desfaire. Gelon apres auoir desfait les Carthaginois
pres la ville d'Himere, faisant paix avec eulx, les cōtraignit de mettre entre les articles
du traicté, qu'ils ne sacrifieroient plus leurs enfans à Saturne. Il menoit souuent les Syra-
cusains aux champs, autant pour labourer & planter, comme pour guerroyer, à fin
que leurs terres en valussent mieux estans bien labourées, & eux ne deuinssent pires à
faute de trauailler. Demandant vn iour de l'argent à ses citoiens, ils commencerent
à s'en mutiner: il leur dit, que c'estoit à l'intérior de leur rendre: & de faict leur rendit
apres la guerre. Et comme en vn festin on presentaist de reng la lyre à tous les con-
uiez pour chanter dessus selon la coustume, & que tous les autres s'accommodassent
à leur tour & chantaissent, luy commandant qu'on luy amenaist son cheual, voltigea
& monta dessus aisement & dispoitement. Hieron, celuy qui fut tyran de Syracuse G
apres Gelon, disoit que ceux qui parloient à luy franchement & librement ne le fas-
choient & ne l'importunoient point: mais que ceux qui reueloient vn propos qu'il
leur auroit dit en secret, faisoient tort non seulement à luy, mais aussi à ceux à qui ils
le disoient: pour ce que coustumieremēt nous haïssons non seulement ceux qui rap-
portent, mais aussi ceux qui escoutent ce que nous ne voudrions pas estre sceu. Quel-
qu'un luy reprocha vn iour qu'il auoit l'haleine puante, à l'occasion de quoy il tenfa

» la femme de ce qu'elle ne luy en auoit iamais rien dit: elle luy respondit, Je pensois
» que l'haleine de tous les autres homes sentist ainsi. Xenophanes natif de Colophone se
plaignoit vn iour à luy, de ce qu'il estoit si pauvre qu'il n'auoit pas le moien d'entre-
» tenir deux seruiteurs, & il luy respondit: Et comment, Homere que tu reprens &
» que tu blasmes ordinairement, tout mort qu'il est, en nourrit plus de dix mille. Il
condemna Epicharmus poëte Comique en quelque amende, d'autant qu'en la pre- H
sence de sa femme il auoit dit quelques paroles villaines & deshonestes. Diony-
sius le pere, comme les orateurs qui deuoient harenguer deuant le peuple tiraissent au
fort des lettres, pour sçauoir l'ordre, auquel ils auroient à parler, & que la terre M
luy fust escheute, quelqu'un des assistans luy dit: Ceste M signifie Marotte, Dio-
nysius, pour ce que tu diras de grandes folies: Mais bien, dit-il, que ie seray Mo-
» narque. & de faict, apres qu'il eut fait sa harengue, le peuple de Syracuse l'elect
Capitaine general. Et comme tout au commencement de sa tyrannie les Syra-
cusains souleuez à l'encontre de luy, le teinssent assiéger dedans son chasteau, ses
amis luy conseilloyent que volontairement il quittaist & se démeist de ceste domina-
tion violente, s'il ne vouloit mourir honteusement, apres qu'il seroit pris: mais luy
aiant veu assommer vn bœuf à vn boucher, & obserué qu'il estoit au premier coup
tombé

A soudainement roide mort : Et dea, dit-il, ne seroit-ce pas grand desplaisir, que pour
 „ crainte de la mort qui dure si peu, & passe si viftement, ie quittasse vne si belle & si
 „ grande Seigneurie ? Aiant entendu que son propre fils auquel il deuoit laisser sa Sei-
 „ gneurie, auoit violé & forcé la femme d'un des bourgeois de la ville il luy demanda
 en cholere, quelle chose semblable il luy auoit iamais veu faire. Le ieune homme luy
 „ respondit, Aussi n'as tu pas eu vn pere qui fust tyran : il luy repliqua tout promptemēt,
 „ Aussi n'auras-tu point de fils qui le soit, si tu ne te deportes de commettre de tels actes.
 Vne autrefois estant allé voir son fils en son logis, & y voyant quantité grande de
 „ vases d'or & d'argent, il dit tout haut, Il n'y a rien de Seigneur & de Prince en toy :
 „ veu que d'un si grand nombre de vaisselle d'or & d'argent que tu as eu de moy, tu n'en
 „ as pas sceu faire vn amy. Il demandoit vn iour de l'argent à ceux de Syracuse, & eux
 se plaignoient & lamentoient, en le priant de les vouloir excuser, disans qu'ils n'en
 auoient point : luy au contraire leur en fit demander encore d'autre : ce qu'il fit ius-
 B ques à deux ou trois fois, coup sur coup. Et comme il continuast à leur en exiger en-
 core d'auantage, il entendit qu'ils ne s'en faisoient plus que rire & gaudir, en se pro-
 „ menant parmy la place : adonc il commanda à ses receueurs de ne les plus presser. Car
 „ c'est signe, dit-il, qu'ils n'ont plus rien, puis qu'ils ne font plus conte de nous. Sa mere
 estant desia vieille & hors d'age de se marier, vouloit neantmoins à toute force estre
 „ mariée à vn beau ieune homme : il luy respondit, qu'il estoit bien en sa puissance de
 „ violer les loix de Syracuse, mais les loix de nature, non. Et punissant asprement tous
 autres malfaiçteurs, il pardonnoit aux voleurs, qui ostoient les robbes & manteaux à
 ceux qu'ils rencontroient la nuit parmy les ruës, à fin que les Syracusains pour ceste
 occasion desistassent de faire festins & assemblees les vns avec les autres. Il y eut vne
 fois vn estranger qui luy promit tout haut de luy enseigner à part en secret, à quoy il
 pourroit congnoistre ceux qui conspiroient & machinoient contre luy : Dionysius le
 „ pria bien fort de luy dire : & l'autre allant deuers luy, Donne moy, dit-il, vn talent,
 C (six cens escus) à fin qu'il semble à ceux de Syracuse que tu ayes appris de moy les fi-
 „ gnes ausquels tu pourras descouurir ceux qui coniureront à l'encontre de toy. Il le luy
 donna, & fit semblant d'auoir appris & entendu de luy ces moyens, leuant grande-
 ment la subtile façon de tirer argent que cest homme auoit inuentee. Quelque anne
 „ luy demanda vn iour, si estoit point quelquefois oisif, l'à dieu ne plaise, dit-il, que
 „ cela iamais m'aduienne. Estant aduertty que deux ieunes hommes de la ville beuuans
 ensemble auoient dit plusieurs outrageuses & iniurieuses paroles de luy & de sa ty-
 rannie à la table, il les enuoya conuier tous deux de venir soupper avec luy : &
 voyant que l'un, apres qu'il eut vn peu de vin en teste, disoit & faisoit tout plein
 de folies, & au contraire que l'autre estoit fort retenu, & beuuoit peu solement, il par-
 donna à l'un comme estant yurongne & insolent de nature, & qui par yurongnerie
 auoit mesdit de luy, mais il fit mourir l'autre, comme luy voulant mal en son cœur,
 D & luy estant ennemy de propos deliberé. Aucuns de ses familiers le reprenoient de
 ce qu'il honoroit & auançoit vn homme meschant & mal voulu des Syracusains, &
 „ il leur respondit, Je veux qu'il y ait en Syracuse quelqu'un qui soit encor plus haï
 „ que moy. Il enuoya vne fois des presens à quelques ambassadeurs de Corinthe, qui
 estoient venus deuers luy : eux les refuserent, à cause de quelque statut & ordon-
 nance de leur chose publique, qui defendoit aux ambassadeurs de prendre ny re-
 ceuoir aucuns dons ne presens de Seigneur ou Prince quelconque. Il en fut mal
 content, & leur dit, qu'ils faisoient mal d'oster le seul bien qu'il y a és tyrannies. de
 pouuoir donner, enseignant aux hommes que mesme le receuoir aucun bien des ty-
 rans est chose que lon doit redouter & fuir. Estant aduertty, que l'un des habitans
 de Syracuse auoit caché vn thresor dedans la terre en sa maison, il luy fit commande-
 ment de le luy apporter : ce qu'il fit, non pas tout pourtant, car il en reteint vne partie,

Les dictz notables des anciens

avec laquelle il s'en alla demourer en vn autre ville, là où il en achetta quelque heritage : quoy entendant, Dionysius le renuoya querir, & luy rendit tout son or & argent : puis que tu sçais, dit-il, maintenant vser de la richesse, & non pas rendre inutile ce qui est fait pour l'usage de l'homme. Son fils que lon appelle Dionysius le ieune, disoit, qu'il nourrissoit & entretenoit plusieurs hommes de lettres, non qu'il les estimast, mais pource qu'il vouloit estre estimé pour l'amour d'eux: entre lesquels „ vn Dialecticien nommé Polyxenus, luy dit vne fois en disputant avec luy, Je te tiens „ conuaincu : Ouy bien de paroles, luy respondit-il soudainement: mais moy ie te con- „ uains toy-mesme de faict, pour ce qu'abandonnant ta propre maison, tu me viens „ faire la court & seruir en la mienne. Apres qu'il eust esté chassé de sa seigneurie, comme „ quelqu'un luy demanda, Que t'a maintenant seruy Platon & toute sa philosophie? „ Elle m'a seruy de ce, que ie porte patiemment la mutation & le changement de ma „ fortune. On luy demanda vne fois, comme son pere estant homme pauvre & „ priué auoit acquis la domination de Syracuse: & luy, à qui son pere l'auoit laissée „ toute acquise, & qui estoit fils d'un si grand tyran, l'auoit laissée perdre: pource, dit- „ il, que mon pere vint à prendre les affaires en main lors que le gouuernement popu- „ laire estoit haï, & moy lors que la tyrannie estoit enuiee. Vne autre fois il respondit „ à quelque autre qui luy faisoit ceste mesme demande: Mon pere m'a bien laissé sa „ tyrannie, mais non pas sa fortune. Agathocles estoit fils d'un potier de terre, & s'estât fait seigneur de la Sicile, & en ayant esté déclaré Roy, il faisoit en son seruice mesler de la vaisselle de terre parmy celle d'or & d'argent, & la monstroït aux ieunes gens „ en leur disant: Je faisois au commencement de telle vaisselle, (en leur monstrant celle „ de terre) & maintenant i'en fais de celle cy (en leur monstrant celle d'or) par ma dili- „ gence & vaillance. Ainsi qu'il tenoit le siege deuant vne ville, quelques vns de ceux „ de dedans luy cryoient de dessus la muraille, pour luy penser faire iniure: Hó potier, „ dequoy payeras tu la souldie à tes gens? & luy sans s'esmouuoir tout doucement en „ riant leur respondit, Du sac de ceste ville, quand ie l'auray prise. Et de faict l'ayant „ emportee d'assault, il vendit à l'encan tous les habitans comme esclaués, en leur di- „ fant, Si vous me dittes plus d'iniures desormais, ie m'en plaindray à voz maistres. Et „ comme les habitans de l'Isle d'Ithaque se plaignissent à luy, disans, que ses mariniers „ estans descendus en leur Isle auoient emmené de leurs moutons: il leur respondit, Et „ comment, vostre Roy estant iadis descendu en la Sicile, non seulement en emmena „ des moutons, mais qui pis est, y creua les yeux au berger. Dion, celuy qui chassa „ Dionysius hors de sa tyrannie, estant aduertý que Callippus, auquel il se fioit plus „ qu'à nul autre de ses hostes ny amis, espioit les moïens de le faire mourir, n'eut iamais le cœur d'en informer pour le conuaincre, disant, qu'il aimoit mieux mourir que „ viure en ceste peine, d'auoir à se garder, non de ses ennemis seulement, mais aussi de „ ses amis. Archelaus roy de Macedoine, comme vn iour à sa table quelqu'un de ses „ familiers, homme qui sçauoit peu de bien & d'honneur, luy demanda en don vne „ coupe d'or dont on seruoit à sa table, le Roy commanda à l'un de ses gens de la porter „ en don au poëte Euripides. Ce que l'autre trouuant estrange, il luy dit: Ne t'en esbahy „ point, car tu merites de demander & luy d'auoir, encore qu'il ne demande point. Et „ comme son barbier, qui estoit vn grand babillard, luy demanda: Comment voulez „ vous que ie vous face la barbe, Sire? Il luy respondit, Sans dire mot. Et comme Euri- „ pides en vn festin embrassa & baïsa le bel Agathon deuant tout le monde: Ne vous „ en esbahissez point, dit-il aux autres assistans: car des beaux l'arriere saison mesme en „ est encore belle. Et comme Timotheus iouëur de cithre, qui s'estoit promis que le „ Roy luy feroit vn bon gros present, en eust eu beaucoup moins qu'il n'esperoit, & s'en „ monstra fort mal content, de sorte qu'en chantât sur sa cithre ces paroles, L'argent „ fils de la terre tu l'as en estime grande: faisant signe de la teste que c'estoit du Roy qu'il „ l'enten-

A l'entendoit: il luy repliqua tout sur le champ, Mais toy tu en fais demande. Vne autre fois, comme il passoit par la rue, on respendit de l'eau sur luy: à raison de quoy ceux qui se trouuerent aupres, l'irritans à l'encontre de celuy qui auoit versé l'eau disoient, qu'il le deuoit bien faire chastier: voire mais, dit-il, il n'a pas versé ceste eau sur moy, mais sur celuy qu'il pensoit que ie fusse. Philippus de Macedoine pere d'Alexandre le grand, ainsi que tesmoigne Theophrastus, a esté plus grand que nul autre des Roys de Macedoine, non seulement en prosperité de fortune, mais aussi en bonté & moderation de mœurs. Il faignoit de reputer les Atheniens bien-heureux, en ce mesmement qu'ils trouuoient tous les ans en leur ville dix capitaines à eslire: car luy au contraire en plusieurs annees n'en auoit peu trouuer qu'un seul, qui estoit Parmenion. Et comme on luy eust apporté en un mesme iour les nouuelles de plusieurs prosperitez qui luy estoient aduenues toutes ensemble: O fortune, fescria il, ne m'enuoye qu'un peu de mal à l'encontre de tant & de si grands biens. Apres qu'il eut vaincu les Grecs, plusieurs luy conseillerent de mettre de bonnes & grosses garnisons dedans les villes, pour plus seurement les tenir en bride: mais il leur respondit, l'aime mieux estre appelé par long temps debonnaire, que peu de temps Seigneur. Et comme ses familiers luy conseillassent de chasser de sa court un mesdisant qui ne faisoit que detracter de luy: il leur respondit, qu'il n'en feroit rien, de peur qu'il n'allast par tout ailleurs semer sa maledicence. Smicythus accusoit souuent Nicanor enuers luy, disant qu'il ne faisoit autre chose que detracter de luy, tellement que ses plus familiers estoient d'aduis qu'il l'enuoyast querir, & qu'il le fist chastier ainsi qu'il le meritoit: Voire mais, Nicanor, ce dit-il, est l'un des hommes de bien de la Macedoine, ne vault il pas doncques mieux s'enquerir si la faute en vient point de nous? Et de faict, aiant fait diligence d'enquerir dont venoit ce mescontentement de Nicanor, il trouua qu'il estoit oppressé d'extrême pauureté, & qu'on n'auoit tenu compte de le secourir en sa necessité: parquoy il commanda incontinent qu'on luy portast un bon present, qu'il luy enuoya: depuis Smicythus luy vint rapporter que Nicanor faisoit merueilles d'aller preschant ses louanges par tout. Voiez vous doncques, dit alors Philippus, comme il depend de nous que lon parle bien ou mal de nous? Il souloit aussi dire, qu'il estoit bien tenu aux harengueurs des Atheniens, pource que mesdisant de luy, ils estoient cause de le rendre plus homme de bien & de parole & de faict: car ie m'efforce, disoit-il, tous les iours & en mes dictes & en mes faicts de les faire trouuer menteurs. Il renuoya, sans leur faire payer rençon, tous les prisonniers Atheniens qui auoient esté pris en la bataille de Cheronee, mais eux demandoient encore d'auantage leurs liets, leurs vestements, & leurs hardes, & se plaignoient des Macedoniens de ce qu'ils ne les leur rendoient pas: Philippus, quand il l'entendit, s'en prit à rire, & dit à ceux qui estoient autour de luy, Ne vous semble il pas, que ces Atheniens pensent auoir esté par nous vaincus au ieu des osselets? Il eut d'aduenture en vne bataille l'os rompu, qui ioinct par deuant les deux espauls: cest os s'appelle en langage grec, la clef: & le chirurgien qui le pensoit luy demandoit tous les iours quelque argent: Philippus luy respondit, Prends en tant que tu voudras, car tu as la clef entre tes mains. Il y auoit en sa court deux freres dont l'un s'appelloit Hecateros, [†] qui signifie en grec, l'un & l'autre: l'autre frere se nommoit Amphoteris, qui signifie, tous les deux: & voiant que Hecateros estoit homme diligent & aduisé, & Amphoteris sot & paresseux, il disoit que Hecateros estoit Amphoteris, c'est à dire, qu'il en valoit deux: & que Amphoteris estoit Oudeteris, comme qui diroit, neant, & homme de nulle valeur. Il dit aussi, que ceux qui luy conseilloyent de se porter aigrement à l'encontre des Atheniens, estoient hommes de mauuais iugement, de conseiller à un Prince qui faisoit aduroit toutes choses pour la gloire, de destruire le theatre de gloire, que la

*L'allusion
des mots
ne se peut
trouuer en
la langue
françoise.*

Les dictz notables des anciens

ville d'Athenes, à cause des lettres. Estant iuge entre deux meschans hommes E
il ordonna que l'un s'en fust hors de Macedoine, & que l'autre courust apres. Il
voulait vn iour loger son camp en vn beau lieu, mais entendant qu'il n'y auoit point
de fourrage pour les bestes, il fut contrainct de s'en partir, en disant: Quelle est no-
stre vie, puis qu'il faut que nous aions le soing d'accommoder iusques aux asnes!
Desirant forcer quelque chasteau, deuant lequel il vouloit mettre le siege, il enuoya
deuant pour reconnoistre la place: Ceux qu'il y auoit enuoyez luy firent rapport
qu'elle estoit si malaisée à approcher, qu'il n'estoit possible de plus, & le luy depai-
gnirent de tout poinct imprenable. Il leur demanda, si estoit si fort inaccessible,
que vn petit asne chargé d'or n'en peust approcher. Lathenes Olynthien, qui
luy auoit aidé à s'emparer de la ville d'Olynthe, se plaignit vn iour à luy, disant que
quelques vns de ses mignons qu'il auoit autour de luy, l'appelloient traistre: Il luy
respondit, que les Macedoniens de leur naturel estoient hommes rudes & grossiers,
& qu'ils appelloient vne marre vne marre, & toutes choses par leur nom. Il conseil- F
loit à son fils Alexandre de parler gracieusement & courtoisement aux Macedoniens
pour acquerir leur bienveillance, pendant qu'il luy estoit loisible d'estre gracieux,
regnant vn autre: comme si eust voulu dire, que quand il seroit Roy il faudroit
qu'il leur teint grauité de maistre & seigneur, & qu'il fist iustice. Aussi luy conseilloit
il de tascher à acquerir l'amitié de ceux qui auoient credit & autorité és bonnes
villes, autant des mauuais comme des bons, pour puis apres vser des bons, & abu-
ser des meschans. Philon gentilhomme Thebain luy auoit fait beaucoup de plai-
sir du temps qu'il demoura ostager en la ville de Thebes: car il estoit logé en sa mai-
son, & depuis ne voulut oncques receuoir dons ne presens de luy: au moien dequoy
Philippus luy disoit, Ne m'oste point le tiltre & l'honneur d'invincible, estant vaincu
de courtoisie & de liberalité par toy. Il auoit esté pris grand nombre de prison-
niers en vne bataille, & estoit present à les voir vendre à l'encan, seant dedans sa
chaire, aiant sa robbe reboursee vn peu plus haut qu'il n'estoit honneste, & y eut vn G
des prisonniers que lon vendoit qui luy crya tout haut: Je te supply, Sire, de me par-
donner, que ie ne sois point vendu: car ie te suis amy de pere en fils: Philippus
luy demanda, De quel costé, & comment est venue ceste amitié entre nous? Je te
le veux dire tout bas en l'oreille, respondit le prisonnier: Philippus commanda que
lon luy amenast: & lors le prisonnier s'approchant de pres luy dit tout bas, Abbaisse
vn petit le deuant de ton manteau, Sire: car estant ainsi assis, tu monstres ce qui n'est
pas honneste de descourir. Lors Philippus dit tout haut à ses gens, Deliurez le, & le
laissez aller, car il est voirement de mes amis, & de ceux qui me veulent bien, mais il
ne m'en souuenoit pas. Il y eut quelquefois vn sien hoste qui le conuia d'aller soupper
chez luy, il y alla: mais par le chemin il rencontra plusieurs qu'il y mena aussi quand
& luy, dont il appercent que son hoste se troubla tout, pour ce qu'il n'auoit pas ap-
presté assez à soupper pour tant de gens: ce qu'ayant Philippus apperceu, enuoya se- H
crettement dire en l'oreille à tous ceux qu'il auoit amenez, qu'ils gardassent en leur
estomach lieu pour la tarte: les autres cuydant qu'il le dist à bon escient, s'absteindrent
de manger, de maniere que la viande vint à estre suffisante pour tous. Quand il en-
tendit la mort d'Hipparchus natif de l'Isle d'Eubœe, il en fut fort desplaisant: & cōme
quelqu'un des assistans luy dist, Si estoit il deormais meur pour mourir: Ouy bien,
dit-il, quant à luy, mais non pas quant à moy, à qui il est mort trop tost: car il est
mort auant que d'auoir receu de moy recompense digne de l'amitié qu'il me portoit.
Estant aduertie que son fils Alexandre trouuoit mauuais, & se plaignoit de ce qu'il
engendrait enfans de plusieurs femmes, il luy dit: Puis que tu vois donc que tu auras
plusieurs concurrens & competeurs du Royaume apres ma mort, mets peine d'e-
stre homme de bien, à fin que tu paruiennes à la couronne, non tant par moy, pour
estre

A estre mon heritier, que par toy-mesme pour en estre digne. Il l'admonestoit fort d'estudier soigneusement sous Aristote en la philosophie: à fin, dit-il, que tu ne faces plusieurs choses que j'ay faites, dont ie me repens. Il auoit vne fois donné quelque office de iudicature à vn qui luy estoit recommandé par Antipater: mais depuis ayant entendu qu'il se paignoit les cheueux & la barbe, il la luy osta, disant, que celuy qui en ses cheueux estoit faulsaire, mal-aisement en bon affaire seroit loyal. Machetas quelquefois plaidoit vne cause deuant luy qui sommeilloit, de maniere qu'à faute d'auoir bien compris & entendu le faict, il le cōdemna a tort: parquoy Machetas se prit à crier tout haut, qu'il en appelloit. Philippus indigné de cela, luy demanda incontinent, deuant qui il appelloit de luy: Deuant toy-mesme, Sire, respondit-il, quand tu seras bien esueillé, & que tu voudras plus attentiuement ouyr & comprendre mon faict. Philippus picqué de ces paroles, se leua en pieds, & y pensant mieux à soy, congneut qu'il auoit fait tort à Machetas par sa sentence, & neantmoins ne voulut point reuoker ne casser son iugement, mais luy mesme paya de son argent autant comme pouuoit valoir la chose dont il estoit question au proces. Hérpalus auoit vn sien parent & amy nommé Crates, atteint & conuaincu de grands crimes: il pria Philippus qu'il payast bien l'amende, mais que la sentence ne fust point prononcee contre luy, pour en euitier la honte & le deshonneur: mais Philippus luy fit response: Il vaut mieux que luy mesme porte le deshonneur de sa faute, que non pas moy pour luy. Ses familiers se courrouçoient de ce que les Peloponensiens, qui auoient receu beaucoup de biens de luy, le siffoient en la feste & assemblée des ieux Olympiques: Et que feroient ils au pris, leur respondre il, si nous leur eussions fait desplaisir? Estant en son camp, il dormit vn matin plus haute heure qu'il n'auoit accoustumé, & s'estant à la fin esueillé & leué, il dit, Je pouuois bien dormir seurement, puis que Antipater veilloit. Vn Musicien ioueur d'instruments auoit sonné deuant luy durant son soupper, Philippus le voulut reprendre de quelque passage, & commença à entrer en dispute contre luy de la Musique des instruments: J'à Dieu ne plaise, Sire, luy dit adonc le musicien, qu'il t'aduienne jamais tant de mal, que tu entendes ces choses-là mieux que moy. Vne autre fois il estoit endormy sur iour, au moien dequoy les Grecs qui auoient affaire à luy, estoient contrains d'attendre longuement à sa porte, tellement qu'ils s'en fachoient & courrouccoient: Antipater leur respondit, Seigneurs Grecs, ne vous esbahissez pas si Philippus dort maintenant, car quand vous dormiez il veilloit. Il fut quelque temps en mauuais mesnage avec sa femme Olympiade, & son fils Alexandre, durant lequel different Demaratus gentilhomme Corinthien l'alla visiter: Philippus luy demanda, comment viuoient les Grecs les vns avec les autres: Vrayement, respondit Demaratus, tu te soucies bien de l'union & concorde des Grecs les vns avec les autres, veu que les personnes qui te touchent de plus pres, & que tu dois auoir les plus cheres, sont en tel diuorſe avec toy. ce mot luy fit penser si bien, que depuis il appaisa son courroux, & se reconcilia avec eux. Vne pauvre vieille aiant procez, vouloit qu'il en fust iuge, & l'en pressoit ordinairement: il respondoit, qu'il n'auoit pas loysir d'y vacquer & entendre: & la vieille se prit à crier tout haut, Ne veuilles donc pas estre Roy. & luy estonné & touché au vif de ceste parolle, ne l'ouit pas seulement elle, mais aussi tous les autres de reng.

Alexandre estant encore enfant ne se resiouissoit point quand il oyoit dire que son pere gaignoit & conqueroit tout, & disoit aux enfans d'honneur qui estoient nourris avec luy, Mon pere ne me laissera rien à faire ny à conquerir. Et comme les enfans luy respondissent, Voire-mais c'est pour toy qu'il acquiert: Que me profitra il, dit-il, d'auoir beaucoup de biens, & de n'auoir rien à faire? Il estoit fort dispos de sa personne, & viste à merueilles, tellement que son pere le voulut vne fois marier à

Les dictz notables des anciens

„ courir en la carriere avec les autres coureurs, qui couroient pour gagner le pris és E
 „ ieux Olympiques: Je le voudrois bien, respondit-il, prouueu que ce fussent Roys
 „ qui courussent avec moy. Vn seoir bien tard on luy amena quelque ieune garce
 „ pour coucher avec luy: il luy demanda, pour quelle cause elle estoit venue si tard:
 „ elle respondit, qu'elle attendoit que son mary fust couché: & lors il tenfa bien aspre-
 „ ment ses gens: pour ce, dit-il, qu'il ne s'en a gueres fallu, que par vous ie n'aye com-
 „ mis adultere. Son gouuerneur Leonidas le reprit vn iour, de ce que faisant sacrifice
 „ de parfum aux Dieux, il y mettoit trop d'encens à son gré, & y retournoit trop sou-
 „ uent à en prendre à pleins poings, pour mettre sur le feu, en luy disant: Quand tu
 „ auras conquis la prouince, qui produit l'encens, alors tu en mettras dedans le feu
 „ tant que tu voudras. Parquoy depuis, apres qu'il eust conquis l'Arabie, il luy escri-
 „ uit vne lettre de telle substance: Je t'enuoye cinq cens quintaux d'encens & de cinna-
 „ mome, à fin que tu apprennes à n'estre plus chiche enuers les Dieux, t'auisant que
 „ pour le iourd'huy nous sommes seigneurs de la prouince qui porte les drogues aroma- F
 „ tiques & senteurs. Le iour de deuant qu'il donnast la bataille du Granique, il en-
 „ horta les Macedoniens de faire bonne chere, & de despendre tout ce qu'ils auoient
 „ de prouision de viures, pour ce que le lendemain ils dineroient aux despens de leurs
 „ ennemis. Vn nommé Perillus luy demanda de l'argent pour marier ses filles: il luy fit
 „ bailler cinquante talents, qui sont enuiron trente mille escus: l'autre luy dit, que
 „ c'estoit bien assez de dix seulement: Alexandre luy repliqua, Si c'est assez à prendre
 „ pour toy, ce n'est pas assez à donner pour moy. Il commanda aussi à ses thresoriers
 „ de donner au philosophe Anaxarchus tout ce qu'il leur demanderoit: les thresoriers
 „ luy rapporterent, qu'il demandoit vne somme excessiue, de cent talents: & Alexan-
 „ dre leur respondit, Il fait bien, fasseurant qu'il a en moy vn amy qui peut & veut luy
 „ en donner autant. En la ville de Milet il trouua plusieurs grandes statues des cham-
 „ pions, qui anciennement auoient emporté le pris és ieux Olympiques & Pythiques:
 „ Et où estoient, dit-il aux Milesiens, ces grands corps icy, quand les Barbares assie- G
 „ geoient & prenoient vostre ville?

La Roynede la Carie, nommee Ada, luy enuoyoit soigneusement tous les iours
 des confitures, & de la patisserie qui estoit fort exquisement faite par des ouuriers &
 patissiers tresexcellents: mais Alexandre luy manda, qu'il auoit bien d'autres patif-
 fiers & cuisiniers encore plus singuliers que ceux là, à sçauoir pour le disner, le leuer
 matin, & cheminer la nuit auant iour: & pour le soupper, le peu manger à disner.
 Son armee estant toute preste pour donner la bataille à Darius, les capitaines luy
 „ vindrent demander, s'il auoit plus rien à leur commander: non, dit-il, sinon que vous
 „ faciez razer les barbes aux Macedoniens. Parmenion s'esmerueillade ce commande-
 „ ment: & Alexandre luy dit, Ne sçais tu pas qu'il n'y a point de meilleure prise en com-
 „ battant, que de saisir son ennemy à la barbe? Darius luy enuoya offrir dix milles ta-
 „ lens, qui sont six millions d'or comptant, & de partir egalemeht par moitié toute l'A- H
 „ sie avec luy: tellement que Parmenion luy dit, J'accepterois ceste offre là, quant à
 „ moy, si j'estois Alexandre: & moy aussi certainement, respondit Alexandre, si j'estois
 „ Parmenion: mais au demourant il fit response à Darius, que la terre ne pouuoit porter
 „ deux Soleils, ny l'Asie endurer deux Roys. Et comme il estoit prest à donner la der-
 „ niere bataille qui deuoit decider tout, pres le village d'Arbelles, contre vn million
 „ d'hommes en armes, il vint quelques vns de ses mignons à luy accuser les souldards
 „ de ce, qu'ils tenoient propos en leurs loges & conspiroient entre eux de ne porter rien
 „ du butin au logis du Roy, & le retenir tout pour eulx: Alexandre s'en prit à rire, &
 „ leur dit: Vous m'apportez de bonnes nouuelles, car ce sont propos d'hommes deli-
 „ berez de vaincre, & non pas de fuir. Plusieurs des souldards mesmes venoient à luy qui
 „ luy disoient, Sire, ayez bon courage, & ne craignez point le grand nombre de voz
 „ enne-

A ennemis : car ils ne pourront pas supporter l'odeur seulement qui sort de nos aixelles. Mais ainsi que lon dressoit l'armee en bataille , il apperçeut vn soudard qui raccou-
stroit l'attache avec laquelle il dardoit son iavelot : il le cassa sur le champ, & le chassa
des bandes comme soudard inutile & indigne d'en estre, veu qu'il accoustroit encore
ses armes à l'heure propre qu'il en falloit vser. Vne fois comme il lisoit des lettres
missiues de sa mere Olympiade, dedans lesquelles il y auoit plusieurs choses secretes,
& plusieurs charges à l'encontre d'Antipater, Hephestion s'approchant de luy les
lêut aussi quand & luy, ainsi qu'il auoit accoustumé de faire. Alexandre ne l'en en-
garda point, mais apres qu'il eut acheué de lire, tirant son cachet de son doigt il le luy
meit dessus les lêures. Estant au temple du Dieu Hammon, il fut nommé par le
„ grand prestre du lieu, Fils de Iupiter : à quoy il respondit, Ce n'est pas de merueille,
„ car Iupiter par nature est pere de tous, mais il adopte & aduouë pour siens particu-
„ lierement ceux qui sont les plus gens de bien. Il y fut en quelque rencontre blecé
B d'un coup de fiesche à la cuisse : si accoururent soudain à luy plusieurs de ceux qui par
flateries auoient accoustumé de l'appeller Dieu : & lors avec vn visage riant il leur dit,
en leur monstrant sa playe : C'est du vray sang, comme vous pouuez voir,
& non de l'humeur telle

Homere
Iliad lib. v.

Qui coule aux Dieux de nature immortelle.

Comme quelques vns louâssent deuant luy la simplicité d'Antipater, disans qu'il
„ viuoit austèrement, sans superfluité ne delices quelsconques : il leur respondit, Anti-
„ pater est voirement blanc au dehors, mais soyez assurez qu'il est tout rouge comme
„ pourpre au dedans. Vn de ses amis luy donnoit à souper en son logis au cœur d'hyuer
qu'il faisoit grand froid, & fit apporter en la salle vn petit foyer, sur lequel n'y auoit
„ que bien peu de feu. Alexandre luy dit, Fais apporter du bois ou de l'encens. [voulant
dire, que si c'estoit pour eschauffer sa salle, il y falloit du bois d'auantage : & que si
n'y vouloit point plus de feu, que ce n'estoit que pour faire du parfum aux Dieux.]
C Antipatrides fit venir en vn festin, où il estoit, vne belle ieune garce baladine, qui
chanta & balla si bien, qu'Alexandre s'affectionna vn peu à la voir : mais premier il
demanda à Antipatrides qui l'auoit amenee, si en estoit point amoureux : il luy con-
„ fessa que ouy : adonc Alexandre luy dit, O malheureux que tu es, ne l'emmeneras-tu
„ doncques pas vistement hors d'icy ? Vne autre fois Cassander s'efforça de baiser
malgré luy vn ieune garson nommé Python, duquel estoit amoureux vn Euius ex-
cellent ioueur de fleutes : Alexandre voyant que cest Euius en estoit fort marry, se leua
„ en cholere contre Cassander, en criant, Comment il ne fera doncques pas deormais
„ loisible par nous d'aimer quelqu'un. Ainsi comme il renuoyoit de son camp les
malades & estropiez vers la mer, pour les reconduire en leurs maisons, on luy vint
rapporter qu'un nommé Antigènes s'estoit fait escrire entre les malades & estro-
piez, qui n'estoit ne l'un ne l'autre : il le fit venir deuant luy, là où le soudard luy con-
D fessa rondement, qu'il feignoit voirement estre malade, & qu'il ne l'estoit pas, pour
l'amour qu'il portoit à vne ieune femme nommée Telesippa, qui s'en retournoit
vers la marine. Alexandre luy demanda à qui il falloit parler pour la faire demourer,
& aiant entendu qu'elle n'estoit point esclauue, mais de libre condition, il luy dit,
„ Taschons doncques par quelques bons moyens à la gagner, tant qu'elle se contente
„ de demourer avec nous : car de retenir par force vne femme libre, ie ne le ferois ia-
„ mais. Apres la bataille gaignee contre Darius, aiant en sa puissance les Grecs, qui
auoient esté à la soulde de son ennemy, il commanda que lon gardast aux fers les pri-
„ sonniers d'Athenes, d'autant qu'aiants moyen de viure du public de leur ville, ils al-
„ loient neantmoins à la soulde des Barbares : & les Thessaliens aussi, d'autant qu'aiants
„ vn gras & fertile pais, ils ne s'arrestoient pas à le labourer, & aimoient mieulx aller
„ seruir les Barbares : mais il commanda que lon laissast aller les Thebains où ils vou-

Les di&ts notables des anciens

droient, pource, dit-il, que nous ne leur auons laiss& ne ville à habiter, ny terre à labourer. Aians pris prisonnier vn Indien, que lon disoit & qui estoit de fai&t excellent à tirer de l'arc, de sorte qu'il ne faillloit iamais de donner d'une fle&che dedans vn petit anneau, il luy fit commander de tirer deuant luy, à fin de voir la preuue de son art. L'Indien ne le voulut pas faire: dequoy Alexandre s'indigna si fort, qu'il commanda qu'on le fist doncques mourir: mais ainsi qu'on le menoit, il dit à ceux qui le conduisoient, qu'il y auoit desia plusieurs iours qu'il ne s'estoit point exercit&, & que pour ceste occasion il auoit eu peur de faillir. Ce qu'Alexandre aiant entendu l'en estima d'auantage, & commanda qu'on le laissast aller, & luy donna encore vn present, d'autant qu'il auoit monstr& en cela vne grande magnanimit&, aiant mieux aim& mourir, que d'estre trouu& indigne de la reputation que lon luy donnoit. Taxiles estoit vn des Roys des Indes qui luy vint au deuant, & le pria qu'ils n'eussent point de guerre ensemble: Mais si tu es, dit-il, moindre que moy re&oy des bien-fai&ts de moy: & si tu es plus grand, que i'en re&oiue de toy. Alexandre luy fit
» response: Pour le moins faut-il que nous combations de cela, à s&auoir lequel de
» nous deux fera plus de bien à son compaignon. Entendant ce que lon disoit d'une
» place des Indes assise dessus vn rocher, que lon appelloit Aorne, qu'elle estoit de tout
» poin&t imprenable, mais que celuy qui la tenoit, estoit homme las&che & couard: La
» place, dit-il, est donc prenable. Vn autre qui tenoit vn chasteau que lon estimoit sem-
» blablement imprenable, se rendit à luy, & se mit luy & sa place entre ses mains.
Alexandre luy rendit son païs, voulant qu'il le teint comme il faisoit au parauant: &
» si luy adiousta encore d'autres terres qu'il luy donna, disant, Cest homme a fai&t sage-
» ment de se fier plus tost à vn Prince homme de bien, qu'à vne place forte. Apres la
prise de la place forte d'Aorne, aucuns de ses mignons luy disoient, qu'il auoit sur-
» mont& Hercules par la gloire de ses fai&ts: Il leur respondit, Vous direz ce que vous
» voudrez, mais quant à moy ie n'estime pas tous mes fai&ts, avec tout mon empire,
» dignes d'estre contrepe&ez à vne seule parole d'Hercules. Estant aduertiy que quelques
» vns de ses familiers iouoient aux dez, non pas pour iouer & passer le temps, mais
» excessiuement pour se destruire, il les condamna en vne amende. Entre ceux qui
» approchoient plus pres de luy, il honnoroit le plus Craterus, & aimoit le plus Heph-
» stion: Car Craterus, disoit-il, aime le Roy, & Hephstion aime Alexandre. [voulant
dire, que Craterus, homme sage & vaillant, aimoit la grandeur de son maist&re: &
Hephstion, homme de bonne compagnie, aimoit la personne propre de son prince.]
Il enuoya quelquefois en don cinquante talens, qui sont trente mille escus, au philo-
» sophe Xenocrates: qui les refusa, & n'en voulut rien prendre, disant qu'il n'en auoit
» point affaire. On le rapporta à Alexandre, qui demanda: Et comment, Xenocrates
n'a-il pas vn amy? car quant à moy, dit-il, la cheuance du Roy Darius à peine m'a peu
suffire à departir entre mes amis. Porus vn Roy des Indes fut par luy pris en bataille,
» apres laquelle Alexandre luy demanda, Comment veux-tu que ie te trait&e? Porus
» luy respondit, Royalement. Alexandre luy repliqua, fil vouloit rien dire d'auan-
» tage: Non, dit-il, pource que tout est compris sous ce mot de Royalement. Alexan-
dre estimant beaucoup son bon sens & sa vaillance, non seulement luy rendit son
Royaume, mais luy adiousta encore beaucoup d'autre païs. On luy rapporta vn iour
» qu'il y auoit quelqu'un qui ne faisoit que mesdire de luy: il respondit, C'est acte de
» Roy, de souffrir patiemment d'estre blas&m& pour bien faire. En mourant il dit à
» ses familiers qui estoient autour de luy, Ie voy bien que j'auray vn grand epitaphe apres
» ma mort. c'est à dire, des ieux funebres que lon faisoit au trespas des grands person-
nages. Apres qu'il fut deced&, Demades orateur Athenien voyant son arm&e demou-
ree sans chef qui y commandast, dit, qu'elle ressembloit à son aduis au geant Polyph&-
mus Cyclops, apres qu'Vlysses luy eut creu& son œil. Ptolomeus fils de Lagos Roy
d'Ægypte,

A d'Ægypte, le plus souuent couchoit & soupoit au logis de ses amis : & fil leur donnoit à souper , il se seruoit de leurs meubles , enuoyant emprunter de la vaisselle, des tables, des lits , pour ce qu'il n'en auoit chez luy iamais plus qu'il en falloit pour
 „ le seruice de sa personne : & disoit , qu'enrichir les autres luy sembloit plus royal que
 „ de s'enrichir soy-mesme. Antigonus leuoit grosse somme d'argent sur ses subiects
 „ avec grosse rigueur : à raison de quoy quelqu'un luy dit , Voire-mais Alexandre ne
 „ faisoit pas ainsi : Ce n'est pas de merucille, dit-il, car il moissonnoit l'Asie , & ie ne fais
 „ que la glaner. Il veit vn iour emmy son camp des simples souldards qui iouoient à
 la boule, aians leurs corselets sur le dos , & leurs morrions en teste : il y prit plaisir,
 & fit appeller leurs Capitaines , en intention de les en louer : mais quand il sceut,
 qu'ils estoient en vne tauerne où ils beuuoient, il leur osta leurs compagnies , & les
 donna aux simples souldards. Quand il fut deuenu vieux, il commença à se monstrier
 plus doux & plus gracieux enuers vn chascun qu'il n'auoit iamais fait , & se compor-
 B. toit plus humainement en toutes choses , dont tout le monde s'esbahissoit : & il res-
 „ pondoit à ceux qui luy en demandoient la cause, C'est pourautant, dit-il, que parauant
 „ ie cherchois de me faire grand en toute puissance : mais maintenant que ie l'ay acquise,
 „ ie n'ay plus besoing que de gloire & de beneuolence. Vn sien fils nommé Philippus
 luy demanda vn iour en presence de beaucoup de gens , quand partiroit le camp : il
 „ luy respondit, As-tu peur de n'ouïr pas le son de la trompette ? Ce mesme fils auoit
 vn iour procuré qu'on luy fist son logis chez vne femme veufue , laquelle auoit trois
 belles filles. Le Roy son pere en estant aduertý , enuoya querir le mareschal des
 logis, & luy dit, Ne me deslogeras-tu point mon fils de ce logis si estroit ? Il fut quel-
 que fois malade d'une maladie longue : depuis estant retourné en conualescence,
 „ Nous n'en vaudrons pas pis , dit-il, d'auoir esté malades, car cela nous a admonestez
 „ de ne nous enorgueillir point, attendu que nous sommes mortels. Hermodotus
 poëte en quelques compositions siennes poëtiques l'appelloit fils du Soleil : & luy à
 C l'encontre disoit, Celuy qui vuide sa selle percee, sçait bien avec moy qu'il n'en est
 rien. Quelqu'un disoit en sa presence , que toutes choses estoient iustes & honnestes
 „ aux Roys : Ouy bien, dit-il, aux Roys des Barbares : mais à nous cela seulement est
 „ iuste & honneste, qui par nature l'est de soy-mesme. Marsias son frere auoit vn procès
 „ deuant luy , & le prioit qu'il fust plaidé & iugé à huys clos en son logis : Mais bien,
 „ respondit il, au beau milieu de la place, à la veüe de tout le monde, si nous ne voulons
 „ faire tort à personne. Il fut vne fois en hyuer contrainct de loger son camp en lieu, où
 il n'y auoit commodité quelconque pour la vie de l'homme : à l'occasion de quoy
 quelques souldards ne sçachans pas qu'il fust si pres d'eux, le maudissoient , & luy di-
 „ soient iniure : & luy entreouurant avec son baston la toile de son pauillon leur dit, Si
 „ vous n'allez plus loing mesdire de moy , ie vous en feray bien repentir. On estimoit
 que vn Aristodemus, l'un de ses familiers, fust fils d'un cuyfinier : au moyen de quoy,
 D comme il luy conseilla de retrencher sa despense ordinaire, & de restraindre ses dons,
 „ il luy respondit, Tes propos , Aristodemus, sentent fort leur deuantreau de cuyfinier.
 Les Atheniens donnerent droict de bourgeoisie de leur ville à vn sien esclaué, comme
 „ fil eust esté personne libre , pour luy faire honneur : mais il leur dit , Ie ne voudrois
 „ pas fouëtter vn Athenien. Il y eut vn ieune homme disciple du Rhetoricien Anaxi-
 menes, qui prononça par cœur deuant luy vne harangue composee de longue main.
 Apres qu'il eut acheué, le Roy luy demanda quelque chose qu'il vouloit sçauoir. Le
 ieune homme qui ne sceut que respondre , se teut tout quoy : & adonc le Roy luy
 „ dit, Que dis-tu ? n'y a-il que cela escrit en tes tablettes ? Vn autre affecté Rhetoricien
 „ haranguant deuant luy vint à dire , La saison iette-nege auoit fait faillir l'herbe aux
 „ champs : Il ne se peut tenir de luy dire, en rompant son propos, Ne cesseras tu aujour-
 „ d'huy de parler à moy , comme si tu parlois à vne tourbe populaire , sans iugement ?

Les dictz notables des anciens

Thrasylus philosophe Cynique luy demanda vn iour vne drachme d'argent en don, E
„ qui sont trois soulds & quatre : Il luy respondit, Cela n'est pas vn don de Roy. Donne
„ moy donc vn talent, dit le Philosophe : & le Roy luy respondit, Cela n'est pas prise
„ de philosophe Cynique. Enuoyant son fils Demetrius avec grosse flotte de vais-
seaux en la Grece, pour deliurer les Grecs de seruitude, comme il disoit, il en rendoit
la cause, par ce qu'il disoit, que sa gloire reluiroit de dessus la Grece par toute la terre
habitable, ne plus ne moins que feroit vn brandon de feu que lon mettroit au des-
sus d'une haulte tour. Le poëte Antagoras estoit en son camp, qui faisoit bouillir
vn congre dedans vne poille, & secouoit la poille luy-mesme. Antigonus le regar-
„ dant faire derriere luy, se prit à luy dire: Antagoras, penses-tu qu'Homere descriuant
„ les haults faictz du Roy Agamemnon s'amusa à faire cuire vn congre? Antagoras se
„ retournant luy repliqua, Mais penses-tu, Sire, que le Roy Agamemnon faisant ces
„ grandes choses que décrit Homere, allast curieusement recercher parmy son camp,
„ fil y auoit quelqu'un qui fist bouillir vn congre? Il luy fut vne nuit aduis en son- F
geant, qu'il voyoit Mithridates moissonnant vn bled aux espics d'or, à raison dequoy
il resolut en soy-mesme de le faire mourir : & aiant communiqué à son fils Deme-
trius ceste sienne deliberation, il luy fit iurer qu'il n'en diroit iamais rien : mais neant-
moins Demetrius tirant à part Mithridates, & se promenant le long de la marine
„ avec luy, il escriuit du bout de sa iaueline dedans le sable, Fuy t'en Mithridates. Mi-
thridates aiant soudain entendu ce qu'il vouloit dire, s'enfuit au Royaume de Pont,
là où il regna toute sa vie. Demetrius aiant mis le siege deuant la ville de Rhodes, y
trouua en l'un des faulx-bourgs le tableau de la ville d'Ialysus que paignoit Protoge-
nes. Les Rhodiens l'enuoyerent prier par vn herault, de vouloir pardonner à ceste
excellente peinture : il leur fit response, qu'il gasteroit plus tost les portraictz & ima-
ges de son propre pere, que celle peinture. Aiant accordé avec les Rhodiens, il leur
laissa sa grande machine de batterie qui s'appelloit Helepolis, c'est à dire, engin à
prendre villes, pour tesmoigner au temps aduenir la grandeur de ses ouurages, & la G
valeur de leur courage. Les Atheniens s'estans rebellez contre luy, il reprit leur ville
qui auoit ja grande faulte de viures. Si fit incontinent proclamer vne assemblee de
ville, en laquelle il declara, qu'il leur donnoit en pur don grande quantité de bleds,
mais en sa harangue il luy aduint de commettre vne incongruité : soudain l'un de
ceux de la ville, qui estoit assis pour l'escouter, le releua, prononçant tout hault le
„ mot ainsi comme il le deuoit auoir dit : Et pour ceste correction-là, dit-il, adonc, ie
„ vous donne encore d'auantage autres cinq mille mines de bled. Antigonus le se-
cond, comme Demetrius son pere aiant esté pris prisonnier luy eust enuoyé dire par
vn de ses familiers, qu'il n'adiousta point de foy, ny ne fist aucun compte de chose
qu'il luy escriuist, si d'aduenture il estoit forcé de ce faire par Seleucus qui le tenoit
prisonnier, & que pour cela il ne luy rendist aucune des villes qu'il tenoit : au con-
traire il escriuit à Seleucus, qu'il luy cederait toutes les terres qu'il auoit en son obeis- H
sance, & se mettroit soy-mesme en ostage, s'il vouloit deliurer son pere. Sur le poinct
qu'il estoit prest à donner vne bataille par mer aux Lieutenans & Capitaines de Pto-
lomeus, le pilote de sa galere luy vint dire, que leurs ennemis auoient bien plus grand
„ nombre de vaisseaux qu'eux : Et moy, dit-il, qui suis icy en personne, pour combien
„ me comptes-tu? Se retirant vne fois de deuant ses ennemis qui le venoient assaillir,
„ il dit qu'il ne fuyoit pas, mais qu'il alloit apres l'utilité qui estoit derriere luy. Et com-
me vn ieune homme fils d'un fort vaillant pere, mais au demourant n'estant pas tenu
pour guerres bon soudard quant à luy, prochassa d'auoir la soude de son pere:
„ Voire-mais, dit-il, ieune fils mon amy, ie donne bien bon appointment & fais des
„ presents à ceux qui sont eulx-mesmes vaillants, non pas à ceux qui ne sont qu'en-
„ fans de vaillants hommes. Estant Zenon le Citicien trespassé, celui qu'il estimoit
le plus

- A** le plus entre tous les Philosophes, il dit que le theatre de ses gestes luy estoit osté: [comme celuy que pour sa gloire il desiroit plus auoir spectateur & approbateur de ses faicts.] Lyfimachus aiant esté surpris au pais de Thrace par le Roy Dromichetes, en vn destroict où il fut contrainct par la soif de se rendre luy & toute son armee à la mercy de son ennemy: apres qu'il eut beu, estant prisonnier, O Dieux comment pour peu de plaisir ie me suis fait esclau, au lieu de Roy que i'estois! Deuisant vn iour avec Philippides poëte comique, qui estoit son familier & amy, il luy dit: Que veux-tu que ie te communique de ce qui est à moy? Ce qu'il te plaira, Sire, luy respondit le poëte, pourueu que ce ne soit point de tes secrets. Antipater aiant entendu comme le Roy Alexandre le grand auoit faict mourir Parmenion, dit en se bahissant, Si Parmenion a attenté à la vie d'Alexandre, à qui se fault-il plus fier? si non, que fault-il plus faire? Il disoit de l'orateur Demades, quand il fut deuenu vieil, qu'il ne luy estoit demouré que le ventre & la langue, non plus que d'une hostie que lon a toute consommée. Antiochus le troisieme escriuit aux villes de son obeissance, que si d'adventure il leur mandoit de faire aucune chose qui fust contraire aux loix, elles n'y obeissent point, comme aians esté les lettres despeschees par surprise. Aiant trouué la religieuse de Diane belle par excellence, il se partit incontinent de la ville d'Ephese, de peur que l'amour ne le forçast de cōmettre contre sa volonté chose qui ne fust pas loisible. Antiochus surnommé le Sacre, faisoit la guerre à son frere Seleucus, à qui demoureroit Roy: & neantmoins apres que Seleucus eust esté defait en bataille par les Galates, tellement que lon estimoit qu'il eust esté luy-mesme taillé en pieces, à cause qu'il ne comparoïssoit point, & ne scauoit-on qu'il estoit deuenu: Antiochus posant son accoustrement Royal de pourpre, prit vn habillement noir: & vn peu apres aiant eu nouuelles qu'il estoit sain & sauf, il sacrifia aux Dieux pour leur rendre graces de son salut, & commanda aux villes de son obeissance d'en faire feste, en portant chapeaux de fleurs sur leurs testes. Eumenes estant tombé dedans les embusches que luy auoit dressees Perseus, le bruit courut incontinent par tout qu'il y estoit mort: tellement que la nouuelle en aiant esté apportee iusques en la ville de Pergamum, Attalus son frere se mit aussi tost le frontal Royal, autrement appelé Diadème, à l'entour de la teste, & qui plus est espousant sa femme, se porta pour Roy: mais peu apres estant aduertie que son frere estoit sain & sauf, & qu'il s'en venoit en sa maison, il s'en alla au deuant de luy comme il auoit accoustumé au parauant avec les gardes du corps du Roy, portant luy-mesme vne iaueline de barde en sa main comme les autres. Eumenes le salua & l'embrassa amiablement, luy disant seulement tout bas en l'oreille, Vne autre fois ne te haste pas tant d'espouser ma femme, que tu ne m'ayes veu mort: sans que iamais depuis en toute sa vie il luy dist ne luy fust chose aucune, dont il se deust deffier: ains qui plus est en mourant luy laissa son Royaume & sa femme: en recompense dequoy son frere ne voulut iamais faire nourrir ny eleuer aucun de ses enfans, combien qu'il en eut plusieurs de sa femme, ains rendit de son viuant le Royaume au fils de son frere Eumenes, apres qu'il fut paruenue en age de regner. Pyrrhus Roy des Epirotes eut plusieurs fils, lesquels estans encore enfans luy demanderent vn iour, à qui d'eux il laisseroit son Royaume apres sa mort: Il leur respondit, A celuy de vous qui aura l'espee la mieux trenchante. On luy demanda vne fois, quel estoit le meilleur ioueur de fleutes, à son aduis, Pithon ou Cephalus: Polyperchon dit-il, est le meilleur Capitaine. Aiant desfait les Romains en deux rencontres, mais avec grand' perte de ses meilleurs Capitaines, & de ses meilleurs seruiteurs: Si nous gagnons, dit-il, encore vne autre bataille cōtre ces Romains, nous sommes perdus. En montant sur mer au partir de la Sicile, d'autant qu'il voyoit bien qu'il ne viendroit iamais à bout de la gagner, en se tournant deuers ses amis: O la belle carriere, dit-il, à luitter que nous laissons aux Romains & aux Carthaginois!

Les dictz notables des anciens

" Ses foudards le surnommoient l'Aigle : & il leur respondoit : Pourquoi non, quand E
 " vos armes sont les ailes qui m'enleuent au ciel ? Estant aduerty que quelques ieunes
 hommes en beuant auoient tenu à la table plusieurs propos outrageux & iniurieux
 de luy, il commanda qu'on les luy amenaist tous le lendemain. Quand ils furent ve-
 " nus, il demanda au premier, si estoit vray qu'ils eussent tenu tels propos de luy : Ouy,
 " Sire, respondit-il, mais nous en eussions bien dit encore d'auantage, si le vin ne nous
 " eust failly. Antiochus, celuy qui fit deux voyages contre les Parthes, estant à la
 chasse poursuiuit si longuement sa proye, qu'il s'esgara de tous ses amis, & tous ses
 seruiteurs, tant qu'il fut contrainct pour la nuit de se loger en la cabane de bien pau-
 " ures païsans : là où en soupant il leur demanda, que c'est que lon disoit du Roy. Il luy
 " fut respondu, Que le Roy estoit vn bien bon prince au demourant, mais que pour
 " ne vouloir pas prendre peine à faire ses affaires luy-mesme, il se remettoit de beau-
 " coup de choses à ses mignons qui ne valloient rien, & qu'il passoit beaucoup d'affai-
 " res de grande importance en nonchaloir, pour estre trop affectionné à la chasse. Il ne
 respondit rien sur l'heure : mais le lendemain au point du iour, comme ses gardes
 fussent arriuez en ceste loge, estant descouuert, en reprenant son habit Royal de
 " pourpre, & le frontal du diadème à l'entour de sa teste : Depuis que ie vous pris pre-
 " mierement à mon seruice, iusques à hier au soir, iamais ie n'auois, dit-il, entendu
 " vne seule parole veritable de moy. Ainsi comme il tenoit le siege deuant la ville de
 Hierusalem, les Iuifs luy demanderent surseance d'armes pour sept iours seule-
 ment, à fin qu'ils peussent solennizer leur plus grande feste : ce que non seulement
 il leur octroya, mais aussi aiant fait apprester bon nombre de taureaux aux cornes
 dorees, & grande quantité de drogues & espices odorantes à faire parfums, il les
 conduisit luy-mesme en procession iusques à la porte de leur ville, & aiant liuré tout
 cest appareil de sacrifice entre les mains de leurs prestres, s'en retourna dedans son
 camp : parquoy les Iuifs esmerueillez de sa religieuse liberalité, incontinent apres
 leur feste se rendirent à luy. Themistocles en sa premiere ieunesse ne faisoit que G
 yurongner & paillarder, mais depuis que Miltiades capitaine general des Atheniens
 eut desfait les Barbares en la plaine de Marathone, iamais on ne le veit faisant aucun
 desordre : & respondoit à ceux qui s'esbahissoient de voir en luy vne si grande mu-
 " ration, Le trophée de la victoire de Miltiades ne me laisse doit dormir ny reposer.
 " On luy demanda quelquefois, lequel il aimeroit mieulx estre Achilles ou Homere :
 " Mais toy-mesme, dit-il, lequel aimerois-tu mieulx estre, ou celuy qui gaigne le pris
 " és ieux Olympiques, ou le crieur qui à son de trompe le proclame victorieux ? Quand
 le Roy Xerxes descendit en la Grece avec celle grande flotte de vaisseaux, crai-
 gnant qu'un orateur Epicydes, qui auoit credit enuers le peuple à cause de son elo-
 quence, mais qui au demourant estoit lasche de cœur, & fort subiect à l'auarice, ne
 paruint par les voix du peuple à estre Capitaine general d'Athenes en ceste guerre,
 & ne fust cause de perdre la ville, il le gaigna par argent, tant qu'il se deporta de la H
 poursuite d'estre capitaine. Eurybiades * le general de toute l'armee n'auoit pas le
 cœur de conclurre à la bataille par mer, à quoy Themistocles faisoit tout ce qu'il
 pouuoit pour esmouuoir & inciter les Grecs : tellement que l'autre luy dit en plein
 " conseil, Ceux qui se leuent auant que ce soit à leur reng és combats publics des
 " ieux sacrez, sont tousiours fouërtez. Il est vray, respondit Themistocles : mais aussi
 " ceux qui demeurent derriere, ne sont iamais couronnez. Eurybiades adonc le capi-
 " taine general leua le baston, comme pour le frapper : & Themistocles luy dit, Frap-
 " pe si tu veux, prouueu que tu escoutes. Voyant qu'il ne pouuoit mettre en la teste
 de ce general Eurybiades qu'il voulust combattre dedans le canal & destroiect de
 Salamine, il enuoya secrettement soubz main aduertir le Roy barbare, qu'il ne lais-
 fast pas eschapper les Grecs qui ne pensoient qu'à s'enfuir : à quoy ce Roy aiant ad-
 iousté

Autrement
 nommé A-
 drianus.

A iousté foy, donna la bataille, qu'il perdit, pour ce qu'il combattit en vn bras de mer long & estroit, qui estoit à l'aduantage des Grecs : & sur l'heure Themistocles renuoya de-rechef vers luy, l'admonester de s'enfuir vers le pas de l'Hellespont, le plus tost qu'il pourroit, pource que les Grecs estoient en propos de luy rompre le pont de nauires qu'il auoit fait bastir sur ce destroit, à fin que ce qu'il faisoit pour sauuer les Grecs, il le semblast faire pour le salut de luy. Vn habitant de la petité Isle de Seriphe luy dit vn iour par maniere de reproche, qu'il estoit renommé pour la gloire de la ville d'Athenes, dont il estoit, non pas pour luy-mesme. Tu dis verité, luy respondit Themistocles, mais ny moy si i'eusse esté Seriphien, ny toy si tu eusses esté Athenien, n'eussions iamais esté renommez. Antiphates le beau fils, du commencement mesprisoit & fuyoit Themistocles qui estoit amoureux de luy, mais depuis quand il le veit paruenir à grande autorité & grande reputation, il le vint rechercher, flater & courtoiser : O ieune fils mon amy, dit-il alors, nous sommes bien tard, mais au moins à la fin, deuenus sages tous deux ensemble. Simonides le poëte luy requeroit en iugement quelque chose qui estoit iniuste, auquel il respondit : Ny toy Simonides ne serois pas bon musicien, si tu chantois contre mesure : ny moy bon magistrat, si ie iugeois contre les loix. Il disoit que son fils qui faisoit faire ce qu'il vouloit à sa mere, estoit le plus puissant homme de la Grece : Pour ce, disoit-il, que les Atheniens commandent au demourant de la Grece, ie commande aux Atheniens, sa mere à moy, & luy à sa mere. Il y auoit deux qui demandoient sa fille en mariage, desquels il prefera l'honneste au riche, disant qu'il aimoit mieux auoir vn homme qui eust affaire de biens, que des biens qui eussent affaire d'un homme. Vendant vn sien heritage il fit proclamer au crieur qui le crioit à vendre, Qu'il auoit bon voisin. Comme les Atheniens estans saouls de luy prissent plaisir à le tondre & rebuter en ses poursuites : O pauures gens, disoit-il, pourquoy vous laissez vous de receuoir souuent de mesmes personnes de bons seruices ? Il disoit qu'il estoit semblable aux grands platanes, sous la rameure desquels les passans se retirent quand ils sont surpris de la pluye : puis quand le beau temps est venu, ils leur arrachent leurs branches, & les deschirent. Semocquant des Eretriens, il disoit qu'ils ressembloient aux Casserons, par ce qu'ils auoient bien des espees, mais ils n'auoient point de cœur. Estant fugitif de la ville d'Athenes premierement, & puis de toute la Grece, il se retira deuers le grand Roy de Perse, là où luy estant audience donnée, il dit, que la parole de l'homme ressembloit proprement aux tapisseries de haute lice figurees & historiees : car en l'une & en l'autre, quand elles sont desployees & estendues bien au long, se descouurent à clair les figures : là où quand elles sont pliees & empacquetees, les portraicts y sont cachez, & n'y cognoit-on rien : au moyen dequoy il demanda terme de certain temps, dedans lequel il peust apprendre la langue Persienne, à fin que de là en auant il peust par luy-mesme se descouurir, & donner à entendre ses conceptions au Roy, non point par vn truchement. Luy ayant doncques le Roy fait plusieurs grands presens, & estant soudain deuenu fort riche, il disoit à ses gens, Enfants nous estions perdus, si nous n'eussions esté perdus. Myronides capitaine general des Atheniens se meit aux champs, pour aller faire la guerre aux Boëtiens, aiant commandé à ceux d'Athenes qu'ils le suiussent avec leurs armes : mais sur le poinct qu'il falloit mener les mains, les Centeniers luy vindrent dire, que leurs gens n'estoient pas encore tous venus : Tous ceux, dit il, qui ont enuie de combattre, sont venus. & ainsi les menant en deliberation de bien faire, gaigna la bataille contre les ennemis. Aristides surnommé le Iuste, faisoit tousiours ses affaires à part au gouuernement de la Chose publique, fuyant toutes ligues & partialitez, d'autant qu'il auoit opinion que l'autorité & le credit qui estoit ainsi acquis par pratiques & menees d'amis, incitoit & poulsait les homes à faire beaucoup de choses iniustes. Et comme

*L'os des
Casserons
s'appelle
espee.*

Les dicts notables des anciens

les Atheniens fussent assemblez en conseil de ville pour proceder au bannissement E
qu'ils appelloient l'Ostracisme, il y eut vn païsan qui ne sçauoit ne lire ny escrire,
qui tenant vne coquille en sa main le pria d'escrire dedans le nom d'Aristides: &
„ qu'il luy demanda, Et comment, cognois-tu bien Aristides? Le païsan luy dit
„ que non, mais qu'il luy faschoit de l'ouïr appeller le Iuste. Aristides ne luy respondit
„ rien, & escriuant son nom dedans la coquille, la luy rebailla. Estant ennemy de
Themistocles, & enuoyé en quelque ambassade quand & luy, arriuez qu'ils furent
„ aux confins de l'Attique, il luy dit, Veux tu Themistocles que nous laissons icy
„ sur les limites du païs nostre inimitié, & puis quand nous serons retournez de nostre
„ ambassade, nous la reprendrons si bon nous semble? Apres auoir faict le departement de la taille sur toute la Grèce, & taxé combien chasque ville deuroit payer, il en retourna plus pauvre qu'il ny estoit allé, d'autant comme il auoit despendu par le chemin. Parquoy aiant le poëte Æschylus fait ces vers en vne sienne Tragedie touchant Amphiaraus,

En la Tragedie des sept de Thebes,

Il ne veut pas sembler iuste, mais l'estre,

Gardant iustice en pensee profonde:

Dont nous voyons tous les iours apparoitre

Sages conseils, où tout honneur abonde:

quand on vint à les reciter en plein theatre, toute l'assistance ietta les yeux sur Aristides. Pericles toutes les fois qu'il estoit esleu capitaine, en prenant son manteau
„ ducal souloit dire en soy-mesme, Pericles prens garde à toy, tu t'en vas pour commander à des hommes libres, & à des Grècs, & à des Atheniens. Vn sien amy le requeroit de porter faux tesmoignage pour luy, où il falloit encore iurer: il luy respondit,
„ Je suis ton amy iusques à l'autel: c'est à dire, iusques à n'offenser point les Dieux.
„ Il suadoit aux Atheniens d'oster l'Isle d'Ægine, comme vne maille ou vne chassie, qui estoit en l'œil de leur port de Pirée. Estant pres à rendre son ame il dit, qu'il se reputoit heureux de ce, que nul Athenien ne portoit robbe noire par son moyen. G
Alcibiades estant encore ieune garson, en luitant contre vn autre, fut saisi d'une prise, de laquelle il ne pouuoit pas bien se desfaire: si prit à belles dents la main de ce-
„ luy qui le tenoit: & l'autre se prit à crier, Comment Alcibiades, tu mords comme vne
„ femme: Non pas comme vne femme, respondit-il, mais bien comme vn lion. Aiant vn fort beau chien, qui luy auoit cousté sept cens escus, il luy couppa la queue, à fin (dit-il) que les Atheniens comptent cela de moy, & ne samusent point à me
recercher curieusement plus auant. Il entra en vne eschole où il demanda au maître
„ l'Iliade d'Homere. Le maistre luy dit qu'il n'auoit rien des œuures d'Homere: il
„ luy donna vn soufflet, & passa outre. Il vint vn iour battre à la porte de Pericles, où lon luy dit, qu'il n'estoit pas de loisir, & qu'il estoit bien empesché à regarder comment il rendroit compte aux Atheniens de leur argent: Et ne vaudroit-il pas mieux,
„ dit-il, qu'il s'empeschast à regarder, comment il ne leur en rendroit point? Estant rap- H
pellé de la Sicile par les Atheniens, qui luy vouloient faire son procès, il se cacha, disant, que qui est accusé de crime capital, est vn sot de chercher à se faire absoudre,
„ quand il s'en peut fuir. Et comme quelqu'un luy dist, Comment, ne te fies-tu pas à ton païs de te iuger? Non pas, dit-il, à ma propre mere, de peur qu'en n'y pensant
„ pas, elle ne iettast par erreur la febue noire au lieu de ietter la blanche. Estant aduertie que luy & ses compagnons auoient esté condamnez à la mort: Montrons
„ leur, dit-il, que nous sommes viuans. & se retirant deuers les Lacedemoniens, suscita la guerre qui fut appelée Decelique. Lamachus reprenoit vn capitaine de gens de pied de quelque faute qu'il auoit commise en son estat: l'autre luy disoit qu'il ne le feroit plus: Mais on ne peut pas, repliqua-il, faillir deux fois à la guerre. Iphicrates estoit mesprisé, d'autant qu'on le tenoit pour fils d'un cordonnier, mais il acquit

- A quit reputation d'homme de valeur, alors premier que tout blecé qu'il estoit, il faist son ennemy au corps, & l'emporta tout vif avec ses armes, de la galere ennemie dedans la sienne. Estant en terre d'amis & alliez, il fortifioit neantmoins son camp fort soigneusement de trenchee & de rempart tout à l'entour. Il y eut quelqu'un qui luy dit, Dequoy auons nous peur? auquel il respondit, que la pire parole qui scauroit sortir de la bouche d'un Capitaine est, Je ne me fusse iamais douté de cela. Dressant son armee en bataille pour combatre des peuples Barbares, il dit, qu'il ne craignoit autre chose, sinon que les Barbares n'eussent point cognoissance d'Iphicrates, qui estoit ce qui effroyoit ses autres ennemis. Estant accusé de crime capital, il dit au calomniateur qui l'accusoit: O pauvre homme regarde que tu fais, ores que la ville est enuironnee de guerre, suadant au peuple de consulter de moy, & non pas avec moy. Harmodius qui estoit descendu de l'ancien Harmodius, luy reprochoit un iour, qu'il estoit extraict de race vile & roturiere: La noblesse de ma race, luy respondit-il commence à moy, & celle de la tienne acheue à toy. Vn orateur haranguant deuant le peuple en pleine assemblee de ville luy demanda, Qu'es tu, à fin que lon sçache dequoy tu te glorifies tant? Es-tu homme d'armes, ou archer, ou homme de pied & picquier? Je ne suis, respondit-il, rien de tout cela, mais ie suis celuy qui sçait commander à tous ceux-là. Timotheus estoit estimé Capitaine plus heureux que habile homme ne vaillant, & quelques vns luy portans enuie luy peignoient des villes qui venoient d'elles-mesmes se prendre dedans vne nasse, pendant qu'il dormoit: & luy disoit, Or pensez si ie prens de telles villes en dormant, que c'est que ie feray, quand ie feray esueillé. Vn des Capitaines hazardeux & aduenteux monstrois aux Atheniens par vne maniere de gloire, quelque playe qu'il auoit dessus sa personne: mais luy au contraire, l'eus (dit-il) grand honte un iour que i'estois Capitaine general, deuant la ville de Samos, quand un traict d'engin de batterie vint tomber tout aupres de moy. Et comme les harangueurs louassent grandement & recommandassent le Capitaine Chares, disans, Voyla un tel homme qu'il faudroit pour en faire un Capitaine general des Atheniens: Timotheus respondit, tout haut, Ne dittes pas Capitaine, mais un bon gros vallet pour porter le liét du Capitaine. Chabrias disoit que ceux qui sçauoient mieux les affaires de leurs ennemis, estoient ceux qui mieux faisoient l'office de Capitaines. Estant accusé de trahison avec Iphicrates, il ne laissoit pas d'aller à l'esbat au parc des exercices, & de disner à son heure accoustumee, dequoy Iphicrates le tançoit: & luy respondoit, S'il aduient que les Atheniens ordonnent de nous autre chose que bien à poinct, ils te feront mourir, dit-il, tout sale & à ieun, & moy lauë, oinct, & bien disné. Il souloit dire, que vne armee de cerfs conduite par un lion estoit plus à craindre, qu'une armee de lions conduite par un cerf. Hegesippus que lon surnommoit Crobelus, incitoit les Atheniens à prendre les armes contre Philippus Roy de Macedoine, & quelqu'un de l'assemblee luy cria tout hault: Commande, nous veux-tu introduire la guerre? Ouy certainement, dit-il, & les robbes de deuil, & les conuoys de funerailles publiques, & les harangues funebres, si nous voulons demourer libres, & non pas nous assubiectir aux Macedoniens. Pytheas estant encore fort ieune se presenta un iour pour contredire en pleine assemblee aux decrets publiqs, que lon passoit par les voix du peuple à l'honneur de Alexandre: quelqu'un luy dit, Comment, oses-tu bien entreprendre, estant si ieune, de parler de si grandes choses? Pourquoi non, dit-il, veu qu'Alexandre que vous faites un Dieu par vos suffrages, est encore plus ieune que moy? Phocion Athenien estoit si constant, que iamais on ne le veit ne plorer ne rire: & comme en vne assemblee de ville, quelqu'un luy dist, Tu es tout pensif, Phocion, il semble que tu estudies quelque chose. Tu coniectures bien, respondit-il, car i'estudie voirement, si ie pourray point retrencher quelque chose de ce que i'ay à dire aux Atheniens. Les Athe-

Les dictz notables des anciens

niens eurent vn oracle qui les aduertissoit qu'il y auoit en la ville vn personnage qui estoit contraire aux conſeils & aduis de tous les autres : & comme ils fiſſent par tout enquerir qui estoit celuy-là , & criassent en grande furie contre luy , Phocion dit franchement tout haut que c'estoit luy , pour ce qu'à luy seul rien ne plaſoit de tout ce que le peuple faisoit & diſoit. Aiant vn iour dit ſon aduis en pleine aſſemblee du peuple, il pleut à toute l'aſſiſtance, & vit que tous egale-ment approuuoient ſon dire :

" il en fut ſi eſbahy, qu'en ſe tournant deuers ſes amis, il leur demanda, Ne m'eſt-il point
" eſchappé de dire quelque choſe de trauers, ſans y penſer? Les Atheniens voulurent
quelquefois faire vn grand & ſolennel ſacrifice, pour à quoy fournir, ils deman-
doient à chaſcun quelque contribution d'argent : chaſcun des autres donnoit libera-
lement, & Phocion eſtant nommeement appellé par pluſieurs fois pour donner
" auſſi, leur dit à la fin : l'aurois honte de vous donner, & ne rendre pas à ceſtuy-cy.
" monſtrant au doigt vn vſurier, à qui il debuoit. Et comme Demothe-nes luy diſt, Les
" Atheniens te tueront ſi vne fois ils entrent en leur fureur: Si feront certes, luy reſpon- F
" dit-il, ils me tueront voirement, ſils entrent en leur fureur : mais toy, ſils entrent en
" leur bon ſens. Ariſtogiton le calomniateur eſtant condamné à mort pour calomnie,
& preſt à executer en la priſon, enuoya prier Phocion de venir iuſques là parler à luy.
" Ses amis ne vouloient pas qu'il y allaſt, pour parler à vn ſi meſchant homme : Et en
" quel lieu, dit-il, pourroient les gens de bien plus volontiers parler à Ariſtogiton? Les
Atheniens eſtoient courrouce-
z à ceux de Byzance de ce qu'ils n'auoient pas voulu re-
cevoir, dedans leur ville le capitaine Chares, qu'ils leur enuoyoient pour les ſecourir
à l'encontre de Philippus : Phocion leur remonſtra, que ce n'eſtoit pas à leurs confe-
derez ſils ſe deffioient, qu'il ſ'en falloir prendre, mais aux capitaines dont on ſe deſ-
fioit, à ceux-là ſ'en falloir-il courroucer. Sur l'heure il fut luy meſme eſleu capitaine:
& ſ'eſtans les Byzantins fiez à luy, & mis entre ſes mains, il les defendit ſi bien contre
Philippus, qu'il le contraignit de ſe retirer ſans rien faire. Le Roy Alexandre le
grand luy enuoya preſenter en don cent talens, qui ſont ſoixante mille eſcus. Il de- G
manda à ceux qui luy apportoit ceſt argent, pourquoy le Roy luy en enuoyoit
à luy ſeul, veu qu'il y auoit tant d'autres Atheniens. Ils luy reſpondirent, que c'eſtoit
" pour ce qu'il l'eſtimoit ſeul homme de bien & vertueux : Qu'il me laiſſe doncques,
" leur dit-il, & ſembler & eſtre tel. Alexandre leur demanda des galeres, & le peuple
nommeement appella Phocion pour en dire ſon aduis, & leur conſeiller ce qu'ils
" en auoient à faire. Il ſe leua & leur dit, Je vous conſeille de trouuer moyen que
" vous ſoyez les plus forts par armes, ou bien amis de ceux qui le ſont. Eſtant ve-
nue vne nouuelle incertaine ſans auteur, qu'Alexandre eſtoit decedé, les ha-
rangueurs ne fail-
lirent pas incontinent de monter à l'enuy les vns des autres en la
tribune aux harengues, & de conſeiller que ſur l'heure meſme, ſans plus attendre,
lon deuoit prendre les armes. Phocion au contraire eſtoit d'aduis, que lon atten-
diſt iuſques à ce que lon en fuſt plus certainement aſſeuré : car ſil eſt aujourdhuy H
" mort, diſoit-il, il le fera auſſi demain & encore apres. Et comme Leothe-nes euſt
ietté la ville en vne forte & groſſe guerre, eſleuant le cœur au peuple ſoubs gran-
des eſperances de recouurer leur liberté & la principauté de la Grèce, Phocion ac-
" comparoit ſes propos aux cypres : Car ils ſont, diſoit-il, beaux, droicts, & hauts, mais
" ils ne portent point de frui-
ct. Et comme neantmoins les premieres rencontres en euſ-
ſent eſté heureuſes, & la ville en fiſt ſacrifices aux Dieux pour les bonnes nouuelles,
" quelqu'un luy demanda : Et bien Phocion, eſ-tu content que cecy ait eſté fai-
ct? Bien
" ſuis-ie content, dit-il, que cecy ſoit ainſi aduenu, mais ie ne me repens point d'a-
" uoir conſeillé cela. Les Macedoniens incontinent firent deſcente au païs d'Attique, &
commencerent à courir & piller toute la coſte de la marine : pour à quoy remedier
il meit aux champs les ieunes hommes de la ville en aage de porter armes : pluſieurs
y accou-

A y accoururent à la foule, qui luy conseilloyent les vns de se saisir de ceste motte-là, les
 „ autres de mettre icy ses gens en bataille: O Hercules, dit-il, combien ie voy de capi-
 „ taines, & peu de foudards! ce neantmoins il leur donna la bataille, qu'il gagna, &
 tua sur le champ Nicion capitaine des Macedoniens. Peu de temps apres les Athe-
 niens demourez vaincus en ceste guerre, & estans contraincts de receuoir garnison
 d'Antipater, Menyllus, capitaine de ceste garnison, luy enuoya de l'argent en don:
 dequoy il se courrouça, disant, que ny Menyllus n'estoit meilleur qu'Alexandre, ny
 la cause si bõne pour laquelle il en deust prendre de luy maintenãt, en aiant lors refusé
 d'Alexandre. aussi disoit Antipater, qu'il auoit deux amis à Athenes, Phocion & De-
 mades, à l'un desquels il n'auoit iamais rien sçeu faire prédre, ny contenter & assouir
 l'autre à assez despédre. Et comme Antipater le rechercha de faire quelque chose qui
 „ n'estoit pas iuste, Tu ne sçauois, luy dit-il, Seigneur Antipater, auoir Phocion pour
 „ amy & pour flateur tout ensemble. Apres la mort d'Antipater, les Atheniens aians
 B recourré leur liberté du gouuernement populaire, Phocion fut condamné à la
 mort par le peuple en pleine assemblée de ville, & ses amis aussi, lesquels s'en alloient
 plorans & se lamentans au supplice: mais Phocion marchant graument, sans mot
 dire, trouua par le chemin l'un de ses ennemis, qui luy cracha au visage: & luy se re-
 „ tournant deuers les magistrats leur dit, N'y aura-il personne qui reprime l'insolence
 „ & villanie de cest homme icy? L'un de ceux qui deuoient mourir avec luy, se cour-
 „ rouçoit & se tourmentoit, & Phocion luy dit, Ne te reconfortes-tu pas Euippus de ce
 „ que tu t'en vas mourir en la compagnie de Phocion? Et comme on luy tendoit la
 „ coupe où estoit le bruuage de la cigüe, on luy demanda s'il vouloit plus rien dire:
 „ alors adressant sa parole à son fils, Je te commande, dit-il, & te prie, de ne porter
 „ point de rancune, pour ma mort, aux Atheniens. Pisistratus tyran d'Athenes, aduertý
 que quelques vns de ses amis s'estans rebellez contre luy, auoient occupé le chasteau
 de Phyle, s'en alla deuers eux portant luy-mesme sur son col vn fardeau de son liçt
 C & de ses hardes. Ils luy demanderent, que c'estoit qu'il vouloit: Je viens, dit-il, ex-
 „ pressément en intention de vous persuader de retourner avec moy, ou bien de de-
 „ mourer icy avec vous, & pourtant ay-ie apporté mes hardes quand-& moy. On luy
 rapporta que sa mere aimoit vn ieune homme, qui couchoit secrettement avec elle,
 mais en grand' crainte, & la refusoit souuentefois: il l'enuoya conuier à souper,
 & apres souper il luy demanda comment il auoit esté traité: Fort bien, dit-il. Tu
 le feras ainsi tous les iours, dit-il, si tu fais plaisir à ma mere. Thrasybulus estoit
 amoureux de sa fille, laquelle il baisa, la trouuant de rencontre deuant luy en son che-
 min: dequoy sa femme fut fort courroucée, & sollicitoit son mary d'en faire demon-
 „ stration: mais il luy respondit tout doucement, Si nous haïssons ceux qui nous ai-
 „ ment, que ferons nous à ceux qui nous haïssent? & la bailla en mariage à ce Thrasy-
 bulus. Quelques ieunes gens apres bien boire, allans masquer & faire les fols par la
 D ville, rencontrèrent sa femme, à laquelle ils firent & dirent plusieurs choses disso-
 lües & peu honnestes: & puis le lendemain recongnoissans la faute qu'ils auoient fait-
 te, vindrent plorer deuant Pisistratus, & luy demander pardon: & il leur respondit,
 „ Donnez ordre que vous soyiez d'ores en auant plus sages: au demourant ie vous ad-
 „ uise, que ma femme ne sortit ny n'alla de tout hier nulle part. Estant prest à espouser
 vne seconde femme, ses enfans du premier liçt luy demanderent, s'il estoit point en
 quelque chose malcontent d'eux, pourquoy il espousast par despit d'eux ceste secon-
 „ de femme: Rien moins, leur respondit-il: ains c'est au contraire, pource que ie me
 „ louë de vous, & que ie desire auoir encore d'autres enfans qui soient semblables à
 „ vous. Demetrius surnommé le Phalerien conseilloyt au Roy Ptolomeus d'acheter &
 lire les liures qui traictent du gouuernement des royaumes & seigneuries: Car ce
 que les mignons de court n'osent dire à leurs Princes, est escrit dedans ces liures-là.

Les dictz notables des anciens

Lycurgus, celuy qui establit les loix aux Lacedemoniens : accoustuma ses citoyens à E
porter cheueux, disant que les cheueux rendoient ceux qui estoient beaux d'eux mes-
mes, encore plus beaux : & ceux qui estoient laids, hydeux & effroyables. Sur les en-
trefaittes qu'il estoit apres à reformer l'estat de Lacedemone, quelqu'un luy con-
seilloit d'y establis l'estat du gouuernement populaire, où l'un a autant d'autorité
" que l'autre : il luy respondit, Commence toy-mesme à establis ce gouuernement-là en
" ta maison. Il ordonna que lon ne bastiroit plus les maisons qu'avec la sçie & la coi-
" gnee seulement : pource, dit-il, que lon auroit honte de porter dedans vne maison
" simple de la vaisselle d'or ou d'argent, ny des meubles precieux, où des tables riches
" & sumptueuses. Il defendit à ses citoyens de combattre ny à l'escrime des poings,
ny à l'escrime generale de pieds, de dents, & de mains, à fin qu'ils ne s'accoustuma-
sent point, non pas en iouant mesme, à se rendre ny à se laisser iamaïs. Aussi leur de-
fendit-il de combattre souuent contre mesmes ennemis, de peur qu'ils ne les rendis-
sent plus belliqueux : au moyen de quoy, depuis le Roy Agésilas aiant esté rapporté F
" fort griefuement blecé d'une bataille, Antalcidas luy dit : Tu rapportes vn beau sa-
" laire, & escolage tel que tu l'as mérité, des Thebains, de ce que tu leur as enseigné à
" combattre malgré eux. Charillus estant enquis, pourquoy Lycurgus auoit fait si
" peu de loix, il respondit, que ceux qui vsoient de peu de paroles, n'auoient pas be-
" soing de beaucoup de loix. Vn des esclaves qu'ils appelloient Elotes, se portoit vn
" peu trop insolentement & audacieusement enuers luy : Par les Dieux, dit-il, si ie n'e-
" stois courroucé, ie te ferois tout à ceste heure mourir. A vn qui luy demandoit pour-
" quoy les Lacedemoniens portoient cheueux : C'est pour ce que de toutes les sortes de
" paremens, c'est celuy qui couste le moins. Teleclus Roy de Lacedemone, respondit
à son frere qui se plaignoit à luy, de ce que les citoyens de Sparte se portoit en son
" endroict plus iniquement & plus indignement qu'enuers luy : Ce n'est pas cela, dit-il,
" mais c'est que tu ne sçais pas endurer que lon te face tort. Theopompus estant en
quelque ville, l'un des habitans d'icelle luy monstrois les murailles, & luy demandoit G
" si elles ne luy sembloient pas belles & haultes. Belles? non, dit-il, quand il n'y auroit
" que des femmes. Archidamus respondit aux alliez & confederez de Lacedemone qui
le prioient de leur taxer leur cote d'argent, qu'ils auroient à contribuer & fournir
" pour la guerre Peloponesiaque, La guerre ne s'entretient pas à pris fait & certain. Bra-
sidas trouua vne souris parmy des figues seiches, qui le mordit, tellement qu'il la laissa
" aller, & dict aux assistans : Voyez-vous, dit-il, comment il n'y a rien si petit, qui ne
" puisse sauuer sa vie, prouueu qu'il ait le cœur de se defendre contre ceux qui l'assailent?
En vne bataille il fut blecé d'un coup de parthisane, qui faulsa & perça son escu : il ar-
racha la parthisane de sa playe, & du mesme baston en tua son ennemy : & estant en-
" quis comment il auoit ainsi esté blecé : Par ce que mon escu, dit-il, m'a trahy. Il mou-
rut au pais de Thrace, là où il auoit esté enuoyé pour affranchir & remettre en liberté
les Grecs qui estoient habitans en celle marche. Les ambassadeurs, qui depuis furent H
enuoyez par le pais en Lacedemone, vindrent visiter sa mere : laquelle leur demanda
premierement, si Brasidas son fils estoit mort vaillamment & en homme de bien :
les ambassadeurs alors le louerent bien haultement, iusques à dire, qu'il n'en seroit
" plus iamaïs de tel : Vous vous abusez, leur dit-elle : il est vray que Brasidas estoit bien
" homme de bien, mais Lacedemone en a plusieurs autres, qui valent encore mieulx
" que luy. Le Roy Agis souloit dire, que les Lacedemoniens ne demandoient point
" combien estoient leurs ennemis, mais seulement où ils estoient. On luy defendit à
" Mantinee de combattre, pource que les ennemis estoient plusieurs contre vn : Il est
" force, dit-il, que celuy qui veult commander à plusieurs, en combatte plusieurs aussi.
A ceux qui hault-louoient les Eliens de ce qu'ils gardoient grande legalité en la feste
des ieux Olympiques : Quelle si grande merueille est-ce, dit-il, si en quatre annees
les

A les Eliens vſent vn iour de la iuſtice? & comme ils perſeueraffent encore en leurs lou-
 » anges: Quelle ſi grande merueille eſt-ce, dit-il, ſi les Eliens vſent d'vne choſe bonne,
 » qui eſt la iuſtice? A vn meſchant homme qui luy rompoit la teſte en luy deman-
 » dant ſouuent, qui eſtoit le plus homme de bien des Spartiates: C'eſt, dit-il, celuy
 » qui te reſſemble le moins. A vn autre qui demandoit, combien en nombre eſtoient
 » les Lacedemoniens: Aſſez, dit-il, pour chaffer les meſchans. Et à vn autre qui
 » luy demandoit le meſme, Ils te ſembleroient beaucoup, dit-il, ſi tu les voyois
 » combattre. Lyſander ne voulut pas accepter des robbes ſumptueuſes & riches que
 » Dionyſius le tyran enuoyoit à ſes filles, diſant, Je craindrois que ces robbes ne les
 » fiſſent trouuer plus laides. Quelques vns le reprenoient & blaſmoient de ce qu'il fai-
 » ſoit la plus part de ſes geſtes par ruzes & trömperie, comme eſtant choſe indigne d'un
 » qui ſe diſoit de la race d'Hercules: Il leur reſpondoit, que là où la peau du lion ne
 » pouuoit ſuffire, il y falloir coudre vn petit de celle du regnard. Les Argiens auoient
 B quelque different à l'encontre des Lacedemoniens touchant leurs confins, & ſem-
 bloit que les Argiens alleguaſſent de meilleures & plus pertinentes raiſons touchant
 » la terre qui eſtoit entre eux en diſpute: mais luy deſguainnant ſon eſpee: Ceux, dit-il,
 » qui feront les plus vaillants avec ceſte cy, feront ceux qui plaideront le mieux de
 » leurs confins. Les Lacedemoniens faiſoient difficulté d'afſaillir les murailles des Co-
 rinthiens, & ſur ces entrefaittes il faillit vn grand lièvre de dedans les foſſez: alors pre-
 » nant ceſte occaſion: Comment, dit-il, faites vous doute d'afſaillir les murailles de
 » gens qui ſont ſi pareſſeux, & ſi laſches, qu'ils laiſſent dormir les lièvres dedans l'encein-
 » te meſme de leurs murs? Il y eut vn Megarien, qui en publique aſſemblée des eſtats
 » de la Grèce luy parla fort hardiment & franchement: Il luy reſpondit, Tes paroles
 » auroient beſoyn d'vne cité. voulant dire, que Megare, dont il eſtoit, auoit trop peu
 de puissance pour maintenir ce qu'il diſoit.

Ageſilaus diſoit que les habitans de l'Asie, pour hommes libres ne valoient rien,
 C mais qu'ils eſtoient bons eſclaves. Ces Aſiatiques auoient accouſtumé d'appeller
 » le Roy de Perſe, le grand Roy: Pourquoi eſt il plus grand que moy, diſoit-il, ſ'il n'eſt
 » plus iuſte & plus temperant? Eſtant enquis de la vaillance & de la iuſtice, laquelle
 » eſtoit la meilleure, Nous n'aurions que faire de vaillance, dit-il, ſi nous eſtions tous
 » iuſtes. Eſtant vne fois contrainct de deſloger la nuit à grand haſte du païs de ſes en-
 » nemis, & voyant vn garſon qu'il aimoit tout eſploré, pour ce qu'on le laiſſoit derrie-
 » re, à cauſe qu'il ne pouuoit fuiure pour ſa maladie: Comment il eſt, dit-il, mal-aiſé
 » d'auoir pitié & bon ſens tout enſemble! Menecrates le medecin qui ſe faiſoit ſur-
 » nommer Iupiter, luy eſcriuit vne lettre avec vne telle ſuſcription, Menecrates Iu-
 » piter au Roy Ageſilaus, Salut. Il luy fit reſponſe, Le Roy Ageſilaus à Menecrates,
 Santé. voulant dire, qu'il eſtoit malade du cerueau. Les Lacedemoniens aiant deſfait
 ceux d'Athenes avec leurs allies & confederez pres de Corinthe, entendans le grand
 D nombre des ennemis qui eſtoient demourez morts ſur le champ: O malheureuſe
 » Grèce, dit-il, qui a elle meſme deſfait tant de ſes hommes, qu'ils euſſent eſté ſuffi-
 » ſans pour ſubiuguer & deſfaire tout tant qu'il y a de barbares! Aiant eu vn oracle
 de Iupiter en la ville d'Olympie, les Ephores luy manderent qu'en paſſant par la
 ville de Delphes, il demandat auſſi reſponſe à l'oracle d'Apollo. Parquoy quand il
 fut là, il luy demanda, ſ'il eſtoit pas de meſme aduiſ que ſon pere. Demandant la de-
 liurance de l'un de ſes amis, qui eſtoit priſonnier entre les mains de Idrieus prince de
 » la Carie, il luy eſcriuit en ceſte ſorte: Si Nicias n'a point failly, deliure le: ſ'il a
 » failly, deliure le pour l'amour de moy: mais comment que ce ſoit, deliure le. On le
 conuiroit vn iour à ouïr la voix d'un qui contrefaiſoit merueilleuſement bien &
 » naïſſement le chant d'un roſſignol: J'ay ouy, dit-il, aſſez de fois le roſſignol
 » meſme. Apres la perte de la bataille de Leuctres, la loy ordonnoit que tous ceux

Les dictz notables des anciens

qui festoient sauuez de vifteſſe , fuſſent notez d'infamie : mais les Ephores voians E
que la ville en ce faiſant demoureroit vuide & depeuplee d'hommes , voulurent abo-
lir ceſte infamie , & pour ce faire eſleurent Ageſilaus Legiſlateur : & luy ſe tirant en
auant ſur la place , ordonna que toutes les loix du lendemain en auant auroient leur
force & vigueur ancienne. Il fut enuoyé pour donner ſecours au Roy d'Ægypte, là
où il ſe trouua aſſiegé avec luy par ſes ennemis qui eſtoient pluſieurs contre vn , &
enfermoient ſon camp d'une grande trenchee : & comme le Roy luy commandaſt
„ de ſortir ſur eux & de les combattre : Je n'empescheraſ pas , dit-il, nos ennemis qui
„ veulent que nous ſoions egaulx à cōbattre tant à tant : & comme il ne ſ'en falluſt plus
gueres que les deux bouts de la trenchee ne ſe vinſſent à récontrer & à ioindre, il dreſſa
ſon armee en ceſt interualle , & par ainſi venans à combattre tant contre tant, ils des-
firent leurs ennemis. En mourant il cōmanda à ſes amis qu'ils ne fiſſent faire aucune
„ image ny ſtatue de luy : Car ſi i'ay , dit-il, fait aucune choſe digne de memoire en ma
„ vie , cela fera ſuffiſant monument de moy apres ma mort : ſinon , toutes les ſtatues & F
„ images du monde ne ſçauroient perpetuer ma memoire. Archidamus fils d'Ageſilaus,
la premiere fois qu'il veit vn traiçt de groſſe arbaleſte de batterie , que lon auoit nou-
„ uellement apporté de la Sicile , ſ'eſcria tout hault : ô Hercules , la prouéſſe de l'hom-
„ me ſ'en va perdue. Demades ſe mocquoit des eſpees Laconiennes , diſant qu'elles
eſtoient ſi petites & ſi courtes , que les baſteleurs & ioueurs de paſſe-paſſe les aual-
„ loient toutes entieres. Agis le ieune luy reſpondit : Mais neantmoins les Lacedemo-
„ niens en aſſenent fort bien leurs ennemis. Les Ephores luy manderent vne fois
„ qu'il liuraſt ſes ſoudards entre les mains d'un traiſtre : Je me garderay , dit-il, bien de
„ commettre les ſoudards d'autrui à vn qui a trahy les ſiens. Cleomenes reſpondit
à quelqu'un qui promettoit de luy donner des coqs ſi courageux , qu'ils mouroient
„ ſur la place en combatant : Ne me donne point de ceux-là qui meurent , mais de
„ ceux qui font mourir les autres en combatant. Peḡaretus aiant failly d'eſtre eſleu du
conſeil des trois cents , ſ'en retourna de l'aſſemblee tout ioyeux & riant, diſant, qu'il G
eſtoit tres-aïſe de ce qu'en la ville de Sparte , il ſe trouuoit trois cents hommes meil-
leurs & plus gens de bien que luy. Damonidas aiant eſté par le maiſtre de la danſe col-
„ loqué tout au dernier lieu de la danſe , Tu as , dit-il, trouué vn bon moien pour ren-
„ dre ce dernier lieu icy honorable. Nicoſtratus Capitaine des Argiens , eſtant ſo-
licité par Archidamus de prendre vne bonne ſomme d'argent pour luy liurer en tra-
hiſon vne place qu'il auoit en garde , avec promeſſes de luy faire eſpouſer telle fille
qu'il voudroit choiſir en toute la ville de Sparte , exceptees celles du ſang royal , luy
„ fit reſponſe , qu'il n'eſtoit point de la race d'Hercules , Pour ce (dit-il) que Hercu-
„ les alloit par tout puniſſant & faiſant mourir les meſchants , & tu eſſayes de rendre
„ meſchants ceulx qui ſont gens de bien. Eudemonidas voiant en l'eſchole de
l'Academie Xenocrates deſia ancien parmy les autres eſcholiers eſtudians en la
„ philoſophie , & entendant qu'il y cherchoit la vertu : Et quand en vſera il , dit-il, ſ'il H
„ eſt encore à la trouuer ? Vne autrefois eſcoutant diſcourir vn Philoſophe , qui
„ maintenoit , que le ſage ſeul eſtoit bon Capitaine : Ce propos, dit-il, eſt merueilleux :
„ mais celuy qui le dit , n'ouit iamais en vn camp le ſon de la trompette. Antiochus
eſtant l'un des contrerolleurs de Sparte , que lon appelle Ephores , entendant comme
„ le Roy Philippus auoit donné aux Meſſeniens leur territoire : Mais leur a il quand
„ & quand , demanda il , donné le moien de vaincre en bataille quand ils combatront
„ pour le defendre ? Antalcidas reſpondit à vn Athenien qui appelloit les Lacede-
„ moniens ignorans : C'eſt pour ce que nous ſommes ſeuls qui n'auons iamais appris
„ de vous rien de mauuais. Vn autre Athenien en eſtriant contre luy , luy diſoit :
„ Nous vous auons ſouuent rechaſſez de la riuere de Cephifus , qui eſt en Attique : Et
„ nous, repliqua il, ne vous auons iamais rechaſſez de celle d'Eurotas , qui eſt en Lacede-
dæmone

A demone. Vn Rhetoricien vouloit reciter vne harangue qu'il auoit composee à la
 „ louange de Hercules : Et qui est, dit-il, celuy qui le blasme? Pendant que Epaminon-
 das fut Capitaine des Thebains, iamais on ne veit aduenir en son camp ces soudaines
 frayeurs sans cause certaine, que lon appelle Terreurs Paniques. Il souloit dire, qu'il
 n'estoit point de mort plus honneste que de mourir en la guerre, & que le corps d'un
 bon homme de guerre deuoit estre exercité, non seulement comme le sont ceux des
 champions qui combattent es ieux de pris, mais bien plus endurcy à tout trauail, ain-
 si qu'il conuient à vn bon soudard : pourtant faisoit-il la guerre à ceux qui estoient
 fort gras, iusques à en casser vn des bandes, pour ceste cause seule, disant, qu'à peine
 trois ou quatre boucliers luy pourroient couvrir le ventre, qui estoit si grand qu'il
 luy empeschoit de voir ses parties naturelles. Au demourant il estoit si reformé
 en son viure, & haïssoit si fort toute superfluité, que vne fois aiant esté inuité à soup-
 per par vn de ses voisins, quand il veit en son logis vn grand appareil de force frian-
 B des patisseries, confitures & parfums, il luy dit, Je pensois que tu fisses vn sacrifice,
 „ non vn excès de superfluité : & s'en alla tout aussi tost. Comme le cuisinier rendist
 à luy & à ses compagnons compte de leur despenſe ordinaire de quelques iours, il
 n'y trouua rien mauuais que la quantité d'huyle : dequoy ses compagnons s'esbahis-
 sans, il leur dit, que ce n'estoit pas la despenſe qui le faſchoit, mais que tant d'huyle
 fust entré dedans les corps des hommes. La ville de Thebes faisoit vne feste pu-
 blique, & estoient tous en banquetts, festins, & grandes assemblees les vns avec les
 autres : au contraire, luy alloit tout sec, sans s'estre oingt d'huyle de parfum, ne paré
 de beaux vestemens, tout pensif, par la ville : quelqu'un de ses familiers le rencon-
 tra en cest estat, qui s'en esbahissant luy demanda, pourquoy il alloit ainsi seul & mal
 „ en ordre par la ville : A fin, dit-il, que vous autres tous puissiez en ſeureté ce pen-
 „ dant yurongner & faire grand chere, sans penser à affaires quelconques. Il auoit
 faict mettre en prison vn homme de basse condition pour quelque legere faute
 C qu'il auoit commise : Pelopidas le pria de le mettre dehors : ce qu'il luy refusa : mais
 puis apres vne femme qu'il entretenoit l'en requit, & il le fit à ſa priere, disant que
 c'estoit de telles gratuites, qu'il falloit conceder aux amies & concubines, non pas
 aux Capitaines. Comme les Lacedemoniens vinſſent à grosse puissance, pour faire
 cruelle guerre aux Thebains, on apporta de tous costez des oracles aux Thebains,
 dont les vns leur promettoient la victoire, les autres les menaſſoient de deſconfiture :
 il commanda que lon meſt ceux de la victoire à main droite de la tribune aux ha-
 rangues, & ceux de la deſfaite à la fenestre : quand ils furent ainsi tous diſpoſez, il ſe
 „ leua en pieds ſur la tribune, & parla ainsi aux Thebains, Si vous voulez rendre bonne
 „ obeissance à vos capitaines, & prendre la hardieſſe en vos cœurs d'aller chocquer
 „ vos ennemis : ceux-cy (monſtrant les bons oracles à la main droite) ſont les voſtres :
 „ mais ſi à faute de courage vous reſtuez au peril, ceux-là (monſtrant les mauuais à
 D la main gauche) ſeront pour vous. Puis ainsi qu'il conduisoit l'armee aux champs
 pour aller trouuer les Lacedemoniens, feſtant pris à tonner, ceux qui estoient les
 „ plus pres de luy, luy demanderent que pouuoit ſignifier Dieu, qu'il tonnoit : Cela, dit
 „ il, ſignifie que la ceruelle de nos ennemis eſt eſtonnee, veu qu'aiants pres d'eulx de ſi
 „ commodas aſſiettes à loger leur camp, ils ſe ſont campez en celle où ils ſont. De tou-
 tes les honnestes & heureuſes fortunes qui luy estoient iamais aduenues, il diſoit que
 „ celle qui luy auoit donné plus de ioye en ſon cœur, estoit, d'auoir deſfaict les Lacede-
 „ moniens en la iournee de Leuctres du viuant des pere & mere qui l'auoient engen-
 „ dré. Aiant accouſtumé tout le reſte du temps de ſe monſtrer net & propre avec
 vne face ioyeuſe, le lendemain de la bataille Leuctrique il ſortit en public tout
 ſale, morne & pensif : parquoy ſes amis luy demanderent incontinent, ſ'il luy estoit
 „ point arriué quelque ſiniſtre accident : Non, dit-il, mais ie ſenty hier que pour la ioye

Les dictz notables des anciens

„ de la victoire, ie m'estois esleué plus que ie ne deuoïs, & pourtât aujourd'huy ie corri- E
 „ ge ceste aise qui fut hier trop excessiue. Et sçachant que les Spartiates auoient ac-
 coustumé de couurir & cacher le plus qu'ils pouuoient tels inconueniens, & vou-
 lant conuaincre & monstrier à descouuert la grandeur de la perte qu'ils auoient fait-
 te, il n'octroya pas permission d'enleuer les morts en bloc à tous ensemble, ains à
 chasque cité les vns apres les autres, tellement qu'il apparut qu'il y en auoit plus de
 mille des Lacedemoniens. Iason Prince de la Theffalie estant allié & confederé
 des Thebains, vint vn iour en la cité de Thebes, & enuoya à Epaminondas deux
 mille escus en don, sçachant qu'il estoit extremement pauvre. Il ne voulut pas re-
 ceuoir le present d'argent: & qui plus est, la premiere fois qu'il veid depuis Iason, il
 „ luy dit, Tu commances à m'oultrager. Et ce pendant il emprunta d'un bourgeois
 de la ville cinquante drachmes d'argent, qui peuuent valoir enuiron cinq escus,
 pour son entretenement au voyage qu'il alloit entreprendre: & avec cela entra en
 armes dedans le Peloponnese. Depuis encore le grand Roy de Perse luy enuoya tren- F
 te mille pieces d'or comme escus de Perse, que lon appelle Dariques: pour raison
 dequoy il fattacha fort aigrement à Diomedes, luy demandant s'il auoit bien en-
 trepris vne si longue nauigation pour cuider corrompre Epaminondas: & au de-
 mourant luy commanda de rapporter à son Roy, que tant comme il voudroit &
 procureroit le bien des Thebains, il l'auroit pour amy, sans qu'il luy coustast rien:
 mais tant qu'il prochasseroit leur dommage, qu'il luy seroit ennemy. Les Argiens
 aians fait ligue & confederation avec les Thebains, ceux d'Athenes enuoyerent
 leurs ambassadeurs en Arcadie pour essayer d'attirer à eux les Arcadiens. Si com-
 mancerent ces ambassadeurs à charger & accuser à bon esciant les vns & les autres:
 de maniere que Callistratus qui parloit pour eux, reprocha à ces deux citez Orestes
 & Oedipus. Epaminondas qui se trouua en ceste assemblee de conseil, se leua, &
 „ dit: Seigneur, nous confessons qu'en nostre ville iadis y a eu vn parricide, & en Ar-
 „ gos vn matricide: mais quant à nous, nous auons chassé & banny de noz pais ceux G
 „ qui ont commis telles malheurtz, & les Atheniens les ont tous deux receus. Et
 aux Spartiates qui auoient chargé les Thebains de plusieurs grandes & griefues impu-
 „ tations: S'ils n'ont fait autre chose, au moins vous ont-ils, Seigneurs Spartiates, re-
 „ spondit Epaminondas, fait oublier vostre peu parler. Les Atheniens auoient con-
 tracté alliance & amitié avec Alexandre tyran de Pheres en Theffalie, qui estoit en-
 nemy mortel des Thebains, & promettoit aux Atheniens qu'il leur feroit auoir la li-
 „ ure de chair pour demy obole. Epaminondas luy respondit, Et nous leur fourni-
 „ rons de bois, qui ne leur coustera rien, pour cuire ceste chair: car nous leur irons razer
 „ & couper tout tant d'arbres qu'ils ont en leur pais, s'ils entreprennent de remuer au-
 „ tre chose que bien à poinct. Congnoissant que les Bœotiens se gastoient & perdoient
 par oyfisfueté, il deliberoit de les tenir continuellement en l'exercice des armes: au
 moien dequoy quād approchoit le téps de l'election des Capitaines, & qu'on le vou- H
 „ loit eslire Bœotarche, c'est à dire, Capitaine de la Bœoce, il disoit à ses citoiés; Pensez y
 „ bien, Messieurs, pendant qu'il vous est encore loisible, auant que de m'eslire: car ie
 „ vous aduise, que si vous me faites vostre Capitaine, qu'il vous faudra venir à la guerre.
 Il appelloit le pais de la Bœoce, qui est tout plat & tout ouuert, l'eschaffault de la guer-
 re, disant qu'il estoit impossible de le garder, sinon que les habitans eussent tousiours
 le bouclier sur le bras, & l'espee au poing. Chabrias Capitaine des Atheniens auoit
 desfait quelque bien petit nombre de Thebains, qui par trop d'ardeur de comba-
 tre auoient couru à la desbandee iusques tout contre les murs de Corinthe, & com-
 me si c'eust esté vne rencontre, il en fit eriger vn trophée: dequoy Epaminondas se
 mocquant, dit, qu'il ne le falloit pas appeller Trophée, mais plus tost Hecatésie,
 comme qui diroit statue de Proserpine, pource qu'au temps passé on colloquoit or-
 dinaire-

A dinairement l'image de Proserpine au premier carrefour qui se trouuoit au deuant de la porte d'une ville. Et comme quelqu'un luy vint rapporter, que les Atheniens
 „ auoient renuoyé au Peloponnese vne armee equippee de nouuelles armes: Et bien,
 „ dit-il, Antigenidas pleure il quand il sçait que Tellin a de nouuelles flustes? car ce
 Tellin estoit vn mauuais ioueur de flustes, & Antigenidas vn excellent. Il s'apper-
 çeut que son Escuyer auoit receu grosse somme d'argent pour la rençon d'un qui
 „ auoit esté prisonnier entre ses mains: Il luy dit, Rend moy mon escu, & t'en va acheter
 „ vn cabaret pour y vser le reste de ta vie, car ie voy bien que tu ne te veux plus en
 „ homme de bien exposer aux hazards de la guerre, comme par cy deuant, depuis que
 „ tu es deuenu vn des riches & opulents. On luy demanda quelquesfois, lequel il esti-
 „ moit plus grand Capitaine, de luy, de Chabrias, ou d'Iphicrates: il respondit, Il seroit
 „ bien mal-aisé d'en iuger tant que nous sommes en vie. A son retour du pais de la La-
 conie il trouua qu'on l'accusoit de crime capital avec les autres Capitaines ses compa-
 B gnons, pour auoir retenu la charge de Capitaine l'espace de quatre mois oultre & par
 dessus le temps qui estoit prefix par la loy: si dit à ses compagnons qu'ils en reiettas-
 sent toute la coulpe sur luy, comme aians esté forcez par luy: & quant à luy, il dit,
 que ses paroles ne pourroient estre meilleures que ses effectz, mais toutesfois que s'il
 estoit forcé, comment que ce fust, de dire quelque chose deuant ses iuges, qu'il les re-
 querroit s'ils estoient d'aduis de le faire mourir, qu'ils fissent escrire sur la coulomme
 „ quarree de sa sepulture sa condamnation, à fin que les Grecs entendissent, que Epa-
 „ minondas auroit esté condamné à mourir, pour ce qu'il auroit contrainct les The-
 „ bains malgré eux de brusler le pays de la Laconie, qui de cinq cents ans au parauant
 „ n'auoit iamais esté pillé: qu'il auroit repeuplé la ville de Messene, deux cens & trente
 „ ans apres qu'elle auoit esté destruite & desertee par les Lacedemoniens: qu'il auroit
 „ reünny & rassemblé en vn corps & vne ligue tous les peuples & villes de l'Arcadie: &
 „ qu'il auroit rendu & restitué aux Grecs leur liberté: car toutes ces choses ont esté
 C faictes par nous en ce voyage. Les Iuges aians ouy ces propos, se leuerent de leurs
 sieges en riant à bon escient, sans vouloir seulement prendre leurs ballottes pour
 ballotter contre luy. Apres la derniere bataille où il fut blecé à mort estant rap-
 porté en sa tente, il fit appeller Daiphantus, & apres celuy là Iollidas: mais quand il
 entendit qu'ils estoient morts tous deux, il ordonna à ses citoyens de faire appointe-
 ment avec leurs ennemis, comme n'aiants plus de Capitaines qui les sçeussent mener
 à la guerre: & de faict l'euenement porta tesmoignage à sa parole, qu'il congnoissoit
 tres-bien ses citoyens. Pelopidas, compagnon d'Epaminondas en la charge de Ca-
 pitaine de la Bœoe, comme ses amis le reprinrent de ce qu'il negligeoit vne chose qui
 „ estoit necessaire, c'est à sçauoir de faire amas d'argent: L'argent necessaire, dit-il, ouy
 „ bien à ce Nicomedes là. monstrant vn pauvre boiteux estropié de bras & de iambes.
 Ainsi comme il se partoioit de Thebes pour aller à la bataille, sa femme le prioit auoir
 D soing de se sauuer: C'est aux autres, dit-il, à qui il fault recorder cela: mais au Ca-
 „ pitaine & qui a charge de commander, il luy fault recorder qu'il ait le soing de sau-
 „ uer les autres, non pas luy. A vn de ses foudards qui disoit, Nous sommes tombez
 „ dedans nos ennemis: Pourquoi nous dedans eux, plus tost qu'eux dedans nous?
 Au reste estant proditoirement retenu prisonnier & mis aux fers, contre la foy publi-
 que des trefues, par Alexandre tyran de Pheres, il luy en disoit iniure en l'appellant
 „ traistre pariure: Le tyran luy demanda, s'il auoit si grande haste de mourir: ouy,
 „ respondit-il, à fin que les Thebains en soient plus irritez contre toy, & que tant
 „ plus tost tu sois puny de ta desloyauté. Thebe la femme du tyran, l'estant allé
 veoir en la prison, luy dit, qu'elle sefbahissoit comment il pouuoit estre si ioyeux
 „ estant en prison aux fers: Mais ie m'esbahis bien plus de toy, dit-il, comme estant
 „ en toute liberté tu peux supporter vn si meschant homme qu'Alexandre. Apres

Les dictz notables des anciens

qu'Epaminondas le fut venu tirer de prison, il dit, qu'il se sentoît tenu à Alexandre, E
 » Pource que par son moien, dit-il, j'ay esprouué plus que iamais, que mon cœur est
 » ferme assez, non seulement contre la crainte de la guerre, mais aussi contre la peur de
 » la mort. Manius Curius, comme quelques vns de ses souldards se plaignissent de ce
 » qu'il donnoit à chascun souldard bien peu de la terre qu'ils auoient conquise sur les
 » ennemis, & en incorporoit la plus grand' part au domaine de la chose publique: l'à
 » Dieu ne plaîse, dit-il, qu'il y ait aucun citoyen Romain qui estime peu de terre, ce qui
 » est suffisant pour nourrir vn homme. Les Samnites, apres qu'il les eut desfaictz en ba-
 » taille, enuoyerent deuers luy pour luy presenter en don vne bonne somme d'or &
 » d'argent. Ils le trouuerent autour de son foyer, où il faisoit bouillir des naueaux de-
 » dans vn pot: il fit responce aux ambassadeurs des Samnites, que celuy qui se conten-
 » toit d'vn tel soupper, n'auoit que faire d'or: au reste, que commander à ceux qui
 » auoient de l'or, luy sembloit plus honorable que d'en auoir. Caius Fabricius aiant
 » entendu que les Romains auoient esté desfaictz en bataille par Pyrrhus, il dit, C'est F
 » Pyrrhus qui a vaincu Labienus, non pas les Epirotes les Romains. Estant enuoyé
 » deuers Pyrrhus pour traiter de la deliurance des prisonniers, le Roy luy offrit en don
 » vne grosse somme d'or, laquelle il ne voulut pas accepter: Et le lendemain Pyrrhus
 » ordonna que lon amenaît le plus grand de ses Elephans, & qu'on le meist droit der-
 » riere Fabricius sans qu'il en sceust rien, puis qu'à l'improuueu on le fist soudainement
 » bramer. ce qui fut faict ainsi. Fabricius se retournant s'en prit à rire, & dit: Ny ton or
 » hier, ny ton Elephant aujourd'huy, ne m'ont point estonné. Pyrrhus luy cuida per-
 » suader qu'il voulust prendre party avec luy, en luy promettant de luy donner toute
 » l'autorité au maniement de ses affaires apres luy. Il luy respondit, Cela ne te feroit
 » pas expedient: car quand les Epirotes auroient bien congneu l'vn & l'autre de nous
 » deux, ils aimeroient mieulx m'auoir pour Roy que toy. Fabricius aiant esté créé Con-
 » sul, le medecin de Pyrrhus luy escriuit vne lettre, en laquelle il luy promettoit de faire G
 » mourir son maistre par poison, s'il vouloit. Fabricius enuoya incontinent la let-
 » tre mesme à Pyrrhus, luy mandant qu'il recongneust par là, qu'il auoit mauuais iuge-
 » ment à discerner quels il deuoit choisir pour ses amis, & quels pour ses ennemis. Pyr-
 » rhus aiant ainsi descouuert & auéré l'embusche que lon dressoit à sa vie, fit pendre
 » son medecin, & renuoya les prisonniers Romains à Fabricius sans leur faire payer
 » rençon: mais Fabricius ne les voulut pas accepter en don gratuitement: ains luy en
 » renuoya autant de ses gens, de peur qu'il ne semblast que ce fust vn loyer qu'il receust
 » pour la descouuerture qu'il luy auoit faite, attendu qu'il ne luy auoit fait faire pour
 » bien qu'il luy voulust, mais de peur qu'il ne semblast que les Romains le voulussent
 » faire mourir par trahison, comme s'ils ne le pouuoient vaincre par vertu.

Fabius Maximus ne voulant pas combattre en bataille rengee Hannibal, ains con-
 sommer par longueur de temps son armee, laquelle auoit faute de viures & d'argent,
 l'alloit tousiours suyuant par lieux aspres & montueux, en le costoyant aucunes fois: H
 dequoy plusieurs se mocquoient, en l'appellant le pedagogue d'Hannibal: mais
 luy ne se souciant point de toutes telles paroles, persistoit tousiours en ses desseings
 » & conseils particuliers, disant, que celuy qui ne pouuoit endurer vn traitt de moc-
 » querie ou vne iniure, estoit plus couard que celuy qui s'enfuyoit deuant son en-
 » nemy. Et comme son compagnon Minucius eust desfaict quelque nombre des
 » ennemis, tellement que lon ne parloit plus que de luy, & disoit-on que c'estoit ve-
 » ritablement vn personnage digne de Rome, il dit, qu'il redoutoit plus la prosperité
 » de Minucius que son aduersité: & peu de temps apres, aiant donné dedans vne em-
 » busche que Hannibal luy auoit dressée, en si grand danger, qu'il fut bien pres d'y
 » demourer luy & toute son armee, Fabius luy allant vistement au secours, non seu-
 » lement le preserua de ce danger, mais encore tua bon nombre des ennemis: telle-
 » ment

A ment que Hannibal dit adonc à ses familiers, Ne vous auois-ie pas bien dit, que
 „ ceste nuee, qui estoit tousiours à l'entour de nous sur ces montaignes, respandroit à
 „ la fin quelque grosse pluye dessus nous? Apres la desconfiture de Cannes, estant
 esleu Consul de Rome, avec Claudius Marcellus homme courageux, qui ne deman-
 doit qu'à s'attacher au combat à l'encontre de Hannibal: luy au contraire auoit espe-
 rance, si lon ne le combatoit point, que son armee harassee & trauaillee se desferoit
 d'elle mesme: de maniere que Hannibal disoit, qu'il craignoit plus Fabius ne com-
 batant pas, que Marcellus combatant. On luy rapporta qu'il y auoit vn soudard Lu-
 canien en son camp, vaillant homme au demourant, & hardy à merueilles, mais qui
 souuent se derobboit la nuit du camp, & s'en alloit veoir vne femme qu'il aimoit. Il
 commanda que lon prist secrettement ceste femme dont le soudard estoit amoureux,
 & que lon la luy amenast. Quand on la luy eust amenee, il fit appeller le soudard, &
 „ luy dit: I'ay esté aduerty comme contre les loix de la discipline militaire tu couches
 B souuent dehors du camp: mais aussi ay-ie bien sçeu d'ailleurs, que tu es homme
 „ de bien: & pourtant les fautes soient remises & pardonnees en recompense des
 „ bons seruices: mais d'ores en auant tu demoureras avec nous, car i'ay vn plege qui
 „ m'en respondra. & en disant ces paroles il fit venir la femme, laquelle il luy consigna
 entre ses mains. Hannibal tenoit toute la ville de Tarente avec grosse garnison, ex-
 cepté le chasteau: Fabius trouua moien de l'attirer & esloigner le plus qu'il peut de
 celle marche, par ruse militaire, puis retournant tout à coup, reprit la ville & la sac-
 cagea toute. Le greffier luy demanda ce qu'il ordonnoit touchant les statues & ima-
 „ ges des Dieux: Laissons, dit-il, aux Tarentins leurs Dieux, qui leur sont courroucez.
 Au reste Marcus Liuius, qui tenoit le chasteau, se vantoit que par son moien la ville
 „ auoit esté reprise: dequoy les autres se mocquoient: mais luy respondit, Tu dis la ve-
 „ rité: car si tu ne l'eusses perdue, ie ne l'eusse iamais recouuree. Estant ia sur l'aage,
 son fils fut esleu Consul: & comme il donnoit audience, & despeschoit affaires de sa
 C charge en public, Fabius le pere monta à cheual pour l'aller trouuer, mais son fils en-
 uoya au deuant de luy vn huissier, luy faire commandement de descendre de son
 cheual: dequoy les assistans eurent honte: mais luy descendant promptement de che-
 „ ual, accourut plus viste que son aage ne portoit, embrasser son fils, en luy disant: Tu
 „ fais tresbien, mon fils, de ressentir à qui tu commandes, & de monstrier que tu en-
 „ tends la grandeur de la charge que tu as prise. Scipion l'ancien estant à repos des af-
 faires, ou de la guerre, ou de gouuernement, employoit tout son loysir à l'estude des
 lettres: au moien dequoy il souloit dire, que quand il estoit seul, il estoit le plus ac-
 cōpagné: & quand il estoit de loysir, c'estoit lors qu'il auoit plus d'affaires. Aiant pris
 d'affault la ville de Carthage la neufue en Espagne, quelques soudards luy amenerent
 vne fort belle fille qu'ils auoient prise prisonniere, & la luy offrirent: Il leur respon-
 dit, Ie la receuroye volontiers, si i'estois homme priué, & non pas Capitaine general.
 D Estant au siege deuant vne ville, qui estoit assise en lieu bas, par dessus laquelle ap-
 paroissoit vn temple de Venus, il commanda que lon continuast les assignations de
 ceux qui auoient à plaider deuant luy dedans ce temple là, & qu'il y tiendrait son au-
 dience au troisieme iour d'apres. comme il fit aiant pris la ville. Quelqu'un luy de-
 manda en Sicile, ainsi qu'il estoit prest de passer en Afrique, sur quoy il se confioit
 de vouloir traicter sa flotte en l'Afrique, il luy monstra trois cents hommes qui se
 iouoient & exercitoient tous armez aux exercices militaires, au long d'une haulte
 „ tour, assise tout sur le bord de la mer: Il n'y a, dit-il, pas vn de ces hommes que tu
 „ vois là, qui ne monte au hault de ceste tour, & ne se iette du hault en bas, la teste la
 „ premiere, si ie luy commande. Estant passé de là, & s'estant aussi tost fait maistre
 de la cāpagne, & aiant bruslé deux camps de ses ennemis, les Carthaginois enuoyerent
 incontinent deuers luy pour traicter d'appointement: & tant fut menee la prattique,

Les dictz notables des anciens

qu'ils promeirent de quitter tout tant qu'ils auoient de vaisseaux en mer, laisser E tous leurs Elephants, & de payer vne bonne grosse somme d'argent : mais aussi tost comme Hannibal fut repassé d'Italie en Afrique, ils se repentirent de ce qu'ils auoient accordé & promis, pour la cōfiance qu'ils auoient és forces & en la personne de Hannibal : dequoy Scipion estant aduertty leur dit, que quand ils voudroient il ne tiendrait pas le traicté qu'il leur auoit accordé, sinon qu'ils payassent cinq mille talents, qui sont trois millions d'or, d'auantage que ce qui auoit esté accordé, pour ce qu'ils auoient mandé & faict venir Hannibal. Et apres que les Carthaginois eurent esté par luy à vifue force desfaicts en bataille, ils renuoyerent de rechef des ambassadeurs pour traicter d'appoinctement & de paix : mais il leur commanda incontinent, qu'ils eussent à se retirer, pour ce qu'il ne leur donneroit iamais audience, que premierement ils ne luy eussent ramené Lucius Terentius, lequel estoit vn gentilhomme Romain, homme debien & d'honneur, qui par fortune de guerre estoit tombé prisonnier és mains des Carthaginois : puis quand ils le luy eurent amené, il F le fit seoir coste à coste de luy au conseil, & donna lors audience aux ambassadeurs, aux quels il octroia la paix. Depuis quand il entra dedans Rome en triumphe, à cause de ceste victoire, Terentius suyuit son char triomphant, aiant vn chapeau sur sa teste, comme estant son serf affranchy, & aduouant tenir sa liberté de luy. Et quand il fut trespaslé, à tous ceux qui accompagnerent le corps à sa sepulture, il donna à tous à boire du bruuage faict de vin & de miel, & procura diligemment toutes autres choses dont il esperoit honorer ses funerailles. mais cela fut depuis. Au reste quand Antiochus veit que les Romains estoient passez en Asie auec puissante armee pour luy faire la guerre, il enuoya ses ambassadeurs deuers Scipion, pour traicter d'appoinctement : aux quels il respondit, Il falloit auoir faict cecy deuant, & non pas à ceste heure, que vostre maistre a desia receu & le mors en la bouche, & la selle avec le cheuauteur sur le dos. Le Senat auoit ordonné qu'il prendroit quelque argent és coffres de l'espargne & thresor de la chose publique, mais les Thresoriers G ne vouloient pas ouurir la chambre du thresor pour ceste iournee là : Il leur dit qu'il pouuroit doncques luy mesme, & qu'il le pouuoit bien faire, attendu qu'il estoit cause qu'on le tenoit ainsi fermé, pour la quantité grande d'or & d'argent qu'il auoit faict apporter dedans. Petilius & Quintus, deux Tribuns du peuple, l'accusoient de plusieurs charges enuers le peuple : Et luy au lieu de s'en iustifier, dit : Seigneurs Romains à tel iour qu'il est au iourd'huy proprement ie desfis en bataille les Carthaginois & Hannibal : & pourtant m'en vois- ie tout de ce pas avec ce chapeau de fleurs sur ma teste, au Capitole, pour y sacrifier & rendre graces de la victoire à Iupiter : ce pendant qui voudra donner sa voix pour ou contre moy, le face à son plaisir. & de faict aiant dit cela, il sy en alla : & tout le peuple alla apres luy, laissant ses accusateurs plaider tout leur saoul. Titus Quintius des son aduenement aux affaires estoit desia si renommé que deuant qu'auoir esté ny Ædile, ny Prêtreur, ny Tribun H du peuple, il fut esleu Consul : & estant enuoyé Capitaine general Lieutenant du peuple Romain, pour faire la guerre à Philippus Roy de Macedoine, il fut conseillé de s'abboucher premierement & parlementer avec luy. Philippus pour la seureté de sa personne luy demandoit ostages : Pour ce, disoit-il, que les Romains ont icy plusieurs capitaines avec toy, & les Macedoniens n'ont que moy : Non, respondit Quintius, pour ce que tu t'es rendu tout seul, aiant faict mourir tous tes amis & parents. Apres qu'il eut desfait en bataille ce Roy Philippus, il fit proclamer en la feste des ieux Isthmiques, qu'il remettoit tous les Grecs en leur franchise & liberté entiere, pour deormais viure à leurs loix : alors les Grecs firent rechercher par toute la Grece les Romains, qui auoient esté vendus pour esclaves durant les guerres de Hannibal, & les aiant rachettez de cinq cents drachmes pour teste, qui sont cin-

quante

A quante escus, ils luy en firent vn present: & les deliurez le suiurerent en son triomphe avec des chapeaux sur leurs testes, comme la coustume est des serfs qui sont de nouveau affranchis. Les Acheïens estoient en propos de faire entreprise pour aller conquerir l'Isle de Zacynthe: mais il les admonesta de ne se ietter point hors du Peloponnese, fils ne se vouloient mettre en danger, comme les tortues quand elles estendent leurs testes hors de leur coque. La nouuelle estant par toute la Grece, que le roy Antiochus sy en venoit en personne avec grosse puissance: tellement que tout le monde estoit effroyé d'ouïr nommer le nombre des combatans & leurs diuerses armeures, il teint vn tel propos au conseil des Acheïens: Qu'estant logé chez vn sien hoste en la ville de Chalcide, qui luy donnoit à soupper, il fesmervilla dont il pouuoit auoir recourré tant de diuerses sortes de venaison, comme il en voyoit seruir sur la table deuant luy: & que son hoste luy respondit, que c'estoit toute chair de pourceau, qui
 „ estoit seulement diuersifiée de faulces & de façon de l'accoustrer. En cas pareil
 B aussi, ne vous esbahissez point de ceste grande armee du Roy Antiochus pour ouïr
 „ nommer des hommes d'armes armez de toutes pieces, des cheuaux legers, des ar-
 „ chers à cheual, des gens de pied: car tous ceux là, ne sont que Syriens, hommes nez
 „ à seruitude, differents les vns des autres de la diuersité d'armeures. Philopœmen estoit
 lors Capitaine des Acheïens, qui auoit bien des gens de cheual & des gens de pied,
 mais il n'auoit point d'argent pour les entretenir: Quintius en se iouant disoit, que
 Philopœmen auoit bien des mains & des pieds, mais qu'il n'auoit point de ventre:
 ce qui estoit de tant plus plaissant, que à la verité il se trouuoit de la composition de
 son corps tel. Caius Domitius, celuy que Scipion l'aîné laissa en son lieu aupres de
 son frere Lucius Scipion, en la guerre contre le roy Antiochus, aiant recogneu l'ar-
 mee des ennemis estans en bataille, comme les Capitaines qui auoient charge en
 l'armee des Romains luy conseillassent que promptement il donnast la bataille: il leur
 respondit, qu'il n'y auoit pas assez de iour pour pouuoir mettre en pieces tant de mil-
 C liers d'hommes, les saccager, & piller leur bagage, & puis s'en retourner au camp &
 se traiter, mais qu'il le feroit le lendemain de bon matin: & de faict, le lendemain
 il leur donna la bataille, & en tua cinquante mille. Publius Licinius consul, en vne
 rencontre de gens de cheual fut vaincu par le Roy Perseus, & perdit bien enuiron
 deux mille huit cens hommes, que morts que pris en la bataille. Apres ceste victoire,
 Perseus enuoya deuers le Consul pour traiter de paix & d'appointement: là où les
 conditions de paix que le vaincu proposa au vainqueur furent, qu'il se soubmet en-
 tierement luy & son estat aux Romains, pour en faire & ordonner à leur discretion.
 Paulus Æmylius poursuiuant vn second consulat, en fut debouté & refuzé: mais
 depuis, quand on veid que la guerre contre le Roy Perseus alloit trop à la longue,
 par l'ignorance, paresse & lascheté des Capitaines que lon y enuoyoit, les Romains
 l'esleurent Consul pour la seconde fois: mais il leur dit, qu'il ne leur en sçauoit ny
 D gré ny grace, d'autant qu'ils l'auoient esleu, non pour luy gratifier, attendu qu'il ne
 demandoit plus de charge, mais pour ce que eux mesmes auoient besoing d'vn Ca-
 pitaine. Retournant de la place en sa maison, il trouua vne sienne petite fille, qui
 auoit nom Tertia, toute esplorée: Si luy demanda la cause pourquoy elle ploroit:
 elle respondit, Nostre Perseus est mort, mon pere. c'estoit vn petit chien qui auoit
 „ ainsi nom. A la bonne heure, dit-il, ma fille: ie pren ceste mort pour bon augure.
 Estant arriué en son camp, il y trouua force babil & force brauerie des souldards, qui
 se mesloient de vouloir faire l'estat de Capitaine, & qui s'entremettoient curieusement
 de plusieurs choses plus auant qu'ils ne deuoient: il leur commanda qu'ils ne se meslas-
 sent point de tant de choses, mais seulement qu'ils se donnassent peine, que leurs espees
 fussent bien afilees & bien pointues, & que luy prouuoïroit au demourant. Ceux qui
 estoient aux escoutes la nuit, il ne vouloit point qu'ils portassent ne picque ny

Les dicts notables des anciens

espee, à fin que sentans qu'ils n'auoient moien de combattre, fils estoient surpris de E
l'ennemy, ils en fussent plus soigneux de resister au sommeil. Estant entré dedans
la Macedoine à trauers les montaignes, il trouua deuant soy les ennemis bien ren-
gez en bataille: & luy conseilloit Scipion Nasica, que tout sur l'heure il leur allast
„ donner la bataille: Si i'estois en l'aage que tu es, dit-il, i'aurois la mesme opinion que
„ tu as: mais la longue experience en ce mestier me defend d'aller tout las du chemin
„ combattre vne armee ordonnee en bataille. Apres qu'il eut desfaict entierement
Perseus, en faisant aux alliez & confederez les festins de sa victoire, il disoit, que de
mesme sens & experience procedoient le sçauoir renger vne bataille tres-effroya-
ble à ses ennemis, & vn festin tres-agreable à ses amis. Perseus estant son prison-
„ nier, qui le supplioit fort instamment qu'il ne fust point mené en triomphe, Cela,
„ luy dit-il, est en ta puissance. luy donnant congé par ses paroles de se desfaire soy-
mesme. Il fut trouué és thresors de ce Roy vne quantité infinie d'or & d'argent, dont
il ne toucha ny ne prit iamais rien pour luy: mais il donna à Tubero son gendre, pour F
honorer sa vertu, vne coupe d'argent du pois de cinq marcs: encore dit on que ce
fut la premiere vaisselle d'argent qui entra en la maison des Æmyliens. De quatre
siens enfans masles, il en auoit parauant donné les deux premiers à adopter en autres
familles nobles: & des deux derniers qui luy estoient demourez en sa maison, l'un
aagé de quatorze ans, luy mourut cinq iours auant son triomphe: & l'autre, qui auoit
douze ans, cinq autres iours apres: dont le peuple fut fort desplaisant, & en auoit grã-
de compassion de luy: mais luy sortant en public, & reconfortant le peuple, dit,
que deormais il pensoit estre hors de crainte & hors de danger, que malheur aucun
n'aduint à la chose publique, pour ce qu'il supportoit pour tous l'enuie de tât de pro-
speritez qu'il auoit eues pour le public, d'autant que la fortune l'auoit deriuee & tour-
nee toute sur sa maison seule. Caton l'ancien en harenguant deuant le peuple Ro-
main, & reprenant aigrement son intemperance, ses delices & superflue despen-
se: Il est bien malaisé, disoit-il, de parler à vn ventre qui n'a point d'aureilles. & disoit G
aussi, qu'il sebahissoit comment pouuoit durer vn cité, en laquelle vn poisson
se vendoit plus qu'un bœuf. Et blasmant aussi la trop grande autorité & licence
„ que lon donnoit par tout aux femmes: Tous autres hommes, disoit-il, comman-
„ dent aux femmes, & nous à tous hommes, & les femmes à nous. Aussi disoit-il,
qu'il aimoit mieux ne receuoir gré ny grace quand il auroit faict quelque seruice,
que n'estre pas puny quand il auroit faict quelque faute: & qu'il pardonnoit à tous
ceux qui failloient par erreur ou ignorance, excepté à luy: Et en sollicitant les ma-
gistrats de chastier ceux qui offensoient les loix, il disoit, que ceux qui auoient le
moyen & l'autorité de reprimer les malfaiçteurs, & ne le faisoient, cōmandoient
eux mesmes le mal. Il disoit aussi, que les ieunes gents qui rougissoient quand on les
reprenoit, luy plaisoient plus que ceux qui pallissoient: & qu'il haïssoit vn soudard, H
lequel en cheminant demenoit les mains, & en combatant les pieds, & qui ronfloit
plus haut en dormant, qu'il ne crioit en frappant: & que celuy là estoit vn mauuais
gouuerneur, qui ne se sçauoit pas gouuerner soy-mesme. Il auoit opinion que cha-
cun doit auoir plus de honte de soy-mesme, que d'autre personne quelconque.
„ Voyant que plusieurs prochassoient que lon leur erigeast des statues: l'ayme mieux,
„ disoit-il, que lon demande pourquoy on n'a point erigé de statue à Caton, que pour-
„ quoy on luy en a erigé. Il conseilloit à ceux qui auoient licence de faire ce qu'ils
vouloient, de l'espargner, à fin qu'elle leur durast tousiours. Ceux qui ostoient
l'honneur à la vertu, ostoient, disoit-il, la vertu à la ieunesse. Il estoit d'aduis que
lon ne deuroit ne prier vn bon magistrat ou iuge de chose iuste, ne deprier de chose
iniuste. Il disoit que si bien l'iniustice n'apportoit peril à celuy qui la commettoit,
qu'elle en apporte à tous les autres. Il admonestoit les vieilles gens de n'adiouster
point

A point à leur aage la laideur du vice, attendu qu'elle en a tant d'autres. Il estimoit qu'il n'y auoit difference entre le courroucé & le furieux, sinon d'autant que l'un duroit plus, & l'autre moins. Il disoit aussi, que lon ne portoit point d'enuie à ceux qui vsoient de leur fortune sagement & modereement: Pource, disoit il, que ce n'est pas de nous que lon est enuieux, mais de ce qui est autour de nous. Et que ceux qui font à bon escient là où il faut iouer & rire, apprestent aussi à rire là où il faudra faire à bon escient: & que les belles & vertueuses actions deuroient tousiours rencontrer de belles descriptions, pour ne demourer iamais sans la gloire qui leur appartient. Il reprenoit les citoiens Romains qui donnoient tousiours leurs voix à vn mesme personnage aux elections des magistrats: Car il semblera, dit-il, ou que vous n'estimez pas beaucoup l'honneur de vos magistrats, ou que vous n'aurez pas beaucoup d'hommes que vous en iugiez dignes. Il faisoit semblant d'auoir en admiration la force d'un qui auoit vendu des terres qu'il possedoit assises au long de la mer, comme estant plus puissant que la mer mesme: car ce qu'elle mine à peine peu à peu, cestuy-cy l'a auallé tout à vn coup. Prochassant l'estat & office de Censeur, & voyant que d'autres siens competeurs & concurrents alloient caressant & flatant le peuple pour l'insinuer en sa bonne grace: luy au contraire alloit criant, que le public auoit besoyn d'un medecin aspre & maupiteux, & d'une grande purgation: & pourtant, qu'il falloit eslire non celuy qui seroit le plus gracieux, mais le plus seuer: & en faisant ces remonstrances là, il fut esleu deuant tous autres. Enseignant les ieunes hommes à hardiment & asseurement combattre, il disoit, que la parole bien souuent effroye plus l'ennemy que l'espee, & la voix que la main, & luy fait prendre la fuite. En faisant la guerre en Espagne à ceux qui habitent au long de la riuere de Betis, il se trouua en danger pour la multitude grande des ennemis qui estoient en armes contre luy, & ne pouuoit auoir promptement secours, sinon des Celtiberiens, qui pour ce faire luy demandoient deux cents talents, qui sont six vingts mille escus: les autres capitaines Romains ne vouloient point qu'il promeist cest argent à des Barbares pour leur salaire, mais Caton leur dit qu'ils abusoient: Car si nous gagnons, dit-il, nous les payerons, non du nostre, mais aux despens de nos ennemis: & si nous perdons, il n'y aura plus ne qui paye, ne qui demande à estre payé. Aiant pris plus de villes qu'il ne demoura de iours en Espagne, ainsi que luy-mesme dit, il n'y prit pour luy iamais rien plus, que ce qu'il y beut & mangea: mais bien departit il à chascun de ses souldards vne liure d'argent, disant qu'il valoit mieux que plusieurs retournassent de la guerre en leurs maisons avec de l'argent, que peu avec de l'or: pour ce que les magistrats & capitaines ne se deuoient accroistre de rien en leurs charges & gouuernemens, sinon d'honneur & de gloire. Au voyage de ceste guerre il auoit quand & luy cinq de ses seruiteurs, desquels il y en eut vn qui achetta trois prisonniers de guerre: mais estant aduertie que son maistre l'auoit sceu, deuant que venir deuant luy, il se pendit & estrangla luy mesme. Scipion l'Africain le priant de vouloir fauoriser à la cause des bannis d'Achaïe, à fin qu'ils fussent remis & restituez en leurs pais, il fit semblant de ne se soucier point de tel affaire: mais voyant que lon en parloit tant, & en faisoit on si grande instance au senat, il se leua, & dit, Comme si nous n'auions autre chose à faire, nous demourons tout le iour à disputer icy de ces vieillards Grecs, à sçauoir s'ils seront portez en terre par les fossoyeurs & porteurs de deça ou par ceux de dela. Postumius & Albinus auoit escrit des histoires en Grec, au prologue desquelles il prioit les auditeurs & lecteurs de luy pardonner s'il y auoit aucune impropriété au langage. Caton s'en mocquant disoit, qu'il meritoit qu'on luy pardonnast, si c'estoit par ordonnance & commandement des Amphictyons, qui estoient les estats de la Grece, qu'il eust esté contrainct, malgré luy, d'entreprendre ceste histoire. Scipion le puisné en cinquante & quatre ans qu'il vesquit, n'achetta

A. Gellius
le nomme
Aulus Albi-
nus, l. ii. c. 8.

Les dictz notables des anciens

ny ne vendit, ny ne bastit oncques rien : & dit on qu'en vne si grosse & si puissante E maison, comme estoit la sienne, lon n'y trouua iamais que trente trois marcs pesant de vaisselle d'argent, mesmement apres auoir eu la ville de Carthage en sa puissance, & auoirenrichy ses soudards plus que iamais autre capitaine n'auoit fait. Obseruant le precepte que luy auoit donné Polybius, il mettoit peine de ne se retirer iamais de la place, qu'il ne se fust rendu de nouveau quelqu'un de ceux qu'il rencontroit, comment que ce fust, familier & amy. Estant encore ieune il auoit desia si grande reputation de vaillance & de sagesse, que Caton l'aîné, enquis des ieunes gens qui estoient au camp deuant Carthage, entre lesquels il estoit, il respondit :

Homere
Odyss. l. 10.

Celuy là seul est au nombre des sages,
Les autres sont vaines vmbres volages.

Au moien dequoy, apres son retour à Rome, ceux qui estoient demourez au camp le rappelloient, non pour enuie qu'ils eussent de luy faire plaisir, mais pour ce qu'ils esperoient prendre plus tost & plus facilement la ville par son moien. Au dedans des F murailles de laquelle estant desia entré, & neantmoins les Carthaginois combattans encore du chasteau, Polybius luy conseilloit de faire ietter dedans la mer qui est entre deux, laquelle n'est pas fort creuse, des chausses-trappes, ou bien des aix percez de pointes de cloux, de peur que les ennemis passans ce bras de mer ne vinsent en sursault assaillir leurs rempars. Il luy respondit que c'estoit vne mocquerie, veu qu'ils auoient desia gaigné les murailles, & qu'ils estoient dedans la ville de leurs ennemis, chercher les moiens de ne combattre point contre eux. Et trouuant la ville toute pleine de statues & de tableaux Grècs, qu'ils auoient emportez des villes de la Sicile, il commanda que les Siciliens vinsent reconnoistre ce qui seroit à eux, & qu'ils l'emportassent : mais de tout le pillage il ne voulut pas endurer qu'aucun esclau ny affranchy en prist ny en achetast chose du monde, combien qu'au demourant chascun en pillast & emportast ce qu'il vouloit. Le plus grand & le plus familier amy qu'il eust, Lælius, poursuiuoit l'estat du consulat, & luy fauorisoit & aidait G sa poursuite en tout ce qu'il pouuoit : à l'occasion dequoy il demanda à vn Pompeius qui briguoit aussi le mesme estat, fil estoit vray qu'il le poursuiuist : or estimoit on que ce Pompeius la fust fils d'un menestrier ioueur de flustes : il luy fit response qu'il ne le poursuiuoit pas, & qui plus est, luy promet qu'il accompagneroit Lælius à faire sa poursuite par tout, & qu'il prieroit pour luy. Ils se fierent à ses paroles, dont ils furent trompez, & le iour de l'election l'attendirent long temps, iusques à ce qu'on leur vint rapporter, qu'il estoit desia en la place, qui briguoit pour luy mesme, & se recommandoit à tous les citoiens, les vns apres les autres. Dequoy tous les autres se courrouçans, Scipion s'en prit à rire disant, C'est vne grande sottise à nous, quand i'y pense, que nous auons icy demouré si long temps à attendre vn flusteur, comme si nous eussions à prier & inuoker non des hommes, mais des Dieux.

C'est pour
ce que, du-
rant les sa-
crifices, on
iouroit tous-
iours des
flustes.

Appius Claudius briguoit à la concurrence de luy, l'office de Censeur, & disoit pour H rendre sa brigade plus fauorable, qu'il salüoit sans aide de protocole par nom & par surnom, tous les citoiens de Rome, là où Scipion n'en congnoissoit, par maniere de dire, pas vn : Tu dis la verité, respondit Scipion, car i'ay tousiours eu soing non d'en congnoistre beaucoup, mais de n'estre incongnu de pas vn. Au reste il conseilloit aux Romains qui lors auoient la guerre contre les Celtiberiens, qu'ils les enuoyassent tous deux au camp en estat ou de Lieutenans, ou de Coulonnels de gens de pied, & puis qu'ils receussent les tesmoignages des Capitaines & hommes de guerre, qui auoit mieulx fait le deuoir d'homme de bien d'eux deux. Aiant esté créé Censeur, il osta le cheval à vn ieune homme, d'autant que despendant excessiuemēt à faire grand' chere, du temps que la ville de Carthage estoit assiegee, il auoit fait faire vne piece de four, en forme de ville, & l'appellant Carthage l'abandonna à deschirer & piller à ceulx qui

A qui estoient à table avec luy. Et comme le ieune homme luy demanda, pour quelle
 „ cause il le cassa, & le priuoit du cheual public: Pour autant, dit-il, que tu as saccagé
 „ & pillé Carthage deuant moy. Durant le temps de la Censure, il apperçeut vn iour
 „ Caius Licinius qui passoit: Je sçay de certain, dit-il, que cest homme icy est pariure:
 „ mais d'autant qu'il n'y a personne qui l'accuse, ie ne puis estre iuge & tesmoing ense-
 „ ble. Estant enuoyé luy troiesiesme par le Senat, comme Contrerolleur general, comme
 dit Clitomachus,

Pour syndiquer les hommes & les villes,

Si lon gardoit les mœurs & loix ciuiles,

& voir comme se gouuernoient les peuples, les nations, & les Roys, quand il fut arriué
 en Alexandrie, & descendu de la nauire, les Alexandrins accouras de toutes pars pour
 le voir, le prierent de descouurir sa teste, d'autant qu'il auoit le bout de sa robbe dessus,
 à fin qu'ils le veissent mieulx à face toute descouuerte: ce qu'il fit, dequoy ils iette-
 B rent grandes acclamations, & luy applaudirent des mains en signe de ioye: & comme
 leur Roy se parforçast à grand peine, tant il estoit gras & delicat, à faire à l'enuy
 d'eulx qui le suyuoient par tout: Scipion dit tout bas en l'oreille de Panætius qui estoit
 „ pres de luy: Les Alexandrins recoient desia ce fruit de nostre voyage, qu'au
 „ moins ils voyent leur Roy se promenant pour l'amour de nous. En ce voyage, il
 estoit accompagné d'un sien amy philosophe nommé Panætius, & de cinq serui-
 teurs, desquels comme l'un fust mort en ceste peregrination, il n'en voulut point a-
 chetter d'autre en estrange país, ains en fit venir un autre de Rome. Il sembloit que les
 Numantins fussent inuincibles & inexpugnables, d'autant qu'ils auoient ja vaincu &
 desfaict plusieurs Capitaines: au moyen de quoy le peuple Romain esleut Scipion
 Consul pour la seconde fois: & cōme plusieurs ieunes hommes en bien grand nom-
 bre se preparassent pour le suyure à ceste guerre, le Senat l'empescha sous couleur de
 dire, que l'Italie demoureroit deserte de gens de defense: & si ne luy permirent pas de
 C prendre de l'argent qui estoit ja tout prest & present au thresor, ains luy baillerent
 des assignations sur les payemens des fermiers, dont les termes n'estoient pas en-
 core escheus. Et quant aux deniers, Scipion dit qu'il ne demoureroit pas pour cela,
 d'autant que son argent & celui de ses amis y fourniroit: mais quant à ce qu'on ne
 luy vouloit pas souffrir leuer & emmener gens, il s'en plaignit bien fort, pource qu'il
 „ disoit que la guerre où lon l'enuoyoit, estoit dangereuse & difficile: Car si c'est pour
 „ la vaillance des ennemis que nos gens y ont esté tant de fois desfaicts, elle est dan-
 „ gereuse pour auoir à combattre contre de tels ennemis: & si ç'a esté pour la faute &
 „ lascheté de nos gens, elle l'est encore plus, pour auoir à combattre avec de si lasches
 amis. Estant arriué au camp, il y trouua un grand desordre, grande dissolution, su-
 perstition, & grande superfluité de toutes choses: si en bannit & chassa incontinent
 toutes sortes de deuins & de diseurs de bonne aduenture, tous sacrificateurs, & tous
 D macquereaux tenans bordaux publiques, & commanda que chascun renuoyast chez
 soy toute autre sorte de vaisselle & d'utensiles, sinon la marmite à faire cuire la chair,
 la broche, & le pot à boire, de terre: de coupes ou de flacons d'argent, ne permet
 que lon en peust retenir pesant plus de deux marcs. Il defendit de se baigner & estu-
 uer, & si l'y en auoit qui se voulussent oindre, qu'ils se frottassent eulx-mesmes, & que
 c'estoient les bestes qui n'ont point de mains, qui auoient besoing d'hommes qui les
 frottassent. Il ordonna aussi que lon disnast tout debout sans manger viande chaul-
 de, mais que pour souper, on s'assist qui voudroit, sans y manger autre chose que du
 pain avec quelque potage lié, & un simple mets de chair boulie ou rostie: & luy-
 mesme alloit vestu d'une cappe noire bouclée pardeuant, disant qu'il portoit le dueil
 „ de la honte de son armee. Il trouua que un Colonel de gens de pied, nommé Mem-
 „ mius, faisoit porter apres luy sur ses sommiers des coupes & vases à boire, enrichis

Les dicts notables des anciens

C'est à dire
pour vn peu
de temps.

de pierreries, & d'ouillage de Thericles. si luy dit: Tu t'es rendu † pour trête iours inu- E
tile à moy & à ton païs, estant tel, & pour toute ta vie à toymesme, t'accoustumant à
» si superfluës delices. Vn autre luy monstroït sa rondelle fort bien & richement or-
» nec, auquel il respondit: Voyla vne belle rondelle, mon amy, mais il fault qu'un sou-
» dard Romain mette plus son esperance en sa main droite, que non pas en sa gauche.
Vn autre aiant chargé sur ses espaules vn faisceau des paillis dont on remparoit le
» camp, se plaignoit qu'il estoit trop chargé: C'est bien employé, dit-il, pource que tu
» te fies plus en ces paillis, que tu ne fais en ton espee. Voyant les ennemis Numantins
desesperer, il ne voulut pas incontinent les aller combattre, ainst tira la chose en quel-
que longueur, disant qu'il achettoit avec le temps la seureté des affaires, pour ce que
le bon Capitaine doit faire comme le sage medecin, qui ne vient iamais à l'extreme
remede de couper la partie avec le fer, sinon à l'extremité, apres que tous autres
moyens de medecine luy defaillent: toutefois ayant espié son occasion, il donna la
bataille à ceux de Numance, & les desfit: quoy voyans les viellards dirent iniure à F
leurs gens, de ce qu'ils s'estoient ainsi laissez battre par ceux qu'ils auoient battus tant
» de fois: mais il y en eut vn qui leur respondit, Les moutons sont bien les mesmes qu'ils
» estoient par cy deuant, mais ils ont vn autre berger. Apres auoir pris la ville de Nu-
mance, & auoir entré en triomphe dedans Rome pour la deuxiesme fois, il tomba en
differéent grand à l'encontre de Caius Gracchus, pour la cause du Senat, & des alliez &
confederez: dequoy le commun peuple estant indigné contre luy, fit bruit & le sis-
fla pour le faire descendre de la tribune aux harangues, ainsi comme il leur cuyda fai-
» re ses remonstrances: Mais il leur dit, Iamais la clameur de tout vn camp en armes ne
» m'estonna, tant s'en fault que la crierie d'une tourbe de gens ramassez me puisse trou-
» bler, à qui ie sçay que l'Italie n'est point mere, mais marastre. Et comme ce Caius
» Gracchus cria tout hault, qu'il le falloït tuer comme vn tyran: Ils ont raison de me
» vouloir faire mourir ceux qui font la guerre à leur propre païs: car ils sçauent bien
» que Rome ne peult tomber tant que Scipion sera debout, ny Scipion viure quand G
» Rome sera abbatuë. Cecilius Metellus deliberant comme il pourroit faire seure-
» ment ses approches deuant vne place forte, comme vn centenier luy dist, En perdant
» seulement dix hommes tu l'emporteras: il luy demanda, si il vouloit estre l'un de ces
» dix. Et comme vn autre Colonel de gens de pied encore ieune d'age luy deman-
» da ce qu'il vouloit faire: Si ie pensois, dit-il, que ma chemise le sceust, ie la despouil-
» lerois tout à ceste heure pour la mettre dedans le feu. Il auoit esté contraire à Sci-
pion durant sa vie, mais quand il fut mort il en eut regret, & commanda à ses enfans
qu'ils allassent mettre leurs espaules sous le liest pour le porter à son enterrement,
disant qu'il rendoit graces aux Dieux, de ce que Scipion auoit esté né à Rome, & non
pas ailleurs. Caius Marius estant venu de fort bas lieu au maniement des affaires,
par le moyen des armes, demanda l'office de l'Ædilité grande: & sentant qu'il n'y fai-
soit pas bon, au mesme iour passa à demander & poursuivre la petite: & neantmoins H
encore qu'il fust debouté de toutes les deux, si ne perdit-il point l'esperance de se
voir vn iour le premier des Romains. Aiant des varices, qui sont des venes essargies
en l'une & en l'autre cuisse, il les bailla à couper au chirurgien sans estre lié, & en-
dura toute l'operation du chirurgien, sans soupirer ny froncer les sourcils: mais com-
me le medecin aiant fait à vne cuisse passa à l'autre, il ne la luy voulut pas donner,
disant que la cure de tel mal ne meritoit pas que lon en endurast de si griesues dou-
leurs. Il auoit vn neveu appellé Lucius, qui au second consulat de son oncle voulut
forcer vn beau ieune fils, qui ne faisoit lors que commencer à porter les armes sous
sa charge. Ce ieune homme le tua tout roide: & comme plusieurs l'accusassent de
ce meurtre, il confessa franchement qu'il auoit voirement fait mourir son Capitai-
ne, & en dit & declara la cause tout publiquement. Marius, le faict entendu, se fit
apporter

- A apporter vne des couronnes que lon auoit accoustumé de donner à ceux qui faisoient quelque bel acte de prouësse à la guerre, & la posa luy-mesme de sa propre main sur la teste du ieune homme. Estant campé assez pres du camp des Teutons, en lieu où il y auoit bien peu d'eau, comme ses souldards se plaignissent qu'ils mouroient de soif, il leur monstra vne riuere non gueres loing, qui couloit au long du camp des ennemis:
- » C'est là, dit-il, qu'il fault que vous alliez acheter à boire au pris de vostre sang, si
- » vous en voulez auoir. Les souldards luy respondirent, qu'il les y menast donc, ce pendant que leur sang estoit encore liquide, & qu'il n'attendist pas qu'il fust du tout sec & caillé de soif. Du temps de la guerre des Cimbres il donna tout à vn coup droit de bourgeoisie Romaine à mille homme de Camerin, qui auoient fort bien seruy en ceste guerre, chose qui estoit contre toutes loix: & comme quelques vns le reprisent de ce qu'il auoit ainsi transgressé les loix, il leur respondit, qu'il n'auoit peu entendre ce que disoient les loix, pour le grand bruit des armes. Et du temps de la guerre
- B Sociale, se voyant enfermer de trenchées tout à l'entour, & assieger, il eut patience, attendant tousiours son occasion. Et comme Pompeius Silo Capitaine general des ennemis luy dist, Marius, si tu es si grand Capitaine que lon dit, fors dehors de ton camp,
- » & me viens combattre: Mais toy, dit-il, si tu es si grand Capitaine que tu penfes, contrains moy malgré que i'en aye de sortir pour t'aller combattre. Catulus Luctatius en la guerre Cimbrique estant campé au long du fleue d'Athésis, & voyans les Romains que les Barbares s'efforçoient de passer l'eau, ils deslogerent, quelque remonstrance que leur Capitaine leur sceust faire: & quand il veit qu'il ne les pouuoit autrement arrester, luy-mesme se mit entre les premiers qui fuyoient, à fin qu'il ne semblast point qu'ils fuyssent deuant leurs ennemis, mais qu'ils suyussent leur Capitaine. Sylla surnommé l'heureux, entre ses prosperitez en comptoit deux pour les
- » plus grandes: l'une, qu'il auoit eu bonne amitié avec Metellus Pius: l'autre, qu'il n'auoit pas destruit la ville d'Athenes, ains l'auoit preseruee de ruine. Caius Popillius
- C fut enuoyé deuers le Roy Antiochus portant vne lettre du Senat, par laquelle on luy mandoit, qu'il eust à retirer son armée d'Ægypte, & de ne point s'attribuer & vsurper le Royaume qui appartenoit aux enfans de Ptolomeus orphelins. Antiochus le voyant venir deuers luy à trauers son camp, le salua de tout loing: Popillius, sans le resaluer, luy bailla sa lettre: laquelle Antiochus leut, & apres l'auoir leue respondit, qu'il delibereroit sur ce que le Senat luy mandoit, & puis qu'il luy feroit response. Popillius adonc luy fit vn cercle autour de luy avec vne baguette qu'il
- » tenoit en la main, en luy disant: Delibere doncques, dit-il, auant que sortir de ce cercle, & m'en fais response. Toute l'assistance s'estonna merueilleusement de l'assurance & hardiesse de cest homme. Et Antiochus sur le champ luy respondit, qu'il feroit doncques ce qu'il plairoit aux Romains: & adonc Popillius le salua amiablement, & l'embrassa. Lucullus en Armenie s'en alloit avec dix mille hommes de pied,
- D & mille de cheual, trouuer le Roy Tigranes, qui auoit cent cinquante mille homes de guerre, pour luy dōner la bataille, & estoit le sixiesme iour d'Octobre, auquel l'armée Romaine, qui estoit sous vn Scipion, auoit esté desfaicte par les Cimbres. Et comme quelqu'un luy dist, que les Romains abominoient & redoutoient fort ce iour-là:
- » C'est pourquoy, dit-il, il nous fault auourd'huy combattre vertueusement & courageusement, à celle fin que nous rendions ceste iournee, que les Romains tiennent pour triste & malencontreuse, ioyeuse & heureuse. Et comme les Romains redoutassent principalement les hommes d'armes Armeniens, estants armez de toutes pieces,
- » il leur dit, qu'ils ne s'en donnassent point d'ennuy, Pour ce que ie vous assure que vous aurez plus de peine à les despouiller, que vous n'aurez à les tuer. Et montant le premier dessus vne motte, apres auoir de là vn peu considéré la contenance des Barbares qui branloient, il fescria tout hault: Compagnons, ils sont à nous: &

Les dictz notables des anciens

de faict, festans d'eux mesmes mis en route, sans que personne eust hardiesse d'at- E
tendre, il les chassa tellement, qu'il en tua sur le champ iusques à bien cent mille, sans y
perdre des siens que cinq tant seulement. Cneus Pompeius surnommé le grand, fut
autant aimé des Romains, comme son pere auoit esté hay : & estant encore fort ieu-
ne, il se ioignit à la faction de Sylla, & sans auoir office quelconque de la Chose publi-
que, ny estre du Senat, il leua grand nombre de gens de guerre de tous costez d'Italie :
& comme Sylla l'appellast à soy, il dit, qu'il ne meneroit point ses gens à son Capitai-
ne, qu'ils n'eussent premierement fait quelque destrouffe, & quelque desfaiete avec
effusion du sang des ennemis : & de faict il n'y alla point que premierement il n'eust
desfaict en plusieurs rencontres plusieurs chefs des ennemis. Depuis estant enuoyé
par Sylla pour gouuerneur en la Sicile, entendant que ses gens s'escartans de la trou-
pe, alloient robant, forçant & pillant par tout le chemin, il fit mourir ceux qui
se desbandoient sans congé, & qui alloient courir çà & là : mais à ceux qui alloient
par son commandement en quelque commission qu'il leur bailloit, il leur sceilloit F
leurs espees avec son cachet. Il fut sur le point de faire passer au fil de l'espee tous
les Mamertins entièrement, d'autant qu'ils auoient tenu & suiuy le party contraire
à Sylla. Mais Sthennius vn des habitans de ceux qui auoient accoustumé de pres-
cher & mener le peuple par leurs harangues, luy dit, Qu'il ne feroit pas bien, si pour
» vn seul coupable, il en faisoit mourir plusieurs innocents, & que c'estoit luy seul
» qui auoit esté cause de tout le mal, aiant induit par persuasions ses amis, & par force
» ses ennemis, à prendre & suyure le party de Marius. Pompeius esmerueillé de ceste
remonstrance dit, qu'il pardonnoit aux Mamertins s'ils estoient laissez mener &
persuader à vn tel personnage, qui auoit plus cher le salut de son pais que sa vie pro-
pre : & de faict il absolut la ville toute, & Sthennius mesme. Depuis estant passé en
Afrique contre Domitius, & y aiant gagné vne grosse bataille, comme ses souldards
le saluassent Empereur, qui est à dire souuerain Capitaine general, il leur dit qu'il
ne receuroit point cest honneur tant que le rempar du camp des ennemis seroit de- G
bout : & adonc eux sen courants tout de ce pas, encore qu'il fist vne grosse pluye,
allerent abbatre la pallissade, & saccager le camp des ennemis. A son retour Sylla
luy fit de grandes caresses & beaucoup d'honneur, & entre autres fut le premier
qui l'appella Magnus : toutefois comme il se delibera de rentrer en triomphe dedans
Rome, Sylla l'en voulut empescher, alleguant pour sa raison, qu'il n'estoit pas en-
» core receu au Senat. Pompeius se tournant deuers les assistans : Il semble, dit-il,
» que Sylla ignore, qu'il y a plus d'hommes qui adorent le Soleil leuant, que le Soleil
» couchant. Quoy entendant Sylla, s'escria : Et bien de par Dieu, qu'il triomphe donc
» fil en a tant d'enuie. Toutefois encore luy faisoit empeschement Seruilius homme
de dignité Senatoriale, qui s'en courrouçoit : & plusieurs de ses souldards mesmes
s'opposoient à son triomphe, s'ils n'auoient quelques presents qu'ils pretendoient
» leur estre deuz : mais Pompeius dit hault & clair, qu'il quitteroit plus tost le triomphe H
» & tout, que de se soubmettre à les caresser ne flater : & adonc Seruilius luy dit, A
» cela voy-ie maintenant, Pompeius, que tu es grand veritablement, & digne de
» triomphe. Estant la coustume à Rome que les Cheualiers, apres auoir esté à la guer-
re le temps prefix & ordonné par les loix, amenassent leur cheual sur la place deuant
les deux reformateurs des mœurs, que lon appelle les Censeurs, & racontassent là
publiquement les guerres où ils se seroient trouuez, & les Capitaines soubz lesquels
ils auroient porté les armes, à fin que selon leurs merites ils en fussent ou louez ou
blasmez : Pompeius estant Consul amena luy-mesme son cheual par la bride deuant
les Censeurs, qui pour lors estoient Gellius & Lentulus : & comme eux suyuant l'or-
donnance luy demandassent, fil auoit esté à la guerre autant d'annees comme il
» estoit requis par les loix : Ouy respondit-il, & tousiours sous moy mesme Capitai-
ne. Estant

A ne. Estant en Espagne faisy des papiers de Sertorius, entre lesquels y auoit plusieurs lettres missiues des principaux du Senat, qui appelloient Sertorius à Rome pour y remuer encore quelque nouveau mesnage, il les meit toutes au feu, donnant à ceux qui auoient eu mauuaise volonté, moyen de se repentir & de se corriger. Phraates Roy des Parthes, enuoya deuers luy le prier de ne passer point la riuiera d'Euphrates, & faire que ce fust la borne d'entre luy & eux: Mais plus tost, dit-il, sera-ce la iustice qui fera la borne d'entre les Parthes & les Romains. Lucius Lucullus apres estre retourné de ses guerres & conquestes sabandonna desbordement aux voluptez & à viure sumptueusement, reprenant Pompeius de ce qu'il appetoit tousiours de plus en plus à auoir de grandes charges plus que son aage ne portoit: à quoy Pompeius respondoit, qu'il estoit plus hors d'aage à vn vieillard sabandonner aux delices & voluptez, que de vacquer aux charges de la Chose publique. Vn iour qu'il estoit malade, les medecins luy ordonnerent qu'il mangeast d'une griue: on en chercha en plusieurs lieux, & n'en peut on trouuer, pour ce que ce n'estoit pas en leur saison: mais il y eut quelqu'un qui dit que lon en pourroit recouurer chez Lucullus, là où lon en nourrissoit tout le long de l'annee. Et quoy, dit-il, si Lucullus donc n'estoit friand & delicat, Pompeius ne viuroit-il pas? & laissant là l'ordonnance de son medecin, il se fit apprestier de ce que lon peut trouuer par tout ordinairement. Pour vne grande famine & disette de bleds qui aduint à Rome, il fut esleu en apparence de parole prouoyeur general, ou superintendant des viures, mais en effect de pouuoir, seigneur de la mer & de la terre: à l'occasion dequoy il alla en Afrique, en Sardaigne & en Sicile: là où aiant fait grand amas de bleds, il s'en vouloit vstemment retourner à Rome: mais vne grosse tourmente se leua, tellement que les pilotes & mariniers mesmes craignoient fort de se mettre en mer & de faire voile: mais luy sembarquant le premier, & commandant de leuer l'ancre, dit tout hault, Il est necessaire d'aller, & non pas necessaire de viure. Quand la querelle d'entre luy & Cesar fut à plein descouuerte, il y eut vn Marcellinus qui auoit esté auancé par luy, & s'estoit neantmoins depuis tourné du costé de Cesar, qui en plein Senat dit plusieurs choses à l'encontre de luy. Pompeius ne se peut tenir qu'il ne luy dist adonc: N'as-tu point de honte Marcellinus, de mesdire ainsi publiquement de moy, qui t'ay rendu eloquent, au lieu que tu estois muet: & saoul, iusques à rendre ta gorge, là où tu mourrois de faim auparauant? A Caton qui le tançoit & reprenoit aigrement de ce qu'il ne l'auoit iamais voulu croire, quand il luy auoit predit par plusieurs fois que la puissance & l'augmentation de Cesar à quoy il tenoit la main, estoit au grand danger & preiudice de la Chose publique, il respondit, Tes conseils estoient plus prudents, & les miens plus amiables. Et parlant de soy-mesme librement il disoit, qu'il auoit eu toutes ses charges plus tost qu'il ne les auoit attendues, & les auoit quittees plus tost qu'on ne l'auoit attendu. Apres la bataille de Pharsale s'enfuyant en Ægypte, en voulant passer de sa galere en vne petite barque de pescheur, que le Roy luy auoit enuoyee pour l'amener à bord: en se retournant deuers sa femme & deuers son fils, il ne leur dit autre chose sinon ces vers d'Euripide,

Qui en maison de Prince entre deuiant

Serf, quoy qu'il soit libre quand il y vient.

Estant passé en ceste barque, & luy aiant esté donné vn coup d'espee à trauers le corps, il ne fit autre chose que soupirer vne fois seulement, & sans mot dire, ains s'affublant le visage, sabandonna à tuer. Ciceron l'Orateur estoit mocqué de quelques vns à cause de son nom qui signifie vn pois chiche, à cause dequoy ses amis luy conseilloyent de changer son nom: mais luy au contraire disoit, qu'il rendroit le nom des Cicerons plus illustre & plus renommé que ceux des Catons, des Catules, ne des Scaures. Et faisant vne offrande d'un vase d'argent aux Dieux, il y fit bien en-

Les dictz notables des anciens

grauer les lettres deses deux premiers noms, mais pour le troisieme il fit engrauer E la figure d'un pois chiche. Il disoit que les Orateurs qui crioient hault à pleine teste, pource qu'ils se sentoient foibles de suffisance, auoient recours au hault braire, ne plus ne moins que les boitteux montent sur des cheuaux. Verres auoit vn fils dif-famé d'auoir abusé de son corps en la fleur de sa ieunesse, & neantmoins il disoit in-iure à Ciceron, iusques à l'appeller impudique & paillard: Ciceron luy respondit, Tu n'entens pas que c'est à part en la maison à huys fermez, qu'il fault tanfer de cela ses enfans. Metellus Nepos luy dit vn iour en debatant avec luy, Tu as fait mourir plus de gens par ton tesmoignage, que tu n'en as sauué par ton bien dire: Je croy bien, respondit-il, car i'ay plus de foy que d'eloquence. Ce mesme Metellus luy de-mandoit, qui estoit son pere, comme luy reprochant qu'il estoit homme neuf: Ta mere, dit-il, a fait ceste response bien plus malaisée à toy: car la mere de Metellus estoit tenue pour femme impudique, & Metellus luy-mesme homme leger & écer-uellé, & se laissant aller à tous ses appetits. Il auoit fait mettre dessus la sepulture F d'un Diodotus qui auoit esté son maistre en Rhetorique, la figure d'un corbeau de pierre: Voyla, dit Ciceron, la recompense telle qu'il luy falloit: car il luy a enseigné à voler, & non pas à parler. Vatinius estoit vn mauuais homme, & son aduersaire: il courut vn bruit, qu'il estoit trespasé: depuis le bruit se trouua faulx: Perisse male-ment, dit Ciceron, celuy qui a si malement menty. Il y auoit quelqu'un que lon souf-pçonnoit estre natif d'Afrique, qui luy disoit, Je ne t'entens point: Je m'en esbahy, dit-il, veu que tu as les oreilles percees. Caius Popilius vouloit estre tenu pour iuriskon-sulte, encore qu'il n'y sceust rien, & qu'il fust au demourant hōme de lourd entende-ment. Il fut appellé en iugemēt pour porter tesmoignage de verité touchant quelque fait, duquel il respondit qu'il ne sçauoit rien: & Ciceron luy dit, Tu pense à l'aduen-ture que lon t'interroge du droit. Hortensius l'orateur qui plaidoit la cause de Ver-res, auoit eu de luy pour son loyer vne image de Sphinx, qui estoit d'argent: Cice-ron luy aiant d'aduenture ietté quelque parole ambiguë & obscure: Je ne sçay, dit-il, G que cela veult dire quant à moy, car ie n'entens rien à soudre les ænigmes: Si est-ce, dit Ciceron, que tu as le Sphinx en ta maison. Il rencontra quelquefois Voconius qui menoit quand & luy trois siennes filles, lesquelles estoient fort laides toutes trois: Il se prit à dire tout bas à ceux qu'il auoit autour de luy, Cestuy malgré Phœbus a semé des enfans. Faustus fils de Sylla se trouua à la fin tant endebté, qu'il fut contrainct d'exposer ses meubles en vente, & en fit mettre des affiches par les carrefours pour le notifier: J'aime bien mieux ces affiches & proscriptions icy, dit Ciceron, que celles de son pere. César & Pompeius estans entrez en aperte guerre l'un contre l'autre: Je sçay bien, dit-il, qui fuir, mais ie ne sçay à qui. Il reprenoit gran-dement Pompeius de ce qu'il auoit abandonné la ville de Rome, & qu'il auoit mieulx aimé imiter en cela le gouuernement de Themistocles que celui de Pericles, di-sant que les affaires de lors ressembloient plus au temps de Pericles, qu'à celui de H Themistocles. Il se retira du costé de Pompeius premierement, puis quand il y fut, il s'en repentit: & comme Pompeius luy demanda, là où il auoit laissé son gendre Pison, il luy respondit promptement, Chez ton beau-pere. Quelqu'un estoit passé du camp de César en celui de Pompeius, & disoit qu'il auoit eu si grande haste de venir, qu'il auoit laissé son cheual: Tu as, luy dit-il, mieux pourueu à sauuer la vie de ton cheual que la tienne. A quelque autre qui venoit rapporter au camp de Pompeius, que les amis de César estoient tous tristes: Mais dis-tu qu'ils veuillent mal à César? Apres la bataille de Pharsale perdue, Pompeius s'en estant desia fuy, il y eut vn Nonius qui vint dire, qu'il ne se falloit point desesperer, & qu'ils auoient encore sept aigles, qui estoient les enseignes des legions: Tes admoneste-mens, dit-il, seroient bons, si nous auions la guerre contre des geays. Apres que César victorieux

- A victorieux fut venu au dessus de tous ses affaires, & qu'il eut fait redresser avec honneur les statues de Pompeius, qui auoient esté abbatues, Cicéron dit, que César en releuant celles de Pompeius auoit assuré les siennes. Il estimoit tant l'honneur de bien dire, & y prenoit si grand' peine avec si grande ardeur d'affection, que aiant à plaider vne cause deuant les cent Iuges seulement, estant escheut le iour de l'assignation, l'un de ses serfs, Eros, luy vint apporter la nouuelle, que la cause estoit remise au lendemain: il en fut si aise, qu'il luy donna liberté pour ceste bonne nouuelle. Caius César, lors qu'il fuyoit la fureur de Sylla, estant encore fort ieune, il tomba entre les mains de quelques coursfaires, qui luy demanderent de premiere arriuee vne petite somme d'argent pour sa rençon: il se mocqua d'eux, qui ne sçauoient pas quel personnage ils auoient pris, & de luy-mesme leur promet de leur en payer deux fois autant qu'ils luy en auoient demandé: & estant par eux gardé soigneusement pendant qu'il auoit enuoyé chercher & amasser argent pour leur bail-
- B ler, il leur enuoyoit faire commandement de se taire, & ne mener point de bruit pendant qu'il reposoit. Et s'exercitant à escrire tant en prose que en vers durant qu'il estoit entre leurs mains, il leur recitoit apres ce qu'il auoit composé: & s'il voyoit qu'ils ne le louassent pas assez à son gré, il les appelloit barbares & ignorants, & en riant les menassoit qu'il les feroit pendre: comme il fit bien tost apres: car estant sa rençon venue, luy deliuré de leurs mains assembla incontinent des vaisseaux & des hommes en la coste de l'Asie, leur courut sus, & les aiant pris, les fit attacher en croix. Estant de retour à Rome, & aiant entrepris la brigue du souuerain Pontificat à l'encontre de Catulus qui lors estoit le premier homme de Rome: ainsi comme sa mere le conuoyoit iusques à la porte de son logis, il luy dit, Ma mere vous
- » aurez aujourd'huy vostre fils souuerain Pontife, ou banny de la ville de Rome. Il repudia sa femme Pompeia, pour le mauuais bruit qu'elle eut d'auoir forfait à son honneur avec Clodius: & depuis Clodius aiant esté appelé en iustice pour ce faict,
- C il fut adiourné pour venir en iugement porter tesmoignage de verité: là où estant enquis par serment, il dit, qu'il n'auoit iamais rien sçeu de mal de sa femme: &
- » comme l'accusateur luy repliquast. Et pourquoy l'as-tu donc repudiée? Pour ce, dit-il, qu'il faut que la femme de César soit non seulement innocente & nette de crime,
- » mais aussi de soupçon de crime. En lisant les faits d'Alexandre le grand, les larmes luy vindrent aux yeux: & comme ses amis luy en demandassent la raison, il respondit: A l'age où ie suis, Alexandre auoit ja vaincu Darius, & ie n'ay encore rien faict. Ainsi comme il passoit par vne meschante petite ville assise dedans les Alpes, ses familiers en iouant demandoient entre eux s'il y auoit point en ceste ville-là des factiōs & des brigues entre les habitans, à qui y seroit le premier: il l'arresta tout court, & apres
- » auoir vn peu pensé en luy-mesme: J'aimerois, dit-il, mieux estre icy le premier, que le
- » second à Rome. Les hautes & hazardeuses entreprises il disoit qu'il les falloit ex-
- D ter, & non pas en consulter: & de faict quand il passa la riuere de Rubicon, qui separe
- » la prouince de la Gaule de l'Italie, pour aller contre Pompeius, il dit, Tout le dé soit
- » ietté: comme qui diroit, A tout perdre il n'y a qu'un coup perilleux. Et comme Pompeius s'en fut fuy de Rome vers la mer, & que Metellus qui auoit la superintendance du thresor public, l'eust fermé, & le voulust empescher d'y prendre de l'argent, il le menassa de tuer: de quoy Metellus monstrant semblant d'estre esbahy de son audace, Non non, mon amy, dit-il, ie veux que tu sçaches qu'il m'est plus difficile de
- » le dire, que de le faire. Et pource que ses gens demouroient trop à passer la mer de Brindes à Duras, se iettant en vn petit vaisseau, sans que personne des siens en sçeuft rien, il voulut trauerfer la mer: mais comme le vaisseau fust prest à estre submergé des
- » vagues de la mer, il se descouurit au pilote, & luy dit tout hault, Assure toy & te fie
- » en la fortune, car saches que tu mènes César. Pour lors toutefois il fut diuerty &

Les dictz notables des anciens

empesché de passer, tant par la tourmente qui se rengregea de plus en plus, comme E aussi pource que les soudards accoururent de toutes parts, qui se plainquirent à luy, & luy dirent qu'il leur faisoit tort d'attendre d'autres forces, comme s'il se deffioit d'eux. Il y eut peu de temps apres vne grosse rencontre, en laquelle Pompeius eut du meilleur, mais il ne suyuit pas sa poincte, ains se retira en son camp: & lors César dit, La victoire estoit aujourd'huy à nos ennemis, mais leur chef ne l'a pas sceu cognoistre. En la plaine de Pharsale, le iour de la bataille Pompeius aiant rengé son armée en ordonnance, commanda à ses gens qu'ils demourassent fermes en leurs places, & attendissent de pied quoy les ennemis: en quoy César depuis dit, qu'il auoit lourdement failly: pource, dit-il, qu'il estoit aux soudards la vehemence & violence du choc que leur donne l'eslancement de la course, outre l'ardeur de courage que ceste roideur-là leur apporte. Aiant desfait de premiere arriuee Pharnaces le Roy de Pont, il escriuit à ses amis, Je veins, Je vey, Je vainquy. Apres la desconfiture & fuitte de ceux qui estoient avec Scipion en Afrique, comme Caton se fust desfaict luy-mesme, F il dit: Je te porte enuie de ta mort Caton, pour ce que tu m'as enuie l'honneur de t'auoir sauué la vie. Quelques vns auoient pour suspects Antonius & Dolabella, & si luy disoient qu'il s'en deuoit prendre garde: Il leur respondit, qu'il n'auoit point de deffiance de ceux-là qui estoient ainsi bien coulorez & en bon point: mais bien, dit-il, de ces palles & maigres-là, en monstrant Brutus & Cassius. Vn iour à sa table comme propos se fust emeu, quelle sorte de mort estoit la meilleure, il respondit soudain, celle dont on se deffie le moins. César, celuy qui fut le premier surnommé Auguste, estant encore en son adolescence, redemanda à Antonius enuiron d'eux millions & quatre cents mille escus, qui apres que Iules César eut esté tué, auoient esté transportez de sa maison en celle d'Antonius, voulant payer aux Romains ce que César leur auoit laissé par testament: car il auoit legué à chasque citoyen Romain par teste septante & quinze drachmes d'argent, qui peuuent estre enuiron sept escus & demy. Antonius retenoit cest argent pardeuers luy, & respondoit au ieune César, G qu'il se deportast de le redemander s'il estoit sage: quoy voyant l'autre, fit proclamer à vendre, & vendit de faict, tous ses biens patrimoniaux, dont il paya les legs aux Romains, & en acquit la bien-veillance des citoyens à foy, & la mal-veillance à Antonius. Rymetalces Roy de la Thrace auoit laissé le party d'Antonius, & festoit tourné de son costé: mais il estoit importun à la table, par ce qu'il ne faisoit iamais autre chose que parler de ce grand seruice qu'il luy auoit fait, & de luy reprocher son alliance: tellement qu'à vn souper, César beuuant à quelqu'un des autres Roys qui estoient à la table, dit tout haut, J'aime bien la trahison, mais ie ne louë point les traistres. Les Alexandrins apres la prise de leur ville, s'attendoient bien de souffrir toute l'extremité de mal que lon peut faire au sac d'une ville prise par force: mais César montant sur la tribune aux harangues, & approchant de luy le philosophe Arius qui estoit son familier, natif d'Alexandrie, il dit qu'il pardonnoit à la H ville, premierement pour la grandeur & beauté d'icelle: secondement, pour Alexandre le grand, qui en estoit fondateur: & tiercement, pour l'amour d'Arius, qui estoit son amy. Estant aduerty comme vn sien serf nommé Eros, qui faisoit ses affaires en Ægypte, auoit achetté vne caille qui battoit toutes les autres, & estoit inuincible, & l'auoit fait rostir & mangée, il l'enuoya querir, & l'interroqua pour sçauoir s'il estoit vray: & comme il luy eust confessé que ouy, il le fit crucifier au mas de sa nauire. Il meit en la Sicile Arius pour son agent & procureur au lieu d'un Theodorus: & y eut quelqu'un qui luy presenta vn petit billet, où il y auoit escrit: Le chauue Theodorus natif de Tarse, est vn larron, non pas? Que t'en semble? Aiant leu le billet, il ne fit qu'escrire au dessoubz, Il le semble. Tous les ans au iour de sa natiuité il receuoit de Mécenas l'un de ses plus familiers vn present d'une coupe. Athenodorus le philosophe,


A philosophe, estant fort viel, luy demanda congé de se pouuoir retirer en sa maison pour sa vieillesse. Il luy donna: mais en luy disant adieu, Athenodorus luy dit, Quand tu te sentiras courroucé, Sire, ne dy ny ne fais rien, que premieremēt tu n'ayes » recité les vingt & quatre lettres de l'Alphabeth en toy-mesme. Cēsar aiant ouy cest » aduertissement, le prit par la main & luy dit, J'ay encore affaire de ta presence: & le » reteint encore tout vn an, en luy disant,

Sans peril est le loyer de silence.

Entendant comme Alexandre le grand en l'aage de trente deux ans, aiant fait la plus part de ses conquestes, estoit en peine de sçauoir ce qu'il feroit plus desormais, il dit, qu'il s'esbahissoit si Alexandre estimoit, qu'il y eust moins d'affaire à bien ordonner, regir & conseruer vn grand Empire, quand il est tout acquis, qu'à le conquerir. Ayant faict la loy Iulia des adulteres, par laquelle il est porté, comme lon doit faire le procès à ceux qui en sont attaincts, & comme lon doit punir ceux qui en sont conuaincus: il aduint qu'il se rua par impatience de cholere sur vn ieune homme qui estoit accusé d'auoir commis adultere avec sa fille Iulia, & le battit à coups de poing. Le ieune homme se prit à crier, Tu as fait la loy, Cēsar, qui ordonne comment il faut proceder contre les adulteres: Il en fut si marry, & se repentit tant de ce » qu'il en auoit faict, que de ce iour-là il ne voulut point souper. Enuoyant son nep- » ueu Caius en Armenie, il fit prieres aux Dieux de l'accompagner de la bienueil- lance de tous enuers Pompeius, de la hardiesse d'Alexandre le grand, & de sa bonne fortune de luy. Il disoit qu'il laisseroit aux Romains, en la succession de l'Empire, vn successeur qui n'auoit iamais consulté deux fois d'une chose, entendant de Tibere. Voulant appaiser quelques ieunes gentilshommes Romains qui estoient en autho- rité de magistrat, & menoient vn grand bruit deuant luy: quand il veit que pour les » premiers admonestemens ils n'en faisoient rien, il leur dit à certes, Escoutez vous » autres ieunes gens vn vieillard, que les vieillards ont bien escouté quand il estoit C ieune. Le peuple d'Athenes luy auoit faict quelque faute & desplaisir: il leur es- » criuit, Je croy que vous n'ignorez pas que ie suis mal-content de vous, car autrement » ie n'hyuerneroy pas en ceste petite Ile d'Ægine: mais iamais depuis il ne leur en fit ny ne leur en dit pis. L'un des accusateurs d'Eurycles, apres auoir bien au long de- duit contre luy en toute licence, sans aucun respect, tout ce qu'il voulut, finable- » ment il se laissa aller iusques à dire vn tel propos: Et si ces choses-là ne te semblent » grandes, Cēsar, commande luy qu'il me rende le septiesme de Thucydide. Cēsar of- fensé de son audace & impudence, commanda que lon le menast en prison: mais de- puis estant aduerty, qu'il estoit demouré seul des descendans du capitaine Brasidas, il le renuoya querir, & apres luy auoir fait vn peu de remonstrances comman- da que lon le laissast aller. Piso bastissoit fort magnifiquement sa maison, depuis les » fondemens iusques à la couuerture: quoy voyant Cēsar luy dit: Tu me resiois tout, D de te voir ainsi bastir, comme si Rome deuoit estre d'eternelle duree.

Les dictz notables des Lacedemoniens.

E



GESICLES Roy des Lacedemoniens estant de sa nature conuoiteux d'ouïr & d'apprendre, il y eut quelqu'un de ses familiers qui luy dit: Je m'esbahis, Sire, veu que tu prens si grand plaisir à ouïr bien dire, que tu n'approches de toy le Rhetoricien Philophanes pour t'enseigner. Il respondit, C'est pource que ie veux estre disciple de ceux dont ie suis né. A vn autre qui demandoit, Comment pourroit vn prince regner seurement, sans auoir autour de soy des gardes, pour la seureté de sa personne, S'il commande à ses subiects, comme vn bon pere fait à ses enfans.

AGESILAVS le grand, en vn festin où il auoit esté conuié, fut esleu par le sort Maistre du conuiue, à qui il appartenoit de donner la loy, comment & combien chascun deuoit boire: & comme celuy qui auoit la charge du vin luy eust demandé, combien il en verseroit à chascun, il respondit: S'il y a bonne prouision de vin, tant que chascun en voudra: si y en a peu, également à tous. Il y eut vn malfaitteur qui estant prisonnier endura fort constamment deuant luy le tourment de la gehenne: O que voyla vn homme, ce dit-il, extremement meschant, qui employe la patience & constance à de si malheureux & si meschants actes comme les siens! On louoit en sa presence vn maistre de Rhetorique, de ce qu'il pouuoit par son eloquence amplifier & rendre grandes les choses petites: & au contraire, appetisser les grandes: Je ne trouuerois pas bon, dit-il, vn cordonnier, qui à vn petit pied chaufferoit vn grand soulier. Comme quelqu'un en debattant contre luy, luy dist, Tu l'as ainsi promis: & luy repetaست par plusieurs fois ceste mesme parole: Si la chose est iuste, dit-il, ie l'ay promise voirement: mais si elle n'est iuste, ie ne l'ay pas promise, mais ditte seulement. Et comme l'autre luy repliquast, Voire-mais il faut que les Roys accomplissent tout ce qu'ils ont accordé, fust-ce d'un signe de la teste seulement. Ils n'y sont pas plus tenus, respondit-il, que ceux qui s'adressent à eux, de demander & dire toutes choses raisonnables & iustes, & de s'accōmoder à l'opportunité & commodité des Roys. Quand il oyoit quelques vns qui en louoient ou blasmoient d'autres, il disoit, qu'il ne falloit pas moins cognoistre les mœurs & le naturel de ceux qui parloient, que de ceux de qui ils parloient. Comme il estoit encore ieune enfant, en vne feste publique où les ieunes gens, fils & filles, dansoient tous nuds, le superintendant de la danse luy donna vn lieu qui n'estoit pas fort honorable, duquel neantmoins il se contenta, combien qu'il fust ia déclaré Roy, & dit: Voyla qui va bien, car ie monstureray que ce ne sont pas les lieux qui honnorent les hommes, mais les hommes les lieux. Le medecin luy auoit ordonné en quelque sienne maladie vne maniere de medecine pour recouurer sa santé, qui n'estoit point simple ne facile, mais fort laborieuse & difficile: Par les Dieux iumeaux, dit-il, si ma destinee ne porte que ie viue, ie ne viuray pas quand ie prendrois toutes les medecines du mode. Estant vn iour aupres de l'autel de Minerue surnommé Chalceecos, qui vaut autant à dire comme au temple de bronze, où il faisoit sacrifice d'un bœuf, vn pou le mordit: il n'eut point de honte de le prendre, & de le tuer publiquement deuant tout le monde, en disant, Par les Dieux, iusques sur l'autel mesme ie tuerois volontiers celuy qui en trahison me viendroit assaillir. Vne autre fois il apperceut, comme vn petit garson tiroit d'une fenestre vne souris qu'il auoit prise: la souris se retourna, qui le mordit à la main, tellement qu'elle luy fit lacher prise, & s'enfuit. Il le monstra aux assistans, & leur dit, Veux-tu que vne si petite bestiole a bien le cœur de se reuenger contre ceux qui luy font tort, pensez ce qu'il est raisonnable que les hommes facent. Voulant entreprendre la guerre contre le Roy de Perse pour la deliurance des peuples Grecs habitans en l'Asie, il en alla demander conseil

- A conseil à l'oracle de Iupiter , qui est en la forest de Dodone : & comme l'oracle luy eust respondu ainsi qu'il desiroit, qu'il entreprist le voyage , il en communiqua la responce aux Ephores, qui sont les contrerolleurs : lesquels luy ordonnerent qu'en passant il en demandast aussi le conseil à celui d'Apollo en la ville de Delphes. Il s'en alla
- » au temple où se rendoient les oracles, & fit ainsi sa demande, O Apollo, es-tu pas
 - » de mesme aduis que ton pere? Et cōme il luy eust respondu, que ouy : il fut esleu pour conducteur de ceste guerre, & sy en alla. Tissaphernes Lieutenant du Roy de Perse en Asie, estonné de son arriuee, du commencement fit appointment avec luy, par lequel il promet de luy laisser toutes les villes & citez Grecques qui sont en l'Asie, franches & libres pour se gouverner par leurs loix : & ce-pendant despescha deuers son maistre, qui luy enuoya vne grosse armee, sur la fiance de laquelle il luy enuoya denoncer la guerre, si bien tost il ne se partoist de l'Asie. Agésilas estant bien aise de ceste rouverte d'appointment, fit semblant de vouloir entrer premierement en

B la Carie, parquoy Tissaphernes assembla là ses forces : & lors il tourna tout court en la Phrygie, là où aiant pris plusieurs villes & grande quantité de tout butin, il dit,

 - » Que violer la foy promise à ses amis est impieté, mais abuser ses ennemis non seule-
 - » ment est iuste, mais aussi plaissant & profitable. Et se sentant foible de gens de che-
 - » ual, il s'en retourna en la ville d'Ephese, là où il fit entendre aux riches qui se vou-
 - » droient exempter d'aller en personne à la guerre, qu'ils eussent à fournir pour teste vn homme & vn cheual, tellement qu'en peu de iours il assembla bon nombre de cheuaux & d'hommes idoines à la guerre, au lieu de riches & de couards. En quoy il disoit qu'il ensuiuoit Agamemnon, qui pour vne bonne iument dispensa vn homme riche & couard de venir à la guerre. Quand on vendoit les prisonniers de guerre pour esclaves, les commissaires qui en faisoient la vente, par son ordonnance vendoyent à part leurs habillements & leurs hardes, leurs corps à part tous nuds : & se trouuoient plusieurs qui achettoient leurs vestemens, mais de leurs corps, il n'y

C auoit personne qui en voulust, pource qu'ils estoient blancs & mols, comme gens qui auoient esté nourris delicatement sous le couuert des maisons : & s'en moquoit-on, comme de corps inutiles, & qui n'estoient bons à rien. Agésilas se tenant

 - » pres de là : Voyla doncques, dit-il, ce pourquoy vous combattez, monstrant les har-
 - » des : & ceux-là contre qui, monstrant les hommes. Ayant desfaiect en bataille Tissaphernes au païs de Lydie, & tué grand nombre de ses gens, il courut les prouin-
 - » ces du Roy, lequel luy enuoya de l'or & de l'argent en don, le priant de faire ap-
 - » pointement. Agésilas luy fit responce, que quant à traiter appointment de
 - » paix, c'estoit à faire à la cité de Lacedemone : & au demourant qu'il prenoit plus de
 - » plaisir à enrichir ses gens, qu'à estre riche luy mesme : & que les Grecs reputoient
 - » honorable non receuoir des presens de leurs ennemis, mais leur oster des despouilles.

Megabates le fils de Spithridates, qui estoit beau de visage par excellence, s'ap-

D procha vne fois de luy pour l'embrasser & le baiser, pensant en estre fort aimé : mais Agésilas destourna sa face, tellement que l'enfant desista de se presenter plus deuant luy, dont il fut marry, & demanda pourquoy c'estoit : ses amis luy respondirent que luy mesme en estoit cause, aiant eu peur de se laisser baiser à vn si bel enfant, & que là où il n'en auroit plus de crainte, l'enfant y retourneroit bien volontiers. Il demoura vne espace de temps à penser en luy-mesme sans mot dire, puis leur respondit :

 - » Il n'est point de besoing que vous luy en parliez : car quant à moy, j'ay plus cher de
 - » demourer superieur & vainqueur en telles choses, que de prendre par force la plus
 - » forte & plus puissante ville de mes ennemis, pour ce qu'il me semble meilleur de gar-
 - » der sa liberté, que de l'oster à autrui. Au demourant il estoit en toutes autres cho-
 - » ses bien roide à obseruer de poinct en poinct tout ce que les loix commandent : mais
 - » és affaires de ses amis il disoit, que garder estroittement la rigueur de iustice, estoit vne

Les dictz notables des Lacedemoniens.

couverture dont se couuroient ceux qui ne vouloient point faire pour leurs amis. E
Auquel propos on treuve encore vne petite lettre missiue qu'il escriuoit à Idrieus
„ prince de la Carie, pour la deliurance d'un sien amy : Si Nicias n'a point failly, de-
„ liure-le : si l'a failly, deliure-le pour l'amour de moy : mais comment que ce soit, de-
„ liure-le. Tel estoit doncques Agesilaus en la plus part des affaires de ses amis: toute-
fois il escheoit bien des occasions, qu'il regardoit plus tost à l'utilité publique : com-
me il monstra vn iour à quelque parlement qu'il fut contraint de faire à la haste &
en trouble, tellement qu'il luy fut force d'abandonner vn qu'il aimoit estant malade:
& comme l'autre l'appella par son nom ainsi comme il partoit, & le supplia de ne
„ le vouloir point abandonner, Agesilaus en se retournant dit, O qu'il est mal-aisé d'ai-
„ mer & estre sage tout ensemble ! Au reste quant à son viure & au traitement de son
corps, il ne vouloit rien auoir d'auantage ne de meilleur que ceux qui estoient en sa
compagnie. Iamais il ne mangea iusques à se saouler, ny ne beut iusques à s'en-
yurer : le dormir ne luy commanda iamais, n'en v'sant sinon autant que luy permet- F
toient ses affaires, & estoit tellement disposé contre le chaud & contre le froid, que
pour toutes saisons de l'annee il n'auoit iamais qu'une sorte d'habillement : aiant sa
tente tousiours au milieu de ses gens, il n'auoit liét qui fust meilleur que piece des
autres : & fouloit dire, qu'il falloit que celuy qui auoit la charge de commander sur-
montast les priuez qui estoient sous sa charge, non en mignardise ny delicatesse, mais
en tolerance de labeur & en force de cœur. Comme doncques quelqu'un demanda
„ en sa presence, Qu'est-ce que les loix de Lycurgus ont apporté de bon à la ville de
„ Sparte? il respondit, Ne faire compte des voluptez : & à un autre qui s'esmerueilloit de
„ voir la simplicité grande, tant du viure que du vestir de luy & des autres Lacedemo-
„ niens: Le fruit que nous recueillons, dit-il, de ceste si estroite maniere de viure, est la
„ liberté. Un autre l'enhortoit de relascher un petit de ceste roide & austere maniere de
viure, quand ce ne seroit, dit-il, que pour l'incertitude de la fortune, & qu'il pourroit
„ venir une occasion de temps qu'il le faudroit faire ainsi: Voire mais ie me vais accou- G
„ stumât, dit-il, à cela, qu'en nulle mutation de fortune ie ne cherche mutation de vie. de
fait, quand il fut deuenu viel, il ne laissa point pour l'aage la durezza de sa maniere de
viure: & pourtant respondit-il à un qui luy demandoit, pourquoi il ne portoit point
„ de saye en une si grande rigueur d'hyuer, en l'aage où il estoit : A fin que les ieunes ap-
„ prennent à en faire autant, aians pour exemple les plus vieux de leur pais, & ceux qui
leur commandent. Auquel propos on treuve que quand il passa avec son armee à tra-
uers le pais des Thasiens, ils luy enuoyerent des rafraichissemens de farines, d'oysons,
& autres volailles, de confitures, de patisserie, & de toutes autres sortes de viandes ex-
quises, & de vins delicieux : il n'en prit que les farines seulement, & commanda à ceux
qui les auoient apportez, qu'ils les reportassent, comme choses dont ils n'auoient que
faire : mais à la fin comme ils le suppliasent & luy fissent toute l'instance du monde
de les prendre, il leur commanda qu'ils les departissent doncques entre les Ilots qui H
estoient leurs esclaves : & comme ils luy en demandassent la cause, il leur dit, que c'e-
stoit pour ce qu'il n'estoit point conuenable à ceux qui faisoient profession de force
virile & de prouesse, de receuoir ces friandises là : & que ce qui amorce & alleche
les hommes de seruile nature, ne doit point aggreer à ceux qui sont de courage franc
& libre. Dauantage les Thasiens aians receu beaucoup de bienfaits, & pour ce
se sentans grandement tenus à luy, luy dedierent des temples, & luy decernerent des
honneurs diuins, comme s'il eust esté un Dieu, & luy enuoyerent des ambassadeurs
pour luy faire entendre leur resolution. Aiant leu leurs lettres, & entendu les hon-
neurs qu'ils luy faisoient, il leur demanda si leur pais & leur communaulté pou-
„ uoit deifier les hommes: ils luy respondirent, que ouy. Or fus doncques, dit-il, com-
„ mancez à vous mesmes, & si vous vous pouuez faire Dieux vous mesmes, alors ie
vous

- A vous croiray que vous me le puissiez faire aussi. Et comme les peuples de l'Asie, qui sont d'extraction Grecque, eussent ordonné, qu'en toutes leurs principales citez „ ils luy feroient eriger des statuës, il leur rescriuit, Je ne veulx que lon face de moy au-
„ cune statuë ny image, ne painte, ne moulee, ny taillee. Et voyant en Asie en la mai-
„ son de son hoste, le planché fait de bois quarré, il demanda au maistre de la maison,
„ si les arbres naissoient aussi quarréz en leur país: l'autre luy respondit que non, mais
„ qu'ils croissoient ronds. Et comment, dit-il, si ils naissoient quarréz, les feriez-vous
„ ronds? On luy demanda vne fois iusques où s'estendoient les confins de Lacede-
„ mone: en branlant vne iaueline qu'il tenoit en la main, il respondit, Iusques là où cecy
„ peult arriuer. Vn autre luy demandant, pourquoy la ville de Sparte n'auoit point de
„ murailles: en monstrant de ses citoyens armez, il respondit, Voyla les murailles des
„ Lacedemoniens. Et à vn autre qui en demandoit autant, il respondit, qu'il ne fault pas
„ que les villes soient fortifiees de pierres, ny de bois, mais de la prouesse & vaillance
B des habitans: & admonestoit ordinairement ses familiers de ne chercher pas à s'enri-
„ chir de deniers, mais de vaillance & de vertu: & quand il vouloit que quelque ouura-
„ ge fust bien tost paracheué par les soudards, il commanceoit luy-mesme le premier à
„ mettre la main à l'œuvre en la veüe de tout le monde. Il se vantoit de trauailler au-
„ tant qu'homme qui fust en sa compagnie, & se glorifioit plus de ce, qu'il se sçauoit
„ commander à soy-mesme, que d'estre Roy. A vn autre qui s'esmerueilloit de voir
„ vn Lacedemonien boitteux aller à la guerre, & qui disoit, Pour le moins ie deman-
„ derois vn cheual: Ne sçais tu pas, luy respondit-il, que lon n'a point affaire de fuyards
„ à la guerre, mais de gens qui tiennent ferme? On luy demanda comment il auoit ac-
„ quis si grande reputation, En mesprisant la mort, dit-il. Enquis aussi, pourquoy les
„ Spartiates combattoient au son des fleutes: A fin, dit-il, que marchants en bataille à
„ la cadéce & mesure, on cognoisse ceux qui sont vaillans d'auec ceux qui sont couards.
„ Quelqu'un reputoit heureux le Roy de Perse, de ce qu'il estoit venu fort ieune à vn si
C puissant estat: Voire-mais, dit-il, Priam en tel aage ne fut pas mal-heureux. Aiant ja
„ conquis la plus grande partie de l'Asie, il delibera d'aller faire la guerre à la personne
„ du Roy mesme pour luy rompre son long repos, & l'empescher ailleurs qu'à penser
„ de corrompre par argent les orateurs & gouuerneurs des citez de la Grece: mais
„ comme il estoit en ceste deliberation, il fut rappellé par les Ephores, à cause d'une
„ grosse guerre des peuples Grecs, dont la ville de Sparte estoit enuironnée par le moyen
„ des deniers que le Roy de Perse y auoit enuoyez: à l'occasion dequoy il fut contrainct
„ de partir de l'Asie, disant, que vn bon prince se doit laisser commander par les loix:
„ & en partant laissa vn tresgrand regret de son partement aux Grecs habitans par-
„ delà. Et pour ce qu'en la monnoye Persienne estoit empreinte l'image d'un Archer,
„ il disoit, que le Roy de Perse le chassoit de l'Asie avec trente mille archers: Car au-
„ tant de Dariques d'or auoient esté portez par vn Timocrates à Thebes & à Athenes,
D qui auoient esté distribuez aux harangueurs & gouuerneurs de ces deux citez, par
„ qui elles furent fuscitees à commancer la guerre à la ville de Sparte. Si rescriuit aux
„ Ephores vne missiue de telle teneur: Agésilas aux Ephores, Salut.
„ Nous auons conquis la plus grand' part de l'Asie, & en auons dechassé les Barba-
„ res, aussi nous auons fait plusieurs armes au país d'Ionie: mais puis que vous me com-
„ mandez de me trouuer par delà à iour nommé, ie vous aduise que ie suiuray de pres
„ ceste lettre, ou paraenture la preuiendray: car l'autorité que j'ay de commander, ie
„ ne l'ay pas pour moy, mais pour mon país, & pour ses alliez. Et lors vn Magistrat
„ commande à la verité selon droit & iustice, quand il obeit aux loix de son país, &
„ aux Ephores, ou autres tels magistrats qui sont en son país.

Aiant trauerfé le destroit de l'Hellespont, il entra dedans le país de la Thrace, là
où il ne demanda iamais passage à aucun Prince ne ville barbare, ains enuoyant

Les dictz notables des Lacedemoniens.

deuers eux leur faisoit demander, fils vouloient qu'il passast comme par pais d'amis, E ou comme par pais d'ennemis: tous les autres Princes & peuples le receurent amiablement, & l'accompagnerent par honneur en passant par leurs terres: mais ceux que lon appelle les Trochaliens, ausquels, à ce que lon dit, Xerxes mesme donna des presents pour son passage, luy demanderent pour loyer de le laisser passer cents talents d'argent, qui sont soixante mille escus, & autant de femmes. Agefilaus en se moquant d'eulx, respondit à ceux qui luy portoient ceste parole, Que ne sont-ils donc „ venus quand & vous pour les recevoir? & tira oultre: mais les trouuant en son chemin, il leur donna la bataille, & les desfit avec grande occision de leurs gents, puis passa oultre. Autant en manda-il au Roy de Macedoine, lequel fit response qu'il s'en „ conseilleroit: Qu'il s'en conseille donc, dit-il, tant qu'il voudra: mais ce-pendant marchons. Le Roy s'esmerueillant de sa hardiesse, & la redoubtant, luy manda qu'il passast amiablement. Les Thessaliens estoient lors allies de leurs ennemis: parquoy en „ passant il pilla leur pais, & enuoya en la ville de Larissa deux de ses amis, Xenocles & F Scytha, pour veoir s'ils la pourroient prattiquer & attirer à faire ligue avec les Lacedemoniens, mais ceux de Larisse les arresterent & les reteindrent prisonniers: dont les autres estans indignez, vouloient à toute force qu'il y menast son camp tout de ce pas, & allast mettre le siege deuant: mais il leur respondit qu'il aimeroit mieulx faillir à gagner toute la Thessalie entierement, que de perdre l'un de ces deux hommes-là seulement: ainsi les retira-il par appointment. Entendant qu'il y auoit eu vne bataille donnee aupres de Corinthe, en laquelle il estoit demouré bien peu des Lacedemoniens, mais des Atheniens, des Argiens, des Corinthiens, & de leurs allies vn bien grand nombre: on ne le veit oncques faire bonne chere, ny s'esleuer de „ ioye pour la nouuelle de ceste victoire, ains soupirant du profond du cœur, dit, O „ mal-heureuse Grece, qui de ses propres mains à desfaict tant de ses gens, qu'ils seroient suffisans pour desfaire en vn iour de bataille tous les Barbares ensemble! Mais „ comme les Pharsaliens le vinssent harceler, & endommager la queue de son armee, G il print cinq cents cheuaux, avec lesquels il les alla charger si vifvement, qu'il les rompit entierement: & pour ceste victoire feit dresser vn trophée au dessoubs du mont qui s'appelle Narthecium: & luy fut ceste victoire autant ou plus agreable que nulle autre, pour ce qu'avec si petite troupe de gens de cheual que luy-mesme auoit mis sus, & qu'il auoit dressez, il se trouua auoir desfaict en bataille ceux qui de tout temps se vantoient estre des meilleurs hommes d'armes du monde. Là le vint trouver Diphridas l'un des Ephores, estant enuoyé expres de Sparte pour luy commander qu'il eust à entrer incōtinent en armes dedans le pais de la Bœoe: & luy, combien qu'il eust deliberé d'y entrer vne autre fois avec beaucoup plus grosse puissance, toutesfois ne voulant en aucune chose desobeir aux Seigneurs du conseil de Sparte, il enuoya querir deux enseignes de ceux qui estoient au camp pres de Corinthe, & avec cela entrant dedans le pays de la Bœoe, il donna la bataille aux Thebains, Atheniens, Argiens, Corinthiens, les deux Locriens pres la ville de Coronee, & la gaigna, H qui fut la plus sanglante & plus grande bataille, ainsi que tesmoigne Xenophon, qui fut donnee de son temps: mais il est vray qu'il y fut fort blecé en plusieurs endroits de sa personne: & depuis estant de retour en sa maison, apres tant de victoires, tant de grandeurs & de prosperitez, il ne changea rien qui soit du traitement de sa personne, ny de toute sa maniere de viure. Voyant qu'aucuns de ses citoyens se glorifioient & pensoient estre quelque chose de plus que les autres, pour autant qu'ils nourrissoient & entretenoient des cheuaux pour courir aux ieux de pris, il persuada à sa sœur qui se nommoit Cynisca, ne monter sur son chariot, & s'en aller à la feste des ieux Olympiques, pour essayer de gaigner le pris de la course avec les cheuaux: voulant par là faire cognoistre aux Grecs, que tout cela n'estoit acte de vertu quelconque, mais

- A mais seulement de richesse & de despenſe. Il auoit autour de luy Xenophon le philoſophe, qu'il aimoit & eſtimoit beaucoup: il le pria d'enuoyer querir ſes enfans pour les faire nourir en Lacedemone, & y apprendre la plus belle diſcipline du monde, de ſçauoir obeir & commander. Vne autre fois luy eſtant demandé, pourquoy il
- " eſtimoit les Lacedemoniens les plus heureuſes gents du monde: C'eſt, dit-il, pour ce
 - " qu'ils font profeſſion & exercice, plus que tous les hommes du monde, d'apprendre
 - " à bien commander, & à bien obeir. Apres la mort de Lyſander, il trouua en la ville de Sparte de grandes ligues & factions, que Lyſander, incontinent qu'il fut retourné de l'Asie, auoit dreſſees & ſuſcitees contre luy: ſi fut en propos & en volonté de monſtrer & faire veoir à ceux de Sparte quel citoyen il auoit eſté. Aiant leu vne harangue, qui fut trouuee apres ſa mort entre ſes papiers, laquelle Creon Halicarnaffien auoit compoſee, & luy la deuoit lire deuant le peuple en aſſemblee de ville, pour introduire de grandes nouuellerez, & renuerſer tout l'eſtat & le gouuernement de Spar-
- B te: il la voulut produire en public: mais apres que l'un des Senateurs l'eut leuë, & que redoutant la force des raiſons & vehemence d'eloquence qui eſtoit en icelle, il luy euſt conſeillé de ne deterrer point Lyſander, ains plus toſt enterrer ſa harangue quand & luy, il creut ſon conſeil & ne bougea rien. Et quand à ceux qui par ceſte mennee luy eſtoient aduerſaires, il ne les haraſſa point ouuertement, mais il trouua moyen d'en faire enuoyer les vns Capitaines en quelques voyages, & de faire cōmettre quelques offices publiques aux autres, eſquelles charges ils ſe portoient tellement qu'ils eſtoient deſcouuerts pour larrons & meſchans: & depuis en eſtans appelez en iuſtice, au contraire il leur aidoit & les ſecouroit en leurs affaires, tellement qu'il ſe les rendoit bien-veuillans & amis, & n'y en demoura à la fin pas vn qui luy fuſt aduerſaire. Quelqu'un le pria d'eſcrire en ſa faueur à ſes hoſtes & amis qu'il auoit en
- " Aſie, qu'ils luy gardaſſent ſon bon droit: Mes amis, dit-il, font ce qui eſt de droit,
 - " encore que ie ne leur eſcriue point. Vn autre luy monſtroit les murailles de ſa ville
- C fortes à merueilles & magnifiquement baſties, en luy demandant ſi elles luy ſembloient pas bien belles: Ouy certes pour y loger des femmes, mais non pas des hommes. Vn Megarien luy magnifioit & hault-loüoit ſa ville: auquel il reſpondit, Jeune
- " homme mon amy, tes propos auroient beſoing d'une grande puissance. Ceux que les autres hommes auoient en admiration, il ne monſtroit pas de les cognoiſtre ſeulement: comme quelquefois vn Callipides excellent ioueur de Tragédies, qui auoit fort grand nom & grande reputation parmy les Grecs, de maniere que toutes ſortes de gens en faiſoient cas, l'ayant rencontré en ſon chemin, il le ſalua premierement, puis fingera preſumptueuſement de ſe promener avec d'autres quand & luy, ſe preſentant & ſe monſtrant à luy, en eſperance que le Roy commenceroit le premier à luy uſer de quelque careſſe. A la fin voyant qu'il ne commençoit point, luy-meſme ſauança de luy demander: Comment, Sire Roy, ne me cognois-tu point, & n'as-tu point ouy
- D dire qui ie ſuis? Ageſilaus le regardant au viſage: Et n'es-tu pas, dit-il, le farceur Callipides? On le conuia vn iour à ouir vn qui contrefaiſoit naiſiement bien le roſſignol:
- " il n'en voulut rien faire, diſant, l'ay ouy le roſſignol luy-meſme par pluſieurs fois.
 - " Le medecin Menecrates auoit eſté heureux en la cure de quelques maladies deſeſperees, au moyen dequoy quelques vns l'auoient ſurnommé Iupiter: & luy par trop arrogamment uſurpoit ce ſurnom-là, de forte qu'il eut bien la preſumption
 - " de mettre en la ſuſcription d'une lettre qu'il luy eſcriuoit, Menecrates le Iupiter
 - " au Roy Ageſilaus, Salut. Ageſilaus luy reſcriuit, Ageſilaus à Menecrates, Santé. Et comme Pharnabazus & Conon avec l'armee nauale du Roy de Perſe eſtans ſans contredit ſeigneurs de la marine, pillaffent toutes les coſtes de la Laconie, & d'auantage les murailles de la ville d'Athenes ſe rebatiſſent de l'argent que Pharnabazus fourniſſoit: les Seigneurs du conſeil de Lacedemone furent d'aduis

Les dictz notables des Lacedemoniens.

qu'il valoit mieux faire paix avec le Roy de Perse, & pour cest effect enuoyerent E
Antalcidas deuers Tiribazus, abandonnans laschement & meschamment à ce Roy
barbare les Grecs habitans en l'Asie, pour la liberré desquels Agefilaus luy auoit
parauant fait la guerre: ainsi n'eut point Agefilaus de part à ceste honte & infamie,
pour ce que Antalcidas, qui estoit son ennemy mortel, chercha par tous moyens de
faire ceste paix à cause qu'il voyoit que la guerre augmentoit tousiours l'autorité,
l'honneur & le credit d'Agefilaus: lequel toutefois respondit lors à vn qui luy repro-
choit que les Lacedemoniens Medisoient, c'est à dire, fauorisoient aux Medois: non
font, mais ce sont les Medois qui Laconisent. On luy demanda quelquefois, laquel-
le des deux vertus estoit la meilleure à son iugement, la force, ou la iustice: Il respon-
dit, que la force ne sert de rien là où regne la iustice: & que si nous estions tous iustes
& gens de bien, il ne seroit point besoing de la force. Les peuples Grecs habitans en
Asie auoient accoustumé d'appeller le Roy de Perse, le grand Roy: Pourquoy, dit-il,
est-il plus grand que moy, s'il n'est plus temperant & plus iuste? Aussi disoit-il, que
les habitans de l'Asie estoient bons esclaves, & mauuais hommes libres. Estant enquis
comment vn homme se pourroit bien faire valoir & acquerir tresgrande reputation,
il respondit: En disant tout bien, & faisant encore mieux. Il fouloit dire, que le
Capitaine doit auoir hardiesse à l'encontre des ennemis, & amitié enuers ses gens.
Quelque autre demandoit, Que doiuent apprendre les enfans en leur ieunesse? Il res-
pondit, Ce qu'ils doiuent faire quand ils sont deuenus grands. Il estoit iuge en vne
cause où le demandeur auoit tresbien dit, & le defendeur tres-mal, ne faisant que re-
peter à tous propos, Sire Agefilaus, il fault qu'un Roy secoure les loix. Agefilaus luy
respondit, Si quelqu'un t'auoit abbatu ta maison, ou que lon t'eust osté ta robbe, au-
rois-tu recours au maçon pour te faire raccoustrer ta maison, ou au cousturier pour
te faire rendre ta robbe? Le Roy de Perse luy escriuit vne lettre missiue qu'apporta le
gentilhomme Persien qui vint avec Callias pour faire iurer la paix, & estoit le subiect
de ceste lettre, Que le Roy vouloit particulièrement auoir amitié & fraternité avec
luy. Il ne la voulut point receuoir, & luy dit: Tu diras au Roy ton maistre de ma
part, qu'il n'est point de besoing qu'il m'escriue des lettres particulieres, pource que
s'il estoit amy en general de Lacedemone, & monstroit aimer & desirer le bien de la
Grece, que luy aussi reciproquement luy seroit amy de tout son pouuoir: mais s'il se
trouuoit qu'il vst de male foy, & attentast aucune chose au preiudice de la Grece,
qu'il luy pourroit escrire toutes les lettres du monde, que iamais il ne luy seroit amy.
Il aimoit fort tendrement ses petits enfans, de sorte qu'il iouoit avec eux parmy la
maison, se mettant vne canne entre les iambes comme vn cheual: & comme quel-
qu'un de ses amis l'eust veu & trouué en cest estat, il le pria de n'en dire iamais rien à
personne iusques à ce que luy-mesme eust des enfans aussi. Mais en faisant continuel-
lement la guerre aux Thebains, il y fut fort griefuement blecé en vne bataille. Ce que
voyant Antalcidas, luy dit: Certainement tu reçois bien des Thebains le salaire que
tu merites, pour leur auoir enseigné malgré eux à combattre, ce qu'ils ne sçauoient
ny ne vouloient apprendre à faire. Car à la verité lon dit que les Thebains deuin-
drent alors plus belliqueux que iamais ils n'auoient esté au parauant, s'estans adres-
sez & exercez aux armes par les continuelles inuasions des Lacedemoniens: aussi
estoit-ce la raison pour laquelle l'ancien Lycurgus en ses loix, que lon appelloit Retres,
leur defendoit de faire souuent la guerre contre vne mesme nation, de peur qu'ils ne
la contraignissent en ce faisant d'apprendre à la faire. Si en estoit Agefilaus hay des al-
liez mesmes de Lacedemone, qui se plaignoient qu'il falloit qu'ils eussent ordinaire-
ment le harnois sur le dos, & que eux qui estoient en bien plus grand nōbre, suyussent
les Lacedemoniens qui n'estoient qu'une poignée de gens au pris d'eux: parquoy
Agefilaus les voulant conuaincre, & leur monstrier quel nombre ils estoient, il com-
manda

A manda que tous les alliez & confederez fassissent ensemble pesse messe, & les Lacedemoniens d'un autre costé à part: puis fit crier par un herault, que les potiers de terre se leuassent les premiers: quand ceux là furent leuez il fit proclamer les ferruriers, & puis apres les charpentiers, & puis les maçons, & ainsi de tous les autres mestiers les uns apres les autres: parquoy tous leurs alliez & confederez presque se leuerent, mais des Lacedemoniens nul ne se leua, pource qu'il leur estoit defendu d'exercer ny d'apprendre aucun mestier mechanique: ainsi Agefilaus se prenant à rire, » Voyez vous, dit-il, mes amis, combien plus de soudards nous enuoyons à la guerre » que vous ne faictes? Or à la desfaiete de Leuctres, il y eut plusieurs des Lacedemoniens qui fuirét, lesquels tous par les loix & ordonnances du pays estoient pour toute leur vie infames. Toutefois les Ephores voyans que la ville par ce moyen s'en alloit deserte & depuelee de citoyens, en temps mesmement qu'elle auoit plus grand besoing de gens de guerre que iamais, vouloient trouuer moyen de les absoudre de ceste B infamie, & neantmoins conseruer l'autorité de leurs loix. Parquoy pour ce faire ils esleurent Agefilaus pour leur Legislatteur, lequel se tirant en auant deuant tout le » peuple, dit, Seigneurs Lacedemoniens, ie ne voudrois aucunement estre autheur » ny inuenteur de nouuelles loix, & à celles que vous auez, ie ne voudrois ny adiouter, ny oster, ny changer aucune chose: parquoy il me semble raisonnable, que » d'icy en auant elles aient leur force, vigueur & autorité accoustumee. Au demourant, il ne laissa pas avec ce peu de gens de faict, qui estoient demourez en la ville, de repoulsier Epaminondas, qui l'alla assaillir avec un grand flot & violente tempeste des Thebains & de leurs confederez, enorgueilliz de la victoire qu'ils auoient obtenue en la plaine de Leuctres, & les fit retourner sans rien faire: mais en la bataille de Mantinee, il admonesta & conseilla les Lacedemoniens de ne se point soucier des autres Thebains, ains de combattre tous, & adresser tout leur effort contre Epaminondas seul, disant qu'il n'y auoit que les sages & prudens qui fussent vaillans & C seuls cause de la victoire: & pourtant que s'ils pouuoient abbatre celuy-là, que facilement ils viendroient au dessus des autres, pour ce que ce n'estoient que fols estourdis, & gens de nulle valeur: comme veritablement il aduint. Car estant la victoire ia toute certaine du costé d'Epaminondas, & les Lacedemoniens en rouverte: ainsi comme il se retourna pour rappeler les siens, il y eut un Lacedemonien qui en fuyant luy donna un coup mortel, duquel estant tombé par terre, les Lacedemoniens qui estoient avec Agefilaus se rallierent, tournerent visage & remeirent la victoire en balance, par ce que les Thebains diminuerent beaucoup de leur courage, & les Lacedemoniens l'augmenterent. Au reste, la ville de Sparte aiant necessité d'argent pour la guerre, & estant contraincte d'entretenir des soudards estrangers à sa soulde: Agefilaus s'en alla en Ægypte appointé du Roy des Ægyptiens qui l'auoit enuoyé querir, mais pource qu'il estoit ainsi petitement & simplement vestu, il en D vint en mespris des habitans du pais: car ils s'attendoient de voir le Roy de Sparte acoustré de sa personne, & accompagné magnifiquement & superbement comme un Roy de Perse, tant ils auoient mauuaise opinion des Roys: mais Agefilaus en peu de temps leur donna bien à cognoistre, que la maiesté & magnificence des Roys se doit acquerir par bon sens & par vaillance. Et voyant que ceux qui deuoient faire teste & combattre avec luy, s'effroyoient pour l'eminent peril, à cause du grand nombre des ennemis qui estoient deux cents mille combatans, & le peu de gens qu'ils auoient de leur costé, il delibera deuant que de venir au combat, de leur remettre le cœur par le moyen d'une ruse, dont il ne voulut rien communiquer à personne, c'est que dedans sa main gauche il escriuit à l'enuers ce mot, Victoire: & prenant le foye de la beste immolee des mains du deuin, le mit dedans sa main senestre, qui estoit escrite par dedans, & le tenant lógument, il faisoit semblant de penser bien profon-

Les dictz notables des Lacedemoniens.

dement à quelque doute, & monstroit apparence d'estre en perplexité de pense- E
ment, iusques à ce que les caracteres & figures des lettres eurent loisir de se pren-
dre & imprimer à la superficie du foye : & lors il le monstra à ceux qui deuoient com-
batre quand & luy, leur disant & donnant à entendre, que par ces lettres les Dieux
leur promettoient la victoire : & eux cuidans auoir en cela vn certain signe & presä-
ge de victoire, prirent hardiment le hazard de la bataille. Et comme les ennemis
teinsent son camp assiegé tout à l'environ, tant ils estoient en grand nombre, & en-
* ou, Ne- core fissent vne trenchee à l'entour, le Roy Nectanebos *, au secours duquel il estoit
ctabius. là venu, le prioit & sollicitoit de faire vne saillie sur eux, & de les combatre auant
que la trenchee fust paracheuee : Il respondit qu'il n'empescheroit iamais le desseing
des ennemis, qui tendoient à leur donner moyen d'estre egaulx pour combatre tant
contre tant, & attendit iusques à ce qu'il ne s'en falloit plus gueres que les deux bouts
de la trenchee ne vinsent à s'entrerencontrer : puis dressant sa bataille en cest inter-
ualle-là, & par ce moyen combatant de front pareil, tant contre tant, il meit les en- F
nemis en rouverte : & avec ce peu de gens qu'il auoit, en fit vn bien grand meurtre, &
du butin qu'il y gaigna, enuoya bonne somme d'argent à Sparte. Mais estant pres
à s'embarquer pour partir d'Ægypte, & s'en retourner au pais, il mourut, & en mou-
rant defendit tres-expressement à ceux qui estoient autour de luy, que lon ne fist fi-
gure ny image quelconque moulee ne peinte de son corps : Pource, dit-il, que si i'ay
» fait aucun acte de vertu en ma vie, cela sera le monument qui perpetuera ma memoire :
» sinon, toutes les images & statues du monde ne le sçauroient faire, attendu que
» ce ne sont qu'ouurages d'hommes mechaniques de nulle valeur. Agesipolis fils de
Cleombrotus, comme quelqu'un contaist en sa presence, que Philippus Roy de Ma-
» cedoine auoit en peu de iours demoly la ville d'Olinthe : Par les Dieux, dit il, en
» plusieurs fois autant de temps il n'en bastira pas vne pareille. Vn autre luy disoit com-
me par maniere de reproche, que luy, tout Roy qu'il estoit, & d'autres de ses citoyens
en aage d'hommes faicts, auoient esté baillez pour ostages, non pas leurs enfans ny G
» leurs femmes : Ainsi falloit-il faire par raison, dit-il, car il est iuste que nous mesmes, &
» non autres, portions la peine de nos fautes. Et comme il voulust faire venir des chiens
» de sa maison, quelqu'un luy dit, Voire-mais on ne les laissera pas sortir hors du pais :
» Aussi ne faisoit on pas les hommes par cy deuant, dit-il, & maintenant on les laisse
» bien sortir. Agesipolis fils de Pausanias comme les Atheniës luy dissent qu'ils estoient
contents de se rapporter au iugement de ceux de Megare, touchant quelques differets
qu'ils auoient ensemble, & quelques plaintes qu'ils faisoient les vns des autres, leur
» dit, C'est vne honte, Seigneurs Atheniens, que ceux qui sont les chefs & Ducs de tous
» les autres Grecs, entendent moins ce qui est iuste, que ne font les Megariens. Agis le
» fils d'Archidamus, comme les Ephores luy dissent, Pren les ieunes hommes de ceste
» ville avec toy, & t'en va au pais de cestui-cy, qui te conduira luy-mesmes iusques dedäs
» le chasteau de sa ville. Et comment est-il raisonnable, Seigneurs Ephores de commet- H
» tre le salut & la vie de tant de vaillans ieunes hommes, à vn qui trahit son pais ? On luy
» demanda quelle science on exerçoit principalement en la ville de Sparte : A sçauoir,
» dit il, obeïr & commander. Aussi disoit-il, que les Lacedemoniens ne demandoient ia-
» mais combien estoient les ennemis, mais où ils estoient. On luy defendit de combatre
» les ennemis à Mantinee, pource qu'ils estoient en bien plus grand nombre : Il est force,
» dit-il, que qui veut commander à beaucoup de gens, en combatte aussi beaucoup. A
» vn autre qui demandoit combien estoient les Lacedemoniens : Ils sont, dit-il, autant
» qu'il en faut pour chasser les meschants. En passant au long des murailles de Corinthe,
» les voyant ainsi hautes, bien basties, & si long estendues : Quelles femmes sont-ce, dit-
» il, qui habitent là dedans ? A vn maistre de Rhetorique qui louant son mestier disoit,
» Quand tout est dit, il n'y a rien si puissant que la parole de l'homme : Quand tu ne parles
point,

A point, dit-il, tu ne vaux doncques rien. Les Argiens aians esté desia vne fois battus, retournoient neantmoins se representer encore fort fierement en bataille, & voyant que la plus part de leurs alliez s'en troubloient de traveur, il leur dit: Asteurez vous mes amis, car si nous qui les auons desia battus auons peur, que pensez vous qu'ils aient eux? Vn Ambassadeur de la ville d'Abdere estoit venu à Sparte, qui auoit fort longuement parlé, & apres qu'il se fut teu, à la fin il luy demanda, Sire, quelle responce veux-tu que ie rapporte à nos citoyens? Tu leur diras, dit-il, que ie t'ay laissé dire tout ce que tu as voulu, & tant que tu as voulu, & que ie t'ay tousiours escouté sans iamais dire mot. Quelques vns louoient les Eliens de ce qu'ils estoient tres-iustes en la solennité des ieux Olympiques: Et est-ce, dit-il, chose si grande, ny dont il faille faire tant de cas, si en cinq annees ils gardent vn seul iour la iustice? Aucuns luy rapportoient, que ceux de l'autre maison royale luy portoient enuie: ils en auront doncques double peine, dit-il: car leurs propres maux d'eux mesmes les fascheront, & outre encore les biens qui seront & en moy & aux miens. Quelqu'un estoit d'aduis, qu'il falloit donner passage aux ennemis qui se mettoient en fuite: Voire-mais, dit-il, si nous ne combatons contre ceux qui s'enfuient par lâcheté, comment combattrons nous contre ceux qui demoureront par vaillance? Vn autre mettoit en auant le propos d'un moyen pour maintenir la liberté de la Grece, qui estoit bien genereux & magnanime, mais bien mal aisé à executer: Il luy respondit, Estranger mon amy, tes paroles auroient besoing de grande puissance & grand argent. Quelque autre luy disoit, que Philippus les engarderoit bien de mettre le pied en tout le demourant de la Grece, Nous nous contenterons, dit-il, amy, de demourer en nostre pays. Vn autre ambassadeur estoit venu de la ville de Perinthe en Lacedemone, qui auoit fait vne longue harangue, & à la fin demanda à Agis quelle responce il porteroit aux Perinthiens: Tu leur diras, dit-il, que tu ne cuydas iamais acheuer de dire, & moy de me taire. Il alla vne fois tout seul ambassadeur deuers Philippus qui luy dit, Comment cela? viens tu seul? Ouy, dit-il, deuers vn seul. Vn des vieux citoyens de la ville de Sparte luy disoit vn iour, à luy qui estoit desia vieil aussi, Que puis les anciennes loix & coustumes falloient tous les iours abbastardissant, & que lon y en introduisoit d'autres qui estoient pires, que tout s'en alloit sans dessus dessous: Il luy respondit en riant, Les affaires vont donq' bien, si le est ainsi que tu dis: car il me souuient qu'estant ieune garçon, j'entendois desia dire à mon pere, que tout estoit aussi renuersé, & ce qui estoit dessus, estoit venu dessous dès son temps: & disoit encore, que son pere luy en auoit autant dit du sien. Et pourtant ne se fait il pas esmerveiller, si les affaires vont apres pis que deuant: mais aussi fils vont quelque fois mieux, & quelquefois sont presque tous semblables. Quelqu'un luy demanda, comment il pourroit demourer franc & libre pour toute sa vie: En mesprisant la mort, dit-il. Agis le ieune, comme l'Orateur Demades luy dist, que les espees Laconiques estoient si courtes, que les triacleurs & charlatans les aualloient à tous coups: Et toutefois dit-il, les Lacedemoniens en assenent bien leurs ennemis. Vn autre importun & meschant homme luy rompoit la teste à force de demander souuent, Qui est le plus homme de bien de Sparte? Celuy, dit-il, qui te ressemble le moins. Agis le dernier Roy de Lacedemone, aiant esté surpris en trahison, & condamné par les Ephores, ainsi qu'on le menoit sans forme de iustice au lieu pour estre estranglé, apperceut vn de ses esclaves qui pleuroit: si luy dit, Cesse de pleurer pour ma mort, car en mourant ainsi iniquement & meschamment, ie vaux mieux & suis plus homme de bien que ceux qui me font mourir. & aiant dit ces paroles, il tendit volontairement son col au laqs de la corde. Acrotatus voyant que ses pere & mere vouloient qu'il leur teint la main à faire quelque chose qui estoit contraire à la raison & à la iustice, il leur résista pour vn temps: mais quand il veit qu'ils luy en faisoient trop grande in-

Les dictz notables des Lacedemoniens.

» stance , à la fin il leur dit , Pendant que i'ay esté entre vos mains, ie n'ay iamais eu au- E
 » cune cognoissance ny aucun sentiment de la iustice : mais depuis que vous m'avez
 » donné à la Chose publique & à ses loix, & par ce moyen m'avez instruit en iustice &
 » preud'homme, comme vous avez peu, ie m'efforceray de suyure ceste instruction-là,
 » & non pas vous : & pource que ie sçay bien que vous voulez que ie face toutes cho-
 » ses bonnes, & que celles-là sont tresbonnes & à vn homme priué, & encore plus à ce-
 » luy qui est en autorité de magistrat, lesquelles sont iustes, ie feray celles que vous
 » voulez, & refuseray celles que vous me dittes. Alcamenes fils de Telecrus, comme
 » quelqu'un demandast, par quel moyen on pourroit bien conseruer vn Royaume:
 » En ne faisant, dit-il, point de compte de gagner. Vn autre luy demandoit, pour
 » quelle cause il n'auoit point voulu prendre ny recevoir de dons des Messeniens:
 » Pour-ce, dit-il, que si i'en eusse pris, ie n'eusse iamais eu paix avec les loix. Quelque
 » autre luy dit qu'il s'esmerueilloit, comment il viuoit si estroitement, veu qu'il auoit
 » si bien dequoy : il luy respondit, C'est chose honneste, quand on a des biens beau- F
 » coup, viure neantmoins selon la raison, & non pas selon l'appetit. Alexandridas fils de
 » Leon, voyant vn qui se tourmentoit & desesperoit, d'autant qu'il estoit banny de son
 » pais : O mon amy, dit-il, ne te tourmente pas pour estre contrainct d'esloigner ton
 » pais, mais bien pour auoir esloigné la iustice. A vn autre qui disoit aux Ephores de
 » bons propos, mais plus qu'il n'en falloit : Estranger mon amy, dit-il, tu dis ce qu'il
 » faut autrement qu'il ne faut. Quelque autre luy demandoit, pourquoy ils donnoient
 » la charge de leurs terres à leurs Ilotes, & qu'ils ne les prenoient à labourer & cultiuer
 » eux-mesmes : Pour ce, dit-il, que nous les auons acquises, non en les cultiuant elles,
 » mais en nous cultiuant nous mesmes. A vn autre qui soustenoit, qu'il n'y auoit que
 » l'ambition & la vaine gloire qui perdoit les hommes, & que ceux qui s'en pouuoient
 » deffaire, estoient heureux : Il faudroit doncques confesser suiuant ton dire, que les
 » meschans qui font tort à autrui, seroient bien-heureux : car comment pourroit-on
 » soustenir que vn sacrilege ou vn voleur, qui rait le bien d'autrui, fust conuoiteux G
 » de vaine gloire ? Il respondit aussi à quelque autre qui luy demandoit pourquoy les
 » Lacedemoniens estoient si hardis & si asseurez aux perils de la guerre : Pource, dit-il,
 » que nous apprenons à auoir honte, & non pas peur de nostre vie, comme les au-
 » tres. On luy demanda aussi quelquefois, pourquoy c'estoit que les Senateurs de-
 » mouroient plusieurs iours à iuger les causes criminelles : & qu'encore que l'accusé
 » fust par eux absous, il deniouroit neantmoins tousiours en estat de criminel : Ils de-
 » meurent, dit-il, plusieurs iours à decider les causes criminelles, où il estoit question de
 » la vie des hommes, pour ce que ceux qui ont commis erreur en la mort d'un homme,
 » ne peuuent plus r'habiller leur sentence : & celuy qui est eslargy, doit neantmoins
 » tousiours demeurer subiect à la loy de l'homicide, pour ce que lon peut tousiours
 » de rechef mieux enquerir & mieux iuger de son faict. Anaxander le fils d'Eury-
 » crates respondit à vn qui luy demandoit, pourquoy ils n'amassoient point d'argent H
 » en public : De peur, dit-il, que si on nous en bailloit la garde, cela ne fust matiere
 » & moyen de nous corrompre. Anaxilas aussi dit à vn qui s'esmerueilloit com-
 » ment les Ephores ne se leuoient point au deuant des Roys, veu que c'estoient eux
 » qui les mettoient : C'est, dit-il, pour la mesme cause qu'ils ont esté creez Ephores,
 » c'est à dire pour contreroller & syndiquer les Roys. Androclidas Laconien estant
 » affollé d'une cuisse, se fit neantmoins enroller au nombre de ceux qui deuoient aller
 » à la guerre : & comme quelques vns sy opposassent, d'autant qu'il estoit impotent
 » d'une cuisse : Voire-mais, dit-il, il ne faut pas des gens qui fuyent, mais qui tiennent
 » ferme pour combatre les ennemis. Antalcidas se faisant recevoir en la confrairie
 » de la religion de Samothrace, comme le presbtre luy demandast, quel peché il auoit
 » faict le plus grand en sa vie : Si i'en auray faict aucun en ma vie, les Dieux, dit-il, le
 » sçauront

A ſçauront bien eux meſmes. Et à vn Athenien qui appelloit les Lacedemoniens groſ-
 » fiers & ignorans : Nous ſommes voirement ſeuls en toute la Grece qui n'auons ap-
 » pris de vous rien de mal. Et à vn autre Athenien auſſi, qui luy diſoit, Nous vous
 » auons ſouuent rechassez de la riuere de Cephifus : Mais nous, dit-il, ne vous rechaf-
 » ſames iamais de celle d'Eurotas. A vn autre qui luy demandoit, Comment il fau-
 » droit faire pour eſtre tref-aggreable aux hommes : Il faudroit, reſpondit-il, leur dire
 » touſiours choſe qui leur pleuſt, & faire choſe qui leur profitaſt. Vn maistre de Rhetor-
 » que luy vouloit vn iour reciter vne harangue qu'il auoit compoſee à la louange de
 » Hercules : Et qui eſt-ce, dit-il qui le meſpriſe ? Et à Ageſilaus qui auoit eſté fort grie-
 » uement nauré en vne bataille par les Thebains : Tu reçois, dit-il, bien l'eſcholage &
 » le loyer que tu merites des Thebains, leur aiant enſeigné malgré eux ce qu'ils ne ſça-
 » uoient ny ne vouloient apprendre, c'eſt à ſçauoir, à combattre : car par les conti-
 » nuelles expeditions qu'Ageſilaus faiſoit contre eux, ils eſtoient deuenus vaillants &
 B belliqueux. Luy meſme diſoit que les murailles de Sparte eſtoient les ieunes hom-
 » mes, & ſes confins eſtoient les fers de leurs picques. Et à vn autre qui demandoit,
 » pourquoy les Lacedemoniens combattoient de ſi courtes eſpees : A fin, dit-il, que
 » nous ioignons nos ennemis de plus pres. Antiochus eſtant Ephore ouyt dire que
 » Philippus auoit donné aux Meſſeniens leur territoire : Mais leur a-il auſſi, demanda-il,
 » donné quant & quant les forces de le pouuoir defendre ? Arigeus reſpondit à quel-
 » ques vns qui louoient hautement des Dames qui n'eſtoient point leurs femmes, ains
 » mariees à d'autres : Par les Dieux, dit-il, on ne doit iamais tenir propos en vain, & que
 » lon ne ſçache bien comment, des femmes de bien & d'honneur, pour ce qu'elles ne
 » doiuent aucunement eſtre cognuës ſinon de ceux qui viuent ordinairement avec
 » elles. Et en paſſant vne fois par la ville de Selinunte en Sicile, il leut ceſt Epitaphe
 qui eſtoit engraué deſſus vne ſepulture,

Après auoir la tyrannie eſtainte

C De leur païs, par Martiale attainte,
 Ceux-cy iadis deuant les hautes tours
 De Selinunte acheuerent leurs iours :

» Ils meritoient bien, dit-il, de mourir, pour auoir eſtaint vne tyrannie, ſi elle bruſloit,
 » car ils la deuoient laiſſer toute bruſſer. Ariſton oyant quelqu'un qui en deuifant
 louoit vne ſentence que ſouloit dire le Roy Cleomenes, quand on luy deman-
 » doit, quel eſtoit l'office d'un bon Roy : Faire du bien à ſes amis, diſoit-il, & du mal
 » à ſes ennemis. Et de combien ſeroit-il meilleur, reſpondit-il, de faire du bien à ſes
 » amis, & de ſes ennemis en faire de bons amis. mais ceſte notable ſentence eſt indubi-
 » tablement de Socrates, & par tous ſe refere à luy. Comme quelqu'un luy deman-
 » daſt combien en nombre eſtoient les Lacedemoniens : Autant, dit-il, qu'il en
 » faut pour chaſſer leurs ennemis. Vn Athenien recitoit l'oraiſon funebre, qu'il auoit
 D compoſee à la louange de leurs citoyens qui auoient eſté deſfaicts par les Lacedemo-
 » niens : Si les voſtres ont eſté ſi vaillans que tu dis, quels penſes-tu doncques, dit-il,
 » que ſoient les noſtres qui les ont deſfaicts ? Archidamidas reſpondit à vn qui louoit
 » Charilaus de ce, qu'il ſe monſtroit humain egale-ment à tous : Et comment, dit-il,
 » merite d'eſtre loué celui, qui ſe monſtre humain enuers les meſchans ? Vn autre
 reprenoit Hecateus, le maistre de Rhetorique, de ce qu'aianſt eſté conuié à manger
 avec eux en leurs conuiues qu'ils appellent, il ne dit iamais mot tout le long du
 » diſner : il luy reſpondit, Il ſemble que tu ignores, que celui qui ſçait bien parler,
 » ſçait auſſi le temps quand il faut parler. Archidamus fils de Zeuxidamus dit à
 » vn qui luy demandoit, qui c'eſtoit qui gouernoit la ville de Sparte, Ce ſont les
 » loix, & puis les magiſtrats ſuiuant les loix. Entendant vn qui louoit grandement
 » vn ioueur de cithre, & auoit en ſinguliere admiration l'excellence de ſon art : O mon

Les dictz notables des Lacedemoniens.

„ amy, quel loyer d'honneur auront enuers toy les preux & vaillans hommes, puis E
„ que tu louës si hautement vn ioueur de cithre? Quelque autre luy recommandoit
„ fort vn Musicien en luy disant, Il est bien bon chanter: C'est autant, dit-il, comme
„ bon potager chez nous. voulant dire qu'il n'y auoit point de difference entre don-
ner du plaisir par le son de la voix ou des instruments, & par l'apprest des viandes ou
des potages. Quelqu'un luy promettoit de luy donner du vin qui seroit fort bon
„ & souëf: A que faire, dit-il, cela ne seruira qu'à en faire boire d'auantage, & à de-
„ uenir moins homme. Estant au siege deuant la ville de Corinthe, il veit des liéures
„ se leuer tout ioignant les murailles de la ville: si dit à ses compagnons, Nos enne-
„ mis nous sont aisez à prendre, puis qu'ils sont si paresseux, que de laisser gister
„ les liéures iusques dedans les fossez de leur ville. Il auoit esté esleu pour arbitre du
consentement de deux qui auoient procez l'un contre l'autre, lesquels il mena tous
deux dedans le temple de Diane surnommee Chalceæcos, & leur fit promettre &
iurer sur l'autel de la Deesse, qu'ils obserueroient tous deux de poinct en poinct ce qui F
„ seroit par luy iugé. Ce qu'ils promirent, & iurerent. Le iuge doncques, dit il, que vous
„ ne partirez ne l'un ne l'autre de ce temple, que vous n'ayez premier pacifié vos differêts.
„ Dionysius le tyran de la Sicile auoit enuoyé à ses filles des robes pretieuses: il ne les
„ voulut pas receuoir disant, l'aurois peur que quand elles les auroient vestues, elles ne
„ m'en semblassent plus laides. Et voyant son fils encore ieune en vne bataille com-
„ battre desespereement à l'encontre des Atheniens, il luy dit, Ou augmente ta force,
„ ou diminue ton courage. Archidamus le fils d'Agésilas, comme le Roy Philippus
apres la bataille qu'il gagna contre les Grecs aupres de Cheronee, luy eust escrit
„ vne missiue fort aspre & rigoureuse, il luy rescriuit, Si tu mesures ton ombre, tu trou-
„ ueras qu'elle ne sera pas deuenue plus grande depuis que tu as vaincu. Estant vn
„ iour enquis, combien de terre possedoient les Lacedemoniens, il respondit, Autant
„ comme ils en peuuent atteindre avec leurs iaelines. Periander estoit vn medecin suf-
fisant en son art, & bien estimé entre les plus excellents, mais qui escriuoit de mau- G
„ uais vers: il luy dit vn iour, Je m'esbahis de toy Periander, comment tu aimes mieux
„ estre appellé mauvais poëte, que bon medecin. En la guerre que les Lacedemoniens
eurent contre Philippus, quelques vns luy conseilloyent, qu'il aduisast bien à donner
„ la bataille le plus loing qu'il pourroit de son païs: Ce n'est pas cela, dit-il, à quoy il
„ faut aduiser, mais bien à ce, comment nous pourrons si bien combattre, que nous
„ demourions victorieux. Il fit aussi response à ceux qui le louoyent de ce qu'il a-
„ uoit gagné la bataille contre les Arcadiens: Il vaudroit mieux, dit-il, que nous
„ les eussions vaincus de prudence que de force. Et enuiron le temps qu'il entra en
armes dedans le païs d'Arcadie, estant aduertie que les Eliens enuoyoyent du secours
„ aux Arcadiens, il leur escriuit en ceste sorte: Archidamus aux Eliens, C'est belle
„ chose que le repos. Et comme les peuples aliez & confederéz en la guerre Pelopo-
nesiaque demandassent combien d'argent suffiroit à mener ceste guerre, & qu'il ta- H
„ xast combien chascun auroit à contribuer: La guerre, dit-il, ne se fait pas à pris certain.
Et voyant vn traitt d'engin de baterie, qui lors auoit nouuellement esté apporté de
„ la Sicile: O Hercules, dit-il, la prouësse de l'homme est perdue. Et pource que les
Grecs ne le voulurent pas croire, ny rompre les traittez qu'ils auoient faictz avec Anti-
gonus & Craterus Macedoniens pour viure en leur ancienne liberté, & alleguans que
„ les Lacedemoniens leur seroient plus insupportables que les Macedoniens: Le mou-
„ ton, dit il, iette tousiours dehors vne mesme voix, mais l'homme en change souuent
„ en diuerses sortes, iusques à ce qu'il soit paruenue au dessus de ses desseings. Astycra-
tidas respondit à quelqu'un qui disoit, apres que le Roy Agis eut perdu la bataille
„ contre Antigonus: O pauvres Lacedemoniens, que ferez vous maintenant? Se-
„ rez vous serfs des Macedoniens? Comment, Antigonus nous pourroit-il defendre
de

A de mourir en combatant pour Sparte? Bias aussi se trouuant surpris d'une embus-
 che que luy auoit dressée Iphicrates capitaine des Atheniens, comme ses souldards
 » luy demandassent: Et bien Capitaine, qu'est-il de faire? Que sçauriez-vous faire,
 » dit-il, sinon aduiser à vous sauuer, & moy à mourir en combatant? Brasidas trouua
 vne souris entre des figues seches qui le mordit, & il la laissa aller, disant à ceux qui
 » estoient presens: Voyez comment il n'y a si petit animal qui ne puisse sauuer sa vie,
 » prouueu qu'il ait le cœur de se defendre contre ceux qui l'assaillent. En vne bataille
 il fut blecé d'un coup de iavelot qui faulsa son bouclier: & luy l'arrachant de son
 corps, en tua l'ennemy qui l'en auoit blecé. Et à ceux qui demandoient, comment
 » il auoit ainsi esté blecé: Par ce, dit-il, que mon bouclier m'a trahy. Se partant pour
 » aller à la guerre, il escriuit aux Ephores, Ce que vous m'escriuez touchant la guerre,
 » ie le feray, ou i'y mourray. Et apres qu'il fut mort en deliurant de seruitude les Grecs
 habitans au païs de Thrace, les ambassadeurs qui furent enuoyez de la part du païs,
 B pour rendre grace aux Lacedemoniens, allerent visiter sa mere Archileonide: la-
 quelle leur demanda premierement, si son fils Brasidas estoit mort vaillamment: &
 comme ces ambassadeurs Thraciens le louassent si hautement, qu'ils disoient qu'il
 » n'auoit point laissé son pareil: Vous vous abusez, dit-elle, mes amis, car Brasidas
 » estoit bien homme de bien, mais il y en a plusieurs en Sparte qui sont encore meil-
 » leurs que luy. Damonidas auoit esté colloqué tout au dernier lieu de la danse par
 celui qui en estoit le maistre: il ne s'en courrouça point autrement, ains luy dit:
 » Tu as bien fait, car tu as trouué moyen de rendre ceste place honorable, qui par cy
 » deuant estoit infame. Damis fit réponse aux lettres qui leur auoient esté écrites
 de la part d'Alexandre le grand, qu'ils eussent à declarer par leurs suffrages, Alexandre
 » estre Dieu: Nous concedons à Alexandre de se faire appeller Dieu fil veut. Da-
 mindas comme Philippus fust entré à main armée dedans le Peloponnese, & que
 quelqu'un luy dist, Les Lacedemoniens sont en danger de souffrir beaucoup de maux,
 C fils ne treuuent moyen d'appoincter avec luy. O demy-femme mon amy, que nous
 » sçauoit-il faire souffrir de mal, veu que nous ne faisons compte de la mort? Der-
 cyllidas fut enuoyé ambassadeur deuers le Roy Pyrrus, lors qu'il auoit son armée
 sur les confins de Sparte. Pyrrus leur fit commandement qu'ils eussent à recevoir leur
 Roy Cleonymus qu'ils auoient banny, ou qu'il leur feroit cognoistre qu'ils n'e-
 » stoient point plus vaillans que les autres. Dercyllidas luy repliqua, Si tu es vn
 » Dieu, nous ne te craignons point, pour ce que nous ne t'auons point offensé: mais si
 » tu es homme, tu n'es point meilleur que nous. Demaratus deuisoit vn iour avec O-
 » rontes qui parla fort brusquement à luy: quelqu'un qui l'auoit ouy, luy dit puis apres,
 » Orontes s'est montré bien audacieux en ton endroit: Il n'a point failly enuers moy,
 » dit-il: car ceux qui flatent & qui complaisent en tous leurs propos, ce sont ceux qui
 » portent dommage, non pas ceux qui parlent avec malveillance. Quelqu'un luy
 D demandoit pour quelle cause à Sparte ils notoient d'infamie ceux qui en vne descon-
 fiture iettoient leurs boucliers, & non pas ceux qui iettoient ou leurs corps de cui-
 » rasses, ou leurs habillemens de teste: Pour ce, dit-il, que c'est pour eux seuls qu'ils
 » portent ces armeures-là, mais les boucliers, c'est pour toute l'ordonnance de la bat-
 » taille. Aiant ouy chanter vn chantre, Il me semble, dit-il, qu'il ne sollastre pas mal.
 Il estoit en vne grande compagnie, où il demoura bien longuement sans dire vn
 » seul mot: à l'occasion dequoy quelqu'un luy dit, Est-ce par folie ou par faute de
 » propos que tu gardes vn si grand silence? Et comment, dit-il, seroit-ce par folie? car
 » vn fol ne se peut iamais taire. Quelqu'un luy demandoit pourquoy il estoit banny de
 » Sparte, veu qu'il en estoit Roy: C'est, dit-il, pource que les loix y sont maistresses. Vn
 Persien à force de donner luy suborna à la fin vne ieune garce qu'il aimoit, & puis s'en
 » mocquant luy disoit: J'ay si bien chassé, qu'à la fin j'ay pris tes amours: Non as pas

Les dictz notables des Lacedemoniens.

„ par les Dieux, dit-il, mais bien les as-tu achettez. Quelque gentil-homme s'estoit **E**
 rebellé contre le Roy de Perse, mais Demaratus auoit tant faict par remonstrances en-
 uers luy, qu'il luy auoit persuadé de retourner. Le Roy luy fit incontinent mettre
 la main sur le collet, & estoit prest à le faire executer: mais Demaratus l'en diuertit
 „ en luy remonstrant, Ce te seroit honte, Sire, de n'auoir sceu le punir de sa rebellion
 „ quand il estoit ton ennemy, & puis maintenant qu'il est redeuenu ton seruiteur &
 „ amy, le faire mourir. Il y auoit vn boufon qui plaisantoit à la table du Roy, lequel
 luy donnoit souuent des attaintes & des traiets picquants de mocquerie, en luy re-
 „ prochant son exil: il luy respondit, Estranger mon amy, ie ne te combattray point,
 car i'ay perdu le rang * de ma vie. Emerepes estant Ephore couppa avec vne hachette
 deux chordes des neuf que le musicien Phrynis auoit en sa lyre, disant, Ne viole
 point la Musique. Epenetus souloit dire, que les menteurs estoient cause de tous
 les pechez & de tous les crimes du monde. Euboïdas oyant quelques vns qui
 louoient la femme d'un autre, les en reprit, disant, que les estrangers qui ne sont pas **F**
 de la maison, ne doiuent aucunement parler des mœurs d'une Dame. Eudamidas
 fils d'Archidamus, & frere d'Agis, aiant veu Xenocrates qui estoit desia fort auant
 sur son aage en l'Academie estudiant en la Philosophie avec ses familiers, demanda
 qui estoit ce vieillard-là: quelqu'un des assistans luy respondit, que c'estoit vn sa-
 „ ge homme, & du nombre de ceux qui cherchoient la vertu: Et quand en vsera-il,
 „ dit-il, si la cherche encore? Et aiant ouy vn philosophe disputer & discourir sur
 „ ceste proposition, Qu'il n'y a bon capitaine que celuy seul qui est sage: Ce propos
 „ là, dit-il, est merueilleux, mais celuy qui le dit n'en est pas croyable, car il n'a pas les
 „ oreilles accoustumées au son de la trompette. Il alla vn iour à l'auditoire pour
 ouïr Xenocrates discourant sur vne question, mais il y arriua comme il acheuoit:
 „ & quelqu'un de ceux qui estoient en sa compagnie commença à dire, Il s'est teu tout
 „ aussi tost que nous sommes arriuez: Il a bien faict, dit-il, si auoit acheué de
 „ dire ce qu'il vouloit dire. Et comme l'autre repliquast, Il seroit bon que nous **G**
 „ l'ouissions dire vne autre fois: Et si nous estions, dit-il, venus visiter vn homme qui
 „ eust desia soupé, le prierions nous qu'il soupast encore vne autre fois pour l'amour
 „ de nous? Quelqu'un luy demanda vn iour, pourquoy il vouloit seul demourer
 en paix, veu que tous ses citoyens vnanimement estoient d'aduis d'entreprendre la
 „ guerre contre les Macedoniens: C'est pour ce, dit-il, que ie ne les veux pas conuein-
 „ cre de mensonge. Vn autre pour l'animer à ceste guerre, luy alleguoit les prou-
 „ essés & beaux faicts d'armes qu'ils auoient autrefois faicts contre les Perses: Il me sem-
 „ ble, dit-il, que tu ignores que c'est autant comme apres auoir vaincu mille mou-
 „ tons, vouloir combattre contre cinquante loups. Il fut quelquefois present à ouyr
 chanter vn Musicien, qui fit fort bien: on luy demanda ce qu'il luy en sembloit: il
 „ respondit, Il me semble que c'est vn grand amuseur de gens à peu de chose. Et comme
 „ vn autre louast hautement la ville d'Athenes deuant luy: Et qui pourroit, dit-il, assez **H**
 „ louer ceste ville, que iamais homme n'aima pour y estre deuenu meilleur? Et comme
 Alexandre le grand eust fait proclamer publiquement en l'assemblée des ieux Olym-
 „ piques, que tous bannis peussent retourner en leurs pays, exceptez les Thebains:
 „ Voyla, dit-il vne proclamation calamiteuse pour vous, ô Thebains, mais elle vous
 „ est honorable, car c'est signe qu'Alexandre ne craint que vous seuls en la Grèce. Vn
 citoyen de la ville d'Argos disoit vn iour en sa presence, que les Lacedemoniens for-
 „ tans de leur païs, & de l'obeïssance de leurs loix, deuenoient pires en voyageant par
 „ le monde: mais au contraire, vous autres Argiens venans en nostre ville de Sparte
 „ n'en empirez pas, ains en deuenez plus gens de bien. On luy demanda pour quelle
 occasion deuant que d'entrer en bataille ils auoient accoustumé de sacrifier aux Mu-
 „ ses: A fin, dit-il, que nos gestes soient bien & dignement escripts. Eurycratidas fils
 d'Anaxan-

La grace de
 la rencontre
 ne se peut
 trouver en
 François, qui
 consiste en
 l'equiuoque
 de ce mot
 τῶν, signi-
 fiant armee
 & rang.

A d'Anaxandrides à quelqu'un qui luy demandoit, pourquoy les Ephores iugeoiēt par
 » tout, & par chascun iour des contractz, respondit : A fin que mesme entre les ennemis
 » nous apprenions à nous garder foy l'un à l'autre. Zeuxidamus respondit aussi à vn
 » qui luy demandoit, pourquoy ils ne redigeoient par escript les statuts & ordonnances
 » de la prouesse, & qu'ils ne les bailloient escripts à lire à leurs ieunes gents : Pour ce,
 » dit-il, que nous voulons qu'ils s'accoustument aux faicts, & non pas aux escriptu-
 » res. Vn Ætolien disoit, que la guerre estoit meilleure que la paix, à ceux qui se
 » vouloient monstrier gens de bien : Non pas cela seulement, dit-il, par les Dieux,
 » mais meilleure est la mort que la vie. Herondas se trouua d'adventure à Athenes,
 » quand il y eut vn des citoyens qui fut condamné d'oisiuerie : & en entendant le bruit,
 » il pria qu'on luy monstreat celuy qui auoit esté condamné en cause de gentillesse.
 » Thearidas aiguisoit la poincte de son espee, quelqu'un luy demanda, si elle estoit
 » bien aigüe : Plus aigüe, dit-il, que n'est vne calomnie. Themisteas, estant deuin,
 B predict au Roy Leonidas la desconfiture qui deuoit aduenir dedans le pas de Ther-
 » mopyles, tant de luy que de ceux qui combateroient avec luy : Leonidas le voulut
 » enuoyer à Lacedemone sous couleur de porter les nouuelles de ce qui deuoit ad-
 » uenir, mais à la verité, de peur qu'il n'y mourust avec les autres : Il ne le voulut pas
 » faire, ains dit au Roy Leonidas qui l'y vouloit despescher : J'ay esté icy enuoyé pour
 » combattre, & non pas pour porter des nouuelles. Theopompus dit à vn qui luy
 » demandoit, Comment vn Roy pourroit bien seurement conseruer son Royaume :
 » En donnant à ses amis liberté de luy dire franchement la verité, & en gardant d'op-
 » pression ses subiects de toute sa puissance. A vn estranger qui luy disoit qu'en son
 » pays on le surnommoit Philolacon, c'est à dire, aimant les Lacedemoniens : Il vau-
 » droit mieux, dit-il, que lon te surnommast aimant tes citoyens, qu'aimant les Lacede-
 » moniens. Vn autre ambassadeur venu de la ville d'Elide disoit, que ses citoyens l'a-
 C uoient enuoyé, pour autant qu'il estoit seul en leur ville qui suyuoit la façon de viure
 » Laconique. Il luy demanda, Et laquelle maniere de viure est la meilleure, la tiene ou
 » celle des autres ? C'est la mienne, respondit-il. Comment doncques est-il possible,
 » dit-il adonc, qu'une cité se conserue, en laquelle y ayant grand nombre d'habi-
 » tans, il n'y en a qu'un seul qui soit homme de bien ? Quelqu'un disoit deuant
 » luy, que la ville de Sparte se maintenoit en son entier, pour ce que les Roys y sça-
 » uoient bien commander : Non pas tant, dit-il, que pour ce que les citoyens y sça-
 » uent bien obeïr. Les habitans de la ville de Pyle luy decernerent en leur conseil
 » de tresgrands honneurs : Il leur rescriuit, que le temps auoit accoustumé d'accroi-
 » stre les honneurs moderez, & d'effacer les immoderez. Therycion retournant
 » de la ville de Delphes trouua le camp de Philippus dedans le destroiēt du Pelopo-
 » nese, où il auoit gagné le passage, auquel est assise la ville de Corinthe : si dit aux
 » Corinthiens, Le Peloponese a de mauuais portiers en vous. Theetamenes ayant
 D esté condamné à mourir par les Ephores, s'en alloit riant : & quelqu'un luy deman-
 » da, si luy mespriſoit les loix & iugemens de Sparte : Non pas, dit-il, mais ie me res-
 » iouys de ce, qu'ils m'ont condamné à payer vne amende que ie puis payer, sans l'em-
 » prunter d'un autre. Hippodamus estoit en bataille ioignant le Roy Archidamus,
 » qui le vouloit enuoyer avec Agis à Sparte, pour là prouoir aux affaires : mais il ne
 » voulut pas y aller, ains luy respondit, Ne mourray-ie pas plus honorablement
 » icy en combatant vaillamment pour Sparte ? Or auoit-il ja vescu plus de quatre
 » vingts ans, & prit ses armes, & se regeant à la main droicte du Roy, il y mou-
 » rut en combatant. Le gouuerneur de la Carie escriuit à Hippocratidas qu'il te-
 » noit entre ses mains vn Lacedemonien : lequel ayant sceu vne trahison, & conspi-
 » ration qui festoit machinee à l'encontre de luy, ne luy en auoit rien reuelé, & luy
 » demandoit quant-&-quant conseil de ce qu'il en deuoit faire. Il luy rescriuit, Si

Les dictz notables des Lacedemoniens.

- » tu luy as par cy-deuant fait quelque grand bien , fais le mourir : sinon , chassé le hors E
» de ton pais , attendu qu'il restiue à la vertu. Il rencontra quelquefois en son che-
» min vn ieune garson , apres lequel venoit vn qui l'aimoit : le ieune garson en eut
» honte : & lors il luy dit , Il te faut aller en compagnie de ceux , avec lesquels quand
» on te verra , tu n'en changes point de couleur. Callicratides Capitaine general de
l'armee de mer , comme des amis de Lysander le requissent de leur oëtroier , qu'ils
peussent sans punition tuer vn de leurs ennemis , & qu'ils luy donneroient cinquante
talents , qui sont trente mille escus , combien qu'il eust grandement affaire d'ar-
gent pour nourrir ses mariniers , il ne leur voulut pas neantmoins permettre. Et
» comme Cleander , qui estoit l'un des ses Conseillers , luy dist , Je les prendrois quant
» à moy , si i'estois en ta place : Et moy aussi , dit-il , si i'estois en la tienne. Estant
allé à Sardis deuers Cyrus le ieune , qui estoit allié des Lacedemoniens , pour veoir
fil pourroit tirer de l'argent de luy , pour entretenir ses gens de marine. La premie-
re iournee il luy fit dire , qu'il estoit là venu pour parler à luy : on luy fit responce, F
» qu'il estoit à table : Et bien , dit-il , j'attendray qu'il ait acheué : & apres auoir lon-
guement attendu , quand il veit qu'il estoit impossible de parler pour ce iour-là à
luy , encore fut-il trouué inciuil & importun. Le lendemain quand on luy dit qu'il
beuuoit encore , & que pour ce iour-là il ne sortiroit point dehors : il s'en retourna en
Ephese , dont il estoit party , disant , qu'il ne falloit pas tant auoir soing de recouurer
deniers , comme de ne faire chose qui fust indigne de Sparte , en maudissant ceux qui
festoient les premiers si indignement assubiectis à l'insolence des Barbares , & leur
auoient enseigné d'abuser ainsi superbement & insolentement de leurs richesses : &
iura en presence de ceux qui estoient en la compagnie , que si tost qu'il seroit de re-
tour à Sparte , il feroit tout ce qu'il luy seroit possible , pour reconcilier les Grecs les
vns avec les autres , à fin qu'ils en fussent plus redoutables aux Barbares , quand ils
n'auroient plus besoing de leurs forces pour s'entrefaire la guerre les vns aux autres.
» On luy demanda , quels hommes estoient les Ioniens : Ce sont , dit-il , bons esclaves, G
» mais mauuais hommes libres. Cyrus à la fin luy aiant enuoyé de l'argent pour
la soude des gents de guerre , & d'autre en don pour luy , il prit bien celuy de la sou-
de des soudards , mais l'autre il le renuoya , disant , qu'il n'estoit point de besoing
qu'il eust amitié particuliere avec luy , pour ce que la commune qu'il auoit avec
tous les Lacedemoniens , estoit encore avec luy. Vn peu deuant qu'il donnast la
bataille des Arginusés , son pilote nommé Hermon luy remonstra , qu'il seroit bon
de foster de là , & faire voile , pour ce que les galeres des Atheniens estoient bien
» en plus grand nombre qu'eux : Et puis , dit-il , qu'est-ce que cela ? le fuir n'est-il pas
» infame & dommageable à Sparte ? Il vault beaucoup mieux , en demourant , ou vain-
» cre , ou mourir. Deuant la bataille aiant fait sacrifice aux Dieux , le Deuin luy predict
que les signes des entrailles promettoient bien la victoire à l'exercite , mais la mort
» au Capitaine : il ne s'en effroya point , ains dit , Sparte n'est pas à vn homme pres : car H
» quand ie seray mort , mon pais n'en sera de rien moindre , mais si ie recule mainte-
» nant , il en sera diminué de reputation : ainsi ayant substitué en son lieu pour Capitai-
ne Cleander , fil luy aduenoit quelque chose , il alla donner la bataille , en laquelle il
mourut en combatant. Cleombrotus fils de Pausanias comme vn estrangier debat-
» tist avec son pere de la vertu , il luy dit : Pour le moins mon pere a cela deuant toy ,
» qu'il a ja engendré vn fils , & tu n'en as encore point. Cleomenes fils d'Anaxandrides
fouloit dire , qu'Homere estoit le poëte des Lacedemoniens , pour ce qu'il enseigne
comme il faut faire la guerre : & Hesiodé celuy des Ilotes , pour ce qu'il escrit de l'a-
griculture. Il auoit fait trefues pour sept iours avec les Argiens : la troisieme nuit
apres , aiant obserué que les Argiens festoient tresbien endormis sur la fiance de ces
trefues , il les alla charger , & en tua les vns , & en prit les autres prisonniers : & comme
on luy

A on luy reprochaſt, qu'il auoit faulſé la foy iuree : il reſpondit, Qu'il n'auoit pas iuré de garder les trefues la nuit : au demourant, que quelque mal que lon peult faire à ſes ennemis, en quelque ſorte que ce fuſt, cela eſtoit par deſſus la iuſtice, & non ſubieſt à icelle, tant enuers les Dieux, qu'enuers les hommes. Mais il aduint que pour ſon pariurement & ſon crime de foy violee, il fut fruſtré de ſon intention, qui eſtoit de cuider ſurprendre la ville d'Argos, par ce que les femmes allerent prendre les armes, qui pour marque de leurs victoires anciennes eſtoient attachees & pendues en leurs temples, avec leſquelles elles le repoulſerent des murailles : & depuis eſtant deuenu furieux & hors du ſens, il prit vn couſteau, & ſe fendit luy-meſme tout le corps, depuis les talons iuſques aux parties nobles, & mourut ainſi en riant. Son deuin meſme le diuertilloit de mener ſon armee deuant Argos, pour ce qu'il diſoit, que le retour luy en ſeroit infame : & quand il fut arriué deuant, il trouua les portes fermees, & les femmes en armes deſſus les murailles : Si luy dit adonc, Ne te ſemble-il

B pas maintenant que ce departement te ſoit infame, que les hommes eſtans tuez, les femmes aient bien eu le cœur de te fermer les portes ? Et à ceux des Argiens qui „ l'outragerent, en l'appellant faulſeur de ſa foy & pariure : Il eſt, dit-il, bien en vous de „ meſdire de moy, mais il eſt en moy de vous meſfaire. Et aux ambaffadeurs de Samos, qui eſtoient venu deuers luy pour luy perſuader d'entreprendre la guerre contre le tyran Polycrates, & pour ce faire vſoient de longues perſuaſions, il reſpon- „ dit, Quant à ce que vous auez dit au commencement, il ne m'en ſouuient plus, & pour „ ceſte cauſe ie n'ay point entendu le milieu : & quant à ce que vous auez dit à la fin, „ ie ne le trouue pas bon. Il y eut de ſon temps vn courſaire qui courut & pillà toute la coſte de la Laconie : il fut pris à la fin : & comme on luy demanda, pourquoi il fai- „ ſoit ces courſes là, Ie n'auois, dit-il, dequoy nourrir mes gens, & pour ce ie ſuis venu „ à ceux qui en auoient, pour en prendre par force, d'autant que ie ſçauois bien qu'ils „ ne m'en euſſent pas donné de gré, Meſchanceté, dit-il, abbrege bien chemin. Il y

C auoit vn homme de neant, qui ne faiſoit iamais que meſdire de luy : Vas-tu, dit-il, ainſi „ meſdiſant de tout le monde, à fin qu'eſtans empeschez à reſpondre à tes iniures & „ meſdiſances, nous n'aions pas temps ne loilir de parler de ta malice ? Et comme l'un „ de ſes citoyens luy diſt, Il faut qu'un Roy en tout & par tout ſoit bening : Non pas, „ dit-il, iuſques à ſe faire meſpriſer. Eſtant trauaillé d'une longue maladie, & ne ſça- „ chant que y faire, il ſe mit à la fin entre les mains des deuins, charmeurs & ſacrifi- „ cateurs, auſquels il ne ſouloit point adiouſter de foy au parauant : dequoy quelque vn „ de ſes familiers ſeſmerueillant, il luy dit, Dequoy t'eſmerueilles-tu, car ie ne ſuis „ plus celuy que ie ſoulois eſtre, & n'eſtant pas le meſme, auſſi ne trouue-je pas main- „ tenant les choſes bonnes que ie trouuois alors. Il y auoit vn Rhetoricien maĩſtre d'e- „ loquence qui ſe mit à diſcourir en ſa preſence de la prouèſſe & vaillance, dequoy il ſe prit bien fort à rire : l'autre luy demanda, Dea Cleomenes pourquoi te ris-tu quād

D tu oys parler de la vaillance, toy meſmement qui es Roy ? Pour ce, dit-il, eſtranger „ mon amy, que ſi vne arondelle en parloit comme toy, ie ferois le meſme que ie fais : „ mais ſi c'eſtoit vn Aigle, ie me tairois tout coy. Les Argiens ſe vantoient qu'en recombattant de rechef, ils recouureroyent la perte qu'ils auoient ſoufferte à la pre- „ miere deſfaicte : Ie m'eſbaïrois bien, dit-il, ſi pour addition d'une ſyllabe vous deue- „ niez plus gens de bien maintenant, que vous n'eſtiez par cy-deuant. Quelqu'un luy „ diſoit outrage, l'appellant deſpenſier & voluptueux : Encore vault-il mieux, dit-il, eſtre „ cela, que iniuſte comme toy, qui bruſles d'auarice, & acquiers des biens, encore que „ tu ayes aſſez dequoy. Quelqu'un luy vouloit recomander vn Muſicien, & de faiſt le loüoit de pluſieurs choſes, & entre autres diſoit, que c'eſtoit le meilleur chantre qui fuſt en toute la Grece : Cleomenes luy monſtra du doigt vn qui eſtoit aupres de luy, „ & dit : Par les Dieux voyla vn mien cuiſinier, qui eſt des meilleurs potagers du mode.

Les dièts notables des Lacedemoniens.

Meander le tyran de Samos, pour la descente des Perſes ſenfuyt en la ville de Sparte, E
là où il monſtra à Cleomenes tout l'or & l'argent qu'il auoit apporté quand & luy,
& ſi le pria d'en prendre tant qu'il luy plairoit. Il n'en voulut rien prendre, mais
craignant qu'il n'en donnaſt à d'autres de la ville, il ſ'en alla deuers les Ephores, &
leur dit, Il vaudra mieux pour le bien de Sparte que lon face ſortir du Peloponeſe
mon hoſte Samien, de peur qu'il n'induiſe quelqu'un des Spartiates à eſtre meſchant.
Les Ephores aians ouy ſon aduertiffement, le bannirent dès le meſme iour. Quel-
qu'un luy demanda vn iour, pour quelle cauſe aiant tant de fois vaincu les Argiens,
ils ne les auoient de tout poinct exterminéz. Encore ne le ferions-nous, dit-il, iamais:
car nous voulons que nos ieunes gens aient touſiours à quoy ſ'exerciter. Et comme
quelque autre luy demandaſt, pourquoy les Spartiates ne conſacroient iamais aux
Dieux les armes dont ils auoient deſpouillé leurs ennemis: Pour ce, dit-il, que ce ſont
deſpouilles de couards: & les armes que lon a oſtees à ceux qui les poſſedoiēt par leur
laſcheté, il n'eſt hōneſte ny de les monſtrer aux ieunes, ny de les conſacrer aux Dieux. F
Cleomenes fils de Cleombrotus reſpondit à vn qui luy donnoit des cocqs fort aſpres
au combat, & luy diſoit que d'aſpreté ils mouroient ſur la place, en combattant pour
la victoire: Donne m'en doncques de ceux-là qui les tuent, car ils doiuent eſtre meil-
leurs que ceux-cy. Labotus à vn qui luy faiſoit de longs diſcours, dit, A quel pro-
pos me vas-tu vſant de ſi longs prologues pour peu de choſe? car quelle eſt la cho-
ſe, telle doit eſtre la parole. Leotychidas le premier reſpondit à vn qui luy repro-
choit, qu'il eſtoit variable & muable: Si ie change, dit-il, c'eſt pour la diuerſité des
temps, non pas comme vous qui changez pour voſtre propre malice & meſchance-
té. Il reſpondit auſſi à vn autre qui luy demandoit, comment on pourroit mieux
conſeruer les biens que lon a preſens, En ne commettant pas tout à vn coup à la for-
tune. On luy demanda quelquefois, que c'eſtoit que les ieunes enfans de noble mai-
ſon deuoient apprendre, Ce qui leur doit profiter, dit-il, quand ils ſeront grands.
Et à vn autre qui l'enqueroit, pour quelle raiſon les Spartiates beuuoient ſi peu: A fin, G
dit il, que les autres ne deliberent de nous, mais nous des autres. Leotychidas fils
d'Ariſton reſpondit à vn qui luy rapportoit, que les enfans de Demaratus diſoient
mal de luy: Par les Dieux, dit-il, ie ne m'en eſbahis pas, car il n'y a piece d'eux qui
ſçeuſt bien dire. Il ſe trouua d'aduenture à l'entour de la clef de la prochaine porte
vn ſerpent entortillé: les deuins diſoient, que cela eſtoit vn grand monſtre & grand
prodige: Cela ne me ſemble pas monſtre ny eſtrange, dit-il, qu'un ſerpent ſoit en-
tortillé à l'entour d'une clef, mais bien ſeroit-ce vn monſtre, ſi une clef eſtoit entor-
tillée à l'entour d'un ſerpēt. Il y auoit vn ſacrificateur nommé Philippus, qui receuoit
les hommes és ceremonies de la religion d'Orpheus, & eſtoit ſi extremement pauvre,
qu'il mendoit ſa vie, & neantmoins alloit diſant, que ceux qui eſtoient receus de ſa
main en ces ceremonies, eſtoient bien-heureux apres leur mort: Et fol que tu es, dit-
il, que ne te laiffes tu doncques viſtement mourir, à fin que tu ceſſes de lamenter ta H
miſere & ta pauvreté? Leon fils d'Eucratidas eſtant enquis, en quelle ville on pour-
roit habiter ſeulement: En celle-là, dit-il, dont les habitans ne ſeroient ne plus riches
ny plus pauvres les vns que les autres: & là où la iuſtice ait vigueur, l'iniuſtice n'ait
point de force. Voyant les coureurs qui ſe preparoient pour courir, à qui gaigne-
roit le pris de la courſe en la feſte des ieux Olympiques, & qui eſpioient tous les
moyens commēt ils pourroient, en quelque ſorte que ce fuſt, gaigner quelque auan-
tage ſur leurs compagnons quand on les laſcheroit. O combien, dit-il, ces coureurs
eſtudient plus à la viſteſſe, qu'ils ne font à la iuſtice? A vn autre qui hors de temps
& de lieu deuſoit de choſes non inutiles: Eſtranger mon amy, dit-il, tu diſ ce qu'il
fault, ailleurs qu'il ne fault. Leonidas fils d'Anaxandrides & frere de Cleomenes
reſpondit à vn qui luy diſoit, Il n'y a difference de toy à nous, ſinon d'autant que tu
es Roy

A es Roy : Voire-mais si ie n'eusse eu quelque chose de plus que toy , ie n'eusse pas esté Roy. Et comme sa femme nommee Gorgo luy demandaſt , ainſi qu'il partoit pour ſen aller combattre au pas de Thermopyles contre les Perſes , ſil luy vouloit point
 » commander autre choſe: Non, dit-il, ſinon que tu te remarques à vn homme de bien, &
 » luy portes de bons enfans. Et comme les Ephores luy diſſent , qu'il menoit bien peu
 » de gens avec luy à ce pas de Thermopyles : Mais beaucoup, dit-il, pour cela que nous
 » y allons faire. Et comme de rechef ils luy demandaffent , ſil auoit point en pen-
 » ſement de faire quelque autre entrepriſe : En apparence, dit-il, c'eſt pour empêcher
 » le paſſage des Barbares , mais en eſſect pour mourir pour le ſalut des Grecs. Quand
 » il fut arriué au deſtroict des Thermopyles, il dit à ſes ſoudards : On dit que le Bar-
 » bare eſt pres de nous , il ne nous faut plus perdre temps : car c'eſt à ceſte heure qu'il
 » faut, ou que nous deſfaisons les Barbares, ou que nous y mourions tous. Et com-
 » me quelqu'un euſt dit, Pour la multitude grande des fleſches de ces Barbares, nous
 B ne pourrons pas veoir le Soleil : Tant mieux, dit-il, nous en combatrons doncques
 » à l'ombre. Et à vn autre qui diſoit, Les voi-cy pres de nous : Et nous doncques, dit-il,
 » pres d'eux. Et comme vn autre luy diſt, Tu viens en bien petite troupe, Leonidas,
 » pour te hazarder contre vne ſi grande multitude : Si vous le prenez au nombre,
 » dit-il, toute la Grece enſemble n'y fourniroit pas, car elle ne feroit qu'une partie de
 » leur multitude : mais ſi vous le prenez à la valeur des hommes, ce nombre-cy eſt
 » ſuffiſant. Et à vn autre qui luy en diſoit autant, Mais i'en amène beaucoup, dit-il,
 » attendu que c'eſt pour y mourir. Xerxes luy eſcriuit : Tu peux, en ne t'opiniaſtrant
 point à vouloir combattre contre les Dieux, & te regeant de mon coſté, te faire
 » monarque de toute la Grece. Il luy fait reſponſe : Si tu congnoiſſois en quoy con-
 » ſiſte le bien de la vie humaine, tu ne conuoiterois pas ce qui eſt à autrui : mais quant
 » à moy, j'ayme plus cher mourir pour le ſalut de la Grece, que de commander à tous
 » ceux de ma nation. Vne autre fois Xerxes luy manda : Enuoye moy tes armes. Il
 C luy reſcriuit, Vien les querir. Sur le poinct qu'il vouloit aller charger les enne-
 mis, les Mareſchaux du camp luy vindrent proteſter, qu'il falloir attendre que les
 » autres alliez & confederez fuſſent arriuez : Ne penſez-vous pas, dit-il, que tous ceux
 » qui ont enuie de combattre ſoient venus : & qu'il n'y a que ceux qui reuerent & crai-
 » gnent leurs Roys qui combattent contre les ennemis ? cela dit, il denonça à ſes gens
 qu'ils diſnaſſent, & qu'ils ſouperoiſent en l'autre monde. Eſtant enquis, pourquoy
 » les gens de bien preferoient vne mort honorable à vne vie honteuſe : Pource, dit-il,
 » qu'ils eſtiment le mourir commun à la nature, mais le bien mourir propre à eux.
 Il auoit enuie de ſauuer les ieunes hommes de ſa troupe qui n'eſtoient pas mariez :
 & ſçachant bien que ſil y alloit ouuertement, ils n'en voudroient rien faire, il leur
 donna à chaſcun d'eux des breuets à porter aux Ephores : & en voulut auſſi ſauuer
 trois de ceux qui eſtoient mariez : mais eux ſen eſtans apperceus ne voulurent pas
 D recevoir ces breuets : car l'un dit, Je t'ay icy ſuiuy pour combattre, non pas pour
 » porter nouuelles. Le ſecond dit, Demourant icy, ie ſeray plus homme de bien.
 » Le troiſième reſpondit, Je ne ſeray pas le dernier, ains le premier de ceux-cy au com-
 » bat. Lochagus pere de Polyenides & de Siron, quand on luy vint dire, que l'un de
 » ſes enfans eſtoit mort : Il y a long temps, reſpondit-il, que ie ſçauois bien qu'il de-
 » uoit mourir.

Lycurgus le Legiſlateur voulant reduire ſes citoyens de leur ancienne maniere de
 viure en vne qui fuſt plus honneſte, & les rendre plus vertueux : car auparauant ils
 eſtoient diſſolus & par trop delicats en leurs mœurs : il nourrit deux chiens nez de
 meſme pere & de meſme mere, & en accouſtuma l'un à toutes friandiſes le tenant
 en la maiſon, & l'autre le menant aux champs l'exercita à la chaſſe : puis les amena
 tous deux en pleine aſſemblée de ville, où eſtoit tout le peuple, & meit deuant eux

Les dictz notables des Lacedemoniens.

des friandises, & fait aussi lâcher vn lièvre. L'un & l'autre se rua incontinent sur ce à E
quoy il auoit esté nourry : car l'un alla à la soupe, & l'autre prit le lièvre : & lors il
leur dit, Vous voyez citoyens mes amis, comme ces deux chiens estants nez de mesmes
pere & mere sont deuenus fort differents l'un de l'autre pour leur diuerse education :
& combien peut plus, à rendre les hommes vertueux, la nourriture, que non pas
la nature. Les autres disent plus, que les deux chiens n'estoient pas nez de mesme
pere & mesme mere, ains que l'un estoit né de ceux dont on se sert à garder la mai-
son, & l'autre de ceux dont on vse à la chasse : & qu'il exercita celuy qui estoit de
la pire race, à chasser : & celuy qui estoit de la meilleure, à gourmander seulement : &
puis que l'un & l'autre estant couru à ce à quoy il auoit esté accoustumé de ieunesse,
apres leur auoir faict voir à l'œil, de combien sert la nourriture à prendre de bon-
nes ou de mauuaises cōditions, il leur dit adonc : Par là cognoissez-vous, mes amis, que
rien ne sert la Noblesse, qui est tant estimee du vulgaire, ny l'estre descendu de la race
d'Hercules, si nous ne faisons les œuvres par lesquelles il fest en son viuant rendu F
le plus illustre & le plus glorieux homme du monde, apprenans & exerçans toute
nostre vie choses honnestes & vertueuses. Et aiant faict le departement de tout le
territoire, & en aiant dōné à chascun citoyen egale portion, lon dit que quelque tēps
apres retournant d'un voyage, & voyant les bleds de nagueres moissonnez, & les
moulons & tas des gerbes situez de reng tous egaux & semblables les vns aux autres,
il en fut fort ioyeux en son cœur, & dit en riant à ceux qui estoient autour de luy, Que
tout le pays de la Laconie luy sembloit vn heritage de plusieurs freres, qui de nagueres
eussent faict leurs partages ensemble. Aiant aussi introduit abolition de toutes deb-
tes, il fut en volonté de faire encore le repartement de tous les vtensiles & meubles qui
estoyent es maisons pour les distribuer egalemēt, à celle fin qu'il ostant toute impa-
rité & toute inegalité d'entre ses citoyens : mais voyant que mal-aisement ils suppor-
teroient qu'on les leur ostant ouuertement, il descria premierement toute sorte de
monnoye d'or & d'argent, commandant qu'on n'vlast que de celle de fer, & taxa ius- G
ques à quelle somme on pouuoit auoir tout son vaillant à l'estimation de ceste mon-
noye-là. Cela faict, il chassa tout crime & toute iniustice hors de Lacedemone : car
on ne pouuoit plus ny desrober, ny rauer par force, ny prendre par corruptions, ny
defrauder en contractant vne chose que lon ne pouuoit cacher, qui n'estoit point
desirable à posseder, dont on ne pouuoit vser sans peril, ny amener ens ou emme-
ner hors à seureté : & quant & quant, par ce mesme moyen il bannit de Lacedemo-
ne toute superfluité, pource qu'il n'y auoit plus ny marchand, ny plaideur, ny deuin
ou diseur de bonne aduerture, ny questeur, ny ingenieur & deuiseur de nouueaux
bastiments qui hantaist à Sparte, à cause qu'il n'y laissa sorte quelconque de mon-
noye qui peust seruir ailleurs, & y donna cours seulement à celle de fer, qui quant
au pois pesoit vne liure Æginetique, & de pris ne valoit qu'environ six deniers.
Et delibérant de courir sus encore plus aux delices & du tout retrencher la con- H
uoitise des richesses, il introduisit ce qu'ils appelloient les conuiues : & à quelques
vns qui luy demandoient, pour quelle cause il les auoit instituez, & pourquoy il
auoit ainsi diuisé ses citoyens en petites tablees avec leurs armes : A fin, dit-il, qu'ils
soient plus prompts à receuoir les commandemens de leurs superieurs, & que si d'ad-
uerture il se mēne quelque pratique de nouuelleté parmy eux, la faute en soit en-
tre petit nombre : & outre ce, à fin qu'il y ait egalité entre-eux en leur manger & en
leur boire : & que ny en leur viande, ny en leur boisson, ny mesme en leur coucher ou
vestir, ny en leurs vtensiles domestiques, ny en autre chose quelle qu'elle fust, le ri-
che n'eust aucun auantage sur le pauvre. Et par ce moyen aiant rendu la richesse
non desirable, attendu qu'il n'y auoit ordre de s'en pouuoir valoir, ny seulement la
monstrer, il disoit à ses familiers, O mes amis, la belle chose que c'est de faire cognoi-
stre

- A estre par effect, que Pluton, c'est à dire la richesse, est à la verité aueugle, comme il est! Car il faisoit mesme prendre garde, qu'ils ne peussent premierement disner en leurs maisons, & puis s'en aller tous saouls és salles de leurs conuiues, remplis d'autres viandes & d'autres bruuges: car les autres disoient iniure à celui qui ne beuuoit & ne mägeoit pas de bon appetit avec eux, comme estant homme gourmand ou friand, & qui par delicateſſe dedaignoit la commune maniere de viure: mais si d'aduenture il se trouuoit que quelqu'un l'eust fait, il en estoit tresbien condamné à l'amende. De là vint que long temps apres le Roy Agis à son retour du voyage de la guerre, auquel il auoit subiugué les Atheniens, voulant souper en son priué avec sa femme, enuoya à la cuisine de son conuiue demander sa portion: les Mareschaux du camp, superintendans de la guerre, ne la luy voulurent pas enuoyer: & le lendemain la chose estant venue à la congnoissance des Ephores, il en fut par eux condamné à l'amende. Parquoy les riches de la ville indignez de ces nouuelles ordonnances,
- B se leuerent à l'encontre de luy, & luy disans outrages luy ietterent des pierres le voulans assommer: mais se voyant ainsi furieusement poursuuy, il se sauua de vistesſe à trauers la place, & se ietta en franchise dedans le temple de Minerue Chalcecos, auant que les autres le peussent atteindre, excepté Alcander, lequel ainsi qu'il se cuida retourner pour veoir qui le poursuioit, d'un coup de baston luy ietta l'œil hors de la teste. Mais celui-là depuis, par commune sentence de toute la ville, luy fut mis entre ses mains pour en faire punition exemplaire, telle comme bon luy sembleroit: toutefois il ne luy fait mal ne desplaisir quelconque: & qui plus est, ne se plaint iamais à luy du tort qu'il luy auoit fait: ains l'ayant domestiquement viuant avec luy, le rendit tel, qu'il ne faisoit autre chose que prescher par tout ses louanges, & la façon de viure qu'il auoit apprise avec luy, se monstrant grand zelateur de la discipline qu'il auoit mise sus: mais au reste pour memoire de l'accident qui luy estoit adueni, il fait bastir dedans le temple de Minerue vne chappelle, qu'il nomma de
- C Minerue Optiletide, pource que les Dorien de celle marche appellent les yeux Optiles. On luy demanda quelquefois, pourquoy il n'auoit point estably de loix escrites: Pource, dit-il, que ceux qui sont bien nourris & instituez en telle discipline qu'il appartient, ſcauent bien iuger ce que le temps requiert. Et à ceux qui l'interroguoient pourquoy il auoit ordonné, que lon feist les couuertes des maisons avec la coignee, & les portes avec la ſcie seulement, sans y employer autre outil ny instrument quelconque: il respondit, A fin que nos citoyens soient moderez & non superflus en toutes choses que lon apporte en la maison, & qu'ils n'ayent rien chez eux de ce qui est tant estimé & tant requis ailleurs. De ceste accoustumance proceda, comme lon dit, que le Roy Leotychides premier de ce nom, soupant en la maison d'un sien hoste, & considerant le planché de la salle, qui estoit sumptueusement enrichi, & lambrissé magnifiquement, demanda à son hoste, si les arbres en leur pais
- D naissoient quarez. Estant aussi enquis pourquoy il auoit defendu que lon ne feist souuent la guerre contre de mesmes ennemis: De peur, dit-il, qu'estans souuent contraincts par ce moyen de se mettre en defense, ils n'en deuient à la fin bien experimenter à la guerre. Et pourtant depuis blasma lon grandement Agesilaus d'auoir esté cause, par ses continuelles expeditions & inuasions en la Boëce, de rendre les Thebains égaux en armes aux Lacedemoniens. Quelque autre luy demanda aussi, pourquoy il faisoit exercer les corps des filles à marier, à courir, à lucter & ietter la
- » barre, & à lancer le dard: A fin, dit-il, que l'enracinement des enfans qui viendroient
- » à estre engendrez d'elles, venant à prendre son pied en des corps robustes & dispos,
- » en germaſt mieux, & qu'elles en estans plus fortes & plus robustes en supportassent
- » mieux leurs enfantemens, & en resistassent plus vigoureusement & plus facilement
- » aux douleurs de leurs trauaux: & oultre, que si beſoing estoit, elles peussent aussi com-

Les dictz notables des Lacedemoniens.

» battre pour la defense d'elles , de leurs enfans , & de leur pais. Quelques vns repre- E
noient la coustume qu'il auoit introduicte , que les filles à certains iours de festes
» allassent ballans par la ville toutes nues, & luy en demandoient la cause: A fin, respon-
» dit-il, que faisans les mesmes exercices que font les hommes , elles n'eussent rien
» moins qu'eux , ny quant à la force & santé du corps, ny quant à la vertu & generosité
» de l'ame, & qu'elles s'accoustumassent à mespriser l'opinion du vulgaire. D'où vient
que la femme de Leonidas nommee Gorgo, ainsi que lon trouue par escrit, respon-
» dit à quelques Dames estrangeres qui luy disoient: Il n'y a que vous autres femmes
» Laconienes qui commandiez à vos maris : Aussi n'y a-il que nous qui portions des
» hommes. Il priua aussi & bannit ceux qui n'estoient point mariez, de la veuë des
danfes où les ieunes filles dansoient à nud, & qui plus est leur imposa encore note d'in-
famie, en les priuant notamment de l'honneur & du seruice que les ieunes estoient
tenus de porter & de faire aux vieux. En quoy faisant, il eut grande preuoyance à in-
citer ses citoyens à se marier pour engendrer des enfans: à l'occasion de quoy il n'y F
eut oncques personne qui trouuaist mauuais, ne qui blasmaist ce qui fut dit à Dercyl-
lidas, combien qu'il fust au demourant bon & vaillant Capitaine : car luy entrant en
quelque lieu, il y eut vn des ieunes hommes qui ne se daigna leuer de son siege par
» honneur au deuant de luy : Pource, luy dit-il, que tu n'as point engendré qui se leuaist
» au deuât de moy. Vn autre l'enqueroit pourquoy il auoit institué que les filles fussent
» mariees sans doire : A fin, dit-il, que ny à faute de doire, il n'y en eust qui demoura-
» sent à marier, ne qui pour les biens fussent requises, ains qu'en regardant aux mœurs
» & conditions de la fille, chacun feist eslection de la vertu en celle qu'il voudroit es-
» pouser : & c'est aussi la cause, pour laquelle il chassa toute sorte de fard & d'embellif-
sement artificiel hors la ville de Sparte. Aiant aussi prefix vn certain temps, de-
dans lequel tant les filles que les ieunes hommes se pourroient marier, quelqu'un luy
» demanda pourquoy il leur auoit ainsi presiny le temps: il respondit, A fin que ce qu'ils
» engendreront, soit fort & puissant, comme estant engendré de personnes entieres & G
» toutes faictes. Et à ceux qui se baïssoient, pourquoy il n'auoit pas voulu que le
nouueau marié couchast avec son espousee, ains auoit expressement ordonné qu'il
fust la plus part du iour avec ses compagnons, & les nuicts toutes entieres, & qu'il
allast veoir sa femme à la desrobee, aiant crainte & honte d'estre surpris avec elle:
» C'est à fin, dit-il, qu'ils en soient tousiours plus forts & dispos de leurs corps, & qu'en
» ne iouyssant pas du plaisir d'aymer à cœur saoul, leur amour en demeure tousiours
» frais & que leurs enfans en viennent plus robustes. Il bannit aussi toutes huiles de sen-
teurs precieuses, disant que ce n'estoit que toute corruption & peste du naturel
de l'huile: & l'art de la tainture, comme estant toute flaterie des sens. Brief il rendit
la ville de Sparte inaccessible à tous ouuriers de ioyaux, d'affiquets, & de tous or-
naments dont on vse pour parer le corps, disant que la corruptele de tels arts auoit
esté cause de gaster & abastardir les bons mestiers : & estoit en ce temps-là l'hon- H
nesteté & la pudicité des Dames si grande, & si esloignee de la facilité que lon dict
auoir esté depuis parmy elles, que lon tenoit l'adultere pour vne chose impossi-
ble & incroyable. Auquel propos on recite d'un fort ancien Spartiate nommé Ge-
radatas, à qui vn estranger demanda, quelle punition on faisoit souffrir aux adulte-
res en la ville de Sparte, pour-ce qu'il voyoit que Lycurgus n'en auoit faict aucune
» ordonnance: & qu'il luy respondit, Il n'y a point d'adulteres parmy nous: l'autre luy
» repliqua, Voire-mais, fil y en auoit: il respondit tousiours de mesme. Car comment,
» dit-il, y auroit-il des adulteres à Sparte, veu que toutes richesses, toutes delices, tous
» fards, & tous embellissemens exterieurs y sont desprizez & deshonzorez? & veu
» que honte de mal faire, honnesteté, & reuerence, & obeïssance enuers ses superieurs,
» y ont toute autorité? Quelqu'un sauua vn iour de luy dire, qu'il establiss
le gouuer-

A le gouuernement de l'Estat populaire à Sparte : il luy respondit, Cōmance toy mes-
 „ me le premier à le mettre en ta maison. A vn autre qui luy demandoit, pourquoy
 „ il auoit ordonné des sacrifices si simples & de si peu de valeur en Lacedemone : A
 „ fin que nous ne cessions iamais de reuerer & honorer les Dieux. Et aiant permis à ses
 „ citoyens de iouër & exercer seulement les exercices du corps, esquels on ne tend
 „ point la main, on luy en demanda la raison : A fin, dit-il, que nul des nostres ne fac-
 „ coustume à se laisser ny à se rendre iamais. Enquis aussi, pourquoy il auoit institué
 „ que lon changeast souuent de camp, & que lon ne campast point long temps en vn
 „ mesme lieu : A fin, dit-il, que lon face plus de dommage aux ennemis. Et à vn autre
 „ qui demandoit, pourquoy il auoit defendu d'assaillir des murailles : De peur, respon-
 „ dit-il, que vn homme de bien ne fust tué par vne femme, ou par vn enfant, ou person-
 „ ne semblable. Quelques Thebains luy demandoient son aduis, touchant le sacrifice &
 „ le dueil qu'ils font à l'honneur de Leucothoé : il leur respondit, Si vous pensez que ce
 B soit vne Deesse, ne la plorez point comme vne femme : & si vous pensez que ce
 „ soit vne femme, ne luy sacrifiez point comme à vne Deesse. A ses citoyens qui luy de-
 „ mandoient, comment ils pourroient repoulsier les inuasions de leurs ennemis, Si vous
 „ demourez pauures, & que l'un ne conuoite point d'auoir plus que l'autre. Et de re-
 „ chef comme ils luy demandassent, pourquoy il ne vouloit point que leur ville fust
 „ murée : il leur respondit, que la ville n'estoit pas sans muraille, qui estoit enuironnée
 „ de vaillans hommes, & non pas de brique. Les Spartiates aussi estoient curieux de bien
 „ accoustre leurs cheueux, rememorans vn certain propos de Lycurgus touchant cela,
 „ qui souloit dire, que les cheueux rendoient ceux qui sont beaux, encore plus beaux,
 „ & ceux qui sont laids, hideux & espouuentables. Il leur commanda aussi qu'en leurs
 „ guerres, quand ils auroient vaincu & rompu leurs ennemis, qu'ils les chassassent ius-
 „ ques à asseurer leur victoire toute certaine, & puis qu'ils se retirassent tout court di-
 „ sant que cela n'estoit acte ny de gentil cœur, ny de nation genereuse comme la
 C Grecque, de tuer ceux qui leur quittoient la place : & cela encore leur estoit vtile,
 „ pource que ceux qui sçauoient leur coustume, qui estoit de mettre à mort ceux qui
 „ s'opiniastroient à leur faire teste, & laissoient aller ceux qui fuyoient deuant eux,
 „ trouuoient le fuir plus vtile que l'attendre. Quelqu'un luy demandoit, pour quelle
 „ cause il leur auoit defendu de despouiller les corps de leurs ennemis morts : De peur,
 „ dit-il, que samusans la teste basse à recueillir ces despouilles, ils ne se souciaient point
 „ de combattre ce-pendant : ains qu'ils entendissent seulement à garder leur pauuereté
 „ & leur reng. Le tyran de Sicile Dionysius auoit enuoyé deux robes de femme
 „ à Lyfander, à fin qu'il en choisist laquelle il aimeroit mieux pour porter à sa fille :
 „ il dit, qu'elle mesme sçauroit mieux choisir celle qui luy seroit plus à propos, & les
 „ emporta toutes deux. Cestuy Lyfander fut homme fort ruzé & grand trompeur, qui
 „ conduisoit la plus part de ses affaires par finesse & par ruzes, estimant qu'il n'y eust
 D point d'autre iustice que l'utilité, ny autre honnesteté que le profit : confessant bien
 „ que la verité estoit meilleure que la faulseté, mais que la dignité & le pris de l'une &
 „ de l'autre se deuoit mesurer & terminer à la commodité. Et à ceux qui le repre-
 „ noient & blasmoient de ce qu'il conduisoit ainsi la plus part de ses entreprises par
 „ tromperies & par fallace, & non pas par viue force, qui estoit chose indigne de la
 „ magnanimité d'Hercules, il respondoit en riant, que là où il ne pouuoit aduenir
 „ avec la peau de lion, il y falloit coudre vn peu de celle du regnard. Et comme
 „ d'autres l'accusassent grandement de ce qu'il auoit faulcé & violé ses serments qu'il
 „ auoit faicts en la ville de Milet : Il faut, dit-il, tromper les enfans avec des osselets, &
 „ les hommes avec des iurements. Aiant desfaié les Atheniens par surprise en bat-
 „ taille nauale, à l'endroit qui se nommoit le fleuve de la chéure, & depuis les aiant
 „ presseés de famine si estroittement qu'ils les contraignit de rendre leur ville à sa mer-

Les dictz notables des Lacedemoniens.

cy, il escriuit aux Ephores, Athenes est prise. Les Lacedemoniens eurent de son E
temps quelque different avec les Argiens touchant leurs confins, & sembloit que ceux
d'Argos alleguassent de meilleures raisons pour eux : Il desgaina son espee & leur
dit, Ceux qui seront les plus forts avec ceste-cy, seront ceux qui plaideront le mieux
pour leurs confins. Et voyant que les Boeotiens balançoient, n'estans pas bien re-
solus ne certains de quel costé ils se deuoient rengier, en passant à trauers leurs pais,
il leur enuoya demander lequel ils aimoient mieux, qu'il passast parmy leurs terres
à picques dressees, ou à piques baissées. En vne assemblee des estats de la Grece,
il y eut vn Megarien qui parla brauement & audacieusement à luy : il luy dit, Tes
propos mon amy, auroient besoing d'une cité. voulant dire, qu'il estoit d'une trop
petit & foible ville pour parler si hardiment. Les Corinthiens festoient rebellez con-
tre eux, & luy auoit amené son armee tout contre les murailles, que les Lacedemoniés
assailloient assez froidement : mais à l'instant il se leua vn lièvre de dedans, qui tra-
uersa le fossé, & adonc il leur dit, N'avez vous point de honte Spartiates de doubter F
tels ennemis, qui sont si paresseux que les lièvres dorment dedans l'enceinte de leurs
murailles? Estant allé à l'oracle de Samothrace pour en auoir responce, le presbtre
luy dit, qu'il luy confessast ce qu'il auoit faict de plus meschant cas en toute sa vie:
Il luy demanda, si c'estoit luy ou les Dieux qui luy commandassent de ce faire : le
presbtre luy respondit, que c'estoient les Dieux qui luy commandoient : Retire toy
doncques vn peu arriere, & ie le diray aux Dieux, fils le me demandent. Vn Per-
sien luy demandoit, quelle sorte de gouuernement il prisoit le plus : Celle, dit-il, qui
ordonne aux lasches & aux vaillans tel loyer comme il leur appartient. Vn autre
luy disoit, que par tout il le loüoit, & le defendoit en toutes compagnies : J'ay dit il,
deux bœufs en ma mestairie qui ne parlent point ny l'un ny l'autre : mais ie ne laisse
pas de sçauoir pourtant lequel besongne bien, & lequel ne faict rien qui vaille. A vn
autre qui luy disoit plusieurs paroles iniurieuses, Vomy hardiment, estranger mon
amy, vomy hardiment & souuent, ne t'y espargne pas, pour veoir si tu pourrois G
vuider ton ame des maux & meschancetez dont elle est pleine. Depuis estant venu à
mourir, il sourdit quelque different entre les alliez de Lacedemone touchant quel-
ques affaires : & pour en sçauoir la verité, Agesilaus alla en la maison de Lyfander vi-
siter les papiers qui en faisoient mention, là où entre autres il trouua vne harangue,
par laquelle il suadoit à ceux de Sparte, d'oster la Royauté aux familles des Eury-
protides & des Agides, & la remettre librement à l'eslection des citoyens, pour eslire
de toute la ville ceux qui se seroient trouuez les plus gens de bien, à fin que lon ne fust
plus obligé d'eslire quelqu'un de la race d'Hercules, ains que ce fust vn loyer que lon
peust deferer à celuy qui en vertu ressembleroit plus à Hercules, attendu mesme-
ment que c'estoit par le moyen d'icelle, que lon luy auoit attribué honneurs tels
qu'aux Dieux. Agesilaus fut entre-deux de publier ceste oraison là, pour faire cognoi-
stre à ceux de Sparte que Lyfander auoit esté autre que lon ne l'estimoit : & quant & H
quant aussi pour mettre en souspeçon ceux qui estoient demourez de ses amis : mais
lon dit que Cratidas, qui estoit lors le premier des Ephores, craignant que si ceste
harangue venoit à estre leuë & publiee, elle ne persuadast ce qu'elle pretendoit, re-
teint Agesilaus, & le garda de ce faire, luy disant qu'il ne falloit point deterrer Ly-
fander, mais plus tost enterrer quand & luy son oraison, tant elle estoit ingenieuse-
ment & artificiellement composee pour persuader. Il y auoit des gentils-hommes
de la ville qui durant sa vie auoient poursuiuy ses filles en mariage, & puis apres sa
mort, quand on trouua qu'il estoit demouré pauvre, s'en estoient desdits : les Epho-
res les condamnerent en grosses amendes, pour ce qu'ils luy auoient faict la court
pendant qu'ils l'auoient estimé riche, & puis quand ils l'auoient trouué iuste & hom-
me de bien par sa pauvreté, ils n'en auoient plus tenu compte. Namertes estant en-
uoyé

A uoyé ambaffadeur quelque part, il y eut vn de ceux où il eſtoit enuoyé qui luy dit, qu'il le tenoit & reputoit pour homme bien-heureux, d'autant qu'il auoit beaucoup
 „ d'amis : il luy demanda, ſ'il ſçauoit bien la preuue, à laquelle on congnoiſſoit ſi l'on a-
 „ uoit beaucoup d'amis ? l'autre luy dit que non, mais qu'il le prioit de la luy enſeigner :
 „ C'eſt, dit-il, aduerſité. Nicander reſpondit à quelqu'un qui luy rapportoit que les
 „ Argiens meſdiſoient de luy : Auſſi en ſont-ils chaſtiez & punis de meſdire des gens de
 „ bien. Et à celuy qui l'interroguoit, pourquoy les Lacedemoniens portoient longs
 „ cheueux, & laiſſoient croiſtre leurs barbes : Pource, dit-il, que c'eſt le plus beau pa-
 „ rement que ſçauroit porter l'homme, & qui couſte moins, & ſi luy eſt propre. Vn
 „ Athenien luy dit quelquefois en deuſant enſemble, Vous autres Lacedemoniens,
 „ Nicander, aimez trop l'oyſiueré : Tu diſ la verité, reſpondit-il, mais nous ne trauail-
 „ lons pas à choſe de neant comme vous. Panthoïdas eſtant enuoyé ambaffadeur en
 Aſie, ceux du pays luy monſtroient par ſingularité vne ville fermee de fortes & hau-
 B tes murailles : Par les Dieux, dit-il, mes amis, c'eſt vn beau ferrail à tenir des femmes.
 En l'eſchole de l'Academie, des philoſophes deuſoient & diſcouroient de pluſieurs
 beaux & bons propos, & apres auoir acheué luy demanderent, Et bien Seigneur
 „ Panthoïdas, que vous ſemble-il de ces diſcours-là ? Que m'en ſçauoit-il ſembler, dit-
 „ il, autre choſe, ſinon qu'ils ſont beaux & bons, mais au demourant inutiles, pour ce
 „ que vous n'en faites rien. Pauſanias le fils de Cleombrotus reſpondit aux habitans de
 l'Iſle de Delos, qui querelloient & plaidoient de la propriété de l'Iſle, à l'encontre des
 Atheniens, alleguans, que par vne ancienne loy, de tout temps obſeruee en leur
 „ pays, ny les femmes n'enfantent dedans l'Iſle, ny les morts n'y ſont enſeuclis : Com-
 „ ment doncques eſt-elle voſtre païs, ſi piece de vous n'y naſquit oncques, ne n'y fut
 „ iamais enſeuely ? Les bannis d'Athenes le ſollicitoient de mener ſon armee contre les
 Atheniens : & pour plus l'irriter à ce faire, luy diſoient qu'il n'y auoit eu que les Athe-
 niens ſeuls qui l'euffent ſifflé, lors qu'il fut déclaré vainqueur en la feſte des jeux
 C Olympiques. Or que penſez vous, dit-il, qu'ils feront quand nous leur aurons faiët
 „ mal, puis qu'ils nous ont ſifflé quand nous leur auons faiët du bien ? Vn autre luy de-
 „ manda pourquoy ils auoient faiët le poëte Tyrteus leur citoyen : A fin, dit-il, qu'il ne
 „ fuſt point trouué, qu'un eſtranger euſt iamais eſté noſtre capitaine. Il y auoit vn fort
 debile & flouët de corps, qui neantmoins mettoit en auant qu'il falloir faire la guerre
 „ aux ennemis, & les combattre par mer & par terre : Veux tu point, dit-il, te deſpouil-
 „ ler, à fin que l'aſſiſtance voye, quel eſtant, tu nous conſeilles de combattre ? Quel-
 „ ques vns ſ'eſmerueilloient en voyant les deſpouilles des corps barbares, apres qu'ils
 „ auoient eſté tuez, de la ſumptuoſité & grande valeur d'iceux : Il euſt eſté meilleur,
 „ dit-il, que eux euſſent beaucoup valu, que non pas leurs habillemens. Apres la vi-
 ctoire que les Grecs gaignerent contre les Perſes deuant la ville de Platee, il comman-
 D da que lon le ſeruiſt du ſouper que les Perſes auoient faiët appreſter pour eux, le-
 „ quel eſtant plantureux & ſumptueux à merueilles : Par les Dieux, dit-il, il faut bien
 „ dire que les Perſes ſont bien gourmands, veu qu'ayant tant de viures, ils venoient
 „ encore pour nous manger noſtre gros pain. Pauſanias fils de Pliftonax à vn qui
 l'interrogeoit, pourquoy il n'eſtoit pas loiſible en leur pays de remuer aucune des
 „ loix anciennes : C'eſt, dit-il, pource qu'il faut que les loix ſoient maiſtreſſes des hom-
 „ mes, & non pas les hommes maiſtres des loix. Et comme eſtant en la ville de Tegce
 fugitif de Sparte, il loüaſt les Lacedemoniens : quelqu'un des aſſiſtans luy dit, Pour-
 „ quoy doncques n'es tu demouré à Sparte, puis qu'ils ſont ſi gens de bien ? & pour-
 „ quoy t'en es-tu fuy ? Pource dit-il que les medecins n'ont pas accouſtumé de ſe te-
 „ nir là où les hommes ſont ſains, mais là où ils ſont malades. Quelqu'un luy de-
 „ manda, Comment pourrons nous venir à bout de deſfaire ces Thraciens ? Si nous
 „ choiſiſſons le plus vaillant homme pour noſtre capitaine. Vn medecin le regardoit

Les dictz notables des Lacedemoniens.

» & consideroit, & apres l'auoir bien regardé luy dit, Tu n'as point de mal : C'est, dit-il, E
» pource que i'en vſe point de toy. Ses amis le reprenoient de ce qu'il disoit mal d'un
» medecin, duquel il n'auoit iamais fait preuue aucune, & n'en auoit iamais receu
» desplaisir: Si i'en auois fait preuue, dit-il, ie ne serois pas ores viuant. Et comme le me-
» decin luy dist, Tu es deuenu vieil : Ouy, dit-il, pource que ie ne me suis pas seruy de
» toy pour medecin. Il souloit aussi dire, Que le meilleur medecin estoit celuy, qui ne
» laissoit point pourrir ses patiens, ains les mettoit bien tost en terre. Pedaretus respōdit
» à l'un de ses cōpagnons qui luy disoit, Nos ennemis sont en grand nombre : Nous en
» acquerrons tant plus d'honneur, car nous en tuerons d'auantage. Voyant vn qui de sa
» nature estoit lasche & coïard, mais qui au demourāt estoit loué de ses citoyens, d'au-
» tant qu'il estoit homme modeste : Il ne faut, dit-il, louer ny les hommes pour estre
» semblables aux femmes, ny les femmes pour ressembler aux hommes, si d'aduen-
» ture la femme par quelque occasion n'y est contraincte. Ayant failly à estre receu au
» conseil des trois cents, qui estoit le degré le plus honorable de toute la Chose publi- F
» que, il se partit de l'assemblee tout riant & tout gay. Les Ephores le renuoyerent que-
» rir, & luy demanderent pourquoy il rioit: Pource, dit-il, que ie m'esiois avec nostre
» ville, de ce qu'elle a trois cents hommes plus gens de bien que moy. Plistarchus fils
» de Leonidas respondit à vn qui l'enqueroit, pourquoy ils n'auoient pris la denomina-
» tion de leur famille du nom de leurs premiers Roys, ains des derniers : Pource, dit-il,
» que ces premiers-là ont mieux aimé estre chefs, que Roys: mais leurs successeurs, non.
» Il y auoit vn Aduocat qui en plaidant ne cessoit iamais de dire quelques gaudisseries,
» & quelques traictz de risée : Mon amy, luy dit-il, tu ne te donneras garde, qu'en
» voulant ainsi faire rire les autres à tout propos, tu te trouueras ridicule & moqué toy
» mesme, ne plus ne moins que ceux qui luiſſent souuent, deuiennent à la fin bons lui-
» cteurs. On luy rapporta vn iour que vn certain mesdisant qui detracloit de tout le
» monde, disoit bien de luy : Je m'en esbahy, dit-il, si ce n'est que quelqu'un luy ait
» rapporté que ie sois mort : car quant à luy, il ne sceut oncques dire bien de personne G
» viuante. Plistonax fils de Pausanias, comme vn certain Orateur Athenien appel-
» last les Lacedemoniens ignorās: Tu dis vray, luy respondit-il, car nous sommes seuls
» entre tous les Grecs, qui n'auons rien appris de mal de vous. Polydorus fils d'Alca-
» menes dit à vn qui ordinairement ne faisoit que menasser les ennemis, Ne t'apperçois
» tu pas que tu cōsumes la plus part de ta vengeance en ces menasses? Il menoit vne fois
» l'armee de Lacedemone contre la ville de Messene: quelqu'un luy demanda s'il auroit
» bien le cœur de faire la guerre à leurs freres : Non, dit-il, mais ie vais en la terre qui n'a
» pas encore esté partagee aux lots. Les Argiens apres la desconfiture de leurs trois
» cents hommes, qui combattirent contre autres tant de Lacedemoniens, furent encore
» tous desfaits en bataille renee : au moyen de quoy les allies & confederez sollici-
» toient Polydorus de ne laisser pas eschapper vne si belle occasion, ains d'aller tout de
» ce pas donner l'assaut à la muraille de leur ville & la prendre, ce qui luy seroit lors tres- H
» facile, attendu que les hommes auoient esté tuez, & n'y estoit demouré que les fem-
» mes dedans. Il leur respōdit, Il m'est tourné, à grande gloire d'auoir vaincu & desfait
» en bataille mes ennemis, en combatant de pair à pair : mais estant venu combattre
» seulement pour nos confins, & puis conuoiter de prendre encore & gagner leur ville,
» ie ne trouue pas que ce soit chose iuste : car ie suis venu pour recouurer ce qu'ils oc-
» cupoient de nostre terre, non pas pour leur oster & saisir leur ville. Estant enquis
» pourquoy les Lacedemoniens s'exposoient ainsi hardiment aux perils de la guerre:
» Pource, dit-il, qu'ils ont appris à auoir honte, & non pas crainte de leurs superieurs.
» Polycratidas ayant esté enuoyé avec d'autres en ambassade deuers les Lieutenans du
» Roy de Perse, comme eux leur demandassent s'ils venoient de leur propre mou-
» uement, ou s'ils estoient enuoyez du public : Si nous obtenons ce que nous deman-
» dons

- A dons, dit-il : c'est de la part du public que nous venons , si non , c'est de nostre propre
 » mouuement. Phœbidas vn peu deuant la bataille Leuctrique, comme quelques vns dis-
 » sent , Ce iour icy monstrera qui sera hōme de bien : C'est doncques, dit-il, vn iour qui
 » vault beaucoup, fil a la puissance de monstrier qui est homme de bien , ou non. Souſ,
 à ce que lon dit, estant vn iour assiegé fort à destroit par les Clitoriens, en vn lieu aspre
 où il n'y auoit point d'eau , leur fait offre de leur rendre toutes les terres qu'il auoit cō-
 quises sur eux , moyennant qu'il beust luy & toute sa compagnie en vne fontaine qui
 estoit assez pres de là. Les Clitoriens le luy accorderent, & fut l'appoinctement ainsi
 iuré entre eux. Si fait l'hors assembler ses gents, & leur declara fil y auoit aucun d'eux
 qui se voulust abstenir de boire, qu'il luy cederait & donnerait sa Royauté: il n'y eut
 pas vn en toute la troupe qui s'en peust garder , tant ils estoient pressez de la soif , ains
 beurent tous à bon esciant , excepté luy, qui descendant tout le dernier , ne fait autre
 chose que seulement se refreschir & arroser vn petit par dehors en presence des ennemis
 B mesmes, sans boire vne seule goutte : au moyen dequoy il ne voulut point rendre les
 terres depuis, comme il auoit promis, alleguant qu'ils n'auoiēt pas tous beu. Telecrus
 » respondit à quelqu'un qui se plaignoit à luy de ce que son pere mesdisoit tousiours de
 luy , S'il n'en falloit mesdire, il ne le feroit pas. Son frere aussi se mescontentoit de ce
 que les citoyens ne se deportoient pas en son endroit comme ils faisoient enuers luy,
 cōbien qu'ils fussent nez de mesme pere & de mesme mere, ains le traictoient plus ini-
 » quement : C'est , dit-il , pour-ce que tu ne sçais pas comporter vn tort comme ie fais.
 Estant enquis pourquoy la coustume estoit en leur païs , que les ieunes se leuassent de
 » leurs sieges au deuant des vieux: C'est, dit-il, à fin qu'en faisant cest hōneur à ceux qui
 » ne leur appartiennent point , ils apprennent à en honorer d'auantage leurs peres &
 » meres. A vn autre qui luy demandoit, combien il auoit de biens: Ie n'en ay, dit-il, pas
 » plus qu'il m'en fault. Charillus enquis , pourquoy Lycurgus leur auoit fait si peu de
 » loix : Pour ce, dit-il , qu'il ne fault pas beaucoup de loix à ceux qui ne parlent gueres.
 C Vn autre luy demandoit, pourquoy ils faisoient sortir les filles en public à visage des-
 » couuert, & les femmes voilees: Pour ce, dit-il, qu'il fault que les filles trouuent mary ,
 » & que les femmes gardent celuy qu'elles ont. Vn des Ilotes se portant quelquefois par
 » trop audacieusement enuers luy, il luy dit, Si ie n'estois courroucé, ie te tuerois tout à
 » ceste heure. On luy demanda quelle sorte de gouuernement il estimoit la meilleure:
 » Celle, dit-il, où plusieurs s'entremettans des affaires de la Chose publique , sans que-
 » relle ne sedition, font à l'enuy à qui sera plus vertueux. A vn autre qui l'interroquoit,
 » pourquoy lon faisoit à Sparte les images de tous les Dieux armees: A fin, dit-il, que ce
 » que lon reproche aux hommes couāards ne leur puisse conuenir, & que les ieunes
 » hommes ne facent iamais priere aux Dieux sans leurs armes.

LES DICTS NOTABLES DE QUELQUES

D *autres Lacedemoniens qui ne sont point nommez.*

- L E s Samiens auoient enuoyé des Ambassadeurs à Sparte , lesquels furent vn peu
 lōgs en leurs harāgues: apres qu'ils eurent acheué de dire , les Seigneurs Spartiates leur
 » responderent, Nous auons oublié le cōmancement, & n'auons pas entendu la fin, pour
 » ce que nous auons oublié le commmancement. Ceux de Thebes leur contredisoient
 » brauement en quelque dispute: Ils leur responderent, Il fault que vous ayez ou moins
 » de cœur, ou plus de puissance. On demanda quelquefois à vn Laconien, pourquoy il
 » laissoit croistre sa barbe si fort longue : A fin, dit-il, que voyant mon poil blanc, ie ne
 » face rien indigne de ceste blancheur chenuë. Vn autre entendoit que lon loüoit des
 » hommes cōme de tres-vaillans combatans: Deuant Troye la grande, dit-il. Vn autre
 » oyant dire qu'en quelques villes on cōtraignoit les hōmes de boire apres qu'ils auoiēt

Les dictz notables des Lacedemoniens.

„ foupé : Les contrainct on point auffi, dit-il , de manger? Le poëte Pindare en l'un de E
„ ses Cantiques appelle la ville d'Athenes , le foustènement de la Grece : Elle tombera
„ doncques bien tost, dit vn Laconien , si elle est foustenuë d'un tel pillier. Vn autre
regardoit vn tableau paint, où il y auoit des Atheniens qui tuoient des Lacedæmo-
niens : & comme quelqu'un des assistans eust dit , Ils sont vaillants hommes ces Athe-
niens icy : Ouy, dit-il, en peinture. Quelqu'un sembloit prendre plaisir & adiouster
foy à des iniures que l'on disoit calomnieusement & faulxement contre vn Laconien.
„ Il luy dit , Cesse de prester tes oreilles contre moy. Vn autre que l'on punissoit , alloit
„ criant, Helas si i'ay failly, ce a esté malgré moy: vn Laconien luy respondit , Aussi est-
„ ce malgré toy que lon te punit. Vn autre voyant des hommes qui s'en alloient aux
„ champs assis dedans des coches : I'à Dieu ne plaise, dit-il , que ie me feie iamais en sie-
„ ge, dont ie ne me puisse leuer au deuant d'un plus aagé que moy. Quelques passans de
la ville de Chios estans venus veoir la ville de Sparte s'en yurerent tresbien : & apres
soupper estans allez veoir l'auditoire des Ephores, rendirent leurs gorges dedans, & qui F
plus est, feirent leurs affaires sur les chaires mesmes où se feoient les Ephores. Le len-
demain les Spartiates feirent du commencement vne extreme diligence d'enquerir
qui l'auoit faict, pour sçauoir si c'estoient point quelques vns de la ville : mais quand
ils entendirent que c'estoient ces passans de Chios , ils feirent alors proclamer à son
de trompe , qu'ils permettoient à ceux de Chios d'estre villains. Vn autre Laconien
voyant que lon vendoit au double les amédes seiches : Comment, dit-il, y a-il icy fau-
te de pierres? Vn autre ayant plumé vn rossignol, & l'ayant trouué fort menu de corps:
„ Certainement, dit-il, tu es vne voix, & non autre chose. Vn autre Laconien regardant
Diogenes le philosophe Cynique au cœur d'hyuer, qu'il geloit à pierres fendant, am-
brassant tout nud vne statuë de bronze, luy demanda s'il auoit pas grand froid : l'autre
„ luy dit, que non: quelle grande merueille fais-tu donc? Vn Laconien reprochoit quel-
quefois à vn natif de la ville de Metaponte , qu'ils estoient lasches & coüards com-
me femmes : Si est-ce, dit le Metapontois, que nous tenons beaucoup de terres d'au- G
„ truy : Comment, luy repliqua le Laconien, vous n'estes doncq pas coüards seule-
ment, mais iniustes aussi. Vn passant estant venu à Sparte pour voir la ville, se tenoit
debout sur vn pied bien longuement, & disoit à vn Laconien, Tu ne te sçauois ainsi
„ tenir debout sur vn pied aussi longuement que moy : Non pas moy, dit-il, mais il n'y a
„ oyson qui n'en feist autant. Quelqu'un se glorifioit d'estre bon Rhetoricien, pour fai-
„ re accroire ce qu'il vouloit : Par les Dieux iumeaux, dit-il, il ne fut iamais art, ny ne fera
aussi, qui ne soit conioincte avec verité. Vn Argien se vantoit qu'il y auoit en leur vil-
„ le beaucoup de sepultures des Lacedæmoniens. Au contraire, respondit le Laconien,
nous n'en auons chez nous pas vne des Argiens : voulant dire que les Lacedæmoniens
estoient par plusieurs fois entrez à main armee dedans le pays d'Argos, & les Argiens
iamais en celuy de Sparte. Vn Laconien aiant esté pris prisonnier de guerre, ainsi qu'on
le vendoit à l'encan, le crieur dit à haute voix, A vendre vn Laconien : il luy meit la H
„ main au deuant de la bouche, luy disant : Crie, vn prisonnier. Quelqu'un des soudarts
„ qui estoit à la soude de Lyfimachus, comme Lyfimachus luy demanda, Es-tu point
„ vn des Ilotes de Lacedæmone? Et penses-tu, respondit-il, qu'un Laconien daignast
„ venir à la soude de quatre oboles par iour? Apres que les Thebains eurent desfaict les
Lacedemoniens en la iournee de Leuctres, ils entrerent dedans le pais de Lacedæmo-
ne iusques à la riuiere mesme d'Eurotas : & quelqu'un d'entre eux se glorifiant com-
mancea à dire , Où sont-ils maintenant ces braues Laconiens, où sont-ils? vn Laco-
„ nien luy respondit , Ils n'y sont pas, car s'ils y fussent, vous ne seriez pas venuz iusques
icy. Lors que les Atheniens rendirent leur ville propre à la discretion des Lacedæmo-
niens, ils requierent qu'au moins on leur laissast l'Isle de Samos: & les Laconiens leur re-
„ spōdirent, Lors que vous n'estes pas à vous mesmes, vous demandez à auoir les autres:

A dont est venu le prouerbe commun, duquel on vse par la Grece,
Celuy, qui n'est à foy, demande
Que de Samos l'Isle on luy rende.

Les Lacedemoniens prirent quelquefois vne ville d'assault à viue force: quoy entendu, les Ephores dirent: Voyla l'exercice de nos ieunes gens perdu, ils n'auront plus d'aduersaires deormais, contre lesquels ils s'exercitent. Vn de leurs Roys leur enuoya promettre qu'il ruineroit de fond en comble, fils vouloient, vne autre certaine ville, qui par plusieurs fois auoit donné beaucoup d'affaires à ceux de Lacedemonie: Ils ne le voulurent pas permettre, ains luy manderent: N'oste pas la queue qui aiguise les cœurs de nos ieunes gens. Ils ne voulurent iamais qu'il y eust des maistres qui enseignassent aux ieunes gens à lucter: A fin, disoient-ils, que ce soit vne ialousie, non d'artifice, mais de force & de vertu parmy eux. Et pourtant quand on demanda à Lyfander, cōment Charon l'auoit terrassé & vaincu à la lucte: A force de ruse & d'artifice, dit-il. Philippus Roy de Macedoine, auant que d'entrer en leur pays leur escriuit, lequel ils aimoient le mieux, qu'il y entraist comme amy, ou comme ennemy: ils luy respondirent, Ne l'un, ne l'autre. Aians enuoyé vn ambassadeur deuers Demetrius le fils d'Antigonius, & estans aduertis qu'il l'auoit appelé Roy en parlant à luy, ils le condamnerent en l'amende à son retour, encore qu'il leur apportast en don de luy, en temps d'extreme famine, vne mine de bled pour chascun teste de leur ville. Il aduint à vn meschant homme de mettre en auant vn tresbon conseil: ils approuuerent bien son aduis, mais ils ne le voulurent pas receuoir, comme venant de sa bouche, ains le feirent proposer par vn autre homme de bonne vie. Deux freres auoient querelle & debattoient ensemble: les Ephores condamnerent leur pere à l'amende, de ce qu'il enduroit que ses enfans eussent querelle ensemble. Vn musicien estranger passant par là fut aussi par eux condamné en vne amende, pour-ce qu'il touchoit les chordes de sa cithre avec les doigts. Deux garçons se battoient l'un contre l'autre: l'un d'eux donna à son compagnon vn coup mortel d'une faucille: & comme il estoit bien pres de rendre l'esprit, ses autres compagnons luy promettoient qu'ils vengeroient sa mort, & qu'ils feroient mourir celuy qui l'auoit ainsi blessé: Non faittes, leur dit-il, ie vous en prie au nom des Dieux, pour-ce qu'il n'est pas iuste: car ie luy en eusse autant fait si i'eusse frappé le premier, & que i'eusse esté gentil compagnon. Vn autre ieune enfant, estant la saison, en laquelle il estoit permis aux ieunes garçons libres de desrober tout ce qu'ils pouuoient, mais estoit reputé à chose bien infame & laide d'estre surpris sur le fait: ses compagnons aians desrobbé vn petit regnardeau vif, le luy baillerent à garder: ceux qui l'auoient perdu vindrent pour le chercher, & luy l'auoit caché dessous sa robe: la beste firrita, & luy rongea le costé iusques aux intestins: ce qu'il endura patiemment sans se bouger, de peur qu'il ne fust descouuert: mais apres que les autres s'en furent allez, & que ses compagnons veirent l'outrage que le regnardeau luy auoit fait, ils l'en tenferent, disans, qu'il valoit beaucoup mieux produire & monstrier le regnardeau, que de le cacher ainsi iusques à la mort: Non faisoit, dit-il, car il valoit mieux mourir en toutes les douleurs du monde, que d'estre descouuert par lascheté de cœur, pour sauuer honteusement sa vie. Quelques vns rencontrerent sur le chemin par les champs des Laoniens, auxquels ils dirent, Vous estes bien-heureux d'estre arriuez à ceste heure, car les voleurs ne font que de partir d'icy: Par le Dieu Mars, respondirent-ils, nous ne sommes point plus heureux pour cela: mais bien eux, de n'estre point tombez en nos mains. On demanda quelquefois à vn Laonien, ce qu'il scauoit faire: il respondit, Estre libre. Vn ieune enfant Spartiate aiant esté pris prisonnier par le Roy Antigonus, & vendu parmy les autres, obeïssoit à celuy qui l'auoit achetté en toutes choses qu'il estimoit estre conuenables à vn homme libre: mais quand il luy commanda

Les dictz notables des Lacedemoniens.

„ de luy apporter le pot à piffer, il ne le peut endurer, ains dit, Je ne te seruiray point de E
 „ cela: & cōme son maistre l'en pressast, il s'en alla monter sur la couuerture du logis, en
 „ disant, Tu sentiras ce que tu auois achetté: & se iettant du hault en bas, il se tua. Vn
 „ autre que lon vendoit, comme celuy qui l'achettoit luy dist, Seras-tu homme de bien
 „ si iet achette? Ouy, dit-il, encōre que tu ne m'achettes point. Vn autre que lon ven-
 „ doit, comme le crieur proclamast, à vendre l'esclau: Malheureux que tu es, dit-il, di-
 „ ras-tu, le prisonnier? Vn Laconien auoit sur sa rondelle pour son enseigne vne mouf-
 „ che peinte, non point plus grande que le naturel, & quelques vns s'en mocquans de
 „ luy, disoient qu'il auoit pris ceste enseigne-là, à fin de n'estre point cogneu: Mais au
 „ cōtraire, dit-il, c'est à fin d'estre mieux remarqué: car ie m'aproche si pres des ennemis,
 „ qu'ils peuuent bien veoir combien ma marque est grande. Vn autre, comme on luy
 „ eust présenté à la fin d'un banquet vne lyre pour en sonner, selon la coustume de toute
 „ la Grece: Les Laconiens, dit-il, n'ont point appris de follastrer. On demāda quelque-
 „ fois à vn Spartiate, si le chemin pour aller à Sparte estoit bien seur: il respondit, Selon F
 „ que lon y va: car ceux qui y viennent comme lions, y sont mal traictez: mais les li-
 „ ures, nous les chassons à l'ombre de la fueillee. En vne prise de luiēte, vn Laconien
 „ estant faisi au collet, faisoit en vain tout ce qu'il pouuoit pour s'en despestrer, car l'au-
 „ tre le tiroit en terre: le Laconien se sentant plus foible de reins, & tout prest à donner
 „ du nez en terre, mordit bien estroict le bras de celuy qui le pressoit: l'autre se prit à
 „ crier, Hó Laconien tu mords comme les femmes: Non fais, dit-il, mais cōme les lions.
 „ Vn Laconien boitteux alloit à la guerre, dont quelques vns se mocquoient: mais il
 „ leur dit, Il ne faut point de gens qui fuyent à la guerre, mais qui tiennent bon, & gar-
 „ dent bien leur rang. Vn autre estant blecé d'un coup de fiesche à trauers le corps, sur le
 „ poinct qu'il rendoit son ame, Il ne me fasche point de mourir, dit-il, mais bien de ce
 „ que ie meurs par la main d'un archer effeminé, auāt que d'auoir rien faict de ma main.
 „ Vn autre arriuant en vne hostellerie pour loger, bailla à l'hostellier vne piece de chair
 „ pour accoustrer à souper: l'hostellier luy demanda encōre du fromage & de l'huyle: G
 „ A quel propos, dit-il: si i'auois du fromage, ie n'auois que faire d'autre viande. Vn
 „ autre entendant louer & reputer grandement heureux le marchand nommé Lampis,
 „ natif de la ville d'Ægine, pour ce qu'il estoit fort riche: & auoit plusieurs grands vais-
 „ seaux sur la mer: Je ne fais point compte, dit-il, d'une telle felicité, qui est attachee à
 „ des cordes. Vn autre respondit à quelqu'un qui luy disoit, Tu mens Laconien: Nous
 „ sommes libres aussi, dit-il: les autres, fils faillent à dire verité, sont bien chastiez. Vn
 „ autre se trauailloit à faire tenir vn corps mort debout sur ses pieds: mais il n'y auoit or-
 „ dre: & voyant qu'il n'en pouuoit venir à bout, Par Iupiter, dit-il, il fault qu'il y ait
 „ quelque chose dedās. Tynnichus Laconien, son fils Thrasybulus luy aiant esté tué à
 „ la guerre, supporta sa mort vertueusement: & en fut faict vn tel Epigramme,

On rapporta, Thrasybulus, ton corps
 Dans ton pauois estant l'ame dehors,
 Que ceux d'Argos en auoient dechassée
 Auec sept coups de mortelle faulcée,
 Tous par deuant: Et ton pere constant
 Vieillard nommé Tynnichus, le mettant
 Dedans le feu, plein de sang, le visage
 Tout sec, vfa de ce masle langage:
 C'est des couiards qu'il faut plorer la mort,
 Non pas de toy, mon enfant, qui es mort
 Comme mon fils en vray homme de bien,
 Et comme vray Lacedemonien.

Le maistre des estuues où Alcibiades s'estuuoit & lauoit, luy versoit dessus beaucoup
 d'eau

H

A d'eau plus qu'aux autres: & comme il demadaſt, Que veult dire cela? vn Laconien qui là eſtoit, luy dit, Il voit bien que tu n'eſt pas net, mais bien ord & ſale, voy-la pour-
 „ quoy il te donne plus d'eau. Quand Philippus de Macedoine entra à main armee de-
 „ dans la Laconie, on penſoit que tous les Lacedemoniens fuſſent perdus, & y eut quel-
 „ que Grec qui dit à l'un des Spartiates: O pauvres Laconiens, que ferez vous mainte-
 „ nant? Que ferions nous, dit le Laconien, autre choſe, que mourir vaillamment? car nous
 „ ſommes ſeuls entre les Grecs qui auons appris de demourer libres, & ne ſeruir iamais à
 „ perſonne. Apres la deffaiſte du Roy Agis, Anripater leur demandoit pour oſtages
 „ cinquante enfans. Eteocles qui lors eſtoit l'un des Ephores luy reſpondit, qu'il ne luy
 „ bailleroit point d'enfans, de peur qu'ils ne deuinſſent mal-conditionnez, pour n'auoir
 „ pas eſté nourris en la diſcipline de leur païs, ſans laquelle ils ne ſeroient pas meſme ci-
 „ toyens, mais qu'il luy bailleroit des femmes ou des vieillards ſil vouloit deux fois au-
 „ tant: & cōme il les menaſſaſt qu'il leur feroit du pis qu'il pourroit, ils reſpōdirent tous
 B vnanimement, Si tu nous cōmandes choſes plus grieſues que la mort, nous en mour-
 „ rons tant plus volontiers & plus facilement. Vn viellard deſirant veoir l'eſbatement
 „ des ieux Olympiques, ne pouuoit trouuer place à ſaſſeoir, & paſſant par deuāt beau-
 „ coup de lieux, on ſe gaudiſſoit & ſe mocquoit de luy, ſans que perſonne le vouluſt
 „ receuoir, iuſques à ce qu'il arriua à l'ẽdroit où eſtoient les Lacedemoniẽs aſſis, là où tous
 „ les enfans, & beaucoup des hōmes, ſe leuerent au deuant de luy, & luy cederent leur
 „ place. Toute l'aſſemblee des Grecs remarqua bien ceſte hōneſte façon de faire, & avec
 „ battemens de mains declarerẽt qu'ils la louoient grãdement: adonc le pauvre viellard
 „ Croulant ſa teſte & ſa barbe chenuẽ,
 „ en plorant: Hé Dieux, dit-il, que de maux! On voit bien que tous les Grecs entendent
 „ bien ce qui eſt honneſte, mais il n'y a que les Lacedemoniens ſeuls qui le facent. Au-
 „ cuns eſcriuent que le meſme aduint à Athenes à la feſte & ſolennité que lon appelle
 „ Panathenees, là où ceux d'Attique feirent honte à vn pauvre viellard qu'ils auoient
 C eux-meſmes appellé, comme pour luy donner place, & puis quand il fut venu, ils ne
 „ luy en baillerent point, ains ſe mocquerent de luy: mais apres que aiant paſſé par de-
 „ uant preſque tous les autres, il fut arriué à l'endroit où eſtoient aſſis les ambassadeurs
 „ de Lacedemone, ils ſe leuerent tous de leurs ſieges au deuant de luy, & luy donne-
 „ rent place entre-eux. Le peuple aiant pris grand plaſir à leur veoir faire ceſt acte,
 „ leur applaudit des mains bien clairement, avec grande demonſtration de l'auoir fort
 „ approuué: & adonc quelqu'un des Spartiates qui là eſtoient, Par les Dieux iumeaux;
 „ les Atheniens, dit-il, entendent bien ce qui eſt bon & honneſte, mais ils ne le font pas.
 „ Vn belifſtre demanda quelquefois l'aumofne à vn Laconien, qui luy dit: Voire-mais
 „ ſi ie la te donne, tu mendieras encore plus: & le premier qui la te donna, a eſté cauſe
 „ de ceſte villaine vie que tu menes maintenant, t'ayant rendu pareſſeux & truand.
 „ Vn autre voyant vn Queſteur qui alloit queſtant pour les Dieux comme il diſoit: Ie
 D n'ay, dit-il, que faire de Dieux qui ſoient plus pauvres que moy. Vn Laconien aiant
 „ ſurpris vn adultere avec vne laide femme.: Malheureux, dit-il, qui te contraignoit?
 „ Vn autre aiant ouy vn Orateur qui tiroit de longues trainees de paroles: Par les
 „ Dieux iumeaux, dit-il, voyla vn vaillant homme, il tourne-vire bien ſa langue
 „ ſans aucun propos. Vn qui paſſoit par Lacedemone, y remarqua entre autres cho-
 „ ſes le grand honneur que y portoient les ieunes aux vieux, & dit, Il n'y a que Sparte
 „ où il ſoit expedient de vieillir. On demanda quelquefois à vn Spartiate, quel
 „ poète eſtoit Tyrteus: Bon, dit-il, pour aguifer les courages des ieunes gens. Vn
 „ autre aiant grand mal aux yeux ſ'en alla à la guerre: & comme les autres luy diſſent,
 „ Où veux-tu aller en l'eſtat que tu eſ? que penſes-tu faire? Quand ie ne feray autre
 „ choſe, dit-il, pour le moins ie rebouſcheray d'autant l'eſpce de l'ennemy: Buris &
 „ Spertis deux Lacedemoniens ſe partirent volontairement du pays, & ſ'en allerent

Les dictz notables des Lacedemoniens.

deuers Xerxes le Roy de Perse , foffrir à endurer la peine que les Lacedemoniens E
auoient meritee par sentence de l'oracle des Dieux, pour auoir occis les heraults que
le Roy leur auoit enuoyez: & estans arriuez deuers luy, luy dirent, qu'il les feist mou-
rir de telle sorte de supplice que bon luy sembleroit en acquit des Lacedemoniens. Le
Roy esmerueillé de leur vertu, non seulement leur pardonna la faulte, mais encore les
„ pria de demourer avec luy, leur promettant de leur faire bon traictement. Et com-
„ ment, dirent-ils, pourrions nous viure icy, en abandonnant nostre pais, nos loix, & de
„ tels hommes, que pour mourir pour eux nous auons volontairement entrepris vn si
„ loingtain voyage? Et comme l'vn des Capitaines du Roy, nommé Indarnes, les en
priaist d'auantage, en leur disant qu'ils seroient en mesme degré de credit & d'hon-
neur qu'estoient les plus fauorisez & les plus auancez aupres du Roy: ils luy dirent,
„ Il nous semble que tu ne sçais pas que c'est de liberté: car qui sçait bien que c'est, s'il
„ a bon iugement, ne l'eschangerait pas avec le Royaume de Perse. Vn Laconien allant
par pays arriua en vn lieu où il auoit vn hoste ancien, qui le premier iour se destourna F
de luy, pour ne le loger point, d'autant qu'il n'auoit point de liëts en sa maison, mais
le lendemain en aiant loué ou emprunté, il le receut magnifiquement: le Laconien
„ monta dessus ces liëts, & les foula aux pieds en disant, Ces meschans liëts furent cause
„ hier, que ie n'ay pas eu seulement de la natte à coucher & dormir la nuit passée.
„ Vn autre estant arriué en la ville d'Athenes, & là aiant veu que les vns des citoyens
alloient par la ville crians des poissons sallez à vendre, les autres de la chair, les autres
tenoient les gabelles, les autres faisoient mestier de tenir des bordeaux, & d'exercer
plusieurs autres choses villaines & deshonestes, & de n'estimer rien sale ny laid,
quand il fut de retour en son pays, & que ses citoyens luy demanderent, comment
„ se portoit tout à Athenes: Le mieux du monde, dit-il, en se mocquant, tout y est hon-
„ neste. voulant leur donner à entendre, que tous moyens de gagner estoient tenus
pour honnestes à Athenes, & rien villain ny deshonest. Vn autre estant interro-
gué de quelque chose, respondit, Non: & comme celuy qui l'auoit interrogué luy G
„ dist, Tu mens: le Laconien luy repliqua, Vois-tu donc, comme tu es vn fol de me
„ demander ce que tu sçais bien? Quelques Laconiens furent vne fois enuoyez am-
bassadeurs deuers le tyran Lygdamis, lequel remettoit de iour à autre, & reculoit à
leur donner audience: & à la fin on leur dit, qu'il se trouuoit vn peu mal-disposé: les
„ ambassadeurs dirēt à celuy qui leur faisoit ce rapport, Dittes luy, de par les Dieux, que
„ nous ne sommes pas venus pour luiëter, mais pour parler seulement avec luy. Quel-
que Sacrificateur receuoit vn Laconien és cerimonies de quelque religion: & auant
que de l'y recevoir luy demandoit, Quel peché il auoit sur sa conscience le plus grief
„ qu'il eust iamais commis: Les Dieux le sçauent bien, respondit le Laconien. Et com-
me le Sacrificateur le pressast de plus en plus, en luy protestant qu'il estoit force qu'il le
„ dist: le Laconien luy demanda, A qui faut-il que ie le die, à toy, ou à Dieu? A
„ Dieu, dit l'autre. Retire toy doncques arriere de moy, dit le Laconien. Vn autre H
passant de nuit à trauers vn cimetiere, pensa voir quelque fantasme d'esprit deuant
luy: il court droit-là comme pour l'enfermer avec sa iaueline, & en poussant dit, Où
„ me fuis-tu ame que ie feray mourir deux fois? Vn autre auoit voué qu'il se ietteroit
du hault de la roche de Leucade en la mer: il y monta, & s'en retourna apres qu'il
„ eut veu la grande hauteur: & comme on le luy reprochast, Ie ne sçauois, dit-il, pas,
„ que ce vœu-là auoit besoing d'vn autre plus grand vœu. Vn autre en la bataille
aiant desia haulsé l'espee pour donner le coup de la mort à son ennemy qu'il tenoit
sous luy, quand il ouit la trompette qui sonnoit la retraite, ne ramena point son
coup: & comme quelque autre luy demanda, pourquoy il n'auoit tué l'ennemy qu'il
„ auoit entre ses mains: Pource qu'il vaut mieux obeyr à son Capitaine que de tuer son
ennemy. Vn Laconien aiant esté vaincu à la luiëte en la feste des Jeux Olympiques,
quelqu'vn

A quelqu'un luy cria, O Laconien, ton aduersaire estoit meilleur que t'oy: Meilleur non, dit-il: mais mieux terrassant, ouy.

LES COVSTVMES ET FACONS DE FAIRE DES

ANCIENS LACEDÆMONIENS.

Quand ils entroient és salles de leurs cōuiues, la coustume estoit que le plus vieil de la chābree monstroït la porte à chascun des autres, & leur disoit, Il ne sort pas vne seule parole par ceste porte. La plus exquisite viande qu'ils eussent, estoit vn porage lié qu'ils appelloiēt le brouët noir, tellemēt que quand il y en auoit, les vieillards ne mangeoiēt point de chair, ains la laissoiēt toute aux ieunes gens. Et dit-on que Dionysius le tyran de la Sicile, pour ceste cause achetta vn cuisinier de Lacedemone, & luy cōmanda de luy apprestier de ce brouët sans y rien espargner: mais quand il en eut vn peu tasté, il le trouua si mauuais, qu'il reietta tout ce qu'il en auoit pris: & le cuisinier luy dit, O Sire, pour trouuer bon ce brouët il se faut premierement estre exercitē à la Laconique tout nud, & bien baignē dedans la riuierē d'Eurotas. Apres auoir sobrement beu & mangē en ces conuiues, ils se retiroient en leurs maisons, sans torche ny lumiere, car il ne leur estoit pas permis d'aller ny là ny ailleurs la nuit auec de la lumiere: à fin qu'ils s'accoustumassent à cheminer asseurement, sans rien craindre, par tout, la nuit, & en tenebres, sans aucune clarté. Des lettres ils en apprenoient pour la necessitē seulement, & au demourāt bannissoient de leur pais toutes autres sciences, aussi bien que tous hōmes estrangers: & au reste toute leur estude estoit d'apprendre à bien obeïr à leurs superieurs, endurer patiemment tous trauaux, & vaincre en combattant ou mourir sur la place. Ils demouroient tout le long de l'annee auec vne simple robbe seulement, sans sayes par dessoubz, sales & crasseux ordinairement, comme ceux qui ne festuuoient ny ne s'oiignoient presque iamais, sinon bien peu souuent. Les ieunes garçons & ieunes hommes dormoient ensemble par bādes & par troupes sur des paillasses qu'ils amassoient eux mesmes, rompans auec les mains, sans aucun ferrement, les cymes des canes & rouseaux qui croissoient au long des riuēs de la riuierē d'Eurotas, & l'hyuer ils mesloient parmy de la bourre d'une espece de chardōs qu'ils appelloient Lycophanes, pource que lon estime que ceste matiere-lā ait en soy ie ne sçay quoy qui eschauffe. Il leur estoit permis d'aimer les enfans de bonne & gentille nature, mais abuser de leurs personnes estoit tenu pour chose tres-infame, comme de gens qui en aimoient le corps, & non pas l'ame: de sorte que qui en estoit accusé, en demouroit noté d'infamie pour toute sa vie. La coustume estoit que les vieux demandoient aux ieunes quand ils les rencōtroient, où ils alloient, & quoy faire, & les tansoient s'ils failloient à respondre, ou s'ils alloient bastissant des excuses: & qui ne tansoit celuy qui commettoit quelque faute en sa presence, estoit subiect à la mesme reprehension que celuy qui auoit failly: mesme celuy qui se courrouçoit ou monstroït de prendre à mal quand on le reprenoit, en estoit reproché & desestimé. Si d'aduenture quelqu'un estoit surpris en commettant vne faute, il falloït qu'il enuironnast vn certain autel de la ville tout à l'entour, chantant vne chanson faitte en son blasme & vitupere, qui n'estoit autre chose que de se tanfer & arguer soy-mesme. Et falloït que les ieunes hommes reuerassent non seulement leurs propres peres, & se rendissent subiects à eux, mais aussi qu'ils portassent reuerence à tous autres vieilles gens, en leur cedant le dessus, & se destournant d'eux par les chemins, en se leuant de leurs sieges au deuant d'eux, & s'arrestant quand ils passoient: & pourtant vn chascun commandoit non seulement comme aux autres villes à ses propres enfans, à ses propres seruiteurs, & dispoït de ses propres biens, ains aussi à ceux de son voisin, ne plus ne moins qu'aux siens propres, & s'en seruoient comme de choses communes entre eux, à fin qu'ils en eussent soing chascun comme des leurs propres. Et pourtant si vn enfant aiant esté chastié par vn autre l'alloit rapporter à son pere, c'estoit honte au pere fil

Les dictz notables des Lacedemoniens.

ne luy donnoit encore d'autres coups : car par la commune discipline de leurs païs ils E
fasseuroient , que vn autre n'auoit rien commandé qui ne fust hōneſte à leurs enfans.
Les ieunes enfans defrobboient tout ce qu'ils pouuoient de bon à manger, apprenans
de ieunesse à dresser embuſche d'extremement pour ſurprendre ceux qui dormoient, ou
qui ne ſe tenoient pas bien ſur leurs gardes : mais la punition de celuy qui eſtoit ſur-
pris en defrobant, c'eſtoit, qu'il eſtoit bien fouetté, & le faiſoit-on ieuner : car on
leur donnoit expreſſément bien fort peu à manger, à fin que d'eux-mesmes comba-
tans la neceſſité, ils fuſſent contraincts de ſ'expoſer hardiment à tous dangers, & d'in-
uenter tousiours quelque ruſe & fineſſe pour en defrobber. Mais generalemēt l'effect,
pour lequel leur viure de tous eſtoit fort eſtroict, c'eſtoit à fin que de longue main ils
ſ'accouſtumafſent à n'eſtre iamais pleins, & à pouuoir endurer la faim, pource qu'ils
auoient opinion qu'ils en ſeroient plus vtiles à la guerre, ſils apprenoient à pouuoir
porter la peine & trauailler ſans manger, & qu'ils en ſeroient plus continents, plus
ſobres, & plus ſimples, ſils apprenoient à durer long temps à peu de deſpenſe. Brief F
ils auoient opinion que ſ'abſtenir de manger chair ou poiſſon appreſté en cuiſine, &
ſe paſſer ou de pain ou de la viande la premiere venue, rendoit les corps des hommes
plus ſains & plus grands, pour ce que les eſprits naturels n'eſtans point preſſez par
trop grande quantité de viures, ny rebatus contrebas, ny eſtendus en large, eſleuoiet
les corps contremont, & ſi les faiſoient plus beaux, d'autant que les habitudes & cor-
pulécēs greſſes & vuides obeïſſent mieux à la vertu de nature qui forme les membres:
là où celles qui ſont graſſes, pleines & ſubiectes à beaucoup manger, pour leur pe-
ſanteur y reſiſtent. Ils eſtudioient auſſi à compoſer de belles chanſons, & non pas
moins à les chanter, & y auoit tousiours en leurs compositions ne ſçay quel aiguillon
qui excitoit le courage, & inſpiroit aux cœurs des eſcoutans vn propos deliberé & vne
ardente volonté de faire quelque belle choſe. Le langage eſtoit ſimple, ſans fard ny
affecterie quelconque, qui ne contenoit autre choſe que les loüanges de ceux qui a-
uoient veſcu vertueuſement, & qui eſtoient morts en la guerre pour la deſenſe de G
Sparte, comme eſtans bien-heureux, & le blaſme de ceux qui par laſcheté de cœur a-
uoient reſtiué à mourir, comme viuans vne vie miſerable & malheureuſe : ou bien
c'eſtoient promeſſes d'eſtre à l'aduenir, ou vanteries d'eſtre preſentement gens de
bien, ſelon la diuerſité des aages de ceux qui les chantoient : car y aiant és feſtes ſo-
lennelles & publiques tousiours trois danſes, celle des vieillards commenceant diſoit,

Nous auons eſté iadis

Ieunes, vaillants, & hardis.

Celle des hommes ſuyuoit apres, qui diſoit,

Nous le ſommes maintenant,

A l'eſpreuue à tout venant.

La troiſième des enfans venoit apres, qui diſoit,

Et nous vn iour le ſerons,

Qui bien vous ſurpaſſerons.

H

Les chants meſmes, à la cadence deſquels ils balloient, & marchoient en bataille au
ſon des fleutes quand ils alloient chocquer l'ennemy, eſtoient appropriez à inciter
les cœurs à vaillance, à aſſurance, & meſpris de la mort : car Lycurgus ſ'eſtudia à
conioindre l'exercice de la diſcipline militaire avec le plaſir de la muſique : à fin que
ceſte vehemence belliqueuſe meſlee avec la douceur de la muſique, en fuſt temperee
de bon accord & harmonie : & pourtant és batailles, auant le choc de la charge, le Roy
auoit accouſtumé de ſacrifier aux Muſes, à fin que les combatans euſſent la grace de
faire choſes glorieuſes & dignes de memoire. Mais ſi quelqu'un vouloit outre-
paſſer vn ſeul poinct de la muſique ancienne, ils ne le ſupportoient pas : tellement que
les Ephores condamnerent à l'amende Terpander aſſez groſſier à l'antique, mais le
meilleur

- A meilleur ioüeur de cithre de son temps, & qui plus prenoit de plaisir à louer les faicts heroïques : & qui plus est, pendirent sa cithre à vn pau, pource qu'il y auoit adiousté vne seule corde pour passer & varier la voix vn peu d'auantage : car ils n'approuuoient les chants & chansons, que les plus simples. Et comme Timotheus à la feste Carniene chanta sur sa cithre pour gagner le pris, l'vn des Ephores prenant vn cousteau en sa main, luy demanda de quel costé, du haut, ou du bas, il aimoit mieux qu'il coupast les cordes qui estoient de plus que les sept ordinaires. Au demourant Lycurgus leur osta toute superstition & vaine crainte des sepultures, leur permettant d'inhumer les morts dedans la ville, & d'auoir les monuments & sepultures alentour des temples des Dieux : & leur osta & retrencha toutes pollutions de mortuaires : & ne leur permit d'enterrer aucune chose avec les corps, sinon de les enuclopper dedans vn drap rouge avec des fueilles d'oliue, & non point plus à l'vn qu'à l'autre : aussi leur osta-il toutes epitaphes & inscriptions de sepultures, sinon de ceux qui feroient morts en bataille, & defendit tout deuil & toutes lamentations.
- B Aussi leur interdit-il de voyager en pays estrange, de peur qu'ils n'y apprinsent des mœurs estranges & façons de viure incorrectes : & par mesme raison bannit-il tous estrangers de sa ville, de peur que s'ils venoient à s'y couler & habiter, ils ne monstrassent & enseignassent quelque vice à ses citoyens : & s'il y auoit aucun qui ne voulust souffrir la discipline & institution des enfans, il ne iouïssoit point des droits & priuileges de bourgeoisie. Et disent aucuns que Lycurgus auoit institué, qu'un estrange mesme qui se vouloit soumettre à l'observation de sa discipline, eust vne des portions qu'ils auoient dès le commencement ordonnées, mais il ne la pouuoit vendre. Leur coustume estoit de seruir & user des seruiteurs de leurs voisins, ne plus ne moins que de leurs propres, quand ils en auoient affaire, & autant de leurs cheuaux ou de leurs chiens, si les propriétaires n'en auoient eux-mesmes affaire. Aux champs pareillement s'ils se trouuoient auoir besoin d'aucune chose qui fust au logis de leurs voisins, ils alloient librement ouurer les coffres & les lieux où elle
- C estoit, & la prenoient, puis refermoient les lieux où ils l'auoient prise. A la guerre ils portoient robes rouges, pour ce qu'il leur sembloit que ceste couleur estoit mieux seante à vn homme, & puis pour ce qu'elle ressemble au sang, elle faisoit plus de frayeur à ceux qui ne l'auoient pas accoustumée : ioinct qu'elle estoit encore utile, par ce que s'il aduenoit qu'ils fussent blecez, l'ennemy ne le pouuoit pas facilement appercevoir, pour la semblance de la tainture au sang. Quand ils auoient vaincu leurs ennemis par quelque ruse & habilité de leur Capitaine, ils sacrifioient à Mars vn bœuf : mais quand c'estoit par viue force à la descouuerte, ils immoloient alors vn coq, accoustumans par cela leurs Capitaines à estre non seulement belliqueux, mais aussi rusez. En leurs prieres qu'ils faisoient aux Dieux, ils y adioustoient, qu'ils peussent supporter vne iniure : & la somme de leurs prieres estoit, que les Dieux
- D leur donnassent honneur pour bien faire, & rien plus. Ils honoroient Venus armée, & faisoient toutes les images des Dieux, tant masles que femelles, avec des lances & iauelines en leurs mains, comme aians tous la vertu militaire & guerriere : aussi disoient-ils en commun prouerbe, Qu'il faut inuoker la Fortune en estendant la main : voulans dire qu'il faut inuoker les Dieux en entreprenant quelque chose, & mettant la main à l'œuvre, non pas autrement. Ils monstroient à leurs enfans les Ilotes yures, à fin de les destourner de boire beaucoup de vin. Ils ne frappaient iamais à la porte des maisons, ains appelloient de dehors. Les estrilles dont ils usoient, estoient non de fer, mais de roseau. Ils n'oyoient iamais iouer ny Comœdies ny Tragedies, à fin qu'ils n'entendissent iamais, ny par ieu ny à bon escient, contredire aux loix. Le poëte Archilochus estant venu à Sparte, ils l'en chasserent à la mesme heure, pour autant qu'ils sceurent qu'il auoit faict des vers, esquels il disoit, qu'il valoit

Les dictz notables des Lacedemoniens.

mieux quitter & ietter ses armes, que de mourir.

E

Fol est qui tant pour vn bouclier f'esmaye:

I'ay bien ietté le mien dans vne haye,

Quoy qu'il fust bon : mais pour me le garder

Ie n'ay voulu ma vie hazarder:

Perdu qu'il soit, i'en pourray bien élire

Vn autre apres qui ne fera ja pire.

Toutes leurs sacrees cerimonies estoient communes autant aux filles comme aux fils. Les Ephores condamnèrent Sciraphidas à l'amende, pour autant que plusieurs luy faisoient tort. Ils feirent mourir vn qui faisoit le penitent public, portant vn haire comme vn sac sur sa chair, d'autant qu'il y auoit de la pourfure de pourpre en sa haire. Ils tanserent vn ieune garson qui alloit encore aux exercices de la ieunesse, d'autant qu'il scauoit le chemin de Pyles, où se tenoit l'assemblée des estats de la Grece. Ils chasserent de leur ville vn Rhetoricien nommé Cephisophon, d'autant qu'il se vantoit de pouuoir parler tout vn iour entier sur quelque subiect que ce fust, disans qu'un bon parleur doit auoir la parole egale à ce dont il parle. Les enfans enduroient d'estre deschirez à coups de foïet tout au long d'un iour, iusques à la mort bien souuent, sur l'autel de Diane surnommee Orthie, c'est à dire droite & roide, tous gays & ioyeux, faifans à l'enuy les vns des autres à qui plus & plus long temps endureroit d'estre battu : & celuy qui en demouroit vainqueur, en estoit entre les plus estimez & mieux prizez : & ceste amulation de combat s'appelle la fouëttade, & se recommence tous les ans. Mais l'une des plus belles & des plus heureuses choses dont Lycurgus ayt faict prouision à ses citoyens, c'est abondance de loisir : car il ne leur est aucunement permis de se mesler d'aucun art mecanique : & de traffiquer laborieusement & peniblement pour amasser des biens, il n'en estoit point de nouvelle, par ce qu'il auoit tant faict qu'il leur auoit rendu la richesse ny honorable ny desirable : & les Ilotes leur labouroient leurs terres, leur en rendant ce qui estoit d'ancien-
cienneté estably & ordonné : & leur estoit defendu d'en exiger plus de loüage, à fin
que les Ilotes pour le gain qu'ils y faisoient, en serussent plus volontiers, & qu'eux
ne conuoitassent point à en auoir d'auantage. Il leur estoit aussi defendu d'estre ma-
riniers, d'aller sur mer, ny d'y combattre : mais depuis pourtant ils combattirent
par mer, & se rendirent Seigneurs de la marine : toutesfois ils s'en deporterent bien
tost, d'autant qu'ils voyoient que les mœurs de leurs citoyens s'en gastoient & cor-
rompoient : mais depuis encore se changerent-ils en cela comme en toutes autres cho-
ses. Car les premiers qui amasserent de l'argent aux Lacedemoniens, furent condam-
nez à mort, d'autant qu'un ancien oracle auoit esté respondu aux Roys Alcamenes &
Theopompus,

Auarice fera la ruine Sparte.

Et neantmoins apres que Lyfander eut pris la ville d'Athenes, il emmena à Spar-
te grande quantité d'or & d'argent qu'ils receurent, & en honorerent le personnage
qui la leur auoit apportee. Maistant que la cité de Sparte a gardé les loix de Lycur-
gus, & obserué le serment qu'elle auoit iuré, elle a esté tousiours la premiere de tou-
te la Grece en gloire & en bonté de gouuernement, l'espace de plus de cinq cens
ans : & venans à les transgresser, l'auarice & la conuoitise d'auoir se coula petit à pe-
tit parmy eux, & aussi en diminua leur autorité & leur puissance : car leurs alliez &
confederez commencerent à leur en mal vouloir. Mais toutefois encore qu'ils
fussent en tel estat, apres que Philippus eut gagné la bataille contre les Grecs, au-
pres de Charonee, & que toutes les autres villes de la Grece l'eussent de commun
consentement élu pour Capitaine general de toute la Grece, tant par mer comme
par terre, & depuis Alexandre son fils apres la destruction de la ville de Thebes,
les

A les Lacedemoniens seuls, encore qu'ils eussent leur ville toute ouverte, sans aucunes murailles, & qu'ils fussent en bien petit nombre, pour les continuelles guerres qu'ils auoient eues, & qu'ils fussent beaucoup plus foibles, & par consequent plus aisez à prendre & à desfaire, qu'ils n'auoient appris d'estre: neantmoins pour auoir retenu encore quelques petites reliques du gouuernement estably par Lycurgus, ils ne voulurent iamais se soubmettre à aller à la guerre sous ces deux grands Roys-là, ny aux autres Roys de Macedoine qui vindrent apres, ny ne se voulurent trouuer és communes assemblees avec eux, ny ne contribuerent aucun argent, iusques à ce qu'aiants de tout poinct mis à nonchaloir les loix de Lycurgus, ils furent reduits en tyrannie par leurs propres citoyens, quand ils ne reteindrent du tout plus rien de leur ancienne institution & discipline, & qu'estans deuenus tous semblables aux autres peuples, ils perdirent entierement toute leur ancienne reputation & gloire, & leur franchise de parler: & furent finablement redigez en seruitude, comme ils sont encore de present subiects aux Romains, aussi bien comme tous les autres peuples & villes de la Grece.

LES DICTS ET RESPONSES NOTABLES
DES DAMES LACEDEMONIENNES.

ARGILEONIDE la mere de Brasidas, son fils ayant esté tué, quelques Ambassadeurs de la ville d'Amphipolis vindrent à Sparte, qui la visiterent: ausquels elle demanda, si son fils estoit mort en homme de bien, & digne de Sparte: & comme ils le louassent extrêmement, & luy dissent, que c'estoit en faict d'armes le plus grand homme qui eust oncques esté en Lacedamone, elle leur respondit: Estrangers mes amis, mon fils estoit bien voirement homme de bien & d'honneur, mais Lacedamone en a plusieurs autres, qui sont encore plus vaillans que luy.

C GORGO la fille du Roy Cleomenes, comme Aristagoras Milesien fust venu à Sparte pour solliciter Cleomenes d'entreprendre la guerre contre le Roy de Perse, pour affranchir les Ioniens, & pour ce faire luy promest grosse somme d'argent: & d'autant que plus il y contredisoit, d'autant plus il luy augmentast la quantité de deniers qu'il luy promettoit: Mon pere, dit-elle, cest estranger icy te corrompra, si tu ne le iettes promptement dehors de nostre maison. Et comme son pere luy eust vn iour commandé de bailler du bled à quelqu'un pour son salaire, y adioustant, C'est luy qui m'a enseigné à faire de bon vin: Comment, mon pere, on en beura du vin d'auantage, & ceux qui en beuront, en deuiendront plus delicats & moins vertueux. Et voyant comme vn des seruiteurs d'Aristagoras luy chauffoit ses souliers: Pere, dit-elle, cest estranger icy n'a point de mains. Et comme vn autre estranger marchant mollement & delicatement se fust approché d'elle, elle le repoulsa rudement, en luy disant: D Te retireras-tu arriere d'icy homme lasche, qui ne vault pas vne femme?

GIRTIAS comme son nepueu Acrotatus eust esté rapporté à la maison, d'une querelle qu'il auoit eue contre d'autres ieunes garçons ses compagnons, fort blessé en plusieurs lieux, de maniere que l'on pensoit qu'il fust mort, & ses domestiques & familiers en pleurassent & menassent grand deuil: Ne vous taisez vous pas, dit-elle, car il a monsté de quel sang il estoit. Il ne faut pas à hauts cris plorer les vaillants hommes, mais les medeciner & penser, pour essayer de les sauuer. Et quand la nouvelle fut venue certaine de Candie, où il estoit allé à la guerre, qu'il y auoit esté tué: Ne falloit-il pas, dit-elle, puis qu'il alloit contre les ennemis, qu'il y mourust, ou qu'il les feist mourir eux? I'ay plus cher d'ouïr dire qu'il soit mort digne de moy, de son pais & de ses predecesseurs, que s'il eust vescu autant que l'homme scauroit, estant lasche de cœur.

Les dictz notables des Lacedemoniens.

DEMETRIA entendant que son fils coüard & indigne d'elle estoit retourné de E
la guerre, elle mesme le tua: dont on feist cest Epigramme,

Demetria tua Demetrien,
Son propre fils, Lacedemonien,
Quand elle sceut que son ame surprise
Auoit esté de lasche couardise.

Vne autre aiant entendu que son fils auoit abandonné son rang, le tua, comme estant
„ indigne de son pais, en disant, Ce n'est point ma geniture: sur laquelle on composa
cest Epigramme,

Va meschant germe aux enfers tenebreux,
Va, qu'en despit de ton forfait paoureux
Eurotas mesme aux cerfs couards ne laisse
Boire son eau. Meurs canaille traistresse,
Entierement inutile à tout bien,
De Sparte indigne, oncques tu ne fus mien.

F

Vne autre aiant entendu que son fils s'estoit sauué & enfuy des mains des ennemis,
luy escriuit: Il court vn mauuais bruit de roy, efface-le, ou ne sois point. Vne autre
de qui les enfans s'en estoient fuis de la bataille, arriuez qu'ils furent vers elle, leur
„ dit: Où allez vous meschants fuyards esclaves? voulez vous rentrer icy dont vous estes
„ fortis? en reboursant sa robbe par deuant, & leur montrant son ventre. Vne autre
„ voyant son fils reuenant du camp, luy demanda, Et bien, comment se porte la Chose
„ publique? Il luy respondit, Tous nos gens sont morts. Et elle prenant vn pot de
„ terre luy ietta sur la teste, en luy disant: T'ont-ils doncques enuoyé pour nous en por-
„ ter des nouvelles? Vn frere racontoit à sa mere la genereuse mort d'un sien autre
„ frere: sa mere luy respondit, Et n'as-tu point de honte de ne l'auoir accompagné à vn
„ si beau voyage? Vne autre mere auoit enuoyé ses enfans, qui estoient cinq, au camp,
& attendoit aux faulx-bourgs de la ville, quelle issue prendroit la bataille. Au pre- G
mier qui en retourna, elle demanda des nouvelles, & il luy respondit, que ses enfans
„ y auoient esté tuez tous cinq. Ce n'est pas cela que ie te demande, meschant esclave
„ que tu es, dit-elle: mais comment se portent les affaires de la Chose publique? La
„ victoire est nostre, respondit-il: Je suis doncques, dit-elle, maintenant contente de
„ la perte de mes enfans. Vn autre, ainsi comme elle enseuelissoit son fils, suruint
„ vne pauvre vicillotte qui se prist à luy dire: O femme, quelle fortune! Bonne par
„ les Dieux iumeaux, respondit elle: car le but, auquel ie l'auois enfanté m'est aduenu,
„ à fin qu'il mourust pour Sparte. Vne Dame du pais d'Ionie se glorifioit d'un sien
ouurage de tapisserie qu'elle auoit faict au mestier fort sumptueux: mais vne Laco-
„ nienne luy montrant quatre siens enfans fort honnestes & bien moriginez, Tels, dit-
„ elle, doiuent estre les ouurages d'une Dame de bien & d'honneur, & voyla dequoy
„ elle se doit vanter & glorifier. Vne autre mere aiant eu nouvelles que son fils se H
„ gouuernoit mal en pais estranger où il estoit, luy escriuit, Il court vn mauuais bruit
„ de roy pardeçà, efface le, ou te meurs. Estans quelques ambassadeurs de Chio venus
à Sparte, qui accusoient & donnoient de grandes charges à Pedaretus, sa mere Teleu-
tia en aiant senty le vent les enuoya querir: & aiant entendu d'eux les charges dont
ils l'accusoient, apres qu'elle eut iugé en elle mesme qu'il auoit tort, elle luy rescriuit:
„ Teleutia mere, à Pedaretus son fils: Ou fais mieux, ou demeure là, n'esperant pas te
„ sauuer par deçà. Vne autre semblablement escriuit à son fils que lon accusoit de
„ quelque crime: Mon fils, deliure toy de ceste charge, ou de la vie. Vne autre ac-
„ compagnant son fils boirteux qui s'en alloit à la bataille, luy disoit: Mon fils, à chaf-
„ que pas souuienne toy de bien faire. Vne autre de qui le fils estoit retourné de la ba-
„ taille blessé au pied, & se plaignoit fort de la grande douleur qu'il sentoit: Mon fils,
dit-

- A dit-elle, si tu te veux souuenir de la vertu tu t'appaiseras, & ne sentiras plus de douleur. Vn Lacedemonien auoit tellement esté blessé en vne bataille, qu'il ne se pouuoit pas bien soustenir sur ses iambes, & falloit qu'il cheminaist à quatre pieds: & comme il eust honte de veoir les gens qui se rioient, sa mere luy dit: Et combien est il plus raisonnable, mon fils, de te resiouir pour le tesmoignage de ta prouesse, que d'auoir honte pour vn rire insensé? Vn autre baillant à son fils son bouclier, en l'admonestant de faire son deuoir: Mon fils, dit-elle, ou rapporte ce bouclier, ou qu'on te rapporte dedans. Vn autre baillant aussi le bouclier à son fils, partant pour s'en aller à la guerre, luy dit: Ton pere t'a tousiours conserué ce bouclier, aduise de le conseruer aussi, ou de mourir. Vne autre respondit à son fils qui se plaignoit d'auoir courte espee, Approche toy d'un pas. Vne autre entendant que son fils estoit mort tref-vaillamment en la bataille: Aussi estoit-il mon fils, dit-elle. Au contraire, vne autre entendant que son fils s'estoit sauué de viffesse: Aussi n'est-il pas à moy, dit-elle.
- B Vne autre entendant que son fils estoit mort en bataille, au mesme lieu où lon l'auoit mis: Ostez-le donc, dit-elle, de là, & mettez son frere en sa place. Vne autre estant en procession solennelle & publique avec vn chapeau de fleurs sur sa teste, entendit que son fils auoit gagné la bataille, mais qu'il estoit si griefuement blessé, qu'il estoit prest à rendre l'ame, sans oster son chapeau de fleurs de dessus sa teste, ains comme se glorifiant de ceste nouuelle: O combien dit-elle, mes amies, il est plus honorable mourir victorieux en bataille, que non pas suruiure apres auoir emporté le pris en la feste des ieux Olympiques! Vn frere racontoit à sa sœur, comme son fils estoit mort vaillamment à la guerre: & elle luy respondit, Autant comme j'ay de plaisir de luy, tout autant j'ay de desplaisir de toy, mon frere, que tu ne l'as accompagné en vn si vertueux voyage. Quelqu'un enuoyoit solliciter vne Lacedæmonienne, si elle vou-droit s'entendre avec luy: elle fit response, Quand j'estois fille j'apprenois à obeïr à mon pere, & j'ay tousiours faict: & depuis que j'ay esté femme, à mon mary: si donc ce que celuy-là me demande est honneste & iuste, qu'il le declare premieremēt à mon mary. Vne fille pauure estant enquisse quel douaire elle apporteroit à celuy qui l'espouseroit: La pudicité, respondit-elle, de mon pays. Vne autre estant interroguee, si elle estoit allée au mary: Non dit-elle, mais le mary à moy. Vn autre aiant esté occultement depucellee, & fait auorter son fruit, porta si patiemment les douleurs de son auortement, sans ietter vn seul cry, que iamais son pere ny ceux qui estoient autour d'elle, ne s'apperceurent aucunement qu'elle eust auorté: car le deshonneur combattant avec l'honnesteté vainquit la vehemence des douleurs. Vne Lacedæmonienne que lon vendoit interroguee qu'elle scauoit faire, respondit, Estre fidele. Vn autre aiant esté prisonniere, & semblablement estant interroguee, qu'elle scauoit faire, respondit, Bien garder la maison. Vne autre estant enquisse par quelqu'un, si elle seroit bonne fil l'achetoit: Ouy, respondit-elle, encorē que tu ne m'achettes pas. Vne autre que lon vendoit à l'encan, respondit au crieur qui luy demandoit ce qu'elle scauoit faire, Estre libre: Et comme celuy qui l'auoit achetee luy commandast quelque seruice indigne de personne libre: Tu te repentiras, dit-elle, de t'auoir enuié vn si noble acquest: & se feit elle mesme mourir.

Les vertueux faicts des femmes.

E



LE N'AY pas mesme opinion que Thucydides, Dame Clea, touchant la vertu des femmes : pour ce que luy estime, que celle-là soit la plus vertueuse, & la meilleure, de qui on parle le moins, autant en bien qu'en mal, pensant que le nom de la femme d'honneur doive estre tenu renfermé comme le corps, & ne sortir iamais dehors. Et me semble que Gorgias estoit plus raisonnable, qui vouloit que la renommée, non pas le visage, de la femme, fust cogneüe de plusieurs : & m'est aduis, que la loy ou coustume des Romains estoit tresbonne, qui portoit, que les femmes, aussi bien que les hommes, apres leur mort fussent publiquement honorees à leurs funerailles des loüanges qu'elles auroient meritees. Et pourtant incontinent apres le trespas de la tresvertueuse Dame Leontide, ie discouru dès lors assez longuement sur ceste matiere avec Froy, lequel discours ne fut point à mon aduis sans quelque consolation fondee en raison philosophique : & maintenant suyuant ce que tu me requis alors, ie t'enuoye le reste du propos, pour monstrier que c'est vne mesme vertu celle de l'homme, & celle de la femme, par la preuue de plusieurs exemples tirez des anciènes histoires, qui n'ont pas esté par moy recueillis en intention de donner plaisir à l'ouye : mais si la nature de l'exemple est telle, que tousiours à la force de persuader est conioincte aussi la vertu de delecter, mon propos ne reiettera point la grace du plaisir qui seconde & fauorise l'efficace de la preuue, ny n'aura point de honte de conioindre les Graces avec les Muses, qui est la plus belle assemblée du monde, comme dit Euripides, induisant l'ame à croire facilement les belles raisons par la delectation qu'elle y prend. Car si pour prouuer que c'est vn mesme art de peindre les femmes que les hommes, ie produisois de telles peintures de femmes, comme Apelles, ou Zeuxis, ou Nicomachus en ont laissees, y auroit-il homme qui m'en sceust avec raison reprendre, G en me mettant sus que i'aurois plustost visé à resiouir & delecter les yeux, que non pas à prouuer mon intention ? Je croy à mon aduis, que non. Et quoy, si d'ailleurs pour monstrier que la science poëtique de représenter en vers toutes choses, n'est point differente és femmes d'avec celle qui est aux hommes, ains toute vne mesme, ie venois à conferer les vers de Sappho avec ceux d'Anacreon, ou les oracles des Sibylles avec les responses de Bacchis, y auroit-il homme qui peust iustement blasmer celle demonstration, pource qu'elle attireroit l'auditeur à la croire avec plaisir & delectation ? Iamais homme ne le diroit. Et neantmoins il n'y a moyen de cognoistre mieux d'ailleurs la similitude ou difference de la vertu de la femme & de l'homme, qu'en conferant les vies aux vies, & les faicts aux faicts, comme en mettant l'un deuant l'autre les ouurages de quelque grande science, & considerant si la magnificence de la Roïne Semiramis a vn mesme air & mesme forme, que celle du Roy Sesostris : & H la prudence de Tanaquil, que celle du Roy Seruius : ou la magnanimité de Porcia que celle de Brutus, ou celle de Timoclea que celle de Pelopidas, en ce qui est principalement commun entre eux, & en quoy gist leur principale valeur : pource que les vertus prennent quelques autres differences, comme couleurs propres & particulieres, selon la diuersité des natures, & se conforment aucunement aux mœurs & conditions des subiects en qui elles sont, & aux temperatures des corps, aux aliments mesmes, & aux façons de viure : car Achilles estoit vaillant d'une forte, & Ajax d'une autre : & la prudence d'Ulysses n'estoit pas semblable à celle de Nestor, ny n'estoit pas Caton iuste de mesme qu'Agésilas, ny Irene n'aimoit pas son mary de la mesme façon que faisoit Alcestis, ny Cornelia n'estoit magnanime comme l'estoit Olympiade : mais pour cela nous ne dirons pas qu'il y ait plusieurs diuerses vertus de vaillance, ne plu-

A ne plusieurs prudences, ne plusieurs iustices, pour les dissimilitudes de la façon de faire particuliere qui est à vn chascun, lesquelles ne forcent point d'aduouër que la vertu soit diuerse. Or quant aux exemples qui sont plus vulgaires & plus communs, & dont ie presume que tu aies toute intelligence & cognoissance, pour les auoir leus és liures des anciens, ie les passeray pour le present, si ce ne sont d'adventure quelques faicts bien dignes de memoire qu'ayent ignoré ceux qui parauant nous ont escrit les communes chroniques & vulgaires histoires. Mais pource que les femmes par le passé, tant en commun qu'en particulier, ont fait plusieurs actes dignes d'estre remémoréz & couchez par escript, il ne sera pas mauuais d'en mettre deuant les autres quelques vns de ceux qu'elles ont faicts en communauté.

DES DAMES TROYENNES.

B LA plus part de ceux qui eschapperent de la prise & destruction de Troye la grande, coururent fortune, & furent iettez par la tourmente, avec ce qu'ils n'entendoient pas l'art de nauiger, ny ne cognoissoient pas la mer, en la coste de l'Italie: & festans garrez és abris, bayes & ports necessaires, à toute peine, à l'endroit où la riuieré du Tybre se desgorge en la mer, les hommes descendirent en terre, & allerent errans çà & là par le pays pour trouuer langue, & ce-pendant leurs femmes aduiferent entre elles, que quand bien ils seroient les mieux fortunez & plus heureuses gens du monde, encore seroit-il meilleur de s'arrester en quelque lieu, que d'aller tousiours ainsi vagans & errans par la mer, & faire là leur pays, puis qu'ils ne pouuoient recouurer celuy qu'ils auoient perdu. A quoy festans toutes accordees, elles bruslerent leurs vaisseaux, aiant cōmancé l'vne d'entre elles qui s'appelloit Rome: & l'aians executé, elles s'en allerent au deuant de leurs maris, qui accouroient vers la mer pour cueder secourir leurs vaisseaux, & craignans la fureur de leur courroux, les embrasserent & baiserent affectueusement, les vnes leurs maris, les autres leurs parens, & par ceste caresse les appaiserent. De là commança la coustume qui dure encore parmy les Romains, que les femmes salüent ainsi leurs parens, en les baissant à la bouche. Car les Troyens recognoissans la necessité qu'ils estoient contraincts d'ainsi le faire, & quant & quant trouuans les habitans du pays qui les receuoient humainement & amiablement, approuuerent ce que leurs femmes auoient faict, & s'habituerent en cest endroit-là de l'Italie parmy les Latins.

DES DAMES DE LA PHOCIDE.

D LE faict des Dames de la Phocide, duquel nous voulons faire mention, n'a point eu d'historien illustre qui l'ait redigé par escript: mais toutefois si ne cede-il en vertu à nul acte qui ait oncques esté fait par femmes, & si est tesmoigné par grands sacrifices que ceux de la Phocide celebrent encore iusques auourd'huy aupres de la ville de Hyampolis, & par des anciens decrets du païs. Or en est l'histoire entiere d'escrite de poinct en poinct en la vie de Daïphantus: mais quant à ce qui en appartient aux femmes, le faict est tel. Il y auoit vne guerre irreconciliable & mortelle entre ceux de la Thessalie & ceux de la Phocide, pour ce que ceux de la Phocide à vn iour nommé tuerent tous les Magistrats & Officiers des Thessaliens qui exerçoient tyrannie en leurs villes, & ceux de la Thessalie briserent avec des meules deux cents cinquante ostagers de la Phocide qu'ils auoient entre leurs mains: & puis avec toute leur puissance entrerent en armes dedans leur pays par celuy des Locriens, ayans premierement conclu & arresté en leur conseil, qu'ils ne pardonneroient à homme quelconque qui fust en aage de porter armes, & qu'ils feroient les femmes & les enfans esclaves.

Les vertueux faictz des femmes.

Parquoy Daïphantus le fils de Bathyllus, l'un des trois qui auoient l'autorité souveraine au gouuernement de la Phocide, leur persuada, que tous ceux qui seroient en aage de porter armes, allassent au deuant des Thessaliens pour les combattre : & au demourant quant à leurs femmes & à leurs enfans, qu'ils les assemblassent tous en vn certain lieu de la Phocide, & enuironnassent le pourpris du lieu de grande quantité de bois, & y meissent des gardes pour les garder, auxquels ils donnassent en mandement, que s'ils entendoient dire qu'ils eussent esté desfaictz, ils meissent le feu dedans le bois, & feissent bruller tous ces corps-là: ce que tous les autres aians approuué, il y en eut vn qui se leuant dit, qu'il estoit iuste & raisonnable d'auoir aussi le consentement des femmes là-dessus, & que si elles ne trouuoient ce conseil bon, qu'il le faudroit laisser, & ne les y point forcer. Ce propos estant paruenü iusques aux Dames, elles teindrent assemblée de conseil à par elles là-dessus, où elles resolurent de suiure l'aduis de Daïphantus, avec si grande allegresse, qu'elles en couronnerent Daïphantus d'un chapeau de fleurs, comme aiant donné vn très-bon conseil à la Phocide: & dit on, que les enfans mesmes en aians tenu conseil entre eux à part, conclurent de mesmes. Ainsi ceux de la Phocide aians donné la bataille aux Thessaliens pres du village de Cleones, és marches de Hyampolis, les desfeirent. Ceste resolution de ceux de la Phocide fut depuis appelée par les Grecs, le Desespoir: en memoire de laquelle victoire tous les peuples de la Phocide iusques auourd'huy celebrent, en ce lieu-là, la plus grande & plus solennelle feste qu'ils aient, en l'honneur de Diane, & l'appellent Elaphebolia.

DES DAMES DE CHIO.

Ceux de Chio fonderent iadis la ville de Leuconie par vne telle occasion. Vn ieune gentilhomme des meilleures maisons de Chio festoit marié: & comme on luy menoit sa femme en sa maison sur vn chariot, le Roy Hippoclus, qui estoit amy & familier du marié, & auoit assisté aux espousailles comme les autres, où lon auoit bien beu, bien ry, & fait bonne chere, faulta sur le chariot, où estoit la mariee, non pour y faire aucune violence ne villanie, mais seulement pour se iouer, comme la coutume estoit en telle feste: toutefois les amis du marié ne le prenans pas ainsi, le tuerent sur la place: à raison duquel homicide, festans monstrez à ceux de Chio plusieurs signes manifestes de l'ire & courroux des Dieux, & aiant l'oracle d'Apollo respondü, que pour l'appaiser il falloit qu'ils tuassent ceux qui auoient occis Hippoclus: Ils respondirent que c'estoient tous ceux de la ville qui l'auoient tué. Dieu leur commanda qu'ils eussent doncques tous à fortir de la ville de Chio, si tous estoient participans de ce meurtre. Ainsi meirent-ils hors de leur ville ceux qui estoient auteurs ou aucunement participans de ce crime, qui n'estoient pas en petit nombre, ny gens de petite qualité, & les enuoyerent habiter en la ville de Leuconie, qu'ils auoient parauant ostee & conquise sur les Coroniens, à l'aide des Erythreïens: mais depuis, guerre festant esmeüe entre eux & les Erythreïens, qui estoient pour lors le plus puissant peuple de tout le pays d'Ionie, & les estans les Erythreïens venus assaillir avec armee, ne pouuans resister, ils feirent composition, par laquelle il leur estoit permis de fortir avec vne robbe, & vn saye tant seulement, & non autre chose. Les femmes entendu cest appointment leur dirent iniure, fils auoient le cœur si lasche que de quitter leurs armes, & de s'en aller passer tous nuds à trauers leurs ennemis: & comme leurs maris alleguassent qu'ils auoient iuré, elle leur conseillèrent, comment que ce fust, de n'abandonner point leurs armes, & de leur dire, que la iaue-line estoit la robbe, & le bouclier le saye à tout homme de cœur. Ceux de Chio les creurent, & parlerent audacieusement aux Erythreïens, en leur monstrant leurs
armes

A armes, si bien qu'ils les effroyerent de leur audace, & n'y eut personne d'eux qui s'en approchast pour cuider les empescher, ains furent tous contens qu'ils s'en allassent, en leur quittant la place. Voyla comment ceux-là aians appris de leurs femmes la hardiesse de fasseur, sauuerent leur honneur & leur vie. Bien long temps depuis les femmes de la mesme ville de Chio feirent vn autre acte, qui ne cede de rien en vertu à celuy-là, lors que Philippus le fils de Demetrius tenant leur ville assiegee .
 B feut proclamer vn mandement par ses heraults, & vn cry merueilleusement superbe & barbare, Que les esclaves de la ville se rebellassent contre leurs maistres, & se veinssent rendre à luy, & qu'il leur donneroit liberté, & si leur feroit espouser à chacun leurs maistresses, femmes de leurs maistres. Les femmes en conceurent vn si grand courroux, & si grande indignation en leurs cœurs (avec les esclaves, qui eux mesmes en furent irritez comme elles, & leur assisterent) qu'elles prirent la hardiesse de monter sur les murailles de la ville, & d'y porter des pierres & des traicts, en priant
 B leurs hommes qui combattoient, d'auoir bon courage, & les admonestant de ne se laisser point de faire bien leur deuoir: si bien qu'en faisant de faict & de parole ce que elles pouuoient pour repoulser l'ennemy, à la fin elles contraignirent Philippus de se leuer de deuant la ville sans rien faire, & n'y eut pas vn esclave tout seul qui se rendist onques à luy.

DES ARGIENNES.

L E combat des Dames Argiennes à l'encontre du Roy de Lacedemone Cleomenes, pour la defense de leur ville d'Argos, qu'elles entreprirent sous la conduite & par l'enhortement de Telefilla, poëtisse n'est pas moins glorieux que autre exploict quelconque que iamais les femmes aient fait en commun. Ceste Dame Telefilla, à ce que lon treuve par escrit, estoit bien de maison noble & illustre, mais au de-
 C mourant fort maladiue de sa personne: à l'occasion dequoy elle enuoya deuers l'oracle pour sçauoir comment elle pourroit recouurer sa santé: & luy aiant esté respondu qu'elle seruist & honorast les Muses, elle obeissant à la reuelation des Dieux, & se mettant à apprendre la poësie & l'harmonie du chant, fut en peu de temps deliuree de sa maladie, & deuint tres-renommee & estimee entre les femmes, pour ceste partie de poësie. Depuis estant adueni que le Roy des Spartiates Cleomenes aiant tué en vne bataille grand nombre des Argiens, mais non pas toutefois comme quelques vns fabuleusement ont escrit precisément, sept mille, sept cents, septante & sept, s'enalla droit à la ville d'Argos, esperant la surprendre vuide d'habitans: il prit vne soudaine emotion de courage & de hardiesse inspiree diuinement aux femmes qui estoient en aage, de faire tout leur effort pour engarder les ennemis d'entrer dedans la ville: & de faict sous la conduite de Telefilla, elles prirent les armes, & se
 D mettans aux creneaux des murailles, les ceignirent & environnerent tout à l'entour, dont les ennemis demourerent fort esbahis. Si repoulserent le Roy Cleomenes avec perte & meurtre de bon nombre de ses gens, & chasserent l'autre Roy de Lacedemone Demaratus hors de leur ville, qui estoit desia entré bien auant dedans, & en auoit occupé le quartier qui s'appelle Pamphyliaque. Ainsi la ville aiant esté sauuee par leur prouesse, il fut ordonné, que celles qui estoient mortes au combat, ferroient honorablement inhumees sur le grand chemin que lon nomme la voye Argienne: & à celles qui estoient demourees, pour vn perpetuel monument de leur vaillance, on permit qu'elles consacraissent & dediaissent vne statue à Mars. Ce combat fut, ainsi comme les vns escriuent, le septième iour: où, comme les autres, le premier du mois que lon nommoit anciennement Tetartus en Argos, & maintenant sy appelle Hermeus, auquel les Argiens solennisent encore aujourd'huy vne feste

Les vertueux faicts des femmes.

solennelle qu'ils appellent Hybristica, comme qui diroit, l'infamie: où la coustume E est, que les femmes vestent des sayes & manteaux à vsage d'homme, & les hommes des corttes & des voiles à vsage de femmes: pour remplir le defect d'hommes en leur ville, au lieu de ceux qui estoient morts és guerres, ils ne feirent pas ce que dit Herodote, qu'ils marierent leurs esclaves avec leurs veufues, mais ils aduiferent de donner droict de bourgeoisie de leur ville, aux plus gens de bien de leurs voisins, & leur feirent espouser les veufues: & toutefois encore semble-il qu'elles les eurent en quelque mespris: car elles firent vne loy, que les nouuelles mariees auroient des barbes feintes au menton, quand elles coucheroient avec leurs maris.

DES PERSIENNES.

CYRUS aiant faict rebeller les Perses contre les Medes & leur Roy Astyages, il aduint qu'il fut rompu en vne bataille avec ses Perses, lesquels fuyans à val de route F vers leur ville, & estans les ennemis bien pres d'y entrer pelle-messe quand & eux, les femmes sortirent dehors au deuant d'eux, & reboursans leurs robbes du bas en hault par le deuant, leur crierent: Où fuyez vous, les plus lasches hommes qui soient au monde? car pour fuir vous ne pouuez pas rentrer icy d'où vous estes partis. Les Perses aians honte de veoir ceste façon de faire de leurs meres, & d'ouïr leurs voix aussi, en se tanfant & blasfant eux-mesmes, tournerēt visage, & retournans de rechef au combat, meirent en fuitte leurs ennemis. Depuis ce temps-là fut establie la loy, que toutes & quantesfois que le Roy, retournant d'aucun voyage loingtain, entre-roit dedans la ville, chasque femme auroit de luy vn escu, de l'ordonnance du Roy Cyrus. Mais on dit que l'un de ses successeurs Roy, nommé Ochus, qui ne valoit rien au demourant, ains estoit plus auaricieux que ne fut oncques Roy, tournoit tousiours à l'entour de la ville, & ne passoit iamais par dedans, ains frustroit tousiours les Dames du present qu'elles deuoient auoir: là où au contraire, Alexandre y entra par G deux fois, & si donna le double aux femmes grosses.

DES GAULOISES.

AVANT que les Gaulois passassent les montagnes des Alpes, & qu'ils eussent occupé celle partie de l'Italie où ils habitent maintenant, vne grande & violente sedition s'esmeut entre eux, qui passa iusques à vne guerre ciuile: mais leurs femmes ainsi que les deux armées furent prestes à s'entrechocquer, se ietterent au milieu des armes, & prenans leurs differens en main, les accorderent, & iugerent avec si grande equité, & si au contentement de toutes les deux parties, qu'il s'en engendra vne amitié & bien-veillance tresgrande reciproquement entre eux tous, non seulement de ville à ville, mais aussi de maison à maison: tellemēt que depuis ce temps-là ils ont tousiours con- H tinué de cōsultier des affaires tant de la guerre que de la paix, avec leurs femmes, & de pacifier les querelles & differens, qu'ils auoient avec leurs voisins & leurs allies, par le moyen d'elles. Et pourtant en la composition qu'ils feirent avec Hannibal, quand il passa par les Gaules, entre autres articles ils y meirent, que si l'aduenoit que les Gaulois pretendissent que les Carthaginois leur teinsent quelque tort, les Capitaines & gouverneurs Carthaginois qui estoient en Espagne en seroient les iuges: & si au contraire les Carthaginois vouloient dire que les Gaulois leur eussent faict quelque tort, les femmes des Gaulois en iugeroient.

DES MELIENNES.

LES Meliens se deliberans d'aller chercher vne terre à habiter plus fructueuse & plus

- A plus fertile que la leur esleurent pour conducteur & Capitaine de la troupe qu'ils enuoyent dehors, vn ieune homme de beauté excellente, lequel auoit nom Nymphæus, & aians premierement enuoyé à l'oracle, Dieu leur respondit qu'ils la cherchassent par mer, & qu'ils l'arrestassent & l'habituaissent au lieu où ils auroient perdu leurs porteurs. Or aduint il que eux estans abordez en la coste de la Carie, & descendus en terre, leurs vaisseaux y perirent pour la tourmente : & lors les habitans de la ville de Cryassa en la Carie, soit qu'ils eussent pitié de leur necessité, ou qu'ils redoubtassent leur hardiesse, les conuierent à demourer avec eux, & leur departirent vne quantité de terres : mais depuis voyans qu'en peu de temps ils auoient pris vn grand accroissement, ils leur dresserent embusches pour les tuer, en vn grand festin & soupper, qu'ils leur preparerent. Or y auoit-il vne ieune fille Carienne nommee Caphéne, qui estoit secrettement amoureuse de Nymphæus, & ne pouuant supporter que lon feist ainsi proditoirement mourir son amy, elle luy descouurit la deli-
 B liberation, & l'entreprise de ceux du pays. Quand doncques les Cryassiens les vindrent querir pour aller au festin, Nymphæus feit response, que la coustume des Grecs n'estoit point d'aller souper en festins, qu'ils n'y menassent leurs femmes quand & eux : quoy entendu, les Cariens leur dirent, qu'ils amenassent doncques leurs femmes en bonne heure. Ainsi aiant donné à entendre à ses gens, ce que les Cariens leur vouloient faire, il leur dit qu'ils veinssent quant à eux sans armes en leurs robes simples, mais que chascune de leurs femmes apportast dedans le plis de sa robe vne espee, & qu'elle l'asseist aupres de son mary. Quand ce fut au milieu du soupper que lon donna le signal aux Cariens pour mettre la main à la besongne, les Grecs incontinent cogneurent bien que c'estoit le poinct de l'occasion, qu'il falloit mener les mains : les femmes toutes à vn coup ouurirent leurs giron, & leurs maris se faissans de leurs espees, coururent sus aux Barbares, & les massacrerent tous en la place, sans en excepter vn : ainsi aians conquis le pays & razé leur ville, ils en bastirent
 C vne autre qu'ils appellerent la nouuelle Cryasse. Et Caphéne estant mariee avec Nymphæus, receut l'honneur & la grace qu'elle meritoit, pour le grand bien qu'elle leur auoit faict. Si me semble que ce qui est plus à louer & estimer en ce faict, c'est le silence & l'assurance de ces Dames, & que iamais entant qu'elles estoient, il n'y en eut vne seule à qui le cœur faillist en ceste entreprise ne qui contre sa volonté à faute de courage y feist aucun mauuais office.

DES THOSCANS.

- IL y eut iadis quelques Tyrrheniens & Thoscans qui occuperent les Isles de Lemnos & d'Imbros, & rauirent quelques femmes des Atheniens du bourg de Lauria, desquelles ils eurent des enfans : mais les Atheniens depuis les chasserent desdites
 D Isles, comme estans mestifs & demy-Barbares : & eux estans par fortune arriuez au promontoire de Ténarus firent seruice bien à poinct aux Spartiates en la guerre qu'ils auoient contre leurs Ilotes : & pour ceste cause aians obtenu droict de bourgeoisie à Sparte, & des femmes en mariage, sans toutefois estre admis aux offices ny magistrats & sans pouuoir estre du Conseil, ils vindrent à estre soupçonnez de vouloir remuer quelque nouuelleté, & de s'assembler & conspirer ensemble, pour changer le gouvernement. Parquoy ceux de Sparte les aians saisis au corps, les meirent en prison, & les teindrent en bien estroite garde, pour veoir s'ils pourroient conuaincre par preuues certaines & indubitables : ce-pendant les femmes de ces prisonniers vindrent en la prison, & firent tant par prieres & obsecrations enuers les gardes, qu'ils les laisserent entrer seulement pour veoir & saluer leurs maris. Quand elles furent entrees, elles leur conseilèrent qu'ils despouillassent vistement leurs habillemens, &

Les vertueux faiçts des femmes.

vestissent ceux d'elles, & qu'ils s'en allassent ainsi se bouschans & affublans le visage : ce qui fut faiçt, & demourerent elles enfermees en la prison, se preparans à soutenir tous les maux que lon leur pourroit faire. Les gardes laisserent sortir leurs maris, pensans que ce fussent les femmes. Eux estans ainsi sortis allerent incontinent occuper le mont de Taugeta, & susciter les Ilotes à prendre les armes & se rebeller : ce que craignans ceux de Sparte, leur enuoyerent vn herault, par lequel ils appointerent auec eux, que lon leur rendroit leurs femmes, leur argent, & tous leurs biens, & leur fourniroit-on de nauires, esquelles ils s'en iroient par mer chercher leur aduventure, & quand ils auroient trouué pais & ville à se loger, ils seroient nommez & reputez parents des Lacedemoniens, & colonie extraitte & descendue d'eux. L'accord ainsi passé, ils prirent pour leurs Capitaines Pollis, Adelphus & Crataïdas Lacedemoniens, & y en eut vne partie d'eux qui s'arrestèrent en l'Isle de Melo : mais la plus grande troupe, sous la conduicte de Pollis s'en alla en Candie, attendant si les signes qui leur auoient esté predicts par les oracles, leur aduiendroient point : car il leur auoit esté respondu, que quand ils auroient perdu leur ancre & leur Deesse, que là ils meissent fin à leur voyage, & qu'ils y bastissent vne ville. Estans doncques venus surgir en la peninsule de la Cherronese, se meit la nuit parmy eux vne frayeur, sans occasion quelconque apparente, que lon appelle terreur panique, dequoy estans effrayez & troublez ils se ietterent en tumulte sans ordre dedans leurs vaisseaux, delaisans à terre l'image de Diane qu'ils auoient eue de pere en fils, aiant esté apportee par leurs predecesseurs de Brauron en l'Isle de Lemnos, & de là par tout auec eux : apres que le tumulte de l'effroy fut passé, ainsi comme ils cingloient desia en pleine mer, ils s'apperceurent qu'ils auoient oublié leur image, & quant & quant Pollis se prit garde que la prise de leur ancre estoit perdue, pource que quand on vint à la tirer à force, comme il aduiant, des lieux où elle estoit fichee parmy des rochers, elle se rompit & y demoura : si dit que les oracles qui leur auoient esté predicts, estoient accomplis, donna le signal à la flotte de retourner arriere, occupa le pais, & aiant en plusieurs rencontres rompu ceux qui se trouuerent en armes deuant luy, il se logea en la ville de Lyctus, & en prit plusieurs autres. Voyla d'où vient qu'encore auioird'huy ils se disent parents des Atheniens du costé de leurs meres, & du costé de leurs peres estre colonie deriuee des Lacedemoniens.

DES LYCIENNES.

*Les Poëtes
seignent que
c'estoit vn
cheval ailé,
mais il est
vray-semblable,
que
c'estoit vn
vaisseau
fort leger.
Homere
Iliad. liu. 6.*

CE que lon recite comme estant aduenue en la Lycie, est bien vn conte faiçt à plaisir, mais si est-il neantmoins tesmoigné par vne constante renommee. Car Amisodarus, que les Lyciens appellent Isaras, ainsi que lon raconte, vint des marches de la ville de Zelee, qui est colonie des Lyciens, auec vne grosse flotte de coursaïres, dont estoit chef & Capitaine vn pirate qui se nommoit Chimarrus, hōme belliqueux, mais cruel & inhumain, qui auoit pour enseigne du vaisseau, sur lequel il estoit, à la proue vn lion, & sur la poupe vn dragon, il faisoit de grands maux en toute la coste de la Lycie, tellement qu'il n'estoit pas possible de nauiguer la mer, ny habiter es villes maritimes, & voisines du riuage. Ce coursaire doncques aiant esté mis à mort par Bellerophon qui le poursuyuit fuyant auec son Pegasus*, tant qu'il l'attrapa, & outre cela aiant encore chassé les Amazones de la Lycie, pour tout cela non seulement il n'eut aucune recompense digne de ses seruices du Roy de Lycie Iobates, mais qui pis est, encore luy faisoit-il beaucoup de torts : à l'occasion dequoy Bellerophon estant fort indigné, entra dedans la mer, là où il feit prieres à Neptune contre luy, qu'il luy rendist sa terre infructueuse & sterile, & sa priere faite se retira : là où il aduint vn estrange & horrible spectacle, c'est que la mer s'enfla, qui vint inonder tout le pais, le

- A le suyuant suspendue pas à pas par tout où il alloit, & courant apres luy toute la campagne. Et pource que les hommes, qui firent tout ce qui leur fut possible de le prier, qu'il voulust arrester ceste inondation de la mer, ne le peurent oncques obtenir de luy, les femmes leuant leurs cottes pardeuant, luy allerent à l'encontre: ce qui de honte le feit retourner en arriere, & la mer se retira aussi quand & luy en son giste. Or quelques vns interpretans vn peu plus gracieusement la fabulosité de ce conte, disent que ce ne fut pas par imprecations qu'il attira la marine, mais que la partie du pais de la Lycie, qui estoit la plus fertile, estant basse & plaine, il y auoit vne leuee tout le long de la coste qui la defendoit: Bellerophon la rompit, & ainsi la mer venant à entrer par grande impetuosité, & à noyer tout le plat pais, les hommes firent tout ce qu'ils peurent par prieres enuers luy pour le cuyder appaiser, & n'y gaignerent rien: mais les femmes l'enuironnans, à grandes troupes, de tous costez, le presserent tant, qu'il eut honte de les refuser, & en leur faueur oublia son mal-talent.
- B Les autres disent que Chimera estoit vne haute montagne, droittement opposee au Soleil du midy, qui faisoit de grandes refractions & reuerberations des rayons du Soleil, & par consequence des inflammations ardentes, comme feu en la montagne lesquelles venans à s'estendre & resprendre parmy la campagne mesme, faisoient secher & fener tous les fruiçts de la terre. Dequoy Bellerophon, homme de grand entendement, ayant compris la cause, feit fendre & couper en plusieurs endroiçts la face du rocher qui estoit la plus vnie & polie, & consequemment qui rebattoit plus les rayons du Soleil, & en enuoyoit de plus grandes ardeurs en la campagne: & pour autant qu'il n'en fut pas recogneu par les habitans, comme il meritoit, par despit il se meit à vouloir prendre vengeance des Lyciens, mais les femmes firent de sorte qu'elles appaiserent sa fureur. Mais au demourant, la cause qu'allegue Nymphis en son quatriémeliure d'Heraclee, n'est pas faicte à plaisir: Car il dit, que ce Bellerophon-tes, aiant tué vn sanglier qui gastoit tous les fruiçts de la terre, & les autres animaux
- C dedans le pais des Xanthiens, il n'en eut aucune recompense: à l'occasion dequoy aiant faict de griefues imprecations contre ces ingrats Xanthiens à Neptune, il vint vne certaine saumure par dessus leur terre, qui la gasta toute, & la feit deuenir amere, iusques à ce qu'ayant esté gaigné par les prieres & supplications des femmes, il pria Neptune de vouloir remettre son courroux. Voy-la pourquoy la coustume en est demouree au pays des Xanthiens, que les hommes en tous affaires se renomment du costé des meres, & non pas du costé des peres.

DES S A L M A T I D E S.

- HANNIBAL fils de Barca, deuant qu'il passast en Italie pour y faire la guerre aux Romains, combatit vne grosse ville d'Espagne qui se nōmoit Salmatique: les assiégez
- D du commencement eurent peur, & promirent qu'ils feroient ce que Hannibal leur commanderoit, & luy payeroient trois cents talents en argent, & trois cents ostagers pour seureté de la capitulation: mais si tost que Hannibal eut leué son siege, ils se repentirent de l'appointement qu'ils auoient faict avec luy, & ne firent rien de tout ce qu'il auoient promis. Parquoy retournant de rechef mettre le siege deuant la ville, pour donner plus grand courage à ses gens de l'assaillir, il leur dit, qu'il leur abandonnoit le pillage: dequoy ceux de la ville se trouuans effroyez, se rendirent à discretion, & les Barbares leur permeirent de sortir de la ville avec chascun vne robbe, ceux qui estoient de condition libre, en abandonnant leurs armes, leurs biens, leur argent, leurs esclaves, & leur ville. Leurs femmes se doubans bien que les ennemis au sortir de la porte fouilleroient leurs maris, & qu'à elles ils ne toucheroient point, elles prirent des espees, & les cachèrent dessoubs leurs robbes, & sortirent à

Les vertueux faicts des femmes.

tout quand & leurs maris. Quand ils furent tous sortis, Hannibal leur baillant vne garnison de Massiliens pour les garder, les arresta au fauxbourg: & ce-pendant tout le reste de son armee se ietta à la foule dedans la ville, qui fut toute pillée, sans ordre quelconque: quoy voyans ces Massiliens perdoient patience, & ne se pouuoient contenir, ny entendre à bien garder leurs prisonniers, ains se courrouçoient, & finalement s'en alloient pour auoir aussi bien que les autres leur part du butin. Mais sur ces entrefaittes les femmes se prirent à crier, & donnerent à leurs hommes les espees qu'elles auoient apportees, & aucunes se ruerent elles mesmes dessus leurs gardes, tellement qu'il y en eut vne qui osta à Banon le truchement, la picque qu'il tenoit, & luy en donna en l'estomach, mais il estoit armé d'un corps de cuirasse: & les maris en abbatans les vns & tournans les autres en fuite, se sauuerent par ce moyen avec leurs femmes en troupe: quoy entendant Hannibal, alla soudainement apres, surprit ceux qui estoient demourez derriere, & ce pendant les autres se sauuerent aux prochaines montagnes sur l'heure: mais depuis enuoyans demander pardon, Hannibal le leur donna gracieusement, & leur permit de reuenir demourer en leur ville.

DES MILESIENNES.

IL fut vn temps que les filles des Milesiens entrèrent en vne estrange refuerie & terrible humeur, sans que lon en veist aucune cause apparente, sinon que lon coniecturoit qu'il falloit que ce fust quelque empoisonnemēt d'air, qui leur cauſoit ce deuoyement & alienation d'entendement: car il leur prenoit à toutes vne soudaine enuie de mourir, & vn furieux appetit de ſaller pendre, & y en eut plusieurs qui se pendirent & estranglerent ſecrettement, & n'y auoit ny remonstrances, ny larmes de pere & de mere, ny conſolations d'amis, qui y ſeruissent de rien: car pour ſe faire mourir elles trouuoient tousiours moyen d'affiner & tromper toutes les ruses & inuentions de ceux qui faisoient le guet ſur elles: de maniere que lon estimoit que ce fust quelque punition diuine, à laquelle nulle prouiſion humaine ne ſceust trouuer remede, iuſques à ce que par l'aduiſ de l'un des citoyens homme ſage, il ſe ſeit au conſeil vn Ediēt, que ſil aduenoit qu'il ſen pendist plus aucune, elle ſeroit portee toute nue à la veuē de tout le monde à trauers la grande place. Ceſt Ediēt fait & ratifié par le Conſeil, ne reprima pas ſeulement pour vn peu, mais arreſta du tout la fureur de ces filles qui auoient enuie de mourir. Or eſt-ce vn grand ſigne de bonne & vertueuſe nature que la crainte d'infamie & de deſhonneur, & veu qu'elles ne redoutoient ny la mort, ny la douleur, qui ſont les deux plus horribles accidens que les hommes puiſſent ſouffrir, qu'elles ne peurent ſupporter vne imagination de villanie, ny de honte & de deſhonneur, qui ne leur deuoit encore aduenir ſinon apres leur mort.

DES CIENNES.

H

LA couſtume eſtoit des filles de Cio, qu'elles alloient enſemble és temples publiques, là où elles demouroient tout le long du iour, & leurs amoureux qui les ſuyuoient en mariage, les regardoient iouer & baller enſemble, & le ſoir elles alloient és maiſons les vnes des autres par ordre, là où elles ſeruoient aux peres & meres, & aux freres, les vnes des autres, iuſques à leur lauer les pieds. Or aduenoit-il que bien ſouuēt pluſieurs des ieunes hommes aimoiēt vne meſme fille: mais leur amour eſtoit ſi bon ſi honneſte, & ſi modeſte, que ſi toſt qu'elle eſtoit fiancée à l'un, les autres ſe deportoiēt de luy faire l'amour: mais en ſomme l'honneſteté de ces femmes ſe peut cognoiſtre à cela, que en l'eſpace de ſept cens ans il n'eſt point de memoire que iamais il y ait eu femme mariee qui ait commis adultere, ne fille qui hors mariage ait eſté depucellee.

DES

A

DES AMPHISSEIENNES.

LES tyrans de la Phocide aians occupé la ville de Delphes, & pour occasion d'icelle occupation les Thebains leur faisant la guerre, il aduint que les femmes dediees à Bacchus, que lon appelle les Thyades, qui vaut autant à dire comme les forsenecs, furent esprises de leur fureur, & courans vagabondes çà & là de nuit, ne se donnerent de garde qu'elles se trouuerent en la ville d'Amphisse, là où estant lassées, & non encore retournees en leur bon sens, elles se coucherent de leur long au milieu de la place, & s'endormirent. Dequoy estans aduerties les femmes des Amphisseiens, & craignās qu'elles ne fussent violees par les souldards des tyrans, dont il y auoit garnison en la ville, d'autant que la ville estoit alliee & confederee des Phociens, elles accoururent routes en la place, & se mettans à l'entour d'elles sans mot dire, les laisserent dormir sans les esueille: puis quand elles se furent d'elles mesmes esueillees, elles se meirent à les traitter, chacune la siene, & à leur donner à manger: puis finablement aiant demandé congé de ce faire à leurs maris, les conuoyerent à sauueté, iusques aux montagnes.

VALERIA ET CLOELIA.

L'OUVRAGE faict à vne Dame Romaine nommee Lucretia, ensemble la vertu d'icelle, furent cause de faire chasser de son estat Tarquinius Superbus septième Roy des Romains apres Romulus. Ceste Dame estant mariee à vn grand personnage, & qui de parenté appartenoit à ceux du sang Royal, fut violee & forcee par l'vn des enfans de ce Roy Tarquin, qui estoit logé chez elle: à l'occasion dequoy elle fait assembler tous ses parens & amis, & apres leur auoir déclaré & faict entendre l'outrage que on luy auoit faict, elle se tua sur l'heure en leur presence. Et Tarquin pour ceste cause aiant esté chassé de son Royaume, suscita plusieurs autres guerres aux Romains, pour penser recouurer son estat, & finablement fait tant enuers Porfena Roy de la Thoscane, qu'il luy persuada d'aller mettre le siege deuant la ville de Rome avec grosse puissance: & leur estant outre la guerre suruenue encore la famine, dont ils se trouuoient fort pressez, entendans que Porfena estoit non seulement prince vaillant aux armes, mais aussi debonnaire & iuste, ils le voulurent faire iuge des differents qu'ils auoiēt à l'encontre de Tarquin. Mais Tarquin s'opiniastra au contraire disant, que s'il ne demouroit ferme & constant allié, aussi peu seroit-il puis apres iuste iuge. Porfena le laissant & se departant de son alliance, entendit à faire en sorte qu'il s'en retournast en bonne paix & amitié avec les Romains, en recourant d'eux toutes les terres qu'ils auoient occupees en la Thoscane, & les prisonniers qu'ils auoient pris en ceste guerre. Pour l'assurance duquel appointment on luy bailla des ostages dix fils, & dix filles, entre lesquelles estoit Valeria fille du Consul Publicola: & cela fait il rompit incontinent son camp, & tout appareil de guerre, quoy que tous les articles de la capitulation ne fussent pas encore accomplis. Ces filles estans en son camp, descendirent vers la riuere, cōme pour s'y baigner & lauer, vn peu arriere du camp, & à la suscitation de l'vne d'entre elles qui auoit nom Clœlia, apres auoir entortillé leurs habillemens à l'entour de leurs testes, elles se ietterent à trauers la riuere qui estoit impetueuse, & passerent à nage, & s'entre-aidans les vnes aux autres avec grand trauail & grande peine. Il y en a qui disent que ceste fille Clœlia aiant trouué moyen de recouurer vn cheual monta dessus, & trauersa la riuere tout doucement, montrant le chemin aux autres, & leur donnant courage & support à nager à l'entour d'elle: mais pour quelle raison ils le coniecturent ainsi, nous le dirons cy apres. Quand les Romains les veirent passees à sauueté, ils eurent bien leur vertu & leur hardiesse en admiration,

Les vertueux faicts des femmes.

mais ils ne furent pas contents de leur retour, ny ne voulurent pas souffrir qu'on leur E peust reprocher d'auoir tous ensemble moins de foy qu'un homme seul. Et pour- tant commanderent aux filles de s'en retourner de là où elles estoient venues, & enuoyerent quant-&-quant escorte pour les conduire: mais quand elles eurent re- passé la riuere du Tybre, il s'en fallut bien peu qu'elles ne fussent prises par vne em- busche que Tarquin leur auoit dressée sur le chemin: mais la fille du Consul, Valeria, s'en fuit la premiere avec trois seruiteurs dedans le camp de Porfena, & son fils A- runs courant soudainement au secours des autres, quand il en ouyt la nouuelle, les recourut des mains des ennemis. Quand elles furent toutes amenees deuant le Roy, il leur demanda laquelle c'estoit qui auoit donné courage à ses compagnes de passer la riuere, & qui leur auoit la premiere donné ce conseil. Les autres craignans que le Roy n'en voulust faire souffrir quelque peine à Clœlia, n'en voulurent mot dire, mais elle mesme confessa que c'estoit elle. Et Porfena estimant beaucoup sa vertu, feit amener vn des plus beaux cheuaux de son escuyrie magnifiquement enharnaché, qu'il F luy donna: & qui plus est, pour l'amour d'elle renuoya courtoisement & humaine- ment toutes les autres. C'est la coniecture par laquelle aucuns iugent, que Clœlia trauerfa la riuere dessus vn cheual: les autres disent que non, mais que le Roy s'estant esmerueillé de sa force & de sa hardiesse, comme estant plus grande que d'une femme, l'estima digne du present que lon a accoustumé de faire à vn bon homme de guerre: tant y a qu'en memoire de ce faict on en voit encore aujourd'huy vne statue de pu- celle estant à cheual, en la rue que lon appelle la Rue sacree, laquelle statue aucuns disent estre de Clœlia, les autres de Valeria.

MICCA ET MEGISTO.

A R I S T O T I M V S aiant vsurpé la tyrannie & violente domination sur les Eliens, moyennant l'espaule & la faueur que luy faisoit le Roy Antigonus, abusoit inhumai- G nement & excessiuelement de son pouuoir: car outre ce que de sa nature il estoit hōme violent, encore estoit-il contrainct, par crainte, d'obeir & complaire à des Barbares, gens ramassez de toutes pieces, qu'il auoit assemblez pour garder sa personne & son estat, & de leur laisser faire plusieurs insolences, & plusieurs cruantez à l'encontre de ses subiects: comme fut entre autres l'inconuenient qui arriua à Philodemus, lequel auoit vne belle fille nommee Micca, de laquelle vn des Capitaines du tyran, qui s'ap- pelloit Lucius, vouloit faire son plaisir, non tant pour amour qu'il luy portast, que pour vn appetit desordonné de la violer & deshonorer: si luy manda qu'elle vint parler à luy: & le pere & la mere voyans que voulussent ou non, ils seroient contraincts de ce faire, luy dirent qu'elle y allast: mais la pucelle estant genereuse & magnanime en les embrassant, & se iettant à leurs pieds, les supplia de la laisser plustost tuer, que de souffrir que sa virginité luy fust meschamment & villainement ostee. Mais pour- H ce qu'elle demouroit trop à venir au gré de Lucius, qui brusloit de concupiscence, & auoit bien beu, il se leua de la table en cholere, & s'y en alla luy mesme: & trouuant Micca qui auoit la teste entre les genoux de son pere, il luy commanda qu'elle le suyust: ce qu'elle refusa de faire: & lors luy deschirant ses vestemens, il la fouëtta toute nue sans qu'elle dist vn seul mot, endurant quant à elle en patience & en silence toutes ces douleurs: mais son pere & sa mere voyans que pour le prier & pour plorer, ils ne gaignoient rien, se prirent à implorer l'aide des Dieux & des hommes, crians à haute voix, que lon leur faisoit vne iniure indigne, & vn outrage insupportable. A raison de quoy le Barbare, entrant totalement en fureur d'yurongnerie & de cholere, tua la pauvre fille au mesme estat qu'elle estoit, aiant le visage dedans le giron de son pere. Mais pour tout cela le tyran ne s'en amollit de rien, ains en tua plusieurs des citoyens

A citoyens, & en bannit encore d'auantage, tellement que lon dit qu'il y en eut huiët cents qui s'enfuirent en Ætolie, lesquels l'enuoyerent requerir de leur permettre qu'ils pussent retirer leurs femmes & leurs petits enfans: mais vn peu apres comme de luy mesme il feit crier à son de trompe, que les femmes qui s'en voudroient aller deuers leurs maris, s'en allassent, & qu'il leur permettoit de pouuoir emporter quand & elles tant comme elles voudroient de leurs biens: & quand il sceut qu'elles estoient toutes fort aises de ce cry, & l'auoient recueilly avec vn grand contentement, car elles estoient en nombre de plus de six cens, il leur commanda qu'elles partissent toutes ensemble à certain iour qu'il leur ordonna, promettant de leur donner escorte pour les conduire à seureté. Quand le iour qui leur auoit esté prefix fut escheu, elles s'assemblerent aux portes de la ville, aians faict leurs pacquets des hardes qu'elles vouloient emporter, tenans entre leurs bras partie de leurs enfans, & faisans emmener les autres sur des chariots, s'entre-attendans les vnes les autres: mais soudainement plusieurs de ces soudards & satellites du tyran leur coururent sus, en leur criant de tout loing, Demeure, demeure. Puis quand ils furent tout pres d'elles, ils commanderent aux femmes de s'en retourner arriere, & faisans rebourser les chariots & cheuaux vers elles, les chasserent à toute bride à trauers la troupe, ne leur permettant ny d'y aller, ny d'arrester, ny de secourir leurs petits enfans, qu'elles voyoient mourir deuant leurs yeux: car les vns perissoient en tombant de dessus leurs chariots à terre, les autres sous les pieds des cheuaux: & ce-pendant ces satellites à grands coups de fouët & grands cris, comme si c'eussent esté des moutons, les pressoient de telle sorte, qu'elles tomboient les vnes sur les autres, iusques à ce qu'ils les eurent toutes iettees dedans les prisons: leurs biens & leurs hardes furent rapportees à Aristotimus. Dequoy ceux d'Elide estans fort desplaisans, les religieuses sacrees à Bacchus, que lon appelle les Seize, tenans en leurs mains des rameaux de suppliantes, & à l'entour de leurs testes des chapeaux de branches de vigne, s'en allerent trouuer

C Aristotimus sur la place. Les satellites qu'il auoit autour de luy pour la seureté de sa personne, se fendirent par reuerence pour les laisser approcher: & elles du commencement teindrent silence sans autre chose faire que tendre humblement & religieusement leurs rameaux de suppliantes: mais quand le tyran apperceut que c'estoit pour les femmes Eliennes qu'elles le venoient supplier, à fin qu'il eust pitié d'elles, se courrouçant à ses soudards, & criant apres eux, pour ce qu'ils les auoient laissées ainsi approcher, il les fit chasser hors de la place, en poulfant les vnes & frappant les autres: & outre cela, encore condamna-il chascune desdittes religieuses en deux talents d'amende. Ces choses ainsi faictes, il y eut dedans la ville l'vn des citoyens nommé Hellanicus, homme iâ bien auant sur son aage, qui suscita vne coniuration à l'encontre de luy, sans qu'il s'en deffiait, ne pensant pas qu'il deust iamais rien entreprendre contre luy, tant pour ce qu'il estoit desia fort vicil, que pour ce qu'il luy estoit

D mort de nagueres deux de ses enfans: & au mesme temps du costé de l'Ætolie les bannis estans passez se saisirent d'vne forte place dedans le territoire d'Elide, qui s'appelloit Amymone, situé en lieu bien commode pour faire la guerre, & y receurent encore plusieurs autres des habitans de la ville qui sy en coururent incontinent que ils en sceurent les nouuelles: ce que craignant le tyran Aristotimus s'en alla deuers leurs femmes en la prison, & cuidant venir mieux à bout de ses desseings par crainte que par amour, il leur commanda d'enuoyer deuers leurs maris, & leur escrire qu'ils fortissent hors du païs, en les menassant s'ils ne le faisoient, de les faire toutes mourir, apres auoir deschiré à coups de fouët & tué deuant eux leurs enfans. Or toutes les autres ne luy respondirent rien, combien qu'il demourast longuement à les presser de luy dire si elles le feroient ou non, ains s'entre-regardoient les vnes les autres sans mot dire, comme s'entredonnans à cognoistre qu'elles n'auoient point de peur,

Les vertueux faicts des femmes.

& ne festonnoient point de ses menasses. Mais vne nommee Megisto femme de Timoleon, que les autres tenoient comme pour leur Capitaineſſe, tant pour l'honneur de son mary, que pour la vertu d'elle meſme, ne daigna pas ſe leuer, ny ne ſouffrit pas
" que les autres ſe leuaſſent non plus, ains luy reſpondit toute aſſiſe: Si tu eſtois hom-
" me ſage, tu ne parleroſ pas à des femmes pour cuider contraindre leurs maris, ains
" enuoyeroſ deuers eux, comme deuers ceux qui ont toute puiſſance ſur elles, pour
" leur porter de meilleurs propos que ceux par leſquels tu nous as trompees: mais ſi
" n'eſperant pas de leur pouuoir rien perſuader, tu penſes les circonuenir & trom-
" per par le moyen de nous, il ne fault pas que tu t'attendes de nous pouuoir iamais plus
" abuſer, ny qu'eux auſſi ſoient ſi maladiſez, ne de ſi peu de cœur, que pour des fem-
" mes & des petits enfans, ils ſoient pour quitter & abandonner la liberté de leur païs:
" car ce ne leur eſt pas tant de perte de nous perdre, veu meſmement qu'ils ne nous
" ont pas maintenant, comme ce leur eſt de bien, de deliurer leur pays & leurs citoyens
" de ton outrageuſe cruauté. Ainſi que Megiſto luy tenoit ces propos, Ariſtotimus F
n'en pouuant plus endurer, commanda que lon luy apportat ſon petit ſils pour le
tuer deuant ſes yeux: & comme ſes ſatellites le cerchaſſent parmy les autres petits
garçons qui ioüoient & luictoient enſemble, ſa mere l'appella elle meſme par ſon
" nom, diſant, Viença mon ſils, à fin que tu ſois deliuré de la cruelle tyrannie de
" ceſtuy, auant que tu aies ſentiment ny iugement de la cognoiſtre: car il me ſeroit trop
" plus grief de te veoir indignement ſeruir, que non pas de mourir. Ariſtotimus adonc
par impatience de cholere deſguainant ſon eſpee, courut vers elle pour la frap-
per elle meſme, n'eust eſté que l'un de ſes familiers appellé Cylon, qui faiſoit ſem-
blant de luy eſtre fidele, & neantmoins le haïſſoit en ſon cœur, & eſtoit des com-
plices de la coniuration de Hellanicus, ſe meit au deuant, & l'en deſtorna par prie-
res, luy remonſtrant que cela n'eſtoit point fait en homme genereux, ains tenoit
de la femme, & non du Prince, ny de perſonnage ſçachant manier de grands affai-
res: tellement qu'à grande peine peut-il tant faire, que retourné en ſon ſens raiſſis, il G
ſ'en voulut aller de là. Or luy aduint-il vn grand preſage & ſigne de ce qui eſtoit
preſt à luy arriuer: car ſur le hault du iour, ainſi comme il eſtoit en ſa chambre à ſe
repoſer avec ſa femme, & que lon appreſtoit ſon ſouper, ceux de la maiſon apper-
ceurent vn aigle roüant en l'air, au deſſus de ſon hoſtel, qui laſcha vne aſſez groſſe
pierre droit ſur l'endroit de la couuerture de la chambre où il ſe repoſoit, comme ſi
de propos deliberé il euſt viſé à ce faire. Ainſi aiant ouy le bruit de la pierre tombee
de deſſus, & le cry de ſes domeſtiques qui auoient veu ce pronostique tout enſem-
ble de dedans la maiſon, il ſ'en effroya, & demanda que c'eſtoit: l'aiant entendu, il
enuoya querir ſur la place le deuin duquel il ſe ſouloit ſeruir, & luy demanda tout
troublé, que vouloit dire ce preſage. Le deuin le reconforta, diſant que c'eſtoit Iu-
piter qui l'eſueilloit, & qui monſtroit de le vouloir ſecourir: mais aux citoyens dont H
il ſe fioit il aſſeura, que c'eſtoit la vengeance diuine qui deuoit bien toſt tomber ſur
la teſte du tyran: & pourtant Hellanicus & ſes adherens furent d'opinion qu'il ne
falloit plus diſſerer, ains luy courir ſus dès le lédemain. Et la nuit meſme il fut aduis à
Hellanicus, en dormant, que l'un de ſes enfans morts ſe preſenta à luy, qui luy dit:
" Pere, comment t'amuſes-tu encore à dormir, veu que demain tu dois eſtre eſleu Ca-
" pitaine general de ceſte ville? Hellanicus encouragé de ceſte viſion alla ſolliciter ſes
compagnons: & Ariſtotimus eſtant aduertty comme Craterus venant pour le ſecou-
rir avec vne puiſſante armee eſtoit campé aupres d'Olympe, en prit vne telle aſſeu-
rance, qu'il ſ'en alla avec Cylon ſur la place ſans aucunes gardes: & lors Hellanicus
voyant le point de l'occafion venu, ne donna pas le ſigne qui eſtoit cōuenü entre eux,
à ceux qui deuoient les premiers mettre la main à l'execution de leur entrepriſe, mais
" à haute voix eſtendant ſes deux mains, il ſ'eſcria, Qu'attendez vous gens de bien?
Sçauriez

A Sçauriez-vous desirer vn plus beau theatre à combattre pour la defense de la liberté que le milieu de vostre pays? Adonc Cylon mettant la main à l'espee frappa l'vn de ceux qui suyuoient le tyran, & de l'autre costé Thrasylbulus & Lampis se ruèrent dessus Aristotimus, qui les preuint s'enfuyant dedans le temple de Iupiter, là où ils le meirent à mort, puis en iettant le corps au milieu de la place, conuierent les habitants de la ville à reprendre leur liberté: mais les femmes encore furent les premieres: car elles accoururent incontinent toutes à grande liesse, en plorant & criant de ioye, & enuironnant tout à l'entour les hommes qui auoient fait ceste execution, les couronnerent, & leur meirent des chapeaux de fleurs sur les testes: & lors la commune se iettant sur la maison du tyran, sa femme aiant fermé sa chambre sur elle, se pendit: mais aiant deux filles toutes deux fort belles de visage, pucelles, & prestes à marier, ils les prirent & tirerent à force hors de la maison, aians bien intention de les tuer apres qu'ils les auroient violees, & puis deschirees à coups de verges premierement, n'eust esté que Megisto avec les autres honnestes Dames de la ville leur allerent au deuant, qui leur crierent, qu'ils faisoient choses indignes d'eux, attendu que estans en train de recouurer leur liberté, pour viure deormais en forme de gouuernement populaire, ils prenoient l'audace de commettre des outrages & violences telles, que sçauroient faire les plus cruels tyrans. Le peuple adonc aiant honte pour l'honneur & l'autorité de ces honnestes Dames, qui parloient ainsi vertueusement à eux les larmes aux yeux, fut d'aduis que lon ne leur feroit point de villanie à leurs personnes, & qu'on mettroit à leurs choisis de mourir de telle mort qu'elles voudroient: ainsi les aiant ramenees toutes deux à la maison, & leur ayans denoncé qu'il falloit qu'elles mourussent à l'heure mesme, l'aînée qui s'appelloit Myro, deicignant sa ceinture en fait vn las-courant qu'elle se mit au col, & en baïsant & embrassant sa sœur, la pria de la regarder faire, pour puis apres faire cōme elle: A fin, dit-elle, que nous ne mourions point bassement, & indignement du lieu dont nous sommes issues. Mais la ieune au contraire la pria de luy permettre qu'elle mourust la premiere, & quant & quant se saisit de la ceinture: & adonc l'aînée luy respondit, Je ne vous refusay iamais chose que vous me demandissiez, ma sœur, & pource, dit-elle, ie suis contente de vous faire encore ceste grace, de supporter & souffrir, ce qui me sera plus grief que la mort mesme, de vous veoir, ma treschere sœur, mourir deuant moy. Cela dit, elle mesme luy enseigna à mettre le las à l'entour de son col: puis quand elle veit qu'elle eut rendu l'esprit, elle l'osta, & couurit son corps: puis adressant sa parole à Megisto mesme, la requit de ne souffrir pas que son corps, quand elle seroit aussi morte, demourast gisant villainement & honteusement: tellement qu'il n'y eut entre les assistans personne de si dur cœur, ne qui de nature haïst tant les tyrans, qui ne deplorast, & n'eust en soy-mesme compassion de la generosité & magnanimité de ces deux ieunes filles. Or comme ainsi soit qu'il y ait infinies belles choses que les femmes ont anciennement faittes plusieurs ensemble, il me semble que ce peu d'exemples que nous en auons allegué, deura suffire: au demourant nous descrirons cy apres des particuliere actes de vertu de quelques vnes, pelle-messe selon qu'elles nous viendront en memoire, estimans que l'ordre des temps n'est point trop necessaire à rediger par escrit vne telle histoire.

PIERIA.

QUELQVES vns des Ioniens, qui s'estoient venus habiter en la ville de Milet, entrèrent en querelle à l'encontre des enfans de Neleus: à l'occasion de laquelle finalement ils furent cōtraincts de se retirer en la ville de Myunte, là où ils esleurent leur demourâce, & y furent fort molestez & trauaillez par les Milesiens qui leur faisoïent la

Les vertueux faicts des femmes.

guerre, pource qu'ils festoient soubstraicts & separez d'auec eux, toutesfois ce n'estoit E point vne si sanglante, ne si mortelle guerre, qu'ils n'enuoyassent bien les vns deuers les autres, & ne cōmuniquassent quelquesfois ensemble: car mesmes à quelques iours de festes solennelles, les femmes de Myunte alloient bien en la ville de Milet. Or y auoit-il entre ces Myuntins, l'un des plus nobles qui s'appelloit Pythes, & sa femme Iapygia, dont il auoit vne belle fille, nommee Pieria. Estant doncques escheuë la grande feste de Diane, en laquelle il se faisoit vn solennel sacrifice, que lon nommoit la Neleïde, ce Pythes y enuoya sa femme & sa fille, qui l'en requirent, à fin qu'elles fussent participantes de la feste. Si aduint que l'un des enfans de Neleus, celui qui auoit plus de credit & d'autorité en la ville, nommé Phrygius, s'enamoura de Pieria, & luy demanda ce qu'il pourroit faire qui luy fust le plus agreable: elle luy respondit, Si tu fais, qu'il me soit loisible de souuent & auec plusieurs venir icy. Phrygius comprenant aussi tost ce qu'elle vouloit dire, qu'il y eust paix & amitié en ces deux villes, fait en sorte qu'il en osta toute guerre: au moyen dequoy Pieria fut depuis grandement honoree & estimée en toutes les deux villes, tellement que iusques auourd'huy les Dames Milesiennes souhaitent encore, & prient aux Dieux, qu'elles soient autant aimees comme Phrygius aima Pieria. F

P O L Y C R I T E.

G V E R R E s'esmeut iadis entre les Naxiens & les Milesiens, à cause de Neëra femme de Hypsicreon, par vne telle occasion. Elle s'enamoura de Promedon Naxien, & montant sur mer s'en alla quand & luy: car il estoit hoste de Hypsicreon, logeant ordinairement chez luy, quand il venoit en la ville de Milet, & iouïssoit secrettement de ceste Neëra amoureuse de luy: mais au long aller, craignant que son mary ne s'en apperceust, il l'enleua, & l'emmena en la ville de Naxe, là où il la fait rendre suppliante à son autel & foyer domestique. Hypsicreon l'enuoya bien redemander: mais les Naxiens en faueur de Promedon refuserent de la rendre, alleguans pour G excuse de leur refus, qu'elle requeroit la franchise des suppliants: à raison dequoy la guerre commença entre eux, en laquelle les Erythréens fauoriserent fort affectueusement la part de ceux de Milet: de maniere que la guerre prenoit vn long traict, & apportoit de grandes miseres & calamitez aux vns & aux autres, iusques à ce que finalement elle s'acheua par la vertu d'une femme, comme elle auoit commencé par le vice & la meschanceté d'un autre. Car vn Diognetus Capitaine des Erythréens, à qui lon auoit commis la garde d'une place forte, assise en lieu opportun pour tra-uailer & endommager les Naxiens, fait quelque course dedans leur pays, là où par-my grande quantité de tout autre butin, il prit & emmena plusieurs filles & femmes de bonne maison, entre lesquelles il s'en trouua vne nommee Polycrite, de laquelle il deuint amoureux, & la teint & traitta non comme prisonniere de guerre, H mais comme si elle eust esté sa femme espousee. Or aduint-il que le iour escheut de la grande feste solennelle des Milesiens, ainsi qu'ils estoient au camp: au moyen dequoy ils se meirent tous à boire, & à faire grande chere les vns auec les autres. Adonc Polycrite demanda à ce Capitaine Diognetus, s'il seroit point mal-content qu'elle enuoyast à ses freres quelques tourteaux de ceux que lon auoit apprestez pour la feste: ce que non seulement il luy permit volontiers, mais luy commanda de ce faire: & elle se seruant de ceste occasion, mit dedans l'un de ces tourteaux vne petite lame de plomb escripte, & enioignit expressément à celui à qui elle les bailla à porter, de dire à ses freres, qu'il n'y eust qu'eux tous seuls qui mangeassent de ces gasteaux: comme ils feirent, & trouuans l'escripture de leur sœur dedans, par laquelle elle les aduertissoit que la nuict ils ne faillissent de venir assaillir leur ennemis, pource

- A pour ce qu'il les trouueroient tous en desordre, sans guet ne garde quelconque, d'autant qu'ils seroient encore yures de la chere qu'ils auroient faite à cause de la feste, ils en allerent incontinent aduertir les Capitaines generaux de l'armee, les prians de vouloir faire ceste entreprise avec eux. Ainsi fut la place prise, & y eut grand nombre de ceux de dedans tuez : mais Polycrite requit à ses citoyens qu'on luy donnast Diognetus, & par ce moyen luy sauua la vie : mais elle quand elle approcha des portes de la ville de Naxe, voyant tous les habitans venir au deuant d'elle avec extreme resioüissance, luy mettans des chapeaux de fleurs sur sa teste, & chantans ses loüanges, son cœur n'eut pas la force de soustenir vne si grâde ioye : car elle mourut sur la place tout ioignant la porte de la ville, là où elle fut depuis ensepulturee, & appelle-lon encore sa sepulture, le sepulchre de l'enuie, comme ayant esté quelque enuieuse fortune qui enuia à Polycrite la fruition de tant de gloire & d'honneur. Ainsi le descriuent les historiens de Naxe: toutesfois Aristote dit, que Polycrite ne fut iamais prise prisonniere,
- B mais que Diognetus l'ayant par quelque autre moyen veüe, en deuint amoureux, tellement qu'il estoit prest de luy donner & faire pour l'amour d'elle tout ce qu'elle voudroit : & elle luy promet qu'elle s'en iroit à luy, prouueu qu'il luy accordast vne seule chose, dequoy, à ce que dir le Philosophe, elle exigea obligation de serment : & apres qu'il eut iuré sa foy, elle luy requit, qu'il luy rendist le chasteau de Delion, car ainsi s'appelloit la place qui luy auoit esté baillee en garde, autrement elle dit qu'elle ne coucheroit iamais avec luy : & que luy tant pour le grand desir qu'il auoit d'en iouyr, comme pour le serment, par lequel il festoit obligé, ceda la place, & la rendit à Polycrite, laquelle la remeit entre les mains de ses citoyens, & par ce moyen estans de rechef retournez à estre pareils aux Milesiens, ils feirent depuis appointment avec eux, à telles condicions qu'ils voulurent.

L A M P S A C E.

- C E N la ville de Phocce il y eut vn temps deux freres iumeaux de la maison des Cordrides, l'un appellé Phobus, & l'autre Blépus, dont Phobus fut le premier qui se ietta du hault des rochers Leucadiens en la mer, ainsi comme Charon chroniqueur Lampfacenien l'escriit : & ayant puissance & autorité royale en son pays, il aduint qu'il eut affaire pour son particulier en l'Isle de Paros, & sy en alla, là où il contracta amitié & alliance d'hospitalité avec Mandron qui estoit Roy des Bebryciens surnommez Pityoësseniens : & de faict les secourut, & feit la guerre avec eux contre des peuples barbares leurs voisins, qui leur faisoient beaucoup de dommage & d'ennuy : puis quand il fut sur son partement pour s'en retourner, Mandron luy feit plusieurs caresses & demonstrations d'amitié, & entre autres luy offrit la moitié de sa terre & de sa ville, s'il vouloit venir s'habituer en la ville de Pityoëssa, avec partie des
- D Phocaiens, pour peupler le pays. Parquoy Phobus estant de retour à Phocce, proposa ce party à ses citoyens, & leur aiant fait trouuer bon, y enuoya pour Capitaine son frere qui conduisit les nouveaux habitans : si eurent à leur arriuee le traictement tel qu'ils eussent sceu desirer de Mandron : mais à traict de temps, apres qu'ils eurent eu de grands auantages sur les Barbares circonuoisins, & eurent gaigné sur eux grande quantité de tout butin, & de despouilles, ils commencerent premiere-ment à estre enuiez, & puis apres craints & redoutez des Bebryciens : à raison dequoy desirans s'en pouuoir deffaire, ils ne s'ozerent pas adresser à Mandron qu'ils cognois- soient homme de bien & iuste, pour luy persuader de commettre aucune desloyauté enuers des hommes de nation Grecque, mais aians espié vn iour qu'il estoit absent, ils se preparerent pour deffaire par surprise tous ces Phocaiens. Toutesfois la fille de ce Mandron nommee Lampface, encore à marier, ayant descouuert l'aguet

Les vertueux faiçts des femmes.

& embusche , tafcha premierement de diuertir fes amis & familiers d'une fi mal- E
heureufe entreprife , en leur remonftrant , que ce feroit vn acte damnable deuant
les Dieux & deuant les hommes , de courir fus en trahifon à leurs propres alliez , &
qui les auoient fecourus à leur befoin contre leurs ennemis , & outre qui eftoient
maintenant leurs concitoyens. Mais quand elle veit qu'elle ne pouuoit venir à bout
de leur perfuader , elle feit fous main entendre aux Grecs la trahifon qu'on leur braf-
foit , & les aduertit de fe tenir fur leurs gardes. Si feirent vn folennel facifice , & vn
feftin public , auquel ils conuièrent les Pityoëffeniens au faulxbourg de la ville , & fe
diuiferent en deux troupes , dont l'une fe faifit des murailles de la ville , pendant que
les habitans eftoient à ce feftin , & l'autre meit à mort les conuiez : & par ce moyen
se feirent feigneurs de toute la ville , & enuoyerent appeller Mandron , lequel ils
voulurent eftre participant de leurs confeils , & inhumerent magnifiquement fa fille
Lampface , qui par fortune mourut de maladie , & pour memoire du bien qu'elle
leur auoit faiçt , furnommerent la ville de fon nom Lampface. Toutesfois Man- F
dron , pour n'eftre fufpeçonné d'auoir esté traiftre aux fiens , ne leur voulut point
consentir de demourer avec eux , ains leur demanda les femmes & les enfans des
morts , lesquels ils luy enuoyerent diligemment , fans leur faire aucun desplairir : &
& aians par auant decerné honneurs heroïques à Lampface , depuis ils ordonnerent
qu'on luy facriferoit comme à vne Deeffe , & cōtinuent encore iufques auourd'huy
à faire ces facrifices.

A R E T A P H I L E.

A R E T A P H I L E de la ville de Cyrene n'est pas des fort anciennes , ains feule-
ment enuiron le temps du regne de Mithridates , mais elle monftra vne vertu , & fit
vn acte comparable à tous les plus magnanimes confeils des antiques demydeeffes.
Elle eftoit fille de Æglator , & femme d'un nommé Phædimus , tous deux nobles G
hommes , & grands perfonnages : & eftant belle de viſage , & femme de fort gen-
til entendement , meſmement en matiere d'eſtat , & affaires de gouuernement , les
publics calamitez de fon païs ont esté caufe d'illuſtrer fon nom , & le faire venir à
la cognoiſſance des hommes : car Nicocrates aiant vſurpé la tyrannie de Cyrene ,
feit mourir pluſieurs des principaux citoyens de la ville , & entre autres , vn Melanip-
pus grand preſbtre d'Apollon , qu'il tua de ſa propre main pour auoir ſa preſbtrie :
auſſi feit-il mourir Phædimus le mary d'Aretaphile , & , qui plus eſt , l'eſpouſa par for-
ce & malgré elle. Ce tyran , outre infinies autres cruautez qu'il commettoit iour-
nellement , auoit mis des gardes aux portes de la ville , lesquels quand on emportoit
des corps morts , pour les inhumer hors la ville , les outrageoient en leur picquant la
plante des pieds avec des poignards & des dagues , ou leur appliquant des fers-chaulds ,
de peur que lon ne transportaſt aucun des habitans viuant hors la ville , ſous couleur H
de le porter en terre , comme ſil fuſt mort. Si eftoient à Aretaphile ſes maux parti-
culiers bien grieſs à ſupporter , combien que le tyran ſe laſchaſt enuers elle pour l'a-
mour qu'il luy portoit , iufques à luy laiſſer iouyr d'une grande partie de ſa puiſſance :
car il eſtoit eſpris de ſon amour , & n'y auoit qu'elle ſeule à qui il ſe laiſſaſt manier ,
eſtant au demourant inflexible , aſpre & ſauuage à tout le demourant : mais encore
plus la greuoit de veoir ſon païs en public ainſi miſerablement & indignement trai-
cté par ce tyran : car tous les iours il faiſoit mourir les citoyens les vns apres les autres
& ſi ne voyoit-on point qu'il y euſt eſperance de vengeance , ny de deliurance d'au-
cun coſté , pour ce que les bannis eſtans foibles de tout poinçt & eſtonnez , ſ'eſtoient
eſcartez les vns çà , les autres là. Parquoy Aretaphile ſe ſubrogeant elle meſme ſeu-
le eſperance de reſſourſe à la Choeſe publique , & ſe propoſant à imiter les haults faiçts
& magna-

- A & magnanimes de Thebe femme du tyran de Pheres : mais n'ayant pas des hommes fideles & proches parents pour la seconder en ses entreprises , comme les affaires en donnerent à l'autre, elle essaya de faire mourir le tyran par poisons: mais ainsi comme elle en faisoit prouision, & esprouuoit les forces d'un chascun, son affaire ne peut estre secret, ains fut descouuert. Et estant le faict bien prouué & auéré, Calbia mere de Nicocrates, femme de nature sanguinaire & implacable, fut d'aduis qu'il la falloit incontinent faire mourir, apres luy auoir deuant fait endurer plusieurs tourmets: mais l'affection que Nicocrates luy portoit, affoiblissoit vn peu & retardoit sa cholere, ioinct qu'Aretaphile qui se presentoit constamment à respondre aux accusatiōs qu'on luy proposoit, donnoit quelque couleur à la passion du tyran : mais à la fin voyant qu'elle se trouuoit conuaincuë par preuues, à quoy elle n'eust sceu respondre, & qu'elle ne pouuoit aucunemēt nier qu'elle n'eust préparé quelque sorte de drogues, elle confessa qu'elle auoit bien voirement fait prouision de quelques drogues,
- B rries, non pas toutesfois dangereuses ne mortelles: Mais ie suis, dit-elle, Monseigneur, en peine de plusieurs choses de grande consequence, c'est de me conseruer la bonne opinion que tu as de moy, & l'affection que de ta grace tu me portes, pour laquelle i'ay cest honneur de iouyr d'une bonne partie de ton autorité & puissance: ce qui me rend enuiee des mauuaises femmes, desquelles craignant les enforcellemens, charmes & autres menees, par lesquelles elles voudroient tascher à te distraire de l'amour que tu me portes, ie me suis laissée aller à tascher d'y vouloir obuier par contraire artifice, qui sont choses à l'aduenture folles, & vrayes inuentions de femmes, mais non pas dignes de mort, si ce n'est qu'il te semble iuste de faire mourir ta femme, pour t'auoir voulu bailler quelques bruuages d'amour, & quelques charmes, pour tascher à estre encore aimée de toy d'auantage qu'il ne te plaist de m'aimer.
- C Nicocrates ayant ouy ces excuses de Aretaphile, fut d'opinion de luy faire donner la torture, à quoy fut presente sa mere Calbia, sans fleschir iamais de pitié ny s'aniollir: & estant interroguee sur la gehenne, iamais ne se laissa vaincre aux douleurs des tourmens, ains se maintint tousiours inuincible à la question, tant que Calbia mesme à la fin se laissa malgré elle de la tourmenter & gehenner: & Nicocrates la lascha adioustant foy aux excuses qu'elle alleguoit, & se repentit de luy auoir donné ce tourment: & ne passa gueres de temps, pour la passion qu'il auoit imprimée en son cœur, qu'il ne retournast à elle, & ne taschast à regagner sa bonne grace par tous honneurs, & toutes caresses qu'il luy pouuoit faire, tant il estoit espris de son amour: mais elle n'auoit garde de se laisser vaincre de ces flatteries, veu qu'elle auoit bien eu la vertu de resister aux douleurs de la question. Ainsi estant ioinct au desir qu'elle auoit auparauant de faire chose vertueuse, l'animosité encore de se venger, elle essaya vn autre moyen: car elle auoit vne fille preste à marier, qui estoit assez belle: elle l'attitra pour vn appast à prendre le frere du tyran, qui estoit vn ieune homme fort
- D aisé à prendre par les plaisirs de la ieunesse: & y en a plusieurs qui tiennent que outre la fille, encore vſa elle de quelques charmes, & quelques bruuages, dont elle enchantait le sens & l'entendement de ce ieune homme, qui s'appelloit Leander. Quand il fut pris de l'amour de ceste fille, il feit tant par prieres enuers son frere, qu'il luy permit de la prendre en mariage: & marié qu'il fut, sa femme instruite de sa mere, commença à le pratiquer, & luy persuader qu'il entreprist de remettre la ville en sa liberté, luy remontrant que luy-mesme n'estoit pas libre, tant comme il viuoit sous vne tyrannie, & qu'il n'estoit pas en sa puissance, si ne plaisoit au tyran, d'espouser telle femme qu'il voudroit, ny de la garder quand il l'auroit espousée. D'autre costé ses familiers & amis, pour faire plaisir à Aretaphile luy alloient tousiours forgeans quelques nouvelles occasions de querelles & de suspicions à l'encontre de son frere: & quand il s'apperçeut qu'Aretaphile estoit de mesme aduis, & qu'elle tenoit la

Les vertueux faicts des femmes.

main à ceste menée, adonc il resolut d'exécuter l'entreprise, & suscita vn sien serui- E
teur nommé Daphnis, par lequel il feit tuer Nicocrates: mais au demourant tué qu'il
l'eut, il ne voulut pas suiure le conseil d'Aretaphile, ains monstra incontinent par
ses deportemens qu'il auoit tué son frere, & non pas le tyran, car il se porta fole-
ment & furieusement en sa domination: toutesfois si portoit-il tousiours quelque
honneur & quelque reuerence à Aretaphile, & luy donnoit quelque autorité au
maniement des affaires, pource qu'elle ne luy monstroist pas son mal-contentement,
ny ne luy faisoit pas la guerre ouuertement, ains secrettement luy troubloist & em-
brouilloist ses affaires. Car premierement elle luy suscita la guerre de la Libye par
le moyen d'un prince nommé Anabus, avec lequel elle eut secrette intelligence, &
luy persuada de venir courir son pays, & approcher son armée de la ville de Cyrene, &
puis elle meit Leander en deffiance & soupçon de ses amis, & de ses capitaines, luy
donnant à entendre qu'ils n'auoient point le cœur à ceste guerre, & qu'ils aimoient
mieux la paix & le repos, avec ce que ses affaires mesmes la requeroient & l'establis- F
sement de sa domination, si luy vouloit bien à faict domter & tenir sous le pied ses ci-
toyens, & que de sa part elle trouueroit bien moyen de traicter appoinctement, voire
de faire qu'ils s'entreuerroient & parleroient ensemble si luy vouloit, Anabus & luy, de-
uant que la guerre tirast plus auant, & apportast quelque inconuenient, auquel il ne
feroit possible de donner ordre, ny mettre remede puis apres. Si fut l'affaire con-
duit de telle sorte, qu'elle la premiere alla parler à ce prince Libyen, auquel elle re-
quit, que si tost qu'ils se trouueroient ensemble pour parlementer, il l'arrestast prison-
nier, & pour ce faire luy promeit de grands presents, & vne bonne somme d'argent.
Le Libyen sy accorda facilement. Leander faisoit quelque doute de se trouuer à ce
parlement: mais toutesfois pour le respect qu'il portoit à Aretaphile, qui auoit pro-
mis pour luy qu'il sy trouueroit, il sy trouua tout nud, sans armes & sans gardes: &
quand il approcha du lieu où se deuoit faire ceste entreueüe, & qu'il apperceut Ana-
bus, il feit de rechef du fascheux & restif, disant qu'il vouloit attendre ses gardes: G
mais Aretaphile qui estoit là presente, luy donnant courage, luy dit, qu'il se feroit
reputer homme de lasche cœur, & qui ne tenoit point sa parole, si failloit à sy trou-
uer: & finalement voyant qu'il s'arrestoist, le tira par la main assez audacieusement
& assurement, tant qu'elle le mena, & le liura entre les mains de ce prince Barbare.
Si fut incontinent rauy & saisy au corps par les Libyens, qui le teindrent en estroicte
garde lié & garrotté comme vn prisonnier, iusques à ce que les amis d'Aretaphile ar-
riuerent avec les autres citoyens de Cyrene, qui luy apporterent l'argent qu'elle auoit
promis: car si tost que l'on sceut en la ville ceste prise, la plus part du peuple y accourut
à sa requeste & mandement: là où quand ils apperceurent Aretaphile, peu s'en fallut
qu'ils n'oubliaissent tout le courroux & mal-talent qu'ils auoient encontre le tyran, &
estimerent que la vengeance & punition exemplaire qu'ils deuoient faire du tyran,
n'estoit qu'un accessoire: mais que leur principale besongne, & la fruition de leur li- H
berté consistoit à la saluer, caresser & embrasser, avec si grande resiouissance, que
les larmes leur en venoient aux yeux, se iettans à ses pieds, comme si c'eust esté l'ima-
ge de quelque Deesse: ainsi y affluans les vns sur les autres iusques au soir, à peine
s'aduiferent-ils à la fin de se saisir de la personne de Leander, avec lequel ils s'en retour-
nerent en la ville, & apres qu'ils se furent bien faoulez de donner toutes sortes de
louanges & de faire tous honneurs à Aretaphile, finalement ils se meirent à penser
ce qu'ils deuoient faire des tyrans: si bruslerent Calbia toute viue, & cousurent Lean-
der dedans vn sac de cuir qu'ils ietterent dedans la mer: & voulurent que Aretaphile
eust la charge & administration de la Chose publique, avec les autres principaux per-
sonnages de la ville. Mais elle, comme aiant ioué vn ieu fort inegal & variable, & qui
auoit eu plusieurs parties, iusques à en auoir rapporté la couronne de victoire, quand
elle

A elle veit que son pays estoit entierement franc & libre, l'alla renfermer en sa maison, & ne se voulant plus hazarder à s'entremettre d'affaire quelconque publique, vſa le reſte de ſes iours en paix & en repos avec ſes parens & amis, ſans ſe meſler plus d'autre choſe que de beſongner à des ouurages.

C A M M A.

I L y eut iadis au pays de Galatie deux des plus puiffants Seigneurs, & qui aucunement eſtoient parens l'un de l'autre, Sinorix & Sinatus, deſquels Sinatus auoit eſpouſé vne ieune Dame qu'il auoit priſe fille, appellee Camma, fort eſtimee & priſee de quiconque la cognoiſſoit, tant pour la beauté de ſon corps, comme pour la fleur de ſon aage, mais encore plus pour ſon honneſteté & ſa vertu : car non ſeulement elle aimoit ſon honneur & ſon mary, mais auſſi eſtoit prudente, magnanime, & ſingulierement aimée & deſirée des ſubiects pour ſa bonté & ſa douceur : &, qui la faiſoit encore plus regarder & renommer, elle eſtoit Preſbtreſſe religieuſe de Diane, à laquelle les Galates anciennement auoient ſinguliere deuotion : ce qui eſtoit cauſe qu'on la voyoit ſouuent és ſacrifices publiques, & ſolennelles proceſſions, parée & accouſtree magnifiquement. Si en deuint Sinorix amoureux, lequel voyant que tant que ſon mary viuroit, il ne pourroit iamais venir à bout d'en iouyr, ny par amour, ny par force, il commit vn mal-heureux acte : car d'aguet propenſé il tua Sinatus, & peu d'eſpace de temps apres il alla demander Camma en mariage. Elle faiſoit ſa demourance dedans le temple, & ne ſupportoit pas la malheureuſe forfaiture qu'auoit commiſe Sinorix, d'un cœur abbattu & failly, qui ne feiſt qu'emouuoir les gens à pitié, ains avec vn courroux couuert en elle meſme, n'attendoit autre choſe que l'occafion de ſ'en pouuoir venger : de l'autre coſté Sinorix eſtoit aſſidu à la ſolliciter & prier, luy alleguant des raiſons qui ſembloient auoir quelque honneſte couleur, qu'il eſtoit touſiours monſtré plus homme de bien en toutes ſortes que Sinatus, & que ce qui l'auoit induit à le tuer, c'eſtoit la vehemence de l'amour qu'il luy portoit à elle, non pour aucune meſchanceré. La ieune Dame du commencement luy feit des refus qui ne furent point trop rudes ; & ſembloit que tous les iours peu à peu elle ſ'allaiſt amolliſſant, d'autant meſmement que ſes parens & amis eſtoient ordinairement apres à la perſuader & forcer de conſentir à ce mariage, pour faire plaſir à Sinorix, lequel auoit grand credit & grande authorité au pays : tant que finablement elle ſ'y conſentit, & l'enuoya lon querir qu'il vint vers elle, à fin qu'en la preſence de la Deeſſe meſme le contract du mariage fuſt paſſé, & les eſpouſailles ſolennifiées. Quand il fut arriué, elle le receut gracieuſement, & l'amena deuant l'autel de Diane, là où elle reſpandit à la Deeſſe vn peu d'un bruuage qu'elle auoit préparé dedans vne coupe, puis en beut vne partie, & bailla l'autre à boire à Sinorix : le bruuage eſtoit de l'hydromel empoiſonné : & quand elle veit qu'il l'eut tout beu, alors iettant vn gemiſſement hault & clair, & faiſant la reuerence à ſa Deeſſe : Je t'appelle à teſmoing, dit-elle, treſhonoree Deeſſe, que ie n'ay ſurueſcu Sinatus pour autre intention que pour veoir ceſte iournee, n'ayant eu ne bien ne plaſir de la vie, en tout le temps que j'ay veſcu depuis, que l'eſperance de pouuoir vn iour faire la vengeance de ſa mort, laquelle aiant maintenant faite, ie m'en vais gayement & ioyeuſement deuers mon mary : mais toy le plus meſchant homme du monde, donne ordre maintenant que tes amis & parens au lieu de liſt nuptial te preparent vne ſepulture. Le Galatien aiant ouy ces propos, & commanceant deſia à ſentir que le poiſon faiſoit ſon operation, & luy troubloit tout le dedans du corps, monta deſſus vn chariot, eſperant que l'eſbranlement & l'agitation du chariot luy pourroit ſeruir à faire vomir le poiſon : mais il en ſortit tout incontinent, & ſe feit mettre dedans vne littiere : & ne ſçeut ſi bien faire, que le

Les vertueux faicts des femmes.

foir mesme il ne rendist l'ame : & Camma aiant passé toute la nuit, & entendu comment il estoit desia trespasé s'en alla volontairement & gayement hors de ce monde.

STRATONICE.

CESTE mesme prouince de Galatie a porté encore deux autres Dames bien dignes d'éternelle memoire, Stratonice femme du Roy Deiotarus, & Chiomara femme de Ortiagonte. Car Stratonice sçachant que le Roy son mary desiroit singulièrement auoir des enfans legitimes pour les laisser successeurs de sa couronne, & n'en pouuant auoir d'elle, elle luy pria & persuada, qu'il en feist à vne autre femme, & luy permit qu'elle se les supposast. Deiotarus s'esmeruilla fort de ceste sienne resolution, & luy permit d'en faire à sa guise, ainsi comme elle voudroit : parquoy elle choisit, entre les captiues prises à la guerre, vne belle ieune fille qui auoit nom Electra, qu'elle enferma avec Deiotarus dedans vne chambre : & nourrit & esleua les enfans qui en vindrent, avec autant d'affection, & en aussi grande magnificence comme s'ils eussent esté siens.

CHIOMARA.

LORS que les Romains sous la conduite de Cneus Scipion desfeirent les Galates habitans en l'Asie, il aduint que Chiomara femme d'Ortiagonte fut prise prisonniere de guerre avec les autres femmes de Galates. Le capitaine qui la prit, vsa de son aduerture en soudard, & la viola. Or si estoit homme subiect à son plaisir, autant ou plus l'estoit-il à son profit, & lors fut attrapé par son auarice : car luy estant promise vne grosse somme d'argent pour deliurer ceste femme, il la conduisit au lieu qui luy fut designé pour la rendre & mettre en liberté : c'estoit sur le bord d'une riuere, que les Galates passerent, luy compterent son argent, & reprirent Chiomara : mais elle fit signe de l'œil à l'un de ses gens qu'il tuast ce Capitaine Romain, ainsi comme il prenoit congé d'elle & la caressoit : ce que l'autre fit, & d'un coup d'espee luy aualla la teste : elle la releua, & l'enveloppant au deuant de sa robe, tira son chemin, & s'en alla. Arriuee qu'elle fut au logis de son mary, elle luy icte ceste teste à ses pieds : dequoy il s'estonna, & luy dit, Ma femme il faut garder la foy : Ce fait-mon, respondit-elle, mais aussi faut-il qu'il n'y ait qu'un seul homme viuant qui ait eu ma compagnie. Polybius escrit que luy mesme parla depuis à elle en la ville de Sardis, & qu'il la trouua femme de grand cœur, & de bon entendement. Mais puis qu'il est venu à propos de faire mention des Galates, j'en reciteray encore vne telle histoire. Le Roy Mithridates enuoya querir à fiance, comme ses amis, soixante des principaux Seigneurs des Galates, en la ville de Pergame : lesquels estans venus deuers luy à sa requeste, il leur parla superbement & imperieusement, dont ils furent tous fort courroucez : tellement qu'il y en eut vn nommé Toredorix, homme robuste de corps, & courageux à merueilles, seigneur d'une contree qui s'appelle des Tossioppiens, qui entreprit de le saisir au corps, lors qu'il donneroit audience dedans le parc des exercices, & de se precipiter avec luy dedans vne profonde baricaue qui là estoit : mais de fortune le Roy ce iour-là n'alla point, comme de coustume, en ce parc des exercices, ains manda que tous ces seigneurs Galates vinssent parler à luy en son logis. Toredorix les admonesta de ne s'estonner point, mais quand ils seroient arriuez aupres de luy, qu'ils se ruaissent ensemble de tous costez sur luy, & le deschirassent en pieces. Cela ne fut pas tenu secret, ains aiant esté descouuert à Mithridates, il les fit prendre tous, & leur enuoya couper les testes l'un apres l'autre : mais sur ces entrefaictes il se va souuenir d'un ieune homme en fleur d'age, le plus beau & le mieux formé qui

A qui fust de son temps, & en eut pitié, se repentant de l'auoir condamné quand & les autres, & monstra euidentement qu'il en estoit marry, pensant qu'il eust esté des-faict des premiers: ce neantmoins à toute aduenture il enuoya faire commandement, fil estoit encore viuant, qu'on le laissast aller. Ce ieune homme auoit nom Bepolitan, & luy aduint vne fortune merueilleuse: car il fut pris avec vne belle robbe & riche, laquelle le bourreau se voulant reseruer nette, sans qu'elle fust souillée de sang, en la luy despouillant tout à l'aise, il apperceut les gens du Roy qui accouroient vers luy, en criant à haute voix le nom de ce ieune homme. Voyla comment l'auarice, qui a esté cause de faire mourir infinis hommes, sauua contre toute esperance la vie à celuy-là. Mais quant à Toredorix, aiant esté cruellement massacré de plusieurs coups, il fut ietté aux chiens sans sepulture, & sans que personne de ses amis en osast approcher pour l'inhumer, fors vne ieune femme Pergamenienne, qu'il auoit autrefois cogneuë pour sa beauté, laquelle se hazarda d'enseuelir & inhumer son corps. Ce que les gardes aians apperceu, la saisirent & la menerent au Roy, où lon dit que Mithridates à la veoir seulement en eut compassion, pour ce qu'elle luy sembla fort ieunette & simple iouuencelle: mais encore plus eut il le cœur attendry, quand il sceut que l'amour auoit esté cause de luy faire entreprendre: si luy permit d'enleuer le corps & de l'ensepulturer, en luy fournissant du sien les draps & autres parements necessaires pour les funeraillles.

TIMOCLIA.

THEAGENES natif de Thebes eut pareille volonté & intention quant à la defense de son pais & de la Chose publique, que iadis eurent Epaminondas, Pelopidas, & tous les plus gens de bien du monde, mais il tomba en la commune ruine de la Grece, lors que les Grecs perdirent la bataille de Cheronee, estant desia quant à luy vainqueur, & poursuuyant ceux qu'il auoit rompus en bataille deuant luy: car ce fut C luy qui respondit à vn fuyant qui luy cria iusques où nous veux-tu chasser? Iusques en Macedoine, dit-il. Mais vne siëne sœur le suruesquit, qui tesmoigna que tant pour la vertu de ses ancestres, que pour la sienne propre, il auoit esté grand homme, & digne d'estre renommé entre les plus vaillans: elle receut vn peu de fruiët de sa vertu, qui luy aida à supporter plus patiemment ce qui luy toucha des communes miseres de son pais. Car apres qu'Alexandre eut pris la ville de Thebes, & que les soldards couroient çà & là pillans ce qu'ils pouuoient, il se rencontra qu'un Capitaine d'une compagnie de cheuaux legers Thraciens, se saisit de la maison de Timoclia, homme qui ne sçauoit que c'estoit d'honnesteré & de courtoisie, mais violent & sans aucun discours de raison: car apres qu'il se fut bien emply de vin & de viande au souper, sans porter aucun respect à la race, ny à l'estat & honnesteré de ceste Dame, D il luy manda qu'elle vint coucher avec luy: & encore ne fut-ce pas tout; car il luy commanda de luy dire où elle auoit caché son or & son argent, tantost la menassant de la tuer, & tantost la caressant, & luy promettant qu'il la tiendrait pour sa femme. Mais elle prenant l'occasion que luy mesme luy presentoit, Pleust à Dieu, dit-elle, que ie fusse morte deuant ceste nuit, plus tost que d'estre demouree viue: car aiant tout perdu au moins fust mon corps impollu & net de toute violence: mais la fortune estant ainsi aduenue, qu'il faut que desormais ie te repute pour mon seigneur, mon maistre & mon mary, puis qu'il plaist aux Dieux qui t'ont donné ceste puissance sur moy, ie ne te veux point frustrer ne priuer de ce qui est à toy: car quant à moy, ie voy bien qu'il faudra que ie sois d'oresenauant telle que tu voudras. Je soulois auoir des bagues & ioyaux à parer ma personne, & de la vaisselle d'argent & si auois encore quelque somme d'or & d'argent monnoyé: mais quand i'ay veu que la

Les vertueux faictz des femmes.

„ ville s'en alloit prise, j'ay le tout faict prendre à mes femmes, & ietter, ou pour mieux E
 „ dire, destourner, & mettre en reserve dedans vn puits, où il n'y a point d'eau, & qui est
 „ sceu de peu de gens, pource qu'il y a vne grosse pierre dessus qui en bousche l'entree,
 „ & force arbres à l'entour qui le couurent. Cela te sera vn thresor qui te rendra riche
 „ à iamais quand tu l'auras en ta possession, & à moy seruira de tesmoignage & de
 „ preuue, pour te monstrier combien nostre maison estoit noble & opulente par cy de-
 „ uant. Le Macedonien ces propos ouys, n'attendit pas qu'il fust iour, ains sur l'heure
 „ mesme se fait conduire par Timoclia au lieu, luy commandant qu'elle fermast seure-
 „ ment le verger apres elle, à fin que personne n'en apperceust rien, & descendit tout
 „ en chemise dedans ce puits: mais la hydeuse Clotho le conduisoit, qui vouloit venger
 „ son forfait par la main de Timoclia qui estoit au dessus: car quand elle sentit à sa
 „ voix qu'il estoit au fond, elle mesme luy ietta dessus grande quantité de pierres, &
 „ ses femmes aussi y en ruerent plusieurs autres grandes & grosses, tant qu'elles l'assom-
 „ merent, & comblèrent le puits. Ce que les Macedoniens aians entendu firent tant F
 „ qu'ils retirerent le corps, & aiant desia esté proclamé à son de trompe par la ville, que
 „ lon ne tuaist plus personne des Thebains, ils faisièrent Timoclia, & la menerent de-
 „ uant le Roy Alexandre, auquel ils firent entendre de poinct en poinct l'audacieux
 „ acte qu'elle auoit ozé commettre. Alexandre iugeant bien à l'assurance de son vi-
 „ sage, & à la grauité de son marcher, qu'elle deuoit estre de quelque grande & noble
 „ maison, l'interroqua premierement qui elle estoit: & elle luy respondit d'une gran-
 „ de assurance, sans se monstrier estonnee de rien, j'ay eu vn frere nommé Theagenes,
 „ qui estant Capitaine general des Thebains en la bataille de Cheronee, contre vous,
 „ mourut en combattant pour la defense de la liberté des Grecs, à fin que nous ne tom-
 „ bassions point en la misere, en laquelle nous sommes presentement tombez: mais
 „ puis qu'il est ainsi, que lon nous fait des outrages indignes du lieu dont nous som-
 „ mes yssues, quant à moy, ie ne suis point à mourir, car il m'est à l'aduenture trop meil-
 „ leur que de viure, pour essayer encore vne autre telle nuit que la passée, si toy-mesme G
 „ n'y mets empeschement. A ces paroles, tous les gens d'honneur qui furent là pre-
 „ sents se prirent à plorer. Mais quant à Alexandre, il luy sembla que le courage de
 „ ceste Dame estoit plus grand, que de deuoir faire pitié, & loüant grandement sa vertu
 „ & sa parole qui l'auoit bien atteint au vif, il commanda à ses Capitaines, qu'ils eussent
 „ soigneusement l'œil, & donnassent bien ordre à ce que lon ne commeist plus de sem-
 „ blables excez en vne maison illustre: & quant & quant ordonna que Timoclia fust
 „ remise en sa pleine liberté, elle & tous ceux qui seroient trouuez luy appartenir aucu-
 „ nement de parenté.

E R Y X O.

BATTUS qui fut surnommé Eudemon, c'est à dire, heureux, eut vn fils qui eut H
 nom Arcesilaus, ne ressemblant de mœurs en rien à son pere: car du viuant mesme de
 son pere, aiant faict faire des creneaux à l'entour de sa maison, il en fut condamné
 en vn talent d'amende par son pere mesme, & apres sa mort estant de nature fas-
 cheux, comme depuis il en eut le surnom, & aussi pource qu'il se gouernoit par le
 conseil d'un sien amy Laarchus, qui ne valoit rien, il deuint tyran, au lieu de Roy:
 & ce Laarchus aspirant à la tyrannie, chassoit & bannissoit de la ville, ou bien fai-
 soit mourir les principaux, & les meilleurs citoyens de Cyrene, & en reiettoit les cau-
 ses sur Arcesilaus, & finalement il luy fait boire du poison d'un lièvre marin, dont
 il tomba en vne maladie lente, & vne langueur fascheuse, de laquelle il mourut, & ce
 pendant se saisit de la seigneurie, sous couleur de la vouloir conseruer, comme tu-
 teur, à Battus fils d'Arcesilaus, lequel estoit contrefaict & boiteux: de maniere que
 tant

- A tant pour son bas aage, que pour l'imperfection de sa personne, il estoit mesprisé peuple, mais plusieurs s'adressoient à sa mere, luy obeïssoient volontiers, & l'honoroient; d'autant qu'elle estoit femme sage, douce & humaine, & auoit beaucoup des plus puissans hommes du pais, qui estoient ses parens & amis, au moien dequoy ce Laarchus luy faisant la cour, poursuivit de l'auoir en mariage, luy offrant si elle le vouloit espouser d'adopter Battus pour son fils, & de le faire participant de sa seigneurie: dequoy Eryxo, car ainsi s'appelloit ceste Dame, s'estant conseillée avec ses freres, luy feit response qu'il en communiquast avec eux, pource que fils trouuoient bon ce mariage, si faisoit elle. Laarchus ne faillit pas de leur en parler, & eux de complot expressément fait entre eux, tiroient la chose en longueur, & le remettoient de iour à autre: mais Eryxo luy enuoya secrettement l'une de ses femmes, luy dire de sa part, que ses freres lors contredisoient à son intention, mais quand le mariage seroit consommé, ils n'en contesteroient plus, & seroient contraincts de le trouuer bon:
- B & pourtant qu'il falloit, si bon luy sembloit, qu'il s'en vint la nuit deuers elle, & que tout le reste de l'affaire se porteroit bien, quand il seroit bien commencé. Ces propos furent merueilleusement plaisans à Laarchus, & estant du tout transporté d'aïse hors de foy, pour la demonstration d'amitié que luy faisoit ceste femme, il promet qu'il se rendroit vers elle à telle heure qu'elle luy commanderoit. Or faisoit Eryxo ce complot de l'aduis & conseil de son frere aîné Polyarchus, & aiant prefix le iour & l'heure qu'ils se deuoient trouuer ensemble, elle feit venir secrettement en sa chambre son frere, qui amena quand & luy deux ieunes hommes avec leurs espees, qui ne desiroient rien plus que venger la mort de leur pere, lequel Laarchus auoit de nouveau faict mourir, puis elle enuoya querir ce Laarchus, luy mandant qu'il vint seul sans ses gardes: si ne fut pas plus tost entré, que ces deux ieunes hommes le chargerent à coups d'espee, tant qu'ils le firent mourir en la place, puis en ietterent le corps par dessus les murailles de la maison: & amenans Battus en public, le declarerent Roy à la mode & coustume du pays: & Polyarchus rendit aux Cyreniens leur ancienne & premiere sorte de gouuernement. Or y auoit il lors à Cyrene plusieurs souldards du Roy d'Ægypte Amasis, ausquels Laarchus se fioit, & par le moien desquels il se rendoit formidable & espouuentable aux Cyreniens. Ces gens de guerre enuoyerent incontinent en diligence deuers le Roy Amasis, pour charger & accuser Eryxo & Polyarchus de ce meurtre: dequoy le Roy fut courroucé, & sur le champ proposa de faire la guerre aux Cyreniens: mais sur ces entrefaites il aduint que sa mere alla de vie à trespas: & ce pendant qu'il fut occupé à en faire les funerailles, les nouvelles vindrent à Cyrene du mal-contentement de ce Roy, & de sa resolution de faire la guerre: si fut d'aduis Polyarchus d'aller luy mesme deuers luy pour rendre raison de son faict, & sa sœur Eryxo ne voulut pas demourer derriere, ains le suyure, & s'exposer au mesme peril que luy, & ne fut pas la mere mesme d'eux, nommee Critola, qui
- D n'y voulust aussi aller, combien qu'elle fust fort vieille, mais elle estoit Dame de grande dignité & autorité, d'autant qu'elle estoit sœur germaine du premier Battus surnommé l'heureux. Quand ils furent arriuez en Ægypte, tous les autres seigneurs de la Cour approuuerent grandement ce qu'ils auoient faict en cest endroit, & Amasis mesme loia infiniment la pudicité & magnanimité de Eryxo, & apres les auoir honorez de riches presens, & les auoir traittez royalement, les renuoya tous, Polyarchus & les Dames, avec sa bonne grace à Cyrene.

X E N O C R I T E.

X E N O C R I T E de la ville de Cumes, ne fait pas moins à louer & estimer pour ce qu'elle feit à l'encontre du tyran Aristodemus, que quelques vns pensent auoir

Les vertueux faicts des femmes.

esté surnommé Malace, qui vaut autant à dire, comme mol, pour la dissolution de ses meurs: mais ils s'abusent pour ne sçavoir pas la vraye origine de ce surnom, car il fut surnommé par les barbares Malace, qui signifie garçon, pource qu'estant encore fort ieune entre ses compagnons d'aage, portans encore les cheveux longs, que l'on appelloit anciennement coronistes, ce semble pour ceste occasion, és guerres contre les barbares il se faisoit bien veoir, & y acqueroit vn grand renom, non seulement pour sa hardiesse à coups de main, mais aussi encore plus pour son bon sens, sa diligence & prouoyance, en quoy il se monstrois singulier: de maniere qu'estant en fort bonne estime de ses citoiens, il fut incontinent auancé & promu aux plus grandes charges & dignitez de la chose publique: tellement que quand les Thoscans faisoient la guerre aux Romains pour remettre Tarquin le Superbe en sa royauté, dont il auoit esté dechassé, les Cumains le firent Capitaine du secours qu'ils enuoyoient aux Romains, en laquelle expedition, qui dura longuement, laissant faire à ses citoiens qui estoient sous sa charge au camp, tout ce qu'ils vouloient, & les amadoüant comme flatteur, plus tost que leur commandant comme Capitaine, il leur persuada de courir sus à leur Senat, quand ils seroient de retour, & luy ayder à en chasser les plus puissans & les plus gens de bien, tellement que peu à peu par ces moiens il se fit tyran absolu. Et si fut meschant & violent en autres extorsions, encore le fut il d'auantage enuers les ieunes femmes & les ieunes enfans de bonne maison: car on trouue par escrit entre autres choses, qu'il cōtraignoit les ieunes garçons à porter cheveux longs comme filles, & des crespines & autres affiquets d'or par dessus, & au contraire, il contraignoit les filles de se tondre en rond, & porter des manteaux, à la façon des ieunes hommes, & des sayes sans manches. Toutesfois s'estant extrêmement enamouré de Xenocrite fille d'un des principaux citoiens qu'il auoit banny, il la teint, non pas apres l'auoir espousée, ou apres l'auoir gagnée par belles persuasions, ains malgré elle, pensant qu'elle se deuoit bien contenter d'estre avec luy en quelque sorte que ce fust, attendu qu'elle en estoit réputée bien-heureuse & bien fortunée de tous ceux de la ville: mais toutes ces faueurs là ne luy esbloüissoient point le iugement à elle, car outre ce qu'elle estoit mariée de ce qu'il couchoit avec elle sans qu'elle luy eust esté donnée ny fiancée par ses amis & parens, elle desiroit le recouurement de la liberté de son pays, autant comme ceux qui apertement estoient hais & mal voulus du tyran. Or faisoit Aristodemus en ce temps là enuironner son territoire d'un fossé tout à l'environ, ouurage qui n'estoit ny nécessaire ny vtile, mais seulement entrepris pour vexer, fascher & consumer de trauaux ses pauvres citoiens, car il estoit commandé à chascun de porter certaine quantité de terre par iour. Comme doncques il allast voir comment on y besongnoit, elle se destourna & couurit son visage avec un bout de sa robe: & passé qu'il fut les ieunes hommes se ioüans & se mocquans d'elle, luy demandoient, pourquoy elle fuyoit ainsi de voir Aristodemus, & auoit honte de luy seul, & n'auoit point honte d'estre veüe des autres: & elle leur respondit, mais bien à certes, & parlant à bon escient: C'est, dit-elle, pource qu'il n'y a entre les Cumains qu'Aristodemus seul qui soit homme. Ceste parole touchoit à tous, mais elle aiguillonna de honte ceux qui auoient le cœur assis en bon lieu, à entreprendre de recouurer leur liberté. Et dit on, que Xenocrite l'ayant entendu dit, qu'elle aimeroit mieux porter elle mesme sur ses espauls la terre, comme les autres, pour son pere, prouueu qu'il peust estre present, que de participer à toutes les delices, & à toute la puissance d'Aristodemus. Cela doncques cōfirma encore d'auantage ceux qui cōiurerent à l'encontre du tyran, dont le chef principal fut Thymoteles, lesquels leur ayant Xenocrite baillé libre & seure entree, trouués Aristodemus seul, sans armes & sans gardes, en se ruant plusieurs sur luy, le tuerent facilement. Voyla comment la ville de Cumes fut deliurée de tyrannie par deux vertus d'une femme, l'une qui leur donna le pensément premier & l'affection

A l'affection de l'entreprendre, & l'autre qui leur aida & leur donna moien de l'exécuter: quoy fait ceux de la ville offrirent à Xenocrite plusieurs honneurs, prerogatiues & presens, mais elle les refusant tous, leur demanda seulement la grace de pouuoir inhumer le corps d'Aristodemus: ce qu'ils luy permirét, & outre l'éleurent prestresse & religieuse de Cerés, estimans que cest honneur qu'ils faisoient à Xenocrite, ne seroit pas moins agreable à la Deesse, que conuenable à elle.

LA FEMME DE PYTHES.

A v s s y dit on que la femme du riche Pythes, du temps que le Roy Xerxes veint faire la guerre aux Grecs, fut vne bonne & sage Dame: car ce Pythes ayant trouué des mines d'or, & aimant non par mesure, mais excessiuelement, le profit grand qui luy en venoit, luy-mesme y employoit toute son estude, & contraignoit tous ces citoiens egalemeut à fouiller, porter, ou purger & nettoyer l'or, sans leur permettre de faire ny exercer autre ceuvre du monde: de quoy plusieurs mouroiet, & tous se faschoient; tellement que les femmes à la fin s'en vindrent avec rameaux de suppliantes à la porte de ceste femme pour l'esmouuoir à pitié, & la prier de les vouloir secourir à ce besoing. Elle les renuoya en leurs maisons avec bonnes paroles, les admonestant de bien esperer, & de ne se desconforter point: & ce pendant elle enuoya secrettement querir des orfeures à qui elle se fioit, & les renfermant en certain lieu, les pria de luy faire des pains d'or, des tartes & gasteaux de toutes sortes de fruiets, & de toutes les chairs & viandes principalemēt qu'elle sçauoit que son mary Pythes aimoit le mieux: puis quand il fut de retour en sa maison, car il estoit lors allé en quelque voyage, comme il demanda à soupper, sa femme luy presenta vne table chargee de toutes sortes de viandes contrefaittes d'or, sans autre chose qui fust bonne à boire ny à manger, mais tout or seulement. Il y prit plaisir du commencement, mais apres qu'il eut assez rassasié ses yeux à veoir tous ses ouurages d'or, il demanda à manger à bon esciant: & elle luy demandant ce qu'il voudroit bien manger, le luy presentoit d'or, tant qu'à la fin il s'en courrouça, & cria qu'il mouroit de faim. Voire-mais, dit-elle, vous en estes cause, car vous nous auez fait auoir foison de cest or, & faute de toute autre chose: car tout artifice, tout mestier, & toute autre vacation cesse entre nous, & n'y a personne qui laboure la terre, ains laissant en arriere tout ce que lon seme & que lon plante en la terre pour nourrir les personnes, nous ne faisons que fouiller & chercher des choses qui sont à nous nourrir inutiles, nous consommons nous mesmes de labeur, & nos citoiens apres. Ces remonstrances émeurent Pythes, qui pour cela ne cessa pas entierement toute son entremise des mines, mais y faisant trauailler la cinquième partie seulement de ses citoyens les vns apres les autres, il permit au reste d'aller vacquer à leur labourage & à leurs mestiers. Mais quand Xerxes descendit avec vne si grande armee pour faire la guerre aux Grecs, s'estant monstré fort magnifique au recueil, & traitement, & grands presens qu'il feit au Roy & à toute sa cour, il requit vne grace au Roy, c'est que de plusieurs enfans qu'il auoit, † il en dispensast l'un seul d'aller à la guerre, à fin qu'il demourast avec luy en la maison, pour auoir soing de le traiter & gouverner en sa vieillesse: de quoy Xerxes fut si courroucé, qu'il fit mourir ce fils là seul, & l'ayant fait couper en deux pieces, fait passer son armee par entre deux, & emmena les autres qui tous moururent es batailles: à l'occasion de quoy Pythes, se desconfortant, feit ce que font ordinairement ceux qui ont faute de cœur & d'entendement, car il craignoit la mort, & haïssoit la vie: il eust bien voulu ne viure point, & si ne se pouuoit deffaire de la vie. Or y auoit il dedans la ville vne grande motte de terre, au long de laquelle passoit la riuere qui se nommoit Pythopolites: il feit bastir sa sepulture dedans ceste motte, & destournant le cours

Herodote
l. 7. l'appelle
Pythius.

Il estoit
cinq selon
Herodote.

Les vertueux faicts des femmes.

de la riuere, la feit passer à trauers ceste motte, de maniere qu'en passant elle venoit à razer sa sepulture. Ces choses preparees il descendit viuant dedans, & resigna à sa femme sa ville & toute sa seigneurie, luy enioignant qu'elle n'approchast point de ce monument, mais bien que seulement elle meist tous les iours son boire & son manger dedans vne petite nacelle, iusques à ce qu'elle veist que la nacelle passeroit outre la motte, aiant les viures tous entiers sans que lon y eust touché, & lors qu'elle cessast de plus luy en enuoyer, pour ce que ce seroit signe certain, qu'il seroit decedé. Voila comment il acheua le reste de ses iours: & sa femme gouuerna depuis son estat sagement, & apporta heureuse mutation & changement de trauaux aux subiects.

Consolation enuoyee à Apollonius sur la

MORT DE SON FILS.



C'EST N'EST pas de ceste heure seulement, Seigneur Apollonius, que i'ay eu pitié & compassion de toy, aiant entendu la mort auant-aage de ton fils, qui nous estoit trescher à tous, pource qu'en si grande ieunesse il se monstrois fort sage, rassé, & modeste, obseruant merueilleusement bien tous offices & deuoirs de pieté, tant enuers les Dieux, comme enuers ses pere & mere, & ses parens & amis. Mais il n'eust pas esté bien à propos, sur l'heure mesme de son trespas, aller deuers toy pour te prescher & admonester de supporter patiemment l'inconuenient qui t'estoit adueni, lors que & ton corps & ton ame estoient de tout poinct accablez sous le faix d'une calamité si estrange & si peu propensee, outre ce qu'il estoit force que i'en sentisse moy-mesme partie de la douleur: car les bien-suffisans medecins mesmes n'ordonnent pas incontinent contre les violentes & soudaines descentes de catarres, les remedes des medecines laxatiues, ains attendent que la force de l'inflammation des humeurs se meurisse d'elle mesme, sans application d'huiles & vnguens par le dehors. Mais apres que le temps, qui a accoustumé de meuir toutes choses, s'est adiousté à l'inconuenient, & que la disposition de ta personne m'a semblé requerir le secours de tes amis, i'ay pensé que ie ferois bien, si ie te departois quelques raisons & discours consolatoires, pour essayer de relascher vn peu de ta douleur, & appaiser les regrets de ton deuil, & les lamentations qui ne seruent de rien: car suyuant ce que dit *Æschyle*,

En la tragedie de Prometheus.

Les medecins des malades esprits
Sont les raisons, quand quelqu'un bien appris
En sçait vser à heure competente,
Pour allegger ce qui le cœur tourmente.

Et comme dit ailleurs le sage poëte Euripide,
A chasque mal il fault propre remede,
Car à celuy qui de douleur procede,
Des bons amis le parler gracieux.
Allege fort les ennuis soucieux.
Qui est trop fol en toutes actions,
Il a besoing d'aspres corrections.

Car y ayant plusieurs passions auxquelles l'ame est subiecte, la douleur est la plus aspre & la plus violente de toutes: pource que par impatience de douleur plus, comme lon dit

H.

- A dit, tumbent en fureur & en des autres maladies incurables : & y en a eu quelques vns qui par force de douleur se sont tuez eux mesmes. Or se douloir & se sentir atteint au vif pour la perte d'un fils, est vne douleur qui procede de cause naturelle, qui n'est point en nostre puissance. Car quant à moy, ie ne scaurois estre de l'opinion de ceux qui louent si hautement ie ne scay quelle brutale, farouche & sauvage impassibilité, laquelle n'est ny possible à l'homme, ny vtile, quand bien elle seroit possible, pource qu'elle nous osteroit la mutuelle bencuolence & douceur d'aimer, & de se sentir aimé, laquelle il nous est necessaire retenir & conseruer plus que nulle autre chose: mais aussi dis-je bien, que se laisser emporter hors de mesure à la douleur, & augmenter son deuil à l'infiny, est contre la nature, & procede d'une mauuaise opinion qui est en nous: pourtant fault-il laisser l'un comme chose dommageable & mauuaise, & qui ne conuient nullement à gens de bien, & ne reprouuer ny ne reietter pas aussi les moderees passions, suyuant ce que souhaittoit le philosophe Academique Crantor:
- B A la mienne volonté que iamais nous ne fussions malades, mais si aduient que nous le soions, à tout le moins, que nous sentions nostre mal, si lon nous arrache, ou que lon nous coupe quelque partie de nostre corps: car ceste indolence là, de ne se douloir de rien, ne s'engendre point en l'homme sans grand salaire, pource qu'il est vraysemblable, & que l'ame en deuient bestiale, & le corps insensible. Parquoy la raison veut que les sages hommes ne soient en telles aduersitez ny impassibles, ny aussi trop passionnez: pource que l'un est inhumain, & tient de la beste sauvage: l'autre trop mol, & sent la femme. Mais bien aduisé est celuy, qui sçait garder le moien, & qui peut porter gentilment autant les prosperitez qui suruiennent en ceste vie, comme les aduersitez: aiant bien propensé que c'est ne plus ne moins comme en un estat populaire, là où lon tire les magistrats au sort, & fault que celuy à qui le sort eschet, commande: & celuy qui en est frustré porte patiemment le refus de fortune. Ainsi faut-il qu'en la distribution des éuenemens & succez des affaires, il se contente, sans plainte ny resistance, de ce que la fortune luy enuoye: car ceux qui ne peuuent faire cela, ne pourroient non plus supporter sagement & modérément de grandes prosperitez: car c'est vne sentence morale fort bien & sagement dite,

Iamais bon-heur, tant soit-il grand ou hault,
Ton cœur n'esleue outre plus qu'il ne fault:
Ny au contraire aussi, pour malencontre,
Qui arriuer te puisse, ne te monstre
Trop bas de cœur, comme vn chetif esclaue;
Ains te maintien en ton naturel graue
Toufiours tout vn, comme l'or dans le feu.

- Car c'est fait en homme sage & bien appris, se maintenir & comporter toufiours d'une mesme sorte en prosperité, & aussi en aduersité garder genereusement ce qui luy est bien seant: car l'office de vraye prudence & bon sens est, d'éuiter le mal quand on le voit venir, ou le corriger quand il est aduenu, & l'amoindrir le plus que lon peut, ou bien se preparer à le supporter virilement & magnanimement: car la prudence se monstre & s'employe, touchant les biens, en quatre sortes, ou à les acquerir, ou à les garder, ou à les augmenter, ou à en vser dextrement & sagement. Ce sont là les regles de la prudence & des autres vertus, dont il faut vser en l'une & en l'autre fortune: car comme dit le commun prouerbe,

Il n'y a nul qui soit en tout heureux:
Et certainement,

Il ne se peut naturellement faire,
Que ce qui est ne soit point necessaire:

Ne plus ne moins que les arbres quelques annes portent beaucoup de fruit, & quel-

Consolation enuoyee à Apollonius

- ques autres n'en portent point : & les animaux vne fois font des petits , & vne autre E
fois font steriles ; & en la mer vn iour y a tourmente , & vne autre calme. Aussi en la
vie humaine aduient il plusieurs diuers accidens, qui tournent & virent l'homme tan-
tost en l'une , & tantost en l'autre fortune , auxquelles aiant esgard , on pourroit à
bonne raison dire ,

Euripide en la
tragédie d'I-
phigene en Au-
lide.

Agamemnon ton geniteur
Ne t'a engendré pour tout heur
En ce monde tousiours auoir,
Bien & mal t'y faut receuoir,
Car tu és né homme mortel:
Et si le tien vouloir n'est tel,
Si aduiendra il nonobstant
En ceste sorte , pour autant
Qu'il plaist ainsi aux tref-hauts Dieux.

F

Et ce que dit à ce propos le poëte Menander ,
Si tu estois , ô Trophime , seul entre
Tous les viuans hors du maternel ventre
Sorty avec ceste condition ,
Que tu ferois à ton élection
Ce qui seroit à ton cœur agreable ,
Aiant tousiours fortune fauorable ,
Et que quelqu'un des Dieux te l'eust promis,
Tu te serois à la verité mis ,
Non sans raison , en si grande cholere ,
Pour sa promesse enuers toy menfongere ,
Car il t'auroit falsifié sa foy:
Mais si tu as , à toute mesme loy
Que nous , humé cest air icy publique ,
Pour te parler en grauité Tragique ,
Plus te le faut porter patiemment ,
Et prendre mieux raison en payement.
Car pour te dire en peu de mots la somme
De ce discours , Trophime , tu es homme ,
Qui est à dire vn animal plus prompt
A deualer soudain à bas d'amont ,
Que pas vn autre : & non sans cause iuste ,
Pource qu'estant de tous le moins robuste
De sa nature , il oze se mesler
Des plus ardues affaires desmesler:
Aussi tombant de haut à la renuerse ,
De plus grands biens sa ruine renuerse.
Mais quant à toy , Trophime , ny le bien
Que perdu as ne fut oncq grand en rien ,
Ne maintenant si tu as de la peine ,
Elle ne peult sinon estre moiene :
Pourtant faut-il aussi , que cy apres
Plus moderé tu sois en tes regrets.

G

H

Et neantmoins les choses humaines estans telles, il y en a qui a faute de bon iuge-
ment sont si estourdis & si outreuidez , que depuis qu'ils sont vn peu eleuez ou pour
grosse somme d'or & d'argent qu'ils se treuuent entre mains , ou pour l'autorité
grande

A grande de quelque office qu'ils auront, ou pour autre presidence & preeminence du lieu qu'ils tiendront au gouuernemēt de la chose publique, ou pour aucuns honneurs & gloire qu'ils auront acquise, ils menasseront & outrageront ceux qui seront moindres qu'eux, ne considerans pas l'incertitude & inconstance de la fortune, ny combien facilement ce qui est haut deuient bas, & ce qui est par terre s'eleue en haut, pour les soudaines mutations & changemens de la fortune: Car chercher certitude en chose de sa nature incertaine, ce n'est pas fait en gens qui discourent sainement.

En vne rouë incessamment tournante,

Tantost basse est, tantost haute vne gente.

Mais pour paruenir à ceste tranquillité d'esprit, de n'estre point trauaillé de douleur, le meilleur moien est, celuy de la raison, & de s'estre par le moien d'elle preparé de longue main contre toutes les mutations & changemens de la fortune: car il ne se faut pas seulement recognoistre mortel, mais aussi attaché à vne vie mortelle, & à des affaires qui facilement se changent d'un estat en vn autre tout contraire. Car certainement, & les corps des hommes sont mortels & caduques, & leurs fortunes mortelles, & leurs passions & affections aussi, & generalement tout ce qui est ou appartient à la vie humaine: ce qui n'est possible de destourner ou cuiter aucunement à qui est mortel de nature,

Ains par necessité ferree,

Toufiours nostre vie aterree

Tend au fond d'enfer tenebreux, comme dit Pindare.

Et pourtāt dit tresbien Demetrius le Phalerien, comme le poëte Euripides eust escript,

Assuré n'est en ce bas monde l'heur,

Vn iour le peut renuerser en malheur,

Abaisant l'un du plus haut en l'abyssine,

Et eleuant du fond l'autre à la cyme.

C le reste, dit-il, est sagement escript, mais il eust encore mieux dit, fil n'eust point mis vn iour, ains vn poinct, ou vne minute de temps.

Arbres fruićtiers comme l'humain lignage,

Tournent sans fin en vn mesme roüage:

La force aux vns vient peu à peu croissant,

Elle sen va aux autres décroissant.

Et Pindare en vn autre passage,

Qu'est-ce, & que n'est-ce, que de l'homme?

C'est l'ombre du songe d'un somme.

Il a declaré la vanité de la vie de l'homme par vne excessiue maniere de parler fort ingenieuse, & fort bien exprimante ce qu'il vouloit dire: car que peut il estre plus debile qu'une ombre? mais encore le songe d'une ombre? Il ne seroit pas possible de l'ex-

D primer plus viuement ne plus clairement. Suyuant lesquels propos Crantor aussi reconfortant Hippocles sur la mort de ses enfans, luy vse de ces paroles: Toute l'ancienne eschole de Philosophie nous presche & admoneste de cela, en quoy fil y a aucun poinct que nous n'approuuions pas, au moins est il trop veritable, qu'en plusieurs endroićs la vie de l'homme est fort laborieuse & penible, car encore que de sa nature elle ne fust pas telle, si est-ce que par nous mesmes elle est reduitte à telle corruption: puis il y a ceste incertaine fortune, qui nous accompagne dès le commencement & dès l'entree de nostre vie, non pour aucun bien: ioinct qu'en toutes choses qui naissent il y a toufiours quelque portion de malice meslee parmy. Car toutes semences mortelles sont incontinent participantes de la cause, dont procedant la mauuaise inclination de l'ame, les maladies & les ennuy, & toute la male destinee des mortels de là rampe iusques à nous. Et pour quelle cause sommes nous tombez en ce

Consolation enuoyee à Apollonius

propos? à fin que nous sachions, que ce n'est rien de nouveau à l'homme d'expe- E
rimer la malheureuse fortune, ains que tous y sommes subiects: car, comme dit
Theophrastus, la fortune ne regarde point où elle vise, & prend plaisir bien souuent
à t'oster ce que tu auras parauant acquis à grande peine, & à renuerfer vne repute'e fe-
licité, sans auoir aucun temps estably ne prefix pour ce faire. Ces raisons, & plu-
sieurs autres semblables, peuuent facilement venir en l'entendement de chascun à par-
soy, ou bien les peut on apprendre des escrits des sages anciens: entre lesquels le pre-
mier est le diuin Homere, qui dit,

Odyss. l. 18.

Rien ne nourrit la terre plus debile,
Ne qui soit tant, que l'homme est, imbecille:
Il se promet que plus n'endurera
Par cy apres, tant que luy durera
Force & vertu, & que diuine essence
Luy donnera de se porter puissance:
Mais quand les Dieux luy enuoyent malheur,
Malgré luy fault qu'il porte sa douleur.

Et ailleurs,

Iliad. liu. 6.

L'homme a le sens tel, & l'entendement,
Que Dieu luy veut donner iournellement.
Pourquoy quiers tu de moy, fils magnanime
De Tydeus, que mon sang ie t'intime?
Les hommes tels comme les feuilles sont,
Les vents tomber à bas les vnes font,
Et la forest en la saison nouuelle,
En produisant d'autres, les renouelle:
Aussi les vns des hommes florissans
Viennent dehors, autres vont perissans.

Et en vn autre passage,

Et que ceste comparaison des feuilles des arbres soit bien à propos, & bien propre G
pour représenter la vanité transitoire de la vie des hommes, il appert clairement par
ce qu'il dit luy-mesme en vn autre lieu,

Iliad. liu. 11.

Pour les chetifs humains prendre harnois,
Qui sont semblans aux feuillages des bois,
Aucunefois vigoureux en verdure,
Tant que de terre ils prennent nourriture,
Vne autre fois de langueur mal-menez,
Sans point d'humeur tous flestris & fenez.

Simonides le poëte, comme le Roy de Lacedemone Pausanias se glorifiait ordinaire-
ment de ses hauts faicts, & luy dist vne fois par maniere de mocquerie, qu'il luy don-
nast quelque sage precepte & bon aduertissement, cognoissant bien son outrecui-
dance, il luy conseilla seulement, qu'il se souuinist d'estre homme. Et Philippus Roy H
de Macedoine, comme en vn mesme iour il eust eu nouuelles de trois grandes pro-
speritez: la premiere qu'il auoit gagné le pris de la course des chariots à quatre che-
uaux en la solennité des ieux Olympiques: la seconde que son Lieutenant Parmenion
auoit desfaict en bataille les Dardaniens: la troisieme, que sa femme Olympiade
luy auoit faict vn beau fils: Il eleua ses mains vers le ciel & dit, O Fortune ie te supplie,
enuoye moy en contre-eschange quelque mediocre aduersité. sçachant bien que
la fortune porte tousiours enuie aux grandes felicitez. Et Theramenes l'un des tren-
te tyrans d'Athenes, estant tombee la maison en laquelle il soupoit avec plusieurs
autres, & s'estant sauué luy seul de la ruine, comme tout le monde l'en reputast bien-
heureux, il s'escria à haute voix, O Fortune, à quelle occasion doncques me reserues
tu? aussi aduint il que peu de iours apres, ses compagnons mesmes l'ayant mis en pri-
son

A son, apres l'auoir bien gchenné & tourmenté, le feirent mourir. Si me semble que le poëte Homere s'est monstre vn merueilleusement excellent ouurier de consoler, en ce qu'il fait qu'Achilles dit au Roy Priam, qui estoit venu deuers luy pour racheter le corps de son fils Hector,

Iliad. liu. 24.

Vueilles pourtant en ce siege te seoir,
Et nos regrets laissons vn peu rasseoir
Dedans nos cœurs, bien que de violente
Occasion soit nostre ame dolente :
Mais à rien bons ne sont regrets ne pleurs,
Car les humains sont à viure en douleurs
Predestinez par les hauts Dieux celestes :
Eux seuls exempts sont de toutes molestes.
Le haut-tonant sur le seuil de son huys
B Là sus au ciel a estalé deux muys
Des dons qu'il donne : en l'vn de ces deux gisent
Les bons, en l'autre il a mis ceux qui nuisent.
Or ceux à qui pesse-messe il depart
Tantost de l'vn, tantost de l'autre part,
Il leur aduient quelquefois de liesse
Et quelquefois rencontre de tristesse :
Mais cil à qui des mauuais il fait don
Tant seulement, n'a iamais rien de bon :
Honte le suit, & par toute la terre
Male famine apres luy va grand' erre :
Il n'est des Dieux ny des hommes prisé,
Ainçois de tous fort defauorisé.

C Le poëte qui vient apres, tant en ordre des temps qu'en estime de reputation, Hesiodé, encore qu'il s'attribue l'honneur d'auoir esté disciple des Muses, aiant aussi bien comme l'autre enfermé les maux dedans vn tonneau, escrit que Pandora l'ouvrant les espendit en grande quantité par toute la terre, & par toute la mer, disant ainsi,

Au 1. liure
des ouures.

La femme aiant osté le grand couuercle,
Qui du tonneau cloüoit la boucle en cercle,
Maux infinis espendit aux humains,
Et leur brassa des trauaux inhumains :
Rien ne resta que l'esperance seule
Dans ce fort mui, sous le bord de sa gueule.
La femme hors voler ne luy permet,
Quand au deuant le couuercle luy meit.
D De là sortit la troupe vagabonde
Des maux qui vont errans parmy le monde,
Car pleine en est & la terre & la mer.
Là commança maladie à germer
De iour en iour aux hommes en cautelle
Venant la nuit, sans que point on l'appelle,
Et sans parler, d'autant que Iupiter
A toutes a la langue faict oster.

Suiuant lesquels propos, le poëte Comique dit encore, touchant ceux qui se tourmentent & desesperent quand telles fortunes leur aduiennent,
Si nos malheurs les larmes guerissoient,
Et si nos maux pour elles en cessoient,

Philemon.

Consolation enuoyee à Apollonius

Quand on auroit larmoyé tendrement, E
Au pois de l'or payees cherement
En vn malheur les larmes deuroient estre:
Mais maintenant les affaires, mon maistre,
N'y pensent point, & n'y iettent point l'œil:
Ains soit ou non que tu pleures en deuil,
Pas ne lairront d'aller la mesme voye.
Qu'est il besoing donc que nostre œil larmoye?
Qu'y gagnons nous? Rien, mais douleur produit;
Comme arbres font, des larmes pour son fruit.
Et Dictys reconfortant Danaë, qui demenoit vn fort grand deuil pour la mort de
son fils, dit en ceste sorte:
Estimes-tu que Pluton face compte
De tous tes pleurs? & crois-tu qu'il se domte F
Par tes souspirs, iusqu'à te renuoyer
Ton fils? Non, non, cesse de larmoyer:
En regardant les maux intolerables
Qu'ont enduré Dames à toy semblables,
Plus patiente à l'heure tu feras,
Quand sagement tu considereras,
Combien iadis en prison douloureuse
Ont acheué leur vie malheureuse:
Combien sont vieux deuenus sans pouuoir
Peres d'enfans en leur vie se voir:
Combien aussi de Royale opulence
Sont cheuts à rien reduicts en indigence.
Il te conuient mettre deuant tes yeux G
Ces argumens, & les repenser mieux.
Il luy conseille de considerer les exemples de celles qui ont esté plus, ou pour le moins
autant malheureuses qu'elle, comme si cela luy deuoit seruir à supporter plus legere-
ment son propre malheur: à quoy se peut aussi tirer & appliquer le propos de So-
crates qui fouloit dire, qu'il falloit que chascun apportast ses malheurs & aduersitez
en commun, & que lon les departist tellement, que chascun en eust son egale por-
tion: car alors il se verroit, que la plus part de ceux qui se plaignent feroient bien ai-
ses de se contenter des leurs, & s'en aller à tout. Le poëte Antimachus aussi vsa de
semblable induction apres que sa femme fut decedee, laquelle il aimoit singulieremēt.
Elle auoit nom Lyde, au moyen dequoy il nomma Lyde vne Elegie qu'il composa
pour consoler luy mesme sa douleur. En ceste Elegie il ramasse toutes les aduersitez
& calamitez qui sont anciennement arriuees aux grands Princes & Roys, rendant sa H
douleur moindre, par la comparaison des maux d'autrui plus griefs: par où il appert,
que celuy qui console vn autre aiant le cœur attainct de douleur, & qui luy fait co-
gnoistre, que l'infortune luy est commune avec plusieurs, par les accidens pareils qui
autrefois sont arriuez à d'autres, luy change le sentiment de l'opinion de sa douleur,
& luy imprime vne telle creance, & telle persuasion, que son inconuenient luy semble
plus leger qu'il ne faisoit au parauant. Æschylus aussi semble reprendre avec bien
bonne raison ceux qui estiment que la mort soit mal, disant ainsi,
A bien grand tort les hommes ont en haine
La mort, qui est guarison souueraine
D'infinis maux à quoy ils sont subiects.
Autant en fait celuy qui dit en suyuant ceste sentence,

Vien

A Vien me guarir de tous mes maux, ô mort,
Car tu es seule en ce monde seur port.
Car c'est veritablement vne grande chose, que pouuoir dire hardimēt avec ferme foy,
Comme est-il serf qui ne craint point la mort? Et,
La mort m'estant secours en tous perils,
Je ne crains point les ombres des esprits.

Qui a il de mauuais, ne quitant nous doiue contrister, au mourir? c'est grand cas
comme estât chose si familiere, si ordinaire, & si naturelle, elle nous semble ie ne sçay
comment au contraire, si penible & si douloureuse. Quelle merueille est-ce, si ce
qui de sa nature est subiect à fendre se fend, qui est propre à fondre se fond, à brusler
se brusle, à corrompre se corrompt? Et quand est-ce que la mort n'est en nous
mesmes? Car, comme dit Heraclitus, c'est vne mesme chose que le mort & le vif,
le veillant & le dormant, le ieune & le vieil, par ce que cela passé deuient cecy, & cecy
derechef passé deuient cela: ne plus ne moins que l'imager d'une mesme masse d'ar-
gille peut former des animaux, & puis les confondre en masse, & puis derechef les re-
former & derechef les reconfondre, & continuer cela incessamment l'un apres l'autre:
aussi la nature d'une mesme matiere a iadis produit nos ayeux, & puis apres conse-
cutiuement a procréé nos peres, & puis nous apres, & de nous par tour en engen-
drera d'autres, & apres d'autres de ces autres, tellement que le fleuve perpetuel de la
generation ne s'arrestera iamais, ny au contraire aussi celuy de la corruption, soit
Acheron ou Cocytus que les poëtes l'appellent, dont l'un signifie priuation de ioye,
& l'autre lamentation. Ainsi la premiere cause qui nous a faiët veoir la lumiere
du Soleil, elle mesme nous amene les tenebres de la mort. Dequoy nous est bien
euidente similitude l'air qui nous enuironne, faisant l'un apres l'autre le iour, & puis la
nuiët, en comparaison de la vie & de la mort, du veiller & du dormir: pourtant est à
bon droict appellé le viure vn prest fatal, pource qu'il le nous fault rendre & acquit-
ter: nos predecesseurs l'ont emprunté, & il le nous faut payer volontairement & sans
y auoir regret, quand celuy qui l'a presté le nous redemandera, si nous ne voulons
estre tenus pour tres-ingrats. Et croy que la nature voyant l'incertitude & la briefueté
de nostre vie, a voulu que l'heure de nostre mort nous fust incogneuë, pource qu'il
nous estoit plus expedient ainsi: car si elle nous eust esté cogneuë, il y en eust eu qui
se fussent seichez de langueur & d'ennuy, & fussent morts auant que de mourir. De
combien de douleurs est pleine nostre vie? de combien de soucis est-elle submergee?
Si nous les voulions tous & toutes comprendre en nombre, certainement nous la
condamnerions comme trop malheureuse, & ferions croire comme veritable l'opi-
nion que quelques vns ont euë, qu'il est trop meilleur à l'homme de mourir que de
viure: & pourtant dit le poëte Simonides,

D Foible est des humains la puissance,
Vaine leur cure & vigilance:
Leur vie est vn passage court,
Où peine sur peine leur sourt:
Et puis la mort qui à personne,
Tant est cruelle, ne pardonne,
Tousiours sur la teste leur pend,
Autant à celuy qui despend
Le cours de ses ans à bien faire,
Comme à celuy de mal' affaire.

Et le poëte Pindare,
Pour vn bien dont l'homme se paist,
De deux malheurs il se repaist:

Consolation enuoyee à Apollonius

Auoir ne peut vie immortelle,
Ne bien supporter sa mortelle. Et Sophocles,

E

En la tra-
gédie d'Al-
ceste.

Quand vn mortel va de vie à trespas,
Ton œil le pleure, & tu ne cognois pas
A l'aduenir fil luy eust profité,
Que sa vie eust de plus long cours esté. Et Euripides,
Sçais tu bien quelle est la condition
De la chetifue humaine nation?

Non que ie croy, car d'où aurois-je telle
Instruction? oy moy donc parler d'elle:
A tous humains il est predestiné
Mourir à iour prefix & terminé,
Et n'y a nul qui sache si viuante
Ame il aura la iournee suyuant:
Car impossible il est de deuiner,
Là où se doit la fortune tourner.

F

S'il est ainsi donc, que la vie de l'homme soit telle comme tous ces grands personna-
ges la descriuent, n'est il pas plus raisonnable de reputer heureux ceux qui sont de-
liurez de la seruitude, à laquelle on est subiect en icelle, que non pas de les deplo-
rer ne lamenter, comme la plus part des hommes font par ignorance? Le sage Socra-
tes disoit, que la mort ressembloit totalement, ou à vn tres-profond sommeil, ou à vn
loingtain & long voyage hors de son pays, ou pour le troisiéme, à vne entiere
destruction & aneantissement du corps & de l'ame: & que selon lequel que lon
voudra de ces trois, il n'y auoit rien de mal en la mort: ce qu'il monstroient en di-
scourant ainsi par tous les trois. Premièrement par la premiere comparaison,
Car si la mort est vn sommeil, & les dormans ne sentent point de mal, il est
doncques force de confesser, que les morts n'en sentent point aussi: mais d'auan- G
tage il n'est ia besoing de s'estendre pour prouuer que le dormir plus il est pro-
fond, plus il est doux & gracieux: car la chose de soy est notoire & manifeste à
tout le monde, outre ce qu'il y a le tesmoignage d'Homere, lequel parlant du
dormir dit,

Odysee, l. 3.

Plus doucement en son liest celuy dort
Qui moins s'éueille, & plus semble à la mort.

Il dit le mesme en plusieurs autres passages:

Iliad. liu. 13.

Là tous se sont mis à dormir ensemble,
Frere germain de mort qui luy ressemble. Et ailleurs,
Dormir & mort sont frere & sœur iumeaux.

Là où il fait à noter en passant, qu'il declare leur similitude en les appellant iumeaux,
d'autant que les freres iumeaux sont ceux qui ordinairement s'entreressemblent plus. H
Et puis en vn autre endroit il appelle le dormir d'airein, taschant à nous donner par
cela à entendre la priuation de tout sentiment: aussi ne parla pas impertinemment
ay inegalement celuy qui dit, que le dormir estoit les petits mysteres, comme fil
eust voulu dire, le nouiciage & apprentissage de la mort. En cas pareil aussi le Phi-
losophe Cynique Diogenes dit fort sagement, estant surpris d'un profond som-
meil, vn peu auant qu'il fust prest de rendre l'esprit, comme le medecin l'esueillast, &
luy demanda si luy estoit rien suruenu de mal: non, respondit-il, car le frere vient
au deuant de sa sœur, c'est à sçauoir, le dormir au deuant de la mort. Et si la mort res-
semble plus tost à vn loingtain voyage & longue peregrination, encore n'y a il point
de mal ainsi, mais plus tost du bien, au contraire: car n'estre plus asseruy à la chair,
ny enucloppé des passions d'icelle, desquelles l'ame estant saisie se remplit de toute
folie

- A folie & vanité mortelle, c'est vne beatitude & fecilité grande : car comme dit Platon, ce corps nous apporte infinis destourbiers & empeschemens , pour son entretenement necessaire : & si d'auantage il luy suruiuent aucunes maladies, elles nous diuertissent de la contemplation de ce qui est & inquisition de la verité, & nous remplissent d'amours de cupiditez, de peurs, de foles imaginations, & de vanitez de toutes sortes: tellement qu'il est tres-veritable ce que lon dit communément, que du corps ne nous vient aucune prudence: car il n'y a rien qui nous amene les guerres, les seditions & les combats, que le corps & les cupiditez qui procedent d'iceluy : pource que communément toutes les guerres aduiennent pour la conuoitise de biens, & nous ne sommes contrains de prochasser des biens que pour seruir à l'entretienement de ce corps, & par là nous sommes diuertis de l'estude de la philosophie, n'aians pas loisir d'y vacquer pour toutes ces occupations-là. Et pour le dernier, si d'aduenture il nous demeure quelque peu de loisir, & que nous le voulions employer à estudier ou contempler quelque chose, il nous donne tant d'assauts de tous costez en nostre estude, nous suscite tant de troubles & d'empeschemens, & nous traueille tant, qu'il est impossible d'en bien veoir la verité: par où il nous est clairement donné à entendre, que si iamais nous voulons purement & nettement sçauoir aucune chose, il faut que nous soyons deliurez de ce corps, & que nous contemplions de l'esprit & de l'ame seule, les choses à nud, & alors nous aurons ce que nous souhaittons, & ce que nous disons aimer, c'est la prudence, quand nous serons mors, ainsi que le discours de la raison le nous signifie: mais tant que nous viurons, non : car puis qu'il n'est pas possible qu'avec le corps on puisse rien cognoistre nettement, il est force que l'un des deux soit, ou que du tout l'homme ne puisse iamais rien sçauoir, ou que ce soit apres la mort: car alors l'ame sera à son appart separee de son corps, mais deuant, non: ains pendant que nous serons viuans, nous serons tant plus prochains de sçauoir, que moins nous aurons de communication avec le corps, sinon entant que la necessité nous y forcera, & ne nous remplirons point de sa nature, ains serons purs & nets de toute sa contagion, iusques à ce que Dieu luy-mesme nous en deliure du tout: & lors estans de tout poinct nettoyez & deliurez de la folie du corps, comme il est vray semblable, nous conuerse-rons avec autres semblables, voyans à descouuert de nous mesmes tout ce qui est pur & sincere, & cela est la verité: car il n'est pas loisible que ce qui n'est pas pur & net, touche & atteigne à ce qui l'est, tellement que quand bien la mort sembleroit transférer les hommes en vn autre lieu, encore n'y auroit-il point de mal pour cela: car ce ne pourroit estre qu'en quelque bon lieu, ainsi que Platon l'a prouué par demonstration. Et pourtant parla Socrates diuinemēt deuant ses iuges, quand il leur dist: Craindre la mort, Seigneurs, n'est autre chose, que sembler estre sage, quand on ne l'est pas. car c'est faire semblant de sçauoir ce que lon ne sçait pas: car nul ne sçait que c'est que de la mort, ne si c'est le plus grand bien qui sçeust iamais aduenir à l'homme, & toutefois ils la redoutent & la craignent, comme fils estoient bien asseurez que ce fust le plus grand mal du monde. Avec ceux-là ne discorde point celuy qui dit,

Que nul iamais n'ait plus de la mort doute,

Elle met hors l'homme de peine toute.

Encore y pourroit on adiouter, qu'elle le deliure des plus grands maux du monde. A quoy il semble que les Dieux mesmes portent tesmoignage: car nous lisons, que plusieurs ont eu comme vn singulier don des Dieux, en recompense de leur religion & deuotion, la mort: desquels, pour euiter prolixité, ie laisseray les autres exemples, & feray mention seulement de ceux qui sont plus illustres, & dont tout le monde parle. Et premierement ie reciteray l'histoire de deux ieunes hommes Argiens Cleobis & Biton. Car on dit, que leur mere estât religieuse & prestresse de Iunon, quand le temps d'aller au temple fut venu, les mulets qui deuoient trainner son coche n'estās

Consolation enuoyee à Apollonius

pas venus, & l'heure les pressant, eux-mesmes se meirent sous le ioug, & tirèrent à E
mont la coche de leur mere iusques au temple. Elle estant singulierement aise de
veoir si grande pieté en ses enfans, fait prieres à la Deesse, de leur donner ce qui estoit
le meilleur aux hommes: & eux festans le soir allez coucher, ne se releuerent plus
iamais, leur aiant la Deesse enuoyé la mort pour recompense de leur pieté. Et Pin-
dare escrit touchant Agamedes & Trophonius, qu'apres qu'ils eurent edifié & basty
le temple d'Apollon en Delphes, ils luy demanderent payement de leurs vacations.
Apollon leur promet que dedans huit iours il la leur donneroit, & cependant leur
commanda qu'ils feissent bonne chere. Ils firent ce qu'il leur auoit ordonné, & la
septiesme nuit festans endormis, le lendemain matin on les trouua morts en leur
liet. On dict aussi que aians esté enuoyez des Commissaires de par la communauté
des Boeotiens deuers Apollon, à la suscitation de Pindare mesme, ils demanderent
à l'Oracle, quelle chose estoit la meilleure à l'homme: la prophetisse leur respondit,
que celuy mesme qui les auoit enuoyez ne l'ignoroit pas, fil estoit vray que l'histoi- F
re que nous auons recitee d'Agamedes & de Trophonius fust de luy: mais que si non
content de cela, il le vouloit encore esprouuer, il luy seroit en brief rendu tout ma-
nifeste. Pindare aiant entendu ceste response, commença à penser à la mort, &
de fait bien peu de temps apres il trespassa. On recite semblablement d'un Euthy-
noüs Italien, natif de la ville de Terina, fils d'un nommé Elisien, le premier hom-
me de sa ville en vertu, en biens, & en reputation, qu'il mourut tout soudainement,
sans cause aucune qui fust apparente. Si vint incontinent à Elisien son pere en l'en-
tendement vne doute, qui fust à l'aduenture aussi bien venue à tout autre, fil au-
roit point esté empoisonné, pource qu'il n'auoit que ce seul fils vnique, qui deuoit
estre son heritier en tant de richesses & tant de biens: & ne sçachant comment en sça-
uoir la verité, il s'en alla en un certain Oracle où lon coniueroit & euocquoit les ames
des morts, là où aiant premierement fait les sacrifices & ceremonies accoustumees,
il s'endormit, & eut en dormant vne telle vision. Il luy fut aduis qu'il voyoit son G
pere, auquel il raconta comme il estoit là venu pour parler à l'ame de son fils, & le
requit & supplia de le vouloir aider à trouuer celuy qui estoit cause de la mort de
son fils: son pere luy respondit: C'est pourquoy ie suis venu icy, mais reçois de la
main de cestui-cy ce que ie t'apporte, car par là tu sçauras tout cela dequoy tu es do-
lent. Celuy qui luy monstroit, estoit un ieune homme qui le suyuoit, semblable à
son fils, & fort prochain de son temps & de son aage: si luy demanda, qui il estoit: &
il luy respondit, qu'il estoit l'ange de son fils, & luy tendit vne petite lettre. Elisien
l'ayant prise & desployee trouua dedans ces vers escrits,

Elisien homme de peu d'aduis,
Va t'enquerir des sages hommes vifs:
Euthynoüs par mort predestinee
A acheué sa derniere iournee:
Car bon n'estoit qu'il vescuist plus icy,
Pour ses parens, ne pour luy-mesme aussi.

H

Voilà quelles sont les histoires que lon en trouue escrites és liures anciens. Mais
fil estoit vray que la mort fust vne entiere abolition & destruction tant de l'ame
que du corps (car c'estoit la troisieme branche de la coniecture de Socrates) encore
n'y auroit il point ainsi mesme de mal au mourir, car c'est vne priuation de tout sen-
timent, & vne deliurance de toute douleur & de tout ennuy: car tout ainsi qu'il n'y
a point de bien, aussi n'y a-il point de mal, pour-autant que le bien & le mal ne peu-
uent estre, sinon en chose qui ait vie & subsistance: mais en chose qui soit ostee du
tout hors du monde, ne l'un ne l'autre ne peut estre, & sont les trespassez en mesme
estat qu'ils estoient au parauant leur naissance. Tout ainsi doncques comme auant
nostre

A nostre natiuité nous ne sentions ne bien ne mal, aussi ne faisons-nous apres nostre mort: & comme ce qui estoit au parauant nous, ne touchoit rien à nous, aussi peu nous touchera ce qui sera apres nous. car,

Le mort ne sent douleur ne mal aucun:

N'auoir esté, & mourir, est tout vn:

& est vn mesme estat celuy d'apres la mort, que celuy de deuant la vie. Estimez vous qu'il y ait difference entre n'auoir oncques esté, & cesser d'estre apres auoir esté? non plus que d'une maison ou d'une robbe, quand l'une est toute ruinee, & l'autre toute vsee, tu penes qu'il y ait difference entre ce temps-là, & celuy qu'elles n'estoiét point encore commencees: & si tu dis qu'il n'y a point de difference en celle-cy, aussi peu y en a il entre l'estat d'apres la mort, & celuy de deuant la naissance. Et pourtant recontras fort gentilement le philosophe Arcefilaus quand il dit, Ce mal qu'on appelle mort, seul entre tous ceux que lon estime maux, ne fait oncques mal à personne

B estant present: mais absent, & ce pendant qu'on l'attend, il fait douleur: de maniere que certainement il y en a plusieurs qui par leur imbecillité, & pour la calomnie que lon met sus à la mort, se laissent mourir de peur de mourir: aussi dit sagement le poëte Epicharmus,

Il fut conioinct, il se déioinct,

Chacun sen reua dont il vint,

L'esprit au ciel, la terre en terre.

Quel mal y a-il? rien n'y erre.

Et Cresphontes en vne Tragédie d'Euripide parlant de Hercules dit,

S'il est manant sous le globe terrestre

Auecques ceux qui plus ne sont en estre,

Il n'a donc plus maintenant de pouuoir:

on pourroit, en changeant vn peu la fin seulement, dire:

C S'il est manant sous le globe terrestre

Auecques ceux qui plus ne sont en estre,

Il ne sent plus doncques de passion.

C'est aussi vne noble, genereuse & magnanime parole que celle-cy des Lacedemoniés,

Nous maintenant sommes en nostre fleur,

Autres estoient auant nous en la leur,

Et apres nous le seront aussi d'autres

Que nullement ne verront les yeux nostres:

& semblablement aussi ceste autre,

Ceux-cy sont morts, non aians ceste foy

Que viure fust ou mourir beau de foy,

Mais bien sçauoir l'un & l'autre parfaire

D Honnestement, ainsi qu'il se doit faire.

Et fort bien aussi dit Euripides de ceux qui soustiennent de longues maladies,

Je hay ceux-là qui par boire & manger

Cerchent les iours de leur vie allonger,

Tournans de mort le cours droict en oblique

Par sortilege ou science magique:

Là où plustost il falloit, fils sentoient

Que plus au monde viles ils n'estoient,

Que volontiers hors d'icy ils fustassent

Et que la place aux ieunes ils quittaissent.

Et Merope prononceant des propos viriles & magnanimes émeut les Theatres entiers à pitié & compassion, quand elle dit:

Consolation enuoyee à Apollonius

Je ne suis pas seule mere deserte,
De ses enfans ayant fait triste perte,
Ny n'a la mort à moy vnique osté
Le cher mary : d'autres sans nombre esté
Ont auant moy , desquelles mesme enuie
De la fortune a trauaillé la vie.

E

A ces vers-là pourroit-on bien à propos conioindre ceux-cy,
Où maintenant est la magnificence
Du Roy Crœsus, où est son opulence?
Où est Xerxés, lequel fait faire vn pont
Sur le destroiët de la mer d'Hellespont?
Tous sont allez-là où Pluton domine,
En la maison d'oubly qui tout ruine.

Leurs biens mesmes & leurs richesses sont peries avec leurs personnes. Voire-mais F
il y en a plusieurs , ce dira-lon , qui sont émeus à plorer & lamenter quand vne ieune
personne vient à mourir auant son temps. Je vous responds, qu'encore ceste mort-là
hastiue & auancee hors de sa saison, est si facile à consoler, que iusques aux moindres
poëtes Comiques ont bien sçeu inuenter les raisons pour la reconforter : qu'il ne soit
ainsi, voyez ce qu'en dit l'vn d'eux à quelque autre qui se déconfortoit pour le trespas
d'vn sien amy decedé auant aage,

Si tu estois pour certain asséuré,
Que le defunct eust esté bien-heuré
Viuant le cours tout entier de sa vie,
Qui deuant temps luy a esté rauie,
Mort importune esté trop luy auroit:
Mais si peut estre en viuant luy seroit
Quelque malheur aduenü incurable,
La mort luy fut plus que toy amiable.

G

Car estant incertain sil est yssu de ceste vie à bonne heure pour son profit, & sil a esté
deliuré de plus grands maux, ou non, il ne faut pas porter sa mort aussi impatiëment
comme si nous eussions perdu toutes les choses que nous esperions, & nous pro-
mettions de luy. Et pour ce me semble-il que Amphiaras en vn poëte ne reconfor-
te & console pas impertinemment la mere d'Archimorus, laquelle estoit merueil-
leusement affligée & desolée pour la mort de son fils, qui luy estoit decedé en son en-
fance fort loing de maturité: car il dit,

Il ne fut onc homme de mere né
Qui n'ait esté en ses iours fortuné
Diuersement: il met ores sur terre
De ses enfans, ores il en enterre,
Luy-mesme apres en fin s'en va mourant,
Et toutefois les hommes vont plorant
Ceux que dedans la biere en terre ils portent,
Combien qu'ainsi comme les espics sortent
D'elle, qui sont puis apres moissonnez:
Aussi, faut-il, que les vns nouveaux nez
Viennent en estre, & les autres en yssent.
Qu'est-il besoing que les hommes gemissent
Pour tout cela, qui doit selon le cours
De la nature ainsi passer tousiours?
Il n'y a rien grief à souffrir, ou faire,

H

De ce

A De ce qui est à l'homme nécessaire.

Brief il faut qu'un chascun, soit en pensant en soy-mesme, soit en discourant avec autrui, tienne pour certain, Que la plus longue vie de l'homme n'est pas la meilleure, mais bien la plus vertueuse: par ce que lon ne louë pas celuy qui a plus longuement ioué de la cithre, ny plus long temps harengué, ou gouuerné, mais celuy qui l'a bien faict. Il ne faut pas colloquer le bien en la longueur du temps, mais en la vertu, & en vne conuenable proportion & mesure de tous faicts & tous dictz: c'est ce que l'on estime heureux en ce monde, & agreable aux Dieux. C'est pourquoy les poëtes nous ont laissé par escrit, que les plus excellens demy-dieux, & qu'ils disent auoir esté engendrez des Dieux, sont yssus de ceste vie auant la vieillesse.

Celuy que plus aime le haut-tonant
D'amour parfait, & Phebus l'arc-tenant,
Iamais sa vie estendre il ne le laisse

*Homere au
xv. de l'O-
dyssée. par-
lant d'Am-
phiaras.*

B Jusques au seuil de la foible vieillesse.

Nous voyons par tout, que le bien auoir employé son temps précède en louange l'auoir vescu longuement, comme nous reputons les meilleurs arbres ceux qui en moins de temps portent plus de fruit, & des animaux les meilleurs ceux qui en peu de temps nous rendent plus de profit, & plus de commodité pour la vie humaine: Car entre peu ou prou de duree il n'y a rien de difference, si nous le comparons avec l'infinie eternité, pour ce que mille ans, voire dix mille, ne sont non plus qu'un point, qui n'est pas remarquable, comme disoit Simonides, ou plustost encore vne bien petite portion de point. Il y a certains animaux au pais de Pont, ainsi que nous voyons par les histoires, qui ne durent qu'un seul iour: ils naissent au matin, sont en leur fleur à midy, & vieillissent & acheuent leur vie au soir: ceux-là sentiroient les mesmes passions que nous, fils auoient vne ame raisonnable, & l'usage de la raison, & qu'il leur aduint de mesme qu'à nous: car ceux qui mourroient auant midy,

C laisseroient des regrets & des larmes au leurs, & ceux qui dureroient tout le long d'un iour, feroient reputez bien-heureux. La vie doncques doit estre mesurée à la vertu, non-pas à la duree du temps. Et faut estimer vaines & pleines de folie toutes telles exclamations, Mais il ne falloit pas qu'il fust rauy ainsi ieune. Qui est-ce qui dit qu'il le falloit? Beaucoup d'autres choses, desquelles on eust peu dire, il ne falloit pas qu'elles se feissent, se sont faictes par le passé, se font encore de present, & se feront souuent cy apres: car nous ne sommes pas venus en ceste vie pour y establir des loix, mais pour y obeir à celles qui sont ordonnees par les Dieux qui gouuernent tout, & aux ordonnances de la destinee & prouoyance diuine. Mais quoy, ceux qui deplorent ainsi les trespassez, les deplorent-ils pour l'amour d'eux-mesmes, ou pour l'amour des trespassez? Si c'est pour l'amour d'eux-mesmes, d'autant qu'ils se treuuent priuez d'un plaisir, ou d'un profit, ou d'un support en vieillesse, qu'ils receuoient

D des trespassez, voyla vne occasion peu honneste de plorer, d'autant qu'il semble qu'ils ne regrettent pas les personnes des trespassez, mais la perte des commoditez qu'ils en receuoient: & si c'est pour le regard des trespassez qu'ils lamentent, fils supposent pour chose vraye, qu'ils ne sentent mal quelconque, ils seront exempts & deliures de toute douleur, en obeissant à vne ancienne & sage sentence qui nous admoneste d'estendre le plus que nous pourrons les choses bonnes, & restreindre les mauuaises. Si doncques le deuil est vne bonne chose, il le faut augmenter & croistre le plus qu'il est possible: mais si, comme la verité est, nous confessons que c'est vne mauuaise chose, il le faut accourcir, & le rendre le plus petit qu'il sera possible, voire l'effacer & abolir du tout, autant qu'il se pourra faire. Et que cela soit facile, il appert par l'exemple d'une telle consolation. On lit qu'un ancien Philosophe en alla un iour visiter la Royne Arsinoë, laquelle demenoit deuil, & lamentoit

Consolation enuoyee à Apollonius

» vn sien fils qui luy estoit decedé, & luy fait vn tel compte : Du temps que le grand E
 » Dieu Iupiter distribuoit ses honneurs & dignitez aux petis Dieux & demi-dieux, le
 » Deuil ne sy trouua pas d'adventure present avec les autres : mais apres que toute la
 » distribution fut faicte, il y arriua, & demanda à Iupiter sa part des honneurs aussi bien
 » comme les autres. Iupiter se trouua bien empesché, pour auoit ia tout employé &
 » donné aux autres : parquoy n'ayant autre chose que luy bailler, il luy bailla l'honneur
 » que lon fait aux trespassez, ce sont les larmes & les regrets. Or tout ainsi comme les
 » autres dæmons & petis dieux aiment ceux qui les honorent, aussi fait le Deuil. Par-
 » quoy si tu le mesprises, Dame, il ne retournera iamais chez toy : mais si tu le fers &
 » l'honores diligemment des honneurs & prerogatiues qui luy ont esté donnees, qui
 » sont regrets, larmes & lamentations, il t'aimera bien, & t'enuoyera tousiours de quoy
 » le seruir & honorer continuellement. Ceste inuention de ce Philosophe persuada
 merueilleusement la Royne, de sorte qu'elle luy osta entierement le deuil & les la-
 mentations. Mais en somme l'on pourroit demander à vn qui demeneroit si grand F
 deuil, Cesseras-tu à la fin quelquefois de te tourmenter, ou si tu penses qu'il faille por-
 ter ceste tristesse & douleur toute ta vie? Car si tu demeures tout le long de ta vie en
 ceste destresse, tu te procureras à toy-mesme vne parfaicte misere, & tres-amere infeli-
 cité, par vne lascheté & foiblesse de cœur trop molle. Et si tu es pour te changer vn
 iour, pourquoy ne le fais-tu dès à present? & pourquoy ne te retires-tu desia de ton
 malheur? car si tu veux considerer de prés les raisons qui avec le temps te deliureront
 de ta douleur, dès maintenant tu te pourras ietter hors de ce mauuais estat, auquel tu
 te trouues : car ainsi comme aux indispositions du corps, le plus tost que l'on s'en peut
 deliurer, est le meilleur, aussi est-il és maladies de l'esprit. Cela donques que tu es
 pour donner à la longueur du temps, donne le dès ceste heure à la raison, à la littera-
 ture que tu as, & te deliure toy-mesme des maux qui t'environnent maintenant.
 Voire-mais, diras-tu, ie ne pensois pas que ce mal me deust arriuer, ie ne m'en fusse
 iamais douté. Il te le falloit auoir propensé, & auoir bien long temps deuant consi- G
 deré & iugé la vanité, foiblesse & instabilité des choses humaines, & par ce moyen tu
 n'eusses pas esté surpris au desproueu, comme par vne soudaine incursion de tes en-
 nemis, comme il semble que Theseus en vne Tragedie d'Euripide se prepare, & se
 munit fort sagement contre tels accidens de la fortune, quand il dit:

L'ayant appris d'une personne sage,
 Estant à part ie pense en mon courage
 Tout le defastre & malheur à venir,
 Qui me pourroit onques iamais venir :
 Me proposant que banny pourrois estre
 De mon pais par fortune fenestre,
 Voir mes enfans mort soudaine encourir,
 Et auant temps moy-mesme aller mourir. H
 Et brief de maux plusieurs autres manieres:
 A fin que si de toutes ces miseres,
 A quoy pensé i'aurois premierement.
 Il m'aduenoit aucun encombrement,
 Ne m'en estant la pensee nouvelle,
 Moins m'en semblaist la pointure cruelle.
 Le temps en fin guarit toutes douleurs.

Mais ceux qui ont le cœur mol, & ne se sont pas de longue main exercitez à la vertu,
 ne se recueillent pas mesmes quelquefois pour deliberer & prendre quelque cōseil qui
 leur soit honneste & profitable, ains se laissent aller en des trauaux & miseres extremes,
 en chastiant leur corps qui n'en peult mais, & contraignant ce qui n'est pas malade
 de l'estre

A de l'estre, comme dit Alcæus, avec eux. Pourtant me semble-il que Platon admoneste fort sagement, qu'en tels inconueniens on se tienne quoy, tant pource qu'il n'est pas certain si c'est bien ou mal pour le trespasé, comme aussi pource qu'il ne reuiet nul profit à l'aduenir à celui qui s'en tourmente: car la douleur empesche que lon ne puisse bien consulter du faict en soy, & veult que lon accommode ses affaires ainsi que la raison iugera estre pour le mieux, ne plus ne moins que quand on iouë au tablier, où lon dispose son ieu selon ce qu'il vient au dé. Parquoy si quelquefois nous venons à tomber en tels heurts de la fortune, il ne faut pas que nous nous prenions à crier, comme font les enfans, touchans l'endroit où ils se sont frappez en tombant, ains accoustumer son ame à aller tout incontinent au remede pour r'habiller ce qui est cheut, ou qui se treuve indisposé par le secours de la medecine, en abolissant & ostant de tout poinct les lamentations. Auquel propos on dit, que celui qui fait les loix & ordonnances des Lyciens, leur commanda que quand ils voudroient mener

B deuil, ils se vestissent de robes de femmes: voulant par là leur donner à entendre que c'est vne passion feminine, & qui ne conuiet aucunement à graues & honnestes hommes, & qui ayent esté noblement & liberalement nourris: car à dire vray, c'est chose vile, basse, & qui sent la femme, que de mener ainsi deuil: Aussi voit-on que coustumierement ce sont plustost femmes qui aiment à faire ce deuil, que non pas hommes, & plustost nations barbares que Grecques, & plustost les pires que les meilleures: & entre les peuples barbares, encore ne seront-ce point les plus genereux, ne qui aient les cœurs hauts & magnanimes, comme les Allemans, & les Gaulois, mais plustost des Égyptiens, des Syriens, des Lydiens, & tous autres semblables: car on recite qu'il y en a d'entre eux qui descendent dedans des caueaux, où ils demeurent plusieurs iours sans vouloir seulement voir la lumiere du Soleil, pour autant que le trespasé qu'ils pleurent en est priué. Et pourtant Ion le poëte Tragique, aiant bien ouy parler de ceste sottise, fait parler vne femme qui dit,

C De vos enfans estant la gouuernante,
Je suis avec vne corde tournante
Sortie amont hors des caueaux du deuil.

Il y en a d'autres de ces Barbares qui se couppent quelques parties de leurs corps, comme le nez & les oreilles, & se deschirent au-demourant le reste de leurs corps, pensant gratifier aux trespasés, fils se departent en ce faisant de la moderation qui est selon la nature. Mais il y en a d'autres, qui venans à la trauerse disent, qu'il ne fault pas mener deuil pour toute sorte de mort, ains seulement pour ceux qui meurent de mort hastee & non meure, d'autant qu'ils n'ont encore point essayé de ce que lon estime biens en la vie humaine, comme de mariage, de litterature, de parfait aage, du maniement de la Chose publique, des estats & offices: car ce sont les poincts qui plus font de douleur à ceux qui perdent ainsi leurs enfans & amis auant aage, pour-

D ce que auant le temps ils ont esté priuez & frustrez de leur esperance, ne s'apperceuant pas que ceste mort auancee, quant au regard de la nature humaine, ne differe rien de celle qui est tardieue: car c'est comme vn retour en nostre pais naturel, qui nous est proposé à tous necessairement, sans que personne s'en puisse exempter: les vns marchent deuant, les autres vont apres, & tous se rendent à mesme lieu: aussi en cheminant deuant nostre fatale destinee, ceux qui y arriuent plus tard, ne gagnent rien d'auantage que ceux qui y sont plustost logez. Si doncques la mort hastieue estoit mauuaise, encore seroit pire celle des petits enfans de mammelle qui ne parlent point, & encore plus celle de ceux qui ne font que sortir du ventre de la mere: & neantmoins nous supportons le mal de ceux-là plus doucement & plus patiemment, & au contraire celle de ceux qui sont vn peu plus aagez, nous la portons plus durement & plus douloureusement, pour la tromperie de nostre vaine esperance, par laquelle

Consolation enuoyée à Apollonius

nous nous estions promis, que ceux qui estoient desia si auancez, nous demou- E
roient assûrément tout le cours entier de la vie. Si doncques le terme prefix de la
vie humaine estoit de vingt ans, celuy qui seroit parueni iusques à quinze ans, nous
iugerions qu'il ne seroit pas trop verd pour mourir, ains qu'il auroit ja attainct vne
mesure d'aage competente: mais celuy qui auroit fourny entierement la destinee de
vingt ans, ou qui seroit approché bien près de ce nombre, nous le reputerions totale-
ment bien-heureux, comme aiant passé vne tref-heureuse & tref-parfaitte vie: mais
si le cours de la vie humaine estoit de deux cents ans, celuy qui seroit decedé en l'aage
de cent ans, estimans qu'il seroit mort trop verd, nous nous mettrions à le plorer &
lamenteur. Par ces raisons doncques, & pour celles que nous auons déduites au para-
uant, il appert, que la mort mesme que nous appellons hastiue, est facile à supporter
patiemment: car certainement Troilus, ou bien Priam luy-mesme, eust beaucoup
moins ploré, fils fussent morts plustost, lors que le Royaume de Troye estoit en sa
fleur & vigueur, & en ceste si grande opulence qu'il lamentoit & regrettoit: ce que F
lon peult euidentement iuger & cognoistre par les paroles qu'il dit à son fils Hector,
quand il l'admoneste de se retirer du combat contre Achilles, par ces vers:

Homere
Iliad. xxij.

Rentre mon fils, rentre dans la closture
De ceste ville, à fin que de mort dure
Puisses Troiens & Troienes sauuer.
Ne donne pas matiere de brauer
A ce cruel Achilles, pour la gloire
D'auoir sur roy obtenu la victoire,
T'aiant osté hors de ce monde-cy.
Helas au moins, mon fils, ayes mercy
De ton vieil pere, à qui encore l'aage
N'a pas rauy de la raison l'vsage,
Que Iupiter autrement à la fin
De ces vieux iours par malheureux destin
Fera mourir d'une mort miserable,
L'aiant faiët voir du mal innumerable,
Ses fils au fer trenchant exterminer,
Par les cheueux ses filles entrainer,
Ses beaux palais saccager & destruire
De fond en comble, & par trop cruelle ire
Petits enfans du tetin arracher,
Pour contre terre ou mur les escacher,
Tirer de mains violentes les femmes
De mes fils morts à forcemens infames:
Finablement iusques dessus ma porte
Les chiens goulus traineront ma chair morte,
Apres que l'un des ennemis aura
Versé ce peu de sang qui restera
Dedans mon corps, d'une espee poinctue,
Ou bien du fer d'une sagette aigue.
Làs il n'y a rien à voir si piteux,
Qu'un vieillard blanc de barbe & de cheueux,
A qui les chiens par villaine morsure
Ont deschiré la face & la nature.
Ainsi parla le bon homme, arrachant
Le poil chenu de son blanc chef penchant:

G

H

Mais

A Mais pour cela ne luy fut onc possible
Plier d'Hector le courage inflexible.

Veu doncques qu'il y a tant & tant d'exemples de cela, il faut que tu penſes que la mort deliure ou preſerue pluſieurs perſonnes de pluſieurs grands & griefs maux, eſquels ils fuſſent certainement encourus, ſ'ils euſſent veſcu d'auantage: dont ie ne t'ay point voulu faire de plus long recit, ne plus ample recueil, pour euitier prolixité, eſtimant que ceux-là te deuoient bien ſuffire, pour t'engarder de te laiſſer aller outre le naturel, & outre toute meſure, en des regrets inutiles, & des lamentations qui ne procedent que de foibleſſe & petiteſſe de cœur. Le philoſophe Crantor ſouloit dire, que ſouffrir aduerſité ſans en eſtre cauſe, eſtoit vn grand allegement contre les ſiniſtres accidens de la fortune: mais j'aimerois mieux dire, que ne ſe ſentir point coupable, eſt vne grande medecine & ſouuerain remede pour oſter le ſentiment de la douleur d'vne aduerſité. Au demourant, l'aimer & auoir cher vn tref-

B paſſé ne conſiſte pas en ſ'affliger, & ſe contriſter ſoy meſme, ains en ſeruir & profiter à celui que l'on aime. Or le ſeruice & profit que lon peut faire à ceux qui ſont oſtez hors de ce monde, c'eſt l'honneur que lon leur porte par la bonne memoire que lon en a: pource que nul homme de bien ne merite d'eſtre lamenté ne ploré, ains plus toſt d'eſtre celebré & loué: ny que lon en demene deuil, ains que l'on en face honorable & glorieuſe memoire: ny que lon en iette larmes indices de douleur, ains que lon luy face des honneſtes offrandes & oblations: ſil eſt ainſi que celui qui eſt paſſé en l'autre monde, ſoit en vne plus diuine condition de vie, eſtant deliuré de la malheureuſe ſeruitude de ce corps & des infinies ſolicitudes & miſeres qu'il eſt force que ſouſtiennent ceux qui ſont en ceſte vie mortelle, iuſques à ce qu'ils aient paracheué le cours prefix de ceſte vie, que la nature ne nous a point donnée pour tousiours, ains à chaſcun de nous en a diſtribué la portion qui luy eſtoit ordonnée par les loix de la fatale deſtinee. Pourtant ne faut-il pas que les ſages, pour le regret de leurs amis

C trefpaſſez, ſe laiſſent deſborder outre le naturel, & outre tout moyen & meſure de douleur, en des deuils & lamentations barbaſques, qui iamais ne prennent fin, entendans ce qui ia par cy deuant eſt aduenü à pluſieurs, qui ſe ſont ſi fort faiſis de triſteſſe & melancholie, que premier que d'acheuer leur deuil, ils ont acheué leur vie, & en portant le deuil des funerailles d'autrui, ils ont eux-meſmes malheureuſement procuré les leurs: de maniere que les ennuys qu'ils auoient de la mort d'autrui, & les maux qui procedoient de leur folie, ont eſté enſepuelis quand & eux, ſi que lon pouuoit bien dire veritablement d'eux ce que dit Homere,

La nuit ſuruint qu'ils lamentoient encore.

Parquoy il leur faut ſouuent repeter de tels propos: Quoy, ne ceſſerons nous iamais de nous doloir: ſerons nous toute noſtre vie en miſere, qui ne finira iamais tant que nous demurerons en vie? Car de péſer qu'il y ait deuil qui iamais ne doie prendre fin, ſeroit vne extrême folie, attendu meſmement que bien ſouuent nous voyons,

D que ceux qui plus impatientement ſupportent leurs douleurs, & qui font plus de demonſtration de grand deuil, deuiennent avec le temps les plus doux, & que dedans les monumens meſmes, là où ils ſe tourmentoient le plus, & crioient les hauts cris en ſe battant les poitrines, ils ſ'aſſemblent, & font de magnifiques feſtins avec toute ſorte de muſique, & toute autre maniere de reſiouiffance. C'eſt doncques à faire à vn homme inſenſé, eſtimer que lon puiſſe auoir vn deuil ainſi permanent & perdurable à iamais: & ſils venoient à conſiderer que leur deuil à la fin paſſera, après que quelque choſe ſera aduenüe, ils preuiendroient le temps à ſe deliurer de douleur, qui ainſi comme ainſi le doit faire: car il eſt impoſſible à Dieu meſme de faire, que ce qui eſt faiſt ſoit à faire: & pourtant ce qui maintenant eſt arriué contre noſtre eſperance, & contre noſtre opinion, a monſtré que c'eſt choſe qui a bien accouſtumé

Consolation enuoyee à Apollonius

d'aduenir à plusieurs par mesmes moyens. Comment, n'est-ce pas chose que nous E
pouuons bien comprendre par discours de raison naturelle, que

Pleine est la mer & la terre de maux?

De maux sur maux fatale destinee

Enuoloppant va l'humaine lignee?

Le cours du ciel n'en est pas mesme exempt.

» Ce n'est pas de maintenant, comme dit Crantor, mais de tout temps, que plusieurs
» sages hommes ont deploré les miseres humaines, reputans que le viure mesme estoit
» vne punition, & que le commencement de naistre homme, estoit vne griefue cala-
» mité. Et dit Aristote, que Silenus, quand il fut surpris par le Roy Midas, le pronon-
» cea ainsi. Mais pource qu'il vient à propos, il vaudra mieux coucher icy les propres
» mots du philosophe: car en son liure intitulé Eudemus, ou de l'ame, il dit ainsi: Par-
» quoy ô tres-bon & tres-heureux personnage, nous reputons les trespassez benicts &
» bien-heureux, & pensons que mentir contre eux; ou bien mesdire d'eux, soit vne F
» impieté, comme de ceux qui sont ia passez en vne meilleure & plus excellente con-
» dition que la nostre: & ceste coustume & opinion est si vieille & si ancienne en no-
» stre pais, qu'il n'y a homme qui sçache ny le commencement du temps qu'elle fut in-
» troduicte, ny le premier authcur qui l'a instituee: ains est de toute eternité, que ceste
» coustume, comme vne loy, est obseruee parmy nous. Mais outre cela, tu sçais bien
» vn ancien conte, qui est de tout temps en la bouche des hommes. Quel propos est-
» ce, dit-il? & l'autre continuant respondit: c'est, Que le meilleur seroit ne naistre
» point du tout: & apres, Que le mourir vaut mieux que le viure: & mesme que les
» Dieux l'ont ainsi tesmoigné à plusieurs, & entre autres au Roy Midas, lequel en chas-
» fant prit vn iour Silenus, & luy demanda, quelle chose estoit meilleure à l'homme, &
» que c'estoit que l'homme deuoit souhaitter & eslire sur toute autre chose. Il ne luy
» voulut rien respondre du premier coup, ains demoura en silence sans dire vn seul mot
» iusques à tant que Midas l'ayant pressé par tous moyens à toute peine à la fin le con- G
» duisit-il à parler: & lors se voyant contrainct par force, il luy dit, O semence de
» courte duree, de laborieuse destinee, & de fortune penible & miserable, pourquoy
» me contraignez-vous de vous dire ce qu'il vous vaudroit mieux ignorer? pource que
» la vie est moins trauaillee, & moins douloureuse, quand elle ignore ses propres maux.
» Or est-il que les hommes ne peuuent nullement auoir ce qui est de tout le meilleur,
» ny estre participans de la nature de ce qui est tres-bon: car le meilleur à tous & à tou-
» tes seroit, n'auoir iamais esté: mais ce qui suit apres, & le premier de ce qui se peut,
» faire, bien qu'il soit en ordre le second, c'est, mourir incontinent apres que lon est né.
Il appert doncques que Silenus iugea & prononcea, que la condition de ceux qui sont
morts est meilleure, que de ceux qui sont viuans: & y a dix mille sentences & exem-
ples tels, & dix mille encore apres, que l'on pourroit alleguer & amener à mesme con-
clusion: mais il n'est ia besoing estendre d'auantage ce propos. Il ne faut doncques H
point lamenter les ieunes hommes qui meurent, pour-autant qu'ils sont priuez des
biens dont les hommes iouissent en viuant longuement: car cela est incertain, com-
me nous auons ia dict par plusieurs fois, fils sont priuez de maux ou de biens, pour-
ce qu'il y a beaucoup plus de maux en la vie humaine que de biens, & acquerons les
vns à grande peine & avec beaucoup de trauail & de soucy, mais les maux fort fa-
cilement: d'autant que lon dit qu'ils sont ronds, & qu'ils s'entretiennent, & vont l'un
apres l'autre fort facilement, là où les biens sont separez & distans les vns des autres,
ne s'assemblans iamais les vns avec les autres, sinon sur la fin de la vie de l'homme. Par-
quoy il semble que nous nous oublions, car non seulement comme dit Euripide,

Les biens mondains ne sont propres aux hommes.

mais ny autre chose quelconque: & pourtant faut-il dire de toutes choses,

Les biens

A Les biens en propre aux Dieux seuls appartiennent,
Et les humains en recepte les tiennent :
Quand il leur plaist de les redemander,
Il est en eux les en deposseder.

Il ne faut doncques point estre marris, fils nous redemandent ce qu'ils nous auoient presté pour vn peu de temps seulement : car les bancquiers mesmes, comme nous auons accoustumé de dire souuent, ne se courroucent pas quand on leur redemande, & qu'ils sont contraincts de rendre les deniers que lon a depose entre leurs mains, fils sont gens de bien : car on pourroit dire avec raison à ceux qui ne le rendroient pas
» volontiers, As-tu oublié que tu auois receu ces deniers-là pour les rendre? Cela se peut conuenablement appliquer à tous les hommes : car nous auons tous la vie des Dieux en depost forcé & contrainct, & n'y a point de certain temps prefix, dedans lequel il la nous faille rendre, comme aussi n'ont point les bancquiers de temps prefix, auquel ils soient tenus de rendre les deniers deposez en leurs mains, ains leur est incertain quand celuy qui les leur a baillez les redemandera. Celuy doncques qui se courrouce excessiuement, quand il se sent luy mesme près de la mort, ou quand ses enfans luy meurent, n'a-il pas manifestement oublié qu'il est homme, & qu'il auoit engendré des enfans mortels? Ce n'est point faict à homme qui ait le sens entier, ignorer que l'homme est vn animal mortel, ne qu'il est né pour vne fois mourir. Parquoy si Niobé, selon que les fables racontent, eust tousiours eu à la main ceste opinion & ceste consideration prompte,

En fleur d'aage tu ne seras
Toute ta vie, & point n'auras
Tousiours d'enfans grande maignie
Autour de toy pour compagnie :
Le Soleil ne te fera pas
Doux à voir iusqu'à ton trespas :

C elle ne se fust pas tourmentee ne desesperée, iusques à desirer sortir hors de ceste vie pour la grandeur de sa calamité, & à coniurer les Dieux de la rauir hors de ce monde en vne tres-cruelle ruine. Il y a deux des preceptes qui sont escrits au temple d'Apollo en Delphes, tres-necessaires à la vie humaine: l'vn est, Cognoy toy mesme: l'autre, Rien trop : car de ces deux preceptes dependent tous les autres, & sont ces deux consonans & accordans ensemble, s'entredeclarans l'vn l'autre autant qu'il est possible: car en Cognoistre soy-mesme est contenu Rien trop : & en Rien trop se comprend Cognoistre soy-mesme : & pourtant Ion le poëte parlant de ces deux preceptes dit ainsi,

Cognoy toy-mesme, à dire est bien aisé,
Mais à le faire il est si mal-aisé,
Qu'il n'y a nul en la celeste bande

D Des Dieux, qu'vn seul Iupiter, qui l'entende. Et Pindare dit,
Les sages louënt grandement
Ce mot, Rien excessiuement.

Qui aura donc tousiours deuant les yeux de sa pensee ces deux preceptes en telle reuerence que meritent d'estre tenus les Oracles d'Apollo, il les pourra facilement appliquer à tous affaires de la vie humaine, & les sçaura bien supporter dextrement & modestement, eu esgard à sa nature, & à ne se point trop esleuer en vaine gloire pour chose qui puisse aduenir, ny aussi à se raualler & abbaïsser outre mesure en deplorations & lamentations pour l'infirmité ou de l'ame ou de la fortune, ny pour la crainte de la mort, qui s'imprime en nos cœurs à faute de bien cognoistre & considerer ce qui est ordinaire & coustumier d'aduenir en la vie de l'homme, par necessité, & selon

Consolation enuoyee à Apollonius

la disposition de fatale destinee.

E

Quand tu seras par les Dieux visité
De la douleur de quelque aduersité,
Supporte la en patience douce
Modestement, & point ne t'en courrouce.

Et le poëte Tragique Æschylus,

C'est fait en homme & vertueux & sage,
Quoy qu'il aduienne à son desaduantage,
Contre les Dieux iamais ne murmurer.

Et Euripides,

Celuy qui cede à la necessité,
Entend que c'est que la diuinité,
Et de nous est estimé homme sage.

Et en vn autre lieu,

Celuy qui sçait porter l'éuenement,
Quel qui luy puisse aduenir, doucement,
Est dessus tous, ainsi comme ie pense,
Homme de bien & de grande prudence.

F

Et au contraire, la plus part du monde se plaint de toutes choses, & quoy que ce soit
qu'il leur aduienne contre leur souhait, ou contre leur esperance, ils estiment tousiours
que cela procede de la malignité & de l'enuie des Dieux & de la fortune. Et pour-
tant ils se lamentent, & accusent tousiours leur mauuaise fortune: ausquels on pour-
roit avec raison repliquer & respondre, Ce n'est pas Dieu qui te rend miserable, mais
c'est toy-mesme, ta folie, & ton erreur procedant d'ignorance: car pour ceste faulx
& abusée opinion ils se plaignent de toutes sortes de mort. Si aucuns de leurs amis
vient à mourir hors de son pais, ils le regrettent en disant,

Iliad. liu. ix.

Helas pauuret, tu n'as eu ny ton pere
A ton trespas, ny ta dolente mere
Aupres de toy pour te clorre les yeux.

Et fil meurt en son pais presens son pere & sa mere, ils le lamentent, comme leur
aiaut esté rauy des mains, & leur aiaut laissé l'impression de la douleur de l'auoir veu
mourir deuant leurs yeux. S'il meurt sans parler ne leur dire mot quelconque de
chose que ce soit, en criant ils disent,

G

Iliad. liu. 24.

Tu ne m'as pas vn bon propos tenu,
Que tousiours i'eusse en mon cœur retenu.

Si au contraire il leur a tenu quelque propos en mourant, ils auront tousiours ce pro-
pos-là en la bouche, comme vn renouvellement de leur douleur. S'il est mort sou-
dainement, ils le déplorent cōme aiaut esté rauy: S'il a demouré longuement à mou-
rir, ils le plaignent comme estant mort à petit feu, par maniere de dire, & aiaut endu-
ré beaucoup auant que passer. brief toute occasion leur est idoine & suffisante pour
exciter leurs douleurs & leurs lamentations. Et ceux qui ont émeu toutes ces crieries, H
ont esté les poëtes, mesmement le premier & le prince de tous, Homere, disant:

Iliad. liu. 23.

Comme le pere au feu des funerailles
De son cher fils mort en ses espouailles
Bruslant ses os lamente amerement,
Et ceste mort afflige durement
La pauvre mere, à tous deux miserables
Laißans regrets & pleurs innumerables.

Et pour cela encoren'est-il pas assésuré si on le plaint & plore iustement: mais voyez
ce qui suit apres,

Estant seul fils vnique en leurs ans vieux,
Et de grands biens heritier apres eux.

Et qui

A Et qui sçait que Dieu par sa prouoyance & bien-veillance paternelle enuers le genre humain, n'en oste quelques vns de ce monde auant leur temps, pour-autant qu'il preuoit bien les maux qui autrement leur deuoient aduenir? Pourtant faut-il plus tost estimer, qu'il ne leur aduient rien que lon doie auoir en haine: Car,

Rien n'est mauuais quand il est necessaire:

Je dis rien de ce qui aduient à l'homme, soit par raison primitiue, soit par consequence, tant par ce que bien souuent la mort suruenant aux hommes, les preserue de plusieurs autres plus griefues & pires aduersitez: comme aussi pour ce qu'il estoit expedient aux vns de n'auoir oncques esté, aux autres de mourir en naissant, aux autres apres estre entrez peu auant en la vie, & aux autres apres qu'ils sont paruenus en la fleur de leur aage: toutes lesquelles especes de mort, en quelque sorte qu'elles aduiennent, se doiuent supporter patiemment, attendu que ce qui procede de fatale destinee, ne se peut euitier: & la raison voudroit que les hommes bien appris considerassent en eux-

B mesmes, que ceux que nous estimons auoir esté priuez de la vie auant la maturité, nous precedent de bien peu de temps: car la plus longue vie qui soit, est courte & briefue, ne montant non plus qu'un poinct ou vne minute de tēps, au regard de l'infinie eternité: & que plusieurs de ceux qui demenēt le plus de deuil, en peu de temps sont allez apres ceux qu'ils ont ploré, n'ayās rien gagné à leur long deuil, & festās pour neant affligez d'ennuis & de fascheries: là où puis que le temps est si court que nous auōs à voyager au pelerinage de ceste vie, nous ne nous deussions pas consumer nous mesmes de tristesse souillee, ny de douleur amere, & miserable deuil iusques à affliger de coups nostre propre corps, ains plus tost nous efforcer de reuenir & retourner à ce qui est meilleur & plus humain, en conuersant avec personnes qui soient, non pour se contrister avec nous, & pour exciter tousiours d'auantage nostre deuil par vne maniere de flatterie, ains plustost avec ceux qui soient pour nous oster & diminuer nos ennuis, avec vne genereuse, graue & venerable consolation, aians tousiours en l'entendement ces

C vers d'Homere que Hector dit à sa femme Andromache, en la reconfortant,

Ne me viens point chetiue trop saisir
L'entendement de triste desplaisir:
Point ne fera ma vie terminee
Par qui que soit auant sa destinee.
Au demourant ie te dis Andromache,
Qu'il n'y a point d'homme ne preux ne lasche
Qui sçeust apres qu'une fois il est né,
Fuir ce qui luy est predestiné.

Et le mesme poète parlant de ceste fatale destinee dit en vn autre passage,

Dés qu'un enfant sort du ventre, l'estaim
Est tout filé de son fatal destin.

D Si nous imprimons ces raisons en nostre entendement, nous serons deliurez d'une vaine melancholie de deuil, qui ne sert à rien, mesmement quand nous viendrons à considerer combien la duree de nostre vie est courte: pourtāt la faut-il contregarder, à fin que nous la puissions passer tranquillement sans estre agitee ne troublee de ces douleurs de mortuaires, en delaisant les marques & habits de deuil, & reprenant le soing de bien traiter nos personnes, & de prouoir au bien de ceux qui vivent avec nous. Aussi sera-il bon de se ramener en memoire les argumens & raisons dont nous aurons, comme il est vray-semblable, autrefois vŕe enuers nos parens & amis en pareilles calamitez, en les recōfortant, & leur suadant de supporter patiemment & communément les communs accidens de ceste vie, & les cas humains humainement, & ne commettre pas ceste faute, que d'estre suffisant assez pour pouoir descharger les autres de douleur, & ne se pouoir pas secourir soy-mesme, ny receuoir aucune vti-

Iliad. liu. 6.

Consolation enuoyee à Apollonius

lité de la recordation de ces persuasions-là, & guarir les angoisses de l'ame avec les E
drogues medecinales de la raison, tenans pour certain qu'il n'y a rien que lon deust
moins differer ny dilayer, que de descharger son cœur de melancholie & d'ennuy : &
toutefois on dit en vn commun prouerbe, qui est en la bouche de tout le monde,

Qui muse à quoy que ce soit,

Toufiours perte il en reçoit.

Mais encore bien plus reçoit-il de dommage, à mon aduis, celui qui dilaye à se des-
charger des griefues & malencontreuses passions de l'ame, le differant iusques à vn
autre temps. Au contraire faudroit-il tourner ses yeux sur ceux qui ont genereuse-
ment & magnanimement supporté la mort de leurs enfans, comme Anaxagoras le
Clazomenien, & Demosthenes l'Athenien, Dion le Syracusain, & le Roy Antigo-
nus, & plusieurs autres, tant du passé, que du present : desquels Anaxagoras, ainsi
comme nous lisons, aiant entendu la mort de son fils, par quelqu'un qui luy en vint
apporter la nouvelle, ainsi comme il disputoit de la nature des choses, & deuisoit F
avec ses familiers & amis, il s'arresta vn peu à penser en soy-mesme, & puis dit seule-
ment aux assistans, Je scauois bien que j'auois engendré vn fils mortel. Et Pericles,
qui pour l'excellence de son eloquence, & de son grand sens & prudence fut surnom-
mé Olympien, c'est à dire, celeste, en feit tout autant, quand il entendit que ses deux
enfans Paralus & Xantippus estoient tous deux morts, ainsi que dit Protagoras en
ces paroles : Luy estans ses deux fils, tous deux beaux ieunes hommes, morts à huit
iours l'un de l'autre, il n'en porta oncques le deuil, ains mainteint toufiours son esprit
en serene tranquillité, dont il receuoit tous les iours de grands fruiçts, non seulement
en ce que ce luy estoit vn grand heur, de ne sentir point de douleur, mais aussi en ce
qu'il en estoit mieux estimé du peuple : car vn chascun le voyât supporter sa perte ainsi
robustement, l'en estimoit vaillant & magnanime, & de plus grand cœur que soy-
mesme, sachant tresbien comme il se trouuoit affligé & troublé en tels accidens :
car on dit qu'apres la nouvelle de la mort de ses deux enfans il ne laissa pas de porter G
sur la teste chapeaux de fleurs, suyuant la coustume de son païs, & de harenguer au
peuple en robbe blanche, mettant toufiours en auant des bons conseils aux Athe-
niens, & les incitant toufiours à la guerre. Semblablement Xenophon l'un des fa-
miliers de Socrates, ainsi comme il sacrifioit vn iour aux Dieux, entendit par quel-
ques vns qui retournoient de la bataille, que son fils y estoit mort : il osta adonc in-
continent le chapeau de fleurs qu'il auoit sur la teste, & demanda en quelle sorte il
estoit mort : & comme on luy eust dit, qu'il auoit esté tué en combatant fort vail-
lamment, apres auoir faiçt vn grand meurtre des ennemis, il demeura vn bien peu
d'espace à reprimer par discours de la raison en son cœur sa passion, & puis remeit in-
continent le chapeau de fleurs sur sa teste, & paracheua son sacrifice, disant à ceux
qui luy en auoient apporté la nouvelle, Je n'ay iamais requis aux Dieux que mon fils
fust immortel, ne qu'il vescu longuement, car on ne sçait si cela est expedient à ceux H
qui le demandent : mais bien leur ay-ie prié, qu'ils luy feissent la grace d'estre hom-
me de bien, & de bien aimer & seruir sa patrie : ce qui est adueni. Et Dion le Sy-
racusain, comme il estoit vn iour assis à deuiser avec ses amis, il entendit vn grand
bruit parmy sa maison, & vn grand cry : si demanda, que c'estoit : & apres auoir en-
tendu l'inconuenient, que c'estoit son fils qui estoit tombé du toict de la maison en
bas, & s'estoit tué, sans autrement s'en effrayer, il commanda que lon en baillast le
corps aux femmes pour l'ensepuelir selon la coustume : & luy ce-pendant continua le
propos qu'il auoit encommencé avec ses amis. Demosthenes l'orateur le suiuit aussi
en cela, apres auoir perdu sa chere & vniue fille, de laquelle Æschines, pensant faire
vn grand reproche à son pere, dit ainsi : Sept iours apres que sa fille fut trespassee,
deuant que d'en auoir faiçt le dueil & les obseques à la maniere accoustumee, cou-
ronné

A ronné d'un chapeau de fleurs, & prenant vne robe blanche, il sacrifia aux Dieux vn
 „ bœuf, & meit ainsi malheureusement à nonchaloir la pauvre trespassee, qu'il auoit
 „ perduë, sa fille vnique, & celle qui premier l'auoit appellé pere, le meschant qu'il est.
 Ce Rhetoricien-là aiant pris pour son sujet à accuser Demosthene, recite ces propos
 là, ne se prenant pas garde qu'en le cuidant blasmer il le louë, veu qu'il reietta arriere
 tout deuil, & monstra qu'il auoit la charité enuers son pais en plus grande recomman-
 dation, que l'amour & compassion naturelle enuers ceux de son sang. Et le Roy An-
 tigonus aiant entendu la mort de son fils Alcyoneus, qui auoit esté tué en vne bat-
 „ taille, il regarda franchement ceux qui luy apportèrent ceste mauuaise nouvelle, &
 „ s'estant vn peu arresté à penser, la teste baissée, sans mot dire, il proféra ces paroles: O
 „ Alcyoneus, tu as perdu la vie plus tard que tu ne deuois, te iettant ainsi à l'abandon
 „ sur les ennemis, & ne te souciant autrement ny de ton salut, ny de mes admoneste-
 „ mens. Or n'y a-il celuy qui n'admire & n'estime grandement ces personages-là,
 B pour leur constance & magnanimité: mais quand ce vient à l'espreuue du faict, ils ne
 les peuuent imiter pour l'imbecillité de leur ame, laquelle procede d'ignorance: tou-
 tefois y aiant plusieurs exemples de ceux qui se sont genereusement & vertueuse-
 ment portez en la mort & perte de leurs amis & proches parens, que lon pourroit
 tirer tant de l'histoire Grecque, comme de la Latine, ce que nous en auons allegué
 iusques icy, pourra suffire pour faire oster ce tant fascheux deuil, & ceste vaine affli-
 ction que tu en prens, laquelle ne peut à rien seruir ne profiter. Mais que les ieunes
 hommes d'excellente vertu, qui meurent en leur ieunesse, soient en la grace des Dieux,
 & qu'ils passent en vn plus heureux estre, i'en ay desia faict quelque mention au par-
 auant, & encore essayeray-ie d'en dire quelque chose en cest endroiect, le plus briefue-
 ment qu'il me sera possible, portant tesmoignage de verité à ceste belle & sage sen-
 tence de Menander qui dit,

Celuy qui est en la grace des Dieux,

C Il meurt auant que de deuenir vieux.

Mais à l'aduenture me pourras-tu repliquer, trescher amy Apollonius, que le ieune
 Apollonius, ton fils auoit toutes choses fort prosperes & à souhait, & que c'estoit plus
 tost toy qui deuois yssir de ceste vie, & estre inhumé par luy qui estoit en la fleur de
 son aage, & que cela estoit le deuoir selon nostre nature, & selon le cours de l'humani-
 té: il est bien vray, mais non pas à l'aduéture selon la prouoyance du gouuernemēt de
 l'vniuers, ny selon la generale ordonnance du monde: & au regard de luy qui est bien-
 heureux maintenant, il ne luy estoit pas selon nature de demourer en ceste vie plus
 que le temps qui luy estoit prefix, ains apres auoir honnestement acheué le cours de
 son temps, estoit besoing qu'il reprist son chemin pour retourner à sa destinee qui le
 rappelloit. Voire-mais, il est mort auant son temps: tant plus heureux est-il, de n'a-
 uoir point essayé d'auantage les maux de ceste vie: car, comme dit Euripide,

D Ce que du nom de vie lon appelle,

Est en effect peine continuelle.

Mais il s'en est allé de trop bonne heure, en la plus belle fleur de son aage, ieune hom-
 me, entier de toutes choses, à marier, aimé, prisé & estimé de tous ceux qui le han-
 toient, aimant son pere, aimant sa mere, aimant ses parens, aimant les lettres, &
 pour dire tout en vn mot, amiable à tout le monde, reuerant ses amis qui estoient
 de plus grand aage que luy comme ses peres, cherissant ses egaux & familiers, ho-
 norant ceux qui l'auoient enseigné, aux estrangers, autant comme aux citoyens,
 tres-humain, & à tous cordial, & de tous vniuersellement bien-voulu, tant pour la
 grace de sa beauté, que pour sa gracieuse affabilité. Il est bien vray tout cela: mais
 aussi faut-il que tu penses, qu'il s'en est allé de bonne heure de ceste vie mortelle, em-
 portant avec soy louange eternelle de sa pieté & obseruance enuers toy, & de la

En diuers
endroits de
ses tragœ-
dies.

Consolation enuoyee à Apollonius

tienne enuers luy , ne plus ne moins , que fil fust sorty d'un banquet , auant que de E
tomber en quelque yurongnerie & folie , laquelle ne peut fuir qu'elle n'aduienne en
longue vieillesse : & si le dire des anciens poëtes & philosophes est veritable , comme
il est vray-semblable , que les gens de bien , & qui ont esté deuots enuers les Dieux ,
quand ils viennent à mourir , aient en l'autre monde honneur & preference , & vn lieu
à part où leurs ames demeurent , tu dois auoir bonne esperance de feu ton fils , qu'il
fera colloqué au nombre de ceux là : desquels hommes religieux le poëte Pindare
parlant en ses Cantiques , dit ainsi ,

Quand nous auons icy la nuit ,
Le Soleil là-dessous leur luit :
Leurs vergers sont belles prairies
De roses vermeilles fleuries ,
Couuertes d'arbres , qui les sens
Remplissent de l'odeur d'encens , F
Tous chargez de pommes dorees.
Par ces delicieuses prees
Les vns se vont resiouissans
A picquer cheuaux bondissans ,
Les autres au son harmonique
De tout instrument de musique ,
Autres aux dez : là sont de fleurs
Toutes delicates odeurs :
Et les autels des Dieux y fument
De toutes senteurs , qui parfument ,
En brulant dedans vn clair feu ,
Toufiours cest amiable lieu.

Et vn peu plus auant , en vn autre Cantique de lamentation , là où il parle de l'ame , il dit : G

Heureuse est leur condition
Hors de toute vexation :
Il n'est point de corps qui ne meure ,
L'ame seule toufiours demeure
Viuant à perpetuité ,
Comme de la diuinité
Seule aiant pris son origine.
Or de dormir elle ne fine
Tant que les membres sont veillans :
Mais quelquefois eux sommeillans ,
Elle donne à cognoistre comme
C'est elle seule qui en l'homme
Fait iugement de ce qui plaist , H
Et de ce qui fasche & desplaist.

Et le diuin Platon en son traité de l'Ame a dit plusieurs raisons de son immortalité ,
& en a aussi beaucoup parlé en ses liures de la Republique , & au dialogue intitulé
Memnon , & en celui de Gorgias , & par-cy par-là en plusieurs autres lieux. Or
quant à tout ce qu'il en a dit en son dialogue de l'Ame , i'en feray vn extraict à part ,
que ie te bailleray , ainsi que tu m'en as requis , mais pour le present ie ne t'en allegueray
que ce qui vient à propos , & qui sert à la matiere : c'est ce qu'il en dit à vn Athénien
familier & domestique de Gorgias l'orateur : car Socrates en ce traité de Platon dit
„ ainsi : Escoute vn fort beau propos , lequel tu repateras à mon aduis estre vne fable ,
„ mais quant à moy , ie l'estime veritable , & ie te le raconteray pour tel : car comme dit

Homere

A Homere, Iupiter, Neptune & Pluton departirent iadis entre-eux l'empire qu'ils auoient
 „ eu de leur pere. Or y auoit-il vne loy touchant les hommes dès le temps de Saturne,
 „ & de tout temps, & est encore iusques au temps present entre les Dieux, Que d'entre
 „ les hommes celuy qui a passé sa vie iustement & sainctement, quand il vient à mou-
 „ rir, s'en va demourer és Isles fortunées, en toute felicité, hors de toute sorte de maux:
 „ & au contraire, celuy qui a vescu iniustement & sans craindre ne reuerer les Dieux,
 „ s'en va en la prison de iustice & de punition, que lon appelle Tartare, c'est à dire, En-
 „ fer. Or les iuges qui ont eu cognoissance de cela durant le regne de Saturne, & en-
 „ core depuis sur le commencement du regne de Iupiter, estoient des hommes viuans
 „ qui iugeoient les autres hommes en leur vie, au propre iour qu'ils deuoient aller de
 „ vie à trespas: dont il aduenoit que les iugemens n'en estoient pas bons, iusques à ce
 „ que Pluton & les autres superintendans des Isles fortunées vindrent rapporter à Iu-
 „ piter, que lon leur enuoyoit des gens qui n'en estoient pas dignes. Iupiter leur respon-
 B dit, l'y donneray bien ordre, & engarderay bien que cela ne se fera plus: car la cause
 „ pourquoy les iugemens sont mauuais est, pource que tant ceux qui iugent, comme
 „ ceux qui sont iugez, le sont estans reuestus, pource que c'est durant leur vie, & plu-
 „ sieurs à l'adventure aians de mauuaises ames, & estans reuestus de beaux corps, de
 „ noblesse, de lignee & de richesse, quand on les veut iuger, il vient plusieurs qui leur
 „ portent tesmoignage, comment ils ont bien vescu: les iuges sont esblouys de ces tes-
 „ moins-là, ioinct qu'ils sont eux-mesmes reuestus, aiant au deuant de leurs ames les
 „ yeux, les oreilles, & toute la structure de leur corps: toutes ces choses-là leur donnent
 „ empeschement, tant leurs vestemens propres, que ceux des iugez. Premièrement
 „ doncques il les fault engarder qu'ils ne sçachent plus l'heure de leur mort, car ils la
 „ sçauent bien maintenant. Cela doncques soit commandé à Prometheus, qu'il engar-
 „ de que deormais les hommes ne sçachent plus le iour de leur mort: & puis il faut que
 „ les iugemens d'ores-enauant se fassent, les vns & les autres estans tous nuds: & pour ce
 C faire il est besoing qu'ils soient tous morts, & le iuge mesme soit mort, & qu'il vienne
 „ à examiner avec l'ame seule, les ames des trespassez, à mesure qu'ils viendront à mou-
 „ rir, estans seules & destituees de tous leurs parens & amis, & aians laissé sur la terre
 „ tout l'ornement & vestement qu'elles souloient auoir à celle fin que le iugement s'en
 „ face plus droict & plus iuste. C'est pourquoy aiant cogneu cela deuant vous, j'ay
 „ constitué de mes propres enfans pour iuges, deux du costé de l'Asie, Minos & Rada-
 „ manthus, & vn du costé de l'Europe, c'est Æacus: ceux là apres qu'ils seront morts,
 „ iugeront dedans le pré au carrefour, là où fourchent les deux chemins, l'un qui va és
 „ Isles fortunées, l'autre au Tartare. Radamanthus iugera ceux de l'Asie, & Æacus ceux
 „ de l'Europe: & quant à Minos, ie luy donneray la presidence de iuger par dessus, si
 „ d'adventure il y a quelque chose qui soit incogneuë à l'un des deux autres, à fin que
 „ d'icy en auant le iugement soit tres-iuste, du chemin que les hommes auront à tenir.
 D Voyla le propos que j'ay ouy reciter, ô Callicles, & que ie croy estre veritable:
 „ duquel discours ie recueille ceste conclusion en fin, Que la mort n'est autre chose,
 „ que la separation de l'ame d'avec le corps. C'est ce que j'ay ramassé & mis ensemble,
 „ tres-cher amy Apollonius, avec grand soing & diligence pour t'en composer vn
 „ discours de consolation, qui m'a semblé tres-necessaire, tant pour allegger vn peu
 „ la douleur qui te trauaille presentement, & te faire cesser ce fascheux deuil que
 „ tu menes: comme aussi pour y comprendre l'honneur & la louange qui me semble
 „ que ie deuois à la memoire de ton fils Appollonius le bien-aimé des Dieux: car
 „ c'est chose à mon aduis tres-desirable, & conuenable à ceux qui par bonne & heu-
 „ reuse memoire, & par gloire perdurable sont consacrez à l'immortalité. Tu feras
 „ doncques sagement si tu obeis aux raisons qui y sont contenuës, & gratifies à ton
 „ fils, en te reuenant de ceste vaine affliction que tu donnes & à ton corps, & à ton ame,

Consolation enuoyee à sa femme

en ton accoustumee, ordinaire & naturelle façon de viure: car ainsi comme lors qu'il E
vivoit entre nous, il n'eust pas esté aise de voir ny toy son pere, ny sa mere, tristes &
desolez: aussi maintenant qu'il est conuersant & faisant bonne chere avec les Dieux,
il ne prendroit pas plaisir à voir l'estat auquel vous estes. Parquoy reprenant cou-
rage d'homme de bien, magnanime & aimant les siens, retire toy le premier, & puis la
mere du ieune homme, & tous vos parens & amis d'une telle misere, en passant en
une plus tranquille & paisible maniere de viure, laquelle sera trop plus agreable & au
defunct ton fils, & à nous tous, qui auons soing de ta personne, ainsi comme il con-
uient à l'amitié que nous te portons.

Consolation enuoyee à sa femme sur la

MORT D'VNE SIENE FILLE.

F

Plutarque à sa femme S.



E L V Y que tu m'auois enuoyé pour m'apporter la nouuelle
de la mort de nostre petite fille, à mon aduis m'a failly par le
chemin, estant allé droict à Athenes: mais arriué à Tana-
gre, i'en ay esté aduerty. Or quant à sa sepulture, ie pense
bien que tu y auras desia donné ordre: & à la mienne volonté
que ce soit en sorte, que ny pour le present, ny pour l'adue-
nir elle ne t'apporte guere de desplaisir. Mais si d'aduenture
tu as differé à faire quelque chose que tu eusses bien voulu,
iusques à ce que tu en eusses entendu mon aduis, estimant que
cela en le faisant t'aidera à porter plus legerement ta douleur, ie te prie au moins que ce G
soit sans aucune curiosité ny aucune superstition, desquelles tu es aussi peu entachee
que femme que ie cognoisse. Seulement te veux- ie admonester, ma femme, qu'en cest
inconuenient tu te maintienes, & pour toy & pour moy en une constance & tranquil-
lité d'esprit: car quant à moy, i'entens & mesure en mon cœur ceste perte telle, & aus-
si grande comme elle est, mais si ie treuve que tu la portes trop impatientement, cela
me sera plus grief, & me fâchera plus que l'inconuenient mesme: combien que ie
n'aye pas non plus esté engendré ny d'un chesne ny d'un rocher, dequoy tu peux toy
mesme estre bien bon tesmoing, sçachant comme nous auons nourry ensemble plu-
sieurs de nos enfans, en nostre maison, & par nos propres mains: tu sçais aussi com-
me ie l'aimois fort tendrement, pource que i'auois bien désiré avec toy que tu eusses
une fille, apres quatre fils que tu auois euz de reng, & pource qu'elle m'auoit apporté
le moyen de luy donner ton nom. Mais outre l'amour paternelle que lon a commu H
nement enuers les petits enfans, encore y auoit il en elle une poincte particuliere qui
la me faisoit plus cherement aimer, c'est qu'elle me donnoit du plaisir, sans que i'ap-
perceusse iamais en elle aucune cholere, ny aucune mignardise: car elle auoit une
douceur & bonté naturelle merueilleuse: & ce qu'elle s'efforçoit de monstrier qu'elle
aimoit ceux qui l'aimoient, & s'estudioit de leur complaire, me donnoit du plaisir, &
ensemble cognoissance d'une grande debonnaireté que nature auoit mise en elle: car
elle prioit sa nourrice de donner la mamelle non seulement aux autres petits enfans
qui ioüoient avec elle, mais aussi aux pouppees & autres ioüets d'enfans, dont elle se
ioüoit, comme faisant part de sa table par humanité, & cōmuniquant ce qu'elle auoit
de plus agreable à ceux qui luy donnoient plaisir. Mais ie ne voy pas, ma femme, pour-
quoy ces petits propos-là, & autres semblables qui nous ont donné du plaisir en sa
vie, nous

A vie, nous doiuent fascher & troubler maintenant apres sa mort, quand nous viendrons à les rememorer, mais aussi, au contraire, crains-je que avec la douleur nous n'en chassions la memoire, comme faiët Clymene quand elle dit,

L'arc & la trouffe m'est moleste,

Tous exercices ie deteste:

fuyant tousiours & tremblant à la recordation & rememoration de son fils, pource qu'elle luy renouvelloit ses douleurs: car naturellement nous refuyons tout ce qui nous fasche: mais il faut que comme en son viuant nous n'auons rien plus doux à embrasser, ne plus plaisant à voir & à ouïr qu'elle, aussi que le pensément d'elle loge & viue avec nous, pour toute nostre vie, aiant ie dis, beaucoup de fois plus de ioye que de tristesse, fil est vray-semblable, que les raisons & argumens que nous auons souuentefois alleguees aux autres, nous ayent à nous mesmes profité de quelque chose au besoing, & ne soient pas demourees oyseuses, en nous accusant qu'au lieu de ces ioyes-là passees, nous leur rendions maintenant plusieurs fois autant de douleurs.

B Ceux qui y ont assisté, nous rapportent, avec grande recommandation de ta vertu, que tu n'en as pas seulement changé de robe, ne pris accoustrement de deuil, & que tu ne t'en es ny défiguree, ny outragée, ny toy ny tes femmes, en aucune maniere, ny que tu n'en as fait aucun appareil somptueux à ses funeraillies, comme si c'eust esté pour vne feste solennelle, ains as fait toutes choses sobrement, & honnestement sans bruit, avec nos amis & parens: dequoy ie ne me suis point esmerueillé quant à moy, si toy qui iamais n'as pris plaisir ny fait gloire de te monstrier ny en theatre, ny en procession, ains plus tost qui as tousiours estimé que la sumptuosité estoit inutile, voire mesmes és choses de plaisir, en chose triste & douloureuse, tu as obserué la simplicité qui est la plus seure: car il faut que la Dame sage & honneste demeure inuiolee non seulement és festes Bacchanales, mais aussi penser qu'il faut que la tourmente & emotion de la passion en deuil, a besoing de continence pour resister &

C combattre, non pas contre l'amour & charité naturelle des meres aux enfans, comme quelques vnes pensent, mais contre l'intemperance de l'ame: car nous concedons à ceste charité le regretter, le reuerer, & le rememorer les trespassez: mais la cupidité excessiue & insatiable de lamentations, qui force les personnes iusques à ietter les hauts cris, & à se battre & outrager, n'est pas moins laide & honteuse, que l'incontinence és voluptez: toutefois on l'excuse plus de paroles, d'autant que à l'une la laideur c'est la douleur & l'amertume, au lieu qu'à l'autre c'est la volupté qui y est conioincte. Car y a-il rien plus desraisonnable, que d'oster l'excez de rire & de s'esjouir: & au contraire, de laisser aller les torrens de larmes & de pleurs, qui partent d'une mesme source, tant qu'ils peuuent aller? & ce que font quelques vns qui tansent & querellent avec leurs femmes pour quelques parfums ou quelques habillemens de pourpre qu'elles voudroient auoir, & ce pendant leur permettent de raser leurs cheueux

D en deuil, & se vestir de noir, se seoir deshonnestement à mesme terre, crier à pleine teste en inuoquant les Dieux: & ce qui est encore plus mauuais que tout, si elles punissent excessiuement ou iniustement leurs seruantes, sy opposer & les engarder: & quand elles mesmes se chastient cruellement, & asprement, les laisser faire en accidens & inconueniens qui auroient au contraire besoing de facilité & d'humanité. Mais quant à nous, ma femme, nous n'auons point eu iamais besoing de ce combat là l'un contre l'autre, ny n'en aurons à mon aduis, iamais de cestuy-cy: car quant à la simplicité de vestemens, & à la sobriété du viure ordinaire sans aucune superfluité, il n'y a pas vn philosophe, ny pas vn honneste citoyen qui ait hanté & fréquenté en nostre maison avec nous, qui n'ait pris grand plaisir à voir & considerer ta simplicité, soit aux sacrifices, soit aux theatres, soit aux danfes & processions: aussi as-tu desia monstté vne grande constance en pareil accident à la mort de ton fils aîné:

Consolation enuoyee à sa femme

& encore depuis quand le gentil Charon nous laissa auant aage: car il me souuient E
que quelques estrangers qui estoient venus avec moy de la marine, quand on nous
vint dire la nouuelle de la mort du petit enfant, comme ils furent arriuez avec d'au-
tres nos amis & voisins en nostre maison, & qu'ils y veirent toutes choses rassises &
bien composees sans desordre ne bruit aucun, ainsi comme eux-mesmes l'ont racon-
té à d'autres depuis, ils penserent que ce fust vne faulx nouuelle, & qu'il ne fust rien
aduenu de mal, tant tu ordonnas honnestement & sagement toutes choses en nostre
maison, lors que l'occasion estoit bien suffisante pour excuser vn desordre & vne
confusion, combien que tu eusses nourry l'enfant de ta propre mammelle, & que tu
y eusses enduré vne incision au tetin, à cause d'une froissure & contusion. Ce sont
actes de generosité en vne Dame, & de charité enuers ses enfans, cela. La où nous
voyons plusieurs autres meres, qui prennent leurs petits enfans des mains des nour-
rices, comme des iouets pour passer leur temps: & puis quand il aduient qu'ils meu-
rent, ils se laschent & laissent aller à tous vains regrets, & deuil qui ne sert de rien, & F
qui ne procede pas de bien-veillance, car bien-veillance est chose raisonnable &
honneste: mais beaucoup de mine procedant de vaine opinion meslé avec vn peu
d'affection naturelle, est ce qui engendre des deuils farouches, furieux & implacables.
Et semble qu'Æsope n'ait pas ignoré cela: car il dit, que Iupiter faisant la distribution
des hōneurs aux Dieux, le Deuil y vint qui en demanda aussi: & il luy bailla les larmes,
les regrets & lamentations, mais seulement de ceux qui le receuroient librement & vo-
lontairement: & de faict aussi en aduient-il ainsi du cōmancement, car vn chascun intro-
duit chez soy de sa propre volonté le deuil, mais depuis qu'il y est vne fois estably par
laps de tēps, & qu'il s'est rendu familier & domestique, il ne s'en va pas puis apresquād
on le voudroit bien chasser. Et pourtant faut-il combattre à la porte contre luy, & ne
receuoir pas garnison chez soy, en deschirant sa robe ou arrachant ses cheueux, ou
quelques autres choses semblables qui aduiennent tous les iours ordinairement, & ren-
dent l'hōme honteux, & son cœur serré, ne s'ozant ouurir ny s'elargir, ains paoureux G
& craintif, se reduisant là, qu'il ne pense pas qu'il luy soit loisible de rire, de voir la lu-
miere du Soleil, ny de hanter personne, ny de manger en compagnie, en telle ca-
ptiuité il se rend à cause de son deuil. Et à ce mal-là est conioinct vne nōchalance du
corps, vne condamnation de toutes estuues, de tout lauement, frottement, huyle-
ment, & traictement de sa personne, tout au contraire de ce que l'ame deuoit faire à
fin qu'elle mesme malade fust soulagee & aidee par le corps sain & dispos: car vne grā-
de partie de la douleur de l'ame s'allege & s'émousse, par maniere de dire, quād le corps
se sent gaillard, ne plus ne moins que les vagues vont chalant & s'applanissant quand
le temps est calme & serain. Mais à l'opposite, si pour estre mal traicté & mal pensé
il s'y engendre vne seicheresse du cuyr, vne aspreté rude, de maniere que le corps
n'exhale rien de gracieux ny de doux à l'ame, sinon des douleurs & des tristesses, ne
plus ne moins que des ameres & fascheuses exhalations: alors n'est-il pas aisé, quoy H
qu'on le desire, de facilement se rauoir, tant de griefues passions viennent à saisir l'ame
quand elle est ainsi affligée & tourmentee. Et ce qui est de plus dangereuse efficace,
& plus à craindre en cela, ie ne le sçauois craindre en toy, c'est à sçauoir, que de foles
femmes ne t'aillent visiter, & qu'elles ne crient & lamentent avec toy: ce qui par ma-
niere de dire aiguise & resueille la douleur, ne permettant pas que ou d'elle mesme, ou
par l'entremise & le secours d'autrui, elle se fene & se passe: car ie sçay combien tu
euz de peine & de trauail dernièrement à l'endroit de la sœur de Theon, pour la se-
courir, & resister aux autres femmes qui la venoient voir avec grands cris & hautes
lamentations, comme si proprement elles eussent apporté du feu pour l'enflammer
d'auantage. Car quand on voit que la maison d'un amy ou d'un voisin brulle, chascun
y court tant qu'il peut, pour aider à l'esteindre: mais quand on voit les ames allu-
mees

- A** mees de douleur, au contraire on y porte encore de la matiere à augmenter ou entretenir le feu. Et quand quelqu'un a mal aux yeux, on ne luy permet pas qu'il y porte les mains, ne qu'il y touche, si luy a inflammation : là où celui qui est en deuil, demeure assis en sa maison, se presentant au premier venu qui veult luy aller émouuoir, aigrir & irriter sa passion, ne plus ne moins qu'une fluxion, tant qu'au lieu qu'elle ne faisoit qu'un petit le chatouiller & demanger, ils la vous deschirent en sorte, qu'ils y font venir un grand & fascheux mal. Je suis assuré que tu te sçauras bien garder de cela. Mais efforce toy de te reduire en ton pensément ce temps-là, auquel ne nous estant pas encore ceste fille nee, nous n'auions pas de quoy nous plaindre de la fortune, & puis de joindre tout d'un tenant le temps present avec celui-là, cōme si nous estions derechef retournez à mesme estat que nous estions au parauant. Car il semblera, ma femme, que nous soyons marris que iamais l'enfant ait esté nee, si nous montrons d'estimer, que nos affaires fussent en meilleur estat auant qu'elle fust nee, que depuis :
- B** non-pas que ie veuille que nous abolissions de nostre memoire les deux anneés qu'il y a eu d'interualle entre les deux temps, ains plustost veux-ie que nous les comptions entre nos voluptez, comme ceux qui nous ont donné de la ioye & du passe-temps beaucoup, non-pas estimer que ce qui nous a esté un peu de bien, nous ait esté beaucoup de mal, & ne nous monstrent pas ingrats enuers la fortune du plaisir qu'elle nous a donné, pour ce qu'elle n'y a pas adiousté ce que nous esperions d'auantage :
- » Certainement se contenter tousiours des Dieux, en parlant comme il appartient, &
 - » ne se plaindre iamais de la fortune, ains prédre en gré ce qu'il luy plaist bailler, apporter tousiours un beau & doux fruit. Et celui qui en tel cas puize de sa memoire les biens qu'il y a, en transportant tousiours, & ramenant sa pensée des obscures & turbulentes cogitations aux claires & reluyfantes, s'il n'estaint entierement la douleur, pour le moins en la meslant & temperant avec son contraire il la rend moindre & plus facile à passer. Car ainsi comme un parfum resioiuit tousiours le sens de l'odoremment, &
- C** outre cela est un remede contre les mauuaises senteurs : aussi la cogitation des biens que lon a autrefois receus, sert de secours necessaire, quand on est tombé en aduersité, à ceux qui ne refuyent pas la rememoracion des ioyes qu'ils ont eues par le passé, & qui ne se plaignent pas en tout & par tout de la fortune, que nous ne deuons pas faire par raison, si d'aduenture il s'y est trouué, comme en un liure, quelque rature parmi tout le reste qui est sain, net & entier. Car tu as souuent ouy dire, que la beatitude de ceste vie depend des droictes & saines ratiocinations de nostre entendement, tendantes à une constante disposition, & que les mutations de la fortune ne font ny n'apportent pas de grandes inclinations, ny de casuels glissemens à nostre vie. Mais s'il faut que nous nous gouuernions comme le commun par les choses exterieures, & que nous comptions les euenemens & accidens de la fortune, en prenant pour iuges de nostre felicité ou infelicité les communs & vulgaires hommes,
- D** mes, ne regarde pas aux larmes ny aux regets & lamentations que font ceux & celles qui te viennent maintenant visiter, qui se font par une mauuaise accoustumance à l'endroit de chascun, mais plustost pense en toy mesme, combien tu es reputée heureuse par celles mesmes qui te visitent, pour les enfans que tu as, & pour ta maison, & pour ta vie : car il feroit mauuais voir, que les autres desirassent estre en ta condition, voire encore avec le regret qui nous fasche maintenant, & que tu t'en plainnisses, & la portasses impatiemment, & que tu ne sentisses pas au moins par la picqueure de ceste petite perte d'un petit enfant, combien tu dois auoir de ioye pour ceux qui demeurent viuans : ne plus ne moins que ceux qui vont faisant un recueil des vers d'Homere qui sont defectueux ou à la teste ou à la queue, & cependant en passent par dessus une infinité, qui sont excellentement bien faicts : aussi que soigneusement tu examinasses & calomniasses particulierement toutes les legeres mesaduentures qui te

Consolation enuoyee à sa femme

font aduenues en toute ta vie, & que les bonnes tu les passasses en gros & en bloc confusement : qui seroit faire proprement comme les chiches auaricieux, qui se tuans le cœur & le corps pour acquerir de grands biens, n'en iouissent pas quand ils les ont presents, & les regrettent & lamentent quand ils viennent à les perdre. Et si d'adventure tu es emeuë de pitié & de cōpassion d'elle, qui s'en est allee de ce monde auant que d'estre marice ny auoir porté des enfans, tu as à l'opposite dequoy te reconforter & resiouir, par ce que cela ne t'a pas defaillly, ny tu n'as esté priuee de l'un ny de l'autre. Car on ne scauroit maintenir, que ces choses-là soient grands biens, eu esgard à ceux qui en sont priuez, & petits à ceux qui les ont, & qui en iouissent: & quant à elle, estant maintenant allee en lieu où elle ne souffre aucune douleur, elle ne demande point que nous nous affligeōs de regret pour l'amour d'elle: car quel mal nous est-il aduenu par elle, si elle mesme n'a rien maintenant qui la puisse faire douloir? car es priuations des grandes choses mesmes on perd tout sentiment de douleur, quand on est arriué à ce poinct-là de ne s'en soucier point. Mais ta fille Timoxene est priuee non de grandes, mais de petites choses, car elle ne cognoissoit encore que petites choses, & ne se delectoit que de petites choses: & au demourant de ce dont elle n'auoit aucun sentiment, ne qui ne luy estoit iamais entré en pensément, comment pourroit-on dire qu'elle en fust priuee? Au reste, quant à ce que tu as entendu d'autres qui persuadent beaucoup de personnes vulgaires, disans que depuis que l'ame est separee du corps, il n'y a plus rien de mal ny de douloureux nulle part, pour le suppost qui est ainsi dissout, ie sçay bien que tu n'y adioustes point de foy, & que les raisons que tu as receuës de main en main de nos ancestres, ensemble les sainctes cerimonies & sacremens secrets des religieus mysteres de Bacchus, que nous scauons & cognoissons nous autres qui en sommes de la confrairie, te gardent fort bien de le croire. Parquoy tenant pour chose arrestee, que nostre ame est incorruptible & immortelle, il fault que tu estimes, qu'il luy prend & aduient tout ainsi comme aux petits oyseaux qui sont pris: car si elle a esté longuement nourrie dedans ce corps, & qu'elle soit accoustumee & appriuoisee à ceste vie, par le maniement de plusieurs affaires qu'elle ait maniees, & par vne longue accoustumance, elle y retourne de rechef, & rentre vne autre fois dedans ce corps, ny iamais ne repose, ny ne cesse estant attachee aux affections de ceste chair, & aux aduentures de ce monde, y retournant par diuerses generations: car il ne faut pas que tu penſes que la vieillesse soit reprochee ny blasmee à cause des rides, ny à cause des cheveux blancs, ny pour l'imbecillité & foiblesse du corps, ains ce qui est en elle plus mauuais & plus fascheux, c'est qu'elle rend l'ame rance, pour la souuenance des choses qu'elle a experimentees en ce corps en s'y trop arrestant & affectionnant trop, & qu'elle la plie & la courbe, retenant la forme & figure qu'elle a prise du corps en ce qu'elle a esté affectionnee: là où celle qui est prise en enfance, pretend à meilleures conditions d'estre, comme se redressant d'un ply plus doux & d'une curuature plus molle & moins forcee, & se remettant à sa naturelle droiture, ne plus ne moins que le feu que lon a estaint, si on le rallume soudainement, il se rembraze, & reprend sa vigueur incontinent. C'est pourquoy il vault beaucoup mieux,

Passer bien tost les portes de la mort,
deuant que l'ame ait pris & imbeu trop d'affection aux choses d'icy bas, & qu'elle se soit attendrie d'amour enuers ce corps, & comme par quelques charmes collee & attachee à luy. La verité dequoy apparoit encore mieux es façons de faire & coustumes anciennes de nostre pays: car nos citoyens quand leurs enfans meurent petits, ne leur portēt point d'offrandes mortuaires, ny ne font point les autres sacrifices & cerimonies pour eux, que lon a accoustumé de faire ailleurs pour les trespassez, d'autant qu'ils ne tiennent rien de la terre, ny des affections terrestres, & ne s'arrestent pas au-

tour

A tour de leur monumens & sepultures, ny ne les exposent en public en veüe, ny ne demeurent & ne fasseyent aupres: car nos loix & statuts ne permettent pas de mener deuil pour ceux qui decedent ainsi en bas aage, comme n'estant sainct ny religieux de ce faire, par ce que lon doit estimer qu'ils sont passez en vn meilleur lieu, & meilleure condition d'estre: ausquelles loix & coustumes estant plus dangereux de décroire, que de croire, portons nous, & nous gouuernons ainsi comme elles nous le commandent quant à l'exterieur au dehors, mais quant à l'interieur au dedans, que tout y soit encore plus net, plus pur, & plus sage.

Pourquoy la Iustice diuine differe quelquefois

LA PUNITION DES MALEFICES.

B



P R E s qu'Epicurus eut ainsi parlé, deuant que pas vn de nous luy eust peu respondre, nous nous trouuafmes tout au bout de la galerie, & luy s'en allant, nous planta là. Et nous esmerueilliez de son estrange façon de faire, demourafmes vn peu de temps sans parler ny bouger de la place, à nous entre-regarder l'vn l'autre, iusques à ce que nous nous meismes de rechef à nous promener comme deuant. Et lors Patrocles le premier se prit à dire: Et bien Seigneurs, Que vous en semble? laisserons nous là ceste dispute, ou si nous respondrons en son absence aux raisons qu'il a alleguees, comme s'il estoit present?

Timon adonc prenant la parole, Voire-mais, dit-il, si quelqu'un apres nous auoir tiré & assené s'en alloit, encore ne seroit-il pas bon de laisser son traict dedans nostre

C corps: car on dit bien que Brasidas aiant esté blessé d'un coup de iaueline à trauers le corps, arracha luy mesme la iaueline de sa playe, & en donna si grand coup à celuy qui la luy auoit lancee, qu'il l'en tua sur le champ: mais quant à nous, il n'est pas question de nous venger de ceux qui auroient ozé mettre en auant parmy nous aucuns propos estranges & faux, ains nous suffit de les reietter arriere de nous, auant que nostre opinion s'y attache. Et qu'est-ce, dis-ie alors, qui vous a plus émeu de ce qu'il a dit? car il a dit beaucoup de choses pesse-messe, & rien par ordre, ains a ramassé vn propos deçà, vn propos delà, contre la prouidence diuine, la deschirant comme en courroux, & l'iniuriant par le marché. Adonc Patrocles: Ce qu'il a allegué, dit-il, de la longueur & tardité de la iustice diuine à punir les meschans, m'a semblé vne objection fort vehemente: &, à dire la verité, ces raisons-là m'ont quasi imprimé vne opinion toute autre que ie ne l'auoye, & toute nouvelle: vray est que de longue main ie

D scauois mauuais gré à Euripide de ce qu'il auoit dit,

De iour à iour il dilaye & differe,

Tel est de Dieu la maniere de faire.

Car il n'est point bien seant de dire, que Dieu soit paresseux à chose quelconque, mais encore moins à punir les meschans, attendu qu'eux mesmes ne sont pas paresseux ny dilayans à mal faire, ains soudainement & de grande impetuosité sont poussez par leurs passions à mal faire. Et toutefois quand la punition suit de près le tort & l'iniure receuë, comme dit Thucydides, il n'y a rien qui si tost bousche le chemin à ceux qui trop facilement se laissent aller à mal faire. Car il n'y a delay de payement qui tant affoiblisse d'esperance, ne rende si failly de cœur celuy qui est offensé, ne si insolent & si audacieux celuy qui est prompt à outrager, que le delay de la iustice: comme au contraire les punitions qui suyuent & ioignent de près les malefices.

Pourquoy la iustice diuine differe quelquefois

aussi tost qu'ils sont commis, empeschent qu'à l'aduenir on n'en commette d'autres, E
& reconfortent d'auantage ceux qui ont esté outragez : car quant à moy, le dire de
Bias, apres que ie l'ay repensé plusieurs fois, me fasche, quand il dit à vn certain mes-
chant homme : Je n'ay pas peur que tu ne sois puny de ta meschanceté, mais j'ay peur
» que ie ne le voye pas. Car dequoy seruit aux Messeniens la punition d'Aristocrates,
» qui les aiant trahis en la bataille de Cypre, ne fut descouuert de sa trahison de plus de
vingt ans apres, durant lesquels il fut tousiours Roy d'Arcadie, & depuis en aiant esté
conuaincu, il fut puny ? mais ce pendant ceux qu'il auoit fait tuer, n'estoient plus en
ce monde. Et quel reconfort apporta aux Orchomeniens qui auoient perdu leurs
enfans, leurs parens, & amis, par la trahison de Lyciscus, la maladie qui long temps
depuis luy aduint & luy mangea tout le corps, encore que luy mesme trempant &
baignant ses pieds dedans la riuere, iurast & maugreast qu'il pourrissoit pour la tra-
hison qu'il auoit meschamment & malheureusement commise ? Et à Athenes les
enfans des enfans des pauvres malheureux Cyloniens qui auoient esté tuez en fran- F
chise des lieux saincts, ne peurent pas voir la vengeance qui depuis par ordonnance
des Dieux en fut faite, quand les excommuniez qui auoient commis tel sacrilege fu-
rent bannis, & les os mesmes des trespassez iettez hors des confins du pais. Et pour-
tant me semble Euripides estre impertinent, quand pour diuertir les hommes de mal
faire il allegue de telles raisons,

Pas ne viendra la iustice elle mesme,
N'en ayes ia de peur la face blesme,
D'un coup d'estoc le foye te percer,
Ny autre avec pire que toy blesser :
Muette elle est, & à punir tardiuë
Les malfaisans, encore fil arriuë.

Car au contraire, il est vray semblable que les meschans n'v sent point d'autres per-
suasions, ains de celles-là mesmes, quand ils se veulent poulser & encourager eux G
mesmes à entreprendre hardiment quelques meschancetez, se promettans que l'inius-
tice represente incontinent son fruiet tout meur & tout prest, & la punition bien
tard & long temps apres le plaisir du malefice. Patrocles aiant dict ces paroles, Olym-
pique prenant le propos : Mais d'auantage, dit-il, Patrocles, voyez quel inconuenient
il arriuë de ceste longueur & tardité de la iustice diuine à punir les mesfaiets, car elle
fait que lon ne croit pas que ce soit par prouidence diuine qu'ils sont punis. Et le mal
qui aduient aux meschans, non-pas incontinent qu'ils ont commis les malefices,
mais long temps apres, est par eux reputé malheur, & l'appellent vne fortune, &
non pas vne punition, dont il aduient qu'ils n'en recoiuent aucun profit, & n'en de-
uiennent de rien meilleurs : pource qu'ils sont bien marris du malheur qui leur est
presentement arriuë, mais ils ne se repentent point du malefice qu'ils ont au para-
uant commis. Car tout ainsi comme en chantant, vn petit coup, ou vn poulse- H
ment qui suit incontinent l'erreur & la faute, aussi tost qu'elle est faite, la corri-
ge & la rhabille ainsi qu'il faut, là où les tiremens, reprises & remises en ton, qui se
font apres quelque temps entre-deux, semblent se faire plus tost pour quelque autre
occasion, que pour enseigner celuy qui a failly, & à ceste cause ils attristent & n'in-
struisent point : aussi la malice qui est reprimée & releuée par soudaine punition à
chascun pas qu'elle choppe ou qu'elle bronche, encore que ce soit à peine, si est-ce
qu'à la fin elle pense à soy, & apprend à s'humilier & à craindre Dieu, comme vn
seuer iusticier qui a l'œil sur les œuures & sur les passions des hommes, pour les cha-
stier incontinent & sans delay, là où ceste iustice-là, qui si lentement & d'un pied
tardif, comme dit Euripide, arriuë aux meschans, par la longueur de ses remises
& de son incertitude vague & inconstante, ressemble plus tost au cas d'adventure
qu'au

- A qu'au desseing de prouidence, tellement que ie ne puis entendre quelle vtilité il y ait en ces moulins des Dieux quelon dit moudre tardiement, attendu qu'ils rendent la iustice obscurcie, & la crainte des malfaiçteurs effacee. Ces paroles aians esté dites, ie demouray pensif en moy-mesme. Et Timon, Voulez-vous, dit-il, que ie mette aussi le comble de la doute à ce propos, ou si ie laisseray premierement combattre à l'encontre de ces oppositions-là? Et quel besoing est-il, dis-ie adonc, d'adiouster vne troisième vague pour noyer & abyssmer du tout ce propos d'auantage, si ne peut refuter les premieres obiections, & s'en despestrer? Premierement doncques, pour commancer, par maniere de dire, à la deesse Vesta, par la reuerence & crainte retenue des Philosophes Academiques enuers la diuinité, nous declarons que nous ne pretendons en parler, comme si nous en sçauions certainement ce qui en est. Car c'est plus grande presumption à ceux qui ne sont qu'hommes, d'entreprendre de parler & discourir des Dieux & des demy-dieux, que ce n'est pas à vn
- B homme ignorant de chanter, & de vouloir disputer de la musique, ou à vn homme qui ne fut iamais en camp, vouloir disputer des armes & de la guerre, en presumant de pouuoir bien comprendre, nous qui sommes ignorans de l'art, la fantasie du sçauant ouurier, par quelque legere coniecture seulement: car ce n'est pas à faire à celuy qui n'a point estudié en l'art de medecine, de deuiner & coniecturer la raison du medecin, pour laquelle il a couppé plustost, & non plus tard, le membre de son patient, ou pourquoy il ne le baigna pas hier, mais aujourd'huy. Aussi n'est-il pas facile ny bien asseuré à vn homme mortel de dire autre chose des Dieux, sinon qu'ils sçauent bien le temps & l'opportunité de donner la medecine telle qu'il fault au vice, & à la malice, & qu'ils baillent la punition à chascque malefice, tout ainsi qu'une drogue appropriée à guarir chascque maladie: car la mesure à les mesurer toutes n'est pas commune, ne n'y a pas vn seul ny vn mesme temps propre à la donner: car que la medecine de l'ame, qui s'appelle droit & iustice, soit l'une des plus grandes sciences du monde, Pindare mesme apres infinis autres le tesmoigne, quand il appelle seigneur & maistre de tout le monde, Dieu, le tresbon & parfait ouurier, comme estant l'autheur de la iustice, à laquelle il appartient definir & determiner, quand & comment, & iusques où il est raisonnable de chastier & punir vn chascun des méchans: & dit Platon que Minos, qui estoit fils de Iupiter, estoit en ceste science disciple de son pere: voulant par cela nous donner à entendre, qu'il n'est pas possible de bien se deporter en l'exercice de la iustice, ne bien iuger de celuy qui s'y deporté ainsi qu'il appartient, qui n'a appris & acquis ceste science. Car les loix que les hommes establisent, ne contiennent pas tousiours ce qui est simplement le plus raisonnable, ne qui semble tousiours & à tous estre tel, ains y a aucuns de leurs mandemens qui semblent estre fort dignes de mocquerie, comme en Lacedemone les Ephores, aussi tost qu'ils sont instalez en leur magistrat, font publier à son de trompe, que personne ne
- D porte moustaches, & que lon obeïsse volontairement aux loix, à fin qu'elles ne leur soient point dures: & les Romains quand ils affranchissent quelques serfs, & les vendiquent en liberté, ils leur iettent sur le corps quelque sion de verge: * & quand ils font leurs testamens, ils instituent aucuns leurs heritiers, & vendent leurs biens à d'autres, ce qui semble estre contre toute raison: mais encore plus estrange, & plus hors de toute raison semble estre celuy de Solon, qui veut que celuy des citoyens qui en vne sedition ciuile ne se sera attaché & rengé à l'une des parts, soit infame: brief on pourroit ainsi alleguer plusieurs absurditez qui sont contenues és loix ciuiles, qui ne sçauroit & n'entendrait bien la raison du legiflateur qui les a écrites, & l'occasion pourquoy. Si doncques il est si mal-aisé d'entendre les raisons qui ont meu les hommes à ce faire, est-ce de merueille si lon ne sçait pas dire des Dieux, pourquoy ils punissent l'un plustost, & l'autre plus tard? Toutefois ce que i'en dis, n'est pas

Latinis festuca dicitur, vn festu, vn ietton, & sion d'arbre.

Pourquoy la iustice diuine differe quelquefois

pour vn pretexte de fuyr la lice, ains plustost vn demander pardon, à fin que la raison E regardant à son port & refuge, plus hardimēt se soublēue & se dresse par vray-semblables argumens à l'encontre de ceste difficulté. Mais cōsiderez premieremēt, que selon le dire de Platon, Dieu f'estant mis deuant les yeux de tout le monde, cōme vn patron & parfait exemplaire de tout bien, influē à ceux qui peuuent suyure sa diuinité, l'humaine vertu, qui est comme vne conformation à luy: car la nature de l'vniuers estant premieremēt toute confuse & desordonnee, eut ce principe-là, pour se changer en mieux, & deuenir Monde par quelque conformité & participation de l'Idée de la vertu diuine: & dit encore ce mesme personnage, que la nature a allumé la veuē en nous, à fin que par la cōtemplation & admiration des corps celestes qui se meuuent au ciel, nostre ame apprist à le cherir, & s'accoustumant à aimer ce qui est beau & bien ordonné, elle deuint ennemie des passions desreglees & desordōnees, & qu'elle fuyst de faire les choses temerairement & à l'aduenture, comme estant cela la source de tout vice & de tout peché: car il n'y a fruition plus grande que l'homme peust receuoir de F Dieu, que par l'exemple & imitation des belles & bonnes proprietéz qui sont en luy, se rendre vertueux. Voyla pourquoy lentement & auec traict de temps il procede à imposer chastiment aux meschans, non qu'il ait aucune doute ne crainte de faillir ou de s'en repentir sil les chastioit sur le champ, mais à fin de nous oster toute bestiale precipitation & toute hatifue vehemence en nos punitions, & nous enseigner de ne courir pas sus incontinent à ceux qui nous auront offensez lors que la cholere fera plus allumee, & que le cœur en boudra & battra le plus fort en courroux, outre & par dessus le iugement de la raison, comme si c'estoit pour assouuir & rassasier vne grande soif ou faim: ains en ensuyuant sa clemence & sa coustume de dilayer, mettre la main à faire iustice en tout ordre, à loisir, & en toute sollicitude, aiant pour conseiller le temps, que bien peu souuent se trouuera accompagné de repentance: car comme disoit Socrates, il y a moins de danger & de mal à boire par imtemperance de l'eau toute trouble, que non pas à assouuir son appetit de vengeance sur vn corps G de mesme espee & mesme nature que le nostre, quand on est tant troublé de cholere, & que lon a le discours de la raison saisy de courroux & occupé de fureur, auant qu'il soit bien rassis & du tout purifié. Car il n'est pas ainsi comme escrit Thucydides, que la vengeance plus près elle est de l'offense, plus elle est en sa bien-seance: mais au contraire, plus elle en est esloignee, plus près elle est du deuoir. Car, comme disoit Melanthius,

Quand le courroux a deslogé raison,

Il fait maint cas estrange en la maison.

Aussi la raison fait toutes choses iustes & moderees, quand elle a chassé arriere de soy l'ire & la cholere: & pourtant y en a-il qui s'appaissent & s'addoucissent par exemples humains, quand ils entendent raconter, que Platon demoura longuement le baston leué sur son valler: ce qu'il faisoit, disoit-il, pour chastier sa cholere. Et Archi- H tas en vne sienne maison des champs, aiant trouué quelque faute par nonchalance, & quelque desordre de ses seruiteurs, & s'en ressentant émeu vn peu trop, & courroucé asprement contre eux, il ne leur feit autre chose, sinon qu'il leur dit en s'en allant, Il vous prend bien de ce que ie suis courroucé. S'il est doncques ainsi, que les propos notables des anciens, & leurs faicts racontez, repriment beaucoup de l'aspreté & vehemence de la cholere, beaucoup plus est-il vraysemblable que nous voyans comme Dieu mesme qui n'a crainte de rien, ny repentance aucune de chose qu'il face, neantmoins tire en longueur ses punitions, & en dilaye le temps, en serons plus reseruez & plus retenus en telles choses, & estimerons que la clemence, longanimité & patience est vne diuine partie de la vertu, laquelle par punition en chastie & corrige peu, & punissant tard en instruit & admoneste plusieurs. En secōd

lieu

- A** lieu considerons que les punitions de iustice, qui se font par les hommes, n'ont rien d'avantage que le contr'eschange de douleur, & s'arrestent à ce poinct, que celuy qui fait du mal, en souffre, & ne passent point outre, ains abbayans, par maniere de dire, apres les crimes & forfaits, comme font les chiens, les poursuivent à la trace. Mais il est vray-semblable que Dieu, quand il prend à corriger vne ame malade de vice, regarde premierement ses passions, pour voir si en les pliant vn peu elles se pourroient point retourner & fleschir à penitence, & qu'il demeure longuement avant que d'inferer la punition de ceux qui ne sont pas de tout poinct incorrigibles, & sans aucune participation de bien : mesmement quand il considere, quelle portion de la vertu l'ame a tiree de luy, lors qu'elle a esté produitte en estre, & combien la generosité est en elle forte & puissante, non pas foible ne languissante : & que c'est contre sa propre nature quand elle produit des vices, par estre trop à son aise, ou par contagion de hanter mauuaise compagnie : mais puis quand elle est bien & soigneusementensee & medecine, elle reprend aisement sa bonne habitude : à raison dequoy, Dieu ne haste pas egaleement la punition à tous, ains ce qu'il cognoist estre incurable, il l'oste incontinent de ceste vie, & le retrenche comme estant bien dommageable aux autres, mais encore plus à soy-mesme, d'estre tousiours attaché à vice & à meschanceté : mais ceux en qui il est vray-semblable que la meschanceté s'est emprainte plus par ignorance du bien, que par volonté propensee de choisir le mal, il leur donne temps & respit pour se changer, toutefois s'ils y persuerent, il leur rend aussi à la fin leur punition, car il n'a point de peur qu'ils luy eschappent. Et qu'il soit vray, considerez combien il se fait de grandes mutations es mœurs & vies des hommes: c'est pourquoy les Grecs les ont appellees partie Tropos, & partie Ethos : l'un pour ce qu'elles sont subiectes à changement & à mutation : l'autre, pour autant qu'elles s'engendrent par accoustumance, & demeurent fermes quand elles sont vne fois imprimees. Voyla pourquoy i'estime que les anciens appellerent iadis le Roy Cecrops double : non pas, comme aucuns disent, pource que d'un bon, doux & clement Roy, il devint aspre & cruel tyran, comme vn dragon : mais, au contraire, pour ce que du commencement aiant esté peruers & terrible, il devint depuis fort gracieux & humain seigneur. Et si y a de la doute en celuy-là, bien sommes nous asseurez pour le moins, que Gelon & Hieron en la Sicile, & Pisistratus fils de Hippocrates aians acquis leurs tyrannies violement & meschamment, en vserent depuis vertueusement : & estans arriuez à la domination par voyes illegitimes & iniustes, ont esté depuis bons & vtils princes & seigneurs, les vns aians introduit de bonnes loix en leur païs, & fait bien cultiver & labourer les terres, & rendu leurs citoyens & subiects bien conditionnez, honnestes & aimans à trauailler, au lieu qu'auparavant ils ne demandoient qu'à iouer & à rire, sans rien faire que grande chere : qui plus est, Gelon aiant tres-vertueusement combattu contre les Carthaginois, & les aiant desfaicts en vne grosse bataille, comme ils le requissent de paix, il ne la leur voulut oncques octroyer, qu'ils ne meissent entre les articles & capitulations de la paix, que iamais plus ils n'immoleroient leurs enfans à Saturne. Et en la ville de Megalopolis Lydiadas aiant vsurpé la tyrannie, au milieu de sa domination s'en repentir, & fait conscience du tort qu'il tenoit à son païs, tellement qu'il rendit les loix & la liberté à ses citoyens, & depuis mourut en combattant vaillamment à l'encontre des ennemis pour la defense de sa patrie. Or si quelqu'un d'adventure eust faict mourir Miltiades, ce-pendant qu'il estoit tyran en la Cherronese : ou qu'un autre eust appellé en iustice Cimon, de ce qu'il entretenoit sa propre sœur, & l'en eust faict condamner d'inceste : ou Themistocles pour les insolences & desbauches extremes qu'il faisoit en sa ieunesse publiquement en la place, & l'en eust fait bannir de la ville, comme depuis on fait

Pourquoy la iustice diuine differe quelquefois

Alcibiades pour semblables excez de ieunesse, n'eust-on pas perdu les glorieuses victoires de la plaine de Marathon, de la riuere d'Eurymedon, de la coste d'Artemise? là où, comme dit le poëte Pindare,

Ceux d'Athenes ont planté
Le glorieux fondement
De la Grecque liberté.

Les grandes natures ne peuuent rien produire de petit, ny la vehemence & force actiue qui est en icelles, ne peut iamais demourer oyseuse, tant elle est vifue & subtile, ains branlent tousiours en mouuement continuel, comme si elles flottoient en tourmente, iusques à ce qu'elles soient paruenues à vne habitude de mœurs constante, ferme & perdurable. Tout ainsi donc comme celuy qui ne se cognoistra pas guerres en l'agriculture & au faict du labourage, ne prisera pas vne terre laquelle il verra pleine de brossailles, de meschans arbres & plantes sauuages, où il y aura beaucoup de bestes, beaucoup de ruisseaux, & consequemment force fange: & au contraire toutes ces marques là & autres semblables donneront occasion de iuger à celuy qui s'y cognoistra bien, la bonté & force de la terre: aussi les grandes natures des hommes mettent hors dès leur commencement plusieurs estranges & mauuaises choses, lesquelles nous ne pouuans supporter, pensons qu'il faille incontinent couper & retrencher ce qu'il y a d'aspre & de poignant: mais celuy qui en iuge mieux, voyant de là ce qu'il y a de bon & de genereux, attend l'aage & la saison qui sera propre à fauoriser la vertu & la raison, auquel temps celle forte nature sera pour exhiber & produire son fruit. mais à tant est-ce assez de cela. Au reste, ne vous semble il pas qu'il y a quelques vns d'entre les Grecs, qui ont à bon droict transcrit & receu la loy d'Ægypte, laquelle commande, fil y a aucune femme enceinte, qui soit attainte de crime, pour lequel elle doie iustement mourir, qu'on la garde iusques à ce qu'elle soit deliuree? Ouy certes, respondirent-ils tous. Et bien donc, dis-je, fil y a aucun qui n'ait pas des enfans dedans le ventre, mais bien quelque bon conseil en son cerueau, ou quelque grande entreprise en son entendement, laquelle il soit pour produire en évidence, & la conduire à effect avec le temps, en descouurant quelque mal caché & latent, ou bien en mettant quelque bon aduis & conseil vtile & salutaire en auant, ou en inuentant quelque necessaire expedient, ne vous semble-il pas, que celuy fait mieux qui differe l'execution de la punition iusques à ce que l'vtilité en soit venuë, que celuy qui l'anticipe & va au deuant? Car quant à moy, certainement il le me semble ainsi. Et à nous aussi, respondit Patrocles. Il est ainsi: car voyez si Dionysius eust esté puny de son vsurpation dès le commencement de sa tyrannie, il ne fust demouré pas vn Grec habitant en toute la Sicile, par ce que les Carthaginois l'eussent occupee, qui les en eussent tous chassés: comme autant en fust-il aduenü à la ville d'Apollonie, d'Anactorium, & à toute la peninsule des Leucadiens, si Periander eust esté puny, que ce n'eust esté bien long temps apres: & quant à moy, ie pense que la punition de Cassander fust differee iusqu'à ce que par son moyen la ville de Thebes fust entierement rebastie & repeuplee. Et plusieurs des estrangers qui faquirent ce temple où nous sommes, du temps de la guerre sacree passerent avec Timoleon en la Sicile, là où apres qu'ils eurent deffaict en bataille les Carthaginois, & aboly plusieurs tyrannies, ils perirent tous meschamment, comme meschans qu'ils estoient: car Dieu quelquefois se sert d'aucuns meschans comme de bourreaux, pour en punir d'autres encore pires, & puis apres il les destruiet eux mesmes, comme il fait à mon aduis de la plus part des tyrans. Et tout ainsi que le fiel de la beste sauuage, qui s'appelle Hyaine, & la presure du veau marin, & autres parties des bestes venimeuses ont quelque propriété vtile aux maladies: aussi Dieu voyant des citoyens qui ont besoing de morsure & de chastiment, leur enuoye vn tyran inhumain, ou vn seigneur

A seigneur aspre & rigoureux pour les chastier : & ne leur oste iamais ce trauail-là , qui les tourmente , & qui les fasche , qu'il n'ait bien purgé & guarý ce qui estoit malade. Ainsi fut baillé pour telle medecine Phalaris aux Agrigentins , & Marius aux Romains , & Apollo mesme respondit aux Sicyoniens , que leur cité auoit besoing de maistres fouëttans , qui les fouëttassent à bon esciant , quand ils voulurent oster par force aux Cleoneïens vn ieune garçon nommé Teletias , qui auoit esté couronné en la feste des ieux Pythiques , voulant dire qu'il estoit de leur ville & leur citoyen , & le tirerent si fort à eux qu'ils le demembrerent : & depuis ils eurent Orthagoras pour tyran , & apres luy Myron , & Cleisthenes , qui les tindrent de si court , qu'ils les garderent bien de faire des insolens & des fols : mais les Cleoneïens qui n'eurent pas vne pareille medecine , par leur folie sont venus à neant : & vous voyez qu'Homere mesme dit en vn passage ,

Le fils en toute espee de valeur ,

Iliad. l. 15.

B Plus que le pere , est de beaucoup meilleur.

Combien que le fils de ce Copreus ne feit iamais acte quelconque memorable , ne digne d'un homme d'honneur , là où la posterité d'un Sisyphus , d'un Autolycus & d'un Phlegyas a flory en gloire & honneur parmy les Roys & plus grands Seigneurs : & à Athenes Pericles estoit yssu d'une maison excommuniée & maudite , & à Rome Pompeius surnommé le grand estoit fils d'un Strabon , que le peuple Romain auoit en si grande haine , que quand il fut mort , il en ietta le corps à terre de dessus le liët , où lon le portoit , & le foula aux pieds. Quel inconuenient doncques y a-il , si ne plus ne moins que le laboureur ne coupe iamais le ramage espineux , que premierement il n'ait cueilly l'asperge , ny ceux de la Libye ne bruslēt iamais la tige & le branchage du ladanon , qu'ils n'en aient deuant recueilly & amassé la gomme aromatique : aussi Dieu ne coupe pas par le pied la souche de quelque illustre & royale famille qui soit meschante & malheureuse , deuant qu'il en soit né quelque bon &

C profitable fruiët qui en doit sortir : car il eust mieux valu pour ceux de la Phocide , que dix mille bœufs , & autant de cheuaux d'Iphitus fussent morts , & que ceux de Delphes eussent encore perdu plus d'or & d'argēt , que ny Vlysses ny Esculapius n'eussent point esté nez , & les autres au cas pareil , qui estans nez de parens vicieux & meschans , ont esté gens de bien , & grandement profitables au public. Et ne deuons nous pas estimer , qu'il vaut beaucoup mieux que les punitions se facent en temps & en la maniere qu'il appartient , que non pas à la haste & tout sur le champ ? comme fut celle de Callippus Athenien , qui faisant semblant d'estre amy de Dion , le tua d'un coup de dague , de laquelle luy-mesme depuis fut tué par ses propres amis : & celle de Mitius Argien , lequel aiant esté tué en vne émotion & sedition populaire , depuis en pleine assemblee de peuple , qui estoit assemblé sur la place pour voir iouër des ieux , vne statue de bronze tomba sur le meurtrier qui l'auoit tué , & le massacra : & sembla-

D blement aussi celle de Bessus Pæonien , & d'Ariston Oëreïen , deux colonnels de gens de pied , comme vous le deuez bien sçauoir Patrocles. Non-fais certes , dit-il , mais ie le voudrois bien apprendre. Cestuy Ariston auoit emporté de ce temple les bagues & ioyaux de la Roïne Eriphyle , qui de long temps estoient gardez en ce temple par octroy & congé des tyrans qui tenoient ceste ville , & les porta à sa femme , & luy en feit vn present : mais son fils estant entré en querelle pour quelque occasion avec sa mere , meit le feu dedans sa maison , & brusla tout ce qui estoit dedans. Et Bessus aiant tué son pere fut vn bien long temps sans que personne en sçeuſt rien , iusques à ce qu'un iour estant allé soupper chez quelques siens hostes , il percea du fer de sapicque & abbatit le nid d'une arondelle , & tua les petits qui estoient dedans : & comme les assistans luy dissent : Dea Capitaine , comment vous amusez vous à faire vn tel acte , où il y a si peu de propos ? Si peu de propos , dit-il : & comment , ne crie elle pas

Pourquoy la iustice diuine differe quelquefois

ordinairement à l'encontre de moy, & tesmoigne faulxement que i'ay tué mon pere? E Ceste parole ne tomba pas en terre, ains fut bien recueillie des assistans, qui en estans fort esbahis l'allerent incontinent deceler au Roy, lequel en feit si bonne inquisition, que le faict fut auéré, & Bessus puny de son parricide. Mais quant à cela, dis-ie, nous le discourons, supposant comme il a esté proposé, & tenu pour confessé, que les meschans aient quelque delay de punition: mais au demourant, il faut bien prester l'oreille au poëte Hesiodé qui dit, non pas comme Platon, que la peine suit le peché & la meschanceté, ains qu'elle luy est égale d'aage & de temps, comme celle qui naist ensemble en vne mesme terre & d'une mesme racine:

Au poëme
intitulé les
œuvres.

Mauuais conseil est pire à qui le donne.

Et ailleurs,

Qui à autrui mal ou perte machine,
A son cœur propre il procure ruine.

Lon dit que la mouche cantharide a en soy-mesme quelque partie qui sert contre sa F poison de contrepoison, par vne contrariété de nature: mais la meschanceté engendrant elle mesme ne sçay quelle desplaisance & punition, non point apres que le delict est commis, mais dès l'instant mesme qu'elle le commet, commence à souffrir la peine de son malefice: & chascun criminel, que lon punit, porte dehors sur ses espauls sa propre croix: mais la meschanceté d'elle mesme fabrique ses tourmens contre elle mesme, estant merueilleuse ouuriere d'une vie miserable, qui avec honte & vergongne a de grandes frayeurs, des perturbations d'esprit terribles, & des regrets & inquietudes continuelles. Mais il y a des hommes qui ressemblent proprement aux petits enfans, lesquels voyans bien souuent baller & iouer des gens qui ne valent rien, sur les eschafaux où lon iouë quelques ieux, vestus de sayes de drap d'or, & de grands manteaux de pourpre, couronnez de couronnes, les ont en estime & admiration, comme les reputans bien-heureux, iusques à ce qu'ils voyent à la fin qu'on les vient percer les vns à coups de iaueline, les autres fouëtter, ou G bien qu'ils voyent sortir le feu ardent de ces belles robes d'or-là si precieuses & si riches. Car à dire vray plusieurs meschans qui tiennent les grands lieux d'autorité, & les grandes dignitez, ou qui sont extraicts des grandes maisons & lignees illustres, on ne cognoist pas qu'ils soient chastiez & punis, iusques à ce que lon les voye massacrer ou precipiter: ce que lon ne deuroit pas appeller punition simplement, mais acheuement & accomplissement de punition. Car ainsi comme Herodicus de Se-libree estant tombé en la maladie incurable de Phthisie, qui est quand on crache le poulmon, fut le premier qui conioignit à l'art de la medecine, celle des exercices: & comme dit Platon, en ce faisant il allongea sa mort, & à luy, & à tous les autres malades attaincts de pareille maladie: aussi pouuons nous dire, que les meschans qui eschappent le coup de la punition presente, sur le champ payent la peine deuë à leurs malefices, non en fin apres long temps, mais par plus long temps: & non pas plus len- H té, mais plus longue: & ne sont pas finablement punis apres qu'ils sont enuieillis, ains au contraire ils enuieillissent en estant toute leur vie punis: encore quand i'appelle long temps, ie l'entens au regard de nous: car au regard des Dieux, toute duree de la vie humaine, quelque longue qu'elle soit, est vn rien, & autant que l'instant de maintenant. Et qu'un meschant soit puny de son forfait trente ans apres qu'il l'a commis, est autant comme s'il estoit gehenné ou pendu sur les vespres, & non pas dès le matin: mesmement quand il est detenu & enfermé en vie, comme en vne prison, dont il n'y a moyen de sortir, ny de s'enfuir: & si ce pendant ils font des festins, qu'ils entreprennent plusieurs choses, qu'ils facent des presens & des largesses, voire & qu'ils s'esbattent à plusieurs ieux, c'est ne plus ne moins que quand les criminels qui sont en prison iouent aux osselets, ou aux dez, aians tousiours le cordeau dont ils doiuent

A doiuent estre estranglez, pendu au dessus de leur teste : autrement on pourroit dire, que les criminels, condamnez à mort, ne sont point punis pendant qu'ils sont detenus aux fers en la prison, iusques à ce qu'on leur ait couppé la teste: ny celuy qui a par sentence des iuges auallé le bruuage de ciguë, pource qu'il demeure encore vif quelque espace de temps apres, attendant qu'une pesanteur de iambes luy vienne, & qu'un gelement & extinction de tous les sentimens le surprenne: fil est ainsi que nous ne voulions estimer ny appeller punition sinon le dernier poinct & article d'icelle, & que nous laissions en arriere, les passions, les frayeurs, les attentes de la peine, les regrets & repentances, dont chascun meschant est trauaillé en sa conscience: qui seroit tout autant que si nous disions que le poisson, encore qu'il ait auallé l'hameçon, n'est point pris iusques à ce que nous le voyons couppé par pieces, & rosty par les cuysiniers. Car tout meschant qui commet un malefice, est aussi tost prisonnier de la iustice comme il l'a commis, & qu'il a auallé l'hameçon de la douceur & du plaisir qu'il a pris à le faire: mais le remors de la conscience luy en demeure imprimé, qui le tire & le gehenne,

Comme le Thun de course vehemente,
De la grand' mer trauerse la tourmente.

Car ceste audace, temerité & insolence-là qui est propre au vice, est bien puissante & prompte iusques à l'effect & execution des malefices: mais puis apres quand la passion comme le vent vient à luy defaillir, elle demeure foible & basse, subiecte à infinies frayeurs & superstitions, de sorte que ie treuve que Stesichorus a feint un songe de Clytemnestra conforme à la verité, & à ce qui se fait coustumierement, en telles paroles:

Arriuer j'ay veu en mon somme,
Un Dragon à la teste d'homme:
Dont le Roy, comme il m'a paru,

C Plifthenidas est apparu.

Car & les visions des songes & les apparitions de fantosmes en plein iour, les responses des oracles, les signes & prodiges celestes, & brief tout ce que lon estime qui se fait par la volonté de Dieu, amene de grands troubles & de grandes frayeurs à ceux qui sont ainsi disposez: comme lon dit qu'Apollodorus en dormant songea quelquefois qu'il se voyoit escorcher par les Scythes, & puis bouillir dedans une marmitte, & luy estoit aduis que son cœur du dedans de la marmitte murmuroit, en disant, Ie te suis cause de tous ces maux. & d'un autre costé luy fut aduis qu'il voyoit ses filles toutes ardentes de feu, qui couroient à l'entour de luy. Et Hipparchus le fils de Pisistratus un peu deuant sa mort songea, que Venus luy iettoit du sang au visage de dedans une fiole. Et les familiers de Ptolomeus, celuy qui fut surnommé la Foudre, en songeant penserent voir, que Seleucus l'appelloit en iustice deuant les loups & les vautours qui estoient les iuges, & que luy distribuoit grande quantité de chair aux ennemis. Et Pausanias estant en la ville de Bysance enuoya querir par force Cleonice ieune fille de honneste maison & de libre condition, pour l'auoir à coucher la nuit avec luy, mais estant à demy endormy quand elle vint, il se fureilla en sursault, & luy fut aduis que c'estoient quelques ennemis qui le venoient assaillir pour le faire mourir, tellement qu'en cest effroy il la tua toute roide: depuis luy estoit ordinairement aduis qu'il la voyoit, & entendoit qu'elle luy disoit,

Chemine droit au chemin de iustice,
Tres-grand mal est aux hommes l'iniustice.

& comme ceste apparition ne cessast point de s'apparoire toutes les nuits à luy, il fut à la fin contrainct d'aller iusques en Heraclee, où il y auoit un temple, auquel on euoquoit les ames des trespassez: & là aiant fait quelques sacrifices de propitiations, &

Pourquoy la Iustice diuine differe quelquefois

luy aiant offert les effusions funebres que lon respand sur les sepultures des morts, il E
fait tant qu'il la fait venir en sa presence, là où elle luy dit, que quand il seroit arriué à
Lacedemone; il auroit repos de ses maux: & de faict il n'y fut pas plus tost arriué
qu'il y mourut: tellement que si l'ame n'a sentiment aucun apres le trespas, & que la
mort soit le but & la fin de toute retribution, & de toute punition, lon pourroit dire
à bon droit des meschans qui sont promptement punis, & qui meurent incontinent
apres leurs mesfaicts commis, que les Dieux les traittent trop mollement & trop dou-
cement. Car si le long temps & la longue duree de vie n'apporte autre mal aux mes-
chans, au moins peult-on dire qu'ils ont celuy-là, que ayans cogneu & adueré par
espreuue & par experience, que l'iniustice est chose infructueuse, sterile & ingrate, qui
n'apporte fruct aucun, ne rien qui merite que lon en face estime, apres plusieurs
grands labeurs & trauaux qu'elle donne, le remors de cela leur met l'ame sans dessus
dessous: comme on lit que Lyfimachus estant forcé par la soif liura sa propre per-
sonne & son armee aux Getes, & apres qu'il eut beu estant prisonnier, il dit: O Dieux F
que ie suis lasche, qui pour vne volupté si courte me suis priué d'un si grand royaume?
combien qu'il soit bien difficile de resister à la passion d'une necessité naturelle. Mais
quand l'homme pour la conuoitise de quelque argent, ou par enuie de la gloire, ou
de l'autorité & credit de ses concitoyens, ou pour le plaisir de la chair, vient à com-
mettre quelque cas meschant & execrable, & puis avec le temps que l'ardente soif &
fureur de sa passion est passée, qu'il voit qu'il ne luy en est rien demouré que les villai-
nes & perilleuses perturbations de l'iniustice, & rien d'utile, ny de necessaire ou dele-
table: n'est-il pas vray-semblable, que bien souuent luy reuient ce remors en l'enten-
dement, que par vaine gloire ou par volupté deshoneste il a remply toute sa vie de
honte, de deffiance & danger? Car ainsi comme Simonides souloit dire en se ioiant,
qu'il trouuoit tousiours le coffre de l'argent plein, & celuy des graces & benefices
uide: aussi les meschans quand ils viennent à considerer le vice & la meschanceté en
eux-mesmes, à trauers vne volupté qui a vn peu de vain plaisir present, ils la trouuent G
destituée d'esperance, & pleine de frayeurs, de regrets, d'une souuenance fascheuse,
& de souspeçon de l'aduenir, & de deffiance pour le present: ne plus ne moins que
nous oyons dire à Ino par les theatres; se repentant de ce qu'elle a commis,

Làs que fuslé-ic, amies, demourante
En la maison d'Athamas florissante,
Comme deuant, sans y auoir commis
Ce qu'à effect malheureux ie y mis.

Aussi est-il vray-semblable, que l'ame de chascun criminel & meschant rumine en elle
mesme & discourt en ce poinct: Comment pourrois-ic en chassant arriere de moy
le souuenir de tant de mesfaicts, que j'ay commis, & le remors d'iceux, recomman-
cer à mener toute vne autre vie? pource que la meschanceté n'est point asseuree, fer-
me, ny constante, ny simple, en ce qu'elle veut: si d'adventure nous ne voulions H
maintenir, que les meschans fussent quelques sages philosophes: ains fault estimer
que là où il y a vne auarice, ou vne concupiscence de volupté extreme, ou vne
enuie excessiue logee avec vne aspreté & malignité, là si vous y prenez de prés gar-
de, vous trouuerez aussi vne superstition cachee, vne paresse au labeur, vne crainte
de la mort, vne soudaineté legere à changer d'affections, vne vaine gloire procedant
d'arrogance. Ils redoubtent ceux qui les blasment, ils craignent ceux qui les louent,
sçachans bien qu'ils leur tiennent tort en ce qu'ils les trompent, & comme estans grâds
ennemis des meschans, d'autant qu'ils louent si affectueusement ceux qu'ils cudent
estre gens de bien: car au vice ce qu'il y a d'aspre, comme au mauuais fer, est pourry,
& ce qui y est dur, est facile à rompre. Et pourtant apprenans en vn long temps à
se mieux cognoistre tels qu'ils sont, quand ils se sont bien cogneus, ils se desplaisent à
eux

A eux mesmes, & s'en haïssent, & ont en abomination leur vie: car il n'est pas vray-semblable, que si le meschant aiant rendu vn depost qui auroit esté déposé entre ses mains, ou plegé vn sien familier, ou fait quelque largesse avec honneur & gloire au public de son païs, s'en repent incontinent, & est marry de l'auoir faict, tant sa volonté est muable & facile à se changer, de maniere qu'il y en a qui aians l'honneur d'estre receus de tout le peuple en plein theatre avec applaudissemens de mains, incontinent gemissent en eux mesmes, par ce que l'auarice se tourne incontinent au lieu de l'ambition: que ceux qui sacrifient les hommes pour vsurper quelques tyrannies, ou pour venir au dessus de quelques conspirations, comme fait Apollodorus, ou qui font perdre les biens à leurs amis, comme Glaucus fils de Epicydes, ne s'en repentent point, & ne s'en haïssent point eux mesmes, & ne soient desplaisans de ce qu'ils ont fait. Car quant à moy, ie pense, s'il est licite de ainsi le dire, que tous ceux qui commettent telles impietez, n'ont besoing d'aucun Dieu ny d'aucun homme qui les punisse, par ce que leur vie seule suffit assez, estant corrompue & trauaillee de tout vice & toute meschanceté. Mais aduisez si desormais ce discours ne s'estend point plus auant en duree, que le temps ne permet. Adonc Timon respondit: Il pourroit bien estre, dit-il, eu esgard à la longueur de ce qui suit apres, & qui reste encore à dire: car quant à moy, i'amène sur les rens, comme vn nouveau champion, la derniere question, d'autant qu'il me semble auoir esté suffisamment debatue sur les precedentes. Et pensez que nous autres qui ne disons mot, faisons la mesme plainte que fait Euripide, reprochant librement aux Dieux, que

Sur les enfans les fautes ils reiettent,

Et les pechez que leurs peres commettent.

Car soit que ceux mesmes qui ont commis la faute en aient esté punis, il n'est plus besoing d'en punir d'autres qui n'ont point offensé, attendu qu'il ne seroit pas raisonnable de chastier deux fois ceux mesmes qui auroient failly, soit que aians omis par negligence à faire la punition des meschans qui ont fait les offenses, ils la veulent long temps apres faire payer à ceux qui n'en peuuent mais, ce n'est pas bien fait de vouloir par iniustice rhabiller leur negligence. Comme lon raconte d'Æsope, que iadis il vint en ceste ville avec bonne somme d'or, enuoyé de la part du Roy Cræsus, pour y faire de magnifiques sacrifices au Dieu Apollo, & distribuer à chaque citoyen quatre escus. Il aduint qu'il entra en quelque different à l'encontre de ceux de la ville, & se courrouça à eux, de maniere qu'ayant fait les sacrifices il renuoya le reste de l'argent en la ville de Sardis, comme n'estans pas les habitans de Delphes dignes de iouir de la liberalité du Roy: dequoy eux estans indignez luy meirent sus qu'il estoit sacrilege, de retenir ainsi cest argent sacré: & de faict l'aians condamné comme tel, le precipiterent du hault en bas de la roche que lon appelle Hyampie. Dequoy le Dieu fut si fort courroucé, qu'il leur enuoya sterilité de la terre, & diuerses sortes de maladies estranges, tellement qu'ils furent à la fin contraincts d'enuoyer par toutes les festes publiques & assemblees generales des Grecs, faire proclamer à son de trompe, s'il y auoit aucun de la parenté d'Æsope, qui voulust auoir satisfaction de sa mort, qu'il vint, & qu'il l'exigeast d'eux telle comme il voudroit, iusques à ce qu'à la troisieme generation il se presenta vn Samien nommé Idmon, qui n'estoit aucunement parent d'Æsope, ains seulement de ceux qui premierement l'auoient achepté en l'Isle de Samos: & les Delphiens luy aians faict quelque satisfaction furent deliurez de leurs calamitez: & dit-on que depuis ce temps-là, le supplice des sacrileges fut transferé de la roche d'Hyampie à celle de Nauplie: Et ceux mesmes qui aiment le plus la memoire d'Alexandre le grand, entre lesquels nous sommes, ne peuuent approuuer ce qu'il feist en la ville des Branchides, laquelle il ruina toute, & en passa tous les habitans au fil de l'espee, sans discretion d'aage, ny de

Pourquoy la Iustice diuine differe quelquefois

sexe, pour autant que leurs ancestres auoient anciennement liuré par trahison le temple de Milet. Et Agathocles le tyran de Syracuse, lequel en riant se mocqua de ceux de Corfou, qui luy demanderent pour quelle occasion il fourrageoit leur Isle: Pour-
autant, dit-il, que vós ancestres iadis receurent Vlysses. Et semblablement comme ceux de l'Isle d'Ithace se plaignissent à luy de ce que ses soudards prenoient leurs moutons: Et vostre Roy, leur dit-il, estant iadis venu en la nostre, ne prit pas seulement nos moutons, mais d'auantage creua l'œil à nostre berger. Ne vous semble-il pas donc qu'Apollo a encore plus grand tort que tous ceux-là, de perdre & ruiner les Pheneates, aiant bousché l'abyssine où se souloient perdre les eaux qui maintenant noyent tout leur pays, pour-autant qu'il y a mille ans, comme lon dit, que Hercules aiant enleué aux Delphiens le tripié à rendre les oracles, l'emporta en leur ville à Phenece: & d'auoir respondu aux Sybarites, que leurs miseres cesseroient quand ils auroient appaisé l'ire de Iuno Leucadiene par trois mortalitez? Il n'y a pas encore long temps que les Locriens ont desisté & cessé d'enuoyer tous les ans de leurs filles F
à Troye,

Où les pieds nuds, sans aucune vesture,
Sans voile aucun ny honneste coeffure,
Ne plus ne moins qu'esclaves, tout le iour,
Dés le matin elles sont sans seiour,
A ballier de Pallas la Deesse

Le temple sainct, iusques en leur vieillesse,

en punition de la luxure d'Aiax: comment est-ce que cela scauroit estre ne raisonnable ne iuste, veu que nous blasmons mesmes les Thraces de ce que lon dit, que iusques auioird'huy ils frisent leurs femmes au visage, en vengeance de la mort d'Orpheus: & ne loüons pas non plus les barbares qui habitent au long du Po, lesquels à ce que lon dit, portent encore le deuil, & vont vestus de noir, à cause de la ruine de Phaëthon? car c'est à mon aduis chose encore plus forte & digne de mocquerie, si ceux G
qui furent du temps de Phaëthon, ne se soucioyent point autremét de sa cheute, que ceux qui sont venus depuis cinq ou dix aages apres son accident, aient commencé à changer de robes & en porter le deuil: mais toutefois en cela il n'y auroit que la sottise seule, & rien de mal ny de danger ou inconuenient d'auantage: mais quelle raison y a-il, que le courroux des Dieux s'estant caché sur le poinct du mesfaiet, comme font aucunes riuieres, se montrant puis apres contre d'autres, se termine en extremes calamitez? Si tost qu'il eut vn peu entrerompu son propos, craignant qu'il n'alleguast encore plus d'inconueniens, & de plus grands, ie luy demandé sur le champ: Et bien, dis-ie, estimez vous que tout cela soit vray? Et luy me respondit, Encore que le tout ne fust pas vray, ains partie seulement, tousiours pourtant demeure la mesme difficulté. A l'aduenture donc que ceux qui ont vne bien grosse & bien forte fiebure, endurent & sentent tousiours au dedans vne mesme ardeur, soit H
qu'ils soient peu ou prou couuerts & vestus, toutefois pour les consoler vn peu, & leur donner quelque allegement, encore leur faut-il diminuer la couuerture: mais si tu ne veux, à ton commandement: toutefois ie te dis bien, que la plus part de ces exemples-là ressemblent proprement aux fables & contes faits à plaisir. Mais au demourant ramene vn peu en ta memoire la feste que lon a celebree n'agueres à l'honneur de ceux qui ont autrefois receu les Dieux en leurs maisons, & de celle honorable portion que lon met à part, & que par la voix du herault on publie, que c'est pour les descendans du poëte Pindare: & te souuiene comment cela te sembla fort honorable & agreable. Et qui est celuy, dit-il, qui ne prendroit plaisir à veoir la preference d'honneur ainsi naïfement, rondement, & à la vieille mode des Grecs, attribuee? Il n'auoit, comme dit le mesme Pindare,

- A Le cœur de metal noir & roide
 Forgé avecques flamme froide.
- Je laisse aussi, dis-je, le cry public semblable à celui-là qui se fait en la ville de Sparte apres le Cantique Lesbien, en l'honneur & souuenance de l'ancien Terpander: car il y a mesme raison. Mais vous qui estes de la race de Philtiades, dignes d'estre preferez à tous autres, non seulement entre les Bœotiens, mais aussi entre les Phocéens, à cause de vostre ancestre Daiphantus, vous me secondastes & fauorisastes, quand ie maintiens aux Lycormiens & Satiliens, qui prochassoient d'auoir l'honneur & la prerogatiue de porter couronnes deuës par nos statuts aux Heraclides, que tels honneurs & telles prerogatiues deuoient estre inuiolablement conseruees & gardees aux descendans de Hercules, en recognoissance des biens qu'il auoit par le passé faicts aux Grecs, sans en auoir eu de son viuant digne loyer ny recompense. Tu nous as, dit-il, mis sur vne dispute fort belle, & merueilleusement bien seante à la philosophie.
- B Or laisse doncques, luy dis-je, amy, ie te pry, ceste vehemence d'accuser, & ne te courrouce pas, si tu vois que quelques vns pour estre nez de mauuais & meschans parens sont punis: ou bien, ne t'esiois dōcques pas, & ne louë pas, si tu vois aussi que la noblesse soit honoree. Car si nous aduoions que la recompense de vertu se doieue raisonnablement continuer en la posterité, il faut aussi consequemment que nous estimions, que la punition ne doit pas faillir ne cesser quand & les mesfaicts, ains reciproquement selon le deuoir, courir sus les descendans des malfaitteurs. Et celui qui voit volontiers les descendans de Cimon honorez à Athenes, & au contraire se fasche, & a desplaisir de voir ceux de la race de Lachares ou d'Ariston bannis & dechassez, celui-là est par trop lasche & trop mol, ou pour mieux dire, trop hargneux & querelleux enuers les Dieux, se plaignant d'un costé, si l'on voit que les enfans d'un meschant & mal-heureux homme prosperent: & se plaignant de l'autre costé au contraire, si l'on voit que la posterité des meschans soit abbaissée, ou bien du tout effacee:
- C & accusant les Dieux, si les enfans d'un meschant homme sont affligez, tout autant comme si c'estoient ceux d'un homme de bien: mais quant à ces raisons là, fais compte que ce soient comme des barrieres ou rempars à l'encontre de ces trop aspres repreneurs & accusateurs-là. Mais au demourant reprenons de rechef le bout de nostre peloton de filet, comme en un lieu tenebreux, & où il y a plusieurs tours & destours, qui est la matiere des iugemens de Dieu, & nous conduisons avecques crainte retenue tout doucement à ce qui est plus probable & plus vray-semblable: attendu que des choses que nous faisons, & que nous manions nous mesmes, nous n'en sçaurions pas asseurement dire la certaine verité. Comme, pourquoy est-ce que nous faisons tenir assis les pieds trempans dedans de l'eau, les enfans qui sont nez de peres qui meurent etiques ou hydropiques, iusques à ce que les corps de leurs peres soient entierement consummez du feu, d'autant que l'on a opinion, que par ce moyen ces maladies-là ne passent point aux enfans, & ne paruiennent point iusques à eux. Et pourquoy c'est, que si vne chéure prend en sa bouche de l'herbe qui se nomme Eryngium, le chardon à cent testes, tout le troupeau s'arreste, iusques à ce que le chéurier vienne oster ceste herbe à la chéure qui l'a en la gueule: & d'autres proprieté occultes, qui par attrouchemens secrets & passages de l'un à l'autre, font des effectz incroyables, tant en soudaineté, qu'en longueur de distance: mais nous nous esbahissons de la distance & interualle des temps, & non pas des lieux, & neantmoins il y a plus d'occasion de s'esbahir & esmerveiller, comment d'un mal aiant commencé en Æthiopie la ville d'Athenes a esté remplie, de maniere que Pericles en est mort, & Thucydides en a esté malade, que non pas si les Phociens & les Sybarites aians commis quelques meschancetez, la punition en soit tombée sur leurs enfans & leurs descendans: car ces proprieté occultes-là ont des correspondences des derniers aux pre-

Pourquoy la Iustice diuine differe quelquefois

miers, & des secretes liaisons, desquelles la cause, encore qu'elle nous soit incogneüe, E ne laisse pas de produire ses propres effects. Mais à tout le moins y a-il raison de iustice toute apparente & prompte à la main, quant aux publiques vengeance surannees des villes, & citez, par ce que la ville est vne mesme chose & continuee, ne plus ne moins qu'un animal, lequel ne sort point de soy-mesme pour les mutations d'aages, ny ne deuient point autre & puis autre, pour quelque succession de temps qu'il y ait, ains est tousiours conforme & propre à soy-mesme, receuant tousiours ou la grace du bien, ou la coulpe du mal, de tout ce qu'elle fait ou qu'elle a fait en commun, tant que la société qui la lie, maintient son vnitè: car de faire d'une ville plusieurs, ou bien encore innumerables en la diuisant par interualles de temps, c'est autant comme qui voudroit faire d'un homme plusieurs, pour autant que maintenant il seroit vieil aiant esté parauant ieune, & encore plus auant, garçon: ou, pour mieux dire, cela ressembleroit proprement aux ruses d'Épicharmus, dont a esté inuenté & mis en auant la maniere d'arguer des Sophistes, qu'ils appellent l'argument croissant. Car celuy F qui a pieça emprunté de l'argent, ne le doit pas maintenant, attendu que ce n'est plus luy, & qu'il est deuenu un autre: & celuy qui fut hier conuié à souper, y vient aujourdhuy sans mander, attendu qu'il est deuenu un autre, combien que les aages fassent encore de plus grandes differences en un chascun de nous, qu'elles ne font és villes & citez: car qui auroit veu la ville d'Athenes il y a trente ans, la recognoistroit encore toute telle aujourdhuy qu'elle estoit alors, & les mœurs, les mouuemens, les ieux, les façons de faire, les plaisirs, les courroux & desplaisirs du peuple qui est à present, ressemblent totalement à ceux des anciens. Là où d'un homme, si lon est quelque temps sans le veoir, quelque familier ou amy que lon luy soit, à peine peut on recognoistre le visage: mais quant aux mœurs qui se muent & changent facilement par toute raison, toute sorte de trauail ou d'accident, ou mesme de loy, il y a de si grandes diuersitez, que ceux qui sentreuoient & se hantent ordinairement, en sont tous esmerueillez: ce neantmoins l'homme est tousiours tenu & réputé pour G un mesme, depuis sa naissance iusques à sa fin, & au cas pareil la ville demeure tousiours vne mesme: à raison dequoy nous iugeons estre raisonnable qu'elle soit participante du blasme de ses ancestres, ne plus ne moins qu'elle se sent aussi de la gloire & de la puissance d'iceux, ou bien nous ne nous donnerons garde que nous ietterons toutes choses dedans la riuier de Heraclitus, en laquelle on dit que lon ne peut iamais entrer deux fois, d'autant qu'elle mue & change la nature de toutes choses. Or sil est ainsi, que la ville soit tousiours vne chose mesme continuee, autant en doit on estimer d'une race & lignee, laquelle depend d'une mesme souche, produisant ne sçay quelle force & communication de qualitez, qui sestend sur tous les descendants. Car ce qui est engendré, n'est pas comme ce qui est produit en estre par artifice, & est incontinent separé de son ouurier, d'autant qu'il est fait par luy, & non pas de luy: là où au contraire, ce qui est engendré est fait de la substance de celuy qui engendre, tellement qu'il emporte avec soy quelque chose de luy, qui à bon droit est ou puny ou honoré mesme en luy. Et si ce n'estoit que lon penseroit que ie me ioüasse, & que ie ne le disse pas à bon esciant, i'assurerois volontiers, que les Atheniens firent plus grand tort à la statue de Cassander quand ils la fondirent, & semblablement les Syracusains au corps de Dionysius, quand apres sa mort ils le firent porter hors de leurs confins, que sils eussent bien chastié leurs descendants: car la statue de Cassander ne tenoit rien de sa nature, & l'ame de Dionysius auoit de long temps abandonné son corps: là où un Nyseus, un Apollocrates, un Antipater, & un Philip- H pus, & pareillement tous autres enfans d'hommes vicieux & meschans, retiennent la principale partie de leurs peres, & celle qui ne demeure point oyssive sans rien faire, ains celle dequoy ils viuent & se nourrissent, dequoy ils negocient, & discourent par
raison,

A raison, & ne doit point sembler estrange ny mal aisé à croire, si estans yssus d'eux ils retiennent les qualitez & inclinations d'eux. En somme, dis-je, tout ainsi comme en la medecine, tout ce qui est vtile, est aussi iuste & honneste, & se mocqueroit-on de celuy qui diroit que ce fust iniustice, quand vne personne a mal en la hanche, de luy cauteriser le poulce : & là où le foye est apostumé, de scarifier le petit ventre : & là où les bœufs ont les ongles des pieds trop molles, oindre les extremittez de leurs cornes : autant meriteroit d'estre mocqué & repris celuy, qui estimeroit qu'il y eust es punitions autre chose de iuste, que ce qui peut guarir & curer le vice : & qui se courrouceroit si on appliquoit la medecine aux vns pour seruir de guarison aux autres, comme font ceux qui ouurent la véne pour allegier le mal des yeux : celuy-là sembleroit ne veoir rien plus outre que son sens, & se souuiendrait mal, qu'un maistre d'eschole bien souuent en fouëtant vn de ses escholiers tient en office tous les autres, & vn grand Capitaine en faisant mourir vn soldat de chasque dizaine ramene

B tous les autres à la raison : ainsi non seulement à vne partie par vne autre partie, mais à toute l'ame par vne autre ame, s'impriment certaines dispositions d'empiremens ou d'amendemens, plus tost que à vn corps par vn autre corps : pour ce que là es corps il est force qu'il se face vne mesme impression, & mesme alteration, mais icy l'ame estant bien souuent menee par imagination à craindre ou à fasseurer, s'en trouue ou pis ou mieux. Comme ie parlois encore, Olympique m'interrompant mon propos, Par ces tiens propos, dit-il, tu supposes vn grand subiect à discourir, c'est à sçauoir que l'ame demeure apres la separation du corps. Ouy bien, dis-je, par cela mesme que vous nous concédez maintenant, ou plus tost, que vous nous auez cy deuant concédé : car nostre discours a esté pourfuiuy dès le commencement iusques à ce poinct, sur ceste presuppotion, que Dieu nous distribue à chascun selon que nous auons merité. Et comment, dit-il, estimes-tu, qu'il s'ensuyue necessairement, si les Dieux contemplent les choses humaines, & disposent de toutes choses icy bas, que les ames en soient du tout immortelles, ou qu'elles demeurent longuement en estre apres la mort ? Non vrayement, dis-je, beau sire, mais Dieu est de si basse entremise, & a si peu à faire, que cōbien que nous n'auons rien de diuin en nous, ne rien qui luy ressemble aucunement, ne qui soit ferme ne durable, ains que nous allions desechans, fenans & perissans, ne plus ne moins que les feuilles des arbres, comme dit Homere, en peu de temps : neantmoins il fait ainsi grand cas de nous, ne plus ne moins que les femmes qui nourrissent & entretiennent des iardins d'Adonis, comme lon dit, dedans des fragiles pots de terre : aussi fait-il luy nos ames de duree d'un iour, par maniere de dire, verdoyâtes dedans vne chair mollastre & non capable d'une forte racine de vie, & qui puis apres s'estaignent pour la moindre occasion du monde. Mais en laissant les autres Dieux, si bon te semble, considere vn peu le nostre, j'entens celuy qui est reclamé en ce lieu. Si aussi tost qu'il sçait que les ames sont desliees, ne plus ne moins que quelque fumee ou quelque brouillas qui exhale hors du corps, il ne fait pas incontinent offrir force oblations & sacrifices propitiatoires pour les trespassez, & s'il ne demande pas de grands honneurs & de grandes venerations à la memoire des morts, & s'il le fait pour nous abuser & deceuoir, nous qui y adioustons foy. Car quant à moy, ie ne concederay iamais que l'ame perisse, & ne demeure apres la mort, si lon ne vient emporter premierement le trepied prophetique de la Pythie, comme lon dit que feit iadis Hercules, & du tout destruire l'oracle pour ne plus rendre de telles responses qu'il en a renduës iusques à nos temps, semblables à celles que iadis il donna à Corax le Naxien, à ce que lon dit,

C'est vne grande impieté de croire,

Que l'ame soit mortelle ou transitoire.

Alors Patrocles : Et qui estoit, dit-il, ce Corax qui eut ceste response ? Car ie n'ay rien

Au 6. liu.
de l'Iliade.

Pourquoy la iustice diuine differe quelquefois

entendu ny de l'un, ny de l'autre. Si auez bien, dis-je, mais i'en suis cause, aiant pris le E
surnom au lieu du propre nom. Car celuy qui tua Archilochus en bataille, s'appel-
loit Callondes, & estoit surnommé Corax : lequel aiant esté la premiere fois reietté
par la prophetisse Pythie, comme meurtrier qui auoit occis vn personnage sacré aux
Muses : & depuis aiant vſé de quelques requestes & prieres enuers elle, avec quel-
ques raisons dont il pretendoit iustifier son faict, à la fin il luy fut ordonné par l'O-
racle, qu'il allast en la maison de Tettix, & que là il appaisast par oblations & sacri-
fices l'ame d'Archilochus. Or ceste maison de Tettix estoit la ville de Tenarus : car
on dit que Tettix Candiot estant iadis arriué à ce promontoire de Tenarus avec
vne flotte de vaisseaux, y bastit vne ville, aupres du lieu où lon auoit accoustumé
de coniurer & euocquer les ames des trespassez. Semblablement aussi aiant esté
respondu à ceux de Sparte, qu'ils trouuassent moyen d'appaiser l'ame de Pausanias, ils
enuoyerent querir iusques en Italie des sacrificateurs & exorcisateurs qui ſçauoient
coniurer les ames, lesquels avec leurs sacrifices chasserent son esprit hors du temple. F
C'est doncques vne mesme raison, dis-je, qui confirme & preuue, que le monde est
regy par la prouidence de Dieu ensemble, & que les ames des hommes demeurent
encore apres la mort, & n'est pas possible que l'un subsiste si lon oste l'autre. Et sil
est ainsi que l'ame demeure apres la mort, il est plus vraysemblable & plus equita-
ble, que lors les retributions de peine ou d'honneur luy soient rendues : car durant
tout le temps qu'elle est en vie, elle combat, & puis apres quand elle a acheué tous
ses combats, alors elle reçoit ce qu'elle a en sa vie mérité. Mais quant aux honneurs
ou punitions qu'elle reçoit en l'autre monde estant seule & separee du corps, cela
ne nous touche de rien à nous autres qui sommes viuans, car ou lon n'en ſçait rien,
ou on ne les croit pas : mais celles qui se font sur les enfans & sur les descendans,
d'autant qu'elles sont apparentes & cogneuës de ceux qui sont en ce monde, elles
retiennent & repriment plusieurs meschans hommes d'executer leurs mauuaises vo-
lontez. Au reste qu'il soit vray, qu'il n'y ait point de plus ignominieuse punition, G
ne qui touche plus les cœurs au vif, que de veoir ses descendans & dependans affli-
gez pour soy, & que l'ame d'un meschant homme ennemy des Dieux & des loix,
apres sa mort voyant non ses images & statuës ou autres honneurs abbattus, ains ses
propres enfans, ses amis & parens ruinez & affligez de grandes miseres & tribula-
tions, & estans griefuement punis pour elle, ne voulsist pas plus tost perdre tous les
honneurs que lon ſçauroit faire à Iupiter, que de retourner à estre derechef iniuste,
ou abandonné à luxure, ie vous en pourrois reciter vn conte qui me fut faict il n'y
a pas fort long temps, si ce n'estoit que ie craindrois qu'il ne vous semblast que ce
fust vne fable controuuee à plaisir : au moyen de quoy il vaut mieux que ie ne vous
allegue que des raisons & arguments fondez en verisimilitude. Non pas cela, dit
adonc Olympique, mais recite nous le conte que tu dis. Et comme les autres aussi
me requissent tout de mesme : Laissez moy, dis-je, deduire premierement les raisons H
vraysemblables à ce propos : & puis apres, si bon vous semble, ie vous reciteray aussi
le conte, au moins si c'est conte. Car Bion dit, que si Dieu punissoit les enfans des
meschans, il seroit autant digne de mocquerie, comme le medecin qui pour la ma-
ladie du pere ou grand-pere, appliqueroit sa medecine au fils, ou à l'arriere-fils : mais
ceste comparaison faut en ce que les choses sont en partie semblables, & en partie
aussi diuerſes & dissemblables : car l'un estant medicinal ne guarit pas la maladie &
indisposition de l'autre, ny iamais homme qui eust la fiebure ou le mal des yeux
n'en fut guarý pour veoir vſer d'un onguement, ou appliquer emplastre à vn autre :
mais au contraire les punitions des meschans pour ceste occasion se font publique-
ment deuant tous, pour ce que l'effect de iustice administree avec raison, est de rete-
nir les vns par le chastiment & punition des autres : mais ce en quoy la comparaison
de Bion

- A de Bion se rapporte & conforme à la dispute proposée, n'a pas esté entendu par luy: car souuent est-il aduenü qu'un homme tombé en vne dangereuse maladie, & non pas pourtant incurable, par son intemperance puis apres & dissolution, a tellement laissé aller son corps en abandon, que finablement il en est mort: & que puis apres son fils qui n'estoit pas actuellement surpris de la mesme maladie, ains seulement y auoit quelque disposition, vn bon medecin ou quelque sien amy, ou quelque maistre des exercices, s'en estant apperceu, ou bien vn bon maistre, qui a eu soing de luy, l'a rengé à vne maniere de diette austere, en luy ostant toute superfluité de viandes, toutes patisseries, toute yurongnerie, & toute accointance de femmes, & luy faisant vser souuent de medecines, & fortifier son corps par continuation de labour & d'exercices, a dissipé & fait esuanouir vn petit commencement d'une grande maladie, en ne luy permettant pas de prendre plus grand accroissement. N'est-il pas ainsi que nous admonestons ordinairement ceux qui sont nez de pere
- B ou mere maladis, de prendre bien garde à eux & de ne negliger pas leur disposition, ains de bonne heure & dès le commencement tascher à chasser la racine de celles maladies nees avec eux, qui est facile à ietter dehors, & à surmonter quand on y prouuoit de bonne heure? Il n'est rien plus vray, respondirent-ils tous. Nous ne faisons doncques pas chose impertinente, mais necessaire, ne sotte, mais vtile, quand nous ordonnons aux enfans de ceux qui sont subiects au hault mal, ou à la manie & alienation d'esprit, ou à la goutte, des exercices du corps, des diettes & regimes de vie, & des medecines, non pour ce qu'ils soient malades, mais de peur qu'ils ne le soient: car vn corps né d'un autre maleficié est digne, non de punition aucune, mais de medecine & d'estre soigneusement bien pensé: laquelle diligence & sollicitude, s'il se trouue aucun qui par lascheté ou delicatesse appelle punition, d'autant qu'elle priue la personne de voluptez, ou qu'elle luy donne quelque poincture de douleur, ou de peine, il le faut laisser là pour tel qu'il est: & s'il est expedient de prendre garde, & de medeciner soigneusement vn corps qui sera issu & descendu d'un autre maleficié & gasté, sera-il moins raisonnable d'aller au deuant d'une similitude de vice hereditaire, qui commence à germer és mœurs d'un ieune homme, & à poulsier dehors, ains attendre & le laisser croistre iusques à ce que se respendant par ses passions ils vienne à estre en veüe de tout le monde, comme dit le poëte Pindare,

Le fruit que son cœur insensé

A par-foy auroit propensé?

Ne vous semble-il point qu'en cela, Dieu pour le moins soit aussi sage comme le poëte Hesiodé, qui nous admoneste & conseille,

Semer enfans garde bien que tu n'aïlles

En retournant des tristes funerailles,

D Mais au retour des festins gracieux

Faits en l'honneur des habitans des cieux?

voulant conduire les hommes à engendrer des enfans lors qu'ils sont gays, ioyeux & deliberez: comme si la generation ne receuoit pas l'impression de vice & de vertu seulement, ains aussi de ioye, & de tristesse, & de toutes autres qualitez. Toutefois cela n'est pas œuvre de sapience humaine, comme pense Hesiodé, de sentir & cognoistre les conformitez ou diuersitez des natures des hommes, descendans avec leurs deuançiers, iusques à ce qu'estans tombés en quelques grandes forfaitures, leurs passions les descouurent pour tels qu'ils sont. Car les petits des ours, des loups, des singes, & de semblables animaux, monstrent incontinent leur inclination naturelle dès leur ieunesse, d'autant qu'il n'y a rien qui les desguise, ne qui les masque. Mais la nature de l'homme venant à se ietter en des accoustumances, en des opinions,

Au poëme
intitulé, Les
œuvres,

Pourquoy la iustice diuine differe quelquefois

& en des loix, couure bien souuent ce qu'elle a de mauuais, imite & contrefait ce qui E
est bon & honneste, tellement que ou elle efface & eschappe du tout la tare & macule
de vice, qui estoit nee avec elle, ou bien elle la cache pour bien long temps, se cou-
urant du voile de ruze & de finesse, de maniere que nous n'apperceuons pas leur ma-
lice, iusques à ce que nous soyons attaincts, comme d'un coup ou d'une morsure
de chascun crime, encore à grand peine: ou pour mieux dire, nous nous abusons
en ce, que nous cuydons qu'ils soient deuenus iniustes, lors seulement qu'ils com-
mettent iniustice, ou dissolus quand ils font quelque insolence, & lasches de cœur
quand ils s'enfuyent de la bataille, comme si quelqu'un auoit opinion, que l'ai-
guillon du scorpion s'engendraist lors premier en luy, quand il en picque: & le ve-
nim des viperes, quand elles mordent: qui seroit grande simplesse de le penser ainsi.
Car chascun meschant ne deuient point tel alors qu'il apparait, mais il a en soy dès
le commencement le vice & la malice imprimee: mais il en use lors qu'il en a le
moyen, l'occasion & la puissance, comme le larron de desrober, & le tyrannique F
de forcer les loix. Mais Dieu qui n'ignore point l'inclination & nature d'un chas-
cun, comme celui qui voit & cognoist plus l'ame que le corps, ny n'attend point,
ou que la violence vienne à main-mise, ny l'impudence à la parole, ny l'intempe-
rance à abuser des parties naturelles, pour la punir, à cause qu'il ne prend pas ven-
geance du meschant, pour ce qu'il en ait receu aucun mal: ny ne se courrouce point
contre le brigand rauisseur, pour ce qu'il ait esté forcé: ny ne hait l'adultere, pour ce
qu'il luy ait fait aucune iniure: ains punit par maniere de medecine celui qui est
sujet à commettre adultere, celui qui est auaricieux, celui qui ne fait compte de
transgresser les loix, ostant bien souuent le vice, ne plus ne moins que le mal cadu-
que, auant que l'accez en prenne. Nous nous courroucions nagueres de ce que
les meschans estoient trop tard & trop lentement punis, & maintenant nous trou-
uons mauuais, de ce que Dieu reprime & chastie la mauuaise disposition & vicieu-
se inclination d'aucuns, auant qu'ils aient commencé à forfaire: ne considerans G
pas que l'aduenir bien souuent est pire & plus à redoubter, que le present: & ce qui est
caché & couuert, que ce qui est apparent & decouvert: & ne pouuans pas discour-
rir & iuger, pourquoy il est meilleur d'en laisser aucuns en repos encore apres qu'ils
ont peché, & préuenir les autres auant qu'ils puissent executer le mal qu'ils ont
propensé, ne plus ne moins que les medecines & drogues medicinales ne conuien-
nent pas à aucuns estans malades, & sont vtils à d'autres qui ne sont pas actuelle-
ment malades, ains sont en plus grand danger que les autres. Voila pourquoy les
Dieux ne tournent pas sur les enfans toutes les fautes des parens: car s'il aduient
qu'il naisse un bon enfant d'un mauuais pere, comme par maniere de dire un fils
fort & robuste d'un pere maladif, celui-là est exempt de la peine de la race, com-
me estant hors de la famille de vice: mais aussi le ieune homme qui se conformera à
la malice hereditaire de ses parens, sera tenu à la punition de leur meschanceté, com- H
me au payement des debtes de la succession: car Antigonus ne fut point puny pour
les pechez de son pere Demetrius, ny entre les meschans Phyleus pour Augeas, ny
Nestor pour Neleus, car ils estoient bien yssus de meschans peres, mais quant à
eux ils estoient gens de bien: mais tous ceux de qui la nature a aimé, receu & prat-
tiqué ce qui venoit de la parenté, la iustice diuine a aussi puny en eux ce qu'il y auoit
de similitude de vice & de peché. Car tout ainsi comme les verrues, porreaux,
seings & taches noires qui sont es corps des peres, ne comparoissans point es corps
des enfans, recommancent à sortir & apparoir puis apres en leurs fils & arriere-fils: &
y eut une femme Grecque, qui aiant enfanté un enfant noir, & en estant appelée
en iustice, comme aiant conçu cest enfant de l'adultere d'un Maure, il se trouua que
elle estoit en la quatrième ligne descendue d'un Æthiopien. Et comme ainsi fust que
lon tenoit

A lon tenoit pour certain, que Python le Nisibien estoit extraict de la race & lignee des Semez, qui ont esté les premiers seigneurs & fondateurs de Thebes, le dernier de ses enfans qui mourut il n'y a pas long temps, auoit rapporté la figure de la lance en son corps, qui estoit la marque naturelle de celle lignee-là anciennement, estant apres si long interualle de temps ressourcé & reuenuë, comme du fond au dessus, celle similitude de race: aussi bien souuent les premieres generations, c'est à dire les premiers descendans, cachent, & par maniere de dire, entondrent quelques passions ou conditions de l'ame qui sont affectées à vne lignee, mais puis apres la nature les boute hors en quelques autres suyans, & represente ce qui est propre à chasque race, autant en la vertu comme au vice. Apres que i'eus acheué ce propos, ie me teu. Et Olympique se prit à rire, en disant, nous ne loüons pas ton discours, à fin que tu l'entendes, comme estant suffisamment prouué par demonstration, de peur qu'il ne semble que nous ayons mis en oubly le conte que tu nous as promis de faire, mais alors donnerons nous nostre sentence, quand nous l'aurons aussi entendu. Parquoy ie recommençay à suyure mon propos en ceste sorte: Thespeus natif de la ville de Soli en Cilicie, familier & grand amy de Protogenes qui icy longuement esté avec nous, aiant vescu les premiers ans de son aage en grande dissolution, en peu de temps perdit & despendit tout son bien: au moyen dequoy estant reduit ja par quelque temps à extreme necessité, il deuint meschant, & se repentant de sa folle despenſe commença à chercher tous moyens de recouurer des biens: ne plus ne moins que font les luxurieux qui bien souuent ne font compte de leurs femmes espousees, & ne les gardent pas ce-pendant qu'ils les ont, puis quand ils les ont laissées, & qu'elles sont remariées à d'autres, ils les vont solliciter pour tâcher à les corrompre meschamment. Ainsi n'espargnant voye du monde prouueu qu'elle tournast à plaisir ou à profit pour luy, en peu de temps il assembla non pas beaucoup de biens, mais beaucoup de honte & d'infamie: mais ce qui plus encore le diffama, fut vne responce que lon luy

C appporta de l'oracle d'Amphilochus, là où il auoit enuoyé demander, si luy viuroit mieux au reste de sa vie qu'il n'auoit faict par le passé: & l'oracle luy respondit, qu'il seroit plus heureux quand il seroit mort. Ce qui luy aduint en certaine maniere bien tost apres: car estant tombé d'un certain lieu hault la teste deuant, sans qu'il y eust rien d'entamé, du coup de la cheutte seulement il s'esuanoüit, ne plus ne moins que si luy eust esté mort: & trois iours apres comme lon estoit à preparer ses funerailles, il se reuint, & en peu de iours s'estant remis sus & retourné en son bon sens, il feit vn estrange & incroyable changement de sa vie: car tous ceux de la Cilicie luy portent témoignage qu'ils ne cogneurent oncques homme de meilleure conscience en tous affaires & negoces qu'ils eurent à desmesler ensemble, ny plus deuot & religieux enuers les Dieux, ne plus certain à ses amis, ne plus fascheux à ses ennemis: de maniere que ceux qui l'auoient de long temps cogneu familièrement, desiroient fort ſçauoir de

D luy, quelle auoit esté la cause de si grande & si soudaine mutation, estimans qu'un si grand amendement de vie si dissoluë, ne pouuoit pas estre adueni fortuitement, comme il estoit veritable, ainsi que luy-mesme le raconta au susdit Protogenes, & aux autres siens familiers amis, gens de bien & d'honneur comme luy. Car quand l'esprit fut hors de son corps, il se trouua du commencement, ne plus ne moins que feroit vn pilote qui feroit ietté hors de sa nauire au fond de la mer, tant il se trouua estonné de ce changement, mais puis apres s'estant releué petit à petit, il luy fut aduis qu'il commença à respirer entierement, & à regarder tout à l'entour de luy, l'ame s'estant ouuerte comme vn œil, & ne voyoit rien de ce qu'il souloit voir au parauant, sinon des astres & estoilles de magnitude tresgrande, distantes l'une de l'autre infiniment, iettans vne lueur de couleur admirable, & de force & roideur grande, tellement que l'ame estant portee sur ceste lueur, cōme sur vn chariot, doucement & vniement,

Pourquoy la iustice diuine differe quelquefois

ainsi que sur vne mer calme, alloit soudainement par tout où elle vouloit, & laissant E
à part grand nombre des choses qu'il y auoit veuës, il disoit qu'il auoit veu, que les
ames de ceux qui mouroient, deuenoient en petites bouteilles de feu, qui montoient
de bas en hault à trauers l'air, lequel s'ouuroit deuant elles, & que petit à petit lesdit-
tes bouteilles venoient à se rompre, & les ames en sortoient aians forme & figure
humaine: au demourât fort agiles & legeres: & se mouuoient, non pas toutes d'une
mesme sorte, ains les vnes sautoient d'une legereté merueilleuse, & iallissent à
droite ligne contremont: les autres tournoient en rond comme des bobines ou fu-
seaux ensemble, tantost contremont, tantost contrebas, de sorte que le mouuement
estoit mélé & confus, qui ne s'arrestoit qu'à grande peine, & apres vn bien long
temps. Or n'en cognoissoit-il point la plus part, mais en aiant apperceu deux ou
trois de sa cognoissance, il s'efforça de s'en approcher, & parler à elles: mais elles ne
l'entendoient point, & si n'estoient point en leur bon sens, ains comme estourdies
& transportees, refuyoient toute veüe & tout attouchement, errantes çà & là à par- F
elles du commencement, & puis en rencontrans d'autres disposées tout de mesme,
elles s'embrassoient & se conioignoient avecques elles, en se mouuant çà & là sans
aucun iugement, & iettans ne sçay quelles voix non articulees ne distinctes, comme
de criz mellez de plainctes & d'espouuement: les autres paruenues en la plus
haulte extremité de l'air estoient plaisantes & gayeres à voir, & tant gracieuses & cour-
toises, que souuent elles s'approchoient les vnes des autres, & se destournoient au
contraire de ces autres tumultuantes, donnans à entendre qu'elles estoient fâchees
quand elles se ferroient en elles mesmes, & qu'elles estoient ioyeuses & contentes
quand elles s'estendoient & s'eslargissoient. Entre lesquelles il dit qu'il en vit vne
d'un sien parent, combien qu'il ne la cognoissoit pas bien certainement, d'autant
qu'il estoit mort, luy estant encore en son enfance: mais elle s'approchant de luy le
salua, en luy disant, Dieu te gard Thespiesen: dequoy luy s'esbahissant luy respondit,
qu'il n'estoit pas Thespiesen, & qu'il s'appelloit Arideus: ouy bien, dit-elle, par cy G
deuant, mais cy apres tu feras appellé Thespiesen, car tu n'es pas encore mort, mais
par certaine permission de la destinee, tu es venu icy avec la partie intelligente de ton
ame, & quant au reste de ton ame, tu l'as laissé attaché comme vne ancre à ton corps:
& à fin que tu le sçaches dès maintenant pour cy apres, prens garde à ce que les ames
des trespassez ne font point d'ombre, & ne cloënt & n'ouurent point les yeux. Thes-
pesien aiant ouy ces paroles se recueillit encore d'auantage à discourir en soy-mes-
me, & regardant çà & là autour de luy, apperceut qu'il se leuoit quand & luy ne sçay
quelle ombrageuse & obscure lineature, mais que ces autres ames-là reluysoient tout
à l'entour d'elles, & estoient par le dedans transparentes, non pas toutefois tou-
tes egalelement, car les vnes rendoient vne couleur vnue & egale par tout comme fait
la pleine Lune quand elle est plus claire, & les autres auoient comme des escailles
ou cicatrices esparfes çà & là par interualles: & des autres qui estoient merueilleuse- H
ment hydeuses & estranges à voir, mouchetees de taches noires, comme sont les
peaux des serpens: les autres qui auoient des legeres frisures & esgrattigneures au
visage. Si disoit ce parent-là de Thespiesen (car il n'y a point de danger d'appeller
les ames du nom qu'auoient les hommes en leur viuant) qu'Adraftia fille de Iupiter,
& de Neceffité, estoit constituée au plus hault, par dessus tous, vengeresse de toute
sorte de crimes & pechez, & que des malheureux & meschans il n'y en eut iamais
vn, ny grand ny petit, qui par ruse ou par force se peust oncques sauuer d'estre puny.
Mais vne sorte de supplice & de peine conuient à vne geoliere & executrice, (car
il y en a trois) & vne autre à vne autre: d'autant qu'il y en a vne legere & soudaine,
qui se nomme Poene, laquelle execute le chastiment de ceux qui dès ceste vie sont pu-
nis en leurs corps & par leurs corps d'un certain doux moyen, qui laisse aller impunies
plusieurs

A plusieurs fautes legeres, lesquelles meriteroient bien quelque petite purgation. Mais ceux où il y a plus à faire, comme de guarir & curer vn vice, Dieu les commet à punir apres la mort à l'autre executrice, qui se nomme Dice. Et ceux qui sont de tout poinct incurables, Dice les aiant repoulsez, la troisiéme, & la plus cruelle des ministres & satellites de Adrastia, qui s'appelle Erinnys, court apres, & les persecute fuyans & errans çà & là en grande misere & grande douleur, iusques à tant qu'elle les attrappe, & precipite en vne abyfme de tenebres indicible. Et quant à ces trois sortes de punitions, la premiere ressemble à celle dont on vse entre quelques nations barbares: car en Perse ceux qui sont punis par iustice, on prend leurs haults chapeaux poinctus & leurs robbes, que lon pelle poil apres poil, & les fouëtte-lon deuant eux, & eux aians les larmes aux yeux crient & prient que lon cesse: aussi les punitions qui se font en ceste vie par le moyen des corps ou des biens, n'attaignent point aigrement au vif, ny ne touchent, ny ne penetrent point iusques au vice mesme, ains sont la plus part d'icelles imposees par opinion, & selon le iugement du sens naturel exterieur. Mais sil y en a quelqu'un qui arriue pardeça sans auoir esté puny & bien purgé pardelà, Dice le prenant tout nud en son ame toute descouuerte, n'ayant dequoy couvrir, ny cacher ou pallier & desguiser sa meschanceté, ains estant veu par tout, de tous costez, & de tous, elle le montre premierement à ses parens gens de bien, fils ont d'auenture esté tels, comme il est abominable & indigne d'estre descendu d'eux: & fils ont esté meschans, eux & luy en sont de tant plus griefuement tourmentez en les voyant, & estant veu par eux en son tourment, où il est puny & iusticié bien long temps, tant qu'un chascun de ses crimes & pechez soit effacé par douleurs & tourmens, qui en aspreté & vehemence surpassent d'autant plus les corporels, que ce qui est au vray est plus à certes que ce qui apparoit en songe, & les marques & cicatrices des pechez & des vices demeurent aux vns plus, aux autres moins. Et pren bien garde, dit il, aux diuersitez de couleurs de ces ames de toutes sortes: car ceste

C couleur noirastre & sale, c'est proprement la teinture d'auarice & de chicheté: & celle rouge & enflambee est celle de cruauté & de malignité: là où il y a du bleu, c'est signe que de là a esté escuree l'intemperance & dissolution és voluptez à bien long temps & avec grande peine, d'autant que c'est vn mauuais vice: le violet tirant sur le liuide procede d'enuie. Ne plus ne moins doncques que les Seiches rendent leur encre, aussi le vice pardelà changeant l'ame & le corps ensemble, produit diuerses couleurs: mais au contraire pardeçà, ceste diuersité de couleurs est le signe de l'acheuement de purification: puis quand toutes ces teintures-là sont bien effacees & nettoyees du tout, alors l'ame deuient de sa naïfue couleur qui est celle de la lumiere: mais tant que aucune de ces couleurs y demeure, il y a tousiours quelque retour de passios, d'affections, qui leur apporte vn eschauffement & vn battement de poux, aux vnes plus debile, & qui s'esteint & passe plus tost & plus facilement: aux autres qui s'y prend

D à bon esciant: & d'icelles ames les vnes, apres auoir esté chastices par plusieurs & plusieurs fois, recourent à la fin leur habitude & disposition telle qu'il appartient: les autres sont telles que la vehemence de leur ignorance & l'appetit de volupté les transporte és corps des animaux, car la foiblesse de leur entendement, & la paresse de speculer & discourir par raison, les faict incliner à la partie actiue d'engendrer: laquelle se sentant destituée de l'instrument luxurieux desire coudre ses cōcupiscences avec la iouyssance, & se soubsleuer par le moyen du corps: car pardeçà il n'y a rien du tout, si ce n'est vne ombre, & par maniere de dire vn songe de volupté, laquelle ne viét point à perfection. Luy aiant tenu ces propos, il le mena bien viste, mais par vne espace infiny, toutefois à son aise & doucement, sur les rais de la lumiere, ne plus ne moins que si c'eussent esté des ailes, iusques à ce qu'estant arriué en vne grande fondriere. rendant tousiours contrebais, il se trouua lors destitué & delaisé de celle force qui

Pourquoy la iustice diuine differe quelquefois

l'auoit là conduit & amené, & voyoit que les autres ames se trouuoient aussi tout de E
mesmes: car se resserrans comme font les oyseaux quand ils volent en bas, elles tour-
noient tout à l'entour de ceste fondriere, mais elles n'ozoient entrer dedans: & estoit
la fondriere semblable aux spelonques de Bacchus, ainsi tapissée de fueillages de ra-
mees & de toutes sortes de fleurs, & en sortoit vne douce & souëfue haleine, qui ap-
portoit vne fort plaisante odeur & temperature de l'air, telle comme le vin sent à ceux
qui aiment à le boire: de sorte que les ames, se repaiffans & festoyans de ces bonnes
odeurs, en estoient toutes esioüyes, & s'en-entrecareffoient, tellement qu'à l'entour
de ce creux-là, tout en rond, il n'y auoit que passe-temps, ieux & rifees, & chansons,
côme de gens qui ioüioient les vns avec les autres, & se donnoient du plaisir tant qu'ils
pouuoient: si disoit, que par là Bacchus estoit monté en la compagnie des Dieux, &
que depuis il y auoit conduict Semelé, & que le lieu s'appelloit le lieu de Léthe, c'est à
dire, d'oublance: & pourtant ne voulut-il pas que Thespesien, qui en auoit bien bon-
ne enuie, s'y arrestast, ains l'en retira par force, luy donnant à entendre & luy ensei- F
gnant, que la raison & l'entendement se dissout & se fond par ceste volupté, & que
la partie irraisonnable se ressentant du corps, en estant arrousee & acharnee, luy ra-
menoit la memoire du corps, & de ceste souuenance naissoit le desir & la cupidité qui
la tiroit à la generation, que lon appelloit ainsi, c'est à dire vn consentement de l'ame
aggrauee & appesantie par trop d'humidité. Parquoy aiant trauersé vne autre pareil-
le carriere de chemin, il luy fut aduis qu'il apperceut vne grande coupe, dedans
laquelle venoient à se verser des fleuves, l'un plus blanc que l'escume de la mer ou
que neige, & l'autre rouge comme l'escarlata que lon apperceoit en l'arc en ciel, &
d'autres qui de loing auoient chascun leurs lustres & teintures differentes: mais quand
ils en approcherent de prés, ceste coupe s'esuanoüit, & ces differentes couleurs des
ruisseaux disparurent, exceptee la couleur blanche: & là veit trois Demons assis en-
semble, en figure triangulaire, qui mesloient ces ruisseaux ensemble à certaines me-
sures. Or disoit ceste guide des ames, que Orpheus auoit penetré iusques-là quand G
il estoit venu apres sa femme, & qu'ayant mal-retenu ce qu'il y auoit veu, il auoit se-
mé vn propos faux entre les hommes, c'est à sçauoir, que l'oracle qui estoit en la ville
de Delphes, estoit commun à Apollo & à la Nuiet: car Apollo n'a rien qui soit de
commun avec la Nuiet, mais cest oracle cy, dit-il, est bien commun à la Lune & à la
Nuiet, toutefois il ne perce nulle part iusques à la terre, ny n'a aucun siege fiché ny
certain, ains est par tout vague & errant parmy les hommes par songes & apparitions:
c'est pourquoy les songes meslez, comme tu vois, de tromperie & de verité, de di-
uersité & de simplicité, sont semez par tout le monde: mais quant à l'oracle d'Apollo
tu ne l'as point veu, ny ne le pourrois voir, pource que la terre sterile de l'ame ne peult
faillir, ny s'esleuer plus hault, ains panche contre bas, estant attachee au corps: &
quant & quant il tascha, en m'approchant, de me monstrier la lumiere & clarté du
trepied à trauers le sein de la deesse Themis, laquelle, comme il disoit, alloit percer au H
mont de Parnase, & aiant grande enuie & faisant tout son effort pour la voir, il ne
peut pour sa trop grande splendeur, mais bien ouyt-il en passant la voix hautaine
d'une femme, qui en vers disoit entre autres choses le temps de la mort de luy, & di-
soit ce Demon que c'estoit la voix de la Sibylle, laquelle tournoyant dedans la face
de la Lune chantoit les choses à aduenir, & desirant en ouyr d'auantage, il fut re-
poulsé par l'impetuosité du corps de la Lune, & ainsi en ouyt bien peu, comme
l'accident du mont Vesuien & de la ville de Pozzol, qui deuoient estre bruslez du
feu: & si y auoit vne petite clause de l'Empercur qui lors regnoit, qu'estant homme
de bien, il laisseroit son empire par maladie. Apres cela ils passerent outre iusques
à voir les peines & tourmens de ceux qui estoient punis: là où du commencement
ils ne virent que toutes choses horribles & pitoyables à voir: car Thespesien qui ne
se dou-

- A se doutoit de rien moins, y rencontra plusieurs de ses amis, parens, & familiers, qui y estoient tourmentez, lesquels souffrans des peines & supplices douloureux & infames, se lamentoient à luy & l'appelloient en criant : finablement il y veit son propre pere sourdant d'un puy profond, tout plein de playes & de picqueures, luy tendant les mains, & qui malgré luy estoit contraint de rompre silence, & forcé par ceux qui auoient la superintendance desdictes punitions, de confesser hault & clair qu'il auoit esté meschât meurtrier à l'endroit de certains estrangers qu'il auoit eu logez chez luy, & sentant qu'ils auoient de l'or & de l'argent, les auoit fait mourir par poison, dequoy il n'auroit iamais esté rien sçeu pardelà, mais pardeçà en aiant esté conuaincu, il auroit desia payé partie de la peine, & le menoit on pour en souffrir le demourant. Or n'osoit-il pas supplier ny interceder pour son pere, tant il estoit estonné & effrayé : mais voulant s'enfuir & s'en retourner, il ne veit plus aupres de luy ce gracieux sien & familier guide, qui l'auoit conduit du commencement, ains en apperceut d'autres
- B hideux & horribles à voir, qui le contraignoient de passer outre, comme estant necessaire qu'il trauersast : si veit ceux qui notoirement à la veüe d'un chascun auoient esté meschans, ou qui en ce monde en auoient esté chastiez, estre pardelà moins douloureusement tourmentez, & non tant comme les autres, comme aians esté debiles & imparfaicts en la partie irraisonnable de l'ame, & subiecte aux passions & concupiscences : mais ceux qui festans desguisez & reuestus de l'apparence & reputation de vertu au dehors, auoient vescu en meschanceté couuerte & latente au dedans, d'autres qui leur estoient à l'entour les contraignoient de retourner au dehors ce qui estoit au dedans : & se reboursans & renuersans contre la nature, ne plus ne moins que les Scolopendres marines, quand elles ont auallé vn hameçon, se retournent elles mesmes, & en escorchant les autres, & les desployant, ils faisoient voir à descouuert comme ils auoient esté viciez au dedans & peruers, aians le vice en la partie raisonnable & principale de l'homme. Et dit auoir veu d'autres ames attachees & entrelasces
- C les vnes auec les autres, deux à deux, ou trois à trois, ou plus, comme les serpens & viperes, qui s'entremangeoient les vnes les autres, pour la rancune qu'elles auoient les vnes contres les autres, & la souuenance des pertes & iniures qu'elles auoient receuës ou souffertes : & qu'il y auoit des lacs suyans de reng les vns les autres, l'un d'or tout bouillant, l'autre de plomb, qui estoit fort froid, & l'autre fort aspre, de fer : & qu'il y a des Dèmons qui en ont la superintendance, lesquels, ne plus ne moins que les fondeurs, y plongeient ou en retiroient les ames de ceux qui par auarice & cupiditez d'auoir, auoient esté meschans. Car quand elles estoient bien enflambees & renduës transparentes à force d'estre bruslees par le feu, dedans le lac d'or fondu, il les plongeient dedans celuy de plomb, là où apres qu'elles estoient geleees & renduës dures comme la gresle, derechef ils les transportoient dedans celuy de fer, là où elles deuenoient hydeusement noires, & estans rompues & brisees à cause de leur roideur
- D & dureté, elles changeoient de formes, puis de rechef ils les remettoient dedans celuy de l'or, souffrans des douleurs intolerables en ces diuerses mutations. Mais celles, dit-il, qui luy faisoient plus de pitié, & qui plus miserablement que toutes les autres estoient tourmentees, c'estoient celles qui pensoient desia estre eschappees, & que lon venoit reprendre & remettre aux tourments, & estoient celles pour les pechez desquelles la punition estoit tombee sur leurs enfans ou autres descendans : car quand quelque vne des ames de ces descendans-là les rencontroit ou leur estoit amenee, elle s'attachoit à elles en courroux, & crioit à l'encontre, en montrant les marques des tourmens & douleurs qu'elle enduroit, en les leur reprochant : & les autres taschoient à s'enfuir, & à se cacher, mais elles ne pouuoient, car incontinent les bourreaux couroient apres, qui les ramenoient au supplice, crians & se lamentans, d'autant qu'elles preuoyent bien le tourment qu'il leur conuenoit endurer. Oultre,

De la punition des malefices.

disoit qu'il en veit quelques vnes, & en bon nombre, attachees à leurs enfans, & ne E
se laissant iamais, comme les abeilles, ou les chauues-souris, murmurantes de cour-
roux, pour la souuenance des maux qu'elles auoient endurez pour l'amour d'eux.
La derniere chose qu'il y veit, fut, les ames qui s'en retournoient en vne seconde vie, &
qui estoient tournees & transformees à force en d'autres animaux de toutes sortes,
par ouuriers à ce deputez, qui avec certains outils & coups forgeoient aucunes des
parties, & en tordoient d'autres, en effaçoient & ostoient du tout, à fin qu'ils fussent
fortables à autres vies, & autres mœurs: entre lesquelles il veit l'ame de Neron affli-
gee desia bien griefuement d'ailleurs, de plusieurs autre maux, & percee de part en
part avec cloux tous rouges de feu: & comme les ouuriers la prinssent en main pour
la transformer en forme de vipere, là où comme dit Pindare, le petit deuore sa mere,
il dit que soudainement il falluma vne grande lumiere, & que d'icelle lumiere il
sortit vne voix, laquelle commanda, qu'ils la transfigurassent en vne autre espee de
beste plus douce, en forgeant vn animal palustre, chantant à l'entour des lacs & des F
marets, car il a esté puny des maux qu'il a commis: mais quelque bien luy est aussi
deu par les Dieux, pour-autant que de ses subiects il a affranchy de tailles & tributs le
meilleur peuple & le plus aimé des Dieux, qui est celuy de la Grece. Iusques icy
doncques il disoit auoir esté seulement spectateur, mais quand ce vint à s'en retourner,
il fut en toutes les peines du monde pour la peur qu'il eut: car il y eut vne femme de
face & de grandeur admirable, qui luy dit, Viença, à fin que tu ayes plus ferme me-
moire de tout ce que tu as veu: & luy approcha vne petite verge toute rouge de feu,
comme celle dont vsent les paintres, mais vn autre l'en engarda: & lors il se sentit sou-
dainement tiré, comme fil eust esté soufflé par vn vent fort & violent dedans vne sar-
batane, tant qu'il se retrouua dedans son corps, & estant reuenü & resuscité de dedans
le sepulchre mesme.

Que les bestes brutes vsent de la raison: G

EN FORME DE DEVIS.

Les personnages, Vlysses, Circé, Gryllus.

V L Y S S E S.



L M E semble, Circé, que j'ay bien compris cela, & l'ay bien
imprimé en ma memoire: mais ie scaurois volontiers fil y
a point quelques Grecs entre ceux que tu as transformez
d'hommes en loups, & en lions. C I R C E. Ouy bien, & H
plusieurs, mon bien-aimé Vlysses: mais pour quelle occa-
sion est-ce que tu me le demandes? V L Y S S E S. Pour ce
qu'il me semble que ce me seroit vne entremise honorable
enuers les Grecs, si de ta grace ie pouuois obtenir que tu
me les rendisse vne autre fois hommes, & que ie les ne lais-
sasse pas enuieillir contre nature en corps de bestes, me-
nans vne si miserable, si infame & si ignominieuse vie. C I R C E. Cest homme icy,
tant il est simple, veut que son ambition apporte dommage, non seulement à luy &
à ses amis, mais aussi à ceux qui ne luy appartiennent en rien. V L Y S S E S. Voyla
quelque autre bruuage de paroles que tu me vas broüillant & mixtionnant: car cer-
tainement tu m'aurois bien fait deuenir beste, si ie me laissois persuader, que ce
fust

- A fust perte & dommage de deuenir homme de beste. C I R C E. Et comment n'as tu pas desia faict encontre toy-mesme choses encore plus estranges que cela? veu que laissant vne vie immortelle, & non subiecte à vieillir, que tu pourras auoir demourant avec moy, tu t'en veux à toute force aller à vne femme mortelle, (& comme ie m'assure, desia toute vieillotte) à trauers dix mille maux qu'il te faudra encores endurer, te promettant que tu en seras cy apres plus celebré, plus regardé, & plus renommé que tu n'es maintenant: & ce-pendant tu ne t'apperçois pas, que tu poursuis vne vaine image de bien, au lieu d'un veritable. V L Y S S E S. Je suis content qu'il soit ainsi que tu dis, Circé: car quel besoing est-il que nous contestions si souvent sur vne mesme chose? Mais ie te prie, pour l'amour de moy deslie ces pauures gens, & me les rends. C I R C E. Non feray pas certes si legerement, car ce ne sont pas hommes communs: mais interroge les premierement s'ils le veulent bien, & s'ils te respondent que non, efforce toy vaillamment de les persuader à force de vives raisons: Et si tu ne peulx venir à bout de les persuader, ains au contraire si eux mesmes te conuainquent par raisons, te suffise d'auoir suiuy mauuais conseil pour toy, & pour tes amis. V L Y S S E S. Deà, pourquoy te mocques-tu de moy, belle Dame, de dire cela? car comment pourroient-ils receuoir ny rendre raison en conference, pendant qu'ils sont asnes, pourceaux, ou lions? C I R C E. Ne te soucie point quant à cela, homme le plus ambitieux qui viue, car ie te les rendray & bien entendans tout ce que tu leur voudras alleguer, & bien discourans: ou bien plus tost, il suffira qu'un seul entende tes allegations, & y responde pour tous ses compagnons. Tien, interroge celuy-là. V L Y S S E S. Et comment le nommerons-nous, Circé? & qui estoit-il quand il estoit homme? C I R C E. Et que peut-il chaloir quant à la dispute? toutesfois appelle le si tu veux, Gryllus: mais à fin que tu ne penses que pour me faire plaisir il discoure au plus loing de sa pensee, ie me tireray à l'escart de vous. G R Y L L V S. Dieu te gard Vlysses. V L Y S S E S. Et toy aussi vraiment Gryllus.
- C G R Y L L V S. Que veux-tu enquerir de nous? V L Y S S E S. Je sçay que vous avez esté hommes, & pourtant ay-ie pitié de vous voir tous tant que vous estes en cest estat: mais encores plus, comme il est vray-semblable, ceux qui aians esté Grecs estes tombez en telle calamité: si ay maintenant supplié Circé, que desliant ceux d'entre vous qui le voudront estre, & les remettant en leur ancienne forme, elle leur donne congé de s'en venir quand & nous. G R Y L L V S. Tais-toy Vlysses, & ne dy rien d'auantage: car nous aussi t'auons en grand mespris, voyans que c'est bien à faulces enseignes que lon t'a par cy deuant tenu pour habile homme, plus aduisé & plus sage que les autres, veu que tu as eu peur de changer de pis en mieux, sans y auoir premierement bien pensé, ne plus ne moins que les enfans craignent les drogues que les medecins leur ordonnent, & fuyent les sciences, qui les peuuent rendre de maladifs & fols sains & sages: aussi as-tu reietté arriere l'estre transmué d'une forme en vne autre: & maintenant encores trembles-tu de peur redoutant de coucher avec Circé, pour crainte qu'elle ne face de toy, sans que tu t'en prennes garde, un pourceau ou un loup: & nous veux persuader qu'au lieu que nous viuons maintenant en abondance & iouissance de tous biens, nous les quittons & abandonnions, ensemble celle qui nous les a procurez, pour nous en aller quand & toy, en redeuenans hommes derechef, c'est à dire, le plus miserable & le plus calamiteux animal qui soit au monde. V L Y S S E S. Il semble, Gryllus, que ce breuuage-là que te donna Circé, ne t'a pas seulement corrompu la forme du corps, mais aussi le discours de l'entendement, & qu'il t'a remply la ceruelle d'estranges & totalement deprauées opinions, ou il faut dire que le plaisir que tu prens à ce corps, pour le long temps qu'il y a desia que tu y es, t'a enforcé. G R Y L L V S. Ce n'est ny l'un ny l'autre, ô Roy des Cephaliens: mais fil te plaist discourir par raison, plus tost que par iniures, nous t'aurons bien tost

Que les bestes brutes vsent de la raison.

osté de ceste opinion, en te prouuant par viues raisons, pour l'experience que nous E
auons del'vne & de l'autre vie, que à bonne cause nous aimons mieux ceste-cy, que
celle-là. V L Y S S E S. Quant à moy, ie suis tout prest de l'ouyr. G R Y L L V S. Et
moy de le dire. Mais premierement il faut commencer à parler des vertus, pour
lesquelles ie voy que vous vous plaisez merueilleusement, comme voulans dire,
que vous estes beaucoup plus parfaicts & plus excellens en iustice, en prudence, &
en magnanimité, & autres vertus, que ne sont les animaux. Ie te prie donc, hom-
me tres-sage, respons moy, car i'ouy dernièrement que tu racontois à Circé du pays
des Cyclopes, comme la terre y est si bonne & si fertile, que sans estre labouree
ny ensemencee aucunement, elle porte d'elle mesme toute sorte de fruiçts: ie te de-
mande donc, laquelle est ce que tu estimes le plus, celle-là, ou bien celle d'Ithace
montueuse & aspre, qui ne vaut qu'à nourrir des chéures, & qui apres plusieurs fa-
çons & plusieurs trauaux, à grand' peine rend à ceux qui la cultiuent, vn bien peu de
maigres fruiçts, qui ne valent pas la peine que lon y prend, & ne sois pas marry si tu F
es contrainct de respondre contre ce que te fait estimer l'amour que tu portes à ton
païs. V L Y S S E S. Il ne faut point mentir, que j'aime & tiens singulierement cher
mon país & le lieu de ma naissance, mais ie louë & estime encore plus ce país-là.
G R Y L L V S. Or bien nous dirons donc, que le plus sage des hommes est d'auis
qu'il y a des choses qu'il faut louer & priser, & d'autres qu'il faut choisir & aimer: &
croy que tu confesseras, qu'autant en faut-il respondre de l'ame comme de la terre,
que la meilleure est celle qui sans labour rend vn fruiçt croissant de soy-mesme.
V L Y S S E S. Et bien, supposons que cela aussi soit ainsi. G R Y L L V S. Tu con-
fesses donc desia que l'ame des animaux est mieux disposee & plus parfaite pour
produire la vertu, attendu que sans estre poulsee, ny commandee, ny enseignee, qui
est autant comme dire, sans estre labouree, ny ensemencee, elle produit & nourrit la
vertu qui selon nature conuient à vn chascun. V L Y S S E S. Et quelle est la vertu,
Gryllus mon amy, dont les animaux sont capables? G R Y L L V S. Mais plus tost G
deuois-tu demander, de quelle vertu ne sont-ils capables, voire & d'auantage que le
plus sage des hommes. Mais considerons premierement, si tu veux, la vaillance
pour laquelle tu te glorifies & te plais merueilleusement, & ne te caches point de
honte quand lon te surnomme, le vaillant, & le preneur de villes, veu que tu as touf-
iours, malheureux que tu es, plus tost par belles paroles, ruzes & tromperies, affiné
les hommes qui ne sçauoient faire la guerre, que rondement & genereusement: &
qui ne sçauoient que c'estoit de fraude ny de menterie, voulant attribuer à finesse le
nom de vertu, laquelle ne sçait que c'est de fraude ny de tromperie: car tu vois les
combats des animaux, tant contre les hommes, que des vns contre les autres, com-
ment ils sont sans aucune ruze ny artifice, avec vne ouuerte & nue hardiesse, &
comme d'une naïfue magnanimité ils se defendent & reuenchent contre leurs enne-
mis, sans qu'il y ait loy qui les y appelle, ne qu'ils aient peur d'estre en iugement re- H
pris de lascheté ny de coïardise, ains par vn instinct naturel, fuyans de leur propre
volonté l'estre vaincus, ils endurent & resistent iusques à toute extremité, pour se
maintenir inuincibles: car encore qu'ils soient plus foibles de corps, si ne cedent-ils
point pour cela, ny ne se rendent point de cœur, ains aiment mieux mourir en com-
battant: & y en a plusieurs de qui, en mourant, la generosité & le courage se retirant en
quelque partie du corps, & là se recueillant, resiste à celuy qui les tue, & faulte, & se
courrouce encore, iusques à ce que comme vn feu elle vienne à s'estaindre & à s'amor-
tir de tout poinct. De prier son ennemy, ne de luy demander pardon ou con-
fesser d'estre vaincu, il n'en est point de nouuelles: ny ne vit-on iamais que vn lion
fasseruist à vn autre lion, ny vn cheual à vn autre cheual, à faute de cœur, comme
fait vn homme à vn autre homme, se contentant facilement de viure en seruitude,
proche

- A proche parente de coüardise : & quant à ceux que les hommes surprennent par piéges & subtiles inuentions d'engins, ils ont atteint leur aage parfait, ils reiettent toute nourriture, & endurent la soif iusques à telle extremité, qu'ils aiment mieux se donner & procurer la mort, que de viure en seruitude : mais à leurs petits, qui pour leur bas aage sont encore tendres & faciles à plier, & mener comme lon veut, ils leur donnent tant de friandises tromperesses, & tant d'emmiellemens, qu'ils les enforcellent quand ils ont vn petit gousté de ces voluptez là, & de ceste vie delicate qui est contre leur nature: tellement qu'avec le temps ils deuiennent mols & imbecilles, receuans cest abastardissement, qu'ils appellent appriuoisement, qui n'est autre chose qu'une effeminement de courage, & de leur naturelle generosité. Par où il appert que les animaux sont nez & bien disposez de nature pour estre vaillans & hardis, & au contraire, que la hardiesse & franchise de parler est aux hommes contre nature: ce que tu pourras, ô bon Vlysses, cognoistre & comprendre par cest argument-cy, c'est qu'entre les animaux la nature pèse autant d'un costé que d'autre, quant au courage & à la hardiesse, & ne cede point la femelle au masle, soit à supporter les travaux pour le recouurement de viures, soit à combattre pour la defense de ses petits : car tu as bien ouy parler de la Truye Crommyene, combien elle donna d'affaires à Theseus : & la Sphinge qui tenoit en subiection tout le pais qui est à l'entour de la roche de Phycion, rien ne luy eust profité son astuce & sa finesse, de sçauoir bien ourdir des questions ambiguës, & des demandes obscures, si elle n'eust eu beaucoup plus de force & plus de hardiesse que tous les Cadmeïens. Environ ce mesme quartier-là aussi estoit la Regnarde de Telmesse, qui estoit vne fine beste : & dit-on que là aupres estoit aussi la Dragonne, qui combattit teste à teste à l'encontre d'Apollo pour la seigneurie de l'oracle de Delphes. Et vostre Roy Agamemnon prit-il pas la iument Æthé, appartenant à vn habitant Sicyonien, pour le dispenser de n'aller point à la guerre? En quoy il fait sagement, à mon aduis, de preferer vne bonne
- C & courageuse iument à vn homme coüard. Et toy-mesme plusieurs fois as veu des Lyones, & des Leopardes, comme elles ne cedent en rien de force & de hardiesse à leurs masles, non pas comme ta femme Penelopé, laquelle demeure au long d'un foyer assise pres du feu, ce pendant que tu es hors de ta maison à la guerre, sans auoir cœur de faire au moins autant de defense que les Arondelles, à l'encontre de ceux qui la viennent destruire elle & sa maison, mesmement elle qui est Laconienne: que diroit on doncques au pris des Carienes & des Meonienes? Mais de là peut-on inferer & iuger, que la prouesse n'est point es hommes par nature : car si elle leur estoit naturelle, les femmes auroient aussi semblablement quelque partie de hardiesse : & pourtant ie conclus, que vous exercez vne vaillance qui n'est point volontaire ny naïfue ou naturelle, ains contrainte par force des loix, fardee & accoustree de belles paroles, & assubiectie à ie ne sçay quelles opinions, ne sçay quelles mœurs & reprehensions, qui ne vous partent point du cœur, ains viennent de dehors, & soustenez des perils & des travaux, non pour ce que vous les mesprisez, ne pour assurance ne hardiesse qui soit en vous, mais pour crainte d'autres que vous estimez plus grands. Or ne plus ne moins qu'entre tes gens, le premier qui se lève à la besongne saisit la plus legere rame à voguer, non pour ce qu'il la mesprise, mais pour ce qu'il fuit & craint de s'attacher à quelque autre plus pesante: aussi celuy qui endure vn coup de baston de peur de receuoir des coups d'espee, ou qui se met en defense contre vn ennemy de peur d'estre villainement outragé ou tué, il ne se doit pas dire hardy contre cecy, mais coüard contre cela: tellement qu'en vous la vaillance est vne coüardise sage, & la hardiesse vne crainte accompagnée de la science d'eiter vn danger par vn autre. Brieſ, si vous vous estimez plus hardis & plus vaillans que les animaux, pourquoy est-ce que vos poëtes appellent ceux qui combattent vaillamment

Que les bestes brutes vsent de la raison.

contre leurs ennemis, cœurs de lions, ou loups acharnez, & ressemblans au sanglier en E
furie: mais pas vn deux n'a oncques appellé vn lion cœur d'homme, ny vn sanglier res-
semblât à l'homme en furie: & neantmoins encore pense-je que c'est vne façon de parler
excessiue en cōparaison, cōme quand ils appellēt les vistes, pieds-de-vent, ou les beaux,
face-d'Ange: aussi accomparent-ils par excez les bons cōbattans à ceux qui sont en
cela beaucoup plus excellens que les hommes, dont la cause est, pour ce que la cho-
lere est comme la trempe & le fil de la vaillance, & les animaux l'employent toute
pure & simple es combats: là où en vous elle est tousiours meslee avec quelque peu
de discours de raison, comme l'eau dedans le vin: elle s'esuanouit au fort des dangers,
& faut à l'occasion. Et y en a parmy vous aucuns qui sont d'opinion, que es com-
bats on ne doit iamais vser de courroux, ains, mettant toute cholere arriere, se seruir
de la raison toute sobre & rassise: en quoy ie pense bien qu'ils ont raison, quand il est
question d'asseurer son salut: mais où il est besoing de forcer & desfaire l'ennemy, ils
parlent tres-laschement. Car quel propos y a-il de reprendre la nature en ce qu'elle ne F
vous a point attaché d'aiguillons au corps, ny ne vous a point donné de dents pro-
pres à vous reuenger, ny des ongles & serres crochuës, & ce-pendant oster à l'ame,
ou bien luy rebouscher l'arme qui est nee avec elle, & que la nature mesme luy a
donnee? V L Y S S E S. Comment Gryllus, tu as, à ce que ie voy, esté autrefois vn
grand Orateur, veu que encore maintenant, parlant en groin de pourceau, tu as si
vaillamment argué & disputé sur le subiect proposé: mais que n'as-tu aussi tout d'un
train discouru de la temperance? G R Y L L V S. Pourautant que i'estimois que tu
voulusses premierement réfuter ce que i'auois desia dit, mais ie voy bien que tu de-
sires ouïr parler de la temperance, d'autant que tu es mary d'une très-chaste femme, &
que toy-mesme penses auoir monsté vne grande preuue de chasteté & de conti-
nence, d'autant que tu as mesprisé l'amour de Circé: mais en cela tu n'es rien plus
parfaict en continence que l'un des animaux: car eux mesmes n'appetent non plus
de se conioindre à plus excellente espece que la leur, ains prennent leurs plaisirs, & G
font leurs amours avec ceux qui sont de leur mesme espece: & pourtant n'est-il pas
de merueille, si comme le bouc de Mendes en Ægypte, encore que l'on l'enferme
avec plusieurs belles femmes, ne prend point enuie pour cela de se mesler avec elles,
ains plus tost enrage apres les chèvres: aussi toy prenant plaisir à ton amour ordi-
naire, ne veux pas, estant homme, coucher avec vne Deesse. Et quant à la chasteté &
continence de Penelopé, il y a dix mille Corneilles, qui avec leur crailllement se moc-
queroient d'elle, & monsteroient que ce n'est pas chose dont on deust faire compte:
car chascune d'elles, si son masse vient à mourir, ne demeure pas vefue sans retour-
ner à l'apparier pour vn peu de temps, ains par neuf aages entiers d'hommes, de ma-
niere qu'il s'en faut neuf fois que tabelle Penelopé ne merite autant d'honneur de
continence, que la moindre Corneille qui soit au monde. Mais puis que tu dis que
ie suis grand Orateur, ie veux obseruer vn ordre scientifique en mon discours, en sup- H
posant premierement la definition de temperance, & diuisant par espece les cupidite-
tez. La temperance doncques est vn retranchement & vn reglement des cupiditez,
à sçauoir retranchement des estrangeres, & des superfluës, c'est à dire, non necessai-
res: & vn reglemēt qui par election de temps, & temperature de moyen, regit les natu-
relles & necessaires. Car entre les cupiditez vous y voyez beaucoup de differences,
comme celle du boire, outre ce qu'elle est naturelle, il est certain qu'elle est aussi ne-
cessaire: & celle de l'amour, encore que nature en donne le commencement, si est-ce
que lon peut bien commodémēt viure en s'en passant, & pource doit-elle estre appel-
lee naturelle, mais non pas necessaire. Il y a vn autre genre de cupiditez, qui ne sont ny
naturelles ny necessaires, ains coulees de dehors par vne ignorāce du bien, par vne vai-
ne opinion: & celles-là sont en si grand nombre, qu'elles chassent presque toutes les
naturelles

A naturelles, ne plus ne moins que si en vne cité il y auoit si grand nombre d'estrangers, qu'ils forceassent les naturels habitans. Là où les animaux ne donnans entree aucune, ny communication quelconque aux estrangeres affections en leurs ames, & en toute leur vie, & toutes leurs actions estans fort esloignées de toute vanité de gloire, & d'opinion, comme de la mer: vray est qu'ils ne se tiennent pas si proprement, ne si curieusement que font les hommes, mais au demourant, quant à la temperance, & quant à estre mieux reglez en leurs cupiditez, qui ne sont ny en grand nombre, ny peregrines & foraines, ils l'observent beaucoup plus exactement & plus diligemment. Qu'il ne soit ainsi, il a iadis esté vn temps que ie n'estois pas moins espris & eslourdy de la cupidité de posseder de l'or que tu es maintenant, estimant qu'il n'y eust bien ny possession au monde qui fust comparable à celle-là: autant m'auoit aussi espris l'argent & l'yuoire, & celui qui plus en possedoit, me sembloit estre plus heureux & plus auant en la grace des Dieux, soit qu'il fust Phrygien ou Carien, &

B plus vilain que Dolon, ou plus infortuné que Priam: tellement qu'estant tousiours attaché & suspendu à ces cupiditez-là, ie ne receuois plaisir ne contentement aucun de tous autres biens, dont i'estois assez suffisamment prouueu, comme si i'eusse esté delaisné necessiteux & indigent des autres qui sont les plus grands: car il me souuient que t'ayant vne fois veu en Candie accoustré magnifiquement d'une belle robe, ie ne souhaitay point ta prudence, ny ta vertu, ains la beauté de ton saye, qui estoit fort delicatement tissu & subtilement ouuré: & ton manteau d'escarlade, qui estoit si proprement plissé, i'estois rauy & esblouy de le voir si beau: la boucle mesme, qui estoit d'or, auoit ie ne sçay quoy de singulier, & estoit, ce croy-ie, quelque excellent sculpteur qui auoit pris plaisir à la grauer: i'allois apres toy pour le veoir, aussi enchanté comme les femmes qui sont amoureuses: mais maintenant estant deluré de toutes ces vaines opinions-là, & en ayant le cerueau purgé, ie passe par dessus l'or & l'argent, sans en faire compte non plus que d'autres pierres: & quand à vos beaux

C habillemens, & vos draps de broderie & de tapisserie, i'en fais si peu d'estime, que i'aimerois mieux vne profonde fange & molle à me veautrer à mon aise, pour dormir quand ie suis saoul: & n'y a pas vne de ces cupiditez-là, & appetits extraordinaires venus de dehors, qui ait place en nos ames, ains pour la plus part nostre vie se passe avec les cupiditez & voluptez necessaires: & quant à celles qui sont bien naturelles, mais non pourtant necessaires, nous n'en vsons ny desordonnement, ny insatiablement: & discourons de celles-là premierement. Quant est doncques à la volupté qui procede du sentiment des choses bien odorantes, & qui par le fleur qu'elles rendent émeuent le sentiment, outre le plaisir qu'elle nous apporte, sans qu'il nous couste rien: encore apporte-elle quant-&-quant vne vtilité, pour sçauoir discerner nostre nourriture: car la langue est bien iuge, comme lon le dit, de la faueur douce, aspre ou aigre, quand les ius viennent à se mesler & confondre par-

D my la faculté de discerner, mais nostre odorement deuant que venir à gouter les ius & faueurs, est iuge de la force & qualité de chascune chose, & les sent beaucoup plus exquisement, que tous ceux qui font les essays deuant les Princes, & les Roys, & ce qui nous est propre le reçoit au dedans: ce qui est nous est estrange le reiette au dehors, & ne le nous laisse pas seulement toucher, ny contrister & offenser nostre sentiment, ains accuse & condamne la mauuaise qualité deuant qu'elle nous porte aucun dommage. Au demourant elle ne nous donne facherie quelconque, comme elle fait à vous, en vous contraignant de mesler ensemble pour faire des parfums, de la cinnamome, de l'aspic, de la lauande, de la canelle, & certaines fueilles & cannes d'Arabie, & les incorporer les vns avec les autres, par vne exquisite science & subtilité d'apothicaierie ou de parfumerie, forçant des drogues de nature toute diuerse de se brouiller & se mesler ensemble, en achetant de

Que les bestes brutes vsent de la raison.

grosse somme de deniers vne volupté qui ne sent point son homme, ains plus tost sa E
fille, & qui est totalement inutile: mais quoy qu'elle soit telle, si est-ce qu'elle a cor-
rompu & gasté non seulement toutes les femmes, mais aussi la plus part des hom-
mes, tellement qu'ils ne veulent pas habiter avec leurs propres femmes mesmes, si-
non qu'elles soient parfumees de toutes bonnes odeurs & senteurs, quand elles vien-
nent pour coucher avec eux. Au contraire, les layes attirent leurs sangliers, & les ché-
ures leurs boucs, & les autres femelles leurs masles, avec leurs propres odeurs, sen-
tans la rosee pure & nette des prez, & la verdure des champs, & se ioignent ense-
mble pour engendrer, avec vne caresse & volupté commune & reciproque, sans que
les femelles facent les mignardes affectees, ne qu'elles desguisent ou couurent l'enuie
qu'elles en ont, de tromperies ou de forcelleries, ou de refus: & semblablement les
masles y viennent aussi, poussez de la fureur d'amour & de l'ardeur d'engendrer,
sans acheter à pris d'argent, ny à grand peine & trauail, & longue subiection & ser-
uitude, l'acte de generation, ains l'exerceans sans fallace ne fainctise, sans l'acheter, F
en temps & saison, lors que la nature à la prime-verre excite & boute hors la concu-
piscence generatiue des animaux, ne plus ne moins qu'elle fait la sene & les boutons
des arbres, & puis l'estaint incontinent: car ny la femelle depuis qu'elle est pleine,
ne cherche plus le masle, ny le masle ne la pourchasse plus, tant est la volupté parmy
nous de peu de pris & de recommandation, se referant le tout à la nature: d'où vient
que iusqu'icy il ne s'est point trouué, que la concupiscence les ait tant transportees,
que ny les masles se soient iamais ioincts avec les masles, ny les femelles avec les fe-
melles: là où entre vous il y en a assez d'exemples, & des plus grands & plus vaillans
hommes, car ie laisse là les petits qui ne valent pas qu'on en parle: mais Agamem-
non courut toute la Bœoe, chassant Argynnus qui le fuyoit par tout: & ce pen-
dant il pretendoit vne faulxe excuse de son seiour, que la mer en estoit cause, & les
vents contraires: à la fin le beau Sire se baigna gentilment dedans le lac Copaïde,
comme pour là estaindre l'ardeur de son amour, & se deliurer de celle concupiscen- G
ce. Et semblablement Hercules poursuyuant vn sien familier qui n'auoit poil de
barbe, demoura apres les preux qui entreprirent le voyage de la toison d'or, & faillit
à s'embarquer quand & cux: & contre les parois du temple de Iupiter Ptoien il y a
quelqu'un des vostres qui a escrit secrettement, Achilles le beau, combien que Achil-
les eut desia vn fils, & i'entens que ces lettres y sont demourees escriptes iusques
aujourd'huy. S'il y a vn coq qui monte sur vn autre coq, n'ayant point de poules
aupres de luy, on le brulle tout vif, par ce qu'il y aura vn deuin ou quelque pro-
nostiqueur qui viendra dire, que cela est vn grand & mal-heureux prodige. Voyla
comment les hommes mesmes sont contraincts de confesser, que les bestes se con-
tiennent mieux qu'ils ne font eux, & que pour satisfaire à leurs appetits ils ne vio-
lentent iamais la nature. Là où en vous la nature, encore qu'elle ait la loy à son
aide, ne peut contenir vostre intemperance dedans les limites de la raison, ains H
comme si c'estoit vn torrent qui l'emportast à force, elle faict bien souuent, & en
plusieurs lieux, de grands outrages, de grands desordres & scandales contre la natu-
re, en matiere de celle volupté de l'amour: car il y a eu des hommes qui ont aimé des
chéures, & des truyes, & des iuments: & des femmes aussi ont esté furieusement
esprises de l'amour d'animaux masles: car de telles nopces nous sont venus les Mi-
notaures, les Ægipans, & comme ie pense, les Sphinx mesmes & les Centaures ont
iadis esté produits de là. Il est bien vray que quelquefois par la necessité de la famine,
il s'est trouué qu'un chien aura mangé d'un homme, & vn oyseau semblablement
en aura tasté, mais il ne se trouua iamais qu'un animal eust appeté de se ioinde
pour engendrer, à un homme, ny à vne femme, là où les hommes, & en cela & en
plusieurs autres appetits, ont souuent forcé & outragé les bestes. Et fils sont ainsi
desordonnez

- A desordonnez & incontinents en ces voluptez là, encore se treuvent-ils beaucoup plus imparfaicts & plus dissolus que les bestes és autres appetits & voluptez necessaires, i'entens du boire & du manger, dont nous ne prenons iamais le plaisir que ce ne soit avec quelque vtilité: mais vous cerchans plus-tost la volupté au boire & manger, que non pas ce qui est necessaire pour la nourriture selon nature, en estes punis puis apres par plusieurs griefues & longues maladies, lesquelles procedantes d'une source, qui est la repletion, remplissent vos corps de toutes sortes de vents, qui sont puis apres bien fort mal-aisez à purger. Car premierement à chasque genre de beste, il y a chasque sorte de nourriture qui luy est propre: aux vnes, l'herbe: aux autres, les racines: aux autres, les fruiçts: & celles qui vivent de chair, ne touchent iamais à autre sorte de pasture, ny ne vont point oster aux plus infirmes & plus debiles leur nourriture, ains les en laissent paistre, comme nous voyons que le lion laisse paistre le cerf, & le loup la brebis, selon leur naturel: mais l'homme estant par son appetit desordonné de voluptez, & par sa gloutonnie tiré à toutes choses, tastant & essayant de tout, comme ne sçachant encore quelle est sa propre & naturelle pasture, il est seul de toutes les creatures viuantes qui mange de tout. Et premierement il se paist de chair, sans qu'il en soit aucun besoing ny aucune necessité, attendu qu'il peult en la saison cueillir, vendenger, moissonner, des plantes, des vignes, & des semences, de toutes sortes de fruiçts les vns sur les autres, iusques à s'en lasser pour la grande quantité: & neantmoins par delices & par chercher ses appetits, après estre trop saoul, il va encore chercher des autres viures, qui ne luy sont ny necessaires, ny propres, ny nets & mundes, en tuant les bestes beaucoup plus cruellement que ne font les plus sauvages animaux de rapine. Car le sang, le meurtre, la chair est propre pasture pour vn milan, vn loup & vn dragon, mais à l'homme c'est sa friandise. Il y a d'auantage: car vsant de toutes sortes de bestes, ils ne font pas comme les animaux de proye qui s'abstiennent de la plus part, & font la guerre à vn petit nombre pour la necessité de se paistre: mais il n'y a ny oyseau en l'air, ny poisson en l'eau, en maniere de parler, ny beste sur la terre, qui eschappe d'estre porté sur vos belles tables que vous appelez amiables & hospitalies. Mais vous me direz, que cela est comme vne faulx de vostre nourriture: soit ainsi, mais quel besoing doncques estoit-il par curiosité de friandise inuenter encore & vser d'autres faulxes pour les manger? La prudence des bestes est bien autre, car elle ne donne lieu à art quelconque qui soit inutile né vain, & encore celles qui sont necessaires, ne leur viennent point de dehors, ny ne leur sont point enseignées par des maistres mercenaires pour vn pris d'argent, ny ne fault point que l'exercitation vienne à coller & attacher maigrement vne proposition avec l'autre, ains tout à vn coup d'elle mesme la nature les produit comme naturelles & nees avec elles. Lon dit que tous les Ægyptiens sont medecins, mais vn chascun des animaux, non seulement a en soy l'art & science de se medeciner soy-mesme quand il est malade, mais aussi de se nourrir & de se defendre, de combattre, & de chasser, & se contregarder: & de la musique mesme, chacun en a autant qu'il luy en fait besoing selon son naturel: car de qui est-ce que nous auons appris quand nous nous trouuons indisposés, à aller aux riuieres chercher des cancrez? Qui est-ce qui a enseigné la tortuë quand elle a mangé d'une vipere, d'aller manger apres de l'herbe du chat, de l'origane? Qui a monstré aux chéures de Candie, quand elles ont receu des coups de traiçt dedans le corps, d'aller chercher l'herbe du Diçtame, laquelle leur fait sortir les fleches quand elles en ont mangé? Car si tu dis, comme il est vray, que c'est la nature qui leur enseigne tout cela, tu referes la prudence des animaux à la plus sage & plus parfaite cause & principe qui soit: laquelle si vous ne voulez appeller raison ny prudence, il faut donc que vous regardiez à luy trouuer vn nom qui soit plus beau & plus honorable: comme, à dire vray, par effects elle monstre sa

Que les bestes brutes vsent de la raison.

puissance plus grande & plus admirable, n'estant ny ignorante ny mal-apprise, mais E
aiant plustost appris d'elle mesme, non par imbecillité ou foiblesse de la nature, ains
au contraire pour la force & perfection de la vertu naturelle, laissant-là & ne faisant
compte d'une prudence mendiee & empruntée d'ailleurs par apprentissage. Et neant-
moins tout ce que les hommes par delices, en passant leur temps, & en ioüant, leur
veulent faire apprendre & y exercer leur entendement, encore que ce soit contre la
naturelle disposition de leur corps, tant ils ont l'esprit grand, en viennent à bout de
l'apprendre. Je laisse à dire comme les chiens suyuent les bestes à la trace, comme les
poulains marchent à pas mesurez, que les corbeaux parlent, que des chiens saultent
à trauers des cercles tournans: mais des cheuaux & des bœufs par les theatres, que
nous voyons se coucher, danser, se tenir debout, si estrangement que les hommes
mesmes auroient fort affaire à en faire autant, & neantmoins eux le font apres qu'on
leur a enseigné, & le retiennent, pour monstrier seulement qu'ils sont dociles à appren-
dre tout ce que lon voudroit, car à autre chose ne sçauroit seruir tout cela. Et si d'ad- F
venture tu es difficile à croire que nous apprenons les arts, ie te diray d'auantage, que
nous les enseignons: comme les perdrix enseignent leurs petits, pour eschapper, à se
renuerfer dessus le dos, & mettre au deuant d'eulx avec leurs pieds vne motte de terre
pour se cacher dessous: & les cicoignes sur les toicts des maisons, ne voyons nous pas
ordinairement comme celles qui sont ia toutes grandes, monstrent aux petits com-
ment il faut voler? & semblablement les rossignols enseignent à leurs petits à chan-
ter, de maniere que ceux que lon prend dedans le nid, & qui sont nourris entre les
mains des hōmes, n'en chantent puis apres pas si bien, pource que lon les a ostez, auant
qu'il en fust temps, de l'eschole, hors de dessous le maistre. Brieu depuis que ie suis
descendu dedans ce corps, ie me suis grandement esmerueillé de ces propos & dis-
cours des Sophistes, qui maintiennent & enseignent que tous animaux, excepté
l'homme, n'ont point de discours de raison ny d'entendement. V L Y S S E S. De for-
te que tu es bien changé donc maintenant, & nous monstres par viues raisons, que G
vne brebis est raisonnable, & vn asne a de l'entendement. G R Y L L V S. Ouy certes
Vlysses, par ces arguments-là tu peux bien colliger, que la nature des bestes n'est pas
du tout priuée de discours de raison ny d'entendement, ne plus ne moins qu'entre les
arbres il n'y en a point qui soient plus ou moins animez que les autres d'ame sensi-
tiue, ains tous également sont priuez du sentiment, & n'y en pas vn entre eux qui
l'ait: aussi entre les animaux il ne s'en trouueroit pas vn plus tardif à faire choses d'en-
tendement ny plus indocile que l'autre, si tous n'estoient participans du discours de
la raison, mais l'un plus que l'autre. Et si il y a de rudes bestes & lourdes, pense que
les fineses & ruzes des autres les recompensent: comme si tu viens à comparer le re-
gnard, le loup, ou les abeilles, avec la brebis & l'asne, c'est tout autant que si tu confe-
rois Polyphemus avec toy, ou Homere le Corinthien avec ton grand pere Autoly-
cus: car ie ne pense pas qu'il y ait si grande distance de beste à beste, comme il y a H
grand interualle d'homme à homme en matiere de prudence, de discours de rai-
son, & de memoire. V L Y S S E S. Mais prens garde, Gryllus, qu'il ne soit bien estran-
ge, & que ce ne soit forcer toute verisimilitude, de vouloir conceder l'usage de raison
à ceux qui n'ont aucune intelligence ne pensement de Dieu. G R Y L L V S. Et puis
nous ne dirons pas que tu sois de la race de Sisyphus, Vlysses, veu que tu es si sage
& si agu?

S'il est

A

S'il est loisible de manger chair.

TRAITTE PREMIER.

Ce sont lambeaux de Declamations qu'il auoit escriptes ieune pour son exercice, mais tout y est corrompu & imparfaict.

B



T P V I S tu me demandes pour quelle raison Pythagoras. fabstenoit de manger de la chair, mais au contraire ie m'esmerueille moy, quelle affection, quel courage, ou quelle raison eut oncques l'homme, qui le premier approcha de sa bouche vne chair meurtrie, qui oza toucher de ses léures la chair d'une beste morte, & comment il feit seruir à sa table des corps morts, & par maniere de dire des idoles, & faire viande & nourriture des membres qui peu deuant besloient, mugissoient, marchoient, & voyoient. Comment peurent ses yeux souffrir de voir vn massacre? de voir tuer, escorcher, demembrer vne pauvre beste? comment en peut son odorement supporter la senteur? comment est-ce que son goust ne fut degousté par horreur, quand il vint à manier l'ordure des bleceures, quand il vint à recevoir le sang & le ius sortant des playes mortelles d'autrui?

Les peaux rampoient sur la terre escorchees,

Les chairs aussi mugissoient embrochees,

Cuittes autant que crues, & estoit

Semblable aux bœufs la voix qui en sortoit.

Odys. l. 12.

C'est vne fiction poétique & vne fable que cela: mais cecy certainement fut vn souper estrange & monstrueux, auoir faim de manger des bestes qui mugissoient encore, enseigner à se nourrir des animaux qui viuoient & crioient encore, ordonner comment il les falloir accoustrer, bouillir ou rostir, & les presenter sur la table. C'estoit celuy-là qui commença le premier qui s'en deuoit enquerir, non celuy qui cessa bien tard le dernier: ou bien on pourroit dire que ces premiers là, qui commencerent à manger de la chair, eurent toutes causes de ce faire pour leur disette & necessité: car ce ne fut point par appetits desordonnez qu'ils eussent pris de longue main, ny par trop d'abondance des choses necessaires, qu'ils fussent venus à ceste insolente friandise de conuoiter des voluptez estranges & contraires à la nature: ains pourroient ils dire, si ils recouuroient sentiment & parole maintenant, O que vous estes heureux & bien-aimez des Dieux vous qui vivez maintenant! En quel siecle vous estes nez! Quelle affluence de toutes sortes de biens vous iouissez! Combien de fruidts vous

D produit la terre, combien vous en vendengez, combien de richesses vous apportent les champs, combien les arbres & plantes vous fournissent de voluptez, que vous pouuez cueillir quand bon vous semble! Vous pouuez viure en toutes delices, sans vous souiller les mains, là où nostre naissance est cheute en la plus dure & plus redoutable partie de la vie humaine, & de l'aage du monde, estant force que nous encourussions, pour la recente creation du monde, en grande & estroite indigence de plusieurs choses necessaires. La face du ciel estoit encore couuerte de l'air, les estoilles estoient meslees parmy l'humeur trouble & instable, & avec le feu & les orages des vents. Le Soleil n'estoit point encore bien estably, aiant vn cours arresté certain & assuré,

De l'Orient iusques en Occident,

Ains retournoit en arriere euidant,

Z iijj

S'il est loisible de manger chair,

Par les saisons en contraire changees,
De fleurs & fruiçts, & de feuilles chargees.

E

La terre estoit outragee par les courbes des riuieres qui n'auoient ne fond ne riue, la plus part en estoit gastee par des lacs & des profonds marefcages, l'autre estoit sau- uage pour estre couuerte de bois & de forests steriles: la terre ne produisoit nuls bons fruiçts, & n'y auoit encore instrumens quelconques pour la labourer, ny au- cune inuention de bon esprit: la faim ne nous laschoit iamais, & n'attendoit-on point par chascun an que la saison des semailles fust venuë pour semer, car on ne se- moit rien. Ce n'est doncques pas merueille, si nous mangeasmes de la chair des bestes contre la nature, veu que lors on mangeoit & la mousse & l'escorce des arbres, & estoit vne heureuse récontre, quand on pouuoit recouurer de la racine verte de chien- dent ou de bruyere: & quand les hommes auoient peu trouuer du gland ou de la fouyne, ils en dansoient de ioye à l'entour d'un chesne ou d'un fousteau, au son de quelque chanson rustique, en laquelle ils appelloient la Terre leur mere, leur nour- F rice qui leur donnoit à viure, & n'y auoit lors en toute la vie des hommes feste quel- conque, que celle-là: tout le reste de la vie humaine n'estoit que douleur, mesaise & tristesse. Mais maintenant quelle rage ne quelle fureur vous incite à commettre tant de massacres, veu que vous auez à cœur saoul tant grande affluence de toutes choses necessaires pour vostre vie? pourquoy mentez vous ingratement à l'encontre de la terre, comme si elle ne vous pouuoit nourrir? pourquoy pechez vous irreligieuse- ment à l'encontre de Ceres inuentrice des sainctes loix, & faiçtes honte au doux & gracieux Bacchus, comme si ces deux deitez-là ne vous donnoient pas suffisamment assez de quoy viure? N'avez vous point de honte de mesler à vos tables les fruiçts doux avec le meurtre & le sang? Et puis vous appelez les lions & les leopards, be- stes sauuages, & ce-pendant vous espanchez le sang, ne leur cedans de cruauté en rien: car ce que meurtrissent les autres animaux, c'est pour la necessité de leur pasture: mais vous, c'est par delices que vous le faictes, par ce que nous ne mangeons pas les G lions ny les loups, apres les auoir tuez en nous defendant contre eux, ains les laissons là: mais celles qui sont innocentes, douces & priuees, qui n'ont ny dent pour mor- dre, ny aiguillon, ce sont celles que nous prenons & tuons, combien qu'il semble que la nature les ait creées seulement pour beauté & pour plaisir. * Ne plus ne moins que si quelqu'un voyant le Nil desbordé, emplissant tout le pais à l'enuiron d'une eau cou- rante, feconde & generatiue, ne louoit pas, avec admiration, la propriété de celle riuere qui fait naistre & croistre tant de beaux & bons fruiçts, & si necessaires à la vie de l'homme: mais pour y voir, ou un Crocodile nageant, ou un Aspic rem- pant, ou des mousches malignes, bestes mal-faisantes & mauuaises, il le blasmoit pour ceste occasion: ou bien si voyant ceste terre & ceste campagne couuerte de bons & beaux fruiçts, & chargee d'espics de bled, parmy ces beaux bleds apperceuoit quelque espi d'yuraye & de la tigne, il laissoit à recueillir & ferrer ces belles mois- H sons, & se plaignoit. Tout ainsi est-il quand on voit le plaidoyer d'un Orateur en quelque cause & procez, qui avec un torrent d'eloquence plein & vehement, tend à sauuer un criminel du danger de sa vie, ou bien à prouuer & verifier des impu- tations & charges de quelques crimes: ce torrent dis-ie d'eloquence courant non simplement & nuëment, ains avec plusieurs affections de toutes sortes, qu'il im- prime és cœurs & esprits de plusieurs auditeurs ou iuges, lesquels il fault tourner & changer en diuerfes sortes, ou bien les adoucir & appaiser, & puis laissant à bien regarder, peser & considerer le poinçt & subiect principal de la cause, il s'amusoit à recueillir quelques fleurs de Rhetorique, que le flux de l'oraison de l'Aduocat de- coulant a amené avec la vehemence de son cours. * Mais rien ne nous émeut, ny la belle couleur, ny la douceur de la voix accordee, ny la subtilité de l'esprit, ny la netteté

Ces paroles, depuis la premiere es- toile inf- ques à la se- conde, n'ap- partiennent point au sub- iect dont il est question, & ont esté de quelque autre liure icy temerai- rement en- treiectées.

A netteté du viure, ny la viuacité du sens & entendement des malheureux animaux, ains pour vn peu de chair nous leur oſtons la vie, le Soleil, la lumiere, & le cours du viure qui leur eſtoit prefix par la nature : & puis nous pensons que les voix qu'ils iettent de peur, ne ſoient point articulees, & qu'elles ne ſignifient rien, là où ce ſont prieres, » ſupplications & iuſtifications de chaſcune de ces pauvres beſtes qui crient : Si tu » es contrainct par neceſſité, ie ne te ſupplie point de me ſauuer la vie, mais bien ſi c'eſt » par deſordonnee volonté : ſi c'eſt pour manger, tue moy : ſi c'eſt pour friandement » manger, ne me tue point. O la grande cruauté ! C'eſt horreur de voir ſeulement la table des riches hommes ſeruiſſe & couuerte par cuiſiniers & ſaulſiers qui habillent des corps morts : mais encore plus d'horreur y a-il à la voir deſſeruir, par ce que le relief de ce que lon emporte, eſt plus que ce que lon a mangé : pour neant doncques ces pauvres beſtes-là ont eſté tuees. Il y en a d'autres qui eſpagnans les viandes ſeruiſſes à table, ne veulent pas que lon en trenche, ne que lon en coupe, les eſpagnans quand B elles ne ſont plus que chairs, là où ils ne les ont pas eſpagnées quand elles eſtoient encores beſtes viuantes. Mais pour ce qu'il y en a qui tiennent qu'ils ont la nature pour cauſe & origine premiere de manger chair, prouuons leur que cela ne peut eſtre ſelon la nature de l'homme. Premièrement cela ne ſe peut monſtrer par la naturelle compoſition du corps humain : car il ne reſſemble à nul des animaux que la nature a faiſts pour ſe paître de chair, veu qu'il n'any vn bec crochu, ny des ongles pointues, ny les dents aigues, ny l'eſtomac ſi fort, ny les eſprits ſi chauds, qu'ils puiſſent cuyre & digerer la maſſe peſante de la chair crüe : & quand il n'y auroit autre choſe, la nature meſme à l'egalité platte des dents vnies, à la petite bouche, à la langue molle & douce, & à l'imbecillité de la chaleur naturelle, & des eſprits ſeruiſſans à la concoction, monſtre elle meſme qu'elle n'approuue point à l'homme l'vſage de manger chair. Que ſi tu te veulx obſtiner à ſouſtenir que nature l'a faiſt pour manger telle viande, tout premier tue la doncques toy meſme, ie diſ toy meſme ſans vſer C ny de coupperet, ny de couſteau, ny de coignée, ains comme les loups, & les ours, & les lions à la meſure qu'ils mangent, tuent la beſte, auſſi toy tue moy vn bœuf à force de le mordre à belles dents, ou de la bouche vn ſanglier, deſchire moy vn aigneau ou vn lièvre à belles griffes, & le mange encore tout viſ, ainſi comme ces beſtes-là font : mais ſi tu attens qu'elles ſoient mortes pour en manger, & as honte de chaſſer à belles dents l'ame preſente de la chair que tu manges pourquoy dōcques manges tu ce qui a ame ? mais encore qu'elle fuſt priuée d'ame & toute morte, il n'y a perſonne qui euſt le cœur d'en manger telle qu'elle ſeroit, ains la font bouillir, ils la rotifſent, ils la transforment avec le feu & pluſieurs drogues, alterans, deſguiſans, & eſteignant l'horreur du meurtre, à fin que le ſentiment du gouſt trompé & deceu par tels deſguiſemens, ne reſuſe point ce qui luy eſt eſtrange. Et certes le Laconien iadis reſpondit gentilement, qui ayant acheté en vne tauerne vn poiſſon, le bailla au tauer D niſtier pour le luy accouſtrer : & comme le tauer niſtier luy demandaſt du vinaigre, du » fromage & de l'huile, pour ce faire : Si i'euffe, dit-il, eu ce que tu me demandes, ie » n'euffe point acheté de poiſſon. Mais nous nous mignardons tant delicatement en ceſte horreur de meurtrir, que nous appellons la chair viande, & auons beſoyn d'autres viandes pour accouſtrer la chair, meſlans avec du vin, de l'huile, du miel, de la gelee, du vinaigre, enſeueliſſans à vray dire vn corps mort avec des ſaulſes Syriaques & Arabiques : & les chairs eſtans ainſi mortifiées, attendries, & par maniere de dire, pourries, noſtre chaleur naturelle a beaucoup d'affaire à la cuyre, & ne la pouuant cuyre & digerer, elle nous engendre de bien dangereuſes peſanteurs, & des cruditez qui nous amenant des griefues maladies. Diogenes fut ſi temeraire, qu'il oſa bien manger vn Poulpe tout crud, à fin d'oſter l'vſage d'appareiller telles viandes avec le feu : & y ayant aupres & autour de luy pluſieurs preſbtres & autres hommes,

S'il est loisible de manger chair,

„ il affubla sa teste de sa cappe, & meit en sa bouche la chair de ce Poulpe, disant, Je E
fais icy vn essay perilleux, & me mets en danger pour vous. Vrayement c'estoit vn
beau & louable danger: car il ne se hazardoit point comme Pelopidas pour le recou-
urement de la liberte de Thebes, ny comme Harmodius & Aristogiton pour celle
d'Athenes, ce beau Philosophe-là combattant de l'estomac avec vn Poulpe, pour
rendre la vie humaine plus bestiale & plus sauvage. Le manger chair doncques non
seulement est contre la nature aux corps, mais aussi par fatieté & par repletion il gros-
sit & espessit les ames. Car l'usage du vin & de la chair à boire & manger à cœur saoul,
rend bien le corps plus fort & plus robuste, mais l'ame plus foible: & de peur que ie
ne me rende ennemy de ceux qui font profession des exercices du corps que lon
nomme Athletes, i'vseray d'exemples de nostre pais mesme: car ceux de l'Attique
nous appellent, nous autres qui sommes du pais de la Bœoece, grossiers, lourdaux
& fots, principalement à cause que nous mangeons beaucoup, comme Menander
dit en vn passage, F

Ces gens qui ont les deux iouës enflées. Et Pindare,

Fais par vraye preuue cognoistre,

„ si nous euitons l'ancien reproche, Porc Bœotien. Lueur seiche, ame tressage, ce di-
soit Heraclitus. Et puis les tonneaux vuydes resonnent quand on les frappe, mais
quand ils sont pleins, ils ne respondent point aux coups qu'on leur baille. Les vases
de cuyure qui sont tenues & deliez, rédent vn son tout à l'environ quand on les frap-
pe, iusques à ce que lon vienne à boucher & estoupper la bouche avec la main. L'œil
rempli d'humidité superflue, s'obscurcit, & diminue beaucoup de sa force à faire
son office. Quand nous regardons le Soleil à trauers vn air humide, & à trauers
des grosses vapeurs indigestes, nous ne le voyons point pur, ny clair, ains tout ter-
ny de lumiere, & comme plongé au fond d'une nuë: aussi à trauers vn corps tout
brouillé, saoul, & aggraué de nourriture & de viandes estranges, & qui ne luy sont
point naturelles, il est force forcee, que la lueur & la clarté de l'ame vienne à se ter- G
nir, à se troubler & esbloüir, n'ayant plus la lumiere, ny la force de pouuoir pene-
trer iusques à contempler les fins des choses qui sont subtiles, menuës & difficiles
à discerner. Mais outre tout cela, ne vous semble-il pas que ce soit chose singulier-
ement recommandable, que de s'accoustumer à l'humanité? Car qui seroit celuy qui
feroit iamais tort ny outrage à vn homme, quand il seroit si doucement & si humain-
ement affectionné enuers les bestes, qui n'ont aucune communication d'espece ny
de raison avec nous? l'alleguay il y a trois iours, en deuisant, ce qu'escriit Xenocrates,
que les Atheniens condamnerent en l'amende celuy qui auoit escorché vn mouton
tout vif: & il me semble que celuy qui gehenne & tourmente vn viuant, n'est pas
pire que celuy qui luy oste la vie, & le fait mourir: mais à ce que ie voy, nous ressen-
tons plus ce qui est contre la coustume, que ce qui est contre la nature. Mais tou-
tes ces raisons que ie deduisis lors, sont à l'aduenture vn peu bien grossieres & vul- H
gaires: car ie crains de remuer en mes propos, & toucher à la grande & pleine de
haüts secrets cause & origine de ceste sentence, Qu'il ne faut point manger de
chair: pour ce qu'elle est incroyable & mal-aisée à persuader aux hommes couïards
& timides, ainsi que dit Platon, & qui ne sentent rien que terrestre & mortel: ne
plus ne moins que le pilote craint & doute de commettre sa nauire à la mer en tour-
mente, & le poëte de dresser vne machine en vn theatre qui tourne toute la scene:

*Ce sont des
vers d'Em-
pedocles, où
il parle de
la transani-
mation.*

toutefois si vault-il mieux à la fin toucher, voire crier tout hault en cest endroit,
les vers d'Empedocles: * car sous paroles couuertes il nous donne à en-
tendre, que les ames sont attachees à des corps mortels par punition de ce qu'elles
ont esté meurtrieres, qu'elles ont mangé de la chair & deuoré l'une l'autre, combien
que ceste sentéce & opinion soit encore bien plus ancienne que non pas Empedocles:

car

A car ce que les poëtes faignent du démembrément de Bacchus, & des outrageux attentats des Titans à l'encontre de luy, & les punitions d'iceux, & commēt ils furent foudroyez, c'est vne fable, dont le sens caché & retiré tend à mōstrer la resurrection: car la partie qui est en nous brutale, priuee de raison, violente & desordonnee, non diuine, mais demonique, les anciens l'ont appelée les Titans, & c'est ce qui est puny, & dont la iustice est faite.

Du manger chair, Traitté second.



B A R A I S O N veut que nous soyons frais & dispos, & de volōté & de pensee, à ouyr discourir à l'encontre de ceste rance & moisie coustume de manger chair: car il est bien malaisé, comme disoit Caton, de prescher vn ventre qui n'a point d'aureilles, & puis nous auons tous beu le breuage de la coustume, qui ressemble à celuy de Circé,
 Meslant douleur, regret, & fascherie,
 Auecques dol, abus, & tromperie.
 & n'est pas facile de reuomir l'hameçon de l'appetit de manger chair, depuis que lon en a les entrailles percees, & que lon est esblouy & transporté de l'amour de volupté: & voudroit le deuoir, que comme les Ægyptiens quand vn homme est trespasé en ostent le vêtre & les entrailles, qu'ils deschirent & decouppent au Soleil, & puis les iettent, comme estans cause de tous les pechez que l'homme a commis, nous retrenchassions aussi toute gourmandise, toute friandise, & tout meurtre, pour viure sainctement tout le reste de la vie, pour ce que ce n'est pas le ventre qui est meurtrier, mais c'est luy qui est pollū de chose meurtrie par incontinence: toutefois sil est impossible de soy, ou par accoustumance, à tout le moins aians honte de la faute que nous commettons en cela, vsons-en avec moyen & raison. Mangeons de la chair, prouueu que ce soit pour satisfaire à la necessité, non pour fournir aux delices, ny à la luxure: tuons vn animal, mais pour le moins que ce soit avec commiseration & avec regret, non point par ieu ou plaisir, ny avec cruauté, comme lon fait en plusieurs sortes maintenant, les vns à coups de broches toutes rouges de feu tuans les pourceaux, à fin que le sang estainct & espandu par le fer ardent qui passe à trauers, rende la chair plus tendre & plus delicate: les autres sautans à deux pieds sur le ventre des pauvres truyes pleines, & prestes à cochonner, & leurs foullans & battans le ventre & les tetins, à fin que le sang, le laiēt, & le caillé du fruit conceu, le tout confus & mēlé ensemble vn peu au parauant le temps de sa maturité, ils en facent (ô Iupiter purgatif!) vn friand manger, vne summade de la partie de l'animal qui est la plus gastee & la plus corrompue. D'autres sillent & cousent les yeux des grues & des cygnes, & les enferment en vn lieu obscur pour les engraisser d'estranges mixtions & de pastons de figues seches, à fin que leur chair en soit plus delicate & plus friande: dont il appert manifestement que ce n'est point pour besoing de nourriture, ny par disette & necessité qu'ils le font, ains par delices, par luxure, & par sumptueuse curiosité & superfluité, qu'ils tirent volupté d'iniustice. Et tout ainsi comme celuy qui est insatiable de la volupté des femmes, apres en auoir essayé de plusieurs, vagant çà & là, & n'ayant point encore sa luxure assouuie, à la fin se laisse tomber en villainies, qui ne se doiuent pas seulement nommer: aussi l'intemperance en matiere de mangeaille, depuis qu'elle vient à passer outre le naturel & le but de la necessité, va en cruauté & iniustice, diuersifiant & cherchant ses appetits desordonnez:

Odyss. l. 10.

S'il est loisible de manger chair,

car les outils des sentimens par contagion de maladie s'entregastent les vns les autres, & se laissent aller à pecher ensemble par intemperance, quand ils ne se contentent pas de mesure naturelle. Ainsi l'ouyë ne se contentant pas de la raison, a corrompu la musique: l'attouchement degenerant en feminine delicateffe, demande & appete des attouchemens & chatouillemens feminins. Ce mesme vice a enseigné à la veuë de ne se contenter pas des morisques, bals, & danses gentilles & honnestes, ny des images & peintures semblables, ains que le plus cher & le plus agreable spectacle luy fust, de voir des meurtres d'hommes, des bleccures & des combats. Voyla comment apres des tables iniustes & viandes illegitimes, suyuent des amours dissolus: apres telles assemblees luxurieuses & deshonnestes, suit, qu'on ne prend plaisir qu'à ouyr propos villains & infames: apres ces propos & chançons éhontees, on demande à voir toutes choses hydeuses & horribles: à ces spectacles-là inhumains est conioincte vne cruauté & dureté impassible, qui ne se passionne point des cas humains. Voyla pourquoy le diuin Lycurgus en l'une de ses trois Ordonnances qu'il appelle Rhetres, commanda que lon feist les portes & huisseries des maisons, & les couuertures, avec la scie & la coignée seulement, sans y employer autre instrument quelconque: non pas qu'il eust conçu aucune haine à l'encontre de la tariere, ny du rabot, ny autres outils de menuiserie: mais sachant bien que à trauers tels ouvrages ne passeroit iamais vn liët doré, ny iamais ne prendroit-on la hardiesse d'apporter en vne maison si simple & si piëtée des tables d'argent, ny des tapits teincts en pourpre, ny des pierres precieuses, ains à maison, à liët, à table, & à coupe de telle sorte, suit vn souper sobre, vn dîner simple & populaire: mais à vn commencement & fondement de vie superflue & desordonnée, toute delicateffe, toute curiosité & superfluité luxurieuse suit,

Comme vn poulain suit la iument qu'il tette.

Quel souper doncques n'est superflu, pour lequel on tue tousiours aucun animal qui ait ame & vie? Estimons nous que ce soit peu de perte & de despense que d'une ame? ie ne dis pas encore qui est à l'aduenture celle de ta mere, ton pere, ton amy, ou ton fils, ainsi que disoit Empedocles, mais à tout le moins qui est participante de sentiment, de veuë, d'ouyë, d'apprehension, & de discretion, telle, que nature la donne à chaque animal pour chercher ce qui luy est propre, & fuir ce qui luy est contraire. Considerons vn petit, si ceux qui nous enseignent de manger nos enfans, nos amis, nos peres & nos femmes, quand ils sont morts, nous rendent plus doux & plus humains, que non pas Pythagoras & Empedocles, qui nous veulent accoustumer à estre encores iustes enuers les autres animaux. Tu te moques de celuy qui fait conscience de manger du mouton: mais nous, diront-ils, ne pourrions auoir enuie de rire, voyans vn qui coupera des portions du corps de son pere, ou de sa mere, qui seront morts, & les enuoyra à quelques vns de ses amis, qui seront absens, & conuiera les presens à en venir manger, & leur en seruira à la table largement. Mais peut-estre encore commettons nous peché en maniant ces liures, sans auoir premierement purifié nos mains, nos yeux, nos pieds, & nos oreilles, si d'aduenture toutes ces parties là ne sont purifiées & nettoyyes par le discourir & deuiser de telles choses, avec douces paroles: qui, comme dit Platon, lauent toute audition fallée. Mais si lon mettoit ces liures & ces argumens là les vns deuant les autres, ou iugeroit que les vns seroient la philosophie des Scythes, Tartares, Sogdianiens, & Melanchléniens, desquels Herodote escriuant est estimé menteur. Mais les sentences & opinions de Pythagoras & d'Empedocles estoient les anciennes loix, ordonnances, statuts & iugemens des Grecs, Que les hommes ont quelques droicts communs avec les bestes brutes. Qui ont doncques esté ceux qui depuis ont autrement ordonné?

Ceux

- A Ceux qui premiers ont forgé les espees
 Outils de mal, & les gorges coupees
 Aux pauvres bœufs qui labourent les champs.

Les tyrans aussi commencerent à ainsi commettre des meurtres, comme iadis à Athenes ils tuerent vn fort meschant calomniateur, qui s'appelloit Epitedius, & vn autre second apres, & vn troisieme aussi: depuis festans ia les Atheniens accoustumez à veoir tuer, ils veirent occire Niceratus fils de Nicias, & puis Theramenes le Capitaine, & Polemarchus le Philosophe. Aussi du commencement on mangea quelque beste sauvage malfaisante, & puis il y eut quelque oyseau & quelque poisson attiré dedans les filets: consequemment la cruauté amorsee & exercitee en tels meurtres passa outre iusques au bœuf laboureur, & au mouton qui nous vest, & au coq domestique, & ainsi croissans & roidissans leur insatiable cupidité, ils vindrent iulques à occire & meurtrir les hommes, & à donner des batailles. Mais si bien l'on ne preue

- B & ne demonstre l'on par raison que les ames ayent les corps communs en leurs renaissances, & que celuy qui est maintenant raisonnable renaist vne autre fois brutal & irraisonnable, ce qui est ores sauvage reuiet à vne autre natiuité domestique & priué, & que la nature transmue ainsi tous corps, delloge & reloge les ames d'vn en autre,

Les reuestant d'vne chair incogneüe:

Ces raisons au moins ne sont elles pas suffisantes pour diuertir l'intemperance de ceux qui se donnent à la glouttonnie, que cela apporte des maladies, des cruditez & pesanteurs au corps, & corrompt l'ame, qui se tourneroit à faire la guerre à ceux qui par trop offensent les loix, quand nous nous sommes accoustumiez de ne iamais festoyer vn hôte & amy estranger qui nous vient veoir, sans faire meurtre & espandre du sang, iamais ne celebrer nopces, iamais ne bancqueter avec noz amis? Et toutes fois si bien la preuue de la mutation des ames en diuers corps n'est pas suffisamment demonstree pour y adiouter foy certaine, à tout le moins nous deust elle bien tenir en

- C crainte, & nous faire aller bien plus retenus: ne plus ne moins que quand deux armées se rencontrent & se combattent la nuit, si quelqu'vn trouuant vn homme tombé par terre, le corps tout couuert & caché d'armes, luy presente l'espee à la gorge, & qu'il en entende vn autre qui luy crie qu'il ne le sçait pas certainemēt, mais qu'il estime & pense que cest homme gifant soit son fils, ou son frere, ou son pere, ou bien son compagnon, lequel sera le meilleur, ou que adioustant foy à vne coniecture & suspicion faulse, il pardonne à vn ennemy, comme s'il estoit amy, ou que mesprisant ce qui n'a pas preuue ne foy certaine, il tue vn des siens, comme si c'estoit son ennemy, il n'y a celuy de vous qui ne die, que le dernier seroit vne trop lourde faute. Considérez vn petit Merope en la Tragedie, quand elle lève sa coignée pour frapper son propre fils, pensant que ce soit le meurtrier de son fils, en disant,

- D Ce coup mortel sainctement ie te donne,
 quel mouuement elle excite de tout le theatre, comment elle fait dresser les cheueux en la teste des spectateurs, de peur qu'elle ne preuiēne le vieillard qui luy prend le bras, & qu'elle ne blesse le ieune adolescent. Et si d'auenture il y eust eu là pres vn autre vieillard qui eust crié, Frappe hardiment, c'est vn ennemy: & que l'autre au contraire luy eust crié, Ne le frappe pas, c'est ton fils: lequel crime eust esté le plus grief, omettre la punition d'vn ennemy pour la doute que ce fust son fils, ou bien tomber en parricide de son propre fils, pour le courroux qu'elle auoit à l'encontre de son ennemy? Quand doncques il n'y a ny haine ny courroux, qui nous poulse à commettre meurtre, ny vengeance, ny crainte de nostre salut, mais pour plaisir nous tenons sous nous vn mouton, la gorge tournée à la renuerse, & qu'vn Philosophe d'vn costé nous dit, Coupe luy la gorge, c'est vne beste brute: d'autre costé vn

Que lon ne ſçauroit viure ioyeuſement

autre nous crie, Arreſte toy, car que ſçais tu ſi c'eſt point l'ame d'un tien parent, ou d'un Dieu, qui ſoit logee en ce corps cy? le danger, ô Dieux, eſt il pareil ou ſemblable, ſi ie reſuſe à manger de la chair, ou ſi ie meſcroy que ie tue mon enfant, ou bien quelque autre de mes parents? N'eſt-ce pas preſque de meſme que les Stoïques combattent tant touchant ce poinct de defendre le manger chair? Pourquoy ſe bandent ils ainſi à defendre le ventre & la cuiſine? Pourquoy eſt-ce que condannans ſi fort la volupté, comme choſe trop molle & trop effeminee, & qui ne doit eſtre tenue pour choſe bonne ny preſque bonne, ny propre & conuenable à la nature, ils ſeſforcent neantmoins tant pour defendre ce qui appartient aux voluptez du manger? & toutefois la raiſon vouloit par conſequence, puis qu'ils chaffent & banniſſent des tables les parfums, la paſtiſſerie, & tout fruit de four, qu'ils ſ'offençaſſent encore plus d'y veoir de la chair & du ſang: mais maintenant, comme ſi par leurs regles philoſophiques ils vouloient contreroller nos papiers iournaux de la deſpenſe ordinaire, ils retrenchent tous frais qui ſe font pour la table, en choſes inutiles & ſuperflues, & ce pendant ils ne reiettent pas ce qu'il y a de cruel & de ſanguinaire en la ſuperfluité. Non, diſent-ils, pource que nous n'auons nulle communication de droit & de iuſtice avec les beſtes brutes. On leur pourroit reſpondre, auſſi n'auons nous pas avec les parfums, ny avec les faulſes eſtrangeres: & neantmoins vous voulez qu'on ſ'en abſtienne, reietans & chaffans de tous coſtez, ce qui en volupté n'eſt ny vtile, ny neceſſaire: toutefois examinons un peu de plus pres ce poinct là, à ſçauroir ſi nous n'auons aucune communication de droit & de iuſtice avec les animaux irraiſonnables, non point ſubtilement & artificielement, comme font les Sophiſtes en leurs diſputes, ains humainement, eu eſgard à noz propres paſſions & affectionſ pour en bien decider.

Ce diſcours eſt defectueux & imparfait.

Que lon ne ſçauroit viure ioyeuſement ſelon LA DOCTRINE D'EPICVRVS.

Plutarque recite par forme de deuis les propos qu'il eut avec Ariſtodemus, Zeuxippus, & Theon, en ſe promenant apres une ſienne leçon, contre l'opinion des Epicuriens, qui conſtituoient le ſouuerain bien de l'homme en la volupté.



OLOTES, l'un des diſciples & familiers d'Epicurus, a eſcript & mis en lumiere un traitté, auquel il ſeſforce de prouuer & monſtrer, que l'on ne ſçauroit pas ſeulement viure en ſuyuant les opinions & ſentences des autres philoſophes. Or H quant à ce qui promptement me vint en l'entendement de luy reſpondre & deduire à l'encontre de ſes raiſons, pour la deſenſe des autres Philoſophes, cela par cy deuant a eſté mis par eſcript: mais pourautant qu'apres la lecture & diſpute finie, il fut encore, en nous promenant, tenu pluſieurs propos à l'encontre de ceſte ſecte, il m'a ſemblé bon de les recueillir auſſi & rediger par eſcript, quand ce ne ſeroit pour autre occaſion, que pour faire au moins cognoiſtre à ceux qui ſ'ingerent de ſyndiquer, reprendre & corriger les autres, qu'il faut auoir ouy & leu bien diligemment, & non pas ſuperficiellement, les œuures & eſcripts de ceux qu'ils entreprennent de reſuter, non pas en tirer un mot deçà, & un mot delà, ou ſ'attacher à des paroles dites en deuſant, & non couchees par eſcript, pour

- A pour diuertir & degouter les personnes qui n'ont pas grande cognoissance de telles choses. Car comme nous nous promenions par le verger, apres estre sortis de la lecture & de l'eschole, Zeuxippus commença à dire : Quant à moy il me semble que le discours a esté beaucoup plus mol & plus doux qu'il ne deuoit : c'est pourquoy Heraclides s'en est allé tout mal content de nous, en nous picquant & poignâr nous mesmes, qui n'en pouuions mais, plus asprement que lon n'a pas faict ny Epicurus, ny Metrodorus. Encore ne dittes vous pas, ce dit Theon, que Colotes, à comparaïson d'eux, est le plus modeste, & le moins mesdisant homme du monde: car toutes les plus ordes & plus iniurieuses paroles que lon sçauroit inuenter pour mesdire, comme badineries, vanitez, bauarderies, paillardises, homicides, mal-heureux corrupteurs, faisans mal à la teste de ceux qui les lisent, ils les ont toutes ramassées & respendues sur les princes des philosophes, comme Aristote, Socrâtes, Pythagoras, Protagoras, Theophrastus, Heraclides, Hipparchus, & contre qui non des premiers & plus illustres hommes en toutes lettres de toute l'antiquité? de maniere que quand bien ils se feroient portez sagement au demourant, pour ces effrenees detractions & mesdisances la, ils meriteroient d'estre mis hors du reng & du nombre des sages hommes, & des philosophes: car enuie, emulation & ialousie ne doiuent point entrer ny auoir place en ce diuin bal la, puis qu'elles sont si impuissantes, que elles ne peuuent dissimuler ny courir leur maltalent. Aristodemus adonc prenant la parole: Heraclides, dit-il, qui de profession est grammairien, rend ces grâces la à Epicurus pour toute la canaille poétique: car ainsi ont ces Epicuriens accoustumé de les blâsonner, & pour les sortises d'Homere, ou pource que Metrodorus en tant de lieux & passages de ses escripts iniurie le prince des poëtes. Mais quant à eux, laissons les la pour tels qu'ils sont, Zeuxippus, & au demourant nous autres icy à par nous, en y associant Theon, car ie voy bien que cestui-cy, Plutarque, est las, efforceons nous de prouuer ce qui des le commencement de la dispute, leur a esté obiicié,
- C Que ce n'est pas viure que de viure selon leurs preceptes. Lors Theon suiuant son propos luy respondit,

D'autres ont ia ce combat combatu

Par auant nous, mais à autre but tendre

Il nous faudroit, si voulez y entendre.

Et pour venger l'iniure faite aux autres philosophes, essayons nous de prouuer & monstrier, si est possible, que selon les preceptes de ces Epicuriens icy, il est impossible de viure ioyeusement. Vrayement, ce dis-ie alors, cela sera bien leur sauter à deux pieds sur le ventre, & les contraindre de venir au combat pour leur chair propre, comme lon dit d'oster la volupté des hommes qui ne font que crier,

Bons escrimeurs des poings pas nous ne sommes,

ny bons orateurs, ny bons magistrats & gouuerneurs de villes & de peuples,

D Mais nous aimons à faire bonne chere,

Odyss. l. 8.

à banqueter tousiours, à nous donner du bon temps, & à bailler tout contentement & agreable chatouillement à nostre chair, si que l'aise & le plaisir en regorge iusques à l'ame: de maniere qu'il me semble que vous ne leur ostez pas la ioye seulement, mais la vie entierement, si vous ne leur laissez le viure ioyeusement. Et bien, dit Theon, si tu trouues l'entreprise de ce subiect bonne, que ne l'entreprens-tu doncques maintenant? Si feray-ie bien, dis-ie, en vous escoutant, & vous respondant, si vous voulez, mais vous commencerez les premiers à nous mettre en train. Et comme Theon s'excusast vn petit, Aristodemus se prit à dire: O que tu nous as bien couppe vn beau, court & plein chemin pour paruenir à ce point la, en ne nous permettant pas de faire premierement respondre ceste secte Epicurienne, de la vertu, & de l'honesteté: car il n'est pas bien aisé d'oster le viure ioyeusement, & en debouter

Que lon ne sçauroit viure ioyeusement

ceux qui supposent, que la fin suprême de la felicité humaine soit la volupté : là où E
si nous les eussions vne fois peu debutter de viure honestement, ils eussent aussi quant
& quant esté forclos du viure ioyeusement : car ils confessent & disent eux-mesmes,
que lon ne peut viure ioyeusement, qui ne vit honestement, & que l'un ne peut
subsister sans l'autre. Quant à cela, dit Theon, si bon vous semble, au progres du
discours nous ne laisserons pas de le ramener en ieu, mais pour ceste heure, nous
nous seruirons de ce que eux mesmes nous concedent: car ils tiennent que le bien sou-
uerain de l'homme consiste au ventre, & autres conduits du corps, par lesquels entre
la volupté au dedans, & non pas la douleur: & ont opinion que toutes les belles,
subtiles & sages intensions du monde, ont esté trouuees & mises en auant pour
les plaisirs du ventre, ou pour la bonne esperance que lon auoit d'en iouir, ainsi
comme l'a escript le sage Metrodorus : & de ceste premiere supposition la, sans
aller plus loing, vous pouuez cognoistre & veoir, comme ils posent vn maigre, ver-
moulu, & mal asseuré fondement, pour fonder leur bien souuerain, veu que les F
mesmes conduits, par lesquels ils introduisent les voluptez, sont aussi bien percez
pour y receuoir les douleurs, ou pour mieux dire, veu qu'il y a bien peu de conduits
au corps humain, par lesquels la volupté y entre: là où il n'y a partie d'iceluy à laquel-
le la douleur ne s'attache, car toute volupté a son siege es parties naturelles, aux nerfs
aux pieds, & aux mains, & c'est là que demeurent les plus cruelles passions de gout-
tes, d'ulceres rongcans, de fluxions & de gangraines, & les esthiomenes qui man-
gent & pourrissent les membres. Si vous approchez du corps les plus douces
odeurs, & les plus souefues faueurs qui puissent estre, il y aura bien peu d'endroits
d'iceluy qui s'en emeuuent guayement & ioyeusement, & toutes les autres bien sou-
uent s'en irritent & s'en offensent : là où il n'y a partie du corps qui ne soit subiecte à
sentir & souffrir les douleurs du feu, du fer, les escorchemens des escorgees & du fouët:
l'ardeur du chaut, la rigueur du froid entre & penetre par tout, comme aussi fait la
fiebre. Et puis les voluptez sont comme des petites bouffees de vents gracieux G
qui souspirent les vnes sur l'une, les autres sur l'autre extremite du corps, ainsi que
sur des escueuils de la marine, & passent & seuanouissent incontinent, tant leur
duree est courte: ne plus ne moins que les estoilles que lon voit la nuit tomber du
ciel, ou bien trauerfer d'un costé à autre: car elles s'allument & s'estaignent en nostre
chair en vn instant: mais au contraire combien les douleurs durent & demeurent, il
n'en faut point alleguer de meilleur tesmoing que le Philoctetes d'Æschylus qui dit
parlant de son vlcere,

Le fier dragon qui dedans mon pied cache
Sa dent cruelle, aucunement ne lasche
Ne iour ne nuit la prise qu'il en tient.

La destresse de la douleur n'a garde de glisser & couler ainsi, ny de mouuoir & cha-
touiller seulement la superficie de quelques extremitez du corps: ains au contraire, H
tout ainsi que la graine & semence de l'herbe qu'on appelle le saint foin, est tortue,
& a plusieurs pointes & angles, dont elle prent dedans la terre, & y demeure plus
long temps à cause de ses pointes: aussi la douleur aiant plusieurs crochets & plusieurs
racines qu'elle iette & seme çà & là, s'entrelasse dedans la chair, & y demeure non
seulement les iours & les nuits, mais aussi les saisons des annes toutes entieres, voi-
re bien les reuolutions des Olympiades toutes accomplies, encore à peine en sort
elle à la fin, estant poulsee & chassée par autres douleurs, comme vn clou est poulcé
par vn autre plus fort. Car qui fut oncques l'homme qui beust ou qui mägeast autant
de temps durant, comme endurent la soif ceux qui ont la fiebre, ou supportent la
faim ceux qui sont assiegez? & où est le soulas & le plaisir que lon prent à la compa-
gnie & conuersation de ses amis, qui dure autant de temps comme les tyrans font sup-
porter

A porter de gehennes & de tourmens à ceux qui tombent en leurs mains? & tout cela ne procede d'ailleurs que de l'inhabilité & incapacité du corps à mener vie voluptueuse, d'autant qu'il est plus apte & plus propre à supporter les douleurs & les labeurs que non pas à iouir des delices & voluptez. Car contre les travaux & douleurs il montre qu'il a force pour les endurer, là où en la iouissance des plaisirs & voluptez il montre incontinent son impuissance & sa foiblesse, par ce qu'il s'en lasse & s'en faoule tout aussi tost: à l'occasion dequoy quand ils voient que nous nous voulons vn petit estendre à discourir sur ce viure ioyeusement & voluptueusement, ils nous rompent incontinent nostre propos, confessans eux mesmes que la volupté du corps & de la chair est fort foible & petite, ou pour dire la verité, que elle passe en vn moment, si ce n'est qu'ils s'accordent à mentir & à dire tout autrement qu'ils ne pensent:

„ comme Metrodorus quand il dit, Nous mesprisons & crachons à l'encontre des voluptez du corps: & Epicurus escriuant, que le sage tombé en maladie, bien souuent se rit & se resiouit au milieu des plus aigres & plus excessiues douleurs de sa maladie corporelle. Comment doncques est il possible que ceux qui portent si legerement & si aiseement les angoisseuses douleurs du corps, facent aucun compte des voluptez? car encore qu'elles ne cedassent aux douleurs ny en grandeur, ny en longueur de tēps & de duree, si est-ce que pour le moins elles ont relation & respondance à icelles, d'autant que Epicurus leur a donné ceste definition generale & commune à toutes, que c'est vne subtraction de tout ce qui peut causer & apporter douleur: comme si la nature estendoit la ioye iusques à dissouldre seulement la douleur, & ne permettoit pas qu'elle peust passer plus outre en augmentation de volupté, ains que quand elle est arriuee iusques à ce poinct là, de ne sentir plus de douleur, elle receust seulement quelques diuersifications & desguisements non necessaires: mais le chemin pour paruenir auec appetit à cest estat là, qui est toute la mesure de volupté, est fort brief & fort court. Voylà pourquoy s'apperceuans bien que ce lieu là est fort estroit & fort maigre, ils transferent leur fin souueraine, qui est la volupté du corps, comme d'un champ sterile en vn plus fecond & plus fertile, qui est l'ame: comme si là nous deuions tousiours auoir les iardins, vergers & prairies toutes couuertes de voluptez, là où en l'Isle d'Ithaque, comme dit Telemachus en Homere,

Il n'y a point de grandes larges plaines,

Qui à courir soient aptes & idoines:

Odyss. l. 4.

aussi n'y a il point en nostre pauvre chair de fruition de volupté qui soit vnie & toute plaine, ains est toute raboteuse, entre-meslee de plusieurs agitations contraires à la nature & fiebureuses. Comment, dit adonc Zeuxippus, ne te semble il pas que ces gens icy facent bien en cela, de commencer au corps, où il semble que la volupté s'engendre premierement, & puis acheuer en l'ame, comme en celle qui est plus constante & plus ferme, & y mettre toute la perfection? Si fait certes, dis-ie, il me semble qu'ils font tresbien & selon nature, si tant est qu'ils y cherchent & y treuuent ce qui est plus parfait & meilleur, comme font les personnes qui s'addonnent à la vie contemplatiue ou actiue: mais si puis apres vous les oyez protester & cryer à pleine teste, que l'ame ne s'esiouit de chose du monde quelle qu'elle soit, ny ne se contente & appaise sinon des voluptez corporelles presentes, ou prochaines à venir, & qu'en cela seul gist son bien souuerain, ne vous semble il pas qu'en remuant ainsi la volupté du corps en l'ame, ils font ne plus ne moins que ceux qui frelatent & transvasent le vin d'un vaisseau gasté ou percé, & qui s'en va par tout, en vn autre meilleur & mieux relié, pour l'y conseruer plus longuement, & qu'ils pensent en cela faire chose plus belle & plus honorable? & toutefois le temps conserue & bonifie le vin qui est ainsi transvasé & frelatté: mais de la volupté l'ame n'en reçoit sinon la souuenance, comme vne odeur, & n'en retient ny n'en reserue autre chose: par ce que tout

Que lon ne ſçauroit viure ioyeuſement

auffi toſt qu'elle a boullu vn bouillon, par maniere de dire, en la chair, elle ſeſtaint, E
& ce qui en demeure en la memoire n'eſt rien plus qu'une ombre & vne fumee: ne
plus ne moins que ſi quelqu'un faiſoit en ſoy vn recueil & amas tout rance des pen-
ſees de ce qu'il auroit autrefois ou mangé ou beu, & ſe repaiſſoit de cela à faute d'au-
tres vins & viandes preſentes & recentes. Or voyez combien les Cyrenaïques par-
lent plus modeſtement, encore qu'ils aient les vns & les autres beu en vne meſme
bouteille qu'Epicurus: car ils ne veulent pas que lon exerce le plaifir de l'amour ou-
uertement à la lumiere, ains veulent que lon le couure & cache des tenebres de la
nuict, de peur que la penſee receuant par la veüe tout clairement les images de telle
action ne ſoit cauſe d'en rallumer ſouuent les appetits: & ceux cy au contraire tien-
nent, qu'en cela giſt & conſiſte la perfection de la felicité du ſage, qu'il ſe ſouuient
certainement, & retient euidentement toutes les figures, les geſtes & mouuements
des voluptez paſſees. Or ſi telles preceptions ſont indignes du nom de ceux qui
font profeſſion de ſapience, de laiſſer ainſi telles laueures & ordures de voluptez de- F
meurer & crouppir en l'ame du ſage, comme en la cloaque & ſentine du corps, ie
ne m'arreſteray point à le diſcourir pour ceſte heure. Mais qu'il ſoit impoſſible
que telles choſes rendent l'homme heureux, ny le facent viure ioyeuſement, il eſt de
ſoy tout manifeſte: car la volupté de ſe ſouuenir du plaifir paſſé ne peult eſtre gran-
de à ceux à qui la iouyſſance du preſent eſt petite: ny à ceux à qui il eſt expedient
d'en peu faire, & de ſ'en retirer promptement, il ne peut eſtre vtile d'y penſer apres
le faiſt longuement, veu qu'à ceux meſmes qui ſont les plus ſenſuels, & plus ſub-
iects au plaifir de la chair, la ioye ne leur demeure pas apres qu'ils ont acheué, ains
leur reſte ſeulement vne ombre, & comme vne illuſion de ſonge en l'eſprit, apres
que la volupté ſ'en eſt enuolee, pour touſiours entretenir & allumer le feu de leur
concupiſcence: ne plus ne moins que ceux qui aians ſoif ſongent qu'ils boient en
dormant, ou qu'ils iouyſſent de leurs amours: telles voluptez imparfaites, & iouyſ-
ſances imaginaires en l'air, ne ſont que plus aſprement aiguillonner & exciter la G
luxure. Ny à ceux-la doncques encore n'eſt point non plus delectable la ſouuenance
des voluptez qu'ils ont iouyes par le paſſé, ains d'un peu de reſte de plaifir fort
foible & fort vain qui leur demeure, ſe reſueille vn furieux appetit qui les poinçonne
& ne les laiſſe point repoſer. Ny n'eſt pas auſſi vray-ſemblable que ceux qui ſont ho-
neſtes & continents ſ'amuſent à rememorer & recorder telles choſes, comme ſils
les liſoient en vn papier journal, ainſi que lon ſe mocquoit d'un Corniades, qu'on
diſoit qu'il le faiſoit, Combien de fois ay-ie couché avec Hedia ou avec Leontion?
En quels & combien de lieux ay-ie beu du vin Thaſien? A combien de feſtes du
vingtième des mois ay-ie fait grand chere? Car ceſte paſſionnee affection de vouloir
ainſi rememorer & ſe representer ſes bonnes cheres paſſees, monſtre & argue eu-
identement vne enuie forſennée & beſtiale ardeur d'appetit apres les actes de volupté
preſente, ou attendue & eſperée. Et pourtant me ſemble il que ces gens icy feſtans H
bien apperceus, que de leur dire ſ'en enſuyuoient tant d'inconuenients & tant d'ab-
ſurditez, ont eu recours à l'indolence & à la bonne diſpoſition du corps, comme ſi
le viure ioyeuſement & heureuſement conſiſtoit en imaginer & penſer, que telle
diſpoſition doiue eſtre ou auoir eſté en quelques vns: car ceſte ferme conſtitution
& bon portement de la chair, ce diſent ils, & l'aſſeuree eſperance qu'elle continuera,
apporte vne extreme ioye & tres-aſſeuré contentement à ceux qui le peuuent bien
diſcourir en leur entendement. Qu'il ſoit ainſi, conſiderez premierement ce qu'ils
font, & comment ils remuent & transportent du hault en bas ceſte ou volupté, ou
indolence, ou ferme diſpoſition de la chair, comment que ce ſoit qu'ils la bapti-
ſent, en la tranſferant du corps en l'ame, & puis de l'ame au corps: pour autant qu'elle
ſ'enfuit & ſecoule partout, eſtans contraincts de la lier & attacher à ſon principe,
en eſtayant

- A en estayant la volupté du corps avec la ioye de l'ame , & reciproquement terminans la ioye de l'ame en l'esperance de la volupté du corps. Mais comment est il possible que le fondement estant ainsi mouuant & esbranlé, ce qui est basti dessus ne le soit aussi? ou que l'esperance soit asseuree , & la ioye bien ferme estant appuyee & fondee sur vn soubassement subiect & exposé à si grand branle , & à tant & de si grandes mutations, comme sont celles qui espient ordinairement le corps, estant subiect à beaucoup de necessitez & de heurts au dehors , & aiant au dedans les sources & principes de plusieurs maux que le discours de la raison ne peut destourner ne diuertir. Car autrement ne fussent pas aduenues à hommes prudents & sages, comme ils sont, les maladies de supression d'vrine, de difficulté de pisser, de flux de ventres, espraintes & racleures de boyaux, de phthises ou d'hydropisies, dont Epicurus luy mesme a esté tourmenté des vnes, & Polyænus des autres, & Neocles & Agathobulus en ont encore esté emportez d'autres: ce que ie n'allegue pas en intétion de leur
- B en faire reproche, sçachant tresbien que Pherecydes & Heraclitus, grands & dignes personnages, ont bien aussi esté trauaillez de grandes & griesues maladies: mais nous leur demandons s'ils veulent que leurs propos s'accordent avec les accidents & passions qu'eux mesmes, endurēt, & qu'ils ne soient trouuez faulx braueries & vâteries, & eux cōuaincus de vanité & de menterie, qu'ils ne dient & n'asseurēt pas que la bōne disposition de la chair soit le principe de toute ioye, & qu'ils ne nous cuydent pas faire à croire que ceux qui sont tombez en trauaux angoisseux, & maladies fort douloureuses, rient, gaudissent & facent grand' chere: car il est bien possible que le corps se treuve souuent en bonne & ferme disposition, mais qu'il y ait esperance asseuree & certaine qu'elle doie continuer, il n'y en peut auoir en ame sage & de bon iugement, ains comme Æschylus dit qu'en la mer,

La nuit apporte à tout pilote sage

Toufiours douleur & peur de quelque orage:

- C car l'aduenir est toufiours incertain: parquoy il est impossible que l'ame qui colloque & constitue son bien souuerain en la bonne disposition du corps, & en l'esperance qu'il continuera en icelle, demeure sans crainte & sans tourmente, par ce que le corps n'a pas seulement les orages & tempestes de dehors comme la mer, ains la plus part de ses troubles & agitations, & les plus violentes, sont celles qu'il produit de soy mesme: & y auroit plus de raison d'esperer beau-temps & sercin en hyuer, que non pas de se promettre vne disposition de corps exempte de toute douleur & tout mal, qui deust longuement perseuerer. Car qu'est-ce qui a donné aux poètes occasion d'appeller la vie des hommes journaliere, instable, inconstante & incertaine, & de la cōparer aux feuilles des arbres qui naissent en la prime-verre, & tombent en Automne, sinon l'imbecillité & foiblesse de la chair subiecte à infinies infirmités, inconueniens & dangers, de laquelle les medecins mesmes nous admonestent de craindre, voire de retrancher & diminuer, le supreme en-bon-poinct? car c'est chose perilleuse, ce dit Hippocrates, que la bonne disposition quand elle est arriuee à son dernier poinct.

Qui florissoit n'agueres en beau taint,

Soudainement est demouré estaint,

Comme du ciel vne estoille tombee:

ainsi que dit Euripide. Qui plus est, lon tient que les personnes qui sont en fleur de beauté, si elles sont regardees d'un œil enuieux & forcier, elles en reçoient du dommage, d'autant que tout ce qui est en sa perfection de vigueur est subiect à soudaine mutation, à cause de la foiblesse & imbecillité du corps: & qu'il n'y ait point d'assurance que l'homme puisse passer sa vie sans douleur, il se peut euidentement monstrier par ce que eux mesmes disent aux autres: car ils tiennent, que ceux qui commettent des crimes contre les loix sont toute leur vie en misere & en crainte, pour ce

En la Tragédie des Supplantes.

Que lon ne ſçauroit viure ioyeuſement

que encore qu'ils puiſſent viure cachez, ſi eſt il impoſſible qu'ils en puiſſent prendre E
aſſurance, & ſe promettre qu'ils n'en ſeront iamais deſcouverts, tellement que la
doute de l'aduenir ne les laiſſe paſſiouiſſer ny ſaſſeurer de l'impunité preſente: mais en
diſant cela, ils ne ſ'apperçoient pas, que c'eſt autant contre eux meſmes, comme
contre les autres: car tout de meſme, il eſt bien poſſible qu'eux ſoient en ſanté &
bonne diſpoſition pour quelque temps, mais de ſaſſeurer qu'ils y demeureront touſ-
iours ou longuement, il eſt impoſſible: & eſt force qu'ils ſoient touſiours en dou-
te & deſſiance de l'aduenir, comme vne femme groſſe qui attend l'heure de ſon tra-
uail, à cauſe du corps, ou bien qu'ils dient comment ils attendent encore vne eſpe-
rance feable & certaine de luy, veu que iamais ils ne l'ont peu cy deuant acquerir iuſ-
ques icy: car il ne ſuffit d'eſtre aſſeuré que lon n'a rien commis ny eu volonté de com-
mettre contre les loix pour ſaſſeurer, pour ce que lon ne redoubte pas le ſouffrir pei-
ne iuſtement, ains le ſouffrir ſimplement: & ſil eſt mauuais & faſcheux de ſe trouuer F
empeſtré de ſes propres forfaitures, il ne peut qu'il ne ſoit dangereux auſſi, de ſe trou-
uer empeſtré de celles d'autrui, comme ſi la violence & cruauté de Lachares ne tra-
uailloit pas plus les Atheniens, & celle de Dionyſius les Syracuſains, que eux meſ-
mes, pour le moins les travailloit elle autant: car en les tourmentant ils eſtoient tour-
mentez eulx meſmes, & ſ'attendoient bien de receuoir vn iour la punition des torts &
outrages qu'ils faiſoient les premiers à leurs citoiens qui tomboient en leurs mains.
Il n'eſt ia beſoing que i'allegue à ce propos vne fureur de peuple, vne cruauté de
brigands, vne meſchanceté de preſumptifs heritiers, vne peſtilence & corruption
d'air, vne mer bruyante, de laquelle Epicurus luy meſme eſcrit, qu'en nauigant
vers la ville de Lampſaque il faillit à eſtre englouty: il ſuffit ſeulement de mettre en
auant la nature de la chair, laquelle a dedans ſoy-meſme la matiere de toutes mala-
dies, prenant, comme lon dit communement par maniere de riſée, du bœuf meſme
les courroyes, c'eſt à dire les douleurs du corps meſme, par où elle rend la vie autant
angoiſſeuſe & dangereuſe aux bons comme aux meſchants, ſils apprennent à ſe G
reſiouiſſre & à fonder la fiance & ſeureté de leur ioye ſur la chair, & ſur l'eſperan-
ce d'icelle. Parquoy il fault conclure, que non ſeulement ils prennent vn mal fea-
ble & peu aſſeuré principe & fondement de viure ioyeuſement, mais auſſi petit & vil,
n'ayant dignité quelconque, ſil eſt ainſi que l'euitier mal ſoit leur ioye & leur felicité
ſouueraine: diſans qu'il ne ſe peut entendre ny comprendre autrement, & brief
que la nature meſme ne ſçauroit où loger le bien, ſinon ſeulement là dont elle chaſſe
le mal, ainſi comme eſcrit Metrodorus en ſon traitté contre les Sophiſtes: de manie-
re qu'il fault ſelon eux definir le bien, eſtre fuir le mal: car on ne ſçauroit où met-
tre le bien & la ioye, ſinon là dont ſeroit deſlogé le mal & la douleur. Autant en eſ-
crit Epicurus, Que la nature du bien ſ'engendre de la fuitte du mal, & de la memoire
de la penſée & du plaſir de ſe ſouuenir quelon a eſté tel, & que tel cas eſt aduenu:
par ce que ce qui fait & donne vne ioye inestimable & incomparable, c'eſt propre- H
ment cela, quand on ſçait que lon a eſchappé vn grand mal: & eſt cela, dit-il, certai-
nement la nature & l'eſtre du bien, ſi lon aſſene droittement là où il faut, ainſi comme
il appartient, & que lon ſ'arreſte là, ſans vaguer en vain çà & là, en babillant de la de-
finition du ſouuerain bien. O la grande felicité, & la grande volupté dont iouiſ-
ſent ces gens là, ſ'eſiouiſſans de ce qu'ils n'endurent point de mal, qu'ils ne ſentent
aucun ennuy, ny ne ſouffrent douleur quelconque! N'ont ils pas bien occaſion de ſ'en
glorifier, & de dire ce qu'ils diſent d'eulx meſmes, en ſ'appellant egaux aux Dieux
immortels? & pour les exceſſiues ſublimez & grandeurs de leurs biens, crier à
pleine teſte, & hurler de ioye, comme ceux qui ſont eſpris de la fureur de Bacchus,
pource que aians ſurpaſſé tous autres hommes en ſageſſe & vigueur d'entende-
ment, ils ont ſeuls inuenté le bien ſouuerain, celeſte & diuin, où il n'y a meſlange
aucune

- A aucune de mal : tellement que leur beatitude ne cede aucunement à celle des porceaux & des moutons , estant par eux constituee , en se trouuer bien de la chair , & de l'ame pour cause de la chair. Car quant aux animaux qui sont vn peu plus gentils , & qui ont plus d'esprit , la fuitte de mal , n'est point le comble de leur bien : car quant ils sont saouls , ils se mettent aucuns à chanter , les autres à nager , les autres à voler , & à contrefaire toutes sortes de voix & de sons , en se iouant de guayeté de cœur , pour le plaisir qu'ils y prennent : & puis ils s'entrefont des caresses , iouënt & faultent les vns avec les autres , monstrans par là , que apres qu'ils sont sortis du mal , la nature les incite à chercher & poursuyure encore le bien , ou plus tost qu'ils iertent & chassent arriere d'eux tout ce qui est douloureux & estranger , comme les empeschant de poursuyure ce qui est de meilleur , plus propre , & plus selon leur nature : car ce qui est necessaire , n'est pas incontinent bon , ains le desirable & choisissable est situé par dela & plus auant que la fuitte de mal : voire certes l'agreable & le propre
- B & naturel , comme disoit Platon , lequel defendoit d'appeller , & ne vouloit pas que lon estimast la deliurance de tristesse & d'ennuy , volupté , ains comme le premier esbauchement des gros traiçts d'vne peinture , & vne mixtion de ce qui est propre & estranger , naturel & contre nature , ne plus ne moins que de blanc & de noir. Mais il y a des gens qui montans du bas au milieu , à faulte de bien sçauoir & entendre que c'est du bas , & que c'est du milieu , estiment que le milieu soit la cyme & le bout , comme font Epicurus & Metrodorus , qui definissent la nature & substance du bien , estre fuitte & deliurance de mal , & se fioüissent d'vne ioye d'esclaves , ou de captifs prisonniers , que lon a tirez des prisons & de ferrez , qui tiennent pour vn grád bien , que lon les laue & les huyle , apres qu'ils ont esté bien fouëttez & deschirez d'escorpees , & qui au demourant n'essayerent ny ne sçeuient iamais que c'est d'vne pure , nette , & liberale ioye , non point cicatricee : car si la galle , la demangeaison de la chair , & la chassie des yeux , sont choses mauuaises & fascheuses , & que la nature refuit , il
- C ne s'ensuit pas pourtant , que le gratter la peau & frotter ses yeux soient choses bonnes & heureuses : ne si superstitieusement craindre les Dieux , & tousiours estre en angoisse & en frayeur de ce que lon raconte des enfers , est mauuais : il ne faut pas inferer que pour en estre exempt & deliure , on soit incontinent bien-heureux ny bien ioyeux. Certainement ils assignent vne bien petite & estroite place à la ioye , pour se pouuoir esguayer & promener à son aise , iusques à ne se point esmayer ny troubler de l'apprehension des peines que lon décrit aux enfers. Ceste leur opinion passant outre les communes du vulgaire , met pour le but & la fin derniere de sa sapience , vne chose que lon voit clairement estre aux bestes brutes : car si quant à la bonne disposition du corps , il ne peut chaloir si c'est ou par nature , ou par luy mesme , qu'il soit exempt de maladie : aussi ne fait il pas quant à la tranquillité de l'ame , & n'est point plus grande chose qu'elle soit rassise hors de toute perturbation , pour auoir ac-
- D quis ce repos de soy mesme , que pour l'auoir de la nature : encore que lon pourroit avec raison soustenir , que la disposition soit plus robuste , qui par sa nature ne reçoit point ce qui trauaille & tourmente , que celle qui avec iugement & diligence de doctrine le fuit. Mais posons le cas , que l'vn soit aussi digne que l'autre , par là il apparaitra pour le moins , qu'ils n'ont en cela rien de plus grand & meilleur que les bestes , quant à ne se angoisser & troubler point de ce que lon raconte des enfers & des Dieux , & à ne craindre point apres la mort des peines & des tourments qui n'auront iamais fin. Et qu'il soit vray , Epicurus certes luy mesme escrit ainsi : Si les soupçons & imaginations , que les hommes ont conceuës des impressions qui sont & qui apparoiissent en l'air & au ciel , ne nous eussent trauaillez , ny semblablement celles de la mort & des peines d'apres elle : nous n'eussions point eu de besoing d'aller rechercher les causes naturelles , non plus que les animaux qui n'ont point de mauuai-

Que lon ne sçauroit viure ioyeusement

ses suspensions des Dieux, ny des opinions qui les tourmentent, touchant ce qui leur E doit arriuer apres leur mort, car ils ne pensent ny ne croient point qu'il y ait aucun mal. Et puis si en l'opinion qu'ils tiennent des Dieux, ils eussent laissé la prouoyance diuine, croians que par icelle le monde soit regy, il eust semblé que les sages hommes eussent eu l'auantage sur les bestes brutes pour viure ioyeusement, en ce qu'ils eussent eu bonnes esperances: mais estant ainsi que la fin de toute leur doctrine touchant la nature des Dieux est, d'en oster toute la crainte, & de n'en estre plus en esmoy ny en soucy, il m'est aduis que cela se treuve plus ferme & plus certain en ceux qui ne cognoissent du tout rien de Dieu, qu'en ceux qui disent le cognoistre bien, mais non point punissant, ny mal faisant: car ceux la ne sont point deliurez de superstition, mais c'est pour autant qu'ils n'y tomberent iamais, ny n'ont point laissé vne opinion touchant les Dieux qui les teint en transe, mais c'est pour autant qu'ils ne l'eurent oncques. autant en faut il dire touchant les persuasions que lon a des enfers, car ny les vns ny les autres n'ont esperance d'en tirer & receuoir du bien: F mais souspeçonner, craindre & redoubter, ce qui doit aduenir apres la mort, est moins en ceux qui n'ont point d'opinion preiugee ny presumee de la mort, qu'en ceux qui deuant se sont imprimé ceste persuasion, que la mort ne nous touche en rien: & ne sçauoient eux dire, qu'elle ne leur touche ny appartienne en rien, veu qu'ils en discourent, qu'ils en escriuent & disputent, là où les animaux n'y pensent, ny ne se soucient aucunement de ce qui point ne leur appartient: vray est qu'ils fuyent & se gardent d'estre frappez, blecez & tuez, & c'est ce qu'ils redoubtent de la mort, & ce qui leur en est espouventable. Voyla les biens qu'ils disent que la sapience leur a apportez quant à eux: mais voyons maintenant & considerons ceux dont eux mesmes se deboutent & se priuent. Quant à ces espanouissements de l'ame, qui se dilate pour l'aise de la chair, & pour les plaisirs qui sont en icelle, fils sont petits ou mediocres, ils n'ont rien de grand, ne qui merite que lon en face cas: & fils passent la mediocrité, outre ce qu'ils sont vains, mal-assurez & incertains, on les deueroit plus G tost nommer voluptez importunes & insolentes du corps, que non pas ioyes ny plaisirs de l'ame, qui rit aux voluptez sensuelles & corporelles, & participe à ses dissolutions. Mais celles qui iustement meritent d'estre appellees ioyes, lieses & resiouissances de l'ame, sont toutes pures & nettes de leurs contraires, n'ayant rien melleé parmi d'emotion fiebureuse, ny de pointure qui les picque, ny de repentance qui les suyue, ains est leur plaisir vraiment spirituel, propre & naturel à l'ame, non point emprunté ny attiré d'ailleurs, ny destitué de raison, ains tresconioinct à icelle, procedant de la partie de l'entendement qui s'addonne à la contemplation de la verité, & est desiruse de sçauoir, ou bien de celle qui s'applique à faire & executer de grandes & honorables choses. De l'une & de l'autre desquelles parties qui voudroit tascher à nombrer, & se parforceroit de pleinement discourir, combien de plaisirs & de voluptez, & combien grâdes il en sort, il n'en viendroit iamais à bout H mais pour en refreschir vn peu la memoire, les histoires nous en suggerent & proposent infinis beaux exemples, lesquels nous donnent vn tres-agreable passe-temps à les lire, & si ne nous soulent iamais, ains laissent tousiours le desir d'entendre la verité, non content ny assouuy de sa propre volupté, pour laquelle le mensonge mesme n'est pas du tout destitué de grace, ains y a aux fables & fictions poëtiques, encore que lon n'y adiouxt point de foy, quelque force & efficace en delectant de persuader. Car pensez en vous mesmes avec quelle chaleur de delectation & d'affection on lit le liure de Platon, qui est intitulé Atlantique, & les derniers liures de l'Iliade d'Homere, & combien nous regrettons que nous ne voyons au long ce qui s'en faut que la fable ne soit toute paracheuee, comme si c'estoiét de beaux temples ou de beaux theatres fermez: car la cognoissance de la verité de toutes choses est si amiable & si

A & si desirable, qu'il semble que le viure & l'estre mesme depende de cognoistre & de sçauoir, & que ce qui est le plus triste, & le plus odieux en la mort, soit oubly, ignorance & tenebres, qui est la raison par laquelle tous hommes presque combattent & font la guerre à l'encontre de ceux qui ostent le sentiment aux trespassez, mettans tout le viure, l'estre, & la ioye de l'homme, au sentiment, & en la cognoissance de l'ame: tellement que les choses mesmes qui sont fascheuses, on les oit aucunes fois avec quelque plaisir, & bien souuent encore que l'on soit tout troublé de ce que lon entend dire, voire & que l'on en ait les larmes aux yeux, si ne laisse l'on pas de prier ceux qui les racontent d'acheuer: comme faiët Oedipus en Sophocles,

LE MESSAGER.

Helas ie suis sur le poinët de te dire
Ce qu'il y a en tout ce mal de pire.

OEDIPUS.

B Helas & moy sur le point de l'ouïr,
Mais point ne faut à l'escouter fuïr.

Toutefois cela pourroit estre vn ruisseau d'incontinence, procedant de la curiosité de vouloir tout entendre & sçauoir, en forçant tout le iugement de la raison: mais quand vne narration qui ne contient rien de triste ny de nuyfible, ains toutes aduentures & actions grandes & honorables, est couchee en beau langage, avec la grace, nerfs, & force d'eloquëce, comme sont les histoires d'Herodote, de Xenophon en ses Annales de la Grece, & de la Perse, ou

C Ce qu'Homere a diuinement chanté
en ses vers, ou Eudoxus en sa peregrination & description du monde, ou Aristote en son traitté de la fondation, gouuernement & institution des grandes villes, ou Aristoxenus qui a couché par escript les vies des hōmes illustres, il y a beaucoup de plaisir & de contentement, & iamais repentance ny desplaisir ne s'en ensuit apres. Et qui est celuy qui ayant faim mangeroit plus volontiers des delicates viandes, ou aiant soif beuroit plus tost des vins friands & delicieux des Phœaciens, qu'il ne liroit toute la fiction du voiage & peregrination d'Vlysses? Et qui est celuy qui prendroit plus de plaisir à coucher avec vne belle femme, qu'à passer la nuit à lire ce que Xenophon a escript de Panthea, ou Aristobulus de Timoclea, ou Theopompus de Thibé? ces plaisirs la sont voluptez propres à l'ame. Mais ces Epicuriens icy reiettent aussi tous les plaisirs qui procedent des subtiles inuentions des Mathematiques, & toutefois la delectation que l'on reçoit en lisant les histoires est toute simple & coulante vniement, mais les plaisirs que l'on reçoit de la Geometrie, de l'Astronomie, & de la Musique, ont ie ne sçay quoy d'apast d'auantage, & vn attraiët de varieté si delectable, qu'il semble que les hommes en soient charmez & enchantez, attirans & retenans les hommes avec leurs descriptions, & demonstrations, ne plus ne moins que si c'estoiët forcelleries & enchantemens: de maniere que qui en a vne fois gousté, & qui en a

Au liure
7. de l'institution
de
Cyrus.

D quelque experience, s'en va par tout chantant ces vers de Sophocles,

Des Muses furieux desir
Est venu le mien cœur saisir:
Ie vois à la cyme du mont,
Où de la lyre me semont
La melodieuse harmonie.

Vn Thamyris, comme l'on diët en commun prouerbe, n'est il pas transporté de son entendement, & n'est rauy d'autre chose, ny vn Eudoxus, vn Aristarchus, vn Archimedes: car veu que ceux qui se delectent de l'art de peindre, prennent si grand plaisir à l'elegance de leurs ouurages, que Nicias iadis peignant l'euocation & coniuration des ames des trespassez, qui est en l'Odysee d'Homere, estoit si affectionné apres,

Que l'on ne sçauroit viure ioyeusement

qu'il demandoit souuent à ses gens s'il auoit disné: & quand la peinture fut paracheuée, E
le Roy d'Ægypte Ptolomee luy en enuoya presenter soixâte talents, qui vallēt trente
six mille escus: lesquels il refusa, & ne voulut oncques vendre son ouurage. Quelles
doncques & combien grandes voluptez deuons nous estimer que recueilloit de la
Geometrie & de l'Astronomie vn Euclides, quand il escriuoit ses propositions de Per-
spectiue, & Philippus quand il composoit les Demonstrations des diuerſes formes &
figures que montre la Lune: & Archimedes quand il inuenta par le moien de l'instru-
ment qui s'appelle l'Angle, que le diametre, c'est à dire le trauers du corps du Soleil, est
la mesme partie du plus grand cercle, q̄ l'angle, par où on le voit, l'est des quatre droicts:
& Apollonius & Aristarchus, qui ont esté inuenteurs de semblables propositions,
dont l'intelligence & contemplation apportent encore aujourdhuy de grandes vo-
luptez, & merueilleuse hautesse de cœur & magnanimité à ceux qui les peuuent enten-
dre? Et ne meritent pas les ordes & ſalles voluptez des cuyſines & bourdelages d'estre
comparees à celles cy, en contaminant le ſainct mont de Helicon & les Muses, F

Là où pasteur n'ozā iamais mener
Aucun troupeau paistre ny promener,
Et où le fer, dont les arbres on tranche,
Ne couppa onc pas vne ſeule branche.

Car ces plaisirs la ſont les vrayes pastures impollues des gētilles abeilles ſans ſaouillure
quelconque, là où celles du corps reſſemblent proprement aux demangeaiſons &
grattements des boucs & des pourceaux, qui outre le corps, empliffent encore de leurs
ordures la partie ſenſuelle de l'ame, ſubicte à toutes paſſions & perturbations. Il eſt
bien vray que le deſir & la cupidité de iouir des voluptez eſt paſſion hardie & auda-
cieuſe à entreprendre choſes diuerſes: mais encore ne ſ'eſt il poſnt trouué iuſques icy
d'amoureux, qui pour auoir couché avec ſon amie, ait ſacrifié vn bœuf: ny pas vn
gourmand qui ſouhaittaſt de ſe pouuoir emplir vn iour à cœur ſaoul des viandes deli-
cieuſes, confitures & paſtiſſeries que l'on ſert aux Roys, à la charge de mourir incon- G
tinent apres: là où Eudoxus ſouhaittoit & faiſoit prieres, qu'il peuſt veoir de pres le
Soleil, comprendre ſa forme, ſa grandeur, & ſa beauté, & puis en eſtre brulé, comme
fut Phaëthon: Pythagoras, pour la preuue d'vne proposition qu'il auoit inuentee, ſa-
crifia vn bœuf aux Muses, ainſi comme eſcrit Apollodorus,

Pythagoras apres qu'il euſt trouué
Le noble eſcript, pour lequel bien prouué
Il feit d'vn bœuf ſolennel ſacrifice.

Soit que ce fuſt la proposition par laquelle il montre que la ligne qui regarde l'angle
droict d'vn triangle, a autant de puissance comme les deux qui l'environnent: ou bien
celle par laquelle il meſure l'air de la ſection parabolique de la Pyramide ronde. Et Ar-
chimedes qui eſtoit ſi ententif à traſſer les figures de Geometrie, qu'il falloir que ſes
ſeruiteurs l'en retiraffent par force, pour le mener huiller & lauer en l'eſtuue: encore H
quand il eſtoit là, traſſoit il avec l'eſtrille dont on le frottoit, des figures ſur la peau de
ſon ventre: & vn iour ainſi comme il ſe baignoit aiant inuenté le moien, par lequel il
pourroit aduerer combien l'orfeure auoit derobbé d'or en la façon de la couronne,
que le Roy Hieron luy auoit baillee à faire, ne plus ne moins que ſ'il euſt eſté ſoudai-
nemēt eſpris & rauy de quelque fureur inſpiree & diuine, il ſortit hors du bain, cryant
ça & là, ie l'ay trouué, ie l'ay trouué, par pluſieurs fois: là où iamais nous n'entendiſ-
mes qu'il y euſt aucun friand ny gourmand, qui allaſt de ioye cryant par tout, l'ay
mangé l'ay mangé: ny amoureux, l'ay baiſé, l'ay baiſé: combien qu'il y ait eu par le
paſſé, & qu'il y ait encore de preſent, dix mille fois dix mille, c'eſt à dire, innombrables
hommes diſſolus: ains au contraire, nous deteſtons ceux qui avec trop de monſtre
d'affection ſont des cōptes de leurs feſtins, comme gens qui ſont trop de cas de baſſes
& indignes

A & indignes voluptez, que l'on deust auoir en mespris : là où au contraire en lisant les escripts d'un Eudoxus, d'un Archimedes, d'un Hipparchus, nous sommes ravis comme eux d'un celeste & diuin plaisir, & adioustons foy au dire de Platon, qui escrit, que les arts Mathematiques estans mesprisées & delaisées par ignorance, à faute de les entendre, neantmoins pour la grace & le plaisir qu'elles ont, encore viennent elles en auât, en despit des ignorans. Toutes lesquelles voluptez si grandes, & en si grand nombre, tousiours coulantes comme vne riuere continuelle, ces hommes icy destournent & deriuent ailleurs, pour empescher que ceux qui s'approchent d'eux, & prestent l'oreille à leur doctrine, n'en tastent, ains leur commandent que leuant tous leurs appareils, ils les fuyent à pleines voiles. Qui plus est, tous ceux de ceste secte, tant hommes que femmes, prient & supplient Pythocles par Epicurus, qu'il ne face compte quelconque de tous ces arts que nous appellons liberaux. Et en loüant vn ie ne sçay quel Apelles, entre autres belles qualitez qu'ils luy attribuent, ils mettent, que dès son commandement il s'estoit abstenu d'estudier es arts Mathematiques, & n'en auoit iamais esté fouillé ny contaminé. Quant aux histoires (pour ne dire point comme de toutes autres sciences ils n'ont iamais rien ouy ne veu) i'all'gueray seulement ce que Metrodorus escrit là où il parle des Poëtes : N'ayes point, dit-il, de honte, & ne pense point que ce soit vergongne de confesser, que tu ne sçis desquels estoit Hector, des Grecs ou des Troyens, ny comment il y a aux premiers vers d'Homere, & te foucies aussi peu de ceux qui sont au milieu. Or a bien Epicurus entendu que les voluptez corporelles, ne plus ne moins que les vents anniuersaires qui soufflent du Septentrion durant les iours caniculaires, se vont passant, & cessent en fin totalement, apres que la fleur de l'aage de l'homme est passée : & pourtant il fait vne question, à sçauoir si le sage estant deuenü vieil, & ne pouuant plus auoir compagnie de femme, prend encore plaisir à toucher, taster, & manier les belles personnes, estant en cela bien loing de la sentence du sage Sophocles, lequel disoit, qu'il estoit bien aise d'estre eschappé des liens de l'amour & de la volupté, comme du ioug & de la chaine d'un maistre violent & furieux. Mais à tout le moins falloit-il que ces voluptueux icy, voyans que la vieillesse desseche & fait tarir plusieurs voluptez corporelles, & que

Dame Venus aux vieux est courroucée, comme dit Euripides, feissent prouision de ces autres voluptez icy spirituelles, comme de viures secs, non subiects à pourriture ny à corruption, pour attendre & soutenir vn siege, & que leurs festes de Venus & leurs lendemains fussent de passer leur temps à lire quelques plaisantes histoires, ou quelques beaux poëmes, ou quelque belle speculation de Musique, ou de Geometrie : car il ne leur seroit iamais venu en pensée, de mettre en auant ces attrouchemens & maniemens-là, qui n'ont plus ny dents, ny yeux, en maniere de parler, & ne sont plus que allechemens & prouocations de luxure amortie, fils eussent appris à escrire d'Homere & d'Euripide, à tout le moins comme Aristote, Heraclides, Dicæarchus en escriuent : mais ne festans iamais souciez de faire munition & prouision de tels viures, & toute leur vie au demourant estant mal-plaisante, aride & seiche (comme eux disent de la vertu) voulans tousiours estre en voluptez continuelles, & le corps n'y pouuant plus fournir, ils font des choses vaillaines & deshonestes hors de temps & de saison, par leurs confessions mesmes, s'efforceans de resueiller & resusciter la memoire de leurs voluptez anciennes : & se seruans de ces vieilles-là à faute d'autres plus fresches, comme fils les eussent gardees en composte salees toutes mortes, & en veulent rallumer d'autres expirees en leur chair, qui est desormais comme vne cendre froide contre la nature, à faute d'auoir faict prouision en leur ame d'aucune douceur qui luy soit propre, avec resiouissance digne d'elle. Et quant au reste des plaisirs spirituels, nous en auons

Que l'on ne sçauroit viure ioyeusement

dit ce qui nous est venu en pensée de dire : mais quant à la Musique qui donne à E l'homme tant & de si grandes delectations, laquelle neantmoins ils fuyent & reiettent, il ne seroit pas possible de l'oublier ny passer sous silence, quand bien on le voudroit, pour les impertinences & absurditez grandes qu'en met Epicurus. Car en ses questions il maintient que le sage est grand amateur de tous spectacles, & plus que nul autre curieux & affectionné de veoir & ouyr les passetemps que l'on faict es Theatres durant les festes de Bacchus : & neantmoins il ne veut pas donner lieu aux disputes & questions des lettres humaines, non pas seulement à la table quand on dîne ou que l'on soupe, ains conseille aux Roys amateurs des lettres, de faire plus-tost lire des ruzes de guerre, & d'ouyr des bouffonneries & plaisanteries à leurs tables, que non pas des propos & disputes de la Musique, ou de l'art Poétique : ainsi l'a-il escrit en son liure de la Royauté, comme s'il escriuoit à vn Sardanapalus, ou à vn Naratus, qui fut iadis Satrape & gouuerneur du pais de Babylone. Car iamais Hieron, Attalus & Archelaus ne se fussent laissez persuader, qu'ils deussent faire le- F uer de leurs tables vn Euripides, vn Simonides, vn Melanippides, vn Crates, vn Diodotus, pour y faire seoir en leurs places vn Cardax, vn Agriante, ny vn Callias bouffons & plaisans, & des Thrasionides & Thrasyleons, qui ne sçauoient autre chose que faire rire, en contrefaisant des lamentations & gemissemens, ou bien des applaudissemens & battemens de mains : & si le premier Ptolomeus qui assemblea vn college d'hommes de lettres, eust rencontré ces beaux enseignemens-là & ces belles instructions Royales, n'eust-il pas dit aux Samiens cela, ô Muse, d'où vient ceste enuie? car il n'est point bien seant à nul Athenien de hair ainsi & faire la guerre aux Muses: mais comme dit Pindare,

Ceux qui ne sont point des esleus
De Iupiter bien-voulus,
Tressaillent de peur, & seffroyent
Quand la voix des Muses ils oyent.

Que dis tu Epicurus? tu vas dès le fin matin au theatre pour ouïr les sons des ioüeurs de cithres & de fleutes, & si en vn banquet il aduient qu'un Theophrastus discoure des accords de la Musique, ou vn Aristoxenus des nuances, ou vn Aristophanes des œuvres d'Homere, bouscheras tu tes oreilles avec les deux mains, de peur de les ouyr, pour la haine & pour l'horreur en quoy tu les as? N'y a-il pas plus d'apparence & plus d'honnesteté, en ce que l'on recite du Roy de Scythie Atreas, lequel comme l'excellent ioüeur de fleutes Ismenias eust esté pris prisonnier de guerre, & eust ioüé deuant luy durant son souper, iura qu'il prendroit plus de plaisir à ouyr hennir son cheual? & puis ils ne veulent pas aduouër quand on leur obiice qu'ils ont la guerre iurée, sans esperance de trefue ny de paix, avec toute gentillesse & toute hon- H nesteté. Et si vous en ostez la volupté, qu'y a il plus au monde de venerable, de saint, de pur & de net, qu'ils aiment, ne qu'ils embrassent? n'eust il pas esté plus rai- sonnable pour viure ioyeusement, de rebuter & fuir les senteurs & les parfums, comme font les escharbots & les vautours, que non pas les propos & deuils des lettres humaines, & de la Musique? Car quelle fleutte ou auboïs, ne quelle cithre bien accom- modée pour chanter dessus,

Quelle chanson de Chorus enuoyee
Hors de la bouche à gorge desployee,
Par gens en l'art de chanter tres sçauans,

donna oncques tant de resiouyssance à Epicurus, ou à Metrodorus, cōme faisoient à Aristote, à Theophrastus, à Hieronymus & à Dicearchus les discours, les regles & preceptes des chors ou charoles, & les questions touchant les instrumēts des auboïs, touchant les proportions, les consonances & accords? comme pour exemple, quand ils

- A ils enqueroient la cause, pourquoy c'est que de deux tuyaux de fleutes, egaux au demourant, celui qui est plus estroit de petuits d'emboucheure, rend le son plus gros: & pourquoy est-ce, q̄ si l'on desbouché & descouvre les trous elle deuient plus hautaine de son, & si l'on les bousche & rouure, elle en sonne plus bassement: autant en fait-elle quand elle est ioincte & approchée d'une autre, & à l'opposite quād elle est disioincte & separee, elle sonne plus haut & plus aigu: & pourquoy est-ce, que si lon seme par la place de la scene où iouent les ioueurs en vn theatre, de la balle, ou bien de la poulfiere, le peuple en est tout assourdy & n'en entend si bien la voix: & comme Alexandre voulust en la ville de Pelle faire le deuāt de la scene du theatre tout de bronze, l'Architecte ne le voulut pas permettre, par cequil dit q̄ cela gasteroit la voix des ioueurs: & pourquoy est-ce qu'en la musique le genre harmonique resserre & attriste, & le chromatique dilate & resioiit? Et puis les mœurs & naturels des hommes que les poètes representent en leurs escripts, leurs ingenieuses fictions, la difference de leurs stiles, les
- B solutions des doubtes & questiōs que l'on faict dessus, outre la delectation, gentillesse & beauté qu'elles ont, encores aportent-elles quant & quant ie ne sçay quelle efficace de persuader, dont chascun se peut seruir à son profit: tellement qu'elles pourroient, comme dit Xenophon, faire oublier iusques à l'amour mesme, tant ceste volupté a de puissance: de laquelle ces Epicuriens icy n'ont aucun sentiment, ny aucune experience, ny n'en veulent auoir, qui pis est, comme ils disent eux-mesmes, tendans toute la partie contemplatiue de l'ame à ne penser à autre chose qu'au corps, & la tirant à fond contrebas avec les cupiditez sensuelles & charnelles, ne plus ne moins que les filets des pescheurs avec de petits rouleaux de plomb, faisans comme les palefreniers ou bergers qui mettent deuant leurs bestes du foin, ou de la paille, ou de quelque herbe, comme estant la propre pasture des animaux qu'ils ont en charge. Car n'est-il pas ainsi qu'ils veulent engraisser l'ame, cōme on faict des pourceaux, avec les voluptez du corps, entant qu'ils veulent qu'elle se resioiisse de ce qu'elle espere,
- C que le corps en aura bien tost iouissance, ou bien qu'elle a souuenance de celles que elle a iouyes par le passé, & ne luy permettent pas qu'elle perçoie aucune particuliere douceur, ny aucune propre delectation à elle seule? Et toutefois peut-il estre chose plus estrange & plus hors de toute apparence de raison, que y aiant deux parties desquelles l'homme est composé, l'ame & le corps, & l'ame estant en plus digne degré, dire que le corps ait vn bien propre & particulier à luy selon nature, & que l'ame n'en ait point, ains qu'elle demeure oyisive à regarder le corps, en regardant aux passions & affections d'iceluy, en s'esioiissant avec luy seulement, sans que d'elle mesme originellement elle ait aucun mouuement, ny aucune election, ny aucun desir, ny aucune ioye? car il falloit, en se descourant tout rondement & simplement, dire, que l'homme fust tout chair, comme font aucuns qui nyent, tout à plat, qu'il y ait aucune substance spirituelle, ou bien en laissant
- D deux natures differentes en nous, y laisser aussi quant & quant à chascune son bien & son mal, son propre & naturel, & son estrange & contre-naturel, comme entre les cinq sens naturels vn chascun est bien destiné & approprié à vn certain subiect sensible, encore qu'ils soient tous fort compassibles & consentans les vns aux autres. Or est-il que le propre sentiment de l'ame est l'entendement, & le dire qu'il n'ait aucun propre subiect, ny spectacle, ny mouuement, ny affection qui luy soit propre, peculiere & naturelle, il ny auroit point de propos, si ce n'est que d'adventure sans y penser, nous leur mettrions sus des calomnieuses imputations. Alors ie pris la parole & luy dis, Non pas à nostre iugement, car nous t'absoluons de toute action d'iniure, & pourtant poursuy hardiment ton propos iusques à la fin. Comment (dit-il) Aristodemus ne me succedera-il doncques pas, si d'adventure tu es du tout las de parler? Ouy bien certes, respondit Aristodemus, mais ce sera quand tu te

Que l'on ne sçaueroit viure ioyeusement

trouueras las & recreu comme cestui-cy : mais maintenant attendu que tu es encore E tout frais & vigoureux , mon bon amy , ne t'espargne point pour ne donner à penser , que ce soit mignardise qui te fait fuir la lice. Certainement, dit adonc Theon, c'est bien peu de chose & tresfacile , que ce qui reste : car il ne reste plus qu'à monstrier & raconter , combien il y a de ioyes & de voluptez en la vie actiue. Or confessent-ils eux mesmes , qu'il y a trop plus de plaisir faire du bien à autrui , que non pas à en receuoir d'autrui : & est vray que l'on peut faire bien de paroles mesmes , mais le plus souuent & principalement de faict , ainsi comme le nom mesme de benefice & de bien faire le donne à cognoistre , & eux-mesmes le tesmoignent, comme nous oyons reciter & recorder à cestui-cy , alleguant les paroles que profera , & les missiues que escriuit Epicurus à ses amis , hault-loüant & magnifiant Metrodorus , de ce que vaillamment & hardiment il descendit de la ville d'Athenes iusques au port de Pirée , pour secourir Mithres le Syrien , encore qu'il ne feist rien en ceste saillie-là. Quelles doncques & combien grandes voluptez deuons nous estimer qu'estoient celles de F Platon , quand Dion sortant de son eschole & de sa discipline , alla ruiner le tyran Dionysius , & deliurer la Sicile ? & quelles ioyes deuoit sentir Aristote quand il feist r'edifier la ville de sa naissance qui estoit toute par terre , & feist rappeler ses citoyens qui en estoient tous chassez & bannis ? & quelles Theophrastus & Phidias , qui ruinerent les tyrans qui auoient vsurpé la domination de leur pais ? car combien d'hommes en particulier secoururent-ils , non point en leur enuoyant vn boisseau de bled ou de farine , comme Epicurus en enuoya à quelques-vns , mais en faisant que ceux qui estoient bannis de leur pais , & chassez de leurs maisons & de leurs biens , y peussent retourner & rentrer , & que ceux qui estoient prisonniers aux fers , en fussent deliurez , & ceux qui estoient priuez de leurs femmes & de leurs enfans , les peussent recouurer ? Qu'est il besoing de vous en dire d'auantage , à vous qui le sçauiez certainement ? Mais quand ie le voudrois , si me seroit il impossible de passer par dessus l'impudence & impertinence de cest homme , lequel mettant sous les pieds , & mesprisant les G faicts de Themistocles & de Miltiades , escriuoit de luy à ses amis en ceste sorte :

- » Quand aux bleds que vous nous auez fournis & enuoyez , vous auez vaillamment &
- » magnifiquement monstrier le soing que vous auez de nous , & auez declare par signes
- » qui montent iusques au ciel , l'amour & bien-veillance que vous me portez. de maniere que qui osteroit vn peu de bleds de la missiue de ce Philosophe , les paroles sont au reste couchees , comme si c'estoit pour remercier quelqu'un d'auoir sauue toute la Grece , ou bien d'auoir deliure ou preserue tout le peuple d'Athenes. Je ne me veux point amuser à deduire , que pour les voluptez corporelles la nature a besoing de grands frais & grosse despenfe , & que le plaisir qu'ils cherchent , ne gist point en gros pain bis ny en potage de lentilles : ains requierent les appetits de ces voluptueux icy des viandes exquisés , des vins delicieux , comme sont ceux de Thasos , des delicates senteurs & odeurs precieuses de parfums , des patisseries , tartres & gasteaux H bien destrempez avec la liqueur de l'abeille au roux pennage : & par dessus tout cela , encore de belles ieunes femmes , comme vne Leontion , vne Boidion , vne Hedidia , vne Nicedion , qu'il entretenoit & nourrissoit en son verger de plaissance : mais au demourant quant aux ioyes & lieses de l'ame , il n'y a celuy qui ne die & ne confesse , qu'il faut qu'elles soient fondees sur la grandeur de quelques actions , & la beaulté de quelques œures memorables , si nous ne voulons qu'elles soient trouuees frivoles , basses & pueriles , ains au contraire qu'elles soient reputees graues , constantes & magnifiques. Mais de se vanter & exalter pour s'estre laissé aller à toute dissolution de voluptez , comme feroient des matelots & mariniers qui auroient celebré la feste de Venus , & de faire gloire de ce qu'estant malade de l'espece d'hydropisie que les medecins appellent ascites , il ne laissoit pas de faire des festins & assemblees de ses amis , & qu'il

A & qu'il ne craignoit point d'adiouster encore de l'humeur d'auantage à son hydro-
pisie, & qu'il se fondoit d'une certaine espece de ioye meslee avec larmes, quand il se
souuenoit des dernieres paroles que luy auoit dittes son frere Neocles à son trespas:
il est certain que nulle personne de sain entendement n'appellera iamais ces sottises
là lieses ny ioyes, mais s'il y a aucun rire qui se doie nommer Sardonien, qui soit
propre à l'ame, c'est à mon aduis en telles resiouissances forcees & meslees de larmes:
toutefois qui les voudra appeller ioyes & lieses, qu'il compare à l'encontre ces au-
tres icy, & qu'il considere de combien sont plus excellentes celles qui sont exprimees
par ces vers :

Par mes conseils de Sparte confondue
En armes a la gloire esté tondue.

Et, Cestuy-cy fut, amy passant, tant comme
Il a vescu, vn clair Soleil de Rome.

B Et, Je ne sçay pas si vn Dieu immortel
Je te doy dire, ou vn homme mortel.

Et quand ie me mets deuant les yeux les hauts faicts d'un Thrasylbulus, d'un Pelopi-
das ou d'un Aristides, en la iournee de Platees, ou d'un Miliades en celle de Mara-
thon, alors ie suis rauy hors de moy-mesme, comme parle Herodote, & contrainct
de dire, que selon mon aduis il y a en la vie actiue de ceux qui font ainsi tant de beaux
actes heroïques, encore plus de ioye & de douceur que non pas de gloire & d'honneur
à quoy porte tesmoignage le dire d'Epaminondas mesme, lequel asseuroit, que le plus
doux contentement qu'il eust eu en toute sa vie, estoit, que son pere & sa mere viuans
voyoient le trophée de la bataille de Leuctres, qu'il auoit gaignee contre les Lacede-
moniens, estant Capitaine general des Thebains. Or comparons maintenant à la mere
d'Epaminondas, celle d'Epicurus, laquelle deuoit estre bien aise de veoir son fils caché
au fond d'un delieieux iardin, & verger de plaissance: là où il faisoit des enfans à moi-
tié avec son familier Polyænus, à vne courtesane natifue de la ville de Cyzique: car
que la mere & la sœur de Metrodorus fussent excessiuement ioyeuses de ce qu'il se-
stoit marié, on le peut voir par les liures & missiues qu'il escrit à son frere, & neant-
moins ils vont par tout criant, qu'ils ont vescu ioyeusement, & ne font autre chose
que magnifier & exalter la delicatessé de leur vie, ne plus ne moins que les esclaves,
quand ils solemnisent la feste de Saturne, soupans ensemble, ou qu'ils celebrent celle
de Bacchus, courans çà & là, il n'est homme qui peult supporter leurs cryeries, & le
bruit qu'ils menent en faisant & disant à qui mieulx mieulx de telles lourderies:

Que chommes-tu, ô pauvre miserable?
Boy moy d'autant: la viande est sur table,
Fais bonne chere, & ne t'espargne point.

D Apres ces mots les autres d'un cry ioint
Se prennent tous à demener grand' feste:
L'un verse à boire, & l'autre sur sa teste
Met vn chapeau de fleurs, l'autre tenant
Vn laurier verd en sa main, entonnant
Avec sa voix rude & mal-acordante,
Quelque chanson rurale à Phœbus chante:
L'autre poulsant la porte prend deduit
A tenir hors sa compagne de liêt.

Ne vous semble-il pas que ces sottises-là ressemblent proprement aux lettres missiues
que Metrodorus escrit à son frere en ces mots? Il n'est ia besoing de s'aller exposer
aux dangers de la guerre, pour le salut de la Grece, ny se tuer le cœur & le corps pour
obtenir des Grecs vne couronne en tesmoignage de sapience, Timocrates, ains faut

Que l'on ne sçauroit viure ioyeusement

" boire de bon vin, se traiter bien, & manger, de sorte que le corps en reçoie tout E
" plaisir, & point de dommage. Et puis en vn autre passage de ces mesmes escripts il dit,
" O que ie suis ioyeux, & comme ie me glorifie d'auoir appris d'Epicurus à gratifier à
" mon ventre, ainsi comme il faut ! car à la verité, le bien souuerain de l'homme, ô Phy-
" sicien Timocrates, consiste au ventre. Brief, ces hommes icy descriuent, limitent &
terminent toute la grandeur de la volupté humaine au ventre, comme à l'entour de
son centre & sa circonference, & n'est pas possible que iamais ils participent d'une
ioye grande, royale & magnifique, ne qui apporte vne magnanimité & hautesse de
courage, vne splendeur de gloire, vne tranquillité d'esprit qui s'espanse en tout &
par tout, attendu qu'ils ont esleu vne vie cachee qui ne se monstre point au dehors,
sans se vouloir entremettre des affaires publiques, sans offices d'humanité, qui n'est
rauie & inspiree ny du desir de faire honneur, ny de bien faire à autrui, & meriter de
la Chose publique: car l'ame n'est point chose petite, ny basse & vile, qui estende ses
cupidez seulement iusques à ce qui est bon à manger, comme font les poulpes leurs F
bras: car ces cupiditez-là sont incontinent rassasies, & saoules en vn moment d'heu-
re: mais depuis que les eslans & mouuements de l'ame, tendans à l'honneur & à la
gloire, & au contentement de la conscience d'auoir bien fait, sont vne fois venus à
leur vigueur & perfection, alors ils ne prennent plus pour leur terme de duree seule-
ment la longueur de la vie humaine, ains le desir d'honneur, & l'enuie de profiter à la
communauté des hommes, embrassant toute l'eternité, s'efforce d'aller tousiours en
auant, avec des actions qui leur donnent des ioyes & voluptez impossibles à expri-
mer, desquelles les grands personnages & gens de bien ne se peuuent iamais despe-
strer, encore qu'ils les fuyent, pource qu'elles les enuironnent de tous costez, & leur
viennent de tous costez au deuant, quand ils ont par leurs bienfaits resiouy beau-
coup de gens,

Chascun regarde vn tel homme en la face,

Ainsi qu'un Dieu, quand par la ville il passe.

Car celui qui a tellement disposé les autres enuers soy, qu'ils s'esioüissent & tressail-
lent d'aïse quand ils le voyent, qu'ils desirent le toucher, le saluer & parler à luy, il est
tout manifeste, voire à vn aueugle, que celui-là sent en soy-mesme de grandes vo-
luptez, & qu'il ioüist d'un tref-doux contentement. voyla d'où vient que iamais ils ne
se lassent ny se fâchent de seruir & profiter au public, ains entend-on tousiours de leurs
bouches de tels propos,

Ton pere t'a en ce monde produit,

Pour aux humains porter beaucoup de fruit.

Et, Ne nous lassons iamais de profiter

Au genre humain, ny d'en bien meriter.

Et n'est ia besoing de parler de ceux qui ont esté extrêmement gens de bien: car si
à quelqu'un de ceux qui ne sont pas du tout meschans, sur le poinct qu'il seroit H
prest à mourir, celui en la puissance duquel il se trouueroit, fust ou vn Dieu ou vn
Roy, luy donnoit vne heure de respit, luy permettant de l'employer auquel il vou-
droit, ou à executer quelque acte memorable, ou à prendre son plaisir, pour incon-
tinent apres l'heure passée s'en aller recevoir la mort, qui seroit celui qui aimeroit
mieux en ce peu de temps de respit, coucher avec sa courtisane Laïs, ou bien boire
du vin Aruisien, que de tuer le tyran Archias, pour deliurer de tyrannie la ville de
Thebes? Quand à moy ie pense qu'il n'y a homme si perdu, qui n'aimast mieux l'un
quel'autre: car mesme ie voy entre les gladiateurs & escrimeurs à outrance, ceux
qui ne sont pas du tout brutaux & sauages, ains Grecs de nation, quand il leur
faut entrer en l'arene & au camp clos, encore qu'on leur presente lors plusieurs viures
& fort delicieux, si aiment-ils mieux recōmander leurs femmes & leurs enfans à leurs
amis

A amis, & affranchir leurs esclaves, que non pas complaire à leurs ventres & appetits sensuels. Mais encore supposons que ce soit chose grande que des voluptez corporelles, elles sont aussi bien communes à ceux qui s'entremettent des affaires publiques: car comme dit le poëte,

Ils mangent pain & boient vin vermeil,

& banquettent avec leurs amis, beaucoup plus alaigrement & plus ioyeusement, à mon aduis, apres qu'ils sont retournez de leurs combats, ou autres grands exploits, comme Alexandre & Agésilas, voire certes Phocion & Epaminondas, que non pas ceux icy qui se sont huylez au long du feu, ou qui se sont branlez tout doucement en leurs brandilloires, en se mocquant de ceux qui ont la fruition de ces autres plus grandes & plus nobles voluptez. Car que diroient-ils d'Epaminondas, lequel estant conuié à souper chez vn sien amy, quand il veit que l'appareil qu'il y auoit, estoit plus grand que ses facultez ne portoient, il n'y voulut pas demourer à souper, disant,

B le pensois que tu sacrifiasse aux Dieux, non pas que tu feisses du prodigue: & veu qu'Alexandre le grand refusa les cuysiniers & patissiers de la Roynie de Carie Ada, en disant qu'il en auoit de meilleurs, à sçauoir, pour le disner, le leuer matin & cheminer auant iour: & pour le souper, le peu disner: & Philoxenus qui luy auoit escrie de deux beaux ieunes garçons, s'il vouloit qu'il les achetast pour les luy enuoyer, il ne s'en fallloit gueres qui ne le deposast de son gouuernement: & toutefois qui le pouuoit mieux faire que luy? Mais comme Hippocrates dit, qu'un labeur & vne douleur moindre est offusquee par vne plus grande: aussi les voluptez qui procedent des vertueuses & honorables actions, obteureissent & amortissent de leurs ioyes & grandeurs celles qui prouiennent du corps: & s'il est ainsi, comme disent ces Epicuriens icy, que la souuenance des plaisirs que l'on a receu par le passé, soit vn grand moyen pour viure ioyeusement: il n'y a celuy de nous qui peult adiouster foy à Epicurus, que mourant en de tresgriefues douleurs & de tresdouloureuses maladies,

C il reconfortoit son tourment & ses angoisses par la souuenance des voluptez qu'il auoit autrefois iouyes: car il seroit plus aisé de veoir l'image de sa face au fond d'une eau agitée, & en vne tourmente, que de ramener en son entendement la memoire riante d'une volupté pieça passée, en vne si grande fiebvre & si grieve laceration du corps: là où l'homme ne sçauoit chasser arriere de soy, encore qu'il le voulust, la souuenance de ses louables & vertueuses actions. Car comment eust iamais Alexandre peu perdre la memoire de la iournee d'Arbeles, ou Pelopidas oublier comment il auoit desfait le tyran Leontiades, ou Themistocles la iournee de Salamine? car quant à celle de Marathon, les Atheniens la festent & solemnisent encore iusques aujour d'huy: & les Thebains, celle de Leuctres: & nous mesmes vrayement celle que Diophantus gaigna pres la ville de Hyampolis, comme vous sçavez: car nous la festons encore, & est tout le pays de la Phocide ce iour-là tout plein de sacrifices,

D & d'honneur que l'on fait à sa memoire, & n'y a celuy de nous qui soit si aisé de ce qu'il boit & qu'il mange, comme furent ceux qui gaignerent celle victoire. On peut doncques penser quelle ioye, quelle liesse & quel contentement accompagnerent toute leur vie ceux qui executerent ces haults faicts d'armes-là, veu qu'apres cinq cens ans, & plus, la memoire d'iceux en est encore conioincte avec grande resjouissance. Et toutefois encore confessoit Epicurus, que de la gloire il naissoit ie ne sçay quoy de volupté. Et comment eust-il peu faire de moins, veu que luy-mesme l'appetoit si furieusement, & haletoit apres si desesperement, que non seulement il desaduouoit ses maistres & precepteurs, & contestoit à l'encontre de Demetrius, à qui il auoit desrobbe toutes ses doctrines, sur quelques syllabes ou quelques poincts, & maintenoit qu'il n'y auoit iamais eu homme sage ny sçauant que luy, & ceulx qui auoient appris de luy? & qui plus est, il a bien eu l'impudence de dire, que Colotes

Que lon ne ſçauroit viure ioyeuſement

l'adoroit, en luy embrassant les genoux, quand il l'entendoit discourir des causes naturelles, & que ſon frere Neocles affermoit dès qu'ils eſtoient enfans, que iamais homme n'auoit eſté ſi ſage ſi ſçauant qu'Epicurus, & que ſa mere eſtoit bien-heureuſe, laquelle auoit porté en ſon ventre tant d'Atomes, c'eſt à dire tant de petits corps indiuiſibles, qui auoient, en ſ'amaffant enſemble, formé vn ſi ſçauant perſonnage. N'eſt-ce pas doncques ne plus ne moins que Callicratidas diſoit anciennement, que Conon adulteroit la mer, auſſi qu'Epicurus honteuſement & à cachettes faiſoit l'amour à la gloire, & taſchoit à forcer & corrompre l'honneur, pour ce qu'il n'en pouuoit iouir ouuertement, & ſi en eſtoit amoureux & paſſionné de deſir? Car tout ainſi que le corps humain en temps de famine, d'autant qu'il n'a point de nourriture d'ailleurs, eſt contrainct d'en prendre de ſa propre ſubſtance contre nature: auſſi l'ambition fait vn grand mal-és-ames des ambitieux: car mourans de ſoiſ de gloire, & voyans qu'ils n'en peuuent auoir d'ailleurs, elle les contrainct de ſe louer eux-meſmes: mais ceulx qui ſont ainſi paſſionnez de la cupidité d'honneur & de gloire, ne confeſſent-ils pas manifeſtement, qu'ils reiettent de grandes louanges par leur laſcheté & foibleſſe de cœur, en fuyant les charges publiques, le maniment des affaires, & le hanter aupres des grands, de là où Democritus diſoit que tous biens eſtoient venus en la vie des hommes? car il ne pourroit iamais perſuader au monde, que veu qu'il eſtimoit tant & faiſoit ſi grand compte du teſmoignage de Neocles, & de l'adoration de Colotes, que ſil euſt eſté receu en la feſte & aſſemblée des ieux Olympiques avec acclamations de ioye & battemens de mains, il ne fuſt ſorty hors de ſoy, tant il en euſt eu de ioye, & qu'il ne ſ'en fuſt allé brayant d'aïſe parmy les rues comme vn fol, ainſi que dit le poëte Sophocles,

Comme le vent ſouffle à ſon abandon

Le dubet blanc du vieux chenu chardon.

Et ſi c'eſt choſe agreable de ſçauoir que l'on a bon nom, il faut conſequemment auſſi confeſſer, que c'eſt choſe faſcheuſe de ſentir que l'on ait mauuais nom: or n'y a-il rien plus infame, ne qui donne plus mauuiſe reputation, que de n'auoir point d'amis, ne ſe vouloir meſſer de rien, ne croire, ny ne craindre point les Dieux, viure en toute diſſolution, paſſer ſa vie ſans rien faire. Or eſt il que tous les hommes viuans, exceptez eux, tiennent que toutes ces qualitez conuiennent à ceux de ceſte ſecte-là. Il eſt vray, dira quelqu'un, mais c'eſt à tort. Tant y a que nous ne diſputons pas maintenant de la verité, mais de la publique opinion que l'on a d'eux. Je ne vous veux point alleguer les decrets publiques de villes, ny les liures diffamatoires que l'on a eſcrits contre eux, pource que cela ſeroit trop odieux. Si la charité & dilection de peres & meres enuers leurs enfans, ſi manier les affaires publiques, gouuerner vne armee, auoir authorité de Magiſtrat, ſont choſes honorables & glorieuſes: il eſt force de confeſſer que ceux qui diſent, qu'il ne ſe faut point trauailler pour ſauuer la Grece, ainſi boire & manger, de maniere que le ventre en reçoïue plaïſir, ſans dommage ny deſplaïſir, ſont infames, & doiuent eſtre tenus pour meſchans: & que ſentans qu'ils ſont tenus & reputez pour meſchans, il eſt force qu'ils en ſoient faſchez & qu'ils en viuent mal plaïſamment, ſ'il eſt ainſi qu'ils mettent l'honneur, le bon nom, & la bonne reputation entre les choſes delectables. Apres que Theon eut acheué d'ainſi parler, nous fuſmes d'aduis de ceſſer noſtre promement, & ſuyuant noſtre couſtume nous aſſiſmes ſur des ſieges, là où nous demourâmes vn peu de temps ſans mot dire, rememorans ce que nous auions entendu: car Zeuxippus penſant à ce qui auoit eſté dit, ſe prit à demander, Et qui acheuera ce qui reſte plus à dire? Par ce qu'ayant fait mention en paſſant de la diuination & de la Prouidence Diuine, le discours nous donne à entendre, qu'il neſt pas encore arriué là où il en doit demourer, pource que ce ſont les poincts deſquels plus ſe vantent & ſe glorifient ces gens là, & qui leur donnent plus

- A plus de contentement, plus de repos & de tranquillité d'esprit, & plus d'assurance d'avoir osté tout cela (disent-ils) de la vie des hommes: pourtant seroit il bien nécessaire d'en toucher quelque chose. Aristodemus adonc prenant la parole: Quant à la volupté, dit-il, qu'ils pretendent en cest endroit, il me semble qu'il a esté dit, que si leurs raisons viennent à bout de leur entente, & qu'ils facent ce qu'ils taschent à faire, elles leur ostent bien de l'esprit ie ne sçay quelle crainte des Dieux, & ne sçay quelle superstition, mais aussi qu'elles ne leur impriment ioye, ny liesse quelconque de la part des Dieux, ains qu'elles les rendent tels enuers eux, en ce qu'ils n'en font ny troublez de crainte, ny consolez d'esperance, comme nous sommes enuers les Hyrcaniens, ou les Scythes, n'attendans ny bien ny mal d'eulx: mais fil faut adiouter aucune chose à ce qui a esté dit, il me semble que ie puis prendre cela comme receu & approuué par eux. Premièrement, qu'ils combattent fort & ferme à l'encontre de ceulx qui defendent, que l'on ne monstre sentir aucune douleur, que l'on ne pleure, & que l'on ne souspire à la mort de ses amis, & maintiennent que ceste indolence-là tendant à impassibilité, par maniere de dire, procede d'un autre mal plus grand & plus grief, qui est vne cruelle inhumanité, ou vne rage & furieuse cupidité de vaine gloire: & pourtant qu'il vault mieux en souffrir vn peu & s'en douloir modérément, mais non pas iusques à en fondre en larmes, ny perdre les yeux à force de plorer, ny à monstre toutes ces passions que quelques vns faisans & escriuans veulent qu'on les estime cordiaux enuers leurs amis, & gens de douce humeur & de bonne amitié. Car Epicurus le met en plusieurs endroits de ses escripts, & mesmement en ses missiues, où il fait mention de la mort de Hegesianax, escriuant à Dositheus le pere, & à Pyrson le frere du trespassé: car il n'y a pas long temps que par fortune ces lettres me sont tombees entre les mains, & en imitant leur façon d'arguer, ie dis, que l'impieté d'estre Atheiste, sans Dieu, n'est pas moindre peché que la cruauté ou la furieuse cupidité de vaine gloire, à laquelle impieté nous induisent les persuasions de ceux qui ostent & la grace & le courroux aux Dieux: & pourtant vault-il beaucoup mieux qu'à l'opinion & créance que l'on a des Dieux, il y ait meslee & adioutée vne affection composee de reuerence & de crainte, qu'en fuyant cela ne se laisser à soy-mesme ny plaisir, ny esperance, ny assurance en prosperité, ny recours en aduersité en la bonté des Dieux. Bien est-il vray qu'il faudroit oster de l'opinion que l'on doit auoir d'iceux, la superstition, ne plus ne moins qu'une maille de l'œil: mais fil est impossible, au moins ne fault-il pas pourtant coupper par le pied, ny auengler la foy & la creance que les hommes, pour la plus part, ont des Dieux, laquelle n'est point, comme ils faignent eulx, seuer, triste, ny austere, en calomniant ainsi la Providence diuine, pour la rendre odieuse: ne plus ne moins que l'on fait peur aux petits enfans de l'Empuse, qui est vn fantosme, ou comme si c'estoit vne Furie infernale ou tragique, qui fust ainsi nommee: mais il n'y a point d'hommes qui craignent Dieu, à qui il ne soit beaucoup meilleur de le craindre qu'autrement: car en le craignant comme vn seigneur doux & propice aux bons, & ennemy des meschans, par ceste seule crainte, qui fait qu'ils n'ont point besoing de plusieurs autres, ils sont deliurez des emorces qui attirent les hommes bien souuent à mal faire, & tenant de court le vice comme languissant aupres d'eux, sans le laisser eschapper, ils sont moins tourmètez que ceulx qui osent bien prendre la hardiesse de l'employer & le mettre en besongne, & puis incontinent apres ils en entrent en des peurs, & s'en repentent. Au demourant quant à la disposition enuers les Dieux des communs hommes, qui sont ordinairement grossiers & ignorans, mais non pas fort vicieux ny meschans, il est vray qu'il y a parmy la reuerence & l'honneur qu'ils portent aux Dieux, quelque crainte & treneur, laquelle s'appelle proprement superstition: mais aussi y a il infiniment plus de bonne esperance, & de resiouissance, qui fait qu'ils prient con-

Que lon ne sçauroit viure ioyeusement

tinuellement pour l'heureux succez de leurs affaires, & reçoüët toute prosperité comme leur estant enuoyee des cieus: ce qui se peut monstrier & verifier par signes & arguments tresgrands: car il n'y a esbatteméts qui plus nous recreent que ceux que nous prenons és temples, ny temps plus ioyeux que les festes, & ne faisons ny ne voyons chose quelconque qui plus nous esgaye, que ce que nous faisons nous mesmes en ballant & chantant aux temples des Dieux, ou en assistant aux sacrifices & ceremonies du seruice Diuin: car nostre ame n'est point alors triste, morne, ny melancholique, cōme si elle auoit affaire à quelques tyrans, ou à quelques cruels bourreaux, ains là où plus elle estime & se persuade que Dieu soit, c'est là où plus elle dechasse arriere de soy tous ennuis, toutes craintes & tous soucis, & se donne à toute resiouissance, iusques à boire d'autant, à iouer & à rire, comme dit le poëte en parlant de l'amour,

Et le vieillard & la vieille hydeuse,
Se souuenans de Venus amoureuse,
De ioye encor' tressaillent en leur cœur.

Mais aux pompes des processions, & aux sacrifices non seulement le vieillard & la F
vieille, le pauvre & l'homme de bas estat, mais aussi

La garce esclaué à la cuisse refaite,
Qui à tourner vne meule est subiecte,

les serfs domestiques, les maneuures qui viuent de la sueur de leur bras, au iour la iournee, tous entierement s'en releuent d'aïse & de ioye. Les Princes & Roys tiennent bien maisons ouuertes & cour pleniére quelquefois à tous venâs, & font des festins publics: mais ceux qui se font és sacrifices, festes & solemnitez des Dieux, parmy les parfums & encensements, là où il semble aux hommes qu'ils touchent & hantent de plus pres avec eux, en tout honneur & toute reuerence: tels honneurs, tels festins, dis-je, donnent bien vne ioye plus rare, & vne delectation plus singuliere, ausquelles n'a part aucune celuy qui n'a foy ne fiance quelconque en la prouidence Diuine: car ce n'est pas la quantité du vin qui sy boit, ny la rostifférie des bonnes viandes que l'on y mange, qui donnent la ioye en telles festes, ains l'assurance & la persuasion que G
Dieu y est present, propice & fauorable, & qu'il prend en gré l'honneur & le seruice qu'on luy fait: car il y a bien des festes & sacrifices, où le plaisir de la musique, des fleutes & au bois, & des chapeaux de fleurs, n'est point: mais vn sacrifice où il n'y ait point de Dieu, non plus qu'une feste, ou vn temple, où l'on ne banquette point, est Athee, ie veux dire desagreable à Dieu, sans pieté, sans religion, sans rauissement de deuotion: & pour mieux dire, il desplaist à celuy mesme qui le fait, d'autant qu'il contrefait par hypocrisie des prieres & des adorations, dont il ne pense pas en son cœur auoir aucunement affaire, mais il le fait pour la crainte du peuple, & prononce des paroles du tout contraires aux opinions qu'il tient en sa Philosophie: & en sacrificiant il assiste au Presbtre, ne plus ne moins qu'il feroit à vn boucher ou à vn cuyfinier, qui couperoit la gorge à vn mouton, puis le sacrifice fait, il s'en retourne chez H
luy, disant en soy-mesme, j'ay sacrifié vn mouton aux Dieux, qui ne s'empeschent ny ne soucient point de moy. Car c'est ainsi qu'Epicurus enseigne à ses sectateurs, de faire bonne mine, pour ne porter point d'enuie, & ne se rendre point odieux à la commune, quand elle se resiouit, se monstrans autres exterieurement en faisant, & eux mesmes interieurement en s'en faschant, par ce que tout ce que l'on fait enuie, & par force, comme dit Euenus, est desplaissant & fascheux. C'est pourquoy eux mesmes disent & tiennét, que les superstitieux assistent aux sacrifices & ceremonies des Dieux, non pour plaisir qu'ils y prennent, mais pour crainte qu'ils en ont. Et en cela il n'y a doncques point de difference du superstitieux à eux, s'il est ainsi qu'ils facent les mesmes choses par crainte du monde, que les autres par crainte des Dieux. Encore sont ils en pire condition, d'autant qu'ils n'ont pas autant de bonne esperance qu'eux,
ains

- A ains sont tousiours en crainte & en transe, que l'on ne descouure qu'ils pipent & abusent le monde: pour la crainte dequoy ils ont escrit leurs liures & traitez, où ils parlent des Dieux & de la diuinité, enueloppez de toute ambiguité, où il n'y a rien de clair ny de pur & net, ains se masquent & se couurent de tout ce qu'ils peuuent, pour cacher les opinions, qu'ils en ont à cause qu'ils redoutent la fureur du peuple. Mais à tant auons nous assez discouru des deux premieres sortes des hommes, à sçauoir des meschants, & de la commune du simple & rude populaire: & pource considerons maintenant la troisieme espece, de ceux qui sont gens de bien & d'honneur, deuots & religieux enuers les Dieux, quelles & combien de voluptez synceres & nettes ils ont à cause de la bonne creance qu'ils ont des Dieux, croyans fermement qu'ils sont auteurs de tous biens, & que d'eulx procedent toutes les choses qui sont belles & bonnes, & qu'il n'est pas loisible de dire ny de croire, qu'ils facent rien de mal, ne moins qu'ils en souffrent: car ils sont bons de nature, & ce qui est bon ne conçoit en
- B luy enuie de chose quelconque, ne crainte, ne courroux, ny haine: comme le chault ne peut refroidir, ains eschauffe tousiours, aussi ne peut le bon nuire ny mal faire: & sont par nature bien esloignez l'un de l'autre, courroux & grace, rancune & debonnaireté, malignité & benignité, aspreté & clemence, d'autant que l'un sourt de vertu & de puissance, & l'autre d'imperfection & d'impuissance: ainsi ne fault-il pas estimer que la Diuinité soit esprise de courroux ny de rancune, ains fault croire que son propre & naturel est de secourir, aider & bien faire tousiours, mais de se courroucer, nuire & mal faire, non: ains le grand Iupiter est celuy, qui le premier descend du ciel en la terre, ordonnant & disposant toutes choses: & puis les autres Dieux apres, dont l'un est surnommé le Donneur de ioye, l'autre le Bening, l'autre le Protecteur, & comme dit Pindare,

Apollo qui son char volant
Parmy les astres va roulant,
C Par les hommes en tout affaire
Est tenu le plus debonnaire.

- Or comme disoit Diogenes, Tout est aux Dieux, & toutes choses sont communes entre amis, & les bons sont amis des Dieux: ainsi est-il impossible, que ceux qui sont deuots & amis des Dieux, ne soient quant & quant bien-heureux, ny qu'un homme qui est vertueux, comme temperant & iuste, ne soit aussi deuot & religieux. Estimez vous doncques que ceux qui ostent le gouuernement de la prouidence des Dieux, meritent autre supplice, & qu'ils ne soient pas suffisamment punis de leur impieté, de se priuer eux mesmes d'une si grande ioye & si grande volupté, comme nous la sentons en nous mesmes, nous qui sommes ainsi disposez & affectionnez enuers les Dieux? Toute l'assurance & toute la resiouissance d'Epicurus estoient vn Metrodorus, & vn Polygenus, & vn Aristobulus: apres lesquels il estoit tousiours occupé,
- D ou à les penser malades, ou à les plorer trespassez: là où Lycurgus fut appelé par la prophetisse Pythie,

De Iupiter amy, & de tous Dieux
Qui ont là-sus leur demourance és cieux.

Et Socrates auoit vn esprit familier qui parloit familierement à luy, pour l'amitié qu'il luy portoit: & Pindare qui entendit Pan chanter vn des cantiques qu'il auoit composez, pensons nous qu'ils en sentissent en leurs cœurs vne petite ou mediocre ioye? ou Phormion quand il logea en son hostel, Castor & Pollux, & Sophocles Æsculapius, ainsi que luy mesme se le persuadoit, & les autres le croyoient pour les grandes apparences qu'il y en auoit. Il ne sera point hors de propos de reciter en cest endroit, quelle foy & creance des Dieux auoit Hermogenes, és mesmes & propres termes qu'il escrit luy mesme. Les Dieux, dit-il, qui sçauent tout, & qui peuuent

Que lon ne fçauroit viure ioyeusement

„ tout, me sont tant amis pour le soing qu'ils ont de ma personne & de mes affaires, E
„ que iamais ils ne m'oublient ny de iour ny de nuit, quelque chose que i'aye enuie de
„ faire, & quelque part où ie propose d'aller : & pour autant qu'ils preuoyent ce qui me
„ doit aduenir de quelque chose que i'entreprene, ils m'en aduertissent tousiours par
„ quelque voix, par songes, ou par les presages du vol des oyseaux. Or est il-bien vray-
semblable, que tout ce qui vient des Dieux est bon : mais quand nous sommes per-
suadez, que les biens que nous receuons, nous sont enuoyez de speciale grace d'iceux,
cela nous apporte vne satisfaction, & nous donne vne confiance grande, vn coura-
ge merueilleux, & vne ioye interieure qui rit aux bons : là où ceux qui sont autres &
autrement encouragez, empeschent ce qu'il y a de plus doux en la prosperité, & ne
se laissent aucun refuge ny recours en l'aduersité : car quand il leur arriue quelque
mesadventure, ils n'ont autre retraicte ny autre port que la dissolution, ou separation
du corps & de l'ame, & priuation de tout sentiment, comme si en vne tourmente &
tempeste de mer, quelqu'un venoit dire pour asseurer les passagers, que ny la nauire
n'auroit point de pilote, ny que les feux de Castor & Pollux n'apparoistroient point F
pour appaiser les vagues, ny les violens tourbillons des vents, & toutefois qu'il n'y
auroit point de mal pour cela, par ce que bien tost la nauire seroit abyssée & en-
gloutie dedans la mer, ou qu'elle donneroit bien tost à trauers la coste, ou de quel-
que rocher, là où elle se briseroit : car ce sont les propres raisons dont Epicurus vse es
„ griefues maladies & extremes perils, Attens-tu quelque chose de bien par ta deuo-
„ tion? tu t'abuses : car l'essence de Dieu & de sa nature est bien heureuse & immor-
„ telle, ne se saisissant point ny de courroux ny de pitié. Imagines-tu quelque chose
„ de meilleur apres ta mort que ce que tu as en ta vie? tu te trompes : car le supposé &
„ composé qui vient à estre dissolu & despecé, perd tout sentiment, & ce qui n'a point
„ de sentiment, ne nous touche en rien, ny en bien ny en mal. Comment doncques
est-ce, mon bel amy, que tu m'enhortes de manger & de faire bonne chere? pour ce
que la tourmente est si grande, que bien tost le naufrage s'en ensuyura, & le peril ex- G
treme te conduira à la mort. Et toutefois le pauvre passager, encore apres que la
nauire est toute brisée & fracassée, & qu'il en est dehors, s'appuye sur quelque peu
d'esperance, qu'il arriuera par quelque fortune à bord, & qu'il gagnera la terre à nage :
mais l'issue de la Philosophie de ceux icy

*C'est le fende
S. Herme.*

Ne sort plus hors de la mer escumeuse,
quant à l'ame, pour ce que tout incontinent elle se dissout & perit deuant le corps
mesme, tellement qu'elle sent vne ioye excessiue, d'auoir appris & receu vne si sage &
si diuine doctrine, que la fin de toutes ses aduersitez & de tous ses maux, est de perir
du tout, se corrompre & estre reduitte à neant. Mais ce pendant, dit-il, en me regar-
dant, ce seroit fortise à moy de parler d'auantage de ce propos-là, veu que n'agueres
nous t'ouysmes amplement discourir à l'encontre de ceux qui tiennent, que les raisons
d'Epicurus nous rendent mieux dispos & plus prests à mourir, que ne fait pas ce que H
Platon a escrit en son traitté de l'ame. Et bien, ce dit Zeuxippus, faudra-il que pour ce
discours-là, cestuy-cy demeure imparfait? & craindrons nous d'alleguer les oracles
des Dieux, en disputant à l'encontre d'Epicurus? Rien moins, dis-je alors :

Deux fois ouyr faut ce qui est honneste,

Qui que ce soit qui nous en admoneste,

ce dit Empedocles, & pourtant nous faut-il derechef prier Theon : car ie pense qu'il
fut lors present à ouyr toute la dispute : & puis il est ieune, & ne craint point, comme
nous faisons, que les ieunes gens l'accusent de faute de memoire. Alors Theon
comme estant contrainct, Et bien (dit-il) puis qu'il faut que ie le face, ie ne feray pas
comme toy Aristodemus : car tu as eu crainte de redire ce que cestuy-cy auoit n'ague-
res dit, & moy i'vseray de ta mesme deduction : car il me semble que tu as bien
diuisé

A diuisé les hommes en trois sortes : la premiere, celle des meschans : la seconde, celle de la commune & des ignorans : & la troisieme, celle des sages & des gens de bien & d'honneur. Ceux doncques qui sont mauuais & meschans, en redoutant les peines generales, & punitions proposees à tous, auront peur de commettre aucun malefice : & à ceste occasion ne se bougeans, ils en viuront plus doucement, avec moins de trouble & de perturbation : car Epicurus n'estime pas qu'il y ait autre moyen de destourner les hommes de mal faire, que par la crainte du supplice, de maniere qu'il leur faut encore imprimer les frayeurs de la superstition, & bracer à l'encontre d'eux les tremeurs du ciel & de la terre tout ensemble, des tremblemens & ouuertures de la terre, & generalement toutes sortes de peurs & de suspicions, prouueu que estans effroyez, par ce moyen, ils soient pour viure plus modestement, & se comporter plus doucement : car il leur est plus expedient de ne commettre aucun malefice, par crainte des tourmens qu'ils seroient pour en souffrir apres leur mort, que non

B pas en transgressant & violant les loix, viure toute leur vie en peril, frayeur & defiance. Quand au menu peuple & la commune ignorance, outre la crainte de ce que l'on croit estre aux enfers, l'esperance de l'eternité que nous promettent les Poëtes, & la cupidité de tousiours estre, qui est le plus ancien & le plus vehement de tous les desirs, surpasse en volupté, & en doux contentement, ceste puerile crainte des enfers : tellement qu'apres auoir perdu leurs enfans, leurs femmes & leurs amis, encore aiment-ils mieux estre, & demeurer en vie avec toutes les calamitez, que d'estre de tout poinct ostez de ce monde, peris & reduits à neant : & escoutent plus volontiers ces manieres de parler, quand on dit d'un mort qu'il est passé de ce monde en l'autre, & qu'il est allé à Dieu, & autres façons de parler, qui signifient que la mort soit seulement vne mutation de l'ame, & non pas vne entiere abolition : & parlent ainsi le plus souuent,

C J'auray encor' pardelà souueraince
 De mon amy & sa douce accointance.

Et, Que conteray-ie à Hector de ta part,
 Et que diray-ie à ton mary vieillard?

De là est procedé l'erreur, qui leur semble qu'ils allegent leur douleur, quand ils ont enterré les armes, les meubles & les vestemens, dont souloient ordinairement vser les trespassez, avec eux, comme fait Minos, qui enseuelit quand & Glaucus ses fleutes Candiotes,

 Fairtes des os de biche tauelee.

Et fils ont opinion que les defuncts desirent ou demandent quelque chose, ils sont bien aises de le leur enuoyer & bailler : comme Periander feit, qui brussa quand & le corps de sa femme ses habillemens & ses bagues, pour ce qu'il luy fut aduis qu'elle les luy demandoit, & disoit qu'elle enduroit froid : & ne redoutent pas fort un iuge

D Æacus, vn Ascalaphus, ny vn fleuve d'Acheron, attendu qu'ils leur attribuent des danfes, des ieux, & de toute sorte de Musique, comme fils y prenoient plaisir : mais il n'y a celuy qui ne tremble de frayeur, quand ils voyent la face de la mort, comme chose effroyable, tenebreuse & melancholique, d'estre priué de tout sentiment, tomber en oubliance & ignorance de toutes choses. Ils fremissent d'horreur quand ils entendent ces façons icy de parler, Il est perdu, Il est pery, Il n'est plus au monde : & perdent patience quand ils oyent dire,

 Dedans la terre il pourrira,
 Et plus aux festins il n'ira :
 Plus il n'entendra le doux bruire
 Ny des fleutes, ny de la lyre.

Et, Depuis que l'ame vne fois departie

Que l'on ne sçauroit viure ioyeusement

D'auec le corps hors des dents est sortie,
Il n'y a plus moyen de la tenir,
De la reprendre, ou faire reuenir.

E

Et leur semble qu'on les assomme, quand ces Epicuriens leur disent, Nous autres mortels auons esté nez vne fois pour toutes, & ne pouuons pas estre deux fois, ains faut n'estre plus eternellement. Car pensans en eux que c'est si peu de chose, ou plus tost rien du tout en durée, que le present, à comparaison de l'eternité, ils le iettent-là sans en faire compte, ny tascher d'en iouyr, mettans à nonchaloir toute vertu & toute honorable entremise d'action, par vne maniere de desespoir & de contemnement d'eux-mesmes, comme estans de si courte durée, si incertaine & si mal-asséuree, & brief inhabiles à faire rien de grand. Car de dire que l'homme mort demeure priné de tout sentiment, par ce que c'est vn supposit composé qui s'est dissout & dissipé, & que ce qui est dissout n'a point de sentiment, & que ce qui n'a point de sentiment ne nous touche doncques en rien : toutes ces belles raisons-là ne nous ostent pas la crainte de la mort, ains au contraire elles adioustent la preuue, demonstration & confirmation d'icelle crainte, par ce que c'est cela proprement que la nature redoute que dit le poëte,

Puissiez vous tous deuenir eau & terre,
c'est à sçauoir, la resolution de l'ame en chose qui n'a ny sentiment, ny intelligence quelconque : laquelle resolution Epicurus dit, qu'elle se fait en vuides & en atomes, par où il retrenche encore d'auantage toute esperance d'immortalité, pour laquelle il ne s'en faut gueres que ie ne die, que tous, tant hommes que femmes, voudroient plus tost combattre à belle dents à l'encontre de Cerberus, & porter l'eau en vaisseaux percez, comme les Danaïdes, que de perir du tout, à fin de pouuoir seulement demourer en estre, & qu'ils ne fussent point abolis entierement : combien qu'il n'y a gueres d'hommes qui craignent ces choses-là sçachans tresbien que ce sont fictious poëtiques, & contes faicts à plaisir, que les meres & les nourrices donnent à entendre aux petits enfans : & encore ceux qui les craignent, ont certaines ceremonies & purgations, par lesquelles ils ont opinion qu'estans purgez & sanctifiez en ce monde, ils s'en vont en l'autre en lieux plaisans, où ils ne font que iouer & danfer, en vn air pur, vn vent doux, & vne lumiere gracieuse, là où la priuation de vie fasche les ieunes & les vieux : car nous sommes tous impatientement amoureux & desireux de veoir

G

Ce beau Soleil qui esclaire la terre,
comme dit Euripides : & ne sommes pas contents, ains marris, quand on nous vient dire,

Le grand œil immortel du monde,
Esclairant la machine ronde,
Auecques son char attelé
S'en est deffoubs la terre allé.

H

Et pourtant auec la persuation de l'immortalité, ils ostent au commun peuple les plus grandes & plus douces esperances qu'ils aient. Or que pensons nous doncques qu'ils ostent aux gens de bien & d'honneur, qui ont iustement & sainctement vescu en ce monde, & qui n'attendent au partir rien de mal en l'autre, ains esperent tous les plus grands & les plus diuins biens qui sçauoient aduenir à l'homme? car premierement les champions qui combattent és ieux sacrez, ne sont iamais couronnez tant qu'ils combattent, ains seulement apres qu'ils ont combattu & qu'ils ont vaincu : aussi eux estimans, que le pris de la victoire de ceste vie est rendu aux gens de bien apres le cours de ceste vie, on ne sçauoit dire combien de contentement ils ont de la conscience de leur vertu pour ces esperances-là, qui les asséurent de veoir

- A** veoir vn iour ceux qui maintenant abusent outrageusement & insolentement de leurs biens, & de leur puissance & autorité, & qui se moquent follement de ceux qui valent mieux qu'eux, payans les iustes peines que meritent leur orgueil & insolence. Et puis il n'y eut iamais homme de ceux qui sont enamourez de sçauoir, qui ait en ce monde assouuy son desir de la congnoissance de verité, & de la contemplation de ce qui est, attendu qu'ils ne le voyent qu'à trauers vne nuec: ou vn broüillas, qui sont les organes de ce corps, se seruans du discours de la raison humaine, foible, trouble & empeschée à merueilles, en regardant tousiours contremont & taschant à s'en voler hors de ce corps, comme vn oyseau qui prend son vol pour voler en vn autre grand lieu reluisant, rendant leur ame legere, & deschargée de toutes passions & affections terrestres, basses & transitoires, par le moyen de l'estude de Philosophie, laquelle ils prennent pour vn exercice de mourir, tant ils estiment que la mort soit vn bien grand & parfait à l'ame, qui alors viura pardelà d'une vie vraye & certaine: là où
- B** maintenant elle ne veit pas à certes, ains ressemble sa vie presente aux vaines illusions de quelque songe. Et s'il est ainsi que dit Epicurus, que la recordation d'un amy trespassé soit fort douce en toutes manieres, on peut dès icy assez cognoistre, de quelle ioye ils se priuent eux-mesmes, ces Epicuriens icy, qui cuident quelquefois en songeant, recevoir les vmbres & images de leurs amis trespassés, & aller apres pour les embrasser: encore que ce soient choses vaines, qui n'ont ne sentiment, ny entendement: & ce-pendant ils se frustrerent eux-mesmes de l'attente de conuerfer iamais au vray avec leur cher pere, leur chere mere, ny de reuoir iamais plus leur honneste femme, se bannissans de toute telle esperance de si amiable compagnie, & si douce frequentation, comme ont ceux qui tiennent les mesmes opinions que tenoient Pythagoras, Platon & Homere, touchât la nature de l'ame. Si me semble qu'Homere a bien en passant montré raisiblement, quelle est en cela leur affection, quand il fait abbatre au milieu de la presse des combattans l'image d'Aeneas, comme s'il fust veritablement mort, & puis incontinent apres il le fait venir sur les reings sain & sauf, entier de tous ses membres,
- C**

Dont ses amis de ioye tressaillirent,
Quand approcher sain & sauf ils le veirent,
Entier de tous ses membres, vigoureux
Pour bien combattre, & le cœur genereux.

Iliade l. 20.

- & quirtans là son idole & image, se rengèrent tout autour de luy-mesme. Nous doncques, puis que la raison nous preuue & nous monstre, que l'on peut encore veritablement conuerfer & frequenter avec ses amis trespassés, voyans & sentans, fuyons ceux qui ne le peuuent croire, ny reietter arriere tous idoles, images, & escorces, dedans lesquelles ils ne font toute leur vie que regretter & lamenter en vain. Mais outre cela, ceux qui se persuadent que la fin de ceste vie soit le commencement d'une autre meilleure, s'ils sont en ce monde bien à leur aise, ils en sont tant plus contents de mourir, d'autant qu'ils s'attendent de iouyr encore de plus grands biens en l'autre: & si leurs affaires ne leur succedent pas selon leur desir icy, ils ne sont pas fort marris d'en partir, d'autant que l'esperance qu'ils ont des biens & plaisirs qui leur doiuent aduenir, leur donnent des voluptez & attentes incroyables, lesquelles effacent & abolissent toute defectuosité, & toute malencontre de l'ame, qui supporte doucement & patiemment tout ce qui luy suruient par le chemin, ou plus tost par vn court destour de chemin: là où au contraire ceux qui croient que la vie se termine en vn aneantissement priué de tout sentiment, à ceux-là la mort ne leur apporte point de fin & de mutation à leurs maux, ains est douloureuse en l'une & en l'autre fortune: mais plus à ceux qui sont heureux en ce monde, que non pas à ceux qui sont miserables: pour ce que à ceux-cy, elle leur retrenche court toute esperance de meilleure for-

Que l'on ne sçauroit viure ioyeusement


ture, & à ceux là elle leur oste vn bien certain, qui est le viure ioyeusement. Et tout E
ainsi comme les drogues medicinales non plaisantes mais necessaires, allegent les
malades & ruynent les sains: aussi la doctrine d'Epicurus à ceux qui sont infortu-
nez, & qui vivent miserablement en ce monde, elle leur promet vne issue non
heureuse de leurs maux, qui est l'aneantissement & totale dissolution de leur ame:
& à ceux qui ont le sens bon, & abondance de tous biens, elle leur oste & empes-
che la tranquillité de leur esprit, en les reduisant d'un viure heureusement, à vn
non viure, & non estre totalement. Car premierement il est certain, que l'appre-
hension de la perte de ses biens afflige & contriste autant l'homme, que l'attente
certaine, ou la iouissance & fruition presente le resioit: toutefois ils nous veu-
lent faire à croire, que l'apprehension de deuoir estre resolu à neant leur laisse vn
bien tres-assuré & tres-plaisant, c'est à sçauoir la refutation d'une crainte & doute
de maux infinis, qui iamais ne sont à bout, & disent que la doctrine d'Epicurus
fait cela, en arrestant & ostant la crainte de la mort, & enseignant que l'ame se F
dissout. Si doncques c'est vn tres-doux contentement, comme ils disent, que
d'estre deliuré de la crainte & attente de maux & miseres sans fin, comment ne sera
il moleste & gnef, se sentir priué de l'esperance des biens sempiternels, & de per-
dre la supreme & souueraine felicité? Ainsi n'est il bon ny aux vns, ny aux autres,
ains est le non estre ennemy naturel & contraire à tout ce qui est: mais ceux à qui le
mal de la mort oste les miseres de la vie, ceux-là ont pour vn froid reconfort l'in-
sensibilité, comme s'ils s'en estoient fuïs: & au contraire, ceux qui vivent en toute
prosperité, & puis viennent soudain à se changer en rien, il me semble que ie voy
manifestement, que ceux-là attendent vne fin fort redoutable, attendu qu'elle fera
cesser leur felicité, & par ce que la nature ne redoute pas ceste insensibilité ou pri-
uation de sentiment, comme le commencement d'un autre estre, ains la craint, pour
autant que c'est vne priuation des biens qu'elle a presens: car de dire que ce qui se
fait avec la perdition de tout ce qui est nostre, ne nous touche en rien, il semble G
que si fait à bon escient, par ceste cogitation & apprehension-là: & n'est pas l'insen-
sibilité qui afflige & contriste ceux qui ne sont pas, ains ceux qui sont, quand ils
viennent à reputer le dommage qu'ils reçoient de n'estre plus, & que par la mort ils
seront reduits à neant. Car ce n'est pas le chien à trois testes, Cerberus, ny la riuere
de pleurs, Cocytus, qui rendent la crainte de la mort infinie & interminée, ains est
la menace de n'estre plus rien, & de ne pouoir iamais plus retourner en estre, depuis
que l'on est vne fois pery, par ce que l'on ne sçauoit deux fois estre, ains faut eter-
nellement n'estre plus, comme dit Epicurus: car s'il n'y a point de fin au non estre,
& qu'il soit infiny & immuable, il se trouue doncques vn mal eternal & infiny, qui
est la priuation de biens par vne insensibilité, laquelle ne prendra iamais fin. En
quoy il semble qu'Herodote ait esté plus sage quand il dit, que Dieu aiant gousté la
douceur de l'eternité s'est monsté en cela enuieux, mesmement à ceux qui sem- H
blent estre heureux en ce monde, ausquels la volupté n'est qu'un appast & amorse de
douleur, quand ils viennent à guster ce dont ils seront priuez: car quelle ioye,
quelle aise & quelle fruition de plaisir ne chasseroit & ne romproit ceste imagina-
tion & cogitation de l'ame, tombant continuellement comme en vne mer vaste
de ceste infinie eternité, mesmement en ceux qui constituent tout le bien & toute
la beatitude en la volupté? Et si est vray ce que pense Epicurus arriuer à la plus part
des hommes, de mourir en douleur, il n'y a certainement plus de moyen de recon-
forter la crainte de la mort, qui nous meine par de griefs maux à la priuation &
perdition du souuerain bien: & neantmoins ils ne cessent iamais de combattre à
l'encontre de cela, voulans à toute force contraindre les hommes de croi-
re que c'est vn bien d'eschapper & cuiter le mal, & neantmoins estimer que ce
ne soit

A ne soit point de mal que d'estre priué de biens. Ils confessent bien, que la mort n'a plus ny ioye ny esperance aucune, ains que toute douceur & tout bien nous est par elle resqué: là où en ce temps-là, au contraire, ceux qui estiment les ames estre immortelles & incorruptibles, s'attendent d'auoir & de iouyr de plusieurs grands & diuins biens, & que par grandes reuolutions elles conuerferont tantost en la terre, tantost au ciel, iusques à ce qu'elles viendront avec la generale resolution du monde vniuersel, avec le Soleil & la Lune, s'enflammer en vn feu spirituel & intellectuel. Epicurus oste & retrenche aux hommes ceste grande place de tant de si grandes voluptez, & en abolissant toute l'esperance que l'on doit auoir en l'aide & faueur des Dieux, il estaint en la vie contemplatiue le desir de sçauoir & apprendre: & en l'actiue, le desir de se faire valoir & d'acquérir gloire & honneur, en restraignant & abbatant la nature à vne sorte de ioye fort estroicte & impure, qui est la volupté de la chair, comme si elle n'estoit point capable de plus grand bien, que d'euitier le mal.

B

Si ce mot commun, *Cacheta vie*, est bien dit.

C'estoit vn precepte fort commun & fort estimé entre les Epicuriens, mis en auant par Neocles le frere d'Epicurus, ainsi que dit Suidas, par lequel ils conseilloyent à qui vouloit estre heureux, de ne s'entremettre d'affaire quelconque publique.

C  **O**IRE-MAIS celuy mesme qui l'a dit, vouloit bien que l'on sçeuſt, que c'estoit luy qui l'auoit dit: car il le disoit expressement à fin qu'il ne demourast pas incogueu, ains que l'on sçeuſt qu'il entendoit quelque chose plus que les autres, se voulant acquérir vne gloire qui ne luy estoit pas deuë, par diuertir les autres de tascher à en acquérir:

Je hay celuy qui a nom d'estre sage,
Et ne sçait pas l'estre à son aduantage.

D On lit que Philoxenus fils de Eryxis, & Gnaton le Sicilien, hommes glouttons & fort subiects à leur bouche, quand ils estoient en vn banquet se mouchoient dedans les plats, à fin que par ce moyen diuertissans ceux qui estoient à table, ils se gorgeassent & remplissent eux seuls, à cœur saoul, des viandes seruies: Aussi ceux qui sont desmesureement & excessiuement ambitieux, blasment deuant les autres, comme deuant leurs corriuaux, la gloire & l'honneur, à fin qu'eux en iouyſſent seuls & sans competeurs: en quoy ils font ne plus ne moins que les forçaires qui voguent en vne galere: car combien qu'ils regardent vers la poupe, si est-ce qu'ils poussent la prouë en auant, à fin que le flus de l'eau courante tout à l'entour, par la reciprocation & rebattement des rames aide à chasser le vaisseau en auant: aussi ceux qui donnent de tels preceptes, faisant semblant de fuyr la gloire, la pourſuyuent. Car qu'il soit ainsi, quel besoing estoit-il de dire cela, quel besoing de l'escrire? & apres l'auoir escript, quel besoing estoit-il de le publier à la posterité, si luy vouloit que ceux de son temps ne le congneuſſent point, veu qu'il veut estre cogneu de ceux mesmes qui seront apres luy? Et comment ne seroit la chose mauuaise, *Cache ta vie*, que l'on ne sçache point que tu ayes vescu? comme si luy disoit, garde que l'on ne sçache que tu ayes fouillé & saccagé les sepulchres des trespassez: mais au contraire, il est deshonesté de viure en sorte que personne n'en sçache rien, & voudrois dire tout l'opposite, *Ne cache point ta vie*, encore que tu ayes mal vescu, ains fay toy cognoistre, amende toy, repens toy: si tu as de la vertu, ne sois point inutile: si tu as des vices, ne demeure point sans te faire pèser: ou plus tost, fais vne distinction & diuision. A qui est-ce que

Si ce mot, Cache ta vie, est bien dit.

tu donnes ce precepte-là? si c'est à vn ignorant, ou à vn meschant, ou à vn fol, c'est autant comme si tu disois, cache ta fiebure, cache ta frenesie, garde que le Medecin ne le sçache, va te ietter en quelque lieu tenebreux où personne ne te voye, ny toy ny tes passions aussi: va te cacher avec la maladie incurable & mortelle des vices que tu as, couure tes enuies, tes superstitions, comme vn poulx haisté & esleué, craignant de te bailler & monstrier à ceux qui auroient le moyen de t'admonester, corriger & guarir: là où les bien-anciens iadis souloient penser & traiter les malades mesme du corps tout publiquement: & lors chascun qui auoit eu cognoissance d'un mal semblable, ou en soy-mesme ou en autrui, dont il auroit esté guarý, le declaroit à celuy qui en auoit besoyn: & dit-on que la science de Medecine nee & accreuë par experience, est ainsi deuenue grande. Ainsi falloit-il descouurir à tous les vies malades, & les infirmités de l'ame, les toucher, & en cōsiderant les inclinations de chascun, leur dire: à l'un, Tu es subiect à te courroucer, donne toy garde de cela: à l'autre, Tu es ialoux, fais vne telle chose: à vn autre, Es-tu amoureux? ie l'ay aussi esté autrefois, mais ie m'en suis repenty. Et maintenant, au contraire, en le nyant, en le cachant & le couurant, les hommes enfoncent le plus bas qu'ils peuuent le vice au dedans d'eux mesmes. Et si c'est aux gens de bien que tu conseilles de se cacher, & de ne se faire point cognoistre, c'est autant comme si tu disois à Epaminondas, Ne prens point charge d'armee: ou à Lycurgus, ne t'amuse point à faire des loix: & à Thrasýbulus, ne tue point les tyrans: & à Pythagoras, n'enseigne point: & à Socrates, ne discours point: & à toy le premier Epicurus, n'escriy point à tes amis qui sont en Asie, ne communique point avec ceux d'Ægypte, & ne coustoye point, comme estaffier, les ieunes gentils-hōmes de Lampsaque, & n'enuoye point à tous & à toutes de tes liures, pour faire monstre de ta science, & n'ordonne point de ta sepulture. A quoy rendoient tes tables communes? A quoy se rapportoient les assemblees que tu faisois de tes familiers & de beaux ieunes fils? A quoy seruoient tant de milliers de vers que tu escriuois & composois à grād labour, sur Metrodorus, sur Aristobulus, & sur Chæredemus, sinon à fin qu'après leur mort mesme ils ne fussent point incogneus? Estoit-ce à fin que tu donnasses à la vertu la loy d'oubliance, aux arts de ne rien faire, à la philosophie de silence? Et si tu veux oster de la vie de l'homme la cognoissance, ne plus ne moins que si tu ostois d'un festin toute lumiere, à fin que l'on ne cognoisse pas que toy & les tiens fasses tout pour la volupté, & à fin de volupté, tu as raison de conseiller, Cache ta vie. Ouy bien certes, si ie veux passer ma vie avec vne putain Hedia, auoir ordinairement avec moy vne Leontion, mespriser toute honesteté, colloquer tout mon bien és chatouillemēts de la chair: ces fins-là certainement ont besoyn d'estre cachees de tenebres, & obscurcies de la nuit: c'est à cela qu'il faut conseiller l'oubliance, & le non estre congneu. Mais si aucun en la science naturelle a appris à louer en cantiques Dieu, la iustice, & la prouidence diuine: en la science morale, la loy, la societé humaine, le gouuernement de la Chose publique, & en iceluy l'honneur, & non pas son profit, pourquoi veux-tu que celui-là cache sa vie? à fin qu'il n'enseigne personne, à fin qu'il ne donne à personne ny enuie ny exemple de bien faire? Si iamais Themistocles n'eust esté cogneu des Atheniens, iamais la Grece n'eust repoulsé Xerxes: & si Camillus n'eust point esté congneu des Romains, à l'aduenture ne fust Rome demouree ville. Si Platon n'eust cogneu Dion, iamais la Sicile n'eust esté deliuree de tyrannie. Mais comme la lumiere fait que non seulement nous nous entrecognoissons, mais aussi elle nous rend vtils les vns aux autres: aussi à mon iugement, l'estre congneu apporte non seulement gloire, mais aussi moyen de s'employer à la vertu, comme Epaminondas estant incogneu aux Thebains iusques à l'aage de quarante ans, ne leur apporta aucun profit: mais depuis qui l'eurent congneu & se furent fiez à luy de la conduite de leur armee, il conserua la ville de Thebes qui s'en alloit perir, & deliura

A deliura la Grece qui estoit prochaine à seruir, monstrant en gloire, ne plus ne moins qu'en vne claire lumiere, la vertu produisant ses effects, quand il en est temps : car comme dit Sophocles,

Comme le fer est clair & reluisant

Tant que la main de l'homme en va vsant ;

Et la maison où ne se tient personne,

Auec le temps du toict en terre donne :

Aussi non seulement le fer, mais les mœurs mesmes, les conditions & le naturel de l'homme se corrompent, attirans vne moy sissure relante, & vne vieillesse, en ne faisant rien par ignorance, vn silence muet, vne vie sedentaire, retiree à part en oyssuete, met en langueur non seulement les corps, mais aussi les ames des hommes. Et tout ainsi comme les eaux cachees, pour autant qu'elles sont couuertes & ombragees, & qu'elles croupissent, elles se pourrissent : aussi ceux qui ne bougent, & ne s'employent point,

B encore qu'ils ayent quelque chose de bon en eux, & ne le font point sortir dehors, ny n'exercent point les naturelles facultez qui estoient nees avec eux, se corrompent & enuieillissent. Ne voyez vous pas, quand la nuit s'approche, comme & les corps deuiennent plus pesants à besongner, & les esprits plus mornes & paresseux à feuer-tuer, & le discours de l'entendement plus assopy & abbatu en soy, ne plus ne moins qu'un feu qui s'en va mourant, & comme pour vne lascheté & fâcherie qui luy vient ; il est agité de peu de diuerses imaginations, qui est vn quotidian aduertissement secretes l'homme, combien sa vie est courte ?

Mais au Soleil les rays espanouis

Aiant rendu songes esuanouis :

& apres que, par maniere de dire, meslant ensemble les actions & les pensees des hommes avec sa lumiere, il les refueille & excite, comme dit Democritus : Au poinct du iour, les hommes courans comme dedans vn chariot, du desir de s'entrerencontrer

C vistement l'un deçà, l'autre delà, se leuent pour vacquer à leurs affaires. Et m'est aduis que le viure mesme, voire le naistre, & participer à la generation des hommes, nous est donné de Dieu, à fin de le cognoistre : car il est incongnu & caché en ceste grande machine de l'vniuers, pendant qu'il sy promene çà & là par les menus : mais quand il se recueille en soy, & prend sa grandeur, alors il reluit, & deuiet apparent au lieu de caché, & manifeste au lieu de couuert qu'il estoit : car congnoissance n'est pas le chemin à l'essence, comme aucuns veulent dire, mais au contraire l'essence est le chemin à la congnoissance, pour ce que la congnoissance ne fait pas estre chascune chose, mais seulement elle la monstre quand elle est : comme ny la corruption de ce qui est, n'est point vn transporter à non estre, ains plus tost vn amener ce qui est dissout à non apparoir. C'est pourquoy selon nos anciennes loix & traditions, estimans que le Soleil soit Apollo, nous l'appellons Delius & Pythius : & celui qui est seigneur de l'autre monde, soit Dieu, ou Dæmon, s'appelle Ades, d'autât que quand nous venons à nous dissoudre, nous allons en vne obscurité où l'on ne voit rien,

Deuers le Roy des tenebres de nuit,

Et du sommeil paresseux & sans bruit.

Et me semble que les anciens mesmes ont appelé l'homme Phota, de la lumiere, à cause qu'il y a en chascun de nous vn vehemēt desir de nous entrecognoistre, & estre entrecongneus, à cause de la consanguinité qu'il y a entre nous. Et y a des Philosophes qui estiment mesmes que l'ame soit vne lumiere de sa substance : ce qu'ils iugent tant par autres signes, comme par ce qu'il n'y a rien en ce monde que l'ame haïsse tant que l'ignorance, & refuit tout ce qui est obscur & sans clarté, & se trouble quand elle entre en lieux tenebreux, estans pleins de crainte & de soupçon pour elle : & luy est la clarté si douce & si desirable, qu'elle ne veut point auoir les autres

Si ce mot, Cache ta vie, est bien dit.

choses qui naturellement sont delectables, sans lumiere, ny en tenebres, ains est ce qui **E** rend tout plaisir, tout passe-temps, & toute recreation plus douce & plus delectable, comme vne saulce commune à toutes viandes, & celuy qui se iette en ignorance & s'en reuest, faisant de sa vie vne representation de mort, il semble qu'il se lasse d'estre, & se fasche de viure: & neantmoins on tient que le lieu où sont les ames des gens de bien & bien-heureux, n'est autre chose que la nature de la gloire, & de l'estre:

Le Soleil qui tousiours leur luit,

Esclaire de là nostre nuit:

De roses vermeilles fleuries

Sont leurs belles grandes prairies:

& là toute la campagne ouuerte est tapissée de fleurs de toutes sortes d'arbres sans fruiets, mais couverts de fleurs: & là y a de belles riuieres qui ne font bruit quelconque, tant elles coulent doucemēt, & s'entretiennent à discourir ensemble & raconter ce qui a passé par cy deuant, & ce qui est, s'entre-accompagnans, & s'entreconuoyans les vnes les autres. Puis il y a vne troisieme voye de ceux qui ont mal vescu & qui **F** sont meschants, laquelle precipite leurs ames en vne abyssme de tenebres,

Où les croupissantes riuieres

De la nuit, hors de leurs fondrieres

Vomissent vne infinité

De tenebreuse obscurité:

engloutissans & enfouissans ceux qui sont punis en oubliance & ignorance: car il n'y a pas des vautours qui mangent continuellement le foye des meschants couchez & renuersez par terre, car il est pieça ou brulé ou pourry: ne n'y a pas des fardeaux qui oppriment & accablent les corps de ceux qui sont punis, pource que les os & la chair n'ont plus de ligatures de nerfs, & n'ont plus les trespasses aucun reste de corps capable de receuoir punitions, ce qui est propre à chose solide & qui resiste. Mais la vraye **G** vniue maniere de chastier & punir ceux qui ont mal vescu en ce monde, est vne infamie, vne ignorance, & vne abolition entiere & aneantissement total qui les emporte au fleuve de Lethé, qui signifie oubliance, en lieu où il n'y a ris aucun, ny aucune resiouissance, & les plonge en la vaste mer qui n'a fond ne riue, de lascheté inutile à tout bien, & paresse qui ne sçait rien faire, sinon tirer apres soy vn oubly, & vn ensepuelissement en toute ignorance & toute desconnoissance.

Les regles & Preceptes de Santé, en forme de deuils.

Les personnages qui parlent en ce deuils, Moschion & Zeuxippus.

M O S C H I O N.



V destournas doncques hier, amy Zeuxippus, le Medecin **H** Glaucus, qui ne demandoit qu'à conferer & communiquer avec nous. **Z E V X I P P U S.** Je ne l'en destournay point, amy Moschion, ne iamais il n'eut volonté de ce faire: mais ie fuy ce que ie craignois, c'estoit de luy donner occasion & prise de s'attacher à moy, sçachant bien qu'il ne demandoit autre chose: car en la medecine, comme dit Homere,

Il vault tout seul autant que plusieurs autres:

mais quant à la philosophie, il ne luy veut point de bien, ains a tousiours quelques aspres & fascheuses paroles à dire contre elle: mesmement lors que ie le voyois venir droit à l'encontre de nous, criant de tout loing à haute voix, que

A que nous auions entrepris vn grand cas, & qui n'estoit gueres honneste: c'est, que nous auions rompu les confins, &, par maniere de dire, leué les bornes des sciences, en discourant de la maniere de viure sainement. Car les confins, disoit-il, des Medecins & des Philosophes, comme l'on dit en commun prouerbe, des Phrygiens & des Mysiens, sont separez: & d'auantage il auoit en la bouche quelques propos, que nous auions tenus par maniere de passe-temps seulement, qui n'estoient pas inutiles pourtant, lesquels il alloit deschirant & reprenant. MOSCHION. Et ie serois bien aise d'entendre ces propos-là dont il se mocquoit, & les autres que vous eustes sur ce subiect-là, s'il te venoit à gré de me les dire. ZEUXIPPVS. Je le croy certainement, Moschion, pour ce que tu es naturellement enclin à la Philosophie, & ne treuues pas bon qu'un Philosophe n'aime la Medecine, te semblant estrange qu'il estime luy estre plus conuenable qu'on le voye estudiant en la Geometrie, en la Dialectique, ou en la Musique, que d'enquerir & d'apprendre

B Ce qu'il y a de bien ou mal chez luy:

c'est à dire, dedans son corps. Et toutefois vous voyez ordinairement, qu'il y a plus grand nombre de spectateurs aux theatres, là où l'on distribue quelque piece d'argent à ceux qui s'y assemblent pour veoir l'esbattemēt des ieux, ainsi que l'on fait à Athenes, qu'il n'y en a aux autres: & la Medecine est vne des sciences liberales, en laquelle il n'y a pas moins de beauté, & de subtilité, & de plaisir, qu'en autre quelle qu'elle soit: mais outre cela, encore paye elle à ceux qui l'aiment vne grande distribution pour leur faire, qui est la conseruation de leur vie, & de leur santé: pourtant ne faut-il pas accuser les Philosophes qui discourent des choses saines, & mal-saines, d'auoir outrepassé leurs confins, ains plus tost les faudroit-il blasmer, s'ils ne leuoient & ostioient entierement ces bornes, pour labourer, comme en vn champ commun, avec les Medecins, à la contemplation des choses belles & honnestes, enquerans par leurs discours ce qui est ensemble & plaisant à entendre, & necessaire à sçauoir. MOSCHION.

C Mais laissons là le Medecin Glaucus, ie te prie Zeuxippus, qui pour sa grauité veult qu'on l'estime accompli de tout poinct, sans auoir aucun besoing de la Philosophie, & me raconté tous les propos que vous eustes, mesmement ceux-là les premiers, s'il te plaist, que tu auois dit en ioüant, & non pas trop à certes, que Glaucus alloit reprenant. ZEUXIPPVS. Je le veux bien. Ce nostre amy doncques disoit auoir ouy dire à quelqu'un, que auoir tousiours les mains chaudes, & ne les laisser pas refroidir, estoit chose grandement vtile à la santé: & au contraire, que d'auoir ordinairement les extremités froides, chassoit la chaleur au dedans du corps, & nous apportoit comme vne accoustumance, & vne vñsance à la fiebure: mais que la tourner au dehors, & tirer avec la chaleur la matiere d'icelle, & la distribuer esgallement par tout le corps, estoit chose saine, comme nous voyons qu'en besongnant des mains, & en faisant quelque ouurage, le mouuement nous y fait venir & y maintient la chaleur:

D mais si nous n'auons de telle besongne à faire, qu'il ne fault pas pourtant recevoir la froideur aux extremités du corps: voylà l'un des poincts dont il se rioit & mocquoit. Le second fut à mon aduis, touchant les viandes que l'on donne aux malades, qu'il conseilloit qu'en santé mesme on en goustast vn petit par interualle de temps, pour s'y accoustumer, à fin que l'on ne les eust point en horreur, comme ont les petits enfans, & que l'on ne haïst point celle maniere de viure, ains que l'on la se rendist peu à peu familiere, à fin que quand il aduiendroit que l'on seroit malade, on n'eust pas à contrecœur ces viandes-là, comme si c'estoient drogues medecinales, & que nous ne nous faschissions point de manger quelquefois d'une seule viande simple, sans faulx ne rosty: à ceste cause vouloit-il que l'on ne trouuast point estrange, de venir quelquefois à la table sans s'estre premierement baigné ou estuüé, ny de boire de l'eau quand il y auroit du vin, ny de boire chaud en esté, quand bien il y auroit de la

Les regles & Preceptes de Santé.

neige, prouueu que l'on ne feist point ces abstinences-là par ambitieuse ostentation E de vaine gloire, & pour s'en vanter apres, ains à part sans en mot dire, & pour accoustumer peu à peu nostre appetit à obeïr facilement à la raison & à ce qui est vtile, en ostant de loing à nostre ame ceste mignardise delicate, de se plaindre trop és maladies, & regretter les grands plaisirs, & agreables voluptez, qu'elle souloit auoir au lieu de la basse & estroite regle de viure, à laquelle elle se voit reduitte. Car il ne fut iamais mal dit, Choyssi la vie la meilleure qui soit, & l'accoustumance te la » rendra plaisante : ce qui à l'esprouue se trouuera vtile en toutes choses, mais principalement quant aux traitemens de la personne, en l'accoustumant à ceux qui sont les plus salubres, on les rend plus familiers, plus amis, & plus congneuz à nostre nature, se ramenant en la memoire ce que font & que disent les autres en leurs maladies, comment ils se courroucent, & se tourmentent, quand on leur presente à boire de l'eau chaude, ou quelque chaudreau à humer, ou du pain sec, comment ils appellent cela fascheuse & mauplaisante viande, & fascheux & importuns ceulx qui les veulent contraindre d'en prendre. Il y en a eu plusieurs que le bain a fait F mourir, qui n'auoient pas grand mal du commencement, sinon qu'ils ne pouuoient boire ny manger que premierement ils ne se fussent baignez, & lauez en l'estuue : entre lesquels a esté l'Empereur Titus, ainsi que tesmoignent ceux qui le penserent en sa maladie. Il fut dit aussi, que tousiours les plus simples viandes, & qui coustent le moins, sont les plus salubres au corps : & que sur tout il se falloit bien donner garde de repletion, d'yurongnerie, & de volupté, mesmement quand on sent approcher vne feste, où l'on a accoustumé de faire grand' chere, ou bien que l'on doit faire vn banquet à ses amis, ou que l'on attend quelque festin de Roy, ou de Prince, là où on est contrainct de boire d'autant à son tour, que l'on ne l'ose refuser, à fin que lors que l'on est encore en beau temps & serain, on prepare son corps de bonne heure, pour le rendre plus gaillard, & plus dispos contre le vent & la tempeste qui le menasse : car il est bien difficile en telles assemblees & festes de seigneurs & d'amis, de se maintenir G en vne mediocrité, & accoustumee sobriété, que l'on ne soit trouué fascheux, malplaisant & ennuyeux à toute la compagnie. A fin doncques que l'on ne mette point feu sur feu, repletion sur repletion, & vin sur vin, il seroit bon d'imiter & ensuyure à bon escient le tour que iadis le Roy Philippus feit par ieu, qui fut tel. Il y eut quelqu'un qui le conuia, comme il estoit par les champs, de venir souper chez luy, pensant qu'il y deust venir avec petite compagnie : mais le voyant venir avec vne grande suite, sçachant qu'il auoit fait apprester pour peu de gens, il en estoit tout troublé : dequoy Philippus s'estant apperceu, enuoya sous-main dire à tous ceux qu'il auoit amenez, qu'ils gardassent lieu à la tourte : eulx le croyans, & l'attendans tousiours, esparagnerent les viandes qui leur furent presentees, de maniere qu'elles suffirent largement à toute la compagnie. Ainsi se fault-il deuant preparer, quand on se doit trouuer à ces assemblees-là, où il faut par force boire d'autant à tour de roolle, H & garder lieu en nostre corps & pour viande & pour patisserie, voire & pour yurongnerie, & y apporter nostre appetit tout frais & bien deliberé. Mais si d'aduenture quelques telles contrainctes nous surprennent encore tous pleins & mal-disposez, pour auoir ia trop beu & trop mangé : estans quelques Seigneurs arriuez soudainement, ou quelques vns de nos amis suruenus à l'improuueu, & que nous soyons forcez par honte de nous trouuer en compagnie d'autres qui seront bien dispos & preparez à boire : alors se faudra-il bien bander & armer contre la mauuaise honte, qui est cause de tant de maux aux hommes, en luy mettant à l'encontre ces vers que dit le Roy Creon en vne Tragédie d'Euripide,

Il me vault mieux maintenant te desplaire,
Amy passant, que pour te vouloir plaire,

- A** En me laissant aller trop mollement,
Me repentir apres amerement.

Car de s'aller ietter en vne pleuresie, ou en vne phrenesie, pour crainte d'estre tenu & reputé lourdault & inciuil, c'est faire du lourdault à bon escient, & de l'homme de mauuais iugement, qui n'a pas la grace ny la parole pour entretenir la compagnie, sans yurongner & gourmander: car le refus mesme, si est fait dextrement & de bonne grace, ne sera point moins agreable à la compagnie, que le boire d'autant à tour de roolle. Et si celuy mesme qui fait le festin, s'abstient de boire & de manger, encore qu'il soit à la table (comme quand on fait vn sacrifice, dont l'on ne taste point) entretenant au demourant la compagnie avec vn bon visage & vne bonne chere, disant tousiours de luy mesme quelque mot pour rire, il resiouira, & contentera plus la compagnie, que celuy qui s'enyurerait & gourmanderait iusques au creuer avec eux. Il fait mention à ce propos de quelques exemples anciens, comme d'Alexandre le

- B** grand entre autres, qui eut honte de refuser Medius, l'un de ses Capitaines, qui le conuia d'aller souper chez luy, apres auoir desia bien beu ailleurs, & qui le remeit à boire encore mieux que deuant, dont il mourut: & de nostre temps vn puissant lui-cteur nommé Rigulus, que l'Empereur Titus vn iour de bon matin enuoya querir pour se baigner & estuuer avec luy, il y vint, & apres s'estre laué beut vn coup tel, que l'apoplexie le surprit incontinent, de maniere qu'il en tomba mort soudainement. Nostre Medecin Glaucus se mocquoit de tous ces propos-là, les appellant discours de maistres d'eschole: ne se souciant pas gueres au demourant d'en ouyr plus auant, ny nous aussi n'ayans pas grande enuie de luy en dire d'auantage, pour ce qu'il ne s'arrestoit pas à considerer plus auant vn chascun d'iceux. Mais au demourant Socrates, qui le premier nous a defendu de manger des viandes qui nous conuient à manger, encore que nous n'ayons point de faim, ny de boire breuuages qui nous fassent boire, encore que nous n'ayons point de soif, ne nous defendoit pas simplement d'en vser, ains nous enseignoit d'en vser seulement lors que nous en aurions besoin, en ioignant la volupté d'icelles avec la necessité, comme font ceux qui employent les deniers publiques, qui parauant se souloient despendre à faire des ieux, à la soule & entretenement des gens de guerre: car le doux, tant comme il est partie du nourrissant, est fort propre & amy familier à la nature, & fault pendant que l'on a encore faim, iouir & vser des aliments necessaires, comme plaisans, non pas se prouoquer & susciter à part de nouueaux appetits extraordinaires, apres que l'on a rassasié les communs & ordinaires. Car ainsi comme à Socrates mesme le danser estoit vn exercice & si delectoit, aussi celuy à qui vne patisserie ou vne confiture sert pour toute viande & pour souper entier, elle luy fait moins de mal: mais apres que l'on a pris ce qui suffit à la nature, & que l'on s'est assez remply, il se fault bien donner garde, autant que de chose qui soit, d'estendre encore ses mains à ces friandises-là: & si ne
- D** fault pas en telles choses moins euitier la sottise & l'ambition, que la friandise ou gourmandise. Car ces deux vices nous induisent aussi bien souuent à manger quand nous n'auons point de faim, & à boire quand nous n'auons point de soif, en nous imprimant de bien folles & extrauagantes imaginations: Que c'est grande simplese de ne prendre pas à cœur saoul d'vne chose qui est rare & chere, quand on la peut auoir: comme seroit, pour exemple, de la sommade ou des champignons d'Italie, ou de la tourte de Samos, ou de la neige en Ægypte: ces imaginations-là sont vn peu de vaine gloire, qui nous tire par le nez bien souuent comme vne odeur de cuyfine, à desirer vser de telles choses, & contraindre le corps, qui ne les demande pas, d'y participer, seulement pour ce qu'elles sont rares & fort renommées, à fin qu'ils en puissent faire leurs contes à d'autres, & estre par eux reputez bienheureux, d'auoir eu iouissance de choses si singulieres, si cheres & si difficiles à recouurer. Pareille

Les regles & Preceptes de Santé.

affection ont ils enuers les femmes de grand renom, & de grande reputation : car E quand ils sont couchez aupres de leurs espouses, qui seront belles bien souuent, & qui leur portent grande amitié, ils ne bougeront : mais s'ils se treuuent avec vne telle courtisane comme estoient Phryné ou Laïs, ausquelles ils auront payé de bon argent pour coucher avec elles, encore qu'ils ne soient pas bien disposez de leurs personnes, ou autrement lasches à tel mestier, ils feront neantmoins tout ce qu'ils pourront pour exciter leur luxure à ceste volupté, par vne vaine gloire : tellement que Phryné mesme estant des-ia vieille & passée disoit, qu'elle vendoit plus chèrement sa lie pour la reputation. C'est vne grande chose & digne d'admiration, que si nous receuons en nostre corps autant de voluptez que la nature en peut porter, ou qu'elle en a de besoin, ou, qui plus est, si pour diuerses occupations nous resistons à ses appetits, & le remettons à vne autre fois, & qu'à toute peine nous luy obtemperions en ses necessitez, ou, comme dit Platon, qu'à fine force apres qu'il nous a bien espointonnez & gehennez, nous luy cedons, nous n'en souffrons point pour tout cela au- F cune perte ny dommage : &, au contraire, si es cupiditez qui descendent de l'ame au corps, nous nous laissons aller tant qu'elles nous forcent de seruir, & de nous esmouuoir au gré des passions d'icelles, il est impossible qu'elles ne nous laissent de tresgrandes & tresnotables pertes & dommages pour bien peu de voluptez, foibles, & peu apparentes, qu'elles nous auront donnees : ainsi se fault-il bien garder de prouoquer le corps aux voluptez par les cupiditez de l'ame, pour ce que le commencement en seroit contre la nature. Car tout ainsi comme le chatouillement des aixelles apporte à l'ame vn rire qui n'est point proprement doux ny gracieux, ains fascheux & ressemblant plus proprement à vne conuulsion & vn esuanouissement : aussi les voluptez que le corps pinse & aiguillonné par l'ame reçoit, sont toutes violentes, forcees, turbulentes & hors de la nature. Toutes & quantes fois doncques qu'il se presentera occasion de iouyr de quelques telles voluptez rares ou renommées, il sera meilleur faire gloire de s'en abstenir, que non pas d'en iouyr : reduisans en memoire G ce que souloit dire Simonides, qu'il ne s'estoit iamais repenty de s'estre teu, mais d'auoir parlé, souuent : aussi iamais nous ne nous sommes repentis d'auoir reietté quelque viande, ny d'auoir beu de l'eau au lieu de bon vin de Falerne. Parquoy non seulement il ne faut iamais forcer la nature : mais si d'auenture quelquefois on nous sert de telles friandises qu'elle appetite, il en faut souuent diuertir nostre appetit & le ramener à l'vsage des choses simples & ordinaires pour l'y accoustumer & exercer.

*Euripide en
la Tragedie
des Thebain-
ciennes.*

Si violer en rien se peult la Loy

Honnestement, c'est pour se faire Roy,

ce dit le Thebain Eteocles, & dit mal : mais nous pourrions dire mieux, & plus veritablement, S'il faut estre ambitieux en telles choses que cela, il est tres-honneste de se contenir pour sa santé entretenir. Toutefois il y en a qui par espargne mechanique, & par chicheté refrenent bien leurs cupiditez quand ils sont chez eux : mais s'il H aduient qu'ils soient conuiez chez autrui, ils se gorgent & se remplissent iusques au creuer de ces viandes exquisés & cheres, ne plus ne moins que l'on fait à la guerre, quand on va fourrager, tant que l'on peut, sur les terres de l'ennemy : & puis ils sortent de là mal-disposez, rapportans de leur cupidité insatiable vne belle prouision pour le lendemain, c'est vne crudité d'estomac. Or le Philosophe Crates, estimant que les guerres ciuiles & les tyrannies se suscitoient dedans les villes, autant pour la superfluité & pour les delices, que pour autre cause qui soit, souloit dire en iouuant selon la coustume, Garde toy de nous ietter en sedition ciuile, en augmentant le plat deuant la lentille : c'est à dire, en faisant despen- se plus grande que ne porte ton reuenue : mais vn chascun se doit commander à soy mesme, N'augmente pas le plat deuant la lentille, ny ne passe point par dessus le cresson & l'oliue, iusques aux tourtes & aux delicieux

- A** la lentille, ny ne passe point par dessus le cresson & l'oliue, iusques aux tourtes & aux delicieux poissons, & ne iette point ton corps puis apres en choliques, & en flus de ventre pour auoir trop mangé : car les viandes simples & ordinaires contiennent l'appetit dedans les bornes & la mesure de nature, mais les artifices des cuysiniers & des patissiers, avec leurs friandises de faulses & de saupiquets, ainsi comme dit le poëte Comique, auacent & mettent tousiours plus auant les limites de la volupté, & outrepassent l'vtilité : & ne sçay comment, veu que nous detestons si fort, & auons en abomination si grande, les femmes qui donnent des breuuages d'amour, & composent des charmes pour appliquer à leurs maris, nous abandonnons ainsi à des mercenaires, ou à des esclaves, nos viandes à empoisonner, par maniere de dire, & à enforceller. Et bien que le mot que souloit dire le philosophe Arcesilaus cōtre les pailards & luxurieux, soit vn peu trop brusque & trop aigre, qu'il ne peut chaloir de quel costé on le soit, pour ce qu'il y a autant de mal à l'vn qu'à l'autre, si ne vient-il pas mal
- B** à propos pour le subiect que nous traittons : car à la verité, quelle difference y a-il de manger des herbes chaudes, que lon appelle Satyrion, pour se prouoquer & semondre à la luxure, & irriter le sentiment par odeur & par faulses? comme les galleux, qui ne demandent autre chose, sinon qu'on leur frotte & qu'on leur galle tousiours leur rongne. Mais à l'aduenture vaudra-il mieux se reseruer à vn autre lieu pour parler contre les voluptez deshonestes, en monstrant combien la continence de soy mesme est honneste & venerable : car le propos qui se presente maintenant, est pour defendre plusieurs grandes voluptez honnestes, par ce que les maladies ne nous ostent pas tant d'actions, tant d'esperances, tant de voyages, ny tant de passetemps, comme elles nous empeschent & font perdre de voluptez: pourtant aussi peu est-il expedient à ceux qui aiment les voluptez, qu'à gens du monde, de mespriser leur santé: car il y en a plusieurs à qui les maladies n'ostent point les moyens de philosopher, ny d'estre grāds capitaines, ny de gouverner les royaumes: mais les voluptez & iouissances corporelles pour la plus part ne peuuent pas seulement naistre en maladie, ou si elles y naissent, elles apportent bien peu de la delectation qui leur est propre & naturelle, & ce peu encore non pur & net, ains meslé de mixtion estrangere, & cōme desguisé & cicatricé, ne plus ne moins qu'à ceux qui sortent d'vne tourmente & répeste: car le plaisir de Venus n'est point bien à propos quand on est trop plein de viāde & de vin, mais plus tost quand le corps est en vne serenité & tranquillité grande, pour ce que Venus se doit terminer en volupté, si fait bien le boire & le manger: mais la santé est aux voluptez, cōme leur beau temps, qui leur donne seure & plaisante naissance, ne plus ne moins que le calme de l'hyuer à la couuee des oyseaux de mer que lon appelle Halcyons, qui escloent leurs œufs tousiours en beau temps, au milieu de l'hyuer. On louë à bon droit Prodicus d'auoir gentilemēt dit, que le feu est la meilleure faulse qui soit: mais on pourroit aussi tres-veritablement dire, que la santé est vne diuine faulse & tresplaisante: car les viandes, pour delicates qu'elles soient, bouillies ou rosties, ou cuittes au four, n'apportēt aucune volupté ne plaisir à ceux qui sont malades ou yures, ou qui ont enuie de vomir, là où vn pur & net appetit rend toute viande agreable & plaisante, voire rauissable, comme dit Homere, à vn corps sain & conuenable. Mais comme Demades l'orateur, voyant les Atheniens desireux des armes & de la guerre hors de propos, leur disoit, que iamais ils ne traittoient de la paix sinon en robes noires, apres qu'ils auoiēt perdu de leurs parens & amis: aussi ne nous souuenons nous iamais de viure sobrement & simplement, sinon parmy des cauterres, des ynguents, & des cataplasmes: & quand nous y sommes, alors nous condamnons bien fort nos fautes, quand il nous souuient de ce que nous auons fait par le passé: mais encore accusons nous tantost l'air, tantost la contree qui n'est pas saine, ou l'estre hors de son pais naturel, & iamais n'en voulons accuser nostre intemperance,

Les regles & preceptes de santé.

& nos appetits desordonnez : & comme le Roy Lyfimachus dedans le païs des Getes E
se trouuant contrainct & forcé de la soif, à se rendre prisonnier luy & son armee en-
tre les mains de son ennemy, apres auoir beu de l'eau fresche dit, O Dieux, combien
de felicité i'ay perdu pour vn si court plaisir ! aussi pourrions nous rapporter & ac-
commoder cela à nous mesmes, en nos maladies, comment pour auoir beu de l'eau
froide, ou pour auoir esté aux estuues importunément, ou pour auoir beu d'autant,
combien de voluptez nous auons gastees, combien de bonnes actions, & combien
d'honnestes passetemps nous auons perdus : car le remors de tels pensemens touche
iusques au vif la memoire, de sorte que la cicatrice en demeure encore apres que lon
est restitué en santé : ce qui fait que nous sommes puis apres plus retenus en nostre
maniere de viure, par ce qu'un corps qui sera bien sain, ne produira gueres iamais
de trop vehementes cupiditez, & appetits desordonnez, mal-aisez à domter, ou à y F
resister, ains leur faut faire teste quand ils se remuent, & qu'ils regibbent pour iouir
des plaisirs dont ils ont enuie : car tels appetits se plaignent legerement, & crient
pour peu de chose, comme font les enfans mignards, & puis ils s'appaissent quand la
table est ostee, & ne se plaignent point qu'on leur ait fait tort, ains au contraire sont
purs & nets, & gaillards, non pas pesans, & báaillans pour auoir l'estomac chargé iuf-
ques au lendemain : comme lon escrit, que le capitaine Timotheus aiant vn iour sou-
pé en l'Academie, chez Platon, vn souper simple & sobre, dit, Ceux qui soupét chez
Platon, s'en trouuent bien iusques au lendemain. Aussi escrit-on qu'Alexandre ren-
uoyant les cuisiniers que la Roynie Ada luy enuoyoit, dit, qu'il en menoit tousiours
quant & luy de meilleurs : pour le disner, le leuer matin & cheminer auant iour : & G
pour le souper, le peu manger à disner. Je sçay bien que les hommes prennent aussi
bien quelquefois la fiebure pour auoir trop trauaillé, ou s'estre eschauffez, ou bien
pour s'estre refroidis. Mais comme les odeurs des fleurs sont foibles & debiles à par-
elles, là où estans meslees avec de l'huile, elles prennent force & vigueur : aussi la re-
pletion d'humeurs donne, par maniere de dire, corps & substance aux causes & oc-
casions exterieures des maladies : & sans la quantité grande d'humeurs superflues, il
n'y a danger, pour ce que toutes telles indispositions se dissipent & se dissoluent fa-
cilement, quand vn sang subtil & vn esprit pur & net reçoit ces autres excessifs mou-
uemens : mais où il y a repletion grande de toutes superfluitez, comme vne fange pro-
fonde remuee, alors il en sourd plusieurs malings accidens, dangereux, & difficiles à
curer. Pourtant ne faut-il pas faire comme les patrons & maistres des nauires, qui
ne se peuuent iamais saouler de fourrer dedans leurs vaisseaux, & leur semble qu'ils H
n'ont iamais trop de charge, & puis ils ne font autre chose que vider la sentine, &
ietter l'eau de la mer qui entre dedans : aussi apres que nous auons bien emply & char-
gé nostre corps, le purger, puis lauer avec medecines & clysteres : ains le faut tousiours
contregarder net, dispos & leger, à fin que si d'aduenture il vient à estre d'ailleurs ap-
pesanty & chargé, il reuienne tousiours au dessus, ainsi comme fait le liege sur la mer.
Mais principalement faut-il prendre garde aux precedentes indispositions & messa-
gers des maladies, pour ce qu'elles ne viennent pas toutes sans mot dire, ainsi que
dit Hesiode, Car Iupiter leur a osté la voix :
ains la plus part ont des avant-coureurs, trompettes & denonciateurs, comme des
cruditez d'estomac, des pesanteurs de toute la personne, suyuant ce qu'escrit Hip-
pocrates, Les pesanteurs & lassitudes qui viennent d'elles-mesmes, prognostiquent &
signifient des maladies : & pour ce que les esprits, à mon aduis, qui doiuent aller
aux nerfs, sont estoupez & exclus par la repletion grande d'humeurs. Mais com-
bien que le corps, par maniere de dire, luy mesme rende au contraire, & nous tire
au liét & au repos : les vns neantmoins par gourmandise ou par appetit desordonné
des voluptez, se vont ietter dans des bains & des estuues, & se hastent d'aller aux
festins

- A** festins, & aux compagnies où l'on boit d'autant, comme s'ils faisoient provision de viures attendans vn siege de ville, & s'ils auoient peur que la fiebre les surprist qu'ils n'eussent premierement bien soupé. Les autres vn peu plus honnestes ne se prennent pas par là, mais aians honte fort sottement de confesser qu'ils ont trop beu ou trop mangé, & qu'ils sentent quelque crudité & indigestion en leur estomac, & de demourer tout vn iour à requoy en robe de chambre, pendant que les autres vont iouer à la paulme & autres tels exercices de la personne qui les y conuient, ils s'y en vont, & se mettent en pourpoint ou tous nuds, comme les autres, & font tout ne plus ne moins que ceux qui sont bien sains : mais la plus part subiects à leur plaisir & desordonnez, se laissent persuader & poulser à se leuer hardiment, & aller faire comme de coustume par vne vaine esperance qu'ils ont fortifiée d'un commun proverbe, qu'il faut prendre du poil de la beste qui les a mordus, & chasser le vin par le vin, resoudre l'yurongnerie par l'yurongnerie. Mais à l'encontre de telle esperance il faut opposer la crainte reseruee de Caton, lequel disoit que telle doubte retenue fait les choses grandes petites, & les petites elle les reduit du tout à neant : & qu'il vaut mieux endurer la faute de manger, & tenir son corps vuide & en repos, que de soy hazarder en se jettant dedans vn baing ou en vne table pour souper : car s'il y a quelque disposition à maladie, il nous nuira de ne nous estre pas gardez : & s'il n'y a rien, il ne nous sçauroit nuire de nous estre reseruez & retenus, & par ceste retenue nous en aurons le corps de tant plus net : & l'autre sot, qui craindra de donner à cognoistre à ses domestiques ou à ses amis, qu'il se treuve mal d'auoir trop beu, ou trop mangé, aiant eu honte de confesser auioird'huy qu'il n'a peu digerer, demain sera contrainct, malgré luy, d'aduouër vn flux de ventre, ou la fiebre, ou des trenchées. Tu reputerois à grande vergongne de confesser que tu eusses faim : mais bien est-ce plus grande honte estre contrainct d'aduouër vne crudité, vne pesanteur venant d'auoir trop mangé, & d'une repletion de corps que l'on entraine encore dedans vn
- C** baing, comme vn vieux vaisseau demy pourry, & ne tenant point eau, que l'on tire dedans la mer. Ils font ne plus ne moins que quelques vns de ceux qui voyagent sur la mer, lesquels estant l'hyuer, ont honte de demourer sans rien faire sur le riuage de la mer : mais puis apres quand ils ont leué l'ancre, mis la voile au vent, & qu'ils sont vn peu eslargis en pleine mer, ils se treuuent tres-mal, crians à l'aide, & rendans leur gorge : aussi ceux se trouuans en doubte de maladie, ou en disposition de leurs corps pour y tomber, cuydent que ce soit lascheté honteuse de se tenir vn iour sur ses gardes dedans le liét, & ne venir pas comme de coustume à la table, sont puis apres bien plus honteusement couchez par plusieurs nuits à se faire purger & appliquer force cataplasmes, & à flatter les Medecins, & les caresser, en leur demandant à boire du vin ou de l'eau froide, aians bien alors le courage si foible, que de faire & dire plusieurs paroles impertinentes, & sentans son cœur failly, pour la peine qu'ils endurent, & la peur qu'ils ont d'auoir encore pis : & toutefois il seroit bien à propos de ramenteuoir à ceux qui ne se peuuent autrement contenir, & qui se laissent esbranler ou bien emporter du tout à leurs cupiditez, que les voluptez prennent la plus part de ce qu'elles ont de bon du corps mesme. Et comme les Lacedemoniens apres auoir donné à leur cuysinier du sel & du vinaigre, luy disoient qu'il cerchast le demourant en la beste qui estoit immolee : aussi à vn corps que l'on veut nourrir, la meilleure faulx qu'on luy sçauroit bailler pour la luy faire trouuer bonne, est, que l'on luy baille quand il est bien sain, & pur & net : car qu'une viande soit douce ou soit chere, cela est hors du corps de celui qui la prend, & se iuge à par-soy : mais pour estre plaisante, il faut que ce soit eu esgard au corps qui la prend, & pour en receuoir le plaisir, il faut qu'il soit disposé ainsi comme le requiert la nature : autrement en vn corps fasché, mal-disposé & chargé de vin, toutes faulxes perdent toute leur grace

Les regles & Preceptes de Santé.

& toute leur saison. Pourtant ne faut-il pas tant prendre garde si le poisson est frais **E** pesché, ne si le pain est de pur fourment, si le bain est chaud, ou si la femme est belle, qu'il faut considerer de bien pres si nostre corps est point degousté, aiant enuie de vomir, gorgé, tout crud & desbauché: autrement nous ferons la mesme faute que feroit vn qui apres auoir bieu beu, voudroit aller en masque baller & iouer en vne maison, où l'on porteroit le deuil pour la mort du maistre d'icelle, qui n'aguere feroit decedé: car au lieu d'y apporter resiouyssance & plaisir, il feroit plorer & crier ceux de la maison à haults cris: aussi le deduit de l'amour, les viandes exquises, le baing, & le vin, en vn corps mal-disposé, & hors du naturel, ne font qu'esmouuoir & brouiller la pituite & la cholere à ceux qui ne sont ne bien rassis en la disposition de leurs personnes, ny aussi du tout corrompus, & desbaucher le corps encore plus qu'il ne l'estoit, ne donnant point de plaisir, dont au moins on doie faire cas, ny de contentement tel que nous l'auions esperé. Il est bien vray que la diete trop exquisite & gardee estroitement au doigt & à l'œil, comme l'on dit en commun langage, rend non seulement le corps **F** paresseux, & dangereux de tomber en maladies, mais aussi matte toute la gayeté de l'ame, de maniere qu'elle a toutes choses pour suspectes, craignant tousiours de s'arrester trop, autant en travail qu'en plaisir, & generally en toute action, n'entreprenant iamais rien assurement ny gaillardement, là où il faut que nous facions de nostre corps comme d'une voile en la mer, ne le resserrant, ny ne le retenant point trop à l'estroit en beau temps, ny aussi le laschant trop dissoluement & trop negligemment, où il y a occasion de soupçonner quelque tempeste: car à ceste heure-là il le faudra choyer, & retirer vn petit, pour le rendre puis apres plus dispos & leger, come nous auons dit, & n'attendre pas à ce faire, iusques à ce que nous sentions des cruditez ny des flux de ventre, ny des inflammations, ou refroidissemens & endormies de membres: lesquels signes estans comme les messagers & les sergens de la fiebre qui est desia à leur porte, à male peine peuuent esmouuoir aucuns tant qu'ils se veulent resserrer & retraindre, lors qu'ils sont ja en l'accez de leur mal, là où il faut de loing **G** preuoir, & se tenir sur ses gardes long temps deuant la tourmente, quand on sent

Sur vn escueil marin en l'ær,

Le vent de la Bise souffler.

Car il n'y auroit point de propos de prendre soigneusement garde au crailler des corbeaux, ou au caqueter des poulles, & au fouiller des pourceaux remuans des ordures & de vieux haillons, comme dit Democritus, pour en tirer pronostiques de vent & de pluye: & que nous ne sçeussions point obseruer ny preuoir à certains signes vne tempeste prochaine à foudre & à naistre dedans nostre propre corps. Pourtant ne faut-il pas seulement obseruer le corps ou boire, & au manger, & aux exercices de la personne, si l'y prend point plus laschement & plus froidement que de coustume, ou au contraire, si a point plus de faim & plus de soif que d'ordinaire: mais aussi craindre, si le dormir n'est point continué tout d'une tire esgalement **H** & doucement, ains qu'il y ait des inegalitez & interruptions: voire iusques aux songes fault-il bien prendre garde s'ils sont point estranges & non accoustumez: car si ce sont imaginations extraordinaires, ils tesmoignent & signifient qu'il y a repletion de grosses humeurs gluantes, & perturbation des esprits au dedans. Quelquefois aussi il aduient que les mouuemens de l'ame mesme nous montrent que le corps est en quelque danger de maladie: car il prend aucunesfois aux hommes des melancholies sans propos, & des frayeurs sans aucune raison apparente, qui leur ostent & esteignent soudainement toute esperance: les vns deuiennent aucunesfois prompts à choleres soudaines, chagrins, se faschans de peu de chose, tellement qu'ils pleurent mal-gré eux, & languissent d'ennuy. C'est quand de mauuaises fumées & vapeurs ameres amassees seleuent & se vont mellant, comme dit Platon, parmy

A parmy les voyes de l'ame. Pourtant faut-il que ceux à qui telles choses arriuent, rememorent & considerent en eux-mesmes, s'il n'y a point quelque cause spirituelle: car s'il n'y en a point, il est force que ce soit quelque matiere corporelle qui a besoing d'euacuation, ou bien de repression. Aussi est-il vtile, quand on va visiter ses amis malades, s'enquerir diligemment des causes de leurs maladies, non par curiosité ny par ostentation, pour en disputer seulement, & faire monstre de son eloquence, en babillant des obstructions, des incidences, & communitiez des maladies, * pour monstre que l'on a leu les liures, & que l'on entend les termes de la medecine: ains s'enquerant diligemment, & non pas en passant par dessus, de ces choses legeres & communes, s'il estoit plein ou vuide, s'il auoit trauaillé, s'il dormoit bien ou mal: & principalement, comment il viuoit, & comment il se gouuernoit, quand il est tombé en fiebure. Et puis, comme Platon souloit dire en soy-mesme s'en retournant, apres auoir veu les fautes que d'autres commettoient: Mais suis-ie point moy-mesme tel? aussi apprendre aux despens d'autrui à prouuoir bien au faict de sa santé, s'en souuenir, & se tenir sur ses gardes, à fin de ne tomber aux mesmes inconueniens, & n'estre point contrainct de salitter, & là regretter, & louer, quand il n'en est plus temps, la tant precieuse Santé, ains en voyant vn autre attainct de maladie, remarquer bien, & imprimer en son cœur, combien nous doit estre chere la santé, combien il faut estre soigneux de se garder, & retenu à s'espargner. Et si ne sera pas mauuais de comparer puis apres sa vie à celle du patient: car s'il aduient que nous aions trop beu, ou trop mangé, ou trop trauaillé, & fait quelque autre telexcez, & que pourtant nostre corps ne nous menace point de maladie prochaine, toutefois si iugerons nous qu'il nous faudra contregarder, & anticiper le mal qui en pourroit aduenir: comme si nous auions fait quelque desordre au plaisir de l'amour, ou autrement trop trauaillé, en nous reposant & demourant à requoy, ou apres vne yurongnerie & apres auoir bien beu d'autant, beuant de l'eau en recompense: mais specialement apres auoir mangé beaucoup de viandes pesantes, comme sont chairs, ou bien diuerfes, en ieunant puis apres, & se restrainant, de maniere que l'on ne laisse aucune superfluité dedans le corps: car ces choses-là seules d'elles-mesmes sont causes de plusieurs maladies, & aux autres causes adioustent encore matiere & force d'auantage qu'elles n'en auoient. Pourtant a-il esté sagement dit par les anciens, que pour entretenir la santé ces trois poincts sont principalement necessaires, Manger sans se saouler, trauailler sans s'espargner, & la sémence conseruer. Car l'intemperance de la luxure dissout & affoiblit fort la chaleur naturelle, qui fait cuire & digerer la viande que nous prenons, & par consequent est cause qu'il s'engendre beaucoup de superfluité, & se fait vn grand amas de mauuaises humeurs dedans nostre corps. Parquoy pour recommencer à parler derechef d'vn chascun de ces poincts, venons premierement à considerer les exercices qui sont conuenables aux hommes de lettres & d'estude: car tout ainsi comme celuy qui dit

D le premier, qu'il n'escriuoit rien touchant les dents à ceux qui habitoient au long de la marine, leur enseigna ce qu'ils doiuent faire en disant cela: aussi pourroit-on dire aux hommes de lettres que l'on ne leur escrit rien touchant les exercices, pour ce que l'usage quotidian de la parole prononcee par viue voix, est vn exercice de merueilleuse efficace, non seulement pour la santé, mais aussi pour la force, non pas telle comme celle que l'on fait venir par artifice aux lucteurs, qui rend le corps charnu, & le cuyr ferme par le dehors, ainsi qu'un bastiment que l'on a enduit & crespé exterieurement: mais bien engendrant vne disposition robuste, & vne force vigoureuse aux plus nobles parties, & principaux instrumens de nostre vie au dedans. Or que les esprits augmentent les forces de nostre corps, les maistres des exercices le montrent assez, commandans aux lucteurs, quand on leur frotte les membres, de resister

* Ce sont
termes du
Medecin
Erasistratus.

Hippocrates
au liu. des
Aphorif.

Les regles & preceptes de santé.

& poulser contre les frictions en retenant leur halene, à mesure que l'on leur manie E
& que l'on leur frotte chascue partie : mais la voix estant vn mouuement de l'esprit
fortifie non superficiellement, mais en la propre source dont elle naist dedans les
flanes & les poumons, augmente la chaleur naturelle, subtilise le sang, nettoye tou-
tes les veines & ouure toutes les arteres, empeschant qu'il ne sy face aucun estoup-
pement ou espessissement d'humeurs superflues, comme vne lie au fond des vaisseaux
qui reçoient, & qui cuyssent les viandes dont nous nous nourrissons : au moyen
dequoy il est besoing que nous vsions fort ordinairement & familièrement de cest
exercice, en parlant en public, & discourant continuellement : ou bien si d'aduen-
ture nous faisons doubte, que nostre corps fust trop debile pour pouuoir supporter
tant de trauail, au moins en lisant à haulte voix : car ce que la branloire est au regard
de l'exercice du corps, cela mesme en proportion est la lecture au regard du parler,
remuant tout doucement & promenant la voix dedans la parole, ne plus ne moins
que dedans vn coche ou voitture d'autrui : il est vray que le deuis & la dispute
y adioust d'auantage la vehemence & l'efforcement, d'autant que l'ame sy atta- F
che quand & le corps : bien se fault-il donner de garde des clameurs violentes à plei-
ne teste : car ces efforts-là, & inegales contensions d'halene, sont bien souuent cause
de rompre des venes, ou de faire conuulsion de nerfs au dedans : puis apres que l'on
a ainsi leu ou parlé, il est bon vser de quelques frictions vnctueuses & chauldes, auant
que de s'aller promener, & de tels amollissements du cuyr & de la chair, en touchant
& maniant, en la sorte qu'on le peult faire, les entrailles, à fin de departir & espandre
egalement les esprits par tout, iusques aux extremittez du corps. La mesure de
ces frottements soit iusques à tant que le sentiment les trouuera agreables, & ne s'en
offensera point. Qui aura ainsi appaisé le trouble & la tension des esprits au fond
de son corps, si d'aduenture il sy treuve quelque superfluité, elle ne luy apportera
point de nuissance : & s'il laisse de se promener à faute de loisir, pour quelque affaire
qui luy sera inopinément surueni, ce sera tout vn pour cela, car nature aura G
touours eu ce qui luy fait besoing : & pour ce ne fault-il prendre pour couleur &
excuse de se taire, ny la nauigation, quand on est avec plusieurs autres passagers de-
dans vn vaisseau sur la mer, ny le logis quand on est en l'hostellerie, encore que les
assistans s'en deussent rire & mocquer, pour ce que là où il n'est point deshonneste
de manger deuant tout le monde, là n'est-il point aussi deshonneste d'exerciter sa per-
sonne : ains plus-tost est-il deshonneste craindre ou auoir honte de mariniere, mula-
tiers ou hostelliers, qui se mocqueront, non d'un qui iouera à la paulme tout seul, ou
qui escrmera à son ombre, ains d'un qui parlera, & en parlant enseignera, discourra,
ou apprendra par cœur & rememorera quelque bonne chose, pour son exercice. So-
crates souloit dire qu'une petite salette estoit suffisante pour exercer vn qui fait son
exercice de la danse : mais à celui qui veut exercer sa personne par le moyen de la
parole, tout lieu luy est suffisant, soit debout, soit couché ou assis : seulement nous H
fault-il bien donner garde que nous ne nous efforcions pas de crier à haulte voix,
lors que nous nous sentirons pleins de boire & de manger, ou bien lassez du plaisir de
l'amour, ou bien d'autre trauail quel qu'il soit, comme il aduient souuent aux Ora-
teurs & maistres de Rhetorique qui se laissent aller, & s'efforcent de declamer & ha-
renguer, les vns par vaine gloire & ambition de se monstrier, les autres pour le gaing
mercenaire, ou pour ialousie à l'encontre de leurs compagnons : comme Niger l'un
de nos amis, lequel faisoit profession d'enseigner la Rhetorique au païs de la Galatie,
aiant vn iour auallé vne areste de poisson qui luy estoit demouree en la gorge, il
suruint d'aduenture vn autre Rhetoricien passant son chemin, qui feit vne harengue
publiquement. Niger craignant qu'il ne semblaist fuyr la lice, pour n'oser se paran-
gonner à luy, se meit luy-mesme à declamer, aiant encore l'aresta accrochee dedans
sa gorge

- A** la gorge, de maniere qu'il sy engendra vne grande & douloureuse inflammation: la douleur de laquelle ne pouuant plus endurer, il souffrit qu'on luy feist vne profonde incision & grande ouuerture par le dehors, par où l'aresté luy fut bien arrachée, mais la playe en deuint si mauuaise, & sy feist vne si grande fluxion d'humeurs, qu'il en mourut tout roide. mais cela à l'aduenture sera plus à propos de ramenteuoir cy dessous. Apres l'exercice il fault entrer dedans l'estuue, là où se lauer d'eau froide est plus fait en ieune homme qui veut monstrier sa bonne disposition, qu'il n'est conuenable à la santé: car le bien que tel lauement peut apporter, c'est qu'il semble endurcir le corps, & le rendre moins subiect à estre offensé des qualitez de l'air: mais cela fait plus de mal au dedans, qu'il ne fait de bien au dehors, d'autant qu'il resserre les pores, & fait grossir & espessir les humeurs & vapeurs qui se vouldroient euaporer & resoudre continuellement. D'auantage il est force que ceux qui vsent de se lauer d'eau froide, tombent en la subiection de celle trop ex-
- B** quise & estroite diete que nous fuyons, ayans tousiours l'œil fiché à n'en outre-passer iamais vn seul point, d'autant que la moindre & plus legere faute du monde est incontinent chastiee bien asprement: là où, au contraire, se lauer d'eau chaulde nous pardonne beaucoup de choses, car elle n'oste pas tant de force & roideur au corps, comme elle nous apporte de profit pour la santé, acheminant & accommodant tout doucement les humeurs à la concoction: & si d'aduenture il y en a qui ne se puissent pas bien cuire, prouueu qu'elles ne soient pas totalement creuës, & qu'elles ne flottent pas au dessus de l'estomac, elle les fait dissoudre & exhaler sans aucun sentiment de douleur, & reconforte, & fait esuanouir les secrettes foulures & lassitudes des membres: toutefois là où nous sentirons que le corps sera en sa disposition naturelle, assez fort & robuste, il vaudra mieulx entre-mettre l'vsage du baing, & sera meilleur se faire huyler & frotter deuant le feu, là où le corps aura beioing d'estre reschauffé: car par ce moyen il prend mieulx ce qu'il luy fault de chaleur: ce qui n'est pas de
- C** mesme quant au Soleil: car on ne peult pas prendre de sa chaleur plus ou moins à discretion, ains est force de s'en seruir & en vser selon qu'il tempere & dispose l'air. Cela fuffise quant aux exercices de la personne: Au demourant pour venir à la nourriture, si les raisons & instructions que nous auons amenees cy dessus, par lesquelles nous nous sommes efforcez de refrener & reprimer les cupiditez, ont apporté quelque fruit, il seroit temps de passer maintenant outre à d'autres aduertissements. Mais si d'aduenture les cupiditez sont si vehementes, & si effrenees par maniere de dire, qu'il soit difficile de les renger à la raison, & s'opiniastrer à combattre contre vn ventre, qui n'a point d'oreilles, ainsi que disoit l'ancien Caton, il fault par subtils moyens faire, que la qualité de la viande en rende la quantité plus legere: & quant aux viandes solides & qui nourrissent beaucoup, comme sont les grosses chairs, les fromages, les figues seiches, & les œufs durs, n'en manger que le moins que l'on peult,
- D** car de les refuser du tout il seroit bien mal-aisé, mais bien se prendre aux viandes legeres & delices, comme sont la plus part des herbages, dont on vse en potages, les chairs des oyseaux & des poissons qui ne sont pas gras: car en mangeant de semblables viandes on peult bien tout ensemble gratifier à l'appetit, & ne charger point l'estomac. Mais sur tout se fault-il donner garde des cruditez precedentes de trop manger de chair: car oultre ce que sur l'heure elles chargent trop l'estomac, il demeure encore puis apres de mauuaises reliques: de maniere que le meilleur est, accoustumer son corps à ne demander point à manger chair: car la terre produit assez d'autres aliments, non seulement pour la necessité de la nourriture, mais aussi pour le plaisir & contentement de l'appetit, les vns tous prests à manger, sans que l'œuvre de l'homme s'empesche d'y rien adiouster, les autres aptes à estre meslez avec d'autres en plusieurs sortes pour les rendre plus sauoureux au goust. Mais pour autant

Les regles & Preceptes de Santé.

que l'accoustumance est, par maniere de dire, vne autre nature, ou à tout le moins non **E** contre nature, il ne fault pas l'accoustumer de manger chair pour assouvir son appetit, comme font les loups & les lions, ains s'en fault seulement seruir comme d'un fonnement, & vn soubassement de toute l'autre viande, & au demourant faire sa nourriture principale d'autres aliments qui sont plus conformes au corps & plus selon nature, & qui grossissent moins la subtilité de l'esprit, & le discours de l'ame, comme vn feu allumé de plus delicate & plus legere matiere. Et quant aux choses liquides, il fault vser du lait, non comme d'un breuuage, mais comme d'une viande pesante & qui nourrit beaucoup. Et quant au vin, il luy fault dire ce que dit Euripides de Venus,

Sois avec moy, mais en mesure bonne,

Ny peu ny trop, & point ne m'abandonne:

car entre toutes sortes de breuuages, c'est le plus vtile: entre les medecines, la plus plaifante: & entre les viandes, celle de qui moins on se lasse, proueu qu'il soit bien trempé & mellé avec temps opportun, plus tost qu'avec l'eau, non seulement celle **F** dont on trempe le vin, mais aussi celle qui est beüe à part, laquelle fait que le vin trempé fait encore moins de mal, & porte moins de dommage: à raison de quoy, il se fault accoustumer de boire par chascun iour deux ou trois fois d'eau pure, pour ce que cela redra la force du vin plus foible, & la boisson d'eau pure plus familiere à nostre estomac, à fin que quand la necessité sera venue, que par force il nous en faudra boire, il ne la trouue pas si estrange, & ne la refuse pas tant. Car plusieurs bien souuent recourent principalement au vin, lors qu'ils ont plus besoin de boire de l'eau, comme quand ils se sont eschauffez au Soleil: où au contraire quand ils sont gelez de froid, ou qu'ils se sont efforcez à haranguer, ou qu'ils ont fort estudié, & generalement apres qu'ils ont bien trauaillé, ou fait quelques grands efforts, ils estiment que c'est lors qu'ils doiuent boire du vin, comme si la nature mesme requeroit que l'on feist quelque bien au corps, & quelque changement pour le recreer de ses trauaux: mais la nature ne desire point qu'on luy face du bien en ceste sorte, si l'on **G** appelle volupté faire du bien, ains requiert seulement qu'on le ramène à vn moyen entre trauail & aise: de maniere qu'à ceux-là il fault retrencher les viures, & ou leur oster le vin du tout, ou leur en bailler ce-pendant qui soit bien trempé: pour ce que le vin estant de sa nature vehemant & remuant, il augmente & empire les emotions qu'il trouue dedans le corps irrité, & aigrit encore d'auantage les parties qui y sont desia offesees, lesquelles auroient plus tost besoing de reconfort & d'adoucisement, à quoy l'eau est bien plus commode: car si n'auons point de soif autrement nous beuons de l'eau chaude, apres auoir bien trauaillé & fait quelque effort es grandes chaleurs de l'esté, nous en sentons vn refreschissement & vn grand reconfort au dedans: c'est pour ce que l'humidité de l'eau est gracieuse & paisible, & qu'elle ne se debat point, là où celle du vin a vne force & vehemence qui ne repose iamais, & qui n'est point benigne, ne bien conuenable aux indispositions qui commencent **H** à naistre: car si l'on craint les acrimonies aigues, & les amertumes que la faim & faulte de manger engēdre dedans nostre corps, ou si comme font les enfans, on trouue mauuais de ne se mettre point à table pour manger auant que la fiebure soit venue, quand on se doute qu'elle doie venir, le boire de l'eau est vn confin & vn entre-deux fort à propos pour cela: & bien souuent nous offrons à Bacchus mesme les sacrifices que l'on appelle Nephália, pour ce qu'il n'y a point de vin, nous accoustumans par là sagement à ne desirer pas tousiours boire du vin. Minos osta du sacrifice la fleute & les chapeaux de fleurs que l'on porte sur la teste, pour quelque ennuy qu'il auoit: & toutefois nous sçauons tresbien, que l'ame dolente n'est par les fleutes, ny par fleurs & festons passionnee: là où il n'y a corps d'homme, tant soit-il fort & robuste, que si l'est esmeu & enflammé, en y mettant encore du vin, n'en soit plus griefue-
ment

- A** ment offensé. On dit que les Lydiens en temps de famine ne mangent que de deux iours l'un, & ce pendant qu'ils passent leurs temps à iouer aux dez, & à d'autres ieux: aussi feroit-il bien seant à vn homme d'estude aimant les Muses & les lettres, en temps qui auroit besoing de souper peu, & de manger moins, auoir deuant soy la figure de quelque proposition Geometrique, ou bien vn petit liure, ou vne lyre, ou vn lut, cela ne le laissera point emmener prisonnier à son ventre, ains luy diuertissant & transferant ordinairement l'entendement de la table à ses honnestes passe-temps là, chassera les appetits de boire & de manger, comme des Harpyes avec les Muses: car il ne feroit pas raisonnable qu'un Scythe en beuuant touchast souuent & feist sonner la chorde de son arc, en resueillant par cela son courage, qui autrement, ainsi comme ils disent, s'en iroit laschant & amollissant par le vin: & qu'un personnage Grec eust crainte & honte d'estre moqué de ce, qu'il essayeroit de refrener & reprimier vn importun & violent appetit, par le moyen des liures & des lettres: ne plus ne
- B** moins qu'en l'une des Comedies de Menander il y a vn macquereau, qui pour tenter de ieunes hommes soupans ensemble en vn festin, leur amena de belles filles sur leur souper, richement & proprement vestues & parees: mais chascun de ces ieunes hommes, pour ne point veoir ces belles filles au visage, baissoit la teste, & mangeoit des confitures & patisseries qui estoient seruies deuant eux. Les hommes addonnez à l'estude des lettres, ont bien d'autres plus plaisants diuertissements, si autrement ils ne peuuent arrester & contenir ceste faim violent & canine, quand ils sont à la table: car quant aux paroles des maistres de l'icte, & aux propos de quelques maistres d'escholes, qui vont disant, que disputer des lettres à la table corrompt la viande que l'on prend dedans l'estomac, & fait mal à la teste, il faudroit craindre cela si nous voulions durant le repas nous mettre à resouldre de tels arguments sophistiques, comme celuy que les Dialecticiens appellent l'Indien, ou que nous voulussions disputer de tels sophismes, comme celuy qu'ils nomment le Maistre. L'on
- C** dit que la cyme du palmier que l'on appelle la ceruelle, est fort douce à manger, mais qu'elle fait mal à la teste: aussi les disputes espineuses de la Logique ne sont pas viandes bien propres ny plaisantes pour vn souper, plus tost feroient elles mal à la teste, & donneroient beaucoup de peine: mais s'ils ne nous veulent permettre de discourir, d'ouyr lire, & de diuiser durant le souper de quelques propos, qui avec l'honnesteré & l'utilité aient la douceur attraiante, & le plaisir conioint, nous les prions de ne nous estre point molestes, ny importuns, ains de se leuer de la table, & s'en aller en leurs galleries, & en leurs parquets à l'icte, tenir ces propos-là à leurs escholiers & champions de la l'icte, lesquels ils retirent & destournent de l'estude des bonnes lettres, & les accoustumans à consumer les iours tous entiers à plaisanter & à dire mots de gaudisserie, ils les rendent à la fin, comme disoit le gentil Ariston, avec aussi peu de sentiment, & aussi gras & bien huilez, comme sont les colonnes de pierre
- D** qui soustiennent les portiques, sous lesquels ils s'exercent & tiennent leur eschole de la l'icte. Et nous au contraire adioustans foy aux Medecins, qui nous conseillent de faire mettre tousiours quelque interualle entre le souper & le dormir, non pas apres auoir remply le corps de viande & auoir comprimé les esprits, estans encore les morceaux tous cruds, & ne faisans que commencer à bouillir, aggrauer & empescher la concoction, là où il leur faut donner vn peu d'espace, & vn peu de loisir, de se rasseoir. Comme ceux qui veulent que l'on meue le corps apres le repas, ne commandent pas que l'on coure à toute bride, ny que l'on escrime à toute oultrance, ains que l'on se promene à l'aise tout bellement, ou que l'on danse tout doucement: ainsi estimerons nous qu'il faut exercer nos entendements apres le souper, non point d'affaires de profonde meditation, ny de disputes sophistiques qui tendent ou à ostentation de grand & vif esprit, ou qui esmeuent à contention: mais il y a plusieurs

Les regles & preceptes de santé.

questions naturelles, plaisantes à disputer, & faciles à decider, & plusieurs beaux E contes, dont il se peult tirer beaucoup de bonnes considerations & instructions pour former les mœurs, qui ont celle facilité que le poëte Homere appelle Menœces, c'est à dire, cedant au courroux, & ne point resistant. Voyla pourquoy aucuns appellent plaisamment cest exercice de mouuoir & resoudre des questions historiques, ou poëtiques, l'yssue de table & le dessert des hommes studieux & doctes. Encore y a-il d'autres deuis plaisants, comme d'ouyr des contes faicts à plaisir, parler du ieu de la fleute, ou de la lyre, qui donne quelquefois plus de contentement, que d'ouyr la fleute, ou la lyre mesme. Et la marque du temps propre à tels entretene- F ments est, tant que l'on sent que la viande s'affaisse bien dedans l'estomac, & que l'haleine monstre que la concoction se fait, & que la chaleur naturelle gagne le dessus. Mais pour ce qu'Aristote estime que le promener apres le souper excite & souffle, par maniere de dire, la chaleur: & le dormir, quand l'on s'endort incontinent apres souper, l'amortit & l'esteint: & que les autres au contraire sont d'opi- nion, que le repos sert mieux à la concoction, & que le mouuement empesche la di- F gestion, qui est cause que les vns se promènent apres le souper, & les autres demeurent en repos: il me semble que l'on satisferoit commodément à toutes les deux opinions, qui se tiendroient quoy & serré apres le souper, pour eschauffer son corps, & qui esueilleroit son ame sans la laisser appesantir d'oyfuieté, ains aguiferoit & subtiliseroit vn petit ses esprits, en deuisant, ou escoutant deuiser, de propos gracieux & plaisans, non pas fascheux & poignans. Au demourant quant aux vomis- sements, ou purgation du ventre, par le moyen des medecines laxatiues, qui sont les malheureux reconforts & remedes de repletion, il n'en fault iamais vser sans tres- grande & vrgente necessité, au contraire de ce que font plusieurs, qui remplissent leurs corps en intention de le vuidier puis apres, ou à l'opposite, qui le vident pour le remplir contre la nature, ne se faschant pas moins, mais estans ordinairement plus G marris d'estre pleins, que d'estre vuides, d'autant que telle repletion leur empesche le contentement de leurs cupiditez: au moyen dequoy ils procurent que leur corps soit toujours vuide de quelque chose, comme estant celle vuidange le propre champ de leurs voluptez. Or le dommage qui peut aduenir de cela est du tout euident, pour ce que l'vn & l'autre apporte de grandes esmotions & violentes lacerations au corps, mais le vomissement amène vn mal propre & particulier d'auantage, c'est qu'il entretient & augmente vn appetit insatiable: car il s'en engendre des faims violentes & turbulentes, comme quand le cours d'vn ruisseau est empesché & arresté, qui tirent à force la viande, laissant toujours vn appetit, qui ne ressemble point au naturel, quand la nature a besoing de manger, mais plus tost aux eschauffements & inflammations des medecines, ou des cataplasmes: d'où vient que les voluptez qui en procedent, passent incontinent comme auortees & imparfaites, estans accompagnées de grands battemens de pouls, & grandes torsions en leur iouissance: & apres s'en ensuyuent H de douloureuses tensions, estoupemens des conduits, & retentions des vents, qui n'attendent pas les naturelles eiections, ains vont discourant par tout le corps, ne plus ne moins que les vaisseaux surchargez, qui ont besoing d'estre soulagez de leurs charges, plus tost que remplis d'auantage. Et quant à l'emotion du ventre & des boyaux qui se fait avec drogues laxatiues, elles gastent & resoluent la vertu naturelle des parties, tellement qu'elles sont cause qu'il s'engendre plus de superfluitez & plus d'excremens dedans le corps, qu'elles n'en tirent dehors. De maniere que c'est tout ne plus ne moins que si quelqu'vn se faschant de veoir dedans sa ville grand nombre de peuple Grec naturel habitant du pais, pour l'en chasser l'alloit remplissant de Tartares, ou d'Arabes estrangers: ainsi se mescomptent grandement aucuns, qui pour ietter hors de leurs corps des humeurs superflues, qui leur sont domestiques & fami- lieres,

- A** lieres, iettent dedans ie ne sçay quelle graine, que l'on appelle Cocque Gnidien, ou de la Scammonee, & autres telles drogues de loingtain pays, qui n'ont aucune conuenance avec nos corps, & qui auroient plustost befoing d'estre purgees & iettees hors du corps elles mesmes, que puissance de vuidier & chasser ce dont la nature se trouueroit chargee. Le meilleur doncques est, par sobriété, & bonne regle de viure, rendre son corps bien composé, pour soustenir tantost vne euacuation, & tantost vne repletion: mais si d'adventure il est force quelquefois vser aucunement de l'un ou de l'autre, il faut prouoquer le vomissement, sans vser de drogues medicinales, ny autre curiosité, en ne troublant rien au dedans, ains seulement pour éuiter vne crudité, reietter ce qui seroit de trop, & qui ne se pourroit paracheuer de cuyre. Car tout ainsi que les linges & draps qui se nettoient avec du saumon, cendres, & autres matieres absterfues, s'vsent bien plus que ceux que l'on
- B** laue avec l'eau simple: aussi les vomissements qui sont prouoquez avec des medecines, offensent bien plus le corps, & engastent la complexion. Et quand le ventre est arresté, il n'y a drogue qui le lasche si doucement, ne qui le prouoque si aisément à le descharger, comme font aucunes viandes, dont l'experience nous est tres-familier, & l'vsage ne nous apporte aucune douleur: mais si d'adventure il estoit si fort endurcy, qu'il ne voulust pas obeyr, ne ceder à ces viandes-là, alors il faudroit par plusieurs iours boire de l'eau, ieuner, ou prendre vn clystere, plus tost que de prendre de ces medecines laxatiues, qui corrompent tout le corps, & le mettent sans dessus dessous: ausquelles toutefois plusieurs courent facilement, ne plus ne moins que les folles femmes qui vsent de certains medicaments pour se faire auorter, & ietter le fruit qu'elles ont conceu, à fin de se faire incontinent remplir vne autre fois, & qu'elles en ayent tant plus de plaisir: mais à tant est-ce
- C** assez parlé de ce propos là. Au contraire aussi, ceux qui entrejettent des ieunes à point nommé trop exactement & trop regléement obseruez par certain circuit de iours, enseignent à la nature, sans qu'elle en ait befoing, d'auoir befoing d'un resserrement, & de se rendre necessaire vne abstinence d'aliments, qui de soy n'estoit point necessaire, à temps prefix, que demande la coustume à quoy on l'a asseruie. Car il est bien meilleur vser de tels chastiments enuers son corps librement, sans qu'il en ait aucun presentiment, ny aucune suspicion: au demourant composer le reste de sa maniere de viure, en sorte qu'elle se puisse accommoder & obeïr à toutes diuerses occurrences, non pas demourer attachee ne liee à vne seule forme de viure, asseruie à certains iours, certains nombres, & certain circuit de temps: car cela n'est ny seur, ny facile, ny ciuil, ny pas humain: ains ressemblant plus proprement à la vie d'une ouystre, ou d'un tronc d'arbre, de se rendre ainsi subiect, sans pouuoir aucunement iamais changer ny diuersifier, ny en viandes, ny en ieuf-
- D** nes & abstinenances, ny en mouuements, ny en repos: ains demourer tousiours clos & couuert en vne vie ombrageuse, oisifue, à part-soy, sans conuersation d'amis, sans participation d'honneurs, loing de toute administration de la chose publique, cela est par trop se resserrer à mon aduis: car la santé ne se doit point acheter avec l'oisuete, & la paresse de ne rien faire, qui sont les principaux inconuenients & maux qu'il y a és maladies: car c'est tout ne plus ne moins que si quelqu'un vouloit bien contregarder ses yeux par ne les employer point à regarder, & sa voix par ne point parler, qui penseroit que la santé pour se bien conseruer eust necessairement befoing d'un continuel repos, & de ne iamais rien faire: car l'homme qui est sain, ne sçauroit mieux faire, pour bien entretenir sa santé, que de s'employer à plusieurs beaux & bons offices d'humanité. C'est doncques vn grand abus d'estimer qu'oisuete soit saine ou salubre, attendu qu'elle destruit la fin de la santé: & n'est pas veritable, que ceux qui font le moins, soient les plus sains:

Les regles & preceptes de santé.

car Xenocrates n'estoit point plus sain que Phocion, ne Theophrastus plus que Demetrius, & n'a de rien seruy à Epicurus ny aux Epicuriens, pour acquerir celle tranquillité de la chair, dont ils font si grand cas, & qu'ils louënt si hautement, de fuir toute entremise de gouvernement & d'administration honorable & publique, ains faut par autres prouisions & moyens entretenir la disposition & habitude du corps, qui est selon nature, estant certain que toute sorte de vie reçoit & maladie & santé. Toutefois le personnage dont il est question dit, qu'il falloit recorder aux hommes politiques, & de gouvernement, le contraire de ce que Platon admonestoit les ieunes gens au sortir de son eschole : car il leur souloit dire, Or sus enfans, aduisez d'employer vostre loisir à quelque passetemps honneste : mais nous recorderions volontiers à ceux qui s'entremettent des affaires de la Chose publique, d'employer leur labeur à choses honnestes & necessaires, & non pas se tuer le cœur & le corps pour choses legeres, & de bien peu de consequence, comme faict vne bonne partie des hommes, qui se tourmentent pour neant, se trauaillans de veilles, d'allées & de venuës, & de courses çà & là, pour choses qui ne sont bien souuent ny bonnes, ny honnestes, ains pour faire honte à quelqu'un par enuie qu'ils luy portent, ou par opiniaistreté, ou pour quelques vaines & folles opinions qu'ils poursuivent : car ie pense que c'est à telles gens principalement que Democritus disoit, que si le corps mettoit l'ame en procès, & l'appelloit en iustice, en matiere de reparation de dommage, iamais elle ne se saueroit qu'elle ne fust condamnée en l'amende : & ne sçay si Theophrastus disoit bien vray, quand il affermoit par vne maniere de translation, que l'ame payoit bien le loüage de sa demeure au corps : car le corps reçoit plus de mal de l'ame qui n'vse pas de luy selon raison, & ne le traite pas ainsi comme il appartient : pour ce que quand elle a ses propres & peculieres passions, & quelques entreprises ou affections, elle abuse de luy, sans en rien l'espargner. Or le tyran Iason, ne sçay pour quelle occasion, souloit dire, qu'il falloit faire beaucoup de petites choses iniustement, qui en vouloit faire vne bien grande iustement : Aussi pourrions nous bien conseiller à l'homme d'estat & de gouvernement, qu'il ne feist pas cas des choses legeres, ains ne s'en feist que iouïr, & se reposer en icelles, s'il veut n'auoir point le corps rompu ne foulé, ne recreu, quand il le faudra employer aux grandes & belles, ains qu'il soit tout refait à loisir, ne plus ne moins que les vaisseaux vieux que lon tire en terre, pour les rhabiller, à fin que derechef, quand l'ame le voudra conduire & remettre aux affaires, il y aille plus dispos,

Comme vn poulain fuit la iument qu'il tette.

Et pourtant quand les affaires le permettent, il se faut refaire & reuenir, sans plaindre ny espargner au corps le dormir, ny le boire, & le manger, ny le repos qui est mestoyen entre plaisir & desplaisir, n'obseruans pas la regle que la plupart des hommes gardent, & en la gardant perdent & affolent le corps par soudaines mutations, ne plus ne moins que le fer que lon trempe : car lors qu'il est bien rompu & foulé de trauaux, ils le vont fondre & dissoudre en voluptez excessiues & demesurées, puis tout soudain, lors qu'il est tout fondu & affoibly du plaisir de Venus, ou d'auoir bien beu, ils le vous tirent ou aux trauaux du palais, ou de la court, à la sollicitation de quelque affaire de grande importance, ayant besoing de chaude & vehemente poursuite. Le philosophe Heraclitus estant tombé en vne maladie d'hydropisie, disoit à son medecin, qu'il feist d'une grande pluye vne grande secheresse : Les hommes aussi font ordinairement de grandes & lourdes fautes, quand ils baillent leurs corps à fondre, & à lascher aux voluptez, lors qu'ils sont bien las, recreuz, & foulez de labeur : & puis derechef les roidissent & retendent au contraire : car la nature ne desire, ny ne demande point ce soudain changemēt, ains est l'incontinence & lascheté de l'ame

A de l'ame, qui se laisse desordonnéement aller aux plaisirs & voluptez, au sortir des laborieux exercices, ainsi comme font ordinairement les gens de matine, qui soudainement apres les voluptez se reiettent derechef à la poursuite du gaing, & à penser à leurs affaires, ne donnans pas loisir à la nature de iouyr du repos, & de la quoye tranquillité, dont elle a besoing, ains l'en iettent incontinent dehors, & la mettent sans dessus dessous par le moyen de ceste inegalité: mais les hommes aduisez se gardent bien de donner des voluptez à leur corps, lors qu'il est rompu de trauail, car ils n'en ont que faire: & les mesprisent, ou ne s'en souuiennent du tout point, ayās tousiours l'esprit tendu à la consideration de l'honnesteté & beauté de la chose qu'ils ont enuie de faire, amortissans toute aise & toute sollicitude de leur ame par autres cupiditez: comme lon trouue escrit qu'Epaminondas dict en iouïant, d'un fort homme de bien & vaillant, qui mourut en son liét de maladie, enuiron le temps de la guerre.

B Leuètrique: O Hercules, comment a cest homme eu loisir de mourir entre tant d'affaires! Autant en pourroit-on dire à la verité d'un personnage qui auroit en main quelque grand affaire, en matiere de gouuernemēt, ou bien quelque traicté de philosophie, Cōment vn tel homme pourroit-il auoir loisir ou de s'enyrurer, ou de gourmander, ou de paillarder? mais les sages quand ils sont hors d'affaires, ils mettent alors leurs corps en repos, les deschargent de trauaux inutiles, & encore plus de voluptez superflues & non necessaires, les fuyans comme chose ennemie & contraire à la nature. Il me souuient d'auoir entendu que Tibere Cēsar souloit dire, que l'homme qui a soixante ans passez, merite d'estre mocqué quand il tend la main au medecin pour se faire taster le pouls: quant à moy ie treuve ce dire à vn peu trop crud, mais bien me semble-il veritable, qu'il faut qu'un chascun cognoisse les particularitez de son pouls, pource qu'il y a beaucoup de diuersitez en vn chascun de nous, & qu'il ne soit point ignorant de la particuliere complexion de son corps, tant en chaleur, que en secheresse, & quelles choses luy font bien, & quelles choses luy font mal, quand il en vse. Car celuy-là ne se sent pas soy-mesme, & demeure sourd & aueugle, comme en vn corps emprunté, qui veut apprendre ces particularitez là d'un autre que de luy-mesme, & qui va demandant au medecin, s'il se treuve mieux en esté qu'en hyuer, & s'il prend plus aisément les choses seches que les humides, & s'il a naturellement le pouls fort ou foible, hasté ou lent: car ce sont choses vtils à sçauoir, & aisées à apprendre, d'autant que nous le pouuons esprouuer à toute heure, veu qu'il est tousiours quant & nous. Aussi faut-il cognoistre entre les viandes & entre les breuuages, plustost ceux qui sont bons à nostre estomac, que ceux qui sont plaisans à la langue, & sçauoir par experience cela qui fait bien à l'estomac, plustost que cela qui l'offense: & ce qui trouble & empesche la concoction, plustost que ce qui est agreable, & qui chatoüille le goust: car demander au medecin quelle chose est facile à digerer, & quelle ne l'est pas, & quelle chose lasche le ventre, & quelle le restrainct, cela me semble aussi laid, que de luy demander que c'est qui est amer, & que c'est qui est doux, ou brusque & austere. Et toutefois nous en voyons plusieurs qui sçauent bien reprendre les cuisiniers, quand ils ont faict vn potage ou vne saulſe trop douce, ou trop aigre, ou trop sallée, & ne discernent pas ce qui estant mis dedas leur corps ne leur fera point de mal, ou leur sera profitable: tellement que bien peu souuent il y a faute, que leur potage ne soit bien assaisonné: & au contraire, par ne vouloir bien assaisonner tout leur corps, ains le desbaucher tous les iours, ils donnent beaucoup d'affaires aux medecins: car ils ne iugent pas le potage estre le meilleur, qui est le plus doux, ains y meslēt plusieurs ius aigres, ou verds, pour luy donner vn peu de pointe: & à l'opposite ils fourrent dedans leurs corps toutes les douceurs des voluptez iusques à cœur faoul, ignorans ou bien ne se souuenans pas, que la nature attache tousiours aux choses qui sont vtils & salubres, vn plaisir non mixtionné de

Cornelius Tacitus lib. 6. met 30. ans. ce qui conuient mieux à ce que Suetone escrit de luy, Vastetudine prosperissima usus est, quāvis a trigesimo etatis anno arbitratu eam suū reuerit sine adiumento cōsilioque medicorum.

Les regles & preceptes de santé.

desplaisir, & dont on ne se repent iamais: mais aussi faut-il auoir en memoire les **E** choses qui sont propres & conuenables aux corps, ou contraires aux mutations des saisons de l'an, & autres qualitez & proprietiez de l'air, pour sçauoir accommoder proprement à vne chacune saison sa maniere de viure. Au reste quant aux inconueniens procedans de chicheté, ou d'auarice & ardeur de gagner, à la saison que lon ferre les fruiçts, pour les loger & garder à force de veiller, de courir & tracasser çà & là, ils font paroïr au dehors les vices & les tares qui sont au dedans du corps: mais il ne faut pas craindre que tels accidens aduiennent aux personnes doctes & studieuses, ny à gens d'estat & d'honneur, auxquels principalement s'adresse ce discours. Mais il faut qu'eux prennent garde, & fuyent vne autre sorte de chicheté & d'auarice, en matiere d'estude & de lettres, laquelle fait qu'ils mettent en nonchaloir, & n'ont aucun esgard à leurs pauvres corps, qui bien souuent n'en peuuent plus, tant ils les ont trauaillez: & neantmoins ne leur pardonnent point encore, ains les contraignent de faire à l'enuy, eux qui sont fressles & mortels, de l'entendement & de l'esprit qui est **P** immortel, & ce qui est terrestre, venu de la terre, à l'enuy de ce qui est celeste. Et puis le bœuf dict au chameau son compagnon au seruice d'un mesme maistre, Tu ne me veux pas maintenant soulager d'une partie de ma charge, mais bien tost tu porteras tout ce que ie porte, & moy avecques dauantage: comme il aduint par la mort du bœuf, qui demoura sous le faix. Ainsi en prend-il à l'ame, qui ne veut pas donner au pauvre corps las & recreu, un peu de relasche & de repos: car peu apres il luy suruient vne fiebure, ou un mal de teste, avec un esblouissement d'yeux, qui la contrainct de quitter & abandonner liures, lettres & estudes, & est finalement forcée de languir, & demourer au liçt malade quant & luy. Parquoy Platon nous admonestoit sagement, de ne remuer & n'exercer point le corps sans l'ame, ny l'ame aussi sans le corps, ains les conduire également tous deux, comme vne couple de cheuaux attelés à un mesme timon ensemble, attendu que le corps besongne & trauaille quant & l'ame: au moyen dequoy il en faut auoir un tresgrand soing, & luy rendre le traitement qui luy appartient, à fin de luy entretenir la belle, bonne, & desirable santé, **G** sçachant que le plus grand & le plus singulier bien qui en procede, c'est, que l'un ne l'autre à faute de bonne disposition n'est empesché de cognoistre la vertu, & d'en vser, tant en lettres comme es actions de la vie humaine.

De la fortune des Romains.



LA Vertu & la Fortune ont combattu plusieurs grands combats, & par plusieurs fois, l'une contre l'autre: mais celui qui se presente maintenant, est le plus grand de tous, à sçauoir, le procès qu'elles ont ensemble touchant l'Empire **H** Romain, laquelle des deux l'a faict, & laquelle a produict en estre vne si grande puissance: car ce ne sera pas un petit tesmoignage pour celle qui le gagnera, ou plustost vne grande iustification alencontre de l'imputation que lon leur met sus à toutes deux: car on impute à la Vertu, qu'elle est honeste, mais inutile: & à la Fortune, qu'elle est incertaine, mais bonne: & dict-on que l'une est infructueuse, & l'autre mal-feable en ses dons. Car qui est celui qui ne dira, estant la grandeur de Rome attribuée & adiugée à l'une ou à l'autre, que ou la Vertu ne soit tres-vtile, si elle a peu faire tât pour les gens de bien: ou la Fortune ne soit tres-ferme & constante, veu qu'elle conserue desia par si long temps ce qu'elle a **vne**

- A** vne fois donné? Or le poète Ion és œuvres qu'il a composez sans vers en prose, dict que la fortune & la sapience, qui sont deux choses tres-differentes & dissemblables, produisent néantmoins de tres-semblables effets: l'une & l'autre agrandissent & honorent les hommes, les auancent en dignité, en puissance, en estat & autorité. Et quel besoing est-il d'estendre ce propos à reciter & denombrez ceux qu'elles ont auancez, attendu que la nature mesme qui nous porte, & nous produit toutes choses, les vns estiment que ce soit la fortune, les autres la sapience? Et pourtant ce present discours adiousté à la cité de Rome vne grande & admirable dignité, c'est que nous mettons en dispute d'elle ce que nous disputons aussi de la terre, de la mer, & des estoilles, à sçauoir, si ce a esté par fortune, ou par prouidence, qu'elles sont venuës en estre. Mais quant à moy, il m'est aduis que si bien la vertu & la fortune ont eu ailleurs plusieurs debats & plusieurs querelles ensemble, qu'à la composition d'un si grand Empire, & si grande puissance, il est vray-semblable qu'elles se sont
- B** accordées ensemble, & que d'un commun accord elles ont acheué & parfaict le plus grand & le plus beau chef-d'œuvre qui fut oncques entre les humains: & ne me pense point abuser en ceste coniecture, ains estime que tout ainsi que Platon dict, que du feu & de la terre, comme des premiers & necessaires elemens, tout le monde a esté concréé, à fin qu'il fust & visible & palpable, la terre luy donnant la grauité & la fermeté, & le feu la forme, la couleur & le mouuement, & les deux autres natures & elemens qui sont entre ces deux extremes, à sçauoir, l'air & l'eau, amollifans & temperans la grande dissimilitude de l'un & l'autre, des deux bouts ont assemblé & meslé par leur moyen la matiere premiere: aussi le temps avec Dieu prenans la vertu & la fortune, les ont destrempées & meslées ensemble, à fin que de ce qui est propre à l'un & à l'autre, ils bastissent & feissent vn temple veritablement sainct, & à tous profitable, vn fondement & soubassement ferme, vn element eternal aux affaires qui tendent tousiours contre bas, & vont tousiours en empirant, &
- C** vne ancre sacrée alencontre de la tourmente, pour garder le monde de courir fortune. Car ainsi comme quelques philosophes naturels disent, que le monde au commencement ne vouloit pas estre monde, & que les corps ne vouloient pas se ioindre & se mesler ensemble, pour donner à la nature vne commune forme composée de tous ces corps-là, ains que ceux qui estoient encore petits, & espars çà & là, se glissoient, s'eschappoient, & fuyoient de peur d'estre attrapez & attachez avec les autres, & ceux qui estoient vn peu plus robustes & mieux entassez, se combattoient desia bien rudement les vns contre les autres, & y auoit de grands troubles entre eux, tellement qu'il en sortoit vne violente tourmente, & vne grande combustion, tout estant plein de ruine, d'erreur & de naufrages, iusques à ce que la terre venant à prendre grandeur par le moyen des corps qui accouroient & s'attachoiēt à elle, elle comença à s'affermir elle-mesme premierement, & depuis donna & dedans elle & à
- D** l'entour d'elle vn siege ferme & assésuré à tous les autres corps: aussi, comme les plus grands potentats & empires qui fussent entre les hommes, se remuassent selon les fortunes, & s'entreheurtaient les vns les autres, d'autant que nul n'estoit assez grand pour commander à tous les autres, & que toutefois chacun le desiroit, il y auoit vn estrange mouuement & agitation vagabonde, & vne mutation vniuerselle de tout en tout parmy le monde, iusques à ce que Rome venant à prendre force & accroissement, & à lier & attacher à soy d'un costé d'autres peuples & nations voisines, & d'autre costé des seigneuries, royaumes & principautez des princes loingtains & estrangers d'outre mer, les choses principales cōmancerent à prendre vn fondement ferme, & vn establisement assésuré, parce que l'Empire se reduisit en fin en vn ordre pacifique, & en vn cercle & rondeur d'estat si grand, que rien n'en pouuoit tomber ne dechoir, par le moyen de ce que toute vertu regna en ceux qui conduisirent ce

De la fortune des Romains.

grand ouvrage à chef, & aussi qu'il y eut beaucoup de faueur de la fortune, qui y coo- E
pera, ainsi comme par la suite de ce discours il sera facile à cognoistre, & à demon-
strer. Si me semble que ie voy maintenant, comme de dessus vne haute guette, venir
la Vertu & la Fortune à la plaiderie de ceste cause, & au iugement & decision de ceste
question. Mais le port & l'alleure de la Vertu est graue & doux, le regard arresté, & le
soing qu'elle a de maintenir & defendre son honneur en ceste contention, luy faict
vn peu monter la couleur au visage, encore qu'elle demeure beaucoup derriere la
Fortune qui se haste de venir tant qu'elle peut: & la conduisent & environnent tout
à l'entour, comme sa garde, vne bonne troupe

D'hommes tuez en guerrieres attaintes,

Ayans de sang les armes toutes taintes,

tous naurez par le deuant, & degouttans de sang meslé avec la sueur, appuyez sur des
tronçons de lances & de picques qu'ils ont ostées à leurs ennemis. Voulez vous que
nous demandions qui ils sont? Ils respondent qu'ils sont vn Fabricius, vn Curius, vn F
Camillus, les Deciens, vn Cincinnatus, vn Fabius Maximus, vn Claudius Marcel-
lus, les deux Scipions. Je y voy aussi Caius Marius se courrouçant à la fortune. Là est
aussi Mucius Scevola qui monstre sa main brulante, & crie tout haut, Voulez vous
attribuer ceste main à la fortune? Et Horatius Cocles qui si vaillamment combattit
sur le pont, tout couuert de coups de traict des Thoscans, & monstrant sa cuisse rom-
pue, murmure à voix sourde du fond de la riuere où il est tombé, A ce esté par for-
tune que i'ay eu la cuisse rompue? Voyla quelle est la troupe de la Vertu, qui vient
pour ouyr ceste decision,

Rudes guerriers combattans de pieds stables

Aux ennemis en armes redoutables.

Mais de la Fortune, au contraire, l'alleure est viste, le courage superbe, l'esperance
hautaine, & preuenant la Vertu, elle est ja tout icy pres, non qu'elle se soubleue avec- G
ques de legeres aisles, ny qu'elle ait le bout des artueils sur vne boule: car elle s'en viét
douteuse & vacillante, & puis s'en reua desplaisante. Mais ainsi comme les Spartia-
tes disent, que Venus depuis qu'elle eut passé la riuere d'Eurotas, quitta les miroirs
& toutes feminines delicatesses, voire son tissu mesme, & qu'elle prit la lance & l'es-
cu, se parant pour se monstre à Lycurgus: aussi la Fortune ayant abandonné les
Perfes & les Assyriens, vola legerement par dessus la Macedoine, & vous secoüa ha-
bilement Alexandre, puis se pourmena vn peu par l'Ægypte, & par la Syrie, train-
nant apres soy les Royautez, & ruinant les Carthaginois, que souuent elle auoit sou-
stenus: finablement elle s'approcha du Mont-palatin, & passant la riuere du Ty-
bre, posa là ses aisles, quitta ses parins volans, & delaisa sa boule mal assuree, qui tour-
ne tantost çà tantost là, & ainsi entra dedans Rome, comme pour y faire sa demeure:
telle se presente elle, comparoissant pour ouyr droict deuant la iustice, non point
funeste, ny trouble-feste, comme l'appelle Pindare, ny maniant vn double timon, H
mais plustost soeur de l'egalité & de persuasion, & fille de prouidence, ainsi comme
le poëte Alcman deduiet sa genealogie. Au reste, elle a bien en sa main celle corne
d'abondance, qui est tant celebrée, pleine non de toutes sortes de fruiets tousiours
verdoyans, ains de toutes les choses exquisés & precieuses qui sont en toute la terre,
& en toute la mer, en toutes les riuieres, & toutes les minieres des metaux, & en tous
les ports, qu'elle respand en grande largesse. Si voit-on à l'entour d'elle plusieurs il-
lustres & excellens personages, comme Numa Pompilius extraict des Sabins, Tar-
quinius Priscus venu de la ville des Tarquins, lesquels estans estrangers & forains,
elle installa Roys dedans le siege Royal de Romulus. Paulus Æmylius ramena son
armée saine & sauue de la desfaiete de Perseus, & des Macedoniens, où il gaigna vne
victoire si heureuse, que iamais Romain n'en iecta l'arme d'œil, & retournant en
triomphe,

A triomphe, il magnifie la Fortune : aussi fait le vieillard Cécilius Metellus surnommé Macedonicus, pour les victoires qu'il y gagna, & pour auoir eu cest heur, que d'estre porté en sepulture par quatre siens fils, tous quatre consulaires, Quintus Balearicus, Lucius Diadematus, Marcus Metellus, & Caius Caprarius, & par deux gendres consulaires aussi, & des arriere-fils qui auoient desia faict des grandes proüesses d'armes, & qui tenoient de beaux estats & offices en la Chose publique : & Æmylius Scaurus venu de bien petit lieu, & de race encore plus basse, homme neuf, esleué par elle, est faict prince du Senat. Et puis Cornelius Sylla qu'elle prit & enleua du sein de la courtisane Nicopolis, pour l'exalter par dessus tous les trophées Cimbriques de Marius, & tous ses sept Consulats, & le colloquer au souverain degré de Monarque & de Dictateur, celuy-là se donnoit luy & toutes ses actions à la faueur de la fortune, criât tout haut avec l'Oedipus de Sophocles, Je me repute enfant de la Fortune. En langage Romain il se surnommoit Felix, c'est à dire l'heureux : mais quand il escriuoit aux Grecs, il se soubsignoit, Lucius Cornelius Epaphroditus, comme qui diroit le bien-aimé de Venus & des Graces. Ses trophées mesmes qui sont en nostre pays de Charonée, des victoires qu'il y gagna contre les lieutenans du Roy Mithridates ont pareille inscription, & meritoirement : car ce n'est pas la nuit, comme dit Pindare, qui a le plus de la faueur de Venus, mais c'est la Fortune. Qui voudroit doncques plaider la cause de la Fortune, ne feroit-ce pas vn bon commencement & bien propre, que d'amener les Romains mesmes pour tesmoins, comme ceux qui ont plus attribué à la Fortune, & se sont iugez plus redevables à elle qu'à la Vertu ? car ce n'a esté que bien tard, & long temps apres la Fortune, que Scipion Numatinus leur bastit vn temple de la Vertu, & depuis Marcellus y fait cōstruire celuy qui s'appelle le temple de Vertu & d'honneur, comme Æmylius Scaurus fait edifier celuy de la deesse Mens, qui signifie l'entendement, enuiron le temps des guerres Cimbriques. Alors que les lettres, les Sophistes & l'eloquence se coulerent dedans la ville de Rome, ils commencerent aussi à auoir en pris & recommandation ces choses-là : mais toutefois iusques aujourdhuy encore n'y a-il point de temple de Sagesse, ny de Temperance, ny de Patience, ny de Magnanimité, ny de Continence, là où les temples de la Fortune sont si notoires & si anciens, qu'il semble qu'ils ayent esté faits & fondez quant & les premiers fondemēs de la ville : car le premier qui en fonda, fut Ancus Marcius, nepueu de Numa, qui fut le quatrième Roy de Rome apres Romulus, & fut à l'aduenture celuy qui la surnomma Fortune virile, cōme ayant la virilité, c'est à dire, la vaillance & proüesse, besoing du secours de la fortune, pour emporter la victoire : & quant à celuy de la Fortune feminine, ils le bastirent auant le temps de Camillus, lors que Martius Coriolanus ayant amené les Volsques contre la ville, fut destourné de sa mauuaise volōté par le moyen des Dames : car elles allerēt en ambassade vers luy avec sa femme & sa mere, & le prièrent tant, que finalement elles luy feirent pardonner à la ville, & remmener arriere l'armée des Barbares : & fut lors que lon dit que l'image & statuë de Fortune, ainsi que
 • on la consacroit, prononça ces paroles, Vous m'auiez Dames Romaines par ordonnance publique deuotement consacrée : combien que Furius Camillus apres auoir estainct le feu des Gaulois, & osté la ville de Rome du bassin de la balâce, où lon la cōtrepesoit à vne certaine quātité d'or, ne bastit point de temple ny à bon conseil, ny à vaillance, ains au Dieu Aius Locutius le long de la rue neufue, à l'endroit où lon dit que Marcus Ceditius en passant la nuit ouit vne voix qui les aduertit, que bien tost ils auroient sur les bras la guerre des Gaulois. L'autre temple de Fortune, qui est sur le bord de la riuere, surnōmée Fortis, c'est à dire vaillante, belliqueuse & magnanime, cōme celle à qui appartient l'efficace & force de dōner la victoire & la generosité d'icelle, ils le bastirent dedans les iardins & vergers que Cēsar delaiſſa par testament au peuple Romain, estimant que luy-mesme par la faueur de fortune estoit deuenu

De la fortune des Romains

le plus grand des Romains. Mais quant à Iules César, j'aurois honte de dire que E
moyennant la faueur de fortune il se soit esleué iusques à estre le plus grand, si luy-
mesme ne l'auoit tesmoigné: car estant party de Brindes le quatriesme iour de Ian-
uier, pour poursuyure Pompeius, au cœur d'hyuer pres du solstice, il trauersâ seure-
ment la mer, luy ayant la fortune reculé le mauuais temps: mais trouuant Pompeius
fort & puissant, tant par mer que par terre, d'autant qu'il auoit toutes ses forces as-
semblées en vn camp, & luy en auoit bien peu aupres, d'autant que les forces que luy
amenoient Antonius & Sabinus estoient demourées derriere, il osa bien se ietter de-
dans vne petite fregate, & partir sans estre cogneu du maistre ny du pilote, comme
si c'eust esté le seruiteur de quelque seigneur: mais y ayant vn grand repoussement du
flot de la mer, contre le cours de la riuere, & vne forte tourmente, voyant que le pi-
lote tournoit en arriere, il osta la robbe qu'il auoit entortillée autour de sa teste, de
• deuant son visage, & se monstrant à face descouuerte, Poussé mon amy, dict-il, har-
• diment, & ne crains point, ains mets les voiles au vent à l'aduenture, assurement, car F
• tu menes César & sa fortune: tant il se persuadoit & assureoit que la fortune nau-
guoit quant & luy, l'accompagnoit par les champs, estoit au camp avec luy, & luy
aydoit à conduire toutes ses guerres, estant son ouurage & son faict qui ne pouuoit
proceder que d'elle, de commander tranquillité à la mer, esté en hyuer, diligence aux
plus paresseux, & force de courage aux plus lasches & coüards, & ce qui est encore
plus incroyable, fuitte à Pompeius, & meurtre de son hoste à Ptolemeus, à fin que
Pompeius mourust, & neantmoins César ne fust point contaminé de son sang. Que
diray-je de son fils, lequel fut le premier des Empereurs surnommé Auguste, qui com-
manda l'espace de cinquante quatre ans à toute la terre & à la mer? Quand il enuoya
son arriere-fils à la guerre, ne luy souhaitta-il pas qu'il fust aussi vaillant que Scipion,
aussi aymé que Pompeius, & aussi bien fortuné que luy? attribuant l'honneur de l'auoir
faict tel qu'il estoit, comme vn grand chef-d'œuvre, à la fortune, laquelle le mettât au
dessus de Ciceron, de Lepidus, de Panfa, de Hircius, & de Marcus Antonius, par les G
conseils, proïesses, expéditions, victoires, armées desquels, tant par mer que par ter-
re, elle le fit le premier, & l'esleua en hault, & abaissa tous ces autres-là par qui elle
l'auoit fait monter, & puis le laissa seul: car c'estoit pour luy que Ciceron conseilloit,
Lepidus menoit armée, Panfa vainquoit, Hircius mouroit, & Antonius yurongnoit
& paillardoit: car ie mets Cleopatra entre les faueurs que la fortune fit à Auguste,
contre laquelle, comme contre vn rocher, Antonius si grand Capitaine s'alla briser
& noyer, à fin que César Auguste demourast tout seul. Auquel propos on raconte,
que y ayant grande priuauté & familiarité entre-eux, ils passoient souuent le temps
ensemble à iouer à la paulme ou aux dez, ou bien à faire cōbattre de petits animaux,
comme des coqs ou des cailles, mais que tousiours Antonius s'en alloit vaincu: &
que quelqu'un de ses familiers, homme entendu en l'art de deuiner, luy en parla fran-
• chement par plusieurs fois, & luy remonstra, Seigneur que veux-tu faire aupres de
• ce ieune homme icy? esloigne toy de luy: tu es plus renommé que luy, tu es plus vieil H
• que luy, tu commandes à plus d'hommes que luy, tu es plus exercité aux armes, tu as
• plus d'experience: mais ton esprit familier craint le sien, & ta fortune, qui à par-foy
• est grande, flatte & courtise la sienne: & si tu ne t'en esloignes bien loing, elle t'a-
• bandonnera pour s'en aller deuers luy. Voyla les preuues par tesmoings que la for-
tune peut alleguer: mais il nous faut amener aussi celles des choses, en commençant
nostre propos à la naissance mesme de la ville de Rome. En premier lieu donc-
ques, qui sera celuy qui ne confessera, que quant à la natiuité, à la preservation, à la
nourriture, & à l'education de Romulus, les excellences de vertu ont esté differées,
& que la fortune a seule fondé le tout? car premierement le faict de la generation
& procreation de ceux mesmes qui ont fondé & planté la ville de Rome, semble
estre

A estre procedee d'une faueur de fortune merueilleuse, car on dit que leur mere coucha avec le Dieu Mars. Et comme lon tient que Hercules fut engendré en vne longue nuit, le iour ayant esté reculé & retardé contre l'ordre de la nature, & le Soleil arresté: aussi trouue-lon escrit qu'en la generation & conception de Romulus, le Soleil eclipsa, & qu'il y eut vne veritable conionction du Soleil avec la Lune, comme Mars qui estoit Dieu, se mesla avec Syluia qui estoit mortelle, & que le mesme aduint encore à Romulus le iour propre qu'il passa de ceste vie: car on dit qu'il disparut ainsi comme le Soleil estoit en eclipse, aux Nones Capratines, auquel iour les Romains encore de present celebrent vne feste bien solennelle. Et puis quand ils furent nez, le tyran les voulant faire mourir, de bonne fortune ce ne fut point vn Barbare esclau maupiteux qui les reçut, ains vn gracieux & humain seruiteur, qui ne les voulut point faire mourir, ains les posa en vn endroit du bord de la riuere, ioignant à vne belle prairie verdoyante, & ombragee de petits arbrisseaux bas, aupres d'un figuier sauvage qu'ils appellent Ruminalis, à cause que la mammelle se nome en latin Ruma: & puis vne Louue qui auoit fait nouuellement des petits, ayant le pis si plein de lait qu'il en creuoit, ses petits estans morts, elle cherchât à se descharger s'abaisa à ces enfans, & leur bailla son tetin comme accouchât vne seconde fois, en se deliurât de son lait: & puis l'oyseau consacré à Mars, qu'ils appellent le Piuerd, y suruenant, & s'en approchant, avec le bout de ses pieds tout doucement entre-ouurant la bouche à ces enfans, l'un apres l'autre, leur mit dedans des petites miettes de sa propre pasture: & qu'il soit vray, le figuier sauvage en est encore appelé Ficus Ruminalis, à cause du pis de la Louue, qui se baissant le donna à teter à ces enfans: & a esté long temps depuis que les habitans alentour de ce lieu-là ont obserué la coustume de ne iamais exposer ne ietter rié de ce qui leur naissoit, ains de nourrir & eleuer tout, en memoire & pour la similitude de l'accident adueni à Romulus. Et puis qu'ils ayent esté nourris & enseignés depuis en la ville de Gabij, sans que lon sceust qui ils estoient, ne qu'on entendist qu'ils fussent enfans de Syluia, & nepeux de Numitor, & du Roy, il semble bien que ce fut vne ruse & vne desrobee de la fortune, de peur qu'ils ne perissent, auant qu'auoir fait aucun acte digne d'eux, ains qu'ils fussent decouverts par les effects mesmes, monstrant leur vertu pour la marque de leur noblesse. Auquel propos il me souuient d'une response que feit vn iour Themistocles à quelques Capitaines, qui depuis luy eurent la vogue, & furent en estime à Athenes, mais ils pretendoient meriter d'estre plus honorez que luy: car il leur dit, que le Lendemain querella vne fois contre le iour de la Feste, disant qu'elle estoit fiere & oiseuse, & que lon ne faisoit que manger en elle, ce qui parauant auoit esté acquis & preparé avec peine: la Feste luy respondit, Certainement tu dis vray, mais si ie n'eusse esté, où est-ce que tu serois? aussi si ie n'eusse esté du temps des guerres Medoises, que seroit-ce maintenant que de vous? & de quoy seruiroit toute vostre vaillance? Il me semble que la Fortune dit tout de mesme à la vertu de Romulus, Tes faicts sont grands & illustres, & as montré que certainement tu estois extraicte de sang & de race diuine, mais tu vois combien de temps tu es venue apres moy: car si lors ie ne me fusse montrée bonne & benigne, ains eusse laissé & abandonné ces pauvres petits enfans, toy comment fusses-tu venue en estre? & comment te fusses-tu fait voir, si lors vne Louue ne fust suruenue, ayant le pis enflé & enflammé de la quantité grande du lait qui y affluoit, cherchant plus tost à qui donner pasture que de quoy se paistre? & si elle eust esté du tout sauvage & farouche, ou affamee, ces maisons royales, ces temples, ces theatres, ces portiques, ces places, ces palais à tenir la iustice, ne seroient-ce pas au iourd'huy des loges de bouuiers & cabanes de bergers, qui seruiroient comme esclaves à quelques maistres d'Albe, ou de la Thoscane, ou du pays Latin? Le commencement en toutes choses est le principal, mesmemēt en la fondation & edificatiō d'un

De la fortune des Romains.

ne ville : & la Fortune a esté celle qui a fourny ce fondement , quand elle a fauüé & E
contregardé le fondateur : car la vertu a bien fait Romulus grand , mais la fortune l'a
conferué iusques à ce qu'il fust grand. Bien est-ce chose certaine & confessée , que le
regne de Numa Pompilius , qui dura bien longuement , fut entierement guidé &
conduit par vne faueur de fortune merueilleuse : car de dire que la Nymphé Egeria ,
l'une des Dryades , fee prudente , & sage , ait esté amoureuse de luy , & que couchant
auec luy elle luy ait enseigné à establir , gouuerner & regir sa Chose publique , cela
est à l'aduenture trop fabuleux , attendu que les autres mesmes que lon raconte auoir
esté aimez par des Deesses , & auoir iouy des nopces d'icelles , comme vn Peleus , vn
Anchises , vn Orion , vn Emathion , n'ont point pour cela eu au reste de leur vie
tout contentement & prosperité , sans aucune fascherie : Mais Numa semble à la ve-
rité auoir eu la bonne fortune pour domestique , familiere compagne & regnante
auec luy , laquelle prenant la ville de Rome , comme en vne tempeste turbulente , &
vne mer tourmentee , en l'inimitié , enuie & mal-vueillance de tous les peuples pro- F
chains & voisins , & outre cela trauaillee en elle mesme d'infinis maux & partiali-
tez , elle estaignit & assopit tous les courroux & toutes les enuies , comme mauuais
vents & contraires. Et ainsi que lon dit que la mer au fin cœur d'hyuer donne l'aïsan-
ce aux oyseaux Halcyons d'esclorre leurs petits , de les nourrir & alimenter en grande
tranquillité : aussi la fortune estendant alentour de ce peuple nouuellement planté , &
branlât encore , vn tel calme & serenité d'affaires , sans guerres , sans maladies , sans peril
& sans crainte , elle donna moyen à la ville de Rome de prendre racine & pied ferme ,
en croissant en repos auec toute seureté , sans empeschement quelconque. Ne plus
ne moins qu'une caraque ou vne galere se fabrique & s'assemble à force de coups ,
à grande violence de marteaux , de clous , de coings , de coignes & de fies , dont el-
le est fort harassée : mais depuis qu'elle est vne fois composée , il faut qu'elle demeu-
re en repos quelque peu de temps , iusques à ce que les liaisons soient affermies , & les
cloüures toutes accoustumées : autrement qui la tireroit en mer , les ioinctures & G
commiffures estâs encore toutes fresches , lasches & non bien consolidées , tout s'ou-
uiriroit quand elle viendroît à estre vn petit secouée & esbranlée des vagues de la mer ,
tellement qu'elle feroit eau par tout : Aussi le premier prince , auteur & fondateur de
la ville de Rome l'ayant composée d'hommes agrestes & de bouuiers , comme de gros
plançons & puissans aix de chesne , eut à ce faire plusieurs trauaux , & se trouua emba-
rassé en plusieurs guerres & plusieurs grands dangers , estant contrainct de combattre
ceux qui s'opposoient à la naissance & fondation d'icelle : mais le second la prenant
de ses mains , luy bailla temps & loisir de s'affermir , & asséurer sa croissance par la fa-
ueur de bonne fortune , qui luy donna moyen de iouir de grande paix & de long re-
pos. Mais si vn Porfena luy fust venu courir sus lors que les murailles toutes fresches
branloient encore , par maniere de dire , plantant son camp , & amenant vne grosse ar-
mee de la Thoscane deuant : ou que quelque puissant personnage belliqueux entre H
les Marfes , ou du pays de la Lucanie , par vne enuie & vn appetit de troubler , & de
remuer tout , homme factieux & entendu au faict des armes , tel que depuis ont esté
vn Mulus ou vn Silon le superbe , & le dernier de tous , vn Tefesinus , auquel Sylla eut
affaire , qui comme à vn signal feit prendre les armes à toute l'Italie , fust venu enui-
ronner & assaillir à trompettes sonantes le philosophe Numa , ce pendant qu'il sacri-
fioit & faisoit prieres aux Dieux , la ville à ce premier commencement-là n'eust pas
peu soustenir vne tempeste & vne tourmente si grande , & ne fust pas creüe en si
grand nombre d'hommes & de peuple : là où il semble que la longue paix , qui dura
sous ce Roy-là , fut aux Romains comme vn magasin de toute munition pour les
guerres qui suyrent apres , & que le peuple Romain , ne plus ne moins qu'un cham-
pion qui a à combattre , s'estant exercé à loisir & en repos par l'espace de quarate trois
ans

- A**ns, apres les guerres qu'ils auoient eues sous Romulus, se rendit fort assez & suffisant pour faire teste à ceux qui depuis s'opposèrent à luy : car on dit qu'il n'y eut ny peste, ny famine, ny sterilité de la terre, ny intemperature d'hyuer ou d'esté, en tout ce temps-là, qui faschast la ville de Rome, comme si ce n'eust pas esté vne prouidée humaine, mais vne fortune diuine, qui eust regy & gouverné toutes ces années-là. Aussi furent lors fermées les deux portes du temple de Ianus, qu'ils appellent les portes de la guerre, pour ce qu'elles s'ouurent quand il y a guerre, & se ferment quand il y a paix : & incontinent apres la mort de Numa elles furent ouuertes pour la guerre d'Albe, qui se rompit aussi tost, & d'autres infinies qui la suyrent de main en main. Depuis elles furent de rechef closes, environ quatre cents quatre-vingts ans apres, quand la guerre fut acheuée, & la paix faite avec les Carthaginois, l'année que Caius Artilius & Titus estoient Consuls : depuis elles furent encores r'ouuertes, & durerent les guerres iusques à la victoire que gaigna Auguste César, deuant le promontoire d'Action : & lors cesserent les armes des Romains, non gueres long temps,
- B** par ce que les troubles des Biscains, & des Gaulois contre les Germains, suruindrent, qui troublerét la paix. voyla les tesmoignages de la felicité & bonne fortune de Numa que lon treuve par escript. Mais les Roys qui ont esté à Rome depuis luy, ont grandement honoré la Fortune, comme la patronne, la nourrice, & le soustien, ainsi que parle Pindare de la ville de Rome : ce que lon peut iuger par les raisons qui ensuyuent. Il y a bien à Rome vn temple fort honoré de la vertu, mais il y a esté fondé & basty bien tard par Marcellus, celuy qui prit Syracuse. Il y en a aussi vn autre de l'Entendement, ou de la Raison, qu'ils appellent Mentem, mais ce fut Æmylius Scaurus qui le dedia environ le temps des guerres Cimbriques, que desia les lettres, les arts & le babil de la Grece auoit commencé à se glisser en la ville : mais de Sapience encore iusques aujourdhuy ils n'en ont pas vn, ny de Temperance, ny de Patience, ny de Magnanimité : mais des temples de la Fortune il y en a plusieurs & fort anciens, & fort celebres en tous honneurs, en maniere de dire, qui y sont fondez & mellez parmy les plus nobles endroiets & lieux de la cité : car il y a celuy de la Fortune virile qui fut basty par Ancus Martius quatriéme Roy, & ainsi nommé, pour autant qu'il estima auoir eu autant de fortune que de vaillance, à obtenir la victoire : & l'autre de la Fortune feminine, chacun sçait que ce furent les Dames qui le dedierent, apres auoir diuertie & destournée Martius Coriolanus, qui auoit amené grande puissance d'ennemis deuant la ville. Et Seruius Tullius qui augmenta la puissance du peuple Romain, & en reduisit en belle & bonne ordonnance le gouvernement, autant que nul autre Roy, ayant estably l'ordre que lon y garde à donner les suffrages aux elections, & aussi l'ordre de la discipline militaire, ayant esté le premier Censeur des mœurs, & Syndique ou contrerolleur de la vie & des mœurs d'un chacun, & qui semble auoir esté & tres-vaillant, & tres-prudent : celuy-là, dis-je, s'attribuoit luy mesme à la fortune, & estoit que sa principauté dependoit d'elle, de maniere que lon disoit que la fortune mesme venoit coucher avec luy, descendat par vne fenestre en sa chambre, que lon appelle maintenant la porte Fenestelle : à raison de quoy il fonda au Capitole le temple de la fortune que lon appelle Primigenia, comme qui diroit, fortune l'aïssance : & vn autre, Fortunæ Obsequentis, comme qui diroit de fortune fauorable & obeïssante. Mais sans m'arrester aux noms & appellations Romaines, ie m'efforceray d'interpreter en Grec les significations de toutes ces fondations de la fortune : Car il y a au Mont-palatin vne chappelle de fortune Priuee, & vne autre de fortune Gluante, encore que le mot semble auoir de la mocquerie, toutefois si a-il par translation signifiante de chose bien importante, voulant donner à entendre qu'elle attire ce qui est loing, & retient ce qui est pres : & aupres de la fontaine qui se surnomme Muscosus, vn autre de fortune Vierge : & au mont des Esquilies, de fortune

De la fortune des Romains:

retournée: & en la longue rue y a vn autel de fortune de bonne esperance, où comme **E**
d'esperance: aussi y a-il ioignant l'autel de Venus Talaria vne chappelle de fortune
Masse, & plusieurs autres hōneurs & denominations de la fortune, que Seruius pour
la plus part a basties, sçachant tresbien qu'au gouuernement de toutes choses humai-
nes la fortune est de grande, ou plus tost de totale importance, mesmement, que luy
par benefice de la fortune, d'esclau & ennemy de son extractiō qu'il estoit, fut eleué
& auancé iusques à la dignité royale. Car estant la ville de Corioles prise par les Ro-
mains, vne ieune fille nommee Ocrisia, de laquelle la fortune de captiuité n'auoit peu
effacer ny la face, ny les mœurs, fut donnee pour seruante à Tanaquil, femme de Tar-
quinius roy, & depuis fut donnee en mariage à vn des dependās de la maison, que les
Romains appellēt Clientes, & d'eux deux nasquit Seruius. Les autres disent qu'il n'est
pas ainsi, mais que Ocrisia ieune fille prenant ordinairement quelques primices des
viandes & du vin qui estoient seruiēs à la table du Roy, les portoit au foyer de l'autel
domestique, & qu'vn iour ainsi comme elle iettoit, suyuant sa coustume, ces primices **F**
dedans le feu qui estoit au foyer, la flāme subitement s'assopit, & sourdit du foyer vn
mēbre viril, dequoy la ieune fille effroyee raconta sa vision à Tanaquil seule: laquel-
le estant sage & prudente, accoustra la ieune fille ne plus ne moins que lon a accou-
stumé de parer les nouuelles mariees, & l'enferma avec ceste apparition, estimant que
ce fust chose celeste & diuine: Aussi pensent aucuns que ce fut le Dieu domestique,
Lar, ou bien Vulcanus, qui fut amoureux de ceste ieune fille: cōment que ce soit, de là
nasquit Seruius: & comme il estoit encore enfant, vne lumiere claire comme l'esclair
du tonnerre, luy enlumina la teste tout alentout. Mais Valerius Antias ne le cōte pas
ainsi: car il dit, que Seruius auoit vne femme nommee Gegania qui mourut, dont il
demena vn grand dueil & apres s'en estre bien tourmenté & trauaillé, finablement il
s'endormit sa mere presente, & que luy dormāt les femmes apperceurēt sa face reluy-
sante cōme toute en feu: ce qui luy fut en tesmoignage qu'il auoit esté engendré par
le feu, & vn presage certain de la royauté inopinee & non esperee, à laquelle il par- **G**
uint apres la mort de Tarquinius, par le moyen du port & de la faueur que Tanaquil
luy feit: car de tous les Roys, cestuy semble auoir esté celuy qui auoit le moins d'ap-
parāce de iamais atteindre à la Monarchie, & moins d'enuie d'y aspirer & pretendre,
attendu mesmement qu'ayant enuie de s'en deposer, il fut empesché de le faire: car
Tanaquil en mourant le coniura & l'obligea par serment qu'il perseuereroit en icelle
royauté, & qu'il n'abandonneroit point la forme de gouuernement que les Romains
auoient receuē. Voyla cōment la royauté de Seruius dependit totemēt de la fortu-
ne, attēdu qu'il y paruint sans l'auoir esperé, & la retint outre son gré. Mais à fin qu'il
ne semble que nous nous retirions, & nous enfuyons, comme en vn lieu obscur, au
temps ancien, à faute de plus euidentes & plus claires preuues, laissons l'histoire des
Roys, & transferons nostre propos à leurs plus glorieux faicts, & leurs guerres plus
celebres & plus renommées, ausquelles qu'il n'y ait eu grande vaillance & grande **H**
discipline d'obeissance cooperante à la vertu guerriere, comme dit le poēte Timo-
theus, qui le pourroit nier? mais le cours heureux de leurs affaires, & la vogue couran-
te de leur progrès à vne si grande puissance & si grand accroissement, monstre bien
clairement à ceux qui sçauent discourir par raison, que ce n'a point esté chose con-
duitte par les mains ny par les conseils, ou affections des hommes, ains par vne guide
& escorte diuine, & par vn vent en poupe de la fortune qui les hastoit, trophées sur
trophées erigez, triomphes continēz d'vn tenant à d'autres triomphes, le premier
sang des armes encore tout chaud lauē par vn autre second: lon y compte les victoi-
res non par les monceaux des morts ou des despouilles, ains par les royaumes subiui-
guez, par les nations assubiecties, par Isles asseruies, & terres fermes qui se sont ren-
gees à l'abry de la grandeur de leur empire: vne seule bataille chassa Philippus de la
Macedoine

- A** Macedoine: par vn seul coup Antiochus leur ceda l'Asie: les Carthaginois par vne seule deffaiete perdirent la Libye: vn seul homme à vne boutee d'vn seul voyage leur conquist l'Armenie, le royaume de Pont, la Syrie, l'Arabie, les Albanien, les Iberiens, & iusques au mont de Caucaſe, & aux Hyrcaniens, & l'Ocean qui enuironne le monde, par trois diuerſes fois, & en trois diuers lieux, l'a veu victorieux. Il reprima & rembarra les Nomades en l'Afrique, iusques aux riuages de l'Ocean meridional: il ſubiuga l'Eſpagne qui s'eſtoit reuoltee avec Sertorius, iusques à la mer Atlantique: il pourſuyuit les Roys des Albanien iusques à la mer Caſpiene. Toutes ces conqueſtes-là il acheua heureuſement tant qu'il ſe ſeruit de la fortune publique, mais depuis il fut ruiné par ſa propre & priuee deſtinee: mais le grand Dæmon tutelaire des Romains ne leur aspira pas pour vn iour ſeulement, ny ne fut pas en vigueur pour vn petit de temps, comme celuy de la Macedoine: ny ne florit pas en terre, comme celuy des Lacedemonien: ny en mer, comme celuy des Athenien: ny
- B** ne commença pas à ſe remuer tard, comme celuy des Perſes: ny ne ceſſa pas toſt, comme celuy des Colophonien: ainſi dès la premiere naiſſance de la ville commença à croiſtre & venir en auant comme elle, mania le gouuernement d'icelle, demoura conſtamment avec elle, par terre, par mer, en guerre, en paix, contre les Barbares & contre les Grecs. Ce fut luy qui feit eſcouler & conſommer Hannibal de Carthage en Italie, comme vn impetueux torrent, en procurant que par l'enuie & malignité de ſes enuieux concitoyens, nul ſecours ne renfort ne luy fuſt enuoyé du pays: ce fut luy qui ſepara les armees des Cimbres & des Teutons de grands interualles de lieux & de temps, à fin que Marius peult fournir à les combattre & deffaire toutes deux l'vne apres l'autre: & empeſcha que trois cents mille combattans ſe ioignans enſemble en vn meſme temps, ne noyaſſent & ne couriſſent toute l'Italie d'hommes inuincibles & d'armes non ſouſtenables. Par luy Antiochus ſe teint quoy cependant que lon faiſoit la guerre à Philippus. Et Philippus ayant deſia eſté battu, quand Antiochus fut en peril de ſon eſtat, mourut. Par luy les guerres Sarmatiques & Baſtarniques teindrent le Roy Mithridates occupé, cependant que la guerre Marſique bruſſoit & fourrageoit l'Italie. Par luy Tigranes, cependant que Mithridates fut fort & puiſſant, ſe deſſia de luy, & luy porta enuie, qui le garda de ſe ioindre avec luy, & puis quand il eut eſté deſſaiet, l'aſſembla avec luy, à fin qu'il perriſt quant & luy. Quoy, en ſes plus griefues calamitez ne fut-ce pas la fortune qui la redreſſa, & remit ſus, pendant que les Gaulois eſtoient campeſ alentour du Capito-
- C** le, & qu'ils tenoient le chasteau aſſiegé?

Dedans leur oſt la peſte elle rüa,

Qui de leur peuple vn grand nombre tua.

- Ce fut auſſi la fortune & vn cas fortuit qui reuela leur venue, & en donna aduertiffement, là où perſonne du monde ne s'en doutoit: & ne ſera point à l'adventure hors
- D** de propos en ceſt endroit, d'en diſcourir vn peu plus amplement. Apres la grande deſconfiture que les Romains reçurent aupres de la riuere d'Allia, ceux qui ſe peurent ſauuer de viſteſſe, arriuez qu'ils furent à Rome, emplirent de trouble & d'effroy toute la ville, tellement que le peuple eſperdu de ces nouuelles, ſ'eſpandit fuyant çà & là, excepté vn petit nombre qui ſe ietterent dedans le chasteau du Capito-
- le, deliberez de le tenir iusques à l'extremité: les autres qui eſtoient eſchappez de la deffaiete, aſſemblez en la ville de Veſes, eleurent pour Dictateur Furius Camillus, que le peuple, haut en bride & insolent pour ſa longue proſperité, auoit abbatu & ietté par terre, le condamnant d'auoir deſrobbé les deniers publics, & lors rauallé & humilié par ceſte affliction, le r'appelloit apres la deſconfiture, & luy mettoit en main la puiſſance & authorité ſouueraine: mais à fin qu'il ne ſemblait que ce fuſt par l'iniquité & le malheur du temps, & non pas ſelon l'ordre des loix qu'il acceptaſt ce

De la fortune des Romains.

magistrat, & que desespérant la ressource de la ville il se fust fait elire par vne trou-
pe de gens de guerre ramassez de toutes pieces, il voulut que les **Senateurs** qui s'e-
stoient retirez dedans le Capitole en fussent aduertis, & que par leur consente-
ment ils approuuassent & confirmassent l'election de luy qu'auoient fait les sou-
dards. Or y auoit-il entre les autres, vn nommé Caius Pontius, homme vaillant,
lequel promit d'aller luy-mesme en personne porter nouuelles de ce que lon auoit
arresté, à ceux qui estoient dedans le Capitole, & entreprit vne chose fort dange-
reuse, par ce qu'il falloit passer à trauers les ennemis, qui tenoient le chasteau en-
uironné avec trenchées & corps de garde. Arriué qu'il fut sur le bord de la riuere, il
meit sous son estomac des pieces de liege plattes, & commettant son corps à la
legereté de telle voitture, se laissa aller au cours de l'eau, qui luy fut gracieux, & le por-
ta tout doucement iusques à la riue opposite, sans aucun danger: & là prenant terre
il s'en alla vers l'endroit qu'il voyoit vuide de clarté, coniecturant par l'obscurité & le
silence, qu'il n'y deuoit auoir personne à la garde & au guet, si se mit à grimper con-
tremon-
t le precipice par où il trouuoit le rocher plus couché & plus plat, & par les
circutions & aspretez rabotteuses d'iceluy, se prenant & appuyant le mieux qu'il
pouuoit, feit tant qu'il arriua tout au fest, où ceux qui faisoient le guet l'ayans apper-
ceu luy aiderent à monter, & là il declara à ceux de dedans ce qui auoit esté aduisé par
ceux de dehors, & en prenant d'eux vn decret & vne ordonnance arrestee, s'en re-
tourna la mesme nuit, par où il estoit venu, deuers Camillus. Le matin l'un des bar-
bares se promenant sans y penser alentour de la place, apperceut par cas d'aduenture
les prises du bout des pieds, & les glissures & froissures de l'herbe qui estoit creuë aux
endroits où il y auoit vn peu de terre, avec les traïsses par où il auoit trainé & tiré son
corps, en grauisant en trauers, & l'alla declarer à ses compagnons: lesquels estimans
que les ennemis mesmes leur monstroient le chemin, s'efforcerent à l'enuy d'en faire
autant, & ayans la nuit obserué l'endroit plus solitaire, monterent contremont, sans
estre nullement apperceus, non seulement des hommes, qui estoient à la garde, mais
non pas des chiens que lon mettoit aussi au deuât pour ayder à faire le guet, tant ils
estoiēt endormis: toutefois la bonne fortune de Rome n'eut point encore faite de
voix qui les peust aduertir d'un si grand danger. Il y auoit des oyes sacrees à la Deesse
Iuno, que lon nourrissoit aux despens de la Republique, en l'honneur d'elle, tout ioi-
gnant son temple: or est cest animal de nature fort paoureux, & fort aisé à effroyer
pour peu de bruit qu'il oye: & lors y ayant dedans la place fort estroite necessité de
tous viures, on ne se soucioit pas beaucoup de leur donner à manger, de maniere qu'à
faute de manger, leur sommeil en estoit encore plus leger: au moyē dequoy elles sen-
tirent incontinent les ennemis, si tost qu'ils furent au dessus de l'enceinte de la murail-
le, & crians effroyement, coururent alencontre, car elles furent encore plus effa-
rouchees quand elles veirent la lueur des armes, tellement qu'elles remplirent tou-
te la place d'un cry violent & aspre, qui esueillâ les Romains, lesquels se doutans de
ce que c'estoit, accoururent incontinent à la muraille, & en repousserent & preci-
piterent à bas les ennemis. En memoire duquel accident iusques aujourdhuy enco-
re en triomphe la Fortune: car on y porte à certain iour en procession vn chien
pédu en croix, & vne oye portee en vne petite litriere, sur vn coussin fort sumptueux
& riche: lequel spectacle nous monstre & dōne à entendre la puissance grāde de la For-
tune, & les grands moyens qu'elle a de trouuer expedient à toutes choses qui sont im-
possibles à la raison humaine, attendu qu'elle donne entendement aux bestes brutes
& destituées de tout vsage de raison, & hardiesse & courage aux paoureuses & couar-
des. Car qui est celuy, s'il n'est du tout priué des affections naturelles, qui ne seroit
rauy d'esbahissement & de merueille, en discourant vn peu en soy-mesme la tristesse
morne de ce réps-là, & la felicité qui est aujourdhuy en la ville de Rome, & regardât
au Capito-

A au Capitole la richesse, sumptuosité & magnificence des offrandes, les enuis des excellens ouuriers à qui y feroit de plus beaux ouurages, les presens ambitieux faicts par les villes, les couronnes des Roys, & tout ce que porte de precieux la terre, la mer, les Isles, les terres fermes, les fleuves, les arbres, les animaux, les campagnes, les montagnes & les minieres des metaux, & de toutes ces choses, les primices & l'eslite choisies à l'enuy les vnes des autres, pour embellir & orner de richesse, de grace & de beauté ce lieu-là, considerant en soy-mesme combien peu il s'en a fallu que tout cela n'ait point esté, & ne soit point, veu que tout estant près de tomber en la puissance du feu, des tenebres effroyables de la nuit, des especes barbaresques, & cruelles, & des courages inhumains de ces Gaulois, de pources bestes priuees de raison, pourceuses & coïardes, y ont apporté commencement de salut: & comme ces grands vaillans hommes & grands chefs de guerre des Manliens, des Seruiens, des Posthumien, des Papyriens, qui ont esté les ancestres & progeniteurs de tant de nobles & illustres races des Seigneurs Romains, approcherent pres d'estre tous perdus & deffaicts, si des oyces ne les eussent esueillez pour defendre le Dieu patron de leur ville, & combattre pour leur pays. Et s'il est vray ce qu'escriit Polybius en son second liure touchant les Gaulois, qui pour lors occuperent & prirent la ville, que leur estans venuës nouuelles, que leurs voisins barbares estoient entrez en armes dedans leur pais, là où ils occupoient & destruisoient tout, ils s'en retournerent à la haste, ayants fait appoinctement avec Camillus, encore ainsi n'y auroit-il point de doute, que la fortune n'ait esté cause du salut de la ville de Rome, ayant tiré & destourné ailleurs ses ennemis, contre toute esperance. Mais quel besoing est-il de s'arrester à ces vieilles histoires-là, où il n'y a rié de bien certain, ny asseuré, par ce que les affaires des Romains furent lors ruinez, & toutes leurs histoires, annales & memoires confonduës, ainsi comme Liuius mesme a laissé par escript, veu que les choses depuis aduenües, qui sont bien plus notoires & plus certaines, demonstrent assez euidemment les faueurs de la fortune? Car quant à moy, ie compte pour vne singuliere la mort d'Alexandre le grand, Prince de courage & de hardiesse nopareille & inuincible, esleué par plusieurs grâdes prosperitez, & glorieuses conquestes & victoires, ne plus ne moins qu'un astre volant, qui saute depuis l'Orient iusques à l'Occident, & qui desia commanceoit à lancer les rays flamboyans de ses armes iusques en Italie, ayant pour pretexte & couleur de son entreprise, la deffaiete de son parent Alexandre Roy des Molossiens, qui auoit esté avec son armee taillé en pieces par les Brutien & Lucanien, qui sont ceux de la Basilicate au Royaume de Naples, pres la ville de Pandasie. Combien qu'à la verité ce qui le menoit ainsi alencontre de toutes nations, n'estoit autre chose qu'une cupidité de gloire & vne enuie de dominer, s'estant proposé par émulation & ialousie, de surpasser les faicts de Bacchus & d'Hercules, en faisant veoir ses armes encore plus auant qu'ils n'auoient fait les leurs. Or entendoit-il qu'il trouueroit en teste dedans l'Italie la force & vaillance des Romains comme l'acier que lon met au trenchant de l'espee, & sçauoit bien, par les rapports qu'on luy en faisoit, que c'estoient des guerriers endurcis & exercez en guerres & combats innombrables: & croy à mon aduis que la meslee eust esté fort sanglante, si les cœurs indomtables des Romains se fussent venus chocquer alencontre des armes inuincibles des Macedoniens: car les citoyens de Rome n'estoyent pas dès lors en moindre nombre, que de cent trente mille combattans, tous adroicts & exercez aux armes, courageux & vaillans,

Sçachans à pied ce qu'il faut pour combattre,
Et de cheual les ennemis abbatte.

*Ce discours est defectueux de toutes les raisons & arguments que la
Vertu deduit & allegue pour elle.*

De la fortune ou vertu d'Alexandrè,

TRAITTE PREMIER.

E



CEST DISCOVERS est à la Fortune, laquelle s'attribue & s'approprié Alexandre comme son œuvre propre à elle seule: mais il luy faut contredire au nom de la philosophie, ou bien pour Alexandre mesme, lequel trouue mauuais, & se courrouce de ce que lon pense que la Fortune luy ait baillé son Empire, qu'il a acheté & conquis avec son propre sang espandu, & avec force blesseures qu'il a receuës les vnes sur les autres,

Ayant passé tant de nuicts à veiller,
Et tant de iours sanglans à trauailler,
En combattant

contre des forces inuincibles, des nations innumérables, des riuieres presque impossibles à passer, des rochers que lon n'eust sceu surmonter à coups de trait, tousiours accompagné de prudence, de patience, de vaillance & de temperance. Et croy que luy-mesme diroit à la Fortune qui se voudroit vendiquer la gloire de ses hauts faicts, Ne viens point calomnier ma vertu, & ne me viens point oster ma gloire, pour te l'attribuer. Darius estoit ton ouurage, que tu as faict de seruiteur & courrier du Roy, seigneur & maistre de tous les Perses: aussi estoit vn Sardanapalus, auquel filant la laine parmy des femmes, tu as attaché le diadème royal, & baillé le manteau de pourpre. Mais moy ie suis monté iusques à Suse, en gagnant la bataille d'Arbeles, & la Cilicie subiuguee m'ouurit le chemin tout plain en Ægypte: & la bataille que ie gagnay sur la riuere du Granique, en la passant par dessus les corps morts de Mithridates & de Spithridates Lieutenans du Roy de Perse, fut ce qui me donna l'entree en la Cilicie. Glorifie toy & te pare tant que tu voudras de ces Roys qui ne furent iamais blessez en guerre, & ne respandirent oncques goutte de leur sang: ce sont ceux-là qui ont esté bien fortunez, comme vn Ochus & vn Artaxerxes que tu as assis & colloquez dès le iour de leur naissance dedans le throsne de Cyrus. Mais mon corps porte plusieurs marques & signes de Fortune non fauorable, ains opposite & contraire. Premièrement contre les Illyriens i'eus la teste brisée d'un coup de pierre, & le col moulu & froissé d'un coup de pilon: depuis en la iournee du Granique i'eus la teste fendue d'un coup de cimeterre barbare: en celle d'Issus i'eus la cuisse perçee d'un coup de trait: deuant la ville de Gaza i'eus vne fleschade dedans la cheuille du pied, & vne autre dedans l'espaule, dont ie tombay par terre tout pasmé: vne autre fois contre les Gandrides i'eus l'os de la iambe fendu en deux d'un autre coup de trait: & contre les Malliens i'en receu vn autre dedans l'estomac, qui entra si auant que le fer y demeura: & d'un coup de pilon i'eus aussi le chignon du col tout brisé, quand les eschelles apposees contre les murailles y rompirent, & la fortune m'enferma tout seul au combat, non contre nobles & illustres aduersaires, mais contre simples souldards barbares, auxquels elle gratifioit d'un si grand effect, que peu s'en fallut qu'ils ne me feissent mourir: car si Ptolomeus n'eust mis au deuant sa targue pour me couvrir, & Limneus se iettant au deuant de moy n'eust receu en son corps infinis coups de trait, dont il mourut sur la place, & que les Macedoniens de courroux & de furie n'eussent rompu la muraille, celle bourgade barbare, & de nul renom, seroit auourd'huy la sepulture d'Alexandre. Au demourant tout le voyage de ceste miene expedition, que fut-ce autre chose sinon tempestes, chaleurs extremes, riuieres profondes infiniment, des hauteurs de montagnes si excessiues, que les oyseaux ne pouuoient voler par dessus, des bestes de grandeur espouuentable à veoir, des façons de viure sauuages, des changemens de gouuerneurs à tout

A à tout propos, trahisons & rebellions d'aucuns, & quant au preambule de mon voyage, la Grece se demenoit & se debattoit encore pour la souuenance des guerres qu'elle auoit endurees sous mon pere Philippus: la ville d'Athenes secotioit de dessus ses armes la poussiere de la bataille de Charonee, commanceant à se releuer & resoudre de celle cheute: à elle se conioignoit celle de Thebes, luy tendant les mains: toute la Macedoine estoit suspecte & douteuse, par ce qu'elle inclinoit à Amyntas & aux enfans d'Æropus: les Esclauons auoient ouuertement rompu la guerre: les Scythes estoient en branle, attendans que feroient leurs voisins qui se remuoient: & l'or & l'argent de la Perse coulant es bourses des orateurs & gouuerneurs du peuple en chascune ville, suscitoit le Peloponese: les tresors & coffres de Philippus estoient vuides de deniers, & si y auoit des debtes avec interets iusques à la somme de douze cens mille escus, ainsi comme escrit Onecritus. En vne si grande pauureté & affaires ainsi troublez, vn ieune adolescent, qui ne faisoit que
B fortir de l'enfance, oza bien esperer & se promettre les royaumes de Babylone, & de Suse, ou pour plus briefuement dire, mettre en son entendement la conqueste de l'Empire de tout le monde, avec trente mille homes de pied, & quatre mille cheuaux. Car il n'auoit pas plus de gens de guerre, ce dit Aristobulus: ou, comme dit le Roy Ptolomeus, quarante & cinq mille hommes de pied, & cinq mil cinq cens de cheual: & tout le grand & plantureux moyen d'entretenir ceste puissance-là, que la fortune luy auoit préparé, c'estoient quarante & deux mille escus comptant, ainsi que dit Aristobulus, ou comme escrit Duris, prouision de viures & d'argent pour trente iours seulement. Comment, Alexandre doncques estoit-il insensé, temeraire & mal conseillé, d'entreprendre la guerre avec si peu de moyen, contre vne si grosse puissance que celle des Peres? Nenny certes: car il n'y eut oncques capitaine qui par-
C tist pour aller à la guerre avec plus grands & plus suffisans moyens que luy, à sçauoir magnanimité, prudence, temperance, vaillance, dont la philosophie luy auoit fait munition pour son voyage, estant plus secouru à ceste entreprise contre les Peres de ce qu'il auoit appris de son precepteur Aristote, que de ce que luy auoit laissé son pere Philippus. Il est bien vray que nous ne voulons pas desdire ny descroire ceux qui escriuent, que luy mesme Alexandre dit quelquefois, que l'Iliade & l'Odysee d'Homere l'accompagnoient tousiours pour vn viatique ou entretien de la guerre, concedans cela à l'honneur & à la reuerence d'Homere: mais toutefois si lon disoit, que l'Iliade & l'Odysee d'Homere luy estoient vn soulagement de ses trauaux, & vn honneste passetemps pour son loisir, mais que sa vraye munition & son entretien pour la guerre estoient les discours qu'il auoit appris de la philosophie, & les recors & preceptes touchant l'assurance de ne rien craindre, la proüesse & vaillance, & de la magnanimité & temperance, nous nous en mocquerions, pour autant qu'il n'a rien escrit de l'artifice de composer syllogismes, ou des elemens & principes de
D Geometrie, & n'a pas tenu le proumenoir en l'eschole du Lycium, ny n'a pas tenu positions en l'Academie: car c'est ce en quoy terminent & definissent la philosophie ceux qui cudent que ce soient seulement paroles, & non pas effects, combien que Pythagoras n'ait iamais rien escrit, ny Socrates, ny Arcefilaus, ne Carneades, qui ont tous esté philosophes tres-renommez, & si n'estoient pas occupez en si grandes guerres, ny à cultiuer & ciuiler des Roys barbares, ny à fonder des villes Grecques pour viure ciuilement entre des nations farouches, & sauuages, ny n'alloyét point par le monde enseignant les loix & le viure pacifique à des peuples effrenez, qui n'auoient iamais ouy parler ny de paix, ny de loix: mais ces grands hommes-là, combien qu'ils eussent tout loisir, si laisserent-ils ceste partie-là de coucher par escript, aux Sophistes. D'où vient doncques que lon les a tenus pour philosophes? Il vient de ce qu'ils ont dit, de leur façon de viure, de ce qu'ils ont fait, & de ce qu'ils ont

De la fortune ou vertu d'Alexandre,

enseigné. Iugeons doncques aussi par ces mesmes choses qu'Alexandre semblablement l'a esté: car on trouuera par les choses qu'il a dittes, qu'il a faittes, & qu'il a enseignées, qu'il a esté vn grand philosophe. En premier lieu, si vous voulez, considerons, ce qui semblera de prime face plus estrange, les disciples d'Alexandre, & les comparons avec ceux de Platon, ou de Socrates: ceux-cy ont enseigné des hommes qui estoient de bon entendement, & qui parloient vne mesme langue qu'eux, quand ils n'eussent eu autre chose, pour le moins entendoient-ils la langue Grecque: & toutefois encore y eut-il beaucoup de leurs auditeurs qu'ils ne peurent persuader: car vn Alcibiades, vn Critias, vn Clitophon, reietterent la raison, comme le mors de bride, & se destournerent ailleurs: là où si vous regardez la discipline d'Alexandre, il enseigna aux Hyrcaniens à contracter certains mariages, aux Arrachosiens à labourer la terre: aux Sogdianiens à nourrir leurs peres vieux, & ne les faire point mourir, & aux Perfes à reuerer leurs meres, & non pas les espouser. O la merueilleuse philosophie, par le moyen de laquelle les Indiens adorent les Dieux de la Grece, les Scythes ensepuclissent les trespassez, & ne les mangent plus! Nous nous esmerueillons de l'efficace du parler de Carneades, qui sceut faire que Clitomachus, lequel au parauant s'appelloit Asdrubal, & estoit Carthaginois de nation, se conforma au party, aux mœurs & langage des Grecs: nous esmerueillons la disposition de Zenon, de ce qu'il sceut persuader à Diogenes le Babylonien de s'adonner à l'estude de la philosophie: & depuis qu'Alexandre eut domté & ciuilité l'Asie, tout leur passetemps estoit de lire les vers d'Homere, & les enfans des Perfes, des Sufianiens, & des Gedrosiens, chantoient les Tragédies de Sophocles & d'Euripides: & Socrates fut puny de mort à la poursuite des calomniateurs qui luy mettoient sus, qu'il introduisoit à Athenes de nouueaux Dieux: là où par l'enseignement d'Alexandre les habitans de Bactra, & du mont de Caucasus, encore de present adorent les Dieux de la Grece. Platon a laissé par escript vne seule forme de gouuernement de ville, mais il n'a pas sceu persuader à vn seul homme de la suyure, tant elle a esté trouuee austere & seuer: là où Alexandre ayant basti & fondé plus de soixante & dix villes parmy les nations barbares, & ayant semé par toute l'Asie les mysteres, sacrifices & ceremonies de seruir aux Dieux, dont on vse en la Grece, les a retirez d'une vie sauuage & bestiale. Il y a encore peu d'entre nous qui lisent les loix de Platon, là où il y a des milliers innombrables d'hommes qui ont vſé & encore vsent de celles d'Alexandre, estans plus heureux ceux qui ont esté subiuguez & domtez par luy, que ceux qui ont eschappé sa puissance: car ceux-là n'ont encore eu personne qui les ait fait cesser de viure miserablement, & ceux-cy ont esté contraincts par le vainqueur de viure heureusement: de sorte que ce que iadis Themistocles dit, lors qu'estant banny d'Athenes il s'enfuit, & se retira deuers le Roy de Perse, où il eut de grands presens, & outre cela encore trois villes, qui luy payoient tous les ans tribut, l'une pour auoir du pain, l'autre pour le vin, & la tierce pour la viande: O mes enfans, dit-il, nous estions perdus, si nous n'eussions esté perdus: cela peut-on bien plus iustement dire de ceux qui furent lors pris par Alexandre, ils n'eussent pas esté appriuoisez & ciuilisez, s'ils n'eussent esté subiuguez: Alexandrie n'eust pas esté bastie en Ægypte, ny Seleucie en la Mesopotamie, ny Prophthasie au pais des Sogdianiens, ny Bucephalie aux Indes, ny le mont de Caucasus n'auroit aupres de soy la ville Hellade, par le moyen desquelles, la farouche bestialité se trouuant empestree, peu à peu s'est estainte, & s'est changé ce qu'il y auoit de mauuais, s'accoustumant à ce qu'il voyoit de meilleur. Si doncques les philosophes se magnifient de ce qu'ils addoucissent & reforment des mœurs rudes & non polies d'aucune doctrine, & il se voit que Alexandre a changé en mieux infinies nations sauuages, & natures bestiales, à bon droit le deura-lon estimer vn tresgrand philosophe. Dauantage la police

A la police ou forme de gouvernement d'estat tant estimé, que Zenon le fondateur & premier auteur de la secte des philosophes Stoïques a imaginé, tend presque toute à ce seul poinct en somme, que nous, c'est à dire les hommes en general, ne viuions point diuisez par villes, peuples & nations, estans tous separez par loix, droicts, & coustumes particulieres, ains que nous estimions tous hommes nos bourgeois & nos citoyens, & qu'il n'y ait qu'une sorte de vie, comme il n'y a qu'un monde, ne plus ne moins que si ce fust vn mesme troupeau paissant sous mesme berger en pastis communs. Zenon a escrit cela comme vn songe ou vne Idee d'une police & de loix philosophiques, qu'il auoit imaginee & formée en son cerueau: mais Alexandre a mis à reale execution ce que l'autre auoit figuré par escript: car il ne fit pas comme

- Aristote son precepteur luy conseilloit, Qu'il se portast enuers les Grecs comme pere, & enuers les Barbares comme seigneur: & qu'il eust soing des vns comme de ses amis & de ses parents, & se seruist des autres comme de plantes ou d'animaux: en

B quoy faisant il eust remply son Empire de bannissements, qui sont tousiours occultes semences de guerres, & factions & partialitez fort dangereuses: ains estimant estre enuoyé du ciel, comme vn commun reformateur, gouuerneur, & reconciliateur de l'vniuers, ceux qu'il ne peut assembler par remonstrances de la raison, il les contrainit par force d'armes: & assemblant le tout en vn de tous costez, en les faisant boire tous, par maniere de dire, en vne mesme coupe d'amitié, & meslant ensemble les vies, les meurs, les mariages, & les façons de viure, il commanda à tous hommes viuans d'estimer la terre habitable estre leur pays, & son camp en estre le chasteau & le donjon, tous les gens de bien parens les vns des autres, & les meschans seuls estrangers: au demourant, que le Grec & le Barbare ne feroient point distinguez par le manteau, ny à la façon de la targue, ou du cimenterre, ou par le haut chapeau, ains remarquez & discerniez le Grec à la vertu, & le Barbare au vice, en reputant tous les vertueux Grecs, & tous les vicieux Barbares: en estimant au demou-

C rant les habillemens communs, les tables communes, les mariages, les façons de viure, estans tous vnis par mellange de sang & communion d'enfans. C'est pourquoy Demaratus le Corinthien estant l'un des hostes & des amis du Roy Philippus, quand il veit Alexandre en la ville de Suse, en fut fort ioyeux, de maniere que d'aïse les larmes luy en vindrent aux yeux, en disant, que les Grecs qui estoient ia decedez, estoient priez d'une grande ioye & singulier contentement, de voir Alexandre assis dedans le throsne royal de Darius. Quant à moy, ie ne repete pas certainement fort heureux ceux qui veirent ce spectacle-là, attendu qu'il dependoit de la fortune, & qu'autant en peut aduenir aux plus communs Roys: mais bien eusse-je eu grand plaisir de veoir ces belles & saintes espousailles, quand il comprit dedans vne mesme tente foncee de fond & couuerture d'or, à mesme festin & mesme table, cent espousees Persienes mariees à cent espoux Macedoniens & Grecs, luy mesme y estant couronné de chapeau de fleurs, & entonnant le premier le chant nuptial d'Hymeneus, comme vn cantique d'amitié generale, venant à conioindre par alliances de mariage deux des plus grandes & plus puissantes nations du monde, estant luy mary de l'une, & pere commun, moyennneur & conciliateur des nopces de toutes, qu'il apparioit ainsi en legitime couple de mariage: car i'eusse bien volontiers dit là, O barbare Xerxes, eceruele, qui te trauaillas beaucoup en vain pour dresser vn pont dessus le destroit de l'Hellespont, c'est ainsi que les sages Roys doiuent conioindre l'Europe avec l'Asie, non point par des vaisseaux de bois, ny par des radeaux, ny avec des liens qui n'ont point d'ame, & ne sont point capables de mutuelles affections, ains par amour legitime & mariages honnestes, conioignant les deux nations par communicatiō d'enfans. Voila pourquoy Alexandre regardant à ce bel ornement-là, ne receut pas l'habillement des Medois, ains celuy des Persiens, qui est beaucoup plus sobre & plus modeste que

De la fortune ou vertu d'Alexandre,

celuy des Medois : car reiettant ce qu'il y auoit de trop excessif, trop pompeux & tragique en l'habit barbaresque, comme le hault chapeau poinctu, la longue robe, & les braguesques, il porta vn vestement composé moitié de l'habit Persien, & moitié du Macedonien, ainsi comme Eratosthenes a laissé par escript, comme philosophe, c'est à dire, homme se gouuernât avec raison, vsant des choses qui sont de soy indifferentes, c'est à dire, ny bonnes ny mauuaises, & comme Prince commun, & Roy gracieux & humain, s'acquérant la bien-vueillance de ceux qu'il auoit subiugez, en honorant sur sa personne leur habillement, à fin qu'ils perseuerassent fermes vers luy en fidelité, en ayment les Macedoniens comme leurs naturels Seigneurs, non pas les haïssant comme leurs ennemis. Car le contraire eust esté d'un esprit estourdy, & d'un entendement desdaigneux & superbe, faire cas d'un manteau de couleur naïfue, & s'offenser d'un saye de pourpre : ou bien à l'opposite, auoir en admiration cecy & mespriser cela, ne plus ne moins qu'un petit enfant, retenât à toute force l'accoustrement que la coustume de son pays, comme sa nourrice, luy auroit vestu, là où les chasseurs ont accoustumé de se vestir des peaux des animaux qu'ils prennent, comme des cerfs : & ceux qui font profession de prendre les oyseaux, se vestent de sayons tissus & composez de plumage d'oyseaux. Ceux qui ont des robes rouges se gardent de se monstrier aux taureaux, & ceux qui ont des sayes blancs, de se monstrier aux Elephans, d'autant que ces bestes-là s'irritent & s'effarouchent en voyant de telles couleurs. Et si vn grand Roy, comme estoit Alexandre, pour addoucir & appriuoiser des nations belliqueuses & malaisées à retenir, ne plus ne moins que des bestes fieres, a vsé des robes qui leur estoient propres, & de leurs façons de viure accoustumées, pour tousiours plus les gagner, amollir la fiereté de leur courage, & reconforter leur deplaisir, il y en a qui le blasment & le reprennent, au lieu qu'ils deueroient admirer en cela sa sagesse, d'auoir si dextrement sçeu, par vn leger changement d'habit, caresser l'Asie, se faisant par armes seigneur & maistre des corps, & par l'accoustrement se conciliant les ames. Et toutefois ceux-là mesmes loüent Aristippus le philosophe Socratique de ce, que quelquefois il se vestoit d'une pauvre & mince cappe, & autrefois d'un manteau riche de la tissure & raincture de Milet, & sçauoit garder la bienseance en l'un & en l'autre vestement : & cependant ils accusent Alexandre de ce, que honorant l'habit de son pays il ne mesprisa point celuy qu'il auoit conquis par armes, en intention de s'en seruir à bastir le fondement de choses grandes : car son desseing n'estoit pas de courir & fourrager l'Asie, comme feroit vn Capitaine de larrons, ny de la saccager & piller, comme rauage & butin de felicité inesperee, ainsi comme depuis Hannibal feit l'Italie, & deuant les Trieriens auoient fait l'Ionie, & les Scythes la Medie, ains estoit sa volonté de rendre toute la terre habitable subiecte à mesme loy de la raison, & tous les hommes citoyens d'une mesme police & d'un mesme gouuernement. Voyla la cause pour laquelle il se transformoit ainsi en habits. Que si le grand Dieu qui auoit enuoyé l'ame d'Alexandre icy bas, ne l'eust soudainement r'appellée à soy, à l'aduenture n'y eust-il eu qu'une seule loy qui eust regy tous les viuans, & eust esté tout ce monde gouuerné sous une mesme iustice, comme sous une mesme lumiere, là où maintenant les parties de la terre qui n'ont point veu Alexandre, sont demourees tenebreuses & obscures, comme estans destituees du soleil. Parquoy le premier proiect & desseing de son expedition monstre qu'il a eu intention de vray philosophe, qui n'estoit point de conquerir pour luy des delices & plantureuses richesses, ains de procurer une paix vniuerselle, concorde, vnion & communication à tous les hommes viuans les vns avec les autres. En second lieu, considerons vn peu ses paroles & propos, par ce que de tous autres Princes & Roys, les ames monstrent quelles sont leurs meurs & leurs intentions, principalement par leurs propos. Antigonus le vieil respondit vn iour à quel-

que

A que Sophiste qui luy presentoit & dedioit vn Traicté qu'il auoit composé de la iustice, Tu es vn sot, mon amy, qui me viens prescher de la iustice, là où tu vois que ie bars
 „ les villes d'autrui. Et Dionysius le Tyran disoit, qu'il falloit tromper les enfans avec
 „ des dez & des osselets, & les hommes avec des iurements. Et sur le tombeau de Sar-
 danapalus y auoit engraué,

*Ailleurs
il est at-
tribué à
Lysander.*

Demouré m'est seulement ce que i'ay

Paillardé, beu, yurongné, & mangé.

Qui pourroit nier que par l'vne de ces responses-là, la volupté & l'impiété ne soient
 autorisées, & par l'autre l'auarice & l'iniustice? mais au contraire si aux dictz d'Ale-
 xandre vous ostez le diademe & la couronne royale, & l'estre fils de Iupiter Ham-
 mon, & la noblesse, vous direz que ce seront sentences d'un Socrates, d'un Platon, &
 d'un Pythagoras: car il ne faut pas que nous nous arrestions aux braueries & superbés
 inscriptions que les poëtes ont engraüées & empreintes sur les images & statues de
 B luy, ne tendans pas à monstrier sa modestie, mais magnifier sa fortune & sa puissance:

Ce bronze estant d'Alexandre l'image

Tournant à mont les yeux & le visage,

A Iupiter semble dire, Pour toy

Retien le ciel, car la terre est à moy.

Et vn autre,

Alexandre ie suis, le fils de Iupiter.

Toutes telles galanteries c'estoient les poëtes qui les disoient & escriuoient pour flat-
 ter sa fortune: mais des vrayz dictz d'Alexandre, qui les vouldroit raconter, on pour-
 roit commencer à ceux qu'il dict en sa ieunesse: car estant plus viste que nul autre des
 ieunes hommes de son aage, ses familiers l'incitoient à vouloir courir en la carrière
 des ieux Olympiques pour gagner le pris de la course: il leur demanda s'il y auoit
 „ des Roys qui y courussent: ils luy respondirent, que non: La partie doncques ne se-
 „ roit pas iustement faicte, en laquelle vn priué pourroit estre vainqueur, & vn Roy
 C vaincu. Et comme son pere eust eu la cuisse percée d'outre en outre d'un coup de
 lance, en vne bataille contre les Triballiens, estant hors du danger de la vie, mais
 „ desplaisant de se voir boiteux: Ne te soucie, dict-il, mon pere, fors hardiment en pu-
 „ blic, à fin qu'à chascun pas que tu feras, tu te souuienes de ta vertu. Ces responses là ne
 procedent elles point d'un entendement de philosophie, & d'un cœur qui pour estre
 rauy de l'amour des choses grandes & honnestes, ne se soucie desia nullement des
 dommages du corps? car commēt pensons nous qu'il se glorifioit des blesseures qu'il
 auoit luy-mesme receuës en sa personne? quand il se souuenoit ou d'un peuple sub-
 iugué, ou d'une bataille gagnée, ou de villes prises, ou de Roys qui s'estoient rendus,
 il n'auoit garde de cacher ny couvrir telles cicatrices, ains les portoit & monstroit
 par tout, comme des images de sa vertu engraüées en sa personne. Et si quelquefois
 en deuisant des lettres, on venoit à faire comparaison des vers d'Homere, ou bien
 D entre les propos de table, s'il se mettoit en auant, lequel estoit le plus excellent, com-
 me l'un en alleguast vn, & l'autre vn autre, luy preferoit cestuy-cy à tous les autres,

Sage en conseil & vaillant au combat:

faisant son compte que la louange que l'autre auoit donnée au Roy Agamemnon,
 quelque aage au parauant, estoit vne loy pour luy-mesme, tellement qu'il disoit, que
 Homere en vn mesme vers auoit honoré la vaillance d'Agamemnon, & prophetisé
 celle d'Alexandre. Et pourtant si tost qu'il eut passé le destroit de l'Hellepont, il alla
 visiter Troye, là où il se representa en son entendement les hauts faictz, d'armes des
 „ princes qui y combattirent: & comme quelqu'un du pays luy promist de luy donner
 „ la lyre de Paris, s'il vouloit: Le n'ay, dit-il, que faire de celle-là, car i'ay celle d'Achilles:
 au son de laquelle il se reposoit en chantant les loüanges des vaillans personnages:
 mais celle de Paris auoit vne harmonie trop molle & trop feminine, sur laquelle

De la fortune ou vertu d'Alexandre,

il chantoit des chansonnettes d'amour. Or est-il bien certain qu'aymer la sapience, & E
auoir en estime les gens sages & de sçauoir, est signe d'une ame philosophique : cela
estoit en Alexandre autant qu'en nul autre des Roys : car nous auons desia dit quelle
affection il portoit à son maistre Aristote, & qu'il faisoit autāt d'honneur à Anaxar-
chus le Musicien, qu'à nul autre de ses familiers. La premiere fois que Pyrrhon Elie
parla à luy, il luy donna dix mille pieces d'or. Il enuoya vn present de cinquante ta-
lents, qui sont trente mille escus, à Xenocrates l'un des disciples de Platon. Et la plus
part des historiens escrit, qu'il feist Onesicritus, lequel auoit esté auditeur de Dioge-
nes, Capitaine de son armée de mer : & s'estant rencontré vne fois aupres de Co-
rinthe à parler avec Diogenes, il fut si esmerueillé de sa façon de viure, & eut sa gra-
uité en telle admiration, que bien souuent depuis, faisant mention de luy, il disoit,
• Si ie n'estois Alexandre, ie serois Diogenes : qui estoit autant à dire comme, i'eusse
volontiers vsé ma vie à l'estude des lettres, si ie n'eusse deliberé de philosopher par
effect. Il ne dict pas, Si ie n'estois Roy, ie serois Diogenes : ne, si ie n'estois riche, ou F
aymant à estre bien vestu, car il ne preferoit point la fortune à la sapience, ny la
pourpre & le diadème à la besace, & à la pauvre cappe : ains dict simplement, Si ie
n'estois Alexandre, ie serois Diogenes : qui est autant à dire comme, si ie n'auois
proposé de mesler ensemble les nations Barbares avec les Grecques, & voyageant
• par toute la terre habitable, polir & cultiuer tout ce que i'y trouuerois de sauage,
rechercher iusques aux extremes bouts du monde, approcher la Macedoine de la mer
Oceane, y semer la Grece, & espandre par toutes nations la paix & la iustice, ie ne
demourerois pas oysif en delices, à prendre mon plaisir, ains ie voudrois imiter la
simplicité & frugalité de Diogenes. Mais maintenant pardonne moy Diogenes,
ie imite Hercules, ie vay apres Perseus, ie suy la trasse de Bacchus, ie veux faire voir
encore vne fois les Grecs victorieux aller au pays des Indes, & reduire encore en
memoire aux montaignars, & sauages nations qui habitent delà la montaigne de
Caucasus, les ioyeusetez des festes Bacchanales. On dict qu'en ces quartiers là il y G
a aussi quelques gens qui font profession d'une sapience austere & nue, hommes
sacrez & viuans à leurs loix, vacants du tout à la contemplation de Dieu, se passans
encore de moins que Diogenes, & n'ayans point besoing de bissac, car ils ne font
point de prouision de viures, parce que la terre leur en fournit tousiours de tous
frais & nouueaux, les riuieres leur donnent à boire, & les fueilles tombans des ar-
bres, & l'herbe, à coucher : par moy Diogenes les cognoistra, & eux Diogenes. Il
faut que ie batte & graue aussi de la monnoye à la forme Grecque, qui se debite en-
tre les nations Barbares. Venons maintenant à ses faicts : apparoit-il qu'il y ait
seulement vne temerité de la fortune, ou vne force d'armes & violence de main
mise, ou plustost vne grande prouesse & iustice, & vne grande temperance, bonté &
clemence, avec vn bon ordre & grande prudence, conduisant toutes choses par vn
bon sens & vn grand iugement ? Certainement ie ne pourrois dire ne discerner en H
ses gestes, cela est vn faict de vaillance, cela d'humanité, cela de patience, ains tout
exploict de luy semble auoir esté meslé & composé de toutes les vertus ensemble, en
• confirmation de ceste sentence des Stoïques, Que tout acte que faict le sage, il le
• faict par toute vertu ensemble. Bien est-il vray, que tousiours en chascue action il
y a vne vertu eminente par dessus les autres, mais celle-là incite & dirige les autres à
la mesme fin : aussi voit-on es gestes d'Alexandre, que sa vaillance est humaine, &
son humanité vaillante, sa liberalité mesnagere, sa cholere facile à appaiser, ses amours
temperées, ses passe-temps non oyseux, ses trauaux non sans addoucissement. Qui
est celuy qui a meslé la feste parmy la guerre, les expéditions militaires parmy les
ieux ? Qui a entrelassé parmy les sieges des villes, parmy les exploicts d'armes les
ioyusetes Bacchanales, les nopces, les chansons nuptiales d'Hymenée ? Qui fut
oncques

A oncques plus ennemy de ceux qui font iniustice, ne plus gracieux aux affligez ? Qui fut iamais plus aspre aux combattans, ne plus equitable aux supplians ? Il me vient en pensée d'alleguer & transferer en cest endroiect le dire du Roy Porus, lequel estant amené prisonnier à Alexandre, & enquis par luy, comment il vouloit qu'il le traitast, respondit, En Roy. Et comme Alexandre luy repliquast, s'il vouloit rien dire d'uantage: Non, dict-il, car tout est compris sous ce mot là, En Roy. Aussi m'est aduis qu'à tous les faicts d'Alexandre, ie puis adiouster ce refrain, En philosophe: car en cela tout est compris. Il deuint amoureux de Roxane, fille d'Oxiathres, l'ayant veüe baller de bonne grace entre les Dames captiues: il n'en voulut point iouyr à force, ains l'espousa legitiment. en philosophe. Ayant veu son ennemy Darius massacré à coups de traict, il n'en fit point de sacrifices aux Dieux, ny n'en chata point chant de triomphe, combien que vne longue guerre fust abbregee & finie par ceste mort, ains ostant son manteau de dessus ses espaulles, le ietta sur le corps du mort, comme s'il eust voulu cacher la miserable destinée d'une fortune royale. en philosophe.

B Il receut quelquefois vne missiue secrette de sa mere, qu'il lisoit, estant d'adventure Hephestion assis aupres de luy, qui la lisoit naïfement sens y penser avec luy: Alexandre ne l'en engarda point, ains seulement tira l'anneau de son doigt, & luy meit contre la bouche, seillant son silence de la foy d'amitié. en philosophe. Car si ces actes ne sont faicts en philosophe, quels autres le seront ? Socrates souffrit bien que Alcibiades couchast avec luy: mais Alexandre, comme Philoxenus son lieutenant au gouuernement de la coste maritime de l'Asie luy eust escript, qu'il y auoit vn ieune enfant en son gouuernement d'Ionie de face & beauté incomparable, & luy demandast par ses lettres, s'il luy plaisoit qu'il luy enuoyast: il luy rescriuit bien aigrement, O malheureux & meschant homme, qu'as-tu iamais cogneu en moy pourquoy tu deusses me flatter par telles voluptez ? Nous admirons Xenocrates de ce qu'il ne voulut pas accepter vn present de cinquante talens qu'Alexandre luy en-

C uoyoit, n'admirerons nous pas aussi celuy qui le luy donnoit ? n'estimerons nous pas qu'aussi peu de compte d'argent fait celuy qui le donne ainsi liberalement, que celuy qui le refuse ? Xenocrates n'auoit point besoing d'argent, pource qu'il estoit philosophe: & Alexandre en auoit, pource qu'il estoit philosophe, à fin qu'il en exerçast liberalité avec telles gens. * Combien de fois pensons nous que l'a dict Alexandre, quand il se voyoit tout couuert de traicts qu'on luy tiroit, & quand à tout effort on le pressoit ? Nous estimons bien qu'il y a en tous hommes quelque lumiere de droit & bon iugement, parce que la nature d'elle-mesme les dresse à ce qui est honneste: mais il y a difference entre les communs hommes & les philosophes en ce, que les philosophes ont le iugement plus ferme & plus asseuré es dangers, d'autant que les vulgaires hommes n'ont pas les cœurs fortifiez & munis de telles anticipations & preiugées impressions,

D Bon augure est, pour son pays combattre. Et,
La mort est fin de tous maux aux humains.

Mais les occurrences des perils qui se presentent, leur rompent leur discours, & les apprehensions des dangers presens ou prochains leur esbranlent tous leurs iugemens: car la peur ne chasse pas seulement la memoire, comme dict Thucydide, mais aussi toute bonne intention, toute enuie de bien faire, & toute emotion, là où la philosophie lie de cordages tout alentour.

La fin en est defectueuse.

* Le discours de
mespris de
la mort,
defaut en
ce lieu.

De la fortune ou vertu d'Alexandre,

E

TRAICTE SECOND.



NOUS oubliâmes hier, ce me semble, à dire que le siecle d'Alexandre fut heureux en cela, qu'il porta plusieurs arts & plusieurs beaux & grands esprits: ou plustost faut-il dire que cela ne fut pas tant la bonne fortune d'Alexandre, que de ces bons ouuriers & grands entendements là, d'auoir vn tel tesmoing & vn tel spectateur, qui sceust tres-subtilement iuger de ce qui seroit bien faict, & tres-liberalement le recompenser. Suyuant lequel propos on dict, que quelque temps depuis ayant esté Arcestratus gentil poëte, viuant en grande & estroicte pauureté, pource que personne n'en faisoit compte, quelqu'un luy dict, Si tu eusses esté du temps d'Alexandre, il t'eust donné pour chascun de tes vers, ou la Cypre, ou la Phœnice: aussi croy-je que les premiers & plus excellens ouuriers de ce regne là ne se doiuent pas tant dire auoir esté sous Alexandre, que par Alexandre: car la bonne temperature & subtilité de l'air cause l'abondance des fruiets, mais la benignité, l'honneur & l'humanité du prince est ee qui prouoque & fait venir en auant l'auancement des arts & des beaux esprits, comme au contraire tout cela languit & s'estaint par l'enuie, l'auarice & l'opiniastreté de ceux qui dominant. Auquel propos on dict, que Dionysius le tyran ayant vn iour ouy vn Musicien ioïeur de Cithre qui sonnoit fort bien, il luy promit tout haut qu'il luy donneroit vn present de six cens escus. Le lendemain cest homme vint demander le present qui luy auoit esté promis, & Dionysius luy respondit, Tu me donnas hier du plaisir à t'ouyr ioïer, & ie t'en ay donné aussi en te faisant ceste promesse: ainsi tu fus payé sur le champ du plaisir que tu me donnas, par celuy que tu receus. Et Alexandre, le tyran de Pheres (il le falloit seulement specifier par celle qualité là, & non pas contaminer le nom d'Alexandre, en le donnant à vn si meschant homme) regardant ioïer vne Tragedie y prit si grand plaisir, qu'il en auoit le cœur fort attendry de pitié & de compassion: de quoy s'estant pris garde, il se leua en haste, & s'en alla du theatre plus viste que le pas, disant que ce seroit chose indigne qu'on le veist plorer par compassion des miseres & calamitez d'Hecuba & de Polyxena, veu qu'il faisoit tous les iours mourir tant de ses citoyens. Mais celuy-là fut bien si meschant, qu'il s'en fallut bien peu qu'il ne feist punir ce ioïeur excellent de Tragedies, pource qu'il l'auoit amolly comme du fer s'amollit au feu. Le Roy de Macedoine Archelaus sembloit estre vn peu tenant en matiere de donner & faire presens: de quoy Timotheus musicien en chantât sur la lyre luy dōna vne attainte, en luy tirant souuent ce petit brocquard, Ce fils de terre, l'argent, trop tu le recommandes: mais Archelaus luy repliqua sur l'heure bien gentilmente & de bonne grace, Mais toy par trop tu le demandes. Et Hecateas le Roy des Scythes ayant pris prisonnier de guerre Ismenias, excellent ioïeur de fleutes, luy commanda qu'il en sonnast durant son disner: & comme les assistans s'esmerueillassent d'ouyr si excellentement ioïer, & luy en feissent caresses, luy iura qu'il prenoit plus de plaisir à ouyr son cheual hennir: tant ses oreilles estoient logées loing des Muses, & auoit son ame attachée en vne estable, plus apte encore à ouïr des asnes que non pas des cheuaux. Quel honneur donc & quel auancement pourroit esperer vn si excellent ouurier & maistre de Musique auprès de tels princes, non plus qu'enuers ceux mesmes qui estriuent contre eux de la suffisance de l'art, & pour ceste ialousie par vne enuie & vne malignité veulent ruiner ceux qui veritablement y sont excellens ouuriers: de quelle sorte estoit le mesme tyran Dionysius, qui feit ietter le poëte Philoxenus es prisons des carrieres, pource que luy ayant baillé vne Tragedie

A Tragedie qu'il auoit composée, pour la reuoir & corriger, il la ratura toute depuis le commencement iusques à la fin. Philippus mesme de Macedoine pour auoir tard appris la Musique, ne respondoit pas en cela au reste de sa grandeur, & se monstroit impertinent & ignorant: car estant vn iour entré en dispute avec vn sonneur d'instruments touchant la façon d'en iouer, & luy semblant auoir quelque raison pour le conuaincre, le Musicien luy respondit en se souriant tout doucement, Dieu te gard, Sire, d'estre si malheureux que tu entendes ces choses-là mieux que moy. Mais Alexandre sçachant tresbien de quelles choses il deuoit estre spectateur & auditeur, & de quelles il deuoit estre facteur & executeur de sa main, il exerça bien tousiours sa personne à estre adroict aux armes & vaillant, & comme dict le poëte Æschylus,

Rude guerrier combattant de pied stable,
Aux ennemis en armes redoutable.

B Celle-là estoit son art hereditaire qu'il auoit par succession de ses ancestres les Æacides & Hercules: mais quant aux autres arts & sciences il les honoroit bien, mais c'estoit sans auoir enuie d'en faire profession, & loüoit bien leur excellence & leur gentillesse, mais pour plaisir qu'il y prist, il n'estoit pas facile à surprendre de l'affection de les vouloir imiter. De son temps furent deux excellens ioueurs de Tragedies, entre autres, Theffalus & Athenodorus, lesquels iouants à l'enuy l'un del'autre, les Roys & Princes de Cypre faisoient les frais à l'enuy de mesme, & estoient iuges de ce different les principaux & plus renommez Capitaines de l'armée: en fin Athenodorus ayât esté déclaré le vainqueur, Alexandre qui aymoît Theffalus dit, Je voudrois auoir perdu la moitié de mon royaume, & ne voir point Theffalus vaincu: mais toutesfois iamais il n'en parla deuant aux iuges pour les solliciter, ny iamais ne reprit leur iugement, estimant qu'il falloit qu'il vint au dessus de toute autre chose, mais qu'il pliaist au dessus de la iustice. Et entre les ioueurs de Comedies y auoit vn Lycon C Scarphien, lequel vn iour en iouant son rolle de quelque Comedie entrelassa dextrement vn vers par lequel il luy demandoit de l'argent: Alexandre s'en prit à rire, & luy fait donner dix talents, qui sont six mille escus. Aussi y auoit-il plusieurs excellens ioueurs de Cithre, & entre autres Aristonicus, lequel en vne bataille accourant pour le secourir, fut tué à ses pieds en combattant vaillamment. Alexandre luy feir faire & dresser vne statue de bronze au temple d'Apollo Pythique, tenant vne Cithre d'une main, & vne lance de l'autre: en quoy faisant il honora non seulement le personnage, mais aussi la Musique, comme luy rendant tesmoignage qu'elle rend les cœurs des hommes magnanimes, & les remplit d'un rauissement d'esprit, & d'un ardeur de bien faire, mesmement ceux qui y sont naïfement nourris: car luy-mesme vn iour que Antigenidas ioueur de fleutes sonna vn chanson militaire, fut si esmeu & si eschauffé en courage par les aiguillons de celle musique, qu'il faulta de sa place & s'en courut aux armes qui estoient pres de luy: tesmoignant par cela estre vray ce que

D les Spartiates chantent es chansons de leur pays,

Sçauoir doucement chanter
Sur la lyre de beaux carmes,
Sied bien avec le hanter
Vaillamment le faiët des armes.

Aussi estoient du temps d'Alexandre Apelles le peintre, & Lyfippus le statuaire, desquels l'un peignit Alexandre tenant la foudre en sa main, si naïfement peint & au vif, que lon disoit que des deux Alexandres, celui qui estoit fils de Philippus estoit inuincible, & celui d'Apelles inimitable. Et Lyfippus ayant moulé la premiere statue d'Alexandre la face tournée vers le Ciel, comme luy mesme Alexandre auoit accoustumé de regarder, tournant vn petit le col, il y eut quelqu'un qui y meit ceste in-

De la fortune ou vertu d'Alexandre.

scription qui n'a pas mauuaise grace :

E

Ce bronze estant d'Alexandre l'image

Iettant à mont les yeux & le visage,

A Iupiter semble dire, Pour toy

Retien le ciel, car la terre est pour moy,

Et pourtant defendit Alexandre que nul autre fondeur ne iettast en brōze son image que Lysippus, parce que luy seul auoit l'industrie de représenter ses mœurs par le cuyure, & monstroit son naturel en la figure de son corps : les autres representans bien la rōse de son col, & l'humidité de ses yeux, ne pouuoient aduenir à exprimer son visage masle, & sa generosité de lion. Il y auoit aussi entre les autres ouuriers vn insigne Architecte nommé Staficrates, lequel ne tendoit point à faire chose qui fust iolie, ny gentille & de belle grace à la voir, ains de grande entreprise, & d'un desseing & disposition telle, que pour y fournir il ne falloit pas vne moindre opulence que celle d'un grand Roy. Cestuy s'en allant trouuer Alexandre, luy blasma toutes ses images, & peintes & grauées, moulées & fonduës, disant que c'estoient ouurages d'ouuriers couards, & non genereux ny magnanimes : Mais i'ay proposé, dit-il, Sire, de fonder la similitude de ta personne en vne matiere viue, & qui a ses racines immortelles, & sa grauité immobile & immuable : car le mont Athos qui est en Thrace, à l'endroit qu'il se leue plus haut, & est le plus eminent, ayant des plaines & hauteurs proportionnées à soy-mesme, & des membres, ioinctures, distances & interualles qui se peuuent accommoder à la forme humaine, se peut, en l'accoustrant & le formant, nommer & estre la statue digne d'Alexandre, qui de sa base touchera à la mer, & en l'une de ses mains embrassera & tiendra vne ville habitable de dix mille hommes, & en la droite vne riuere perpetuelle qu'elle versera d'une cruche dedans la mer : & au reste, quant à toutes ces statues d'or ou de bronze, ou d'yuoire, & à tous ces tableaux de bois & de peinture, iettons les là, comme de petits moules seulement qui se peuuent acheter ou desrober, ou se fondre & gaster. Alexandre l'ayant ouy parler, loua bien grandement le haut courage de son entreprise, & la hardiesse de son inuention : mais il luy respondit, Laisse là Athos demourer en sa forme & en sa place : il suffit qu'il soit le monument de l'outrageuse insolence & arrogance d'un seul Roy : & quant à moy, le mont de Caucasus, les montagnes Emodienes, la riuere de Tanais, & la mer Caspiene, seront les images de mes faicts. Or ie vous prie posons le cas qu'un tel ouurage eust esté fait & parfait, y a-il homme qui le veist en telle forme, en telle disposition, & de telle face, qui pensast qu'il fust ainsi creu fortuitement & par cas d'aduenture ? Le croy que non. Que dirons nous de son image que lon surnomme, Portant la foudre ? Que dirons nous de celle que lon appelle, Appuyé sur la lance ? & comment la grandeur d'une statue ne se pourroit sans artifice acheuer par fortune, encore qu'elle y versast & espondist largement en grande affluence l'or, le cuyure, l'yuoire & toute autre riche & precieuse matiere ? & nous estimerons qu'il soit possible qu'un grand homme, voire le plus grand qui fut iamais au monde, ait esté acheué par la fortune sans la vertu, & que ce soit la seule fortune qui luy ait fait prouision d'armes, d'argent, d'hommes, de cheuaux, & de villes, toutes lesquelles choses apportent peril à ceux qui n'en sçauent pas bien vser, non pas honneur ny puissance, ains plustost font preuue de leur petitesse & impuissance ? Car Antisthenes disoit bien, qu'il falloit souhaiter à ses ennemis tous les biens du monde, excepté la vaillance : car par ce moyen ils sont non à ceux qui les possèdent, mais à ceux qui les surmontent. C'est pourquoy lon dict que la nature a attaché à la teste du cerf, qui est la plus lasche & la plus couarde beste qui soit, les plus merueilleuses & plus dangereuses cornes pour se defendre, à fin de nous enseigner par cest exemple, que rien ne sert d'estre ny fort ny bien armé, qui n'a le

A n'a le courage de demourer & fasseur à combattre : ainsi la fortune bien souuent attachant des forces & des estats grands à des hommes de lasche cœur & de ceruelle esuentée, en faisant veoir comme ils s'y portent laschement & villainement, honore & recommande la vertu, comme celle de qui seule depend toute la grandeur, toute la gloire & l'honneur des hommes: car ainsi comme dit Epicharmus, l'entendement voit, l'entendement oit, tout le reste est aueugle & sourd, ayant faute de la raison. Les sentimens ont bien leurs propres & particulieres fonctions, mais qu'il soit vray que ce soit l'entendement qui profite tout, & qui dispose tout en bon ordre, que ce soit l'entendement qui surmonte, qui domine & qui regne, & que toutes autres choses aueugles, sourdes, & sans ame, aggrauent & deshonnorent ceux qui les possèdent, si la vertu n'y est ioincte quant-&-quant, on le peut clairement apperceuoir & verifier par les exemples. Car d'une mesme puissance, & d'un mesme empire, Semiramis, qui n'estoit qu'une femme, equippoit de grosses flottes de vaisseaux par mer, armoit
B & soudoyoit de puissans exercites, bastissoit des Babylones, conqueroit tous les enuiron de la mer Rouge, assubiectionnant à soy les Arabes, & les Ethiopiens: Et Sardanapalus qui estoit né homme, filoit la pourpre en la maison, estant veauté & couché à la renuerse parmy des concubines: & quand il fut mort, on luy fit une statue de pierre, qui balloit à par-soy à la mode barbaresque, & cliquetoit des doigts au dessus de sa teste, avec un tel escreteau: Mange, boy, paillarde, tout le reste n'est rien. Lon dict que le philosophe Crates, voyant au temple d'Apollo Pythique une statue d'or de la courtisane Phryné, s'escria tout haut, Voyla un trophée de la luxure des Grecs: mais qui considereroit la vie ou la sepulture de Sardanapalus, car il n'y a point de difference, il pourroit bien à la verité dire, Voyla un trophée des biens de la fortune. Quoy doncques? permettrons-nous que la fortune apres Sardanapalus touche tant peu que ce soit à Alexandre, ne qu'elle s'attribue part aucune ny de sa grandeur, ny de sa puissance? Il n'y auroit point de propos: car que luy a-t-elle iamais
C donné d'auantage que aux autres Roys, soit d'armes, de cheuaux, de finances & de soudards? Que elle en face doncques grand Arideus si elle peut: Qu'elle en face grand un Amasis, un Arsès, un Tigranes Armenien, un Nicomedes Bithynien, dont l'un ietta son diadème aux pieds de Pompeius, & perdit honteusement son royaume, & l'autre se faisant raire la teste, & se mettant un chapeau dessus, se declara libert, c'est à dire serf affranchy des Romains. Nous disons doncques, que la fortune rend petits les hommes, qui de leur nature sont coitiards, craintifs & bas de courage: mais il n'est pas raisonnable d'attribuer la lascheté à infortune, ny aussi la vaillance & prudence à la fortune. Mais bien peut-on dire que la fortune est chose grande, parce que Alexandre a dominé: car en luy & avec luy elle a esté glorieuse, inuincible, magnanime, non superbe, ny insolente, ains humaine & clemente: mais si tost qu'il fut decédé, Leosthenes disoit, que son armée & sa puissance errante, s'entre-
D heurtant soy-mesme, ressembloit au Cyclops Polyphemus, qui apres son aueuglement taistoit par tout de la main, sans sçauoir où il alloit: aussi la grandeur de sa puissance, luy mort, vaguoit & erroit tantost çà tantost là, bronchant & chopant à tout propos, pource qu'il n'y auoit plus personne à qui elle obeyst: ou plustost, ainsi comme les corps mourans, quand l'ame en est dehors, les parties ne s'entretiennent plus, ny ne se tiennent plus l'une à l'autre, ains s'entrelaissent & se destachent l'une d'avec l'autre, & se retirent: aussi l'armée d'Alexandre depuis qu'elle l'eut perdu, ne feit plus que palpiter, trembler, & estre en fiebure, soubz ie ne sçay quels Perdicques, Meleagres, Seleuques & Antigones, qui estoient comme des esprits encore chauds & pouls faillans, tantost cy, tantost là, par bouttées & interualles, iusques à ce que finalement venans à se gaster & pourrir en soy-mesme, elle groüilla toute de vers, qui furent des Roys qui n'auoient aucune valeur ny generosité en eux, & des

De la fortune ou vertu d'Alexandre.

capitaines lasches & faillis de cœur. Luy-mesme Alexandre tenant vn iour Hephestion, qui auoit pris querelle alencontre de Craterus, luy dict : Quelle force ne puissance as-tu de roy-mesme ? Que scaurois-tu faire qui t'osteroit Alexandre ? Aussi ne faindray-je pas d'en dire autant à la fortune de ce temps-là : Quelle grandeur as-tu ? quelle gloire ? où est ta puissance, où est ta force inuincible, si lon t'oste Alexandre ? c'est à dire, si lon oste des armes l'experience, des richesses la liberalité, de la sumptuosité & magnificence la temperance, du combat la hardiesse & assurance, de la victoire la bonté & la clemence ? Fais-en si tu peux vn autre grand qui ne departe point liberalement ses biens, qui ne s'expose point luy-mesme le premier aux perils deuant son armée, qui n'honore point ses amis, qui n'ait point de pitié de ses ennemis captifs, qui ne soit point continent es voluptez, vigilant aux occasions, aisé à appaiser en ses victoires, doux & humain en ses prosperitez. Comment pourroit estre vn homme grand, quelque autorité & puissance qu'il eust, si il est beste & vicieux quant & quant ? Ostez la vertu à vn homme heureux, vous le trouuerez petit en toutes sortes, petit en ses dons & presens pour sa chicheté, petit es trauals pour sa delicatesse, petit enuers les Dieux pour sa superstition, petit enuers les bons à cause de son enuie, petit entre les hommes pour sa lascheté, petit entre les femmes pour estre subiect à la volupté : car ainsi comme les mauuais ouuriers qui posent de petites statues sur des bases grandes & amples, monstrent par là mesme la petitesse de leurs statues : aussi quand la fortune eleue vn homme de foible & petit cœur en grand estat, où il doit estre veu de tout le monde, elle le descouure, le descrie, & le deshonne d'auantage, faisant voir comment il branle & chancelle pour sa legereté. Par ce moyen faut-il confesser que la grandeur ne gist pas à posseder des biens, mais à en bien vser : car il y a bien souuent des enfans qui dès le berseau heritent des royaumes, estats & seigneuries de leurs peres, comme fait Charillus, que Lycurgus son oncle apporta en son maillot au lieu où mangeoient les seigneurs, & le mettant au siege Royal le declara Roy de Sparte au lieu de luy : & pour cela l'enfant n'estoit pas grand, mais bien celuy qui rendoit au petit enfant venant de naistre, l'honneur & le degré qui luy appartenoit, sans le se vouloir attribuer ny en priuer son neveu. Mais qui eust peu faire grand Arideus, que Meleager emmaillota seulement d'vn manteau royal de pourpre, ne differant point d'vn petit enfant, & le colloqua dedans le throsne d'Alexandre ? Faisant bien en cela, pour donner clairement à cognoistre au monde dedans bien peu de iours, comment les hommes regnent par la vertu, & comment par la fortune : car il subrogea à vn vray Prince & vray Roy, vn qui n'en auoit que la mine, ou pour mieux dire, il promena pour vn peu de temps par la terre habitable, ne plus ne moins que sur vn eschaffaut, vn diadème sourd & muet :

La femme mesme vn fardeau porteroit,

Que sur l'espaule vn homme luy mettroit.

Mais on pourroit dire au contraire, qu'une femme ou vn enfant mesme pourroit prendre & charger vne seigneurie, vn royaume, vn estat & office, comme Bagoas, vn Eunuque, enleua & chargea sur les espauls des Roys Arses & Darius second, le royaume des Perles : mais apres que lon a receu sur ses espauls vne grande puissance, la porter, la manier, & ne se laisser point accabler ne briser dessous, par la grandeur & pesanteur des affaires, c'est fait en homme qui a la vertu, l'entendement & le courage tel comme l'auoit Alexandre : auquel il y a quelques vns qui reprochent qu'il aymoit le vin & qu'il s'en yuroit, mais il estoit grand aux affaires, là où il demouroit sobre, & ne s'en yuroit, ny ne se mesconnoissoit point pour quelque puissance, autorité, ne licence qu'il eust, de laquelle depuis que les autres ont vn petit gousté & participé, ils ne se peuuent plus retenir, ains si tost qu'ils sont ou remplis de deniers, ou qu'ils ont attainct à quelques honneurs & dignitez de ville, ils regibbent & deuiennent si insolents

A si insolents que lon ne peut plus durer à eux,

Quand la Fortune a leurs maisons rendues
En des grandeurs qu'ils n'auoient attendues.

Clitus pour auoir mis à fond trois ou quatre galeres des Grecs pres d'Amorges, se fait appeller Neptune, & porta le Trident: Demetrius à qui la fortune auoit donné vn petit lambeau de l'Empire d'Alexandre, se laissoit appeller Iupiter: & quand on enuoyoit deuers luy, on n'appelloit pas les députez Ambassadeurs, mais Theores, qui sont ceux que lon eslit pour aller enquerir quelque chose de l'oracle des Dieux: aussi ses responses s'appelloient Oracles. Et Lyfimachus ayant occupé la Thrace, qui estoit comme vne petite lisiere de son Empire, monta en telle superbe, & arrogance si insupportable, qu'il osa bien dire, Les Byfantins viennent maintenant à moy, quand ie touche du bout de ma lance au ciel. A laquelle parole se trouuant present Pasiades Byfantin, ne se peut tenir qu'il ne dist aux assistans, Retirons nous de bonne heure, de peur que cestuy-cy ne perce le ciel du fer de sa lance. Mais quel besoing est-il d'alleguer ceux-là, ausquels encore estoit-il aucunement loisible d'auoir les cœurs & les esprits éleuez, d'autant qu'ils auoient esté soudars d'Alexandre? veu qu'un Clearchus s'estant fait tyran de la ville de Heraclée, porta en sa deuise, la Foudre, & appella l'un de ses enfans le Tonnerre: & Dionysius le ieune s'appella luy mesme le fils d'Apollo, par vne telle inscription,

Doris la Nymphé aux beaux yeux est ma mere,
Qui me conceut de Phebus le mien pere.

Et son pere qui auoit fait mourir dix mille de ses citoyens, si non plus, qui par enuie auoit trahy son propre frere aux ennemis, qui n'auoit pas eu la patience d'attendre peu de iours que sa mere auoit à suruiure, ains la fait estouffer toute vieille qu'elle estoit, & qui auoit luy-mesme escrit en vne Tragédie,

La tyrannie est mere d'iniustice,

C ce neantmoins de trois filles qu'il auoit, il en nomma la premiere Vertu, la seconde Temperance, & la tierce Iustice. Les autres se sont surnommez les vns Bienfaiteurs, les autres Victorieux, les autres Sauueurs, & les autres Grands. Au demourant qui seroit celuy qui pourroit fournir à expliquer de paroles leurs nopces les vnés sur les autres, passans les iours entiers parmy grand nombre de femmes, comme les estalons parmy vn troupeau de iumens, violemens de ieunes filles, frottemens en bains & estuues meslez d'hommes & de femmes, passer les iours entiers à iouer aux dez, sonner de la fleute en pleins Theatres, les nuicts à souper, & les iours tout du long à disner? Alexandre au contraire disnoit dès le matin assis, & ne souppoit qu'il ne fust le soir: il faisoit bonne chere & beuuoit apres qu'il auoit sacrifié aux Dieux, il iouoit aux dez chez Medius ayant la fiebure, il passoit son temps, & iouoit en allant par les champs, en apprenant ensemble à tirer de l'arc, à descendre & remonter en son chariot courant. Il espousa Roxane seule par amour & pour luy, mais Stira la fille de Darius pour le royaume & pour ses affaires, pource qu'il estoit expedient de mesler les nations: & quant à toutes les autres Dames de Perse, il en fut autant vainqueur par temperance, comme des hommes Perses par vaillance: car il n'en veit iamais vne contre sa volonté, & celles qu'il vid, il en fit moins de compte que de celles qu'il ne vid oncques: & là où il estoit gracieux à toutes autres sortes de gens, il se monstroient rebours à ceux qui estoient beaux. Quant à la femme de Darius qui estoit vne fort belle Dame, il ne voulut pas seulement ouyr vn qui luy en loüoit la beauté, & quand elle fut trespassee, il en honora si hautement les obseques, & la plora si tendrement, que son humanité fait mescroire sa continence, & sa bonté en fut suspecte d'iniustice: car Darius fut esmeu de prime-face à ceste deffiance, tant pource qu'il estoit ieune, que pource qu'il auoit sa femme en sa puissance,

De la fortune ou vertu d'Alexandre.

estant aussi luy vn de ceux qui s'estoient persuadez, qu'Alexandre estoit ainsi venu E
au dessus de ses affaires par le benefice de la fortune : mais quand il en sceut la verité,
" apres en auoir fait diligente enqueste de tous costez, Tout ne va doncques, dit-il, en-
" core pas mal pour les Perfes, & ne nous reputera-lon pas du tout lasches & effeminez
" pour auoir esté vaincus par tel aduersaire. Quant à moy ie prie aux Dieux qu'ils
" m'enuoyent heureux succès, & en fin la victoire de ceste guerre, à fin que ie puisse
" aussi surmonter Alexandre en beneficence : car i'ay vne émulation & ialousie de me
" monstrier encore plus bening enuers luy, que luy enuers moy. Mais si c'est fait que de
" moy & de ma maison, ie te supplie Iupiter protecteur de l'Empire des Perfes, & vous
" Dieux tutelaires des Roys & des royaumes, que vous ne permettiez qu'autre qu'Ale-
" xandre seye au siege & throne royal de Cyrus. Cela estoit comme vne adoption
d'Alexandre, faicte en la presence des Dieux. Voyla comme on gaigne la victoire
par vertu. Attribue si tu veux la iournée d'Arbeles, la bataille de la Cilicie à la for-
tune, & autres tels exploicts qui procederent de force & de guerre. Ce fut la fortune F
qui luy esbranla la ville de Tyr, qui luy ouurit l'Ægypte : par le benefice de fortune
Halicarnassus tomba, Milet fut prise, Mazeus laissa le riuage de l'Euphrates despro-
ueu, & fut toute la campagne de Babylone couuerte de corps morts : mais ce n'a
point esté la fortune qui l'a rendu temperat, il n'a point esté continent par le moyen
de la fortune : la fortune ne gardoit point son ame enfermée dedans son corps, com-
me dedans vne forteresse inexpugnable aux voluptez, & non approchable aux cu-
piditez, & toutefois c'estoit ce dequoy plus il vainquoit la personne propre de Da-
rius : le reste estoit desconfiture d'armes & de cheuaux, batailles, meurtres, occisions,
& fuittes d'hommes : mais la plus grande desfaiete, moins refutable, & à laquelle ce-
da le plus Darius, ce fut la vertu, la magnanimité, & la iustice, admirant son cœur
inuincible de volupté, de trauail, & de liberalité, plus que nulle autre chose. Car
quant aux piques & pauois, escus & lances, aux alarmes & choc des batailles, aussi
bien estoit asseuré Tarrias fils de Dinomenes, & Antigenes de Pelle, & Philotas fils G
de Parmenion, mais alencontre des voluptez, des femmes, de l'or & de l'argent, ils
n'estoient de rien meilleurs ne plus vaillans que des esclauues : car Tarrias alors qu'A-
lexandre paya les debtes de tous les Macedoniens, & satisfeut à tous ceux qui leur
auoient presté de l'argent, feignit en auoir emprunté, & amené au bureau, où s'en
tenoit le compte, vn qu'il disoit estre son creancier, & depuis estant adueré & con-
uaincu que c'estoit chose faulse & supposée, il s'en cuida desfaire luy-mesme, si Ale-
xandre, en estant aduertí, ne luy eust remis & pardonné ceste faute, & permis qu'il
retint la finance qui pour luy auoit esté fournie & payée à faulses enseignes, se sou-
uenant que lors que son pere Philippus assiegeoit la ville de Perinthe, il auoit re-
ceu vn coup de fiesche dedans l'œil, & ne voulut oncques bailler à penser son œil ny
à tirer la fiesche, que premier les ennemis ne fussent tournez en fuitte. Et Antige-
nes s'estant faict enroller entre ceux que lon renuoyoit en la Macedoine, pour occa- H
sion de maladie ou de quelque mutilation de membre : quand il fut depuis trouué
qu'il n'auoit mal aucun, & qu'il contrefaisoit le malade, luy qui estoit homme de
guerre, ayant le corps tout cicatricé de coups, Alexandre en fut mal-content, & luy
demanda la cause pourquoy il le faisoit : il luy confessa que c'estoit pource qu'il estoit
amoureux d'une ieune femme nommée Telefippa, & qu'il auoit intention de la fuy-
re iusques à la coste de la mer, ne pouuant demourer esloigné d'elle. Alors luy de-
manda Alexandre à qui estoit ceste femme, & à qui il en falloir parler pour la faire
demourer. Antigenes luy respondit, qu'elle estoit de franche & libre condition.
Il faut donc, dict Alexandre, que nous luy persuadions à force de luy donner & pro-
mettre, qu'elle vueille demourer avec nous, car de la forcer nous ne pouuons. Ainsi
pardonnoit-il à tous l'amour, & le concedoit, fors qu'à soy-mesme. La cause primi-
tiue du

A tiue du malheur de Philotas le fils de Parmenion fut aucunement son intemperance: car il y auoit vne ieune femme natifue de la ville de Pella, laquelle auoit esté prise entre les autres prisonniers au saccagement de la ville de Damas, où elle auoit parauant esté amenée par Autophradates qui l'auoit surprise sur mer, ainsi comme elle natifguoit de la coste de Macedoine en l'isle de Samothrace: elle estoit assez belle de visage, & auoit tellement espris de son amour Philotas depuis qu'il s'estoit approché d'elle, qu'encore qu'il fust vn homme de fer, elle l'amollit & destrempa, de sorte que le pauvre homme au milieu de ses plaisirs ne fut pas maistre de son iugement, ains ouurant son cœur en laissa sortir beaucoup de secrets à la cognoissance d'elle.

B Qu'eust-ce esté, disoit-il, de Philippus sans Parmenion? Et que seroit-ce encore de cest Alexandre mesme sans Philotas? Où seroit son Iupiter Ammon? Où seroient ses serpens si nous ne voulions? Antigone rapporta ces paroles à quelque femme de ses familières, & celle-là les rapporta à Craterus, & Craterus amena Antigone mesme à Alexandre secrettement. Alexandre se garda bien de luy toucher, ains s'en absteint, mais sondant Philotas par le moyen d'elle, il le descouurit entierement tel qu'il estoit plus de sept ans depuis: mais en tout ce temps-là, iamais en quelque festin qu'il fust, ne quelque bonne chere qu'il feist, luy que l'on accuse d'auoir esté yron- gne, n'en donna aucune suspicion, ny en courroux, luy qui estoit cholere, ny à son amy Hephestion, luy qui luy fouloit fier & commettre tout: car on dict que vn iour ayant ouuert vne missiue secrette de sa mere, & la lisant en soy-mesme, Hephestion approchant tout doucement sa teste, la leut quant & luy: il n'eut pas le cœur de luy defendre de la lire, mais apres luy auoir laissé lire, il tira son anneau de son doigt & luy en scella la bouche. Brief on se lasseroit de dire, qui voudroit entreprendre de reciter au long tous les beaux exemples par lesquels on pourroit monstrier, qu'il a vŕé tres-honnestement & tres-royalement de la grandeur de sa puissance, de sorte qu'encore que l'on dist qu'il a esté grand par le benefice de la fortune,

C il en est tant plus grand, qu'il a bien & sagement ŕeu vŕer d'elle. Ce nonobstant ie veux venir au commencement de son accroissement & à l'entrée de sa puissance, & considerer quel acte de la fortune il y a eu là, pour lequel ils puissent dire & maintenir qu'Alexandre a esté grand par la fortune. Comment doncques est-ce, ie vous prie au nom des Dieux, qu'elle ne l'a colloqué dedans le throne de Cyrus sans coup frapper, sans sang espandre, sans estre nullement blessé, sans aucune expedition d'armes, par le hennissement d'un cheual, comme elle auoit faict au parauant le premier Darius fils de Hyŕaspes: ou bien vn mary gagné par les flatteries de sa femme, comme Darius feit Xerxes flatté par sa femme Atossa: ou bien le diadème royal de luy-mesme venu à sa porte, comme il feit à Darius le second, par le moyen de l'Eunuque Bagoas, lequel ne feit que changer son hocqueton de courrier, & se vestir du manteau royal, & prendre le turban à la poincte droicte, qui s'appelle Cittaris, &

D ainsi soudainement sans y auoir pensé, par le benefice du sort & de la fortune il se trouua Roy de la terre, ne plus ne moins que par le sort on eslit à Athenes les officiers qui s'appellent Thesmothetes & Archontes. Voulez vous ŕeŕaŕoir comment les hommes viennent à estre Roys par la fortune? Cest exemple le vous enseignera. La race des Heraclides, c'est à dire, des descendans de Hercules, faillloit en la ville d'Argos, de laquelle ils auoient de tout temps accoustumé d'essire leurs Roys: & comme ils eussent enuoyé deuers l'oracle d'Apollo, enquerir & demander ce qu'ils auoient à faire, l'oracle leur respondit, qu'un aigle le leur enseigneroit. Peu de iours apres il apparut en l'air vn grand aigle, lequel fondant se vint poser sur la maison d'un nommé Egon, & ainsi fut Egon pris pour Roy. Encore vn autre. Celuy qui regnoit en la ville de Paphos, fut d'aduenture trouué meschant, iniuste & violent: à l'occasion dequoy Alexandre le deboutta de la royauté, & en cherchoit vn autre qui

De la fortune ou vertu d'Alexandre,

fust de la race & famille des Cinyrades qui s'en alloit defaillant. On luy diſt qu'il n'y **E**
en auoit plus qu'un ſeul pauvre homme, dont on ne faiſoit compte quelconque, qui
ſe tenoit en un iardin, là où il viuoit fort pauurement. On y enuoya incontinent
pour le chercher: & ceux qui eurent ceſte commiſſion, le trouuerent là, où il tiroit de
l'eau pour arroſer des porreaux: ſi fut tout troublé & effroyé quand les ſoudards le
vindrent prendre, & luy dire qu'il vint parler à Alexandre. Ainſi eſtant amené en ſa
chicquenie de toile, il fut là déclaré Roy de Paphos, & luy donna lon ſur le champ
vne robbe de pourpre, & fut l'un de ceux que lon appelle les mignons du Roy. celui
là s'appelloit Alynomus. Voila comment la Fortune faiſt les Roys ſubitement &
facilement, en leur changeant de robbes, & leur muant leur nom ſeulement, ſans
que ils y penſent, ne qu'ils s'y attendent. Mais Alexandre qu'a-il iamais eu de grand
qu'il n'ait merité? Que luy eſt-il adueni ſans ſueur, ſans ſang eſpandu? Qu'a-il eu
gratuitement, qu'a-il eu ſans trauail? Il a beu és riuieres taintes de ſang, il en a paſſé
par deſſus des ponts de corps morts, il a mangé de l'herbe la premiere qu'il a peu ren- **F**
contrer pour la famine: il a deſcouuert des peuples ſubmergez en des profonds mon-
ceaux de neiges, & des villes enfouyes dedans la terre: il a nauigué la mer qui luy
faiſoit la guerre, en paſſant par les ſablons ſans eaux des Gedroſiens & Arrachofiens:
il veit pluſtoſt en la mer qu'en la terre des herbes & des plantes. Que ſ'il eſtoit loi-
ſible de adreſſer ſa parole à la Fortune comme à vne perſonne, pour la deſenſe d'A-
lexandre, ne luy diroit-on pas, Où & quand eſt-ce que tu as dreſſé le chemin aux af-
faires d'Alexandre? quelle fortereſſe a-il iamais priſe ſans ſang eſpandre par ta faueur?
Quelle ville luy as-tu fait rendre ſans garniſon, quelle armée ſans armes? Quel Roy a
il trouué pareſſeux? Quel Capitaine negligent, ou portier endormy, ou riuiere paſſa-
ble à guay, ou hyuer moderé, ou eſté ſans douleur? Va t'en, retire toy deuers Antio-
chus fils de Seleucus, à Artaxerxes frere de Cyrus, à Ptolomeus Philadelphus: ceux
là ont eſté declarez & couronnez Roys par leurs peres encore viuans: ceux-là ont **G**
gagné des batailles, pour leſquelles on ne ietta oncques larmes d'œil: ceux-là n'ont
faiſt autre choſe toute leur vie que feſtes & ieu de batteaux és theatres: chaſcun de
ceux-là vieillit regnant en toute proſperité, là où, quand il n'y auroit autre choſe, le
corps d'Alexandre fut detaillé de bleſſeures depuis la teſte iuſques aux pieds, & mou-
lu de coups qu'il receut des ennemis

A coups de traiſt, d'eſpée & de cailloux,

Sur la riuere du Granique ſon armet luy fut fendu d'un coup d'eſpée iuſques aux
cheueux: deuant la ville de Gaze il eut l'eſpaule percée d'un coup de traiſt: au pays
des Maragadiens il eut l'os de la iambe faulſé & eſclaté d'une fleſche, de maniere que
l'os du fuzeau en ſortoit par la playe: en Hyrcanie il receut un coup de pierre ſur le
col, duquel la veuë luy fut obſcurcie, tellement que pluſieurs iours durant on fut en
crainte qu'il en perdift la veuë du tout: contre les Affacaniens il eut le talon rompu
d'un coup de traiſt Indien, là où ſe tournant deuers ſes flatteurs en riant, C'eſt (dit-il) **H**
ſang cela, leur monſtrant ſa playe,

Non pas l'humeur qui coule & flue aux Dieux.

En la bataille d'Iſſus la cuiſſe luy fut percée d'un coup d'eſpée, ainſi comme eſcrit
Chares, par le Roy Darius meſmes qui vint aux priſes avec luy. Et Alexandre luy-
meſme eſcriuant ſimplement & en toute verité à Antipater, Je fus, dit-il, bleſſé d'un
coup d'eſpée en la cuiſſe, mais graces aux Dieux il ne m'en eſt adueni aucun incon-
uenient, ny ſur l'heure, ny depuis. Contre les Malliens il eut un coup de traiſt de
deux coudées de long, qui faulſant ſa cuiraffe à trauers la poitrine, vint ſortir au long
du col, ainſi comme Ariſtobulus a laiſſé par eſcrit. Ayant paſſé la riuere de Tanais
pour aller contre les Scythes, & les ayant deſfaicts en bataille, il les chaſſa & pour-
ſuyuit par l'eſpace de bien neuf ou dix lieues, ayant un flus de ventre. Vrayement
Fortune

- A** Fortune, tu augmentes bien Alexandre, tu le fais bien grand, en le perceant de tous costez, en le sappant par le pied, en luy ouurant toutes les parties de son corps, non comme faisoit Pallas, qui destournoit avec la main les traicts des ennemis, & leur faisoit donner aux plus forts endroits des armes de Menelaus, dedans le corps de la cuirasse, ou dedans l'armet, ou sur le baudrier: & si le coup venoit à penetrer iusques au corps, elle en diminuait de la roideur, iusques à en faire couler par maniere d'acquit vn peu de sang: mais au contraire baillât aux coups les parties d'agereuses toutes nues & descouuertes, faisant penetrer les traicts à trauers les os, enuironnant son corps tout à l'enuiron, assiegeât ses yeux & ses pieds, empeschât qu'il ne poursuuyist ses ennemis, diuertissant ses victoires, ruynant ses esperances. Quant à moy, il me semble qu'il n'y eut oncques Roy qui eust la fortune plus rebourse ny plus aduerfaire, combien qu'elle ait esté dure & enuieuse à plusieurs autres: car elle les a destruits & perdus tout à vn coup comme vne foudre: mais alencontre d'Alexandre sa haine & son inimitié fut opiniastre, obstinee & implacable, comme contre Hercules: car quels geants, quels Typhons, & hommes de grandeur monstrueuse n'a elle suscité à combattre contre luy? Quels ennemis n'a elle fortifiez & munis de quantité grande d'armes, de profondes riuieres, de rochers coupez, ou bestes de force & courage étrange? Que si le courage d'Alexandre n'eust esté grand, & qu'il ne fust party d'vne vertu grande, appuié & fondé sur icelle alencontre de la fortune, ne se fust il pas à la fin ennuyé & lassé de tant dresser de batailles, de tant porter de harnois, de tant assieger de villes, tant chasser & poursuure d'ennemis, de tant de rebellions, tant de trahisons, tant de souleuements de peuples, tant de Roys qui secouoient le ioug, de domter les Bactriens, les Maragandiens, les Sogdianiens, nations infideles, qui ne faisoient que espier l'occasion de luy iouer vn mauuais tour, qui estoit autant comme couper la teste du serpēt Hydra, qui reiettoit & reuerdissoit tousiours à remettre sus nouvelles guerres? Je diray vne chose qui semblera estrange, mais elle est vraye pourtant. C'est
- C** par fortune qu'Alexandre depuis n'agueres a perdu l'opinion que lon auoit qu'il fust fils d'Ammon: car qui fut oncques hōme extraict de la semēce des Dieux, qui exectast de plus laborieux, plus dangereux & plus difficiles combats? si ce n'a esté le fils de Iupiter, Hercules, mais encore estoit-ce par ce qu'vn homme outrageux & violent luy commandoit d'aller prendre des lions, poursuure des sangliers, chasser des oyseaux, à fin qu'il ne s'occupast à plus grandes choses, en allant par le monde punir des Antēes, & faire cesser les meurtres ordinaires que commettoit le tyran Busiris: mais il n'y eut que la vertu seule qui commanda à Alexandre d'aller exploiter vn combat digne d'vn grand Roy, duquel la fin estoit, non l'or porté par tout apres luy sus dix mille chameaux, ny les delices de la Medie, ny les tables friandes, ny les belles Dames, ny les bons vins de Calydoine, ny les poissons de la mer Caspiene, ains de rendre tout le monde gouuerné par vn mesme ordre, obeissant à vn mesme Empire,
- D** & réglé par vne mesme façon de viure, ayant ce desir né & nourry & accru dès son enfance quant & luy. Il vint des ambassadeurs du Roy de Perse deuers son pere Philippus, lequel n'estoit pas pour lors au pays, & Alexandre les festoyant & caressant ne leur feit point de demandes pueriles, comme les autres, touchant vne vigne d'or & touchant les iardins suspendus de Babylone, ny quels habillements portoit le Roy: ains tous ses propos furent des choses qui sont les plus importantes en vn Empire, les enquerant combien de gens de guerre entretenoit le Roy, en quel endroit de la bataille il se mettoit quād il falloit combattre, ne plus ne moins qu'Vlysses en Homere,

En quel lieu sont ses cheuaux & ses armes?

quel chemin estoit le plus court pour ceux qui vouloient aller de la coste de la mer Mediterranee aux prouinces hautes: de maniere que ces ambassadeurs estrangers en demourerent tous esbahis, & dirent, que cest enfant estoit le grand Roy, & le leur

De la fortune ou vertu d'Alexandre,

estoit le riche. Si tost que son pere fut trespasé, son cœur le conuioit de passer incontinent le destroiët de l'Hellespont, & estoit tout apres & d'esperance & d'appareil à mettre le pied en l'Asie: mais la fortune s'opposa à ses desseings, qui le destourna & le retira en arriere, l'embrouillant de mille troubles & trauerfes pour l'arrester & retenir. Premièrement elle suscita les nations barbares qui luy estoient voisines, luy brasant la guerre contre les Esclauons & contre les Triballiens, & iusques aux Tartares qui habitent le long de la riuere de Danube, qui le retirerent & diuertirent de l'entreprise d'aller faire la guerre és hauts pays de l'Asie: toutefois apres auoir couru par tout, & assopy tous ces mouuements-là, avec perils tresgrands, & tresdangereuses batailles, il se remeit de rechef à auancer & haster son passage: mais la fortune de rechef luy attira la ville de Thebes, & luy meit au deuant la guerre des Grecs, & vne calamiteuse necessité de guerroyer pour se venger à feu & à sang des peuples de mesme origine & de mesme nation que luy, dont l'yssue fut fort miserable. Cela fait, il passa à la fin ayant prouision de viures & d'argent, comme escrit Philarchus, seulement pour trente iours, ou comme dit Aristobulus, quarante & deux mille escus seulement, ayant distribué & donné à ses amis & familiers la plus part de son domaine, excepté Perdiccas, qui ne voulut rien prendre de ce qu'il luy presenta, ains luy demanda, Mais pour toy Alexandre, que te reserues-tu? Comme il luy eust respondu, l'Esperance: le veux doncques aussi y participer: car il n'est pas iuste que nous prenions le tien, ains que nous attendions celui de Darius. Quelles estoient doncques les esperances sur lesquelles Alexandre passoit en Asie? Ce n'estoit point vne puissance mesuree à nombre grand de grosses & riches villes: ce n'estoit point des flottes de vaisseaux nauiguans à trauers les montaignes: ce n'estoit point des foïets ny des fers à mettre aux pieds des prisonniers presumptueux & furieux instruments de la folie des Barbares qui en pensoient chastier la mer: mais quant à ce qui estoit hors de luy, vne grande volonté de bien faire, en vne petite armee bien trouffée, vne emulation d'honneur entre les ieunes gens de mesme aage, contention de vertu & de gloire entre les mignons du Roy: mais ses plus asseurees esperances estoient en luy mesme, en deuotion enuers les Dieux, fiances en ses amis, suffisance de peu, continence, beneficence, mespris de la mort, magnanimité, humanité, entretien gracieux, facile accès, vn naturel franc, non simulé ne fainët, constance en ses conseils, promptitude en ses executions, vouloir d'estre le premier en gloire, & resolution de faire tousiours ce que le deuoir commande. Car Homere ne composa point bien ny comme il falloit de trois images la beauté d'Agamemnon, comme celle d'un parfait prince,

De chef semblable il estoit, & des yeux,
A Iupiter le haut-tonnant és cieux,
Des reins à Mars, & de large poitrine
Au souverain seigneur de la marine.

Mais le naturel d'Alexandre, si Dieu qui le fait naistre, le forma & composa de plusieurs vertus, ne pourrions nous pas à la verité dire, qu'il luy donna le courage de Cyrus, la temperance d'Agésilas, l'entendement aigu de Themistocles, l'experience de Philippus, la hardiesse de Brasidas, & la suffisance de Pericles en matiere d'estat & de gouuernement? Et des plus anciens il fut plus continent que Agamemnon, qui prefera vne prisonniere captiue à sa femme legitime, & luy ne voulut oncques toucher à vne captiue, que premierement il ne l'eust espousée: plus magnanime qu'Achilles, qui pour vn peu de finance vendit le corps mort d'Hector, & luy despendit grande somme de deniers à inhumer celui de Darius: & l'autre à fin d'appaiser sa cholere prit, comme vn mercenaire, pour son loyer, des presens de ses amis, & cestuy-cy victorieux enrichit ses ennemis. Il estoit plus religieux que Diomedes, qui estoit prest de combattre les Dieux mesmes: & luy estimoit, que toutes ses victoires

- A etoires & succès heureux luy venoient de la faueur des Dieux. Il estoit plus charitable à ses parents, qu'Vlysses, duquel la mere mourut de douleur: là où la mere de son ennemy, pour l'amour & bien vueillance qu'elle luy portoit, mourut de regret quant & luy. Brief si ç'a esté par fortune que Solon a estably le gouuernement d'Athenes, que Miltiades a conduit les armées: ç'a esté du port & faueur de la fortune que Aristides a esté iuste: il n'y a doncques œuvre quelconque de la vertu, & n'est rien sinon vne parolle & vn nom vain, qui passe avec quelque reputation par la vie des hommes, estant feinct & controuué par les Sophistes & par les Legillateurs. Mais si chacun de ces personnages-là a bien esté pauvre ou riche, fort ou foible, beau ou laid, de longue ou de courte vie par le moyen de la fortune, & se sont faicts ou grands capitaines, ou grands legillateurs, ou grands gouuerneurs, & bien entendus en l'exercice de la iustice & en toute matiere d'estat par leur vertu, & par la raison qui estoit en eux: considerez vn peu quel a esté Alexandre, en le comparant &
- B parangonnant à tous ceux-là. Solon establit à Athenes abolition de toutes debtes, qu'il appella Sifachthia, qui est autant à dire comme, descharge de fardeau: & Alexandre paya aux creanciers les debtes que ses souldars auoient faites. Pericles ayant taillé les Grecs, de l'argent qui ptouint de celle taille orna la ville d'Athenes de beaux temples, mesmement le chasteau: au contraire Alexandre, ayant pris les finances des barbares, en enuoya en la Grece iusques à la somme de six millions d'or, pour en faire bastir des temples aux Dieux, au lieu de ceux qu'ils auoient demolis. Brasidas acquit grande reputation de vaillance parmy les Grecs, pour ce qu'il trauerfa de bout à autre le camp des ennemis campez deuant la ville de Methone le long de la marine: là où le fait merueilleux que feit Alexandre en la ville des Oxydraques, à ceux qui l'oyent raconter est incroyable, & à ceux qui le veirent effroyable, quand il se jetta du haut des murailles au milieu des ennemis, qui le reçurent à coups de traict, de picques & d'espees: à quoy pourroit-on comparer ce faict-là, sinon à vn
- C feu de la foudre qui sort avec impetuosité de la nue, & estant porté par le vent vient fondre en terre, ne plus ne moins qu'un fantasme reluyfant d'armes flammantes? tellement que ceux qui le veirent sur l'heure, en eurent si grand effroy, qu'il se tirent en arriere: mais puis apres quand ils veirent que c'estoit vn homme seul qui se ruoit sur plusieurs, alors ils retournerent pour luy faire teste. Là monstra bien la fortune des grandes & claires preuues de la bien-vueillance qu'elle portoit à Alexandre, quand elle le ietta & enferma en vn lieu ignoble & barbare, enuironné tout alentour de hautes murailles: & puis quand ceux de dehors se hastans pour le secourir planterent leurs eschelles contre les murailles pour y monter, elle feit rompre les eschelles, & precipita par terre ceux qui estoient ja demy montez: & des trois qui peurēt atteindre iusques au haut, & se ietterent à bas pour secourir leur Roy, elle en raut incontinent l'un & le feit tuer deuant luy, l'autre fut si couuert de coups de traict & de dard, qu'il ne s'en falloit, qu'il ne fust mort, autre chose, sinon qu'il voyoit & sentoient encore: & cependant que les Macedoniens au dehors accouroient en vain celle part avec grands cris, n'ayans ny artillerie, ny engin quelconque à battre les murailles, & les frappans seulement de leurs espees nues, tant ils auoient d'ardente enuie de l'aller secourir, & les rompsans à belles mains, voire par maniere de dire s'efforceans de les manger à belles dents. Et l'heureux Roy ce pendant qui estoit tousiours gardé & accompagné de la fortune, se trouua pris comme vne beste sauuage dedans les toiles, abandonné seul, sans ayde ne secours, non pour prendre la ville de Suse ou celle de Babylone, ny pour cōquerir la prouince de Bactra, ou pour saisir le grand corps de Porus: car aux grands & illustres combats, encore que la fin n'en soit pas heureuse: pour le moins si n'y a-il point d'infamie: mais la fortune fut si maligne & si enuieuse, en son endroit, & tant fauorable aux barbares, & contraire à Alexandre, que non

De la fortune ou vertu d'Alexandre,

seulement elle s'efforcea de luy faire perdre le corps & la vie, mais aussi son honneur **E**
& sa gloire, tant qu'il estoit en elle : car s'il fust demouré mort estendu au long de la
riuiere d'Euphrates, ou de celle d'Hydaspes, il n'y eust point eu de desastre indigne:
& ne luy eust point esté de deshonneur quand il vint aux prises avec Darius, s'il
eust esté là massacré des cheuaux, des espees, & des haches des Perles combattans
pour l'Empire, ny estant monté sur les murailles de Babylone s'il en fut trespuché, &
decheu d'une grande esperance. ainsi moururent Pelopidas & Epaminondas, & fut
leur mort plus tost acte de vertu, qu'accident de malheur, taschant à executer de si
grandes choses. Mais quant à la fortune que nous examinons maintenant, quel
œuvre fut-ce? En vn lointain pais barbare le long d'une riuiere, dedans les murailles
d'une meschante villette enfermer & cacher le Roy & souverain Seigneur de la terre
habitable, pour illec le faire perir par les mains & armes honteuses d'une multitude
barbaresque, qui le massacroient & tiroient avec bastons & traits les premiers ren-
contrez: car il fut blessé en la teste d'un coup de hache à trauers son armet, & sa cui-
rassse luy fut faulsee d'un coup de fiesche, dont le fust pendoit au dehors, & le fer lar- **F**
ge de trois doigts, & long de quatre, luy demoura fiché dedans les os qui sont
au deffous de la mammelle. Et pour le comble de l'indignité, il se defendoit par
deuant, & celui qui luy auoit tiré le coup de trait s'estant ozé approcher l'espee au
poing pour le cuyder acheuer, il le tua à coups de dague: mais cependant vn autre
accourant d'un moulin luy donna par derriere vn coup de pilon sur l'eschignon du
col, dont il tomba pasmé, ayant perdu tout sentiment: mais la vertu luy assistoit, qui
luy donnoit vn cœur assuré, & à ses gens la force & diligence de le venir secourir:
car vn Linneus, vn Leonnatus, vn Ptolomeus, ayants rompu la muraille, ou bien
monté par dessus, se meirent au deuant de luy, & luy seruient d'un rampar & mu-
raille de vertu, iettans leurs corps, leurs faces & leurs vies au deuant, pour l'amour &
bien-veillance qu'ils portoient à leur Roy: car ce n'est point par fortune qu'il y a des
personnes qui s'exposent volontairement à la mort, ains par amour de la vertu, ne
plus ne moins que les abeilles par aiguillons d'amour naturelle s'approchent touf- **G**
jours & s'attachent à leur Roy. Qui dōcques eust esté en lieu, où il eust peu voir à son
aise sans danger ce spectacle-là, n'eust-il pas dit, qu'il eust veu vn grand combat de la
fortune alencontre de la vertu: auquel les barbares par le moyen de la fortune auoient
le dessus plus qu'ils ne meritoient, & les Grecs par leur vertu resistoient plus qu'ils ne
pouuoient: & que si ceux-là auoient du meilleur, c'estoit œuvre de fortune & de
quelque esprit maling & enuieux: & si ceux-cy venoient au dessus, c'estoit la vertu,
la hardiesse, la foy & l'amitié qui emportoient la victoire, car il n'y auoit que cela
qui accompagnaist en ce lieu-là Alexandre: & quant au reste de ses forces, de son ar-
mee, de ses cheuaux, & de ses vaisseaux, la fortune auoit mis la muraille de ceste mes-
chante bourgade-là entre deux. Les Macedoniens à la fin desfeirent les barbares, &
sur eux abbattirent & raserent leur ville: mais tout cela ne seruoit de rien à Alexan- **H**
dre, car on l'emporta viftement avec le trait qu'il auoit en l'estomac portant la guer-
re dedans ses entrailles, & estoit le trait comme vn clou ou vne cheuille, qui tenoit
sa cuirassse attachee à son corps: car si lon s'efforçoit de l'arracher de la playe comme
de la racine, le fer ne venoit pas quant & quant, estant fiché bien auant dedans les os
de la poitrine, qui sont au deuant du cœur, & n'ozoit-on fier ce qui pendoit dehors
de la canne, pour ce que lon craignoit que par ce secoüement l'os ne se fendist dau-
tage, qui luy causast des douleurs extremes, & qu'il n'en sortist du fond vne grande
effusion de sang. Au moyen dequoy luy voyant ceste grande doubte & longue de-
meure de ses gens, essaya de couper avec sa dague le fust de la canne tout rasibus de la
cuirassse, mais sa main n'eut pas la force, estant preuenue & saisie d'une pesanteur en-
dormie & amortie, qui procedoit de l'inflammation de sa playe: si commanda à ses chi-
rurgiens

A ruriens d'y mettre la main hardiment, encourageant, tout blessé qu'il estoit, ceux qui estoient sains & entiers, & disoit iniure à ceux qu'il voyoit plore & se laméter appelloit les autres traistres qui n'ozoient pas le secourir, & crioit apres ses familiers & ses mignôs, Nul ne se môstre lasche & coïard, non pas pour ma vie mesme: le ne scaurois pen ser que lon croye que ie ne craigne point la mort, si lon la craint pour moy.

De Isis & d'Osiris.



B E S hommes sages, ô Clea, doiuent en leurs prieres demander tous biens aux Dieux: mais ce que plus nous desirons obtenir d'eux, c'est la cognoissance d'eux mesmes, autant comme il est loisible aux hommes d'en auoir, pour ce qu'il n'y a don ne plus grand aux hommes à receuoir, ne plus magnifiqué & plus digne aux Dieux à donner, que la cognoissance de verité: car Dieu donne aux hommes toutes autres choses dont ils ont besoing, mais celle-là il la retient pour luy mesme & s'en fert: & n'est point bienheureux pour posseder grande quâtité d'or ny d'argent, ny puissant pour tenir le tōnerre & la foudre en sa main, mais bien pour sa prudence & sapience: & est vne des choses qu'Homere a le mieux & le plus sagement dictes, en parlant de Iupiter & Neptune,

Ils sont tous deux de mesme extraction,
Et tous deux nez en mesme region,
Mais Iupiter en est le fils aîné,
Et de scauoir plus grand que l'autre orné.

C Il afferme que la preference & precedence de Iupiter estoit plus venerable & plus digne en ce qu'il estoit plus scauant & plus sage. Et quant à moy i'estime que la beatitude & la felicité de la vie eternelle, dont Iupiter iouyt, consiste en ce qu'il n'ignore rien, & que rien de tout ce qui se fait ne le fuit: & pense que l'immortalité, qui en osteroit la cognoissance & intelligence de tout ce qui est & qui se fait, ne seroit pas vne vie, mais vn temps seulement. Pourtant pouuons nous dire, que le desir d'entendre la verité est vn desir de la diuinité, mesmement la verité de la nature des Dieux, dont l'estude & le prochas de telle science est comme vne profession & entree de religion, & œuure plus saincte que n'est point le vœu & l'obligation de chasteté, ny de la garde & closture d'aucun temple: & si est d'auantage tresagreable à la Deesse que tu fers, attendu qu'elle est tressage & tresscauante, ainsi comme la deriuation mesme de son nom nous le donne à cognoistre, que le scauoir & la science luy appartient

D plus qu'à nul autre, car c'est vn mot Grec que Isis: & Typhon aussi l'ennemy & aduersaire de la Deesse, enflé & enorgueillly par son ignorance & erreur, dissipant & effaçant la saincte parole, laquelle la Deesse r'assemble, remet sus & baille à ceux qui aspirent à se deifier par vne continuelle obseruance de vie sobre & saincte, en s'abstenant de plusieurs viandes, & se priuant du tout des plaisirs de la chair, pour reprimer la luxure & l'intemperance, & en s'accoustumant de longue main à supporter & endurer dedans les temples des durs & penibles seruices faicts aux Dieux: de toutes lesquelles abstinences, peines & souffrances, la fin est la cognoissance du premier, principal & plus digne obiect de l'entendement, que la Deesse nous inuite & conuie à chercher, estant aupres d'elle & demourant avec elle. Ce que mesme nous promet le nom de son temple, qui s'appelle Ifion, c'est à scauoir l'intelligence & cognoissance ^{ως εισομεν} de ce qui est: comme nous promettant, que si nous entrons dedans le temple & reli- ^{τοι το θεον}

De Isis & d'Osiris.

gion de la Deesse saintement, & ainsi qu'il appartient par raison, nous aurons intel- E
 ligence de ce qui y est. Dauantage plusieurs ont escrit qu'elle est fille de Mercure, les
 autres de Prometheus, dont on reputé l'un inuenteur & auteur de Sapience, & de
 Prouoyance, & l'autre de la Grammaire & de la Musique. Voyla pourquoy en la vil-
 le de Hermoupolis ils appellent la premiere des Muses, Isis & Iustice tout ensemble,
 comme estant sçauante, ainsi qu'il a esté dit ailleurs, & montrant à ceux qui à bon-
 nes enseignes sont surnommez religieux, & portans habits de sainteté & de religiõ,
 & ce sont ceux qui portent & enferment en leur ame, comme dedans vne boiste, la
 sainte parole des Dieux pure & nette, sans aucune curiosité ne superstition, & qui
 de l'opinion qu'ils ont des Dieux, en declarant aucunes choses obscurcies & ombragees,
 & les autres toutes claires & ouuertes, comme encore leur habit saint le mon-
 stre. Et pourtant ce que lon habille ainsi de ces habits saints les religieux Isiaques,
 apres qu'ils sont trespassez, est vne marque & vn signe qui nous tesmoigne, que ce- F
 ste sainte parole est avec eux, & qu'ils s'en sont allez de ce monde en l'autre sans em-
 porter autre chose que ceste parole: car porter longue barbe, ou se vestir d'une gros-
 se cappe, ne font point le philosophe, Dame Clea: aussi ne font pas les vestemens
 de lin, ny la tonsure ou rasure, les Isiaques, ains est vray Isiaque celuy, qui apres
 auoir veu & receu par la loy & coustume les choses qui se montrent, & qui se font
 es ceremonies de ceste religion, vient à rechercher & diligemment enquerir par le
 moyen de ceste sainte parole & discours de raison, la verité d'icelles. Car il y en
 a bien peu entre eux, qui entendent & sçachent pour quelle cause ceste petite cere-
 monie, qui est la plus commune, s'observe, pourquoy les prestres & religieux d'Isis
 razent leurs cheueux, & portent vestemens de lin: & y en a les uns qui du tout ne se
 foucient pas d'en rien sçauoir: les autres disent qu'ils s'abstiennent de porter habillem-
 ent de laine, ne plus ne moins que de manger de la chair des moutons par reueren-
 ce qu'ils leur portent, & qu'ils font razer leurs têtes en signe de deuil, & qu'ils portēt
 habillements de lin à cause de la couleur qu'a la fleur du lin quand il florit, ressem- G
 blant proprement au celeste azur qui enuironne tout le monde. Mais à la verité il n'y
 en a qu'une cause certaine: car il n'est pas loisible ainsi que dit Platon, de toucher
 avec chose sale ce qui est pur & net: or toute superfluité de nourriture & tout excre-
 ment est ord & immonde, & de telles superfluites s'engendrent & se nourrissent
 la laine, le poil, les cheueux & les ongles: si seroit chose digne de mocquerie, que es
 sanctifications & celebrations des diuins offices ils ostassent tout leur poil, en ra-
 zant & polissant vniement tout leur corps de toutes superfluites, & qu'ils vestissent
 & portassent les superfluites des bestes: & faut estimer que quand le poëte Hesiodé
 escriuoit,

Ny au festin d'un public sacrifice
 Offert aux Dieux tu ne feras si nice,
 Que de rongner tes ongles d'un cousteau,
 Couppant le sec d'avec la verte peau:

H

il ne nous vouloit pas enseigner, que pour faire festes & bonnes cheres il falloit estre
 propre & net, mais bien se nettoyer & se purger de telles superfluites, en traittant les
 choses saintes, & faisant le seruice des Dieux. Or le lin naist de la terre, qui est
 immortelle, & produit tout fruit bon à manger, & nous fournit dequoy faire robe
 simple, sobre & nette, qui ne charge point de sa couuerture celuy qui la porte,
 & conuenable à toute saison de l'annee, joint qu'elle n'engendre point de poux nul-
 lement, ainsi que lon dit, dequoy il faudroit discourir ailleurs. Mais les prestres
 haïssent tant la nature de toutes superfluites, que pour cela non seulement ils refu-
 sent à manger toutes sortes de legumages, & entre les chairs celles des brebis & mou-
 tons, & celles des porcs, d'autant qu'elles engendrent beaucoup d'excrements, ains aussi

- A** aussi és iours & œutires de sanctification, ils commandent d'oster mesme le sel des viandes, tant pour plusieurs autres causes & raisons, que pour ce qu'il aiguise l'appetit, & nous prouoque à boire & à manger d'auantage: car de dire ce que disoit Aristagoras, que le sel est par eux reputé immonde, pour autant que quand il se congele, plusieurs petits animaux, qui se treuuent pris dedans, y meurent, c'est vne sottise. On dit mesme qu'ils ont vn puis à part, de l'eau duquel ils abreuent leur bœuf Apis, & qu'ils l'engardent en toute sorte de boire de l'eau du Nil: non qu'ils repurent l'eau du Nil immonde à cause des Crocodiles qui sont dedans, comme quelques vns estiment: car au contraire il n'y a rien que les Egyptiens honnoient tant qu'ils font le fleue du Nil, mais il semble qu'elle engraisse trop, & engendre trop de chair: or ne veulent-ils pas que leur Apis soit par trop gras, ny eux aussi: ains veulent que leurs ames soient estayees de corps legers, habiles & dispos, & non pas que la partie diuine qui est en eux soit opprimee & accablee par le pois & la force de celle qui est mortelle.
- B** En la ville de Heliopolis, qui est à dire la ville du Soleil, ceux qui seruent à Dieu ne portent iamais de vin dedans le temple, comme n'estant pas conuenable qu'ils boient de iour à la veüe de leur Seigneur & leur Roy: & ailleurs les presbtres en boient, mais bien peu, & ont plusieurs purgations & sanctifications où ils s'abstiennent totalement de vin, esquels iours ils ne font autre chose que vacquer à estudier, à apprendre & enseigner les choses saintes: les Roys mesmes n'en beuuoient que iusques à certaine mesure, ainsi qu'il estoit prescrit en leurs escriptures saintes, & commencerent à en boire au Roy Psammitichius, au parauant duquel ils n'en beuuoient du tout point, & n'en offroient point aux Dieux, estimans qu'il ne leur estoit pas agreable, pour ce qu'ils pensoient que ce fust le sang de ceux qui iadis feirent la guerre aux Dieux, duquel mellé avec la terre, apres qu'ils furent renuersez, elle produisit la vigne: c'est pourquoy, disoient-ils, ceux qui s'enyurent perdēt l'entendement & l'usage de la raison, comme estans remplis du sang de leurs predecesseurs. Eudoxus
- C** escrit au second de sa Geographie, que les presbtres d'Aegypte le disent & le tiennent ainsi. Quant aux poissons de mer, tous ne s'abstiennent pas de tous, mais les vns d'autres, comme les Oxyrinchites de ceux qui se prennent avec l'hameçon: car d'autant qu'ils adorent le poisson qui se nomme Oxyrinchos, qui est dire Bec-agu, ils ont doute que l'hameçon ne soit immonde, si d'adventure le poisson Oxyrinchos l'auroit auallé: & les Syenites le Phagre, car il semble qu'il se trouue alors que le Nil commence à croistre, & qu'il leur en signifie la croissance quand il apparoit, dont ils sont fort ioyeux, le tenans pour vn certain messager: mais les presbtres s'abstiennent de tous: & là où le neufiesme iour du premier mois tous les autres habitans d'Aegypte deuant la porte de leurs maisons mangent de quelque poisson rosty, les presbtres n'en tastent aucunement, mais bien en brulent-ils deuant leurs maisons, ayants deux sortes de paroles, l'vne sainte & subtile, laquelle ie reprendray encore en cest endroit, comme estant conforme & conuenable à ce que lon discourt saintement touchant Osiris & Typhon: l'autre vulgaire, grossiere & exposee à tout le monde, qui est representee par le poisson, lequel n'est viande ny necessaire, ny rare & exquise, ainsi que tesmoigne Homere, quand il ne fait les Phœaciens qui estoient gens delicats, friands, & aimans à delicieusement viure, ny ceux d'Ithace hommes insulaires, mangeans en leurs festins du poisson, non pas les gens mesmes d'Ulysses par tout le temps de leur nauigation, qui fut si longue, & par la mer, iusques à ce qu'ils furent réduits à l'extreme necessité: brief ils estiment que la mer ait esté esprainte par le feu hors des bornes de la nature, n'estant ny partie naturelle, ny element du monde, ains chose estrangere, superfluité corrompue, & maladie contre nature: car il n'y auoit rien de fabuleux, ny hors de raison, ny de superstitieux, comme aucuns cuidoient faulxement, qui seruiſt de note & de signe en leurs saintes

De Isis & d'Osiris.

céremones, ains estoient toutes marques qui auoient quelques causes & raisons morales & vtils à la vie, ou bien qui representoient quelque notable histoire, ou bien quelque deduction naturelle, comme ce que lon dit touchant vn Crommyus : car de dire ce que le commun en raconte, que le nourrisson d'Isis nommé Dictys, tomba dedans la riuere du Nil & s'y noya, s'estant pris à des oignons, il n'y a apparence quelconque : mais les prestres haïssent & abominent l'oignon, ayant obserué que iamais il ne croist & ne grossit bien, & iamais ne florit sinon au decours de la Lune, & qu'il n'est conuenable ny à ceux qui veulent ieuner & mener sainte vie, ny à ceux qui veulent celebrer festes : aux vns, pour ce qu'il apporte la soif : aux autres, pour ce qu'il fait plorer ceux qui en mangent. Pour ceste mesme cause reputent-ils la truie beste immonde, d'autant qu'elle se fait couvrir ordinairement au malin quand la Lune commence à defaillir, & que de ceux qui en boient du lait, la peau iette hors ne sçay quelle sorte de lepre & d'asperitez, qui ressemblent au mal de saint Main : & quant au propos que disent ceux qui vne fois en leur vie sacrifient vne truie, & puis la mangent, que Typhon poursuivant vne truie, estant la Lune au plein, il rencontra vn bucher de bois, dedans lequel estoit le corps d'Osiris, & qu'elle le renuersa & esboula, il y a peu de gens qui l'approuent, estimans que ceste fable a esté mise en auant par gens qui auoient mal ouy, & n'auoient pas bien entendu que cela vouloit dire, comme plusieurs autres contes semblables. Mais on tient que les anciens ont eu par le passé en si grande haine & si grande abomination les delices, la superfluité & volupté, qu'ils disent que dedans le temple de la ville de Thebes y auoit vne coulonne quarrée, sur laquelle estoient engraues des maledictions & execrations alencontre du Roy Minis, qui fut le premier qui destourna & retira les Égyptiens d'une vie simple & sobre, sans argent & sans richesses : & dit on aussi que Technatis le pere de Borchoris, en vne guerre qu'il eut alencontre des Arabes, comme son bagage fust demouré derriere, & n'eust peu arriuer à temps, soupa d'une pauvre viande la premiere qu'il peut trouuer, & puis se coucha sur vne paillasse, là où il dormit toute la nuict d'un tresprofond sommeil, à raison dequoy tousiours depuis il ayma la sobriété de vie, & maudit ce Roy Minis : ce que luy ayants loué les prestres de son temps, il fit engrauer lesdictes maledictions & execrations sur la coulonne. Or les Roys s'eslisoient ou de l'ordre des prestres, ou de l'ordre des gens de guerre, pour ce que l'un ordre estoit honoré & reueré pour la vaillance, & l'autre pour la sapience : & celui qui estoit esleu de l'ordre des gens de guerre, incontinent apres son eslection estoit aussi receu en l'ordre de prestrise, & luy estoient communiquez & descouverts les secrets de leur philosophie, qui couuroit plusieurs mysteres souz le voile de fables, & soubs des propos qui obscurément monstroient & donnoient à veoir à trauers la verité, comme eux-mesmes donnent raisiblement à entendre, quand ils mettent deuant les portes de leurs temples des Sphynxes, voulans dire que toute leur Theologie contient, souz paroles enigmatiques & couuertes, les secrets de sapience. Et en la ville de Sais l'image de Pallas, qu'ils estiment estre Isis, auoit vne telle inscription, Je suis tout ce qui a esté, qui est, & qui sera iamais, & n'y a encore eu homme mortel qui m'ait descouuerte de mon voile. Dauantage plusieurs estiment que le propre nom de Iupiter en langue Égyptienne soit Amoun, & que nous en Grec en ayons deriué ce mot Ammon, dont nous appellons Iupiter Ammon : mais Manethon qui estoit Égyptien de la ville de Sebenne estime, que ce mot signifie caché ou cachement : & Hecatheus natif de la ville d'Abdere dit, que les Égyptiens vsent de ce mot quand ils se veulent entre appeler l'un l'autre, pource que c'est vne diction vocatiue : & pourautant qu'ils estiment que le Prince des Dieux soit vne mesme chose que l'univers qui est obscur, caché & incogneu, ils le prient & couient à se vouloir manifester & donner à cognoistre à eux,

A à eux, en l'appellant Amoun. Voyla donc comment les Égyptiens estoient reseruez & retenus à ne point profaner leur sapience, en publiant trop ce qui appartient à la cognoissance des Dieux: ce que tesmoignent mesme les plus sages & plus sçauans hommes de la Grece, Solon, Thales, Platon, Eudoxus, Pythagoras, & comme quelques vns ont voulu dire, Lycurgus mesme, qui allerent de propos deliberé en Égypte pour en communiquer avec les presbtres du pays: car on tient que Eudoxus ouït Chonoupheus qui estoit de Memphis, & Solon Sonchis qui estoit de Sais, & Pythagoras Oenupheus qui estoit de Heliopolis. Ce dernier Pythagoras fut fort estimé d'eux, & luy aussi ce semble les estima beaucoup, tellement qu'il voulut imiter leur façon mystique de parler en paroles couuertes, & cacher sa doctrine & ses sentences sous paroles figurees & énigmatiques: car les lettres que lon appelle hieroglyphiques en Égypte, sont presque toutes semblables aux preceptes de Pythagoras, comme, Ne manger point sur vne selle, Ne se seoir point sur vn boisseau, Ne planter point de palmier, N'attizer point le feu avec vne espee en la maison. Et me semble que ce que les Pythagoriens appellerent l'vnité Apollon, & le deux Diane, le sept Minerue, & Neptune le premier nombre cubique, ressemble fort à ce qu'ils consacrent, qu'ils font & qu'ils escriuent en leurs sacrifices, car ils peignent leur Roy & leur Seigneur Osiris par vn œil, & vn sceptre: & y en a qui interpretent le nom d'Osiris, ayant plusieurs yeux, pour ce que Os en Égyptien signifie plusieurs, & Iris œil: & le Ciel, comme ne vieillissant point à cause de son eternité, par vn cœur, ayant dessous vne chauferette de feu, qui est la marque de courroux. Et en la ville de Thebes y auoit des images de Iuges qui n'auoient point de mains, & celle du President d'iceux auoit les yeux bandez, pour donner à entendre que la iustice ne doit estre ny concussionnaire ny fauorable, c'est à dire, ne prendre point d'argent, & ne faire rien plus ne moins par faueur. Les gens de guerre pour la marque de leurs anneaux y portoient engrauee la figure d'un escharbot, pour ce qu'entre les escharbots il n'y a point de femelle, ains sont tous masles, & iettent leur geniture dedans vne boule de fens, laquelle ils preparent & construisent, non tant pour matiere & prouision de leur viure, comme pour vn lieu à engendrer. Quand doncques tu entendras parler de certaines vagabondes peregrinations & erreurs, & desmembremens, & autres telles fictions, il te faudra souuenir de ce que nous auons dit, & estimer qu'ils ne veulent pas entendre que iamais rien ait esté de cela ainsi, ne qu'il ait oncques esté fait: car ils ne disent pas que Mercure proprement soit vn chien, ains la nature de celle beste, qui est de garder, d'estre vigilant, sage à discerner & chercher, estimer & iuger l'amy ou l'ennemy, celuy qui est cogneu ou incogneu, suyuant ce que dit Platon, ils accomparent le chien au plus docte des Dieux. Et si ne pensent pas que de l'escorce d'un Alisier sorte vn petit enfant ne faisant que naistre, mais ils peignent ainsi le Soleil leuant, donnans à entendre sous figure couuerte, que le Soleil sortant des eaux de la mer, se vient à rallumer. Car ainsi appellerent-ils Ochus, l'Espee, qui fut le plus cruel Roy des Perses, & le plus terrible, comme celuy qui feit mourir plusieurs grands personnages, & qui finalement tua leur bœuf Apis, & le mangea avec ses amis, & iusques auourd'huy ils l'appellent encore ainsi en la liste & catalogue de leurs Roys, non qu'ils voulussent signifier sa substance, ains la dureté de son naturel & sa mauuaistié, qu'ils accomparent à l'instrument dont on fait mourir les hommes. En escoutant doncques & receuant ainsi ceux qui t'exposeront sainctement & doctement la fable, en faisant & obseruant tousiours diligemment ce qui vous est ordonné en vostre estat pour le seruice des Dieux, & croyant fermement que tu ne leur pourrois faire seruice ne sacrifice qui leur fust plus agreable que de t'estudier à auoir saine & vraye opinion d'eux, tu euiteras par ce moyen la superstition, laquelle n'est point moindre mal ne peché, que l'impiété de ne croire

De Isis & d'Osiris.

point qu'il y ait de Dieux. Or la fable doncques d'Isis & d'Osiris, pour la deduire en E
moins de paroles qu'il fera possible, & en retrencher beaucoup de choses superflues,
& qui ne seruent à rien, se raconte ainsi. On dit que Rhea s'estant meslee secrettemēt
à la defrobbee avec Saturne, le Soleil s'en apperceut, qui la maudit, priant en ses male-
dictions qu'elle ne peüst iamais enfanter ny mois ny an : mais que Mercure estant a-
moureux de celle Deesse, coucha avec elle, & que depuis ioüant aux dez avec la Lune
il luy gaigna la septantième partie de chacune de ses illuminations, tant que les met-
tant ensemble il en fit cinq iours, qu'il adiousta aux trois cents soixante de l'annee,
que les Ægyptiens appellent maintenant les iours Epactes, les celebrans & solenni-
zans, comme estans les iours de la natiuité des Dieux, pour ce que au premier iour
naquit Osiris, à l'enfantement duquel fut ouye vne voix, que le Seigneur de tout
le monde venoit en estre : & disent aucuns, qu'une femme nommee Pamyle, ainsi F
comme elle alloit querir de l'eau au temple de Iupiter, en la ville de Thebes, ouyt cel-
le voix, qui luy commandoit de proclamer à haute voix, que le grand Roy bienfai-
cteur Osiris estoit né : & pour ce que Saturne luy mit l'enfant Osiris entre les mains
pour le nourrir, que c'est pour l'honneur d'elle que lon celebre encore la feste des Pa-
myliens, semblable à celle des Phallegphores en la Grece. Le deuxiesme iour elle en-
fanta Aroueris qui est Apollo, que les vns appellent aussi l'aisné Orus. Au troisieme
iour elle enfanta Typhon, qui ne sortit point à terme, ny par le lieu naturel, ains rom-
pit le costé de sa mere, & faulta dehors par la playe. Le quatrieme iour naquit Isis,
au lieu de Panygres. Le cinquieme naquit Nephté, que les vns nomment aussi Te-
leute, ou Venus, & les autres Victoire : & que Osiris & Aroueris auoient esté conçus
du Soleil, & Isis de Mercure, & Typhon & Nephté de Saturne : c'est pourquoy les
Roys reputent le troisieme iour malencontreux, & à ceste cause ne despeschent af-
faires quelsconques ce iour-là, & ne boient ny ne mangent iusques à la nuit : que
Typhon porta honneur à Nephté, que Isis & Osiris estans amoureux l'un de l'autre
deuant qu'ils fussent sortis du ventre de la mere, coucherent ensemble à cachettes,
& disent aucuns que Aroueris naquit de ces amourettes-là, qui est appelé l'aisné G
Orus par les Ægyptiens, & Apollo par les Grecs. Osiris regnant en Ægypte, reti-
ra incontinent les Ægyptiens de la vie indigente, souffreteuse & sauage, en leur en-
seignant à semer & planter, en leur establisant des loix, & leur montrant à honorer
& reuerer les Dieux : & depuis allant par tout le monde, il l'appriuoisa aussi sans y
employer aucunement la force des armes, mais attirant & gaignant la plus part
des peuples par douces persuasions & remonstrances couchees en chansons, & en
toute sorte de Musique, dont les Grecs eurent opinion que c'estoit vn mesme que
Bacchus : que Typhon durant le temps de son absence ne remua rien, d'autant que
Isis y donna bon ordre, & y proueut avec bonnes forces : mais que quād il fut de re-
tour, Typhon luy dressa embusche, ayant attiré à sa ligue soixante & douze autres
hommes coniurez avec luy, sans vne Roynie d'Æthiopie participante & complice H
aussi de la coniuration (ceste Roynie s'appelloit Azo) & ayant secrettement pris la
mesure du corps d'Osiris, il fit faire vn coffre de la mesme longueur, beau à merueil-
les, ouuré & labouré fort exquisement, lequel il fit apporter en la salle, où il don-
noit à souper à la compagnie : chacun prit plaisir à veoir vn si bel ouirage, & l'esti-
ma-lon grandement : & Typhon faisant semblant de ioüer, dit qu'il le donneroit vo-
lontiers à celuy qui auroit le corps egal de mesure à ce coffre : tous ceux de la compa-
gnie l'essayerent les vns apres les autres, & ne se trouua bien proportionné, ny egal à
pas vn des autres : finalement Osiris luy-mesme y monta, & se coucha dedans : & alors
les coniurez y accourans ietterent le couuercle dessus, & partie le fermerent de clous,
& partie de plomb fondu qu'ils ietterent par dessus, puis le portans en la riuiera,
le ietterent par la bouche du Nil, qui se nomme Tanitique, dedans la mer : c'est
pourquoy

- A** pourquoy iusques aujourd'huy ceste bouche est execrable aux Égyptiens, & pourquoy ils l'appellent abominable. On dit que tout cela fut fait le dix-septième du mois, que lon appelle Athyr, qui est celuy durant lequel le Soleil passe par le signe du Scorpion, & le vingt-huitième du regne d'Osiris: toutefois d'autres disent qu'il vescu, non pas qu'il regna, autant: que les premiers qui entendirent la nouvelle de cest inconuenient, furent les Panes & Satyres habitans autour de la ville de Chennis, & commencerent à murmurer entre eux: c'est pourquoy encore iusques aujourd'huy on appelle les soudaines peurs, troubles & emotions de peuples, frayeurs Paniques. Et qu'Isis en estant aduertie feit tondre vne tresse de ses cheueux, & se vestit de dueil au lieu qui maintenant est appelé Coptus, combien que les autres veulent dire que ce mot signifie priuation, pource que Coptein est autant à dire comme priuer. En cest habit elle alla errant par tout, pour en cuider entendre des nouvelles, en grande destresse: mais personne ne venoit ny ne parloit à elle, iusques à ce qu'elle rencontra de ieunes enfans qui ioüoient ensemble, auxquels elle demanda s'ils auoient point veu le coffre: ces enfans l'auoient veu, qui luy dirent la bouche du Nil par laquelle les complices de Typhon l'auoient poussé dedans la mer. Depuis ce temps-là les Égyptiens estiment, que les enfans ont le don de prophetie, de pouuoir reueler les choses secretes, & prennent à presage toutes les paroles qu'ils disent en ioüant & babillant ensemble, mesmement dedans les temples, de quoy que ce soit. Et qu'ayant apperceu qu'Osiris estant deuenu amoureux de sa sœur, auoit couché avec elle, pensant que ce fust Isis, & en ayant trouué le signe du chappellet de melilot, qu'il auoit laissé chez sa sœur Nephté, elle cercha l'enfant, pour ce que Nephté incontinent qu'elle l'eut enfanté l'alla cacher, pour la crainte de Typhon, & l'ayant trouué difficilement & à grande peine, par le moyen des chiens qui la conduisirent au lieu où il estoit, elle le nourrit, de maniere que depuis qu'il fut deuenu grand, il fut son gardien & son page, appelé Anubis, que lon dit qui garde les Dieux, comme les chiens font les hommes. Depuis elle entendit nouvelles du coffre, comme les flots de la mer l'auoient ietté en la coste de Byblus, là où il s'estoit tout doucement rengé au pied d'un Tamarix: ce Tamarix en peu de temps deuint un fort beau & fort gros tronc d'arbre bien branchu, qui ambrassa & enueloppa tout alentour le coffre, de sorte qu'on ne le voyoit point. Le Roy de Byblus s'esbahissant de voir ceste plante ainsi soudainement creüe en telle grandeur, feit couper le branchage qui couuroit le coffre que lon ne voyoit point, & du tronc en feit un pillier à soustenir le toit de sa maison: de quoy Isis, ainsi que lon dit, ayant esté aduertie par un vent diuin de renommee, s'en alla en la ville de Byblus, là où elle s'asseyoit aupres d'une fontaine, toute triste & esplorée, sans parler à autre personne quelconque, sinon qu'elle salua & caressa les femmes de la Royne, en leur accoustrant les tresses de leurs cheueux, & leur rendant une merueilleusement douce & souëfue odeur yssant de son corps. La Royne ayant veu ses femmes si bien parees, eut enuie de voir l'estrangere qui les auoit ainsi accoustrees, tant pource qu'elle scauoit ainsi bien accoustrer les cheueux, comme pource qu'elle rendoit une si douce senteur, ainsi l'enuoya elle querir, & ayant pris familiarité avec elle, la feit nourrice & gouuernante de son fils: le Roy s'appelloit Malcander, & la Royne Astarte, ou bien Saosis, ou Nemanoun, comme les autres veulent, c'est à dire en langage Grec, Athenaide: & dit-on que Isis nourrit cest enfant en luy mettant son doigt en la bouche au lieu du bout de la mammelle, & que la nuit elle luy brusloit tout ce qui estoit mortel en son corps, & qu'elle se tournant en une harondelle alloit voletant & lamentant alentour de ce pillier de bois, iusques à ce que la Royne s'en estant pris garde, & s'estant escree quand elle veit le corps de son fils bruslant ainsi alentour, luy osta l'immortalité, & que la Deesse ayant ainsi esté descouuerte, demanda le pillier de bois, lequel elle coupa facilement,

De Isis & d'Osiris.

& osta de fous la couuerture le tronc du Tamarix, qu'elle oignit d'une huyle parfume, puis l'envelopa d'un linge, & le bailla en garde aux Roys, dont vient que iusques aujourdhuy les Bybliens reuerent encore ceste piece de bois-là, qui est couchee dedans le temple d'Isis: & qu'à la fin elle rencontra le coffre, sur lequel elle plora, & lamenta, tant que l'un des enfans du Roy, le plus ieune, en mourut de pitié: & elle ayant en sa compagnie le plus aagé, avec le coffre, s'embarqua en un vaisseau, monta sur la mer, & s'en alla. Et pourtant que sur l'aube du iour la riuere de Phedrus destourna le vent un peu trop asprement, elle, qui en fut courroucée, la secha toute, & au premier lieu qu'elle se peut trouuer seule, elle ouurit le coffre, là où trouuant le corps d'Osiris, elle mit sa face sur la sienne en l'embrassant & plorant. Le ieune enfant survint & s'approcha secrettement, & veit ce qu'elle faisoit, dont elle s'estant apperceüe se retourna, & le regarda d'un mauuais œil en trauers, tellement que l'enfant, ne pouuant supporter la terreur qu'elle luy feit, en mourut. Les autres le disent autrement, c'est qu'il tomba dedans la mer, & qu'il est honoré à cause de la Deesse, & que c'est celuy que les Égyptiens chantent en leurs festins qu'ils appellent Maneros: aucuns disent que cest enfant auoit nom Palestinus, & que la ville de Pelusium fut fondée en memoire de luy par la Deesse, & que ce Maneros qu'ils celebrent en leurs chansons, fut celuy qui premier trouua la Musique. Toutefois il y en a d'autres qui disent, que ce n'est point le nom d'aucun homme, mais une façon de parler propre & conuenable à ceux qui boient & banquettent ensemble, laquelle signifie autant, comme qui diroit, A bonne heure soit cecy venu: car les Égyptiens ont accoustumé de crier cela ordinairement: comme aussi le corps sec d'un homme mort qu'ils portent dedans un cercueil, n'est point une representation de l'accident d'Osiris, comme aucuns estiment, ains un admonestement aux conuiez de se donner ioye, & iouyr alaigrement des biens presents, d'autant que bien peu de temps apres ils seront tous semblables à celuy-là, c'est la raison pourquoy ils l'introduisent és festins. Et comme la Deesse Isis fust allée voir son fils Orus qui se nourrissoit en la ville de Butus, & qu'elle eust osté le coffre, ou la bierre dedans laquelle estoit le corps d'Osiris, Typhon étant la nuit à la chasse au clair de la Lune le rencontra, & ayant reconnu le corps le deschira & decouppa en quarante parties, qu'il ietta çà & là: ce que ayant Isis entendu, le chercha dedans un batteau fait de l'herbe du papier à trauers les marets: d'où vient que les Crocodiles n'offensent iamais ceux qui nauignent dedans les vaisseaux faicts d'icelle herbe, soit qu'ils en ayent peur, ou qu'ils les reuerent en memoire de ce faict de la Deesse. Voyla d'où vient que lon trouue plusieurs sepultures d'Osiris par le pays d'Égypte, pource que à mesure qu'elle en trouuoit chascune partie, elle y faisoit dresser un sepulchre: les autres disent que non, mais qu'elle en feit faire plusieurs images, qu'elle laissa en chascune ville, comme si elle leur en laissoit le propre corps, à fin qu'en plusieurs lieux il fust honoré, & que si d'aduenture Typhon venoit au dessus de son fils Orus, quand il viendrait à chercher le vray sepulchre d'Osiris, & qu'on luy en monstreroit plusieurs, il ne sceust auquel s'arrester: & dit-on plus, que Isis trouua toutes les autres parties du corps d'Osiris, excepté le membre naturel, pource qu'il fut incontinent ietté dedans la riuere, & que les poissons, le Lepidote, le Phagre, & l'Oxyrinche le mangerent: pour raison dequoy Isis les abomina par dessus tous les autres poissons, mais au lieu du naturel elle en feit contrefaire un qui s'appelle Phallus, & le consacra, tellement que les Égyptiens en solennisent encore la feste. Et puis ils content, que Osiris reuenant de l'autre monde s'apparut à son fils Orus, qu'il instruisit & exercita à la bataille: qu'il luy demanda, quelle chose il estimoit au monde la plus belle, & que Orus luy respondit, que c'estoit venger le tort & l'iniure que lon auroit fait à ses peres & meres. Secondement qu'il luy demanda, quel animal il estimoit plus vtile à ceux qui alloient à la bataille.

Orus

- A** Orus respondit, que c'estoit le cheual: dont Osiris s'esmerueilla, & luy demanda pourquoy il auoit respondu que c'estoit le cheual, & non pas le lion: & que Orus repliqua, que le lion estoit plus vtile à celuy qui auroit besoing de secours pour combattre, mais le cheual pour desfaire entierement & descōfire celuy qui se mettroit en fuite: ce que Osiris ayant entendu de luy, en fut fort aise, iugeāt qu'il estoit suffisamment preparé pour donner la bataille à son ennemy. Et dict-on que plusieurs se retournoient ordinairement du costé d'Orus, iusques à la cōcubine mesme de Typhon nommée Thoueris, mais qu'un serpent la pourfuyuit, qui fut taillé en pieces par les gens d'Orus: voyla pourquoy encore auiourd'huy ils apportent vne petite corde, laquelle ils couppent en pieces. Si disent que la bataille dura plusieurs iours, mais que finablement Orus en gagna la victoire, & que Isis ayant Typhon prisonnier lié & garotté, ne le tua point, ains le deslia & le laissa aller: ce que Orus ne peut endurer patiemment, ains ietta les mains sur sa mere, & luy osta de sur la teste la marque de royauté, au lieu de laquelle Mercure luy mit en la teste vn morrion fait en guise d'une teste de bœuf. Typhon voulut appeller en iustice Orus, & luy mettre en auant qu'il estoit bastard: mais à l'aide de Mercure qui defendit sa cause, il fut iugé par les Dieux legitime, & qu'il deffit depuis à faict Typhon en deux autres batailles: & que Isis apres sa mort coucha encore avec Osiris, duquel elle eut Helitomenus & Harpocrates qui estoit mutilé des pieds. Voyla presque les principaux poincts de toute la fable, excepté ceux qui sont plus execrables, comme le demembrement d'Orus, & la decapitation de Isis. Or qu'il ne leur faille cracher au visage & rompre la bouche, comme dict *Æschylus*, s'ils ont telles opinions de la bienheureuse immortelle nature que nous entendons la diuinité, s'ils pensent & disent que telles fables soient veritables, & que realement & de faict elles soient ainsi aduenues, il ne le faut point dire à toy, car ie sçay bien que tu hais & abomines ceux qui ont de si barbares, & si estranges opinions des Dieux: mais aussi vois-tu bien que ce ne sont pas contes qui ressemblent
- C** fort aux fables vagues, & vaines fictions que les poëtes ou autres fabuleux escriuains controuuent à plaisir, ne plus ne moins que les araignées qui d'elles-mesmes, sans aucune matiere ny subiect, filent & tissent leurs toiles, ains est apparent qu'ils contiennent des accidens & memoires de quelques inconueniens: ainsi comme les Mathematiciens disent, que l'arc-en-ciel est vne apparence seulement de diuerses peintures de couleurs, par la refraction de nostre veüe cōtre vne nuée. Aussi ceste fable est apparence de quelque raison qui replie & renuoye nostre entendement à la consideration de quelque autre verité: comme aussi nous le donnent à entendre les sacrifices, où il y a meslé parmi ne sçay quoy de dueil & de lamentable, & semblablement les ordonnances & dispositions des temples, qui en quelques endroits sont ouuerts en belles ailes & plaisantes allées longues à descouuert, & en quelques autres endroits ont des caueaux tenebreux & cachez sous terre, ressemblans proprement aux sepulchres & caues où lon met les corps des trespassez: & mesmement l'opinion des Osiriens, qui bien que lon die que le corps d'Osiris soit en plusieurs lieux, renomment toutefois Abydos & Memphis petites villes, où ils disent que le vray corps est, tellement que les plus puissans hommes & plus riches de l'Ægypte, ordonnent coustumierement que leurs corps soient inhumez en la ville d'Abydos, à fin qu'ils gisent en mesme sepulture que Osiris. Et en Memphis on nourrit le bœuf Apis, qui est l'image & figure de son ame, & veulent que le corps aussi y soit: & interpretent aucuns le nom de ceste ville, comme s'il signifioit le port des gens de bien, les autres le sepulchre d'Osiris: & y a deuant les portes de la ville vne petite Isle, qui au demourant est inaccessible à tous autres, de maniere que les oyseaux mesmes n'y peuuent pas demourer, ny les poissons en approcher, fors qu'en vn certain temps les prestres y entrent, & y font des sacrifices & offrandes que lon presente aux trespassez, & y cou-

De Isis & d'Osiris.

Donnent de fleurs la sepulture d'une Mediphthe, qui est ombragée & couverte d'un **E** arbre plus grand & plus haut que pas un oliuier. Eudoxus escrit que combien que lon monstre plusieurs sepulchres, qu'on dict estre d'Osiris en Ægypte, le corps neantmoins en est en Busiride, pource que c'est le pays & le lieu de la naissance d'Osiris, & qu'il n'est ia besoing le dire de Taphosiris, pource que le nom mesme le dict assez, signifiant la sepulture d'Osiris. l'approuue la coupure du bois, la deschirure du lin, & les effusions & offrandes funebres que lon y fait, pour autat qu'il y a beaucoup de mysteres meslez parmy. Si disent les prestres Ægyptiens, que non seulement de ces Dieux-là, mais encore de tous ceux qui ont esté engendrez, & ne sont point incorruptibles, les corps en sont demourez par deuers eux, là où ils sont honorez & reuez, & les ames estans deuenues estoilles en reluisent au ciel, & que celle d'Isis est celle que les Grecs appellent l'estoille Caniculaire, & les Ægyptiens Sothin, celle de Orus Orion, celle de Typhon l'Ourse. Mais là où toutes les autres villes & peuples de l'Ægypte contribuent la quote qui leur est imposée, pour faire protraire & peindre les animaux que lon y honore, ceux qui habitent en la contrée Thebaïde seuls entre tous n'y donnent rien, estimans que rien qui soit mortel ne peut estre Dieu, ains celui seul qu'ils appellent Cnef, qui iamais ne nasquit, ne iamais ne mourra. Comme doncques ainsi soit, que plusieurs telles choses se disent & se montrent en Ægypte, ceux qui cuydent que ce soit pour perpetuer la memoire des faicts & accidens merueilleux & grands de quelques Princes, Roys, ou tyrans, qui pour leur excellente vertu, ou grande puissance, ont adiousté à leur gloire l'autorité de diuinité, ausquels puis apres il soit arriué des inconueniens, ils vsent en cela d'une bien facile desfaicte & façon d'eschapper, & si ne font point mal de transferer des Dieux aux hommes ce qu'il y a de sinistre ou infame en tous ces contes-là, & si sont aydez par ces tesmoignages que lon lit és histoires: car les Ægyptiens escriuent que Mercure estoit bien petit de corsage, que Typhon estoit de couleur roussseau, Orus blanc, & Osiris brun, comme ayans de nature esté hommes: dauantage ils appellent Osiris **G** capitaine & gouuerneur, Canobus, duquel nom ils ont aussi appelé une estoille, & la nauire que les Grecs appellent Argo, ils tiennent que c'est la figure de la nauire d'Osiris, que lon a referé au nombre des astres pour l'honneur de luy, & si n'est pas située au mouuement du ciel gueres loing de celle d'Orion, & de celle de la Caniculaire, dont ils estiment l'une sacrée à Orus, & l'autre à Isis. Mais i'ay peur que cela ne soit remuer les choses saintes, ausquelles on ne doit toucher, pour ne point combattre, non seulement le long temps & l'antiquité, comme dict Simonides, ains la religion de plusieurs peuples qui de longue-main ont une deuotion imprimée enuers ces Dieux-là, en ne voulant pas endurer que ces grands noms-là transportent chose quelconque du ciel en la terre, & que ce ne soit encore vouloir arracher & renuerfer un honneur, & une foy & creance, qui est empreinte aux cœurs des hommes pres- que dès leur premiere naissance, qui seroit ouurir de grandes portes à la tourbe des **H** mescreans Atheistes, lesquels separent & esloignent les hommes de toute diuinité, & donner manifeste ouuerture & grande licence aux impostures & tromperies de Euemerus le Messenien, lequel ayant luy-mesme controuué les originaux de fables qui n'ont aucune verisimilitude, ny aucun subiect, a respádu par le monde vniuersel toute impieté, transmuant & changeant tous ceux que nous estimons Dieux, en noms d'admiraux, grands Capitaines, & de Roys qui auroient esté le temps passé, ainsi qu'il est, ce dict-il, escrit en lettres d'or, en la ville de Panchon, que iamais homme Grec ne barbare ne veit que luy, ayant nauigué au pays des Panchoniens & Triphyliens, qui ne sont en nulle partie de la terre habitable, & neantmoins on celebre assez entre les Assyriens les hauts faicts de Semiramis, & de Sesostris. En Aegypte iusques aujourd'huy les Phrygiens appellent les illustres & admirables entrepri-
ses

A les & exploicts d'armes Maniques, d'autant que l'un de leurs anciens Roys du temps iadis s'appelloit Manis, qui de son temps fut vn tres-sage & tres-vaillant Prince : aucuns l'appellent autrement Masdes. Cyrus mena les Perles, Alexandre les Macedoniens tousiours conquerans presque iusques au bout du monde, mais pour tout cela ils n'ont renom que d'auoir esté puissans & vaillans Princes & Roys. Et s'il y en a eu quelques vns qui esleuez par outrecuidance avec ieunesse & ignorance, comme dict Platon, ayans l'ame enflâmée de vaine gloire & d'insolence, ayent reçu les surnoms de Dieux, & des fondations de temples en leurs noms, celle gloire ne leur a gueres longuement duré : & puis estans par la posterité condamnez de vanité & de superbe arrogance, outre l'iniustice & l'impiété,

En peu de iours leur folle renommée

S'en est allée en vent & en fumée.

Et maintenât, comme serfs fugitifs, qu'il est loisible de reprendre par tout où lon les peut trouuer, ils sont arrachez des temples & des autels, & ne leur est demouré que leurs tombeaux & sepulchres. Et pourtant Antigonus le vieil, cōme vn certain poète, nommé Hermodotus, en ses vers l'eust appellé fils du Soleil, & Dieu : Celuy, dict-il, qui vuide le bassin de ma selle percée, sçait bien, comme moy, le contraire. Et fait aussi bien sagement Lyfippus le statuaire, quand il reprit le peintre Apelles de ce que peignant Alexandre le grand il luy meit la foudre en main, là où Lyfippus luy auoit mis au poing la lance, de laquelle la gloire estoit pour durer eternellement, comme estant veritable & meritoirement propre & deuë à luy. Et pourtant ont mieux faict & dict ceux qui ont pensé & escrit, que ce que lon recite de Typhon, d'Osiris & d'Isis, n'estoient point accidens aduenus ny aux Dieux ny aux hommes, ains à quelques grands Demons, comme ont faict Pythagoras, Platon, Xenocrates & Chrysippus, suyuant en cela les opinions des vieux & anciens Theologiens, qui tiennent qu'ils ont esté plus forts & plus robustes que les hommes, & qu'en puissance ils ont grandement surmonté nostre nature : mais ils n'ont pas eu la diuinité pure & simple, ains ont esté vn suppost composé de nature corporelle & spirituelle, capable de volupté & de douleur, & des autres passions & affections qui accompagnent ces mutations-là, trauaillans les vns plus, les autres moins : car entre les Demons il y a, comme entre les hommes, diuersité & difference de vice & de vertu. Et les faicts des Geants & des Titans qui sont tant chantez par les poètes Grecs, & les abominables actes d'un Saturne, & les resistances d'un Python aleancontre d'Apollon, les sons d'un Bacchus, & les erreurs d'une Ceres, ne different en rien des accidents d'Osiris & de Typhon, & de tous ces autres tels contes fabuleux que chascun peut ouyr tant qu'il veut, & tout ce qui est caché & couuert sous le voile des sacrifices significatifs, & sous des cerimonies qu'il n'est pas loisible de dire, ny de monstrier à vn commun populaire, tout cela est d'une mesme sorte : suyuant laquelle opinion nous voyons que Homere appelle les gens de bien diuersement, tantost semblables aux Dieux ou es-

D gaux aux Dieux, tantost

Ayans des Dieux la diuine prudence :

mais du nom de Dæmon il en vse communément, autant en parlant des meschans comme des bons,

Dæmonien auant approche toy,

Comment as-tu de ces Grecs tant d'effroy ?

Et ailleurs,

Quand il chargea la quatrième fois,

Il ressembloit vn Dæmon.

Et ailleurs,

Dæmonienne en quelle forfaiture

Le vieil Priam, & sa progeniture,

T'ont-ils si fort offensée, que tant

De Isis & d'Osiris.

Ton cœur felon prochasse souhaitant
De Troye voir la ville bien bastie
Entierement rasee & subuertie?

E

Comme nous donnant à entendre, que les Dæmons ont vne nature meslee, & vne volonté & affection inégales, & non point tousiours semblables. De là vient que Platon attribue aux Dieux Olympiques & celestes, tout ce qui est dextre & non pair, & tout ce qui est senestre & pair aux Dæmons: & Xenocrates tient que les iours malencontreux, & les festes où lon se bat, & où lon se donne des coups, & qu'on se frappe l'estomac, ou quelon ieusne, où il se fait ou dit quelque chose honteuse & villaine, il n'estime point qu'elles appartiennent aux bons Dieux, ny aux bons Dæmons: mais qu'il y a en l'air des natures grandes & puissantes, au demourant malignes & malaccointables, qui ont plaisir que lon face de telles choses pour elles, & que quand elles les ont obrenuës, elles ne s'adonnent plus à pis faire: comme aussi au contraire Hesiodé appelle les bons & saincts Dæmons, gardiens des hommes,

F

Donneurs de biens, d'opulence & richesse,

Propre à eux est la royale largesse.

Et Platon appelle ceste sorte de Dæmons Mercuriale & Ministeriale, estant leur nature au milieu des Dieux & des hommes, enuoyans les prieres & requestes des hommes vers le ciel aux Dieux, & de là nous transmettant en terre les oracles & reuelatiōs des choses occultes & futures, & les donations des richesses & des biens. Empedocles mesme dict, qu'ils sont punis & chastiez des fautes & offenses qu'ils ont commises,

L'air les vous iecte en la grand' mer profonde,

L'eau les vomit dessus la terre ronde,

La terre apres au ciel les faict voler,

Et le Soleil les precipite en l'air:

De l'un en l'autre ainsi chassez, ils cheent,

Et tous ensemble également les hayent:

G

iufques à ce qu'estans ainsi chastiez & purgez, ils recourent derechef le lieu, le reng & l'estat qui leur est propre, selon leur nature. A cela ressemble naïfvement ce que lon recite de Typhon, qu'il feit par son enuie & sa malignité plusieurs mauuaises choses, & qu'ayant mis tout en combustion, il remplit de maux & de miseres la mer & la terre, & puis en fut puny, & que la femme & sœur d'Osiris en feit la vengeance, esteignant & amortissant sa rage & sa fureur: & neâtmoins encore ne meit-elle point à nonchaloir les trauaux & labeurs qu'elle auoit supportez, & ses fuittes çà & là, ny plusieurs actes de grande sapience & grande vaillance, se contentant que cela demourast ensepuely en silence & en oubly, ains les meslant parmy les plus sainctes ceremonies des sacrifices, comme exemples, images & souuenances des inconueniens pour lors aduenus, elle consacra vn enseignement & vne instruction & consolation de pieté enuers les Dieux, autant pour les femmes que pour les hommes detenus en H miseres & calamitez. Au moyen dequoy elle & son mary Osiris auroient esté transformez de bons Dæmons pour leurs vertus en Dieux, comme depuis l'auroient aussi semblablement esté Hercules & Bacchus, ausquels non sans raison pour cela auroient esté decernez honneurs entremeslez des Dæmons & des Dieux, comme à ceux qui ont par tout grande puissance, tant deffous que dessus la terre, mais spécialement en ces sacrifices-là, pource que Sarapis n'est autre chose que Pluton, & Isis que Proserpine, comme dict Archemachus natif d'Eubœe, & Heraclitus le Pontique, qui pense que l'oracle qui est en la ville de Canobus soit celuy de Pluton. Le Roy Ptolomeus, surnommé le Sauueur, feit enleuer de la ville de Sinope la statue enorme de Pluton, non qu'il sceust qu'elle y fust, & qu'il eust iamais veu auparauant qu'elle face elle auoit, sinon qu'il luy fut aduis en songeant, qu'il voyoit Sarapis qui luy commandoit,

- A** mandoit, que le plustost qu'il luy seroit possible, il feist transporter sa statuë en Alexandrie. Le Roy ne sçauoit où estoit ceste statuë, ny là où il la deuoit trouuer, mais ainsi comme il racontoit luy-mesme sa vision à ses amis, il se rencontra vn nommé Sosibius, homme qui auoit esté en beaucoup de pays, lequel dict qu'il auoit veu vne pareille statue que celle que le Roy leur descriuoit, en la ville de Sinope: si y enuoya le Roy vn Soteles & Dionysius, qui avec longue espace de temps & grand trauail, non sans ayde speciale encore de la prouidence diuine, la desroberent & l'emmenèrent. Quand elle fut apportée, & qu'on la veit en Alexandrie, Timotheus le cosmographe & Manethon Sebennitique, coniecturans que c'estoit la statue de Pluton à voir Cerberus aupres de luy, & le Dragon, persuaderent au Roy que ce n'estoit l'image d'autre Dieu que de Sarapis: car il ne vint pas de là avec ce nom là, mais étant apporté en Alexandrie, il y acquit le nom de Sarapis, qui est le nom dont les Égyptiens appellent Pluton, combien que Heraclitus le Physicien die, que Pluton & Dionysius, c'est à dire Bacchus, soient tout vn. Quand doncques ils veulent enra-
- B** ger & follastrer, ils se laissent aller en ceste opinion. Car ceux qui cuydent que Ades, c'est à dire Pluton soit le corps, comme la sepulture de l'ame, pource qu'il semble qu'elle soit folle ou yure pendant qu'elle est dedans, il me semble qu'ils allegorisent bien froidement, & vaut mieux assembler en vn Osiris avec Bacchus, & Bacchus avec Sarapis, en disant, que depuis qu'il eut changé de nature, il changea aussi d'appellation: & pourtant est le nom de Sarapis commun à tous, ainsi comme sçauent assez ceux qui ont esté receuz és sacrifices & en la religion d'Osiris. Car il ne faut pas adiouter foy aux liures des Phrygiens qui disent, que vne Charops fut fille de Hercules, & que d'un autre fils de Hercules nommé Isaiacus nasquit Typhon: ny aussi faire compte de Philarchus escriuant que Bacchus fut le premier qui amena des Indes deux bœufs, l'un desquels auoit nom Apis, & l'autre Osiris, & que Sarapis est le propre nom de celui qui regit & embellist l'uniuers, d'autant que Sairein signifie or-
- C** ner & embellir: car ces propos de Philarchus sont manifestement hors de toute appa-
σιρην, βα-
layer.
 rence, & encore plus le dire de ceux qui escriuent, que Sarapis n'est pas le nom d'un
σιρην, ἀντι-
δος.
 Dieu, mais que c'est le sepulchre d'Apis que lon appelle ainsi, & qu'il y a dedans la vil-
 le de Memphis des portes de bronze nommées d'Oubliance & de Dueil, que lon ou-
 ure quand lon inhume Apis, & qu'elles menent vn bruiet bas & rude quand on les
 ouure, & que c'est pourquoy nous mettons la main sur tout vase de bronze & de cuy-
 ure qui nous faict du bruit, pour le faire cesser. Il y a plus d'apparence en l'opinion de
 ceux qui tiennent qu'il a esté deriué de ce mot Seuesthai ou Sousthai, qui signifie
σιρην, ἀντι-
δος.
 poulfier, comme étant celui qui remue toute la machine du monde. Il y a aussi plu-
 sieurs des prestres qui tiennent que c'est vn mot composé de Osiris & d'Apis, expo-
 sants & nous enseignans qu'il nous faut penser, que Apis est vne belle image de l'ame
 d'Osiris. Mais quant à moy, si Sarapis est vn nom Égyptien, ie pense qu'il signifie
- D** ioye & alaigresse, le coniecturant par ce que les Égyptiens appellent feste & lieffe
 Sairei: car Platon mesme escrit, que Ades, qui signifie Pluton, est fils d'Aido, cest à di-
 re de vergongne & de honte, doux & clement Dieu à ceux qui sont pardeuers luy.
 Et est vray que, au langage des Égyptiens, plusieurs autres noms propres signifient
 quelque chose, comme celui par lequel ils signifient le lieu de dessoubsterre, où ils
 cuydent que les ames des trespassez s'en aillent apres la mort, qu'ils disent Amenthes,
 c'est à dire Prenant & Donnant: mais si ce mot-là est vn de ceux qui anciennement
 sont sortis de la Grece, & depuis y ont esté rapportez, nous en discourrons cy-apres,
 & maintenant achetons de considerer le reste de l'opinion que nous auons en
 main: car Osiris & Isis, estans des bons Dæmons, ont esté transferez en la nature
 des Dieux: & quant à la puissance de Typhon qui s'en alloit deffaicte & fracassée,
 voire tirant aux derniers sanglots & battemens de la mort, ils ont aucuns sacri-

De Isis & d'Osiris.

fices & ceremonies où ils la reconfortent: & y en a aussi d'autres, esquels au contraire ils l'abbatent, & la diffament en certainer festes qu'ils ont: car ils iniurient & outragent les hommes rousseaux, & qui plus est, ils precipitent les asnes roux, comme font les Coptites, pourautant que Typhon a esté roux, & de la couleur d'un asne rouge: & les Busirites & Lycopolites se gardent entierement de sonner des trompettes, d'autant que leur son ressemble au cry de l'asne: & brief ils estiment que l'asne soit un animal immonde, pour la semblance de couleur qu'il a avec luy: & faisant des gasteaux es sacrifices des moys de Payni, & de Phaosi, ils y figurent dessus un asne lié: & au sacrifice du Soleil, à ceux qui veulent cognoistre Dieu, ils commandent qu'ils ne portent point de bagues d'or sur leurs corps, & qu'ils ne donnent point à manger à l'asne: & semble que les Pythagoriens mesmes eussent opinion, que Typhon estoit une puissance daemonique: car ils disent qu'il nasquit en un nombre pair de cinquante huit, & derechef que celle du nombre triangle est la puissance de Pluton, de Bacchus, de Mars: & que celle du quarré est de Rhea, de Venus, de Ceres, de Vesta & de Juno: & celle du Dodecagone, c'est à dire, à douze angles, est celle de Jupiter: & celle à cinquante & huit angles est celle de Typhon, ainsi comme Eudoxus a laissé par escript. Et les Égyptiens estimans que Typhon a esté roux de couleur, immolent & sacrifient les bœufs de la mesme couleur, en faisant si exquise & si diligente observation, que si il a un seul poil blanc ou noir, ils le reputent non sacrificable, parce qu'ils estiment que ce qui est bon à sacrifier, ne soit pas agreable aux Dieux: ains au contraire, desplaisant à eux, d'autant qu'ils pensent que ce soient des corps qui ont receu les ames de quelques mauuais & meschans hommes, transformez en d'autres animaux: & pourtant font-ils toutes les execrations & maledictions du monde dessus la teste, laquelle ils coupent, & puis la iettent dedans la riuere, au moins ils le faisoient ainsi anciennement, mais maintenant ils la donnent aux estrangers: & puis les presbtres, qui se nomment les Seelleurs, venoient à marquer ce bœuf que lon deuoit immoler, de la marque de leur seau, qui estoit, ainsi comme escrit Castor, l'image d'un homme à genoux, ayant les mains liees derriere, & l'espee à la gorge: semblable traictement font-ils à l'asne pour sa lourde rudesse & son insolence, non moins que pour sa couleur. Et pourtant surnommoient-ils Ochus, celui des Roys de Perse que plus ils haïssoient, comme execrable & abominable, l'Asne: & Ochus en estant aduerty leur dict, Cest asne-là mangera vostre bœuf. aussi feit-il immoler leur bœuf Apis, ainsi comme Dinon a laissé par escript. Et quant à ceux qui disent que Typhon, apres la bataille perduë, s'enfuit sept iournees dessus un asne, & que s'estant ainsi sauué, il engendra des enfans, Ierosolymus & Iudeus, il est tout manifeste qu'ils veulent tirer à toute force les histoires des Iuifs en ceste fable. Telles doctrines sont les coniectures que lon en peut tirer, mais pour en discourir un peu avec raison, considerons premierement les poincts où il y a plus de simplicité. Ainsi comme les Grecs allegorisent que Saturne est le temps, & que Juno est l'air, & que la generation de Vulcain est la transmutation de l'air en feu: aussi disent-ils que si Osiris H empres les Égyptiens s'entend estre le Nil, qui se mesle avec Isis, c'est à dire la terre, & que Typhon est la mer, dedans laquelle le Nil venant à entrer, se perd & se dissipe çà & là, sinon en tant que la terre en receuant une partie en est renduë fertile par luy, & s'y fait une lamentation, sacree sur le Nil, par laquelle on le deplore comme naissant à la main gauche, & se perdant à la main droite: car les Égyptiens estiment que la partie du Soleil leuant soit la face du monde, & la partie de Septentrion soit le costé droit, & la partie du Midy le costé gauche. Ce Nil doncques qui sourd à la main gauche, & se vient à perdre en la mer à la main droite, à bon droit est dit auoir sa naissance à la gauche, & sa mort à la droite. C'est pourquoy les presbtres ont la mer en abomination, & appellent le sel l'escume de Typhon, & est l'un des poincts

- A** poinçts qu'on leur defend, de n'yfer iamais de sel à la table, & la raison pourquoy ils ne saluent iamais les pilotes & gens de marine, pour autant qu'ils sont ordinairément sur la mer, & gagnent leur vie à l'art de nauiger, & est aussi l'une des principales causes pourquoy ils abominent le poisson, de sorte que quand ils veulent escrire le hair & abominer, ils peignent vn poisson : comme au vestibule, qui est deuant le temple de Minerue, en la ville de Sai, il y auoit peint vn petit enfant, vn vieillard, & puis vn esparuiier, & tout ioignant vn poisson, & à la fin vn cheual de riuere, qui signifioit
- .. soubz figure: O arriuans & partans, ieunes & vieux, Dieu hait toute violente iniustice : car par l'esparuiier ils representent Dieu, par le poisson haine & abomination, & par le cheual de riuere toute impudence de mal faire, d'autant que l'on tient qu'il tue son pere, & puis se mesle par force avec sa mere. Ainsi semblera-il que le dire des Pythagoriens, qui disoient que la mer estoit la larme de Saturne, soubz paroles couuertes voulussent donner à entendre, qu'elle estoit impure & immonde. J'ay bien voulu en passant alleguer cela, encore qu'il soit hors du propos de nostre fable, pource
- B** qu'il contient vne hystoire toute commune : mais pour reuenir à nostre propos, les plus sçauans des prestres entendent par Osiris non seulement la riuere du Nil, & par Typhon la mer, ains par l'un ils entendent generalement toute vertu de produire eau, & toute puissance humide, estimans que ce soit la cause materielle de generation, & la substance du germe generatif : & par Typhon ils entendent toute vertu deficatiue, toute chaleur de feu, & toute secheresse, comme chose qui est de tout poinçt contraire & ennemie de l'humidité : c'est pourquoy ils tiennent que Typhon estoit roussseau de poil, & de teinct iaunastre, & pour ceste raison ils ne rencontrent pas volontiers les hommes qui sont de telles couleurs, ny ne parlent pas, sinon enuis, à eux : au contraire ils feignent que Osiris estoit brun de couleur, pour autant que toute eau faict apparoir la terre, les vestemens, & les nuées mesmes noires, & l'humidité qui est dedans les ieunes hommes rend les cheveux noirs, & la couleur iaune, qui
- C** semble vne pallidité procedant de secheresse, qui est au corps de ceux qui ont passé la fleur & vigueur de leur aage : & la saison de la prime-verre est verdoyante, generatiue & douce : mais l'arriere-saison de l'Automne à faute d'humeur est ennemie des plantes, & maladiue pour les hommes. Et le bœuf qui publiquement est nourry en la ville de Heliopolis, que l'on appelle Mneuis, consacré à Osiris, & que les aucuns estiment estre pere d'Apis, est de poil noir, & est honoré en second lieu apres celui d'Apis. Dauantage toute la terre d'Égypte est fort noire entre les autres, comme ils appellent le noir des yeux Chemia, & l'accomparent & representent par le cœur, lequel est chaud & humide, & aussi à la fenestre partie du monde, comme le cœur est tourné vers la partie gauche de l'homme, & encline là : & disent que le Soleil & la Lune ne sont point voiturez dedans les chariots ou charrettes, ains dedans des bateaux, esquels ils nauignent tout à l'entour du monde, donnans par cela couuertement à entendre, qu'ils sont nez & nourris d'humidité. Et estiment que Homere ayant appris
- D** des Égyptiens, comme Thales, que l'eau estoit le principe de toutes choses, le met aussi, parce que Osiris est l'Ocean, & Isis est Thetis, qui nourrit & allaitte tout le monde : car les Grecs appellent la proiection de semence Apousian, & la commixtion du masle & de la femelle Synousian : & Hyos en Grec signifie fils, qui est deriué de ce mot Hydor, qui vaut autant comme eau, & Hysai signifie plouuoir, & surnomment Bacchus Hyes, comme qui diroit, maistre & seigneur de l'humide nature, qui n'est autre chose que Osiris. Et ce que nous prononçons Osiris, Hellanicus le met Hysiris, disant l'auoir ainsi ouy prononcer aux prestres, & l'appellent par tout ainsi, non sans apparence de raison, à cause de sa nature & de son inuention. Mais que ce soit Osiris vn mesme Dieu que Bacchus, qui est-ce qui par raison le doit mieux sçauoir que toy, ô Clea, attendu qu'en la ville de Thebes tu es la maistresse des

De Isis & d'Osiris.

Thyades, & que dès ton enfance tu as esté consacree & deuouëe par ton pere & par ta mere au seruice & à la religion d'Osiris? Mais si pour le regard des autres il est besoing d'alleguer des tesmoignages, nous laisserons les choses cachees & secretes: mais ce que les prestres font en public quand ils enterrent Apis, ayans apporté le corps sur vn radeau, ne differe en rien des cerimonies de Bacchus: car ils sont vestus de peaux de cerfs, & portent en leurs mains des iauelines, & crient à pleines testes, & se deménent fort, ne plus ne moins que ceux qui sont espris de la sainte fureur de Bacchus. C'est pourquoy plusieurs peuples de la Grece portrayēt la statuē de Bacchus avec vne teste de taureau, & les femmes des Eliens en leurs prieres le reclament & requierent de venir à elles avec son pied de bœuf: & les Argiens communément le surnomment *Bougenes*, qui est à dire, fils de vache: qui plus est ils l'inuoquent & l'appellent hors de l'eau au son des trompettes, iettans outre vn abyfme d'eau vn agneau pour le portier, & cachent leurs trompettes dedans leurs iauelines, ainsi comme Socrates l'escrit en son liure des saintes cerimonies. Et puis les faicts Titaniques & la nuit toute entiere s'accordent avec ce que lon racôte du demembrement d'Osiris, & à sa resurrection & renouvellement de vie: aussi font les sepultures, car les Ægyptiens monstrent en plusieurs lieux des sepultures d'Osiris: & les Delphiens pensent auoir les ossemens de Bacchus par deuers eux, qui sont inhumez pres de l'Oracle, & luy font les religieux vn sacrifice secret dedans le temple d'Apollo, quand les Thyades, qui sont les prestresses, commencent à remuer & entonner leur cantique de *Licnites*, qui est vn surnom de Bacchus, deriué de *Licnon*, qui signifie le berseau d'un petit enfant ou vn van. Or que les Grecs estiment que Bacchus soit le seigneur & maistre non seulement de la liqueur du vin, mais aussi de toute autre nature humide, Pindare en est suffisant tesmoing quand il dict,

Bacchus le donneur de liesse
Les arbres accroisse en largesse,
Car sa lueur sainte produict
Toutes les especes de fruit.

Voilà pourquoy il est estroitement inhibé & defendu à ceux qui seruent & reuerēt Osiris, de gaster vn arbre fruitier, & d'estouper vne fontaine: si n'appellent pas seulement la riuere du Nil, le decoulement d'Osiris, ains toute autre sorte d'eau: au moyen dequoy deuant ses sacrifices on porte tousiours en procession vne cruche à eau, en l'honneur de ce Dieu. Et puis ils peignent vn Roy, ou le climat meridional du monde, par vne feuille de figuier, & interpretent ceste feuille l'abbreuement & le mouuement de tous, & semble qu'elle se rapporte au membre naturel. Et quand ils celebrent la feste qu'ils appellēt des *Pamyliens*, qui est toute Bacchanale, ils monstrent & portent en procession vne statuē qui a le mēbre naturel, qui est trois fois aussi grād que l'ordinaire: car Dieu est le principe des choses, & tout principe par generation se multiplie soy-mesme. Or auons nous accoustumé de dire trois fois pour plusieurs fois, nombre finy pour infiny: cōme quand nous disons *Trismacares*, c'est à dire trois fois heureux, pour dire tres-heureux, & trois liens pour dire infinis: si d'aduenture le nombre ternaire n'a esté expressément & proprement choisi par les anciens: car la nature humide estant le principe & la generation de toutes choses, a engendré dès le commencement les trois premiers corps, à sçauoir l'eau, l'air, & la terre. Car le propos que lon adioustē à la fable, que Typhon ietta le membre viril d'Osiris en la riuere, & qu'Isis ne le peut trouuer, mais qu'elle en fait faire vne représentation semblable, & que l'ayant accoustre elle ordonna qu'on l'honorast, & qu'on le portast en pompe, tend à nous enseigner, que la vertu genitale & productiue de Dieu, eut l'humidité pour sa premiere matiere, & par le moyē d'icelle humidité se mesla parmy les choses qui estoient propres à participer de la generatiō. Il y a vn autre propos que tiennēt les Ægyptiens,

- A** Ægyptiens, que vn Apopis frere du Soleil faisoit là guerre à Iupiter, qu'Osiris porta secours à Iupiter, & luy ayda à deffaire son ennemy : au moyen dequoy il l'adapta pour son fils, & le nomma Dionysius, c'est à dire Bacchus. Si est facile à monstrier que la fabulosité de ce propos-là touche couuertement la verité de nature, car les Ægyptiens appellent Iupiter le vent, auquel rien n'est plus contraire que la secheresse enflammée, ce que n'est pas le Soleil, mais elle a grande consanguinité & conformité à luy. Or l'humidité venant à esteindre l'extremité de la secheresse, fortifie & augmente les vapeurs qui nourrissent le vent & le tiennent en vigueur : d'auantage les Grecs consacrent le lierre à Bacchus, lequel s'appelle en langage Ægyptien Chenosiris, qui signifie ainsi cōme lon dit, la plante d'Osiris : au moins Ariston, celuy qui a descript les colonies des Atheniens, dit l'auoir ainsi trouué en vne epistre d'Alexarchus. Il y a d'autres Ægyptiens qui tiennent que Bacchus estoit fils d'Isis, & qu'il ne s'appelloit pas Osiris : mais Arfaphes en la lettre Alpha, lequel nō signifie, ce disent-ils, prouesse & vaillance : ce que mesme donne à entendre Hermès en son premier liure des choses Ægyptiennes, là où il dit, qu'Osiris interpreté signifie pluuieux. Je laisse à alleguer Mnafas, qui adioute à Epaphus, Bacchus, Osiris & Sarapis : ie laisse aussi Anticlides, qui dict qu'Isis estoit fille de Promethéus, & qu'elle fut mariée avec Bacchus. Car les particulieres proprieté que nous auons dict qui sont en leur festes & sacrifices, font foy plus euidente & plus claire que nulle allegation de tesmoins : & entre les estoilles ils tiennent que la Caniculaire est consacrée à Isis, laquelle estoille attire l'eau : & puis ils honorent le Lion, & ornent les portes de leurs temples avec des testes de lion, ayans les gueules ouuertes, pource que le fleue du Nil deborde quand le Soleil passe par le signe du Lion. Or ainsi comme ils estiment & appellent le Nil decoulement d'Osiris, aussi tiennent-ils que le corps d'Isis est la terre, non pas toute, mais celle que le Nil en se meslant rend fertile & feconde, & de celle assemblée ils disent qu'il s'engendre Orus, qui n'est autre chose que la temperature & dispositiō de l'air, qui nourrit & maintient toutes choses : & disent que cest Orus fut nourry dedans les marets qui sont pres de la ville de Butus, par la Deesse Latone, pource que la terre eueuse & arrosée d'eaux, produit & nourrit les vapeurs qui esteignent & empeschent la grande secheresse. Ils appellent aussi les extremité de la terre, & les confins des riuages qui touchent à la mer, Nephtys : c'est pourquoy ils surnomment Nephtys la derniere, & disent qu'elle fut mariée à Typhon : & quand le Nil débordé & hors de ses riués approche de ces extremité-là, ils appellent cela l'adultere d'Osiris avec Nephtys, laquelle se cognoist à quelques plantes qui y sourdent, entre lesquelles est le Melilot, duquel, ce disent-ils, quand la graine vint à tomber, Typhon commença à s'appercevoir du tort qu'on luy faisoit en son mariage. Ainsi, disent-ils, que Isis enfanta Orus legitime, & Nephtys Anubis bastard : & en la succession des Roys, ils mettent Nephtys mariée à Typhon, qui fut la premiere sterile : & si cela ne s'entend point d'une femme, ains d'une Deesse ils entendent soubs ces paroles couuertes vne terre de tout point sterile & infructueuse pour sa dreté. Et la surprise de Typhon, & sa domination vsurpée, n'est autre chose que la force de la secheresse qui fut la plus forte, & qui dissipa toute humidité, qui est le Nil, matiere de produire en estre, & de croistre & augmenter tout ce qui naist de la terre. Et la Roynie d'Aethiopie qui vint à son secours, ce sont les vents Meridionaux venās de deuers l'Aethiopie : car quand ces vêts-là du Midy viennent à gagner les Etesiens, qui soufflent de la part de Septentrion, & chassent les nuës en l'Aethiopie, & par ce moyen empeschent que les grands rauages des pluyes ne deualent des nuës, alors la secheresse obtient le dessus qui brulle tout, & surmonte de tout point le Nil son contraire, qui pour sa foiblesse se retire & referre, tellement qu'il coule creux & bas, & se va perdre en la mer. Car ce que la fable dict, qu'Osiris fut enfermé dedans vn coffre, ou vn cercueil, ne veut autre chose

De Isis & d'Osiris.

signifier, que le retirement & appétissement de l'eau: c'est pourquoy ils disent que **E** Osiris disparut au mois d'Arthyr, lors que cessans de souffler du tout les vents Eteslés, le Nil se retire, & la terre se descouvre: & la nuit croissant l'obscurité croist, & la force de la lumiere décroist & se diminue: & les prestres alors font plusieurs ceremonies de tristesse, entre autres ils montrent vn bœuf aux cornes dorées, qu'ils couurent d'une couverture de lin teint en noir, pour représenter le dueil de la Deesse: car ils estiment que le bœuf soit l'image d'Osiris, & le vestement de lin la terre: si le montrent quatre iours durant, depuis le dixseptième du mois tout de reng, pource qu'il y a quatre choses qu'ils regrettent, & dont ils font demonstration de dueil: la premiere c'est le Nil, qui se retire & qui s'en va tarissant: la seconde, les vents du Septentrion qui se baissent, & les vents du Midy qui gagnent le dessus: la tierce, le iour qui devient plus court que la nuit: & apres tout, le denuement & la descouverture de la terre, avec le déuestement aussi des arbres, qui au mesme temps perdent leurs feuilles qui leur tombent: puis la nuit du dixneuvième iour il descend vers la mer, & les **F** prestres reuestus de leurs habits sacrez portent le coffre sacré, où il y a vn petit vase d'or, dedans lequel ils versent de l'eau douce: & adonc tous les assistans se prennent à crier, comme si Osiris estoit trouué, & puis ils destrempent de la terre avec de l'eau, & y meslant des plus precieuses senteurs & bonnes odeurs, en font vne petite image en forme de croissant, & la vestent & accoustrent, donnans clairement à cognoistre qu'ils estiment la substance de l'eau & de la terre estre ces Dieux-là. Ainsi ayant Isis recouuré Osiris & esleué Orus, fortifié par vapeurs, broüillas & nuées, Typhon fut bien surmonté, mais non pas tué, pource que la Deesse, qui est dame de la terre, ne voulut pas permettre que la puissance qui est contraire à l'humidité, fust du tout aneantie, ains seulement la lascha & la diminua, voulant que ce combat demourast, pource que le monde ne seroit point entier & parfait quand la nature du feu en seroit esteincte & ostée. Et si cela ne se dict entre eux, aussi ne seroit point ce propos vray-semblable, si quelqu'un le mettoit en auant, que Typhon iadis fust **G** venu au dessus d'une portion d'Osiris, pource que anciennement Égypte estoit la mer, de maniere qu'encore iusques auourd'huy dedans les mines où lon fouille, & parmy les montagnes, lon trouue force coquilles de mer, & toutes les fontaines, & tous les puits, qui sont en grand nombre, ont l'eau salmastre & amere, comme estant encore vn reste & reserue de la mer qui seroit là coulée. Mais avec le temps Orus est venu au dessus de Typhon: c'est à dire, qu'estant venue la temperature des fructs, qui ont temperé l'excessiue chaleur, le Nil a repoussé la mer, & montré la campagne à descouuert, qu'il a tousiours depuis remplie de plus en plus de nouveaux amas de terre: ce que tesmoigne l'experience que nous en voyons tous les iours à l'œil: car nous apperceuons encores iusques auourd'huy, que le fleuve apportant tous les iours de la nouvelle vase, & amenant du limon de la terre, la mer se retire tousiours petit à petit en arriere, & que la mer s'en va, parce que **H** ce qui estoit bas en elle, se remplit & se hausse par les continuels atterremens du Nil: & l'Isle de Pharos, qu'Homere disoit estre de son temps esloignée de la navigation d'une iournée de la terre ferme d'Égypte, est maintenant partie d'icelle, non qu'elle s'en soit approchée ou remontée vers la terre, mais pource que la mer qui estoit entre-deux a cedé au fleuve, qui continuellement a maçonné de nouveau limon, dont il a augmenté la terre ferme. Mais cela ressemble aux Theologiques interpretations que donnent les Stoïques: car ils tiennent que l'esprit generatif & nutritif est Bacchus, & celui qui bat & qui diuise est Hercules: celui qui reçoit, Ammon: celui qui penetre la terre, & les fructs, est Ceres, & Proserpine: celui qui passe à trauers la mer est Neptune: les autres meslans parmy les causes & raisons naturelles quelques vnes triées des Mathematiques, mesmement

- A** mesmement de l'Astrologie, estiment que Typhon soit le monde du Soleil, & Osiris celui de la Lune, pour ce que la Lune a vne lumiere generatiue, multipliant l'humidité douce & conuenable à la generation des animaux, & à la generation des plantes & des arbres: mais que le Soleil ayant vne clarté de feu pur, eschauffe & desseche ce que la terre produict, & ce qui verdoye & florit, tellement que par son embrasement il rend la plus grande partie de la terre totalement deserte & inhabitable, & en plusieurs lieux supplante la Lune: & pourtant les Égyptiens appellent tousiours Typhon Seth, qui vaut autant à dire, comme dominant & forçant: & content que Hercules conioinct avec le Soleil, enuironne le monde, & Mercure avec la Lune: au moyen dequoy les œuvres & effets de la Lune ressemblent aux actes qui se font par eloquence & par sagesse: & ceux du Soleil, à ceux qui se font à coups par force & puissance. Et disent les Stoïques que le Soleil s'allume de la mer, & s'en nourrit, mais que les fontaines & les lacs enuoyent à la Lune vne douce & delicate vapeur. Les Égyptiens feignent que la mort d'Osiris aduint le dixseptième iour du mois, auquel on iuge mieux qu'en nul autre, qu'elle est pleine: c'est pourquoy les Pythagoriens appellent ce iour-là obstruction, & ont du tout en grande abomination ce nombre là: car estant le seize nombre quarré, & le dixhuiet plus long que large, auxquels deux seuls entre les nombres plats il aduint, que les vnitez qui les enuironnent alentour sont égales aux petites aires contenuës au dedans, le seul dixseptième tombant entre deux les separe & desioinct l'un d'avec l'autre, & diuise la proportion sesquioctauè, estant coupé en interualles inégaux. Et y en a aucuns qui tiennent qu'Osiris vescu, les autres qu'il regna, vingt & huit ans: car autant y a-il de iours esclairez de la Lune, & en autant de iours enuironne elle son cercle: & pour ces cerimonies qu'ils appellent la sepulture d'Osiris, coupans du bois ils en font vn coffre courbé, en façon de croissant, pour autant que quand elle s'approche du Soleil, elle deuient pointuë & cornuë en forme de croissant, tant que finalement elle
- C** disparoit. Et quant au demembrement d'Osiris, qu'ils disent auoir esté coupé en quatorze pieces, ils donnent à entendre sous le voile de ces paroles couuertes, les iours qu'il y a du decours que la Lune va décroissant iusques à la nouvelle Lune, & le premier iour qu'elle commence à apparoir nouvelle, en s'eschappant des rais du Soleil & le passant, ils l'appellent bien imparfait: car Osiris est bien-faisant, & son nom signifie beaucoup de choses, mais principalement vne force actiue & bien-faisante, comme ils disent. Et son autre nom, qui est Omphis, Hermès dict qu'il signifie autant comme bienfaiteur: aussi estiment-ils que les montées des debordemens du Nil ont quelque respondance au cours de la Lune: car la plus haute qui se faict en la contrée Elephantine, monte iusques à vingt & huit coudées, autant qu'il y a de iours illuminez en chascue reuolution de la Lune: & la plus basse qui se faict pres de Mendes & de Xoïs est de six coudées, qui respond au premier quartier: & la moyëne
- D** qui se faict aux enuiron de Memphis, quand elle est iuste est de quatorze coudées, respondât à la pleine Lune: & que Apis est l'image viue d'Osiris, & qu'il nasquit alors que la lumiere generatiue descend de la Lune, & vient à toucher la vache quand elle appete le masse, & pour ce ressemble-il aux formes de la Lune, ayant des marques blanches & claires, fort obscurcies par les ombres du noir: c'est pourquoy ils solennisent vne feste à la nouvelle Lune du mois, qu'ils appellent Phamenoth, laquelle ils nomment l'entrée d'Osiris en la Lune, qui est le commencement de la prime vere: ainsi mettent-ils la puissance d'Osiris en la Lune. Ils disent qu'Isis, qui n'est autre chose que la generation, couche avec luy, pourtant appellent-ils la Lune la mere du monde, & disent qu'elle est de nature double, masse & femelle: femelle, en ce qu'elle est emplie & engrossie de la lumiere du Soleil: & masse, en ce que de rechef elle iecte & respand en l'air des principes de generation: pource que l'intemperature seche

De Isis & d'Osiris.

de Typhon ne gaigne pas tousiours, ains est bien souuent vaincue par la generation, E
& estant liée, se monstre de nouveau, & combat de rechef alencontre d'Orus, qui
n'est autre chose que ce monde terrestre, lequel n'est pas de tout poinct deliure de
corruption, ny aussi de generation. Il y en a d'autres qui veulent, que toute ceste fi-
ction ne represente couuertement autre chose que les eclipses: car la Lune eclipse
quand elle est au plein directement opposée au Soleil, & qu'elle vient à tomber dedās
l'ombre de la terre, comme quand Osiris fut mis dedans la biere, & au contraire aussi
elle le cache & fait disparoïr au trentième iour, mais elle n'oste pas du tout le Soleil,
comme aussi ne fait pas Isis Typhon. Mais Nephtys engendrant Anubis, Isis luy est
supposée, car Nephtys est la partie de dessous la terre qui ne nous apparoit point, &
Isis celle de dessus qui nous apparoit: & le cercle qui s'appelle Orizon, qui est com-
mun, & disgrege les deux hemispheres, se nomme Anubis, & se compare de figure à
vn chien, pource que le chien se sert de la veüe aussi bien la nuit que le iour, & sem-
ble qu'enuers les Ægyptiens Anubis a vne pareille puissance que Proserpine enuers F
les Grecs, estant & terrestre & celéste. Il y en a d'autres à qui il semble qu'Anubis est
Saturne, & pourtant qu'il porte en son ventre & engendre toutes choses, qui s'appel-
le Kyēin en langage Grec, pour ceste cause a esté surnomé Kyon, qui est à dire chien.
Il y a doncques quelque secret qui fait que quelques vns encore reuerent & adorent
le chien, car il fut vn temps qu'il auoit plus d'honneur en Aegypte que nul autre ani-
mal: mais depuis que Cambyfes eut tué Apis, & ietté par piece-çà & là, nul autre ani-
mal n'en approcha ny n'en voulut taster, sinon le chien, il perdit ceste prerogatiue
d'estre le premier, & plus honoré que nul autre des animaux. Il y en a d'autres qui ap-
pellent l'ombre de la terre, qui fait eclipser la Lune quand elle y entre, Typhon. Par-
quoy il me semble qu'il ne seroit pas hors de propos de dire, que particulièrement il
n'y a pas vne de ces interpretations qui soit entieremēt parfaicte, mais que toutes en-
semble disent bien & droictement: car ce n'est ny la seicheresse seulement, ny le vent,
ny la mer, ny les tenebres, mais tout ce qui est nuisible, & qui a vne partie propre à G
perdre & à gaster, tout cela s'appelle Typhon. Et ne faut pas mettre les principes de
l'vniuers en des corps qui n'ont point d'ames, ainsi que font Democritus & Epicurus:
ny ouurier & fabricant de la premiere matiere, vne certaine raison & vne proui-
dence, comme font les Stoïques, ayant son estre auant toutes choses, & commandāt
à tout: car il est impossible qu'il y ait vne seule cause bōne ou mauuaise qui soit prin-
cipe de toutes choses ensemble, pource que Dieu n'est point cause d'aucun mal, & la
concordance de ce monde est composée de contraires, comme vne lyre du hault &
bas, ce disoit Heraclitus: & ainsi que dict Euripide,

Iamais le bien n'est du mal separé,

L'un avec l'autre est tousiours temperé,

A fin que tout au monde en aille mieux.

Parquoy ceste opinion fort ancienne, descenduē des Theologiens & Legislateurs du H
temps passé iusques aux poētes & aux philosophes, sans que lon sçache toutefois qui
en est le premier auteur, encore qu'elle soit si auant imprimée en la creance & per-
suasion des hommes, qu'il n'y a moyen de l'en effacer, ny arracher, tant elle est fre-
quentée, non pas en familiers deuis seulemēt, ny en bruits cōmuns, mais en sacrifices
& diuines ceremonies du seruice des Dieux, tant des nations barbares que des Grecs
en plusieurs lieux, que ny ce monde n'est point flottant à l'aduenture sans estre regy
par prouidence & raison, ny aussi n'y a-il vne seule raison qui le tiēne & qui le regisse
avec ne sçay quels timons, ne sçay quels morts d'obeyssance, ains y en a plusieurs mes-
lez de bien & de mal: & pour plus clairement dire, il n'y a rien icy bas que nature por-
te & produise, qui soit de foy pur & simple: ne n'y a point vn seul despensier de
deux tonneaux qui nous distribue les affaires, comme vn tauernier fait ses vins, en les
mellant

- A** meslant & broüillant les vns avec les autres : ains ceste vie est conduite de deux principes, & de deux puissances aduersaires l'une à l'autre, l'une qui nous dirige & conduit à costé droict, & par la droite voye, & l'autre qui au contraire nous en destourne & nous rebute : ainsi est ceste vie meslee, & ce monde, sinon le total, à tout le moins ce bas & terrestre au dessous de la Lune, inegal & variable, subiect à toutes les mutations qu'il est possible : car s'il n'y a rien qui puisse estre sans cause precedente, & ce qui est bon de foy ne donneroit iamais cause de mal, il est force que la nature ait vn principe & vne cause dont procede le mal aussi bien que le bien. C'est l'aduis & l'opinion de la plus part & des plus sages anciens : car les vns estiment qu'il y ait deux Dieux de mestiers contraires, l'un auteur de tous biens, & l'autre de tous maux : les autres appellent l'un Dieu qui produit les biens, & l'autre Dæmon, comme fait Zoroastre le Magicien, que lon dit auoir esté cinq cents ans deuant le temps de la guerre de Troye. Cestuy donc appelloit le bon Dieu Oromazes, & l'autre Arimanius : & d'auantage il disoit, que l'un ressembloit à la lumiere, plus qu'à autre chose quelconque sensible, & l'autre aux tenebres & à l'ignorance : & qu'il y en auoit vn entre les deux qui s'appelloit Mithres : c'est pourquoy les Perses appellent encore celuy qui intercede & qui moyenne, Mithres : & enseigna de sacrifier à l'un, pour luy demander toutes choses bonnes, & l'en remercier : & à l'autre, pour diuertir & destourner les sinistres & mauuaises : car ils broient ne sçay quelle herbe, qu'ils appellent Omomi, dedans vn mortier, & reclament Pluto & les tenebres, & puis la meslant avec le sang d'un loup qu'ils ont immolé, ils la portent & la iettent en vn lieu obscur où le Soleil ne donne iamais : car ils estiment que des herbes & plantes les vnes appartiennent au bon Dieu, & les autres au mauuais Dæmon : & semblablement des bestes comme les chiens, les oyseaux & les herissons terrestres, soient à Dieu : & les aquatiques, au mauuais Dæmon, & à ceste cause reputent bien-heureux ceux qui en peuvent faire mourir plus grand nombre : toutefois ces sages-là disent beaucoup de choses fabuleuses des Dieux, comme sont celles cy, que Oromazes est né de la plus pure lumiere, & Arimanius des tenebres : qu'ils se font la guerre l'un à l'autre : & que l'un a fait six Dieux, le premier celuy de Beneuolence, le second de Verité, le troisieme de bonne Loy, le quatrieme de Sapience, le cinquieme de Richesse, le sixieme de Ioye pour les choses bonnes & bien-faittes : & l'autre en produit autant d'autres en nombre, tous aduersaires & contraires à ceux-cy. Et puis Oromazes s'estant augmenté par trois fois, s'esloigna du Soleil autant comme il y a depuis le Soleil iusques à la Terre, & orna le Ciel d'estres & d'estoilles, entre lesquelles il en establit vne comme maistresse & guide des autres, la Caniculaire. Puis ayant fait autres vingt & quatre Dieux, il les meit dedans vn œuf : mais les autres qui furent faicts par Arimanius en pareil nombre, gratterent & ratifierent tant cest œuf, qu'ils le percerent, & depuis ce temps-là les maux ont esté pelle-mesle brouillez parmy les biens. Mais il viendra vn
- D** temps fatal & predestiné, que cest Arimanius ayant amené au monde la famine ensemble & la peste, sera destruit & de tout poinct exterminé par eux : & lors la terre sera toute platte, vnice & egale, & n'y aura plus qu'une vie & vne sorte de gouvernement des hommes, qui n'auront plus qu'une langue entre eux, & viuront heureusement. Theoponipus aussi escrit que selon les Magiciens, l'un de ces Dieux doit estre trois mille ans vainqueur, & trois autres mille ans vaincu, & trois autres mille ans qu'ils doiuent demourer à guerroyer & à combattre l'un contre l'autre & à destruire ce que l'autre aura fait, iusques à ce que finalement Pluton sera delaisné, & perira du tout, & lors les hommes seront bien-heureux, qui n'auront plus besoing de nourriture, & ne feront plus d'ombre, & que le Dieu qui a ouuré, fait & procuré cela, comme ce pendant & se repose vn temps, non trop long pour vn Dieu, mais comme mediocre à vn homme qui dormiroit. Voyla ce que porte la fable controu-

De Isis & d'Osiris.

uee par les Mages. Et les Chaldées disent qu'entre les Dieux des planètes qu'ils ap-
pellent, il y en a deux qui font bien, & deux qui font mal, & trois qui sont communs
& moyens: & quant aux propos des Grecs touchât cela, il n'y a personne qui les ignore:
qu'il y a deux portions du monde, l'une bonne, qui est de Jupiter Olympien, c'est
à dire celeste: l'autre mauuaise, qui est de Pluton infernal: & feignent d'auantage, que
la Deesse Armonie, c'est à dire accord, est nee de Mars & de Venus, dôt l'un est cruel,
hargneux & querelleux, l'autre est douce & generatiue. Prenez garde que les Philo-
sophes mesmes conuiennent à cela, car Heraclitus tout ouuertement appelle la guerre,
pere, roy, maistre & seigneur de tout le monde, & dit que Homere quand il prioit,

Puisse perir au Ciel & en la terre,

Et entre Dieux & entre hommes, la guerre,

ne se donnoit pas de garde qu'il maudissoit la generation & production de toutes
choses qui sont venuës en estre par combat & contrarieté de passions, & que le Soleil
n'outre-passerait pas les bornes qui luy sont prefixes, autrement que les Furies mi-
nistres & aides de la Iustice le rencontreroient. Et Empedocles chante, que le princi-
pe du bien s'appelle Amour & amitié, & souuent Armonie: & la cause du mal,

Combat sanglant, & noise pestilente.

Quant aux Pythagoriens, ils designent & specifient cela par plusieurs noms, en ap-
pellant le bon principe, Vn, finy, reposant, droit, non pair, quarré, dextre, lumineux:
& le mauuais, Deux, infiny, mouuant, courbe, pair, plus long que large, inegal, gau-
che, tenebreux. Aristote appelle l'un forme, l'autre priuation: Et Platon, comme
vmbrageant & couurant son dire, appelle en plusieurs passages l'un de ces principes
contraires, le Mesme, & l'autre l'Autre: mais es liures de ses loix qu'il escriuit estant
desia vieil, il ne les appelle plus de noms ambigus ou couuerts, ny par notes significa-
tiues, ains en propres termes il dit, que ce monde ne se manie point par vne ame-seu-
le, ains par plusieurs à l'aduenture, à tout le moins, non par moins que deux, des-
quelles l'une est bien-faisante, l'autre contraire à celle-là, & produisant des effects cō-
traires: & en laisse encore entre deux vne troisieme cause, qui n'est point sans ame,
ny sans raison, ny immobile de soy-mesme, comme aucuns estiment, ains adiacente
& adherente à toutes ces deux autres, appellant toutefois tousiours la meilleure, la
desirant & la prochassant, comme ce que nous dirons cy apres le rendra manifeste,
qui accommodera la Theologie des Égyptiens avec la Philosophie des Grecs, par
ce que la generation, composition, & constitution de ce monde icy est meslee de
puissances contraires, non pas toutefois egales, car la meilleure le gaigne, & est plus
forte, mais il est impossible que la mauuaise perisse du tout, tant elle est auant im-
primee dedans le corps & dedans l'ame de l'univers, faisant tousiours la guerre à la
meilleure. En l'ame doncques l'entendement & la raison, qui est la guide & la con-
duitte, & le maistre de toutes les bonnes choses, c'est Osiris: & en la terre, es vents,
en l'eau, & au ciel, & aux astres, ce qui est ordonné, arresté & bien disposé en tempera-
ture, saisons & reuolutions, cela s'appelle decoulement ou defluxion d'Osiris, & l'i-
mage apparente d'iceluy: au contraire la partie de l'ame passionnee, violente, desrai-
sonnable, folle, est Typhon: & du corps ce qui est debile, indispos & maladif, qui est
turbulent par réps obscur, mauuais air, obscurcissement de Soleil, priuation de Lune,
deuoyements hors du cours naturel, disparition: toutes ces choses-là sont Typhons,
comme l'interpretation mesme du mot Égyptien le signifie, car ils appellent Typhō
Seth, qui vaut autant à dire comme supplantant, dominant, forceant. Il signifie aussi
bien souuent retour, & quelquefois aussi sursaut & supplantation: & disent aucuns
que l'un des familiers amis de Typhon, s'appelloit Bebon: & Manethus arriere dit,
que Typhon s'appelle aussi Bebon, qui signifie empeschement & retention, comme
estant la puissance de Typhon qui arreste & empesche les affaires qui sont bien ache-
minez

- A minez, & qui vont ainsi qu'il appartient. Voyla pourquoy des bestes priuees ils luy dedient & attribuent la plus grossiere & la plus lourde, qui est l'asne, & quant à l'asne nous en auons parlé au parauant : & des sauuages celles qui sont les plus cruelles, comme le Crocodile & le cheual de riuere. En la ville de Mercure ils monstrent l'image de Typhon, qui est vn cheual de riuere, sur lequel il y a vn esparuiet qui combat vn serpent, par le cheual representans Typhon, & par l'esparuiet, la puissance & l'autorité que Typhon ayant acquise par force, ne se soucie pas d'estre souuēt troublé, & de troubler aussi les autres par malice : & pourtant faisans vn sacrifice le septième iour du mois de Tybi, lequel sacrifice ils appellent la venue d'Isis du pays de la Phœnice, ils font sur les gasteaux du sacrifice vn cheual de riuere lié & attaché. Et en la ville d'Apollo la coustume estoit, qu'il falloit que chacun y mangeast du Crocodile, & à certain iour ils en font vne grande chasse, où ils en tuent tant qu'ils peuuent, & puis les iettēt deuant le temple. Ils disent que Typhon estant deuenu Crocodile est
- B eschappé à Orus, attribuans toutes les mauuaises bestes, les dangereuses plantes, les violentes passions, comme estans œuures ou parties, ou mouuements de Typhon : au contraire ils peignent & representent Osiris par vn sceptre sur lequel il y a vn œil peint, entendans par l'œil la prouoyance, & par le sceptre l'autorité & la puissance, comme Homere appelle Iupiter, celuy qui est maistre & seigneur de tout le monde, le souuerain & le clair-voyant, nous donnant à entendre par souuerain sa suprême puissance, & par clair-voyant sa sagesse & sa prudence. Ils le representent aussi souuent par vn esparuiet, d'autant qu'il a la veuë claire & aiguë à merucilles, & le vol merueilleusement viste & leger, & se remplit moins de viande, & est moins sur la bouche que nul autre : & dit-on qu'en volant par dessus des corps morts non ensepueles, il leur iette de la terre sur les yeux : & quand il fond sur la riuere pour boire, il dresse & herisse son pennache, puis quand il a beu il le rabat de rechef, par où il appert qu'il est fauue, & qu'il a eschappé le Crocodile, car si le Crocodile le happe,
- C son pennache luy demeure droit & herisse comme il estoit. Mais par tout où l'image d'Osiris est en forme d'homme, ils le peignent avec le membre viril droict, pour figurer sa vertu d'engendrer & de nourrir : & l'habillement qui reuest ses images, est tout reluisant comme feu, reputans le feu estre le corps de la puissance du bien, comme matiere visible d'une substance spirituelle & intellectuë. Voyla pourquoy il ne faut pas s'arrester au propos de ceux qui attribuent la sphere du Soleil à Typhon, attendu que iamais à luy ne s'attribue rien qui soit luyfant, ny salutaire, ny disposition, generation ou mouuement qui soit faite par mesure ny avec raison, mais si en l'air ou en la terre il se faict quelque emotion de vents ou d'eaux hors de saison, quand la cause primitiue d'une desordonnee & indetermince puissance vient à esteindre les vapeurs. Et puis es sacrez hymnes d'Osiris ils reclament & inuoquent celuy qui repose entre les bras du Soleil : & le trentième iour du mois Epiphi ils solennisent la
- D feste des yeux d'Orus, lors que le Soleil & la Lune sont en vne mesme droicte ligne, comme estimans non seulement la Lune, mais aussi le Soleil, estre l'œil & la lumiere d'Orus : & le vingt & huitième du mois de Phaophi, ils solennisent vne autre feste qu'ils appellent le baston du Soleil, qui est apres l'equinocce de l'automne, donnant couuertement à entendre, que le Soleil a besoing d'un soustien, d'un appuy, & d'un renfort, d'autant que sa chaleur commence à diminuer, & sa lumiere aussi s'encliriant & s'esloignant obliquement de nous : d'auantage ils portent alentour du temple sept fois vne vache enuiron le solstice d'hyuer, & ceste procession s'appelle le recerchemēt d'Osiris ou la reuolution du Soleil, comme desirant lors la Deesse les caux de l'hyuer : & font autant de tours, pour autant que le cours du Soleil depuis le solstice de l'hyuer iusques à celuy de l'esté se fait au septième mois. On dit aussi que Orus, le fils d'Isis, fut le premier qui sacrifia au Soleil le quatrième iour du mois, ainsi

De Isis & d'Osiris.

qu'il est escrit au liure de la natiuité d'Orus, combien qu'à chasque iour ils offrent par E
trois fois du parfum au Soleil : la premiere fois enuiron le Soleil leuant, de Resine : la
seconde fois sur le midy, de Myrrhe : & enuiron le coucher du Soleil, d'une compo-
sition qu'ils nomment Kyphi : l'interpretation & signifiante desquels parfums ie
declareray cy apres : mais ils pensent reuerer & honorer le Soleil par tout cela. Et
qu'est-il besoyn de ramasser beaucoup de telles choses, attendu qu'il y en a qui tout
ouuertement maintiennent qu'Osiris est le Soleil, & que les Grecs l'appellent Sirius,
mais que l'article que les Ægyptiens ont mis deuant, a fait que lon ne s'en est pas
apperceu : & que Isis n'est autre chose que la Lune, & que de ses images celles à qui
lon donne des cornes ne representent autre chose que le croissant : & ceux qui la
vestent de noir, signifient les iours qu'elle se cache, ou qu'elle s'obscurcit, esquels
elle court apres le Soleil : c'est pourquoy en leurs amourettes ils reclament la Lune :
& Eudoxus mesme dit, que Isis preside, regit & gouerne les amours : & en tout
cela encore y a-il quelque verisimilitude : mais de dire que Typhon soit le Soleil, il F
n'y faut pas seulement prester l'oreille. Et à tant reprenons de rechef nostre
premier propos. Car Isis est la partie feminine de la nature apte à receuoir toute
generation, pour laquelle occasion elle est appelée de Platon nourrice & tout re-
ceuant, & par plusieurs est surnommée Myrionymos, c'est à dire ayant noms in-
finis, d'autant qu'elle reçoit toutes especes & toutes formes, selon qu'il plaist à la pre-
miere raison de la tourner : mais elle a en elle vn amour naturellement imprimé de ce
premier & principal estre, qui n'est autre chose que le bien souuerain, & le poursuit
& desire : & au contraire elle fuit & repoulse la partie du mal, bien qu'elle soit la ma-
tiere & la place idoine & capable de receuoir l'une & l'autre : mais de soy-mesme elle
incline tousiours plus tost au bien, & se baille plus tost à engendrer & à semer en elle
des semblances & decoulements, car elle prent plaisir & se resiouit quand elle est en-
grossie du bien, & qu'elle en peut enfanter : car cela est vne representation & descri- G
ption de substance engendree en la matiere, & n'est cela qu'une figuration & imita-
tion de ce qui est. Voyla pourquoy ce n'est point hors de propos qu'ils feignent
que l'ame d'Osiris soit eternelle & immortelle, & que Typhon en deschire bien sou-
uent & perd le corps, & que Isis, errant çà & là, le va cherchant, & rassemblant les
pieces : car ce qui est bon & spirituel, consequemment n'est point aucunement sub-
iect à mutation ou alteration, mais ce qui est sensible & materiel, il moule plu-
sieurs images, & reçoit plusieurs raisons & plusieurs similitudes, ne plus ne moins
que les seaux & figures qui s'impriment en cire ne demeurent pas tousiours, ains sont
subiectes à changement, alteration, & à trouble, lequel a esté chassé de la superieu-
re region celeste, & enuoyé en bas, où il combat alencontre d'Orus, que Isis engen-
dre sensible, estant l'image du monde spirituel & intellectuel. C'est pourquoy on
dit que Typhon l'accusa de bastardise, comme n'estant pas pur & sincere, comme est H
son pere, le discours de l'entendement, qui est simple non melle d'aucune passion,
ains est cestuy-cy abastardy & adulteré, à cause qu'il est corporel : à la fin demeu-
rent les victoires à Mercure, qui est le discours de la raison, qui nous tesmoigne &
nous montre que la nature a produit ce monde materiel à la forme du spirituel &
intellectuel. Car la naissance d'Apollo, qui fut engendré d'Isis & d'Osiris lors que
les Dieux estoient encore dedans le ventre de Rhea, signifie couuertement que de-
uant que ce monde fust manifestement mis en euidence, & que la matiere de la rai-
son fust paracheuée, qui par nature estoit conuaincue d'estre imparfaite, la premiere
generation estoit desia faite : & c'est ce qu'ils appellent l'ancien Orus, car ce n'e-
stait pas encore le monde, mais vne image & vn dessein d'iceluy entendement :
mais cestuy est l'Orus déterminé, desiny & parfaict, qui ne tua pas du tout entiere-
ment Typhon, ains luy osta la force & la puissance de pouuoir plus rien faire. D'où
vient

- A vient qu'en la ville de Coptus on dit, que l'image de Orus tenoit en l'une de ses mains le membre viril de Typhon, & feint-on aussi, que Mercure luy osta ses nerfs, dont il fait des cordes à sa lyre: nous enseignans par cela, que la raison a mis d'accord tout ce qui au paravant estoit en discord: & ne tollit pas du tout entierement la puissance de perdre & de corrompre, ains la remplit & parfait: dont procede qu'elle est foible & debile, se meslant & attachant aux parties subiectes à mutation & alteration de tremblements & de concussions en la terre & de grandes ardeurs & vents extraordinaires & excessifs, & aussi de foudres, tonnerres & esclairs qu'elle produit en l'air, & empoisonne de pestilence les eaux & les vents de l'air, s'estendant & eleuant la teste iusques au Ciel de la Lune, obscurcissant & noircissant bien souuent ce qui de nature est clair & luyfant: comme les *Ægyptiens* cuidoient, & disent que Typhon tantost a donné vn coup sur l'œil à Orus, & tantost luy a arraché, & l'a auallé, & puis l'a rendu au Soleil: car par le coup ils entendent couuertement le decours de la Lune, qui se fait par chascun mois: & par la priuation totale de l'œil, l'eclipse & defaut de la Lune: à laquelle le Soleil remedie, en la reilluminant aussi tost comme elle est sortie de l'ombre de la terre. Mais la principale & diuine nature est composée de trois choses, de l'entendement, & de la matiere, & du composé de ces deux choses, que nous appellons le monde. Or Platon appelle ceste intellectuelle, l'idee, le patron & le pere: la matiere il la nomme la mere, la nourrice, & le fondement & la place de la generation: ce qui est produit de ces deux, il a accoustumé de l'appeller l'engendré & l'enfanté. Et pourroit-on à bon droit coniecturer, que les *Ægyptiens* auroient voulu comparer la nature de l'univers au triangle, qui est le plus beau de tous, duquel mesme il semble que Platon es liures de la Republique use à ce propos, en composant vne figure nuptiale: & est ce triangle de ceste sorte, que le costé qui fait l'angle droit est de trois, la base de quatre, & la troisième ligne, qu'on appelle soubtendue, est de cinq, qui a autant de puissance comme les deux autres qui font l'angle droit: ainsi faut comparer la ligne qui tombe sur la base à plomb au
- C masse, la base à la femelle, & la soubtendue à ce qui naît des deux: & Osiris au principe, Isis à ce qui le reçoit, & Orus au composé des deux: car le nombre ternaire est le premier nom pair, & parfait, le quatre est nombre quarré, composé du premier nombre pair, qui est deux: & cinq ressemble partie à son pere & partie à sa mere, estant composé du deux & du trois: & si semble que ce mot de Pan, qui est l'univers & le monde, soit deriué de Penté, qui signifie cinq: & si Pembasasthai signifioit anciennement nombrer: qui plus est, le cinq en soy multiplié fait vn quarré, qui est vingt-cinq, autant comme les *Ægyptiens* ont de lettres en leur Alphabet, & autant comme Apis vescu d'annees. Ils ont doncques accoustumé d'appeller Orus Kæmin, qui vaut autant à dire comme, veu, pour ce que ce monde est sensible & visible: & Isis aucunes fois s'appelle Mouth, & quelquefois Athyri ou Methyer, & entendent par le premier Mere, & par le second la belle maison d'Orus, comme Platon l'appelle, le lieu de generation, & receuant: le troisieme est composé de plein & de cause, car la matiere est pleine du monde, estant mariee au premier principe bon, pur & bien orné: & pourroit sembler que le poëte Hesiode, disant que toutes choses au commencement estoient le Chaos, la Terre, le Tartare & l'Amour, se fondeoit sur mesmes principes qui sont signifiez par ces noms-là, & qu'il entend par la terre Isis, par l'amour Osiris, & par le tartare Typhon, car par le Chaos il semble qu'il vueille entendre quelque place & quelque endroit du monde: & semble que les affaires mesmes appellent aucunement la fable de Platon, que Socrates recite au liure du conuiue, là où il expose la generation de l'Amour, disant que Penia, c'est à dire pauvreté, desirant auoir des enfans, s'alla coucher au long de Porus, c'est à dire richesse, qui dormoit, & qu'ayant esté engrossie de luy, elle enfanta Amour,

De Isis & d'Osiris.

qui de sa nature est meslé & diuers en toutes sortes, comme celuy qui est né d'un pere **E** bon, sage, & ayant tout ce qui luy fait besoyn, & d'une mere pauvre, indigente, & qui pour son indigence appéte autrui, & est tousiours apres à le chercher & requerir: car Porus n'est autre chose que le premier aimable, desirable, parfait, & n'ayant besoyn de rien: & appelle Penia la matiere, qui de soy-mesme est tousiours indigente du bien, par lequel elle est remplie, & qu'elle desire & participe tousiours: & celuy qui est engendré d'eux Orus (c'est le monde) n'est point immortel, ny impassible, ny incorruptible, ains tousiours engendrant tasche à faire par vicissitude de mutations, & par reuolution de passion de demourer tousiours ieune, comme si iamais ne deuoit perir. Or se faut-il seruir des fables, non comme de propos qui reellement subsistent, ains en prendre ce qui par similitude conuient à chacun. Quand doncques nous disons la matiere, il ne faut pas en le referant aux opinions de ie ne sçay quels philosophes, estimer que ce soit un corps sans ame, sans qualité, qui demeure quant à soy oysif, sans action quelconque: car nous appellons l'huile la matiere **F** d'un parfum, & l'or la matiere d'une statuë d'or, combien qu'ils ne soient pas de tout poinct hors de toute similitude: aussi disons nous que l'ame mesme & l'entendement de l'homme est la matiere de la vertu & de la science, & les baillons à former, dresser, & accoustre par la raison, & y en a eu quelques-uns qui ont dit, que l'entendement estoit le propre lieu des especes, & le moule des choses intelligibles. Comme aussi y a-il quelques naturels qui tiennent, que la semence de la femme n'a point de force de principe constituant en la generation de l'homme, & ne sert que de matiere & de nourriture seulement: suyuant lesquels il faut aussi entendre, que ceste Deesse ayant fruition du premier Dieu, & le hantant continuellement pour l'amour des biens & vertus qui sont en luy, ne luy resiste point, ains l'aime comme son mary iuste & legitime: comme nous disons que vne honneste femme qui iouit ordinairement de son mary, ne laisse pas pour cela de l'aimer & desirer, aussi ne laisse elle **G** pas à estre enamourée de luy, bien qu'elle soit tousiours avec luy, & qu'elle soit remplie de ses principales & plus sincerés parties: mais là où Typhon sur la fin y survient, elle s'en fasche & s'en contriste, & pour ce dit-on qu'elle en deméne dueil, & qu'elle recerche quelques reliques & quelques pieces d'Osiris, lesquelles, quand elle en peut trouuer, elle reçoit & recueille soigneusement, & les cache diligemment, comme de rechef elle en monstre & en produit d'autres d'elle mesme: car les raisons, les Idees, & les influences de Dieu qui sont au ciel & aux estoilles, y demourent quant à cela: mais celles qui sont semées parmy les corps sensibles & passibles en la terre & en la mer, & sont attachées aux plantes & aux animaux, y estans amorties, & enseuelies, se resueillent & resuscitent aucunes fois par generation. Voyla pourquoy la fable dit, que Typhon coucha avec Nephthys, & que Osiris aussi à la desrobee eut sa compagnie, car la puissance de perdre & amortir occupe principalement les **H** dernieres parties de la matiere, que lon appelle Nephthys & mort, & la vertu generatiue & conseruatrice y donne bien peu de semence foible & debile, estant perdue & amortie par Typhon, sinon en tant que Isis la recueillant la conserue & la nourrit & maintient: mais vniuersellement cestuy-cy vaut mieux, comme Platon & Aristote font d'opinion, & la puissance naturelle d'engédre & de conseruer se meut deuers luy, comme deuers l'estre, & celle de perdre & de gaster arriere de luy, vers le non estre: c'est pourquoy ils appellent l'un Isis, qui est un mouuement animé & sage, estant le mot deriué de Iesthai, qui signifie mouuoir par certaine science & raison, car ce n'est point un mot barbaresque. Mais ainsi que le nom general de tous Dieux & de toutes Deesses, qui est Theos, est dit, ou de Theaton, ou de Theon, dont l'un signifie visible, & l'autre courant: aussi & nous, & les Egyptiens, auons appelé ceste Deesse Isis, & de la science ensemble & du mouuement: ainsi dit Platon que
les

- A** les anciens qui l'ont appelée *Isia*, ont voulu dire *Osia*, c'est à dire sainte, comme *Noësis* & *Phronesis*, qui sont mouuemens de l'entendement & du iugement: & ont aussi imposé ce mot *Syniénai* à signifier ceux qui ont trouué & qui voyent à descouuert le bien & la vertu: comme aussi ils ont ignominieusement denommé de noms contraires les choses qui empeschent, gardent & arrestent le cours des choses naturelles, & ne les laissent aller, en les nommant *Kakia vice*, *Aporia* indigence, *Dilia* lâcheté, *Ania* douleur, comme gardant, *Iénai* ou *Iesthai*, c'est à dire, d'aller en auant. Quant à *Osiris* c'est vn nom composé de *Osios* & *Ieros*, c'est à dire saint & sacré: car c'est la raison ou Idee commune des choses qui sont au Ciel, & en bas, dont les anciens auoient accoustumé de nommer les vnes saintes, & les autres sacrees: & la raison qui montre les choses celestes, & le cours des choses qui se meuuent la-hus, s'appelle *Anubis*, & quelquefois *Hermanubis*, l'vn comme conuenable à celles de la-hus, & l'autre à celles de ça bas: pourtant sacrifient-ils à l'vn vn coq blanc, & à l'autre vn iaune, pour ce qu'ils estiment les choses de la-hus pures, simples & luisantes, & celles de ça bas meslees & de diuerses couleurs: & ne se faut pas esmerueiller si lon a desguisé les termes à la façon des mots Grecs, car il y en a infinis autres qui ont esté transportez de la Grece avec les hommes qui en sont autrefois sortis, & y demeurent encore iusques aujourdhuy, comme estrangers, hors de leurs pays: entre lesquels il y en a aucuns qui sont cause de faire calomnier les poëtes, qui les rappellent en vsage, comme s'ils parloient barbaresquement, par ceux qui appellent telles dictions poëtiques, & obscures, glottas, qui est à dire langues: mais es liures que lon appelle de *Mercur*, on dit qu'il y a escript touchant les noms sacrez, que la puissance ordonnée sur la reuolution du Soleil, les *Ægyptiens* l'appellent *Orus*, & les Grecs *Apolon*, & celle qui est ordonnée sur le vent, aucuns l'appellent *Osiris*, les autres *Sarapis*, les autres en *Ægyptien* *Sothi*, qui signifie estre grosse ou engrossement: d'où vient que par vn peu de la deprauation de langage l'estoille *Caniculaire* a esté nommée
- C** *Kyon*, qui vaut autant à dire comme chien, *Caniculaire*, laquelle on estime propre à *Isis*: bien sçay-ie qu'il ne faut point estriuer touchant les noms, toutefois ie cederois plus tost aux *Ægyptiens* de ce mot *Sarapis* que de *Osiris*: celui-là est estranger, & celui-cy Grec, mais l'vn & l'autre signifie vne mesme puissance de la diuinité. A quoy se rapporte le langage des *Ægyptiens*, car bien souuent ils appellent *Isis* du nom de *Minerue*, qui signifie en leur langue autant comme, Je suis venu de moy-mesme: qui montre & donne à entendre vn volontaire mouuement: & *Typhon*, comme nous auons dit, se nomme *Seth*, *Bebon*, & *Smy*, tous lesquels noms signifient vn arrest violent, & empeschant vne contrariété, & vn deuoyement & destournement. D'auantage ils appellent la pierre de l'aimant l'os de *Orus*, & le fer l'os de *Typhon*, ainsi que l'escriit *Manethus*: car ainsi comme le fer semble quelquefois suiure, & se laisser tirer à l'aimant, & bien souuent aussi se retourne & repoulse alencontre: aussi le bon & salutaire mouuement qui à la raison du monde conuertit & amene à foy, & adoucit par remonstrances de bonnes paroles celle dureté de *Typhon*, mais aussi quelquefois elle rentre en foy-mesme, & se cache & profonde en impossibilité. D'auantage *Manethus* dit, que les *Ægyptiens* feignent de *Iupiter*, que ses deux cuisses se prirent & vnirent tellement ensemble, qu'il ne pouuoit plus marcher, en sorte que de honte il se tenoit en solitude, mais que *Isis* les luy coupa & les diuisa d'ensemble, tellement qu'elle le feit marcher droit à son aise. Laquelle fable donne couuertement à entendre que l'entendement & la raison de Dieu marchent inuisiblement, & secrettement procedent à generation par mouuement: ce que montre & donne raisiblement à entendre le *Seistre*, qui est la cresserelle d'egrain, dont on vse es sacrifices d'*Isis*, qu'il faut que les choses se secoüent, & ne cessent iamais de se remuer, & quasi s'esueillent & se croulent, comme si elles s'endormoient ou languissoient: car ils disent

De Isis & d'Osiris.

qu'ils destournent & repoulsent Typhon, avec ses Seistres, entendans que la corrup-
tion liant & arrestant la nature, le mouuement de rechef la dessie, reléue & remet
fus par la generation. Et ceste cresserelle estant ronde par dessus sa curuature con-
tient quatre choses qui se secoüent : car la portion du monde qui naist ou qui meurt,
c'est à dire subiecte à corruption & alteration, est contenue par la sphære de la Lune,
au dedans de laquelle toutes choses s'esmeuent & se changent par les quatre ele-
mens, du feu, de la terre, de l'eau, & de l'air : & sur la rondeur du Seistre au plus haut
ils y engrauent la figure d'une chatte, ayant la teste d'un homme, & au dessoubs des
choses que lon secoüe : quelquefois ils y engrauent le visage d'Isis, & quelquefois
celuy de Nephthys, signifiâns par ces deux faces la naissance & la mort, car ce sont les
mutations & motions des elemens : & par la chatte ils entendent la Lune, à cause de
la varieté de sa peau, qu'elle besongne la nuit, & qu'elle porte beaucoup : car on
dit qu'elle porte premierement vn chatton à la premiere portee, puis à la seconde
deux, à la troisième trois, & puis quatre, & puis cinq, iusques à sept fois, tant qu'elle
en porte en tout vingt-huict, autant comme il y a de iours de la Lune : ce qui à l'ad-
uenture est fabuleux, mais bien est veritable que les prunelles de ses yeux se remplis-
sent & s'ellargissent en la pleine Lune, & au contraire s'estroissent & se diminuent
au decours d'icelle : & quant au visage d'homme qu'ils luy baillent, ils entendent par
là la subtilité ingenieuse & de grand discours des mutations de la Lune. Et pour e-
straindre tout ce propos en peu de paroles, la raison veut que nous n'estimions point,
ny que le Soleil, ny l'eau, ny que la terre, ny le Ciel, soient Isis ou Osiris, ny sembla-
blement aussi que la seicheresse, l'ardeur excessiue de chaleur, ny le feu, ny la mer,
soient Typhon, mais simplement tout ce qui est en telles choses demesuré, inconstât,
desordonné, tant en excez qu'en defect, il le faut attribuer à Typhon : & au contrai-
re tout ce qu'il y a de bien disposé, bien ordonné, de bon & de profitable, il nous faut
croire que c'est ceuvre d'Isis, & l'image, l'exemple & la raison d'Osiris : & en l'hono-
rant & adorant de ceste sorte, nous ne pecherons point, & qui plus est nous osterons
toute la deffiance & doute d'Eudoxus, qui demande pourquoy c'est que Ceres n'a
aucune part de la superintendance des amours, & qu'on la donne toute à Isis, & pour-
quoy Bacchus ne peut ny augmenter & croistre le Nil, ny commander aux morts :
car pour en dire vne raison generale & commune, nous estimons que ces Dieux-là
ont esté ordonnez pour la portion du bien, & que tout ce qu'il y a en la nature de
beau ou de bon est par la grace & par le moyen de ces Deitez-là, l'un qui en donne les
premiers principes, & l'autre qui les reçoit & qui demeure perseuerante. Et par mes-
me moyen satisferons à la commune & aux mechaniques, qui se delectent en des chā-
gemens des saisons de l'annee, ou bien de la procreation, semailles & labourages
des fruiets, qui approprient & accommodent les propos de ces Dieux-là, à ce en quoy
ils prennent plaisir, disâns que lon ensepuelit Osiris, quand on couure la semence
dedans la terre, & que de rechef il resuscite & retourne en vie, quand il commence
à germer : & que c'est pour ce que lon dit, que quand Isis se sentit enceinte elle s'at-
tacha au col vn preseruatif le sixième iour du mois qu'ils appellent Phaophi, & qu'elle
enfanta Harpocrates enuiron le solstice de l'hyuer, n'estant pas encore à terme
avec les premieres fleurs & premiers germes : voyla pourquoy on luy offre les pri-
mices de lentilles, & solennise-lon les iours feriaux de ses couches apres l'equinocce
de la prime-verre. Car quand les hommes populaires entendent cela, ils y prennent
plaisir & le croyent, prenans la verisimilitude pour le croire des choses ordinaires
& qui nous sont tous les iours à la main. Et n'y a point d'inconuenient premiere-
ment qu'ils nous fassent les Dieux communs, & non pas propres & particuliers aux
Ægyptiens, & qu'ils ne comprennent pas seulement le Nil & la terre que le Nil arro-
se, sous ces noms-là, ny en nommât leurs lacs, leurs alifiers, & la natiuité des Dieux,
ils ne

A ils ne priuent pas les autres hommes qui n'ont point de Nil, ny de Butus, ny de Memphis, & neantmoins recognoissent & ont en veneration la Deesse Isis, & les Dieux qui l'accompagnent, desquels ils ont depuis nagueres appris à nommer aucuns des noms mesmes des Égyptiens : mais de tout temps ils ont eu la cognoissance de leur vertu & puissance, & à raison de ce les ont adorez. Et secondement, qui est bien plus grande chose, à fin qu'ils craignent & se donnent bien garde de dissouldre & defiler, sans y penser, les diuinitez en des riuieres, des vents, des labourages, & autres alterations de la terre, mutations de saisons & qualitez de l'air, comme font ceux qui tiennent que Bacchus soit le vin, Vulcain soit la flamme, & Proserpine, comme dit Cleanthes en vn passage, soit l'esprit qui penetre dedans les fruiçts de la terre, & comme vn poëte dit touchant les moissonneurs,

Lors qu'à Ceres les ieunes iouuenceaux

Vont decoupant les membres à faisceaux.

B Car ceux-là ressemblent proprement à ceux qui cuident que les voiles, les chables & cordages, ou l'anchre, soient le pilote : & que les filets, la trame & l'estaim, & la nauette, soient le tisserand : & que le gobelet, la ptisane, ou l'hydromel, soient le medecin : mais en ce faisant ils s'impriment de mauuaises & blasphemés opinions alencontre des Dieux, en donnant des noms des Dieux à des natures & des choses insensibles, inanimees & corruptibles, dont ils se seruent necessairement, & ne s'en scauroient passer. Car il ne faut pas entendre que ces choses-là elles mesmes soient Dieux, pour ce que rien ne peut estre Dieu qui n'a point d'ame, ne qui soit subiect, ny sous la main à l'homme, mais par ces choses-là nous auons cogneu que ce sont les Dieux qui les nous donnent perdurables, & qui nous les prestent pour nous en seruir, non qu'ils soient autres en vn pays, & autres en vn autre, ne qu'ils soient Grecs, ou estrangers barbares, ny Septentrionaux & Meridionaux, ains comme le Soleil, & la Lune, le Ciel & la terre, & la mer, sont communs à tous, mais ils sont appelez de diuers noms en diuers lieux : ainsi d'une mesme intelligence qui ordonne tout le monde, & d'une mesme prouidence qui a soing de le gouverner, & des puissances ministeriales sur tout ordonnees, autres noms & autres honneurs selon la diuersité des loix ont esté donnees, & vsent les presbtres de marques & mysteres, aucuns plus obscurs, autres plus clers, pour conduire nostre entendement à la cognoissance de la diuinité : non sans peril toutefois, par ce que les vns ayants failly le droit chemin sont tombez en superstition, & les autres fuyans la superstition, comme si c'estoit vn marais, ne se donnent de garde qu'ils tombent dedans le precipice d'impieté. Et pourtant faut-il en cela prendre la raison de la philosophie, qui nous guide en ces saintes contemplations, pour dignement & religieusement penser de chascune chose qui s'y dit & qui s'y fait, à fin qu'il ne nous aduienne comme à Theodorus, qui disoit que la doctrine qu'il tendoit de la main droite, aucuns de ses auditeurs la prenoient & receuoient de la main gauche : aussi que prenans en autre sens & en autre part qu'il ne conuient, ce que les loix ont ordonné touchant les festes & les sacrifices, nous ne faillions lourdement : car que toutes choses se doiuent en cela rapporter à la raison, on le peut veoir & cognoistre par eux-mesmes, car le dix-neufiesme iour du premier mois faisans feste à Mercure, ils mangent du miel & des figues, & disent en les mangeant, C'est vne chose douce que la verité. Et quant au preseruatif qu'ils feignent que Isis prit en sa groisse, on l'interprete, voix veritable : & quant à Harpocrates, il ne faut point penser que ce soit vn Dieu ieune, & non encore d'aage parfait, ny aussi aucun homme, ains que c'est le superintendant & correcteur du langage que doiuent les hommes tenir des Dieux, estant encore ieune, imparfait, & non bien articulé : c'est pourquoy il tient vn anneau au deuant de sa bouche, qui est le signe & la marque de taciturnité & de silence. Et au mois de Mesori, luy apportans

De Isis & d'Osiris.

• des legumages, ils disent, La langue est fortune, la langue est dæmon. Et de toutes ^E les plantes qui sont en Ægypte, on tient que le Pescher luy est consacré plus que nul autre, pour ce que son fruit ressemble à vn cœur, & sa feuille à vne langue: car de toutes les choses qui sont naturellement en l'homme, il n'y en a pas vne qui soit plus diuine que le langage, & le parler, mesmement des Dieux, ne qui le face plus approcher de sa beatitude: c'est pourquoy ie conseille à tout homme qui vient par deçà à l'oracle, de saintement penser, & honnestement parler: là où plusieurs es processions & festes publiques font toutes choses dignes de mocquerie: & combien que lon y face crier par la voix des Huissiers & Heraults, que lon se taife & se tienne de mal parler, ils ne laissent pas de caqueter des Dieux, & de penser les plus deshonestes choses du monde. Comment doncques est-ce que lon se comportera es sacrifices tristes, & sentens leur dueil, où il est prohibé de rire, s'il n'est licite ny de laisser & omettre rien des ceremonies accoustumees, ny de mesler les opinions des Dieux, ny les broüiller & confondre de suspicions faulces? Les Grecs en font de presque ^F semblables, & presque en vn mesme temps que les Ægyptiens: car en la feste des Thesmophories à Athenes, les femmes ieunent assises sur la terre, & les Bœotiens remuent les maisons d'Achaia, qu'ils appellent Ceres, nommans ceste feste-là odieuse, comme si Ceres estoit en tristesse pour la descente de sa fille aux enfers: & est ce mois-là, celuy auquel apparoiſſent les Pleiades, & que lon commence à semer, que les Ægyptiens appellent Athyr, & les Atheniens Pyanepsion, & les Bœotiens le nomment Damatrien, comme qui diroit Cereal. Et Theopompus escrit, que ceux qui habitent vers l'Occident estiment & appellent l'hyuer Saturne, l'esté Venus, la prime vere Proserpine, que de Saturne & de Venus toutes choses ont esté engendrees. Et les Phrygiens cuidans que Dieu dorme l'hyuer, & que l'esté il veille, ils celebrent en vne saison la feste du dormir, & à l'autre du resueil de Dieu: mais les Paphlagoniens disent qu'il est retenu prisonnier, & qu'il est lié en hyuer, & que à la prime vere il est deslié, & commence à se mouuoir: & nous donne la saison occasion ^G de soupçonner, que la triste chere qu'ils font c'est pour ce que les fruits sont cachez: lesquels fruits les anciens iadis n'estimoient pas estre Dieux, ains des dons vtiles & necessaires pour viure ciuilement, & non fauuagement & bestialement: mais en la saison qu'ils voyoient les fruits des arbres disparoïr & defaillir totalement, & ceux qu'ils auoient eux-mesmes semez, ils les remettoient encore en terre, en fendant la terre bien petitement & bien maigrement avec leurs propres mains, sans autremét estre affeurez de ce qui en deuoit succeder & venir à perfection: ils faisoient beaucoup de choses semblables à ceux qui inhumant les corps en terre, & qui portent le dueil. Et puis ainsi que nous disons que celuy qui achette les liures de Platon achete Platon, & disons que celuy iouë Menander qui iouë les comedies de Menander: aussi eux ne faignoient point d'appeller des noms des Dieux les dons ou les inuentions d'iceux, en les honorant & reuerant pour le besoing qu'ils en auoient. Mais ^H les suruiuans prenans cela lourdement, & le retournans ignorantement, attribuoïent aux Dieux mesmes les accidents de leurs fruits: & non seulement appelloient la presence des fruits, la naissance des Dieux: & l'absence, le trespas d'iceux: mais aussi le croyoient & le tenoient ainsi: tellement qu'ils se sont remplis eux-mesmes de plusieurs mauuaises & confuses opinions des Dieux: encore qu'ils eussent la faulseté & absurdité de leurs opinions toute euidente deuant leurs yeux, non seulement Xenophanes le Colophonien, & autres qui ont depuis admonesté les Ægyptiens s'ils les estimoient Dieux, qu'ils ne les lamentassent point: & s'ils les lamentoient, qu'ils ne les estimassent point Dieux: mais aussi que c'estoit vne vraye mocquerie, en les lamentant les prier de leur ramener de rechef de nouueaux fruits, & les faire venir à maturité, à fin que de rechef ils les consumassent, & de rechef les plorassent & lamentassent.

A lamentassent. Mais cela ne va pas ainsi, car ils plorent & lamentent leurs fruits qu'ils ont consumez, & prient les auteurs & donateurs d'iceux, de leur en donner & faire croistre de rechef d'autres nouveaux, au lieu de ceux qui sont faillis. Voyla pourquoy c'est que les Philosophes disent tresbien, que ceux qui n'ont pas appris à bien prendre les paroles, vsent aussi mal des choses: comme, pour exemple, les Grecs qui n'ont pas appris ny accoustumé d'appeller les statues de bronze ou de pierre, & les images peintes, statues & images faites à l'honneur des Dieux, mais Dieux mesmes: & puis prennent la hardiesse de dire, que Lachares despouilla Pallas, & Dionysius le tyran tondit Apollo, qui auoit vne perruque d'or, & Iupiter Capitolin durant les guerres ciuiles fut brûlé & consumé par le feu: & ne se donnent pas garde en ce faisant, qu'ils attirent & reçoient de faulx opinions qui suivent ces noms-là: mesmement les Égyptiens entre toutes autres nations, touchant les bestes qu'ils honorent. Car quant aux Grecs ils disent bien en cela, & croient que la Colombe est
B oyseau sacré à Venus, le Dragon à Minerue, le Corbeau à Apollo, & le Chien à Diane, comme dit Euripide,

Diane qui chasse la nuit,

Le chien est son plaissant deduit.

Mais les Égyptiens, au moins la plus part, entretenans & honorans ces animaux-là, comme s'ils estoient Dieux eux-mesmes, ils n'ont pas seulement remply de risée & de mocquerie leur seruice diuin, car cela est le moins de mal qui soit en leur ignorance & sottise, mais il s'en engendre es cœurs des hommes vne forte opinion, qui attire les simples & infirmes en vne pure superstition, & iette les hommes aigus d'entendement ou audacieux en pensemens bestiaux & pleins d'impiété: c'est pourquoy il ne fera pas mal à propos de dire, en passant, de cela ce qui en est plus vraysemblable. Car de penser que Typhon ait mué les Dieux espouventez es corps de ces bestes-là, comme se cachans dedans les corps des Cigognes, des chiens, ou des espar-
C uiers, cela surpasse toute monstruosité de fiction & de fables: & semblablement de dire que les âmes de ceux qui trespasent, demeurans encore en estre, renaissent seulement es corps de ces animaux-là, il est aussi hors de toute verisimilitude: & quant à ceux qui en veulent rendre quelques causes & raisons ciuiles, les vns disent que Osiris, en son grand exercite, ayant departy sa puissance en plusieurs bandes & compagnies, il leur donna à chacune, pour enseignes, des figures d'animaux, desquels chacune bande depuis honora & eut en veneration le sien, comme chose sainte. Les autres disent, que les Roys successeurs d'Osiris, pour espouventer leurs ennemis, porterent en bataille le deuant de telles bestes faictes d'or & d'argent sur leurs armes. Les autres alleguent, qu'il y eut quelque Roy aduisé & caut, qui cognoissant que les Égyptiens de leur nature estoient legers & prompts à se
D reuolter, & à emouuoir seditions, & que pour leur grande multitude ils feroient mal-aisez à contenir & deffaire s'ils estoient bien conseillez, & qu'ils s'entr'entendissent les vns avec les autres, il fema parmy eux vne eternelle superstition, laquelle leur seroit occasion d'inimitié & dissension qui ne finiroit iamais entre-eux: car leur ayant commandé de reuerer des bestes qui auoient naturelle inimitié & guerre continuelle les vnes contre les autres, voire qui s'entremangeoient les vnes les autres, chascun peuple voulant secourir les siennes, & se courrouceant quand on leur faisoit desplaisir, ils ne se donnerent garde qu'ils se tuerent eux-mesmes pour les inimitiez qui estoient entre les animaux qu'ils adoroient, & qu'ils s'entre-haïrent mortellement les vns les autres: car iusques auourd'huy encore, il n'y a que les Lycopolites qui mangent du mouton, pour ce que le loup, qu'ils venerent comme vn Dieu, est son ennemy: & iusques à nostre temps les Oxyrinchites, pour autant que les Cynopolites, c'est à dire, les habitans de la ville du Chien, mangent le

De Isis & d'Osiris :

poisson qui se nomme Ozyrinchos, comme qui diroit Bec-agu, quand ils peuuent E attraper vn chien ils le sacrifient, comme vne hostie, & le mangent: & pour ceste occasion aians emeu la guerre les vns contre les autres, ils s'entrefeirent beaucoup de maux, & depuis en aians esté chastiez par les Romains, ils s'appointerent. Et pour autât que le vulgaire dit, que l'ame de Typhon mesme fut decoupee en ces animaux-là, il sembleroit que ceste fiction vouldroit dire, que toute mauuaise, bestiale, & sauuage nature, est & procede du mauuais Dæmon, & que pour le pacifier & addoucir qu'il ne leur face mal, ils honorent & reuerent ainsi ces bestes-là. Et si d'aduenture il aduient vne grande ardeur, & mauuaise seicheresse, qui cause des maladies pestilentes, ou d'autres calamitez estranges & extraordinaires, les prestres amènent quelque vne des bestes qu'ils seruent & honorent de nuict en tenebres, sans en faire bruit ny en rien dire, & la menassent du commencement & luy font peur, puis si le mal continue ils la sacrifient & la tuent, estimants que cela soit comme vne punition & chastiment du mauuais Démon, ou quelque grande purgation qui se fait pour notables inconueniens: car mesme en la ville de Idithya, ainsi que Manethon recite, ils brusloient des hommes vifs, & les appelloient les Typhoniens, & en faisant par vn tamis les cendres, les dissipoient & semoient çà & là, mais cela se faisoit publiquement & manifestement à certain temps, & es iours qu'ils appelloient Cynades: mais les immolations des bestes qu'ils auoient pour sacrees, se faisoient secrettemēt, & non à certain temps ny à iours prefix, ains selon les occurrences des inconueniēs qui aduenoient: & pourtant le commun peuple n'en sçait ny n'en voit rien, sinon quand ils les ont inhumees, & qu'en presence de tout le peuple ils en monstrent quelques vnes des autres, & les iettent quant & quant, pensans que cela attriste en contr' eschange Typhon, & repri-
me la ioye qu'il a de mal faire. Car il semble que Apis avec quelque peu d'autres animaux, soit consacré à Osiris, combien qu'ils luy en attribuent la plus part: & si ce propos est veritable, ie pense qu'il signifie ce que nous cerchons, & ceux qui sont de tous confessez, & qui ont honneurs communs, comme la Cigogne, l'Esparuier & le G Cynocephale, & Apis mesme, car ainsi appellent-ils le Bouc en la ville de Mendes. Il reste doncques l'utilité & la marque significatiue, car les vns participent de l'une des raisons, & les autres des autres: car le bœuf, le mouton, & l'Ichneumon, il est certain qu'ils les honorent pour l'utilité & pour le profit qu'ils en reçoient, comme les habitans de Lemnon honorent les aloüettes, pour ce qu'elles trouuent les œufs de fauterelles, & les quassent: & les Theffaliens semblablement les Cigognes, pour autant que leurs terres aians produit grand nombre de serpens, les Cigognes qui suruindrēt les feirent tous mourir, à raison dequoy ils feirent vn edict, que quiconque tueroit vne Cigogne, il seroit bāny du pays. Et l'aspic, la belette, & l'escharbot, d'autant qu'ils voyoient en eux ne sçay quelles petites images reluire de la diuinité, comme nous aperceurons le corps du Soleil en vne goutte d'eau: car il y en a beaucoup qui cuident encore, & le disent, que la belette s'accompagne avec son masse, & qu'elle fait ses pe-
rits par la bouche: & disent que c'est vne figure & representation de la parole qui se H forme & procede de la bouche. Et quant aux escharbots ils tiennent, qu'en toute leur espee il n'y a point de femelle, & que tous les masses iettent leur semence dedans vne certaine matiere qu'ils forment en façon de boule, laquelle ils poulsent à reculons, comme il semble que le Soleil tourne le Ciel au contraire de luy, qui a son mouuement de l'Occident en Orient: & l'Aspic pour ce qu'il ne vieillit point, & qu'il se remue sans instruments de mouuement avec vne grande facilité, vistesse & soupplisse, & pour ce l'ont-ils comparé à l'astre du Soleil. Le Crocodile mesme n'a point esté par eux honoré sans quelque occasion vraysemblable, ains disent qu'il est en certaine chose l'image de Dieu, car il est seul entre tous les animaux qui n'a point de langue, à cause que la parole diuine n'a point besoing de voix ny de langue,

Ains

- A Ains cheminant par le sentier sans bruit
De la iustice, à droict le tout conduit.

Et dict-on que de toutes bestes qui vivent en l'eau, il n'y a que luy seul qui ait sur les yeux vne taye bien deliée & transparente, qu'il fait descendre de son front, & en couure ses yeux, tellemēt qu'il voit sans estre veu, en quoy il est conforme au premier des Dieux: & l'endroict où la femelle se descharge de son petit, c'est le bout dernier de la croissance & regorgement du Nil, car ne pouuans enfanter dedans l'eau, & craignās en accoucher loing, elles presentent si exquisement & si parfaictement ce qui en doit aduenir, qu'elles se seruent du Nil qui s'approche d'elles, quand elles pondent leurs œufs, & qu'elles les couuent, & neantmoins maintiennēt & contregardent leurs œufs secs, sans estre baignez de la riuere: elles en pondent soixante, & les pondent en autant de iours, & vivent autant d'années ceux qui vivent le plus longuement, qui est le premier & principal nombre, duquel se seruent plus ceux qui traittent des

- B choses du ciel. Au demourant quant aux animaux qui sont honorez pour toutes les deux causes, nous auons ia au parauant parlé du chien, mais la cigogne noire, outre ce qu'elle tuē les petits serpenteaux, dont la morsure est mortelle, elle est celle qui la premiere a enseigné l'usage de la purgation & euacuation medicinale du clystere, parce que lon apperceoit qu'elle se laue, purge & nettoye elle-mesme de ceste sorte: & les plus experimentez & plus religieux des prestres, quand ils se veulent sanctifier, prennent de l'eau où la cigogne a beu, pour s'en asperger, car elle ne boit iamais eau corrompue ny empoisonnée, ny n'en reçoit point: & de ses deux iambes eslargies, & de son bec, elle fait vn triangle de costez égaux: & dauantage la diuersité & meslange des plumes blanches avec les noires, represente la Lune, quand elle a passé le plein. Et ne se faut pas esmerueiller si les Ægyptiens se sont contentez de si legeres & petites similitudes avec les Dieux, car les Grecs mesmes, tant en peintures que mouleures & sculptures, ont vsé souuent de telles conferences & similitudes: comme en la Candie il y auoit vne statue de Iupiter qui n'auoit point d'aureilles, pource que à celuy qui est seigneur & maistre de tout, il ne conuient point estre instruit par ouyr aucun: & à celle de Pallas, Phidias y adiousta le dragon: & à l'image de Venus en la ville d'Elide, vne tortue, pour donner à entendre, que les filles ont besoing d'estre soigneusement gardées, & les femmes mariées se doiuent tenir en la maison, & garder silence. Et le trident de Neptune signifie le troisieme lieu, que tiēt la mer apres le ciel & l'air, & pour ceste mesme occasion ils appelloient la mer Amphitrite, & les petits Dieux marins des Tritons. Et les Pythagoriens ont bien honoré les nombres & les figures geometriques de noms des Dieux, car le triangle à costez égaux, ils l'appelloient Pallas née du cerueau de Iupiter, & Tritogenia, pour autant qu'il se diuise également avec trois lignes droictes tirées à plomb, de chascun des angles: & Vn, ils l'appelloient Apollon,

- D Tant pour la grace à persuader viue,
Que la ieunesse en vnitē naïfue:

& le Deux, contention & audace: & le Trois, iustice: car offenser & estre offensé, faire ou souffrir tort, se fait l'un par excès, & l'autre par defect, le iuste demeure au milieu en égalité: & le nombre qu'ils appelloient Tetractys, qui estoit trente & six, c'estoit leur plus grand serment, comme il est en la bouche d'un chascun: & s'appelle le monde composé des quatre premiers nombres pairs, & des quatre premiers non pairs, assemblez ensemble. Si donc les plus excellens & plus renommez philosophes, ayans apperceu es choses qui n'ont ny corps ny ame quelque marque & figure de la diuinité, ont estimé qu'il ne falloit en cela rien negliger ny despriser, & passer sans honneur: encore estimé-je qu'il le faille moins faire es natures qui ont sentiment, & qui sont capables d'affections & de qualitez particulieres de douceurs de meurs. Il se

De Isis & d'Osiris.

faut doncques contenter, non pas d'honorer telles bestes, mais par elles la diuinité **E** qui reluit en elles, comme en vn plus clair & plus reluyfant miroir qui est selon nature, à fin que nous les reputions comme instrumēt & artifice du Dieu qui regit & gouuerne tout ce monde. Et ne faut pas penser qu'aucune chose, n'ayant point d'ame ou point de sentimēt, puisse estre plus digne ny plus excellēte que celle qui a ame & qui a sentiment, non pas si lon mettoit tout tāt qu'il y a d'or ny d'esmeraudes ensemble, car ce n'est point en couleurs, ny en figures ou polissures, que la diuinité s'imprime, ains tout ce qui ne participe point de vie, ny ne fut oncques de nature pour en participer, est de moindre & pire condition que les morts mesmes: mais la nature qui vit & qui voit, & qui en soy-mesme a le principe de mouuement & cognoissance de ce qui luy est propre, & de ce qui luy est estrāger, a tiré quelque influēce & quelque part & portion de la prouidence, par laquelle cest vniuers est gouuerné, comme dict Heraclitus. Et pourtant la diuinité n'est pas moins représentée en telles natures qu'en ouurages faits de bronze ou de pierre, lesquels sont aussi bien subiects à corruptiō & **P** alteration, mais par nature ils sont priuez de tout sentiment & de toute intelligence. Voyla l'opinion que ie treuve de toutes la meilleure, quant aux animaux que lon honore. Au reste les habillemens d'Isis sont de differētes teintures & couleurs, car toute sa puissance gist & s'employe en la matiere, laquelle reçoit toutes formes, & se faict toutes sortes de choses, lumiere, tenebres, iour, nuict, feu, eau, vie, mort, commencement, fin: mais ceux d'Osiris n'ont aucun ombrage, ny aucune varieté, ains sont d'une seule couleur simple, à sçauoir de la couleur de la lumiere, car la premiere cause & principe est toute simple, sans meslange quelconque, estant spirituelle & intelligible: voyla pourquoy ils ne monstrent qu'une seule fois ces habillemens là, & au demourant les resserrent & les gardent estroictement, sans les laisser voir ny toucher, là où au contraire ils vsent souuent de ceux d'Isis, pource que les choses sensibles sont en vsage, & les a-lon tousiours entre les mains, & d'autant qu'elles sont subiectes à plusieurs alterations, on les desploye & regarde-lon à plusieurs fois. Mais l'intelli- **G** gence de ce qui est spirituel & intellectuel, pur, & simple, & sainct, reluisant comme vn esclair, ne se donne à toucher & regarder à l'ame qu'une seule fois. Voyla pourquoy Platon & Aristote appellent ceste partie de la philosophie Epoplique, comme qui diroit visive ou visible, pource que ceux qui ont passé avec le discours de la raison toutes les matieres subiectes à opinions meslées & variables, faultent finalement à la cōtemplation de ce premier principe-là, simple & qui n'a rien de materiel, & depuis qu'ils ont peu vn peu atteinre la pure verité d'iceluy, ils estiment que la philosophie acheuée a atteinct le dernier but de sa perfection. Et ce que les prestres maintenant ont horreur de monstrier, & qu'ils tiennent couuert & caché avec si grād soing & diligence, ne le monstrent seulement que à cachettes en passant, que ce Dieu commande & regne sur les trespassez, qui n'est autre Dieu que celuy qui s'appelle Ades, en langage Grec, & Pluton: le commun peuple n'entendant pas com- **H** ment cela est vray, s'en trouble, trouuant cela estrange que le sainct & sacré Osiris habite dedans la terre, ou soubs la terre, là où sont cachez les corps de ceux que lon estime estre venus à leur fin. Mais luy au contraire est bien loing de la terre, sans macule, sans tache ny pollution quelconque, pur & net de toute substance qui peut admettre aucune mort, ny aucune corruption. Mais les ames des hommes, pendant qu'elles sont icy bas enuoloppées de corps & de passions, ne peuuent auoir aucune participation de Dieu, sinon d'autant qu'ils en peuuent atteinre de l'intelligence par l'estude de la philosophie, comme vn obscur songe: mais quād elles seront deliurées de ces liens, & passées en ce lieu-là sainct, où il n'y a passion aucune, ny forme quelconque passible, alors ce mesme Dieu est leur conducteur & leur roy, s'attachans le plus qu'il leur est possible à luy, & contemplans insatiablement, & desirans celle beauté

- A** beauté qu'il n'est possible de dire ny d'exprimer aux hommes, de laquelle, selon les anciens contes, Isis fut iadis amoureuse, & l'ayant tant pourfuyue qu'elle en ioüit, elle fut depuis remplie de toutes les choses belles & bones, qui peuuent estre engédrees en autrui. Voyla donc comment il en va quant à cela, selon l'interpretation qui est plus conuenable aux hommes. Et s'il faut aussi parler des parfums que lon y brusle par chascun iour, selon que i'ay promis au parauant, il faut premierement supposer en son entendement, que les hommes ont accoustumé d'auoir principalemēt en singuliere recommandation les exercices qui appartiennent à leur santé, mesmement es cerimonies de leur seruice diuin, en leurs sanctifications, & en leur viure ordinaire, où il n'y a pas moins d'esgard à la santé qu'à la saincteté, car ils n'estiment pas qu'il soit loisible ne bien seant de seruir à l'essence qui est toute pure, sans aucune tare ny pollution ou corruption quelconque, avec des corps non plus que des ames gastez au dedans ou subiects à des maladies. Et pour autant que l'air, duquel nous vsons le plus souuent, & dedans lequel nous sommes tousiours, n'est pas tousiours en semblable disposition ny mesme temperature, ains la nuit s'espeult, & comprime le corps, & fait retirer l'ame en ne sçay quelle tristesse & soucieuse façon, comme estant obscurcie de broüillats & appesantie, incontinent qu'ils sont leuez ils encensent & allument de la rasine, pour nettoier & purifier l'air par ceste rarefaction & subtilisation, en resueillant par mesme moyen les esprits qui en nos corps sont comme languissans, & encore assopis, par la force de ceste odeur, laquelle a ie ne sçay quoy de vehement, & qui bat les sens. Et puis sur le midy, sentans que le Soleil attire de la terre, par son ardeur, grande quantité de vapeur forte, ils allument alors de la myrrhe pour en parfumer l'air, car la chaleur de ce parfum-là dissout & dissipe ce qui est gros & espais & limonneux en l'air: mesme en temps de pestilence les medecins pensent y remedier en faisant de grands feus, ayans opinion que la flamme subtilise & rarefie l'air, ce qu'elle faict encore mieux quand on y brusle des bois bien odorans, comme sont les cyprez, les genéures, & les sapins. Voyla pourquoy lon dict que le medecin *Acron* medecin fort ancien, deuant Hippocrates, natif d'Agrigente en Sicile, premier des Empiriques, fort recommandé par Empedocles. Acron, du temps de la grande pestilence à Athenes, acquit grande reputation de ce qu'il ordonna, que lon feist bon feu aupres des malades de peste, car il en sauua par cela plusieurs: & Aristote escrit, que les douces senteurs & bonnes odeurs des parfums, des fleurs, & des prairies, ne seruent pas moins à la santé, qu'au plaisir & à la volupté, parce qu'elles destrempent & dissoluent avec leur chaleur & suauité la substance du cerueau, qui de sa nature est froide, & comme figée: & puis les Ægyptiens appellent le myrrhe Bal, qui signifie autant comme dechassement de resuerie, ce qui donne encore quelque confirmation à nostre dire. Et quant au parfum qui s'appelle Cyphy, c'est vne composition de seize ingrediens, où il entre du miel & du vin, des raisins de cabas, & du fouchet, de la resine & de la myrrhe, de tribule & de fefeli, de ionc odorant, de bitume, de la mousse & du lacaphtum, & outre
- D** cela de deux fortes de grains de genéure, du grand & du petit, du Cardamon & du calame: & les composent ensemble non point à l'aduenture, ainsi qu'il leur vient en fantasie, ains lit-on des lettres sacrees aux parfumeurs cependant qu'ils les meslent ensemble. Et quant au nombre, encore qu'il soit carré & faict d'un autre carré, & que seul entre les nombres également égaux il face l'aire au dedans contenue égale aux vnitez de sa circonference, si ne faut-il pas penser qu'il face ny coopere rien en cela: mais plusieurs des simples qui entrent en ceste composition ayans vertus aromatiques, rendent vne douce haleine & vne bonne vapeur, par laquelle l'air s'altere, & le corps s'esmouuant souëfument & doucement se prepare à reposer, & en prennent vne temperature attractiue du sommeil, en laschant & desliant les liens des ennuis & soucis du iour, sans qu'il soit besoing d'yuresse pour les oster, lissant & polissant la partie imaginatiue du cerueau qui reçoit les songes, ne plus ne moins que vn

De Isis & d'Osiris.

miroir, & le rendant plus pur & plus net, autant ou plus que les sons de la lyre & des instruments de musique, desquels vsoient les Pythagoriens deuant que se mettre à dormir, enchantans ainsi & entretenans la partie de l'ame irraisonnable, & subiecte aux passions: car les odeurs bien souuent suscitent & resueillent le sentiment qui defect, & au contraire aussi bien souuent ils le rendent plus mouffe, plus reposé & plus quoy, quand les senteurs aromatiques sont espanduës & semées par le corps pour leur subtilité, ainsi comme aucuns medecins disent, que le dormir se forme en nous, c'est à sçauoir, quand la vapeur de la viande que nous auons prise, venant à ramper tout doucement au long des parties nobles, par maniere de dire, les chattoüille. Ils vsent aussi de ceste composition de Cyphi en breuuage, car ils tiennent qu'en le beuuant il purge & lasche le ventre: mais sans cela, la resine est ouurage du Soleil, & cueille lon la myrrhe à la Lune, des arbres qui la pleurent: mais des simples qui composent le Cyphi, il y en a qui ayment mieux la nuict, comme ceux qui sont nourris des vents froids, des ombrages, des roses & humiditez: car la clarté & lumiere du iour est vne, & simple: & dict Pindare, que lon voit le Soleil à trauers l'air solitaire, là où l'air de la nuict est vne composition & meslange de plusieurs lumieres & plusieurs puissances, comme plusieurs semences confluentes de plusieurs astres en vn mesme corps: & pourtant à bon droict brulent-ils ces parfums-là, qui sont simples; le iour, comme ceux qui sont engendrez par la vertu du Soleil: & ceux-cy, comme estans meslez & de toutes sortes de diuerses qualitez, ils les allument sur le commencement de la nuict.

Des Oracles qui ont cessé, & pourquoy.



N faiët vn conte, amy Terentius Priscus, que iadis des Aigles, ou des Cygnes, volants des extremitez opposites de la terre vers le milieu d'icelle, s'entrerencontrerent les vns les autres au lieu où est basti le temple d'Apollo Pythien, à l'endroit qui s'appelle, le Nombri: Et que quelque temps depuis Epimenides le Phestien voulant sçauoir si ce conte estoit veritable, demanda à l'oracle d'Apollo, où estoit le milieu & le nombri de la terre: qui luy rendit vne responce ambigüe & incertaine, de sorte que lon n'y pouuoit rien entendre: à raison dequoy il composa ces vers,

Il n'y a point de nombri en la mer,
Ny en la terre, & ne faut presumer,
S'il y en a, qu'homme en ait cognoissance:
Il n'est cogneu qu'à la diuine essence.

Ainsi chastia Apollo bien à propos ce curieux-là, qui vouloit esprouuer vne vieille fable comme vne peinture, en la touchant du doigt. Mais de nostre temps, vn peu auant la feste des ieux Pythiques qui furent celebrez durant le magistrat de Callistratus, il y eut deux saincts personnages, qui venans des bouts contraires de la terre s'entrerencontrerent ensemble en la ville de Delphes: l'vn estoit Demetrius le Grammairien, venant de l'Angleterre pour s'en retourner à la ville de Tarse en Cilicie, dont il estoit natif: l'autre estoit Cleombrotus Lacedemonien, lequel auoit longuement versé en Ægypte, & en la prouince Troglodytique, & qui auoit nauigué fort auant dedans la mer rouge, non pour traffiquer ne marchander, mais pour desir de voir & d'apprendre tousiours quelque chose de nouveau: car ayant dequoy suffisamment, & ne se souciant pas beaucoup d'amasser des biens plus qu'il ne luy en fa-

loit

A loit, il employoit son loisir à aller ainsi voir le monde, & en recueilloit vne histoire, comme vne matiere de philosophie, qui a pour son but & sa fin, la Theologie, ainsi qu'il l'appelloit. Cestuy ayant n'aguères esté au temple & oracle de Iupiter Ammon, monstroit ne s'esmerveiller pas grandement de chose qu'il y eust veüe, mais il nous racontoit vn propos, qu'il disoit auoir entendu des prestres du temple, touchant la lampe qui iamais n'esteint, bien digne d'estre de pres consideré: c'est qu'ils disoient, que d'année en année il se consumoit moins d'huile, & que de là ils coniecturoient, qu'il y auoit inégalité entre les années, qui faisoit que la suyuante estoit tousiours de plus courte durée que la precedente, pource qu'il estoit vraysemblable, puis qu'il se consumoit moins d'huile, qu'il y eust aussi moins de temps. Tous les assistans trouuerent ce propos fort estrange. Et Demetrius entre les autres dit, que c'estoit vne moquerie de vouloir recercher la cognoissance de choses si hautes & si grandes par de si petites: ce qui ne seroit pas peindre le Lion, ainsi que disoit Alcèus, à l'estimation des ongles, ains vouloir remuer le ciel ensemble, & tout le monde, à la coniecture d'vne mesche & d'vne lampe seulement, & renuerser de fond en comble tous les arts mathematiques. Ne l'vn ne l'autre, respondit adonc Cleombrotus, n'esimouueroit ces hommes-là de rien: car premierement ils ne cederoient iamais aux Mathematiciens en certitude de probations, pource qu'il est bien plus aisé que les Mathematiciens se trompent en la precision du temps, obseruans des mouuements & reuolutions, qui sont si esloignées d'eux, que non pas eux en la mesure de l'huile qu'ils obseruent continuellement, & qu'ils remarquent diligemment, pource qu'ils la trouuent estrange & contre tout discours de raison. Et au reste, Demetrius, ne vouloir conceder que petites choses soient souuent signes & indices de grandes, seroit faire grand preiudice à beaucoup d'arts, attendu que ce leur seroit oster les preuues de beaucoup de conclusions & plusieurs predictions. Et neantmoins vous autres mesmes Grammairiens voulez verifiser vne chose qui n'est pas petite, que les demy-dieux & princes, qui estoient à la guerre de Troye, rasoient leur poil avec le rasoir, parce que vous trouuez en Homere ce mot de rasoir: Et semblablement qu'ils prestoient argent à vsure, pource qu'il dict en vn passage,

*Au troi-
sieme de
l'Odyssée*

La dette n'est petite ny recente,

Et tous les iours de plus en plus augmente:

voulans dire qu'en ce lieu-là le mot Grec, Ophelēsthai, signifie s'augmenter. Et puis d'autant qu'en plusieurs lieux il appelle la nuit Thoen, c'est à dire viste & aiguë, vous vous attachez fort affectionnément à ce mot-là, disans qu'il a voulu dōner à entendre que l'ombre de la terre, qui est rōde cōme vne boule, se va aboutissant en pointe, comme fait le corps d'vne Pyramide. Et qui sera celuy qui niāt que petites choses ne puissent estre signes & preuues de grādes, approuue ce que la medicine enseigne, que quand il y a multitude d'araignées, c'est vn prognostique d'vn esté qui doit estre pestilent: & semblablement aussi, quand à la prime-verre les fueilles du figuier sont aussi grādes que le pied d'vne corneille, il est saison de nauiger? Et qui pourra souffrir que l'on mesure la grādeur du corps du Soleil aux clepsydres & horologes à eau, avec vne quarte ou vne pinte d'eau, ou qu'vne tablette en forme de thuyle faisant vn angle aigu sur vn plan à niueau, monstre la hauteur du Pole qui tousiours nous apparait par dessus l'horizon? Voyla ce que disent les prestres de par delà, pourtant faut-il que nous alleguions d'autres raisons cōtre eux, si nous voulōs maintenir le cours du Soleil ferme & inuariable, ainsi comme nous le tenons par deçà. Non pas du Soleil seulement, s'escria adonc tout haut le philosophe Ammonius qui estoit present, mais aussi de tout le ciel entierement: car il sera force forcee, que son passage & voyage qu'il faiēt depuis l'vn des tropiques iusques à l'autre, soit necessairement racourcy, & qu'il ne mesure pas vne si grāde partie de l'horizon comme les Mathematiciens le mettēt, ains de-

*C'est un
instrumēt
de Ma-
themati-
que, pour
trouuer la
hauteur
du Pole,*

Des oracles qui ont cessé.

uienne plus court, parce que la partie australe s'approchera tousiours de la Septentrionale, dont il aduiendroit consequemment que l'esté nous en feroit plus brief, & la temperature de l'air par cōsequent aussi plus froide, parce qu'il tourneroit plus en dedans, & atteindroit de plus grands paralleles & cercles equidistans és poincts de ses reuersions, qui sont au plus grand iour d'esté, & au plus court d'hyuer. Dauantage il s'ensuyuroit aussi, que les aiguilles dressees en la ville de Syene, ne feroient plus sans ombre au iour du solstice d'esté, & que plusieurs des estoiles fixes feroient couruës les vnes sous les autres, ou qu'elles s'entretoucheroiēt & confondroient pelle-messe à faulte d'espace. Et s'ils veulent dire que tous les autres corps celestes demeurent en leurs cours & mouuements ordinaires, sans aucun changement, ils ne sçauroient alleguer cause aucune qui peult hastier le mouuement seul de celuy-là, entre tant d'autres qu'il y a, & si troubleront & confondront plusieurs euidentes apparences qui se monstrent clairement à nos yeux, & mesmement celles de la Lune, du tout, tellement qu'il ne seroit point de besoing d'observer ces mesures d'huile, pour cognoistre la diuersité des anneés, parce que les Eclipses les monstreroient assez s'il y en auoit, d'autant que le Soleil se rencontre assez souuent avec la Lune, & la Lune assez souuent tombe en l'ombre de la terre reciproquement: & n'est ia besoing de desployer plus auant la faulseté de ce propos-là. Voire-mais, dict Cleombrotus, j'ay moy-mesme veu la mesure de l'huile, car ils en monstroient de plusieurs anneés, mais celle de la presente estoit de beaucoup plus petite que celle des bien anciennes. Ammonius repliquant derechef: Et comment est-ce que les autres hommes qui adorent aussi le feu inextinguible, & chez lesquels on le garde depuis vne suite d'ans par maniere de dire infinie, ne s'en sont aussi bien apperceus? Et quand bien on voudroit supposer que ce propos-là fust veritable, ne vaudroit-il pas mieux en attribuer la cause à quelque froideur, ou à quelque humidité de l'air, ou au contraire à quelque secheresse & chaleur, par lesquelles estant le feu elangouré n'auroit pas eu besoing de tant de nourriture, ny n'en auroit pas peu tant consumer? Car j'ay souuent ouy dire, qu'en hyuer le feu brulle beaucoup mieux, estant plus fort pour estre estrainct & resserré en soy-mesme par la froideur, là où és grandes chaleurs & secheresses il s'affoiblist, demeurant lasche & rare sans aucune vehemence, & si on l'allume au Soleil il en opere moins, se prenant plus laschement au bois & le consumant plus lentement. Mais encore plus iustement en pourroit-on attribuer la cause à l'huile mesme, car il n'est pas sans apparence de dire qu'anciennement l'huile estoit de moindre nourriture & plus eueuse, comme estant produicte de ieunes oliuiers, & depuis ayant esté mieux cuicte en oliuiers entiers & parfaicts, & estant plus pressée en égale quantité, elle ait eu plus de force, & ait mieux nourry & entretenu le feu. Voyla comment il falloit sauuer la supposition de ces presbtres Ammoniens, bien qu'elle soit estrange & merueilleusement extrauagante. Apres qu'Ammonius eut acheué son propos, Mais plustost, dis-je, Cleombrotus, ie te prie conte nous vn peu de l'oracle: car il y a de toute ancienneté tousiours eu grand apport & grande opinion de diuinité en ce lieu-là, iusques à maintenant qu'il semble que ceste reputation-là se va fort passant. Et comme Cleombrotus ne respondist rien à cela, & regardast contre bas, Demetrius prit la parole, disant, Il n'est ia besoing d'enquerir & demander des oracles de par delà, veu que nous voyons le desfinement, ou pour mieux dire, l'entier aneantissement de tous ceux de par deçà, excepté d'un ou de deux, & seroit plus à propos de rechercher la cause pour laquelle ils sont ainsi defaillis. Car quel besoing est-il de discourir des autres, veu que la Bœoe mesme qui souloit anciennement estre resonante de plusieurs oracles, en est de present toute tarie comme de fontaines, & y a maintenant vne grande secheresse & defaut d'oracles? Car il n'y a auourd'huy lieu aucun en toute la Bœoe où lon sçeust puiser vn seul oracle, si ce n'est en la ville de Lebadie

- A** Lebadie seule, tous les autres lieux sont deuenus muets, ou de tout poinct delaissez: & neantmoins du temps des guerres contre les Perles l'oracle de Prous Apollo estoit en reputation, & celuy d'Amphiaraus autant, car l'un & l'autre fut lors esprouué: celuy de Prous Apollo quand le prestre, qui auoit tousiours accoustumé de respondre & rendre les oracles en langue Grecque, respondit à celuy qui y estoit enuoyé de la part des Barbares en langue Barbaresque, de sorte que nul des assistans n'en entendit pas vn mot, donnant ceste inspiration raisiblement à entendre, qu'il n'est pas loisible ny permis aux Barbares d'auoir la langue Grecque seruante à leurs commandemens. Et quant à celuy d'Amphiaraus, le seruiteur qui y fut enuoyé s'estant endormy dedans le sanctuaire, pensa premierement en songeant voir & ouyr le ministre du Dieu qui le chassoit de parole, & luy commandoit de sortir hors du temple, disant que son Dieu n'y estoit pas, & puis qu'il le poussa avec les deux mains, & finalement voyant qu'il s'arrestoient encore, qu'il prit vne grosse pierre & luy en donna par la teste: & tout cela n'estoit que prediſtion & denonciation de ce qui deuoit aduenir: car Mardonius fut depuis desfaiſt par Pausanias qui n'estoit pas Roy, ains seulement tuteur du Roy de Lacedemone, & son Lieutenant, commandant pour lors à l'armee des Grecs, & fut assommé & porté par terre d'un coup de pierre, ainsi comme le seruiteur Lydien pensa auoir esté frappé en dormant. Semblablement aussi florissoit adonc l'oracle qui estoit aupres de Tegyres, là où lon tient qu' Apollo mesme nasquit: & de faiſt il y a deux ruisseaux qui coulent alentour, dont l'un s'appelle la Palme, & l'autre l'Oliue, comme lon diſt. En cest oracle, du temps des guerres Medoises contre les Perles, estant lors prophete Echecrates, le Dieu Apollo respondit par sa bouche, que l'honneur & la victoire de ceste guerre demoureroit aux Grecs. Et durant la guerre Peloponesiaque, les Deliens ayans esté dechassez de leur Isle, il leur fut rapporté vn oracle de Delphes, par lequel il leur estoit mandé de chercher & trouuer le lieu où Apollo auoit esté né, & là y faire quelques certains
- C** sacrifices: dequoy eux s'esmerueillans, & demandans si Apollo estoit né ailleurs que chez eux, la Prophetisse Pythie leur diſt dauantage, qu'une Corneille leur diroit l'endroit. Ces deputez des Deliens en s'en retournant passerent d'aduenture par la ville de Cheronee, là où ils ouyrent l'hostelliere deuissant avec quelques estrangers passans de l'oracle de Tegyres, auquel ils vouloient aller, & leur propos finy, entendirent comme ces estrangers prenans congé luy dirent, A dieu dame Corneille: & ainsi comprenans ce que vouloit dire la response de la Prophetisse Pythie, & ayans faiſt leurs sacrifices à Tegyres, eurent la grace d'estre bien tost apres remis & restituez en leur pays. Encore y a-il eu d'autres plus recentes apparitions de ces oracles-là, que celles que nous auons alleguees, & maintenant ils ont de tout poinct cessé, tellement qu'il ne seroit pas mal à propos, attendu que nous sommes chez Apollo Pythien, de rechercher la cause de telle mutation.
- D** Au demourant nous estions desia deuant les portes de la salle des Gni-diens venans du temple, parquoy entrans dedans, nous y trouuâmes les amis deuers lesquels nous venions, assis en nous attendant: tous les autres estoient de loisir sans rien faire, pour l'heure qu'il estoit du iour, sinon que regarder ou froter d'huile les champions de luitte qui s'exercitoient: si se prit Demetrius en se riant à leur dire,

Diray-je vray, ou si ie mentiray?

Il me semble à vous voir, que vous n'avez pas entre vous propos qui soit de guerres grande consequence, car ie vous voy assis fort à vostre aise, & semble bien à vos visages rians, que vous n'avez pas grands pensemens. Il est vray, repliqua lors Heracleon le Megarien, que nous ne disputons pas, à sçauoir si ce verbe Ballo en son futur perd l'une de ses ll. ny de quel mot positif ou primitif sont formez & deriuez

Des oracles qui ont cessé.

ces deux comparatifs, chiron & beltion, & ces deux superlatifs chiriston & belti- E
 fton : car ces questions-là, & autres semblables, sont celles qui font rider & froncer
 les visages: mais au reste on peut bien disputer de toutes autres questions de philo-
 sophie, sans se froncer le sourcil, & en discourir tout doucement, sans auoir vn re-
 gard furieux, ny se courroucer aux assistans. Receuez nous doncques, dict Deme-
 trius, en vostre compagnie, & quand & nous le propos qui s'est n'aguères émeu en-
 tre nous, lequel est bien conuenable à ce lieu icy, & qui pour le regard du Dieu ap-
 partient bien à tous tant que nous sommes: mais aduisez bien, que pour cela vous
 ne ridiez ny ne fronciez point vos visages. Apres doncques que nous fumes assis
 pêle-mêle les vns parmy les autres, & que Demetrius eut proposé la question de la-
 quelle nous deuisions, Didymus le philosophe Cynique, surnommé Planetiades, se
 dressant sur ses pieds, apres auoir frappé deux ou trois coups de son baston contre
 terre s'escria disant, ô Dieux ô Dieux, vous nous apportez vne question bien mal-ai- F
 sée à foudre, & qui a besoing d'une longue & profonde inquisition: car c'est bien
 grande merueille, si tant de meschanceté estant auourd'huy espanduë par le monde,
 non seulement honte & honneur ont abandonné la vie humaine, ainsi comme nous
 auoit prophetisé Hesiodé, mais aussi la prouidence des Dieux, ayant emporté quād
 & elle tout tant qu'il y auoit d'oracles au monde. Mais au contraire ie vous propo-
 se vne autre demande à discourir, Comment plustost ils ne sont pieça tous faillis, &
 comment Hercules, ou quelque autre des Dieux, long temps y a n'a soustrait la ma-
 chine à trois pieds, qui est ordinairement remplie de si villaines & de si sacrileges de-
 mandes que lon y propose à Apollo. I es vns comme s'ils vouloient esprouuer vn
 Sophiste, les autres l'interrogans de quel es thresors cachez, de successions à adue-
 nir, de mariages clandestins: tellement que Pythagoras est par là manifestement con-
 uaincu de mensonge, qui a dict, que les hommes sont alors les plus gens de bien,
 quand ils se presentent deuant les Dieux: car ce qui seroit honneste de cacher & cou-
 urir en la presence seulement d'un personnage ancien, touchant les plus ordes ma- G
 ladies & passions de l'ame, ils l'apportent à descouuert & tout à nud deuant Apollo.
 Et comme il voulust encore poursuiure ce propos, Heracleon le tira par sa robbe, &
 moy qui estois plus son familier que nul autre de la compagnie, luy dis, Cesse, amy
 Planetiades, d'irriter Apollo contre toy, car il est aspre & cholere, & non pas gra-
 cieux, mais comme dict Pindare,

Les humains iniustement

Le iugent doux & clement.

Soit que ce soit le Soleil, ou bien le maistre du Soleil, ou son pere, estant par dessus
 toute nature visible, il n'est pas vray-semblable qu'il desdaigne de parler plus aux
 hommes du temps present, auxquels il est cause de naissance & de nourriture, de l'e-
 stre, & de l'entendre: ny n'est pas croyable que la prouidence diuine, qui comme vne
 bonne & charitable mere produict & conserue toutes choses pour nostre vsage, se H
 monstre maligne en la seule diuination, & tienne son courroux contre nous, ny
 qu'elle la nous ait ostee, nous l'ayant au commencement donnee, comme si lors qu'il

*Durāt les
 ieux O-
 lympi-
 ques &
 Pythi-
 ques, il y
 auoit tré-
 nes en
 guerre
 ciuile.*

y auoit des oracles en toutes les parties du monde, en plus grande tourbe d'hommes,
 le plus grand nombre n'estoit pas tousiours des meschans. Parquoy faisans tréfues
 Pythiques avec le vice & la meschanceté que tu as tousiours accoustumé de chastier
 de paroles, sied toy icy aupres de nous, pour chercher avec nous quelque autre occa-
 sion de ceste cessation & eclipsment d'oracles, & cependant garde tousiours Dieu
 propice & maintien qu'il ne se courrouce point. Ces miennes paroles eurent tant
 d'efficace, que Planetiades s'en alla sans mot dire ne repliquer. Ainsi estant la com-
 pagnie demouree en repos & silence pour vn espace de temps, Ammonius adres-
 sant à moy sa parole: Je te prie (dit-il) Lamprias, pren garde à ce que nous faisons, &

considere

- A** considéré vn peu de près ce que nous disons, à fin que nous n'ostions point du tout à Dieu la cause de ce que ces oracles font faillis: car celui qui en attribue la cessation à quelque autre cause qu'à la volonté & ordonnance de Dieu, il donne occasion de suspecter aussi qu'il pense, qu'ils n'ayent iamais esté ny ne soient encore à present par sa disposition, mais par quelque autre moyen: car il n'y a point d'autre plus noble ny plus forte & plus excellent cause & puissance, qui peust destruire & abolir la diuination, si elle estoit œuvre de Dieu. Et quant au discours de Planetiades, il ne me reuient point, tant pour autres causes que pour vne inégalité & inconstance qu'il met en Dieu: car il le fait tantost reiettant & detestant le vice, & tantost l'admettant & le receuant, ne plus ne moins que vn Roy, ou vn tyran plustost, qui par vne porte chasseroit les meschans, & par vne autre les receuroit, & negocieroit avec eux. Mais comme ainsi soit que le plus grand ouurage qui scauroit estre, qui n'est en rien superflu, ains en tout & par tout accomply, & ne desirant rien d'ailleurs, est
- B** celui qui conuient le mieux à la dignité des Dieux, en supposant ce principe & ce fondement-là, on pourroit à mon aduis dire, que de ceste rareté & faute d'hommes commune, que les seditions & guerres passées ont aujourd'huy apportée par tout le monde, la Grece en a senty la plus grande partie, tellement qu'à grande peine pourroit-elle aujourd'huy faire toute ensemble trois mille hommes de guerre, que la seule cité de Megares enuoya iadis à la bataille de Platees. Parquoy si Dieu delaisse aujourd'huy plusieurs oracles qui anciennement souloient estre frequentez, qui dira que cela ne monstre autre chose, sinon que la Grece est maintenant fort deshabitée & depeuplée, au pris de ce qu'elle estoit anciennement, ie luy pourrois suffisamment fournir de quoy en discourir: car à qui profiteroit maintenant, & de quel bien feroit cause l'oracle qui iadis souloit estre à Tegyres ou à Ptoum, là où en tout vn iour à peine pourriez-vous rencontrer vn seul homme gardant les bestes? Car on trouue mesme par escript, que ce siege de diuination où nous sommes, qui est &
- C** d'antiquité le plus vieux, & de reputation le plus noble & plus renommé de toute la Grece, fut iadis longuement desert & inaccessible, pour le danger d'vne male beste venimeuse qui y repairoit, c'estoit vn Dragon: mais ceux qui escriuent cela ne prennent pas bien la cessation de l'oracle, comme il faut, ains tout au rebours: pource que ce fut la solitude qui y attira le Dragon, plustost que le Dragon y ait fait la solitude. Depuis quand il a plu à Dieu, la Grece s'est fortifiée de villes, & le lieu s'est remply d'hommes, & lors ils vserent de deux femmes prophetisses, qui l'vne apres l'autre descendoient dedans le trou, encore y en auoit-il vne tierce choisie pour secours, si besoing en estoit, & maintenant il n'y en a plus qu'vne, & neantmoins nous ne nous en plaignons point, pource qu'vne seule suffit: par ainsi ne faut-il point accuser Dieu, car ce qu'il y a aujourd'huy en estre de diuination fournit & suffit assez à tous, & renuoye contents ceux qui viennent, ains response à tout ce qu'ils scau-
- D** roient demander. Tout ainsi doncques comme en Homere, Agamemnon iadis auoit neuf herauts, & encore à peine pouuoit-il contenir l'assemblée des Grecs, pour le grand nombre qu'il y en auoit, & maintenant vous verrez dedans peu de iours, que la voix d'vn seul homme fournira à se faire ouyr de tous ceux qui seront dedans le Theatre: aussi faut-il penser, que la diuination parloit lors par plus d'organes & de voix, pource qu'il y auoit plus grande multitude d'hommes: plustost au contraire faudroit-il trouuer estrange, si Dieu laissoit respandre & couler en vain, comme de l'eau, la diuination prophetique, & resonner par tout, ne plus ne moins qu'aux champs nous voyons que les rochers des montaignes retentissent à la voix, & au bellement des trouppes paissans. Ammonius ayant dict ces paroles, & moy n'y respondant rien, Cleombrotus prit la parole, en s'adressant à moy: As-tu doncques ja confessé, dict-il, que c'est Dieu qui fait & qui defait aussi les oracles? Non

Des oracles qui ont cessé.

pas moy, dis-je, car ie maintiens, que Dieu ne fut oncques cause d'oster ny d'abolir E
oracle ny diuination quelconque: ains au contraire, au lieu que luy produict & pre-
pare plusieurs choses pour nostre vsage, la nature y amène la corruption, & quel-
quefois la priuation du tout: ou, pour mieux dire, la matiere, qui est la priuation,
elle-mesme s'enfuit bien souuent, & dissout ce qu'une plus excellente cause qu'elle
auoit composé, ainsi estime-je qu'il y a quelques autres causes, qui obscurcissent
ou qui amortissent du tout ces puissances-là diuinatrices, comme ainsi soit que
Dieu donne bien aux hommes plusieurs choses belles & bonnes, mais rien de per-
durable immortellement, de sorte que les dons mesmes des Dieux meurent, mais
non pas eux, comme dict Sophocles: & faut bien que les Philosophes naturels, exer-
citez en la cognoissance de la nature & de la matiere premiere, en enquierent, &
recherchent la substance, la propriété & la puissance, mais qu'ils en laissent l'origi-
ne & cause primitiue à Dieu, comme il est iuste & raisonnable. Car ce seroit chose
trop forte & puerile, de cuider que Dieu luy-mesme, comme les esprits parlans de F
dedans le creux du ventre, que lon appelloit anciennement Eurycles, & maintenant
Pythons, entraist dedans les corps des Prophetes, & qu'il parlaist par leur bouche, se
seruant de leurs langues & de leurs voix, comme d'outils & instrumens à parler: car
celuy qui entremesle ainsi Dieu parmy les negoces des homes, n'a pas le respect qu'il
doit à sa Majesté, ny ne luy conferue pas la dignité & la grandeur de sa puissance &
vertu. Cleombrotus adonc prenant la parole, Tu dis bien vray, dict-il, mais d'au-
tant qu'il est mal-aisé de comprendre & de definir, commét & iusques à quel poinct
il faut employer ceste prouidence diuine, il me semble que ceux qui veulent simple-
ment que Dieu ne soit cause de rien du monde, & ceux qui le font autheur de tout
entierement, ne tiennent point le moyen qu'il faut tenir, & ne touchét pas au poinct
du deuoir & de la verité. Mais comme ceux-là disent tresbien, qui tiennent que Pla-
ton ayant inuenté cest element, sur lequel naissent & s'engendrent les qualitez que
lon appelle tantost la matiere premiere, & tantost la nature, a deliuré les philosophes G
de plusieurs grandes difficultez: aussi me semble-il que ceux qui ont mis l'espece des
Dæmons entré celle des Dieux & celle des hommes, ont resolu encore plus de dou-
tes & de difficultez, & de plus grandes, ayans trouué le lien qui conioinct & tient
ensemble, par maniere de dire, nostre societé & communication avec eux, soit que
ce propos & ceste opinion soit venuë des anciens Mages, & de Zoroastres, ou bien
de la Thrace & d'Orpheus, ou bien de l'Ægypte, ou de la Phrygie, comme nous con-
iecturons à veoir les sacrifices qui se font en l'un & en l'autre pays, là où parmy leurs
sainctes & diuines cerimonies il semble qu'il y ait quelques signes de dueil & de
mortalité meslez parmy. Et quant aux Grecs, Homere a vsé indifferemment de ces
deux noms, appellant aucunesfois les Dieux Dæmons, & les Dæmons Dieux: mais
Hesiodé a le premier purement & distinctement mis quatre genres de natures rai-
sonnables, les Dieux, les Dæmons plusieurs en nombre & bons, les demy-Dieux, & H
les hommes, car les Heroïques sont nombrez entre les demy-Dieux. Les autres di-
sent, qu'il se faiet mutation des corps aussi bien que des ames, ne plus ne moins que
lon voit que de la terre s'engendre l'eau, de l'eau s'engendre l'air, & de l'air le feu, ten-
dant tousiours la nature & la substance contre-mont: aussi les bonnes ames prennent
tousiours mutation, se tournans d'hommes en demy-Dieux, & de demy-Dieux en
Dæmons, & de Dæmons bien peu & avec fort long espace de temps, apres estre bien
affinees & entierement purifiees par la vertu, viennent à participer de la Diuinité:
& y en a qui ne se peuuent pas contenir, ains se laissent aller, & s'enueloppent de
rechef de corps mortels, où ils vivent d'une vie sombre & obscure, comme d'une
vapeur & fumee: & quant à Hesiodé, il estime que les Dæmons mesmes apres
certaines reuolutions de temps viennent à mourir: car parlant en la personne d'une
Naïde

A Naïde, il designe le temps auquel ils viennent à definir,
 Neuf hommes vit la corneille cryarde,
 Le cerf autant quatre fois vif se garde,
 Le corbeau noir si longuement vieillit,
 Que de trois cerfs les vies il emplit,
 Et le Phenix de neuf corbeaux égale
 Les iours : mais vous progenie Royale
 De Iupiter, Nymphes aux chefs plaifans,
 De dix Phenix vous fournissez les ans.

Or ceux qui ne prennent pas bien ce que le poëte a voulu entendre par ce mot Genean, c'est à dire l'aage de l'homme, font monter ceste somme de temps à vn grand nombre d'annees, car ce n'est seulement que vn an, de maniere que la somme totale ne vient à faire que neuf mille sept cens & vingt ans, qui est la duree de la vie des Demons. Et y a plusieurs des Mathematiciens qui la font plus courte que cela, mais plus longue non. Pindare mesme ne la fait pas plus grande quand il dit, que les Nymphes ont la destinee de leur vie égale aux arbres, & que c'est pour cela que lon les appelle Amadryades, pource qu'elles naissent & meurent avec les chesnes. Il parloit encore quand Demetrius, rompant son propos, prit la parole, en disant: Comment est-il possible, Cleombrotus, que tu soustiennes que vn an ait esté appelé par ce poëte l'aage d'un homme? car ce n'est la durée ny de la fleur de l'aage de l'homme, ny de sa vieillesse, pource qu'il y a en cest endroit diuerse leçon, d'autant que les vns y lisent Hebonton, qui seroit à dire florissans, & les autres Geronton, qui signifieroit vieillissans: & ceux qui y lisent florissans, y mettent l'aage de l'homme à trente ans, suyuant l'opinion d'Heraclitus, que c'est l'espace de temps dedans lequel vn pere qui a engendré vn fils le rend apte & propre à en r'engendrer vn autre: & ceux qui y lisent vieillissans, attribuent à l'aage de l'homme cent & huit ans, disant que cinquante & quatre ans sont iustement la moytié de la vie de l'homme, estant composé de l'vnité des deux premiers nombres plains, des deux quarez & des deux cubiques, lesquels nombres Platon mesme a pris à bastir la generation de l'ame qu'il décrit: & semble que le poëte Hesiodé par ces paroles-là couuertement ait voulu designer la consommation du monde par feu, auquel temps il est vray-semblable que les Nymphes avec toute humeur & liqueur periront,

Celles qui sont aux forests demourantes,
 Sources des eaux & riuieres courantes,
 Ou par les prez de verdure vestus.

Et lors Cleombrotus, l'entends, dit-il, alleguer cela à plusieurs, & voy bien que comme l'inflammation & l'embrasement des Stoïques a desia enuahy les vers de Heraclitus & d'Orpheus, aussi va-elle saisir ceux d'Hesiodé, en luy donnant vne faulce & abusive interpretation aussi bien qu'aux autres. Mais ny ie ne puis supporter ce definement du monde, qu'ils mettent en auant, ny ie n'estime pas qu'il soit possible d'auoir remarqué ces vies des bestes, & si pense que le nombre des ans qu'ils vont sommans, mesmement en la corneille & au cerf, est excessiuement extrauagant: au demourant l'annee contenant en soy le commencement & la fin de toutes choses que les saisons amènent, & que la terre produict, pourroit à mon aduis non impertinemment estre appelée l'aage de l'homme, car vous mesmes confessez qu'Hesiodé en quelque passage appelle la vie de l'homme genean: n'est-il pas ainsi? Demetrius l'aduouia, Mais aussi est-il bien certain, pour suyuit Cleombrotus, que bien souuét les vaisseaux qui mesurent s'appellent de mesme nom que les choses mesurées, comme nous disons vne chopine, vn picotin, vn boisseau, vne mine. Tout ainsi donc comme nous appellons l'vnité nombre, qui est la mesure & la moindre partie, & le commencement

Des oracles qui ont cessé.

de tout nombre: au cas pareil aussi a-il appelé l'année l'âge de l'homme, pource que **E** c'est la mesure avec laquelle on la mesure: car les nombres que ces autres-là somment, n'ont aucune singularité notable ny celebre de celles que lon remarque en matiere de nombres, mais la somme de neuf mille sept cens & vingt, est composée des quatre premiers nombres à commencer à vn, assemblez ensemble & multipliez quatre fois, ou bien dix fois quatre, car par l'une & l'autre mode il en vient quarante: & ces quarante reduits en triangles par cinq fois, font la somme du nombre dessus allegué: mais quant à cela il n'est point necessaire d'en entrer en altercation alencontre de Demetrius, car soit qu'il y ait vn court ou long temps, & certain ou incertain, auquel Hesiodé fait trespasser l'ame d'un Dæmon, la vie d'un demy-Dieu: tousiours sera-il prouvé par lequel des deux il vouldra, avec tesmoignages fort euidens & anciens, qu'il y a des natures neutres & moyennes, comme és confins des Dieux & des hommes, subiectes aux passions mortelles, & à recevoir mutations & variations necessaires, lesquelles natures, suyuant la tradition & l'exemple de nos predecesseurs, il est raisonnable que nous **F** appellions Dæmons, & que nous les honorions. Auquel propos Xenocrates l'un des familiers amis de Platon souloit apporter l'exemple des triangles qui y conuenoit fort bien, car il comparoit celuy des triangles, qui a tous ses trois costez & ses trois angles égaux, à la nature diuine & immortelle: celuy qui les a tous trois inégaux, à la nature humaine & mortelle: & celuy qui en a deux égaux & vn inégal, & qui par ce moyen est en quelque chose égal, & en quelque chose inégal, à la nature des Dæmons, laquelle a les passions & perturbations de l'homme mortel, & la force & puissance semblable à un Dieu. La nature mesme nous en a proposé deuant les yeux des figures sensibles, & similitudes en haut, c'est à sçauoir des Dieux, le Soleil & les estoilles: des hommes mortels, les cometes, les lueurs nocturnes, les brandons de feu volans, & estoilles tombantes, comme Euripide mesme les a comparez quand il dict,

Naguere ayant de sa ieunesse attainct
La belle fleur, il a esté estainct
Comme vne estoille ardente, deuoluë
Du ciel en l'air, aussi tost dissoluë.

Et pour vn corps meslé representant la nature des Dæmons, la Lune, laquelle voyans estre ainsi subiecte à croistre & à descroistre, & à disparoître du tout, ils ont estimé estre fort sortable & conuenable à la mutabilité du genre des Dæmons, & l'ont à ceste cause aucuns appelée astre terrestre: les autres terre olympique, c'est à dire celeste, & les autres, l'heritage & possession de Proserpine celeste & terrestre. Tout ainsi doncques comme si quelqu'un ostoit du monde l'air, & le soustrayoit d'entre la Lune & la terre, il dissoudroit la continuation & la composition de l'univers, en laissant au milieu vne place toute vuide, sans liaison qui conioignist les extremittez ensemble, aussi ceux qui ostent le genre des Dæmons, ils ostent toute communication, & toute conference des Dieux avec les hommes, attendu qu'ils ostent la nature, laquelle **H** sert de truchement & de messager entre les deux, ainsi que dict Platon: ou bien ils nous contraignent de confondre pêle-mêle, & de broüiller le tout ensemble, si nous venons à mesler la diuinité parmy les passions & actions humaines, & si nous l'arrachons du ciel pour la faire entremettre des negoces & affaires des hommes, ainsi que lon dict, que les femmes de Thessalie tirent la Lune hors du ciel, laquelle ruze de fiction trouua foy entre les femmes, parce que Aglaonice fille de Agetor, comme lon dict, estant femme sçauante en Astrologie, donnoit à entendre au vulgaire, & faisoit semblant d'vser de quelques charmes & enchantemens, par vertu desquels elle arrachoit la Lune du ciel. Mais quant à nous n'estimons pas qu'il y ait aucuns oracles ne diuinations sans quelque diuinité, ny ne prestons pas l'oreille à ceux qui disent que les Dieux ne se soucient pas de sacrifices ny de seruices, & autres sacrees ceremonies qu'on

A qu'on leur face : mais d'autre costé aussi, ne cuidons pas que Dieu y soit présent, ne qu'ils s'en entremette, ou qu'il s'y employe luy-mesme en personne, ains renuoyans cela aux ministres des Dieux, comme il est iuste & licite, ne plus ne moins que si c'estoient leurs commis & leurs greffiers, croyons que ce sont les Dæmons qui font les espies & escoutes des Dieux, allans par tout çà & là, les vns contemplant & dirigeans les sacrifices & sacrees ceremonies que lon fait aux Dieux, les autres vengeans & punissans les grandes & outrageuses forfaitures & iniustices des hommes. Il y en a encore d'autres, à qui le poëte Hesiodé donne vn fort venerable nom, les appellant

Saincts & donneurs de biens, car l'exercice

Propre leur est de ce royal office.

comme nous baillant en passant à entendre, que le donner & faire des biens est le propre office des Roys : car il y a difference de vertu entre ces Dæmons, ne plus ne moins qu'il y en a entre les hommes, & y en a aucuns esquels il demeure encore

B quelques petites reliques, mais bien foibles & peu apparoissantes, de la partie de l'ame sensitive qui n'est point raisonnable, comme vn peu d'excremēt & de superfluité demouré de reste, & d'autres en qui il en est demouré beaucoup, & mal aisé à assoupir & esteindre, dequoy nous voyons les marques & les traces en plusieurs lieux empraintes & semees es sacrifices, festes & ceremonies que lon leur fait, & es contes que lon en recite : toutefois quant aux mysteres & ceremonies secretes, desquelles & à trauers lesquelles on peut plus clairement, que par nulle autre voye, appercevoir la verité de la nature des Dæmons, ie n'en parle point quant à cela, & en ay la bouche close, ainsi que parle Herodote : mais au reste quant à certaines festes & sacrifices seueres & tristes, comme iours malencontreux, là où en quelques lieux on mange chair crue, & la deschire-lon à beaux ongles, ou es autres où lon ieune,

C & se bat-on la poitrine, & en plusieurs lieux où lon dit de villaines & deshonnestes paroles durant les sacrifices,

En se secoüant de furie,

Auec forfence cryerie,

Le col & la teste croulans :

ie n'estimeray iamais que cela se face pour aucun des Dieux, mais plus tost diray-ie que c'est pour diuertir, adoucir & appaiser l'ire & la fureur de quelques Dæmons malings. Et n'est pas vray-semblable qu'il y ait iamais eu Dieu qui ait requis & demandé qu'on luy sacrifiait des hommes, comme lon faisoit anciennement, ou qui receust tels sacrifices pour agreables : & n'est pas aussi pour neât, que des Roys & grâds princes baillent leurs propres enfans à immoler, ou bien que eux-mesmes les immo-

D lent & sacrifient, ains faut croire que c'est pour destourner ou pour appaiser le courroux & la rancune que quelques peruers & malings esprits ont pour assouuir leurs violentes & tyranniques amours, dont ils ne peuuent ou ne veulent iouir auec les corps ny par les corps : ains comme Hercules assiegea la ville d'Oechalie pour auoir vne fille qui estoit dedans, aussi ces puissans & violents Dæmons-là demandans quelque ame humaine, estant encore enuelopee de son corps, & n'en pouuant iouir à trauers ce corps, amēnent la pestilence, la famine & sterilité de la terre aux villes, suscitent des guerres & des seditions ciuiles, iusques à ce qu'ils viennent à auoir & à iouir de ce qu'ils aiment. Les autres au contraire, comme il me souuient auoir remarqué en Candie, où ie me suis longuement tenu, qu'ils celebrent vne feste, en laquelle ils montrent la figure d'vn homme sans teste, disans que c'est Molus le pere de Meriones, lequel ayant pris à force vne Nymphé, fut depuis trouué sans teste. Et puis les rauissements de fils ou de filles, les voyages loingtains, les bannissements, les fuites & cachements, les seruices que lon dit & que lon chante es fables & hymnes des poëtes, ne sont point passions ny accidents conuenables aux Dieux, ains aux Dæ-

Des oracles qui ont cessé.

mons, dont on fait mention pour celebrer leur vertu ou leur puissance : ny n'a pas E
Æschylus entendu d'un Dieu, quand il a dit,

Sainct Apollo de tout le ciel banny:
ny Admetus en Sophocles,

Mon coq chantant le menoit à la meule:
& se fouruoient grandement de la verité les Theologiens de la ville de Delphes, qui
estiment que iamais il y ait eu en ce lieu combat d'Apollo alencontre d'un serpent,
pour la possession de l'oracle, & qui souffrent que les poëtes ou les orateurs en estri-
uant les vns contre les autres, aillent iouer ou reciter de telles fables parmy les Thea-
tres, comme contredifans expressément, par ce qu'ils composent, aux plus saintes
ceremonies de leurs sacrifices. En cest endroit Philippus se trouuant fort esbahy ('car
l'historien Philippus estoit en la compagnie) demanda, Et à quelles ceremonies diui-
nes est-ce que contredisent ceux qui estriuent és theatres les vns contre les autres? A
celles-là, dit-il, qui concernent l'oracle Delphique, & par lesquelles ceste cité de- F
puis nagueres ayant admis & reçu en ses ceremonies & sacrifices tous les Grecs, qui
habitent deça la vallee de Tempes, en a chassé & exclus ceux qui sont habitans ou-
tre le pas des Thermopyles. Car la tente de fueillees que lon faißt de neuf en neuf
ans dedans l'aire du temple, n'est pas la representation du repaire & de la tefniere om-
brageuse du dragon, ains plus tost de la maison & habitation de quelque tyran ou
de quelque Roy, & l'assault que lon luy donne par surprise en silence par la porte
que lon appelle Dolonia: & ce que vn peu apres lon y amene vn ieune garçon
ayant pere & mere, avec torches ardentes que lon iette le feu dedans la fueillee, &
renuerse-lon la table par terre, & puis que ceux qui l'ont fait, s'enfuient à trauers
les portes du temple, sans regarder derriere eux: & finalement la fuite de ce garçon
en diuers lieux, qu'il est reduit en seruitude: & apres tout les expiations & ceremo-
nies de purification, qui se font en la vallee de Tempes, me font soupçonner que
cela represente quelque notable malefice & hardie entreprise, anciennement adue- G
nue. Car c'est vne mocquerie, mon bel amy, de dire qu'Apollo pour auoir tué le dra-
gon ait esté contrainct de s'enfuir iusques aux extremitez de la Grece, pour en estre
rehabilité & purifié, & que là il ait faißt quelques offrandes & quelques effusions,
comme font les hommes quand ils veulent appaiser l'ire & le courroux des Demons,
que nous appellons Alastoras & Palamnaos, c'est à dire poursuyuans la punition
& vengeance de crimes si enormes que la memoire en dure à iamais, ou bien de
quelques fort anciennes forfaitures. Vray est que le propos que i'ay autrefois ouy ra-
conter touchant ceste fuite & cest absentement, est fort merueilleux & estrange,
mais s'il contient aussi quelque chose de verité, il ne faut pas que nous estimions que
ce soit petite chose, ne vulgaire & commune, que celle qui fut alors commise au lieu
de l'oracle. Toutefois de peur qu'il ne semble, que comme dit Empedocles,

Je coufe vn bout d'une fable à vn autre. H
& que ie ne fuiue pas vn mesme sentier en mes propos, ie vous prie souffrez que ie
mette icy la fin conuenable à mon premier discours, car nous y sommes iustement
arriuez: & me permettez prendre la hardiesse de dire ce que plusieurs deuant moy
ont dit, que quand les Dæmons, qui sont ordonnez pour le gouuernement & super-
intendance des oracles & diuinations, viennent à defaillir, il est force aussi que les ora-
cles defaillent & perissent: & que quand ils s'enfuient, ou qu'ils passent & s'en vont
tenir ailleurs, il est force que les forces diuinatrices faillent en tels lieux: puis quand
ils y retournent apres vn long espace de temps, les lieux recommencent à parler ne
plus ne moins que les instruments de musique, quand ceux qui en sçauent iouer
les manient & les touchent. Apres que Cleombrotus eut ainsi discouru, Hera-
cleon se prit à dire, Il n'y a personne en la compagnie qui soit infidele ny mescreant,
ou

- A ou qui ait opinions touchant les Dieux qui ne s'accordent avec les nostres, mais toutefois donnons nous garde qu'en nos discours nous ne facions des suppositions erronees, & qui pourroient donner de grands fondements à l'impieté. Tu parles bien, dit Philippus, mais quel propos est-ce qui t'a le plus offensé & scandalisé en ce que Cleombrotus a supposé? Adonc Heracleon, Que ce ne soient pas des Dieux qui president aux oracles, d'autant qu'il est conuenable de croire qu'ils soient exempts de toute entremise de choses terrestres, & que ce soient plus tost des Démonz ministres des Dieux, il me semble que ce n'est point mal supposé: mais tout à coup d'aller attribuer à ces Démonz-là des crimes, forfaitures, calamitez, erreurs & inquietudes enuoyez des Dieux, en tirant ces propos-là des vers d'Empedocles, cela me semble vn peu trop presumptueux & d'vne audace trop barbaresque. Et lors Cleombrotus demanda à Philippus, qui & d'où estoit ce ieune homme-là: & apres qu'il eut entendu son nom & son pays, luy respondit: Nous n'ignorons pas non plus qu'vn autre,
- B Heracleon, que ce que nous auons dit ne soit estrange, mais on ne sçauoit discourir de grandes matieres sans poser de grands fondements, pour prouuer vne opinion vray-semblable: mais toy-mesme ne t'aduises pas, que tu ostes ce que tu concedes: car tu confesses bien qu'il y a des Démonz, mais en voulant maintenir qu'il n'y en a point de meschans ny de mortels, tu ne sçauois plus soustenir qu'il y en ait: car en quoy seront-ils differents des Dieux, si quant à leur essence ils l'ont conioincte à l'immortalité, & quant à la vertu ils ne sont subiects à aucunes passions ny à aucun péché? Heracleon pensant en soy-mesme, sans mot dire, ce qu'il deuoit respondre à cela, Cleombrotus poursuyuit, disant: Et qui plus est, ce n'a pas esté Empedocles seul qui a dit, qu'il y auoit de mauuais Démonz, mais Platon mesme, & Xenocrates & Chrysippus: & encore Democritus quand il souhaittoit & prioit qu'il rencontrast des images heureuses, il donnoit assez à entendre qu'il croyoit y en auoir d'autres peruerfes, & mauuaises, & qui ont de mauuaises intentions, & de violentes affectations. Et quant à ce qu'ils soient mortels, i'en ay ouy faire vn conte à vn personnage qui n'est point esuenté ny menteur, c'estoit Epitherfes le pere d'Æmylianus l'orateur, que quelques vns de vous à mon aduis peuuent auoir ouy declamer: cestuy Epitherfes estoit de la mesme ville que ie suis, & auoit esté mon maistre en Grammaire, lequel contoit que pour aller en Italie il s'embarqua vn voyage sur vne nauire chargée de plusieurs marchandises, & de grand nombre de passagers: & disoit que sur le soir le vent leur faillit aupres des Isles Echinades, & que leur nauire alla branlant tant qu'elle arriua pres des Paxes, que la plus part des passagers estoient veillans, & y en auoit beaucoup qui beuuient encore, acheuans de souper, quand tout soudain on entendit vne haute voix venant de l'vne de ces Isles de Paxes, qui appelloit Thamos, si fort, qu'il n'y eut celuy de la compagnie, qui n'en demourast tout esbahy. Ce Thamos estoit vn pilote Ægyptien, que peu de ceux qui estoient en la nef cognoissoient
- D par son nom. Pour les deux premieres fois qu'il fut appelé, il ne respondit point, mais à la troisieme, si: & lors celuy qui l'appelloit renforçant sa voix, luy crya, que quand il seroit à l'endroit des basses, qu'il denonceast, que le grand Pan estoit mort. Epitherfes nous contoit que tous ceux qui ouïrent le cry de ceste voix, en demeurèrent fort esmerueillez, & entrerēt la dessus en dispute, à sçauoir s'il seroit bon de faire ce qu'il commandoit, ou bien de ne s'en entremettre point, ains le laisser là: finalement qu'ils resolurent ainsi, que s'ils auoient bon vent, lors qu'ils passeroient par deuant ce lieu, que Thamos passast outre sans mot dire: mais si d'aduenture il y auoit calme, & qu'il ne tirast point de vent, qu'il cryast tout hault, ce qu'il auoit entendu. Quand ils furent à l'endroit de ces basses & platys, il aduint qu'il ne tiroit ne vent ny haleine, & estoit la mer fort platte: parquoy ce Thamos regardant de dessus la proue vers la terre, cria tout hault ce qu'il auoit entendu, que le grand Pan estoit mort. Il n'eut

Des oracles qui ont cessé.

pas plus tost acheué de dire, que lon entendit vn grand bruit, non d'un seul, mais E
de plusieurs ensemble, qui se lamentoient & s'esbahissoient tout ensemble: & pour
autant que plusieurs estoient presens, la nouuelle en fut incontinent espendue par
toute la ville de Rome, tellement que l'Empereur Tiberius Cæsar enuoya querir ce
Thamos, & adiousta tant de foy à son dire, qu'il feist enquerir qui pouuoit estre ce
Pan là, & que les hommes de lettres, qui estoient en bon nombre autour de luy, fu-
rent d'opinion que ce deuoit estre celuy qui estoit né de Penelopé & de Mercure: si
y eut lors quelques vns en la compagnie qui tesmoignerent l'auoir autrefois ouy dire
au viel Æmylianus. Demetrius adonc conta, que alentour de l'Angleterre y a plu-
sieurs petites Isles desertes, semées çà & là par la mer, que lon appelle au pays les Isles
des Dæmons & des demy-Dieux, & que luy mesme par commandement de l'Empe-
reur alla en la plus prochaine des desertes, pour voir & enquerir ce que c'estoit, &
trouua qu'il y auoit peu d'habitans, qui estoient tenus pour saincts & inuiolables par
les Anglois. Peu apres qu'il y fut arriué, il dit que l'air & le temps se troubla merueil- F
leusement, & se feist vne terrible tempeste & orage de vents & de tonnerres: laquelle
estant à la fin cessée, il dit que les insulaires luy asseurerent, que c'estoit quelqu'un de
ces Dæmons & demy-Dieux qui estoit decédé: car ainsi comme vne lampe, disoit
il, pendant qu'elle est allumée n'a rien qui offense personne, mais quand elle vient
à s'esteindre, elle rend vne puanteur qui fasche ceux qui sont alentour: aussi les gran-
des ames, pendant qu'elles luy sent, sont doulces & gracieuses, sans fascher per-
sonne, mais quand elles viennent à s'esteindre & à defaillir, elles emeuuent, comme
lors, de grands orages & de grandes tempestes, & bien souuent mesme infectent l'air
de maladies contagieuses. Ils disent d'auantage, qu'il y a l'une de ces Isles-là, ou Sa-
turne est detenu prisonnier par Briareus, qui le tient lié de sommeil, & que lon a in-
uenté ce moyen-là de le tenir enchainé en le faisant dormir, & qu'il y auoit autour de
luy plusieurs Dæmons qui estoient ses vallets & ses seruiteurs. Cleombrotus adonc
prenant la parole: Je pourrois, dit il, aussi bien reciter plusieurs tels exemples si ie vou- G
lois, mais c'est assez que cela n'est point contraire, ny n'apporte aucune opposition
alencontre de ce que nous auons mis en auant, combien que nous sçauons assez que
les Stoïques ont la mesme opinion des Dæmons que nous auons, & qu'ils tiennét qu'il
y a vne si grande multitude de Dieux que lon tient, il n'y en a qu'un seul qui soit eternal
& immortel, & que tous les autres ont eu commencement par naissance, & prendrôt
fin par mort. Quand aux ruses & mocqueries des Epicuriens, il ne les faut point
craindre, attendu qu'ils ont bien l'audace d'en vser mesme contre la prouidence diui-
ne, l'appellans fable & conte de vieilles: mais au contraire nous maintenons, que leur
infinité de mondes est veritablement vne fable, de dire qu'entre les mondes innu-
merables il n'y en ait pas vn qui soit gouuerné par raison & prouidence diuine, ains que
tous ont esté faicts & se maintiennent fortuitement & casuellement. Et s'il est loisible H
de se rire & mocquer es discours de philosophie, plus tost faudroit-il se mocquer de
ceux qui tirent aux disputes des choses naturelles ie ne sçay quelles images sourdes,
aueugles & sans ames, qui apparoiſſent par infinies reuolutions d'annees aux surui-
uans, & se promènent par tout, estans, ce disent-ils, yssues & decoules des corps,
partie encore viuans, & partie de ceux qui long temps y ont esté ou bruslez ou pourris:
c'est de ceux-là qu'il se faudroit mocquer, qui attirent des ombres & des bourdes
fortes es disputes de la nature: & cependant se courroucent, & treuuent estrange si
lon dit qu'il y a des Dæmons, non seulement qui apparoiſſent, mais aussi qui parlent
& qui ont leur vie & leur estre de bien fort longue duree. Apres que ces propos eu-
rent esté dictz, Ammonius parla disant: Il me semble que Cleombrotus a bien pro-
noncé. Et qui empesche que nous ne receuions sa sentence, laquelle est sainte
& tres-digne d'un philosophe? car si on la reiette, on sera contrainct de reietter aussi
& nier

- A** & nier beaucoup de choses qui sont & qui aduiennent, mais dont on ne sçauroit rendre raison certaine: & si on la reçoit, elle ne tire apres elle consequence de chose quelconque impossible, ne qui ne soit en estre. Mais quant à ce que j'ay ouy dire aux Epicuriens seuls, alencontre des Dæmons qu'introduit Empedocles, comme estant impossible qu'ils soient heureux & de longue vie, s'ils sont mauuais & vicieux, d'autant que le vice de sa nature est auetue, & qui de foy-mesme se precipite ordinairement és perils & inconueniës qui destruisent la vie, cela est vne sorte oppositiõ, car par ceste raison il faudroit qu'ils confessassent que Epicurus ait esté pire que Gorgias le Sophiste, & Metrodorus que Alexis le farceur & ioüeur de Comædies, car il vescu deux fois autant que Metrodorus, & Gorgias vescu deux fois autant, & encore vn tiers d'auantage qu'Epicurus: mais autrement disons nous que la vertu est puissante, & le vice debile, non pas pour l'entretienement, ou pour la dissolution du corps en vie, attendu que nous voyons entre les animaux plusieurs qui sont lourds & hebetes, & d'autres qui sont fort getifs & fort lascifs, qui viuent plus longuement que ne sont ceux qui sont plus sages & plus esueillez: parquoy ils ne concluent pas bien de dire, que la nature diuine iouisse de l'immortalité, d'autant qu'elle sçait euer & repoulsier les choses qui destruisent la vie, car il falloit qu'en la nature de la diuinité bien-heureuse, ils missent vne impassibilité de n'estre subiecte à corruption ou alteration quelconque, sans auoir besoin d'aucune sollicitude de l'entretenir. Mais à l'aduenture n'est-il pas honneste de dire ne disputer contre ceux qui ne sont pas presens: & pourtant fera-il meilleur que Cleombrotus reprenne le propos qu'il a nagueres laissé touchant la fuite & le passage des Dæmons de lieu à autre. Voire-mais, dit Cleombrotus, ce sera bien merueille s'il ne vous semble encore plus estrange & hors d'apparence de raison, que le premier, combien qu'il semble estre fondé en raison naturelle, & que Platon luy mesme en ait donné le commencement, non qu'il l'ait absoluëment prononcé & affermé, mais par maniere d'opinion douteuse en ayant sous paroles couuertes ietté avec vne crainte retenue quelque coniecture en auant.
- C** Mais puis que la coupe des deuis & des contes, meslez de toutes sortes, est seruie sur table, & que à peine pourrois-je iamais rencontrer de plus gracieux & plus faciles auditeurs, pour faire passer vne telle narration, ne plus ne moins que de la monnoye estrangere, ie ne feindray point de vous faire le conte que j'ay entendu d'un estrangier, lequel apres plusieurs allees & venues, ayant bien cherement acheté & payé l'aduenture de le rencontrer, ie trouuay à la fin, à toute peine, aupres de la mer rouge. Il ne parloit aux hommes qu'une fois l'annee, & le demourant du temps conuersoit, comme il disoit, avec les Nymphes Nomades, & avec les Dæmons. Je parlay à luy, & me fit bon recueil: c'estoit le plus bel homme de visage que ie pense iamais auoir veu, non subiect à maladie aucune, & prenoit tous les mois vne fois seulement le fruit de ne sçay quelle herbe medicinale amere, dont il viuoit: il estoit exercité à parler plusieurs langages, & parloit avec moy plus communément en langue Dorique: son parler sembloit presque vn chant, & si tost qu'il ouuroit la bouche pour parler, tout l'environ de luy estoit remply d'une tressoüefue odeur qui en sortoit. Or quant à tout autre sçauoir & cognoissance de toutes histoires, il l'auoit tout le long de l'an: mais quant à la diuination, elle luy estoit inspiree vn seul iour en chascque annee, auquel il descendoit sur le riuage de la mer, & là chantoit & predisoit les choses à aduenir aux Princes & Seigneurs de tout le pays, ou aux secretaires des Roys, qui se trouuoient là à iour nommé, & puis s'en retournoient. Ce personnage doncques attribuoit la diuination aux Dæmons, & estoit bien aise d'ouïr ce que lon raconte de Delphes. Quant à ce que nous tenons de Bacchus, & des sacrifices que nous luy faisons, il en estoit tout informé, disant que c'estoient tous grands accidents aduenus aux Dæmons, & semblablement ce que lon raconte touchant le serpent

Des oracles qui ont cessé.

Python, & disoit que celuy qui l'auoit tué n'en auoit pas esté banny pour dix ans, ny E ne s'en estoit pas fuy en la vallee de Tempes, ains de tout ce monde, dont il seroit depuis retourné apres neuf reuolutions de la grande annee, estant bien purifié, nettoyé, & veritablement Phébus, c'est à dire, clair & luisant, auroit recouuré la superintendance de l'oracle Delphique, lequel ce pendant auoit esté déposé en la garde de Themis. Autant en disoit-il de ce que lon raconte des Typhons, & des Titans: car il affermoit que ce auoit esté des batailles de Démon contre Démon, & des fuittes & bannissements de ceux qui auoient esté vaincus, ou bien des punitions que les Dieux auoient faittes de ceux qui auoient commis de telles forfaitures que lon raconte que Typhon commeit alencontre d'Osiris, & de Saturne alencontre du Ciel, desquels les honneurs sont fort obscurcis ou du tout esteincts, d'autant qu'ils sont passez en vn autre monde: car i'entends que les Solymiens, qui sont voyfins des Lyciens, honorent singulierement Saturne, mais depuis qu'il eut occis leurs prince, Arsalus, Dryus & Trofobius, il s'en fuit, & s'en alla en quelque autre pays, car ils ne sçauent où, F lon ne fait plus conte de luy, mais qu'ils appellerent ces trois, Arsalus, Dryus, & Trofobius, les Dieux feueres, & de faict que tant en public qu'en priué les Lyciens font encore leurs maledictions & execrations par eux. Plusieurs autres exemples semblables peut-on tirer de ce que lon raconte des Dieux. Et si nous appellons aucuns de ces Démon des noms des Dieux vsitez & ordinaires, il ne s'en faut point emerueiller, disoit ce personnage estranger, car ils sont bien-aïses d'estre appelez des noms des Dieux dont ils dependent, & dont ils ont honneur & puissance, comme entre les hommes, l'un est Iouial, l'autre Palladien, l'autre Apollonien ou Bacchanal, ou Mercurial, & y en a qui sont bien & conuenablement nommez, encore que ce soit à l'aduenture: mais la plus part ont des denominations des Dieux qui ne leur conuiennent aucunement, ains sont transposees. Icy Cleombrotus ayant fait pause, son dire sembla merueilleux à toute la compagnie: & Heracleon luy demanda, en quelle sorte c'estoit que cela touchoit à Platon, & comment c'estoit qu'il auoit donné cōmance- G ment à vn tel propos. Cleombrotus luy respondit, Tu fais bié de me le remettre en memoire, c'est par ce que premierement il reietta tousiours l'infinité des mondes: mais il a tousiours douté du nombre certain & precis, & concedant qu'il y auoit apparence au dire de ceux qui en mettoient cinq, vn en chascun element, il s'est tenu à vn, & semble que cela soit propre à Platon, là où tous les autres philosophes ont tousiours fort redouté de receuoir & admettre multitude de mondes, comme s'il estoit necessaire que ceux qui n'arrestoient & ne terminoient pas la matiere en vn, ains en sortoient, tombassent necessairement en ceste facheuse & non terminee infinité. Mais cest estranger-là, dis-je adonc, determinoit-il rien du nombre des mondes cōme Platon, ou si tu ne l'en recherches iamais en tout le temps que tu fus avec luy? Je n'auois garde de faillir, dit Cleombrotus, d'estre bien diligent & affectionné auditeur de tels deuis, voyant mesmement qu'il se monstroient si affable en mon endroit. Il disoit que ny le H nombre des modes n'estoit infiny, ne qu'il n'y en auoit pas vn seul, ny cinq, mais cent quatre vingts & trois, qui estoient ordonnez & regez en forme triangulaire, duquel triangle chacun costé contenoit soixante mondes, & que des autres trois chascun estoit à l'un des coings du triangle, & qu'ils s'entretenoient tout alentour, ne plus ne moins que ceux qui sont en vne danse, & que la plaine qui est au dedans du triangle, estoit le fondement & l'autel commun de tous ces mondes, qui s'appelloit le champ ou la plaine de verité, dedans laquelle sont les desseings, les moules, les idees, & les exemplaires immobiles de toutes les choses qui furent oncques & qui iamais seront, & à l'entour de ces idees estant l'eternité, le temps, comme vn ruisseau qui en sortoit, couloit dedans ces mondes, & que les ames des hommes, s'ils ont bien vescu en ce monde, en dix mille ans vne fois les voyent, & que les plus saintes ceremo-

A cerimonies mystiques des sacrifices qui se font icy bas, ne sont que comme vn songe de ceste veüe, & de ce spectacle-là: & disoit que toute la peine que lon employe à l'estude de la philosophie estoit pour paruenir à la veüe de ces beautéz-là, ou autrement que c'estoit toute peine perdue. Je l'entédois, dit-il, conter tous ces propos-là, ne plus ne moins proprement, que si c'eust esté quelque cerimonie de sacrifice qu'il m'eust exposée en quelque religion, en laquelle il m'eust instruit, sans qu'il m'amenaist aucune preuue ny aucune demonstration de son dire. En cest endroit me tournant deuers Demetrius, ie luy demanday comment il y auoit aux vers d'Homere que disent les pourchassans de Penelope, quand ils voyent manier l'arc à Vlysses:

O ç'a esté quelque grand crocheteur

D'arcs cestui-cy, & vn grand fureteur!

B Et comme Demetrius me les eust remis en memoire: Il me vient, dis-je, en pensee d'en dire autant de cest estranger, O c'estoit vn grand amateur & vn grand fureteur de toutes resolutions, & de tous discours de philosophie, & estoit homme bien versé aux lettres. Certes il n'estoit point estranger de nation, ains Grec, & rempli de toute science, & erudition Grecque: & ce nombre de mondes nous monstre qu'il n'est ny Ægyptien, ny Indien, ains venu d'un Grec de langue Dorique, du pays de la Sicile, nommé Petron, natif de la ville d'Imere en Sicile, qui en a composé vn petit liure, que ie n'ay pas leu, & si ne sçay s'il est en estre es mains des hommes, mais Hippys natif de Rege, duquel Phantias Ereffien fait mention, escrit que c'estoit l'opinion & le discours de ce Petron, qu'il y auoit cent quatre vingts & trois mondes qui touchoient les vns aux autres de reng: mais il ne declare point que c'est à dire, se toucher de reng, & n'en apporte aucune raison probable. Et quelle verisimilitude, ce dit Demetrius, pourroit-il auoir en cela, veu que Platon, sans amener aucune coniecture vray-semblable, ny aucune apparence de raison, a renuersé ceste opinion

C là? Et toutefois, ce dit Heracleon, nous entendons dire à vous autres Grammairiens, que Homere mesme est le premier auther de ceste opinion-là, comme ayant diuisé l'univers en cinq mondes, le ciel, l'eau, l'air, & la terre, & ce qu'il appelle Olympe, dont il en laisse les deux communs, c'est à sçauoir la terre à tous ceux d'à bas, l'Olympe à tous ceux d'en haut, & les trois du milieu attribue à trois diuers Dieux. Aussi semble-il que Platon attribuant aux principaux membres de l'univers les especes & figures premieres, & les plus excellentes des corps, les appelle cinq mondes, à sçauoir celui de la terre, celui de l'eau, celui de l'air, & celui du feu, & finalement celui qui embrasse tous les autres, qu'il appelle Dodecaëdre, c'est à dire à douze faces, qui s'estend amplement, est fort capable & mobile, comme estant sa forme & figure fort propre & conuenable aux reuolutions & mouuemens des ames. Demetrius alors, Qu'est-il besoing, dit-il, de remuer maintenant Homere, car assez

D auons nous desormais allegué de fables. Mais il s'en faut beaucoup que Platon n'appelle les cinq differentes essences du monde cinq mondes, attendu que là mesme où il dispute contre ceux qui mettent vne infinité de mondes, il afferme qu'il n'y en a que vn seul créé de Dieu & aymé de luy, composé de toute nature, ayant corps entier, & content de soy-mesme, sans auoir besoing de rien d'ailleurs. Voyla pourquoy à bon droit pourroit-on trouuer estrange, que luy ayant dit verité, il ait donné occasion à d'autres de prendre vne opinion faulse, & en laquelle il n'y a apparence quelconque: car s'il n'eust retenu l'vnité du monde, il eust aucunement donné fondement à ceux qui en mettent infinis: mais qu'il en ayt voulu asseurer precisément cinq, & non point plus ne moins, cela est merueilleusement estrange & esloigné de toute probabilité, si d'aduenture tu n'as quelque chose à dire sur cela, dit-il, en soy retournant deuers moy. Comment, dis-je lors, estes vous doncques d'aduis de laisser là vostre premiere dispute des oracles, comme estant de tout poinct

Des oracles qui ont cessé.

acheuee & resoluë, & d'en prendre vn autre de non moindre difficulté? Nous ne la E
laisserons pas pour cela, respondit Demetrius, mais aussi ne passerons nous pas ou-
tre ceste-cy, qui de soy-mesme se presente, & presque nous met la main au deuant:
car nous n'y demourerons pas beaucoup, ains seulement tant que nous puissions
en passant y trouuer quelque peu de verisimilitude, & puis nous retournerons à
nostre premier propos. En premier lieu doncques, dis-je, les raisons qui empes-
chent que lon ne mette des mondes infinis, n'empeschent pas que lon n'en mette
plus d'un: car aussi bien en plusieurs mondes, comme en vn, pourra estre la diuina-
tion, la prouidence & la fortune, qui entretiendra és plus petites choses: mais la
plus part des plus grandes & principales choses auront & prendront leurs genera-
tions, changemens & mutations par ordre, ce qui ne se pourroit faire en infiny nom-
bre de mondes. Et puis il est plus conforme à la raison, de dire, que Dieu n'ait pas
créé pour vn monde vnique & seul, car estant parfaitement bon, il n'y a vertu ne
bonté aucune qui luy defaille, & moins encore que toutes les autres, la iustice & F
l'amitié, car elles sont de soy-mesme tres-belles & tres-bien seantes aux Dieux: or
n'a Dieu rien qui soit inutile, ne qui soit pour neant: parquoy il faut qu'il y ait hors
de luy d'autres dieux & d'autres mondes, enuers lesquels il vse de ces vertus sociales:
car il n'en vsera pas enuers soy-mesme, ny enuers aucune partie de soy, de iustice,
ny de grace & de benignité, ains enuers les autres: ainsi n'est-il pas vray-semblable
que ce monde flotte & vague sans amy, sans voisin, sans communication quelcon-
que en vn vuide infiny, attendu mesmement que nous voyons que la nature enferme
& enuironne toutes choses en leurs genres & en leurs especes, ne plus ne moins que
dedans des vases, ou dedans les enueloppes de leurs semences, car il n'y a en toute la
nature rien qui soit vn en nombre, qu'il n'ait la raison de son estre commune avec
d'autres, ne n'y a chose qui participe de quelque denomination en commun, qui
en particuliere ne soit telle. Or est-il que le monde s'appelle ainsi en commun. Il
faut donc qu'il soit en particulier tel, & est qualifié tel en particulier, pour la diffe- G
rence qu'il a avec ses semblables & de mesme espece: car s'il n'y a en toute la nature
ny homme qui soit vn, ny cheual, ny estoille, ny Dieu, ny Démon, qui empes-
chera que lon ne puisse dire que la nature n'a pas non plus vn seul monde, ains qu'il
faut qu'il en ait plusieurs? Et qui m'obiicera que ce monde n'a semblablement que
vne terre, ny qu'une mer, ie luy respondray qu'il ne s'apperçoit pas de ce qui est tout
euident, des parties semblables: car nous diuisons la terre en parties de semblable
& mesme denomination, pour ce que toutes parties de terre sont terre, & de la
mer semblablement: mais nulle partie du monde n'est monde, ains est composé
de diuerses & differentes natures: car quant à l'inconuenient que d'aucuns redou-
tent principalement, pour lequel ils consomment toute la matiere au dedans d'un
monde, de peur que s'il en demouroit quelque chose au dehors, elle ne troublast
la composition de cestui-cy par resistance qu'elle luy feroit, & heurts qu'elle luy H
donneroit, ils n'ont point occasion de le craindre, car y ayant plusieurs mondes, &
vn chacun d'eux particulierement ayant vne mesure definie & determinee à sa
substance & à sa matiere, & nulle partie d'icelle sans mesure ny sans ordre, il ne de-
meurera rien de superfluité, comme d'excrement, au dehors, qui puisse donner em-
peschement, pour ce que la raison qui dominera celle portion de la matiere qui se-
ra attribuee à chascun monde, ne permettra pas qu'il y ait rien, qui sortant hors de
son ordre, & vagant çà ou là, aille choquer vn autre monde, ny que d'un autre auf-
si il sorte rien qui se vienne ruer sur soy, pour ce que la nature n'a rien qui en quantité
soit infiny, ny desordonné, ny mouuement qui soit sans raison, ny sans ordre, & s'il
y a d'adventure quelque influence qui passe des vns aux autres, cela est vne commu-
nication fraternelle, douce & amiable, dont ils se meslent tous ensemble, ne plus ne
moins

- A** moins que les lumieres des astres, & les influences de leurs températures font causes qu'eux mesmes se resiouissent en s'etrerregardat les vns les autres d'un bening aspect, & donnent aux dieux, qui sont plusieurs & bons en chacun astre, moyen de s'entrehanter & s'entrecareffer les vns les autres : car en tout cela il n'y a rien qui soit impossible, ny fabuleux, ny contraire à la raison, si ce n'est que quelques vns s'en desient, pour les raisons & decisions d'Aristote, qui dit que chaque corps a son lieu propre & naturel, à raison dequoy il est force que la terre de tous costez tende au milieu, & puis l'eau par dessus elle, seruant pour sa pesanteur de fondement aux autres plus legers elemens. Si doncques il y auoit plusieurs mondes, il aduiendroit que la terre bien souuent se trouueroit situee au dessus de l'air & du feu, & bien souuent au dessous, & semblablement que l'air & le feu se trouueroient au dessous, quelquefois en leurs lieux naturels, & quelquefois en d'autres contre nature : lesquelles choses estans impossibles, ainsi comme il pense, il s'ensuit doncques qu'il n'y a ne deux ne plusieurs mondes, ains vn seul, qui est cestui-cy, composé de toute sorte de substance, disposé selon nature, ainsi qu'il est conuenable à la diuersité des corps. Mais en tout cela il y a plus d'apparence vray-semblable, qu'il n'y a de verité : car qu'il soit ainsi, amy Demetrius, considere que quand il dit, qu'entre les corps simples les vns tendent vers le milieu, c'est à dire contre-bas, les autres arriere du milieu & contremont, & les autres à l'entour du milieu, c'est à dire en rond : au regard dequoy prent-il le milieu ? il est certain que ce n'est pas au regard du vuide, car il n'y en a point en nature selon son aduis, & encore selon ceux qui en mettent, il ne peut auoir de milieu non plus que de premier, ny de dernier : car premier & dernier sont des bouts : or ce qui est infiny, consequemment est aussi sans bout : mais encore que par force quelqu'un d'eux nous contraignist d'admettre vn milieu au vuide, il est impossible de comprendre & imaginer la difference de mouuemens des corps vers iceluy, parce qu'il n'y a ny en iceluy vuide aucune puissance attractiue des corps, ny dedans les corps aucune deliberation, ou inclination & affection de tendre de tous costez
- C** à ce milieu, ains est aussi peu possible d'imaginer, que des corps sans ames se meuuent d'eux-mesmes, vers vne place incorporelle & n'ayant aucune difference de situation, comme qu'elle les attire à soy. Il reste donc que ce milieu se doiue entendre, non point localement, mais corporellement : car estant ce monde vne masse & vnion composee de plusieurs corps differents & dissemblables conioincts ensemble, il est force que les diuersitez d'iceux engendrent mouuemens dissemblables aussi de l'un en l'autre : ce qui apparoit par ce que chacun d'iceux corps changeant de substance change aussi de place quant & quant : car la subtilisation & rarefaction distribue à l'entour en rond la matiere qui se leue du milieu en contremont, & au contraire la condensation & constipation la deprime & la chasse contre bas vers le milieu : sur quoy il n'est ia besoing de discourir d'auantage en ce lieu, car quelque cause que
- D** lon suppose produire de telles passions & de telles mutations, celle mesme contiendra chacun des mondes en soy, par ce qu'un chacun d'eux a sa terre & sa mer, & chacun son milieu propre, & chacun aussi les passions & mutations des corps, & la nature & puissance qui les maintient & conserue chacun en son lieu & son estre : car le dehors, soit qu'il n'y ait rien, soit qu'il y ait vn vuide infiny, ne peut bailler aucun milieu, comme nous auons dit parauant : mais y ayant plusieurs mondes, chacun a son milieu propre à part, tellement qu'en chacun y aura aussi mouuemens propres des corps, les vns tendans au milieu, les autres arriere du milieu, les autres à l'entour du milieu, selon que eux mesmes les distinguent : & celuy qui voudroit que y ayant plusieurs milieus, les corps pesans de tous costez tendent vers vn seul, ressembleroit proprement à celuy qui voudroit, que y ayant plusieurs hommes le sang coulast de tous costez en vne seule vene, & que les cerueaux de tous fussent

Des oracles qui ont cessé.

contenus d'une mesme taye, estimant que ce seroit vn grand inconuenient, si tous **E** les corps solides n'estoient en vne mesme place, & les rares en vne autre: mesme celuy là seroit bien impertinent, & aussi lourdaud seroit celuy qui trouueroit mauuais que les entiers eussent toutes leurs parties en leur ordre, en leur reng, & en leur situation naturelle: car ce seroit vne extrême sottise si quelqu'un croyoit, qu'il y eust vn monde qui eust la Lune en soy situee au bas, ne plus ne moins que si vn homme auoit la ceruelle aux talons, & le cœur aux tempes: mais il n'y a point d'absurdité ne d'inconuenient, qu'en mettant plusieurs mondes distincts & separez les vns des autres, on distingue aussi quant & quant, & separe leurs parties: car en chacun la terre, la mer, & le ciel, seront situez & colloquez en leurs assiettes naturelles, ainsi comme il appartient, & aura vn chacun d'iceux mondes, son bas, son haut, son enuiron, & son milieu: non pas au regard d'un autre monde, ny au regard du dehors de soy, ains en soy-mesme, & au dedans de soy: & quant à la supposition que font aucuns, que si vne pierre estoit hors du monde, lon ne scauroit imaginer ou com- **F** prendre, ne comment elle pourroit demourer, ny comment elle se pourroit mouoir: car comment pourroit-elle demourer suspendue, veu qu'elle est pesante, ou se mouuoit vers le milieu du monde, comme les autres corps pesans, veu qu'elle ne feroit ny partie d'iceluy, ny comptee entre les substances? Et quant à la terre qui est attachee & enuironnee tout alentour en vn autre monde, il ne faut pas enquerir ne demander comment elle ne tombe deça, veu sa pesanteur, & comment elle ne s'arrache de son entier total, attendu que lon voit qu'il y a vne nature & vne force naturelle qui contient vne chacune partie: car si nous voulons prendre bas & haut, non au dedans du monde, mais au dehors, nous nous trouuerons es mesmes destresses & difficultez que Epicurus, qui fait motuoir & tendre ses petits corps indiuisibles vers les lieux qui sont au dessous des pieds, comme si le vuide auoit des pieds, ou que son espace infinie permeist que lon y peust imaginer vn bas & vn haut. Et pourtant ya-il cause de s'esmerueller, ou plus tost de rechercher & demander **G** quelle fantasie a meu Chrysippus à dire, que le monde estoit colloqué & situé droitement au milieu, & que sa substance de toute eternité ayant occupé le lieu du milieu, y estoit si bien serree & pressée pour durer à iamais, & iusques à vne immortalité, par maniere de dire: car il escrit cela en son quatriesme liure des choses possibles, songeant sans propos, qu'il y ait milieu en vn infiny, & encore plus mal à propos attribuant à vn milieu qui n'est point la cause de la stabilité & ferme fondation du monde, attendu mesmement, qu'il a escrit en beaucoup d'autres lieux, que la substance se gouuerne, & se maintient par ses mouuemens, tendans au milieu, & partans du milieu d'icelle. Au demourant, quant aux autres oppositions que font les Stoïques qui les redoubteroit? comme quand ils demandent, Comment sera-il possible de maintenir vne fatale destinee, vne prouidence diuine? & comment ne sera-lon **H** contrainct de mettre plusieurs Iupiters, quand on mettra plusieurs mondes? Car premierement s'il y a inconuenient à mettre plusieurs Iupiters, leurs opinions sont encore bien plus absurdes, car ils mettent des Soleils & des Lunes, des Apollons, des Dianes, & des Neptunes infinis en infinies reuolutions des temps. Et puis quelle necessité ya-il qui contraigne d'aduouer qu'il y ait plusieurs Iupiters, s'il y a plusieurs mondes, & non pas en chacun Dieu souuerain, gouuerneur & conducteur de l'univers, prouueu de toute intelligence & de raison, comme celuy que nous surnommons le Seigneur & le Pere de toutes choses? ou bien qui empeschera que tous mondes ne soient subiects à la prouidence & à la destinee de Iupiter, & que luy aussi reciproquement n'ait l'œil sur tous, & ne les dirige & gouuerne, en subministrant à tous les principes, les semences & les raisons de toutes les choses qui se font? car puis que ainsi est que nous voyons icy bien souuent vn corps composé de plusieurs autres corps distincts,

- A** distinct, comme vne assemblée de ville, vne armee, vne danse, en chacun desquels corps y a vie, prudence & intelligence: il n'est pas aussi donc impossible qu'en tout l'univers, dix, ou cinquante, ou cent mondes qu'il y aura, n'usent d'une même raison, & ne respondent tous à un même principe, ains au contraire cest ordre & disposition est fort convenable aux Dieux, car il ne les faut pas faire comme les roys d'un exaim d'abeilles, qui ne sortent jamais de la ruche, ny les tenir en prison enfermez, ou plus tost attachez dedans la matiere, comme ceux-cy font, qui disent que les Dieux sont certaines dispositions de l'air, & certaines proprieté & vertus des eaux, & du feu, infuses au dedans, & ainsi les font naistre avec le monde, & puis les brulent aussi quand & luy: mais encore ne les deslient-il pas, ny ne les font pas libres, à tout le moins comme les chartons qui guident les chariots, ou les pilotes qui gouvernent les navires, ains les y cloient, ne plus ne moins que les statues attachees & scellees avec des clous & du plomb à leurs bases, ainsi les tiennent ils enfermez &
- B** enclouez dedans la matiere corporelle, participans avec elle iusques à corruption, dissolution, & alteration toute entiere. Mais bien plus est ce propos digne & magnifique, de dire que les Dieux sont de tout point libres, sans que personne leur commande, ne plus ne moins que les feus de Castor & de Pollux secourent ceux qui sont travaillez en tourmente de mer: en y survenant ils addoucissent la violence de la mer, & les impetueux soufflemens des vents, non pas qu'eux mêmes nauignent ny soient participans du même peril, ains seulement se montrant en l'air, & preservant les mariniers: aussi que les Dieux aillent visiter par plaisir tantost un monde, & tantost un autre, en regissant & gouvernant un chacun d'eux avec la nature: car le Iupiter d'Homere ne iette pas gueres loing ses yeux de la ville de Troye, iusques au pays de Thrace, & des Scythes vagabonds, habitans au long des rives du Danube: mais le vray Iupiter a plusieurs passages honnestes & convenables à sa maiesté d'un monde à l'autre, non point regardant hors de foy en un vuide infiny, & se contemplant foy-mesme, & non autre chose, comme aucuns estiment, ains considerant les faicts des hommes & des Dieux, les mouvemens & reuolutions des astres: car la diuinité ne hait point les varieté & mutations, ains y prent fort grand plaisir, comme lon peut coniecturer par les circuitions, conuersions & commutations qui apparoiſſent au ciel. Parquoy ie conclus que l'infinité de mondes est une refuerie faulſe, où il n'y a point d'apparence de raison, & qui ne peut en aucune maniere admettre un Dieu, ains se gouverne en tout & par tout par la fortune & à l'adventure: & au contraire, que le gouvernement & la prouidence d'un nombre certain & quantité terminee & finie de mondes, n'a point d'administration qui doive sembler plus
- D** indigne ne plus laborieuse que celle qui s'employe & s'attache à la direction d'un tout seul, & qui le transforme, renouvelle & reforme par infinies fois. Apres que i'eu acheué ce propos ie m'arrestay: & Philippus sans gueres attendre, Quant à cela, dit-il, s'il est ainsi, ou s'il est autrement, ie ne le voudrois point trop asseurer: mais si nous faisons sortir Dieu hors de la superintendance d'un monde seul, pourquoy est-ce que nous le faisons ouurier de cinq tant seulement, & non de plus? & quelle raison y a-t-il peculiere de ce nombre-là avec la multitude des mondes, plus tost que d'un autre? Je l'entendrois bien plus volontiers, que non pas l'occasion & la cause pourquoy ce mot E'i a esté consacré en ce temple: car il n'est nombre, ny triangle, ny quarré, ny parfait, ny cubique, ny ne presente aucune singularité à ceux qui aimét, & qui estiment telles speculations: & l'argument & illation tiree des Elemens, laquelle il semble que Platon même obscurément ait touchée, est fort difficile à comprendre, & ne nous demonstre rien de la probabilité qui l'ait deu attirer à faire ceste consequence, qu'il est vray-semblable, que comme il se fait & engendre en la matiere cinq sortes de corps reguliers ayants les angles & les costez egaux, environnez de

Des oracles qui ont cessé.

superfices egales, aussi de ces cinq corps y ait eu dès le commencement incontinent E
cinq mondes faicts & formez. Et toutefois, dis-je, il semble que Theodore le So-
lien, exposant ce qu'il y a de Mathématique en Platon, ne traite pas mal ce passage
là, car il declare ainsi la Pyramide : l'Octaëdre, c'est à dire, le corps à huit faces ega-
les, le Dodecaëdre à douze, & l'Icosaëdre à vingt, que Platon met les premiers, sont
fort beaux pour leurs proportions & leurs egalitez, & ne scauroit la nature rien for-
mer ne figurer de plus excellent ny de semblable: mais toutefois ils n'ont pas eu tous
vne même constitution, ny vne semblable origine, car le plus petit des cinq, & le
plus delié, est la Pyramide, & le plus grand, & qui a plus de parties, est le Dodecaëdre:
& des autres deux l'Icosaëdre est plus grand de la moitié que n'est l'Octaëdre, en mul-
titude & nombre de triangles: & pourtant est-il impossible qu'ils ayent esté faicts
l'un tout quand & l'autre d'une même matiere, car les plus deliez, & plus petits, &
plus simples en manufacture, il est force qu'ils soient plus tost venus en main, &
qu'ils ayent plus tost obey à l'ouurier qui mouuoit & qui formoit la matiere, & par F
consequent qu'ils ayent esté plus tost faicts, & plus tost venus en estre, que ceux qui
ont plus de parties, & plus grande masse de corps: d'autant que la manufacture de
la composition en estoit plus laborieuse & plus difficile, comme est le Dodecaëdre:
dont il s'ensuit que la Pyramide est le premier de tous les corps, & non pas vn des au-
tres, comme ceux qui par nature ont posterieurement esté creez & produits. Or le
remede pour obuier & respondre à cest inconuenient, est de separer & diuiser la
matiere en cinq mondes: icy la Pyramide, car elle est sortie la premiere: là l'Octaë-
dre, & là l'Icosaëdre: & en chacun d'iceux mondes de ce qui sera le premier venu
en estre, le reste puis apres prendra sa naissance par discretion & concretion, ou par
rarefaction & condensation des parties: qui fait que toutes se transmuent en toutes,
ainsi comme Platon luy-même le donne à entendre, le discourant par exemples,
presque de toutes: mais à nous presentement il suffira de l'entendre par peu d'exem-
ples, car l'air s'engendre par l'extinction du feu, & puis de rechef en se subtiliant & G
rarefiant, il produit du feu: en la semence de ces deux-là peut-on cognoistre les pas-
sions & transmutations de tous. Or le seminaire ou principe du feu est la Pyramide,
composee de vingt & quatre premiers triangles, & l'Octaëdre est le seminaire de l'air,
composé des quarante & huit mêmes triangles: ainsi il se fait vn element d'air, de
deux de feu conioincts & composez ensemble, & à l'opposite l'element de l'air par-
ty se diuise en deux corps de feu, puis retournant à s'espeussir & constiper d'auantage
en soy-même, il deuient en forme d'eau, tellemēt que par tout ce qui sort le premier
en lumiere donne tousiours facilement generation aux autres par transmutation,
& ne demeure iamais seul ce qui est venu en estre le premier, mais l'un ayant en la
masse de l'autre l'origine de mouuement primitif & antecedant, on conserue à tous
vn même nom. Ammonius adonc se prit à dire: cela certes a esté vaillamment &
diligemment recherché par Theodorus, mais ie serois bien esmerueillé, si les presup- H
positions qu'il fait ne s'entredestruisoient & refutoient l'une l'autre: car il veut que
les cinq mondes n'ayent pas esté composez à la fois tous ensemble, mais que ce qui
est plus delié, & où il y a moins de manufacture à le composer, soit sorty premier
en essence: & puis, comme si c'estoit chose consequente, & non pas repugnante,
il suppose que la matiere ne poulse pas tousiours en essence ce qui est le plus delié
& le plus simple, mais que aucunes fois les plus espesses, & les plus lourdes & pesantes
parties sortent les premieres en generation. Mais sans cela, estant supposé qu'il y a
cinq corps premiers, & consequemment qu'il y a autant de mondes, il n'applique sa
probabilité qu'aux quatre seuls: car quant est du cube, c'est à dire du corps quarré, il
le prent & l'oste, comme si c'estoit au ieu des marelles, par ce que le corps quarré de
sa nature & propriété ne se peut muer en eux, ny leur bailler à eux puissance de
se tourner


- A se tourner en luy, d'autant que les triangles dont ils sont composez, ne sont pas d'un mesme genre: car tous les autres communément sont composez de demy-triangles, mais le subiect propre, dont cestuy-cy particulierement se compose, est le triangle aux deux iambes égales, qui ne se peut vnir, incorporer, ny accommoder avec le demy-triangle. S'il est ainsi doncques qu'il y ait cinq corps, & consequemment cinq mondes, & qu'en chascun d'iceux mondes le principe de generation soit le corps qui premier fort en euidéce, celui où le corps quarré fera le premier, nul des autres corps n'y pourra doncques estre, comme celui qui ne se peut naturellement tourner & changer en pas vn d'eux. Je laisse à dire davantage, que l'element & principe dont est composé le Dodecaëdre, n'est pas le triangle à trois costez inégaux, mais vn autre, comme ils disent, bien que de celui aux costez inégaux, Platon compose la Pyramide, l'Octaëdre & l'Icosaëdre: tellement, dict Ammonius en riant, qu'il faut, ou que tu resolues ces obiections-là, ou que tu allegues quelque chose de nouveau touchant la question qui se presente: & ie luy respondy, Quant à moy ie n'en scaurois
- B rien alleguer pour le present, où il y ait plus de verisimilitude, mais à l'adventure vaut-il mieux rendre raison de son opinion propre que de celle d'autrui. Je dy doncques de rechef, que la nature se departant & diuisant dès le commencement en deux parties, l'une sensible, muable, subiecte à generation & corruption, tantost d'une sorte, & tantost d'une autre: l'autre spirituelle & intelligible, se comportant tousiours d'une mesme sorte, il seroit bien estrange, beaux amis, de dire que la spirituelle receust en soy diuisiō, & eust de la diuersité & difference en soy-mesme, & que lon trouue mauuais, iusques à s'en courroucer, si lon ne laisse à la corporelle & passible toute vnue en soy, & samassant en soy-mesme, ains qu'on la diuise & qu'on la separe en plusieurs parts: car il seroit plus raisonnable que les natures permanentes & diuines s'entretinssent plustost & s'embrassassent inseparablement elles-mesmes, & qu'elles eussent, autant qu'il leur seroit possible, toute section & toute separation,
- C & toutefois la force de l'Autre ou de la diuersité touchant aussi bien à elles, faict es choses spirituelles & intellectuelles de plus grandes similitudes en forme & raison essentielle, que ne sont les distances locales entre les corporelles: parquoy Platon refutant ceux qui tiennent ceste propositiō, Que tout est Vn, dict, que ce qui est, est & Mesme & Autre, & mouuement, & station. Si doncques ces cinq choses-là sont, ce n'est pas de merueille, si de ces cinq elements corporels, nature en a fabriqué les figures & representations chascune propre à chascun, non pas simples ny pures, mais entant qu'ils sont plus participans de chasque propriété & puissance: car il est tout manifeste, que le corps quarré est le plus propre & plus sortable à la station & au repos, pour la stabilité & fermeté de ses plattes faces & superficies: & quant à la Pyramide il n'y a celui qui ne recognoisse incontinent la nature de feu mouuante à ses costez longs & gresles, & à ses angles aigus. Et la nature du Dodecaëdre, apte à comprendre toutes les autres figures, sembleroit proprement estre l'image de l'vniuers en
- D toute essence corporelle. Et des deux qui restent l'Icosaëdre est l'image de l'Autre & diuers, & l'Octaëdre participe principalement de la forme du Mesme: & par ainsi l'un a produict l'air, lequel est capable de toute substance en vne forme: & l'autre nous a baillé l'eau, qui par temperature se peut tourner en toutes sortes de qualitez. Or s'il est ainsi que la nature requiere en tout & par tout vne égale & vniforme distribution, il est doncques vray-semblable qu'il y a aussi cinq mondes, & non point plus ny moins qu'il y a de moules & de patrons, à fin que chascun patron & exemplaire tienne le premier lieu, & la principale puissance en chascun monde, ne plus ne moins qu'ils l'ont en la premiere constitution & composition des corps. Mais cela soit dit pour respondre vn peu à celui qui s'esmerueilleroit comment nous diuisions la nature subiecte à generation & alteration en tant de genres. Au demourant

Des oracles qui ont cessé.

ie vous prie considérez vn petit de pres, avec moy, cest argument. Il est certain que E
des deux premiers supremes principes, i'entends l'vnité, & le binaire, ou la dualité,
ceste-cy estant l'element & l'origine premiere de toute difformité, desordre & con-
fusion, s'appelle infinité: & au contraire, la nature de l'vnité venant à terminer le va-
gue de l'infinité, qui n'a aucune proportion, aucun arrest, ny aucune terminaison,
luy baille forme, & le rend aucunement capable de receuoir certaine denomination,
laquelle accompagne tousiours les choses sensibles. Or ces deux generaux principes
là se monstrent premierement au nombre, tellement que la multitude n'est iamais
nombre, iusques à ce que l'vnité venant à s'imprimer, comme vne forme en la matie-
re, commença à retrencher ce qu'il y a icy de plus, & là de moins en l'infinité inde-
terminee: car lors chascune multitude deuient & est faicte nombre, quand elle est ter-
minee par vn: mais si lon oste l'vnité, de rechef la dualité indefinie & interminee con-
fondant le tout, le rend sans ordre, sans grace, sans nombre, & sans mesure. Or puis
qu'il est ainsi, que la forme n'est pas la destruction de la matiere, mais plustost la fi- P
gure & l'ordre, il est force que ces principes soient tous deux dedans le nombre, des-
quels procede la premiere & plus grande dissimilitude & difference: car le principe
infiny & interminé est auteur du nombre pair, & l'autre meilleur principe, qui est
l'vnité, pere du non-pair: si que le premier nombre pair, c'est deux, & le premier non-
pair est trois, desquels se compose le cinq, par conioction estant commun aux deux,
& de puissance non-pair, car il estoit necessaire, d'autant que ce qui est corporel &
sensible se diuise en plusieurs parties pour la composition par force de l'Autre, c'est
à dire diuersité, que ce ne fust, ny le premier pair, ny le premier non-pair, ains vn
troisième composé des deux, à fin qu'il fust procréé des deux principes, de celuy qui
engendre le nombre pair, & de celuy qui produit le non-pair, car l'vn ne se pouuoit
departir ny separer d'avec l'autre, d'autant que tous deux ont nature, force & puissan-
ce de principe. Ces deux principes donc estans conioincts ensemble, le meilleur
estât le plus fort s'est opposé à l'infinité interminee qui diuisoit la nature corporelle: G
& ainsi estant la matiere diuisee, l'vnité s'interposant a empesché que l'vniuers ne fust
diuisé & mesparty en deux parties égales, ains y a eu pluralité de mondes causee par
l'Autre, de l'infinité & diuersité, mais ceste pluralité a esté produite en nombre non-
pair, par la vertu & puissance du Mesme & du Finy, parce que le meilleur principe
n'a pas souffert que la nature s'estendist plus loing qu'il ne falloit, car si l'vn y eust esté
tout pur & simple, la matiere n'eust eu aucune separation: mais d'autât qu'il est meslé
avec la nature diuisiue de la dualité, il a reçu & souffert par ce moyen separation &
diuision, mais elle s'est arrestee là, parce que le non-pair a esté maistre & superieur du
pair. Voila pourquoy les anciens souloient nommer, le compter, Pembasasthai: &
croy que ce mot Panta, qui signifie l'vniuers, a esté deriué de Penté, qui signifie cinq,
non sans raison, d'autant que cinq est composé des deux premiers nombres, & puis
les autres nombres multipliez pas autres, produisent diuers nombres, là où le cinq H
multiplié par nombre-pair, produit dix precisément, & multiplié par non-pair, il s'en-
gendre soy-mesme: ie laisse à dire, qu'il est composé des deux premiers nōbres quar-
rez, c'est à sçauoir, de l'vnité & du quatre, & que c'est le premier des nōbres qui peut
autant que les deux qui le precedent, tellement qu'il cōpose le plus beau triangle qui
soit à angle droit, c'est le premier nombre qui contiēt la proportion sesquialtere: car
à l'aduēture toutes ces raisons-là ne sont pas bien forttables ne propres au discours de
la matiere presente, mais bien est-il plus conuenable d'alleguer qu'en ce nombre là y
a vne vertu naturelle de diuiser, & que la nature diuise plusieurs choses par ce nōbre
là: car en nous mesmes elle a mis cinq sens naturels, & cinq parties de l'ame, la naturel-
le, la sensitiue, la cōcupiscible, l'irascible, & la raisonnable, & autāt de doigts en chas-
cune des mains: & que la semence genitale se depart au plus en cinq, car on ne trouue
point

μεντασται-
σαι.
παντα.
μεντε.

Voyez cy
dessus
feuille
330.



- A** point par escrit que femme ait enfanté plus d'enfans en vne mesme portée : & les Ægyptiens aussi content, que la Deesse Rhea enfanta cinq Dieux: donnans à entendre sous paroles couuertes, que d'une mesme matiere y auoit eu cinq mondes procreés. Et en l'vniuers, la terre est diuisee en cinq bandes, & le ciel en cinq cercles: deux arctiques, deux tropiques, & vn equinoctial au milieu: qu'il y a cinq reuolutions des planettes ou estoilles errantes, d'autant que le Soleil, Venus, & Mercure, ne font qu'une mesme reuolution, & est la construction du monde faicte par raison harmonique: ne plus ne moins que la game, dont nous vsons à chanter, est composée de cinq tetrachordes arrangez de rang l'un apres l'autre, dont le premier s'appelle Hypatōn, c'est à dire, des bas: le second Mésōn, c'est à dire, moyens: le tiers Synemmenōn, c'est à dire, conioincts: le quart Diezeugmenōn, c'est à dire, deioincts: & le quint Hyperbolōn, c'est à dire, supremes: & les interualles du chant dont nous vsons, sont aussi cinq, Diesis, Semitonion, Tonus, Triemitonion, & Ditonus:
- B** de maniere qu'il semble, que la nature prenne plaisir à faire toutes choses par nombre quinaire, plus qu'elle ne faict encore à les produire en forme ronde comme vne boule, ainsi qu'escrit Aristote. Mais pourquoy, dira quelqu'un, est-ce que Platon a rapporté le nombre de cinq mondes aux cinq premieres figures des corps reguliers? Pource qu'il a dict que Dieu en ordonnant le monde a vsé de la cinquième composition. Et puis ayant proposé la doute & question du nombre des mondes, à sçauoir s'il faut tenir qu'il n'y en ait qu'un, ou qu'il y en ait cinq, à la verité il monstre assez clairement que sa coniecture est fondée sur ceste raison-là. S'il faut doncques amener & appliquer la verisimilitude à son aduis & opinion, voyant qu'il est force qu'avec la diuersité de ces figures & de ces corps-là, il s'en ensuyue aussi incontinent difference & diuersité de mouuements, ainsi comme luy-mesme enseigne, affermant que ce qui est espessy ou subtilisé avec l'alteration de substance, change aussi quant & quant de lieu, car si de l'air s'engendre du feu, estant le corps Octaèdre dissolu &
- C** departy en Pyramides, ou au contraire, s'il se faict de l'air du feu, estant pressé & referré en forme d'Octaèdre, il n'est pas possible qu'il demeure là où il estoit au parauant, ains s'en fuit & s'en court en vne autre place, forçant & cōbattant ce qu'il treuve en son chemin, & qui luy faict resistance: & monstre encore cela plus clairement & plus euidemment par vn exemple & similitude des vans, & autres tels instruments où l'on vannie & nettoye le bled, disant que ne plus ne moins que les elements remuans la matiere, & estans remuez par elle, s'alloient tousiours rendre les semblables avec leurs semblables, & qu'ils occupoient tantost vn, tantost autre lieu, auant que le monde fust ordonné en la maniere qu'il est maintenant. Estant doncques la matiere en tel estat qu'il est vray-semblable que soit toute chose là où Dieu n'est pas, les cinq premieres qualitez, c'est à dire les premiers corps, ayans chascunes leurs propres & peculieres inclinations & mouuements, s'en allerent à part, non pas du tout ny sincerement diuisees & separées les vnes des autres, pource que tout estat broüillé pesse-melle, les surmontees tenoient tousiours vn peu & suyuoient contre leur nature celles qui surmontoient: & pourtant les vnes s'en allans d'un costé, & les autres de l'autre, il est aduenü de là, qu'il y a eu autant de portions & de distinctions, comme il y a de diuers genres des premiers corps, l'une de feu non pas du tout pur, mais tirant sur la forme de feu: vne autre de nature celeste, non du tout sincere ciel, mais tirant sur la nature du ciel: vn autre de terre, non terre seule & simple, mais tirant sur la forme de la terre: mais principalement la communication de l'eau & de l'air, comme nous auons dict par cy deuant, pource qu'elle s'en alla remplir de plusieurs genres diuers & estranges: car ce n'a pas esté Dieu qui a separé & distribué la substance, mais l'ayant trouuée ainsi temerairement dissipee d'elle-mesme, & se tirant chascune à part en si grand desordre & si grande confusion, il l'ordonna & l'arrangea avec sym-

Des oracles qui ont cessé.

mettrie & proportion, & mettant en chascune la raison comme garde & gouuerneur, E
il feit autant de mondes, comme il y auoit de premiers corps. Ce discours doncques
soit attribué à la grace & faueur de Platon, pour l'amour d'Ammonius: car quand à
moy ie ne voudrois pas affermer qu'il y ait precisément autant de mondes en nom-
bre, mais ie diray bien que l'opinion de ceux qui tiennent qu'il y a plus d'un monde
& non pas pourtant infinis, est fondee en aussi bonne raison que nulle des autres:
voyant que la matiere de sa nature se respand & se depart en plusieurs parts, sans de-
mourer en vn, & que la raison aussi ne souffre pas qu'elle s'en aille à l'infiny: & si en
aucun autre lieu, principalement en cestuy-cy, nous souuenans des preceptes de l'A-
cademie, osons de nos entendemens le trop de creance, & comme en vn lieu glissant
& coulant retenons la fermeté de creance, seulement au propos de l'infinité, croyans
fermement qu'il n'y peut auoir des mondes infinis. Apres que i'eus deduit ces rai-
sons, Demetrius dict, Lamprias nous admoneste sagement,

Les œuvres des Dieux en diuerfes

F

Façons nous donnent des traueses,

comme dict Euripide, quand nous presumons & osons prononcer de si hautes &
grandes choses, comme si nous les sçauions bien certainement. Mais il nous faut,
comme il a dict, rapporter nos deuins au premier propos que nous auons laissé: car
ce qui a parauant esté dict, que les oracles demeurent muets & inutiles, quand les Dæ-
mons, qui les souloient gouuerner, s'en sont retirez & allez, ne plus ne moins que
nous voyons les instruments de Musique demourer oyseux, sans aucun son ny ar-
monie, quand les ouuriers ne les manient: cela, dis-je, remue vne autre question qui
est plus grande, touchant la cause & la puissance, par laquelle ces Dæmons rendent
les deuins & prophetes esprits & ravis de fureur diuine, & leur font auoir des visions:
car de dire que les oracles se taisent pour autant qu'ils sont delaissez & abandonnez par
les Dæmons, cela n'est rien, si premier lon ne donne à entendre comment c'est que
quand ils y sont presents, & qu'ils les gouuernent, ils les mettent en besongne, & les G
font prophetiser. Ammonius adonc prenant la parole, Estimes-tu, dict-il, que les
Dæmons soient autre chose que

Esprits vestus de substance aëree,

Allans par tout la terre labouree?

comme dict Hesiodé: car quant à moy il me semble que la difference qu'il y a d'un
homme à vn autre qui iouë vne Tragédie ou vne Comédie, la mesme difference y a-
il d'une ame à vne autre qui est reuestue d'un corps durant ceste vie. Il n'y a doncques
en cela rien qui soit estrange, ny sans apparence de raison, si des ames rencontrans
d'autres ames, leur impriment des visions & apprehensions des choses futures, ne plus
ne moins que nous montrons plusieurs choses ia faictes & aduenues, & en signi-
fions & prognostiquons de celles qui sont à aduenir, non par viue voix seulement,
mais aussi par lettres & escrits, & par quelque attouchement, ou par vn regard seule- H
ment: si d'adventure tu n'as quelque autre chose à dire à l'encontre, Lamprias, car
nous ouysmes n'a pas long temps dire, que tu en auois eu n'agueres de grands propos
avec des estrangers en la ville de Lebadie, mais celui qui nous en dit des nouuelles ne
se souuenoit pas bonnement des propos. Ne vous en esbahissez pas, dis-je, car plu-
sieurs occupations & affaires qui sont suruenues depuis, mesmement pour l'ouuerti-
re de l'oracle, & pour le sacrifice, ont esté cause que nos propos se sont esuanouys &
égarez çà & là. Mais maintenant, dict Ammonius, tu as des auditeurs qui sont de
loisir, qui desirent & interroguer & apprendre, sans aucune volonté de contester
ny de contredire opiniastrément, deuant lesquels tu peux tout dire, & entendre d'eux
toute excuse, quelque chose que tu dies, comme tu vois. Et comme les autres de la
cōpagnie me feissent pareilles exhortations, apres auoir fait vn peu de pause en filée,
ie re-

A ie recommençay à dire, Certainement (Ammonius) tu as, sans y penser, toy-mesme ouuert l'entree, & donné commencement aux propos qui furent lors tenus: car si les Dæmons sont ames & esprits separez des corps, & n'ayans aucune communication avec eux, comme tu dis, suyuant le diuin poëte Hesiodé, qui les appelle

Saincts habitans dessus la terre tarde,

Pour des humains mortels auoir la garde:

Pourquoy est-ce que nous priuons les esprits & ames qui sont dedans les corps de ceste mesme puissance, par laquelle les Dæmons peuuent preuoir & predire les choses à aduenir? car il n'est pas vray-semblable, que les ames acquierent propriété ou puissance aucune nouuelle, quand elles abandonnent les corps, qu'elles n'eussent pas au parauant, ains faut penser qu'elles ont tousiours les mesmes parties, mais qu'elles les ont pires, quand elles sont meslees avec les corps, & aucunes d'elles nullement apparentes & cachees, les autres debiles & obscures, & qui pesamment & malaisément peuuent faire leurs operations, ne plus ne moins que ceux qui regardent à tra-
 B uers vn broüillas, ou qui se meuuent dedans quelque substance liquide, desirans fort la guarison & le recouurement de ce qui leur est propre, & le deschargement & purgation de ce qui les couure: car l'ame encore pendant qu'elle est liee & attachee avec le corps, a la puissance de preuoir & cognoistre les choses futures, mais elle est aueuglee par la meslange avec la terrestreité du corps: pource que tout ainsi comme le Soleil n'est pas clair, quand il est eschappé des nuës, ains l'estant tousiours, il nous semble neantmoins obscur & trouble à trauers vn broüillas, aussi l'ame n'acquiert pas de nouveau la puissance de deuiner, quand elle sort du corps, comme d'une nuce, ains l'ayant dès maintenant, elle est aueuglee par la commixtion & confusion qu'elle a avec le corps mortel: & ne le faut pas trouuer estrange, ny le decroire quand nous ne verrions autre chose en l'ame, que la faculté & force de la memoire qui respond vis à vis à la puissance de deuiner, & considerant le grand effect qu'elle fait, de conser-
 C uer & garder les choses passees, ou pour mieux dire, de les faire aucunement estre, car du passé rien ne demeure ny ne subsiste en estre, soient actions ou paroles, ou passions, d'autant qu'elles ne font que passer, & perissent aussi tost comme elles viennent en estre, par ce que le temps, ne plus ne moins qu'un torrent emporte tout, mais ceste faculté memoratiue de l'ame, luy faisant ne sçay comment resistance, & l'arrestant, donne, par maniere de dire, apparence & essence, à ce qui n'est pas present. Car l'oracle qui fut donné à ceux de Thessalie, touchant la ville d'Arna, vouloit qu'on luy dist

Ce que l'aueugle voit,

Et ce que le sourd oit:

mais la memoire nous est l'ouye des choses sourdes, & la veüe des aueugles, tellement que, comme j'ay tantost dit, ce n'est pas de merueille, si retenant les choses qui ne sont desia plus, elle en anticipe plusieurs de celles qui ne sont pas encore: car celles là luy touchent & luy appartiennent dauantage, & s'affectionne plus à elles, car elle
 D se panche & incline vers celles qui sont encores à venir, là où de celles qui sont desia passees & du tout finies, elle n'en a rien que le souuenir. Les ames doncques ayans ceste puissance nee quand & elles, mais foible, obscurcie & mal-aisée à exprimer ses apprehensions, ce neantmoins encore la monstrent elles, & la poussent dehors bien souuent par songes, ou bien par quelques cerimonies de sacrifices, quand le corps est bien purifié, & qu'il prent vne certaine temperature propre à cest effect, là où pource que la partie ratiocinative & speculatiue estant lors relaschee & deliuree de la sollicitude des choses presentes, elle se met avec la partie irraisonnable & imaginatiue à penser de l'aduenir: car ce n'est pas comme dict Euripide,

Bon deuin est qui coniecture bien:

mais bien est-il homme sage qui suit la partie de l'ame qui a discours de raison, & qui

Des oracles qui ont cessé.

le conduit avec verisimilitude, mais la vertu diuinatrice, comme vn papier sans es-
ture, non capable d'aucune raison ny d'aucune determination d'elle mesme, ains seu-
lement apte & propre à receuoir des fantasies, imaginations & presensions, sans au-
cune ratiocination ne discours de raison, touche à l'aduenir, lors qu'elle s'esloigne &
se tire le plus arriere du present dont il sort, par vne certaine temperature & disposi-
tion du corps transmué, que nous appellons inspiration. Or a le corps bien souuent
de luy-mesme vne telle disposition, mais la terre iette dehors aux hommes les four-
ces & origines de plusieurs autres forces & puissances, les vnes qui transportent les
hommes hors de foy, & apportent des maladies, & des mortalitez: & des autres
aussi quelquefois bonnes, doulces & viles, ainsi comme il appert à ceux qui en font
l'experience. Or le flux, ou vent & respiration prophetique de diuination est tres-
diuin & tressainct, soit qu'il se lève seul à trauers l'air, soit qu'il sourde avec quelque
fluxion humide: car venant à se mesler dedans le corps il y engendre vne tempera-
ture & disposition estrange & non accoustumee aux ames, de laquelle il est bien
mal-aisé pouuoir clairement & certainement exprimer la propriété, mais avec rai-
son on en peut tirer quelque coniecture, en plusieurs manieres: car par sa chaleur &
sa dilatation & diffusion il ouure ne sçay quels petits pertuis, où il y a force imagina-
tiue de l'aduenir, ne plus ne moins que le vin qui bouilt & qui fume faict plusieurs
autres mouuemens, & mesmement qu'il reuelle & decelle plusieurs propos secrets
& cachez: car la fureur de Bacchus & de l'yuresse a, comme dict Euripide, beaucoup
de diuination, quand l'ame eschauffee & enflammee iette arriere toute crainte, que
la prudence mortelle apportant, destourne, & esteinct bien souuent l'inspiration di-
uine. Et quant & quant on pourroit dire, non sans grande raison, que la seicheresse
s'y mettant avec la chaleur, subtilise l'esprit, & le rend de nature de feu & pur: car,
comme disoit Heraclite, Seiche lueur, ame tressage: là où l'humidité non seulement
grosist & rebousche la veuë & l'ouye, mais qui plus est, meslee parmy l'air, & venant
à toucher la superficie des miroirs, elle leur oste la splendeur & la lueur: & au contrai-
re aussi, il n'est pas impossible que par quelque refrigeration & condensation de cest
esprit, comme le fer s'affine par la trempe, aussi ceste partie preuoyante l'aduenir, ne
s'engendre & ne s'aiguise en l'ame, ne plus ne moins que l'estaim fondu avec le cuy-
ure, qui de foy-mesme est rare & plein de petits pertuis, le serre & l'espeffit, & quant
& quant le rend plus luyfant & plus net: aussi n'y a-il inconuenient qui empesche,
que ceste diuinatrice exhalation, ayant quelque chose de propre & de peculierement
conforme aux ames, ne remplisse ce qui est rare & vuide, & ne le resserre au dedans,
d'autant qu'il y a des choses qui ont conuenance avec d'aucunes, & d'autres avec d'au-
tres, comme la febue est sortable à la couleur de pourpre, & le salnistre meslé parmy
semble ayder la teinture de l'escarlatte: &, comme dict Empedocles,

Parmy le bysse on mesle le safran.

Et nous auons appris de toy, seigneur Demetrius, que la riuiera de Cydnus seule net-
toye le cousteau sacré à Apollo, en la ville de Tarse en Cilicie, & qu'il n'y a eau quel-
conque qui le puisse escurer ny nettoyer que celle là seule: ne plus ne moins qu'en la
ville d'Olympie, on dict que lon detrempe la cendre des sacrifices avec l'eau du fleu-
ue d'Alpheus, & que lon la plastre contre l'autel, & que si lon essaye de le faire avec
l'eau de quelque autre fleuue, on ne sçauroit venir à bout de la faire prendre ne lier.
Ce n'est doncques pas de merueille si la terre poulsant hors de foy contremont plu-
sieurs exhalations, il ne s'en treuve que celles-là, qui transportent les ames de fu-
reur diuine, & qui leur donnent imagination & apprehension de l'aduenir: & sans
contredict, ce que lon raconte touchant l'oracle de ce lieu s'accorde à ce propos, car
c'est icy proprement que lon dict que ceste puissance de deuiner se monstra pre-
mierement, parce qu'il y eut vn berger qui par fortune y estant tombé, commença
à ietter

- A** à ietter des cris & voix de personne transportee hors de foy : dequoy les voisins du commencement ne faisoient point de compte : mais depuis quand ils veirent que ce qu'il leur auoit predict estoit aduenü, ils l'eurent en admiration, & mesmes les plus sçauans entre les Delphiens l'appellēt Corera. Si me semble que l'ame se mesle & s'attache avec ceste exhalation diuinatrice, ne plus ne moins que fait l'œil & la veüe avec la lumiere: car l'œil, qui a vne naturelle propriété & puissance de voir, n'est de nul effect sans la lumiere: aussi l'ame ayant ceste propriété & faculté de preüoir les choses à aduenir comme vn œil, elle a besoing d'une chose propre qui l'allume, & qui l'aiguise. Voyla pourquoy plusieurs des anciens estimoient que le Soleil & Apollo fussent vn mesme Dieu, & ceux qui entendent que c'est, & qui reuerent la belle & sage proportion, estiment & iugent que telle comparaïson qu'il y a du corps à l'ame, & de la veüe à la lumiere, & de l'entendement à la verité, telle y a-il de la force du Soleil à la nature d'Apollo, affermans que c'est sa geniture qui continuellement procede & s'engendre de luy, estant tousiours eternellement: car ne plus ne moins que celuy-là allume, poulse & excite entre les sentimens la vertu visüe, aussi fait cestuy-cy la vertu diuinatrice qui est en l'ame. Ceux donc qui ont estimé que ce fust vn mesme Dieu, à bon droict ont dedié & consacré cest oracle à Apollo, & à la Terre, iugeans que c'estoit le Soleil qui imprimoit ceste temperature, & ceste disposition en la terre, de laquelle sourdoit ceste exhalation diuinatrice. Or comme Hesïode, avec beaucoup meilleure raison que plusieurs philosophes, appelle la terre

Le fondement ferme de toutes choses:

- aussi l'estimons nous eternelle, immortelle & incorruptible: mais des vertus & facultez qui sont en elle, nous estimons que les vnes faillent en vn lieu, & naissent de nouveau en vn autre, & passent en vn endroit, & affluent d'ailleurs en vn autre: & est vray-semblable que ces telles reuolutions-là en vn cours de long temps tournent & reuiennent en elle par plusieurs fois, comme nous en pouuons tirer coniecture de ce qui manifestement nous apparöist: car en plusieurs contrees nous voyös des lacs, des fleues entiers, & encore plus des fontaines chaudes faillir, & se perdre du tout en autres, s'enfoïir & se cacher dedans terre, & puis aux lieux mesmes, de là à quelque interualle de temps, se monstrier de rechef, ou bien couler là aupres. Et des mines nous sçauons les vnes perir & faillir de tout poinct, comme celles d'argent au pays d'Attique, & d'arain en Negrepont, où lon forgeoit anciennement les espees battües à froid, comme dict le poëte Æschylus,

Prenant l'espee Euboïque pointüe.

- Et la carriere de Caryste il n'y a pas long temps qu'elle a cessé de produire des pelotons de pierre mols, qui se filoient comme lin: car ie pense que quelques vns de vous en ont peu veoir des feruiettes & des rezeaux, & des coiffes qui en estoient tiffües, qui ne brusloient point au feu, ains quand elles estoient ordes & salles, pour auoir seruy, & qu'on les iettoit dedans la flamme, on les en retiroit toutes nettes & claires: mais maintenant tout cela s'est esuanouy, & ne voit-on plus dedans la carriere que vn peu des cheveux bien rares, & des filets deliez qui courent çà & là. De toutes lesquelles choses Aristote maintient que la seule exhalation est la cause efficiente dedans la terre, avec laquelle exhalation il est doncques force que tels effects defaillent quelquefois, qu'ils passent de lieu à autre, & qu'ils resorrent aussi de rechef quelque autre fois: autant en faut-il estimer des esprits & exhalations diuinatrices qui sortent de la terre, qu'elles n'ont pas non plus la vertu immortelle, & qui ne puisse iamais vieillir, ains subiecte à mutations & alterations: car il est vray-semblable que les rauages excessifs des pluyes & grandes eaux les esteignent, & que les coups des tonnerres les dissipent, & mesmement quand la terre est agitée & concassée par tremblement, & qu'elle vient à s'affaïsser & à se troubler & confondre au dedans; il

Des oracles qui ont cessé.

est bien force que telles exhalations dedans les cauernes de la terre changent d'issues **E** à sortir, ou bien qu'elles s'affoiblissent & s'estouffent entierement, comme lon dit que le grand tremblement, dont on parle tant, demeura tout court & s'arresta icy, aussi ruina-il toute la ville: comme lon dict qu'en la ville d'Orchomene il amena vne pestilence qui emporta nombre infiny d'hommes, & que l'oracle de Tiresias y defaillit entierement, de sorte que iusques aujour d'huy il est demouré muet, & sans aucun effect. Et si le semblable est aduenu aux oracles qui souloient estre en la Cilicie, comme nous entendons, il n'y a personne qui le nous sçeuft plus certainement dire que roy Demetrius. Alors Demetrius, le ne sçay, dict-il, comme il en va pour le present, car il y a desia bien fort long temps que ie suis hors de mon pays, comme vous sçaez: mais du temps que i'y estois, celuy de Mopsus & celuy de Amphilochus estoient encore en leur fleur: & vous puis dire, pour auoir esté present, vne chose merueilleuse touchant celuy de Mopsus. Le gouuerneur de la Cilicie estoit quant à luy en doute s'il y auoit des Dieux, pour l'infirmité de sa mescreance, n'osant pas **P** du tout croire qu'il n'y en ait point, à mon aduis: car au demourant c'estoit vn mauuais homme & violent: mais ayant autour de luy certains Epicuriens qui ont accoustumé de se mocquer de telles choses, d'une mocquerie, ce disent-ils, honneste & fondee en raison naturelle, il enuoya vn sien affranchy, comme s'il l'eust enuoyé au pais des ennemis pour espier, avec vne lettre cachetee, en laquelle lettre estoit escripte la demande qu'il deuoit faire à l'oracle, sans que personne sçeuft ce qu'il y auoit es-
crit. C'est homme donc, ainsi que la coustume du lieu est, demourant toute la nuit dedans le sanctuaire du temple, & s'y estant endormy, recita le lendemain le songe qu'il y auoit eu, c'est qu'il luy fut aduis qu'il veit vn bel homme qui se presenta à luy, qui luy dict ce mot, Noir, & rien d'aduantage, pource qu'il s'en alla aussi tost: cela nous sembla à nous autres impertinent, & n'entendiōs point que c'estoit à dire: mais le gouuerneur s'en esmerueillā, & en demoura tout picqué, & depuis eut l'oracle en grande veneration, car ouurant la lettre, il monstra ceste demande qui estoit es-
crit dedans, T'immoleray-je vn taureau blanc, ou vn noir? tellement que les Epicuriens mesmes qui estoient avec luy, en demourerent tous honteux & confus: & luy fait le sacrifice, & reuera tousiours depuis Mopsus. Demetrius ayant acheué ce conte se teut: Et moy voulant conclure toute ceste dispute, iettay derechef ma veuë sur Philippus & sur Ammonius, qui estoient assis l'un aupres de l'autre, lesquels me semblerent vouloir parler, & pour ce ie me retins vne autre fois. Parquoy Ammonius dict adonc, Philippus a encore quelque chose à dire sur ce qui a esté mis en auant, car il estime, comme les autres, que ce soit vn mesme dieu Apollo, que le Soleil, & non point autre: mais la doute que ie fais est plus grande, & de plus grandes choses: car ie ne sçay comment n'aguères nous auons par nos discours osté la diuination aux Dieux, & l'auons attribuee aux Dæmons tout ouuertement: & maintenant il me semble que de rechef nous les chassons & deboutons icy de l'oracle, & de la machine à **H** trois pieds, en referant le principe, & la premiere cause efficiente de la diuination, à ie ne sçay quels vents ou vapeurs, & exhalations, & non pas le principe seulement, mais la substance & la puissance mesme: car ces temperatures, ces chaleurs, & ces trem-pes, par maniere de dire, que nous auons alleguees, nous destournent à l'aduenture plus de l'opinion & creance que cela procede des Dieux, & nous donnent imagination, que ce soit vne telle cause comme Euripide en faict dire à Polyphemus en sa Tragedie du Cyclops,

Terre produit, vueille ou non, la pasture

Dont mon troupeau prend grasse nourriture:

toutefois il ne dit point qu'il sacrifie ses moutons aux Dieux, ains à soy-mesme, & à son ventre le plus grand des Dæmons: & neantmoins nous leur sacrifions, & leur faisons

- A faisons prières, pour auoir response des oracles: à quel propos, si il est vray que les ames apportent quand & elles vne faculté prophetique & diuinatrice, & que la cause mouuante qui excite celle faculté & vertu, soit vne certaine temperature de l'air, ou bien vn vent? Et puis que veut doncques dire, l'institution des religieuses ordonnees pour prononcer les responses? & pourquoy est-ce qu'elles ne respondent point, si premier l'hostie que lon veut immoler ne tremble toute, depuis le bout des pieds, & qu'elle ne se croule toute, quand on luy respand dessus les effusions du vin? car ce n'est pas assez de secoüer la teste, comme aux autres sacrifices, ains faut que la secousse & le tremblement soit en toutes & par toutes les parties du corps, avec vn bruit de fremissement: car si cela ne se fait, ils tiennēt que l'oracle ne besongne point, & n'y introduisent point la religieuse qui s'appelle Pythia: & neantmoins il seroit bien vray-semblable de dire & de penser cela, si lon attribuoit la pluspart de ceste inspiration prophetique, ou à vn Dieu, ou à vn Dæmon: mais ainsi que tu le dis, il n'y auroit point d'apparence, car l'exhalatiō qui sort de la terre, soit que l'hostie tremble,
- B ou qu'elle ne tremble point, causera tousiours le rauissement & transport d'esprit, & disposera tousiours l'ame, autant d'une autre personne, la premiere venue, que de la religieuse Pythia: dont il s'ensuit que c'est vne sottise de se seruir d'une femme à faire rendre ces oracles, en la trauaillant pour neant à la maintenir vierge toute sa vie & nette de compagnie d'homme. Car ce Coretas-là que les Delphiens disent auoir esté le premier, qui estant tombé en ceste fente & creuasse de la terre, donna sentiment de la vertu & propriété du lieu, n'estoit à mon aduis en rien different des autres pasteurs & bergers, au moins si cela est vray, & non pas vne fable & vne fiction vaine, comme ie l'estime, quand ie discours en moy-mesme, de combien de bonnes choses a esté cause cest oracle aux Grecs, tant au faict des guerres, comme des fondations de villes, & aux necessitez de famine, & de pestilence, il me semble indigne d'en attribuer l'inuention & le commencement à la fortune, & à vn cas d'aduenture, non
- C pas à Dieu, & à la prouidence diuine. Je voudrois fort, amy Lamprias, que tu nous discourusses vn petit sur cela: & te prie, Philippus, que tu ayes cependant vn peu de patience. Bien volontiers, respondit aussi tost Philippus, & toute la compagnie aussi, car ie voy bien que le propos que tū as mis en auant a esmeu toute la compagnie. Et lors prenant la parole, Certainement, dis-je, Philippus, il ne m'a pas seulement esmeu quant à moy, ains m'a rendu tout confus de honte, doubtant qu'en vne si notable compagnie de si grands personnages, il ne semble que contre le deuoir de mon aage, i'aye voulu, me glorifiant en la probabilité du langage, destruire ou remuer aucune chose qui avec verité soit creüe & tenuë touchant les choses diuines. I'y respondray doncques, amenant pour tesmoing & pour mon aduocat & defendeur, Platon, lequel reprent l'ancien Anaxagoras, de ce qu'estant trop attaché aux causes naturelles, recerchant & poursuiuant tousiours par tout, ce qui de necessité se fait es operations du corps, il omettoit la cause finale & l'efficiente, qui sont
- D causes & principes de plus grande importance & plus noble, là où luy le premier ou plus que nul autre des philosophes, les a declairees l'une & l'autre, attribuant à Dieu le principe des choses qui se font avec raison, & ne priuant pas cependant la matiere des causes necessaires à l'œuure qui se faict, ains recognoissant en cela, que l'ornement & la disposition de tout ce monde sensible ne pend point d'une seule ne simple cause, ains qu'elle prend son essence quand la matiere vient à estre ioincte & liee avec la raison: & qu'il soit ainsi, considerez-le premierement es ouurages qui se font par les mains des ouuriers, comme, pour exemple, sans aller plus loing, le pied & soubassement de la coupe tant renommé, qui est entre les ioyaux de ce temple, que Herodote appelle Hypocrateridion, qui a pour sa cause materielle le feu, & le fer, & l'amollissement par la force du feu, & la trempe par l'eau, sans quoy il n'y

Des oracles qui ont cessé.

auroit moyen de faire vn tel ouurage : mais la maistresse & principale cause qui remuë tout cela, & qui besongne avec ces matieres-là, c'est l'art & la raison qui les applique à l'œuvre, & neantmoins on met l'inscription du nom de l'ouurier à ces peintures icy, & representation des choses passées:

Polygnotus ayant pris sa naissance

Dedans Thafos de la noble semence

D'Aglaophon, a icy peint comment

Ilium fut pris anciennement.

C'est luy veritablement qui a peint, comme vous voyez, la destruction de Troye: mais sans couleurs brayees & meslees, & confuses les vnes avec les autres, il eust esté impossible que ceste peinture fust ainsi belle à veoir comme elle est. Si doncques quelqu'un venoit maintenant à enquerir de la cause materielle, en recherchant ou discourant des mutations & alterations que reçoit l'ochre meslee avec le vermillon, ou le noir avec la ceruse, il ne diminueroit pour cela rien de la gloire de l'ouurier Polygnotus. Et celuy qui reciteroit comme le fer se trempe, & comment il se mollifie, & qu'estant attendry par le feu, il se forge & obeyt à ceux qui le battent, & puis qu'en le plongeant dedans de l'eau fresche, venant à se reserrer par la froideur de l'eau, & à s'espeffir, à cause qu'il s'estoit amolly & rarefié par le feu, il en acquiert vne dureté & trempe, que Homere appelle la force du fer, reserue-il pour cela moins la cause de l'ouurage à l'ouurier? quant à moy ie ne le pense pas: car ceux qui esprouuent les facultez & proprietiez des drogues medicinales, pour cela ne condamnent pas la medecine, tout ainsi comme quand Platon dict, que nous voyons parce que la lueur de l'œil vient à se mesler ensemble avec la clarté du Soleil, & que nous oyons quand l'air vient à estre frappé: ce n'est pas à dire pour cela, que nous n'ayons la faculté de veoir & d'ouyr par la raison & la prouidence: car en somme, comme ie dy, toute generation procedant de deux causes, les premiers & plus anciens theologiens & poëtes, ne se sont arrestez qu'à la premiere & plus excellente, chantés à tous propos ce commun refrain qui est en la bouche de tout le monde,

Iupiter est de tout commencement,

Et le milieu, & l'accomplissement:

mais au demourant quant aux causes necessaires & naturelles, ils n'en approchent point, mais au contraire les plus recents & plus modernes que ces anciens-là, que lon appelle les naturels, abandonnans ce beau & diuin principe-là, attribuent tout aux corps, & aux passions des corps, & à ne sçay quels battemens, mutations & temperatures, tellement que les vns & les autres en leur dire sont defectueux, parce qu'ils ignorent ou omettent à dire, les vns par qui, les autres de quelle matiere, & par quels moyens chascune chose se faict. Mais celuy qui le premier ouuertement & manifestement a conioinct avec la raison mouuante & ouurante librement, la matiere subiecte & souffrante, necessairement celuy-là respond & pour luy & pour nous à toute calomnie & toute suspicion: car nous ne priuons point la diuination ny de Dieu, ny de raison, attendu que nous luy donnons pour matiere & pour subiect l'ame de l'homme, & pour son outil, & comme son poinçon, le vent d'inspiration & l'exhalation. Premièrement la terre est celle qui engendre telles exhalations, & puis le Soleil, qui donne à la terre toute la vertu & puissance de celle temperature & mutation, par la tradition de nos peres est vn Dieu: puis nous y adioustons les Dæmons, comme superintendans, conseruateurs & gardiens de ceste temperature, comme d'une harmonie & consonance, qui en temps opportun laschent ou tendent & roidissent la vertu de celle exhalation, luy ostans aucunes fois ce qu'elle a de trop actiue efficace à tourmenter l'ame, & la transporter hors de soy, & luy meslant parmy vne vertu d'émouuoir sans faire douleur, ny porter dommage à ceux qui la reçoient.

En quoy

- A** En quoy il me semble que nous ne faisons rien qui doive estre trouué estrange ny impossible, ou non conuenable à la raison, ny quand nous immolons des hosties deuant que de venir à l'oracle, que nous les couronnons de festons de fleurs, & que nous leur espondons dessus les effusions des sacrifices, nous ne faisons en tout cela rien qui soit contraire à ce discours-là: car les prestres & religieux qui sacrifient les hosties, & qui respandent les effusions de vin par dessus, & qui contemplent leurs mouuemens & leurs tremblemens, ne le font pour autre cause que pour auoir signe, si Dieu entend à leur demande, pource qu'il faut que l'hostie que lon immole aux dieux soit pure, entiere, saine, & non aucunement contamnee, ny quant à l'ame, ny quant au corps. Or n'est-il pas mal-aisé de remarquer & cognoistre les signes du corps, & quant à l'ame, ils en font l'espreuue, en presentant aux taureaux de la farine, & aux sangliers des pois chiches, car s'ils n'en veulent point taster, c'est certain signe qu'ils ne sont pas sains: quant à la chéure l'eau froide en est la preuue, car si
- B** elle n'en faiët point de semblant, & qu'elle ne fremisse point quand on en iette dessus elle, c'est certain signe que son ame ne se porte pas selon nature, & quand bien il seroit prouué que ce soit certain & indubitable signe que Dieu vueille rendre response, quand l'hostie arrosée s'esmeut, & le contraire qu'il ne vueille point répondre: ie ne voy pas pour cela qu'il y ait rien qui repugne à ce que nous auons dict parauant, car toute force naturelle produit l'effect auquel elle est ordōnee pis ou mieux, selon qu'elle a le temps & la saison plus ou moins à propos: & il est vray-semblable que Dieu nous donne des indices par où nous pouuons cognoistre si l'occasion se passe, ou non: & quant à moy i'estime que l'exhalation mesme qui s'ourd de la terre, n'est pas tousiours d'une mesme sorte, mais qu'en vn temps elle se lasche, & puis elle se renforce en vn autre: & l'argument qui me le faiët ainsi iuger se peut aisément verifier par le tesmoignage de plusieurs estrangers, & de tous ceux qui seruent dedans le temple: car la chambre là où lon faiët seoir & attendre ceux qui viennent
- C** demander response à l'oracle se remplit aucunesfois, non pas souuent, ny à certains interualles de temps, ains à differents espaces, fortuitement, d'une si souëfue odeur & si douce haleine, que les plus precieux & meilleurs parfums n'en scauroient rendre de plus douce, qui s'ourd comme d'une source de viue fontaine du sanctuaire du temple: & est vray-semblable que c'est la chaleur, ou bien quelque autre puissance qui la pousse au dehors: & si d'aduenture cela semble à quelqu'un n'estre pas vray-semblable, à tout le moins me confessera-il, que la prophetisse Pythie a celle partie de l'ame, de laquelle ce vent & soufflement d'inspiration s'approche, disposée tantost d'une sorte & tantost d'une autre, & qu'elle n'est pas tousiours en une mesme temperature, comme si Dieu gardoit en tout temps une mesme & immuable harmonie: car il y a plusieurs fascheries, & plusieurs passions qui occupent le corps, & qui se coulent en l'ame, les vnes apparentes, les autres secretes: desquelles se sentant
- D** faisie, il seroit meilleur qu'elle ne s'allast point là presenter, ny s'exhiber à ceste inspiration diuine, n'estant pas pure & nette de toute perturbation, comme vn instrument de musique bien accordé, & bien sonant, & non pas tout confus & tout desaccordé: ne plus ne moins que le vin ne surprét pas tousiours l'yurongne autāt une fois qu'autre, ny le son de la fleute n'affectionne pas de mesme tousiours celui qui de sa nature est subiect à facilement estre rauy, ains les mesmes personnes sont aucunesfois plus, aucunesfois moins transportées hors de soy, & plus ou moins enyurees, d'autant qu'il se rencontre en leurs corps une diuerse temperature. Mais principalement la partie imaginative de l'ame, & qui reçoit les especes, est possedee du corps, & subiecte à changer quand & luy, comme il appert manifestement par les songes: car aucunesfois nous auons plusieurs visions de songes, & de toutes sortes, & une autrefois nous sommes en toute tranquillité & tout repos de telles illusions. Nous cognoissons

Des oracles qui ont cessé.

tous Cleon natif de Daulie, jamais en iour de sa vie, & si a vescu bien longuement, il E
n'eut aucun songe:& des anciens on en raconte autant de Thrasyme des Hereien, de-
quoy la cause est en la complexion & temperature du corps, comme lon voit que la
complexion des melancholiques est subiecte à beaucoup songer & auoir beaucoup
d'illusions la nuit, encore qu'il semble que leurs songes soient plus reguliers & plus
veritables que des autres, pour autant que telles personnes tournans facilement leur
phantasie tantost à vne imagination, & tantost à vne autre, il est force qu'ils rencon-
trent aucunes fois: comme font ceux qui tirent plusieurs coups de fiesches, il est force
qu'ils assenent au but de quelque vne. Quand doncques l'imaginatiue partie de l'a-
me & faculté diuinatrice est bien disposee & bien assortie à la temperature de l'exha-
lation, comme à la reception d'une medecine, alors il est force que dedans les corps
des prophetes s'engendre la fureur d'inspiration prophetique, & au contraire aussi
quand elle n'y est pas bien disposee, qu'il ne s'en engendre point, ou bien que ce soit
vne fureur forsenée, non point naïfue, mais violente & turbulente, comme nous F
auons veu aduenir en la prophetisse Pythie, qui est n'aguères decedee: car estans ve-
nus des pelerins estrangers pour auoir responce de l'oracle, on dict que l'hostie endu-
ra les premieres effusions que lon luy versa dessus, sans se bouger ny sans en faire au-
cun semblant, mais les presbtres ne laisserent pas pour cela de la presser outre mesu-
re, & à continuer de luy ietter de l'eau dessus, tant qu'à la fin estant toute trempee &
baignee elle se rendit. Qu'aduint-il doncques de cela à la prophetisse Pythie? elle
descendit bien dedans le trou de l'oracle maugré elle, comme lon dict, & mal volon-
tiers, mais incontinent aux premieres paroles qu'elle dict, elle monstra bien qu'elle
ne le pouuoit plus supporter, estant pleine d'un esprit maling & muet, comme vne
nauires qui cingle à pleines voiles: & finalement estant du tout perturbée, & s'en-
courant avec un cry espouventable & horrible deuers la porte, elle se ietta cōtre ter-
re, tellement que non seulement les pelerins s'enfuirent de peur, mais aussi le grand
presbtre Nicander, & tous les autres presbtres & religieux qui estoient là presens, les- G
quels toutefois rentrans dedans, un peu apres, l'enleuerent estant encore hors de son
bon sens, & de fait elle sur-vescut peu de iours apres. Voyla pourquoy lon contre-
garde le corps d'icelle Pythie pur & net de toute compagnie d'homme, & defend-on
qu'il ne hante ny ne conuerse aucune personne estrangere avec elle, & deuant que
venir à l'oracle ils prennent ces signes, estimans que Dieu sçait bien certainement
quand elle a le corps disposé & préparé à recevoir, sans danger de sa personne, ceste
inspiration fanatique, car la force & vertu de ceste exhalatiō, n'eueut pas toutes for-
tes de personnes, ne les mesmes personnes tout d'une sorte, ny autant à vne fois qu'à
vne autre, ains donne seulement l'eschauffement & le principe, comme nous auons
dict auparauant, à ceux qui sont preparez & accommodez à souffrir & à recevoir ce-
ste alteration. Or est ceste exhalation certainement diuine & celeste, mais non pour-
tant indefaillible, ny incorruptible ou non subiecte à vieillir, & suffisante à durer par H
un temps infiny, lequel vient à bout de toutes choses qui sont au dessoubz de la Lu-
ne, ainsi comme nous tenons: & y en a d'autres qui disent, que celles qui sont encore
par dessus n'y resistent non plus, mais que se lassans par un eternal & infiny temps, el-
les sont soudainement immuees & renouuelees. Or quant à cela, dis-je, ie suis d'aduis
que vous & moy ensemble rememorions, & reconsiderions souuent ces discours-là,
sçachans bien qu'il y a plusieurs prises & plusieurs coniectures alencontre, lesquelles
le temps ne permet pas que nous puissions toutes deduire, & pourtant remettons les
à vne autre fois, avec les doubtes que fait & allegue Philippus touchant Apollo & le
Soleil.

Que

A **Que signifioit ce mot E'i, qui estoit engraué sur**
LES PORTES DV TEMPLE D'APOLLO
 en la ville de Delphes.

B **E** trouuay nagueres en lisant, amy Serapion, des vers qui ne font pas mal faiçts, lesquels Dicęarchus estime que le poète Euripides dit iadis au Roy Archelaus,

Donner ne veux estant pauvre à riche homme,
 Que iustement vn fol on ne m'en nomme,
 Ou que de là on n'aille soupçonnant,
 Que ce ne soit demander en donnant.

Car qui donne du peu de moyen qu'il a vn petit present à ce-
 luy qui possède beaucoup de biens, il ne luy fait pas grand plaisir: & qui pis est encore, d'autant que lon ne peut pas croire qu'il donne ce present-là, quelque petit qu'il soit, pour neant, il en acquiert la reputation d'estre homme auaricieux, fin & cauteleux: Mais d'autant que les dons qui se font avec argent & biens temporels sont en liberale gentillesse, & en beauté, beaucoup moindres que ceux qui procedent de l'entendement, d'autant plus est-il & honneste d'en donner, & en donnant en demander de semblables à ceux qui les reçoient. Parquoy enuoyant presentement à toy, & à ceux qui sont par delà, pour l'amour de toy, quelques vns des discours que nous auons recueillis, touchant le temple d'Apollo Pythique, comme vne offrande de primices de nos fructs: ie confesse que i'en attens de vous autres & plus en nôbre, & de meilleurs en valeur, attendu que vous estes en vne grande ville, que vous auez plus de loisir, avec plus grande quantité de liures, & de toutes sortes d'exercices & conferences de lettres & d'estudes. Or

C semble-il que le bon Apollo remedie aux doubtes, & donne expedient aux difficultez qui se presentent ordinairement en la vie de l'homme, en respondant les oracles à ceux qui se retirent à luy, mais qu'il en produit & met en auant, en matiere de lettres, imprimant en l'ame de sa nature conuoiteuse de sçauoir, vn desir de cognoistre & entendre la verité, comme il appert en plusieurs autres exemples, & mesmement en ce petit mot E'i, qui a esté consacré en son temple: car il n'est pas vray-semblable que ce soit esté par vn cas fortuit, ny par vne maniere de sort des lettres, que ce mot seul ait eu ceste preeminence enuers ce Dieu, de preceder tous les autres, ne qu'il ait eu l'honneur de chose sacree à Dieu, ou dediee en vn temple pour estre de chacun regardee, ains faut que les premiers hommes doctes qui ont eu dès le commencement la charge de ce temple, ayent cogneu quelque particuliere propriété exquise en ce mot, ou qu'ils s'en soient seruis comme d'une deuise & vne marque pour cou-

D uertement signifier & donner à entendre quelque chose de grande consequence. Par plusieurs fois doncques au parauant, ayant tout doucement destourné ce propos quand on le mettoit en auant pour en discourir, & ayant passé outre, ie fus nagueres surpris par mes propres enfans, ainsi que ie m'efforçois d'en satisfaire à quelques pelerins estrangers, lesquels estans prests à partir de la ville de Delphes, il n'eust pas esté honneste de tenir en longueur, ny aussi du tout les refuser, ayans desir singulier de m'en ouir dire quelque chose. Comme doncques nous fussions assis dedans le temple, ie commençay à rechercher moy-mesme, & partie à demander & enquerir, admonesté du lieu & des propos que nous tenions, ce que jadis lors que Neron passa par ce pays icy, i'auois ouy discourir à Ammonius, & à quelques autres en ce mesme lieu, ayant esté semblablement ceste mesme difficulté mise dès lors en auant. Pour ce que ce dieu Apollo n'est pas moins philosophe & sçauant, que pro-

Que signifioit ce mot E'i.

phete, ce dit lors Ammonius, on a appliqué & accommodé à cela les furnoms que E
lon luy donne avec bonne & grande raison, enseignant & montrant qu'il est Py-
thius, comme qui diroit enquerant, à ceux qui commencent à apprendre & à en-
querir : & Delius & Phaneus, c'est à dire clair & luyfant, à ceux à qui la verité com-
mence vn petit à se montrer & apparoitre : & Ismenius, c'est à dire sçauant, à ceux
qui ont ia la science toute acquise : & Leschenorius, c'est à dire eloquent, quand ils
mettent leur science en œuure, & qu'ils commencent à conferer de leurs estudes, &
à disputer & communiquer les vns avec les autres. Et pourautant que aux philoso-
phes appartient enquerir, admirer & doubter, à bon droit la plus part des choses de
ce Dieu sont comme cachees sous des ænigmes, & paroles couuertes, & requierent
que lon demande le pourquoy, & l'enseignement de la cause. Comme, pourquoy est-
ce, que lon n'y brulle iamais que du bois de Sapin, pour entretenir le feu éternel :
que lon n'y fait iamais parfum que de laurier : qu'il n'y a en ce temple que les images
de deux Parques, c'est à dire Deesses fatales, veu que par tout ailleurs on en met trois : F
qu'il n'est pas permis à femme, qui qu'elle soit, d'approcher de l'oracle : que c'est de la
machine à trois pieds qui y est : & autres telles matieres, lesquelles conuient & attirent
ceux qui ne sont pas du tout sans ceruelle & sans entendement, à demander, desirer
ouïr & discourir que cela veut dire. Et qu'il ne soit vray, voyez seulement ces escreteaux
icy, Cognoy toy mesme : & Rien trop : combien ils ont esineu & excité de questions
& de disputes entre les hommes doctes, & quelle multitude de beaux discours est pro-
cedee de telles inscriptions, ne plus ne moins que d'une grainc : & ie vous dis que ce
dont nous enquerons maintenant n'est moins fertile pour en produire, que piece des
autres. Apres que Ammonius eut dit cela, mon frere Lamprias parla ainsi : Toute-
fois le propos que nous en auons tous ouy dire, quant à cela, est fort simple, & fort
court : car on dit que ces anciens Sages-là, que d'aucuns appellent Sophistes, n'estoient
que cinq, quant à eux, c'est à sçauoir Chilon, Thales, Solon, Bias, & Pittacus : mais
que depuis Cleobulus, le tyran des Lindiens, & apres Periander tyran de Corinthe, G
qui n'auoient rien ne de vertu ne de sapience, par le moyen de leur grande puissance,
grand nombre d'amis, & par les biens-faicts qu'ils faisoient à leurs adherents, force-
rent la reputation, & se poulserent, en despit qu'on en eust, en l'vsurpation du nom de
sages, & qu'ils feirent à ceste fin, semer ne sçay quelles sentences & diets notables par
toute la Grece, ne plus ne moins que ceux des autres : dequoy ces autres premiers sa-
ges furent bien mal-contents, mais toutefois ils ne voulurent point descouurir ne
conuaincre ceste vanité, ny appertement en prendre querelle, pour ceste reputation
alencontre d'eux, & en debattre contre des hommes qui auoient de grands moyens,
& beaucoup de puissance, mais que s'estans assemblez à part en ce lieu, & en ayant de-
uisé ensemble, ils consacrerent icy la lettre E, qui est la cinquième en l'ordre de l'Al-
phabet, & qui signifie cinq entre les nombres, comme pour tesmoigner au Dieu de H
ce temple qu'ils n'estoient que cinq, & qu'ils reiettoient & excluioient de leur compa-
gnie le sixième & le septiesme, pour ce qu'il ne leur appartenoit pas d'y estre. Et que
cela ne soit point trop hors de propos, lon le pourroit croire qui auroit entendu des
presbtres qui ont la superintendance du temple, comme ils appellent celuy E'i qui est
d'or, l'E'i de Liuia femme d'Auguste César : & celuy qui est de cuyure, celuy des Athe-
niens : & E'i le premier qui est le plus ancien, & qui n'est quant à la matiere que de
bois, iusques aujourd'huy ils le nomment celuy des Sages, comme n'ayant pas esté
dedié par vn, mais par tous ensemble. A ce propos Ammonius se prit tout douce-
ment à soubrire, estimant que c'estoit l'opinion particuliere de Lamprias, mais qu'il
feignoit l'auoir entendu d'ailleurs, à fin qu'il ne fust point tenu d'en rendre cõpte, ny
de la soustenir. Et vn autre des assistans alors dit, que cela ressembloit proprement à
ce que quelque estranger Chaldeïen & Astrologue de profession, auoit nagueres
babillé,

- A babillé, Qu'il y auoit sept lettres qui seules à par elles rendoient chacune leur voix propre, sept autres au ciel qui auoient leur propre mouuement separé, & non point lié, & qu'entre les lettres voyelles E estoit la seconde, comme le Soleil apres la Lune, & que tous les Grecs presque vnanimement tenoient que Apollo & le Soleil estoient vnemesme chose: mais cela, quand tout est dit, sent trop son calcul de deuineur iudiciaire, & sa harangue de charlatan. Au demourant il me semble que Lamprias ne se donne pas garde, qu'il a suscité tous ceux qui ont la charge du temple alencontre de son propos, car il n'y a homme des Delphiens qui sçache rien de ce qu'il a dit, ains alleguent eux la cōmune opinion, & qui va par la bouche de tout le monde, c'est qu'ils n'estiment pas ny que la veuë, ny que le son, mais que le mot seul, ainsi qu'il est escrit, ait quelque secrette signifiante: car c'est ainsi comme les Delphiens l'estiment, & cōme le grand presbtre Nicander mesme, qui estoit là present le premier, le disoit, le formulaire & la façon que tiennent ceux qui viennent pour se conseiller avec le Dieu
- B Apollo, & est ordinairement la premiere parole que mettent en leurs interrogatoires ceux qui viennent à l'oracle, S'ils gaigneront, S'ils se marieront, S'il leur sera vtile de se mettre sur mer, ou bien de se mettre au labourage de la terre, ou de voyager hors de leur pays. Et en cela le Dieu qui est sage & sçauant se mocque des Dialecticiens, lesquels maintiennent que de ceste particule, Si, & de quelconque proposition qui vient apres, il ne se peut rien du tout effectuer ny affirmer, entendant & receuant toutes les propositions qui sont soubmises & adiointes à ce mot Si, pour choses estans en estre. Or tout ainsi que ce Si, nous est propre pour l'interroguer cōme Deuin, aussi nous est-il cōmun à le prier comme Dieu. De maniere qu'ils estiment que ce Si là n'ait pas moins d'efficace à souhaitter & prier, qu'à interroguer: car nous voyons que ceux qui prient disent ordinairement, O si, à la mienne volonté! & Archilochus qui dit,

O si toucher ie te pouuois la main, Neobulé!

- Et dit que la seconde syllabe de ce mot Eithé, qui signifie, à la mienne volonté, est vne adionction superflue, pour ce que E'i signifie autant tout seul: ne plus ne moins que
- C Thin est vne particule de réplissage, comme en ce carme du poëte Sophron *ἀμα τέκνων θέλω δευομῆα*, c'est à dire, desirant aussi d'auoir enfans: & en ce vers d'Homere, *ὥς θέλω καὶ σὸν ἐγὼ λύσω δέμας* c'est à dire, à fin qu'aussi ta force ie defface. Et qu'en ce petit mot de E'i l'efficace de prier & de souhaitter estoit suffisamment declaree. Apres que Nicander eut dit ces paroles, ie presuppose que vous cognoissiez vn sien familier nommé Theon, celuy-là, demanda à Ammonius, s'il seroit permis à la Dialectique, qui se voyoit ainsi fouler aux pieds, de se defendre. Ammonius luy dit qu'il parlast hardiment, & deduisist tout ce qui pouuoit seruir à la defense d'icelle. Certainement, dit-il adonc, il y a plusieurs oracles, qui tesmoignent & monstrent euidemmēt, que le Dieu Apollo est tres-expert en la Dialectique: car c'est vn mesme ouurier de mouuoir & de souldre les doubtes. Et puis ainsi comme Platon disoit, que iadis ayant esté donné
- D aux Grecs vn oracle, qu'ils eussent à doubler l'autel qui estoit au temple de Delos, ce qui est vn chef d'œuvre d'homme consommé en la science de la Geometrie, que ce n'estoit pas cela que Dieu commandoit aux Grecs, ains qu'il leur enioignoit de s'adonner à l'estude de la Geometrie: aussi en donnant quelquefois des responses & oracles ambigus & douteux, il augmēte & recommande d'auantage la Dialectique, comme estant du tout necessaire à ceux qui voudront bien entendre son parler. Or en la Dialectique ceste conionction, qui est propre & apte à continuer vne oraison, a tres-grande force, comme celle qui forme celle proposition, qui est la plus capable de discours & de ratiocination. Car qui niera que telle ne soit la proposition conionctiue & copulatiue, attendu que les bestes brutes mesmes ont bien quelque intelligence & cognoissance de la subsistance des choses: mais la nature a donné à l'homme seul la notice de la consequence, & le iugement de sçauoir discerner ce qui s'ensuit de

Que signifioit ce mot E'i:

chaſque choſe: car qu'il ſoit iour & qu'il face clair, les loups meſmes, les chiens & les E
coqs le ſentent bien: mais de dire, ſ'il eſt iour, il eſt doncques force qu'il face clair, il
n'y a creature qui le ſçache ſinon l'homme, eſtant ſeul qui a intelligence du commã-
cement & de la fin, de ce qui precede & de ce qui acheue, & de la coherence & colli-
gature de ces deux extremittez-là, les vnes avec les autres, quelle habitude ou cor-
reſpondence, & quelle difference elles ont entre elles, & c'eſt de là dont prennent
leur principale origine les demonſtrations. Or puis qu'il eſt ainſi, que toute la philo-
ſophie du monde conſiſte à bien entendre la verité, & que la lumière qui eſclaire la
verité, c'eſt la demonſtration, & que le principe de la demonſtration c'eſt ceſte cohe-
rence-là, & conionction: à bon droit la puissance qui fait & qui contient cela, a
eſté dediee & conſacree par les ſages & ſçauans hommes au Dieu qui par deſſus tous
aime la verité: & puis c'eſt vn Dieu prophete & diuin, & l'art diuinatrice eſt de l'ad-
uenir par le moyen des choſes qui ſont ou preſentes, ou paſſees: car ny il ne ſe fait
rien ſans cauſe, ny il ne ſe preuoit rien ſans raiſon precedente: ains pourautant que F
tout ce qui eſt ſuit & depend de ce qui a eſté, & conſequemment tout ce qui ſera a ſa
ſuite & dependance de ce qui eſt par vne continuation de bout à autre, & du com-
mancement à la fin, qui peut voir ces cauſes naturellement enſemble, & les com-
poſer & conioindre les vnes avec les autres, celui-là ſçait & peut predire

Tout ce qui eſt, qui fut, & qui ſera: comme dit Homere, qui a ſagement mis en
premier lieu ce qui eſt, & puis ce qui ſera, & ce qui fut: car du preſent depend la ratio-
cination, par l'efficace & vertu de la conionction, par ce que ſi telle choſe eſt, telle
choſe doncques neceſſairement a precedé: ou à l'opposite, ſi telle choſe eſt, telle cho-
ſe doncques ſera. Car toute la ſcience & l'artifice, de diſcourir & de ratiociner, com-
me nous auons dit, eſt de bien cognoiſtre la ſuite & la conſequence, mais le ſenti-
ment eſt-ce qui donne l'anticipation au diſcours de la raiſon: parquoy encore qu'il
ſoit à l'aduenture peu honneſte, ie ne faindray pas de dire, que cela eſt proprement le
Tripied de la verité, quand le diſcoursant ſuppoſe la conſequence avec ce qui a prece-
dé, & puis apres y adiouſtant la ſubſiſtance, vient à induire finalement la conclu- G
ſion de la demônſtration. Or ſ'il eſt ainſi qu'Apollo Pythien ſe delecte de la Muſique,
comme lon dit, & du chant des Cygnes, & du ſon de la Cithre, eſt-ce de merueille,
ſi pour l'affection qu'il porte ſemblablement à la Dialectique, il cherit & aime la
partie de l'oraïſon, de laquelle il voit que plus ſouuent & plus volontiers vſent les
philophes? Hercules deuant qu'il euſt deſlié les liens dont eſtoit attaché Prome-
theus, n'ayant pas encore communiqué avec Chiron & avec Atlas, qui eſtoient grãds
maîtres de diſpute, ains eſtant encore ieune, & ſentant encore fort ſon Bœotien,
voulut premierement deſtruire la Dialectique, & ſe mocqua de ce petit mot E'i,
mais puis apres il ſemble qu'il voulut ſouſtraire le Tripied meſme à Apollo, & con-
teſter avec luy de l'art de deuiner, par ce qu'avec l'aage & le temps il deuint tres-sub-
til à diſputer, & tres-clair-voyant à deuiner. Apres que Theon eut acheué ſon pro- H
pos, Euſtrophus Athenien, ce me ſemble, ſe prit à nous dire: Voyez-vous comment
Theon a defendu vaillamment l'art de la Dialectique? de ſorte que peu ſ'en faut qu'il
ne veſte meſme la peau de lyon de Hercules. C'eſt honte à nous autres, qui referons
tous affaires, enſemble les natures & les principes de routes choſes, tant diuines que
humaines, au nombre, & qui le faiſons authœur & dominateur de celles meſmement
qui ſont les plus belles, & les plus precieufes, que nous demourions tout quoy ſans
mot dire, ains eſt raiſonnable que nous auſſi de noſtre part offrions des primices des
Mathematiques au Dieu Apollo. Car nous diſons que ceſte lettre E, d'elle meſme,
ny en puissance, ny en forme, ny en ſon nom, n'a rien de plus que les autres lettres:
mais penſons qu'elle a eſté preferee à toutes autres, d'autant qu'elle eſt la note & la
marque du nombre de cinq, qui eſt de tresgrande vertu & efficace à routes choſes, de
forte

- A forte que les sages anciens appelloient nombrer Pembazin, comme qui diroit quinter pour compter : & addressoit Eustrophus sa parole, en disant cela, à moy, non point en se iouant, ains à bon escient, pourautant que lors i'estois fort affectionné à l'estude des Mathematiques: mais en forte toutefois que en toutes choses i'estois pour observer le precepte de Rien trop: mesmement estant en la secte de l'Academie. Parquoy ie respondis que Eustrophus, à mon aduis, sauuoit tresbien la difficulté par ce nombre: car comme ainsi soit, dis-je, que le nombre en general se diuise en pair & en non-pair, l'vnité est en puissance commune à l'un & à l'autre: de maniere qu'estant adioustee au pair, elle le rend non-pair, & adioustee au non-pair, elle le rend pair, & fait deux le principe du nombre pair, & trois le premier des nombres non-pairs, desquels meslez ensemble s'engendre le cinq, qui à bon droit est honoré, comme le premier composé des premiers: & de là est appelé mariage, pour ce que
- B le nombre pair a quelque semblance avec la femelle, & le non-pair avec le male, d'autant qu'en diuisant les nombres en partie egales, le pair se mespartisant & coupant tout net, laisse vn chemin & vne place entre ses parties, principe idoine à receuoir: mais au contraire le non-pair, si on luy en fait autant, il demeure tousiours quelque chose entre-deux, propre à soubdiuiser, par où il appert qu'il est plus generatif que n'est pas l'autre: & puis quand on le vient à meller, il demeure tousiours le maistre, & iamais ne se trouue vaincu: car quelque melange que lon face des deux, iamais n'en vient nombre pair, combien qu'on les messe, ains de toutes mixtions en sortira tousiours nombre non-pair: mais qui plus est, l'un & l'autre adiousté & composé avec soy-mesme, monstre encore plus la difference qu'il y a entre-eux deux: car iamais nombre pair assemblé avec pair ne produisit nombre non-pair, ne iamais ne sortit de son propre naturel, n'ayant pas la puissance d'en engédrer vn autre, tant il est imparfait: mais les non-pairs meslez avec les non-pairs en produisent plusieurs pairs,
- C tant il a de force d'engendrer en toutes sortes: & ne seroit pas bien à propos maintenant de discourir les autres proprieté, puissances & differences des nombres. Voila doncques pourquoy les anciens philosophes Pythagoriques ont appelé le cinq mariage comme estant composé du premier male & du premier femelle: aussi l'a on quelque fois appelé la Nature, pour ce qu'estant multiplié par soy, il vient à se terminer en soy-mesme: car tout ainsi comme la nature prenant du froment en semence, & le respendant, produit entre deux plusieurs formes diuerses & especes de choses, par lesquelles elle passe pour paruenir à la fin de son oeuvre, mais apres tout elle en fait naistre du froment. Aussi les autres nombres, quand on vient à les multiplier se terminent par multiplication en autres nombres: mais le cinq & le six, quand on les multiplie par eux mesmes, se ramencent & regenerent eux mesmes, car six fois six font trente & six, & cinq fois cinq, vingt & cinq, mais le six ne le fait qu'une fois,
- D & en vne maniere seulement, quand on vient à l'esquarrir par soy-mesme: mais au cinq cela mesme aduient aussi bien quand on le multiplie par soy-mesme, mais particulièrement il a cela de propre, que par addition de soy il se produit soy-mesme, ou bien le dix alternatiuement, & cela infiniment, tant que le nombre se peut estendre, ressemblant en cela au principe & premiere cause qui conduit & gouuerne tout ce monde: car comme elle de soy-mesme conserue le monde, & reciproquement par le monde se parfait soy-mesme, ne plus ne moins que Heraclitus dit, Toutes choses se tournent en feu, & le feu en routes choses: comme l'or en biens, & les biens en or: aussi le concours & assemblage du cinq avec soy-mesme ne peut amener & engendrer rien ny imparfait, ny estrange, ains a ses mutations limitees & certaines: car ou il s'engendre soy-mesme, ou il produit la dizaine, c'est à dire, ce qui luy est domestique & propre, ou bien ce qui est parfait. Or si quelqu'un maintenant me vient à demander, à quel propos cela? & qu'a-il affaire avec Apollo? Je luy respon-

Que signifioit ce mot E'i.

dray, que cela n'appartient pas à Apollo seulement, mais aussi à Bacchus, comme à E
celuy qui n'a pas moins d'autorité & de puissance en la ville de Delphes qu' Apollo
mesme: car nous entendons des Theologiens, qui partie en vers, & partie en prose,
nous disent & chantent que ce Dieu est de sa nature incorruptible & immortel,
mais que par ie ne sçay quelle sentence & raison fatale il se transmue & se change en
plusieurs sortes. Quelquefois il s'allume en feu, rendant toutes choses de sembla-
ble nature, quelquefois il est de diuerses formes, diuerses passions, & puissances toutes
differentes, & se fait, comme maintenant il est, Monde, s'appellant ainsi d'un nom
tres-commun. Mais les sages & sçauans voulans celer & cacher ces secrets-là au com-
mun peuple, appellent ceste sienne mutation en feu, Apollo, d'autant qu'elle oste la
pluralité des choses, & reduit tout à vne seule: aussi l'appellent ils Phœbus à cause de
sa pureté & netteté, sans aucune ordure ne pollution: & quant à sa transmutation
en eauë, terre, estoilles, diuers genres de plantes & d'animaux, par tel ordre & dispo-
sition que nous la voyons, ils donnent par cela sous paroles couuertes obscurément F
à entendre, comme vn demembrement & vne distraction, & l'appellent pour cela,
Dionysius, Zagreus, Nyctelius, Isodetes, & feignent en leurs compositions, qu'ils
chantent ne sçay quels trespassements, & aneantissements, & puis des resurrections
& renaissances, qui sont toutes fables & ænigmes proprement inuentees pour si-
gnifier & représenter ces mutations-là. Suiuant laquelle difference ils dedient à
l'un certaine sorte de vers & de cantiques qu'ils appellent Dithyrambes, qui sont
pleins de passions & de mutation, avec mouuement & agitation çà & là, comme dit
Æschylus,

Le Dithyrambe au langage bruyant

Est en tous lieux à Bacchus bien seant:

mais à l'autre le cantique de Pæan; qui est vne posée, sage & raffinée façon de poésie &
musique. Et puis en toutes leurs peintures, images & moulures, ils font cestuy-cy
toufiours ieune & iamais ne vieillissant, & l'autre à plusieurs faces & plusieurs visages. G
Et brief ils attribuent à l'un vne constance toufiours à soy semblable, vne ordre re-
glee, vne grauité serieuse, pure, sans mélange de chose aucune differente, & à l'autre
vn ieu parmy vne insoléce, vne grauité entremeslee de furie: ils le surnōment Inegal,

Bacchus Euius qui errantes

Incite à fureur les Bacchantes,

Qui veult estre honoré de ieux

Et de seruices furieux,

touchans par cela bien à propos ce qui est propre à l'une & à l'autre mutation: mais
pour ce que le temps de la reuolution n'est pas egal ne semblable en l'une & en l'autre
mutation, ains est plus long celuy de la conuersion qu'ils appellent Coros, com-
me qui diroit abondance & grand' chere: & plus court celuy de la Difette, gar-
dans encore en cela la proportion: ils vsent du cantique de Pæan durant tout le reste H
de l'année en leurs sacrifices: & quand ce vient sur le commencement de l'hyuer,
ils resuscitent le Dithyrambe, & suppriment le Pæan, trois mois durant reclamans
cestuy-cy au lieu de celuy-là, estimans qu'il y a telle proportion entre l'embrasement
& la reparation du monde, comme il y a entre vn & trois. Mais à l'aduenture auons
nous demouré sur ce propos plus long temps qu'il n'appartenoit, tant y a qu'il est
bien certain qu'ils attribuent à ce Dieu le nombre de cinq, disans que tantost par
multiplication de soy il se ramene soy mesme cōme le feu, & tantost apres il fait la di-
zaine comme le monde. Et puis ce nombre n'a-il pas quelque communication avec
la musique, qui est si agreable à ce Dieu que rien plus? car pour la plus part la musi-
que est par maniere de dire, occupee alentour des accords, lesquels ne sont que cinq
en nōbre, & non plus: ainsi que la raison & l'experience le monstre par necessité, à qui
en veut

- A** en veut faire la preuve, avec des cordes ou des pertuis de fleute, au sentiment de l'ouyè sans autre raison: car tous ces accords prennent leur generation par proportions de nombre:& est la proportion de la quarte sesquiterce,& de la quinte sesquialtere, de l'octaue double,d'une quinte sur double triple,& d'une double sur double, ou quinzième quadruple:& quant à celuy que les Musiciens y adioustent, le nommans vne quarte sur double, il n'est point raisonnable de le recevoir & admettre, comme sortant hors de moyen & de mesure, en voulant gratifier au plaisir deraisonnable de l'oreille contre la proportion, comme contre l'ordonance de la loy: laissant doncques à part les affiettes des cinq tetrachordes, & les cinq premiers tons, changemens de voix, ou notes, ou harmonies, s'il les faut ainsi appeller, pour ce qu'elles se changent en laschant ou roidissant plus ou moins les cordes, estant au demourant sons, ou voix basses & hautes. Ne voyons-nous pas que y ayans plusieurs, ou
- B** pour mieux dire, infinis interualles, il n'y en a que cinq seulement que lon puisse chanter, Diesis, Semitonium, Tonus, Triemitonium, Ditonus? & n'y a autre lieu de voix ne plus petit, ne plus grand, distingué de bas & de haut, qui se puisse exprimer en chantant. Et en passant plusieurs autres telles choses, dis-je, ie citeray Platon, qui dit bien qu'il n'y a qu'un monde, mais que s'il y en auoit plusieurs, & non pas un tout seul, il faudroit qu'il y en eust cinq en tout,& non point plus. Et bien qu'il n'y en eust qu'un seul, ainsi comme Aristote l'estime, si est-ce encore qu'il est comme composé & assemblé de cinq autres, dont l'un est celuy de la terre, l'autre de l'eau, le troisième du feu, le quatrième de l'air, le cinquième est le ciel, que les autres appellent la lumiere, & aucuns *Æther*, & d'autres nomment encore cela mesme la quinte-essence, à laquelle seule il est propre & naturel, entre tous les corps, de tourner en rond, non point par force, ny autrement à l'adventure. Voila pourquoy ayant entendu que les plus belles & plus parfaittes figures des corps reguliers qui soient en toute la nature, sont cinq en nombre, à sçauoir la Pyramide, le Cube, l'Octaèdre, l'Icosaèdre, &
- C** le Dodecaèdre, il a dextrement approprié & attribué chacune de ces nobles figures à chacun de ces premiers corps. Et y en a d'autres qui attribuent aussi les facultez des sens de nature, qui sont aussi en pareil nombre, à ces premiers corps-là: c'est à sçauoir, l'attouchement qui est dur & ferme, à la terre: le goust qui iuge les qualitez des saveurs par vne certaine humidité, à l'eau: l'ouyè à l'air, d'autant que l'air frappé se fait voix & son aux oreilles & à l'ouyè: des deux autres l'odoremēt a pour son obiect l'odeur, laquelle est comme vne maniere de parfum, qui s'engendre par la chaleur, & pour ce tient-il du feu: la veuë qui esclaire par ie ne sçay quelle affinité & consanguinité qu'elle a avec le ciel & la lumiere, à vne certaine temperature & complexion meslee de l'un & de l'autre: & n'y a en toute la nature ny animal qui ayt autre sentiment, ny en tout le monde autre substance qui soit simple & non composée, ains y a vne merueilleuse distribution & conuenance de ces cinq à ces cinq.
- D** Apres auoir dit cela il s'arresta, & ayant fait un peu de pause: O quelle faute, dis-je, Eustrophus, auons nous pensé faire, d'auoir presque laissé en arriere Homere, comme si ce n'estoit pas luy qui le premier a diuisé le monde en cinq parties, ayant distribué les trois qui sont au milieu à trois Dieux, & laissé les deux extremittez en commun, sans les attribuer à pas un, à sçauoir le ciel & la terre, estant la terre le bout d'en bas, & le ciel le bout d'en haut: mais il faut rapporter nostre propos, comme parle Euripide, car ceux qui magnifient le quaternaire ne nous enseignent pas mal à propos, que tout corps solide a pris sa naissance & generation par la raison d'iceluy, pour ce qu'estant ainsi, que tout solide consiste en longueur, largeur & profondeur, deuant la longueur est situé le poinct, comme l'unité entre les nombres, & la longueur sans la largeur s'appelle ligne, qui est longueur sans largeur: & le mouuement de la ligne en large est la superficie qui se compose des trois, puis y estant adioustee la pro-

Que signifioit ce mot E'i.

fondeur, l'augmentation va croissant par quatre, iusques à vne parfaicte solidité. Il **E** est tout manifeste que le quaternaire ayant poussé nature iusques à là, & iusques à ce poinct, de former & parfaire vn corps, en luy donnant double magnitudo, avec ferme solidité, ne l'a pas laissé là destituee de ce qui est le principal & le plus grand: car ce qui est sans ame, est par maniere de dire, orphelin, sans conduite & imparfaict, ne seruant à chose quelconque, s'il n'y a quelque ame qui en vse: mais le mouuement & la disposition qui y met l'ame dedans, par le moyen du nombre de cinq, c'est ce qui apporte la perfection & consommation à la nature: par où il appert qu'il a vne essence plus excellente que le quatre, d'autant que le corps vif, & qui a ame, est de plus noble nature que celuy qui n'en a point. Mais qui plus est, la beauté & puissance de ce nombre de cinq passant encore plus outre, n'a pas voulu souffrir que le corps animé s'estendist en infinies especes, ains nous a donné cinq diuerses sortes de corps animez & viuans: car il y a les Dieux, les Dæmons, & les Demy-dieux: le quatrième genre est celuy des hommes, le cinquième & dernier est celuy des bestes brutes & irraisonnables. **F** Dauantage, si vous venez à diuiser l'ame mesme selon la nature, la premiere & plus obscure partie ou puissance d'icelle est la faculté vegetatiue & nutritiue, la seconde est la sensitiue, & puis l'appetitiue, apres l'irascible où s'engendre le courroux: & quand elle est paruenue à celle qui discourt par la raison, elle s'arreste à ceste cinquiesme partie, comme à la cyme de toutes. Mais ayant ce nombre tant & de si grandes proprieté & faculté, sa generation est encore belle à considerer, non pas celle dont nous auons desia parlé cy-deuant, quand nous auons dict qu'il se compose du deux & du trois, mais celle qui se fait par la conionction du principe avec le premier nombre quarré: car le principe & commencement de tous nombres est l'vnité, & le premier quarré est le quaternaire, & de ces deux-là, ne plus ne moins que de la forme, & de la matiere venue à sa perfection, se procree le cinq: & s'il est vray ce que quelques vns tiennent, que l'vnité soit quarrée, cōme celle qui est la puissance d'elle-mesme, & qui se termine en soy-mesme, le cinq qui sera composé des **G** deux premiers nombres quarrés, en deura estre estimé si noble & si excellent, que nul autre ne le pourroit estre dauantage. Il y a encore vne autre excellence plus grande que toutes les precedentes, mais i'ay peur que qui la diroit, ne foulast vn petit l'honneur de nostre Platon, comme luy-mesme disoit, que le nom de la Lune fouloit l'honneur d'Anaxagoras, d'autant qu'il s'attribuoit l'inuention d'auoir le premier déclaré la maniere comme la Lune reçoit sa lumiere du Soleil, laquelle opinion est tres-ancienne: n'a-il pas dict cela au dialogue intitulé Cratylus? Ouy certes, respondit Eustrophus, mais pour cela ie ne voy pas comment cela soit à propos d'Anaxagoras: & toutefois vous sçaez bien que au liure du Sophiste il met cinq principes & chefs principaux, Ce qui est, le Mesme, l'Autre, le Mouuement pour le quatrième, & le Repos pour le cinquième. Et puis au dialogue de Philebus il vse encore d'une autre sorte de partition de ces principes, où il dict, que Vn est l'infiny, & l'Autre le finy, & que de la meslange de ces deux-là se faict & accomplit toute generation, & la cause par laquelle ils se meslent, il la met pour le quatriesme genre, & nous laisse à coniecturer le cinquiesme, par le moyen duquel ce qui est composé & meslé se rediuisé & se separe derechef: & quant à moy, ie pense que ces principes-cy sont comme les figures & images de ceux-là, De ce qui est, ce qui se faict: Du mouuement, l'Infiny: le Finy du repos: du Mesme, la cause meslante: de l'Autre, la cause separante. **H** Ou bien si ce sont diuers principes, & non pas les mesmes, ainsi comme ainsi, tousiours y a-il cinq genres & cinq differences de principes. Quelqu'un doncques auant Platon s'estant de soy-mesme aduisé de cela, ou l'ayant entendu de quelque autre, consacra deux E, au Dieu de ce temple, comme vne marque & signifiante du nôbre qui comprend tout l'vniuers. Et parauenture aussi qu'ayât entendu, que le bien apparoist en

A roist en cinq genres, dont le premier est Moyen, le second Proportion. le tiers Entendement, le quatrième les Sciences, les arts, & vrayes opinions qui sont en l'ame, & le cinquième la Volupté pure & simple, sans meſlange d'aucune faſcherie ne douleur, il s'arresta-là en diſant ce vers d'Orpheus,

Au ſixième arreſtez voſtre chant.

Après ces propos qui ſ'addreſſoiēt à nous, ie diray encore vn mot, dit-il, à Nicander,

Ie chanteray aux hommes entendus :

car le ſixième iour du mois que vous menez ſolennellement la prophetiſſe Pythie au Palais, la premiere ſortition des trois que vous y faites, entre vous, eſt de cinq, car elle en iette trois, & toy deux : n'eſt-il pas ainſi ? Ouy certes, reſpondit Nicander : mais quant à la cauſe, nous ne l'oſerions declarer aux autres. Bien doneques, diſ-je en riānt, iuſques à ce que Dieu permette à nous encore eſtans deuenus ſaincts, de cognoiſtre la verité: cela ſera adiouſté aux loüanges que lon recite à la recomman-

B dation du cinq. Tellē fin eut le diſcours des loüanges qui furent donnees au nombre de cinq, par les Arithmēticiens & autres Mathématiciens, ainſi comme il me ſouuient. Et Ammonius comme celui qui mettoit bonne partie de la philoſophie eſ ſciences Mathematiques, prit plaifir à ouir tels propos, & dit : Il n'eſt ja beſoing de vouloir trop exactement reſuter ce que ces ieunes gens ont allegué, ſinon que chaque nombre nous donneroit aſſez matiere & argument de le celebrer & louer, qui en voudroit prendre la peine: car, pour ne parler point des autres, tout vn iour ne ſuffiroit pas à vouloir par paroles exprimer toutes les vertus & proprieté de la ſacree ſeptaine d'Apollo. Et puis nous ferions que les ſages combattroient contre la commune loy, & contre toute l'antiquité, ſi deboutans le ſept de la preeminence dont il eſt en poſſeſſion, ils conſacroient le cinq à Apollo, comme luy eſtant ceſte preference mieux deuë. Parquoy mon aduis eſt, que ceſte eſcripture ne ſignifie ny nombre, ny ordre, ny conionction, ny autre particule d'oraiſon defectueuſe quelcon-

C que, ains eſt vne entiere ſalutation & appellation du Dieu, laquelle en prononçant les paroles induit le lecteur à penſer la grandeur de la puiſſance d'iceluy, lequel ſemble ſaluer chacun de nous, quand nous entrons, par ces paroles, Cognoy toy-meſme: qui ne ſignifient rien moins que, Dieu te gard: & nous luy rédans la pareille, reſpondons, Ei, c'eſt à dire, Tu es : en luy baillant la vraye & nullement faulſe appellation, & tiltre qui à luy ſeul appartient, d'eſtre: car, à le bien prendre, nous n'auons aucune participation du vray eſtre, pour ce que toute humaine nature eſt touſiours au milieu, entre le naiſtre & le mourir, ne baillant de ſoy qu'une obſcure apparence & vmbre, & vne incertaine & debile opinion : & ſi d'aduenture vous fichez voſtre penſee à vouloir prendre ſon eſtre, ce ſera ne plus ne moins que qui voudroit empoigner l'eau, car tant plus il ferrera & preſſera ce qui de ſa nature coule par tout, tant plus il perdra ce qu'il vouloir retenir & empoigner: ainſi eſtans toutes choſes ſubiectes à

D paſſer d'un changement en vn autre, la raiſon y cherchant vne reellement ſubſiſtance ſe trouue deceuë, ne pouuant rien apprehender de ſubſiſtant à la verité & permanent, par ce que tout ou vient en eſtre & n'eſt pas encore du tout, ou commence à mourir auant qu'il ſoit né : car comme ſouloit dire Heraclitus, On ne peut pas entrer deux fois en vne meſme riuere, ny trouuer vne ſubſtance mortelle deux fois en vn meſme eſtat : car par ſoudaineté & legereté de changement, tantost elle diſſipe, & tantost elle rasſemble, elle vient & puis s'en va, de maniere que ce qui commence à naiſtre, ne paruiet iamais iuſques à perfection d'eſtre, pourautant que ce naiſtre n'acheue iamais, ne iamais n'arreſte comme eſtant à bout, ains depuis la ſemence va touſjours ſe changeant & muant d'un en autre, comme de ſemence humaine ſe fait premierement dedans le ventre de la mere vn fruit ſans forme, puis vn enfant formé, puis eſtant hors du ventre, vn enfant de māmelle, après il deuient garſon, puis conſe-

Que signifioit ce mot E'i.

quemment vn iouuenceau, apres vn homme fait, puis homme d'aage, à la fin decre- E
pité vieillard: de maniere que l'aage & generation subsequeute va tousiours des-
faisant & gastant la precedente: & puis nous autres forttement craignons vne sorte
de mort, là où nous en auons des-jà passé, & en passons tant d'autres: car non seule-
ment, comme disoit Heraclitus, la mort du feu est generation de l'air, & la mort
de l'air, generation de l'eau: mais encore plus manifestement le pouuons-nous
voir en nous mesmes, la fleur d'aage se meurt & passe quand la vieillesse suruient,
& la ieunesse se termine en fleur d'aage d'homme fait, l'enfance en la ieunesse, &
le premier aage meurt en l'enfance, & le iour d'hier meurt en celuy d'aujourd'huy,
& le iourd'huy mourra en celuy de demain, & n'y a rien qui demeure ne qui soit
tousiours vn, ains renaissions plusieurs alentour d'un fantasme ou d'une ombre &
moule commun à toutes figures, la matiere se laissant aller, tourner & virer alen-
tour. Car qu'il ne soit ainsi, Si nous demourons tousiours mesmes, & vns, comment
est-ce que nous nous resiouïssons maintenant d'une chose, & puis apres d'une au- F
tre? comment est-ce que nous aimons choses contraires, ou les haïssons, nous les
louïons ou nous les blasmons? comment vsons nous d'autres & differents langages?
comment auons nous differentes affections, ne retenans plus la mesme forme &
figure de visage ny le mesme sentiment en la mesme pensee? Car il n'est pas vray-sem-
blable que sans mutation nous prenions autres passions, & ce qui seuffre mutation
ne demeure pas vn mesme, & s'il n'est pas vn mesme, il n'est doncques pas aussi, ains
quand & l'estre tout vn, change aussi l'estre simplement, deuenant tousiours autre d'un
autre: & par consequent se trompent & mentent les sens de nature, prenans ce qui ap-
paroist pour ce qui est, à faute de bien sçauoir que c'est qui est. Mais qu'est-ce donc
qui est veritablement? ce qui est eternal, c'est à dire, qui n'a iamais eu commencement
de naissance, ny n'aura iamais fin de corruption, à qui le temps n'apporte iamais au-
cune mutation: car c'est chose mobile que le temps, & qui apparoit comme en um-
bre, avec la matiere coulante & fluante tousiours, sans iamais demourer stable ny G
permanente, comme le vaisseau percé, auquel sont contenues generation & corru-
ption, à qui appartiennent ces mots, deuant & apres, & a esté ou sera, lesquels tout de
prime face monstrent euidentement, que ce n'est point chose qui soit: car ce seroit
grande sottise, & faulseté toute apparente, de dire, que cela soit qui n'est pas en-
core en estre, ou qui des-jà a cessé d'estre: & quant à ces mots de present, instant,
maintenant, par lesquels il semble que principalement nous soustenions & fon-
dions l'intelligence du temps, la raison le descourant incontinent, le destruiet tout
sur le champ, car il se fend & s'escache tout aussi tost en futur & en passé, comme le
voulant voir necessairement mesparty en deux. Autant en aduiet-il à la nature,
qui est mesurée, comme au temps qui la mesure: car il n'y a non plus en elle rien qui
demeure, ne qui soit subsistant, ains y sont toutes choses ou naissantes, ou mouran-
tes, meslees avec le temps: au moyen dequoy ce seroit peché de dire de ce qui est, H
il fut ou il sera, car ces termes-là sont declinaisons, passages & vicissitudes de ce
qui ne peut durer ny demourer en estre. Parquoy il faut conclure, que Dieu seul
est, & est non point selon aucune mesure de temps, ains selon vne eternité immua-
ble, & immobile, non mesurée par temps, ny subiecte à aucune declinaison, de-
uant lequel rien n'est, ny ne sera apres, ny plus nouveau ou plus recent, ains vn
realement estant, qui par vn seul maintenant emplit le tousiours, & n'y a rien qui
veritablement soit que luy seul, sans qu'on puisse dire, il a esté, ou il sera, sans com-
mencement & sans fin. C'est doncques ainsi, qu'il faut qu'en l'adorant nous le fa-
luons, & reueremment l'appellions & le specifions, ou vrayement, ainsi comme
quelques vns des anciens l'ont appelé, Toy qui es vn: car Dieu n'est pas plusieurs,
comme chascun de nous, qui sommes vne confusion, & vn amas composé d'infinies
diuersitez

- A** diuerfitez & differences procedentes de toutes sortes d'alterations, ains faut que ce qui est soit vn, & que vn soit ce qui est: car diuerfite est la difference d'estre, fortant de ce qui est pour produire ce qui n'est pas. Et pourtant conuient tresbien à ce Dieu le premier de ses noms, & le second, & le troisieme, car Apollo est comme vne priuation de pluralité, & vne denegation de multitude: & Ieios, comme estant vn seul: & Phœbus, c'est à dire, pur & net: car ainsi appelloient les anciens ce qui est saint & monde sans macule, comme encore iusques au iourd'huy les Theffaliens à certains iours malencontreux, que leurs prestres se tiennent à part dehors des temples à l'escart, disent qu'ils Phœbonomisent, c'est à dire, qu'ils se purifient. Or vn est pur & net, car pollution vient quand vne chose est meslee avec vne autre, comme en vn passage Homere parlant d'un yuoire teint de rouge, dict qu'il estoit pollué de teinture: & les teinturiers disent que les couleurs meslees sont corrompues, & la melange ils l'appellent corruption: pourtant est-il necessaire, que ce qui doit estre sincere &
- B** incorruptible soit vn, & tout simple, sans mixtion quelconque: au moyen dequoy ceux qui estiment qu' Apollo & le Soleil soit vn mesme Dieu, sont bien dignes d'estre carez & estimez pour la gentillesse de leur esprit & bon iugement, attendu qu'ils mettent l'opinion & apprehension qu'ils ont de Dieu, en ce que plus ils honorent, que mieux ils sçauent, & que plus ils desirent. Or maintenant, tant que nous sommes en ceste vie, comme si nous songions le plus beau songe que lon pourroit songer de Dieu, excitons nous, & nous enhortons de passer plus oultre, & monter plus hault à contempler ce qui est par dessus nous, en adorant bien principalement son essence, mais honorant aussi son image, le Soleil, & la vertu qu'il luy a donnee de produire, representant aucunement par sa splendeur, quelques vmbres, apparences & simulachres de sa clemence, bonté & felicité, autant comme il est possible à vne nature sensible d'en representer vne intelligible, & à vne mouuante vne stable & permanente. Et au demourant, quant à ie ne sçay quelles faillies hors de soy &
- C** de son naturel, ie ne sçay quels changements, que lon dict qu'il iette le feu, qu'il se demembre soy-mesme, & puis qu'il s'abbaisse icy bas, & s'estend en la terre, la mer, les vents, les astres, & estranges accidents des animaux & des plantes, on ne les sçauoit seulement ouyr sans impieté, ou il faudroit dire qu'il feroit plus impertinent que le petit enfant que les Poëtes feignent sur le bord de la mer se iouer à amasser du sable, & puis apres à le respandre luy-mesme, s'il iouoit sans cesse à ce mesme ieu, de defaire le monde quand il feroit fait, & de le refaire quand il feroit defait: car au contraire, tout ce qui en quelque sorte que ce soit vient à naistre en ce monde, c'est Dieu qui l'y entretient, & qui assure son essence, d'autant que l'infirmité & imbecillité de la nature corporelle tend tousiours à corruption & definement. Et me semble que principalement contre ce propos-là a esté directement opposé ce mot E'i, c'est à dire, Tu es, comme pour tesmoigner de Dieu, que iamais il n'y a en luy changement ny
- D** mutation quelconque, & que faire & souffrir, cela appartient plustost à quelque autre Dieu, ou plustost à quelque Demon ordonné pour auoir la superintendance de la nature subiecte à naistre & à mourir, comme il appert incontinent à la signifiacé de leurs noms qui sont contraires, & s'entrecontredisent, parce que l'un s'appelle Apollo, & l'autre Pluto, comme qui diroit, non plusieurs & plusieurs: l'un Delius, c'est à dire clair: & l'autre Aidoneus, c'est à dire, ne voyant goutte: l'un Phœbus, c'est à dire, reluyfant: & l'autre Scotius, c'est à dire, tenebreux. Aupres de l'un sont les Muses & la Memoire, & aupres de l'autre l'Oubliance & le Silence: l'un se surnomme Theorius & Phaneus, c'est à dire, regardant & monstrant: l'autre

De nuict qui n'a honte de deshonneur,
Et du Sommeil fait-neant le seigneur:
L'un est hay des hommes & des Dieux:

Que signifioit ce mot E'i.

& de l'autre Pindarus a dict non mal-plaisamment,

Condamné de point ne pouuoir

Iamais aucuns enfans auoir.

Et pourtant Euripides dict bien à propos,

Pleurs & regrets aux trespassez conuiennent,

Mais point à gré, Apollo, ne te viennent.

& deuant luy encore Stefichorus,

Apollo veut & iouer & chanter,

Pluto gemir, plorer & lamenter,

Et Sophocles leur attribue à chascun les instrumés qui leur sont propres en ces vers,

L'espinette n'est point fortale,

Ny la lyre, à chant lamentable.

Car l'aubois bien tard, & deuant hier, par maniere de dire, a commencé à ofer faire entendre sa voix & son son és choses agreables & desirables: mais au premier temps il sonnoit au dueil & conuoy des trespassez, & estoit employé à ce seruice là, qui n'estoit ny gueres honorable ny gueres plaisant, depuis on l'a melle par tout: mais principalement ceux qui ont confondu & melle les honneurs des Dieux parmy ceux des Dæmons, ont mis l'aubois en reputation. Au demourant il semble que ce mot E'i, est aucunement contraire à ce precepte, Cognoy toy-mesme: & en quelque chose aussi accordant & conuenable: car l'vne est parole d'admiration & d'adoration enuers Dieu, comme estant eternal, & tousiours en estre: & l'autre est vn aduertissement & vn recors à l'homme mortel, de l'imbecillité & debileré de sa nature.

FIN DES OEUVRES MORALES
DE PLUTARQUE.

